

Yusuja Quisarati

Cavineña New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

MATEO	4
MARCOS	53
LUCAS	84
JUAN	135
HECHOS	173
ROMANOS.....	222
1 CORINTIOS	245
2 CORINTIOS	267
GALATAS	281
EFESIOS	291
FILIPENSES.....	299
COLOSENSES	305
1 TESALONICENSES	311
2 TESALONICENSES	316
1 TIMOTEO.....	319
2 TIMOTEO.....	326
TITO	331
FILEMON	334
HEBREOS.....	336
SANTIAGO	352
1 PEDRO	358
2 PEDRO	364
1 JUAN	368
2 JUAN	373
3 JUAN	374
JUDAS.....	375
APOCALIPSIS	378

MATEO

Riyaque quirica ri Mateora huenecuareque. Jesúsja empequetu jucuaré. Jesúsja mepema jarijutu Roma juque enaruqija ishü chipiru baca puji jucuaré.

Riyaque quirica ri israelita cuanaja ishü huenetanacuareque. Mateora tuna bahue amerecara acuare Jesús MESIAS, YUSUJA EMEPEQUE. Berutu Yusu equeque quisarati cuejaqui cuanara icueneta cueja acuare eje tupu Mesías junabuqueque. Tura tuna bahue amerecara acuare Jesús jadya ayaque tuna jadya huenecuareque. Ejitaju tujatu acuare Jesús israelita cuanaja ECUARI DYAQUE ARIDAQUE. Tura tuna ejitaju acuare dutyara jujeri israelita cuanara Jesús bijidamaduracuareque. Mateoratu cuejacuare Jesús curusuju majucuaréque, majutsu, chacha netitsuranucatsu, barepaju Yusuja yacuaju tsuracuareque.

Riyaque quiricajuri ehüene aniya:

Jesús cuinanacuareque (capítulo 1, 2)

Jesús utsatanacuareque (cap. 3)

Satanásra Jesús cajuchatishacara acuareque (cap. 4)

Jesúsra ecuita cuana emataju bahuityacuareque (cap. 5-7)

Yahua terehüe eje bucha judadibuqueque (cap. 24-25)

Jesús majucuaréque (cap. 26-27)

Jesús emajuque chacha netitsuranucacuareque (cap. 28)

Jesucristoja baba cuana

(Lc 3.23-38)

- 1 Jesucristo jucuaréque micuana cuejaya.
David eque ejuracanaque tu jucuaré. David bacue Abraham equeque. Riya cuanaque ri Jesucristoja baba cuana jucuaré cuanaque.
- ² Abraham tu Isaacja etataque jucuaré.
Isaac bacue Jacobja etataque.
Jacob tu Judája, tuatsehuequi cuanaja jadya etataque jucuaré.
- ³ Judá tu Fares, Zara jadyaja etataque jucuaré. (Tatseja ecuaquedya tu Tamar jucuaré).
Fares tu Esromja etataque jucuaré.
Esrom bacue Aramja etataque.
- ⁴ Aram tu Aminadabja etataque jucuaré.
Aminadab bacue Naasónja etataque.
Naasón tu Salmónja etataque jucuaré.
- ⁵ Salmón bacue Boozja etataque. (Boozja ecuaquetu Rahab jucuaré).
Booz tu Obedja etataque jucuaré. (Obedja ecuaque tu Rut jucuaré).
Obed tu Isája etataque jucuaré.
- ⁶ Isái tu ecuari Davidja etataque jucuaré.
David tu Salomónja etataque jucuaré. (Salomónja ecuaque tu Betsabé jucuaré, Urías yanumeja ehüaneque jucuaréque).
- ⁷ Salomón tu Roboamja etataque jucuaré.
Roboam bacue Abiasja etataque.
Abiás tu Asaja etataque jucuaré.
- ⁸ Asa bacue Josafatja etataque.
Josafat tu Joramja etataque jucuaré.
Joram bacue Uziasja etataque.

⁹ Uzías tu Jotamja etataque jucuaré.

Jotam bacue Acazja etataque.

Acaz tu Ezequiasja etataque jucuaré.

¹⁰ Ezequías bacue Manasésja etataque jucuaré.

Manasés bacue Amónja etataque.

Amón tu Josiasja etataque jucuaré.

¹¹ Josías bacue Jeconiasja, tuatsehuequi cuanaja etataque jucuaré.

(Babiloniaju tuna erisi dujutanacuare, jetiama umae tunaja ata cuana tsehue).

¹² Jeconías tu Salatielja etataque jucuaré.

Salatiel bacue Zorobabelja etataque.

¹³ Zorobabel tu Abiudja etataque jucuaré.

Abiud bacue Eliaquimja etataque jucuaré.

Eliaquim tu Azorja etataque jucuaré.

¹⁴ Azor bacue Sadocja etataque.

Sadoc tu Aquimja etataque jucuaré.

Aquim bacue Eliudja etataque.

¹⁵ Eliud tu Eleazarja etataque jucuaré.

Eleazar bacue Matánja etataque jucuaré.

Matán tu Jacobja etataque jucuaré.

¹⁶ Jacob bacue Joséja etataque.

José tu María tsehue caquemiticuare.

Riyaque epunadya tu Jesúsja ecuaque jucuaré.

Riyaque Jesúsdyá tuque ecuaana "Mesías" bacani jadya aya, "Yusuja Emepeque" jadique.

¹⁷ Riya cuanaqueri Mesíasja ebaba cuanaque jucuaré. Abraham equeque David tu anicuare peadya tunca pushi earacana ebaba cuanaque. David equeque ecuanaja baba cuana Babiloniaju dujutanacuare patya tujatu anicuare peadya tunca pushi earacana nucadya. Tuna dujutanacuare patya equeque tuque

cuinanacuare eque tuna anicuare peadya tunca pushi earacana nucadya.

Jesús cuinanacuareque

(Lc 2.1-7)

¹⁸ Cuatsabiji micuana aya Jesucristo eje bucha cuinanae cuita jucuaque. Tuja ecuaque Mariatu José tsehue caquemiti ishuque jucuaque. Tatse caquemitima jariju, Joséja jipema jariju cuitadyatu carecani isaqui jucuaque Yusuja Espirituja casa eque. ¹⁹ Josétu Yusuja cacuatsashati eque anicara juhua. Jadya tibudya tujatu carecani isaqui baatsu, jacacara acuare. Jadya ama bucha tuja tuatsehue canerecabati aniya tibu, tujatu etehua tyau acara acuare quirica tatse cajacati ishuque, dutyaja yacuaju bahue ameretsu tuque ebisuturau tibu. ²⁰ Tumeque inime tupuqui ayaque tahuitsutu barepa juque Yusu tsahuaquira isaracuare tahuiju:

—José, miquemi David eque ejuracanaque. Arepa María carecani isaqui ama bucha, jabama tu ni ejeque ecuitaja buchique. Tuja ebacua ecarecaniju badeyaque tu Yusuja Espiritu equeque. Bisuume tuque micue etareju duju ishu. ²¹ Deca nana piji tujatu cuinanaya. JESUS tuja ebacani paju. (Riyaque ebacani tu “INAJA-CAMEREQUIQUE” jadicue). Jadya bacanietu juya, tuque tuja cuanaque inajacamerequi jubuque tibu, tunaja jucha cuana apupashaqui jubuque tibu, —jadyatu barepa juque Yusu tsahuaquira José acuare tahuiju.

²² Berutu quisarati cuejaqui eque Yusura cuejacuare eje bucha judadiyaque: “Epuna deca jipemaquetu carecani isaqui jubuque. Cuinanabuque tujatu ebacua. EMANUEL bacanitu jubuque” (“YUSU ECUANA TSEHUE” jadicue), jadyatu Yusura quisarati acuare beru.

Jesucristo cuinanahuajutu tura quisarati iyahua eque jucuaque.

²⁴ Tahuiyaque cabatietitsutu José barepa juque Yusu tsahuaquira cuejaha equedya jucuaque. Caquemiticuaredya ecatsé María tsehue. ²⁵ Tumetu arepa caquemitihua ama bucha Joséra jabahuishacuare ama tuja ebacua cuinanaya tupu. Ebacua nana cuinanahuajutu Joséra JESUS bacanidya acuare.

Purari cuana eje bucha riyaque yahuaju judadiyaque bahue ishu cabahuityatiya cuanaque Jesús queja juticuareque

2 Herodes ecuanaja yahua naruqui jucuaque patyatu Jesús cuinanacuare Belén bacani epu eje ariju ama. Riyaque eputu Judea yahuaju jucuaque.

Tuequedyatu junacuare Jerusalénju ecuita cuana dyaque bahue cuanaque ijete cuinanaya queja amaca aniya cuanaque. Tuna tuna purari cuana riyaque yahuaju eje bucha judadiyaque bahue juishu cabahuityatiyaque jucuaque. ² Tuhua junatitsu tunajatu bacaduranaticuare:

—¿Are, eje queja ri israelita cuanaja ecuari judadiyaque cuinanachineque? Ijete cuinanaya queja

amaca tuque ecuana bachine purari, amena cuinana-chine jadicue adeba ishuque. Rehua ecuana jehua tuque pureama ara, —jadya tunajatu anaticuare.

³ Herodes enaruquique tunara eje buchique bacadurayaque bahue juatsu tujatu bape inime tupucuare, tuque cuaredadiqui juyaque bucha baatsu. Tumebaedya Jerusalénju cuanara enaruquique iyacuaquepa cuinanachine jadya bacatsu, eje bucha adebataqui ama bape bape jutidya tunajatu inime tupucuare.

⁴ Herodesratu ihuaramerecuare pae cuanaja huaraji cuana, cacuatsashati bahuityaqui cuanaque jadya. Tuna junatihuaaju tuna Herodesra bacaduracuare:

—¿Eju Yusuja Emepeque cuinanadadiya? jadyatu Yusu equeque quisarati cuejaqui cuanara cuejacuare, —jadya tujatu ecana bacaduracuare.

⁵ Tunaratu quemitsacuare:

—Belénju patu cuinanabuque. Belénju Judea yahuaaju patu cuinanabuque. Miqueas Yusu equeque quisarati cuejaquiratu beru hueneacuare:

⁶ “Belén tu epu eje arique ama yahua ecuanaja ebaba Judá tyatanacuareque.

Aniyatu peya epu dyaque arida cuanaque.

Jadya ama buchatu tumeque epu piji dyaque emuique judadiya, tuhua enaruquique dyaque inime metseque cuinanabuque tibu.

Israel eque ejuracana cuanaque ecue cuanaque tujatu ecana narudadibuque”, jadyatu ehue Yusuja quisarati, —jadyatu jucuaque israelita cuanaja huaraji cuana.

⁷ Jadicue bahue juatsutu Herodesra dyaque bahue cuanaque tuna cuita camadya ihuaramerecuare. Junatihuaaju tujatu ecana bacaduratsacuare:

—¿Ejeque huecatatu purari ejitaju jumetse juchine micuanara ique bacadurahuaque?

⁸ Tunara cuejahuaju tujatu ecana cuadishacuare.

—Necuacue Belénju. Ita nebaticue. Pana bau neaticue tumeque ebacua nana. Dadititsu reequedya nejuet-inucacue. Necuejaeticue ique. Era dyadi pureamadya paati, —jadyatu Herodes jucuaque, ai muicara aatsu ama.

⁹ Herodesra jadya ahuaajutu ecuita cuana cuanucacuare. Purari, ijete cuinanaya queja amaca ejitaju juhuaquetu tunaja yacua queja ajequenanicuare tuna eju cuita juti ishu bahue juishu. Ebacua nana aniya dyaque junatitsutu purari netinaticuare. ¹⁰ Purari tuhua netihua baatsutu ecuita cuana dyaque pureama jucuaque. ¹¹ Etareju tuna nubicuare. Etareju nubinatitsu tunajatu ebacua nana banaticuare ecuaque María tsehue. Ebacua nanaja yacuaju tuna chichucata junaticuare tuque muiyaque. Jadya juatsu tunajatu caju caca cuana pacashacuare. Pacashatsu tunajatu ebacua nana tyacuare tuja ishu bechine cuanaque. Tyacuare tunajatu oro, tumebaedya beta acuimadi bapebapeque ijimedaque tsuje aridaque, “incienso”, “mirra” jadya bacani. ¹² Ebacua nana amena muihuaju tuna Yusura tahuiju cuejacuare dirunucayaque Herodes aniya eque ama dirunuca ishu. Jadya tibudya tuna

Jerusalén eque ama cuetidirunucacuare tunaja yahua-ju dirunucayaque.

José tuja familia tsehue Egiptoju huanacuareque

¹³ Purari cuana eje buchique bahue cuanaque dirunucahuajutu barepa juque Yusu tsahuaquira tahuiju José cabamereti ishu acuare Yusuja quisarati cueja ishu.

—Isaranaya mique era. Netitsuracue. Cabajejeticue. Huanaquerecue ebacua nana Egiptoju tuja ecuaque tsehue. Tuhuadya anidirucue jari, era mique micue yahuaaju dirunuca ishu cuejaya tupu. Herodesratu sareya ebacua nana iye ishu, —jadyatu José barepa juque quisarati cuejaquira cuejacuare.

¹⁴ Jadya cuejahuaajutu José netitsuracuare. Tumeque meta cuitadyatu José, ebacua nana, ecuaque jadya tsehue huanacuare Egiptoju. ¹⁵ Tuhua tuna anidirucuaré Herodes majuya tupu. “Egipto juque tuque ecue Ebacua ihuarahua”, jadya patu jucuaré Yusu tuja quisarati cuejaqui eque. Tumetu ebacua nana Egipto juque juetinucahuaju, Yusura quisarati acuare bae cuitadya jucuaré.

Herodesra ebacua piji cuana iyemerecuareque

¹⁶ Dyaque bahue cuanaque Jerusalén eque ama judirunucahuajutu Herodes dyaque ecahuaiti cuita jucuaré, tunara jahue ahua bucha cabatitsu. Cuadishacuaretu tuja sudaru cuana Belénju.

—Neiyetillaticue dutya ebacua deca nana cuana tsuneedy cuinana cuana eque, beta mara tupu cuanaque. Neiyecue Belénju aniya cuanaque camadya ama, tumbaedy epu japadama aniya cuanaque, —jadya tuna Herodesra acuare.

Jadya tujatu ecana amerecuare, dyaque bahue cuanara beta maratu butseeju tumeque purari amena ejitaju jucuaré, jadya acuare tibu. ¹⁷ Jeremías Yusu equeque quisarati cuejaquira patu icuenetadya cuejacuare tumbaecue cuitadya judadibuqueque:

¹⁸ “Ramáju taa peya inime, paa tsuri jadya bacataqui jubuque.

Raquel tu tuja ebacua cuanaque jiteque pabuque.

Ni aija isaratsu casaturataquimatu paya tuja ebacua cuanaque jiteque, dutya iyetillatahua tibu”, jadyatu Jeremíasra beru yuequedy huenecuare.

Jesús Egipto juque dirunucacuareque

¹⁹ Herodes majuhuaajutu Yusura cuadishacuare barepa juque etsahuaquique Egiptoju. Tahuijutu José queja cabameretinucauare. Isaracuare tuja tuque:

²⁰ —Netitsuracue. Yudijidya dirunucacue micue yahuaaju nucadya ebacua piji, ecuaque tsehue Israelju. Herodes, peya cuana, ebacua nana iyecara jucuaré cuanaque tuna amena majuchine, —jadyatu quisarati bepujira acuare José.

²¹ Jadya ahuaajutu José netitsuracuare. Dirunucacuare Israelju ebacua piji tsehue, ecuaque jadya.

²² Dirunucatsu tujatu bacacuare quisarati. Arepa

Herodes majucuaré ama bucha, tuja ebacuaque Arquelao etataque cuarequi enaruquique. Jadya bacatsu José bajida jucuaré Judeaju dirunuca ishu, Arquelao-ra dyadi ebacua piji iyecara anucaya bucha baatsu. Tahuijutu Yusura cuejacuare tuna eju diru ishu. Jadya tibudyatu dirucuaré ebacua piji, ecuaque jadya tsehue Belénju ama. Galilea yahuaaju tuna dirucuaré. ²³ Tuhua judirutsu tuna anidirucuaré epu Nazaret bacaniju. Icuene Yusu equeque quisarati cuejaqui cuanara patu cuejacuare: “Yusuja Emepequetu nazareno bacani jubuque” jadya. Jadya eque tuna Nazaretju anidiruhua-ju, tunara icueneta cueja acuare bae cuitadya jucuaré.

Juan Ecuíta Cuana Utsaquira Yusuja quisarati cuejati-bunecuareque

(Mr 1.1-8; Lc 3.1-9, 15-17; Jn 1.19-28)

³ Tsunuda juatsutu Yusuja quisarati cueja puji ejitaju jucuaré Judea yahuaaju epu japadama anitaya cuanaju. Tumeque ecuitatu Juan Ecuíta Cuana Utsaquique bacani jucuaré, ecuita cuana utsayaque junenicuaré tibu. ² Tura tuna cuejacuejanicuare:

—Necacuareticue inime, Yusuja micuanaja jucha cuana apupasha ishu. Tsunutaya amatu Yusuja Emepeque ejitaju juishu. Ejetsunue amadyatu tumeque enaruqui jutibune ishucue, —jadya tuna Juanra cuejacuejanicuare.

³ Beru yuequedy Yusu equeque quisarati cuejaquique Isaiasratu huenecuare:

“Quisarati cuejatu jubuque ejeque cuana tsecada eje uma piji anitaya cuana queja.

“Nequihuaticue, Ecuana Cuatsashaquique junayaju ishu.

Jidamaque neajacacue.

Jida tuyu nejuque, ediji benubenuque etuyune ejuu bucha”.

Juan tu Isaiasra jadya acuare, tsecada anitaya cuanaju quisarati cueja judadiya jadya.

⁴ Juanratu jutucuaré camello tsaru etarique etataque ejutuqui eaque, baya ecuita cuanadya jutidya cajututiya bucha. Ebiti patsa quinida ejicui tsehuedya jutidyatu ecaquereti jucuaré. Tsei ebari, huaja jadya tujatu araanicuare. ⁵ Jetiama epu cuanajuratu quisaratiyaju ijacabacati bahue jucuaré. Jerusalénju cuanaque tuna tuhua cuacuare. Judea yahuaaju peya epu cuana juque, Jordán cueri japadama anicuare cuanaque, jadya tuna cuabahue jucuaré Juan quisarati cueja juyaju. ⁶ Tura quisarati cuejayaju bacatsu,

—Yuneridya ecuana jucha arida, —jadya tuna cacuejaticuaré.

Jadya tuna cacuejatihuaju tuna Juanra utsacuare Jordán cueriju.

⁷ Juanratu jetiama fariseo cuana, saduceo cuana jadya batsacuare tuaqueja cutsameretira cuayaju. Batsatsu tujatu ecana atsacuare:

—Cutsameretimaquedy necabamereticue inime cacuaretihuaque, cajuchaticarama juyaque jadya. Bacua cuana yachi tiruyaju eje buchadya huanacara ejuu bucha micuana juya. Cutsameretitsu Yusura

enerecaturauque ehuanau bucha tuque micuanaja inime juya. Jadya ama tuque. ⁹“Abraham eque ejuracanaque tibu, ecuana Yusura nerecaturabuque ama”, jadya micuanaja inime paju ama. Dyaque inime metseque juishuque ama tu Abraham eque ejuracanaque. Cuejaya micuana era. Yusujatu aniya casa riyaque tumu cuana Abraham eque ejuracanaque amere ishu. ¹⁰Micuana micuana acui cacacati baecuaque bucha. Acui cacacati baecuaque tu jacha tsehue cuere, pahua jadya aishuque. Jadya micuana Yusura abuque, micuana inime cacuaretiyaque ama juatsu. Acui cuere bahuera eau bucha tura micuana abuque. ¹¹Era tuna utsaya ena tsehue, jucha cuana aniyaque caadebatitsu inime cacuaretihua cuanaque. Tsunutaya amatu peya junayaque. Tujatu dyaque casa aniya, ecue bucha ama. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique. Tume junayara micuana Yusuja Espiritu tyanaya, tujaque jadique adebataqui juishu. Tuaqueja catyaticarama juya cuanaque tujatu nerecaturabuque ijahuaja etiquiju. ¹²Ecuita trigo iruru, tsaje jadya aishuque buchique tu Junayaque. Turatu tuja cuanaque nityasicuanabuque tunaja ishu cuita emajacaju, ecuita trigo etareju equiyatiu bucha. Tuja ama cuanaque bacuetu ijehuebuque nerecatura ishu etiqui tucu baecuaaju, trigo tsaque epahuata bucha, —jadya tuna Juanra acuare.

Jesús cutsamereticuareque

(Mr 1.9-11; Lc 3.21-22)

¹³Tumetu Jesús jecuare Galilea juque, Jordán cueri japadama Juan quisarati cueja juyaju, Juan queja cutsameretira. ¹⁴Tuque jutihuajutu Juanra utsacarama acuare, Jesús tuque buchique ama baya tibu.

—Micue di taa ique utsataqui. Mique equeque di taa tu Yusuja Espiritu eaqueja jutaqui. ¿Eje bucha juatsu jatsumi jeya eaqueja enaju cutsameretira? —jadyatu Juanra Jesús atsacuare.

¹⁵Jesusratu quemitsacuare:

—Iyacua jadidya jutidya paju. Yusura amereyaque tuque yatseja ataqi, —jadya tujatu acuare.

Jadya tura ahuaaju, en aatsutu Juanra utsacuare. ¹⁶Utsahuajutu Jesús ena juque cuinanacuare. Ena juque cuinanayajutu barepa pacashatanacuare. Bacuaretu Yusuja Espiritu huei jiuque tuque dyaque buteyaju.

¹⁷Tume tujatu barepa juque etsuri bacacuare. Yume tucuetu jucuare tuja Etataque Yusu.

—Riyaque rique ecue Ebacua dyaque iyuhuedaque. Ique dyaque pureama juya tuatsehue, —jadyatu Yusu jucuare.

Satanásra Jesús cajuchatishacara acuareque

(Mr 1.12-13; Lc 4.1-13)

4 Tuequedyatu Yusuja Espiritura Jesús dujucuare japada peya queja amaca anitaya amaju, Satanásra nime adeba ishu. ²Pushi tunca huecaca, pushi tunca meta jadyatu arama jucuare. Jadya juatsutu amena

aracara jucuare. ³Satanasratu Jesús jipecuare, cajuchatishacara aatsu.

—Yusuja Ebacuaquepa mique, jadyami juya. Jutaquiju riyaque tumu pan cacueyatishacue, —jadyatu Satanásra acuare.

⁴Jesusratu quemitsacuare:

—Aama! Aya ama tuque era! Ehuene tu Yusuja quisarati: “Earaqui tsehue jipidya amatu Yusura ecuita cuana anishaya. Tumebaedyatu Yusuja dutya cacuat-sashati eque anitaqui”, —jadyatu Jesúsra acuare.

⁵Jadya juatsutu Satanásra Jesús, Jerusalén bacani epu aridaju dujucuare. Dujutsu tujatu tsuraquerecuare Yusuja etare camahua barudaju.

⁶—Putitanacue reequ. Yuneridya ni mi Yusuja Ebacuaque, tumemi ujeda ecatiu ama, Yusuja quisarati jadya ehue tibu:

“Yusuratu cuadishaya barepa juque tuque tsahuaqui cuanaque mique naru ishu, mique pacacayaju inatsa ishu, mique ni riyá piji buchique ujeda cati ishu ama, tumura ehuaquiju ujeda eauju” jadya.

⁷Jesusratu acuare:

—Aama! Aya ama tuque era! Tumebaedya tu Yusuja quisarati ehue: “Nime adebaume Yusu” jadya, —jadyatu Jesúsra Satanásra acuare.

⁸Tumetu Satanásra Jesús dujunucacuare emata dyaque barudaque matina. Tuequeradya tujatu bamerecuare dutya epu cuana riyaque yahua juque. Tumeque epu cuanaju dutya ai jida pijique aniya cuanaque tujatu bamerecuare.

⁹—Mira ique chichucata juatsu muiyaju, tume mique etyau dutya riyá cuanaque, —jadyatu Satanásra Jesús acuare.

¹⁰—Aijama, Ijahua! Micue yacuaju ique chichucata junime ama! Ehuene tu Yusuja quisarati: “Mique Cuat-sashaquique Yusu camadya muicue. Tura cuatsashaya eque peadya camadya jucue” jadya. Dirucue rehuaque, Satanás, —jadya tujatu acuare.

¹¹Tura jadya ahuaquiju Satanásra jacacuare. Tumetu Yusu tsahuaqui cuanaque butecuare barepa juque Jesús tsahua, casatura jadya aishu.

Jesús Galileaju Yusuja quisarati cueja catibuticuareque

(Mr 1.14-15; Lc 4.14-15)

¹²Juan Ecuita Cuana Utsaquique patu etare apudaju eishatana jucuare. Jadya bahue juatsutu Jesús Galileaju cuacuare. ¹³Anidirucualetu Capernaumju, Nazaretju ama. Capernaum tu bei jiruru jucuare, ecuanaja ebaba ecatsé Zabulón, Naftalí jadyaja yahua jucuareju.

¹⁴Jadyatu jucuare, Isaías Yusu equeque quisarati cuejaquira icuenetadya quisarati acuare eque juya tibu:

¹⁵“Pureamatu jubuque Zabulón, Naftalí ecatséja yahua jucuareju aniya cuanaque.

Galileaju tuna aniya, Jordán cueriju ijeti nubiyá queja amaca.

Israelita ama cuanaque aniya japadama tuna aniya. Icuene tunajatu adebahua ama Yusuja quisarati.

Eje buchadya jucara, huenanaya jadya tuna juhua, maju tsehue bajida juatsu.

Tunaratu adebabuque Yusu.

Enime casatura tuna jubuque”.

¹⁷ Tuequedyatu Jesús Yusuja quisarati cueja catibuticuaere.

—Necacuareticue inime. Yusu queja necatyaticue. Yusujuatu adebamerehuie tuja Emepeque. Ejetsunue ama tu tuque enaruqui jutibune ishuque, —jadya tuna Jesúsra cuejacuejanicuare.

Jesúsra pushi jae puji cuana tuatsehue juneni ishu ihuaradirucuareque

(Mr 1.16-20; Lc 5.1-11)

¹⁸ Jesúsra Galilea bei jiruru eque dirucuare. Diruyara tujatu badirucuare beta jae puji ecatse. Peadyatu jucua Simón. (Peya ebacani tujatu jucua Pedro.) Peyatu jucua Andrés, Simón tsehuequique. Jae deru ishuque enaju mare tatse jucua. ¹⁹ Jesúsra tatse isaradirucuare:

—Nejecue. Eatsehue nejunenicue. Metse metse jae puji ecatse. Iyacia metse era ecuita cuana Yusu adeba mere ishuque amereya, —jadya tatse Jesúsra adirucuare.

²⁰ Tumeque ura cuitadya tatse jae deru ishuque shanaquenatsu junenitibunecuare Jesús tsehue.

²¹ Cuabacanucatsu tujatu banucacuare beta ecuita ecatse. Jucua retu Santiago, Santiago tsehuequique Juan jadya, Zebedeoja ebacuaque ecatse. Cuaba aridaju tatse juanicuare etataque tsehue, jae deru ishu cuanaque sipiani juyaque. Jesúsra tatse ihuaracuare tuatsehue juneni ishu. ²² Tura ihuarayaju bacatsu tatsejatu shanaquenacuare tatsera ai ayaque. Cuinanacuare tatse cuaba arida juque, etataque isaraquenatsu. Jadya juatsu tatse Jesús tsehue junenitibunecuare.

Jesúsra jetiama ecuita cuana bahuityacuareque

(Lc 6.17-19)

²³ Jesúsra junenicuare Galileaju dutya epu cuanaju. Nubi bahueta jucua caradati ishuque etare cuanaju, tuna bahuitya ishu. Nubitsu tujatu ecana cueja bahue jucua quisarati jidaque.

—Tata ecana, Yusura micuana tujaque amerecara aya; tura micuana narucara aya, —jadya tujatu ecana abahue jucua.

Chachanecua retu ujejeda cuanaque, ejeque ujejedyu jutidya. ²⁴ Jesúsra eje bucha juyaque tuna bahue juterecuare dutya Siria yahuaju aniya cuanaque. Tuque epuju judiruhajutu ecuita cuanara dujubarecuare ujejeda cuanaque, tuja ecana chachane ishu. Dujubarecuare tunajatu ai ujera juya cuanaque, ijahua cuanara quijahuatishaya cuanaque, manu arida cuanaque, bucutaquima cuanaque jadya. Jadya chachaneetu Jesúsra acuare bape bape ujeje tsehue cuanaque.

²⁵ Jetie ecuitara amatu tupujudya anenicuare. Jecuare tuna Galilea juque, Peadya Tunca Epu Cuana juque, Jerusalén juque, Judea yahua cuana juque, Jordán cueri yueque macare aniya cuanaque jadya.

Jesús emataju tsuratsu Yusuja quisarati cueja jucuaque

⁵ Ecuita jetieque ama tuaqueja jutiya baatsutu Jesús tsuracuare emataju tura mepehua cuana tsehue. Tuque anibutehuajutu tura mepehua cuanaque caradaticuare tuque peque, tuja ecana bahuitya ishu.

Dyaque jida juya cuanaque

(Lc 6.20-23)

² Jadya bahuityae tujatu ecana atibunecuare.

³ —Dyaque jida taa tuna taca caadebati Yusu pureamaturayaque ama juya cuanaque, tuja tsahua ishu tunaja tuque saretaquique. Pusha ama cuitadya tuna Yusura naruya, baya jadya aya.

⁴ “Dyaque jida taa cajuchatitsu peya inime juya cuanaque. Arepa ecana peya inime, paya jadya juya ama bucha tuna Yusura nime casaturaya.

⁵ “Dyaque jida taa eje bucha cabatitsu abacata juya cuanaque. Tuna tuna Yusu jaque. Tura tuna tyaya dutya jidaque tura tyaana ahua cuanaque, Yusu dutya naruqui juatsu.

⁶ “Dyaque jida taa Yusura amereya eque jucara ebari juya cuanaque, ecua aracara, ijicara ejuu bucha Yusura cuatsashaya eque jucara ebari juya cuanaque. Yusura tuna tsahuaya tura amereya eque juishu.

⁷ “Dyaque jida taa peya cuana tsehue canerecabati aniya cuanaque. Yusujuatu tuna tsehue canerecabati aniya.

⁸ “Dyaque jida taa Yusu pureamatura cuita camadya inime tupu juya cuanaque, ai riyaque yahua juque ama. Tunaratu badirubuque tuaqueja judirutsu.

⁹ “Dyaque jida taa ecahuaiti cuanaque jida inime bajeje, tsahua jadya juya cuanaque. Yusura tuna ‘Ecue ebacua rena’ jadya aya.

¹⁰ “Dyaque jida taa Yusuja biji eque juyaju jidama ataya cuanaque. Arepa ecana iyacia nerecada ataya ama bucha, pusha ama cuitadya tuna Yusura naruya, baya jadya aya.

¹¹ “Dyaque jida taa micuana peya cuanara ijillahuanaya cuanaque, peya cuanara jidama aya cuanaque, yuneriju ama jadya micuana jadya ataya cuanaque. Arepa micuana jadya nerecada juya ama bucha, Yusura micuana narujacaya ama. ¹² Pureama nejujacaume. Necanimehuallatiume, barepaju Yusura dyaque jidaque tyatsabuqueque adebatsu. Micuana camadya ama micuana jadya canerecatie juya. Jadya nerecaturaedyu tunajatu acuare beru yuequedyu Yusu equeque quisarati cuejaqui cuanaque, Yusuja biji eque tuna aniya baatsu, —jadya tujatu ecana bahuityacuare.

Banu, hueca jadya buchique micuana

(Mr 9.50; Lc 14.34-35)

¹³ Jesúsra tuna bahuityanucacuare:

—Banu ecuanaja ara ishuque cayuamatimaque et-sumeu bucha, jadidya micuana Yusura tsumebuque ecue quisarati cueja ishu, dutya ecayuamatitereu tibu. Banuja ni, banu huaja etereu, aijamatu ni eje bucha banuqui amerenuca ishuque. Jidamatu ni aishu buchique. Ecuita cuanaja tapapasha ishutu ijehuetaku etsecueju. Tumebaedya micuana micuana ni era cuatsashaya eque jujacaya, tume micuana ni aishu ejuu, Yusuja yacua juque ijehue ishuque jutidya.

¹⁴ “Micuana equetu peya cuanara Yusu adebabeque. Udera apudaju eudau buchadyatu micuanara ecuita cuanaja inime huecashaya Yusu adeba ishu. Era micuana mepehua dutyara bayaju ique mere ishu, ai etehua ama, epu ebarucueque dutyara epetau bucha. ¹⁵ Udetu tuchatanaya caju ducu tehua ishu ama, apuda ducu hueca ishu, etareju dutya pana peta aishu. ¹⁶ Tumebaedya tuque micuanaja Yusu meretaqui, etehua mere ama. Micuana dutyara petayaju micuana era cuatsashaya eque jutaqui, peya cuanaja micuana jida juyaque baatsu, micuanaja Tata Yusu barepa juque pureama aishu, —jadya tuna Jesúsra bahuityacuare.

Yusura cuatsashaya eque jujacataquique ama

¹⁷ Jesúsra tuna bahuityanucacuare:

—Paju ama micuanaja inime: “Jesús amena junahua tibusu Moisésra cuatsashahuaque amena iyataqui, Yusu equeque quisarati cuejaqui cuanara cuejahuaque tumebaedya”, jadya micuanaja inime paju ama. Ique jehua tume cuanaque aputashara ama; eje buchique cuita pana adebamerera jehua. ¹⁸ Yuneri cuitadya micuana cuejaya. Barepa, yahua jadya aniya jari tuputu ni ejeque cacuatsashati cuaretanaya ama ni apupashatanaya. Cacuatashati cuana Yusura iyahua eque micuana anitaqui dutya tura eje bucha judadi ishuque inime iyahuaque judaditereya tupu. ¹⁹ Inime ni micuanaja juya: “Arepá Yusura amerehuaque ama bucha, aishuque cuita ama rique. Aniya ama riyaque cacuatsashati eque”, tume micuana dyaque jetiedyaque jubuque Yusu enaruqui juhuaju. Dyaque jidamadyatu judadibuque cuatsashaya eque ama ani ishuque bahuityaqui cuanaque. Jadya ama bucha Yusura cuatsashaya eque ni micuana aniya, peya cuana ni micuana cuatsashaya eque ani ishuque bahuityaya, tume micuana Yusu enaruqui juhuaju dyaque inime metseque jubuque. ²⁰ Fariseo cuanara, cacuatsashati bahuityaqui cuanara jadyatu jidaque ayadya, ecuita cuanaja sumi ishu cuita camadya. Yusu queja ni micuana judirucara juya, ataquí tuque micuanaja jidaque Yusu pureamatura ishu, ecuita cuana pureamatura ishuque camadya ama.

Jesúsra cahuititaquique ama bahuityacuareque

(Lc 12.57-59)

²¹ “Micuanajatu ebacadya ecuanaja baba cuana bahuityatanacuareque: ‘Nequiyetiume. Ejeque quiyetiyaquetu dujutaya huarajija yacuaju, nrecatura, iye jadya ata ishu’. ²² Era micuana cacuatsashati iyacuque bahuityaya. Yurameta ujeu peya cuana tse-

hue necabatiume. Ejeque cahuitiyaquetu Yusura quiyeti puji bucha nrecaturae eau. Ejeque cahuitiyaquetu huarajija yacuaju edujutanau nrecatura ishu. Ejeque quijillahuanatiyaquetu edujutanau huaraji cuana ecasitatiju, nrecaturamereta ishu. Ejera ni peya aya, ‘Inimema, miquemi dyaque jidama’, tudyá jutidyatu ijahuaja etiquiju ejudiruu.

²³ “Netsunutaume peya tsehue inime bajeje ishu. Peya micuanara cahuitishahuaque ura, jadya ama juatsu eje bucha ahuaque adebayaque ura inime neba-jeticue, arepa micuanara Yusuja etareju tuque pureama aya ama bucha, arepa micuanara behuaque Yusu tyahuie ama bucha. ²⁴ Tuhadya micuanara tyaishu dujuyaque neiyacue jari. Icuene necuacue jari micuanaja ai inime aniya queja. Jida neba-jeticue jari inime tuatsehue. Amena jida inime bajejetitsu, necuanucacue Yusuja etareju, micuanara tyacara ahuaque amena netyaticue.

²⁵ “Ejera ni micuana huaraji queja cuejaya, dujucara ni tunara micuana aya, huaraji queja junatimaradya icuene jida inime neba-jecue. Icuenedya ni micuana inime ebajejeu ama, tume tunara micuana edujuu huaraji dyaque aridaja eaniquiju. Dujuhaju micuana huarajira policía cuana queja edujumereu. Tume tunara micuana etare apudaju eishau. ²⁶ Tuhua tunara micuana enityamereu, huarajira tsujebacayaque tsujetyatillaya tupu, —jadya tujatu eana acuare.

Epuna caquemitiqueremaque jabataquimaque Jesúsra bahuityacuareque

²⁷ Jesúsra tuna bahuityanucacuare:

—Ebacadya tuque micuanaja beruque cacuatsashati: “Nejabaume epuna micuana tsehue caquemitimaque”.

²⁸ Era micuana cacuatsashati iyacuque bahuityaya. Micuanaja caquemitiqueremaque jaba ishuque inime tupuqui neaume. Ejera tuja caquemitiqueremaque jabacaraque inime tupuqui ayaquetu jabahua bucha nrecaturae cuitadya Yusura aya. Arepa jabama ama bucha, Yusratu ecajuchati baya, tumeque epuna jabacaraque inime tupuqui ahua tibu.

²⁹ “Nejacacue cajuchaticaraque. Petaya ni micuana micuanaja petataquique ama, nehuicacue micuanaja yatuca cajuchaticaraque. Huicatsu neijehuecue, jidamaque petatsu ebijiseriu tibu. Cajuchaticaraque jutyadya ni micuana, tume micuana ijahuaja etiquiju ijehuetanabuque. Dyaque jidatu Yusu queja atuca pidya camadya judirutaqui, ijahuaja etiquiju atuca beta enubiduruque. ³⁰ Emetucu tsehue ni micuana ai jabataquimaque jabacara aya, necatubuticue cajuchaticaraquedyá. Catubutitsu neijehuecue, emetucu tsehue ecajuchatiu tibu. Cajuchaticaraque jutyadya ni micuana, tume micuana ijahuaja etiquiju ijehuetanabuque. Dyaque jidatu metucu pidya camadya Yusu queja judirutaqui, metucu betaque ijahuaja etiquiju enubiduruque.

**Ecaquemitique cajacatitaquimaque Jesúsra bahuity-
acuareque**

(Mt 19.9; Mr 10.11-12; Lc 16.18)

³¹ “Ebacadya tuque micuanaja beruque cacuat-sashati: ‘Epuna ecaquemitiquerequetu ijehuetaquidya. Jacacara ni micuana aya, neinamerecue quirica eje bucha juatsu micuanara jacayaque cuejayque’. ³² Era micuana cacuatsashati iyacuaque bahuityaya. Nequijehuetiume micuanaja huane tsehue. Eje bucha baatsu cuita camadya micuanaja huane jacataquique, micuanaja huane peya tsehue jarayaju daditsu cuita camadya. Epuna ni micuanara jacahuaju peya tsehue caquemitiya, tumetu epunara, deca iyacuara jadya Yusu cahuaishaya, peyaja tsehue cajipetihua tibu, —jadya tujatu ecana bahuityacuare.

**Quejenemereticara juatsu “Yusu bahue” jadya ju-
taquique ama**

³³ Jesúsra tuna bahuityanucacuare:

—Ebacadya tuque micuanaja beruque cacuatsashati: “Quejenemereticara ni micuana juya quisarati ahuaque, ‘Yusu bahue’ jadya nejudue. Micuanara aana ahua equedya nejudue”. ³⁴ Era micuana cacuatsashati iyacuaque bahuityaya. “Yusu bahue” jadya quisarati neaume. Micuanara ni yunerique quisarati ajacaya ama, tumetu aijamadya quejenemereti ishü, Yusu bacani huesa ishü. “Barepaju aniyaquetu bahue que yuneri quisaratiyaque”, jadya quisarati neaume. Yusu tuque micuana bacani huesaya. ³⁵ “Riyaque yahua iyaquiquetu bahue ique yuneri quisaratiyaque”, jadya nejuume. Yusu tuque micuana bacani huesaya. “Jerusalénju aniyaquetu bahue ique pusha pusha ama juyaque”, jadya nejuume. Yusu tuque micuana bacani huesaya. ³⁶ “Ique yuneri ama quisaratiyaque juatsu ique papajata”, jadya neaume quisarati. Ecuana ni tu eje bucha cacuareshae ama etsaru pajada, sehueda jadya ni peadya etsaru buchique. ³⁷ Ai ni micuana aana aya, neacue quisarati barema. Aana ama ni micuana ai aya, neaume. Micuanara quisarati aya equedya neacue, “Yusu bahue” jadya tsehue ama. Quisarati ejenemereticara ebarique tu Satanás jaque jutidya.

Jesúsra ecana etsuje juishuque ama bahuityacuareque
(Lc 6.29-30)

³⁸ “Ebacadya tuque micuanaja beruque cacuat-sashati: ‘Ejera jidama ayaju etsuje nejudue. Ejera ni peya yatucaju ujedá aya, yatucajudyatu peya paanuca. Ejera ni peyaja etse jupuya, tuja etse dyaditu pajupunucadya’. ³⁹ Era micuana cacuatsashati iyacuaque bahuityaya. Ejera jidama ayaju, etsuje jucara nejuume. Jida tsehue jutidya nebacue. Ejera bahuapajayaque juatsu, peya ebahua equé necatimerenucacue. ⁴⁰ Ejera ni micuana huaraji queja cueja ishü dujuya, huarajira ni micuana aya, ‘Mique jidamapa ejuu jadya cuejaquique micue camisa tyacue’, camisa camadya ama tyacue. Micue chompa tyanucacuedya. ⁴¹ Ejera ni micuana tura

abuyaque casada tsehue japadama dujumereya, japada tuque tsahuayaque nedujucue. ⁴² Ejera ai bacayaquedya netyacue. Ejera ni micuana ai masadama tyanuca ishü bacaya, netyacue, —jadya tujatu ecana bahuityacuare.

**Eje bucha iyuhuebatsae ecuana ujeu baqui cuanaque
aishuque**

(Lc 6.27-28, 32-36)

⁴³ Jesúsra tuna bahuityanucacuare:

—Ebacadya tuque micuanaja cacuatsashati beruque: “Iyuhueda nebacue micuana iyuhueda baqui cuanaque camadya. Micuana ujeu baqui cuanaque ujeu nebacue”. ⁴⁴ Era micuana cacuatsashati iyacuaque bahuityaya. Iyuhueda nebacue micuana ujeu baqui cuanaque. Micuana jidama quisarati tsehue apuji cuanaque jida nebacue. Yusu queja nebacabacacue micuana ijillahuana, jidama aqui cuanaja ishü. “Jida judue ique ujeu, jidama jadya aqui cuana tsehue”, jadya Yusu neacue. ⁴⁵ Yusu tu jida dutya tsehue. Micuanara peya cuana jida tsehue bayaju, micuana ejitaju juya yuneri cuitadya micuana Etata Yusu barepaju aniya jaque. Turatu ijeti hueca cuinanashahuecacaya jidama cuanaja ishü, jida cuanaja ishü jadya. Nei bacue jida, jidama jadya cuanaja jida ishü. ⁴⁶ Inime micuanaja paju ama: “Yusura ecuana tyabuque jidaque, ecuana iyuhueda baqui cuanaque camadya ecuanara iyuhueda bayaju”. Butsee jidama juya cuanaratu iyuhueda baya tuna iyuhueda baqui cuanaque. Butsee huarajija ishü chipiru sitaqui cuanaque tuna jadya juya. ⁴⁷ Micuanara ni jida batsaya micuana iyuhueda baqui cuanaque cuita camadya, “Ecuana ecuana peya cuana bucha dyaque jida”, jadya micuanaja inime paju ama. Butsee Yusu adeba baecua cuanajatu tuna iyuhueda baqui cuanaque jida batsa bahue. ⁴⁸ Dutya tsehue jida anicara nejudue. Micuanaja Tata barepa juque bae nejudue. Jida tsehue nebacue peadya peadya ecuita cuana, —jadya tuna Jesúsra bahuityacuare.

Peya tsahuatsu casumititaquique ama

6 Jesúsra tuna bahuityanucacuare:

—Tsahuaya ni micuana peya cuana, net-sahuacuedya peya cuana queja capetamereti ishü ama. Dutyara bayaju ni micuana aya, peya cuanara micuana sumiya. Jadya ama bucha micuanaja Tata barepajura micuana tyabuque ama ni ai jidaque peya tsahuahua tsuje.

² “Jadya tibudya nrecada cuanaque tsahuatsu, necasumitiume ai tyaatsu; Yusu adebaquipa ejuu jadya juya cuanaque bucha nejuume. Nrecada cuanaque tsahuatsu tuna cacuejatiya dutya queja tunara jidaque mere ahuaque, caradati ishüque etare cuanaju, edijiju juneniyaque jadya. Ecuita cuanaja jida baishu jutidya tuna jadya juya. Ecuita cuana ni tu tunaja ishü jida quisaratiya, Yusu bacue aijama. Riyaque yahua camadya tunajatu jidaque inime baya. Yusura tuna jidaque tyadadibuque ama ni riya piji buchique.

³ Nrecada cuanaque tsahuatsu necacuejatiume ni eje

quejadya jutidya. Ni ejeque micuanaja iyuhueda queja necacuejatiume. ⁴ Ejeque cuejamaque neacue. Micuanaja Tata dutya petaquiratu baya eje bucha micuana juyaque. Tura micuana jida juya baatsu dyaque jidaque tyabuque, —jadya tujatu ecana bahuityacuare.

Jesúsra eje bucha quisaratie Yusu tsehue jutaquique bahuityacuareque
(Lc 11.2-4)

⁵ Jesúsra tuna bahuityanucacuare:

—Micuana Yusu tsehue quisaratiyaque, ecuita cuanaja sumi ishuhue jutidya nequisaratiume; Yusu adebaquipa ejuu jadya juya cuanaque bucha nejuume. Tunaratu dutya bahue amerecara aya tuna Yusu tsehue quisaratiyaque. Jadya tibudya tuna Yusu tsehue quisarati neti bahue caradati ishuhue etare cuanaju, ejudya jutidya ecuita cuanaja peta ishuhue. Ecuita cuana camadyatu tunaja ishuhue jida quisaratiya, Yusu bacue aijama. Riyaque yahuaju camadya tuna tyatanaya tuna jida pureama juishuque. ⁶ Era micuana bahuityaya. Arepa Yusu tsehue quisarati ishuhue casitatitiqui ama bucha, jida nucadyatu yatse taca Yusu tsehue quisarati ishuhue. Jadya juyaque nenubicue eju aira buchique sicatoraya amaju. Nubitsu etsecue necateriticue. Micuanaja Tata Yusu tu tuhuadya micuana tsehue. Nequisaraticue tuatsehue. Turatu adebayadya micuanara inime tupuyaque. Turatu bacayadya micuana tacara tuque cuejayaque. Tura micuana jida juya baatsu, dyaque jidaque tyadadiya.

⁷ “Yusu tsehue quisaratiyaque, tumeque quisaratidya jutidya atinuca atinuca neaume; Yusu adebaquipa ejuu jadya juya cuanaque bucha nejuume. Tunajatu inime juya, quisarati ahuaquedya atinuca atinuca ayaju Yusura bacaya bucha. ⁸ Tuna bae nejuume. Yusu tuque micuanaja Tata. Turatu berudya adebahua micuanara ai sareyaque, micuanaja bacamajudya. Jadya tibudya tuque micuanaja tumeque quisarati atinuca atinuca ataquí ama. ⁹ Jadya Yusu tsehue quisaratiyaque nequisaraticue:

‘Ecuanaja Etata barepaju aniyaque, muiba ishuhue mique.

Adebaya mique ecuana juchama nerique.

¹⁰ Pajuetihuisha huecaca micue ecuana naru ishuhue. Barepaju micue inime dutya juya bucha, tumebaedya paju dutya rehua riyaque yahuaju.

¹¹ Tyacue ecuana riyaque huecaca ara ishuhue ecuanara sareyaque.

¹² Apupashacue ecuanaja jucha cuana.

Ecuana peya cuanara jidama ayaque nime aputaya bucha, jadidya ecuanaja ecuana jidama juya cuanaque apupashacue.

¹³ Satanásra cajuchathacara ayaju, ecuana tsahuacue, ecuana ecajuchatiuju.

Miquemi enaruqui.

Miquemi dutya casa tsehueque.

Miquemi eje tupu mui, pureama jadya ajaca ishuhue ama.

Jadidya paju’, jadya neacue Yusu tsehue quisaratiyaque.

¹⁴ “Micuanaja Tata barepajura tuque micuanaja apupashaya micuanara jidama ahuaque, micuanara, micuana jidama aqui que nrecabayaque juatsu.

¹⁵ Micuanara ni peya nrecabaya ama, tume tuque micuanaja Tatara dyadi apupashaya amadya micuanaja jucha cuana, —jadya tujatu ecana acuare.

Yusu mui ishuhue arama quibetiyaque peya inime jutaquique ama

¹⁶ Jesúsra tuna bahuityanucacuare:

—Yusu mui ishuhue arama quibetiyaque, micuana jadya juyaque ni eje quejadya jutidya necaadebameretiume. Yusu adebaquipa ejuu jadya juya cuanaque juya bae nejuume. Tunaratu dutya bahue amerecara aya tuna arama quibetiyaque. Peya inime tuna jubahue. Ramusu pahua muru tsehue ecana ebutsequiniju capepati bahue. Ecuita cuana camadyatu tunaja ishuhue jida quisaratiya, Yusu bacue aijama. Riyaque yahuaju camadya tuna tyatanaya tuna jida pureama juishuque. ¹⁷ Micuana Yusu mui ishuhue arama quibetiyaque, pureama nejuque. Necajibururuticue. Cajibururutitsu necaluticue jida, micuana arama quibetiyaque peya cuanara eadebauju. ¹⁸ Micuanaja Tata tu micuana tsehue. Tuquetu bahue dutya eje bucha micuana juyaque. Tura micuana jida pureama juishuque tyabuque.

Tere baecuaque etsujequi jida quiyatiaje ishuhue
(Lc 12.33-34)

¹⁹ “Nequiyatiajeume chipiru, riyaque yahuaju ai tsuje arida cuanaque. Micuana rehuaque quiyatiaquetu muju cuanara eyuamaturau. Eapatatereu jutidya tuque micuanaja. Chiri puji cuanaratu echiriu. Tume tuque micuanaja aijama ejuu ni ai buchique. ²⁰ Nequiyaticue Yusuja yacuaju micuana pureama juishuque. Micuana yuqueja quiyatiajeyuquetu cayuamati baecua. Mujuratu araya ama. Jitsu baecua tuque. Chiritanaya ama tuque; ni tu yuamaturaya rapara. ²¹ Tupujacaya ama tuque ecuana inime ecuanaja iyuhueda cuanaque quiyatihuaaju.

Ecuitaja educujuque inime udaquique
(Lc 11.34-36)

²² “Yatuca tsehue ademe ecuana capetatiya. Capetatitsu ecuana canarutiya ai muda cuanaju. Yatuca ecatse jidaju ecuana jidadya anitaqui. ²³ Yatuca ecatse jidamaju, ecuana ecanarutiya amadya muda cuanaju. Era micuana cuejayaque tu hueca buchique. Ecue yana equedya ama ni micuana aniya, tume micuana apudaju juneniyaque cuji juhuaque bucha.

Yusu mereya ama bucha cachipiruticara ebari jadya jutaquique ama
(Lc 16.13)

²⁴ “Ni ejera buchiquetu emereu ama beta patrón ecatse. Jadya jucara juyaque juatsu, tuque micuana,

peya ujeu, peya bacue iyuhueda jadya jutidya ebau. Peyatu nijuta ducuta jadya tsehue emereu, peya bacue merecarama tsehue. Eje bucha anie ni micuana juma Yusuja biji eque, micuanaja ishu cuita camadya chipiru radanitya jadya juatsu, —jadya tujatu ecana acuare.

Yusura tuja cuanaque narujacayaque ama
(Lc 12.22-31)

²⁵ Jesúsra tuna bahuityanucacuare:

—Cuejaya micuana era. Netsapeume inime: “¿Ai dyadi rique araya, ijiya? ¿Ai dyadi rique jutuya?” jadya. Yusura micuana iyahua tibu, yuneri cuitadya micuana tura tyadadiya micuanaja aijamaque ara ishuque, jutu ishuque jadya. ²⁶ Neadebacue upati huiri cuana. Tunaratu inime tsapeya ama tunara sareya tsehue. Tuna tuna cuhuatiya ama ni cahuesatiya ama ara ishuque. Aijama tunajatu ni eju tunaja earaqui iya ishuque. Jadya ama bucha tuna micuanaja Tata barepajura tyaya ara ishuque. Tujaque micuana. Micuana tura micuana dyaque iyuhueda baya, upati huiri cuana bucha ama. Yuneri cuitadya tura micuana tyaya micuanara ara ishuque sareyaque. ²⁷ Ni ejeradya jutidyatu tuja maju ishuque ura juetihuaju tuja ani erirunucau ama.

²⁸ “Micuanajatu tsapetaqui ama inime jutu ishu cuana tsehue. Nebacuedya yachiju shasha cuana eje bucha danee juyaque. Tunaratu jidama ama inime baya jutu ishu cuana tsehue. Mere ecana juya ama chipiru jiteque, ni ecana taritariya. Jadya ama bucha tuna Yusura jida piji amereya. ²⁹ Salomón tu jucuare ecuari dyaque jida tsehue cajututitsu jida piji. Jadya ama bucha shasha cuana yachi juquetu dyaque jida piji, Salomónra ejutuqui dyaque jidaque jutucuare bucha ama. ³⁰ Shasha yachi juquetu tsunuda ama juya. Tumeque huecaca camadya tu jida piji; peya huecaca bacue eijehue ejuu etiquiju. Yusura yachi juque shasha cuana dyaque jida piji amereya tibu, yuneridya tura micuana tyadya micuanara jutu ishu sareyaque. Micuanaratu tura naruyaque ejeneya ama, arepa tuque micuana upati jeta aqui cuanaque, shasha cuana jadya naruyaju baya ama bucha. ³¹ Yusura tura iyahuaque naruya tibu, inime netsapeume: ‘¿Ai dyadi tuque ecuana araya? ¿Ai tuque ecuana ijiya?’ jadya ama juatsu ‘¿Ai dyadi tuque ecuana jutuya?’ ³² Yusu adeba baecua cuanaque tuna tumeque inime tupu tsehue jutidya juneniya. Micuana jadya inime tupu tsehue nejuneniume. Micuanaja taa tu aniya Etata Yusu barepa juque, micuanara ai ara ishuque, jutu ishuque jadya sareyaque tyaquique. ³³ Pana catyati nejucue Yusu queja, tuja micuana naru ishu. Eje buchadya tuque pureamaturacara ayaque anicara nejucue. Jadya anie ni micuana juya, tume tura micuana tyaya dutya micuanara sareya cuanaque. ³⁴ Netsapeume inime huecacape eje bucha juya tsehue. Dutya huecacatu aniya eje buchique inime, masada, inime tupu jadya. Inime tsapequi neaume eje buchique inime cuetimaque jari. Baecua micuana eje bucha judadiyaque. Tume cuanaque inime tupuqui aatsu, eje bucha inime

tsapema anie ni micuana juma, —jadya tujatu ecana acuare.

Peya cuana jidama juyaque cuatsabiji jutaquique ama
(Lc 6.37-38, 41-42)

7 Jesúsra tuna bahuityanucacuare:

—Peya jidama juyaque cueja nejuume, Yusura micuana dyadi jidama juyaju ebau tibu. ² Micuanara peya cuana baya bucha baedya micuana Yusura eau. Micuana ni peya cuana ai tyaishu inijeda juya, tumetu Yusu dyadi inijedadya juya micuana jidaque tyaishu. Micuanara ni tyacara tsehue tupuya ai tyayaque, tume micuana Yusura dyaque jidaque tyaajeyadya jutidya, —jadya tujatu ecana acuare.

³ Jesusratu cuatsabiji cuejacuare tuna bahuityayaque:

—Micuanaja cuitadya yatucaju acui tibu ebari aniyaque juatsu, ¿eje bucha juatsu jatsu tuque micuana peyaja yatuca juque aijara piji quemicara aya? ⁴ Micuanaja cuitadya yatucaju acui tibu aniyaque caadebatiyaque ama, ¿tume tuque micuana peya eje bucha juatsu jadya eau: “Aijara tuque micue yatucaju aniya. Paquemi micue era”, jadya eau? ⁵ Ebaupa, ai jadique micuana shuhui buchique! Icuene micuana cuitadya yatuca juque acui tibu necaquemiticue. Caquemititsu tuque micuana ebau jida peyaja aijara yatuca juque quemishe, —jadya tuna Jesúsra acuare.

(Riya tsehue tujatu ecana bahuityacuare: Neadebacue micuanaja jucha. Adebatsu neajacacue, peyaja ishu jidama quisaratimaque.)

⁶ Jesúsra tuna bahuityanucacuare:

—Aniyatu Yusuja quisarati tsehue tsaya cuanaque. Chapa mureda buchique tuna jipeyaju cacaruticaraqe. Cuchi cuana buchique jutidya tuna. Tapa-pasha, asicatura jadya jutidya tunajatu aya peya cuanara tyayaque. Casada tsehue ecana quisarati bacamerecara neaume tunara bacacarama ayaque, —jadya tuna Jesúsra acuare.

Yusura ai tyaya tupu bacajacataquique ama
(Lc 11.9-13; 6.31)

⁷ Jesúsra tuna bahuityanucacuare:

—Nebacabacajacaume Yusu queja. Tyadya tura micuana. Nebacajacaume ai sareyaque. Yusura micuana dadimereya. Canimehuallatima neihuacue, micuanara ai Yusu bacahuaque tura tyaya tupu. Tyadya tura micuana. Etareju nubicara juatsu etare metsera pacashaya tupu eihuau bucha ihuae neacue. ⁸ Ejera bacajacayaque ama tujatu tyadya. Ejera sareyaratu dadiyadya. Ejera canimehuallatima ihuayaratu bayadya tura bacahuaque. ⁹ ¿Micue bacuara pan bacayaju ni taa mi tumu jutidya etyau ara ishu? ¿Micue bacuara jae bacayaju ni taa mi bacua jutidya etyau ara ishu? [Ni ejeque etataqueratu tura bayaque jadya eau ama! ¹¹ Butsee micuana jidamaradya tuque micuana micuanara baya cuana jidaque tyaya. Yutsumadya Yusu barepa juque micuana dutya tyaquique, dyaque jidaque micuanara bacayaju tura micuana tyadya.

¹² Peya cuana queja necabamereticue tunara eje bucha bacara aya eque. Jadya tibudya tuna dyadi jida tsehuedya nebacue. Riyaquedyatu Moisésra, Yusu equeque quisarati cuejaqui cuanara jadya bahuityacuare, —jadya tuna Jesúsra acuare.

Eje uma ama Yusu queja judirubuqueque
(Lc 13.24)

¹³ Jesúsra tuna bahuityanucacuare:

—Eaqueja necatyaticue Yusu queja judiru ishu. Eje uma tuna jadya jucarama juya. Tunaja biji eque ecana anijacacarama juya. Tunadya tuna etsecue quinida eque nubiya buchique; ediji quinida eque ajeyaque buchique tuna. Ijahuaaja etiquiju tuna judirubuque.

¹⁴ Masabaya micuana Yusu pureamatura ishu, micuana cuita camadya capureamaturatijacacarama juya tibu. Eje uma ama tuna Yusu camadya pureamatura juya cuanaque. Tunadya tuna etsecue quinidama eque nubiya buchique; ediji ibeda eque ajeya buchique tuna. Tunadya tuna Yusu queja judirubuque.

Ecacaju acui adebataquique
(Mt 12.33-35; Lc 6.43-45)

¹⁵ “Necanaruticue pusha pusha arida cuana tsehue, Yusuja quisaratipa ecuejau jadya juya cuana tsehue. Quisariatijaju bacatsu tuque micuana ecana micuana tsahuara jehuaque buchadya ebau. Pana yuamatura cuitadya tunara micuana eau, micuanara bacayaque juatsu. Uhuisha bucha cuita jida datse tuna jucara juya, iba bucha jidamaque jutidya. ¹⁶ Micuanaratu eadebaudya ejeque pusha pusha arida cuanaque tuna eje bucha juyaju baatsu. Ecacaju petatsudyatu adebataqui acui. Abarijutu uva caca ecuinanau ama. Higo-tu acuija ducu edaneu ama. ¹⁷ Jadidyatu dutya acui jidaque jida cacacatiya. Acui amena rarayaquetu jida amadya cacacatiya. ¹⁸ Acui jidajatu juya amadya ecaca jidama arataquimaque. Acui arataquimajatu juya amadya ecaca arataquique. ¹⁹ Tumebae adebaedya tuque micuana eau ejeque jidama bahuitya bahuitya puji que tuna eje bucha juya baatsu. Tuna tuna judiruya ama eju Yusu adebaqui cuanaque judiruyaju. Ijahuaaja etiquiju tuna ishatanabuque, acui ecaca arataquimaque eata bucha cuere, pahua jadya.

Dutya ama Yusu aniyaju judirubuqueque
(Lc 13.25-27)

²¹ “Aniyatu umae ecuiquepa jadya juya cuanaque. ‘Miquemi Ecuana Cuatsashaquique’, jadya datse tunara aya. Jadya ama bucha tuna Yusu queja judirubuque ama, ecue Etata barepaju aniyaja biji eque ama anihua tibu. Tuja biji eque aniyaque cuita camadyatu tuaqueja judirubuque. ²² Tere ishuque huecaca juetihuaju camadyatu Yusu adebaquipa ejuu jadya juya cuanara abuque: ‘Ecuana Cuatsashaquique, ecuanaratu Yusuja quisarati cuejahua micue ebacaniju. Micue ebacaniju tuque ecuana ijahua cuanara quijahuatishaya cuanaque ijahua cuana ijehuecuinahua. Micue ebacaniju tuque ecuana ahua ni ejeque ecuitaja

ataquique ama’, jadya tunara abuque. ²³ Era tuna quemitsabuque: ‘A, aijama. Ecuique ama micuana. Adebaya ama micuana era. Nenetisicuaque ique pequeque, micuana micuana jidama juhua cuanaque’, jadya tuna abuque, —jadya tuna Jesúsra cuejacuare.

Jesús queja nimee cuanaque, tuaqueja nimee ama cuanaque jadya
(Mr 1.22; Lc 6.47-49)

²⁴ Jesúsra tuna cuejanucacuare:

—Anicuairetu beta ecuita etare caticuaqueque ecatsé. Icuenequetu inime adebabada, bahue jadya jucuaque. Purucuairetu deda. Tumu ebari dyaque yahua pajidaju tujatu dudu cuana puchacuare ni eje tupu bucucunuca ishu ama. Peya bacue inimema jucuaque. Mejijiju jutidya etare caticuaque. Nei ebari juatsu cueri cuana pesitanaterecuare. Cuejipa casadara etare ecatsé aeticuaque. Icueneque etare pujija eaque casada neticuaque. Rihuicuaque ama, dudu cuana yahua pajidaju casada epucha tibu. Peyara etare acuareque bacue rihuicuaque. Pana aputatere jucuaque.

“Era bahuityayaque bacatsu era amereya eque juya cuanaque tuna yahua pajidaju etare caticuaque buchique. Tuna tuna ni eje tupu yuamaturatana ishuque ama. Era amereya eque ama juya cuanaque bacue mejijiju etare caticuaque buchique. Tuna tuna pana aputatere jubuque, —jadyatu Jesúsra ecuita cuana cuejacuare.

²⁸ Jesús quisariatiaque abacatanahuajutu ecuita jetieque ama anajacatacuare tura bahuityayaque bacatsu. ²⁹ Jadya tuna jucuaque:

—Pana adeba taa tu aya eje buchique quisarati ayaque. Cacuatashati cuejanuca cuejanuca jadya amatu juya, ecuana bahuityaqui cuanaque bucha ama taa, —jadya tuna jubarecuare.

Jesúsra ecuita pusesera ririshayaque chachanecuaque
(Mr 1.40-45; Lc 5.12-16)

8 Jesús bahuitya bahuityayaque emata juque butehuaajutu ecuita jetiera ama tupujudya acuare.

² Tumetu ecuita pusesé sehuera rami ririshayara jipeticuaque. Jipetitsu tujatu Jesús tuja yacuaju chichucata juatsu isaratsacuare:

—Ique Cuatsashaquique, chachanecara aatsu taa mira ecue ujeje aniyaque echachaneu, —jadya tujatu acuare.

³ Tura jadya ayajutu Jesúsra jabacuare.

—Chachaneyadya mique era, —jadyatu Jesúsra acuare.

Jadya aya tsunumeetu pusesé aputacuare tuja ecuita juque. Chachadya tu jucuaque.

⁴ —Cuejacueja camadya aume ni ejequedya jutidya mique eje bucha chachae juhuaque. Aticue Moisésra amerehua equedya. Riyata cuau cuitadya jucue pae queja, tuja mique pana adeba atsa ishu, “Chachadya rique,” jadya tuja aishu. Cadujuticue Moisésra amerehua equedya riyaque ujeje chacha eju cuanaja Yusu

tyabahueque. Jadya juatsutu ecuita cuana bahue juya mique amena chachaque, —jadyatu Jesúsra acuare.

Jesúsra 100 sudaru cuana cuatsashaquija mere puji chachanecuareque
(Lc 7.1-10)

⁵Jesústu Capernaumju junaticuare. Junatihua jutu huaraji cien sudaru cuana cuatsashaquique Roma juque ecuadishara jipeticuare Jesús. Tume tujatu Jesús jipeticuare tuaqueja canerecati ishu.

⁶—Ique Cuatsashaquique, ique merequique tuque ecue ujejeda ecue etareju. Jarayadya tuque. Bucucutaqui amatu juya. Dyaque nerecadatu juya, —jadyatu sudaru cuana cuatsashaquira acuare Jesús.

⁷Jesusratu quemitsacuare:
—Cuayadya ique. Chachanetiadya tuque era, —jadya tujatu acuare.

⁸—Eratu adebayadya mira ecue etareju cuamara echachaneuque, Ique Cuatsashaquique. Cuatsashacue. Tuquetu chachadya juya. Ique israelita ama. Bahuedya ique micue cacuatsashati eque mique ecue etareju nubitaquique ama. ⁹Ique ecue huaraji cuanara cuatsashayaju yana equedya jubahue. Era dyaditu sudaru cuana cuatsashayadya. Era ecue sudaru cuadishayaju, masadamadyatu cuaya. Peya ni era ihuaraya, masadamadyatu jeya. Era ni ecue mere puji, “Acue jeeque” jadya aya, masadamadya tujatu aya. Ique bahuedya micue casa aniyaque ique merequique chachane ishu, —jadyatu huarajira acuare Jesús.

¹⁰Jadya bacatsutu Jesúsra ecuita bape bacuare tuja quejeneti baatsu. Jadya baatsu tujatu tuque tupuju cuaya cuanaque cuejacuare:

—Riyaque Romajura taa dyaque ejene neri aya era tuja tuque merequique echachaneuque. Pusha amadya aijamatu ni ejeque ecue ata israelita ique dyaque ejenequique. ¹¹Nebacacue taa era cuejayaque. Eje uma israelita ama cuanaque tuna Yusu huaraji dyaque aridaque aniyaju judirubuque. Dutya quejaque tuna tuhua jubuque. Ijeti cuinanaya queja amacaque, ijeti nubiya queja amacaque jadya tuna caradati-buque. Caradatitsu tuna Abraham, Isaac, Jacob jadya tsehue ararapeedya jubuque. ¹²Ecue ata israelita cuanajatu anihua emajaca Yusuja quisarati baca ishu. Jadya ama bucha tuna dutya jujeri Yusu queja judirubuque ama, eaqueja catyatiya ama tibu. Apudaju tuna ijehuetanabuque. Ijahuaja etiquiju tuna judirubuque. Tuhua tuna dyaque payaque, etse tari jubuque, dyaque canerecati cabatitsu, —jadya tuna Jesúsra acuare.

¹³Tuequedyatu Jesúsra isaranucacuare sudaru cuanaja huaraji:

—Dirucue micue etareju. Miratu ejenehua era ujejedaque japada equera chachanyaque. Mique merequiquetu amena chacha, —jadyatu Jesúsra acuare sudaru cuanaja huaraji.

Tumetu mere puji tumeque ura cuitadya yunqueja chacha jucuaire.

Jesúsra Pedroja ehuanqueja ecuaque chachanecuareque
(Mr 1.29-31; Lc 4.38-39)

¹⁴Jesústu Pedroja etareju cuacuare. Tuhua junatitsu tujatu banaticuare Pedroja ehuanqueja ecuaque dyaquene cuita baara juyaque jarayaju. ¹⁵Junatitsutu Jesúsra emetucuju jabanaticuare. Jabanatihua jutu baarara ajacacuare. Tumetu netitsuratsu earaqui juacuare Jesús, tura mepehua cuanaque jadya mihua ishu.

Jesúsra umada ujejeda cuanaque chachanecuareque
(Mr 1.32-34; Lc 4.40-41)

¹⁶Amena ijeti nubihua ju tunajatu becuare Jesús queja ijahua cuanara quijahuatishaya cuanaque, peya ujeje tsehue cuanaque jadya. Tura tuna quisarati tsehuedya jutidya ijahua cuanara quijahuatishaya cuanaque quijahuatishajacacuare, tumbaedy peya ujejequi cuanaque. ¹⁷Tura jadya ahua jutu jucuaire. Isaías Yusu equeque quisarati cuejaquira beru cuejacuare bae cuitadyatu judadicuare: “Tura cuitadya ecua chachanecuare ujejedaque. Secacuare tura ecuanaja uje cuana”.

Jesús tsehue junenicara jucuaire cuanaque datse
(Lc 9.57-62)

¹⁸Ecuita cuana jetiama caradatiya baatsutu Jesúsra tura mepehua cuanaque jadya acuare:

—Necarequetira bei yueque macare, —jadya tujatu ecana acuare.

¹⁹Cacuatsashati bahuityaquiratu Jesús jipeticuare.

—Ebhuiyaquique, ique junenicara juya miatsehue eju mique cuayaju, —jadya tujatu Jesús acuare.

²⁰—Dyaque masada tuque. Equique chapa cuanajatu aniya cani; upati cuanaja bacue eja. IQUE ECUITA-ja bacue aijama etare tahui ishuque, —jadyatu Jesúsra acuare.

²¹Peya tuque ijacabacaquiratu acuare:

—Ecuatsashaquique, icuene tuque ecue etata narutaqui tuque majuya tupu. Tuque majuhua ju, papatsu piisi miatsehue juneniya. Ihuacue jari ique, —jadya tujatu Jesús acuare.

²²—A, aijama. Iyacuadya eatsehue junenicue. Ique adebaya ama cuanaque tuna emaju cuanaque bucha. Tunara inime tsapequi paa ai riyaque yahua ju cuanaque, emaju cuanaque papaya tupu, —jadya tujatu acuare.

Jesúsra cuejipa, ena pacu jadya nityacuareque
(Mr 4.35-41; Lc 8.22-25)

²³Jadya juatsutu Jesús cuaba ebariju anibutecuare tura mepehua cuana tsehue. Anibutetsu tuna carequeticuare. ²⁴Bei riqueyaquetu Jesús tahuicuare. Tuna eje tupu ajehua ju amatu muya jutidya cuejipa casadaque jueticuare. Cuejipa juetitsutu ena pacura cuaba ebari nudyajeri nudyajeri acuare. ²⁵Jadya baatsutu tura mepehua cuanara Jesús bushishaticuare.

—Ecuana Cuatsashaquique, chachanecue ecuana!
 Rumutanaya ecuana! Ena pacura ecuana nudyaya!
 —jadya tunajatu acuare quique eque.

²⁶ —¿Eje bucha juatsu jatsu micuana bajida juya?
 Ejeneya ama jaridya tuque micuana ecue micuana
 naru ishu casa aniyaque.

Jadya juatsutu Jesús netitsuracuare. Netitsuratsu tu-
 jatu acuare cuejipa enapacu jadya:

—Tume tupu camadya! Neticue! —jadya tujatu
 acuare.

Tura jadya aya tsehuedyatu cuejipa neticuare. Duty-
 atu pana abacatana jucuare. ²⁷ Jadya baatsu tuna
 eanajacata jucuare. Cabacaduratibarecuare ecana:

—Ai ecuita dyadi ri riyaque! Cuejipa, enapacu jadya
 taa tuja yana equedya juya, —jadya tuna jubarecuare.

Jesúsra ijahua cuanara quijahuatishayaque ecatsé qui- jahuatishajacacuareque

(Mr 5.1-20; Lc 8.26-39)

²⁸ Chamacama tuna jaratsuradirucuare Gadaraju
 aniya cuana queja bei yueque macare. Jarat-
 suradiruhajutu beta ecuita ecatsera Jesús jipeticuare.
 Ijahua cuanara quijahuatishayaque tatse jucuare.
 Emaju cuanaque eisha cani cuana juque tatse jecuare.
 Dyaque emuba tatse jucuare. Ni ejequedya jutidyatu
 tumeque ediji eque juneni bahue jucuare. ²⁹ Jesús
 baatsu tatsejatu quiquetsacuare:

—¿Ai jitequemi jeya yatse queja, Jesús Yusuja
 Ebacuaque? Bacuedya jutidya yatse. Huecaca juetima
 jariju cuitami jeya yatse nerecaturara, —jadya tatse-
 jatu acuare.

³⁰ Tueque eje japa amatu cuchi cuana jetiama
 araaranibarecuare.

³¹ —Riyaque ecuita ecatsé quijahuatishajaca ishu, mi-
 ra ecuana cuinanashayaque juatsu, ecuana panubi
 cuchi cuanjaju, —jadyatu ijahua cuanara acuare Jesús.

³² —Nenubicue taa, —jadya tuna Jesúsra acuare.

Tumetu ijahua cuanara quijahuatishajacacuare
 tumeque ecuita ecatsé. Tatse quejaque cuinanatsu tu-
 na cuchi cuanjaju nubibarecuare. Dutya cuchi cuana
 ijahuaqui cuanaque tuna tsajajayaque pacacadiru-
 cuare bei tihuesu baruda eque. Bei ju pacacatsu tuna
 huiditerecuare. ³³ Cuchi cuana naru juya cuanaratu
 bacuare jadya juyaju. Ejecutana tuna tsajaterecuare
 epu ebariju. Tuhua judirutsu tuna cuatsabiji adiru-
 cuare dutya eje bucha juhuaque, ijahua cuanara qui-
 jahuatishayaque ecatsé eje bucha quijahuatijacae
 juhuaque. ³⁴ Jadya bahue juatsutu dutya jujeri ecuita
 cuana tumeque epu juque cuacuare Jesús queja. Batit-
 su tunajatu aticuare:

—Dirucue rehuaque, —jadya tunajatu Jesús aticuare.

Jesúsra ajebaecuaque ajeshacuareque

(Mr 2.1-12; Lc 5.17-26)

9 Jadya juatsutu Jesús nubicuare cuaba ebariju, bei
 yueque macare carequeti ishu, tuja epuju judiru
 ishu. Judirucualetu Capernaumju, tuque aniqui epuju.

² Tsunuda juatsu ama cuitadyatu ecuita cuanara duju-

cuare ecuita ajebaecuaque tuaqueja. Tumeque ecui-
 tatu jaracuare ujejeda cuanaque huesa ishujaju. Uje-
 jedaque dujuqui cuanara Jesúsra ajebaecuaque eaje-
 shauque ejeneyaque adebatsu tujatu jadya ajebaec-
 uaque acuare:

—Cacasaticue, tata. Micue jucha cuana tu amena ea-
 pupasha, —jadyatu Jesúsra acuare ajebaecuaque.

³ Jadya juyajutu cacuatsashati bahuityaqui tuhua ju-
 cuare cuanara jadya inime tupucuare:

—Riyaqueri Yusu tsehue beta tupu cabatiya. Yusu tu-
 jatu ijillahuanaya. Ni ejeradya jutidyatu jucha cuana
 eapupashau, Yusura peadya camadya, —jadya tuna-
 jatu inime tupubarecuare.

⁴ Jesúsra bahuedya jucuare tunara eje bucha inime
 tupuyaque.

—¿Eje bucha juatsu tuque micuana jadya inime
 tupuya: “Yusu tujatu ijillahuanaya” jadya? Jida ama
 tuque micuana inime tupuya. ⁵ Era ni aje baecuaque
 eau: “Micue jucha cuana tu eapupasha” jadya, eade-
 bau ama tuque micuana ecue casa aniyaque, eapu-
 pasha, apupashama jadique ejitaju ama tibu. Era ni
 eau: “Netitsuracue. Ajecue”, tumeque ura cuitadya
 tuque micuana eadebau ecue casa aniyaque, ajebaec-
 uaque juneniyaju baya tibu. ⁶ Tuque juneniya baatsu
 micuana bahue juya ecue tumbaedy a riyaque yahua-
 ju jucha cuana apupasha ishu casa aniyaque, —jadya
 tujatu ecana acuare.

Tumetu Jesúsra acuare ajebaecuaque:

—Netitsuracue. Piruricue micue jara ishucue. Diru-
 cue micue etareju, —jadya tujatu acuare.

⁷ Jadya ahuaaju cuitatu ecuita netitsuratsu tuja etareju
 dirucuare. ⁸ Ecuita jetiama capetatiya cuanaquetu
 jadya baatsu anajacatacuare. Pureama tuna Yusu
 acuare.

—Dyaque jida, casada taa Yusu! Riyaque ecuita
 Jesús tujatu tyahua casa ujejeda cuanaque chachane
 ishu, tumbaedy jucha cuana apupasha ishu, —jadya
 tunajatu acuare.

Jesúsra Mateo tuatsehue juneni ishu ihuaracuareque

(Mr 2.13-17; Lc 5.27-32)

⁹ Ecuita ajebaecuaque ajeshatsutu Jesús dirucuare
 tuhuaque. Diruyara tura ique badirucuare Roma juque
 enaruquija ishu chipiru tsuje bacayaque juaniyaju.
 Ique Mateo bacani. Ique enaruquija ishu chipiru tsuje
 baca puji jucuare. Tuhadya tura isaracuare:

—Eatsehue junenicue, —jadya Jesúsra acuare.

Jadya ahuaaju netitsuratsu Jesús tsehue juneniti-
 bunecuare.

¹⁰ Ejetsunue juatsu amatu Jesús ecue etareju
 araaraapunacuare tura mepehua cuana tsehue. Tuhu-
 atu jucuaredya enaruquija ishu chipiru tsuje bacaqui
 cuanaque, umae bijidamadurataya cuanaque jadya.
 Dutya ecuana mesaju Jesús tsehue araaruare.

¹¹ Tume ecuana fariseo cuanara bacuare. Baatsu tuna-
 jatu acuare tura icuene mepehua cuanaque:

—Riyaque ecuita cuana ri bijidamadurataya cua-
 naque. Micuana Bahuityaquiuetu araarataqui ama

enaruquija ishü chipiru tsuje sitaqui cuana tsehue, tumbaedyä peya jucha arida cuana tsehue, —jadya tunajatu ecana acuare.

¹² Jesúsra tuna quisaratiyaju bacacuare.

—Chacha cuanaratu sareya ama casamati puji. Ujejeda cuanara camadyatu sareya. ¹³ Jadya tu ehüene Yusuja quisarati: “Dyaque jida micuana quiyuhue batsati aqui amerecara aya, ique uu cuana iyetsu tyaihuque bucha ama”. Jida inime netupudirucue tume ehüeneju, pana adeba aishu. Juchama bucha cabatiya cuanaque sarera ama jehua. Ique jehua jucha arida cabatiya cuanaque jiteque, tuna inime cacuaretisha ishü, —jadya tujatu ecana acuare.

Eje bucha anitaqui amatu beruque inime eque, iyacua eque jadya

(Mr 2.18-22; Lc 5.33-39)

¹⁴ Jadya juatsutu Juan Ecuita Cuana Utsaqui tsehue junenicuare cuanara Jesús jipeticuare. Jipetsu tunajatu bacaduracuare:

—Ecuana ecuana arama quibeti bahue, Yusu muiyaque cabamereti ishü. Tumbaedyatu fariseo cuana jadidya juya. Mira mepehua cuanaque bacue arama quibeti baecua. ¿Eje bucha juatsu? —jadya tunajatu Jesús acuare.

¹⁵ Jesúsra tuna quemitsacuare:

—Caquemitiyaju cuaishu ecueja cuanaque tuna peya inime juya ama caquemitiyahuque tuna tsehueju. Tuna quejaque dujutanahuaju piisi tuna arama quibetiya. Tumbaedyatu ecue cuanaque; ique cuanucahuaju piisidya tuna arama quibetiya.

¹⁶ “Ni ejeratu camisa siri sipiya eraca iyacua tsehue.

Jadya ayaque juatsutu nacatatsu eraca iyacuaque dyurutanatsu camisa siri echajatanau. Chajatanayaque juatsutu camisa beru juhua bucha dyaque jidama ejuu.

¹⁷ Tumbaedyatu ishataqui ama tupari sasana ishüque sura siri cuitaju. Tupari sasanayaratu epututashau sura siri. Tumetu eaputau sura, tupari jadya. Jadya tibudyatu tupari sasana ishüque sura jida iyacuaju ishataqui. Tumetu jidadya juya. Aputaya ama tupari ni sura, —jadya tujatu ecana acuare.

(Riyaque cuatsabiji tsehue tuna Jesúsra bahuityacuare. Eje bucha anitaqui amatu beru inime israelita cuanara bahuityacuare eque, iyacuaque tura cuitadya bahuityaya eque jadique.)

Jairora Jesús jipeticuareque

(Mr 5.21-24; Lc 8.40-42)

¹⁸ Jesús jadya quisaratiyajutu peadya ecuanaja huarajira jipeticuare. Jipetitsutu Jesúsja yacuaju nuyucuare. Isaracuare tuja tuque:

—Nerecabacue ique. Ecue ebacujunatu iyacua cuitadya majuhua. Mira camadyatu enityatsuranucau. Mique ecue etareju cuaatsu mira jabatsu camadyatu chacha enetitsuranucau, —jadya tujatu Jesús acuare.

¹⁹ Jadya ahujutu Jesús cuacuare tuatsehue. Ecuana dyadi Jesúsra mepehua cuanaque ecuana cuacuare dyatse tsehue.

Jesúsra epuna ujejedaque chachanecuareque

(Mr 5.25-34; Lc 8.43-48)

²⁰ Ecuana huarajira etareju cuaya tsunumeetu epunara Jesús etibene eque jipeticuare. Ujejedaquetu epuna jucua. Peadya tunca beta earacana maratu amena nerecada, ujejeda jucua. Ebacuatate tujatu jidama jucua; ami tujatu jucuaedyä jutidya. Jipetitsutu tujatu jabacuare Jesúsja unaju ebebacuaju ehuejitaque. ²¹ Tujatu inime jucua: “Tura jutuyaque jabatsu chacha juya” jadya. ²² Tibene bajiyu aatsutu Jesúsra bacua epuna. Isaracuare tuja tuque:

—Cacasaticue, mama. Chachami juhua, mira era chachaneya que pana ejene ahua tibu, —jadya tujatu acuare.

Tura jadya aya tsehuedyatu chacha jucua.

Jesúsra Jairoja ebacujunaque emajuque chacha nityatsuranucacuareque

(Mr 5.35-43; Lc 8.49-56)

²³ Junaticuare ecuana huarajira etareju. Junatitsutu que ecuana tuhua cuanaque sicacada juyaju bacanaticuare. Dudududu puji cuanara emajuque papati ishüque duduyaju ecuana bacanaticuare. ²⁴ Jesusratu tuhua cuanaque acuare:

—Necuinanacue rehuaque. Dyaque peya inimetu juttaqui ama. Tumeque ebacujuna piji tu majuma. Tahuiya jutidya tuque, —jadya tuna Jesúsra acuare.

Jadya bacatsutu ecuita cuanara ijaribacuare, tunara yuneri cuitadya emaju bahua tibu. Ecanajetijacatu ebacujuna piji jucua. ²⁵ Jesúsra tuna cuinanashacuare. Tuna cuinanashatsutu nubiticuare ebacujuna piji emajuque jarayaju. Emetucuju tujatu ebacujuna piji emajuque inanaticuare. Inayajutu ebacujuna piji chacha netitsuracuare. ²⁶ Duya tuque amaca aniya cuanaque tuna bahue jubarecuare Jesúsra emajuque chacha nityatsuranucahuaque.

Jesúsra beta shuhuique ecatsé capetatihacuareque

²⁷ Jesús tuhuaque cuinanayajutu beta shuhuique ecatsé tupujudya quiqueajecuare.

—¿Jesús, miquemi Yusuja Emepeque, David eque ejuracanaque! ¡Nerecabacue taa yatse! —jadya tatsejatu quique eque acuare.

²⁸ Etareju nubinatihuajutu shuhui ecatsé jipeticuare. Tatsé jipetihuaju tujatu ecatsé bacaduracuare:

—¿Ejeneyadya metse era ecapetishauque?

—Jejee, Yatse Cuatsashaquique. Ejeneyadya tuque yatse mira jadya eauque, —jadya tatsejatu acuare.

²⁹ Jadya aatsu tatse Jesúsra yatucaju jabacuare.

—Metsera era capetatihaya que ejeneya tibu, capetatiyadya metse, —jadya tatse Jesúsra acuare.

³⁰ Tura jadya aya tsehue cuitadya tatse jida capetaticuare. Jadya aatsu tatse Jesúsra cuatsashacuare tatse cacuejati ishü ama:

—Necuejaume ni ejequedya jutidya metse eje bucha capetatie juhuaque, —jadya tujatu ecatsé acuare.

³¹ Tuhuaque cuinanatsu piji cuitadya tatsejatu cu-
atsabiji acuare dutya tumeque emajacaju Jesúsra tatse
eje bucha ahuaque.

Jesúsra quisarati baecuaque quisaratishacuareque

³² Tatse cuinanaquenayajutu ecuita cuanara becuare
ujejedaque. Tumeque ecuitatu quisarati baecuaque ju-
cuare; ijahuara jadya amereyaquetu jucuaque. ³³ Tumetu
Jesusra quisarati baecuaque ijahua queja jacamere-
cuare. Jacamerehuajutu ecuita quisaratitibunecuare.
Quisaratiya bacatsutu tuhua jucuaque cuanaque anaja-
catacuare.

—Bama rique ecuanaja riyaque yahua Israelju
riyaque ecuita buchique! —jadya tuna jucuaque.

³⁴ Jadya baatsutu fariseo cuanaja juticuare ama in-
imeju Jesúsra Yusuja casa tsehue jadya ayaque.

—Satanás ijahua cuana cuatsashaquique tu tuatse-
hue. Jadya tibudya tujatu casa aniya ijahua cuana ije-
huecuina ishu, —jadya tuna jucuaque tuna camadya ju-
tidya.

Jesúsra ecuita cuana nrecada bacuareque

³⁵ Jesússtu junenicuare dutya epu cuanaju, tume-
baedya japada epu achaacha cuanaju. Bahuityaja-
cacuare ama tujatu ecana caradati ishuque etare cua-
naju, epu tura cuajiya cuanaju jadya. Jidaque quisarati
tujatu cuejacuare, Yusura eje bucha narue
adadiyaque. Dutya ujeje tsehue ujejeda juya cuanaque
tujatu chachane bahue jucuaque. ³⁶ Bacuaretu ecuita je-
tiamaque. Nrecada, ecapeya inimeti jadya tujatu
ecana bacuare. Uhuisha cuana aija naruquima
juneniyaque bucha tujatu ecana bacuare. ³⁷ Jesúsra
ecuanacuare:

—Riyaque ecuita cuana ri trigo amena ejahuane
buchique. Aniya jari tuna jetiama Yusuja quisarati ba-
cama cuanaque. Eje uma ama tu quisarati tsapequi
cuanaque. Nebacacue Yusu. Pacuadishatu jetiama
ecue quisarati cueja ishu cuanaque. Tee metsera mere
puji cuana trigo racara ecuadishau bucha, jadidyatu
Yusura tuja cuanaque cuadishaya tuna tuaqueja caty-
atishamere ishu, —jadya ecuanacuare Jesúsra cuejacuare.

Jesúsra tura mepehua cuanaque tuja casa ty- acuareque

(Mr 3.13-19; Lc 6.12-16)

10 Jesúsra ecuanacuare ecuanacuare peadya tunca
beta earacana tura mepehua cuanaque.

—Ijahua cuana ijehuecuina ishu micuana tyaya casa.
Tumebaedya micuana cuatsashaya ejeque ujeje, eje
buchu ujeje tsehue cuanaque chachane ishu, —jadya
tura ecuanacuare.

² Ecuana ecuadisha cuanaque ecuanacuare peadya tunca
beta earacana jucuaque.

Simón (Icuene ebananiju atanahuaque; peya eba-
cani tujatu "Pedro" jucuaque.)

Andrés (Simón tsehuequique)

Santiago

Juan (Santiago tsehuequique; tatse tatse jucuaque
Zebedeoya ebacuaque ecatsé.)

³ Felipe

Bartolomé

Tomás

Mateo (Icuene jucuaque enaruquija chipiru
sitaquique.)

Santiago (Alfeoja ebacuaque)

Tadeo

⁴ Simón (Tuquetu Roma juque enaruquique biji-
damaduraqui juyaque jucuaque.)

Judas Iscariote (Jesús inamerequi judadicuareque)

Jesúsra tura mepehua cuanaque tuja quisarati cuejara cuadishacuareque

(Mr 6.7-13; Lc 9.1-6)

⁵ Ecuana tura mere amerehuaju cuana jariju ecuanacuare
Jesúsra cuejacuare:

—Necuaume israelita ama cuana aniya queja amaca
ni samaritano cuana aniya epu cuanaju. ⁶ Necuejaticue
Yusuja quisarati ecuanaju ata israelita cuana camadya.
Tuna tuna uhuisha cuana eaputa buchique. ⁷ Necue-
jacue ecana, amena tu japadama huecaca Yusura
dutya narudadiyaque. ⁸ Nechachaneticue ujejeda cua-
naque. Neniyatsuraticue emaju cuanaque. Nechacha-
neticue ujeje dyaque jidamara biti ririshaya cuanaque.
Ijahua cuanara quijahuatishaya cuanaju ijahua cuana
necuinanashaticue. Era micuana tsujema tyaya
riyaque casa cachachaneti ishuque. Jadya tibudya
micuanara netsujebacaume ujejeda cuanaque
chachanetsu.

⁹ "Micuanara tsahuatiya cuanaradya micuana tsuje-
ma tyatsaya micuanara ai sareya cuanaque, micuana
Yusuja mere juyaque baatsu. Jadya tibudya necaduju-
tiume chipiru ni peya ai etsujequi tsehue cacuareti-
quere ishuque. Asicada juatsu catacati ishu jutu
ishuque necadujutiume. Zapato jutuyaque cuita ca-
madya necadujutiume. Necadujutiume shitara ni sari.
Dutyu micuanara sareyaquedyu micuana tyataya.

¹¹ "Ejeque epuju junatitsu banatimetseque etareju
nenubinaticue etare metsera jida batsayaju camadya.
Tuhuadya neanicue tuja etareju peya epuju
dirunucaya tupu. ¹² Nubinaticue tumeque etareju aniya
cuanaque neisanaticue. 'Yusura inime tsapema
neamerecue', jadya ecana neanaticue. ¹³ Tumeque
etareju cuanara ni micuana jida batsaya, micuanara
cuejayaque ni tuna jida tsehue bacaya, tume tuna jida
inime tsapema juya micuanara isaranatihua baedya. Ji-
dama ni tunara micuana batsaya, micuanara cue-
jayaque ni tuna bacacarama aya, tume ecana pureama
ni inime tsapema jadya paju ama. ¹⁴ Tunara micuana
batsacarama ayaju, micuanara cuejayaque bacacara-
ma ayaju, masadama necuinanacue tuhuaque.

Cuinanayaque neitataquenacue muru micuanaju
ehuachi juque, 'Aine yatse micuana tsehue juma', jadya
tura ayaque. Tunadya tuna inime metse, Yusuja quis-
arati bacacarama ahua tibu. ¹⁵ Tere huecaca juetihuaju
tura Yusura dyaque nrecaturabuque tuja quisarati

bacacarama juya cuanaque. Sodomaju, Gomorraju anicuaque cuanaque tuna dyaque jidama jucuare. Jadya ama bucha tuna tumeque huecaca juetihuaju dyaque ama canerecatibuque, micuanara quisarati cuejayaque bacacarama ahua cuanaque bucha ama, —jadya ecuanara Jesúsra acuare.

Jesucristo ujeu baqui cuanara tuja cuanaque nerecat- urabuqueque

¹⁶ Jesúsra ecuanara bahuityanucacuare:

—Pana ijacobaca neacue. Cuadishaya micuana ecue quisarati cuejara. Cacuaehuanaticara nejuume, arepa tunara micuana jidama aya ama bucha. Micuana micuana uhuisha iba cuana ducu buchique. Jida inime netupucue micuana ai jutiyaju. Cuejayaque ecana necuejacue jida inime tsehue, yana ujeda ujeda tsehue ama. ¹⁷ Necanaruticue. Ecuita jidama cuanara micuana huaraji cuana queja inamerebuque. Catsacatsa tunara micuana amerebuque caradati ishucue etare cuanaju. ¹⁸ Dujubuque tunara micuana enaruqui cuanaja yacuaju, ecuari cuanaja yacuaju eaqueja ecatyati baatsu. Tume tuque micuanaja emajaca anibuque ique eje buchique tuna cueja ishucue, israelita cuana tumebaedya israelita ama cuanaque jadya. ¹⁹ Huaraji cuanaja yacuaju dujutayaju jidama inime nebaume quicueneti ishucue quisarati aishucue, ni eje bucha cuejae aishucue. Quisaratati ishucue ura juetihuaju, Yusura micuana huecashabuque micuana eje bucha quisaratati juishucue. ²⁰ Micuanara inime tupuya eque ama micuana quisaratibuque; micuanara Tataja Espiritura inime tupumereya eque micuana quisaratibuque.

²¹ “Ecue cuanaque tuna tunaja etareju cuanara cuitadya ijahue jahue abucue. Iyemere ishucue tunajatu huaraji cuana queja inamerebuque. Tuna tsehuequi cuanara cuitadya tuna huaraji cuana queja inamerebuque. Etata cuanaqueratu ebacua cuanaque cuitadya inamerebuque, ebacua cuanaquera bacue etata cuanaque. ²² Dutya jujerira micuana ujeu babuque, eaqueja ecatyati baatsu. Tereya tupu ejeque eaqueja nimee jujacayaque ama camadyatu Yusu queja judirubuque ni eje tupu tuque jakanuca ishucue ama. ²³ Tunara ecue cuanaque baatsu nerecatu rayaca cabatitsu, nehuanacue peya epuju ecue quisarati cuejara. IQUE ECUITA junanucabuque, micuanara dutya ecuanara ata israelita cuana ecue quisarati cuejatillama jarijudya.

²⁴ “Ique tunara baya bae, baedya tunara micuana abucue. Ejeque cabahuityatiyaquetu tuque bahuityaquique bucha emui ama jubuque. Mere puji bacue tuja patrón bucha mui bae ama atabuque.

²⁵ Cabahuityatiyaque tunajatu tuque bahuityaquique bucha baedya abucue. Mere puji tunajatu tuja patrón bucha baedya abucue. Iquepa Satanás, jadya tunara ijillahuanahua. Ecue inime tunara micuana micuana dyadi ijillahuanayadya, —jadya ecuanara Jesúsra acuare.

Yusu camadya mubataquique (Lc 12.2-7)

²⁶ Jesúsra ecuanara bahuityanucacuare:

—Bajida nejuume ecuita cuanara eje bucha eauju. Dutya era etehua cueja ahuaque micuanara dutyaja ijacaju necuejacue. Dutya era bahuityahuaque micuanara peya cuana pana adebamere neacue. Dutya etehuaquetu ejitaju judadiya. Dutya ibedaquetu adebataqui judadiya. ²⁸ Nemubaume micuana iyecara juya cuanaque. Arepa tunara micuana eiyeu ama bucha, aijama tunajatu casa ni ejeque ijahuaja etiquiju nudya ishucue. Nemubacue Yusu camadya. Tuja peadya camadyatu casa aniya quiyeti ishucue, tumebaedya ijahuaja etiquiju ejeque nudya ishucue. Tura cuatsashaya eque nejuume, arepa micuana ecuita cuanara jidama aya ama bucha.

²⁹ “Yusuratu naruya dutya ai aniyaque. Upati huiri cuanatu tsujequi cuitaque ama. Beta chaitu catyati atanaya ficha patya cuesi tsuje piji. Jadya ama bucha tuna ecuanara Etata naruya, tunaja maju ishucue huecaca iyahuaque juetiya tupu, tuna emaju yahuaju pacacaya tupu. ³⁰ Yusuratu adebaya dutya eje bucha micuana judadiyaque. Turatu adebaya dutya, eje uma micuanara iyucaju etsaru aniyaque. ³¹ Jutaquijudya bajida nejuume. Pusha ama cuitadya micuana Yusura naruya. Upati huiri cuana naruya bucha, dyaque jida tura micuana narujacaya ama.

Ecuita cuanara yacuaju “Jesús jaque ique” jadya juya cuanaque (Lc 12.8-9)

³² “Ejeque ni ecuita cuanara yacuaju ‘Jesús jaque ique’ jadya cacuejatiya, eratu ecue Etata barepajuja yacuaju ‘Ecuique tume’ jadidya abucue. ³³ Ejeque ni ecuita cuanara yacuaju ‘Ique Jesús jaque ama’ jadya cacuejatiya, era dyaditu ecue Etata barepajuja yacuaju ‘Ecuique ama tume’ jadidya abucue.

Jesúsja inime riyaque yahuaju cuanaque catibuqueque (Lc 12.51-53; 14.26-27)

³⁴ “¿Micuanara ni tu inime juya, ique junahua baatsu dutya inime jidama cuanaque, cati jadya amena terehua bucha? Jadya ama tuque. Ique adeba baecua cuanaque tuna ecue cuana tsehue cahuititsu catibuque. ³⁵ Micuana eaqueja catyatihua tibu, micuana micuanara etareju cuanara cuitadya ujeu babuque. Ebacua cuanaqueratu etata cuanaque ujeu babuque. Ebacujuna cuanaqueratu ecua cuanaque ujeu babuque. Ebacuaque jahuane cuanaratu yahuiqueja ecua cuanaque ujeu babuque.

³⁷ “Arepa micuanara etareju cuanaquedya iyuhueda ebau ama bucha, ique dyaque iyuhueda nebacue, tuna iyuhueda baya bucha iyuhuee ama; paanidya datse micuanara tata, cuaa, bacua, bacujuna, ejeque micuanara iyuhuedaque. Ejeque ecuita jutidya ni micuanara dyaque iyuhueda, ique iyuhueda ebauque, tume micuana ecue jutaqui ama. ³⁸ Ecue yana equedya nejuume, arepa micuana canerecati, maju jadya jutaqui ama bucha, curusuju etata ejuu bucha. Ique jiteque iyetacara juyaju, iyetacarama juyaquetu ecue jutaqui ama. ³⁹ Micuana ni catehuatiya eaqueja ecatyati que

eyetauju, ejetsunue ama micuana anibuque. Tume micuana majutsu ni eje tupu Yusu queja judirubuque ama. Micuana ni ique jiteque ejenetsu jadya iyetaya, tume micuana Yusu quejadya anisiribuque, arepa micuanaja ecuita ririya ama bucha.

Pureama juishuque tyatabuqueque
(Mr 9.41)

⁴⁰ “Ejera ni micuana jida batsaya, tumbaedyatunara ique jida batsaya. Ejera ni ique jida batsaya, tumbaedyatunajatu ecue Etata Ique Cuadishaquique jida batsaya. ⁴¹ Yusuja quisarati cueja juya cuanaque tuna jidaque tyatanabuque. Yusuja quisarati cueja juya cuanaque jida batsaqui cuanaque tuna tyatanabuquedyatunajatu ecue Etata Ique Cuadishaquique jida batsaya. ⁴² Micuanara ni ecue cuanaque tsahuaya, babuquedyatunajatu ecue Etata Ique Cuadishaquique jida batsaqui cuanaque tuna tumeque jidaque nucadya tyatanabuque. ⁴³ Micuanara ni ecue cuanaque tsahuaya, babuquedyatunajatu ecue Etata Ique Cuadishaquique jida batsaqui cuanaque tuna tumeque jidaque nucadya tyatanabuque. ⁴⁴ Micuanara ni ecue cuanaque tsahuaya, babuquedyatunajatu ecue Etata Ique Cuadishaquique jida batsaqui cuanaque tuna tumeque jidaque nucadya tyatanabuque. ⁴⁵ Micuanara ni ecue cuanaque tsahuaya, babuquedyatunajatu ecue Etata Ique Cuadishaquique jida batsaqui cuanaque tuna tumeque jidaque nucadya tyatanabuque. —jadya ecuana Jesúsra cuejacuare.

Juan Ecuita Cuana Utsaquira Jesús bacaduramerecuareque
(Lc 7.18-35)

11 Jesúsra ecuana peadya tunca beta earacana tume cuanaque cueja ishuque bahuitya amena ahuaju ecuana dutyadya Jesús tsehue cuacuare tuhuaque, tuja quisarati cueja, bahuitya jadyara tumeque yahua epu cuanaju.

² Juan Ecuita Cuana Utsaquiquetu amena etare apudaju erisi neticuare. Tuhuaquedyatu bahu jucuare Jesús ai juyaque. Jadya bacatsu tujatu tura mepehua cuanaque cuadishacuare Jesús queja. ³ Tuhua junatitsu tunajatu bacaduracuare Jesús, Juanra bacaduramerehuque:

—¿Midyami Mesías, Yusuja Emepeque rehua junataquique? ¿Ihuaya jari ni taa ecuana peya? —jadyatu Juanra cuadishahua cuanara Jesús bacaduraticuare.

⁴ Jesúsra tuna quemitsacuare:

—Micuanaratu bacahuadya era ai cuejayaque. Bahuadya micuanara ique ujejeda cuanaque chachane juyaju. Dirunucatsu Juan necuejadirucue micuanara bahuque, bacahuque jadya. ⁵ Necuejacue era shuhui cuanaque capetatishayaque; rudurudu cuanaque rena jida ajeshaya; pusesera ririshaya cuanaque rena chachaneya; isahue cuanaque rena quijacabatishaya; emaju cuanaque rena nityatsuranucaya; nericada cuanaque rena Yusu queja judiru ishuque quisarati cuejaya. ⁶ Dyaque jida paju ique dyaque adebaquique, eaqueja nimee jujacayaque ama jadya, —jadyatu Jesúsra Juan cuejamerecuare.

⁷ Jadya cuejahujatu tuna dirunucacuare. Tuna diruhujatu Jesúsra cuejatibunecuare Juan eje buchique:

—Jetiama micuana cuachine yachiju Juanra cuejayaque ijacabacara. ¿Ai tuque micuana batichine tuhua? Micuanaratu adebahuadya Juanra ejenecara, ejenecarama jadya ama Yusuja quisarati ahuaque. Shita cuejijira peya queja huanati, peya queja huanati eau bucha ama tuque. ⁸ Bacaduranucaya micuana era. ¿Eje buchique ecuita batiya bucha tuque micuanaja inime juchine? Bahuedya micuana, tuque ejutuqui jida piji tsehue ama ecajututique. Ejutuqui jida piji tsehue ecajututi cuanaque tuna chipiruda cuanaja, ecuari cuanaja etareju aniya. ⁹ Bacaduranucaya micuana era. ¿Ai bucha adebatsu tuque micuana batichine? ¿Yusu equeque cuitadya quisarati cuejaquique ni taa tuque micuana batichine? Pusha amadya Juan tu Yusu equeque cuitadya quisarati cuejaquique. Yusratu tuque mepecuare israelita cuana quisarati cueja ishu. ¹⁰ Jadya tu Yusuja quisarati ehue:

“Cuadishabuque tuque mique cuadishama jariju ique merequique.

Turatu ecuita cuana bajejebuque, tunaja mira quisarati cuejadadibuqueque bacatibune ishu”. Juan tu Yusuja quisarati cuejaquique. ¹¹ Rivaque micuanaja cuejaya. Juan Ecuita Cuana Utsaquiratu quisarati cuejahua dyaque saretanayaque, beru yuequedyatunajatu ecue Etata Ique Cuadishaquique jida batsaqui cuanaque tuna tumeque jidaque nucadya tyatanabuque. —jadya ecuana Jesúsra cuejacuare buchique ama. Jadya ama bucha iyacua ecue cuanara cuejayaque tu dyaque jidaque, Juanra cuejacuare buchique ama. Jadya tuque, arepa micuanara ecue cuanaque jetiedya, aishuque ama jadya baya ama bucha.

¹² “Juanja cuejama jarijutu ni ejera buchique cuejahua ama, inime cacuaretiya cuanaque iyacua eque Yusu queja eje bucha judirue juishuque. Iyacuatu era cuejaajenucaya tura quisarati cuejahuaque nucadya. Cuejayaju bacatsutu eje umadya pureama tsehue Yusu queja catyatiya. Casada dyaidama cuanaque pureama tsehue ijahue aya tupu ecatiu bucha, jadya tuna pureama tsehue eaqueja catyatiya. ¹³ Moisésra, Yusu equeque quisarati cuejaquique cuanara jadyatu cuejacuare ejeque huecaca Yusura iyacua inime eque narutibuneyaque. Ejeque cuanapa Elías Yusu equeque quisarati cuejaquique junabuque, Yusuja Emepeque junama jarijudyatunajatu ecue Etata Ique Cuadishaquique jida batsaqui cuanaque tuna tumeque jidaque nucadya tyatanabuque. —jadya ecuana Jesúsra cuejacuare buchique ama. ¹⁵ Micuana quijacabati aqui juatsu, nebacacue.

¹⁶ “¿Ai baetu iyacua aniya cuanaque? ¿Ai tsehue beta tupu jadya tuna eau? Tuna tuna peya cuanara cuejaya eque jucarama juya. Ebacua cuana ijahue juya bucha jutidya tuna, peya ebacua cuanara ijahue aquerecara ayaju ijahue jucarama juya bucha. ¹⁷ Yusura tuaqueja judiru ishuque quisarati cuejamereyaju bacatsu, pureama nejucue’, jadya ayaju bacatsu, tuna pureama jucarama juya. ‘Peja inime micuanaja jucha cuana aniyaque caadebatitsu nejucue’, jadya ayaju bacatsu, tuna peya inime jucarama juya. Ebacua cuana tuna tsehue tupu cuanara rauta duduyaju ijahue jucarama ejuu bucha tuna. Ebacua cuana tuna tsehue tupu cuanara peya inimeque jeru ayaju pacarama ejuu bucha tuna. ¹⁸ Iyacua tunara yatse bijidamadurahua Juan,

ique jadya. Juantu anicuare quibeti neri juyaque, ecuita cuana tsehue araara, ijijji jadya juyaque ama. Tuque jadya juya baatsutu ecuita cuanara ahua, tuquepa equijahuati, jadya. ¹⁹ Tuequedya IQUE ECUITA junahua. Ique bacue earaqui ara, uva nacaca esasanashaque iji jadya juya ecuita cuana tsehue. Ique jadya juya baatsu tunara dajicama, nijuqui arida jadya aya. Iquepa ecuita cuanara bijidamaduraya cuanaja ecare; tumebaedy a iquepa enaruquiya ishu chipiru sitaqui cuana tsehue casitatiya, jadya tunara aya. Era, Juanra jadya ayaque baatsutu ejitaju yatse betadya Yusura bahue amereya eque juyaque, —jadya tujatu ecana acuare.

Inime cacuareticarama jucuare cuanaque

(Lc 10.13-15)

²⁰ Corazín, Betsaida, Capernaum epu cuanajutu Jesúsra acuare jetiama ni ejeque ecuitaja ataquique ama Yusuja casa bamereyaque. Arepa tuhua aniya cuanara tura ayaque bacuare ama bucha, cacuareticarama tuna inime jucuare. Jadya tibu tuna Jesúsra nereda atibunecuare:

²¹ —Dyaque neredada micuana jubuque, micuana Corazínju, Betsaidaju jadya aniya cuanaque! Tiro, Sidón jadyaju anicuare cuanaque tuna dyaque jidama jucuare. Jadya ama bucha, baquena ni tuna juquena juhua Yusuja casa era micuana iyacua bamereyaque, cacuaretiquena tuna inime juquena jucuare. Jutuquena tunajatu jucuare ejutuqui sehuedaque, ai tiru, muru tsehue iyucaju casehueti jadya, inime cacuaretihua jadya ata ishu. Micuana micuana cacuaretihua ama inime, arepa era Yusuja casa tsehuedya ayaju bahua ama bucha. ²² Riyaque micuana cuejaya. Ejeque huecaca Yusura jidama cuanaque nrecaturadadiyaju; tura micuana dyaque nrecaturabuque; Tiroju, Sidónju cuanaque jucuare dyaque tura micuana nrecaturabuque. Micuanajatu anicuare emajaca ecue casa baishu. Tuna-ja baishuque aijama jucuare tibu micuana tuna bucha dyaque micuana neredada jubuque. ²³ Micuana Capernaumju aniya cuanaque, jida bucha datse micuana cabatiya. Dyaque inime metseque bucha datse micuana cabatiya. Barepaju etsurashatau bucha datse micuana cabatiya. Ijahuaja etiquiji jutidya micuana nudyatabuque. Sodomaju anicuare cuanaque tuna dyaque jidama jucuare. Jadya ama bucha baquena ni tuna Yusuja casa juquena juhua iyacua micuana era bamereyaque, cacuaretiquena tuna inime juquena jucuare. Pana aputashatana ama tunajatu epu juquena jucuare. ²⁴ Riyaque micuana cuejaya. Tere huecaca juetihuaju micuana Yusura dyaque nrecaturabuque. Sodomaju anicuare cuanaque tuna dyaque jidama jucuare. Jadya ama bucha tuna tumeque huecaca juetihuaju, dyaque ama canerecatibuque, micuanara quisarati cuejayaque bacacarama ahua cuanaque bucha ama, —jadya tuna Jesúsra acuare.

Jesús tu ecuana jucha cuana secaquique

(Lc 10.21-22)

²⁵ Jesús tuja Etataque barepaju tsehue quisaraticuare:

—Tata, miquemi barepa, yahua jadya aniyaque metseque. Bahue, inimequi bucha cabatiya cuana queja ecabameretiquemi, mique eje buchique adebacara, bahue jucara ebari juya cuana queja cabameretihua. Yusrupai mique aya, mique jadya juhua tibu. ²⁶ Jadya tu juya, mira jadya amerehua tibu, Tata, —jadyatu Jesúsra acuare Etataque.

²⁷ Jadya juatsu tujatu isaranucacuare tuhua cuanaque:

—Ecue Etatara ique mepehua tuque cuarequi rehua ecuita cuana ejitaju amere ishu. Ecue Etatara peadya camadya ique pana adeba aya. Ique tuja Ebacuaque. Era cuita camadya tuque ecue Etata pana adeba aya. Tumebaedyatu adebaya era adebamerehua cuanara. ²⁸ Yanacana cuita micuana cacasatiya ecuita cuanaja cacuatsashati eque anitsu Yusu queja judiru ishu. Ai bicueda cuitaque abutsu ereme ejuu bucha micuana. Eaqueja necatyaticue. Era micuana secaya micuana inime tsapemere, bajitura jadya ayaque. ²⁹ Catsahuamereti ishu ique neacue micuana remeshaquique buchique dujuquere ishu. Ique eque necabahuityaticue Yusu queja judiru, tuja biji eque ani jadya juishuque. Ique jida, casumiti baecuaque. Eaqueja catyatitsu micuana ecabutique qiyabutyatitsu canajaraya bucha ecabatiu. ³⁰ Casaturaya micuana era, era amereyaque micuanaja aishu. Dyaque jida inime tsapema micuana amereya. Era micuanara bicuedaque abuyaque jatada tsehue ecuareu bucha tuque, —jadya tuna Jesúsra acuare.

Jesúsra mepehua cuanara trigo esa canajara huecaca-ju sepiajecuareque

(Mr 2.23-28; Lc 6.1-5)

12 Tume patyatu Jesús cueticuare euhua cuana eque canajara huecacaju. Aridatu trigo euhuaque jucuare ejahuane, amena racataqui. Ecuana tura mepehua cuanaque ecuana tuhuadya jucuare tuatsehue. Aracara ecuana jucuare. Aracara juatsu tuque ecuana trigo esa sepitsu etsucaca mucuajecuare.

² Umae fariseo cuanara baatsu tunajatu Jesús cuejacuare:

—Mira mepehua cuanaquetu Moisésra cuat-sashacuare eque ama juya. Meredya tuna juya etsucaca cuana sepi, mucu jadya juyaque. Meretu jutabaecua canajara huecacaju, —jadya tunajatu cuejacuare Jesús.

³ Jesúsra tuna quemitsacuare:

—Neadebacue ecuanaja ebaba David emuique jucuareque. Tuque, tuatsehue cuaya cuanaque jadya tuna aracara jucuare. ⁴ Davidtu Yusuja etareju nubicuare. Nubitsu tujatu Yusuja ishu eiyaque pan cuana inacuare. Inatsu tujatu aracuare. Arepa tuja, tuatsehue cuaya cuanaja jadya arataquima paju ama bucha tuna aracuare, pae cuanaja cuita camadya arataquique.

Jady ama buchatu Yusu cahuitishacuare ama, tumeque pan aratsu. ⁵ Ni dyaditu pae cuanara Yusu cahuitishaya canajara huecacaju Yusuja etareju mere juyara, arepa Moisésja cacuatsashati eque mere huecaca ama paju ama bucha. ⁶ Era cuejayaque pana ija-cabaca neacue. Yusuja etareju mere juya cuanajatu canajara aijama canajara huecacaju, dyaque di taa tu ecue cuanaque canajaraya amadya. ⁷ Ehuene tu Yusura quisarati acuareque: “Dyaque jida micuana quiyuhue batsati aqui amerecara aya, ique uu cuana iyetsu tyashuque bucha ama” jadya. Micuanaratu adebataqui ama baya eje buchique jadique quisarati. Adebaquena ni micuana juquena juhua, tume tuque micuana eje bucha jumaque ecajuchati mique jadya aquena ama juhua. ⁸ IQUE ECUITAJatu aniya cacuatsashati canajara huecacaju ai juishuque, —jadya tuna Jesúsra acuare.

Jesúsra ecuita emetucu majuque chachanecuareque
(Mr 3.1-6; Lc 6.6-11)

⁹ Jadya juatsutu Jesús tuhua caradati ishuque etareju nubinucacuare. Canajara huecacajutu jadya jucuare. ¹⁰ Ecuita emetucu majuquetu tuhua jucuare, tumebaedya Jesús ujeu baqui cuanaque. Tunaratu dadicara acuare Jesús eje bucha ejuuque tuque jidama aishu. Jadya tibu tunajatu bacaduracuare jadya:

—¿Chachanetaquidyatu ujejeda cuanaque canajara huecacaju?

¹¹ Jesúsra tuna quemitsacuare:

—Meredy tu uu caniju pacacahuaque cuinanasha. Jadya ama bucha ejeja ni micuanaja cani dedaju uhuisha epacacau canajara huecacaju, ecuinanashaudya tuque micuanara, arepa ecuanaja cacuatsashati eque tumeque huecaca mere jutabae-cua ama bucha. ¹² ¡Ecuita tu dyaque inime metseque uhuisha bucha ama! Jadya tibusu ecuitaja ishu jidaque ataquidya canajara huecacaju, —jadya tuna Jesúsra acuare.

¹³ Tumetu Jesúsra ecuita emetucu majuque is-aracuare:

—Rirucue micue ebi, —jadya tujatu acuare.

Ebi riruya tsehuedya cuitadya tujatu emetucu chacha jucuare peya emetucu bucha. ¹⁴ Jadya baatsutu fariseo cuana cuinanaquenacuare. Tuequedya tunajatu inime bajetibunecuare Jesús iye ishu.

Isaiasra icueneta cueja Jesús eje bucha judadiyaque acuareque

¹⁵ Tunara iyecara ayaque caadebatitsutu Jesús tuhuaque dirucuare. Jetiama ecuitaratu tupujudya acuare. Jesusratu chachanecuare dutya ujejeda cuanaque ecuita jetiama ducucue. ¹⁶ Cuatsashacuare tujatu ecana:

—Necuejaume ni ejeque buchique era eje bucha ahuaque.

¹⁷ Berutu Isaías Yusu equeque quisarati cuejaquira icueneta cueja acuare Yusuja Emepeque junatsu eje

bucha judadiyaque. Jesús jadya juhuajutu, tura cuejacuare bae cuitadya jucuare.

¹⁸ “Riyaque ri ique merequique, ecue Emepeque. Iyuhueda tuque ecue.

Ique dyaque pureama tuatsehue juya.

Ecue Espiritutu tuatsehue jubuque.

Ique Merequiratu dutya queja aniya cuanaque cuejabuque ecue yatucaju jida, tuyu juishuque.

¹⁹ Quicueneticaramatu jubuque.

Quiquebuque ama tujatu peyaja icuenena ishu.

Junenibuque amatu epu quini eque quicueneti tsahua ishuque sare juyaque.

²⁰ Ecapeya inimetique, casadamaque jadyatu shita penuque buchique aishu ama buchique.

Jadya ama buchatu ecue Emepera casaturadadiya ecasatereque.

Eaqueja pana catyati juma cuanaque tuna tsahuabuque, eaqueja nimeedya jutidya juaje ishu.

Arepa ecana shita penuque bucha paju ama bucha, arepa ecana ude ticuhueque hueca bucha paju ama bucha, era tuna casaturabuque dutya tere huecaca juetishayaju tuyu aya tupu.

²¹ Dutya queja aniya cuanaque tuna tuaqueja catyati-buque”, jadyatu Yusu jucuare beru tuja quisarati puji Isaías eque.

Jesús tunara “Satanásja casa rejari aniya” jadya acuareque

(Mr 3.20-30; Lc 11.14-23; 12.10)

²² Jesús queja tunajatu dujucuare ecuita ijahua cuanara quijahuatishayaque, shuhuique quisarati bae-cuaque jadya ijahua cuanara amereyaque. Jesusratu capetatisha, quisaratisha jadya acuare. ²³ Jadya baatsutu dutya ecuita cuana anajacatacuare. Cabacaduratitibunecuare ecana:

—¿Jesús ni tu David eque ejuracanaque, Yusura cuadisha ana acuareque ecuanana jida inimeju cuinana ishu junabuque jadique? —jadya tuna jucuare.

²⁴ Fariseo cuanatu tuna jadya bacatsu jadya jucuare:

—¡Aama! Beelzebú ijahua cuana cuatsashaquique tu tuatsehue. Jadya tibudya tujatu casa aniya ijahua cuana ijehuecuina ishu, —jadya tuna jucuare.

(Beelzebú taa tu Satanás bacani nucadya).

²⁵ Jesusratu adebacuare tunara eje bucha inime tupuyaque.

—Jadique juatsu taa tu Satanás tuta tacadya jutidya pana cayuamaturati ejuu. Yahuaju dutya aniya cuanaque ni ecajaquetibareu cuarepe cuarepe tuna cama cati ishu, tuna camadya jutidya tuna ecatillatiu. Epuju cuanaque ni ecajaquetibareu cati ishu, tumebaedya tuna ecayumatu; tumebaedyatu ejuu etareju cuanaque tuna cama catiyaque juatsu. ²⁶ Era ni Satanásja casa tsehue ijahua cuana ijehuecuinau, tume taa tu Satanás tuja cuana tsehuedya jutidya ecatiu. Tumetu ni ejeque ijahuadya jutidya tura cuatsashaya eque ejuu ama. Satanásja casa tsehue ama tuque ijahua cuana ijehuecuinaya. ²⁷ Micuanara ique aya, Beelzebú-ja casa tsehuepa ijahua cuana ijehuecuinaya jadya.

Micuanara ni ejeneya era Beelzebúja casa tsehue ijahua cuana ijehuecuinaya, jutaquiju ¿aija casa tsehue jatsutu ijehuecuinaya micuana tsehue juneniya cuanara? Micuanara Yusuja casa tsehue tunara ijehuecuinayaque ejeneya tibu, neejenecue era dyadi Yusuja casa tsehuedya ayaque. ²⁸ Yusuja Espiritura ique casa tyaya ijahua cuana ijehuecuina ishu. Jadya tibudya tuque micuanaja inime jutaqui “Riyaquedya ri Yusuja Tumepeque”, idya micuanara ihuacuareque.

²⁹ “Ijahua cuana ijehuecuina ishutu icuene cuita tuna cuatsashaquique Satanás dutya tuja casa secataqui, ecuita dyaque casadaque tuja ai seca ishu icueneta risi ataquí bucha. Ejeque casa secamaja etarejutu eje bucha nubitaquí ama tuja ai aniyaque seca ishu.

³⁰ “Ejeque ecue ishu jidama quisaratiyaquetu ique ujeuque. Ique tsahua baecuara ique jidama aya. Tumequetu era mepeyaque dacashaajeya buchique.

³¹ “Jadya tibudya micuana riyaque cuejaya. Yusuratu jidama quisarati aya cuanaja jucha cuana eapupashau, eje bucha cajuchatie juya cuanaja. Jadya ama bucha Yusuja Espirituja ishu jidama quisarati aya cuanaja jucha tujatu apupasha nime ama. ³² Yusuratu IQUE ECUITAja ishu quisarati jidama ayaja jucha cuana eapupashau. Jadya ama bucha tujatu jucha cuana apupashabuque ama tuja Espirituja ishu cuita jidama quisarati aya cuanaja. Ejeque jadya quisaratiyaquetu dyaque nerecada jubuque riyaque yahuaju, tumebaedya majutsu, —jadya tujatu ecana acuare.

Ecacaju acui adebataquique

(Mt 7.16-20; Lc 6.43-45)

³³ Jesusratu isaranucacuare fariseo cuana:

—Acui ni jidaque, jidadya tujatu ecaca. Acui ni jidamaque, jidamadya tujatu ecaca. Dutya acuitu adebataqui ecacaju.

(Riyaque quisarati tsehue tuna Jesúsra huecashacara acuare. Ejeque eje bucha juya equetu adebataqui eje buchique ecuita jadique).

³⁴ “Micuana micuana jii jii ama bacua bucha. Micuanadya micuana jidama; jadya tibu micuana jida quisaratiyaque ama cabatiya. Educuju ecuanaja inime tupu aniyaquedya tuque ecuanaja quisarati abahue. ³⁵ Ecuita jidaquetu jidadya quisaratiya, jidaque inime tuja educuju aniya tibu. Ecuita jidamaque bacue jidama quisaratiya, jidamaque inime tuja educuju aniya tibu.

³⁶ Era micuana riyaque cuejaya. Yusuja yacuaju inime bajeje ishu netititsu tuhua, micuana eje bucha juhuaque dutya cacuejatibuque eje bucha juatsu micuanara quisarati jidamaque ahua cuanaque.

³⁷ Micuanara cuitadya quisarati ahua eque micuana Yusura jidama jadya abuque. Micuanaja quisaratiyudya micuana eje buchique cabameretiya. Jida ni micuana quisarati ahua, ‘jida mique baya’, jadya micuana Yusura abuque. Jidama micuana quisarati ahujau bacue, ‘Ecajuchati mique baya’, jadya micuana Yusura abuque, —jadya tuna Jesúsra acuare.

Yusu adeba baecua cuanara Jesús Yusuja casa ejitaju juishuque amerecara acuareque

(Mr 8.12; Lc 11.29-32)

³⁸ Tumetu umae fariseo cuanara, cacuatsashati bahuityaqui cuanara jadya jipeticuare Jesús. Jipetsu tunajatu isaracuare:

—Ebahuityaquique, acue ai bapeque inimeradya jutidya, ecuana mique Yusura cuadishahuaque bahue juishu, —jadya tunajatu acuare Jesús.

³⁹ Jesúsra tuna quemitsacuare:

—Micuana micuana jidama inime cadujutiya cuanaque. Yusu micuana iyuhueda bajacahua ni micuana tuja yana equedya juya. ‘Acue ai inimeradya jutidya, ecuana mique Yusura cuadishahuaque bahue juishu’, jadya micuana juya. Aya ama tuque era. Jonás jucuaque cuita camadya micuana huecashaya. ⁴⁰ Tuquetu jae ebarija ecarecani ducu jucuaque quimisha huecaca, quimisha meta jadya, Yusura jae queja mejijiju pushamereya tupu. IQUE ECUITA tumebaedya quimisha huecaca, quimisha meta jadya emaju jubuque. ⁴¹ Jadya juatsu Jonás cuacuare Niniveju Yusuja quisarati cuejara. Cuejayaju bacatsutu tuhua cuanaque inime cacuareticuare. Ique Jonás bucha dyaque inime metseque. Jadya ama bucha micuana bacacarama aya era bahuityayaque. Tumetu tumeque huecaca Yusura dutya eje bucha judadibuqueque cuejabareyaju, Niniveju anicuare cuanara micuana pana cueja abuque Yusuja yacuaju: “Dyaque ecana pacanerecati Jesús yahuaju anicuare patya tura cuejayaque bacacarama jucuaque cuanaque”. ⁴² Beru yuquejanetu ecuari epuna Sabá juque beni diji queja anicuareque jecuare dyaque japadaque Salomón dyaque inimequija quisarati bacara. Ique Salomón bucha dyaque inime metseque. Jadya ama bucha micuana era cuejayaque bacacarama aya. Jadya tibudyatu tere ishucue huecaca juetihuaju, Yusura ecuita cuana tuna eje bucha jubuqueque cuejabareyaju tumeque ecuari epunaryadya micuana pana cueja abuque Yusuja yacuaju: “Dyaque ecana pacanerecati Jesús yahuaju aniya patya tura cuejayaque bacacarama jucuaque cuanaque”, jadya tuna tumeque epunara Yusuja yacuaju cuejabuque, —jadya tuna Jesúsra acuare.

Ijahua yudijidya judirunuca jucuaqueque

(Lc 11.24-26)

⁴³ Tuhua cuanaque tuna Jesúsra cuejanucacuare:

—Anicuaretu ijahua tura quijahuatishaya quejaque ecuinanaque. Tumeque ijahuatu junenicuare anitaya ama cuanaju ani ishucue sare juyaque. Dadicuare amatu eju ani ishucue. Dadima aatsu tujatu jadya inime tupucuare: ⁴⁴ “Padirunuca ique eju ique inuanashatahuaju. Tuatsehue camadya ique eaninucan” jadya. Tumeque ecuita queja judirunucatsu tujatu badirucare ni ejeque ijahua tsehue ama, etare ejabu jida, ebajeje bucha. ⁴⁵ Jida baatsutu tumeque ijahuara peya ijahua cuana sareticuare. Pacarucu ijahua cuana, tuque bucha dyaque jidama cuanaque tujatu daditic-

uare. Daditsu tujatu ecana beticuare. Juetinucatsu tunajatu dutyara quijahuatishanuc acuare tumeque nrecadaque ecuita. Jadya juetu ecuita juya tuque icuene juhua bucha dyaque jidama. Tumbaedy a micuana iyacua nrecada juya bucha dyaque nrecada jubuque, —jadya tujatu ecana acuare.

Jesúsja ecuaque, tuatsehuequi cuanaque jadya Jesús jiteque cuacuareque
(Mr 3.31-35; Lc 8.19-21)

⁴⁶ Jesús quisarati netiyajutu juticuare ecuaque, tuatsehuequi cuanaque jadya. Ecuita jetiama tibu tuna etsecueju netinaticuare. Quisaraticara datse tuna jucuaque tuatsehue. ⁴⁷ Tumetu ejera cuana Jesús cuejaticuare:

—Micue cuaa, micue miatsehuequi cuanaque jadya rena etsecueju. Miatsehuepa tuna quisaraticara juya, —jadya tujatu Jesús aticuare.

⁴⁸ —Tumeque epuna tuque ecue ecuaa; tume cuanaque tuna ecue eatsehuequi cuanaque. Jadya ama bucha tuque ecue aniya peya ecue iyuhueda cuanaque, —jadyatu Jesúsra acuare tuhua cuanaque.

⁴⁹ Tume tura ecuana imetacuare tura mepehua cuanaque.

—Riya cuanaque rique ecue iyuhueda cuanaque. Riya cuanaque rena ecue ecuaa buchique, ecue eatsehuequi cuana buchique jadya. ⁵⁰ Iyuhueda tuna baya ecue Etata barepaju aniyaja inime eque juya cuanaque. Tunadya tuna ecue ecuaa, ecue eatsehuequi cuanaque bucha bae ayaque, —jadya tujatu ecana acuare.

Uhuauhua puji cuatsabiji
(Mr 4.1-9; Lc 8.4-8)

13 Tumeque huecacatu Jesús cuinanacuare etare juque. Cuinanatsutu aninaticuare bei jiruru tuhua cuanaque bahuitya. ² Masadamatu caradatinucacuare jetiama ecuita cuana. Tuna majacama cuita baatsutu Jesús cuabaju nubitsu anibutecuare. Mejiji equera tunajatu bacacuare tuque quisaratiyaju. ³ Cuatsabiji eque tujatu ecana bahuityacuare, yunerique adebamere ishu.

—Anicuaretu ecuita. Cuacuaretu tuja teeju uhuauhuara. ⁴ Tura uhuajayaquetu umae pacacacuare edijiju, yahua pajidaju. Uhuayaque etsucaca yahuaju huiruhuaquetu upati huiri cuanara anibutetsu mucutillacuare. ⁵ Peya etsucaca cuanatu pacacacuare yahua macana dedamaju. Yahua macanamaque dedama tibusu huijatsu danecuare ama, masadama buraracuare ama bucha. ⁶ Ijetija uqueratu iyecuare ehua cuanaque, etiri yahua nacadaju ama tibu. ⁷ Umae bacue pacacacuare acui tiri, acuija jadya jetiama ducu. Acuija cuana danetsu tujatu trigo euhuaque ehuija cuanaque iyetillacuare. ⁸ Umae etsucaca cuanatu pacacacuare yahua jidaju. Cacaticuare umada. Tee mere pujiratu jetiama huesacuare tuhua euhuaque. Umae esa cuanajutu cien tsucaca jucuaque. Peya esa cuanajutu shucuta tunca tsucaca jucuaque. Peya esa

cuanaju jucuaque quimisha tunca tsucaca. Jadyatu jucuaque teeju euhua cuanaque.

⁹ “Quijacabacati aqui juatsu, nebacacue, —jadya tujatu ecana acuare.

Eje bucha juatsu ecana Jesúsra cuatsabiji eque bahuityacuareque
(Mr 4.10-12; Lc 8.9-10)

¹⁰ Tume tuque ecuana tura mepehua cuanara jipeticuare. Jipetitsu tuque ecuana acuare:

—Ecuita cuana bahuityayaque tuquemi ecana cuatsabiji cuana eque bahuityaya. ¿Eje bucha juatsu tuquemi ecana jadya bahuityaya? —jadya tuque ecuana acuare.

¹¹ Jesúsra ecuana quemitsacuare:

—Yusura micuana pana adebamere acara aya tura tuja cuanaque naruyaju eje bucha juyaque. Peya cuana jadya cuejae eauque, tuna cuatsabiji cuana eque jutidya cuejaya jari, pana huecasha cuita ayaque ama.

¹² Ejeja ai aniyajutu dyaquedya ai aniajeya. Ejeque aiqui bucha cabatiyaquetu, aimaquedya jutidya. Tuja aniyaque piji tujatu aputatereya. ¹³ Jadya tibudya tuna cuejaya cuatsabiji cuana eque, tunara era bahuityayaque pana adeba eauju. Tunaratu era ayaque baya. Tume tuna baatsu bama jiu juya. Bacatsu tuna bahuityahua ama jiu juya, arepa bacahua ama bucha. ¹⁴ Berutu Isaías, Yusu equeque quisarati cuejaquique, jadyatu judadiya jadya jucuaque. Tumetu iyacua tuequedya juya.

“Micuanaratu bacabuquedya.

Adebataqui ama tuque micuana babuque.

Tume tuque micuana adebataqui ama babuque micuara petayaque.

¹⁵ Micuanaja Yusu adeba ishuque tuque micuanaja aishu ama cuita jubuque caadebati ishu.

Bacabuque datse micuana Yusuja quisarati.

Ijaca cani ecatse ehuijitudana bucha jutidya micuana jubuque.

Yatuca ecatse etumu bucha jutidya micuana jubuque.

Jadya tibudya tuque micuana adebabuque ama micuanaja yatuca tsehue bayaque, ni micuanara micuanaja ijaca tsehue bacayaque.

Micuanaratu adebabuque ama, ni micuana inime cacuareticara jubuque, eaqueja catyatitsu eaqueja judiru ishu”.

¹⁶ Isaíasra béru hueneacuareque quisarati aatsu ecuana Jesúsra cuejanucacuare:

—Micuana micuana dyaque jida, pureama, micuanaja yatuca tsehue bayaque micuana pana adeba aya tibu, micuanaja ijaca tsehue bacayaque micuana pana ejene aya tibu. ¹⁷ Neadebacue riyaque. Beru yuequedyatu Yusu equeque quisarati cuejaqui cuanara, tumbaedy ecuita tuyu cuanara jadya bacara ebari acuare ecue casa micuanara iyacua bayaque. Bacacara ebari tuna acuare ecue quisarati iyacua micuanara bacayaque. Jadya ama bucha tunaja anihua ama emajaca baishu ni baca ishu.

Jesúsra pana cueja cuatsabiji uhuauhua puji equeque acuareque

(Mr 4.13-20; Lc 8.11-15)

¹⁸ “Pana ijacobaca neacue. Pana cueja micuana aya uhuauhua puji cuatsabiji equeque eje buchique.
¹⁹ Umaetu Yusura naruyaju eje buchique quisarati bacsatsu masadama nime aputaya, Satanásra masadama pana nime aputashamere aya tibu. Tuna tuna ediji pajidaque buchique. ²⁰ Umaeratu ejetsunue ishü ama pureama tsehue Yusuja quisarati bacaya. Nerecada juya cabatitsu tuna ejenejacaya. Quisarati ejenehua baatsu jidama atayaju, masadama tuna ejenejacaya, pana adeba aya ama tibu. Tuna tuna yahua macana dedamaque buchique. Huijahua cuanaquetu macana quini danetsu tsunuda ama juya, etiri dedama tibu.
²² Umaera Yusuja quisarati bacaya cuanaratu ejenejacaya, riyaque yahua cuanaquedya jutidya dyaque inime tsapequi aya tibu. Tunajatu inime juya chipiru dyaque umada anitsu camadya pureama ejuu bucha. Chipiru dyaque iyuhueda baatsu tuna tunadya jutidya ijahue catiya. Jadya juatsu tuna Yusu muijacaya. Tuna tuna yahua acuija quinique buchique. ²³ Umae cuana Yusuja quisarati bacaqui juya cuanaratu adebaajeyadya jutidya. Tuna eje bucha anieju tuna ejitaju Yusuja biji eque aniyaque. Umae cuana tunajatu tsahuaya eaqueja catyati ishü. Tunadya tuna esaju jetiama etsucaca juhuaque bucha, cien, shucuta tunca, quimisha tunca jadya catyatihuaque buchique, —jadya tuna Jesúsra acuare tuhua cuanaque.

Trigo ducu trigo jiuque uhuatanacuareque

²⁴ Jadya juatsu tuna Jesúsra bahuityanucacuare:
 —Bahue micuana amerecara aya eje bucha micuana amena Yusura naruyaque. Nebacacue riyaque cuatsabiji. Jucuaire tu ecuita. Cuacuairetu tuja teeju trigo uhuara. Uhuatsutu dirunucacuare tuja etareju.
²⁵ Tumetu meta tuque, dutya tuja etareju aniya cuana tsehue tahuiyaju, nubicuare tuja teeju tee metseque ujeu baquique. Uhuacuaretu tumeque teeju nucadya peya etsucaca. Etsucaca euhua cuanaque huijatsutu trigo bae cuitadya jucuaire. Ecaca bacue tuja arataqui ama jucuaire. Trigo jiuque tsucaca uhuatsutu dirucuaire. ²⁶ Uhuahuajutu dutya euhua cuanaque huijacuaire trigo neri, trigo jiuque jadya. Cacacatihuaju pisi amena esaju baatsutu teeju mere juya cuanara chamacama adebacuaire dutya tumeque teeju huijahuaque trigoque ama. ²⁷ Jadya baatsu tuna emechiqui queja cuacuare. “Tata, miratu uhuachine teeju trigo neri. Jetiama cuitatu huijachine trigo ducu trigo jiuque. ¿Airatu uhuachine tume jidamaque huijachineque?” jadya tunajatu aticuare. ²⁸ Tee metsequetu jucuaire: “Ecue inimetu ejeque ique ujeu baquira uhuachine”, jadya tuna emechiquira acuare. “¿Mutsumerecara mira ecuana aya trigo jiuque?” jadya tunajatu bacaduracuare. ²⁹ “Paju ani. Mutsuyaque tuque micuana emutsuu trigo neri. ³⁰ Panetidya jutidya ecuanara racaya tupu. Trigo raca ishüque huecaca jueti-

huaju piisi tuque mere puji cuana jadya abuque: ‘Icuene nemutsucue trigo jiuque. Mutsutsu nequerebarecua. Jadya aatsu nepahuacua. Jadya bajejee dutya aatsu piisi neracacua trigo. Racatsu neiyacua ecue trigo iyaquiju”, jadyatu acuare emechiquira mere puji cuana, —jadya tuna Jesúsra cuejacuaire.

(Jadiquetu Jesúsra cuatsabiji eque huecashacuare, arepa ecuana riyaque yahua yuhua cama aniya ama bucha, ejeque huecaca Yusuja cuanaque Yusuja ama cuanaque jadya cajuquetibuque.)

Mostaza caca cuatsabiji eque bahuityacuareque

(Mr 4.30-32; Lc 13.18-19)

³¹ Jesúsra tuna bahuityanucacuare peya cuatsabiji eque bahuityayaque.

—Bahue micuana amerecara aya eje bucha micuana amena Yusura naruyaque. Adebayadya micuana mostaza caca, teeju ehuataque. ³² Achaachaque piji, bataqui nerique ama. Jadya ama buchatu buraratsu, huijatsu danetsu dyaque arida juya, teeju peya euhua cuanaque bucha ama. Tuja yaa cuanajudyatu upati huiri cuana eja catiya, —jadya tuna Jesúsra acuare.

(Riyaque cuatsabiji eque tuna Jesúsra jadique huecashacuare. Arepa catibutiyaque eje uma piji tuaqueja catyatiya ama bucha, tuequedya tuna riyá piji, riyá piji jetiama catyatiajeya.)

Levadura cuatsabiji eque bahuityacuareque

(Lc 13.20-21)

³³ Tumebaedya tujatu ecana riyaque cuatsabiji eque bahuityanucacuare:

—Bahue micuana amerecara aya eje bucha micuana amena Yusura naruyaque. Epunatu pan ejuu. Eiyautu riyá piji levadura. Quimisha equiniqui medidaju tujatu harina ehua. Tumeque riyá piji levaduraradyatu dutya esaca huahuaju emujashau, —jadya tuna Jesúsra acuare.

(Riyaque cuatsabiji eque tujatu ecana jadique huecashacara acuare. Levadurara dutya esaca mujashaya bucha, jadidyatu tuja quisarati dutya queja cuejatanabuque jadique.)

Eje bucha juatsu Jesúsra cuatsabiji eque bahuityayaque cuejacuaireque

(Mr 4.33-34)

³⁴ Jesusratu ecuita jetiamaque cuatsabiji eque cama bahuityacuare. Cuatsabijima tujatu ecana bahuityacuare ama. Pana adebamere ama tujatu ecana cuatsabiji eque acuare. ³⁵ Jadya juetu jucuaire Yusu equeque quisarati cuejaquira acuareque:

“Cuatsabiji eque tuna bahuityabuque.
 Yusura yahua iyahua equeque etehuaque tuque quisarati abuque”,
 jadya patu Yusu equeque quisarati quejaquira hueneacuare.

Trigo ducu trigo jiuque eje buchique jadique

³⁶ Jadya juatsutu Jesúsra camadya ishu isaracuare tuhua aniya cuanaque. Tuna isaratsutu ecuana tsehue etareju dirucuare. Tume tuque ecuana jipetinucacuare.

—Ecuana peya cuana tsehueju mira ecuana cuatsabiji cuejehua trigo ducu trigo jiuque uhuacuareque. ¿Ai mira ecuana bahuityacara aya tumeque cuatsabiji eque? —jadya tuque ecuana acuare.

³⁷ Jesúsra ecuana quemitsacuare:

—IDYA ECUITA tee metse buchique, trigo neri uhuaquique. ³⁸ Yahua tu tee buchique. Dutya ecue neri cuanaque tuna trigo neri cuana buchique. Satanásja cuanaque tuna trigo jiuque ehuijaque buchique. ³⁹ Satanás tu trigo jiuque uhuaquique buchique. Mere puji cuanara teeju euhuaque jahuanehuaju huesahuaju jucuaque tu yahua tereyaju judadibuqueque buchique. Tume teeju euhuaque huesa puji cuana tu barepaju Yusu tsahuaqui cuanaque jadique. ⁴⁰ Trigo huesaqui cuanara trigo jiuque trigo ducuque cuitubut-su pahuacuareque jadiquetu yahua tereyaju judadibuqueque. ⁴¹ Tumeque huecaca ique enaruqui juatsu tuque ique barepaju tsahuaqui cuanaque cuadishabuque, dutya jidama juhua cuanaque sita ishu, dutya peya cuana jidama amerequi juhua cuanaque. ⁴² Tume cuanaque tuna ijahuaja etiquiju ijehue-tanabuque. Tuhua tuna payaque dutya etse tari jubuque. ⁴³ Tumetu adebataqui jubuque eje cuanaque Yusura amereya eque cuita juhuaque. Jidama cuana ducuque tuna cuinanabuque, barepa asicadaque cuetiyaju ijete epujetanau bucha. Tuna tuna tuhua Etataque Yusu huaraji arida queja judirubuque.

“Micuana quijabacati aqui juatsu, nebacacue, —jadya tura ecuana acuare.

Cuatsabiji chipiru etehua equeque

⁴⁴ Jesúsra ecuana bahuityanucacuare:

—Bahue micuana amerecara aya eje bucha micuana Yusura naruyaque. Riyaque cuatsabiji micuana cuejaya. Jucuaque patu ecuita. Yahua puru juyaque tujatu dadicuare dyaque tsuje aridaque etehuaque. Daditsu-tu dyaque pureama jucuaque. Tuja yahua juque ama tujatu dadicuare. Jadya tibudya tujatu tuhua nucadya papanucacuare. Tehuanucatsu patu dirucuare, tuja dutya ai aniyaque catyati ara, dyaque umada chipiru anitsu tumeque yahua quemi ishu. Quemicuaredya tura, —jadya ecuana Jesúsra cuejacuare.

(Riyaque cuatsabiji eque tuna Jesúsra huecashacara acuare. Tuja juishuque patu dyaque saretanayaque. Eje buchadya tujaque jucara ebari tsehue ecuana tuja ishu jutaqui.)

Tumu dyaque tiquidaque tsuje aridaque cuatsabiji equeque

⁴⁵ Bahuityanucacuare ecuana Jesúsra:

—Bahue micuana amerecara anucaya eje bucha micuana amena Yusura naruyaque. Anicuaretu catyati puji tumu dyaque tiquidaque tsuje aridaque perla bacani sare juyaque. ⁴⁶ Jadya juyajutu ejera cuana bamerecuare tumu dyaque tiquidaque tsuje aridaque. Dutya tuja ai aniyaque catyati caticuare tumu quemi ishu. Quemicuaredya tura, —jadya tura ecuana cuejacuare.

(Riyaque cuatsabiji eque tuna Jesúsra huecashacara acuare tuja juishuque patu dutya ai dyaque tsuje arida cuanaque buchique.)

Jae deruqui equeque cuatsabiji

⁴⁷ Jesúsra ecuana bahuityanucacuare:

—Bahue micuana amerecara aya eje bucha micuana amena Yusura naruyaque. Riyaque cuatsabiji micuana cuejaya. Ecuita cuanaratu marecuare jae deruquique enaju. Derucuare tuna jae bape bape cuanaque earataque, arata baecuaque jadya cuanaque. ⁴⁸ Jae deruquique jequehuajutu jae puji cuanara repecuare mejijiju. Tuhuadya tuna jae earataque, arata baecuaque jadya mepe juanibarecuare. Jae earata cuanaque tunajatu jitiju ishacuare. Arata baecua cuanaque tunajatu ijehuebarecuare. ⁴⁹ Jadidyatu jubuque tere ishucue huecaca juetihuaju. Barepa juque Yusu tsahuaqui cuanaque tuna jebuque ecuita Yusuja ama cuanaque, ecuita Yusuja cuanaque ducuque mepera. ⁵⁰ Jidama cuanaque tunajatu ijehuebuque ijahuaja etiquiju. Tuhua tuna pajacabuque ama. Dyaque nercada tuna jubuque. Ujera tuna etse tari amerebuque, —jadya tura ecuana acuare.

Yusuja inime beruque, iyacuaque jadya

⁵¹ Tume ecuana Jesúsra bacaduracuare:

—¿Jutiyadya micuanaja inimeju era cuejehuaque?

—Jejee, Ecuana Cuatsashaquique. Jutiyadya tuque ecuanaja inimeju, —jadya tuque ecuana acuare.

⁵² Tura ecuana acuare:

—Dyaque jida tu cacuatsashati bahuityaqui cuanaque eaqueja catyati ishu. Jadya juatsu tunajatu chamacama pana cueja eau beruque inime equeque, iyacua equeque jadique. Ecuita dutya tuja aniyaque tsumequi buchique tuna, iyacuaque, beruque jadya tsumeya bucha tuja etareju cuanaja jida ishu, —jadya ecuana Jesúsra acuare.

Jesús Nazaretju juetinucacuareque

(Mr 6.1-6; Lc 4.16-30)

⁵³ Tume cuanaque cuatsabiji atillatsutu Jesús dirunucacuare tuhuaque. ⁵⁴ Cuacuaretu Nazaretju, tuque catemuticuareju. Caradati ishucue etareju tujatu eana bahuityacuare. Anajacatacuaretu tuhua casitaticuare cuanaque. Bacuare tuna tura Yusuja casa tsehue aya cuanaque.

—Riyaque ecuita taa dyaque inimequi quisarati ishu. ¿Eju jatsuri riyaque jadya quisarati cabahuityatihua? ¿Eje bucha ae jatsu rejari eau ejeque ecuitara ayaque

ama? ⁵⁵ Nanadaju ecuanara bacuareque taa riya. ¿Riyaquedya ama jatsu ri Joséja ebacuaque, mesa, caju cuana pujija ebacuaque? ¿Mariaja ebacuaque di taa riya? ¿Riyaque di taa ri Santiago, José, Simón, Judas jadyaja euji que? ⁵⁶ Tuja enuu cuanaque tupuju cuanaque taa rena ecuanaja epujudya aniya. ¿Tume jat-suri eje bucha juatsu dyaque quisarati bahue? —jadya tuna jucuare.

⁵⁷ Tunara nanada equedya bahua tibu, tunajatu ejenecarama acuare tuque Mesías, Yusuja Emepeque jadique. Jadya tibudya tunajatu bacacarama acuare tura bahuityayaque.

Jesúsra tuna acuare:

—Quisarati dyaque jida cuanaque cuejaqui cuanaque tuna dutya queja jida batsataya, tunaja epuju cuanara cuita bacue aijama. Dutyara tuna pana ija-cabaca aya, tunaja ata cuanara bacue aijama, —jadyatu Jesúsra acuare Nazaretju cuanaque.

⁵⁸ Tuhua tuja epuju cuita tujatu anericuare ama ai ejeque ecuitaja ataquique ama, tuhua cuanaque tu-aqueja catyaticarama jucuare baatsu.

Eje bucha iyetanae Juan Ecuira Cuana Utsaquique jucuareque

(Mr 6.14-29; Lc 9.7-9)

14 Tume patyatu Herodes Galilea naruquique jucuare. Bacuaretu Jesús ai juyaque, eje bucha juyaque jadya.

² —Tumeque Jesústu baya ecuita ama. Juan Ecuira Cuana Utsaquique emajuque cacuitatitsu netitsuranu-cachineque tume. Jadya tibudyatu Jesúsja casa aniya ejeque ecuitaja ataquique ama aishu, —jadyatu Herodesra acuare tuque merequi cuanaque.

³ Herodestu pana bahuedya jucuare Juan emajuque, tura cuitadya iyemerechine tibu. Iyacua micuana Juan eje bucha iyetanae jucuareque cuejaya. Herodesratu Juan inamerecuare. Inameretsu tujatu etare apudaju ishamerecuare. Etare apudaju tujatu ishamerecuare Herodías pureamatura ishu. Tumeque epuna tujatu ejuque jahuane jucuare, tuatsehuequique Felipeja ehuaneeque. Tumeque epunaratu Felipe jacacuare, Herodes tsehue anicara juatsu. ⁴ Eje uma cuejadyatu Juanra acuare Herodes: “Caquemititaqui amami micue miatsehuequiya ehuaneeque tsehue”, jadyapa tujatu acuare.

⁵ Jadya tibudya tujatu Juan iyecara acuare. Jadya ama bucha tujatu inime tupucuare: “Juan eyemereu; tume taa tu ecuita cuana eatsehue ecahuaitiu. Tunaratu ejeneya Juan Yusuja quisarati cuejaquique”. Ecuita cuana mubatsu tujatu Juan risimeretsu ishamerecuare jutidya. ⁶ Herodesja cuinana huecaca camaratsuru-tiyaque chine ishutu Herodiasja ebacujunaque ihuarahua cuanaja yacuaju ijahue jucuare. Jadya tuque ijahue juyaju baatsutu Herodesra bijisericuare tuja ijahue. ⁷ Tuque tuja biji ijahue juya baatsu tujatu epuna ehue ebari acuare:

—Bacacue ique ai mira bijida bayaque. Etyaudya mique era. Yusura ique panerecatura, era mique

tyaana ayaque tyayaque ama juatsu, —jadyatu Herodesra epuna ehue ebari acuare.

⁸ Ecuacuera ana cuejahuajutu epuna ehue ebarira Herodes bacacuare:

—Iyemerecue Juan Ecuira Cuana Utsaquique. Piti tubumeretsu, tuja iyuca pejaju iyatsu, ique inamerecue. Riyaque mique bacaya, —jadyapa tujatu acuare.

⁹ Jadya ahuaajutu Herodes dyaque peya inime jucuare. Jadya ama bucha tujatu ataquidya jucuare, tura quisarati ahuaque tuatsehue chine juya cuanaja ijacaju jadya juhua tibu, “Yusura ique panerecatura, era tyaana ahuaque tyayaque ama juatsu”. Jadya tibu tujatu cuatsashacuare tuja sudaru cuana:

¹⁰ —Necuacue etare apudaju. Juan Ecuira Cuana Utsaquique nepititubuticue, —jadyapa tujatu ecana acuare.

¹¹ Tume tuna cuatsashatahua equedya jucuare. Jadya aatsu tunajatu Juanja iyuca pejaju iyatsu epuna ehue ebari tyaticuare. Tunara tyatihuaju tujatu ecuaque inamereticuare.

¹² Jadya juhuaque bahue juatsutu Juanra mepehua cuanara emajuque queticuare. Dujutsu tuna ishaticuare caniju. Jadya aatsu tunajatu cuejaticuare Jesús, Juan eje bucha juhuaque.

(Herodesratu dutya cuanaque inime tupuqui acuare. Jadya tibudya tujatu Jesús, Juan Ecuira Cuana Utsaquique chacha enetitsuranuacuaque bucha bacuare.)

Jesúsra pishica pan, beta jae jadya umanashacuareque pishica mil ecuita cuana mihua ishu

(Mr 6.30-44; Lc 9.10-17; Jn 6.1-14)

¹³ Juan Ecuira Cuana Utsaquique majuchineque bahue juatsutu Jesús tuhuaque cuacuare cuaba eque peya queja amaca ecuanana tsehue cuita camadya. Ecuita cuanaratu badadicuare eje queja amaca cuayaque. Badaditsu tuna cuacuare tunaja epu cuana juque yahua eque tuaqueja juti ishu. ¹⁴ Cuaba juque cuinanyaratu Jesúsra bacuare jetiama ecuita tuque ihua juyaju. Jadya baatsu tujatu ecana nerecada banaticuare. Chachanecuaratu ujejeda cuanaque tunara dujuya cuanaque. ¹⁵ Amena ijete nubihuie ecuanana tura mepehua cuanara jipeticuare.

—Amena taa ri chinehua. Rehuari aijama ni eju buchique ara ishu cuanaque quemi ishuque. Isaracue ecuita cuana. Padiru ecana epu cuanaju, eje queja tuna japadama aniyaju. Pacabacatidiru ecana ara ishu cuanaque, —jadya tuque ecuanana aticuare.

¹⁶ —Cuadishaya ama tuna era. Micuanaradya ecana nemihuacue, —jadya ecuanana Jesúsra acuare.

¹⁷ —Rehua rique ecuanaja aniya pishica pan, beta jae jadya piji camadya, —jadya tuque ecuanana acuare.

¹⁸ —Nebecue requeja, —jadya ecuanana Jesúsra acuare.

¹⁹ Tume tujatu ecuita cuana iyabutyamerecuare tuhua tuna netibareyaju cuitadya. Jadya juatsu tujatu inaticuare pishica pan, beta jae jadya. Inatsu tujatu

barepa Yusu aniya queja petacuare. Petayaquetu jucuaire:

—Yusurupai mique aya, Tata, mira ecuana riyaque ara ishuque tyahua tibu, —jadya tujatu Yusu acuare.

Yusurupai au jadya aatsu tujatu pan cuana cuesi-barecuare. Jadya aatsu tura ecuana tyabarecuare, ecuita cuana ecuanaja tyabare ishu. Tura ecuana tyabareya tupu tujatu jetiama umanashacuare.

²⁰ Dutya tuna araaracuare, pana jeque juya tupu. Amena jadya juhuaju tuque ecuana jequeshabarecuare peadya tunca beta earacana jiti arida cuanaque pan tunara arabishahua cuana tsehue, jae jadya tsehue.

²¹ Jetieque ama tuna araaracuare. Pishica mil deca cuana tuna araaracuare; epuna cuana, ebacua piji cuana jadya piyebamaque.

Jesús ena dyaque eque ajecuareque

(Mr 6.45-52; Jn 6.16-21)

²² Tume ecuana Jesúsra jadya acuare:

—Neanibutecue cuabaju. Necarequeticue bei yueque macare. Tumidya micuana adadiya ecuita cuana isaratsu, —jadya tura ecuana acuare.

Tura jadya ahuaaju ecuana cuabaju anibutecuaire. Anibute jadya juatsu ecuana carequeticuaire, Jesús ecuita jetiamaque isara juya tupu. ²³ Amena ecuita cuana cuadisha ishu isaratsutu Jesús tsuracuare emata baruda cuita amaju Yusu tsehue quisarati ishu.

Apunaya tupudyatu tuhua jucuaire. ²⁴ Ecuana ecuana bei patya patya juajecuare. Ena pacutu cuaba queja catsatana catsatana jucuaire, cuejijira ecuana acuatsuruya tibu. ²⁵ Amena huecaca japadara tacure quique pidya juhuaju ecuana Jesúsra jipedirunucacuare ena dyaque eque ajeajeyara. ²⁶ Jesús ena dyaque eque ajeajeyaju batsatsu ecuana dyaque bajida jucuaire. Bajida juatsu ecuana jadya jucuaire:

—Ita nebacue! Yatanana tume! —jadya ecuana quique eque jucuaire.

²⁷ Jesúsra ecuana yume quiquedya acuare:

—Bajida nejuume! Dyda ique! Casada nejucue!

²⁸ Pedroratu acuare:

—Ecuana Cuatsashaquique, midya ni taa mique, ique dyadi ajeshacuedya ena dyaque eque mique netiya tupu, —jadyatu Pedroratu acuare.

²⁹ —Jecue taa, —jadyatu Jesúsra acuare.

Jadya ayajutu Pedro butecuaire cuaba juque. Butetsutu ena dyaque eque ajequenacuare Jesús netiya queja.

³⁰ Cuejijira bucucushaya cabatitsutu bajida jucuaire. Tumetu ajeyaque nubiajecuare.

—Ecuana Cuatsashaquique, chachanecue ique! —jadyatu Pedro quiquecuare.

³¹ Tumeque ura cuitadyatu Jesúsra ebi rirutsu inaticuaire.

—Ejenehua ama tuquemi era cuejipa casada juque echachaneuque, ena pacu juque jadya. ¿Eje bucha juatsu tuquemi ejenehua ama era echachaneuque? —jadya tujatu acuare.

³² Tatse cuabaju tsurahuaaju cuejiji neticuaire.

³³ Tume ecuana cuaba ducu anicuaire cuanaque chichucata jucuaire Jesúsja yacuaju tuque muiyaque.

—Pusha ama cuitadya mi Yusuja Ebacuaque! —jadya tuque ecuana acuare.

Jesúsra ujejeda cuanaque Genesaretju chachanecuareque

(Mr 6.53-56)

³⁴ Bei riquetsu ecuana Genesaret yahuaju jaratsuranaticuaire. ³⁵ Tuhua aniya cuanaratu Jesús adebat-sacuare. Masadama tunajatu tsapecuare quisarati tuque junatiyaque tumeque epuju. Jetiama ecuitatu peya cuejati peya cuejati jadya jucuaire tunaja ujejeda cuanaque Jesús queja duju ishu, tuja ecana chachane ishu. ³⁶ Canerecaticuaire tuna tuaqueja:

—Cajabamereticue taa ujejeda cuana queja micue una cuatsa cuana pijidya jutidya, tuna chacha juishu, —jadya tunajatu Jesús acuare.

Dutya ejeque tuja una jabaqui jucuaire cuanaque tuna pana chacha jubarecuare.

Baba cuanaja bahue eque ama ecuana jutaquique, Yusuja inime eque

(Mr 7.1-23)

15 Umae fariseo cuana, cacuatsashati bahuitaqui cuanaque jadya tuna juticuaire Jerusalén juque. Junatitsu tunajatu Jesús jipeticuaire. Jipetitsu tunajatu bacaduracuare:

² —Mira mepehua cuanaquetu ecuanaja baba cuanaja bahue eque ama juya. Araara ishutu micue cuanaque emetucu cutsatiya ama ecuanaja bahue eque. ¿Eje bucha juatsu? —jadya tunajatu Jesús acuare.

³ Tura tuna quemitsacuare:

—Arepá micuana peya cuanapa jidama juya jadya aya ama bucha, dutya amadya tuque micuana aya Yusura amerehuaque. Micuanaja bahue cuana eque cuitadya jutidya juyaque tuque micuana Yusura amereyaque aya ama. ⁴ Moisés equetu Yusura cuatsashacuare béru: “Muibacue micue tata, micue cuaa jadya”. Tumebaedyatu jucuaire: “Paiyetana ejeque etataqueja ishu, ecuaqueja ishu jidama quisarati ayaque”. ⁵ Micuanaratu cuarehua riyaque cacuatsashati. Tume micuana, micuanaja tata nerecada cuanara catsahuamereti ishu bacayaju, jubahue: “Tsahuataqui ama mique ecue, amena ecue dutya ai aniyaque amena Yusu etya tibu”. ⁶ Ejera jadya quisarati ayaquetu tuja etataque, tuja ecuaque tsahuataqui ama, jadya tuque micuanaja cuatsasha bahue. Jadya apupashae tuque micuana Yusura cuatsashahuaque aya, micuana cuejatahua cuana equedya jutidya juishu. ⁷ Yusu adebaquipa ejuu, jadya micuana juya, ai yuneri ama. Isafás Yusu equeque quisarati cuejaquiratu micuana jadya ayaque hueneuare jadya:

⁸ “Riyaque ecuita cuanara muiya tunaja quisarati tsehue camadya.

Jadya ama bucha tuna eje bucha juya eque ejitaju ecue cuanaque ama.

⁹ Yanacana cuita tunara tunaja bahue cuana eque muiya.

Tunara bahuityayaquetu ecuita cuanara inime tupuyaquedya jutidya”, jadyatu Yusu jucuafe Isafas eque, —jadyatu Jesúsra acuare fariseo cuana, cacuatsashati bahuityaqui cuanaque jadya.

¹⁰ Tumetu Jesúsra ihuaracuare ecuita cuana tuhua eje uma netiya cuanaque.

—Pana baca neacue. ¹¹ Ecuitara ai arayaratu ecuita cajuchatishaya ama. Micuanaja ducuta inime jidamaque cuinanayaratu cajuchatishaya, —jadya tuna Jesúsra acuare.

¹² Tume tuque ecuanana tura mepehua cuanara jipeticuare.

—¿Bahuedyami fariseo cuana mira quisarati jadya ayaju cahuaitiyaque? —jadya tuque ecuanana bacaduracuare.

¹³ —Ecue Etata barepajuja ama cuanaque tuna pana aputashatana jubuque, acui tiritu mutsu eau bucha.

¹⁴ Nebacaume tunaja quisarati. Arepa tuna Yusuja quisarati pana adeba ama aya ama bucha tunajatu peya cuana bahuityacara aya. Shuhuique ecatsedya jutidya ecaquerenitiu buchique tuna. Shuhui ni peya shuhuique eaquereniu, betadya tatse caniju epacacadiruu. Tumebae cuitadya tuna; yanacana cuita tuna peya cuana Yusu adebamerecara juya. Tunara, ni peyara jadyatu Yusu adebabuque ama, —jadya ecuanana Jesúsra acuare.

¹⁵ Jadya ayajutu Pedrora Jesús jipetitsu isaraticuare.

—Arepa ecuanaja cacuatsashati eque ai arata bae cuaque aniya ama bucha, mira bacue ecuanana cuejahua ai araya tsehuepa ecuanana cajuchatiya ama jadya. Pana cueja ecuanana acue, —jadyatu Pedrora acuare.

¹⁶ —Arepa micuana eatsehue juneniya ama bucha, tuque micuana adebaya ama jari micuana era eje buchique bahuityacara ayaque. Ni ejeque earaquira micuana cajuchatishaya ama. ¹⁷ Earaqi tu ecuanaja ecuita casatura ishuedya jutidya. Dutya earaqi ecuatasa eque nubiyauquetu ecare canijudya jutidya judiruya. Tuhuaquedyatu cuinanaya. ¹⁸ Educu juquetu ecuitaja juetiya cajuchati ishuedya. ¹⁹ Tuhuaquedyatu riya cuanaque jidama cuanaque, bijiseri, au jadya cuanaque juetiya: jidama inime tupucara cuanaque, quiyeticaraque, peya tsehue ecaquemitique jaraquerecaraque, chiri jucaraque, pusha pusha jucaraque, quijillahuanaticaraque jadya. ²⁰ Dutya riya cuanaratu ecuita cajuchatishaya. Yusratu asicabaya riya cuanaque. Araaraya ni micuana emetucu cuana cutsatimaque fariseo cuana cutsatiya bucha, jadya cuana tsehue micuana cajuchatiya ama ni riya piji buchique, —jadya tura ecuanana acuare.

Epuna israelitaque ama Jesús queja catyaticuareque
(Mr 7.24-30)

²¹ Jesússtu cuanucacuare tuhuaque. Tumetu cuacuare Tiro, Sidón jadya queja amaca. ²² Epuna israelitara amatu jipeticuare. Tumeque epunatu jucuafe israelita

ama cuana eque ejuracanaque ecuanaja baba cuana Canaánju anidiruma jariju anicuareque. Jipetsu tujatu quiquecuare:

—Ique Cuatsashaquique, midyami David eque ejuracanaque. Nerecabacue ique. Ijehuecuinacue ijahua cuana ecue ebacujuna juque, —jadyatu epunara aticuare Jesús.

²³ Isaraya ama buchatu Jesús diruajecuaredya jutidya. Epuna bacue quiqueajecuaredya jutidya. Bacacarama ecuanana acuare.

—Cuejacue tumeque epuna. Padiru. Ecuanana tupujutu quiquebeya. Bacahuillahua tuque ecuanana amena, —jadya tuque ecuanana Jesús acuare.

²⁴ —Ecuanaja ata israelita cuana tuna uhuisha cuji eju buchique. Yusura ique cuadishahua tuna tsahua ishuhui, israelita ama cuanaque tsahua ishuhui ama, —jadyatu Jesús jucuafe.

²⁵ Epuna bacue Jesúsja yacuaju junatitsu nuyunaticuare.

—Tsahuacue ique, Ique Cuatsashaquique, —jadya tujatu anaticuare.

²⁶ —Adebayami quisarati: “Jidama tu ebacua cuana earaqi secatsu chapa cuana tyau” jadicue, —jadyatu Jesús jucuafe.

²⁷ —Jejee, Ique Cuatsashaquique. Jadya ama buchatu chapa cuanara arayadya enimetsequera araarayaque mesa juque pacacashayaque, —jadyatu epunara acuare.

(Jadya quisarati tsehue tujatu acuare. Tumebaedyatu israelita ama cuanaque Jesús queja ecatyatiudya.)

²⁸ —Yuneri cuitadya tuquemi pana ejene aya era micue bacujuna juque ijahua cuana eijehuecuinauque. Ayadya tuque era mira bacahua eque, —jadyatu Jesúsra acuare.

Tumeque ura cuitadyatu ebacujunaque quijahuatijacacuare.

Jesúsra jetiama ujejeda cuanaque chachanecuareque

²⁹ Jesússtu tuhuaque dirunucatsu cueticuare Galilea bei jiruru eque. Tuequedyatu tsuracuare emataju.

Tsuratsutu tuhuadya anibutecuare. ³⁰ Jetiamatu ecuita cuana tuaqueja juticuare. Dujucuafe tuna aje jidama cuanaque, shuhui cuanaque, ebi jidama cuanaque, quisarati baecua cuanaque, umada peya ujeje tsehue cuanaque jadya. Jesús anibutehua peque tunajatu iyabareticuare. Chachanecuaredya tujatu ecana.

³¹ Quisarati baecua cuanaque tuna quisaraticuare. Ebi jidama cuanaquetu chacha jucuafe. Ajebaecua cuanaque tuna ajecuare. Shuhui cuanaque tuna capeticuare. Dutya riya cuanaque baatsutu ecuita cuana anajacatacuare. Pureama tuna Yusu atibunecuare:

—Dyaque casada, jida jadya taa Yusu, Yusu israelita cuanara muiyaque, —jadya tunajatu acuare.

Jesúsra pushi mil ecuita pacarucu pan eje uma jae piji jadya umanashatsu mihuacuareque

(Mr 8.1-10)

³² Tume ecuanana Jesúsra ihuaracuare isara ishuhui:

—Nerecada taa rique ecuita cuana arama baatsu baya, riya barepa tibene equeque taa rena ique ija-cabaca juyaque. Amena taa renajari aijama ara ishuque. Cuadishacarama taa rena aramaque aya tunaja etare cuanaju. Edijiju taa rena emajudiruu, —jadya ecuana Jesúsra acuare.

³³ —¿Eje bucha dadie jatsu tuque ecuana eau earaqui ecuita jetiamaja ishu, rehua ni ejeque buchique anitayaju ama? —jadya tuque ecuana acuare.

³⁴ Jesúsra ecuana bacaduracuare:

—¿Eje uma pan micuanaja aniya?

—Pacarucu piji camadya, eje uma cuana piji jae, —jadya tuque ecuana acuare.

³⁵ Tuequedya tujatu iyabutyamerecuare ecuita cuana. ³⁶ Yahuaju iyabutyameretsu tujatu inacuaru pacarucu pan, jae piji jadya.

—Yusurupai mique aya, Tata, mira ecuana riyaque earaqui tyahua tibu, —jadya tujatu Yusu acuare.

Yusurupai aatsu, tujatu pan cuesibarecuare. Cuesibaretsu umanashatsu tura ecuana tyabarecuare. Tudy tuque ecuana tyabarecuare ecuita cuana.

³⁷ Dudy tuna araaracuare jequeya tupu. Araara amena juatsu tuque ecuana jequeshabarecuare pacarucu jiti arida cuanaque pan cuesi cuana anidadihua tsehue.

³⁸ Jetieque ama tuna araaracuare. Pushi mil deca cuana tuna araaracuare, epuna cuana, ebacua cuana jadya piyebamaque.

³⁹ Jadya juatsu tujatu ecuita cuana amena isaracuare. Tuna isaratsutu anibutedirucuare cuabaju, Magadán queja amaca diru ishu.

Fariseo cuanara, saduceo cuanara, Jesúsra ai ejeque ecuitaja ataquique ama amerecara acuareque
(Mr 8.11-13; Lc 12.54-56)

16 Fariseo cuanara, saduceo cuanara jadyaratu baticuare Jesús. Sarecuare tunajatu eje bucha eque jidama aishu. Tume tunajatu Jesús acuare:

—Acue ecuanaja yatucaju ai bapeque inimeradya jutidya, ecuana mique Yusura cuadishahuaque bahue juishu, —jadya tunajatu acuare, arepa tuna tuque Yusu equeque junahuaque ejenecarama acuare ama bucha.

² Jesusratu adebacuaredya tunara inime tupuyaque. Jadya tibu tujatu ecana acuare:

—Barepa asicada cuanaque baatsu tuque micuana pana adeba abahue eje bucha huecaca juyaque, nei juya, juyaque ama jadique. Chinequeja piji ni jacua pude juya, tume micuana jubahue “Metajudyatu jida juya huecaca”. Micuanara quisarati ahua bae cuitadyatu juya. ³ Apudajudy barepa jidama nei jucara juyaju, huani ducu ijete riya piji baatsu micuana jubahue: “Iyacuari nei juya” jadya. Tumetu micuanara quisarati ahua equedya juya. Yusuratu jetiama ahua ique tu-aquejaque junahuaque adebamere ishuque. Micuanaradya jutidyatu adebahua ama, arepa micuana huecaca cuana eje buchique adeba bahue ama bucha.

⁴ Micuana micuana jidama inime cadujutiya cuanaque. Yusu micuana iyuhueda bajacahua, ni micuana tuja

yana equedya juya. “Acue ai inimeradya jutidya, ecuana mique Yusura cuadishahuaque bahue juishu”, jadya micuanara aya. Aya ama tuque era, ni aidya jutidya. Jonás jucuaruque cuita camadya micuana huecashaya, —jadya tujatu ecana acuare.

Jadya isarae aatsu tujatu ecana shanaquenacuare.

Fariseo cuanara bahuityacuareque tu levadura buchique
(Mr 8.14-21)

⁵ Nime aputacuare ecuana bei yueque macare cuayaque pan cadujuti ishu. ⁶ Tuhua ecuana Jesúsra acuare:

—Necanaruticue bacue fariseo cuanaja, saduceo cuanaja jadya levadura tsehue, —jadya ecuana Jesúsra acuare.

⁷ Ecuannaratu adebacuare ama eje buchique tura ecuana jadya ayaque. Jadya ecuana ecuana cama quisaraticuare:

—Ecuana pan nime aputahua baatsu tura ecuana jadya quisarati tsehue aya, —jadya ecuana jucuaru.

⁸ Jesusratu adebacuaredya ecuanara inime tupuyaque.

—¿Eje bucha juatsu micuana pan beishu nime aputahuaju era nereda aya bucha cabatiya? ¡Ejeneya ama tuque micuana era micuanaja ai aijama juyaque etyauque! ⁹ ¡Adebaya ama jari cuitadya tuque micuana era micuanara ai sareyaque etyauque! Pishica pan era pishica mil ecuitaja ishu tupu amerechine patya ¿eje uma jiti tuque micuana jequeshachine pan arabishahua cuana tsehue? ¿Adebaya ama jatsu micuanara? ¹⁰ Pacarucu pan umanashatsu era pushi mil ecuita aramerechineque, ¿eje uma jiti tuque micuana jequeshachine anidadichine cuana tsehue? ¿Nime aputachine cuitadya ni taa micuana era jadya achineque? ¹¹ Era adebaya ama eje bucha juatsu micuanara levadura jadya ayaque bape cueyane jutidya ayaque. Yudijidya tuque quisarati anucaya. Necanaruticue bacue fariseo cuanaja, saduceo cuanaja levadura tsehue, —jadya ecuana Jesúsra anucacuare.

¹² Chamacama ecuana adebacuare fariseo cuanara, saduceo cuanara jadya bahuityayaque jadya tura ayaque. “Levadura tsehue canarutitaquique ama”, tujatu jadya acuare.

Pedroro “Jesús tu Mesías Yusuja Emepeque” cuejacuareque
(Mr 8.27-30; Lc 9.18-21)

¹³ Jesússtu cuacuare Cesarea Filipino epu ebari japadama anitaya cuana queja. Cuayara tura ecuana bacaduranaticuare:

—¿Eje buchatu ecuita cuanara ecue ishu inime tupuya?

¹⁴ Ecuannaratu quemitsacuare:

—Umae cuanarami aya Juan Ecuita Cuana Ut-saquique emajuque enetitsuranucaque jadya. Peya cuanarami Elías jadya aya. Peya cuanarami Jeremías jadya aya. Peya cuanarami ejeque cuana Yusu

equeque quisarati cuejaquique baba cuana anicuare patyaque jadya aya, —jadya tuque ecuana acuare.

¹⁵ —¿Micuanara bacue, ique ai jadya aya? —jadya ecuana Jesúsra bacaduracuare.

¹⁶ —Miquemi Mesías, Yusuja Emepeque. Miquemi Yusu Chachaja Ebacuaque, —jadyatu Simón Pedrora Jesús acuare.

¹⁷ —Jadidya ique. Yusura jida amerecue, Simón Jonásja ebacuaque. Ni ejeque maju aquira amami adebamerehua riyaque. Ecue Etata barepajurami adebamerehua. ¹⁸ Miquemi Pedro. (Micue ebacani tu “Tumu aija bucucushataquimaque” jadique). Mira quisarati ahuarami ejitaju amerehua mique eaqueja catyatihuaque. Cuadishaya mique ecue quisarati cueja ishu, ecue cuanaque ique dyaque jida adebamere ishu. Aija aputashataqui ama, ni yuamaturataqui amatu eaqueja catyatiya cuanaque. Ni ejeque Satanásja ecuadishara tuna eyuamaturau ama. ¹⁹ Erami casa tyaya Yusura naruyaju judiru ishuque cueja ishu. Era etsecue pacasha ishu yahue etyau bucha tuque. Mira riyaque yahuaju “Jucha metse” jadya ayaquetu Yusura barepaju “Jucha metse” jadidya abuque. Mira riyaque yahuaju “Jucha metse” jadya amadya abuque —jadyatu Jesúsra Pedro acuare.

²⁰ Tume ecuana Jesúsra acuare:

—Necuejaume jari ni ejeque buchique ique Mesiasque, —jadya tura ecuana acuare.

Jesús eje bucha iyetanadadie juyaque cacuejaticuareque

(Mr 8.31-9.1; Lc 9.22-27)

²¹ Tumeque huecaca equetu Jesús cacuejatitibunecuare ecuana tura mepehua cuana queja tuque eje bucha judadiyaque.

—Eje tupu cuaya Jerusalénju. Emuiba cuanara, pae cuanaja huaraji cuanara, cacuatsashati bahuityaqui cuanara jadya dyaque nerecaturadadiya. Iyemeradadiya tunara ique. Quimisha huecaca juatsu netitsuranucaya, —jadya tura ecuana cuejaticibunecuare.

²² Pedroratu ejeneacuare ama Yusuja Emepeque jadya ejudadiuque. Jadya tibudya tujatu peya queja ihuara acuare. Ecuana peya queja jacameretsu piji tujatu Jesús nereda atibunecuare:

—Jadya quisarati aume. Yusura iyuhue batsacue mique, mira cuejehua bae judadi ishu ama, Ecuana Cuatsashaquique. ¿Arequemi jadya ejudadiu ama! —jadyatu Pedrora Jesús aticuare.

²³ Jesusratu huareretsu Pedro jadya acuare:

—Satanástu mique eque quisaratiya. Maju aqui cuana jaque jutidya tuquemi inime tupuya, Yusu jaque ama. Bacacarama tuque aya mique eque Satanás ama amara cuejayaque, —jadyatu Jesúsra Pedro acuare.

²⁴ Tume tura ecuana tura mepehua cuanaque isaracuare:

—Micuana eatsehue junenicara juyaque juatsu, era cuatsashaya eque neanicue, micuanaja biji eque

juneniyaque nime aputatsu, arepa micuana canerecaci, maju jadya jutaqui ama bucha, curusuju etata ejuu bucha. ²⁵ Micuana ni catehuatiya eaqueja ecatyatique eiyetauju, ejetsunue ama micuana anibuque. Tume micuana majubuque ni eje tupu Yusu queja judiru ishu ama. Micuana ni eaqueja catyatihua baatsu iyetaya, Yusu tsehue micuana anisiribuque, arepa micuanaja ecuita ririya ama bucha. ²⁶ Ecuita ni ijahuaja etiquiju judirubuque, ni aishu buchique tujatu jida juhua ama riyaque yahuaju tuja dutya ai anihuaque. Ni aishu buchiquetu jida ama dyaque chipiruda juishu, majudaditsu dutyadya shanadadiya tibu. Aijamatu ni ai buchique micuanara maju ishu ama etsujetyauque. ²⁷ Ejeque huecaca IQUE ECUITA junanucabuque. Barepaju Yusu tsahuaqui cuanara tajibeque. Ique junanucayajutu dutyara babuque ecue Etataja casa. Tsujetyanabuque tuna peadya peadya eje bucha anie tuna juhua eque. Era amereya eque juya cuanaque tuna jida tsehue babuque. Era amereya eque juya ama cuanaque tuna jidama abuque. ²⁸ Umae micuana rehuaeque majuhuishaya ama, dutya era ecue casa tsehue narutibuneya que badadiya tupu, —jadya tura ecuana acuare.

Jesús cabapeticuareque

(Mr 9.2-13; Lc 9.28-36)

17 Shucuta huecaca juatsutu Jesúsra dujuacuare emata barudaju Pedro, Santiago, Juan jadya. (Juan tu Santiago tsehuequique jucuaque). ² Tuhudyatu tunara petayaju cabapeticuare. Tuja ebutsequinitu tiquida jucuaque, ijetei bucha. Tuja unatu pajada, huecada dyaque tiquida jucuaque. ³ Masadaque amatu Moisés yanume, Elías yanume jadya ejitaju jucuaque. Tume tatse Jesús tsehue quisaratinacuare. Tuatsehue cuanaratu bacacuare quisaratiyaju. ⁴ Jadya baatsutu Pedrora Jesús acuare:

—Ecuana Cuatsashaquique, dyaque jida taa ecuana rehua. Micue jadya inimeque juatsu taa ecuana eau quimisha erere, peadya micue ishu, peya Moisésja ishu, peya bacue Elíasja ishu, —jadya tujatu acuare.

⁵ Pedro quisaratiya jarijudya tuna huani tiquidara dunutilacuare. Tume tunajatu bacacuare huani ducuque Yusu jadya quisaratiyaju:

—Riyaque rique ecue Ebacua dyaque iyuhuedaque. Dyaque pureama ishu rique aya. Nebacajacaume. Eje bucha tura cuejaya eque nejuque, —jadya tuna Yusura acuare.

⁶ Jesús tsehue cuahua cuanaque tuna jadya bacatsu dyaque bajida jucuaque. Jadya tibu tunajatu chichucata juatsu remetsu ebutsequini tsehue yahua tseracuare.

⁷ Tume tuna Jesúsra jipetitsu isaraticuare:

—Nenetitsuracue. Bajida nejuume.

⁸ Bajiyunucatsu tunajatu banucacuare ama Moisés, Elías jadya, Jesús camadya.

⁹ Emata juque butejeyara tuna Jesúsra cuatsashacuare:

—Necuejahuishaume jari ni ejeque buchique micuanara eje bucha bahuaque. IQUE ECUITA majuhuaque,

chacha netitsuranucahuaju piisi ecana necuejacue,
—jadya tuna Jesúsra acuare.

¹⁰ Tuatsehue cuahua cuanaratu Jesús bacaduracuare:
—¿Eje bucha juatsutu cacuatsashati bahuityaqui cuanara Eliaspa icuene junabuque, Mesías junama jariju, jadya aya? —jadya tunajatu bacaduracuare.

¹¹ Tura tuna quemitsacuare:
—Tunara bahuityayaque tu yuneridya. Eliastu icuene junabuque. Turadyatu dutya bajejenabuque. ¹² Pusha amadya micuana cuejaya. Elías buchiquetu amena junahuadya. Dutya jujerira tunajatu adebacuare ama. Eijacabacauque tunajatu ijahue ijahue acuare, tunara acara aya eque. Ique tunara tumbaedy ayaque, —jadya tujatu ecana acuare.

¹³ Tura jadya quisarati ayajutu tuatsehue cuahua cuanaja inime juticuare Juan Ecuíta Cuana Utsaquiquedya Mesías junamaju junataqui jucuareque.

Jesúsra ebacua piji ijahua cuanara quijahuatishayaque quijahuatishajacacuareque

(Mr 9.14-29; Lc 9.37-43)

¹⁴ Emata juque tuna butecuare. Jetiama ecuitara ihuayajutu Jesús judirucuaré. Jesús, quimisha tuatsehue cuahua cuanaque jadya tuna ecuita cuanara ihuayaju judirucuaré. Tumetu peadya ecuitara Jesús jipeticuaré. Tumetu chichucata jucuare tuja yacuaju tu-
aqueja canerecatiyaque.

¹⁵ —Ique Cuatsashaquique, nerecabacue ecue ebacua. Manu tuque ecue juya. Dyaque nerecadatu juya. Eje uma rihuitu eju etiquiju, jadya ama juatsu ena dedaju. ¹⁶ Riya behua mira mepehua cuana queja ijahua cuana ijehuecuinamere ishú datse. Ijehuecuinataqui ama tunajatu bahua, —jadya tujatu Jesús acuare.

¹⁷ Jadya bacatsutu Jesúsra acuare tuhua jucuare cuanaque:

—[Micuana micuana quejeneti baecua, cuejataqui ama jadya! Arepa micuana era ayaju bahua ama bucha, adebaya ama jaridya tuque micuana Yusuja casa. ¿Eje tupu cuita micuana eiduu? Nebecue requeja ebacua piji —jadya tuna Jesúsra acuare tuhua jucuare cuanaque.

¹⁸ Behuajutu Jesúsra nereda acuare ijahua ebacua piji quijahuatishaquique:

—Cuanacuare riyaque ebacua piji quejaque, —jadya tujatu acuare ijahua.

Nereda aatsu tujatu cuinanashacuare. Tumeque ura cuitadyatu ebacua piji quijahuatijacacuare, ni eje tupu jadya quijahuatinuca ishú ama.

¹⁹ Jadya juatsu tuque ecuana Jesús tsehue camadya cabatitsu bacaduracuare:

—¿Eje bucha juatsu tuque ecuana ijehuecuinataqui ama bahua tumeque ijahua ebacua piji yuamatu-
raquique? —jadya tuque ecuana acuare Jesús.

²⁰ —Ijehuecuinataqui ama tuque micuana tumeque ijahua bahua, era ijahua cuana ijehuecuina ishú que casa tyahuaque ejeneriya ama tibu. Micuanara ni ejenequena juhua, paju riya piji cuana; ni aidya jutidya

tuque micuana ataquima ama ebau. Emata ni micuana eau: “Netisicuacue”, enetisicuaudya tuque, era casa tyahuaque ejenehuaque juatsu. Mostaza caca achaacha piji; jadya ama buchatu baruda mostaza acui daneya. Tumbaedy riya piji cuana ni micuanaja eani quejeneti, eaudya tuque micuana ai ataquima buchique. ²¹ Micuanara ni Yusu bacaya tuja riyaque casa tyaishu, arama ni micuana equibetiu, eaudya tuque micuana riyaque. Aijamatu peya eje bucha eque aishuque, —jadya tura ecuana acuare.

Jesús eje bucha iyetanadadie juyaque cacuejatinucacuareque

(Mr 9.30-32; Lc 9.43-45)

²² Galilea yahua queja dutya juneni juyaque jari ecuaná Jesúsra cueja beta acuare tuque eje bucha juddiyaque.

—Ejera cuana tsetatsu inameredadiya IQUE ECUITA. Inameretsu tura ique iyecara juya cuana queja iyemeredadiyadya. ²³ Iyedadiya tunara ique. Iyehuaquimisha huecaca juatsu netitsuranucaya, —jadyatu cacuejaticuaré.

Jesús iyetanadadiyaque cacuejatiyaju bacatsu ecuaná dyaque capeya inimeticuaré.

Jesúsra tuque tsujebacayaju Yusuja etare juque mere tsahua ishú tsujetyacuareque

²⁴ Jesús ecuaná tsehue Capernaumju juetihuajutu Yusuja etareju mere juya cuanaque jecuare. Tuna tuna chipiru ecuanaja tyabahueque Yusuja etareju ai que-
mi, tsujetya jadya aishuque sitaqui cuanaque jucuare. Pedro jipetsu tunajatu bacaduracuare:

—¿Tsujetyadyatu chipiru tsehue Micuana Bahuityaquira Yusuja etareju tsujetya ishúque?

²⁵ Pedrora tuna quemitsacuare:

—Jejee, tsujetyadya tuja tuque, —jadyatu Pedro jucuare.

Pedrotu Jesús etareju netiyaju nubiticuaré. Nubiti-
huajutu Pedroja isarama jariju cuitadya Jesúsra isarat-
sacuare:

—Riyaque yahuaju ecuatsashaqui cuanara peya yahuaju cuanaque ijahue aatsu ¿eje cuanaque tunajatu chipiru bacaya tuna naruquija ishú? ¿Tunaja yahuajuquedya jutidya tuna bacaya, tunara catiju ijahue ahuaque ni taa? ¿Eje buchami adebaya, Pedro?

²⁶ —Catiju ijahue ahuaquedya, —jadyatu Pedrora acuare.

Jesústu quisaratinucacuare:

—Tuyudyami juya. Tunaja yahuaju cuanajatu tsujetyataqui ama ni riya piji buchique. Jutaquiju, ique Yusuja Ebacuaque juya tibu, ecuetu tsujetyataqui amadya tunara Yusuja etareju ishúque ique tsujebacayaque.

²⁷ Jadya ama bucha tuque tsujetyadya, tuna ec-
ahuaítu tibu. Cuacue beiju. Huica mutya juticie. Tinutinu metse juyaquedya acue. Jaeja ecuatsajudya tuquemi chipiru dadiya. Tumeque chipiru tu tupu tunara ique tsujebacayaque tsujetya ishú, tumbaedy micue. Jae juque quemitsu, dujucue Yusuja etareju.

Tsujetyaticue yatseja tunara tsujebacayaque, —jady-
atu Jesúsra Pedro acuare.

¿Ejeque tu dyaque inime metseque?

(Mr 9.33-37; Lc 9.46-48)

18 Tume patya tuque ecuana Jesúsra mepehua
cuanara jipetitsu bacaduracuare:
—¿Ejeque ecuana dyaque inime metseque jubuque,
mique enaruqui judadihuaaju ecuana dyadi mique
tsahuaqui juatsu? —jadya tuque ecuana bacadu-
racuare.
² Tume tujatu ihuaracuare ebacua piji tuhua netiya
baatsu. Ihuaratsu tujatu nityacuare ecuana patya.
³ —Riyaque micuana era cuejayaque ri yunerique.
Peadya peadya micuana micuana taca casumiti jutaqui
ama. Inime metseque ama bucha micuana jutaqui,
riyaque ebacua piji bucha. Jadya juyaque juatsu ca-
madya micuana judiribuque eju Yusura naruyaju.
⁴ Ejeque dutyaja jetiedyaque cabatiyaque, riyaque
ebacua piji bucha dyaque jetiedyaque, tumequetu
dyaque emui jubuque Yusura dutya naruyaju. ⁵ Micua-
narani ecue cuanaque jida tsehue baya, arepa riyaque
ebacua piji bucha paju ama bucha, idya datse micua-
nara jida tsehue baya, —jadya tura ecuana acuare.

**Peya cuana cajuchatishaquique dyaque canerecati-
buqueque**

(Mr 9.42-48; Lc 17.1-2)

⁶ Jesúsra ecuana bahuityanucacuare:
—Ejera riyaque ebacua piji bucha cuanaque ca-
juchatishayaquetu Yusura dyaque nerecaturabuque.
Dyaque jidatu majutaqui juhua ejeque ca-
juchatishamaquedya. Dyaque jidatu peya ca-
juchatishaquique tumu ebari epitiju risitsu bei dyaque
dedaju ijehuetaqui juhua. ⁷ Dutyatu riyaque yahuaju
cuanaque nerecada juya, peya eje buchadya ca-
juchatishacara jadya juya cuanaque aniya tibu. Maju-
ma jari tuputu ecuita cajuchaticara jujacaya ama. [Dya-
quetu nerecada jubuque peya eje buchadya ca-
juchatishacara juya cuanaque!
⁸ “Emetucu tsehue ni micuana cajuchaticara juya,
necatubuticue cajuchatimaquedya, jidamaque acara
ayaque micuanaja aishu ama. Cuacara ni micuana juya
eju micuana cuataqui amaju, cajuchatimaquedya
ehuachi necatubuticue eju micuana cuacara juyaju
cuaishu ama. Nejacacue cajuchaticaraque. Dyaque ji-
dadyatu bipidya, rudurudu Yusu queja judirutaqui, bi-
beta, huachi beta jadya ijahuaja etiquiju enubidiru-
uque, etiqui ticu baecuaju. ⁹ Micuanaja
petataquimaque ni micuana petacara aya, nec-
ahuicaticue yatuca cajuchatimaquedya, jidamaque pe-
ta ish u ama. Nejacacue cajuchaticaraque. Dyaque ji-
datu Yusu queja judirutaqui atuca pidya camadya,
ijahuaja etiquiju atuca beta enubidiruuque, etiqui ticu
baecuaju.

**Cristo queja nimee juyaque ama tu uhuisha cuji eju
buchique**

(Lc 15.3-7)

¹⁰ “Nebijidamaduraume eaqueja ecatyatique ai ama
jipenee juya cuanaque. Etata barepajuquetu bahue tu-
na ai juyaque. Barepa juque quisarati bepuji cuana-
quetu tuna tsahuaqui cuanaque Yusuja yacua juque
netisicuayaque ama. ¹¹ Ique riyaque yahuaju junahua
Yusu adeba baecua cuanaque, uhuisha cuji eju bucha
cuanaque inajacamerera. ¹² Cuejaya micuana riyaque
cuatsabiji piji micuana pana huecasha aishu. Peadya
ecuitaja cien uhuisha eaniu. Peadya tuja cuji ejuu. ¿Eje
buchatu tumeque ecuita ejuu? Eshanau jari di taa tu-
jatu puscurucu tunca puscurucu earacana taracaju.
Eishautu eju aija eje bucha ataqui amaju. Jadya
shanatsutu pereu amadya ecuau uhuisha cuji ejuque
sarera. ¹³ Esareudya tujatu dadiya tupu. Daditsutu
pureama eau dadihuaque, aputama cuanaque purea-
ma eau bucha ama. ¹⁴ Uhuisha naruqira ni peadya
uhuisha aputashacarama eau bucha, tumebaedya
micuanaja Tata barepajura micuana ijahuaja etiquiju
nudyacarama aya, ni ejeque eaqueja ecatyatique ai
ama jipenee juya cuanaque, —jadya ecuana Jesúsra
acuare.

Peyara jidama ayaju ecuanaja nerecabataquique

(Lc 17.3)

¹⁵ Jesúsra ecuana bahuityanucacuare:
—Ejera ni micuana jidama aya, tuta tacaju neisaratic-
ue. Nehuecashacue tuque jidama juhuaque. Bacaya ni
tura micuana micuanara cuejayaju, cacuejatiyadyatu
micuana jidama ahuaque, tume tura micuana jidadya
carenenucaya. ¹⁶ Tura ni micuana bacacarama aya,
adebacarama ni tu aya tuque cajuchatihuaque, necue-
jacue peadya, jadya ama juatsu beta eaqueja ecatyat-
ique, cajuchatihuaque isarara micuana tsehue
cuaishu. Micuana tsehue inime bajejera cuaya ecata-
sera neredadya paati. Tatseradya paba micuana
tumeque inime bajeje ish u cacasatihuaque.
¹⁷ Tumeque ecuitara ni bacacarama aya micuana tse-
hue cuayaque ecatsé, tume necuejacue ecue cua-
naque casitatihuaaju. Dutya ecana necuejacue. Tunara
cajuchatihuaque paihuara, peya cuana tsehue ca-
sitatishatsu dutyaja yacuaju nereda aishu. Tura ni ba-
cacarama cuitadya cuejayaque aya, tume amena biji-
damadurayaque ebau bucha bae neacue. Yusu adeba
baecua cuanaque, jadya ama juatsu enaruquija ish u
chipiru sitaqui cuana bucha bae neacue ecajuchatique
inime cacuareticarama juya tibu.
¹⁸ “Micuanara riyaque yahuaju ‘Jucha metse’ jadya
ayaquetu Yusura barepaju ‘Jucha metse’ jadidya aya.
Micuanara riyaque yahuaju ‘Jucha metse ama’ jadya
ayaquetu Yusura barepaju ‘Jucha metse’ jadya amadya
aya.
¹⁹ “Micuana riyaque yahuaju aniya cuanaque ni
micuana casitatiya inime jidamaque bajeje ish u paju
beta piji, betaja tupu ni metseja inime Yusu ba-

cayaque, tyadadiyadya tura metse. ²⁰ Ejudyá jutidyá micuana ecasitatiu beta, jadya ama juatsu quimisha eatsehue quisarati ishú, ique tuhuadya micuana tsehue, —jadya ecuana Jesúsra acuare.

²¹ Jadya bacatsutu Pedrora jipetitsu bacaduracuare: —Ejera ique jidama ajacaya amaju, ¿eje uma nerecaba tuque eau tume ique jidama aquíque? ¿Pacarucu nerecaba ni taa tu tupudya? —jadyatu Pedrora acuare.

²² Jesúsratu quemitsacuare: —¡Aijama! ¡Tupu ama tuque! Tura jidama ayaju nerecabajacaumedyá; pushi cientos puscurocu tunca nerecabadya acue, —jadya tujatu acuare.

Mere pujira tuja ecare nerecabacarama acuareque cuatsabiji

²³ Jesúsra ecuana bahuityanucacuare: —Cuejaya micuana riyaque cuatsabiji Yusura dutya naruyaju eje buchique micuana bahue juishu. Jucuareru ecuari. Tumeque ecuaritu tuque merequi cuanaja manu bajeje jucara jucare. ²⁴ Tuque jadya juyaju tunajatu ecana becuare tuaqueja peadya beu, peadya beu. Becuare tuna tuaqueja manuqui nerique. Eje bucha piyebatilla tupu ama jujeri tujatu manu tuatsehue anicuare. Eje uma millones tujatu manu jucare. ²⁵ Tumeque mere pujijatu aijama chipiru jucare tuja manu tsujetyatilla ishú. Tura ai tsehue tsujetyataqui ama bayajutu ecuarira acuare: “Catyati mique aya, micue huane, micue bacua cuana jadya tsehue. Casada micuana mere jutaqui. Dutya chipiru micuanara inayaque micuanara tyaaajeya dutya micuanara manu tsujetyatillaya tupu”, jadyatu ecuarira acuare ecuita manu metseque. ²⁶ Jadya ayajutu ecuita manuquique tuja yacuaju chichucata juatsu canerecaticuare: “Nerecabacue ique, Ique Cuatsashaquique. Cahuaitiume. Ihuacue jari. Tsujetyatillayadya mique era”, jadya tujatu acuare. ²⁷ Ecuariratu nerecabatsu tuja manu apupashacuare. Apupashatsu tujatu tuaqueja manuqui juhua bucha nime ama bacuare. Pana inajaca tujatu acuare.

²⁸ “Tumeque ecuita ecuarija yacua juque cuinanatsu tujatu tsurutsacuare peya tuja ecare, tuaqueja eje uma piji manu aniyaque. Erumuju inatsatsu tujatu rumupuditsu iyecara acuare. ‘Yacua cuita tsujetyacue micue manu eaqueja aniyaque’ jadyatu ecuita ecuarira manu apupashahuara tuja ecare atsacuare. ²⁹ Tuja ecaretu tuja yacuaju chichucata juatsu canerecaticuare tuaqueja: ‘Ihuabacanucacue jari taa ique. Tsujetyayadya taa mique era’ jadyatu manuquira acuare. ³⁰ Tura bacue ihuacarama acuare. Inameretsu tujatu etare apudaju ishamerecuare, tura manu piji tsujetyaya tupu. ³¹ Etare apudaju nubihuaja ata cuanatu peya inime cuita jucare. Jadya tibu tunajatu ecuari cuejaticuare, tura peya jadya ahua baatsu. ³² Tumetu ecuarira tumeque ura cuitadya ihuamerecuare tura manu apupashahuaque. Ihuaratsutu ecuarira acuare: ‘¡Miquemi dyaque jidama! ¡Cuejataquima mique! Era tuque micue manu jetieque ama apupashahua mique eaqueja canerecaticyaju. ³³ Jida tsehue tuquemi micue

ecare nerecabataqui ahua, era mique nerecabahua bucha’ jadyatu ecuarira acuare. ³⁴ Dyaque cuita cahuaititsutu ecuarira etare apudaju ishamerecuare. Eterinetiya cuanaque naruqui cuanaque tujatu acuare: ‘¡Jahue ¡jahuemeree neacue tura dutya tsujetyaya tupu’. Jadyatu jucare tuja ecare manu apupashacarama acuareque.

³⁵ “Jadidya micuana ecue Etata barepajura abuque micuanara yuneri cuitadya micuana jidama aquíque nerecabayaque ama juatsu, —jadya tura ecuana acuare.

Ecaquemitique cajacatitaquiquemaque

Jesúsra bahuityacuareque

(Mr 10.1-12; Lc 16.18)

19 Jadique cueja amena aatsutu Jesús dirucuar Galilea yahua juque. Judea yahuajutu cuacuare Jordán cueri yueque macare. ² Jetiama ecuitaratu tupu-judyá acuare. Jesúsratu chachanecuare ujejeda cuanaque.

³ Tumetu umae fariseo cuanara jipeticuare. Quisaratishatsu tunajatu pusha pusha tsehue jidama amerecara datse acuare. Bacaduraticuare tunaja tuque:

—¿Ecuanaja ehuae amena bijidama baatsu, ijehuetaquidya tuque ecuanaja? —jadya tunajatu aticuare.

⁴ —Eisara micuanaja Yusuja quisarati. Adebayadya tuque micuanara tuhua eje bucha ehueque. Jadya tu ehue: “Yusuratu yuequedyadya iyacuare deca, epuna jadya carequi juishu”. ⁵ Tumbaedyá tu ehue: “Jadya tibudyatu decaja jacataqui etataque, ecuaque, carequi juatsu. Caquemitihuaju tatse Yusura baya peadya camadya bucha”. ⁶ Jadya tibu tatse amena beta ama, peadya camadya. Yusura cuitadya casitatishahua tibu, tujatu ecatse peadya camadya bucha baya. Jadya tibudya tatse ni ejeque ecuitaja buchique cajacatishataqui ama, —jadya tuna Jesúsra acuare.

⁷ Tumetu fariseo cuanara bacaduranucacuare:

—Miquemi bahuedyá Moisésra cuatsashahuaque. “¡Jehuecara ni micuana aya micuanaja huane, neinamerecue quirica eje bucha juatsu micuanara ijehueyaque cuejayaque. Inameretsu micuanaja huane neijehuecue”, jadya tujatu hueneacuare béru. ¿Eje bucha juatsu jatsutu Moisésra hueneacuare ehueque tsehue cajacatitaquique, cajacatitaquique ama inime aniya ama bucha? —jadya tunajatu bacaduracuare Jesús.

⁸ —Moisesratu adebacuaredya Yusuja cuanaque ama Yusuja biji eque ama anicara juyaque, tunaja biji equedyá jutidya. Jadya tibudya tujatu hueneacuare ecaquemitique cajacatitaquique. Jadya ama buchatu Yusura yuequedyadya inime iyahua ecaquemitique cajacati ishú ama. ⁹ Era micuana cuejaya. Eje bucha juatsu cuita camadya micuanaja huane ijehuetaquique, micuanaja huane peya tsehue jarayaju daditsu cuta camadya. Micuanarar ani micuanaja huane ijehueya eje bucha juatsu pijidya jutidya, jadya juatsu micuana

peya tsehue caquemitiya, Yusu tuque micuana cahuaitishaya. Tuja yatucaju tuque micuaanaja icueneque epuna huane neri jaridya, ai tupujuque ama, —jadyatu Jesúsra fariseo cuana acuare.

¹⁰ Ecuana tura mepehua cuanara tuque ecuana acuare:

—Caquemititsu eje bucha cajacatitaquima juya tibu, jutaquiju taa ecuana caquemitima siri didya jutaqui, —jadya tuque ecuana acuare Jesús.

¹¹ Jesúsra ecuana quemitsacuare:

—Dutya ama micuana caquemitima siri eaniu. Yusura jadya ani ishu casa tyahuaque cuita camadyatu jadya anie ejuu. ¹² Bape bape inime equetu peadya peadya deca cuana huanema. Umaetu ai jidamaquedy cuinanaya. Jadya juatsudya tuna cabacuati bae-cua. Jadya tibu tuna caquemitiya ama. Peya cuana bacue cabacuatiya ama, peyara ujeta eje bucha ahua-ju. Peya cuana bacue carequi jucarama juya, Yusu mere juyaju aija buchique pere ishu ama. Caquemitima paani Yusura jadya ani ishu casa tyahua cuanaque, —jadya tura ecuana acuare.

Jesúsra “Yusura jida panaru ebacua cuana” jadya acuareque

(Mr 10.13-16; Lc 18.15-17)

¹³ Tumetu umae ebacua cuana etata cuanaquera Jesús queja dujubarecuare.

—Emetucu micue iyacue ebacua cuanaja iyuca dyaque. Bacacue ecana Yusu queja, tuja ecana jida naru ishu, —jadya tunajatu Jesús acuare.

Ecuana tuna jadya baatsu, nereda jutidya atsabarecuare ebacua cuana tsehue cuacuare cuanaque:

—Nepereume Jesús, —jadya tuque ecuana ecana at-sacuare.

¹⁴ Ecuana jadya quisaratiyaju ecuana Jesúsra acuare:

—Pajedya ebacua cuana eaqueja. Necuadishaume ecana eaquejaque. Esiri cuanaque camadya ama, tumbaedy tuna dyadi tuna Yusu jaquedy, —jadya ecuana Jesúsra acuare.

¹⁵ Tuna dyaque ebi rirutsu tujatu peadya peadyaja iyuca dyaque emetucu iyabarecuare, Yusu tuna tsehue jadique adeba ishu. Jadya amena au jadya juatsutu tuhuaque dirucuare.

Ecuata chipirudaque Jesús tsehue quisaraticuareque

(Mr 10.17-31; Lc 18.18-30)

¹⁶ Peya huecacatu Jesús ecuitara batitsu bacaduraticuare:

—Jidaque Ebahuityaquique, ¿ai mere tuque jidaque eau, Yusu queja judiru ishu ni eje tupu tuque jaca ishu ama? —jadya tujatu Jesús aticuare.

¹⁷ Jesusratu quemitsacuare:

—¿Adebayadyami eje buchique quisarati ahuaque? ¿Eje bucha juatsu mira “Jidaque Ebahuityaquique” jadya aya? Yusu peadya camadya tu jidaque. Jutaquiju, Yusu queja judirucara juatsu, Yusura cuatsashaya eque jucue, —jadyatu Jesúsra acuare.

¹⁸ —¿Ejeque cacuatsashati cuana eque jutaqui? —jadyatu ecuitara bacaduracuare.

—Quiyeti puji juume. Peyaja ehuaneeque micuique bucha aniquere aume. Chiri juume. Ni ejeque buchique pusha pusha aume. ¹⁹ Muibacue mique baquique, mique susuquique jadya. Iyuhue tsehue bacue peya cuana. Mique cuitadya iyuhueda cabatiya bucha, iyuhue peya bacue, —jadyatu Jesúsra acuare.

²⁰ —Dutya riya cuanaque cacuatsashati cuana tuque muibacuare nanada equeradya. ¿Ai tuque ecue peya bataqui ama Yusu queja judiru ishu? —jadyatu ecuitara acuare.

²¹ Jadya bacatsutu Jesúsra jadya acuare:

—Yusura amerecara aya eque jucara juyaque juatsu, dutya micue aniya cuanaque catyati aticue. Catyati aatsu tyabarecue chipiru nerecada cuanaque. Dutya micue ai catyati aatsu, juetinucacue eaqueja, eatsehue juneni ishu. Eaqueja ni mi ecatyatiu, tume tuque micue eaniu Yusuja cuanaja ishu barepaju aniyaque, —jadyatu Jesúsra acuare.

²² Jadya ayaju bacatsutu ecuita dyaque peya inime dirucuare, tuja dyaque jetiama aniyaque catyati acarama aya tibu.

²³ Tumeque ecuita yuneridya tuatsehue junenicarاما juyaque adebatsu ecuana Jesúsra acuare:

—Yuneri cuitadya micuana riyaque cuejaya. Jetiama ai aniya cuanaratu dyaque ibeda, masada baya eaqueja pana catyati juishu, Yusura dutya naruyaju judirutaqui juishu. ²⁴ Yudijidya cuejanuca micuana aya. Cahuayutu etsucuija cani eque eje bucha cuetitaqui ama. Tumbaedy tuna tunaja ai aniyara eje bucha judirutaqui ama amereya Yusu queja, —jadya ecuana Jesúsra acuare.

²⁵ Jadya bacatsu tuque ecuana bape bacacuare.

—Chipiruqui cuanaque ni Satanás quejaque quinajacameretitaqui ama cabatiya, ¿ejeque jatsutu tuaquejaque equinajacameretiu? —jadya ecuana cabacaduraticuare.

²⁶ Jesúsra ecuana petacuare. Petatsu tura ecuana quemitsacuare:

—Ecuata ni tu tuta taca eje bucha quinajacameretie juma Satanás quejaque. Yusura peadya camadya tuna einjacamereu. Yusuja ishutu aijama ai ataquimaque, —jadya tura ecuana acuare.

²⁷ Jadya bacatsutu Pedrora acuare:

—Ecuana ecuana dutya cashanatihua miatsehue juneni ishu. ¿Ai tuque ecuana inabuque? —jadyatu Pedrora Jesús acuare.

²⁸ —Pusha amadya micuana cuejaya. Juetibuquetu huecaca dutya era iyacuaneyaque. Ique huaraji dyaque aridaque jubuque. Ique ecue eaniqui muidaju anibutebuque dutya ecuita peadya peadya eje bucha judadiyaque cueja ishu. Micuana micuana ique muitaya bucha muitaedy jubuque, peadya tunca beta earacana eaniqui cuanaju anibutehuaju. Micuanaratu narubuque peadya tunca beta earacana cuare cuanaque Israel eque ejuracana cuanaque. Peadya peadya micuanaja eaniquijuradya tuque micuana

ecana narubuque. ²⁹ Micuana ni cashanatiya dutya micuanaja ai aniyaque eatsehue juneni ishu, Yusura micuana tyaya dutya micuanara riyaque yahua ju sareyaque. Tura micuana tyaya micuanara sareya tupu dyaquedy a jetiama, cien tyau bucha dyaque jetiama. Micuana ni etare cashanatiya, tura micuana tyaya eju ani ishuque. Cashanatiya ni micuana micuana tsehuequique epuna, deca cuana, micuanaja tata, micuanaja cuaa, micuanaja bacua cuana, tura micuana peya cuana queja iyuhue tsehue narumereya tunaja ata neri bucha. Cashanatiya ni micuana micuanaja tee cuana, tura micuana tyaya dutya micuanara ara ishu sareya cuanaque. Micuana majuhua ju tura micuana barepaju tuatsehue anishasiribuque ni eje tupu tuque jaca ishu ama. ³⁰ Iyacia dyaque inime metse cabatiya cuanaque tuna inime metse ama jubuque. Iyacia jetiedya inime metse ama cabatiya cuanaque bacue dyaque inime metse cabatibuque, —jadya tura ecuana acuare.

Teeju mere puji cuana cuatsabiji equeque

20 Bahuityanucacuare ecuana Jesúsra: —Cuejaya micuana riyaque cuatsabiji Yusura dutya naruyaju eje buchique micuana bahue juishu. Anicuairetu ecuita uva tee ebari metseque. Apudajudya cuitatu mere puji cuana sarera cuacuare, tuja uva ejahuanegue pitu ishu. ² Mere puji cuana daditsu tujatu ecana acuare: “Jida micuana tsujetyaya, peadya huecacaque mereja etsujequidya micuana tsujetyaya”. Tunaratu jidadya bacuare peadya huecacaque etsujequidya tsujetyayaju. Jadya etsujequi bajejetsu tujatu ecana cuadishacuare teeju merera. ³ Quimisha ura juatsu, las nueve ura tupu dyanetu cuanucacuare mere puji cuana sarera. Plaza eque cuetiyaratu eje uma ecuita tsurucuare mere sare juneniya cuanaque. ⁴ Isaracuairetu ecana: “Micuana dyadi necuacuedya ecue teeju uva ejahuanegue pitura. Jida micuana tsujetyaya”, jadya tuna tee metsera acuare. Jadya ahua ju tuna merera cuacuare. ⁵ Barepatyatu cuanucacuare mere puji cuana sarera. Las tres chinequeja dyanetu cuanucacuare mere puji cuana sarera. Tsurutsu tujatu ecana cuadishacuare tuja teeju merera. “Jida micuana tsujetyaya”, jadya tujatu ecana acuare. Jadya ahua ju tuna merera cuacuare. ⁶ Las cinco chinequeja pijitu cuanucacuare. Plaza eque cuetinuayara tujatu ecana tsurunucacuare ecuita merema juneniya cuanaque. Banucatsu tujatu ecana jadya acuare: “¿Ai micuana juya rehua dutya huecaca merema?” ⁷ “Ni aira buchique ecuana mere ishu isaraya ama tibu”, jadya tunajatu quemitsacuare. “Jutaquiju ecue teeju mere nejiticue. Era micuana tsujetyaya jida”, jadya tuna tee metsera acuare. Jadya ahua ju tuna teeju cuacuare merera.

⁸ “Amena ijete nubihuie, las seis chinequeja cuana tujatu acuare tuja mayuruma: ‘Ihuaracue mere puji cuana tsujetya ishu. Tsujetyatibunecue ecana tupuju mere catibutihua cuana eque. Icuene cuita mere catibutihua cuanaque tupuju tsujetyacue’ jadya tujatu mayuruma acuare. ⁹ Tumetu las cinco chinequeja mere catibutic-

uare cuanaque casitaticuare mere juhuaque tsujetyata ishu. Inacuare tuna peadya huecacaque mere etsujequidya. ¹⁰ Jadya tujatu ecana tsujetyaajecuare mere juhua cuanaque peadya huecacaque mere tsujedya. Amena chamacama judirunucacuare icuene las seis apudajudya mere catibutihua cuanaque tsujetya. Tuna jada datsetu inime jucuar: ‘Peadya huecacaque mere dyaquedy tura ecuana tsujetyaya’. Jadya ama bucha tunajatu peadya huecacaque mere etsujequi piji cuita camadya inacuare. ¹¹ Etsujequi baatsu tuna tee metse tsehue cahuaicuaque jipenee. ¹² ‘Jidama mira ecuana tsujetyahua. Tupuju mere catibutihua cuanaque tuna peadya ura pijidya mere juhua. Ecuana bacue peadya huecaca yuta mere juhua ijete uquedaju. Jadya ama bucha mira ecuana tuna tsehue dutya tupu tsujetyae ahua’ jadya tunajatu acuare. ¹³ Tee metseratu bacuare tuna quisaratiyaju. Tume tujatu acuare peadya, etsujequi baatsu quisaratiyahuque: ‘Tata, jidadya mique tsujetyaya. ¿Adebaya ama jatsumi peadya huecacaque mere etsujequi tsujetya ishu yatseja quisarati juhuaque?’ ¹⁴ Ique bahue ecue chipiru tsehue ai juyaque. Era ni tsujetyacura aya dutya tupu las cinco chinequeja mere catibutihua cuanaque, las seis apudajudya mere catibutihua cuana tsehue, ni riy piji buchique micuana jidama ama tsujetyaya. ¿Mique ni mi cahuaitya ique jida juya baatsu? Jeedy micue etsujequi. Dirucue’ jadyatu tee metsera acuare tumeque ecuita. Jadyatu jucuar teeju mere jucuar cuanaque.

¹⁶ “Jadya equedyatu tupuju cuanaque icuene; icuene cuanaque bacue tupuju, —jadya ecuana Jesúsra acuare.

Jesús eje bucha iyetanae juyaque cacuejati quimisha ishu cacuejatinucacuareque

(Mr 10.32-34; Lc 18.31-34)

¹⁷ Jesúsra ecuana Jerusalén diji eque cuayaque tura mepehua cuanaque peya queja amaca duju acuare, tuque eje bucha juyaque cueja ishu.

¹⁸ —Micuana micuana bahuedya Jerusalénju ique cuayaque. Neadebacue bacue ique eje bucha judadiyaque era cuejahuaque. Pae cuanaja huaraji cuana queja, cacuatsashati bahuityaqui cuana queja tunara inamereya. Tunara ique aya “Paiyetanadya” jadya. ¹⁹ Israelita ama cuana queja tunara inamereya. Ijahue ijahue tunara aya. Ebi tsehue au, catsacatsa jadya tunara aya. Tataya tunara curusuju ique maju ishu. Quimisha huecaca majutsu chacha netitsuranucaya, —jadya ecuana Jesúsra acuare.

Santiago, Juan jadyaja ecuaquera ebacuaque ecatsé Jesús tsehue huaraji juishu bacacuareque

(Mr 10.35-45)

²⁰ Tumetu Zebedeoja ehuanecuera jipeticuare ebacuaque ecatsé tsehue, Santiago, Juan jadya tsehue. Tuja yacuajutu chichucata jucuar, tuaqueja canercatiyaque. ²¹ Jesusratu epuna bacaduracuare:

—¿Ai micue?

—Mique dutya naruqui jutibuneyaque, ecue ebacua ecitse bacanishacue miatsehue enaruqui iyuca juishu. Emuita eanicuareju ecitse iyabutyacue, peadya micue jida eque amaca, peya bacue jani eque amaca jadya. Miatsehue muitapeedya ecitse paju, —jadyatu epunara acuare.

²² Santiago, Juan jadya ecitse jipetinucatsu tujatu ecitse isaratinucacuare:

—Metse metse baecua eje buchique metseja cuaara bacayaque. Ique dyaque canerecatiyaque tu patsedaque ebuijiu buchique. ¿Ique canerecatiya bucha canerecatie metse ejuudya?

—Eiduudya tuque yatsera, —jadya tatsejatu quemitsacuare.

²³ —Pusha amadya metse cuejaya. Canerecati-buquedya metse, ique canerecatiya bucha. Jadya ama bucha ecuetu aijama cueja ishü ejeque ecue jida eque amaca, jani eque amaca jadya iyabutyä ishü, eatsehue enaruqui juishu. Ecue Etatara camadyatu mepebuque tuhua iyabutyä ishü, —jadyatu Jesúsra acuare Santiago, Juan ecitse.

²⁴ Tume ecuana, Santiago, Juan ecatsera bacayaque bacatsu, cahuaiticuare tatse tsehue. ²⁵ Jesúsra ecuana dutya tuaqueja ihuaracuare.

—Yahua juque huaraji cuanara tuna cuatsashaya, emechiquira cuatsashaya bucha. Casada cuanaratu jetiedya cuanaque casada tsehue cuatsashaya equedya amereya. ²⁶ Micuana micuana jadya jutaqui ama. Peya queja ni micuana camuimereticara juya, tunadya tuque micuanaja tsahuataqui. ²⁷ Ejeque muitacara juyaque juatsu, necacasaticue peya cuana pureamatura ishü, micuana cuita camadya ama.

²⁸ Ique juya bae nejucue. Ique junahua riyaque yahua-ju peya cuana tsahua ishü, tunaja ique tsahua ishü ama. Tuna jiteque maju ishü, eaqueja catyatihuaju tuna Ijahua quejaque inajacamere ishü ique junahua, —jadya ecuana Jesúsra acuare.

Jesúsra beta shuhuique ecitse capetatishacuareque
(Mr 10.46-52; Lc 18.35-43)

²⁹ Ecuana Jericó juque cuinanayajutu Jesús jetiama ecuitara tupujudya acuare. ³⁰ Tuhuatu beta ecuita shuhuique ecitse juanicuare ediji jiruru. Jesús cuetiyaque bacatsu tatse quiquecuare:

—[Ecuana Cuatsashaquique, miquemi Yusuja Emepeque, David eque ejuracanaque! [Nerecabacue taa yatse! —jadya tatsejatu quique eque acuare.

³¹ Ecuita cuanara tatse nereda acuare tatse abacasha ishü. Tatse bacue jadya ayaju dyaque jebuda quiquecuare:

—[Ecuana Cuatsashaquique, miquemi Yusuja Emepeque! [David eque ejuracanaque mique! [Nerecabacue taa yatse! —jadya tatse quiquecuare.

³² Tatse juaniya tuyu junatitsutu Jesús netinaticuare. Ihuaratsu tujatu ecitse bacaduracuare:

—¿Eje bucha metse eaqueja catimerecara juya? —jadya tujatu ecitse bacaduracuare.

³³ —Ecuana Cuatsashaquique, capetatishanucacue yatse, —jadya tatsejatu acuare.

³⁴ Jadya juyaju tatse Jesúsra nerecada bacuare. Jabacuare tujatu ecitse yatucaju. Tura jadya aya tsehuedya cuita tatse capetaticuare. Capetatitsu tatse Jesús tsehue junenicuare.

Jesús Jerusalénju judirucuareque
(Mr 11.1-11; Lc 19.28-40; Jn 12.12-19)

21 Junaticuare ecuana Betfagé epuju, Jerusalén piji dyane. Emata baruda cuita ama Olivo Acui Quini bacaniju ecuana junaticuare. Junatitsutu Jesúsra icueneta cuadisha acuare beta tura mepehuaque ecitse.

² —Ecuana yacua tuyu epu achaachaju necuacue. Tuhua junatitsu tuque metse banatiya burra erisque netiyaju. Tuatsehuedya tujatu ebacua ehue ebarique. Nepisuticue. Pisutsu ecue nebecue. ³ Ejera ni metse aya: “¿Aishu tuque metse pisuya?”, “Ecuana Cuatsashaquiratu sareya. Masadama tujatu cuadishanucaya”, jadya neacue, —jadya tatse Jesúsra acuare.

⁴ Yuequedyadyatu Yusu equeque quisarati cuejaquira icueneta cueja acuare, jadyatu judadiya jadique. Jesús burro dyaque eque Jerusalénju (Sión bacandya tume) judiruhajutu beru cuejatanacuare baedya jucuare:

⁵ “Necuejacue Sionju aniya cuanaque:

‘Micuanaja ecuaritu micuana queja junaya.

Micuana catiju ijahue ara amatu junaya.

Burro dyaque equetu junaya.

Uu cabuti ishüque jabacua dyaque equetu junaya”, jadyatu Yusu equeque quisarati cuejaquique béru ju-
cuare.

⁶ Jesúsra cuadishahuaju, tura amerehua equedya tatsejatu aticuare. ⁷ Yaratupu juatsu tatsejatu burra, burra jabacua jadya dujuacuare Jesús queja. Judiriqueretsu tatsejatu tatsera jutuya tsehue titecuare. Tatsera bajeje amena ahuajutu Jesúsra isaanicuare.

⁸ Jesúsra isaanihuaju tunajatu jetiama tuhua cuanara tunaja jutu ishü cuanaque pijabarecuare edijiju, tuque muiyaque. Peya cuanaratu ejaqui cuana huanabarecuare edijiju, tuque muiyaque. ⁹ Jesús icuene, tupuju jadya cuaya cuanaquetu quiquetibunecuare:

—[Hosana! [Miquemi dyaque emuique ecuanaja Ecuari! [David eque ejuracanaque mique! [Jida paju Yusuja ebacaniyu jeyaque! [Arida, dyaque casada jadyatu Yusu barepajuque! —jadya tuna jubarecuare.

¹⁰ Tuequedyatu Jesús junaticuare Jerusalénju. Tuque junatihuaju tuna dutya tumeque epuju cuanaque capuriticuare.

—¿Ai ri riyaque? —jadya tuna cabacaduratibarecuare.

¹¹ Ecuita jetieque ama tuatsehue junatihua tuna quemitsacuare:

—[Jesús riyá! [Yusu equeque quisarati cuejaquique riyá! [Galilea yahua juque epu Nazaret juque riyá! —jadya tuna jubarecuare.

**Jesúsra catyati puji cuana Yusuja etare juque ijehue-
cuinatillacuareque**

(Mr 11.15-19; Lc 19.45-48; Jn 2.13-22)

¹² Jadya juu jadya juatsutu Jesús Yusuja etareju nubidiru-
cuare. Nubitsutu dyaque cahuaicuare, tuhua
eje bucha juyaque baatsu. Jadya tibudya tujatu ecana
etsecueju pana ijehuecuinatilla acuare catyati puji cua-
na, bacabaca puji cuana jadya. Tipacatillacuare tujatu
chipiru cuarequi juya cuanaja mesa cuana. Huei caty-
ati juya cuanaja ani ishü cuanaquetu tumbaedyä
tipacabarecuareadyä. ¹³ Cuinanashayaque tujatu ecana
jadya acuare:

—Yusuja quisarati tu jadya ehüene: “Ecue etare tu
eatsehue quisarati ishüque etare bacani’ jadyatu Yusu
beru jucüare”. Jadya ama bucha tuque micuana chiri
puji cuana catehua ishüque cani bucha jutidya
amereya, —jadya tuna Jesúsra acuare.

¹⁴ Tuhua Yusuja etarejutu shuhui cuanara, rudurudu
cuanara jadya Jesús jipeticuare. Jipetihüaju tujatu
ecana chachanecuare. ¹⁵ Pae cuanaja huaraji cuanara,
cacuatsashati bahuityaqui cuanara jadyatu bacuare
Jesúsra shuhui cuanaque, rudurudu cuanaque jadya
chachaneyaju. Bacacuare tunajatu ebacua cuana
quiqueyaju:

—Jesús, miquemi dyaque emuique! David eque eju-
racanaque mique!

Jadya bacatsu tuna cahuaicuare dyáque.

¹⁶ —¿Bacayami ecana quiqueyaju? ¿Eje bucha juatsu
tuquemi ecana jadya quiqueyaju bacayadya jutidya?
—jadya tunajatu Jesús bacaduracuare.

—Jejee, bacaya tuque era. Yuneridya tuque micuana-
ja eisara Yusuja quisarati ehüeneque:

“Miquemi emui jubuque ebacua achaacha cuanaja,
ebacua atsüju cuanaja.

Jeru eque tunarami pureama abüque”,
jadya tu ehüene Yusuja quisarati.

¹⁷ Jadya aatsu tujatu ecana shanaquenacuare. Yudi-
jidya dirunucatu jucüare Betaniaju, tahüiti ishü.

**Jesúsra higuera “Cacacatinucanime ama mique”, jadya
acuareque**

(Mr 11.12-14, 20-26)

¹⁸ Apudajudya Jerusalén epu queja diruyaquetu Jesús
aracara jucüare. ¹⁹ Bacuaretu acüi higuera ediji jiruru.
Baatsu tujatu jipeticuare, cacaqui bucha baatsu, ecaca
tuya ejaqui cuana tsehue cuinanae jipenee juya tibu.
Bacuare amatu ni peadya ecaca buchique ecüiju,
ejaqui camadya. Jadya baatsutu Jesúsra quisarati ty-
acuare higuera:

—Cacacatinucanime ama mique! —jadya tujatu
acuare.

Tura jadya aya tsehuedya cuitadyatu higuera
masadama raracuare. ²⁰ Acüi rarahua baatsu ecuana
tura mepehua cuanaque anajacatacuare.

—Masadama cuitari higuera rarahua! —jadya ecua-
na jucüare.

²¹ —¿Eje bucha juatsu micuana anajacataya? Yuner-
idya ni micuana ejeneya era ecue casa tyahuaque,
ejenecara ejenecarama jadya ama ni micuana eau, era
higuera ahua baeque cuita camadya ama tuque
micuana eau. Aida jutidya tuque micuana eau, arepa
ai ibedaque paju ama bucha. Riyaque uhua cuemusu
micuana eau: “Anisicuacue tuhuaque. Cüeri cuanaja
ecuaqueju pacacacue”. Amereya equedyatu ejuu.

²² Yusu tsehue quisaratiyaque, ai ni micuana ebacau,
tyayadya tura micuana, ejenecara ejenecarama jadya
ayaque ama juatsu, —jadya ecuana Jesúsra acuare.

**¿Airatu Jesús cuatsashacuare tura aya cuanaque
aishu?**

(Mr 11.27-33; Lc 20.1-8)

²³ Tumetu Jesús dirunucatsu Yusuja etareju nubidiru-
cuare. Tuhua tuque bahuitya bahuityayajutu pae cua-
naja huaraji cuanara, israelita cuanaja emuiba cuanara
jadya jipeticuare. Jipetitsü tunajatu bacaduracuare:

—¿Aírami ejeque ecuitaja ataquique ama aishu cuat-
sashahua? ¿Aija casa tsehue tuquemi jadya aya?
—jadya tunajatu acuare Jesús.

²⁴ Jesúsra tuna quemitsacuare:

—Era micuana tumbaedyä bacaduraya. Quemitsaya
ni micuanara ique, tume micuana cuejaya aira cuat-
sashahüaju era riya cuanaque ayaque. ²⁵ ¿Airatu Juan
cuatsashacuare ecuita cuana utsa ishü? ¿Yusura, ecui-
ta cuanara ni taa? Nequemitsacue ique, —jadya tuna
Jesúsra bacaduracuare.

Tume tuna, tuna cama quisaraticuare:

—¿Eje bucha tuque ecuana equemitsau? “Yusurady-
atu cuatsashacuare”, jadya ni ecuana eau, tume tura
ecuana ebacadurau: “¿Eje bucha juatsu jatsu tuque
micuana Juanra cuejacuareque ejenecuare ama?”
jadya tura ecuana eau. ²⁶ “Ecuita cuanaja
ecuaadishaquedyä jutidyatu jucüare”, jadya ni ecuana
eau, tumetu dutya jujeri ecuita cuana ecahuaitiu ecua-
na tsehue. Juan tunajatu Yusu equeque quisarati cue-
jaquique bucha adebaya, —jadya tuna cuejaticuare.

Ecuita cuana mubatsu tunajatu Jesús quemitsacura-
ma acuare. ²⁷ Chamacama tunajatu quemitsacuare:

—Bacua ecuana aira Juan ecuita cuana utsa ishü cu-
atsashacuareque, —jadya tunajatu Jesús acuare.

—Jutaquiju micuana era cuejaya amadya aira ique
ecuitaja ataquique ama aishu cuatsashahuaque,
—jadya tuna Jesúsra acuare.

Beta ehue ebari ecatse equeque cuatsabiji

²⁸ Bahuityanucacüaretu Jesúsra pae cuanaja huaraji
cuanaja, cacuatsashati bahuityaqui cuanaque jadya:

—Cuejaya micuana cuatsabiji piji. ¿Ai era bahuity-
acara aya bucha tuque micuanaja inime juya? Peadya
ecuitajatu anicuare beta ebacuaque. Peadya tujatu
ebacuaque acuare: “Cuacue teeju merera, deca. Uva
ejahuaneque pititicue”, jadya tujatu acuare. ²⁹ “Aijama,
tata. Cuacarama juya merera”, jadya tujatu etataque
quemitsacuare. Yara tupu junenitsu eje bucha inime
tuputsutu merera cuacuare. ³⁰ Peadya icuene jadya is-

arae aatsutu etataquera peya isaratinucacuare: "Cuacue teeju merera, deca. Uva ejahuaneque pituticue", jadya tujatu acuare. Turatu quemitsacuare: "A, pacua taa, tata. Mere pajuti", jadya tujatu etataque acuare. Jadya ama buchatu cuacuare ama merera. Jadyatu ehue ebari ecatse jucuaire, —jadya tuna Jesúsra acuare.

³¹ Jadya cuejatsu tuna Jesúsra bacaduracuare:

—¿Ejera tatsejatu etataqueja yana acuare?

—Inime cacuaretitsu merera cuacuarera, —jadya tunajatu quemitsacuare.

—Micuanara bijidamaduraya cuanaque tuna Yusu jaque judadibareya; micuana jida bucha cabatiya cuanaque micuana Yusu jaque ama. ³² Juan Ecuira Cuana Utsaquiuetu junahua micuana Yusuja biji eque ani bahuitya ishu. Bacacarama micuana tura cuejayaque ahua. Micuanara bijidamaduraya cuanara bacue tuja quisarati bacacuare. Tume Roma juque enaruquiya ishu chipiru sitaqui cuanaque, tumebaedya epuna decadeca arida cuanaque jadya tuna inime cacuareticuaire. Arepa micuana tuna inime cacuaretihuaque baya ama bucha micuana inime cacuareticarama juya, Yusura cuejahua eque ani ishu, —jadya tujatu ecana acuare.

Mere puji jidama cuanaque cuatsabiji eque bahuityacuareque

(Mr 12.1-12; Lc 20.9-19)

³³ Bahuityanucacuare tuna Jesúsra:

—Nebacuare riyaque peya cuatsabiji micuana bahue ishu. Peadya ecuitajatu tee aridaque anicuare. Tee aatsutu uva uhuamerecuare. Taracanemerecuare tura. Amerecuaretu uva jahuanehuaju pitutsu nacaca tisi ishuque. Amerecuaretu etare piji barudaque, tueque tsuratsu, dutya queja naru ishu. Umae ecuita cuana queja tujatu tee narumerecuare. Tura tuna acuare: "Micuanara ni ecue tee naruya, tume ecuanu uva jahuanehuaju cajuquetiya micuana tsehue". Tuna tuna endya jucuaire. Tume cuanaque bajetsutu emechiqui cuacuare japada peya yahuaju. ³⁴ Uva jahuane mara juetihuaju tujatu tuque merequi cuanaque cuadishacuare tee naruqui cuana queja. "Necuacue ecue teeju mere juya cuana queja. Necuejaticue ecana; pacuadisha tuna ecue ishuque uva epituque", jadya tujatu ecana acuare. ³⁵ Jadya ahuaju tuna cuacuare. Jutihuaaju tuna tee naruqui cuanara inatsacuare. Peadya tuna catsacatsa acuare. Peya tuna iyecuare. Peya tuna tumu tsehue acuare. ³⁶ Jadya juhua bacatsutu emechiquira uma tuque merequi cuanaque cuadishanucacuare. Tee naruqui cuanara icueneque atsahua baedya jutidya tuna atsanucacuare dutyadya jutidya.

³⁷ "Datse juatsu tujatu ebacuaque neri cuadishacuare. 'Riyaque renajari eje bucha ama at-saya. Ecue ebacua neri tibu, tunajatu muibatsaya' jadya datse tujatu inime jucuaire. ³⁸ Ebacuaquera jipeajeyajutu tee naruqui cuanaque jadya jucuaire tuna cama: 'Riyaquedyari tee metseja ebacuaque neri. Eje tupu etataque majuhujari riyaquedyari tee metse ju-

dadiya. Neiyetsara. Ecuandya emechiqui nejura' jadya tuna jucuaire. ³⁹ Inatsacuare tunara. Inatsatsu tuna tee juque cuinanashacuare. Cuinanashatsu tuna iyecuare. Jadyatu tee naruqui cuanaque jucuaire, —jadya tuna Jesúsra cuejacuare.

⁴⁰ Tumetu Jesúsra bacaduracuare tuque quisaratiyaju bacaqui cuanaque:

—¿Eje buchatu anabuque tee naruqui cuanaque emechiquira? —jadya tujatu ecana acuare.

⁴¹ Tuhua cuanaratu quemitsacuare:

—Iyemerenubuquedya tujatu nerecabatsu ama tumeque ecuita jidama cuanaque. Peyadya tujatu mere puji cuana sarenabuque tee naru ishu. Tume iyacu cuanaratu tyabuque dutya uva cuana tee metseque jaquetsu, —jadya tunajatu quemitsacuare.

⁴² Jesúsra tuna anucacuare:

—Neadebacue riyaque Yusuja quisarati ehueque. Adebayadya tuque era micuanaja riyaque quisarati eje uma isara eaque:

"Tumu etare puji cuanara tsumecarama acuarequetu tumu dyaque saretanayaque judadicuare.

Ecuana Cuatsashaquiratu dyaque saretanayaque amerecuare.

Riyaque jadya baatsu, ecuanu dyaque pureama juya", jadya tu ehue.

⁴³ "Jadya tibudya micuana cuejaya riyaque. Micuanara ique bijidamaduraha tibusu Yusuja quisarati israelita ama cuanaque quisarati cuejatanabuque. Tuna tuna eaqueja catyatibuque. ⁴⁴ Idya tumeque tumu etare puji cuanaja ebijidamadurahuque buchique. Ique bijidamadurahuque yuamaturatanabuque. Ejeque era nerecaturayaquetu pana yuamaturatana jubuque, ejeque tumu ebarira tyanatsu pana jemi muru eamereu bucha, —jadya tuna Jesúsra acuare.

⁴⁵ Riyaque quisarati bacatsutu pae cuanaja huaraji cuana, tumebaedya fariseo cuana jadya cahuaicuaire, tunara cuitadya Jesús bijidamadurahuque caadebatitsu, mere puji cuanara tee metseja ebacuaque bijidamaduraha bucha. ⁴⁶ Eje buchadya iyecara datse tunajatu acuare. Jadya ama bucha "Iyacua ni ecuanu einau, tumetu ecuita cuana ecuanu tsehue ecahuaitiu, tunara Jesúsra Yusuja quisarati cuejayaque ejeneya tibu", jadya tunajatu inime jucuaire. Ecuira cuana mubatsu tunajatu Jesús inacuare ama tumeque ura cuitadya.

Chine ishu eihuara cuana equeque cuatsabiji

(Lc 14.15-24)

22 Jesúsra tuna bahuityatibunenuacuare. Cuejacuare tujatu ecana cuatsabiji tuna bahuitya ishu:

² —Cuejaya micuana riyaque cuatsabiji Yusura dutya naruyaju eje buchique micuana bahue juishu. Anicuare tu ecuari. Dyaque arida chinetu jucuaire tuja ebacuaque caquemitiyaju. ³ Ihuaramerecuare tujatu ecana jetiama chine ishu. Earaquu amena juhujatu tujatu cuadishacuare tuque merequi cuanaque tuja ecueja cuanaque ihuarara. Cuejatahua ama bucha ecana cuacarama jucuaire. ⁴ Yaratupu juatsutu peya

tuque merequi cuanaque cuadishanucacuare. “Necue-jatinucacue eihuara cuanaque; ebajarara ecana paje. Patsunuta ama ecana. ‘Iyetanahuari huaca, uu etseri cuinasha cuanaque. Eramiri jinahua amena. Dutyari amena ebajeje’ jadya necuejaticue eihuara cuanaque”.⁵ Tura jadya ayaju tuna cuanucacuare ecueja cuanaque ihuarara. Eihuara cuanaque tuna jubarecuare: “Aijama, cuaya ama ique chinera”. Peadyatu cuahua teeju. Peya bacue cuahua tuja ai catyatira.⁶ Peya cuanara bacue ecuari merequi cuanaque inatsacuare. Inatsatsu tunajatu iyeya tupu miririshacuare.⁷ Jadya juhuajutu ecuari dyáque cahuaiticuare. Tuja sudaru cuana cuadishatsu tujatu iyemerecuare quiyeti puji cuana. Epu pahua jadya tujatu amerecuare.

⁸ “Tumetu ecuarrira tuque merequi cuanaque jadya acuare: ‘Dutyatu amena ebajeje carisitihuaju chine juishu. Era cuejamerehua cuanaque tuna jecarama juhua. Paje ama taa ecana.⁹ Necuacue ediji arida cuanaque. Ejeque tsuruyaquedya jutidya ecana necuejacue; chine juyaju tunara pabana’ jadyatu ecuarrira acuare tuque merequi cuanaque.¹⁰ Tura jadya ayaju tuna yana equedya cuacuare. Cuacuare ecana ediji cuana eque. Dutya jecara juyaque tunajatu becuare chine juishu, jidama cuanaque, tumbaedyda jida cuanaque jadya. Tume tujatu ecana tyamerecuare caquemitiyague chine juishu jutu ishuque cuita camadya. Jadya jequeetu etare jucuaré.”

¹¹ “Yaratupu juatsutu ecuari nubiticuare junahua cuanaque isarara. Nubitsu tujatu bacuare peadya ecuita caquemitiyaju tarepe ishuque ejutuqui tsehue ama.¹² Tume tujatu isaraticuare: ‘Miquemi caquemitiyaju tarepe ishuque ejutuqui tsehue ama ecajututi. ¿Eje bucha juatsu?’ jadya tujatu bacaduracuare tumeque. Ecuitaratu quemitsacuare ama.¹³ Tumetu ecuarrira acuare eihuara cuanaque bau juya cuanaque: ‘Nerisicue ehuchiju, emetucuju jadya. Etsecue apuda ducu neijehueticue. Tuhua dyaque canerecatiyague etse tari paju’ jadya tuna ecuarrira acuare.¹⁴ Jadyatu caquemitiyaju chine ishu jucuaré. Chine ishu juchine bucha, jadyatu Yusu enaruqui juhuaju jubuque. Arepa jetiama tuja eihuaraque ama bucha, eje uma ama tuna tuaqueja judirubuque, —jadya tuna Jesúsra acuare.”

Yusu tuja ishuquedya tyataquique

(Mr 12.13-17; Lc 20.20-26)

¹⁵ Jadya cuejayaque bacatsutu fariseo cuana diruacuare. Jesús jidama aishuque inime bajeje tuna jucuaré. “Jidama nequisaratishara, huaraji cuana queja duju ishu”, jadya tuna jucuaré.¹⁶ Jadya eque tunajatu tuna tsehue juneni puji cuana cuadishacuare, tumbaedyda Herodes tsehue juneni puji cuana Jesús tsehue quisarati ishu. Cuadishahua cuanaque jutitsu tunajatu Jesús aticuare fariseo cuanara bacaduramerehuaque: —Ebahuityaquique, ecuana ecuana bahue mique jida, tuyuque. Miratu bahuityaya Yusuja inime eque ani ishuque, ni ejeque buchique mubatsu ama. Micue ishutu ecuita cuana dutya tupu.¹⁷ Cuejacue dyadi

ecuana mira inime tupuyaque. ¿Ecuana cacuat-sashati eque tuque ecuana ecuana naruquique Roma juque tsujetyataqui, tsujetyataqui ama ni taa? —jadya tunajatu Jesús aticuare.

¹⁸ Jesúsra adebacuaredya tunara jidama inime tupuya tsehue jadya bacaduratiyague.

—Jidadya batacara datse micuana juya, ai jidaque ama. Micuanara ijahue acara aya, jadya cabacadurati tsehue, babi pujira armadilla nityatsu ai cuanubi eamereu bucha.¹⁹ Nebamerecue ique ficha enaruquija chipiru tuque tsujetya ishuque. Papeta era, —jadya tujatu ecana acuare.

Jadya ahuaju tunajatu queticuare peadya ficha “denario” bacani Roma juque enaruquique tsujetya ishuque chipiru.²⁰ Petatsu tuna Jesúsra bacaduracuare:

—¿Aija ebutsequini ri riyaque fichaju eiya? ¿Aija ebanani ri rehua ehue?

²¹ —Enaruqui muidaque César bacani jaque tume, —jadya tunajatu quemitsacuare.

—Jutaquiju netyacue enaruquique César tuque tyaishuquedya. Yusu netyacue Yusuja ishuquedya, —jadya tuna Jesúsra acuare.

²² Anajacatacuare tuna tuque jadya caquemitsatiyaju bacatsu. Jadya juatsu tuna cuinanatsu dirubarecuare.

Emaju cuanaque netitsuradadinucabuqueque

(Mr 12.18-27; Lc 20.27-40)

²³ Tumeque huecaca nucadyatu saduceo cuanara Jesús baticuare. Tunaradyatu ejeneacuare ama emaju cuanaque netitsuranucayaque. Junatitsu tunajatu Jesús isaranaticuare:

²⁴ —Ebahuityaquique, Moisésra taa tu riyaque cuatsashacuare: “Ejeque ecuita ni majuya cabacuatimaque, tuatsehuequyetu caquemitinucataqui eahuemaju tsehue, tuatsehue cabacuati ishu, icueneque ebacua emajuja ebacuaque bucha ishu”, jadyatu Moisésra cacuat-sashati hueneacuare béru.²⁵ Riyaque cuatsabiji mique ecuana aya; ijariba ishuque jutidya tu ecuita emajuque chacha netitsuranucaya jadique. Anicuaretu ecuitaja pacarucu ebacua cuanaque. Icueneque ebacuaquetu caquemiticuare. Huanequi juu jadya juatsutu majucuaré bacuamaque. Majuhua jutu ejuque beta ishuque caquemitinucacuare eahuemaju tsehue.

²⁶ Beta ishuque tumbaedyda majunucacuaredya bacuamaque. Quimisha ishuque ejuquetu caquemitinucacuare eahuemaju tsehue. Tumbaedyatu junucacuare. Bacuamaquedyatu majunucacuare. Jadya ecana jubarecuare; pacarucudyatu tumeque epuna tsehue cama ecana caquemittu ma-juetibecuare bacuamaque tere.²⁷ Tumeque nerecadaque epunatu pacarucu ahuee juhuaque majucuaré, yahue cuanaque majuterehuaju. Jadya tuna jucuaré.

²⁸ “Ecuana narami bacaduraya riyaque. Yuneridya ni majuya cuanaque chacha netitsuranucabuque, ¿ejeje ehuanequetu jubuque chacha netitsuranucatsu,

riyaque yahuaju tuque pacarucu ahuee juhua tibu? —jadya tunajatu Jesús bacaduracuare.

²⁹ Jesúsra tuna quemitsacuare:

—Micuana micuana cuji juya. Micuanaratu adebaya ama Yusuja quisarati ehueque, ni Yusura eauque.

³⁰ Emaju cuanaque netitsuranucatsu tuna caquemitinucabuque ama. Barepaju Yusu tsahuaqui cuanaque tuna caquemiti baecua. Jadidya tu emaju cuanaque; netitsuratsu tuna caquemitinucabuque amadya.

³¹ Yuneridyatu emaju cuanaque chacha netitsuranucabuque. Pusha ama cuitadya tuque micuana eje uma isara ahua Yusuja quisarati ehueque adebayaque ama: “Ique Yusu Abraham, Isaac, Jacob jadyara iyacua muiyaque”. Chacha cuanara cuita camadya Yusu emuiu tibu, yuneridyatu Abraham, Isaac, Jacob jadya ecana enetitsura. Yusu tu chacha cuanara muiyaque, emaju cuanara ama, —jadya tuna Jesúsra acuare.

³³ Ecuiteda cuanatu anajacatacuare jadya caquemitsatiya bacatsu.

Ejeque cacuatsashatira cuatsashaya eque cuita ecuana jutaquique

(Mr 12.28-34; Lc 10.27)

³⁴ Fariseo cuanatu, Jesúsra saduceo cuana abacashahua jadya bahue juatsu casitaticuare, Jesús eje bucha jidama acara aatsu. ³⁵ Peadya fariseo cacuatsashati bahuityaquietu tuna tsehuedya jucuare. Turatu Jesús bacaduracuare, cabacadurati eque ijahue acara aatsu datse:

³⁶ —Ebahuityaquietu, aniyatu jetiama cacuatsashati cuana ecuanaja cacuatsashatiju ehueque. ¿Ejeque cacuatsashatira cuatsashaya eque cuita ecuana jutaqui? —jadya tujatu Jesús bacaduracuare.

³⁷ Jesúsratu quemitsacuare:

—“Iyuhueda bacue ducuta Yusu Mique Cuatsashaquietu. Yusu iyuhueda bacue ducuta, dutya micue cabijiseriti tsehue Yusu pureamaturacue, dutya micue inime tupu tsehue, dutya micue casa tsehue”.

³⁸ Riyaque cacuatsashatiratu dutya cacuatsashati cuana sabutillaya. Riyaque cacuatsashatira cuatsashaya eque cuita micuana jutaqui. ³⁹ Beta ishuquetu tumbae cuita nucadya: “Iyuhue tsehue bacue peya cuana; mique cuitadya iyuhueda cabatiya bucha iyuhuee peya bacue”. ⁴⁰ Riya beta cacuatsashati ecatsera cuatsashaya eque ni micuana aniya, tumemi Moisésra, Yusu equeque quisarati cuejaqui cuanara jadya bahuityacuare equedy a juya, —jadyatu Jesúsra acuare.

Mesías tu ecuita camadya ama, ecuita cuana dyaque inimequique

(Mr 12.35-37; Lc 20.41-44)

⁴¹ Fariseo cuanatu tuhuadya ecasitati jucuare jari.

⁴² Jesúsra tuna bacaduracuare:

—¿Eje bucha micuana adebaya Mesías? ¿Ejeque ecuita eque ejuracanaquedy jutidya ni taa tume? —jadya tujatu ecana acuare.

Tunaratu quemitsacuare:

—Ecuana ebaba David emui eque ejuracanaquedy jutidya tume, —jadya tunajatu acuare.

⁴³ —David cuitadyatu bahue jucuare Mesías ecuita camadya ama jubuqueque, ecuita cuana bucha dyaque inimequique, Yusuja Espiritura huecashayaju, “Ique Cuatsashaquietu” jadya isarae acuare tibu, Micuana micuana bahuedy Davidra quisarati jadya acuareque:

⁴⁴ “Yusuratu Ique Cuatsashaquietu jadya cuejacuare: ‘Anibuteque ecue jida eque amaca muita ishu, era mique ujeu baqui cuanaque dutya ijahue atillaya tupu, Ique Cuatsashaquietu’” jadya.

⁴⁵ “Davidradyatu Mesías ‘Ique Cuatsashaquietu’ jadya acuare, arepa tueque ejuracanaque ama bucha. Yuneridyatu Mesías ecuita jutidya ama ejuu; ecuita cuana bucha dyaque inimequiquedy tume, —jadya tujatu ecana acuare.

⁴⁶ Jadya bacatsutu ni ejera buchique quemitsataqui ama bacuare, dutya ecana tuque yuneridy quisarati huaque bahue tibu. Tumeque huecaca equetu ni ejera bacaduranacuare ama tuque jidama acara aatsu.

Jesúsra fariseo cuana, cacuatsashati bahuityaqui cuanaque jadya jidama juyaque ejitaju acuareque

(Mr 12.38-40; Lc 11.37-54; 20.45-47)

23 Tuequedy ecuana tura mepehua cuanaque ecuana Jesúsra isaracuare, tumbaedy ecuita cuana tuhua jucuare cuanaque.

² —Fariseo cuanaja, cacuatsashati bahuityaqui cuanaja mere tu Moisésra cuatsashahuaque cueja. ³ Jadya tibudya nebacacue tunara amereyaju. Dutya tunara cuatsashaya equedy nejuque. Jadya ama bucha tuna aniya bae neaniume. Arepa jida bahuityaya ama bucha tuna jidama aniya. ⁴ Tunajatu peya cuana cuatsasha bahue eje bucha anie juishuque; ai tuna cuitadya tunara bahuityaya eque aniyaque ama. Tsahuaya ama tuna peya jida Yusuja biji eque ani ishu. Cacuat-sashatiya camadya ecana. Abu ishuque dyaque bicueda eje bucha abutaquimaque peya abumere ishuque bajejequi buchique tuna. Tunara cuitadyatu ni ai buchique abucarama aya, ni tuna peya abucherera aya. ⁵ Dutya tunara ayaquetu peya cuanaja peta ishuque jutidya, peya cuanaja sumi ishu. Ecuana bahue eque tunajatu Yusuja quisarati huene bahue ebite eje junuju ama equetiju carisiti ishu, ebiju jadya. Quinquinisi tunaja ebiju, equetiju jadya erisi cuanaque. Dyaque junudaque tuna unaju huesiruyaque jutuya, peya cuana queja Yusu adebaqui jadya cabamereti ishu datse. ⁶ Chine cuana ishu araratayaju cuaatsu tuna emuita cuanaja eaniqui cuanaju cama tuna eaniqui metsene juya. Caradati ishuque etareju cuaatsu tuna muida cuanaque anibahueju anibutetiya. ⁷ Ediji cuanaju juneniyaju tuna dyaque muida tsehue isaratacara juya. “Ebahuityaquietu” jadya tuna isaratacara juya.

⁸ “Micuana jadya nejuume. Peya cuana dyaque inimeju bucha necabatiume. Peya cuana queja ‘Ebahuityaquietu’ jadya catimerecara ebari nejuume.

Ique camadya Micuana Bahuityaqui, ni ejeque buchique micuana dyaque inimeju ama; micuana tsehuequi cuanaque buchique micuana dutya. ⁹ Nemuiume muita ishü ama cuanaque. "Ecuanaja Etata Emuique" jadya ebacani eque neisaraume micuanaja tata ama cuanaque. Peadya camadya tuque micuanaja Tata aniya, barepaju aniyaque. ¹⁰ Micuana cuita camadya ecuatsashaqui bucha necabatiume. Ique Ecuatsashaqui. Ique Yusuja Emepeque. ¹¹ Ejeque ni micuana dyaque inime metseque cabatiya, tumejadyatu peya cuana tsahuataqui iyuhue tsehue. ¹² Yusratu dyaque inime metse cabatiyaque aishu ama amereya. Aishuque ama cabatiyaquetu dyaque inime metse Yusura amereya, —jadya ecuana Jesúsra acuare.

¹³ Tuequedya tujatu fariseo cuana, cacuatsashati bahuityaqui cuanaque jadya isaratibunecuare:

—[Nerecapane micuana, cacuatsashati bahuityaqui cuanaque, fariseo cuana jadya! ¡Jidadya batacara datse micuana juya ai jidaque ama! Dyaque nrecada micuana jubuque, micuanara peya cuana Yusu queja ecatyati cuanaque eaqueja nimee amerejacaya tibu. Micuanaratu era iyacua bahuityaya cuanaque bijidamadranneri ahua. Tumebaedya micuanara peya cuana queja ijacabacamerecarama aya. Micuana micuana etsecue yahue tsehue teriqui buchique, micuana cuitadya nubi ishü ama ni peya cuana nubi ishü.

¹⁴ "[Nerecapane micuana cacuatsashati bahuityaqui cuanaque, fariseo cuana jadya! ¡Jidadya batacara datse micuana juya ai jidaque ama! Arepa micuana eahuemaju cuanaque tsahuaya bucha cabatiya ama bucha, yuneri cuitadya micuana eahuemaju nrecada cuanaque tunaja ai aniya cuanaque secatillaya, tuna tunaja etare juque cuitadya ijehuecuinaya tupu. Yusu tsehue quisaratiyaque micuana tsunuda quisarati bahue dutyaja ijacaju, tuna queja 'Yusu adebaqui cuita rena' jadya catimere ishü datse. Jadya tibudya micuana Yusura dyaque nrecaturabuque.

¹⁵ "[Nerecapane micuana cacuatsashati bahuityaqui cuanaque, fariseo cuana jadya! ¡Jidadya batacara datse micuana juya, ai jidaque ama! Japada micuana cuabahue, muda cuana eque micuana cueti bahue, peya cuana micuanara ejeneya bucha ejenemerera. Amena tunara, tunaja beruque quejeneti cuana iyatsu, micuanara ejeneya bae ejenetsu, tuna icuene juhua bucha dyaque jidama, micuana bucha dyaque jidama. Micuana tsehue judirupeedya tuna ijahuaja etiquiju jubuque.

¹⁶ "[Nerecapane micuana shuhuique bucha cuanaque! Arepa micuana Yusuja quisarati bahuityacara aya ama bucha, micuanara cuitadyatu pana adeba ama aya. Jadya tibudya tuque micuanaja bahuitya bahue: 'Baretaqui amatu micuanara quisarati ayaque, Yusuja etareju ai oro ea cuanaque bacani huesayaque juatsu. Baretaquidyatu quisarati Yusuja etare bacani huesayaque juatsu. Micuanaja ishü tu oro Yusuja etare ducuque dyaque emuique, Yusuja etare bucha ama. ¹⁷ [Micuana micuana inimema! Shuhuique bucha cuanaque micuana. Yusuja etaretu dyaque sare-

tanayaque, tumeque etareju aniya buchique ama. Tuhua oro ea cuanaque tu Yusuja cuanaque, tuja etare ducu tibu. ¹⁸ Tumebaedya tuque micuanaja bahuitya bahue: 'Baretaqui amatu micuanara quisarati ayaque, Yusu tyayaque bacani huesayaque juatsu. Baretaquidyatu quisarati tyayaque iyaquique mesa bacani huesayaque juatsu'. ¹⁹ [Micuana micuana inimema, shuhuique bucha cuanaque! Mesa Yusu jaque juya tibu, tumeque mesa tu dyaque emuique, uu, upati cuana jadya micuanara Yusu tyayaque mesaju iyaya cuanaque bucha ama. ²⁰ Bijidamaduraya ni micuana mesa, tumebaedya tuque micuana bijidamadurayadya mesa dyaque aniyaque. ²¹ Bijidamaduraya ni micuana Yusuja etare, tumebaedya tuque micuana bijidamadurayadya Yusu tuhua cabameretiyaque. ²² Bijidamaduraya ni micuana barepa, jutaquiju taa tuque micuana bijidamadurayadya Yusuja eaniqui, Yusu cuitadya jadya, tuque tuhuadya aniya tibu.

²³ "[Nerecapane micuana cacuatsashati bahuityaqui cuanaque, fariseo cuana jadya! ¡Jidadya batacara datse micuana juya, ai jidaque ama! Arepa micuana cacuatsashati cuana aishuque ama jipenee eque juya ama bucha, cacuatsashati dyaque inime metse eque micuana aniya ama. Micuanajatu Yusu tyabahue cacuatsashatira casada tsehue tyamereyaque camadya. Acuihuija ijimeda cuanaque "anis", "comino" jadya bacani micuanaja etare taracaju euhua cuanaque tuque micuanaja tyabahue. Jadya ama bucha tuque micuana jida, tuyu tsehue ama baya peya cuana. Nreca baya ama micuanara eana. Micuanara aana ayaque tuque micuana aya ama. Pusha amadya tuque micuanaja Yusu tyataqui cacuatsashati eque casada tsehue tyataquique. Jadya ama buchatu dyaque saretanaya jida, tuyu peya cuana tsehue ani ishü, tuna canerecabati tsehue baishu, micuanara aana ayaque aishu jadya. ²⁴ Shuhuique cama micuana caaquerenitiya. Micuanaratu quibeti tsehue aya aishuque ama, dyaque ataquique micuana peya queja iya aya. Canecu juque ena ijiyaque dii ebuijuju equemiu bucha, tumeque piji buijicaramaque, cahuyau ebari ebuiju bucha tuque.

²⁵ "[Nerecapane micuana cacuatsashati bahuityaqui cuanaque, fariseo cuana jadya! ¡Jidadya batacara datse micuana juya, ai jidaque ama! Arepa micuana ecuitaju asicadaque jida catillaticara juya ama buchatu Yusura micuanaja inime ducuta asicada baya. Bijiserijacaya ama micuana chipiru, micuana cuita camadya captureamaturati ishü. Chiri micuana juajeyadya jutidya ai bijiseriyaque cadaditi ishü. Yusratu tume cuanaque dyaque asicada baya. Micuana micuana canecu, peja jadya dyaque camadya eutsaque bucha, educuju asicadaque utsama. ²⁶ Fariseo cuana, micuana micuana shuhui cuana buchique. Icuene cuita necajuchatiacacue, Yusuja biji eque ani ishü. Jadya anie juyaju micuana Yusura jida asicadama baya, canucu dyaque, educuju jadya pana utsa eaque bucha.

²⁷ "[Nerecapane micuana cacuatsashati bahuityaqui cuanaque, fariseo cuana jadya! ¡Jidadya batacara datse micuana juya, ai jidaque ama! Micuana micuana ema-

juja uhuacuare pajada tsehue dyaque epepaque bucha. Petatsutu emaju cuanaja uhuacuare cuana jida piji. Educuju bacue emajuja etsau cuana erami jadya eririque jirutaquimaque. ²⁸ Jadya micuana juya. Quisaratiyaju bacatsu micuana ecuita cuanara ecuita jida cuanaque bucha baya. Educuju micuanaja inime tupu bacue micuanaja jidama. Micuana cabameretiya bucha ama micuana.

²⁹ “Nerecapane micuana cacuatsashati bahuityaqui cuanaque, fariseo cuana jadya! Jida bucha datse micuana cabamereticara juya, ai jidaque ama! Béru tu micuanaja baba cuanara iyecuare Yusu equeque quisarati cuejaqui cuanaque, peya jida cuanaque jadya. Iy-acua tuque micuana micuanaja baba cuanara iyecuare cuanaja uhuacuare cuana, tunaja cueya cueya cuana mui ishu jida piji bajejeya. ³⁰ ‘Ecuana beru yuequedya anicuareque juatsu, ecuanaja baba cuana juhua eque ama ecua juquena juhua. Iyequena ama ecua juquena juhua Yusu equeque quisarati cuejaqui cuanaque’ jadya micuana jubahue. ³¹ Jadya quisarati eque micuana amena ejitaju juya micuanaja baba cuanaja inime cadujutiyaque. Micuana cuitadya micuana Yusu equeque quisarati cuejaqui cuanaque iyequi cuanaque jucuare bae juya. ³² Micuanaratu aajeya jaridya micuanaja baba cuanara jidamaque tibunecuareque.

³³ “Micuana micuana jii jii ama, bacua ujetaque bucha! Micuanaja baba cuana baedya micuana juya! Tunaja inime jari cuitadya micuana cadujutiya jari. Yuneri cuitadya micuana ijahuaja etiquiju canerecaticuque; eje bucha huanataqui ama micuana jadya canerecati ishu ama. ³⁴ Era tuque micuanaja cuadishabuque ique equeque quisarati cuejaqui cuanaque. Cuadishabuque tuque micuanaja ecue quisarati pana adeba aya cuanaque. Cuadishabuque tuque micuanaja ecue quisarati pana bahuitya abahue cuanaque. Ijacabacacarama tuque micuana abuque. Eje uma tuque micuana ecana iyebuque, curusuju tatatsu. Peya cuana tuque micuana miririshabuque etare caradati ishu cuanaju. Peya cuana tuque micuana nerecada abuque, peya epu cuana juque huanashayaque.

³⁵ Nerecaturatabuque micuana ecue cuanaque jidama ahaju camadya ama, tumbaedy micuanaja baba cuanara béru yuequedya ecuita jida cuanaque iyecuare tibu. Dutya iyetacuare tibu Abel equeque, Zacarías tupu micuana jucha metse. Zacarías, Berequíásja ebacuaquetu Yusu etareju iyetanacuare, Muida Cuitaque Ama, mesa tumu eaque Yusu tyaya cuanaque iya ishuque patya majaca. ³⁶ Pusha amadya micuana cuejaya. Micuana iyacua aniya cuanaque micuana nerecada atabuque Yusu dutya merequi cuanaque iyetacuareja inime, —jadyatu Jesúsra acuare fariseo cuana, cacuatsashati bahuityaqui cuanaque jadya.

Jesús Jerusalénju cuanara bijidamadurayaque caadebatitsu pacuareque (Lc 13.34-35)

³⁷ Jadya quisarati amena aatsutu Jesúsra quisarati acuare Jerusalénju aniya cuanaja ishu. Tuna cuitadya baatsu quisarati aya buchatu jucuare, arepa tuna tuhua ama jucuare ama bucha.

—Micuana Jerusalénju aniya cuanaque, micuanaja epu ebarijutu Yusu equeque quisarati cuejaqui cuanaque tumu tsehue iyetajacama jucuare. Eje uma narucara ebari datse micuana ahua. Tacure jabacua cuana ecuaquera yajapara emaque ishatsu enaruu bucha, narue datse micuana acara ahua. Micuanajatu ecue jadya narue aishu bijidama juhua. Dutya jujeri micuana eaqueja catyaticarama juhua. ³⁸ Nebacacue. Yusratu tuja epu ebari narujacabuque, tumbaedy tuhua anibuque cuanaque. ³⁹ Banucabuque ama micuanara ique, “Jida paju Yusuja ebacaniju juna-yaque”, dutya israelita cuana jadya judadiya tupu, —jadyatu Jesúsra jucuare.

Jesús “Yusuja etaretu pana rihuishatana jubuque” jadya jucuareque (Mr 13.1-2; Lc 21.5-6)

24 Yusuja etare juque cuinanayara, ecua Jesúsra mepehua cuanara tuque ecua isaracuare:

—Ecuana Bahuityaqui, petacue! Dyaque jida piji taa Yusuja etare, tumbaedy dutya ai ea cuanaque etare tsecue cuanaju, —jadya tuque ecua acuare.

² —Pusha amadya. Jida pijidya tuque ecua petaya. Jadya ama buchatu Yusuja etare, etsecueju dutya ai ea cuanaque pana rihuishatanatere jubuque. Anibuque amatu tumu ecadyaqueti. Dutya tumu etare enityat-suraquetu yahuaju tere jubuque, —jadya tura ecua acuare.

Terehuie adeba ishuque jubuqueque (Mr 13.3-23; Lc 21.7-24; 17.22-24)

³ Jadya juatsu ecua cuanacuare uhua cuemusú Olivo Acui Quini bacaniju. Cuayaquetu Jesús anibute-naticuare. Anibutehuaju tuque ecua isaracuare:

—Cuejacue ecua. ¿Eje tuputu jadya judadiya? ¿Aiju ecua caadebatibuque mique junanucayaque, yahua tereyaque huecaca japadamaque jadya? —jadya tuque ecua bacaduracuare.

⁴ —Nimequi tsehue nequihuaticue. Ijahue neca-timereume. ⁵ Ique junanucahuie tuna jetiama junabuque iquepa ejuu jadya juya cuanaque. “Idya Mesías, Yusuja “Emepeque”, jadya tuna jetiama junabuque. Jetiamara tuna ejenebuque. Ijahue tuna atabuque. ⁶ Dutya quejaquedya jutidya tuna catibuque. Japadama tuque micuana ecana catiyaju bacabuque. Tumbaedy tuque micuana ecana japadapa catiya jadya bacabuque. Jadya bacatsu “Masadamatu tere juetiya”, jadya micuanaja inime paju ama. Dutya tume cuanaquetu jadya jubuque icuene. Tere ishuque ama jari tume. ⁷ Riyaque yahuaju cuanaque tuna peya

yahuaju cuana tsehue catibuque. Anape cuanaquetu catibuque peya anae cuana tsehue. Eje uma epu cuana tuna dyaque mije jubuque. Bucucubuquetu yahua dutya queja. ⁸ Jadya cuana judadiyaquetu canerecati catibutiyaque jutidya. Ecue cuanaque tuna dyaque canerecatibuque.

⁹ Tume tunara micuana tunaja biji ijahue ijahue abuque. Dutya jujerira micuana ujeu babuque, eaqueja ecatyati baatsu. Iyebuque tunara micuana. ¹⁰ Eje uma tuna eaqueja nimee jujacabuque, ecue ama cuanaque aniya bucha anie junuca ishu. Ujeu tuna cabatibuque. Yurameta ijahue quinatibare juatsu tuna ujeu cabatitsu huaraji cuana queja quinameretibuque. ¹¹ Jeti amatu cuinanabuque pusha pusha arida cuanaque, Yusuja quisaratipa ecuejau jadya juya cuanaque. Dyaque ijahue tunajatu ecuita cuana abuque.

¹² Dyaque cuita canerecati juetihua ju tuna dutya jujeri yurameta iyuhueda cabatijacabuque. Etiqui riya piji ticuajeya bucha tunajatu iyuhue tereajebuque. ¹³ Ejeque tereya tupu eatsehue nime aputayaque ama camadyatu Yusu queja judirubuque, ni eje tupu tuque jacanuca ishu ama. ¹⁴ Dutya quejatu riyaque yahuaju quisarati tsapetanabuque Yusura dutya naruyaque, dutyaja ecue quisarati adeba ishu. Dutya queja Yusuja quisarati cuejatanahuaju ique chamacama junanucabuque, —jadya tura ecuana acuare.

¹⁵ Jesúsra ecuana cuejanucacuare:

—Ejitajutu dyaque jidama cuitaque judadibuque, “Ecuita Cuana Bajituraquique” bacani. Tumequedyatu Yusu equeque quisarati cuejaqui Danielra béru huenecuareque. Tuquetu ejitaju jubuque Yusuja etareju. Tumequepa amena juetihua jadya bacatsutu Yusuja quisarati ehueque pana adeba aya cuanara adebabuque masadama eje bucha judadiyaque. ¹⁶ Ecuita Cuana Bajituraquique Jerusalénju juetihua jadya bacatsutu Judea yahuaju cuanaque huanataqui emata cuanaju catehua juishu. ¹⁷ Muya jutidyatu Ecuita Cuana Bajituraquique juetibuque. Jadya tibudya tuna etare ebarucue ecamahua jepeda cuana juque ai inaquenama butetaqui huana ishu. ¹⁸ Teeju mere juya cuanaque tuna judirunucataqui ama tunaja etareju. Tuequedyata tuna huanataqui. Nubitinucataqui ama tuna tunaja caramati ishuque jiteque. ¹⁹ Dyaque nerecadatu jubuque epuna maqui cuanaque, bacua nanaqui cuanaque jadya. Tuna tuna eje bucha huanataqui ama ebajarara cabatibuque. ²⁰ Nebacabacacue Yusu queja, micuana huanayaque huecaca cuejipa, nei, jadya ama juatsu canajara huecacaju micuana huanayaque huecaca ejuetiuju. ²¹ Ecuita Cuana Bajituraquique ejitaju juhuajutu dyaque canerecati ishuque anibuque. Ni eje tuputu jadya canerecati anihua ama Yusura yahua iyahua equeque tumeque huecaca judadibuque bucha. Ecuita Cuana Bajituraquique ijehuetanahuajutu aninucabuque ama jadique canerecati ni eje tupu.

²² Dyaquetu Yusura iyuhueda baya tuja cuanaque, tura mepehua cuanaque. Jadya tibudyatu Yusura tumeque huecaca canerecati ishuque jununushabuque ama. Tu-

ra ni jadya ama eau, ni aira buchiquetu eiduu ama; ni ejequetu chacha ejuu ama.

²³ “Aira cuejatsu ama micuana ique junanucahuque bahue jubuque. Jadya tibudya ejera ‘Mesiastu junanucagua. Ecuana epujudya rique’ jadya ayaju, neejeneume. Ejera ni micuana aya: ‘Mesiastu junanucagua. Peya epuju tuque’ neejeneume. ²⁴ Tume cuanaque huecaca juetihua ju tuna jetiama pusha pusha jubuque: ‘Ique Mesías, Yusuja Emepeque’ jadya ama juatsu ‘Ique Yusuja quisarati cueja ishuque cuita camadya’ jadya. Abuque tunajatu inimeradya jutidya ecuitaja ataquique ama. Eje uma tunajatu ecana ijahue abuque. Dutya tunajatu ecana cujishabuque. Yusuja cuanaque neri neri tunajatu ecana ijahue acara ebari abuque. ²⁵ Jida nebacacue. Icuenetadya micuana cuejahua riyaque, micuana ijahue eatauju. ²⁶ Jadya tibudya, ejera jadya cuejayaju: ‘Mesiastu junanucagua. Yuqueja tuque’ neejeneume. Necuaume ique sarera tuhua. Cuejaya ni tunara micuana; ‘Mesiastu junanucagua. Rehuadyari catehua juya’ neejeneume. ²⁷ IQUE ECUITA eje tupu junanucayaju, dutyaradya babuque. Dutyajadyatu babahue pupipupiyaque ijeti cuinanaya queja, ijeti nubiya queja; jadidya ique dutyara babuque junanucayaju. ²⁸ Eju ai emajuque ririyajutu jamanu cuana caradatiya aija cuejatsu ama. Tumebaedyatu jubuque ique junanucayaju. Dutya tuna bahue jubuque, aija cuejatsu ama, —jadya tura ecuana acuare.

ECUITA junanucayaju eje bucha jubuqueque

(Mr 13.24-37; Lc 21.25-33; 17.26-30, 34-36)

²⁹ Jesúsra ecuana bahuityanucacuare:

—Masadama huecaca cuana nerecada juishuque cuetiajeyaju cuitadyatu ijeti apunabuque. Baditu huecadama jubuque. Purari cuanatu barepa juque pacacabuque. Barepaju casada aniya cuanaque tuna piririterebuque. ³⁰ Ique masadama junanucayaque adeba ishuquetu barepaju ejitaju jubuque. Dutya yahuaju cuanaratu babuque. Baatsu tuna dyaque bajida juatsu pabuque. Tuequedyata tunara IQUE ECUITA junanucayaju batsabuque. Ecue dyaque casa tsehue junanucabuque. Cabameretibuque ique eje bucha muitaque. ³¹ Meyamerebuque tuque jebuda barepa juque meya ishuque. Cuadishabuque tuque barepaju ique tsahuaqui cuanaque, ecue cuanaque dutya yahua queja aniya cuanaque sita ishu.

³² “Anibuquetu ique masadama junanucayaque adeba ishuque, masadama nei mara catibutinucayaque adeba ishuque aniya bucha. Ita taa acui higuera bacani neadebacue. Yaa cuana catapananatiyaju baatsu, micuana bahue amena nei mara catibutiyaque.

³³ Tumebaedya micuana dutya riya cuanaque era cuejahua cuanaque juajeya baatsu, bahuedya micuana jubuque yahua amena terehueque. ³⁴ Pusha amadya micuana cuejaya. Dutya riya cuanaquetu judadibuque iyacua ecuita cuana aniyaque majuma jarijudya.

³⁵ Arepa barepa, yahua jadya pana cuaretana jubuque

ama bucha, dutya micuana era cuejehua cuanaquetu cuaretanatsu ama jadya judadibuque.

³⁶ “Yusu ecue Etata peadya camadyatu bahue ejeque huecaca ique junanucayaque. Tuque peadya camadyatu bahue huecadajuni, jadya ama juatsu meta eje tupu ique junanucayaque. Ni ejeque ecuitaratu adebaya ama. Ni ejeque barepaju Yusu tsahuaquiratu adebaya ama. Arepa ique Yusuja Ebacuaque ama bucha, eratu adebaya amadya.

³⁷ “Noé anicuare patya, tuque cuaba ebariju nubima jarijutu ecuita jidama cuanaque anicuare; ni ecana Yusura nerecaturayaju canerecati ishü equihuati jucuaque. Jadidyatu jubuque ique junanucahuie. Ecuita cuanatu jidamadya jutidya anibuque, Yusura eje bucha ayaque quihuatima. ³⁸ Beru tume patya, ena eque teretama jarijutu ecuita cuana anicuare tuna anitibehua buchadya jutidya. Araaraya; ijijiyaya; huanequi juya; ebacujuna cuanaque, ebacua cuanaque caquemiti ishüque inime bajeje jadya anie tuna jucuaque Noé cuaba ebariju nubicuare tupu. ³⁹ Muya jutidyatu ena shumaumaque ama jueticuaque, tunara ihuayaju ama. Dutya tuna huiditerecuare. Jadidyatu jubuque ique junanucahuie. Ecuita cuanaratu adebabuque ama eje tupu ique junanucayaque. ⁴⁰ Tumeque huecaca ique junanucayajutu ecue cuanaque enityasicua jubuque ecue ama cuana ducuque. Beta ecuita teeju cuinetse mere ejuu. Ecuiquetu Yusu queja dujutanabuque. Peaya bacue shanatanabuque. ⁴¹ Beta epuna tuhua cuinetse eerieriu. Ecuiquetu dujutanabuque Yusu queja. Peaya bacue shanatanabuque.

⁴² “Jadya tibudya nequihuaticue. Neihuajacaume ique junanucayaque, ai micuana bahue batune eje tupu Micuana Cuatsashaquique junanucayaque. ⁴³ Ni ejeque etare metsequetu bahue ama ejeque ura chiri puji ejutiique. Junayaque bahueque juatsutu ecabati ejuu, chiri puji etareju chiri ejutiique naru. ⁴⁴ Micuana dyadi equihuaticue nejuque ique batsa ishü. Muya jutidya micuana eanau, ejeque huecaca ique junanucayaque baecua juya tibu, —jadya tura ecuaque acuaque.

Mere puji cuejataquique, cuejataquimaque jadya

(Lc 12.41-48)

⁴⁵ Jesúsra ecuaque bahuityanucacuaque:

—Neihuacue ique, mayuruma jidara tuja patrón iyuhuedaque juetiyaque eihuau bucha. Mere puji yana equedya juyaquetu jida, inimequique. Micuanaja pana adeba aishu micuana cuejaya riyaque. Anicuaretu mayuruma. Tuja patronratu shanacuare tuque juneniya tupu tuja etareju cuanaque naru ishü. “Dutyahuecaca ecana ara ishü cuanaque tyacue”, jadya patu tuja patrónra aquenacuare. ⁴⁶ Tumeque mayuruma ni amerehua eque juya, peya cuana ni tu narujacaya ama, dyaque pureamatu jubuque tuja patrón juetihua ju. ⁴⁷ Pusha amadya micuana cuejaya. Tura tuja patrónra mere puji cuana jida naruhua tibu tujatu dutya tuja ai aniya cuanaque narumereya.

⁴⁸ “Mayuruma ni cuejataquima, amerehua eque amadyatu juya. Turani jadya inime tupuya: ‘Ecue pa-

tróntu juetihuishaya ama’ jadya. ⁴⁹ Amena jadya juatsu tujatu peya mere puji cuana nerecaturaya; ijahue ijahue jutidyatu ecana aya. Chine mere, araara, nijiqui arida cuana tsehue ijijiyaya jadya tsehue jutidyatu ecana aniquereya, tuja mere ataqui ama bucha. ⁵⁰ Tumetu tuja patrón juetiyaya ni tuque quihuaticue, ni tuque juetinuacayaque ura bahueju. ⁵¹ Jadya baetitsutu tuja patrónra catsacatsa, ijehue jadya aetiyaya tuja etare juque. Riyaque mayuruma baetu Yusuja cuanaquepa ejuu jadya juya cuanaque tuja yacua juque ijehue tanabuque. Tuhua ijahuaja etiquiju tuna dyaque canerecatiyaque, payaque etse tari jubuque, —jadya ecuaque Jesúsra acuaque.

(Riyaque cuatsabiji eque tuna Jesúsra bahue amerecuaque acuaque tuque iyuhueda baqui cuanara ihuayaque; tuque iyuhuedama baqui cuanara bacue ihuaya ama jadique.)

Peadya tunca epuna ehue ebari cuana equeque cuatsabiji

25 Jesúsra ecuaque bahuityanucacuaque:

—Cuejaya micuana riyaque cuatsabiji Yusura naruyaju eje buchique micuana bahue juishu. Caquemitiyaque chinetu anicuare. Caquemitiyaya iyuhueda cuanaque tuna etsecueju neticuare tuque junayaque ihua juyaque. Peadya tunca epuna ehue ebari tuna jucuaque. Peadya peadyajadya tunajatu lamparina anicuare etseri tsehue ejequeshaque. ² Pishica tuna inime adebabadaque jucuaque. Icuenetadya tunajatu lamparina etseri tsehue jequeshaque. Tumebaedya ecana botillaju etseri cadujuticuare, terehuaju lamparina jequeshanuca ishü, caquemitiyaque etsuntauque adebatsu. Pishicadya tuna inimema jucuaque. Cadujuticuare ama ecana etseri lamparina urahuaju jequeshanuca ishü. ⁵ Peadya tunca epuna ehue ebari cuana tuna tahuira jetiedya ahuaque tahuicuare. ⁶ Tume tuna metapatya quique eque aira cuana bushishacuare. “¡Jehuatü amena caquemitiyaque! ¡Netsurutsacue!” jadyatu ejeque cuana quiquecuare. ⁷ Dutyatu epuna ehue ebari cuana netitsuracuare. Tume tuna lamparina cabajejetibunecuare. ⁸ Yara tupu juatsutu pishica inimema cuanara adebacuaque tunaja lamparina jequesha ishü etseri aijamaque. “Riya piji ecuaque etseri netyacue. Ticuya tuque ecuanaja lamparina”, jadya tunajatu inime adebabada cuanaque acuaque. ⁹ Tunaratu quemitsacuare: “Aama. Aijama tuque ecuanaja etseri micuana tyaisü. Necuacue tunara catyati ayaju. Nequemiticue micuanaja”, jadya tunajatu ecana acuaque. ¹⁰ Jadya ahuaque tuna cuacuare etseri quemira. Tuna etseri bacara cuaya tsunumeedyatu huanequi juyaque junaticuaque. Epuna ehue ebari equihuati jucuaque cuanaque tuna tuatsehue nubipee jucuaque, carisitihuaque chine juyaju. Nubitsu tunajatu etsecue tericuare. ¹¹ Yara tupu juatsutu peya pishica epuna ehue ebari cuana juetinuacuaque. “Nudyacue ecuaque”, jadya tuna quiquecuare. ¹² Tura tuna pana teri ea eque quemitsacuare: “Aijama. Adebaya ama micuana era. Nedirucue”, jadya tuna caquemitiyaya acuaque. Jadyatu

jucuaire peadya tunca epuna ehue ebari cuana,
—jadya ecuana Jesúsra cuejacuaire.

¹³ —Nequihuaticue, ai micuana ique ejeque huecaca junanucayaque bahue batu. Baecua micuana huecadaju, jadya ama juatsu meta jadya ique junanucayaque, —jadya ecuana Jesúsra acuare.

Chipiru umanashaqui cuanaque cuatsabiji eque bahuityacuareque

(Lc 19.11-27)

¹⁴ Jesúsra ecuana bahuityanucacuare:

—Cuejaya micuana riyaque cuatsabiji Yusura dutya naruyaju eje buchique micuana bahue juishu. Ancuaretu ecuita chipirudaque. Pea yahuaju cuacaruquetu jucuaire. Ihuaracuare tujatu tuque merequi cuanaque. Ihuaratsu tujatu ecana acuare: “Ique juneniya jari tupu jida nenarucue tumeque chipiru peadya peadyaja ishü era micuana tyabareyaque. Neumanashacue”, jadya tujatu peadya peadya cama mere puji cuana abarecuare. ¹⁵ Dutya tupu ama tujatu ecana chipiru tyabarecuare. Peadya tujatu tyacuare pishica mil chipiru, peya bacue beta mil, peya bacue peadya mil. Tyabarecuaretu ecana tunaja umanashataqui tupu adebatsu. Tuna chipiru tyabaretsutu cuacuare japada. ¹⁶ Pishica mil tyatanahuaquetu meredyaju cuare chipiru tsehue. Chipiru tsehue jida mere juatsu tujatu tuja patrónra chipiru tyahuaque beta tupu amerecuare. ¹⁷ Beta mil tyatanahuaquetu meredyaju cuare chipiru tsehue. Chipiru tsehue jida mere juatsu tujatu tuja patrónra tyahuaque beta tupu amerecuare. ¹⁸ Mil tyatanahuaquetu tuja patrónra amereya eque ama jucuaire. Dirutsu tujatu tuja patrónra chipiru yahua puru jadya aatsu papacuare.

¹⁹ “Eje uma badi juatsutu juetinucacuare tunaja patrón tuna queja. Ihuarabarecuare tujatu chipiru tyaquenacuare cuanaque. Bahuetu jucara jucuaire tunara chipiru eje bucha acuareque. ²⁰ Icuenuetu juticuare pishica mil chipiru tyatanacuareque. Tyatsacuaretu tuja patrón pishica mil chipiru tuja cuare tyanuca aishuque, tura pishica mil mere aatsu umanashacuare tsehuedya. Ique mira tyacuare pishica mil chipiru. Jeedyamie micue, peya pishica mil tsehue, era mere juatsu umanashacuareque’ jadya tujatu tuja patrón acuare. ²¹ ‘Jida. Jidaque ecuita yana equedyaju huaque mique. Miratu pana tsume ahua era riyapiji tyacuareque. Tume mique tyaya mere dyaque muidaque. Eatsehue pureama jupeedyami juyae ecue jidaque aniyatsehue’ jadyatu tuja patrónra acuare. ²² Tuequedyatu jutinucacuare beta mil chipiru tyatanacuareque. Ique mira tyacuare beta mil. Jeedyamie micue, peya beta mil tsehue, era mere juatsu umanashacuareque’ jadya tujatu tuja patrón acuare. ²³ “Jida. Jidaque ecuita yana equedyaju huaque mique. Miratu pana tsume ahua era riyapiji tyacuareque. Tume mique tyaya mere dyaque muidaque. Eatsehue pureama jupeedyami juyae ecue jidaque aniyatsehue”, jadyatu tuja patrónra acuare.

²⁴ “Tupujutu jutinucacuare mil chipiru tyatanacuareque. Junatitsutu anaticuare tuja patrón:

‘Ique bahue micue peya cuana tsehue canerecabati aijamaque. Ique taa bahuedya jucuaire mira ecue riyapiji aniyaque secanucabuqueque. Arepa ecuanaradya tee cuana uhuahua ama bucha, miratu huesamereya micue ishü cuita camadya. Arepa ecuanara iruruya ama bucha, dutyadya tu micue etsucaca cuana quiniquique jequesha ishüque. ²⁵ Jadya tibu bajidajucuaire, mira era aputashahuaju cuana jidama eauju. Bajida juatsu tuque micue chipiru yahua purutsu papatsu tehuacuare. Jeedyamie micue ique mira tyacuareque’ jadya tujatu tuja patrón acuare. ²⁶ ‘Cuejahuanataquima! Dyaini! Iyacuami bahue juya. Era camadyapa tsumehua dutya ecue ishü camadya micuanara uhuahuaque. Erapa ecue etsucaca iya ishüju iyahua dutya micuanara iruruhua cuanaque jadya. ²⁷ Jadya mira ejeneya tibu taa tuquemi dujuquena cuana dyadi juquena jucuaire chipiru umanashaqui cuana queja. Tume taa tuque junanucatsu equeminau mil chipiru tumeque umanashaqui cuana queja tyacuareque juatsu. Tume tuque ecue chipiru eumana tsehue inapee aquena juhua’ jadyatu tuja patrónra acuare. ²⁸ Isaracuare tujatu tuhua jucuaire cuanaque: ‘Nesecacue chipiru tumeque mere puji cuejataquimaque. Netyacue peadya tunca mil umanashaqui juhuaque. ²⁹ Ejeja aniyaketu dyaque tyatanabuque. Tuja aniyaque dyaquedyatu tyatanabuque. Ejera ni jidama tsumeya tuque tyatahuaque, secatabuquedyatuque, arepa riyapiji tuja aniya ama bucha. ³⁰ Riyaque mere pujiratu tuque tyatahuaque jida ama tsumehua. Apuda ducu neijehuecue. Tuhua dyaque canerecatiyaque payaque etse tari paju’ jadyatu tuja patrónra acuare tuhua jucuaire cuanaque. Jadyatu jucuaire mere puji cuana chipiru tyacuare cuanaque, —jadya ecuana Jesúsra acuare.

(Riyaque cuatsabiji eque tuna Jesúsra huecashacuare, Yusu ecuanaja dutya casa tsehue mere-taqui tura ecuana casa tyaya tsehue.)

Ecuana rehua eje bucha juhua eque ecuana Yusura adadibuqueque

³¹ Jesúsra ecuana bahuityanucacuare:

—IQUE ECUITA junanucatsu, huaraji dyaque aridaque bucha junanucabuque. Barepaju ique tsahuaqui cuana tsehue junanucabuque. Junanucatsu anibutebuque dyaque emui judadiyaju, ique Yusura tuque cuarequi enaruquique jadya ishü cuatsashahua tibu. ³² Cuadishabuque tuque barepaju ique tsahuaqui cuanaque dutya ecuita dutya yahua juque, epu cuana juque sitabare ishü. Uhuisha naruquira uhuisha cuana, cabra cuana ducuque ejaquebareu buchatu era ecue cuanaque jaquebuquedyae cuique ama ducu cuanaque. ³³ Iyabuque tuque ecue cuanaque jida eque amaca, eaniqui muidaju tunaja tuna muitaqui juishu. Ecue ama cuanaque tuque iyabuque jani eque amaca, ecue cuanaque pana jacamere aishu. ³⁴ Ecue jida eque amaca cuanaque tuna abuque: “Nejecue eatsehue. Ecue Etata Yusura micuana dyaque jidaque tyabuque cuanaque micuana tyaya, yahua iyatanahua eque era

ecue cuanaque tyaana ahuaque. Nebaeticue era micuanaja ishu bajeeticuareque. ³⁵ Aracara juyaju micuanara tyahua ara ishuque. Ijicara juyaju, micuanara tyahua iji ishuque. Ique tarema juneniyaju, micuanara nudyahua micuanaja etareju. ³⁶ Jutuquima juneniyaju micuanara tyahua jutu ishuque. Ujejeda juyaju micuanara cuajitihua chachanecara aatsu. Etare apudaju netiyaju baatsu micuanara batihua ique nime casatura ishu", jadya tuna era abuque ecue cuanaque. ³⁷ Tume era jadya ayaju tuyu jucuare cuanara quemitsabuque: "Ecuana Cuatsashaquique, caadebatiya ama taa ecuana eje tupu mique ecuana arama, ijima jadya baatsu mira ai sareyaque tyahuaque. ³⁸ Caadebatiya ama ecuana eje tupu mique tarema bucha juneniyaju etareju nudyahuaque, ni eje tupu mique jutuquima baatsu tyahuaque. ³⁹ Caadebatiya ama ecuana eje tupu mique ujejeda baatsu ni etare apudaju baatsu mique ecuana tsahuacara aatsu batihuaque", jadya tunara abuque. ⁴⁰ Era tuna quemitsabuque: "Pusha amadya cuejayadya micuana era. Micuanaratu ecue cuanaque tyahua tunaja ai aijama cuanaque. Micuanaratu tsahuahua ecue eatsehuequi cuanaque buchique. Ejera dyaque jetiedya buchique tsahuahuaque, idya cuitadya tura tsahuahua", jadya tuna abuque. ⁴¹ "Tuequedy tuque ecue cuanaque ama abuque: 'Japada nejucue cuejahanataquima cuana! Nenubidirucue ijahuaja, tuque tsahuaqui cuanaja jadya ishu etiqui eiyaju. Tuhua micuana canerecatijacanime ama. ⁴² Ique aracaraque juneniyaju micuanara tyahua ama ara ishuque. Ijicaraque juneniyaju micuanara tyahua ama iji ishuque. ⁴³ Ique tarema bucha juneniyaju micuanara nudyahua ama micuanaja etareju. Jutuquima baatsu micuanara tyahua ama jutu ishuque. Ique ujejedaju etare apudaju netiya baatsu micuanara batihua ama ique nime casatura ishu' jadya tuna era abuque. ⁴⁴ Era jadya ayaju tunara jadya abuque: 'Ecuana Cuatsashaquique, ¿eje tupu jatsu mique ecuana tsahuacarama acuare? ¿Eje tupu jatsu mique ecuana arama ijima, tarema, jutuquima, ujejeda, etare apudaju jadya baatsu tsahuacuare ama?' jadya tunara abuque. ⁴⁵ Era tuna quemitsabuque: 'Pusha amadya cuejaya micuana era. Micuanaratu ecue cuanaque, ecue eatsehuequi cuanaque buchique tsahuahua ama ni dyaque jetiedya bucha cuanaque. Tuna tsahuahua ama tibu, idya micuanara tsahuahua ama' jadya tuna abuque. ⁴⁶ Jadya cuanaque tuna canerecati ishuju nubidirubuque ni eje tupu cuinana ishu ama. Yusuja biji eque juya cuanaque tuna Yusuja yacuaju judirubuque ni eje tupu tuque jaca ishu ama —jadya tura ecuana cuejacuare.

Jesús ujeu baqui cuanara tuque inamere ishu inime bajejecuareque

(Mr 14.1-2; Lc 22.1-2; Jn 11.45-53)

26 Jadya cueja amena aatsu tura ecuana tura mepehua cuanaque cuejanucacuare:

² —Micuana micuana bahuedya metajudya tibene Pascua chine juyaque. Riyaque chine ishudy a ique ujeu baqui juya cuanara inamereya curusuju tatamere ishu, —jadya tura ecuana acuare.

³ Jesúsra ecuana isaraya jarijutu pae cuanaja huaraji cuanara, israelita cuana emuiba cuanara jadya inime tupucuare eje bucha iyemere Jesús aishuque. Casitaticuare tuna Caifás pae dyaque muidaja etareju. ⁴ Tuhua tunajatu Jesús iye ishu, tseta inamere aishu inime bajejecuare. ⁵ —Neinamerera ama Pascua chine ishu cuita, ecuita cuana ecapuritishau tibu, —jadya tuna jucuare.

Epunara Jesúsja iyucaju etseri ijimedaque juracuareque

(Mr 14.3-9; Jn 12.1-8)

⁶ Jesústu Betaniaju jucuare Simónja etareju. Icuenu tumeque ecuita erami ririshaqui ujeje tsehue jucuare. Jadya tibudya tunajatu "Leproso" jadya isarae acuare.

⁷ Chineju araarayajutu Jesús epunara jipeticuare botilla caca alabastro eaque ina jadya. Tumeque botilla cacatu etseri ijimeda tsehue ejequeshaque jucuare, dyaque tsuje aridaque. Jesús mesaju juaniyajutu epunara etseri ijimedaque tuja iyucaju juraticuare.

⁸ Epunara jadya aya baatsu ecuana Jesúsra mepehua cuanaque cahuaicuaque.

—Nepetacue tura etseri dyaque tsuje aridaque ije-hueneyaju. Ni aishu buchiquetu jida ama jadya ije-huenetsu. ⁹ Catyati ni tu aquena juhua etseri ijimedaque, umada tujatu chipiru inaquina juhua. Jettiamatu nrecada cuanaque etsahuauque chipiru inatsu, —jadya ecuana jucuare ecuana cama.

¹⁰ Ecuana quisaratiyajutu bacatsu ecuana Jesúsra ecuana acuare:

—¿Eje bucha juatsu jatsu tuque micuana tumeque quisarati tsehue aya? Tura ique jadya ahuaquetu dyaque jidaque. ¹¹ Micuana ducutu jujacaya amadya nrecada cuanaque, ique bacue aijama. Ique micuana tsehue junenisiriya ama. ¹² Tura ecue ecuitaju etseri ijimedaque jurahuaquetu ique iyetahuaju papata ishuque, tura jadya ahua. ¹³ Pusha amadya micuana cuejaya. Riyaque epunara jadya ahuaque tuna dutya yahuaju bahue jubuque, eju ecue quisarati jidaque cuejatanayaju, ecuita cuanaja tuque adeba ishu, —jadya tura ecuana acuare.

Judasra Jesús inamere ishu inime bajejecuareque

(Mr 14.10-11; Lc 22.3-6)

¹⁴ Tumetu Judas Iscariote, Jesúsra mepehuaque, cuacuare pae cuanaja huaraji cuana queja. Junatitsu tujatu ecana isaranaticuare:

¹⁵ —¿Eje uma micuanara tsujetyaya, era micuana Jesús inamereyaju? —jadya tujatu ecana bacaduraticuare.

—Quimisha tunca chipiru.

—Eratu aya tumeque, —jadya tujatu ecana acuare.

¹⁶ Tumeque huecaca equeratu Judasra Jesús eje bucha inamere aishuque sarecuare.

Jesúsra Pascua earaqui tura mepehua cuana tsehue aracuareque

(Mr 14.12-21; Lc 22.7-18; Jn 13.21-30)

¹⁷Jueticuaretu icueneque huecaca Pascua chine ecuanaja pan levaduramaque ara bahueque huecaca. Tumeque huecaca tuque ecuana Jesús jipetitsu bacaduracuare:

—¿Ejumi bajejemerecara aya riyaque chineju Pascua ishu araara ishu? —jadya tuque ecuana aticuare.

¹⁸Tura ecuana quemitsacuare:

—Jerusalénju nebajejeticue. Eisaradya tuque ecue ecuita tuja etareju araara ishu. Necuacue. Necuejaticuedya tumeque ecuita: “Ecuana Bahuityaquiquetu jeya. Amena patu ura japadama tuque iyetayaque. Junaya patu micue etareju Pascua juyaque chineju araarara tura mepehua cuana tsehue”. Jadya necuejaticue, —jadya tura ecuana amerecuare.

¹⁹Jesúsra cuatsashahua equedya ecuana jucuare. Tuhuadya tuque ecuana bajejecuare Pascua juyaque chineju ara ishuque.

²⁰Amena apunahuajutu Jesús ecuana tura mepehua cuana tsehue mesaju anibutecuare. ²¹Araarayara ecuana Jesúsra isaracuare:

—Peadyara micuanara ique ujeu baqui cuana queja inamereya, —jadya tura ecuana acuare.

²²Jadya ayaju ecuana peya inime jucuare. Peadya peadyara tuque ecuana bacadurabarecuare:

—¿Era ni taa, Ecuana Cuatsashaquique? —jadya tuque ecuana abarecuare dutyara.

²³—Eatsehue peadya pejaju araarayara pan mullayara inamereya. ²⁴Bérutu Yusu equeque quisarati cueja puji cuanara hueneacuare ecuita jidama cuanara ique iyebuqueque. Tunaja quisarati ehue equedyatu juya. Dyaque nrecadatu jubuque ique ujeu baqui cuana queja inamerequi juyaque! Dyaque jida taa tu tumeque ecuita ecuaquera ejitaju aquena ama juhua, —jadya tura ecuana acuare.

²⁵Jadya bacatsutu Judas tuque inamerequi juyara acuare:

—Ique Cuatsashaquique, ¿era ni taa mi jadya amereya?

—Jejee, mira quisarati aya equedya, —jadyatu Jesúsra acuare.

Ecuana Cuatsashaquique majucuaque adeva ishu araarataquique

(Mr 14.22-25; Lc 22.19-23; 1 Co 11.23-26)

²⁶Araarayaquetu Jesúsra pan inacuare. Pan inatsu tujatu

—Yusurupai mique aya, Tata, —jadya Yusu acuare.

Yusurupai jadya aatsu tujatu pan cuesicuare. Cuesitsu tura ecuana tuatsehue anibareya cuanaque tyabarecuare.

—Nearacue. Riyaque pan rique ecue ecuita, —jadya tura ecuana acuare.

²⁷Tuequedya tujatu canecu juque uva nacaca esasanashaque inanucacuare. Canecu inatsu,

—Yusurupai mique aya, Tata, —jadyatu Yusu acuare. Yusurupai aatsu tura ecuana sadatsu inamerebarecuare.

—Neijicue jeeque canecu juque uva nacaca esasanashaque. ²⁸Riyaque rique ecue ami, micuana jiteque quijehuetiyaque. Jetiama tuna eaqueja catyati-buque, tunaja jucha cuana tillatana ishu. Ique ecue ami quijehuetitsu majuhuaajutu Yusura iyaya iyacuaque inime tuaqueja judiru ishuque. Ique majuhuaaju piisitu riyaque inime yunerinetanaya. ²⁹Riyaque micuana cuejaya. Ni eje tupu tuque riyaque yahuaju Pascua chine micuana tsehue anucaya ama; ijinucanime ama tuque ecue uva nacaca esasanashaque. Jadya ama buchatu tumeque huecaca, era dutya naruyaque huecaca juetihuaaju piisi tuque ijibuque micuana tsehue iyacuaque eijiqui, —jadya tura ecuana acuare.

Jesúsra Pedro “Adebaya ama tuque era” jadya juyaque cuejacuaque

(Mr 14.26-31; Lc 22.31-34; Jn 13.36-38)

³⁰Chineju araara amena juatsu tuque ecuana Yusu pureama aishuque jeru acuare. Jeru amena juatsu ecuana cuacuare uhua cuemusú “Olivo Acui Quini” bacaniju. ³¹Tuhua ecuana Jesúsra isaranucacuare:

—Riyaque meta micuanara era ijahue ahua bucha cabatitsu jacatillaya. Yusuja quisarati tu ehue: “Tuna aquereniquiquetu iyetanabuque. Dutya tura aquerenihua cuanaque tuna tsapetanabuque, uhuisha cuana naruquique iyetanahuaju etsapetanau bucha”. ³²Emajuque netitsuranucatsu icuenetadya cuaya Galileaju, tuhua micuana tsehue catsurutinuca ishu, —jadya ecuana Jesúsra acuare.

³³Jadya juyajutu Pedrora acuare:

—Arepá dutyara jacatillaya ama bucha, ecuemi jancanime ama, —jadya tujatu acuare.

³⁴—Pusha amadya mique aya. Riyaque meta, tacure quiquehuiemi catehuati quimisha juya. “Adebaya ama tuque era”, jadya aquimisha mira aya, —jadyatu Jesúsra Pedro acuare.

³⁵—[A, aijama! Mique adebaya ama jiu junime ama ique. Miatsehue iyepeedya datse tunara paa. “Tujaque ama ique” jadya junime ama ique, —jadyatu Pedrora Jesús acuare.

—Mique adebaya ama jiu junime ama ique, —jadya tuque ecuana abarecuare, Pedrora aya baedya.

Jesús Etaque tsehue Getsemaniju quisaraticuaque

(Mr 14.32-42; Lc 22.39-46)

³⁶Tumetu Jesús junaticuare ecuana tura mepehua cuana tsehue Getsemaní bacani emajacaju. Tuhua junatitsu tura ecuana anaticuare:

—Rehuadya neanibutecue, ique ecue Etata tsehue quisaratiya tupu.

³⁷Jadya juatsu tujatu dujucuare Pedro, Zebedeoja ebacuaque ecatsé jadya. Cuacuare tuna ecuana japada cuita ama. Dyaque peya inime, nijuhuanada, eje buchadya jucara jadyatu cabatijecuare.

³⁸ —Dyaque peya inime taa cabatiya. Idutaqui ama jipenee cuita taa rique baya. Rehuadya neanicue. Ecabati nejudue. Netahuiume, —jadyatu Jesúsra acuare Pedro, Santiago, Juan jadya.

³⁹ Jadya tuna aatsutu Jesús cuacuare eje japa cuita amadya. Cuaatsutu chichucata junaticuare, yahua queja huipuchitana. Jadya juatsutu Yusu tsehue quisaraticuare:

—Tata, riya ique nrecada jutaquique tu ai patseda buchique. Canerecatitaquique ama juatsu taa ecanerecatiu ama. Ebacau datse mique era, ique canerecatishu ama. Jadya ama bucha ecue biji eque ama paju. Micue biji eque paju, —jadyatu Jesúsra acuare tuja Etataque.

⁴⁰ Jadya juatsutu cuanucacuare quimisha tura dujuhua cuana queja. Cuaatsu tujatu ecana tahuijarabareyaju baticuare. Isaranaticuaretu Pedro:

—¿Eje bucha eatsehue ecabati jupee jutaqui ama micuana yararatu cuana cabatihua, ni peadya ura cuana? ⁴¹ Necabaticue. Netahuiume. Nebacabacacue Yusu queja, micuana Satanásra ique jacamerecara ayaju, micuanaja idu ishu. Micuanaja tacatu aijama casa Ijahua cajuchatishacara ayaju casada juishu, arepa micuanara jacacarama aya ama bucha, —jadya tuna Jesúsra acuare.

⁴² Cuabeta ishutu Jesús cuacuare tuque cuahuaju nucadya, Yusu tsehue quisaratira:

—Tata, canerecatitaquique ama juatsu taa ique ataya bae eatau ama. Jadya ama bucha ecue biji eque ama paju. Micue biji eque paju, —jadya ati beta tujatu acuare.

⁴³ Jadya juatsutu cuanucacuare tura quimisha dujuhua cuana queja. Cuanucatsu tujatu ecana tahuijarabareyaju batinucacuare. Busataqui ama cuita tunajatu yatuca bacuare tahuicara juatsu. ⁴⁴ Tuna shanatsutu cuaquimisha ishu cuanucacuare Yusu tsehue quisaratira. Tuque quisaratihua baedyatu quisaratitincacuare. ⁴⁵ Jadya juatsutu cuanucacuare tura dujuhua cuana queja.

—¿Canajaraya jari cuitadya micuana? ¿Tahuiya jari cuitadya ni taa micuana? Amenatu ura juetihua IQUE ECUITA tunara jucha arida cuana queja inamereyaque. ⁴⁶ Nenetitsuracue. Nedirura. Amenatu jehua ique ujeu cuana queja inamerequi juyaque, —jadya tuna Jesúsra acuare.

Jesús erisique dujutanacuareque

(Mr 14.43-50; Lc 22.47-53; Jn 18.2-11)

⁴⁷ Jesús quisaratiya jarijutu Judas junaticuare, tura mepehuaquedya datse. Ecuiteda jetiama tsehuetu cuacuare. Cuchiru tsehue, acui tsehue jadya tuna junaticuare. Pae cuanaja huaraji cuanara, israelita cuana emuiba cuanara jadya tuna cuadishacuare. ⁴⁸ Junatima jariradya tuna Judasra cuejanaticuare: “Era dyahuanatiyaque, tudya tume. Risitsu, nedujucue”, jadyapa tujatu ecana junatimaradya anaticuare. ⁴⁹ Junatitsu tujatu Jesús jipeticuare:

—Banuchi, Ebahuitaqui.

Jadya aatsu tujatu Jesús dyahuanaticuare. ⁵⁰ Tura jadya ayajutu Jesúsra isaracuare jadya:

—Acuedya mira ai acara aya eque, era mepehuaque, —jadyatu Jesúsra acuare.

Jesús dyahuahua baatsutu Judas tsehue cuahua cuanara jipetitsu inaticuare.

⁵¹ Jesúsra mepehuaratu cuchiru baeque baina juque juputsu pae dyaque muidaque merequique ijaca pejuacuare.

⁵² —Cuchiru tsehue icuenecara aume. Ishacue micue cuchiru bainaju. Miratu adebayadya quisarati: “Cuchiru tsehue quiyetiyaquetu cuchiru tsehuedya iyetabuque” jadique. ⁵³ Sareya ama tuque era micue ique icuene ishu. Eratu Etata ebacaudya peadya tunca beta earacana cuare barepaju Yusu tsahuaqui cuanaque ique icueneda ishu. Masadamadya tujatu ecana ecuadishau. Jadya ama bucha bacaya ama tuque era.

⁵⁴ Ehuenedya tu Yusuja quisarati ique nrecada judadiyaque. ¿Eje bucha judadie jatsutu ejuu, jadya judadi ishuque era barepa juque etsahuaqui cuana ique tsahuana ishu bacahuaju? —jadyatu Jesúsra acuare ecuita ijaca pejuquique.

⁵⁵ Tuequedya tujatu isaracuare ecuita cuana jetiamaque:

—Micuana micuana jehua cuchiru tsehue, acui tsehue jadya ique inara, chiri puji inara ejeu bucha. Anichinedya tuque micuanaja emajaca ejudya jutidya ique ina ishu cuchiruma, acuíma. Dutya huecaca taa ique Yusuja etareju Yusuja quisarati bahuitya juchine. ¿Tume micuanara eje bucha juatsu inachine ama tuhua? ⁵⁶ Riya ique atayaqueri juya Yusu equeque quisaratira cuejaqui cuanara cuejacuareque, Yusuja quisaratitiju ehuene bae cuitadya, —jadya tuna Jesúsra acuare.

Tuque quisaratiya tsunumeedya ecuana Jesúsra mepehua cuanaque huanaterecuare. Jacacuare ecua-na Jesús.

Jesús israelita cuanaja huaraji arida cuana ecasitati ducu dujutanacuareque

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesús inaquí cuanaratu Jesús dujuacuare Caifás, pae dyaque muidaja etareju. Tuhuatú ecasitati juacuare cacuatsashati bahuityaqui cuanaque, tumebaedya israelita cuana emuiba cuanaque. ⁵⁸ Tumetu Pedrora tunara Jesús dujuyaju japa tupuaje acuare. Cuacuaretu pae dyaque muidaja etare tsecue tupu. Etare tsecue junatitsutu sudaru cuana tsehue aninaticuare, eje bucha tuna Jesús ayaque petacara aatsu.

⁵⁹ Huaraji cuana tuhua ecasitati juacuare cuanaratu tyacara acuare Roma juque huaraji, tuque iyemere ishu. ⁶⁰ Jadya ama bucha tunajatu dadicuare ama eje bucha eque jidama cueja ishu. Jetiama tuhua juacuare cuanaratu pusha pusha tsehue jidamapa ejuu jadya acuare. Daditaqui ama tunajatu bacuare dutyara tupu tuque jidama ejuque. Eje uma quisaratiyaju baca jadya aatsu tatse beta netitsuranucacuare quisarati ishu.

⁶¹ —Yatseratu Jesús jadya quisaratiyaju bacachine: “Eratu Yusuja etare rihuishatsu puririsha jadya aatsu, quimisha huecacaju enityatsuranucau”, jadyari ju-chine, —jadyatu ecuita ecatse jucuaire.

⁶² Tatse jadya juyaju bacatsutu pae dyaque muidaque netitsuracuare. Turatu Jesús bacaduracuare:

—Bacahuadyami ecatse micue ishü quisaratiyaju. ¿Caquemitsatiya ama cuitadya mique? ¿Jadidyami quisaratichine, jadya ama ni taa?

⁶³ Jesús tu caquemitsaticuare ama. Yudijidyatu pae dyaque muidara bacaduranacuare:

—Yusu aniyara mique quisaratiyaque bacayaque adebatsu, tuyudya cacuejaticue. ¿Midyami Mesías, Yusuja Ebacuaque, aijama ni taa?

⁶⁴ —Jejee, Mesiasdya ique; Yusuja Ebacuaque ique. Tumebaedya mique cuejaya. Ejeque huecaca micuanara ique babuque Yusuja jida eque amaca eaniqui muidaju aniyaju. Tumebaedya micuanara babuque barepa huani ducu eque junanucayaju, —jadyatu Jesúsra acuare.

⁶⁵ Jadya quisaratiyaju bacatsutu pae dyaque muidaque cahuaiticuare. Cahuaitsutu una cachajaticuare, dyaque cuita ecahuitique ejitaju juishu.

—Riyaque ecuitarari Yusu cahuaishaya tuja quisarati tsehue. Sareya ama tuque ecuaana peyaja riyaque jidama juchineque cueja ishü. Micuanaratu bacahuadya tura quisarati jidamaque ayaju. ⁶⁶ ¿Eje bucha micuana amerecara aya? ¿Iyemerecara, iyemerecara ma ni taa? —jadya tujatu acuare peya huaraji cuana.

—Jucha metse tuque. Pamajudya, —jadya tuna caquemitsaticuare.

⁶⁷ Jadya aatsu tunajatu ebutsequiniju ecuedira acuare. Miricuaire tunara. Peya cuanaratu bahuapajacuare.

⁶⁸ —Yuneridya ni mi Mesías, Yusuja Emepeque, caadebaticue. ¿Aira taa mi bahuapajahua? —jadya tunajatu ijahue ayaquedya jutidya acuare.

Pedrorra “Adebaya ama tuque era” jadya acuareque
(Mr 14.66-72; Lc 22.56-62; Jn 18.15-18, 25-27)

⁶⁹ Jadya juya tsunumeetu Pedro etare tsecue juanicuare. Juaniyajutu epuna mere pujira jipeticuare. —Miquemi Jesús Galileaju tsehue junenihuaquedya, —jadyatu Pedro epunara acuare.

⁷⁰ Pedrotu dutya tuhua cuanaja ijacaju catehuaticuare.

—¿Aijama, mama! ¿Adebaya ama tuque era! ¿Ejeque cuana taa tuquemi jadya aya? —jadyatu Pedro caquemitsaticuare.

⁷¹ Tuequedyatu etare tsecue enubitaquiju netidirunucacuare. Tuhua junetiyajutu peya epuna mere pujira banucacuare. Baatsu tujatu anucacuare:

—Riyaque ecuita ri Jesús Nazaretju tsehue junenihuaquedya, —jadya tujatu acuare tuhua cuanaque.

⁷² —¿Aijama, mama! ¿Adebaya ama tuque era! Yusu bahue ique yuneri quisaratiya, —jadyatu Pedrorra acuare.

⁷³ Yaratupu juatsutu tuhua cuanara jipeticuare.

—Yuneri cuitadyami mique Jesús tsehue junenihuaquedya. Micue quisarati tu Galileaju aniya cuanaja quisarati cuitadya, —jadya tunajatu Pedro acuare.

⁷⁴ Tunara jadya ayajutu Pedro caquemitsaticuare:

—¿Aijama! ¿Adebaya ama tuque tumeque ecuita!

Yusu bahue ique yuneri quisaratiya. Ique yuneri ama juyaque juatsu, Yusura panerecatura, —jadya tuna Pedrorra acuare.

Tuque jadya quisaratiyaju cuitatu tacure quiquecuare. ⁷⁵ Jadya juyajutu Pedro huecatanacuare. Caadebaticuaretu Jesúsra jadya cuejachineque: “Tacure quiquehuie mira tehua quimisha aya. ‘Adebaya ama tuque era’ jadya mira aquimisha aya”. Jadique adebatsutu Pedro tsajaja cuinana juatsu paa ebari jucuaire.

Jesús Pilato queja dujutanacuareque
(Mr 15.1; Lc 23.1-2; Jn 18.28-32)

27 Apudajudya tunajatu dutya pae cuanaja huaraji cuanara, israelita emuiba cuanara jadya inime bajejucuaire Jesús iyemere ishü. ² Erisi tunajatu Pilato Roma juque enaruqui cuarequi queja dujumerecuare.

Judas capitirisititsu quiyeticuareque

³ Judas tuque inamerequique juhuaratu bacuaire tunara Pilato queja iye ishü dujumereyaju. Jadya baatsu tujatu jidama inime jucuaire tura inime ahuaque caadebatitsu. Dyaque peya inime tsehuetu cuacuare israelita emuiba cuana queja, pae cuanaja huaraji cuana queja jadya, quimisha tunca chipiru tunara tsujetyahuaque yudijidya tyanucara.

⁴ —Cajuchatihua ique, era ecuita jidaque eje buchique ama iye ishü inamerehua tibu, —jadya tuna Judasra aticuare.

—Tyanucaume ecuaana riyaque chipiru. Ecuaana ama ecuaana inime metse. Miaquejadyatu tumeque inime, —jadya tunajatu atsacuare Judas.

⁵ Jadya atsayajutu Judasra tuhuadya Yusuja etareju chipiru marecuare. Tuhuaque cuinanatsutu capitirisititsu quiyeticuare.

⁶ Pae cuanaja huaraji cuanaratu chipiru huesacuare yahuaaju mare ijehue ahuaque.

—Riyaque chipiru tsehue tuque ecuaana iyemere ishüque tsujetyahua. Jadya tibu tuque ecuanaja iyataqui ama Yusu tyayaque cajaju. Ecuanaja cacuat-sashati equetu en ataquí ama, —jadya tuna jucuaire.

⁷ Yaratupu juatsu tunajatu inime bajejucuaire israelita ama cuanaque majuyaju papa ishüque yahua quemi ishü. Tumeque chipiru tsehue tunajatu quemicuare mechi jaba puji cuanara sura ishü mechi quemiyaque yahua. ⁸ Riya cama jaridyatu tumeque emajaca emaju cuanaque papa ishüque “Quiyeti pujija chipiru tsehue equemique emajaca” bacani. ⁹ Jadya equetu Jeremías Yusu equeque quisarati cuejaquira icueneta cueja acuare bae cuitadya judadicuare. Tura patu hueneacuare:

“Inacuare tunajatu quimisha tunca chipiru metal eaque.

Riyaque etsujequi tu Israel eque ejuracana cuanara iyacuareque.

¹⁰ Tumeque chipiru tsehue tunajatu yahua quemicuare mechi jaba puji queja, Ecuana Cuatsashaquira cuatsashahua eque”, jadya patu Jeremiasra huenequere béru.

Jesús Pilatoja yacuaju netiticuareque

(Mr 15.2-5; Lc 23.3-5; Jn 18.33-38)

¹¹ Jesústu Pilato Roma juque enaruquique cuarequija yacuaju netiticuare.

—¿Midyami israelita cuanaja ecuari? —jadyatu bacaduracuare Pilatora.

—Jejee, mira aya equedya, —jadya tujatu acuare.

¹² Pae cuanaja huaraji cuanara, tumbaedyia israelita emuiba cuanara jadyatu Pilato cuejacuare eje bucha juatsu tuna Jesús tuaqueja dujuyaque. Jesústu tunara pusha pusha cuejayaju caquemitsaticuare ama.

¹³ —¿Bacaya amami ecana micue ishú dutya jidamaque quisarati ayaju? ¿Eje bucha juatsu tuquemi ecana quemitsaya ama? —jadyatu Pilatora Jesús acuare.

¹⁴ Jesusratu quemitsacuare ama ni peadya quisarati tsehue. Jadya baatsutu enaruquique anajacatacuare.

Pilatora “Jesús pamajudya” jadya acuareque

(Mr 15.6-20; Lc 23.13-25; Jn 18.38-19.16)

¹⁵ Dutya maratu Pilatoja bahue jucuare Pascua chine ishú etare apudaju erisi netiyaque inajaca, ecuita cuanara peadya ejeque inajacameracara ayaque camadya. ¹⁶ Tume patyatu erisi neticuare ecuita etare apudaju dutyara adebayaque Jesús Barrabás bacani. ¹⁷ Jetiamatu ecuita cuana apudajudya Pilatoja etare tsecue casitaticuare. Pilatora tuna bacaduracuare:

—¿Ejeque micuanara inajacameracara aya? ¿Barrabás, Jesús “Mesías” jadya catiyaque ni taa? —jadya tujatu ecana bacaduracuare.

¹⁸ Turatu adebacuaredya ecuita cuanara ama Jesús ujeu bayaque, tunaja huaraji cuanara camadya. Bahuedyatu jucuare jishatsu huaraji cuanara Jesús inamerehuaque.

¹⁹ Pilato ecuita cuanara quemitsayaque ihua juyajutu ehuanequera cuejamerecuare:

—Iyemereume bacue mira Jesús tuyuque. Eratu dyaque jidama inime ishú baya. Tahui ique juchine tusehue dyaque jidama, —jadya tujatu yahuique cuejamerecuare.

²⁰ Jadya ama buchatu pae cuanaja huaraji cuanara, israelita emuiba cuanara jadya ecuita cuana acuare:

—Dyaque jidatu Barrabás inajacataqui, Jesús bacue iye. Jadya necuejacue Pilato tura bacaduranucayaju, —jadya tunajatu ecuita jetieque ama acuare.

²¹ Yara tupu juatsu tuna Pilatora bacaduranucacuare:

—¿Ejeque micuanara inajacameracara aya?

—¿Barrabás! —jadya tuna caquemitsaticuare.

²² —¿Tume ique ai juya Jesús tsehue? ¿Ai ique juya tunara Mesías bacani jadya aya tsehue? —jadya tujatu ecana bacaduracuare.

—¿Curusuju tatamerecue! ¿Tuhua pamaju!

²³ —¿Eje bucha juatsu? ¿Ai tujatu jidama achine? —jadya tuna Pilatora acuare.

Abacatanacuare ama tuna quiqueyaque:

—¿Curusuju tatamerecue maju ishú!

²⁴ Pilatoratu adebacuaredya inime eje bucha cuarenucataquique ama. “Ique ni tunaja biji eque ama ejuu, tume tuna dyaque sicacadadya jutidya ec-ahuaiteu eatsehue”, jadya tujatu inime jucuare. Tume tujatu jadya bahue juatsu bañadoraju ena quetimerecuare. Emetucutu cutsaticuare ecuita jetiamara bayaju, tuque amapa inime metse jadya cabamereti ishú.

—Ique ama inime metse riyaque ecuita iyetanayaju. Micuanadya micuana inime metse, —jadya tujatu ecana acuare.

²⁵ Dutya tuna caquemitsaticuare:

—Ecuana inime metse paju. Tumbaedyia ecuana eque juracanaya cuanaque inime metsedyia paju, —jadya tuna quique eque jubarecuare.

²⁶ Jadya bacatsutu Pilatora inajacameracuare Barrabás. Tuequedya tujatu Jesús menajetyacuare sudaru Romaju cuanaque, tunaja catsacatsa, curusuju tata jadya aishu.

²⁷ Icuene tunajatu dujucuare Pilatoja etareju, tuja sudaru cuana tahui ishúque etareju. Dutya sudaru cuana capiretishatsu tunajatu tuna patya nityacuare.

²⁸ Ijahue ayaquedya jutidya tunajatu ecuari edujuta bucha dujue acuare. Dyaque jutuyaque tacatsu tunajatu jutumerecuare una sehuesahuauque, ecuari arida cuanaja ejutuqui tsehue. ²⁹ Iyucaju tunajatu jutumerecuare cunu sahua cuija epicaque, acui sari jida eque amaca inamere jadya. Tuque jadya aatsu tuna tuja yacuaju chichucata jucuare, tuque jahue ayaque.

—¿Emuita paju israelita cuanaja ecuari muidaque! —jadya tuna jucuare tuque iaribayaque.

³⁰ Ecuedira tuna acuare. Acui secatsu tuna tuatsehuedya iyucaju acuare. ³¹ Jadya jahue jahue amena aatsu tunajatu tacanucacuare una sehuesahuauque, tujaque cuita una jutumerenuca ishú. Jadya aatsu tunajatu curusuju tata ishú dujucuare.

Jesús curusuju tatatanacuareque

(Mr 15.21-32; Lc 23.26-43; Jn 19.17-27)

³² Epu ebari juque cuinanayara tunajatu tsurut-sacuare ecuita Cirene juque, Simón bacani. Casada tsehue tunajatu curusu mapemerecuare Jesús tatatana ishú juyaque.

³³ Jadya junatie tuna jucuare Gólgota bacani emajacaju. Tumequetu jucuare uhua cuemusú, emaju iyuca baeque. ³⁴ Tuhua tunajatu Jesús ijimerecara acuare uva nacaca esasanashaque patseda tsehue eujaque, ecuita uje cuana ujejarasha ishú. Riya piji chibatsutu Jesús-ra ijicarama acuare.

³⁵ Jadya aatsu tunajatu curusuju tatacuare. Curusuju amena tatatanahuaju tuna dadu jahue jucuare, Jesús-ra jutuhua cuanaque ejeja ejeja juyaque tuna cama cajaquetibare ishú.

³⁶ Jadya juatsu tunajatu petaanibarecuare.

³⁷ Anibutema jarira tunajatu tauraju ehuenecue shuracuare ebarucue tuja iyuca dyaque. Taurajutu ehuenecue jucuare eje bucha juatsu Jesús curusuju tatatanahuaque bahue amere ishuque. "Riyaque ri Jesús, israelita cuanaja ecuari", jadyatu ehuenecue juacuare.

³⁸ Tumbaedyata tunajatu beta ecuita casada tsehue ai secaquique ecatsé curusuju tatacuare, Jesúsja jida eque amaca, peya jani eque amaca jadya. ³⁹ Tueque cuetiya cuanaratu ijaribacuare iyuca huinu huinu tsehue tuque asicaba, bijidamadura jadya ayaque.

⁴⁰ —Miquemi dyaque casada cabatichine Yusuja etare rihuisha ishu. Quimisha huecaca juatsupa nityatsuranucaya, jadyami juchine. Yuneridya ni micue casa aniya, quinajacamericue mita taca. Yuneri ni mi Yusu jabacua, butecue curusu juque, —jadyatu ecuita cuanara acua, tuque ijaribayaque.

⁴¹ Pae cuanaja huaraji cuanara, cacuatsashati bahuityaqui cuanara jadya tunajatu ijillahuanacuare. Tumbaedyatu israelita emuiba cuanara ijaribacuare.

⁴² —Peya cuana inajacamere ishupa tuja casa aniya. Tumetu tuta taca quinajacamericuqui ama cabatiya. Tuque patu ecuanaja ecuari, jadyatu juchine. Yuneridya ni jadya, pabute curusu juque. Curusu juque ni buteya, tume tuque ecuaana ejeneya tuque Mesiasque. ⁴³ Tura ecuaana cuejachine, tuquepa Yusu Jabacua, tuquepa Yusu queja nimee camadya Yusuja naru ishu. Yuneridya ni jadya, Yusura curusu juque pabutyta. Painajacamere tura, —jadyatu israelita cuanaja huaraji cuana jucuare tuna cama.

⁴⁴ Chiri aridaque ecatsé tuatsehue curusuju tatatanacuareratu ijillahuananucacuareadya.

Jesús curusuju majucuaque

(Mr 15.33-41; Lc 23.44-49; Jn 19.28-30)

⁴⁵ Tumetu tumeque chinequeja, barepatya eque las tres chinequeja dutya yahua apunateracuare. ⁴⁶ Las tres chinequeja dyanetu Jesús jebuda quiquecuare:

—Elí, Elí, ¿lema sabactani? ("Ecue Etata Yusu, ¿eje bucha juatsu mira jacahua?" jadique) —jadyatu quiquecuare.

⁴⁷ Eje uma tuhua neticuare cuanaratu bacacuare. Elías tura ihuaraya bucha jutidya tunajatu bacacuare. —Elías béru Yusu equeque quisarati cuejaquique juacuareque tujatu ihuaraya, tuque tsahuana ishu, —jadya tuna jucuare.

⁴⁸ Jadya Jesús quiqueyaju bacatsutu eraca pucaca jiteque tsajajaecuare. Mullaticuare tujatu uva nacaca esasanashaque patsedaju. Mullatsu tujatu acui barudaju risitsu nityatsuratsu ecuatssaju jipemerecuare tuja susu ishu datse.

⁴⁹ —Jadya aume. Nebara, ejepa Eliasra junatsu butyanaya curusu juque, —jadyatu peya cuana jucuare, tuque ijaribayaque.

⁵⁰ Tumetu Jesús quique pidya casada juatsu, amena ishu canajeti pidya juatsu majucuaque. ⁵¹ Tuque majuya-judyatu Yusuja etare juque junuda eshuraque Dyaque

Muidaque penequique chajatanacuare ebarucue eque emaque queja. Yahuatu bucucucuare. Tumu ebari cuanatu buribarecuare. ⁵² Emaju cani cuanatu pacashatanacuare. Yusu queja ecatyati cuanaque emaju cuanaque tuna jetiama chacha netitsuranucacuare. ⁵³ Emaju cani ducuque tuna cuinanacuare. Jesús emajuque netitsurahuaju tuna cuacuare Jerusalénju. Tuhua tunajatu jetiamara bacuare. ⁵⁴ Cien sudaru cuana cuatsashaquique Jesús naru juyaratu bacuare yahua bucucuyaju, dutya eje bucha juyaju. Tumbaedyata uma cuana tuhua neticuare cuanara bacuareadya. Jadya juya baatsu tuna dyaque bajida jucuare.

—Pusha ama cuitadya tucueri riyaque ecuita Yusuja Ebacuaque juhua, —jadya tuna jucuare.

⁵⁵ Tuhuatu jetiama epuna cuana neticuare japada eque capetatiya cuanaque. Jesús Galileaju cuaya patya equetu tumeque epuna cuana tuatsehue junenicuare, tuque tsahua juyaque. ⁵⁶ Jucuare tuna María Magdala-tu aniyaque; María, Santiago, José jadya ecatséja ecuaque; Zebedeoja ebacuaque ecatséja ecuaque; tumbaedyata peya epuna cuana.

Jesús emajuque tumu cani epuruju ishatanacuareque

(Mr 15.42-47; Lc 23.50-56; Jn 19.38-42)

⁵⁷ Apunayajutu jecuare ecuita chipirudaque José bacani, Arimatea bacani epuju aniyaque. Arepa israelita cuanaja huaraji juya ama bucha tuquetu Jesús queja ecatyati que jucuare. ⁵⁸ Pilato queja cuatsu tujatu bacaticuare:

—¿Ebutyamereu ama mira Jesús curusuju emaju badeyaque? Paishati caniju, —jadya tujatu Pilato aticuare.

Bacatihuaajutu Pilatora acuaque:

—Butyameretsu emaju papa ishu cani epuruju ishaticue.

⁵⁹ Tura jadya ayaju tujatu butyamericuare. Butyameretsu tujatu piruricuare sahuana iyacua tsehue. ⁶⁰ Ishaticuare tujatu tumu cani jadya ishu eaju, tsumemaju. Tumeque canitu jucuare Joséja cuita yahuajudya. Jesús emajuque ishatsu tujatu etsecue tachimerecuare tumu ebari tsehue. Tachimere jadya aatsu tujatu shanacuare. ⁶¹ María Magdala juque, peya María jadya tatse cani queja acua juanicuare.

Sudaru cuana Jesús emajuque ishatanahuaque cani narumeretacuareque

⁶² Canajara huecaca cabajejeti ishuque huecaca cuetihuaju, amena ijete nubihuaju apunahuajutu pae cuanaja huaraji cuana, fariseo cuana jadya cuacuare Pilato tsehue quisaratira.

⁶³ —Ecuana Naruquique, tume pusha pusha aridaque tuque ecuaana adebaya tuque chacha jarira tura quisarati achineque, quimisha huecaca emajuquepa netitsuranucaya jadya juchineque. ⁶⁴ Jadya tibu narumerecue cani tsecue quimisha huecaca tupu, Jesúsra mepehua cuanara emajuque meta echiritiiju, emajuque tuna etehua queti eauju. "Majuchinequetu

chacha netitsuranucachine", jadya tuna pusha pusha ejuu. Jadya juhuajutu ecuita cuanara eejeneu Jesús chachaque nuca. Tunaratu eejeneu tuque Mesiasque. Tumetu dyaquedya ejuu, majuchinequepa chacha netitsuranucachine jadique ejenetsu, —jadya tunajatu Pilato aticuare.

⁶⁵ —Jida, jadinya paju. Tumidya peadya cuare sudaru cuana. Jutaquiju pana narumere neaticue emaju cani, jadya micuanara adebaya bae ejuu tibu, —jadya tuna Pilatora acuare.

⁶⁶ Jadya ahuaju tuna dirucuare. Pana narumereti tuna emaju cani acuare. Tumu tsecue tunajatu pana tachi acuare, ejera epacashauque adeba ishü. Jadya juatsu tunajatu sudaru cuana enaruqui nityacuare.

Jesús chacha netitsuranucacuareque

(Mr 16.1-8; Lc 24.1-12; Jn 20.1-10)

28 Canajara huecaca cuetihuaju, semana catibutiyaque dumiçu huecacayajutu María Magdala juque, peya María jadya tatse cuahuecacacuare Jesús emajuque tumu cani epuruju tunara ishachineque cuajira. ² Casadatu yahua bucucucuare. Barepaju Yusu tsahuaquique buteyajutu jadya jucuare. Junacuaretu emaju caniju. Tuhua junatsu tujatu tumu ebari bucucushanacuare. Cani tsecue tumu penequique tujatu nityasicuacuare. Tumu nityasicuatsutu tumeque tumu dyaquedya juanicuare. ³ Pupipupiya bucha huecaetu jucuare. Tuja unatu dyáque pajada jucuare, ai pajada cuanaque dyaque pajada, huapeje bucha pajae. ⁴ Jadya baatsutu sudaru cuana tadadacuare, bajida juatsu. Emaju bucha tuna rihuitsu yahuaju jarabarecuare. ⁵ Tumetu barepa juque Yusu tsahuaquira epuna cuana bajida juya cuanaque isaracuare:

—Nejecutanaume. Jesús, Nazaret juque, curusuju tatatanachineque sare micuana juya. ⁶ Rehua ama rique. Chachatu netitsuranucachua, tuque cacuejatini-chine baedya. Nepetanacue tunara ishachineju, yuneri tuque rehua aijamaque bahue juishu. ⁷ Petatsu ebararara nedirunucacue. Tura mepehua cuanaque necuejadirucue: "Majuchineque patu chacha nuca. Tuque patu icuenetadya cuaya Galileaju. Tuhudyapa tura micuana ihuatiya. Tuhudyapa tuque micuana batiya", jadya ecana necuejadiruhuisacue, —jadya tatse barepaju Yusu tsahuaquira cuejamerecuare.

⁸ Jadya ayajutu epuna ecatse masadama emaju cani juque dirunucacuare. Bajida, peya inime tuputsu bacue pureama jadya tatse jucuare. Tsajaja cama tatse ecuanu Jesúsra mepehua cuanaque cuejara dirunucacuare. ⁹ Tatse diruyaju tatse Jesúsra cabamereti ishü atsacuare. Isaratsacuare tujatu ecatse:

—Ban día, mama ecatse, —jadya tujatu ecatse isaratsacuare.

Tueque cuitadya tatse rihuitsu chichucata jucuare. Chichucata juatsu tatsejatu pureama acuare ehuasiju macacatsu.

¹⁰ —Bajida nejuume. Necuejaticue ecue cuanaque; pacua ecana Galileaju. Tuhua ecuanu pacatsuruti, —jadyatu Jesúsra acuare epuna ecatse.

Sudaru cuanara pusha pusha cuatsabiji acuareque

¹¹ Epuna ecatse ecuanu cuejara cuaya tsunumeetu emaju cani naru juya cuanaque dirucuare epuju. Pae cuanaja huaraji cuana dutya eje bucha juhuaque cuejara tuna cuacuare. ¹² Riyaque pae cuanatu cuacuare peya israelita cuanaja huaraji cuana tsehue quisarati-ra. Inime tunajatu bajejecuare narunaruya cuanaque chipiru tsehue tsujetya ishü, tuna pusha pusha juishu. Tsujetyatsu tunajatu ecana acuare:

¹³ —Ejera ni micuana bacaduraya emaju caniju eje bucha juhuaque, "Meta ecuanu tahuuyajutu Jesúsra mepehua cuanaque emaju caniju junahua. Junatsu tunajatu Jesús emajuque chirinahua", jadya necuejaticue. ¹⁴ Roma juque ecuari cuarequique ni bahue juya micuanara quisarati ayaque, bajida nejuume. Tura ni micuana cahuaitsü iyecara aya, micuana tahuhua baatsu, ecuanara micuana tachiya, tura enerecaturaju, —jadyatu pae cuanaja huaraji cuanara cuejacuare sudaru cuana emaju cani naruqui juhua cuanaque.

¹⁵ Tumetu sudaru cuanara inatsacuaredya etsujequi. Chipiru inatsu tuna cuejatahua equedya jucuare. Cuejatibunecuare tuna ecuanaja ata cuana ducu tumeque pusha pusha. Riya camatu ecuanaja ata cuanara riyaque pusha pusha ejeneya jaridya.

Jesúsra camadya ishü tura mepehua cuanaque cuatsashacuareque

(Mr 16.14-18; Lc 24.36-49; Jn 20.19-23)

¹⁶ Jadya juatsu ecuanu Jesúsra mepehua cuanaque cuacuare Galilea emataju Jesúsra catsurutiquire ana ahuajudya. ¹⁷ Jesús baatsu tuque ecuanu pureama acuare, arepa ecuanu umaera ejenecarama acuare ama bucha tuque Jesúsque. ¹⁸ Tume ecuanu Jesúsra jipeticuare.

—Yusura ique dutya naru ishü cuatsashahua, barepa juque, yahua juque jadya naru ishü. ¹⁹ Necuacue dutya yahuaju aniya cuana queja. Necuejaticue ecana jidaque quisarati, eaqueja ecana pacatyati, ecue juishu. Neutsaticue ecana, tuna Etata jaque, Ebacuaque jaque, Espiritu jaque jadya ejitaju juishu. ²⁰ Era micuana cuejahua eje bucha era cuatsashaya eque juishu. Nebahuityaticue ecana tuna era amereya eque juishu. Jida bahue nejucue riyaque. Ecue micuana jaca nime ama. Narujacaya amadya micuana era, ique junanucaya tupu, —jadya ecuanu Jesúsra acuare.

Riya tupu camadya micuana cuejahua.

MARCOS

Riyaque quirica ri Marcosra hueneacuareque. Bernabéja ebuquetu jucuaire. Marcosratu Pablo peya yahua cuanaju Jesúsja quisarati cueja juyaju tajicuare. Turatu tsahuacuarenya Pedro, Jesúsja quisarati cuejaquique. Pedrorra cuejayaju bacatsutu Marcosra hueneajecuare Jesús eje buchique.

Marcosratu Jesús MERE PUJI YUSUJA ECUADISHAQUE jadya cuejae acuare. Hueneacuare tujatu eje bucha bameree Jesúsra Yusuja casa acuareque, Jesúsra eje bucha ae Yusuja casa tsehue acuareque. Riyaque quirica isaratsu ecuana bahue juya Jesúsra acuare cuanaque. Dyaque tujatu hueneacuare Jesús eje bucha jucuaireque, Jesúsra bahuityacuareque bacue dyaque cuita ama. Turatu ejitaju acuare Jesúsra ecuita cuana tsahuacuareque, tuna tsehue tuja iyuhue anicuareque jadya.

Juan Ecuita Cuana Utsaquira Yusuja quisarati cuejati-bunecuareque

(Mt 3.1-12; Lc 3.1-9, 15-17; Jn 1.19-28)

¹ Cuejaya micuana era Jesucristo Yusuja Ebacuaque eje buchique. ² Béru yuequedya Yusu equeque quisarati cuejaquique Isaiasratu hueneacuare eje bucha judadiyaque:

“Cuadishabuque tuque mique cuadishama jariju ique merequique.

Turatu ecuita cuana bajejebuque, tunaja mira quisarati cuejabuqueque baca ishu.

³ Quisarati cuejatu jubuque ejeque cuana tsecada eje uma piji anitaya cuana queja.

‘Nequihuaticue, Ecuana Cuatsashaquique junayaju ishu.

Jidamaque neajacacue.

Jida tuyu nejudue, ediji benubenuque etuyune ejuu bucha”,

jadyatu Yusura Isaías eque quisarati acuare.

⁴ Tsunuda eje uma mara juatsutu Juan tsecada eje uma piji anitaya cuana queja Yusuja quisarati cueja jucuaire. Tuaequeja jutiyaque ecuita cuana tujatu cuejatsabarecuare:

—Necacuareticue inime, Yusuja micuanaja jucha cuana apupasha ishu. Necutsamereticue yuneridya inime cacuaretihua jadique adebataqui juishu, —jadya tujatu ecana cueja bahue jucuaire.

Tuna inime cacuaretihuaaju tujatu ecana utsa bahue jucuaire. ⁵ Jetiama Jerusalén epu ebariju aniya cuanaratu quisaratiyaju bacaticuare. Tumebaedya Judea yahuaju dutya queja aniya cuanara quisaratiyaju ijacabacaticuarenya. Tura quisarati cuejayaju bacatsu,

—Yuneridya ecuana jucha arida cuanaque, —jadya tuna cacuejaticuare.

Jadya tuna cacuejatihuaaju tuna Juanra utsacuare Jordán cueriju.

⁶ Juanratu jutucuare camello tsaru etarique etataque ejutuqui eaque, baya ecuita cuanadya jutidya cajututiya bucha. Ebiti patsa quinida ejicui tsehuedya jutidya

tu ecaquereti jucuaire. Tsei ebari, huaja jadya tujatu araaranicuare.

⁷ Ecuita cuana isarayaque tujatu jadya abahue jucuaire:

—Tsunutaya amatu peya junayaque. Tujatu dyaque casa aniya, ecue bucha ama. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique. ⁸ Era micuana ut-saya ena tsehue, inime cacuaretihua jadique adebataqui juishu. Tume junayara micuana Yusuja Espiritu tyanaya, tujaque jadique adebataqui juishu, —jadya tujatu ecana acuare.

Jesús cutsamereticuareque

(Mt 3.13-17; Lc 3.21-22)

⁹ Juan ecuita cuana utsa jucuaire patyatu Jesús jucuaire Nazaret juque. Tumeque eputu Galilea yahuaju jucuaire. Tuque jutihuaaju Juanra Jordán cueriju ut-sacuare. ¹⁰ Tuque ena juque cuinanayaju cuitatu Jesúsra bacuare barepa pacashatanayaju. Bacuaretu Yusuja Espiritu huei jiuque tuque dyaque buteyaju. ¹¹ Tume tujatu barepa juque etsuri bacacuare. Yume tucuetu jucuaire tuja Etataque Yusu.

—Mique mique ecue Ebacua dyaque iyuhuedaque. Ique dyaque pureama juya miatsehue, —jadya tujatu acuare.

Satanásra Jesús cajuchatishacara acuareque

(Mt 4.1-11; Lc 4.1-13)

¹² Jadya juu jadya juatsutu Yusuja Espiritura Jesús jucuaire japada peya queja amaca anitaya amaju.

¹³ Pushi tunca huecacatu tuhua juticuare. Tuhuatu jetiama cuanubi mureda cuanaque anicuare. Tuhuadyatu Satanásra cajuchatishacara ebari datse acuare. Jadya juhuaju Yusu tsahuaqui cuanaque butecuare barepa juque Jesús tsahua, casatura jadya aishu.

Jesús Galileaju Yusuja quisarati cueja catibuticuareque
(Mt 4.12-17; Lc 4.14-15)

¹⁴ Ecuarira Juan etare apudaju ishamerehuajutu Jesús Galileaju cuacuare Yusuja jidaque quisarati cuejara.

¹⁵ Cuejacuare tujatu ecana:

—Necacuareticue inime. Yusu queja necatyaticue, tujaja quisarati jidaque ejenetsu. Juetihuatu huecaca. Yusuajatu adebamerehuie tuja Emepeque, —jadya tujatu ecana cuejacuare.

Jesúsra pushi jae puji cuana tuatsehue juneni ishuhuaradirucuareque
(Mt 4.18-22; Lc 5.1-11)

¹⁶ Jesúsra Galilea bei jiruru eque dirucuare. Diruyara tujatu badirucuare beta jae puji ecatse. Peadyatu Simón jucuare, peya bacue Simón tsehuequiquedya Andrés. Jae deru ishucue enaju mare tatse jucuare.

¹⁷ Jesúsra tatse isaradirucuare:

—Nejecue. Eatsehue nejunenicue. Metse metse jae puji ecatse. Iyacua metse era ecuita cuana Yusu adeba mere ishucue amereya, —jadya tatse Jesúsra adirucuare.

¹⁸ Tumeque ura cuitadya tatse jae deru ishucue shanaquenatsu junenitibunecuare Jesús tsehue.

¹⁹ Cuabacanucatsu tujatu banucacuare beta ecuita ecatse. Jucua retu Santiago, Santiago tsehuequique Juan jadya, Zebedeja ebacuaque ecatse. Cuaba aridaju tatse juanicuare, jae deru ishucua cuanaque sipiani juyaque. ²⁰ Jesúsra tatse ihuaracuare, tuatsehue juneni ishucua. Tura ihuarayaju bacatsu tatsejatu shanaquenacuare etataque Zebedeja cuabaju tuja mere puji cuana tsehue. Cuinanacuare tatse cuaba arida juque, etataque isaraquenatsu. Jadya juatsu tatse Jesús tsehue junenitibunecuare.

Jesúsra ecuita ijahua cuanara quijahuatishayaque quijahuatishajacacuareque
(Lc 4.31-37)

²¹ Judirucuare tuna Capernaum epuju. Canajara huecacajutu Jesús nubicuare caradati ishucue etareju. Nubititsutu catibuticuare tuna bahuitya. ²² Anajacacuare tuna tura bahuityayaque bacatsu, huaraji equisaratiu bucha quisaratie juya bacatsu. Bahuityacuare tujatu ecana cacuatsashati bahuityaquira bahuityaya bucha ama.

²³ Anicuaretu tumeque etareju ecuita ijahua cuanara quijahuatishayaque. Tuque quijahuatishaquiquedya jutidyatu ecuita eque quiquecuare:

²⁴ —¿Ai jitequemi jeya ecuana queja, Jesús Nazaret juque? ¿Ecuana aputasharami jeya? Adebaya mique ecuanara. Miquemi juchama. Yusu quejaquemi jehua, —jadya tujatu acuare.

²⁵ Jesusratu tumeque ijahua nereda acuare:

—¿Abacata jucue! ¡Iyacua cuita cuinanacue riyaque ecuita quejaque! —jadyatu Jesúsra acuare ijahua ecuita quijahuatishaquique.

²⁶ Jadya quisarati aatsutu ijahuara ecuita tadadashatilla, yahua catsaqui amere jadya acuare. Manu amere, jebuda quiqueshatilla, cuinana jadyatu tuaquejaque jucuare. ²⁷ Dutya tuque petaqui jucuare cuanaque tuna jecutanacuare. Cabacaduratibarecuare tuna:

—¿Eje buchique ri riyaque? ¡Eje buchique rejari iyacuaque bahuityaya! Huaraji equisaratiu bucha rejari quisarati. Aniya taa tuja casa ijahua cuana cuatsasha ishucua. Tuna bacue tuequedya juya tura amereya equedya, —jadya tuna jucuare.

²⁸ Masadama cuitatu tumeque jadya juyaque tsapetanacuare dutya Galilea yahuaju. Tumeque yahuaju cuanaque tuna dutya bahue jucuare Jesús jadya juyaque.

Jesúsra Simón Pedroja ehuaneequeja ecuaque chachanecuareque
(Mt 8.14-15; Lc 4.38-39)

²⁹ Caradati ishucue etare juque cuinanatsutu Jesús cuacuare Santiago, Juan jadya tsehue. Cuacuare tuna Simón, Andrés jadya etareju. ³⁰ Simónja ehuaneequeja ecuaquetu dyaquene cuita, baara juyaque jaracuare. Cuejatsacuare tunajatu Jesús, tumeque epuna ujejeda jarayaque. ³¹ Jadya bacatsutu Jesúsra jipeticuare. Jipetitsu tujatu emetucuju jabanaticuare. Emetucuju jabatsu tujatu iyatsuracuare. Tumeque ura cuitadyatu baara juyaque chacha jucuare. Tumetu netitsuratsu earaqui jucuare Jesús, tura mepehua cuanaque jadya mihua ishucua.

Jesúsra umada ujejeda cuanaque chachanecuareque
(Mt 8.16-17; Lc 4.40-41)

³² Amena ijete nubihuaju, apupuyajutu ecuita cuanara becuare Jesús queja ujejeda cuanaque umada ujeje tsehue cuanaque, tumebaedya ijahua cuanara quijahuatishaya cuanaque. ³³ Dutya epu jujeri tuna casitaticuare etsecueju, Jesúsra eje bucha ayaque petacara aatsu. ³⁴ Jesusratu chachanbarecuare umada bape bape ujeje tsehue cuanaque. Tumebaedyatu ijahua cuanara quijahuatishaya cuanaja ijahua cuana cuinanashacuare. Quisaratishacarama tujatu ijahua cuana acuare, ecuita cuanara tuque Mesiasque eadebauju.

Galileaju Jesús Yusuja quisarati cueja jucuareque
(Lc 4.42-44)

³⁵ Huecacama jarijutu Jesús netitsurahuecacacuare. Epu juquetu cuacuare Yusu tsehue quisaratira tuta taca piji. ³⁶ Umae peya cuana Simón tsehue mepetapee jucuare cuanaratu Jesús sareticuare.

³⁷ Jesús tunajatu Etataque tsehue quisaratiyaju baticuare. Quisaratiyacahuaju tunajatu cuejacuare:

—Dutyara tunarami sareya, —jadya tunajatu acuare.

³⁸ Jesúsra tuna acuare:

—Caadebatiyadya ique tunara sareyaque. Jadya ama bucha necuara peya queja amaca epu cuana japadamaju Yusuja quisarati cuejara. Jadya ishudyu

ique Capernaum juque cuinanahua, —jadya tujatu ecana acuare.

³⁹ Tumetu Jesús junenicuare dutya Galileaju, caradati ishuque etare cuanaju Yusuja quisarati cueja juyaque, tumbaedy a ijahua cuanara quijahuatishaya cuanaque chachane.

Jesúsra ecuita pusesera ririshayaque chachanecuareque

(Mt 8.1-4; Lc 5.12-16)

⁴⁰ Jesús peya queja amaca juneniyajutu ecuita pusesera sehuera rami ririshayara jipeticuare. Tume tujatu Jesús tuja yacuaju chichucata juatsu isaratsacuare:

—Chachanecara aatsu taa mira ecue ujeje aniyaque echachaneu, —jadya tujatu acuare.

⁴¹ Nerecada baatsutu Jesúsra jabacuare.

—Chachaneyadya mique era, —jadyatu Jesúsra acuare.

⁴² Jadya aya tsunumeetu pusesera aputacuare tuja ecuita juque. Chachadya tu jucuare. ⁴³ Ecuita diruma jarijutu Jesúsra nereda bucha cuejae acuare:

⁴⁴ —Bacacue era cuejayaju. Cuejacueja camadya aume ni ejequedy juditya mique eje bucha chachae juhuaque. Riyata cuau cuitadya jucue pae queja, tuja mique pana adeba atsa ishu, “Chachadya rique” jadya tuja aishu. Cadujuticue Moisésra amerehua equedy riyaque ujeje chacha eju cuanaja Yusu tyabahueque. Jadya juatsutu ecuita cuana bahue juya mique amena chachaque, —jadyatu Jesúsra acuare.

⁴⁵ Jadya ahuajutu ecuita dirucuare. Arepa Jesúsra cuejamerecarama ahua ama bucha, tujatu ecana cuejaajecuare tuque Jesúsra chachanehuaque. Jetiama ecuitara bape baatsu petacara ayajutu Jesús epu arida cuanaju cuataqui ama cabaticuare. Epu japada tsecada anitaya quejatu junenicuare. Dutya queja aniya cuanaratu Jesús baticuare.

Jesúsra ajebaecuareque ajeshacuareque

(Mt 9.1-8; Lc 5.17-26)

2 Eje uma huecaca cuana juatsutu Jesús yudijidya judirunuca jucuare Capernaumju. Masadamatu ecuita cuana bahue jucuare tuque tuhua etarejuque judiruhuaque. ² Umadatu ecuita cuana caradatinucacuare tuhua. Aijamatu jucuare emajaca educuju ni etsecueju, umada caradatihua tibu. Tuhua tuna tura Yusuja quisarati cuejacuare. ³ Tuque quisarati cueja juya tsunumeetu pushi ecuita junaticuare, ebadequi baeju ajebaecuareque duju juyaque. Jadya iyabutya-maquedy juditya tunajatu ajebaecua queja Jesús jipemerecara acuare. ⁴ Jipetaqui ama tunajatu Jesús bacuare, ecuita jetiama tibu. Amena eje bucha nubitaqui ama cabatitsu, tuna tsuracuare ebarucue etare duyaque. Tsuratsu tunajatu etare ebarucue jepedaque huetsacuare, Jesús netiya tuyu. Huetsatsu tunajatu ajebaecuareque butyacuare ebadequi baeju misa tsehue tisunetsu. ⁵ Ajebaecuareque dujuqui cuanara Jesúsra ajebaecuareque eajeshauque ejeneyaque adebatsu tujatu jadya ajebaecuareque acuare:

—Micue jucha cuana tu amena eapupasha, tata, —jadya tujatu acuare.

⁶ Cacuatshati bahuityaqui cuanaque tuna tuhadya etareju jucuare. Jadya quisaratiyaju bacatsu tunajatu inime tupucuare:

⁷ —¿Eje bucha juatsuri riyaque ecuita jadya quisaratiya? Yusu tujatu ijillahuanaya. [Ni ejeradya jutidyatu jucha cuana eapupashau, Yusura peadya camadya! —jadya tunajatu inime tupubarecuare.

⁸ Jesússtu bahuedy a jucuare tunara eje bucha inime tupuyaque.

—¿Eje bucha juatsu tuque micuana jadya inime tupuya: “Yusu tujatu ijillahuanaya” jadya? Jida ama tuque micuana inime tupuya. ⁹ Era ni ajebaecuare eau: “Micue jucha cuana tu eapupasha” jadya, eadebau ama tuque micuana ecue casa aniyaque, eapupasha, apupashama jadique ejitaju ama tibu. Era ni eau: “Netitsuracue. Piruricue micue jara ishuque. Aje-cue”, tumeque ura cuitadya tuque micuana eadebau ecue casa aniyaque, ajebaecuareque juneniyaju baya tibu. ¹⁰ Tuque juneniya baatsu micuana bahue juya ecue tumbaedy riyaque yahuaju jucha cuana apupasha ishu casa aniyaque, —jadya tujatu ecana acuare.

Tumetu Jesúsra acuare ajebaecuareque:

¹¹ —Netitsuracue. Piruricue micue jara ishuque. Dirucue micue etareju, —jadya tujatu acuare.

¹² Jadya ahuaju cuitatu ecuita netitsuracuare. Tuja jara ishuque piruritsu, huesatsutu cuinanaquenacuare tuhuaque dutyara petayaju. Dutya tuna anajacat-acuare. Pureama tuna Yusu acuare:

—[Dyaque jida, casada taa Yusu! [Bama taa rique ecuanaja jadya cuanaque! —jadya tuna jucuare.

Jesúsra Leví tuatsehue juneni ishu ihuaracuareque

(Mt 9.9-13; Lc 5.27-32)

¹³ Jadya junucatsutu Jesús cuanucacuare bei jiruru eque. Jetiama ecuitaratu jipetinucacuare. Tume tujatu ecana bahuityacuare. ¹⁴ Cuetiyara tujatu bacuare Leví, Roma juque enaruquija ishu chipiru tsuje bacayaque juaniyaju. Levítu Alfeoja ebacuareque jucuare. Isaranati jadya aatsu tujatu acuare:

—Eatsehue junenicue, —jadyatu Jesúsra acuare.

Jadya ahuaju netitsuratsutu Jesús tsehue junenitibunecuare.

¹⁵ Ejetsunue juatsu amatu Jesús Levíja etareju araaraapunacuare, tura mepehua cuana tsehue. Tuhuatu jucuaredya enaruquija ishu chipiru tsuje bacaqui cuanaque, umae bijidamadurataya cuanaque jadya. Tuhadya tuna jetiama mesaju Jesús tsehue araaruare. ¹⁶ Cacuatshati bahuityaqui cuanara, fariseo cuanara jadyara tunajatu bacuare eje bucha juyaque. Bacuare tuna Jesús tunara ecuita cuana ujeu baya cuana tsehue araarayaju. Jadya baatsu tunajatu acuare Jesúsra mepehua cuanaque:

—Riyaque ecuita ri bijidamadurataya cuanaque. Micuana Bahuityaquiuetu araarataqui ama enaruquija ishu chipiru tsuje sitaqui cuana tsehue, tumbaedy

peya jucha arida cuana tsehue, —jadya tunajatu ecana acuare.

¹⁷ Jesúsra tuna quisaratijaju bacacuare.

—Chacha cuanaratu sareya ama casamati puji. Ujeje-da cuanara camadyatu sareya. Juchama bucha cabatiya cuanaque sarera ama jehua. Ique jehua jucha arida cabatiya cuanaque jiteque, tuna inime cacuaretisha ishu, —jadya tuna Jesúsra acuare.

Eje bucha anitaqui amatu beruque inime eque, iyacua eque jadya

(Mt 9.14-17; Lc 5.33-39)

¹⁸ Juan Ecuita Cuana Utsaqui tsehue junenicuare cuanaque, fariseo cuana tsehue junenicuare cuanaque jadya tuna arama quibeti bahue jucuare, Yusu muiyaque cabamereti ishu. Jadya tuna arama quibetiayutu, umae ecuita cuana Jesús queja cuacuare. Jutitsu tunajatu bacaduracuare:

—Juan tsehue juneniya cuanaqueri arama quibetiya Yusu muiyaque cabamereti ishu. Tumebaedya fariseo cuana tsehue juneniya cuanaque jadidya ecana juya. Mira mepehua cuanaque bacue arama quibeti baecua. ¿Eje bucha juatsu? —jadya tunajatu Jesús acuare.

¹⁹ Jesúsra tuna quemitsacuare:

—Caquemitiyaju cuaishu ecueja cuanaque tuna arama quibetiya ama caquemitihuaque tuna tsehueju. Tuna quejaque dujutanahuaju piisi tuna arama quibetiya. Tumebaedyatu ecue cuanaque; ique cuanucahuaju piisidya tuna arama quibetiya.

²¹ “Ni ejeratu camisa siri sipiya eraca iyacua tsehue. Jadya ayaque juatsutu nacatatsu eraca iyacuaque dyurutanatsu camisa siri echajatanau. Chajatanayaque juatsutu camisa beru juhua bucha dyaque jidama ejuu.

²² Tumebaedyatu ishataqui ama tupari sasana ishuque sura siri cuitaju. Tupari sasanayaratu epututashau sura siri. Tumetu eaputau sura, tupari jadya. Jadya tibudyatu tupari sasana ishuque sura jida iyacuaju ishataqui, —jadya tujatu ecana acuare.

(Riyaque cuatsabiji tsehue tuna Jesúsra bahuityacuare. Eje bucha anitaqui amatu beru inime israelita cuanara bahuityacuare eque, iyacuaque tura cuitadya bahuityaya eque jadique.)

Jesúsra mepehua cuanara trigo esa canajara huecaju sepiajecuareque

(Mt 12.1-8; Lc 6.1-5)

²³ Tume patyatu Jesús cueticuare euhua cuana eque canajara huecacaju. Aridatu trigo euhuaque jucuare ejahuane, amena racataqui. Jesúsra mepehua cuanaratu cuetiyaradya jutidya trigo esa sepitsu etsucaca mucuajecuare. ²⁴ Umae fariseo cuanara baatsu tunajatu Jesús cuejacuare:

—Mira mepehua cuanaquetu Moisésra cuatsashacuare eque ama juya. Meredya tuna juya etsucaca cuana sepi, mucu jadya juyaque. Meretu jutabaecua canajara huecacaju, —jadya tunajatu acuare Jesús.

²⁵ Jesúsra tuna quemitsacuare:

—Neadebacue ecuanaja ebaba David emuique jucuaque. Tuque, tuatsehue cuaya cuanaque jadya tuna aracara jucuaque. Aijama tunaja ara ishuque jucuaque. ²⁶ Tume patya, Abiatar pae dyaque muidaque jucuaque patyatu David nubicuare Yusuja etareju. Nubitsu tujatu Yusuja ishu eiyaque pan cuana inacuare. Inatsu tujatu aracuare. Tumebaedyatu tyacuare tuatsehue cuaya cuanaque. Arepa tuja, tuatsehue cuaya cuanaja jadya arataquima paju ama bucha tuna aracuare, pae cuanaja cuita camadya arataquique. Jadya ama buchatu Yusu cahuitishacuare ama, tumeque pan aratsu.

²⁷ Icuene cuitatu Yusura ecuita cuana iyahua. Tuequedyatu iyahua semanaju peadya huecaca tuna canajara ishu. Canajara huecaca icuene au, ecuita cuana au jadya amatu Yusura acuare. ²⁸ IQUE ECUITAjatu aniya cacuatsashati canajara huecacaju ai juishuque, —jadya tuna Jesúsra acuare.

Jesúsra ecuita emetucu majuque chachanecuareque

(Mt 12.9-14; Lc 6.6-11)

3 Jadya juatsutu Jesús caradati ishuque etareju nubinucacuare. Canajara huecacajutu jadya jucuaque. Ecuita emetucu majuquetu tuhua jucuaque. ² Tumebaedyatu tuhua jucuaque Jesús ujeu baqui cuanaque. Tunaratu Jesús jidama inime tupu tsehue petacuare. “Tura ni canajara huecacaju riyaque emetucu majuque chachaneya, tume tuque ecuanana huaraji cuana queja cuejatiyadya”, jadya tunajatu inime tupucuare.

³ Tumetu Jesúsra isaracuare ecuita emetucu majuque:

—Netitsuracue. Netinacue requeja tuna patya, —jadya tujatu acuare.

⁴ Netitsurahuajutu Jesúsra tuhua cuanaque bacaduracuare:

—Ecuanaja cacuatsashati eque ¿canajara huecacaju tuque ecuanaja jidaque ataqui, jidamaque ni taa? ¿Ejeque majutaqui baatsu echachaneudya tuque ecuanara, “Pamaju” jadya ni taa ecuanana eau? ¿Eje bucha micuana inime tupuya? —jadya tujatu ecana acuare.

Tura jadya ahaju tuna caquemitsaticuare ama. ⁵ Tumetu Jesús tuna tsehue ecahuaiti jucuaque. Jadya ama buchatu peya inime jucuaque, tuna inime cacuareticarama juya baatsu.

—Rirucue micue ebi, —jadya tujatu acuare ecuita.

Jadya ayajutu ecuitara rirucuaque ebi. Tura ebi riruya tsehuedya cuitadya tujatu emetucu chacha jucuaque.

⁶ Jadya juya baatsutu fariseo cuana cuinanaque-nacuare. Cuinanatsu tuna enaruqui Herodes tsehue juneniya cuana tsehue quisaratira cuacuare. Bajejetibunecuare tuna inime Jesús iye ishu.

Jesús quisaratijaju bacacara aatsu bei jiruru ecuita jettiana caradaticuareque

⁷ Jesússtu cuacuare tura mepehua cuana tsehue bei jiruru queja. Umada ecuita Galileaju aniya cuanaratu tajicuare. ⁸ Jecuare tuna Judea yahua juque, Jerusalén juque jadya. Idumea juque ecana junacuaredya, tumebaedya Jordán cueri yueque macare cuanaque. Tiro,

Sidón yahua cuana juque tuna junacuareya. Jadya eque tuna dutya quejaque tuque eje bucha juyaque bahue juatsu jebarecuare. ⁹ Ecuíta cuana jetiama baat-sutu Jesúsra acuare tura mepehua cuanaque:

—Nequeticue cuaba requeja, ecuíta cuanara ique naiishayaque juatsu tuhua anibute ishú, —jadya tuna Jesúsra acuare.

¹⁰ Tura icuene ujejeda cuanaque chachanechineque adebatsutu jetiama ujejeda cuanaque tuaqueja cajabamereticara juatsu quitushati quitushati tsehue cuacuare. Cajabameretitsu cuanadya jutidya tuna cachachanemereticara jucuare. ¹¹ Ijahua cuanara qui-jahuatishaya cuanaquetu tuque baatsu quiqyeaque nuuyacuare tuja yacuaju:

—[Midyami Yusuja Ebacuaque!]

¹² Jadya juhuaju tuna Jesúsra nereda bucha cuejae acuare:

—Jadya dutyaja ijacaju nequisaratiume, —jadya tujatu ecana acuare.

Jesúsra peadya tunca beta earacana tuatsehue juneni ishú mepecuare cuanaque

(Mt 10.1-4; Lc 6.12-16)

¹³ Jadya juu jadya juatsutu Jesús tsuracuare emataju. Tuequeradya tujatu ihuaracuare tuatsehue juneniya cuanaque. Tuhuadya tuna caradaticuare. ¹⁴ Tuhuadya tujatu ecana mepecuare peadya tunca beta earacana.

—Eatsehue nejunenicue era eje bucha ayaque cabahuityati ishú. “Jesúsja Ecuadisha cuanaque” jadya bacani eque neadebatacúe. Ecúe quisarati cuejara micuana cuadishaya. ¹⁵ Tyaya micuana casa ijahua cuana ijehuecuina ishú, —jadya tujatu ecana acuare.

¹⁶ Peadya tunca beta earacana tura ebacaniju abarecuare cuanaque tuna jucuare:

Simón (Jesúsra tujatu peya ebacani iyacuare “Pedro”.)

¹⁷ Santiago

Juan (Santiago tsehuequique; tatse tatse jucuare Zebedeoya ebacuaque ecátse. Tatsedyá tatse “Boanerges” bacani jucuare, “Tiriti baeque ecátse” jadique.)

¹⁸ Andrés

Felipe

Bartolomé

Mateo

Tomás

Santiago (Alfeoja ebacuaque)

Tadeo

Simón (Tuquetu Roma juque enaruquique bji-damaduraqui juyaque jucuare.)

¹⁹ Judas Iscariote (Jesús inamerequi judadicuareque) Jadya tuna jucuare tura mepecuare cuanaque.

Jesús tunara “Satanásja casa rejari aniya”, jadya acuareque

(Mt 12.22-32; Lc 11.14-23; 12.10)

²⁰ Jadya juatsutu Jesús tura mepehua cuana tsehue nubidirucuare etareju. Jesús judirunucaguaque bahue

juatsutu jetiama ecuíta cuacuare tuaqueja. Jesúsja, tura mepehua cuanaja jadya tunajatu aijama emajaca jucuare ni araara ishú cuanadya jutidya. ²¹ Jadya bahue juatsutu Jesúsja ata cuana jecuare tuque jiteque, qui-jahuatiyapa jadya bacatsu datse.

²² Tuhuatu umae cacuatsashati bahuityaqui cuanaque jucuare Jerusalén juque junahua cuanaque.

—Beelzebú, ijahua cuana cuatsashaquique tu tuatsehue. Jadya tibudya tujatu casa aniya ijahua cuana ijehuecuina ishú, —jadya tuna jucuare.

(Beelzebú taa tu Satanás bacani nucadya.)

²³ Tumidya tuna Jesúsra ihuaracuare. Ihuaratsu tujatu ecana cuejacuare:

—Beelzebúja casa eque ama tuque aya. Tuja casa eque ni eau, tume taa tu Satanás tuta tacadya jutidya pana cayuamaturati ejuu. ²⁴ Ita taa nebacacúe. Yahua-ju dutya aniya cuanaque ni ecajaquetibareu cuarepe cuarepe tuna cama cati ishú, tuna camadya jutidya tuna ecattillatiu. ²⁵ Peadya etareju aniya cuanaque ujeu cabatitsu, ecajaquetibarequetu catillatiya. Tsapetanatereya. Ebacua cuanaquera tuna etata cuanaque muibajacaya. ²⁶ Era ni Satanásja casa tsehue ijahua cuana eijehuecuinau, tume taa tu Satanás tuja ijahua cuana ducuque peadya tsehue ecatiu. Tumetu ejeque ijahuadya jutidya tura cuatsashaya eque ejuu ama.

²⁷ “Ijahua cuana ijehuecuina ishutu icuene cuita tuna cuatsashaquique Satanás dutya tuja casa secataqui, ecuíta dyaque casadaque tuja ai seca ishú icueneta risi ataqui bucha. Ejeque casa secamaja etarejutu eje bucha nubitaqui ama tuja ai aniyaque seca ishú.

²⁸ Yusratu jidama quisarati aya cuanaja jucha cuana eapupashau, eje bucha cajuchatie juya cuanaja.

²⁹ Jadya ama bucha Yusuja Espirituja ishú jidama quisarati aya cuanaja jucha tujatu apupasha nime ama. Apupashaya ama tibusu Yusura nerecaturajacabuque ama tumeque jucha tibu, —jadya tuna Jesúsra acuare.

³⁰ Jesúsra tuna jadya acuare, tuna cuejayaque. Yusuja Espíritu tsehue tujatu ijahua cuana ijehuecuinaya jadya eauquetu tunara Ijahua casa tsehue bucha bacuare.

Jesúsja ecuaque, tuatsehuequi cuanaque jadya Jesús jiteque cuacuareque

(Mt 12.46-50; Lc 8.19-21)

³¹ Jesús quisarati netiyajutu junaticuare ecuaque, tuatsehuequi cuanque jadya. Ecuíta jetiama tibu tuna etsecueju netinaticuare. Tuequeradya tunajatu ihuaramerecuare. ³² Jetiama tuna anibarecuare educuju Jesús peque.

—Micue cuaa, micue miatsehuequi cuanaque jadya rena etsecueju. Miatsehuepa tuna quisaraticara juya, —jadya tunajatu Jesús aticuare.

³³ —Tumeque epuna tuque ecue ecuaa; tume cuanaque tuna ecue eatsehuequi cuanaque. Jadya ama bucha tuque ecue aniya peya ecue iyuhueda cuanaque, —jadya tuna Jesúsra acuare.

³⁴Jadya quisarati aatsutu Jesúsra educuju anibareya cuanaque petabarecuare.

—Nebacacue. Riya cuanaque rique ecue iyuhueda cuanaque. Riya cuanaque rena ecue ecuaa buchique, ecue eatsehuequi cuanaque buchique jadya. ³⁵Iyuhueda tuna baya Yusuja inime eque juya cuanaque. Tunnadya tuna ecue ecuaa, ecue eatsehuequi cuanaque bucha bae ayaque, —jadya tuna Jesúsra acuare.

Uhuauhua puji cuatsabiji

(Mt 13.1-9; Lc 8.4-8)

4 Yudijidya catibutitu junucacuare Jesús ecuita cuana bahuitya bei jiruru. Masadamatu caradatinucacuare jetiama ecuita cuana. Tuna majacama cuita baatsutu Jesús cuabaju nubitsu anibutecuare. Mejiji equera tunajatu bacacuare tuque quisaratiyaju. ²Cuatsabiji eque tujatu ecana bahuityacuare, yunerique adebamere ishü.

³—Nebacacue riyaque cuatsabiji. Anicuaretu ecuita. Cuacualetu tuja teeju uhuauhuara. ⁴Tura uhuaajeyaque tu umae pacacacuare edijiju yahua pajidaju. Uhuayaque etsucaca yahua huiruhuaquetu upati huiri cuanara anibutetsu mucutillacuare. ⁵Peya etsucaca cuanatu pacacacuare yahua macana dedamaju. Yahua macanamaque dedama tibutu huijatsu danecuare ama, masadama buraracuare ama bucha. ⁶Ijetija uqueratu iyecuare ehua cuanaque, etiri yahua nacadaju ama tibu. ⁷Umae bacue pacacacuare acui tiri, acuija jadya jetiama ducu. Acuija cuana danetsu tujatu trigo ehuaque ehuija cuanaque iyetillacuare. Jadya eque tujatu jucuaire ama ni peadya etsucaca. ⁸Umae etsucaca cuanatu pacacacuare yahua jidaju. Cacacaticuare umada. Tee mere pujiratu jetiama huesacuare tuhua ehuaque. Umae esa cuanajatu quimisha tunca tsucaca jucuaire. Peya esa cuanajatu shucuta tunca tsucaca jucuaire. Peya esa cuanaju jucuaire cien tsucaca. Jadyatu jucuaire teeju ehua cuanaque.

⁹“Quijacabacati aqui juatsu, nebacacue, —jadya tujatu ecana acuare.

Eje bucha juatsu ecana Jesúsra cuatsabiji eque

bahuityacuareque

(Mt 13.10-17; Lc 8.9-10)

¹⁰Tuequedyatu dutya jujeri ecuita cuana cuinanaterecuare. Jesúsra mepehua cuanara, peya cuana cuinanahuishacuare ama cuanara jadyatu Jesús bacaduracuare:

—¿Eje buchique ri riyaque cuatsabiji? ¿Ai mira ecuana bahuityacara aya? —jadya tunajatu acuare.

¹¹Jesúsra tuna quemitsacuare:

—Yusura micuana pana adebamere acara aya tura tuja cuanaque naruyaju eje bucha juyaque. Peya cuana jadya cuejae eauque, tuna cuatsabiji cuana eque jutidya cuejaya jari, pana huecasha cuita ayaque ama.

¹²Tunaratu era ayaque baya. Tume tuna baatsu bama jiu juya. Bacatsu tuna bahuityahua ama jiu juya, arepa bacahua ama bucha. Adebayaque juatsu tuna inime

ecacuaretu. Tuna inime cacuaretiyaque juatsu tunajatu Yusura juca cuana eapupashau, —jadya tujatu ecana acuare.

Jesúsra pana cueja cuatsabiji uhuauhua puji equeque acuareque

(Mt 13.18-23; Lc 8.11-15)

¹³Jesúsra tuna bahuityanucacuare:

—Micuanara ni riyaque cuatsabiji uhuauhua puji equeque bacaya ama, ¿eje bucha adebae jatsu tuque micuana peya cuatsabiji cuana eau? ¹⁴Pana cueja micuana aya era bahuityahuaque. Uhuauhua puji tu Yusuja quisarati cuejaquique. ¹⁵Umaetu Yusura naruyaju eje buchique quisarati bacatsu masadama nime aputaya, Satanásra masadama pana nime aputashamere aya tibu. Tuna tuna ediji pajidaque buchique. ¹⁶Umaeratu ejetsunue ishü ama pureama tsehue Yusuja quisarati bacaya. Nerecada juya cabatitsu tuna ejenejacaya. Quisarati ejenehua baatsu jidama atayaju, masadama tuna ejenejacaya, pana adeba aya ama tibu. Tuna tuna yahua macana dedamaque buchique. Huijahua cuanaquetu macana quini danetsu tsunuda ama juya, etiri dedama tibu. ¹⁸Umaera Yusuja quisarati bacaya cuanaratu ejenejacaya, riyaque yahua cuanaquedya jutidya dyaque inime tsapequi aya tibu. Tunajatu inime juya chipiru dyaque umada anitsu cuita camadya dyaque pureama ejuu bucha. Chipiru dyaque iyuhueda baatsu tuna tunadya jutidya ijahue catiya. Dutya tuna tunaja bijida cuanaque camadya inime tupuqui aya. Jadya juatsu tuna Yusu muijacaya. Tuja quisarati tuna ejenejacaya. Tuna tuna yahua acuija quinique buchique. ²⁰Umae cuana Yusuja quisarati bacaqui juya cuanaratu adebaejadya jutidya. Tuna eje bucha anieju tuna ejitaju Yusuja biji eque aniyaque. Umae cuana tunajatu tsahuaya eaqueja catyati ishü. Tunadya tuna esaju jetiama etsucaca juhuaque bucha, quimisha tunca, shucuta tunca, cien jadya cacacatihuaque buchique, —jadya tuna Jesúsra acuare.

Yusura eje bucha ahuaque catehuatitaquique ama

(Lc 8.16-18)

²¹Jesúsra tuna bahuityanucacuare:

—Ude tuchatsu tuque ecuana tehuaya ama caju ducu ni eperere emaque. Etehuaque tuque ecuana iyaya ebarucue dutya queja uda ishü. ²²Dutya etehuaquetu ejitaju judadiya. Dutya ibedaquetu adebataqui judadiya. Yusura micuana bahue ameredadiya eje bucha jue tujaque juishuque. ²³Micuana quijacabacati aqui juatsu, nebacacue.

²⁴“Pana baca neacue era cuejayaque. Era cuejayaque bacatsu micuanara eje bucha adebae aya eque neanicue. Micuana ni micuanara adebaya eque aniajeya, Yusura micuana adebamereajeyadya jutidya. ²⁵Ejeja ai aniyajatu dyaquedya ai aniajeya. Ejeque ai aniya bucha cabatiyaque, aimaquedya jutidya, tuja aniya cabatiyaque tujatu aputatereya, —jadya tuna Jesúsra acuare.

**Jesúsra ecaca uhuatsu eje bucha cabapetie acui huija
juya eque bahuityacuareque**

²⁶ Jesúsra tuna bahuityanucacuare:

—Cuejaya micuana riyaque cuatsabiji, Yusura naruyaju eje buchique micuana bahue juishu. Ecuitara tuja tee euhau. ²⁷ Tee uhua, jadya juatsu peya mere ecatinucau. Huecadaju mere, meta bacue tahui jadya. Tuque jadya juyajutu uhuachine cuanaque buraratsu huijatsu daneya. Yusura eje bucha iyahua equetu uhuaya cuanaque buraraya, ecuitara eje bucha ayaju ama. ²⁸ Yahua ni jida, icuene cuitatu huijaya uhuahuaque. Tuequedyatu danetsu amena catsatiya. Tuequedyatu etsucaca esaju cacueyatiajeya jahuaneya tupu. ²⁹ Ecaca jahuanehuajutu tee mere pujira racaya, raca raca ishuque huecaca juetihua tibu, —jadya tuna Jesúsra cuejacuare.

(Riyaque quisarati tsehuetu Jesúsra bahuityacara aya riyaque: yuneridya ni ecuana ejeneya tura bahuityayaque, ecuanaja bahue cuana, inime tupu cuanatu cuaretanaya, ecaca uhuahuaque huijatsu, ecaca huesaya tupu cuaretanaajeya bucha.)

Mostaza caca cuatsabiji eque bahuityacuareque
(Mt 13.31-32; Lc 13.18-19)

³⁰ Jesúsra tuna bahuityanucacuare peya cuatsabiji eque bahuityayaque:

—Bahue micuana amerecara aya eje bucha micuana amena Yusura naruyaque. Jadya tibudya micuana cuejaya riyaque cuatsabiji. ³¹ Adebayadya micuana mostaza caca, teeju euhuataque. Achaachaque piji, bataqui nerique ama. ³² Jadya ama buchatu buraratsu, huijatsu, danetsu dyaque arida juya, teeju peya euhua cuanaque bucha ama. Yaa cuana tujatu junuda, arida juya. Tumeque yaa cuanajudyatu upati huiri cuana eja catiya, —jadya tuna Jesúsra acuare.

(Riyaque cuatsabiji eque tuna Jesúsra jadique huecashacuare. Arepa catibutiyaque eje uma piji tuaqueja catyatiajeya ama bucha, tuquedyata tuna riya piji, riya piji jetiama catyatiajeya.)

**Eje bucha juatsu Jesúsra cuatsabiji eque
bahuityayaque cuejacuareque**
(Mt 13.34-35)

³³ Cuatsabiji equetu Jesúsra ecuita cuana Yusuja quisarati bahuityacuare. Tura cuejayaju adebataquima baya cuanaque tujatu cuatsabiji equedya jutidya bahuityacuare. Cuejayaju adebaya cuanaque tujatu ecana dyaquedya pana cueja acuare. ³⁴ Ecuita jetiamaque bahuityayaque tujata ecana cuatsabiji eque cama bahuityacuare. Tura mepehua cuana tsehueju tuna Jesúsra pana cueja acuare cuatsabiji eque bahuityayaque eje buchique jadique.

Jesúsra cuejipa, ena pacu jadya nityacuareque
(Mt 8.23-27; Lc 8.22-25)

³⁵ Apupuyajutu Jesúsra acuare tura mepehua cuanaque:

—Bei yueque macare necarequetira.

³⁶ Tume tunajatu isaraquenacuare ecuita cuana.

Jesús patu ecuita cuana tsehue quisaratitibunehuaque yume anidya cuabaju jucuare. Ecuita cuana isara amena aatsu tuna, tuna dyadi anibutecuaredya cuaba ducu. Dujucuare tuna Jesús yueque macare. Umae ecuita cuana tumebaedya peya cuaba cuana eque carequeticuaredya. ³⁷ Tuna carequetiyajutu muya jutidya cuejipa casadaque jueticuare. Cuejipa juetitsutu ena pacura cuaba ebariju ena ishacuare. Jadya tibusutu ena pacura cuaba nudyajeri nudyajeri acuare. ³⁸ Jesús-tu tahuicuare cuaba tibu queja, iyuca icuquiju. Rumutanaya bucha cabatitsutu tura mepehua cuanara Jesús bushishaticuare.

—Ecuana Naruquique, ¿miratu jidama ama cuitadya inime baya, ena pacura nudyatsu ecuana ehuiditereuju?

³⁹ Tunara jadya ayajutu Jesús netitsuracuare. Netitsuratsu tujatu acuare cuejipa, ena pacu jadya:

—Tume tupu camadya! ¡Neticue! —jadya tujatu acuare.

Tura jadya aya tsehue cuitadyatu cuejipa neticuare. Dutyatu pana abacatana jucuare. ⁴⁰ Jadya juatsutu Jesúsra acuare tura mepehua cuanaque:

—¿Eje bucha juatsu micuana bajida cuita juhua? ¿Eje bucha juatsu micuana eatsehue nime aputahua? —jadya tujatu ecana acuare.

⁴¹ Tuna bacue dyaque eanajacata jucuare. Bajida ecana jucuare. Tuna taca tuna jadya jutibunecuare:

—¡Ai ecuita dyadi ri riyaque! ¡Cuejipa, ena pacu jadya taa tuja yana equedya juya! —jadya tuna jucuare.

Jesúsra ecuita ijahua cuanara quijahuatishayaque quijahuatishajacuareque
(Mt 8.28-34; Lc 8.26-39)

5 Chamacama tuna jaratsuradirucuare Gerasaju aniya cuana queja, bei yueque macare. ² Amena Jesús cuaba juque cuinanahuajutu ecuita ijahua cuanara quijahuatishayara jipeticuare. Emaju cuanaque eisha cani cuana juquetu jecuare. ³ Tucuanajutu anicuare, ijahua cuanara quijahuatishaya tibu. Naru ishutu ecuita cuanara eje uma risi datse abahue jucuare ehuchiju, ebi ecatsēju jadya cadena tsehue. ⁴ Ijahua cuanaja casa tsehue tujatu cadena metal eaque riya piji riya piji tibibishajacama acuare. Ni ejera buchiquetu inataqui ama bacuare. ⁵ Huecada tupu, meta tupu jadyatu emaju cuanaque eisha cuana patya queja, emata cuana queja jadya junenicuare. Tuque amacatu quiqueterenicuare. Tumu cuana tsehuetu ujeta ujeta caticatinicuare. ⁶ Tumetu Jesús japada equera batsatsu, tuaqueja tsajajaajecuare. Tsajajaajetsutu chichucata jucuare tuja yacuaju. ⁷ Jadya ayajutu Jesús quisaraticuare:

—Necuinanacue tumeque ecuita quejaque, ijahua cuana, —jadya tujatu ecana acuare.

Jadya ayajutu ecuita quiquecuare:

—¿Ai jitequemi jeya eaqueja, Jesús Yusu barepajuja Ebacuaque? Nerecabacue ique. Nrecaturaume taa ique, —jadyatu equijahuatira Jesús acuare jebuda quique eque.

⁹Jadya quiqueyajutu Jesúsra bacaduracuare ecuita:

—¿Ai bacani mique?

—Ique Umadaque bacani, ecuana dyaque umada tibu. ¹⁰Cuinanashaume taa ecuana rehuaque, —jadyatu ijahua cuana caquemitsaticuare ecuitaja quisarati eque.

¹¹Tuhuatu jetiama cuchi cuana araanibarecuare emata jiruru. ¹²Ijahua cuanaratu Jesús acuare:

—Panubi ecuana cuchi cuanaju, —jadya tunajatu Jesús acuare.

¹³—Nenubicue taa, —jadya tuna Jesúsra acuare.

Tumetu ijahua cuanara quijahuatishajacacuare tumeque ecuita. Tuaequejaque cuinanatsu tuna cuchi cuanaju nubibarecuare. Jetiamatu cuchi cuana jucuare; beta mil cuchi cuana ni tuna jucuare. Dutya cuchi cuana ijahuaqui cuanaque tuna tsajajayaque pacacadirucare bei tihuesu baruda eque. Bei ju pacacatsu tuna huiditerecuare.

¹⁴Cuchi cuana naru juya cuanaratu bacuare jadya juyaju. Ejecutana tuna tsajajaterecuare epu ebariju. Cueti yara tunajatu epu cuana juque cuejabarecuare tuhua eje bucha juhuaque. Epu ebariju judirutsu tunajatu tumeque quisarati nucadya tsapedirunucacuare. Tunara cuejayaque bacatsutu ecuita cuana cuabarecuare eje bucha juhuaque petara. ¹⁵Junaticuare tuna Jesús queja. Tuhua junatitsu tunajatu banaticuare ecuita equijahuati juhuaque tuhua juaniyajaju. Ecajututi, tuja jida inime tsehue, equijahuatijaca jadya tunajatu banaticuare. Jadya banatitsu tuna dyaque cuita eana-jacata jucuare. ¹⁶Jesúsra equijahuatija ijahua cuana ije-huecuinayaju baqui jucuare cuanaratu peya cuana cuejacuare eje bucha juhuaque. Tunara tuna cuejacuare Jesúsra eje bucha cuinanashae tumeque ecuita juque ijahua cuana tuque quijahuatishaquique ahuaque. Tumbaedyu tuna cuejatsacuare cuchi cuana equijahuati cuanaque bei ju pacacateretsu huiditerehuaque. ¹⁷Jadya bacatsu tunajatu Jesús acuare:

—Dirucue rehuaque.

¹⁸Tunara jadya ayajutu Jesús anibutecuare cuabaju. Cuabaju anibuteyajutu ecuita equijahuatijacara Jesús acuare:

—Ique miatsehue junenicara juya, —jadya tujatu acuare.

¹⁹—Aijama. Rehuadya anicue. Dirunucacue micue ata cuana queja. Cuejadirucue ecana Mique Cuat-sashaquira micue ishuhu dutya ahua cuanaque. Cuejadirucue ecana era mique jida iyuhue tsehue bahuque, —jadyatu Jesúsra acuare.

²⁰Tura jadya ahua jutu ecuita dirucue. Dirutsu tujatu ecana dutya cuejaajecuare Decápolis epu cuana

juque, tuque Jesúsra eje bucha ahua cuanaque. Dutya tuna anajacatacuare tumeque quisarati bacatsu.

Jairora Jesús jipeticuareque

(Mt 9.18-19; Lc 8.40-42)

²¹Jesústu tura mepehua cuana tsehue cuaba eque carequetinucacuare bei yueque macare. Judiruhua jutu jetiama ecuita cuana jutinuacuare tuaqueja bei jiruru.

²²Tuna tsehue quisaratiyajutu ecuita Jairo bacanira jipeticuare. Tuquetu caradati ishuhue etare juque inime metseque jucuare. Jesús banatitsu nuyunaticuare tuja yacuaju. ²³Isaracuare tuja tuque:

—Nerecabacue ique. Ecue ebacujunatu majuhue cuita. Mique jiteque ique jehua. Necua ecue etareju. Jabaticue micue emetucu tsehue. Jabatsu chachaneticue, —jadya tujatu Jesús acuare.

²⁴Tura jadya ahua jutu Jesús cuacuare Jairo tsehue. Umada ecuita cuanaratu tupujudya ayaque nai- ishacuare.

Jesúsra epuna ujejedaque chachanecuareque

(Mt 9.20-22; Lc 8.43-48)

²⁵Tumeque ecuita cuana ducudyatu jucuare epuna ujejedaque. Peadya tunca beta earacana maratu amena nrecada, ujejeda jucuare. Ebacuatere tujatu jidama jucuare; ami tujatu jucuare dyu jutidya. ²⁶Eje uma casamati bahue cuana quejatu casamamereticuare datse. Dutya tuja chipiru aniyaquetu quijehuelaticuare casamameretiyaque. Jadya ama buchatu ni ejeradya jutidya chachanecuare ama. Dyaquetanaajecuare dyu jutidya tuque. ²⁷Jesúsrapa ecana chachaneya jadya bacatsu tujatu Jesús etibene eque jipeajecuare ecuita cuana ducu equedyu jutidya. ²⁸“Tura jutuyaque jabatsu cuanadya jutidya chacha ejuu”, jadya tujatu inime jucuare. ²⁹Jipetitsu tujatu jabacuare Jesúsra unaju ebebacuaju ehuejitaque. Tura jabaya tsehuedya tujatu neticuare ami. Chacha cabaticuare tuja ecuita ujejedaque. ³⁰Tumetu Jesús caadebaticuare tuja casa tsehue ejeque cuana chachanehuaque. Jadya tibudya tujatu tibene bajiyu acuare ecuita cuana ducu queja. Bajiyutsu tujatu bacaduracuare:

—¿Aira jabahua ecue unaju?

³¹Jadya juyajutu tura mepehua cuanara jadya acuare:

—Jeedyu bacuemi ecuita cuanara naiishaya. ¿Eje bucha juatsu mira ecuana bacaduraya aira jabahuaque? —jadya tunajatu Jesús acuare.

³²Caquemitsatimaradya jutidyatu Jesúsra petatibaril-lanucacuare, adeba ishuhu. ³³Epunatu caadebaticuare dyu tura chachanehuaque. Tuja etibene quejaquetu juticuare tuja yacuaju. Tadadayaquetu tuja yacuaju chichucata juticuare.

—Ique micue una jabadaditsu chacha juhua, —jadya tujatu acuare Jesús.

³⁴—Mama, chachami juhua, mira era chachaneya que pana ejene ahua tibu. Cacasicue. Inime tsapema dirucue. Amena tuque micue ujeje anihuaque chacha juhua, —jadyatu Jesúsra acuare.

Jesúsra Jairoja ebacujunaque emajuque chacha nityat-suranucacuareque
(Mt 9.23-26; Lc 8.49-56)

³⁵ Tuque quisaratiya jarijudyatu yana dujuqui cuanaque juticuare Jairoja etare juque.

—Micue bacujunatu amena majuhua. Ai jiteque ni tu Ebahuitaqui que cuama amena, —jadya tunajatu Jairo acuaire.

³⁶ Arepa tunara huaraji jadya cuejayaju bacaya ama buchatu Jesúsra jadya acuaire:

—Jidama inime baume. Cacasaticue. Eaqueja nimee camadya jucue, —jadya tujatu acuaire.

³⁷ Pedro, Santiago, Juan (Santiago tsehuequique) jadya tujatu ecana acuaire:

—Micuana camadya eatsehue nejecue. Tuhuadya uma epaneti, —jadya tujatu ecana acuaire.

³⁸ Junaticuare tuna huarajija etareju. Junatitsu tuna Jesúsra emajuque naru ishu bajejeyaju banaticuare. Bacaajecuaire tujatu ecana quique, pau pau juyaju.

³⁹ Nubinatitsu tujatu ecana jadya anaticuare:

—¿Aishu tuque micuana emajuque naru ishu bajejeya? ¿Eje bucha juatsu tuque micuana majuhuaque jidama inime ishu baya? Tumeque ebacujuna pijitu majuma. Tahuiya jutidya tuque, —jadya tuna Jesúsra anaticuare.

⁴⁰ Jadya bacatsutu ecuita cuanara ijaribacuare, tunara yuneri cuitadya emaju baya tibu. Ecanajetijacatu ebacujuna piji jucuaire. Tume tuna Jesúsra dutya cuinanashacuare. Nubiquerecuare tujatu ebacujuna pijija etataque ecatse, quimisha tura mepehua cuanaque jadya camadya. Nubinatitsu ecana ebacujuna piji emajuque jarayaju. ⁴¹ Tuhua nubinatitsutu Jesúsra emetucuju inanicuare ebacujuna piji emajuque. Isaranaticuaretu emajuque:

—Talita, cumi (“Ebacujuna piji, netitsuracue” jadique).

⁴² Tura jadya ayaju cuitatu ebacujuna piji canajetiet-inucatsu, anitsura netitsura jadya juatsu ajecuaire. Peadya tunca beta earacana mara tujatu anicuare. Tuque ajenucaya baatsutu tuhua jucuaire cuanaque dyaque anajacatacuare. ⁴³ Tume tuna Jesúsra nereda bucha cuejae acuaire:

—Cueja cueja neaume ni ejeque riya jadya juhuaque, —jadya tujatu ecana acuaire.

Jadya juu jadya juatsu tujatu ecatse acuaire:

—Nemihuacue, —jadya tujatu acuaire ebacujuna pijija etataque ecatse.

Jesús Nazaretju juetinucacuareque

(Mt 13.53-58; Lc 4.16-30)

6 Jesúsru dirunucacuare tuhuaque. Cuacuairetu Nazaretju, tuque catemuticuareju. Tura mepehua cuana tsehuetu cuacuare. ² Amena canajara huecaca juetihujutu cuacuare caradati ishuque etareju. Nubitsu tujatu tuhua cuanaque bahuityatibunenuacuare. Anajacatacuare ecana, tura jidaque quisarati cuejayaju bacatsu.

—Riyaque ecuita taa dyaque inimequi quisarati ishu. ¿Eju jatsuri riyaque jadya quisarati cabahuityatihua? ¿Eje bucha ae jatsu rejari eau ejeque ecuitara ayaque ama? ³ Nanadaju ecuanara bacuaireque taa riya.

¿Riyaquedya ama jatsu ri Joséja ebacuaque, mesa, caju cuana pujija ebacuaque? ¿Mariaja ebacuaque di taa riya? ¿Riyaque di taa ri Santiago, José, Simón, Judas jadyaja euji que? Tuja enuu cuanaque tupuju cuanaque taa rena rehua ecuanaja epujudya aniya, —jadya tuna jucuaire.

Tunara nanada equedya bahua tibu, tunajatu ejenecarama acuaire tuque Mesiasque, Yusuja Emepeque jadique. Jadya tibudya tunajatu bacacarama acuaire tura bahuityayaque.

⁴ Jesúsra tuna acuaire:

—Quisarati dyaque jida cuanaque cuejaqui cuanaque tuna dutya queja jida batsataya, tunaja epuju cuanara cuita bacue aijama. Dutyara tuna pana ija-cabaca aya; tuja etareju cuanara cuita bacue aijama, —jadyatu Jesúsra acuaire Nazaretju cuanaque.

⁵ Tuhua tuja epuju tujatu anericuare ama ai ejeque ecuitaja ataquique ama, tuhua cuanaque tuaqueja catyaticarama juya baatsu. Eje uma piji ujejeda cuanaque cuita camadya tujatu chachanecuare, tuja emetucu tsehue jabatsu. ⁶ Turatu bape cuita bacuaire, eje uma piji ecana tuaqueja catyaticara juya baatsu.

Jesúsra tura mepehua cuanaque tuja quisarati cuejara cuadishacuareque

(Mt 10.5-15; Lc 9.1-6)

Jadya juatsutu Jesús junenicuare epu ashaasha cuana japadamaju ecuita cuana bahuitya.

⁷ Sitacuare tujatu peadya tunca beta earacana tura mepehua cuanaque.

—Necuacue beta beta cama ecue quisarati cuejara. Ijahua cuana ijehuecuina ishu micuana tyaya casa.

⁸ Tuna cuadishahuaque cuahuie tujatu ecana acuaire:

—Micuanara tsahuatiya cuanaradya micuana tsujema tyatsaya micuanara ai sareya cuanaque, micuana Yusuja mere juyaque baatsu. Jadya tibudya sari cuita camadya necadujuticue. Necadujutime shitara ni chipiru. Cadujutitaqui ama micuana ara ishuque ni jutu ishuque. ⁹ Asicada juatsu catacati ishu jutu ishuque necadujutime. Zapato jutuyaque cuita camadya necadujuticue. ¹⁰ Ejeque epuju junatitsu, ejera jida bat-sayaju, tuhua neanicue tuja etareju, peya epuju dirunucaya tupu. ¹¹ Eju junatijaju ecuita cuanara bat-sacarama ayaju, eju tunara micuanara cuejayaque bacacarama ayaju, masadama necuinanacue tuhuaque. Cuinanayaque neitataquenacue muru micuanaja ehuaqui juque, “Aine yatse micuana tsehue juma”, jadya tuna ayaque. Tunadya tuna inime metse Yusuja quisarati bacacarama ahua tibu, —jadya tuna Jesúsra acuaire.

¹² Epu cuana tupu tuna junenicuare Yusuja quisarati cueja juyaque.

—Inime necacuareticue. Peya inime nejudue micuanaja jucha cuana aniyaque caadebatitsu, —jadya tunajatu ecana cuejaajecuaire.

¹³ Ijehuecuinacuare tunajatu jetiama ijahua cuanara quijahuatishaya cuanaja ijahua cuana. Jetiama tuna ujejeda cuanaque chachanecuare, iyucaju riya piji etseri juratsu.

Eje bucha iyetanae Juan Ecuiteda Cuana Utsaquique jucuaireque

(Mt 14.1-12; Lc 9.7-9)

¹⁴ Ecuareda Herodesratu bacacuare Jesús ai juyaque, eje bucha juyaque jadya. Dutya quejatu ecuita cuanara Jesúsja ishucuarati acuaire.

—Tumeque Jesúsdu baya ecuita ama. Juan Ecuiteda Cuana Utsaquique emajuque cacuitatitsu netitsuranucachineque tume. Jadya tibudiatu Jesúsja casa aniya ejeque ecuitaja ataquique ama aishu, —jadyatu Herodes jucuaire.

¹⁵ Peya cuana bacue jucuaire:

—Elías ecacuitatiqué jutidya tume, Yusu equeque quisarati cuejaquique.

Peya cuana bacue jucuaire:

—Jesústu beru Yusu equeque quisarati cueja jucuaireque jutidya, emajuque enetitsuranucaque.

Jadya tuna cuji cuita juatsu quisaraticuaire.

¹⁶ Dutya ecuita cuanara quisarati ayaque bacatsutu Herodes jadya junucacuare:

—Tumequetu Juan era iyuca tubumerechineque. Jesús bucha cacuitatitsutu netitsuranucachine, —jadyatu tuque jucuaire.

¹⁷ Iyacuá micuana Juan eje bucha iyetanae jucuaireque cuejaya. Herodes patu caquemiticuaire Herodías tsehue, arepa tumeque epuna tuatsehuequi Felipeja ehuanecue jucuaire ama bucha. Eje uma cuejadya datse patu Juan Ecuiteda Cuana Utsaquira acuaire: “Caquemititaqui amami micue miatsehuequiija ehuanecue tsehue”. Jadya cuejayaju patu Herodes cahuaitecuare Juan tsehue. Jadya juatsu tujatu sudaru cuana queja inamerecuare. Inameretsu tujatu cadena tsehue risimeretsu etare apudaju ishamecuare. Tura Herodías dyaque bijida baya tibu tujatu Juan jadya amerecuare. ¹⁹ Juanra jadya quisarati ahuaaju Herodiasra dyaque ujeu bacuaire. Iyemerecara ebari tujatu acuaire. Jadya ama bucha patu Herodesra acuaire: “Eje bucha juyaju ni tuque iyema”. ²⁰ Herodestu bahuedya jucuaire Juan Ecuiteda Cuana Utsaquique tuyuque, tuque Yusuja inime eque aniyaque jadya. Inime tujatu tupucuaire “Yusura taa enerecaturau, era Juan iyemerehuaju”. Jadya tibudya tujatu etare apudaju ishamecuare jutidya. Eje uma cuautu etare apudaju jucuaire Juan tsehue quisarati, tura cuejayaque bacacara ebari aya tibu. Jadya ama buchatu bape bape inime tupu tsehue jutidya cuinana bahue jucuaire, inime cacuairetarama juya tibu. ²¹ Chamacamatu Herodiasra eje bucha iyemeree Juan aishuque emajaca dadicuaire. Cuinana huecaca camaratsurutiyaju Herodes chine caticuaire. Cuejamerecuaretu dutya huaraji inime metse cua-

naque. Sudaru cuana cuatsashaqui cuanaquetu cuejamerecuaredya. Tumebaedyatu Galilea yahua juque dutya inime metse cuanaque cuejamerebarecuaredya.

²² Tuna araarayajutu Herodiasja ebacujunaque dutya ihuarahua cuanaja yacuaju ijahue juishu nubiticuaire. Jadya tuque ijahue juyaju baatsutu Herodesra bijisericuare tuja ijahue, tumebaedy tuatsehue araaraya cuanara. Tuja yatuca eque dyaque jida baatsu tujatu epuna ehue ebari acuaire:

—Bacacue ique ai mira bijida bayaque. Etyaudya mique era. ²³ Yusura ique panerecatura, era mique tyaana ayaque tyayaque ama juatsu. Ique chipiriqui. Jetiamaja ecuari ique. Etyaudya mique ecue ai aniyaque patya jaque, mira bacayaque juatsu, —jadya pa tujatu epuna ehue ebari acuaire.

²⁴ Jadya ahuaaju tumeque epuna ehue ebari cuinanaquenacuare etare juque. Tume tujatu ecuaque bacaduraticuaire:

—¿Ai mira bacamerecara aya?

—Bacacue Juan Ecuiteda Cuana Utsaquija iyuca, iyuca camadya, —jadyatu ecuaquera acuaire.

²⁵ Tumetu epuna ehue ebari nubinatincuacuare ecuari Herodes queja.

—Iyemerecue Juan Ecuiteda Cuana Utsaquique. Pititubumeretsu tuja iyuca pejaju iyatsu ique inamerecue. Riyaque mique bacaya, —jadya tujatu acuaire.

²⁶ Jadya ahuaaju Herodes dyaque peya inime jucuaire. Jadya ama bucha tujatu eje bucha tyataqui ama amadya bacuaire, tura quisarati ahuaque tuatsehue chine juya cuanaja ijacaju jadya juhua tibu, “Yusura ique panerecatura, era tyaana ahuaque tyayaque ama juatsu”. ²⁷ Jadya tibudya tujatu cuatsashacuare tuja sudaru:

—Juan Ecuiteda Cuana Utsaquique pititubuticue. Pititubutitsu tuja iyuca beticue, —jadya tujatu acuaire.

²⁸ Jadya ahuaaju cuacuare etare apudaju. Cuaatsutu pititubuticuaire Juan. Tubutsutu Juanja iyuca pejaju iyatsu epuna ehue ebari tyaticuaire. Tura tyatihuaaju tujatu ecuaque inamereticuaire.

²⁹ Jadya juhuaque bahue juatsutu Juanra mepehua cuanara emajuque queticuaire. Dujutsu tuna ishaticuaire caniju.

(Herodesratu dutya tume cuanaque inime tupuqui acuaire. Jadya tibudya tujatu Jesús, Juan Ecuiteda Cuana Utsaquique chacha enetitsuranucaque bucha bacuaire.)

Jesúsra pishica pan, beta jae jadya umanashacuareque pishica mil ecuita cuana mihua ishucuarati

(Mt 14.13-21; Lc 9.10-17; Jn 6.1-14)

³⁰ Jidaque quisarati cuejara cuadishatanacuare cuanaque juetitsu tunajatu cuejaeticuaire Jesús tuna eje bucha jutihua cuanaque, dutya tunara bahuityatihua cuanaque jadya. ³¹ Tunara tuque tuna junenitichine cuanaque cuejayaque tsunumeetu ecuita cuana Jesús queja umae jutiya, diruya jadya jucuaire. Tuja, ni tura mepehua cuanaja jadyatu aijama emajaca jucuaire ni araara ishucuarati. Jadya tibudya tujatu ecana jadya acuaire:

—Necuara peya queja amaca ecuana taca jari. Ecastere micuana juneniyaque. Necanajaraticue jari tuhua, —jadya tujatu ecana acuare.

³² Jadya cacuejatitsu tuna cuacuare cuaba eque peya queja amaca ajetaya ama queja. ³³ Umada ecuita cuanara tuna badadicuare cuayaju. Adebadicuare tuna eju Jesús cuayaju. Tume tuna Jesús cuayaju badaditsu ecuita cuana dutya epuju cuanaque tsajabarecuare Jesús tura mepehua cuana tsehue cuaya queja. Baredadicuare tunara. Icueneta junati ecana jucuare.

³⁴ Cuaba juque cuinanayaratu Jesúsra bacuare jetiama ecuita tuque ihua juyaju. Jadya baatsu tujatu ecana nrecada banaticuare. Uhuisha cuana aija naruquima juneniyaque bucha tujatu ecana banaticuare. Jadya tibu tujatu ecana jetiama Yusuja quisarati cuejati-bunecuare.

³⁵ Amena ijete nubihuetu tura mepehua cuanara Jesús jipeticuare.

—Amena taa ri chinehua. Rehuari aijama ni eju buchique ara ishu cuanaque quemi ishuque. ³⁶ Isaracue ecuita cuana. Padiru ecana epu cuanaju, epu ashaasha cuana japadamaju. Pacabacatidiru ecana ara ishu cuanaque, —jadya tunajatu aticuare Jesús.

³⁷ —Cuadishaya ama tuna era. Micuanaradya ecana nemihuacue, —jadya tuna Jesúsra acuare.

—Ecuana dyadi taa ri aijama ecuita jetiamaja ara ishuque quemi ishuque. Jetiama taa tuque ecuana chipiru esareu, tuna tupu, dutya mihua ishu. Beta ciento ficha taa tuque ecuana esareu, peadya ecuita shucuta badi mere ejuuque etsujequi tupu, —jadya tunajatu acuare.

³⁸ —¿Eje uma pan jatsu ecana cabetihua? Nebacaduraticue, —jadya tuna Jesúsra acuare.

Bacaduratitsu tunajatu cuejaeticuare:

—Pishica pan, beta jae jadya piji camadya tunaja aniya.

³⁹ Tume tujatu ecuita cuana cuarequi cuarequi iyabutyamerecuare tuhua tuna netibareyaju cuitadya.

⁴⁰ Dutya ecuita cuana anibutecuare. Peadya cuareju cien, peya cuareju pishica tunca jadya tuna jetiama cuare anibutebarecuare. ⁴¹ Jadya juatsutu Jesúsra inaticuare pishica pan, beta jae jadya. Inatsu tujatu barepa Yusu aniya queja petacuare. Petayaquetu juacuare:

—Yusurupai mique aya, Tata, mira ecuana riyaque ara ishuque tyahua tibu, —jadya tujatu Yusu acuare.

Yusurupai au jadya aatsu tujatu pan cuana cuesibarecuare. Jadya aatsu tujatu tyabarecuare tura mepehua cuanaque, ecuita cuana tunaja tyabare ishu. Betaque jae umanashatsu tujatu ecana tyabarecuare.

⁴² Dutya tuhua jucuare cuanaque tuna araaruare, pana jeque juya tupu. ⁴³ Jadya juhuajutu Jesúsra mepehua cuanara jequeshabarecuare peadya tunca beta earacana jiti arida cuanaque pan tunara arabishahua cuana tsehue, jae jadya tsehue. ⁴⁴ Jetieque ama tuna araaruare. Pishica mil deca cuana tuna araaruare; epuna cuana, ebacua piji cuana jadya piyebamaque.

Jesús ena dyaque eque ajecuareque

(Mt 14.22-33; Jn 6.16-21)

⁴⁵ Tumetu Jesúsra tura mepehua cuanaque jadya acuare:

—Neanibuteque cuabaju. Necarequetique bei yueque macare epu Betsaida bacaniju. Tumidya micuana adadiya ecuita cuana isaratsu, —jadya tujatu ecana acuare.

⁴⁶ Amena ecuita cuana cuadisha ishu isaratsutu Jesús tsuracuare emata baruda cuita amaju Yusu tsehue quisarati ishu. ⁴⁷ Cuaba tsehue cuahua cuanaque tuna bei patya patya apunacuare. Jesús camadyatu jucuare uhaju. ⁴⁸ Japada equera tuna Jesúsra bacuare masada nrecada tsehue tarutaruyaju cuejijira acuatsumaya tibu. Amena huecaca japadama tacure quique pidya juhuaju tuna Jesúsra jipedirunacuare, ena dyaque eque ajeajeyara. Baredirucara datse tujatu ecana acuare. ⁴⁹ Jesús ena dyaque eque ajeajeyaju baatsu tuna quiquecuare:

—Ita nebacue! Yatanana tume! —jadya tuna quique eque jucuare.

⁵⁰ Dutyara tunajatu bape inime tillaqui jadya acuare, ena dyaque eque ajeya baatsu. Jadya juyaju tuna Jesúsra isaracuare:

—Bajida nejuume! Idya ique! Casada nejuque! —jadya tujatu ecana acuare.

⁵¹ Tumetu tsuracuare tuna queja cuabaju. Tuque cuabaju tsurahuaju cuitatu amena cuejiji neticuare. Jadya baatsutu tura mepehua cuanaque anajacat-acuare. ⁵² Tunaratu adebacuare ama jari tuja casa aniyaque, arepa tura pan, jae jadya jetiama ecuitaja ishu tupu amerehuaque bahua ama bucha. Adebataqui ama jari tuna bacuare Jesús aique.

Jesúsra ujejeda cuanaque Genesaretju chachanecuareque

(Mt 14.34-36)

⁵³ Bei riquetsu tunajatu Genesaret yahuaju jaratsuranatitsu cuaba risinaticuare. ⁵⁴ Muya jutidya, tuna cuaba juque cuinanayajutu tuhua aniya cuanara Jesús adebatsa piisi acuare. ⁵⁵ Masadama tunajatu tsapecuare quisarati tuque junatihuaque. Dutya jujeri tuhua cuanaque tuna bahue jucuare. Jesús, tura mepehua cuanaque jadya tuna epu epu cuanaju junenicuare. Jesús tunaja epuju junatihuaque bahue juatsutu tuhua cuanara dujubarecuare ebadequi cuanaju ujejeda cuanaque tuaqueja. ⁵⁶ Eju tuque junatiyaju epu achacha cuanaju, epu arida cuanaju, tee cuanaju aniya cuanara jadya tunajatu cuinanashabarecuare edijiju ujejeda cuanaque. Canerecaticuare tuna tuaqueja:

—Cajabamereticue taa ujejeda cuana queja micue una cuatsa cuana pijidya jutidya, tuna chacha juishu, —jadya tunajatu Jesús acuare.

Dutya ejuque tuja una jabaqui jucuare cuanaque tuna pana chacha jubarecuare.

**Baba cuanaja bahue eque ama ecuana jutaquique,
Yusuja inime eque**
(Mt 15.1-20)

7 Umae fariseo cuana, cacuatsashati bahuityaqui cuanaque jadya tuna juticuare Jerusalén juque. Junatitsu tunajatu Jesús jipeticuare. ² Tuhuadya tunajatu bacuare Jesúsra mepehua cuanaque tunaja bahue ama juyaju emetucu cutsatimaque araarayaju. ³ Dutya ecuanaja ata cuana, fariseo cuana neri neri, ecuanaja baba cuanaja bahue eque tuna anijacaya ama. Araaraya ama tuna tunaja bahue emetucu cutsatimaque. ⁴ Mercadoju quemihuaque arama jarique tunajatu utsajacama aya tunaja bahue. Tumebaedya canecu cuana, ena iyaqui arida cuanaque, equiniqui metal cuana tunajatu utsa bahue tunaja bahue. Tumebaedya tuna cutsati bahue etahuiqui cuana. Dutya ecuanaja baba cuanaja bahue tunajatu ajacaya ama. Jadya tuna juya, jadya jujacatsu Yusu cahuaishaya bucha cabatitsu. ⁵ Jesúsja cuanaque cutsatima araarayaju baatsutu fariseo cuana, cacuatsashati bahuityaqui cuanaque jadya quisaraticuare: —Mira mepehua cuanaquetu ecuanaja baba cuanaja bahue eque ama juya. Araara ishutu micue cuanaque emetucu cutsatiya ama ecuanaja bahue eque Yusu cahuaishaya ishu ama. ¿Eje bucha juatsu? —jadya tunajatu Jesús acuire.

⁶ Tura tuna quemitsacuare:

—Yusu adebaquipa ejuu, jadya micuana juya, ai yuneri ama. Isaías Yusu equeque quisarati cuejaquiratu micuana jadya ayaque huenecuare jadya: “Riyaque ecuita cuanara muiya tunaja quisarati tsehue camadya.

Jadya ama bucha tuna eje bucha juya eque ejitaju ecue cuanaque ama.

⁷ Yana cana cuita tunara tunaja bahue cuana eque muiya.

Tunara bahuityayaquetu ecuita cuanara inime tupuyaquedyata jutidya”, jadyatu Yusu jucuire Isaías eque.

⁸ “Micuana micuana Yusura cuatsashaya eque anijacahua, ecuita cuanara cuatsashaya eque ani ishu.

⁹ “Micuanaratu dyaque ijacabacaya ecuanaja baba cuanara cuejehua cuanaque, Yusura cuejayaque eba-cauque. ¹⁰ Moisés equetu Yusura cuatsashacuare béru: “Muibacue micue tata, micue cuaa jadya”. Tumebaedyatu jucuire: “Paiyetana ejeque etataqueja ishu, ecuaqueja ishu jidama quisarati ayaque”. ¹¹ Micuanaratu cuarehua riyaque cacuatsashati. Tume micuana, micuanaja tata nrecada cuanara catsahuamereti ishu bacayaju, jubahue: “Tahuataqui ama mique ecue, amena ecue dutya ai aniyaque Yusu etya tibu”.

¹³ Jadya apupashae tuque micuana Yusura cuatsashahuaque aya, micuana cuejatahua cuana equedyata jutidya juishu. Micuana camadya ama micuana jadya juya. Tumebaedya micuana peya cuana casada tsehue amereya micuana juya bae. Umada ecuita cuanaja

bahue cuanaque micuana ajacaya ama, —jadya tuna Jesúsra acuire.

¹⁴ Tumetu Jesúsra ihuaracuare ecuita cuana tuhua ejeuma netiya cuanaque. Tume tujatu ecana acuire:

—Nebacacue ique dutyara. Pana ijacabaca neacue.

¹⁵ Ni ai buchique micuanara arayara micuana cajuchatishaya ama. Micuanaja ducuta inime jidamaque cuinanayaratu Yusu cahuaishaya. ¹⁶ Micuana quijacabacati aqui juatsu, nebacacue, —jadya tujatu ecana acuire:

¹⁷ Jadya isara aatsutu Jesúsra ecuita cuana isaraque-nacuare. Nubidirucuretu etare ducu. Amena tuque etareju nubidiruhajutu tura mepehua cuanara bacaduracuare:

—¿Eje buchique tu tumeque mira ecuita cuana bahuityahuaque? —jadya tunajatu acuire.

¹⁸ —Arepa micuana eatsehue juneniya ama bucha, tuque micuana adebaya ama jari micuana era eje buchique bahuityacara ayaque. Ni ejeque earaquira micuana cajuchatishaya ama. ¹⁹ Arayaquetu ecare canijudya judiruya. Tuhuaquedyatu cuinanaya. Ni eje tuputu nubiyata ama ecuanaja inime Yusu adebaquiju. Jadya tibudya ecuana, ecuanara arayara cajuchatishaya ama, —jadya tujatu ecana acuire.

Jadya cuejae aatsu tuna Jesúsra huecashacara acuire. Aijamatu ejeque earaqui arataquimaque.

²⁰ Jesusratu tuja cuanaque isaranucacuare:

—Educu juquetu ecuitaja juetiya cajuchati ishuque.

²¹ Iyuca juquetu jidamaque aishuque bijiseri juetiya.

Tuhuaquedyatu jidamaque aishuque inime tupu juetiya, eje tsehuedya jutidya decadeca, puna puna jadique bijiseri, chiri jucaraque, peya iyecaraque, ²² peya tsehue ecaquemitique jaraquerecaraque, tuja ishu cuita camadya ai umada aniajecaraque, dutya ai jidamaquedyata jutidya acaraque, peya ijahue acaraque, ai ajaca baecuaque acaraque, peya jaque metsene ishu bijiseri, peyaja ishu jidama quisaraticaraque, dyaque inime metse jucaraque. Tuhuaquedyatu aishuque ama inime cuinanaya. ²³ Dutya riya cuanaque acarquetu educu juque cuinanaya. Dutya riya cuanaratu ecuita cajuchatishaya. Yusuratu asicabaya riya cuanaque.

Epuna israelitaque ama Jesús queja catyaticuareque
(Mt 15.21-28)

²⁴ Jesússtu cuanucacuare tuhuaque. Tumetu cuacuare Tiro queja amaca. Epuju junatitsutu etareju nubicuare. Tumeque etareju etehua junati datse jucara jucuire. Eje bucha etehua junatitaqui ama tu jucuire. ²⁵ Anciuaretu tumeque epuju peadya epunaja ebacujunaque ijahua cuanara quijahuatishayaque. Bahuetu jucuire epuna Jesús junatihuaque. Bahue juatsutu yume cuau cuitadya Jesús queja jucuire. Junatitsutu Jesúsja yacuaju nuyunaticuare. ²⁶ Tumeque epunatu israelita ama jucuire. Sirofenicia yahuaju ecuinanaque patu jucuire. Jesúsja yacuaju nuyutsutu canerecaticuare:

—Ique Cuatsashaquique, nrecabacue ique. Ijehuecuinacue ijahua cuana ecue ebacujuna juque, —jadyatu epunara aticuare Jesús.

²⁷ —Icuene tuque ecue israelita cuana tsahuataqui. Aijama jari tuque ecue emajaca ecue ata ama cuanaque tsahua ishu. Adebayami quisarati: “Jidama tu ebacua cuana earaqui secatsu chapa cuana tyau” jadique, —jadyatu Jesúsra acuare.

²⁸ Epunaratu quemitsacuare:

—Jejee, Ique Cuatsashaquique. Jadya ama buchatu chapa cuanara enimetsequeja ebacua cuanaquera mesa emaque pacacashaya cuanaque arayadya, —jadyatu acuare epunara.

²⁹ —Jidadya mira quemitsahua. Jadya caquemitsati juatsumi ejitajudya juhua era micue bacujuna juque ijahua cuana eijehuecuinauque, pana ejene ayaque. Jida dirucue. Micue etareju judirutsu tuque mira micue bacujuna ijahua cuanara jacahuaju badiruya. Ijehuecuinattillahua tuja tuque ijahua cuana, —jadyatu Jesúsra acuare.

³⁰ Jadya ahuajutu epuna dirunucacuare tuja etareju. Etareju judirutsu tujatu ebacujunaque badirucua amena quijahuatijacahuaju. Dyaque jida inime tsape-matu tuja etahuiquiju jaracuare, ijahua cuanara amena jacahua tibu.

Jesúsra isahueque, quisarti baecuaque jadique quijacabacatisha, quisaratisha jadya acuareque

³¹ Tiro juque cuinanatsutu Jesús Galilea beiju judirunucacuare. Sidón yahua, Peadya Tunca Epu Ebari Cuana equetu cueticuare. ³² Tuhuadyatu ecuita cuanara tuaqueja dujucuaque ecuita isahueque, quisarati baecuaque jadya. Tuaqueja dujutsu tunajatu isaracuare Jesús:

—Nrecabacue ecua. Jabacue riyaque ecuita, tuja ijaca pacashatana ishu, quisarati ishu, —jadya tunajatu acuare.

³³ Jesusratu dujucuaque peya queja amaca, ecuita cuana riya piji jacamere ishu. Tuhua dujutsu tujatu emetucu sapara huicuabu ecatsé beta eque amaca ijaca caniju ishacuare. Tuequedya tujatu emetucu sapara tuja ijaca cani juque yume quemi acuare. Emetucu sapara huicuabu tujatu ecuedi iyacuare. Jadya aatsu tujatu pepacuare ujejedaja yanaju. ³⁴ Jadya aatsu tujatu petacuare barepa. Canajeti ebari juatsutu jadya jucuaque:

—¡Efata! (“Pacashatanacue ijaca cani ecatsé” jadique.)

³⁵ Jadya ayaju cuitadyatu ecuita jida quijacabacati, quisarati jadya jucuaque. ³⁶ Jesusratu ecuita cuana acuare:

—Cueja cueja ecana neaume, —jadya tuna Jesúsra acuare.

Jadya ama bucha tuna quisarati tsapecuare. ³⁷ Jesúsra quisarati baecuaque, isahueque jadique quijacabacatisha, quisaratisha jadya ahuaque bacatsaqui jucuaque cuanaque tuna anajacatacuare.

—¡Dutyatu jida aya! Isahue cuanaquetu jida quijacabacatishaya. Quisarati baecua cuanaquetu quisaratishaya, —jadya tuna jucuaque.

Jesúsra pushi mil ecuita pacarucu pan, eje uma jae piji jadya umanashatsu mihuacuareque

(Mt 15.32-39)

8 Eje uma huecaca ama jadya juchineque cuetihua-jutu ecuita jetiamaque cuanucacuare Jesúsra cuejayaque bacara. Tuna aracara juyaque adebatsutu Jesúsra tura mepehua cuanaque ihuaracuare.

² —Nrecada taa rique ecuita cuana arama baatsu baya, riya barepa tibene equeque taa rena ique ijacabaca juyaque. Amena taa renajari aijama ara ishuque. ³ Cuidishacarama taa rena aramaque aya tunaja etare cuanaju. Edijiju taa rena emajudiruu. Umae taa ri japada aniya cuanaque, —jadya tuna Jesúsra acuare.

⁴ —¿Eje bucha dadie jatsu tuque ecua eua earaqui ecuita jetiamaja ishu, rehua ni ejeque buchique anitaya amaju? —jadya tunajatu acuare.

⁵ Jesúsra tuna bacaduracuare:

—¿Eje uma pan micuanaja aniya?

—Pacarucu piji camadya, —jadya tunajatu acuare.

⁶ Tuequedya tujatu iyabutyamerecuare ecuita cuana. Yahuaju iyabutyameretsu tujatu inacuare pacarucu pan. Pan inatsutu jucuaque:

—Yusurupai mique aya, Tata, mira ecua riyaque earaqui tyahua tibu, —jadya tujatu Yusu acuare.

Yusurupai aatsu tujatu pan cuesibarecuare. Cuesibaretsu umanashatsu tujatu pan tyabarecuare tura mepehua cuanaque. Tyahuaju tunajatu tyabarecuare ecuita cuana. ⁷ Tumebaedya tunaja anicuare eje uma cuana jae. Jesúsra quisaratinucacuare Yusu tsehue:

—Yusurupai mique aya, riyaque jae cuana mira ecua- na tyahua tibu, —jadya tujatu Yusu acuare.

Yusurupai au jadya aatsu tujatu ecana acuare:

—Netyabarecuare ecuita cuana, —jadya tujatu acuare tura mepehua cuanaque.

Jadya aatsu tujatu jae umanashacuare. ⁸ Dutya tuhua jucuaque cuanaque tuna araaracuare jequeya tupu.

Araara amena juatsutu tura mepehua cuanara jeque-shabarecuare pacarucu jiti arida cuanaque pan cuesi cuana anidadihua tsehue. ⁹ Jetieque ama tuna araaracuare. Pushi mil deca cuana tuna araaracuare. Jadya juatsutu Jesúsra ecuita cuana amena isaracuare.

¹⁰ Tuna isaratsutu anibutedirucuaque cuabaju, tura mepehua cuana tsehue. Anibutetsu tuna cuacuare Dalmanuta bacani yahuaju.

Fariseo cuanara Jesúsra ai ejeque ecuitaja ataquique ama amerecara acuareque

(Mt 16.1-4; Lc 12.54-56)

¹¹ Umae fariseo cuanatu Jesús queja juticuare. Cati-buticuare ecana Jesús tsehue caquemitsati caquemitsati. Sarecuare tunajatu eje bucha eque jidama aishu. Tume tunajatu Jesús acuare:

—Acue ecuanaja yatucaju ai bapeque inimeradya jutidya, ecuana mique Yusura cuadishahuaque bahue juishu, —jadya tunajatu acuare, arepa tuna tuque Yusu equeque junahuaque ejenecarama acuare ama bucha.

¹² Jesústu ducuta peya inime jucuare, tuna tuaqueja catyaticarama juya baatsu.

—“Acue ai inimeradya jutidya, ecuana mique Yusura cuadishahuaque bahue juishu”, jadya micuanara aya. Aya ama tuque era, ni aidya jutidya, —jadya tuna Jesúsra acuare.

¹³ Jadya isarae aatsu tujatu ecana shanaquenacuare. Yudijidya anibutedirunucatu jucuare cuabaju. Carequeticuare ecana bei yueque macare.

Fariso cuanara bahuityacuareque tu levadura buchique (Mt 16.5-12)

¹⁴ Jesúsra mepehua cuanaque tuna cuayaque pan umada cadujuti ishü nime aputacuare. Peadya pan piji camadya tuna cadujuticuare. ¹⁵ Jesúsra tuna isaracuare:

—Neijacabacacue. Necanaruticue bacue fariseo cuanaja, Herodesja jadya levadura tsehue, —jadya tuna Jesúsra acuare.

¹⁶ Tunaratu adebacuare ama tura eje buchique jadya ayaque. Jadya tibu tuna, tuna cama quisaraticuare:

—Ecuana pan umadama cabetihua baatsu tura ecuanaja jadya quisarati tsehue aya, —jadya tuna, tuna cama jucuare.

¹⁷ Jesusratu adebacuaredya tuna cabacadurati-bareyaque.

—¿Eje bucha juatsu micuana, pan umadama cabetihua ju cuana era nereda aya bucha cabatiya? [Adebaya ama jaridya ni taa tuque micuana era bahuityayaque! [Adebaya ama jari tuque micuana era micuanara ai sareyaque etyauque! Micuanara ecue quisarati bijidamadurhua bucha tuque. ¹⁸ Micuanaja yatuca tsehuedya tuque micuana bahua micuana era casa bamere ishü ahuaque. Micuanaja ijaca tsehuedya tuque micuana bacahua era bahuityahuaque. Neadebacue era jetiamaque mihuachineque. ¹⁹ Pishica pan era pishica mil ecuitaja ishü tupu amerechine patya, ¿eje uma jiti tuque micuana jequeshachine pan arabishahua cuana tsehue? —jadya tujatu ecana acuare.

—Peadya tunca beta earacana jiti, —jadya tunajatu quemitsacuare.

²⁰ —Pacarucu pan umanashatsu era pushi mil ecuita aramerechineque, ¿eje uma jiti tuque micuana jequeshachine anidadichine cuana tsehue?

—Pacarucu jiti, —jadya tunajatu quemitsacuare.

²¹ —Arepa micuana era achineque bahua ama bucha taa micuana adebaya ama jari micuanara ai sareyaque tyaisü ecue casa aniyaque, —jadya tujatu ecana acuare.

Jesúsra shuhuique Betsaidaju capetashacuareque

²² Tuequedya tuna junaticuare Betsaidaju. Junatihua-jutu tuhua cuanara dujucuare Jesús queja ecuita shuhuique. Canerecaticuare tuna tuaqueja:

—Nerecabacue ecuana. Jabacue riyaque shuhuique tuque capetati ishü, —jadya tunajatu Jesús acuare.

²³ Jadya ayaju tujatu inacuare emetucuju shuhuique. Inatsu tujatu cuinanaquerecuare epu juque. Cuinanaqueretsu tujatu ecuedi tsehue pepacuare yatucaju. Jadya au jadya aatsu tujatu yatucaju emetucu tsehue jabacuare. Jabatsu tujatu bacaduracuare:

—¿Are capetatiyadya mique?

²⁴ Ecuitaratu petatsu jadya acuare:

—Jejee, amena tuque bayadya riya piji. Baya tuque ecuita cuana. Juneniyaju tuna baya. Jadya ama bucha tuna cueyane jida cuita ama aya. Acui cuana bucha jutidya tuna baya, —jadya tujatu acuare.

²⁵ Tumetu Jesúsra yudijidya jaba anucacuare yatucaju. Jabanucahuajutu ecuita amena jida capetaticuare. Dutyadyatu jida pana cueyane acuare. ²⁶ Tumetu Jesúsra jadya acuare:

—Tuyu diru jucue micue etareju. Epuju yudijidya dirunuca juume, —jadyatu acuare Jesúsra.

Pedroro “Jesús tu Mesías Yusuja Emepeque” cuejacuareque

(Mt 16.13-20; Lc 9.18-21)

²⁷ Jadya juatsutu Jesús cuacuare tura mepehua cuana tsehue Cesarea Filipino epu ebari japadama anitaya cuana queja. Edijiju tujatu ecana bacaduranaticuare:

—¿Eje buchatu ecuita cuanara ecue ishü inime tupuya? ¿Ai jadya tunara aya? —jadya tujatu ecana anaticuare.

²⁸ Tunaratu quemitsacuare:

—Umae cuanarami aya Juan Ecuita Cuana Utsaquique emajuque enetitsuranucaque jadya. Peya cuanarami Elías jadya aya. Peya cuanara bacuemi aya beru Yusu equeque quisarati cuejaquique emajuque enetitsuranucaque jadya, —jadya tunajatu acuare.

²⁹ —¿Micuanara bacue, ique ai jadya aya? —jadya tujatu ecana acuare.

—Miquemi Mesías, Yusuja Emepeque, —jadyatu Pedroro quemitsacuare.

³⁰ —Necuejaume jari ni ejeque buchique ique Mesiasque, —jadya tuna Jesúsra acuare.

Jesús eje bucha iyetanadadie juyaque cacuejaticuareque

(Mt 16.21-28; Lc 9.22-27)

³¹ Tumeque huecaca equetu Jesús cacuejatitibunecuare tura mepehua cuanaque tuque eje bucha judadiyaque.

—IQUE ECUITA dyaque canerecatitaqui. Emuiba cuanara, pae cuanaja huaraji cuanara, cacuatsashati bahuityaqui cuanara jadya dyaque nerecaturadadiya. Iyemeradadiya tunara ique. Quimisha huecaca juatsu

netitsuranucaya, —jadya tujatu ecana cuejati-bunecuare.

³² Pana ejitaju tujatu ecana bahue amerecuare tuque iyetanadadiyaque. Pedroratu ejeneacuare ama Yusuja Emepeque jadya ejudadiuque. Jadya tibudya tujatu peya queja ihuara acuare. Tuna peya queja jacamersu piji tujatu Jesús nereda atibunecuare:

—Jadya quisarati aume. ¿Arequemi jadya ejudadiu ama! —jadya tujatu aticuare.

³³ Jesús tura mepehua cuanaque. Tume tujatu Pedro nereda acuare:

—Satanástu mique eque quisaratiya. Maju aqui cuana jaque jutidya tuquemi inime tupuya, Yusu jaque ama. Bacacarama tuque aya mique eque Satanás ama amara cuejayaque, —jadyatu Jesúsra Pedro aticuare.

³⁴ Tuequedyatu Jesúsra isaranucacuare tura mepehua cuanaque, ecuita cuana jadya:

—Micuana eatsehue junenicara juyaque juatsu, era cuatsashaya eque neanicue, micuanaja biji eque juneniyaque nime aputatsu, arepa micuana canerecati, maju jadya jutaqui ama bucha, curusuju etata ejuu bucha. ³⁵ Micuana ni catehuatiya eaqueja ecatyatique eiyetauju, ejetsunue ama micuana anibuque. Tume micuana majubuque ni eje tupu Yusu queja judiru ishú ama. Micuana ni eaqueja catyatihua baatsu iyetaya, Yusuja quisarati ejenehua baatsu ni micuana iyetaya, Yusu tsehue micuana anisiribuque, arepa micuanaja ecuita ririya ama bucha. ³⁶ Ecuita ni ijahuaja etiquiju judiribuque, ni aishu buchique tujatu jida juhua ama riyaque yahuaju tuja dutya ai anihuaque. Ni aishu buchique tu jida ama dyaque chipiruda juishu, majudaditsu dutyadya shanadadiya tibu. ³⁷ Aijamatu ni ai buchique micuanara maju ishú ama etsujetyauque. ³⁸ Iyacia riyaque yahuajutu aniya ecue ama cuanaja yacuaju ique eje buchique quisarati aishu bisuya cuanaque. Tunajatu bisu aniya ecue quisarati cueja ishú. Ejeque huecaca IQUE ECUITA junanucabuque. Barepaju Yusu tsahuajutu cuanara tajibeque. Ique junanucayajutu dutyara babuque ecue Etataja casa. Bisunabuquedy a ique tume ecue ishú bisuhua cuana tsehue.

⁹ Pusha amadya micuana cuejaya. Umae micuana rehua majuhuishaya ama, dutya era ecue casa tsehue narutibuneyaque badadiya tupu, —jadya tujatu ecana acuare.

Jesús cabapeticuareque

(Mt 17.1-13; Lc 9.28-36)

² Shucuta huecaca juatsutu Jesúsra dujuacuare emata barudaju Pedro, Santiago, Juan jadya. (Juan tu Santiago tsehuequique juacuare.) Tuhuadyatu tunara petayaju cabapeticuare. ³ Tuja unatu pajada, huecada dyaque tiquida juacuare. Ni ejeradya jutidyatu riyaque yahua juque ai utsatsu jadya pajae eamereu. ⁴ Masadaque amatu Moisés yanume, Elías yanume jadya ejitaju juacuare. Tume tatse Jesús tsehue quisaratinacuare. Tuat-

sehue cuacuare cuanaratu bacacuare quisaratiyaju.

⁵ Jadya bacatsutu Pedroru Jesús acuare:

—Ecuana Bahuityaquique, dyaque jida taa ecuana rehua. Eau tuque ecuana quimisha erere, peadya micue ishú, peya Moisésja ishú, peya bacue Elíasja ishú, —jadya tujatu acuare.

⁶ Tuque, tuja ecare ecatsé jadya tuna dyaque ejecutana juacuare. Jadya tibudyatu tuque ai quisarati ataqui ama juacuare. ⁷ Tumetu barepa juque huanira dunutilacuare. Tume tunajatu bacacuare huani ducuque Yusu jadya quisaratiyaju:

—Riyaque rique ecue ebacua dyaque iyuhuedaque. Nebacajacaume. Eje bucha tura cuejaya eque nejuque, —jadya tuna Yusura acuare.

⁸ Jadya bacatsutu quimisha, Jesús tsehue cuacuare cuanara bajiyucuare. Bajiyunucatsu tunajatu banucacuare ama Moisés, Elías jadya, Jesús camadya.

⁹ Emata juque butejeyara tuna Jesúsra cuatsashacuare:

—Necuejahuishaume jari ni ejeque buchique micuanara eje bucha bahuaque. IQUE ECUITA majuhuaque, chacha netitsuranucahuaju piisi ecana necuejacue, —jadya tuna Jesúsra acuare.

¹⁰ Tura cuejahu equedy a tuna juacuare. Jadya ama bucha tuna tuna cama cabacaduratitibunecuare:

—¿Eje buchiquetu “Ique majuhuaque, chacha netitsuranucaya” jadique? —jadya tuna cabacaduratiajuacuare.

¹¹ Tume tunajatu bacaduracuare Jesús:

—¿Eje bucha juatsutu cacuatsashati bahuityaqui cuanara Elíasja icuene junabuque, Mesías junama jariju, jadya aya? —jadya tunajatu bacaduracuare.

¹² Tura tuna quemitsacuare:

—Tunara bahuityayaquetu yuneridya. Eliastu icuene junabuque. Turadyatu dutya bajejenabuque. Tumebaedyatu ehue Yusuja quisarati. ECUITAtu ijahue ijahue atabuque. Pana bijidamadura tunajatu abuque. Yusuja Emepeque eadebau bucha adebae ama tunajatu abuque. ¹³ Pusha amadya micuana cuejaya. Elías buchiquetu amena junahuadya. Eijacabacauque, tunajatu ijahue ijahue acuare, tunara acara aya eque. Judadihuatu Yusuja quisarati icueneta huene ea bae cuitadya, —jadya tujatu ecana acuare.

Jesúsra ebacua piji ijahua cuanara quijahuatishayaque quijahuatishajacacuareque

(Mt 17.14-21; Lc 9.37-43)

¹⁴ Jesúsra, emata tuatsehue juque buteetibeya cuanara tunajatu bacuare ecuita jetiera ama peya cuana dunuyaju. Tuhuadyatu juacuare cacuatsashati bahuityaqui cuanaque Jesúsja cuana tsehue caquemitsati caquemitsati juyaque. ¹⁵ Riya batsa cuita tunajatu Jesús judiruyaju acuare. Batsatsu tunajatu anajacata ishú acuare, tunara emataju jari bucha baya tibu. Batsatsu tuna tuaqueja tsajajabare juacuare tuque isarara.

¹⁶ Jesusratu isaratsacuare tura mepehua cuanaque:

—¿Ai micuana caquemitsati caquemitsati juya tuna tsehue? —jadya tujatu ecana acuare.

¹⁷ Peadya tuhua jucuareratu quemitsacuare:

—Behua rique ecue ebacua miaqueja. Ijahua cuanarari quijahuatishaya. Jadya tiburi quisarati baecua.

¹⁸ Ejudya jutidya juneniyajutu ijahuara ecue ebacua yahua catsaqui amereya. Jadya juyaque tujatu cuinanaya uba jasa yatsanaca eque. Etse tari jadya tujatu amereya. Dutya ecuita tujatu temutsuya. Canerecatihua datse ique mira mepehua cuana queja ijahua ijehuecuinamere ishu datse. Arepa ijehuecuinacara aya ama bucha, tuna ijehuecuinataquima bahua, —jadyatu ebacua pijija etataquera Jesús acuare.

¹⁹ Jadya bacatsutu Jesúsra acuare tuhua jucuare cuanaque:

—[Micuana micuana quejeneti baecua! Arepa micuana era ayaju bahua ama bucha, adebaya ama jaridya tuque micuana Yusuja casa. ¿Eje tupu cuita micuana eiduu? ¿Micuanara adebaya tupu ni taa? Nebecue requeja tumeque ebacua piji, —jadya tujatu ecana acuare.

²⁰ Jadya ahuaju tunajatu becuare. Behuajutu ijahuara, Jesús baatsu, manu amerenuacuare ebacua piji. Tume tujatu yahua catsaqui amerenuacuare. Tipiru tipiru, yatsanaca eque ubajasa jadya tujatu amerenuacuare. ²¹ Tumetu Jesúsra bacaduracuare ebacua pijija etataque:

—¿Eje tupuri jadya catibuticuare?

—Nanada equeque cuitadya. ²² Eje uma ijehue cuanatu ijahuara aya etiquiju, enaju jadya iyecara aatsu. Nerecabacue yatse. Tsahuacue yatse, micue casa aniyaque juatsu, —jadya tujatu Jesús acuare.

²³ —¿Eje bucha juatsu jatsu mira “micue casa aniyaque juatsu” jadya aya? Ecue ishutu dutya ai ataque. Ejera Yusura casa tyahuaque ejeneyaratu eau dutya, —jadyatu Jesúsra acuare ecuita.

²⁴ Tumetu ebacua pijija etataquera pana ejitaju quisarati acuare:

—Riya pijidya tuque ejeneya mira ecue ebacua juque ijahua cuana eijehuecuinauque. Tsahuacue ique; pana ejene paa mira jadya ayaque, —jadya tujatu acuare.

²⁵ Amena Jesúsra umada ecuita cuana caradatiyaju baatsu tujatu nereda acuare tumeque ijahua ebacua piji yuamaturaqui juyaque:

—Cuinanacue riyaque ebacua piji quejaque, ijahua quisarati baecua, isahue ijacama jadya amerequique. Cuinanatsu dirucue; ni eje tupumi tuaqueja nubinucaya ama, —jadya tujatu acuare ijahua.

²⁶ Jadya ayajutu ijahua quiqueterequenacuare. Manu tujatu ebacua piji amerequenacuare. Jadya aatsutu cuinanacuare. Cuinanatsutu shanacuare ebacua piji emaju bucha.

—[Majuhua tuque! —jadyatu umae jucuare ebacua piji yahujaju jujaraya baatsu.

²⁷ Jesusratu emetucuju inatsu nityatsuracuare. Tume-tu ebacua piji netitsuracuare.

²⁸ Jadya aatsutu Jesús nubicuare etareju, tura mepehua cuana tsehue. Jesús tsehue camadya cabatitsu tunajatu bacaduracuare:

—¿Eje bucha juatsu tuque ecuana ijehuecuinataqui ama bahua tumeque ijahua ebacua piji yuamaturaque? —jadya tunajatu bacaduracuare.

²⁹ —Ijehuecuinataqui ama tuque micuana tumeque ijahua bahua, Yusu tuja casa jadya aishu bacahua ama tibu. Aijamatu peya eje bucha eque cuinanasha ishuque, —jadya tujatu ecana acuare.

Jesús eje bucha iyetanadadie juyaque cacuejatinucacuareque

(Mt 17.22-23; Lc 9.43-45)

³⁰ Tuhuaque cuinanatsu tuna cueticuare Galilea yahua eque. Jesusratu ecuita cuana tuque ejuque bahue amerecarama acuare. ³¹ Emajaca tujatu tura mepehua cuanaque bahuitya ishu anicara jucuare. Ni aija perema tujatu ecana bahuityacara acuare.

—Ejera cuana tsetatsu inameredadiya IQUE ECUITA. Inameretsu tura ique iyecara juya cuana queja iyemeredadiyadya. Iyedadiya tunara ique. Iyehujaju quimisha huecaca juatsu netitsuranucaya, —jadyatu cacuejaticuare.

³² Adebacuare ama tunajatu tura cuejayaque. Bacaduracarama tunajatu acuare tura eje buchique jadya ayaque, adebataqui ama baatsu bacadurayaju nereda eau bucha caadebatitsu.

¿Ejeque tu dyaque inime metseque?

(Mt 18.1-5; Lc 9.46-48)

³³ Tuequedya tuna junaticuare Capernaum epu ebariju. Etareju junatitsu tuna Jesúsra bacaduranaticuare:

—¿Ai tuque micuana caquemitsati caquemitsati ishu abeabehua edijiju jeyaque?

Jadya tujatu ecana bacaduracuare, arepa tuque tunara eje buchique quisarati ahuaque bahue jucuare ama bucha. ³⁴ Tuna tuna anama cuitadya jucuare. Bisucuare tuna, tuque quemitsa ishu, tura mepehua cuanaque ecana ejequepa ecana dyaque inime metseque jadya juatsu caquemitsatihua tibu. ³⁵ Anibutetsutu Jesúsra acuare tura mepehua cuanaque:

—Nejecue. Nejipenacue ique. Micuana ni emuita jucara juya, dyaque jetiedyaque bucha necabamereticue. Camereti arida ejuuque, nemerecue jutidya peya cuana, —jadya tujatu ecana acuare.

³⁶ Jadya juatsu tujatu ihuaracuare ebacua piji tuhua netiya baatsu. Ihuaratsu tujatu tuna patya nityacuare. Ebacua pijija yaracacaju tujatu ebi ecatse huanacuare.

³⁷ —Micuanara ni ecue cuanaque jida tsehue batsaya, arepa tuna riyaque ebacua piji bucha paju ama bucha, idya datse micuanara jida tsehue batsaya. Micuanara ni ique jida tsehue batsaya, tume tuque micuana ecue Etata Ique Cuadishaquique jidadya batsaya, —jadya tujatu ecana acuare.

Yusuja cuanaque tuque ecuanaja bijidamadurataqui ama, arepa ecuana tsehueque ama paju ama bucha

(Mt 10.42; Lc 9.49-50)

³⁸ Juantu quisaraticuare Jesús tsehue:

—Ecuana Bahuityaquique, ecuana micue quisarati cuejara cuachine patya, tuque ecuana bachine ejeque cuana ijahua cuana micue ebacaniju ijehuecuina juyaju. Jadya baatsu tuque ecuana achine: “Jesúsja ebacaniju rique ijahua ijehuecuinaya’ jadya ajacacue, ai mi Jesúsra mepehuaque batu”, —jadyatu Juanra Jesús acuare.

³⁹ Jadya ahuajutu Jesúsra acuare:

—Jadya neaume. Ejera yuneridya ecue ebacaniju aya ejeque ecuitaja ataquique ama; tumequetu ecue ishü jidama quisaratinime ama. ⁴⁰ Ecuana iyuhueda baquira ecuana ujeu baya ama. ⁴¹ Pusha amadya micuana cuejaya. Yusuratu jidaque tyabuque ecue cuanaque tsahuaquí cuanaque. Arepa tuna ena cuana pijidya jutidya iji ishü tyahua ama bucha, tujatu ecana tsujetyabuquedya, —jadya tuna Jesúsra cuejacuare.

Peya cuana cajuchatishaquique dyaque canerecaticuque

(Mt 18.6-9; Lc 17.1-2)

⁴² Jesúsra tuna bahuityanucacuare:

—Ejera riyaque ebacua piji bucha cuanaque cajuchatishayaquetu Yusura dyaque nerecaturabuque. Dyaque jidatu majutaquí juhua ejeque cajuchatishamaquedya. Dyaque jidatu peya cajuchatishaquique tumu ebari epitiju risitsu bei dyaque dedaju ijehuetáquí juhua. ⁴³ Emetucu tsehue ni micuana cajuchaticara juya, necatubuticue cajuchatimaquedya, jidamaque acara ayaque micuanaja aishu ama. Nejacacue cajuchaticaraque. Dyaque jidatu bipidya Yusu queja judirutaquí, bibeta ijahuaja etiquiju enubiduruque, etiqui ticu baecuaju. ⁴⁴ Tuhuatu emaju cuanaja ecuita cayuamatijacaya ama, tsuju cuanara araya tibu. Tuhuatu etiqui ticunime ama. ⁴⁵ Cuacara ni micuana juya eju micuana cuataquí amaju, cajuchaticuquedya ehuaquí necatubuticue, eju micuana cuacara juyaju cuaishu ama. Nejacacue cajuchaticaraque. Dyaque jidatu ruduruduque Yusu queja judirutaquí, huachi beta ijahuaja etiquiju ejudiruruque. ⁴⁶ Tuhuatu emaju cuanaja ecuita cayuamatijacaya ama, tsuju cuanara araya tibu. Tuhuatu etiqui ticunime ama. ⁴⁷ Micuanaja petataquimaque ni micuana petacara aya, necahuaticue yatuca, cajuchaticuquedya, jidamaque peta ishü amadya. Nejacacue cajuchaticaraque. Dyaque jidatu Yusu queja judirutaquí atuca pidya camadya, ijahuaja etiquiju atuca beta ejudiruruque. ⁴⁸ Tuhuatu emaju cuanaja ecuita cayuamatijacaya ama, tsuju cuanara araya tibu. Tuhuatu etiqui ticunime ama. ⁴⁹ Etiquira, banura jadya jidamaque cuinanashaya bucha, jadyatu Yusura ecue cuanaque jidamaque cuinanashaya canerecati eque. ⁵⁰ Banu tu jida earaquí dyaque jida amere ishü. Banuja, ni banu huaja etereu, aijamatu ni eje bucha banuquí amerenuca ishüque. Banura earaquí dyaque jida amerenucaya bucha, tumbaedyá micuana dyaque jida peya cuana tsehue ani ishü cabahuenetitaquí, ai aishu jida ama ejuu tibu, —jadya tuna Jesúsra acuare.

Ecaquemitique cajacatitaquiquemaque Jesúsra bahuityacuareque

(Mt 19.1-12; Lc 16.18)

10 Jesúsra dirucua Capernaum juque. Tuhuaque cuinanatsutu cuacuare Judea yahua queja.

Jordán cueri yueque macaretu cuacuare. Tuhuaque ecuita cuana jetiama yudijidya caradarati junucacuare tuaqueja. Caradatihuaju tujatu ecana bahuityanucacuare tuja bahue. ² Tumetu umae fariseo cuanara jipeticuare. Quisaratishatsu tunajatu pusha pusha tsehue jidama amerecara acuare. Bacaduraticuare tunaja tuque:

—¿Ecuana ehuane amena bijidama baatsu, ijehuetáquidya tuque ecuanaja? —jadya tunajatu aticuare.

³ Tume tuna Jesúsra quemitsacuare peya cabacaduraticuare eque:

—¿Eje buchique cacuatsashatitu Moisésra hueneacuare?

⁴ Tunaratu quemitsacuare:

—Turatu hueneacuare: “Ijehuecara ni micuana aya micuanaja huane, neinamerecue quirica eje bucha jutatsu micuanara ijehueyaque cuejayaque. Inameretsu micuanaja huane neijehuecue”, —jadya tunajatu acuare.

⁵ Jesúsra tuna acuare:

—Moisesratu adebacuaredya Yusuja cuanaque ama Yusuja biji eque anicarama juya cuanaque, tunaja biji equedya jutidya. Jadya tibudya tujatu hueneacuare ecaquemitique cajacatitaquique. ⁶ Jadya ama buchatu Yusura yuequedya inime iyahua ecaquemitique cajacati ishü ama. Ehuene tu Yusuja quisarati: “Yusuratu yuequedyadya iyacuare deca, epuna jadya carequí juishu”. ⁷ Tumbaedyá tu ehue: “Jadya tibudyatu deca jacataquí etataque, ecuaque, carequí juatsu.

⁸ Cajacatitihuaju tatse Yusura baya peadya camadya bucha”. Jadya tibu tatse amena beta ama, peadya camadya. ⁹ Yusura cuitadya casitatishaya tibu, tujatu ecatsé peadya camadya bucha baya. Jadya tibudya tatse ni ejeque ecuitaja buchique cajacatishataquí ama, —jadya tuna Jesúsra acuare.

¹⁰ Etareju judirunucatsutu Jesús tura mepehua cuanara acuare:

—Pana cueja cuita ecuana anucacue ecaquemitique cajacati ishüque ama, —jadya tunajatu acuare.

¹¹ —Micuana ni micuanaja huane neri tsehue cajacatitsu, peya epuna tsehue caquemitinucaya, tume micuana cajuchatiya. Yusuja yatucaju tuque micuanaja icueneque epuna huane neri jaridya, ai tupujuque ama. ¹² Tumbaedyá nucadya, epuna ni tuja yahuique jacatsu, peya deca tsehue caquemitinucaya, Yusu tujatu cahuitishaya. Yusuratu icueneque deca baya epunaja yahuique neri, beta ishüque ama, —jadya tujatu ecana acuare.

Jesúsra “Yusura jida panaru ebacua cuana” jadya acuareque

(Mt 19.13-15; Lc 18.15-17)

¹³ Tumetu umae ebacua cuana etata cuanaquera Jesús queja dujubarecuare.

—Emetucu micue iyacue ebacua cuanaja iyuca dyaque. Bacacue ecana Yusu queja, tuja ecana jida naru ishu, —jadya tunajatu Jesús acuare.

Jesúsra mepehua cuanara tuna jadya baatsu, nereda jutidya atsabarecuare ebacua cuana tsehue cuacuare cuanaque:

—Nepereume Jesús, —jadya tunajatu ecana at-sacuare.

¹⁴ Tura mepehua cuanaque jadya quisaratiyaju bacat-sutu Jesús cahuaicuare tuna tsehue.

—Pajedya ebacua cuana eaqueja. Necuadishaume ecana eaquejaque. Esiri cuanaque camadya ama, tumbaedy a tuna dyadi tuna Yusu jaquedy. ¹⁵ Pusha amadya micuana cuejaya. Yusura dutya naruhaju tu- aqueja judirucara juya cuanaquetu era cuatsashaya eque jutaqui ebacua cuejataquique bucha, —jadya tu- jatu ecana acuare.

¹⁶ Jadya quisarati aatsutu Jesúsra ebacua cuana tuhua jucuare cuanaque ebiju inatsu macacabare- cuare. Peadya peadyaja iyuca dyaquetu emetucu iyabarecuare.

—Yusura jida narucue, —jadya tujatu ecana peadya peadya abarecuare.

Ecuita chipirudaque Jesús tsehue quisaraticuareque

(Mt 19.16-30; Lc 18.18-30)

¹⁷ Amena Jesús dirunucayajutu ecuita juticuare tsaja- ran cama. Jutitsutu nuyunaticuare tuja yacuaju. Bacadu- ranaticuare tura:

—Jidaque Ebahuityaquique, ¿ai mere tuque jidaque eau, Yusu queja judiru ishu ni eje tupu tuque jaca ishu ama? —jadya tujatu Jesús aticuare.

¹⁸ Jesusratu quemitsacuare:

—¿Adebayadyami eje buchique quisarati ahuaque? ¿Eje bucha juatsu mira “Jidaque Ebahuityaquique” jadya aya? Yusu peadya camadya tu jidaque.

¹⁹ Bahuedyami Yusura cuatsashahuaque. “Quiyeti puji juume. Peyaja ehuanque micuque bucha aniquere aume. Chiri juume. Ni ejeque buchique pusha pusha aume. Ijahue aume peya. Muibacue mique baquique, mique susuquique jadya”. Jadyatu Yusura cuat- sashacuare béru, —jadyatu Jesúsra acuare.

²⁰ —Dutya riy a cuanaque cacuatsashati cuana tuque muibacuare nanada equeradya, Ebahuityaquique, —jadyatu ecuitara acuare.

²¹ Jadya bacatsutu Jesúsra iyuhue tsehue pana peta acuare.

—Aniya jari tuque micue eje bucha ataquique. Dutya micue aniya cuanaque catyati aticue. Catyati aatsu tyabarecue chipiru nrecada cuanaque. Dutya micue ai catyati aatsu, juetinucacue eaqueja eatsehue juneni ishu. Eaqueja ni mi ecatyatiu, tume tuque micue eaniu

Yusuja cuanaja ishu tuja barepaju aniyaque, —jadyatu Jesúsra acuare.

²² Jadya ayaju bacatsutu ecuita dyaque peya inime dirucuare, tuja dyaque jetiama aniyaque catyati acara- ma aya tibu.

²³ Tumeque ecuita yuneridya tuatsehue junenicara- ma juyaque adebatsutu Jesúsra peta baretsu tura mepehua cuanaque isaracuare.

—Jetiama ai aniya cuanaratu dyaque ibeda, masada baya eaqueja pana catyati juishu, Yusura dutya naruyaju judirutaqui juishu, —jadya tujatu ecana acuare.

²⁴ Jadya bacatsutu tuna bape bacacuare. Jesúsra tuna yudijidya cuejanuca acuare:

—Ecue iyuhueda cuanaque, dyaque ibeda, masadatu eaqueja pana catyati juishu, Yusura dutya naruyaju judirutaqui juishu. ²⁵ Cahuayutu etsucuija cani eque eje bucha cuetitaqui ama. Tumbaedy a tuna tunaja ai aniyara eje bucha judirutaqui ama amereya Yusu que- ja, —jadya tujatu ecana acuare.

²⁶ Jadya bacatsutu tuna bape pana baca anucacuare. Cabacaduratibarecuare ecana tuna cama:

—Chipiruqui cuanaque ni Satanás quejaque quinaja- cameretitaqui ama cabatiya, ¿ejeque jatsutu tuaque- jaque equinajacameretiu? —jadya tuna jubarecuare.

²⁷ Jesúsra tuna petatsu jadya quemitsacuare:

—Ecuita ni tu tuta taca eje bucha quinajacameretie juma Satanás quejaque. Yusura peadya camadya tuna einajacameru. Yusuja ishutu aijama ai ataquimaque, —jadya tujatu ecana acuare.

²⁸ Jadya bacatsutu Pedrora acuare:

—Ecuana ecuaana dutya cashanatihua miatsehue juneni ishu, —jadya tujatu acuare.

²⁹ —Pusha amadya micuana cuejaya. Micuana ni cashanatiya dutya micuanaja ai aniyaque eatsehue juneni ishu, Yusuja quisarati cuejara cuaishu, Yusura micuana tyaya dutya micuanara riyaque yahuaju sareyaque. Tura micuana tyaya micuanara sareya tupu dyaquedy, cien etyau bucha dyaque jetiama. Micuana ni etare cashanatiya, tura micuana tyaya eju ani ishucue. Cashanatiya ni micuana micuana tsehuequi cuanaque, micuanaja tata, micuanaja cuaa, micuanaja bacua cuana, tura micuana peya cuana queja iyuhue tsehue narumereya tunaja ata neri bucha. Cashanatiya ni micuana micuanaja tee cuana, tura micuana tyaya dutya micuanara ara ishucue sareya cuanaque. Riyaque yahuaju jari tupu micuana ecue cuanara ama ijahue ijahue abuque. Jadya ama bucha micuana Yusura dujubuque tuja yacuaju ni eje tupu tuque jaca ishu ama. ³¹ Iyacua dyaque inime metse cabatiya cua- naque tuna inime metse ama jubuque. Iyacua jetiedya, inime metse ama cabatiya cuanaque bacue dyaque inime metse cabatibuque, —jadya tujatu ecana acuare.

Jesús eje bucha iyetanae juyaque cacuejati quimisha ishu cacuejatinucacuareque
(Mt 20.17-19; Lc 18.31-34)

³² Jesús, tura mepehua cuanaque jadya tuna Jerusalén diji eque cuacuare. Jesús tunajatu icuene-itya aajecuare. Tuque ujeu baqui cuanaque tumeque epu ebariju aniya baatsutu tura mepehua cuanara inime tillaqui acuare, tuque tuhua cuaya baatsu. Tuque tupuju cuaya cuanaque tuna tumbaedy baja juacuare.

³³ —Pana baca neacue. Micuana micuana bahuedy Jerusalénju ique cuayaque. Neadebacue era cuejachineque IQUE ECUITA eje bucha judadiyaque era cuejahuaque. Pae cuanaja huaraji cuana queja, cacuat-sashati bahuityaqui cuana queja jadya tunara inamereya. Tunara ique aya “Paiyetanadya” jadya. ³⁴ Israelita ama cuana queja tunara inamereya. Ijahue ijahue tunara aya. Ebi tsehue au, catsacatsa, ecuedira jadya tunara aya. Iyemereya tunara ique. Quimisha huecaca majutsu chacha netitsuranucaya, —jadya tuna Jesúsra acuare.

Santiago, Juan jadyara Jesús tsehue huaraji juishu bacacuareque
(Mt 20.20-28)

³⁵ Tumetu Santiago, Juan, Zebedeoja ebacuaque ecatsera jipeticuare Jesús.

—Ecuana Bahuityaqui, nerecabacue yatse. Tyacue yatse, yatsera mique bacayaque, —jadya tatsejatu aticuare.

³⁶ —¿Ai tuque metse bijida baya?

³⁷ Mique dutya naruqui jutibuneyaque, yatse bacanishacue miatsehue enaruqui iyuca juishu. Emuita eanicuareju yatse iyabutyacue, peadya micue jida eque amaca, peya jani eque amaca jadya. Miatsehue muitapeedy yatse paju, —jadya tatsejatu acuare.

³⁸ —Metse metse baecua eje buchique metsera bacayaque. Ique dyaque canerecatiyaque tu patsedaque ebuijiu buchique. ¿Ique canerecatiya bucha canerecatie metse ejuudy? Yusura cuatsashaya eque juishu ecutsameretiu bucha; tumbaedy ique majuya Yusura cuatsashaya eque cuita juishu. ¿Ejuudy metse tura cuatsashaya eque? —jadya tatse Jesúsra acuare.

³⁹ —Eiduudy tuque yatsera, —jadya tatsejatu quemitsacuare.

—Pusha amadya metse cuejaya. Canerecatibuquedy metse, ique canerecatiya bucha. Majubuquedy metse ique majuya bucha. ⁴⁰ Jadya ama bucha ecuetu aijama cueja ishu ejeque ecue jida eque amaca, jani eque amaca jadya iyabuty a ishu, eatsehue enaruqui juishu. Yusura camadyatu mepebuque tuhua iyabuty a ishu, —jadya tujatu ecatsere acuare.

⁴¹ Umae tura mepehua cuanaquetu Santiago, Juan ecatsera bacayaque bacatsu cahuaicuaru tatse tsehue. ⁴² Jesúsra tuna dutya tuaqueja ihuaracuare.

—Yahua juque huaraji cuanara tuna cuatsashaya, emechiquira cuatsashaya bucha. Casada cuanaratu

jetiedya cuanaque casada tsehue cuatsashaya equedy amereya. ⁴³ Micuana micuana jadya jutaqui ama. Peya queja ni micuana camuimereticara juya, tunadya tuque micuanaja tsahuataqui. ⁴⁴ Ejeque micuana muitacara juyaque juatsu, necacasaticue peya cuana pureamatura ishu, micuana cuita camadya ama. ⁴⁵ Ique juya bae nejuce. Ique junahua riyaque yahua-ju peya cuana tsahua ishu, tunaja ique tsahua ishu ama. Tuna jiteque maju ishu, eaqueja catyatihuaju tuna Ijahua quejaque inajacamere ishu ique junahua, —jadya tujatu ecana acuare.

Jesúsra shuhuique Bartimeo bacani capetatishacuareque
(Mt 20.29-34; Lc 18.35-43)

⁴⁶ Tuequedy tuna junaticuare Jericóju tura mepehua cuana tsehue. Tuhuaque cuinanayratu Jesúsra badircuare shuhuique ediji jiruru juaniyaju. Bartimeo bacanitu jucuare, Timeoja ebacuaque. Cuetiya cuanaque chipiru bacaanitu jucuare. ⁴⁷ Ejera cuanatu cuejacuare Jesús Nazaret juque cuetiyaque. Jadya bacatsutu quiquetibunecuaru:

—¡Jesús, miquemi Yusuja Emepeque, David eque ejuracanaque! Nerecabacue taa ique, —jadya tujatu quique eque acuare.

⁴⁸ Umadaratu nereda datse acuare, tuque abacasha ishu. Tuque bacue jadya ayaju dyaque jebuda quiquecuare:

—¡Miquemi Yusuja Emepeque! ¡David eque ejuracanaque mique! ¡Nerecabacue taa ique! —jadyatu jebuda quiquecuare.

⁴⁹ Tuque juaniya tuyu junatitsutu Jesús netinaticuare. Cuatsashacuaru tuhua cuanaque:

—Requeja nebecue shuhuique.

Tura jadya ayaju tunajatu ihuaracuare shuhuique:

—Cacasaticue. Netitsuracue. Ihuaraya tura mique, —jadya tunajatu aticuare.

⁵⁰ Tume tujatu caramati ishucue ijehuequenacuare. Nere netitsura juatsutu Jesús jipeticuare.

⁵¹ —¿Eje buchami eaqueja catimerecara juya? —jadyatu Jesúsra bacaduracuare.

—Ebahuityaqui, capetatishanucacue ique.

⁵² —Amenami capetatiya. Erami capetatishahua, mira era mique ecapetatishauque ejenehua tibu. Jida dirucue, —jadyatu Jesúsra acuare.

Tura jadya aya tsehuedya cuitatu capetaticuare. Taji-ajecuaru Jesús ediji eque.

Jesús Jerusalénju judirucuaruque
(Mt 21.1-11; Lc 19.28-40; Jn 12.12-19)

11 Junaticuaru Jesús tura mepehua cuana tsehue Jerusalén piji dyane. Emata baruda cuita ama Olivo Acui Quini bacaniju tuna junaticuare. Beta epu ecatsere Betfagé, Betania jadya japadama tuna jucuare. Junatitsutu Jesúsra icuene cuadisha acuare beta tura mepehuaque ecatsere.

² —Ecuana yacua tuyu epu achaachaju necuacue. Tuhua junatitsutu tuque metse banatiya burro erisique

netiyaju, ni aija buchique isaanimaque. Nepisuticue. Pisutsu ecue nebecue. ³ Ejera ni metse aya: “¿Aishu tuque metse pisuya?”, “Ecuana Cuatsashaquiratu sareya. Masadama tujatu cuadishanucaya”, jadya neacue, —jadya tatse Jesúsra acuare.

⁴ Tura jadya ahuaaju tatse cuacuare. Banaticuare tatse burro isaanimaque etsecueju erisique netiyaju. Banatitsu tatse pisucuare. ⁵ Burro pisuyaju baatsu tatse tuhua cuanara bacaduracuare:

—¿Ai metse juya? ¿Aishu tuque metse burro pisuya? —jadya tunajatu ecatsé acuare.

⁶ Jadya tunara ayaju tatsejatu quemitsacuare Jesúsra cuejadadhua equedya:

—Ecuana Cuatsashaquira pari sareya. Masadama patujatu cuadishanucaya, —jadya tatsejatu ecana cuejacuare.

Tatsera jadya ayaju, tunajatu ecatsé acuare:

—Jida. Nedujucue taa, —jadya tunajatu ecatsé acuare.

⁷ Pisutsu tatsejatu dujucuare burro Jesús queja. Judiriqueretsu tatsejatu tatsera jutuya tsehue titecuare. Tatsera bajeje amena ahuaajutu Jesúsra isaanicuare. ⁸ Jesúsra isaanihuaju tunajatu jetiama tuhua cuanara tunaja jutu ishú cuanaque pijabarecuare edijiju, tuque muiyaque. Peya cuanaratu ejaqui cuana huanabarecuare edijiju, tuque muiyaque. ⁹ Jesús icuene, tupuju jadya cuaya cuanaquetu quiquetibunecuare:

—¡Hosana! ¡Jida paju Yusuja ebanijiu jeyaqué!

¹⁰ ¡Yusurami cuadishahua ecuana naruqui juishu, Davidra ecuanaja baba cuana naruhua bucha narue aishu! ¡Arida, dyaque casada jadyatu Yusu barepajuque! —jadya tuna jubarecuare quique eque.

¹¹ Tuequedyatu Jesús junaticuare Jerusalénju. Junatitsutu nubinaticuare Yusuja etareju. Nubinaticuare ai cuana dutya queja amaca. Petanati jadya aatsutu cuinanancuare. Dirunucacuare Betaniaju tura mepehua cuana tsehue, amena chinehua tibu.

Jesúsra higuera “Cacatinucanime ama mique”, jadya acuareque
(Mt 21.18-19)

¹² Huecacape nuca Betania juque Jerusalénju dirunucayaquetu Jesús aracara jucuare. ¹³ Japada equeratu badirucare acui higuera bacani. Jaquiqui tibusu ecaca sahuaqui cuana datse juquena jucuare. Cacaqui ejuuque peta ishú tujatu petaticuare. Baticuare amatu ni peadya ecaca buchique ecuiju, ejaqui camadya, higo jahuane mara ama tibu. ¹⁴ Tumetu Jesúsra jadya acuare tumeque acui:

—¡Cacatinucanime ama mique! Aranucanime ama tunaja tuque micue ecaca, —jadya tujatu acuare.

Tura mepehua cuanaratu tura jadya ayaju bacacuare.

Jesúsra catyati puji cuana Yusuja etare juque ijehuecuinatillacuareque

(Mt 21.12-17; Lc 19.45-48; Jn 2.13-22)

¹⁵ Jadya juu jadya juatsu tuna junaticuare Jerusalénju. Junatitsutu nubinaticuare Jesús Yusuja etareju. Nubit-sutu dyaque cahuaítinaticuare, tuhua eje bucha juyaque baatsu. Jadya tibudya tujatu ecana etsecueju pana ijehuecuinatilla acuare catyati puji cuana, bacabaca puji cuana jadya. Tipacatillacuare tujatu chipirucuaquequi juya cuanaja mesa cuana. Huei catyati juya cuanaja ani ishú cuanaquetu tumebaedya tipacabarecuareadya.

¹⁶ —Etsecue cuana eque catyati ishú cuanaque necuetiquereume, —jadya tujatu ecana acuare.

¹⁷ Catyati juya cuanaque ijehuecuinatilla jadya aatsutu tujatu cuejatibunecuare ecuita cuana:

—Yusuja quisarati tu jadya ehue: “Ecue etare tu dutya queja aniya cuanaque eatsehue quisarati ishúque etare bacani jadyatu Yusu beru jucuare”. Jadya ama bucha tuque micuana chiri puji cuana catehua ishúque cani bucha jutidya amereya, —jadya tuna Jesúsra acuare.

¹⁸ Pae cuanaja huaraji cuanara, cacuatsashati bahuityaqui cuanara jadyatu tuque quisaratiyaju bacacuare. Cahuaítitsu tunajatu inime piritibunecuare eje bucha iyee aishuque. Tunaratu tuque mubacuare, ecuita cuanara Jesús ijacabacaya baatsu, tuna eba-cauque.

¹⁹ Amena apunahuajutu Jesús dirunucacuare Jerusalén juque.

Higuera acui raracuareque

(Mt 21.20-22)

²⁰ Huecacape nuca Jesús, tura mepehua cuanaque Jerusalénju dirunucaya tsunumee tunajatu petadirucare acui Jesúsra “Cacatinucanime ama mique” jadya achineque. Pana maju tiritu patu raracuare.

²¹ Petatitsutu Pedro huecatanacuare Jesúsra higuera ishú quisarati achineque.

—Petacue higuera, Ecuana Bahuityaqui. Acui mira riya barepa “Cacatinucanime ama mique” jadya achinequeri pana raradya juchine, —jadyatu Pedrorra Jesús acuare.

²² Jesúsra tuna cuejacuare:

—Yusu queja micuana pana catyati neri jutaqui.

²³ Yuneridya ni micuana ejeneya era ecue casa tyahuaque, ejenecara ejenecarama jadya ama ni micuana eau, tumebaedyatu micuanara amereya equedya ejuu, arepa ai ibedaque paju ama bucha. Riyaque uhua cuemusú micuana eau: “Anisicuaque tuhuaque. Cueri cuanaja euaqueju pacacacue”. Amereya equedyatu ejuu. ²⁴ Jutajudya micuana cuejaya. Yusu tsehue quisaratiyaque, ai ni micuana eba-cau, tyadya tura micuana, ejenecara ejenecarama jadya ayaque ama juatsu. ²⁵ Yusu tsehue quisaratima jarira nenerecabacue peya cuanara jidama ahuaque. Nenerecabacue ecana, Yusura dyadi micuana cuitadya

jidama juhuaque apupasha ishu. ²⁶ Micuanara ni peya nerecabaya ama, tume tuque micuanaja Tata barepajura dyadi apupashaya amadya micuanaja jucha cuana, —jadya tujatu ecana acuare.

¿Airatu Jesús cuatsashacuare tura aya cuanaque aishu?

(Mt 21.23-27; Lc 20.1-8)

²⁷ Jerusalénju tuna yudijidya judirunuca jucuaire. Yusuja etare queja juneniyajutu pae cuanaja huaraji cuanara, cacuatsashati bahuityaqui cuanara, israelita cuana emuiba cuanara jadya jipeticuare. ²⁸ Jipetitsu tunajatu bacaduracuare:

—¿Airmi ejeque ecuitaja ataquique ama aishu cuatsashahua? ¿Aija casa tsehue tuquemi jadya aya?

—jadya tunajatu acuare Jesús.

²⁹ Jesúsra tuna quemitsacuare:

—Era micuana tumbaedy a bacaduraya. Quemitsaya ni micuanara ique, tume micuana cuejaya aira cuatsashahuaju era riya cuanaque ayaque. ³⁰ ¿Airatu Juan cuatsashacuare ecuita cuana utsa ishu? ¿Yusura, ecuita cuanara ni taa? Nequemitsacue ique, —jadya tuna Jesúsra bacaduracuare.

³¹ Tume tuna, tuna cama quisaraticuare:

—¿Eje bucha tuque ecuana equemitsau? “Yusuradyatu cuatsashacuare”, jadya ni ecuana eau, tume tura ecuana ebadurau: “¿Eje bucha juatsu jatsu tuque micuana Juanra cuejacuareque ejenequere ama?” jadya tura ecuana eau. ³² “Ecuita cuanaja ecuadishaquedya jutidyatu jucuaire”, jadya ni ecuana eau, tumetu dutya jujeri ecuita cuana ecahuaitiu ecuana tsehue”, jadya tuna cacuejatibarecuare.

Bahuedya tuna jucuaire, dutya jujeri ecuita cuanara, Juan Yusu equeque quisarati cuejaqui jucuaireque ebaduareque. ³³ Ecuita cuana mubatsu tunajatu Jesús quemitsacarama acuare. Chamacama tunajatu quemitsacuare:

—Baecua ecuana aira Juan ecuita cuana utsa ishu cuatsashacuareque, —jadya tunajatu Jesús acuare.

—Jutaquiju micuana era cuejaya amadya aira ique ecuitaja ataquique ama aishu ique cuatsashahuaju, —jadya tuna Jesúsra acuare.

Mere puji jidama cuanaque cuatsabiji eque bahuityacuareque

(Mt 21.33-46; Lc 20.9-19)

12 Jadya juatsutu Jesús catibutinucacuare ecuita cuana bahuitya. Riyaque cuatsabiji tujatu ecana cuejacuare, tuna bahuityayaque.

—Peadya ecuitajatu tee aridaque anicuare. Tee aatsutu uva uhuamerecuare. Taracanemerecuare tura. Amerecuaretu uva jahuanehuaju pitutsu nacaca tisi ishuque. Amerecuaretu etare piji barudaque, tueque tsuratsu, dutya queja naru ishu. Umae ecuita cuana queja tujatu tee narumerecuare. Tura tuna acuare: “Micuanara ni ecue tee naruya, tume ecuana uva jahuanehuaju cajuquetiya micuana tsehue”. Tuna tuna endya jucuaire. Tume cuanaque bajetsutu emechiqui

cuacuare japada peya yahuaju. ² Uva jahuane mara juetihuaju tujatu tuque merequique cuadishacuare tee naruqui cuana queja. “Cuacue ecue teeju mere juya cuana queja. Cuejaticue ecana; pacuadisha tuna ecue ishuque uva epituque”, jadya tujatu acuare. ³ Jadya ahuaajutu cuacuare. Jutihuaajutu tee naruqui cuanara inatsacuare. Mirimiri tunajatu atsacuare. Mema tuna cuadishacuare, ni peadya uva caca tsehue. ⁴ Jadya juhua baatsutu emechiquira cuadishanucacuare peya tuja mere puji. Tumeque tunajatu ijahue ijahue, ujeta, ujeta jadya atsacuare. Puucuare tuna iyucaju. ⁵ Tuequedyatu emechiquira cuadishanucacuare peya mere puji nuca. Tumeque tunajatu iyetsacuare. Jadya juatsutu umada peya cuana cuadishacuare. Umae tuna miririshatsacuare. Peya cuana bacue tuna iyetsabarecuare.

⁶ “Amena aijama jucuaire mere puji cuana cuadisha ishu. Peadya cuita camadya tuhua jucuaire tuja peadyaque ebacuaque iyuhuedaque. Datse juatsu tujatu ebacuaque neri cuadishacuare. ‘Riyaque renajari eje bucha ama atsaya. Ecue ebacua neri tibu, tunajatu muibatsaya’ jadya datse tujatu inime jucuaire.

⁷ Ebacuaquera jipeajeyajutu tee naruqui cuanaque jadya jucuaire tuna cama: ‘Riyaquedya ri tee metseja ebacuaque neri. Eje tupu etataque majuhuaajuri riyaquedya tee metse judadiya. Neiyetsara. Ecuandya emechiqui nejura’ jadya tuna jucuaire. ⁸ Inatsacuare tunara. Inatsatsu tunajatu iyecuare. Iyetsu tunajatu emajuque ijehueticuare tee tibene. Jadyatu tee naruqui cuanaque jucuaire, —jadya tuna Jesúsra cuejacuare.

⁹ Tume tuna Jesúsra bacaduracuare tuque quisaratiyaju bacaqui cuanaque:

—¿Eje buchatu anabuque tee naruqui cuanaque emechiquira? Era micuana cuejaya. Juetitsu tujatu iye-merenabuquedya tee naruqui cuanaque. Peadya tujatu mere puji cuana sarenabuque tee naru ishu.

¹⁰ “Neadebacue riyaque Yusuja quisarati ehuenecue. Adebayadya tuque era micuanaja riyaque quisarati eje uma isara eaque:

‘Tumu ebari etare puji cuanara tsumecarama acuarequetu tumu dyaque saretanayaque judadicuare.

¹¹ Ecuana Cuatsashaquiratu dyaque saretanayaque amerecuare.

Riyaque jadya baatsu, ecuana dyaque pureama juya’ jadya tu ehuenecue.

¹² Riyaque cuatsabiji bacatsutu israelita cuanaja huaraji cuana dyaque cahuaicituare, tunara cuitadya Jesús bijidamadurahuaque caadebatitsu, mere puji cuanara tee metseja ebacuaque bijidamadurahua bucha. Eje buchadya iyecara datse tunajatu acuare. Jadya ama bucha “Iyacia ni ecuana einau, ecuita cuanatu ecuana tsehue ecahuaitiu”, jadya tunajatu inime jucuaire. Ecuita cuana mubatsu tunajatu Jesús inacuaire ama tumeque ura cuitadya. Shanaquenacuare jutidya tunaja tuque.

Yusu tuja ishuquedya tyataquique

(Mt 22.15-22; Lc 20.20-26)

¹³ Israelita cuanaja huaraji cuanaratu cuadishacuare fariseo cuana, Herodes tsehue junenicuare cuanaque jadya Jesús queja.

—Jidama nequisaratishara, huaraji cuana queja duju ishu, —jadya tuna jucuare.

¹⁴ Tume cuadishahua cuanaratu jadya anaticuare:

—Ebahuityaquique, ecuana ecuana bahue mique jida, tuyuque. Miratu bahuityaya Yusuja inime eque ani ishuque, ni ejeque buchique mubatsu ama. Micue ishutu ecuita cuana dutya tupu. Jadya tibudya ecuana cuejacue. ¿Ecuana cacuatsashati eque, tuque ecuanaja ecuana naruquique Roma juque tsujetyataqui, tsujetyataqui ama ni taa? Tura ecuana tsuje tyamereyaju, ¿tsujetyataquidya tuque ecuanaja, aijama ni taa? —jadya tunajatu Jesús aticuare.

¹⁵ Jesusratu adebacuaredya tunara jidama inime tupuya tsehue jadya bacaduratiyaque.

—Micuanara ijahue acara aya jadya cabacadurati tsehue, babi pujira armadilla nityatsu ai cuanubi eamereu bucha. Nequeticue ficha enaruquija chipiru tuque tsujetya ishuque. Papeta era, —jadya tujatu ecana acuare.

¹⁶ Jadya ahuaju tunajatu queticuare peadya ficha “denario” bacani, Roma juque enaruquique tsuje tyaishuque chipiru. Petatsu tuna Jesúsra bacaduracuare:

—¿Aija ebutsequini ri riyaque fichaju eiya? ¿Aija ebanani ri rehua ehue?

—Enaruquique muidaque César bacani jaque tume, —jadya tunajatu quemitsacuare.

¹⁷ —Jutaquiju netyacue enaruqui César tuque tyaishuquedya. Yusu netyacue Yusuja ishuquedya, —jadya tuna Jesúsra acuare.

Anajacatacuare tuna tuque jadya caquemitsatiyaju bacatsu.

Emaju cuanaque netitsuradadinucabuqueque

(Mt 22.23-33; Lc 20.27-40)

¹⁸ Tumeque huecaca nucadyatu saduceo cuanara Jesús baticuare. Tunaradyatu ejenequere ama emaju cuanaque netitsuranucayaque. Junatitsu tunajatu Jesús isaranaticuare:

¹⁹ —Ebahuityaquique, Moisésra taa tu riyaque cuatsashacuare. “Ejeque ecuita ni majuya cabacuatimaque, tuatsehuequiquetu caquemitinucataqui eahuemaju tsehue, tuatsehue cabacuati ishu, icueneque ebacua emajuja ebacuaque bucha ishu”, jadyatu Moisésra cacuatsashati huenequere béru. ²⁰ Riyaque cuatsabiji mique ecuana aya; ijariiba ishuque jutidya tu ecuita emajuque chacha netitsuranucaya jadique. Anicuaretu ecuitaja pacarucu ebacuaque. Icueneque ebacuaquetu caquemiticuare. Huanequi juu jadya juatsutu majucuare bacuamaque. ²¹ Majuhujutu ejuque beta ishuque caquemitinucacuare eahuemaju tsehue. Beta ishuque tumebaedya majunucacuaredya bacuamaque. Quimisha ishuque ejuquetu caquemitinu-

cacuare eahuemaju tsehue. Tumebaedyatu junucacuare. Bacuamaquedyatu majunucacuare bacuamaque tere. ²² Jadya ecana jubarecuare; pacarucudyatu tumeque epuna tsehue cama ecana caquemititsu majuetibecuare. Tumeque nerecadaque epunatu pacarucu ahuee juhuaque majucuaredya, yahue cuanaque majuterehuaju. Jadya tuna jucuare.

²³ “Ecuana rami bacaduraya riyaque. Yuneridya ni majuya cuanaque chacha netitsuranucabuque, ¿ejeja ehuanequetu jubuque chacha netitsuranucatsu, riyaque yahuaju tuque pacarucu ahuee juhua tibu? —jadya tunajatu Jesús bacaduracuare.

²⁴ Jesúsra tuna quemitsacuare:

—Micuana micuana cuji juya. Micuanaratu adebaya ama Yusuja quisarati ehueque, ni Yusura eauque.

²⁵ Emaju cuanaque netitsuranucatsu tuna caquemitinucabuque ama. Barepaju Yusu tsahuaqui cuanaque tuna caquemiti baecua. Jadidya tu emaju cuanaque; netitsuratsu tuna caquemitibuque amadya. ²⁶ Yuneridyatu emaju cuanaque chacha netitsuranucabuque. Pusha ama cuitadya tuque micuana eje uma isara ahu Moisésra huenequereque, acui huija jujuyaque murutayaque ama tura huenequereque. Yusratu Moisés acuare: “Ique Yusu, Abraham, Isaac, Jacob jadya iyacua muiyaque”. Chacha cuanara cuita camadya Yusu emuiu tibu, yuneridyatu Abraham, Isaac, Jacob jadya ecana enetitsura. ²⁷ Yusu tu chacha cuanara muiyaque, emaju cuanara ama. Micuana micuana pana cuji eju emaju cuanaque chacha netitsuranucaya ama jadique ejeneya tibu, —jadya tuna Jesúsra acuare.

Ejeque cacuatsashatira cuatsashaya eque cuita ecuana jutaquique

(Mt 22.34-40; Lc 10.27)

²⁸ Tuhudyatu cacuatsashati bahuityaquique jucuare. Tura tuna quisaratiyaju bacacuare. Adebacuaredya tura Jesúsra saduceo cuana jida quemitsahuaque. Tume tu tura Jesús isaratsu bacaduracuare:

—Ebahuityaquique, aniyatu jetiama cacuatsashati cuana ecuanaja cacuatsashatiju ehueque. ¿Ejeque cacuatsashatira cuatsashaya eque cuita ecuana jutaquique?

²⁹ Jesusratu quemitsacuare:

—Ehuele tu Yusuja quisarati: “Nebacacue ique, micuana Israel eque ejuracana cuanara. Ecuana Cuatsashaquique tu Yusu; tuque peadya camadya tu Ecuan Cuatsashaquique. ³⁰ Iyuhueda bacue ducuta Yusu Mique Cuatsashaquique. Yusu iyuhueda bacue ducuta; dutya micue cabijiseriti tsehue Yusu pureamaturacue, dutya micue inime tupu tsehue, dutya micue casa tsehue.” Riyaque cacuatsashatira cuatsashaya eque cuita micuana jutaqui. ³¹ Riyaque ri beta ishuque: “Iyuhue tsehue bacue peya cuana; mique cuitadya iyuhueda cabatiya bucha iyuhuee peya bacue”. Jeeque cacuatsashati ecatsara cuatsashaya eque cuita micuana jutaqui. Aijamatu peya cacuatsashati dyaque inime metseque, —jadyatu Jesúsra acuare.

³² Jadya cuejayaju bacatsutu cacuatsashati bahuityaquira acuare:

—Jidadya tuquemi cuejaya, Ebahuityaquique. Yusu tu Ecuana Cuatsashaquique peadyaque. Aijamatu peya Yusu, tuque cuita camadya. Mira quisarati ahuaque tu yuneridya. ³³ Yusu tuque ecuanaja ducuta iyuhueda bataqui. Dutya ecuanaja inime tupu tsehue tuque ecuanaja iyuhueda bataqui, ecuanaja casa tsehue jadya. Tumebaedya yuneridya tuque ecuanaja peya cuana iyuhueda bataqui; ecuanaja cuitadya iyuhueda cabatiya bucha iyuhuee tuque ecuanaja peya bataqui. Yusu, peya cuana jadya ni ecuanaja iyuhueda baya, tuquetu dyaque pureama juya, ecuanara uu cuana, jadya ama juatsu peya ai tuque tyayaju pureama juya bucha ama, —jadya tujatu acuare.

³⁴ Tumetu Jesúsra tura jida inime tupu tsehue quemitsahuaque adebatsu jadya acuare:

—Miratu amena adebatibuneya Yusu eje bucha pureamatura aishuque. Masadama ni mi tujaque ejudadiu, —jadyatu Jesúsra acuare.

Dutya riya cuanaque bacatsutu ni ejeradya jutidya bacaduranucacuare ama.

Mesías tu ecuita camadya ama, ecuita cuana dyaque inimequique

(Mt 22.41-46; Lc 20.41-44)

³⁵ Jesús tuhua Yusuja etareju bahuitya bahuityaya jarira tujatu tuque quisariatijaju bacaqui cuanaque jadya acuare:

—Cacuatsashati cuana bahuityaqui cuanaque tuna juya “Mesías, Yusuja Emepequetu ejeque ecuita baedya jutidya judadibuque, David eque ejuracanaque jubuque tibu”. Cuejaya micuana era. ³⁶ David cuitadyatu bahue jucuare Mesías ecuita camadya ama jubuqueque, ecuita cuana bucha dyaque inimequique, Yusuja Espirituradya jadya huenemerecure tibu:

“Yusuratu Ique Cuatsashaquique jadya cuejacuare: ‘Anibutecue ecue jida eque amaca muita ishú, era mique uje baqui cuanaque dutya ijahue atillaya tupu, Ique Cuatsashaquique” jadya.

³⁷ “Davidradyatu Mesías ‘Ique Cuatsashaquique’ jadya acuare, arepa tueque ejuracanaque ama bucha. Yunerí cuitadyatu Mesías ecuita jutidya ama ejuu; ecuita cuana bucha dyaque inimequiquedya tume, —jadya tujatu ecana acuare.

Jesús quisariatijajutu jetiama ecuitara pureama tsehue bacacuare.

Jesúsra cacuatsashati bahuityaqui cuanaque jidama juyaque ejitaju acuareque

(Mt 23.1-36; Lc 11.37-54; 20.45-47)

³⁸ Jesúsra tuna bahuityanucacuare:

—Necanaruticue cacuatsashati bahuityaqui cuana tsehue. Tuna aniya bae neaniume. Tunaratu una junudaque jutuya, peya cuana queja Yusu adebaqui jadya cabamereti ishú datse. Epu patya eque cuetiyaju tuna dyaque muida tsehue isaratacara juya. ³⁹ Caradati

ishuque etareju cuaatsu tuna muida cuanaque anibahueju anibutetiya. Chine cuana ishú araratayaju cuaatsu tuna emuita cuanaja eaniqui cuanaju cama tuna eaniqui metsene juya. ⁴⁰ Arepa ecana eahuemaju cuanaque tsahuaya bucha cabatiya ama bucha, yunerí cuitadya tunajatu eahuemaju nrecada cuanaque tunaja ai aniya cuanaque secatillaya, tuna tunaja etare juque cuitadya ijehuecuinaya tupu. Yusu tsehue quisariatiyaque tuna tsunuda quisarati bahue dutyaja ijaju, tuna queja “Yusu adebaqui cuita rena”, jadya catimere ishú datse. Yusura tuna dyaque nrecaturabuque, —jadya tuna Jesúsra acuare.

Eahuemaju nrecadara chipiru Yusuja ishú iyacuareque

(Lc 21.1-4)

⁴¹ Jesúsra Yusuja etareju anibuteacuare ecuita cuanara Yusuja ishú chipiru iyaya tuyu. Petacuare tujatu umada ecuita cuanara chipiru ishayaju. Jetiama chipiruda cuanaque tuna cueticuare tueque jetiama chipiru ishú juyaque. ⁴² Tuequedyatu eahuemaju nrecadaque junicuare. Tumeque epunaratu ishaticuare cajuju beta ficha piji cobre eaque, tsuje aridaque ama, ai tsujequi cuitaque ama. ⁴³ Baatsutu Jesúsra acuare tura mepehua cuanaque:

—Pusha amadya micuana cuejaya. Yusuratu dyaque tsuje arida baya epuna nrecada eahuemajura ishahuaque, chipiruda cuanara jetiama ishahuaque bucha ama. ⁴⁴ Tunaratu ishahua tunaja anidadiyaque jutidya. Jeeque epuna nrecadara taa tyatillahua tuja dutya aniyaque piji, tuja ai caquemiti ishú ejuuque, —jadya tujatu ecana acuare.

Jesús “Yusuja etaretu pana rihuishatana jubuque” jadya jucuareque

(Mt 24.1-2; Lc 21.5-6)

13 Jesús Yusuja etare juque cuinanayajutu peadya tura mepehuara jadya acuare:

—[Ecuana Bahuityaquique, petacue! Dyaque jida piji taa Yusuja etare, tumebaedya dutya ai ea cuanaque etare tsecue cuanaju, —jadya tujatu acuare.

² —Pusha amadya. Jida pijidya tuquemi petaya. Jadya ama buchatu Yusuja etare, etsecueju dutya ai ea cuanaque pana rihuishatanatere jubuque. Anibuque amatu tumu ecadyaqueti. Dutya tumu etare enityatsurajutu yahuaju tere jubuque, —jadyatu Jesúsra cuejacuare.

Terehuie adeba ishúque jubuqueque

(Mt 24.3-28; Lc 21.7-24; 17.22-24)

³ Jadya juatsu tuna cuanucacuare uhua cuemusú Olivu Acuí Quini bacaniju. Tumeque uhua cuemusutu Yusuja etare tuyu jucuare. Aninaticuaretu Jesús. Anibutehuajutu Pedro, Santiago, Juan, Andrés ecanara jipeticuare. Jipetsu tunajatu bacaduracuare:

⁴ —Cuejacue ecuaná. ¿Eje tuputu jadya judadiya? ¿Aiju ecuaná caadebatibuque yahua tereyaque huecaca japadamaque? —jadya tunajatu Jesús bacaduracuare.

⁵—Nimequi tsehue nequihuaticue. Ijahue neca-timereume. ⁶Ique junanucahuie tuna jetiama junabuque iquepa ejuu jadya juya cuanaque. “Ique Mesías, Yusuja Emepeque”, jadya tuna jetiama junabuque. Jetiamara tuna ejenebuque. Ijahue tuna atabuque. ⁷Dutya quejaquedya jutidya tuna catibuque. Japadama tuque micuana ecana catiyaju bacabuque. Tumebaedya tuque micuana ecana japadapa catiya jadya bacabuque. Jadya bacatsu “Masadamatu tere juetiya”, jadya micuanaja inime paju ama. Dutya tume cuanaquetu jadya jubuque icuene. Tere ishucue ama jari tume. ⁸Riyaque yahuaju cuanaque tuna peya yahuaju cuana tsehue catibuque. Anape cuanaquetu catibuque peya anae cuana tsehue. Bucucubuquetu yahua dutya queja. Eje uma epu cuanaju tuna dyaque mije jubuque. Jadya cuana judadiyaquetu canerecati catibutiyaque jutidya. Ecue cuanaque tuna dyaque canerecatibuque.

⁹“Necanaruticue bacue micuana. Micuana ujeu baqui cuanara micuana jahue jahue abucue eaqueja ecatyati baatsu. Inatsu tunara micuana huaraji cuana queja dujubuque. Abucue tunara micuana caradati ishucue etare cuanaju. Dujubuque tunara micuana enaruqui cuanaja yacuaju, ecuari cuanaja yacuaju eaqueja ecatyati baatsu. Tume tuque micuanaja emajaca anibuque ique eje buchique tuna cueja ishu. ¹⁰Dutya terema jarijudyatu ecue quisarati jidaque dutya queja cuejatanabuque. ¹¹Huaraji cuanaja yacuaju dujutanayaju jidama inime nebaume quicueneti ishuhu quisarati aishu. Quisarati ishucue ura juetihua, Yusura huecashaya eque nequisaraticue, Yusuja Espíritu micuana eque quisaratiya tibu. ¹²Ecue cuanaque tuna tunaja etareju cuanara cuitadya jahue jahue abucue. Iyemere ishu tunajatu huaraji cuana queja inamerebuque. Etata cuanaquera tuna ebacua cuanaque cuitadya inamerebuque, ebacua cuanaquera bacue etata cuanaque. ¹³Dutya jujerira micuana ujeu babuque, eaqueja ecatyati baatsu. Ejeque tereya tupu eatsehue nime aputayaque ama camadyatu Yusu queja judirubuque ni eje tupu tuque jakanuca ishu ama, —jadya tunaa Jesúsra cuejacuare.

¹⁴Jesúsra tuna cuejanucacuare:

—Ejitajutu dyaque jidama cuitaque judadibuque “Ecuita Cuana Bajituraquique” bacani. Eju tuque anitaquiju amatu anibuque. Yusuja etarejutu ejitaju jubuque. Tumequepa amena juetihua jadya bacatsutu Yusuja quisarati ehuenecue pana adeba aya cuanara adebabuque masadama eje bucha judadiyaque. Ecuita Cuana Bajituraquique Jerusalénju juetihua jadya baatsutu Judea yahuaju cuanaque huanataqui emata cuanaju catehua juishu. ¹⁵Muya jutidyatu Ecuita Cuana Bajituraquique juetibuque. Jadya tibudya tuna etare ebarucue ecamahua jepeda cuana juque ai inaquenama butetaqui huana ishu. ¹⁶Teeju mere juya cuanaque tuna judirunucataqui ama tunaja etareju. Tuequedya tuna huanataqui. Nubitinucataqui ama tuna tunaja caramati ishucue jiteque. ¹⁷Dyaque nerecadatu jubuque epuna maqui cuanaque, bacua nanaqui cua-

naque jadya. Tuna tuna eje bucha huanataqui ama ebajarara cabatibuque. ¹⁸Nebacabacacue Yusu queja, micuana huanayaque huecaca cuejipa, nei micuana huanayaque huecaca ejuetiujju. ¹⁹Ecuita Cuana Bajituraquique ejitaju juhuajutu dyaque canerecati ishucue anibuque. Ni eje tuputu jadya canerecati anihua ama Yusura yahua yahua equeque tumeque huecaca judadibuque bucha. Ecuita Cuana Bajituraquique ijehuetanahuajutu aninucabuque ama jadique canerecati ni eje tupu. ²⁰Dyaquetu Yusura iyuhueda baya tuja cuanaque, tura mepehua cuanaque. Jadya tibudya Yusura tumeque huecaca canerecati ishucue jununashabuque ama. Tura ni jadya ama eau, ni aira buchiquetu eiduu ama; ni ejequetu chacha ejuu ama.

²¹“Aira cuejatsu ama micuana ique junanucahuque bahue jubuque. Jadya tibudya ejera ‘Mesiastu junanucahua. Ecuanaja epujudya rique’ jadya ayaju, neejeneume. Ejera ni micuana aya: ‘Mesiastu junanucahua. Peya epuju tuque’ neejeneume. ²²Tume cuanaque huecaca juetihua tuna jetiama pusha pusha jubuque: ‘Ique Mesías, Yusuja Emepeque’ jadya ama juatsu ‘Ique Yusuja quisarati cueja ishucue cuita camadya’ jadya. Abucue tunajatu inimeradya jutidya ecuitaja ataquique ama. Eje uma tunajatu ecana jahue abucue. Dutya tunajatu ecana cujishabuque. Yusuja cuanaque neri neri tunajatu jahue acara ebari abucue. ²³Necanaruticue. Icuenetadya micuana cuejahua riyaque, micuana jahue eatauju, —jaadya tuna Jesúsra acuare.

ECUITA junanucayaju eje bucha jubuqueque

(Mt 24.29-35, 42-44; Lc 21.25-36)

²⁴Jesúsra tuna bahuityanucacuare:

—Masadama huecaca cuana nerecada ishucue cue-tiajeyaju cuitadyatu ijete apunabuque. Badiu huecadama jubuque. ²⁵Purari cuanatu barepa juque pacacabuque. Barepaju casada aniya cuanaque tuna piririterebuque. ²⁶Tuequedya tunara IQUE ECUITA huani ducu junanucayaju batsabuque. Ecue dyaque casa tsehue junanucabuque. Cabameretibuque ique eje bucha muitaque. ²⁷Cuadishabuque tuque barepaju ique tsahuaqui cuanaque, ecue cuanaque dutya yahua queja aniya cuanaque sita ishu.

²⁸“Anibuquetu ique masadama junanucayaque adeba ishucue, masadama nei mara catibutinucayaque adeba ishucue aniya bucha. Ita taa acui higuera bacani neadebacue. Yaa cuana catapananatiyaju baatsu, micuana bahue amena nei mara catibutiyaque.

²⁹Tumebaedya micuana dutya riy cuanaque era cuejahua cuanaque juajeya baatsu, bahuedya micuana jubuque yahua amena terehueque. ³⁰Pusha amadya micuana cuejaya. Dutya riy cuanaquetu judadibuque iyacua ecuita cuana aniyaque majuma jarijudya.

³¹Arepa barepa, yahua jadya pana cuaretana jubuque ama bucha, dutya micuana era cuejahua cuanaquetu cuaretanatsu ama jadya judadibuque.

³²“Yusu ecue Etata peadya camadyatu bahue ejeque huecaca ique junanucayaque. Tuque peadya camady-

atu bahue huecadaju ni, jadya ama juatsu meta eje tupu ique junanucayaque. Ni ejeque ecuitaratu adebaya ama. Ni ejeque barepaju Yusu tsahuaquiratu adebaya ama. Arepa ique Yusuja Ebacuaque ama bucha, eratu adebaya amadya.

³³ "Jadya tibudya nequihuaticue. Neihuajacaume ique junanucayaque, ai micuana bahue batune eje tupu ique junanucayaque. ³⁴ Ique ecuita eje queja cuayaque ejeque huecaca juetinucaayaque cacuejatima cuau ejuu buchique. Cuama jariratu tumeque ecuitara aya tuja mere puji cuana: 'Nenarucue ecue aniya cuanaque'. Cuejabareyatu ecana peadya peadya tuque juneniya tupu tura amerecara ayaque. Cuejamereyatu etsecue naruquique: 'Quihuatijacaume bacue ejeque uradya jutidya ique juetinucaayaju etsecue pacasha ishu'. ³⁵ Canarutijacataqui ama, mere jadya tuna jutaqui ejeque huecaca etare metseque juetiyaque baecua tibu. Ejuetiutu apupuyaju, jadya ama juatsu barepatya, jadya ama juatsu tacure quiqueyaju, jadya ama juatsu apudajudya. Tumebaedya micuanara ique junanucayaque neihuajacaume. ³⁶ Ique muya jutidya junanucayaque. Neajacaume bacue era micuana amerequenayaque. Ecabatique bucha nejudue. ³⁷ Micuana amereyauque tumebaedya tuque amereya dutya: 'Neihuajacaume ique junanucayaque. Ecabatique bucha nejudue' —jadya tuna Jesúsra acuare.

Jesús ujeu baqui cuanara tuque inamere ishu inime bajecuaque

(Mt 26.1-5; Lc 22.1-2; Jn 11.45-53)

14 Beta huecacatu bataqui ama jucuare Pascua chine, ecuanaja baba cuana Egipto juque cuinanacuareque adeba ishuque, pan levaduramaque ecuanaja ara bahueque. Pae cuanaja huaraji cuanara, cacuatsashati bahuityaqui cuanara jadyatu Jesús iye ishu, tseta inamere aishu sarecuare.

² —Neinamerera ama Pascua chine ishu cuita, ecuita cuana ecapuritishau tibu, —jadya tuna jucuare.

Epunara Jesúsja iyucaju etseri ijimedaque juracuareque

(Mt 26.6-13; Jn 12.1-8)

³ Jesússtu Betaniaju jucuare Simónja etareju. Icuenetu tumeque ecuita erami ririshaqui ujeje tsehue jucuare. Jadya tibudya tunajatu "Leproso" jadya isarae acuare. Chineju ararayajutu Jesús epunara jipeticuare botilla caca alabastro eaque ina jadya. Tumeque botilla cacatu etseri ijimeda tsehue ejequeshaque jucuare, dyaque tsuje aridaque, "nardo" bacani. Pucucua tujatu botilla cacaja etumuqui. Pucutsu tujatu etseri ijimedaque juraticuare Jesúsja iyucaju. ⁴ Epunara jadya aya baatsutu uma tuhua cuanaque cahuaicuare:

—Nepetacue tura etseri dyaque tsuje aridaque ije-hueneyaju. Ni aishu buchique tu jida ama jadya ije-huenetsu. ⁵ Catyati ni tu aquena juhua etseri ijimedaque, umada tujatu chipiru inaquina juhua, quimisha ciento ficha dyaque cuitadya, peadya mara mere juatsu etsujequi einau tupu. Jetiamatu nerecada

cuanaque etsahuauque chipiru inatsu, —jadya tuna jucuare.

Sicacada ecana epunaja ishu quisaraticuare.

⁶ Tuna quisaratiyaju bacatsu tuna Jesúsra acuare:

—Jadya neaume. ¿Eje bucha juatsu jatsu tuque micuana tumeque quisarati tsehue aya? Tura ique jadya ahuaquetu dyaque jidaque. ⁷ Micuana ducutu jujacaya amadya nerecada cuanaque. Aijama amadya tuque micuanaja emajaca juya tuna micuanaja ai aniyaque tyaishu, ique bacue aijama. Ique micuana tsehue junenisiriyaya ama. ⁸ Riyaque epunaru ahua tuja ecue ishu ataquique. Ique iyetahuaju papata ishuque tura jadya ahua. ⁹ Pusha amadya micuana yahuaju bahue jubuque, eju ecue quisarati jidaque cuejatanayaju, ecuita cuanaja tuque adeba ishu, —jadya tuna Jesúsra acuare.

Judasra Jesús inamere ishu inime bajecuaque

(Mt 26.14-16; Lc 22.3-6)

¹⁰ Tumetu Judas Iscariote, Jesúsra mepehuaque, cuacuare pae cuanaja huaraji cuana queja. Bajeticuaretu inime tuna queja eje bucha inamere Jesús aishuque. ¹¹ Tura jadya quisarati ayaju bacatsu tuna pureama jucuare.

—Mira ecuanaja Jesús menajetyahuaju, mique ecuanaja chipiru tsehue tsujetyaya, —jadya tunajatu acuare.

Tumeque huecaca equeratu Judasra Jesús eje bucha inamere aishuque sarecuare.

Jesúsra Pascua earaqui tura mepehua cuana tsehue aracuareque

(Mt 26.17-25; Lc 22.7-18; Jn 13.21-30)

¹² Jueticuaretu icueneque huecaca Pascua chine ecuanaja pan levaduramaque, uhuisha jidaque iyetsu jadya ara bahueque huecaca. Tumeque huecacatu Jesúsra mepehua cuanara Jesús jipetitsu bacaduracuare:

—¿Ejumi bajecumerecara aya riyaque chineju Pascua ishu araara ishu? —jadya tunajatu aticuare.

¹³ Tunara jadya atihuaju tujatu cuadishacuare beta tura mepehuaque ecatsé. Tatse cuama jariju tujatu ecatsé acuare:

—Jerusalénju nebajeticue. Necuacue. Tuhua junatitsu tuque metse tsuruya ecuita suraju ena duju juyaque. Tudyu netupujecue. ¹⁴ Tupujudya aajetsu, ejeque etareju tuque nubidiruyaju baatsu, tuhuadya nenubicue. Etare metseque jadya neaticue: "Ecuana Bahuityaquiramí bacaduramereya: '¿Eje dyanepa micue etareju emajaca, tuque tura mepehua cuana tsehue Pascua ishu araara ishu?'" jadya nebacaduraticue. ¹⁵ Metsera jadya ayaju tura metse bamereya tuja etareju emajaca aridaque beta ishuque pisoju. Tuhuadyatu aniya dutya ecuanara sareyauque. Tuhuadya nebajecue ara ishuque, —jadya tatse Jesúsra acuare.

¹⁶ Jadya ahuaaju tatse cuacuare. Junaticuare ecatsé epu ebariju. Junatihuajutu jucuare dutya tatse Jesúsra

cuejadadihua bae cuitadya. Tumeque ecuita tsurutsu, etare cuejahuaju cuaatsu, tatsejatu earaqui bajeteticuare Pascua juyaque chineju ara ishuque.

¹⁷ Amena apunahuajutu Jesús junaticuare tura mepehua cuana tsehue. ¹⁸ Amena mesaju araarayara tuna Jesúsra jadya acuare:

—Peadyara micuanara ique ujeu baqui cuana queja inamereya, peadya eatsehue araarayara, —jadya tujatu ecana acuare.

¹⁹ Jadya ayaju tuna peya inime jucuaire. Peadya peadyara tunajatu bacadurabarecuare:

—¿Era ni taa, Ecuana Cuatsashaquique? —jadya tunajatu abarecuare.

²⁰ —Eatsehue peadya pejaju araarayara, pan mullayara. ²¹ Bérutu Yusu equeque quisarati cuejaqui cuanara huenequere ecuita jidama cuanara iyebuqueque. Tunaja quisarati ehue equedyatu juya. Dyaque nerecadatu jubuque ique ujeu baqui cuana queja inamerequi juyaque! Dyaque jida taa tu tumeque ecuita ecuaquera ejitaju aquena ama juhua, —jadya tujatu ecana acuare.

Ecuana Cuatsashaquique majucuaireque adeba ishu araarataquique

(Mt 26.26-29; Lc 22.19-23; 1 Co 11.23-26)

²² Araarayaquetu Jesúsra pan inacuaire. Pan inatsu tujatu

—Yusurupai mique aya, Tata, —jadya Yusu acuare.

Yusurupai, jadya aatsu tujatu pan cuesicuare. Cuesitsu tujatu tuatsehue anibareya cuanaque tyabarecuare.

—Nearacue. Riyaque rique ecue ecuita, —jadya tujatu ecana acuare.

²³ Tuequedya tujatu canecu juque uva nacaca esasanashaque inanucacuare. Canecu inatsu,

—Yusurupai mique aya, Tata, —jadyatu Yusu acuare.

Yusurupai jadya aatsu tujatu ecana sadatsu inamerebarecuare, tunaja ijibare ishu canecu juque.

²⁴ —Riyaque rique ecue ami, micuana jiteque quijehuetiyaque. Jetiama tuna eaqueja catyatibuque. Ique ecue ami quijehuetitsu majuhua jutu Yusura iyaya iyacuaque inime tuaqueja judiru ishuque. Ique majuhua jutu piisitu riyaque inime yunerinetanaya.

²⁵ Riyaque micuana cuejaya. Ni eje tupu tuque riyaque yahuaju Pascua chine micuana tsehue anucaya ama; ijinucanime ama tuque ecue uva nacaca esasanashaque. Jadya ama buchatu tumeque huecaca era dutya naruyaque huecaca juetihuaju piisi tuque ijibuque micuana tsehue iyacuaque eijiqui, —jadya tujatu ecana acuare.

Jesúsra Pedro “Adebaya ama tuque era” jadya juyaque cuejacuaireque

(Mt 26.30-35; Lc 22.31-34; Jn 13.36-38)

²⁶ Chineju araara amena juatsu tunajatu Yusu pureama aishuque jeru acuare. Jeru amena juatsu tuna cuacuare uhua cuemusú Olivo Acui Quini bacaniju.

²⁷ Tuhua junatitsutu Jesúsra isaracuare tura mepehua cuanaque.

—Riyaque meta micuanara era ijahue ahua bucha cabatitsu jacatillaya. Yusuja quisarati tu ehue: “Tuna aquereniquiquetu iyetanabuque. Dutya tura aquerenihua cuanaque tuna tsapetanabuque, uhuisha cuana naruquique iyetanahuaju etsapetanau bucha”. ²⁸ Emajuque netitsuranucatsu icuenetadya cuaya Galileaju, tuhua micuana tsehue catsurutinuca ishu, —jadya tujatu ecana acuare.

²⁹ Jadya juyajutu Pedrora acuare:

—Arepá dutyara jacatillaya ama bucha, ecuemi jancanime ama, —jadya tujatu acuare.

³⁰ —Pusha amadya mique aya. Riyaque meta, tacure quique beta juma jarijudyami catehuati quimisha juya. “Adebaya ama tuque era”, jadya aquimisha mira aya, —jadyatu Jesúsra Pedro acuare.

³¹ —[A, aijama! Mique adebaya ama jiu junime ama ique. Miatsehue iyepedyá datse tunara paa. “Tujaque ama ique” jadya junime ama ique, —jadyatu Pedrora Jesús acuare.

—Mique adebaya ama jiu junime ama ique, —jadya tunajatu abarecuare, Pedrora aya baedya.

Jesús Etataque tsehue Getsemani ju quisaraticuaireque

(Mt 26.36-46; Lc 22.39-46)

³² Tumetu Jesús tura mepehua cuana tsehue junaticuare Getsemani bacani emajacaju. Tuhua junatitsu tujatu ecana anaticuaire:

—Rehuadya neanibutecue, ique ecue Etata tsehue quisaratiya tupu.

³³ Jadya juatsu tujatu dujucuaire Pedro, Santiago, Juan jadya. Japada cuita ama tunajatu ecana jacacuare. Cuayaquedyatu Jesús dyaque peya inime cabatiacuaire, niju huenanada, eje buchadya jucara jadya.

³⁴ —Dyaque peya inime taa cabatiya. Idutaqui ama cuita taa rique baya. Rehuadya neanicue. Ecabati nejuque. Netahuiume, —jadya tujatu ecana acuare.

³⁵ Tuna jadya aatsutu Jesús cuacuare eje japa cuita amadya. Cuaatsutu chichucata junaticuare, yahua queja huipuchitana. Jadya juatsutu Yusu tsehue quisaraticuaire:

—Tata, ique canerecati ishuque ama juatsu taa ecanerecatiu ama. ³⁶ Ecue Etata, micuetu dutya ataqui. Riya ique nerecada jutaquique tu ai patseda buchique. Canerecatitaquique ama juatsu taa ecanerecatiu ama. Ebacau datse mique era, ique canerecati ishu ama. Jadya ama bucha ecue biji eque ama paju. Micue biji eque paju, —jadyatu Jesúsra acuare tuja Etataque.

³⁷ Jadya juatsutu cuanucacuare quimisha tura dujuhua cuana queja. Cuaatsu tujatu ecana tahuijarabareyaju baticuaire. Isaranaticuairetu Pedro: —¿Tahuiyami, Simón? ¿Eje bucha ecabati jutaqui amami yaratupu cuana cabatihua, ni peadya ura cuana?

³⁸ Tuequedya tujatu ecana quimishadya isaracuare:

—Necabaticue. Netahuiume. Nebacabacacue Yusu queja, micuana Satanásra ique jacamerecara ayaju, micuanaja idu ishu. Micuanaja tacajatu aijama casa Ijahua cajuchatishacara ayaju casada juishu, arepa

micuanara jacacarama aya ama bucha, —jadya tuna Jesúsra acuare.

³⁹ Cuabeta ishutu Jesús cuanucacuare tuque cuahua-ju nucadya, Yusu tsehue quisaratira.

—Tata, canerecatitaquique ama juatsu taa ique ataya bae eatau ama. Jadya ama bucha ecue biji eque ama paju. Micue biji eque paju, —jadya ati beta tujatu acuare.

⁴⁰ Jadya juatsutu cuanucacuare tura quimisha du-juhua cuana queja. Cuanucatsu tujatu ecana tahui-jarabareyaju batinucacuare. Busataqui ama cuita tunajatu yatuca bacuare tahuicara juatsu. Tahuiya baatsu tura nereda ayaju tuna eje bucha caquemitsatitaqui ama jucuare. ⁴¹ Cuaquimisha ishutu cuanucacuare Yusu tsehue quisaratira. Jadya juatsutu cuanucacuare tura dujuhua cuana queja.

—¿Canajaraya jari cuitadya micuana? ¿Tahuiya jari cuitadya ni taa micuana? Riya tupu camadya. Amenatu ura juetihua IQUE ECUITA tunara jucha arida cuana queja inamereyaque. ⁴² Nenetitsuracue. Nedirura. Amenatu jehua ique ujeu cuana queja inamerequi juyaque, —jadya tuna Jesúsra acuare.

Jesús erisique dujutanacuareque

(Mt 26.47-56; Lc 22.47-53; Jn 18.2-11)

⁴³ Jesús quisaratiya jarijutu Judas junaticuare, tura mepehuaquedya datse. Ecuita jetiama tsehuetu cuacuare. Cuchiru tsehue, acui tsehue jadya tuna junaticuare. Pae cuanaja huaraji cuanara, cacuatsashati bahuityaqui cuanara, emuiba cuanara jadya tuna cuadishacuare. ⁴⁴ Junatima jariradya tuna Judasra cuejanaticuare: “Era dyahuanatiyaque, tudya tume. Neinacue. Risitsu, nedujucue”, jadyapa tujatu ecana junatimaradya anaticuare. ⁴⁵ Junatitsu tujatu Jesús jipeticuare.

—Banuchi, Ebahuityaquique.

Jadya aatsu tujatu Jesús dyahuanaticuare. ⁴⁶ Tura jadya ayajutu ecuita cuanara Jesús inaticuare. Inatsu tunajatu jida risicuare.

⁴⁷ Jesúsra mepehuaratu cuchiru baeque baina juque juputsu pae dyaque muidaque merequique ijaca pejuacuare.

⁴⁸ Tumetu Jesúsra isaracuare ecuita cuana jetiamaque:

—Micuana micuana jehua cuchiru tsehue, acui tsehue jadya ique inara, chiri puji inara ejeu bucha. Anichinedya tuque micuanaja emajaca ejudya jutidya ique ina ishucuchiruma, acuima. ⁴⁹ Dutya huecaca taa ique Yusuja etareju Yusuja quisarati bahuitya juchine. ¿Tume micuanara eje bucha juatsu inachine ama tuhua? Riya ique atayaqueri juya Yusu equeque quisarati cuejaqui cuanara cuejacuareque, Yusuja quisaratiju ehuene bae cuitadya, —jadya tuna Jesúsra acuare.

⁵⁰ Tuque quisaratiya tsunumeedyatu Jesúsra mepehua cuanaque dutya huanaterecuare. Jacacuare tuna Jesús.

⁵¹ Peadya ehue ebariratu Jesús tupujudya acuare, sahuana tsehue capirurritsu. Tumeque datse tunajatu inacara acuare. Sahuana camadya tuna inadaditsu se-cacuare. ⁵² Tunara inadadihuaju tujatu sahuana shanacuare. Quinajacameretitsutu huanacuare ecatacatique.

Jesús israelita cuanaja huaraji arida cuana ecasitati ducu dujutanacuareque

(Mt 26.57-68; Lc 22.54-55, 63-71; Jn 18.12-14, 19-24)

⁵³ Tuequedya tunajatu Jesús dujucuare pae dyaque muidaja etareju. Tuhuatu ecasitati jucuare pae cuanaja huaraji cuana, cacuatsashati bahuityaqui cuanaque, tumbaedy a israelita cuana emuiba cuanaque.

⁵⁴ Tumetu Pedrora tunara Jesús dujuyaju japa tupuaju acuare. Cuacualetu pae dyaque muidaja etare tsecue tupu. Etare tsecue junatitsutu sudaru cuana tsehue aninaticuare. Tuna tsehuetu etiqui bahuinitya jucuare.

⁵⁵ Pae cuanaja huaraji cuanara, dutya huaraji cuana tuhua ecasitati jucuare cuanaratu tyacara acuare Roma juque huaraji, tuque iyemere ishucue. Jadya ama bucha tunajatu dadicuare ama eje bucha eque jidama cueja ishucue. ⁵⁶ Jetiama tuhua jucuare cuanaratu pusha pusha tsehue jidamapa ejuu jadya acuare. Jadya ama bucha tunajatu daditaqui ama bacuare dutyara tupu tuque jidama ejuque. ⁵⁷ Eje uma quisaratiyaju bacatsutu uma chamacama huaraji cuanaja yacuaju netitsuranacuare quisarati ishucue. Pusha pusha tunajatu cuejacuare:

⁵⁸ —Cuejaya micuana ecuanara, icuene tuque quisaratiyaju bacachineque: “Rihuishatillaya tuque Yusuja etare ecuita cuanaja eaque. Rihuishatillatsu, quimisha huecaca juatsu tuque anucaya ecuitaja eaque ama”, jadya tuque ecuanara quisaratiyaju bacachine, —jadya tuna pusha pusha jucuare.

⁵⁹ Arepa ecana umada “Bacachine tuque ecuanara jadya quisaratiyaju”, jadya juya ama buchatu tunara cuitadya eje bucha adebataqui ama bacuare tunara quisaratiyaju bacahua tsehue.

⁶⁰ Tuna jadya juyaju bacatsutu pae dyaque muidaque netitsuracuare dutya tuhua cuanaja yacuaju. Turatu Jesús bacaduracuare:

—Bacahuadyami ecana micue ishucue quisaratiyaju. ¿Caquemitsatiya ama cuitadya mique? ¿Jadidyami quisaratichine, jadya ama ni taa?

⁶¹ Jesústu caquemitsaticuare ama. Yudijidyatu pae dyaque muidara bacaduranacuare:

—¿Midyami Mesías, Yusuja Emepeque? ¿Midyami Yusu Dyaque Jidaja Ebacuaque, aijama ni taa?

⁶² —Jejee, Mesiasdya ique; Yusuja Ebacuaque ique. Ejeque huecaca micuanara ique babuque Yusuja jida eque amaca eaniqui muidaju aniyaju. Tumbaedy micuanara babuque barepa huani ducu eque junanucayaju, —jadyatu Jesúsra acuare.

⁶³ Jadya quisaratiyaju bacatsutu pae dyaque muidaque cahuaicacuare. Cahuaicacuare una cachajaticuare, dyaque cuita ecahuitique ejitaju juishu.

—Sareya ama tuque ecuana peyaja riyaque jidama juchineque cueja ishu. ⁶⁴ Jesusratu Yusu cahuaishaya tuja quisarati tsehue. Micuanaratu bacahuadya tura quisarati jidamaque ayaju. ¿Eje bucha micuana amerecara aya? ¿Iyemerecara, iyemerecarama ni taa? —jadya tujatu acuare peya huaraji cuana.

—Jucha metse tuque. Pamajudya, —jadya tuna caquemitsaticuare.

Dutyaja tupu tunajatu inime jucuare.

⁶⁵ Jadya aatsutu umae cuanara ebutsequiniyu ecuedira acuare, eraca tsehue butsequini risi jadya. Jadya aatsu tunajatu bahuapaja bahuapaja acuare.

—¿Aira taa mi ahua? —jadya tunajatu acuare, ijaribayaque.

Tumbaedyatu sudaru cuanara bahuapajacuareadya.

Pedroro “Adebaya ama tuque era” jadya acuareque

(Mt 26.69-75; Lc 22.56-62; Jn 18.15-18, 25-27)

⁶⁶ Pedrotu juanicuare jari pae dyaque muidaja etare tsecue. Tuque tuhua juaniyaju nubitacuare tumeque etareju mere juyaque. ⁶⁷ Pedro etiqui cunu etiqui bahuni juyajutu epunara petanituacuare.

—Miquemi Jesús Nazaretju tsehue junenihuaquedya, —jadyatu Pedro epunara acuare.

⁶⁸ Pedrotu catehuaticuare:

—¿Aijama, mama! ¿Adebaya ama tuque era! ¿Ejeque cuana taa tuquemi jadya aya? —jadyatu Pedro caquemitsaticuare.

Tuequedyatu etare tsecue enubitaquiju netidirunucacuare. Jadya juyaju cuitatu tacure quiquecuare. ⁶⁹ Epuna etareju mere juyaratu banucacuare tuhua junetiyaju.

—Riyaque ecuita ri Jesús tsehue junenihuaquedya, —jadya tujatu acuare tuhua cuanaque.

⁷⁰ Tuquetu catehuatinucacuare:

—¿Aijama, mama! ¿Adebaya ama tuque era! —jadyatu pusha junucacuare.

Yaratupu juatsutu tuhua cuanara jadya anucacuare Pedro:

—Yuneri cuitadyami mique Jesús tsehue junenihuaquedya. Ecuanamami adebaya mique Galilea juque, —jadya tunajatu Pedro acuare.

⁷¹ Tunara jadya ayajutu Pedro caquemitsaticuare:

—¿Aijama! ¿Adebaya ama tuque tumeque ecuita micuanara ique jadya ayaque! Yusu bahue ique yuneri quisaratiya. Ique yuneri ama juyaque juatsu, Yusura panerecatura, —jadya tuna Pedroro acuare.

⁷² Tuque jadya quisaratiyaju cuitatu tacure quique beta jucuare. Jadya juyajutu Pedro huecatanacuare. Caadebaticuaretu Jesúsra jadya cuejachineque: “Tacure quique beta juma jarijumi catehuati quimisha juya. ‘Adebaya ama tuque era’ jadya aquimisha mira aya”. Jadique adebatsutu Pedro paa ebari jucuare.

Jesús Pilato queja dujutanacuareque

(Mt 27.1-2, 11-14; Lc 23.1-5; Jn 18.28-38)

15 Apudajudyatu pae cuanaja huaraji cuana caradatinucacuare emuiba cuana tsehue, cacuat-

sashati bahuityaqui cuana tsehue jadya. Tuhuatu jucuare dutya israelita huaraji cuana. Inime tunajatu bajejucare Jesús iyemere ishu. Erisi tunajatu Pilato Roma juque enaruqui cuarequi queja dujumerecuare. Pilato tunajatu tyaticuare. ² Tuja yacuaju netitihuajutu Pilatoro bacaduracuare:

—¿Midyami israelita cuanaja ecuari?

—Jejee, mira aya equedya, —jadya tujatu acuare.

³ Pae cuanaja huaraji cuanaratu pusha pusha cuita cuejacuare dyaque jidamapa ejuu jadya Pilatoja yacuaju. ⁴ Tumetu Pilatoro bacaduranucacuare:

—¿Bacaya amami ecana micue ishu dutya jidamaque quisarati ayaju? ¿Eje bucha juatsu tuquemi ecana quemitsaya ama? —jadyatu Pilatoro Jesús acuare.

⁵ Jesusratu quemitsacuare ama ni peadya quisarati tsehue. Jadya baatsutu enaruquique anajacatacuare.

Pilatoro “Jesús pamajudya” jadya acuareque

(Mt 27.15-31; Lc 23.13-25; Jn 18.38-19.16)

⁶ Dutya maratu Pilatoja bahue jucuare Pascua chine ishu etare apudaju erisi netiyaque inajaca, ecuita cuanara peadya ejeque inajacamerecara ayaque camadya. ⁷ Tumepatyatu erisi neticuare ecuita etare apudaju Barrabás bacani. Roma juque enaruqui tsehue patu cahuaicuare. Tuque, tuja ecare cuana jadya patuna enaruqui tsehue cahuaitsu quiyeticuare. Jadya tibudyapa tunajatu etare apudaju ishacuare. ⁸ Jettiamatu ecuita Pilatoja etare tsecue casitaticuare. Bacaticuare tuna:

—Nerecabacue ecuana. Inajacacue micue bahue ecuana mepeyaque, —jadya tunajatu aticuare.

⁹ Jadya tunara bacayaju bacatsu tuna Pilatoro bacaduracuare:

—¿Jesús tuque micuana eaqueja inajacamerecara aya, israelita cuanaja ecuari jadya juyaque? —jadya tujatu ecana bacaduracuare.

¹⁰ Turatu adebacuareadya ecuita cuanara ama Jesús ujeu bayaque, tunaja huaraji cuanara camadya. Bahuedyatu jucuare jishatsu huaraji cuanara Jesús inamerehuaque. ¹¹ Jadya ama buchatu pae cuanaja huaraji cuanara ecuita cuana capuritishacuare.

—Pilato nebacacue, tuja Barrabás camadya inajacamere ishu, —jadya tunajatu ecana acuare.

Ecuita jetiera amatu Pilato bacacuare, tuna huaraji cuanara cuejamerehuaque.

¹² Tume tuna Pilatoro bacaduranucacuare:

—¿Tume jatsu micuanara ique ai amerecara aya Jesús micuanaja ecuari tsehue?

¹³ —¿Curusuju tatamerecue! ¿Tuhua pamaju! —jadya tuna caquemitsaticuare quique eque.

¹⁴ —¿Eje bucha juatsu? ¿Ai tujatu jidama achine? —jadya tuna Pilatoro bacaduracuare.

Abacatanacuare ama tuna quiqueyaque:

—¿Curusuju tatamerecue maju ishu!

¹⁵ Pilatoratu ecuita cuana pureamaturacara acuare, tuatsehue ecahuaitiiju. Jutaquijudya tujatu Barrabásdya inajacamerecuare. Tuequedya tujatu Jesús mena-

jetyacuare sudaru Romaju cuanaque, tunaja catsacatsa, curusuju tata jadya aishu.

¹⁶ Icuene tunajatu dujuacuare Pilatoja etare tsecue. Sitacuare tuna dutya sudaru cuana tuhua anicuare cuanaque. ¹⁷ Ijahue ayaquedya jutidya tunajatu ecuari edujuta bucha dujue acuare. Dyaque jutuyaque tacatsu tunajatu jutumerecuare una sehuesahuauque, ecuari arida cuanaja ejutuqui tsehue. Iyucaju tunajatu jutumerecuare cunu sahua cuija epicaque.

¹⁸ —Emuita paju israelita cuanaja ecuari muidaque! —jadya tuna jucuare, tuque ijaribayaque.

¹⁹ Acui tsehue tuna iyucaju acuare. Ecuedira tuna acuare. Jadya aatsu tuna tuja yacuaju chichucata jucuare, tuque ijahue ayaque. ²⁰ Jadya ijahue ijahue amena aatsu tunajatu tacanucacuare una sehuesahuauque, tujaque cuita una jutumerenuca ishuh. Jadya aatsu tunajatu curusuju tata ishuh dujuacuare.

Jesús curusuju tatatanacuareque

(Mt 27.32-44; Lc 23.26-43; Jn 19.17-27)

²¹ Epu ebari juque cuinanayara tunajatu tsurut-sacuare ecuita Cirene juque, Simón bacani. Simóntu Alejandro, Rufo jadyaja etataque jucuare. Eje queja japada juneniyaque juetiyaque tunajatu tsurutsatsu casada tsehue curusu mapamerecuare Jesús tatatana ishuh juyaque.

²² Tudy tuna dujuacuare Jesús Gólgota bacani emajacaju. Tumequetu jucuare uhua cuemusuh, emaju iyuca baeque. ²³ Tuhua tunajatu Jesús ijimerecara acuare uva nacaca esasanashaque mirra tsehue eujaque, ecuita uje cuana ujejarasha ishuh. Jesusratu ijicarama acuare. ²⁴ Jadya aatsu tunajatu curusuju tatacuare. Curusuju amena tatatanahuaju tuna dadu ijahue jucuare, Jesúsra jutuhua cuanaque ejeja ejeja juyaque tuna cama cajaquetibare ishuh.

²⁵ Apudajudyah las nueve cuana ni tunajatu curusuju tatacuare. ²⁶ Tauraju ehuenequé tunajatu shuracuare ebarucue tuja iyuca dyaque. Taurajutu ehue jucuare eje bucha juatsu Jesús curusuju tatatanahuauque bahue amere ishuh. “Riyaque ri Jesús, israelita cuanaja ecuari” jadyatu ehue jucuare. ²⁷ Tumebaedya tunajatu beta ecuita casada tsehue ai secaquique ecatse curusuju tatacuare, Jesúsja jida eque amaca, peya jani eque amaca jadya. ²⁸ Icueneta huenedyatu Yusuja quisarati atanacuare: “Yusuja Emepeque ujeu baqui cuanaratu quiyeti puji bucha abuhue”. Tumetu icueneta cueja atanacuare bae cuitadya judadicuare.

²⁹ Tueque cuetiya cuanaratu ijaribacuare iyuca huinu huinu tsehue tuque asicaba, bijidamadura jadya ayaque:

—Miquemi dyaque casada cabatichine Yusuja etare rihuisha ishuh. Quimisha huecaca juatsupa nityatsuranucaya, jadyami juchine. ³⁰ Yuneridya ni micue casa aniyah, quinajacamereticue mita taca. Butecue curusu juque, —jadyatu ecuita cuanara acuare, tuque ijaribayaque.

³¹ Pae cuanaja huaraji cuanara, cacuatsashati bahuityaqui cuanara jadya tunajatu ijillahuanacuare:

—Peya cuana inajacamere ishupa tuja casa aniyah. Tumetu tuta taca quinajacameretitaqui ama cabatiyah. ³² Mesías, Yusuja Emepequepa jadyatu juchine. Ecuana naja ecuari dyaque aridaquepa, jadyatu juchine. Curusu juque ni buteyah, tume tuque ecuana ejeneyah tuque Mesiasque, —jadya tuna tuna cama jubarecuare, tuque ijahue ayaque.

Chiri aridaque ecatse tuatsehue curusuju tatatanacuareratu ijillahuananucacuareduyah.

Jesús curusuju majucuareque

(Mt 27.45-56; Lc 23.44-49; Jn 19.28-30)

³³ Tumetu tumeque chinequeja, barepatyah eque las tres chinequeja dutyah yahua apunaterecuare. ³⁴ Las tres chinequeja dyanetu Jesús jebudah quiquacuare:

—Eloí, Eloí, ¿lema sabactani? (“Ecue Etata Yusu, ¿eje bucha juatsu mira jacahua?” jadique) —jadyatu quiquacuare.

³⁵ Eje uma tuhua neticuare cuanaratu bacacuare. Elías tura ihuarayah bucha jutidyah tunajatu bacacuare.

—Nebacacue. Elías béru Yusu equeque quisarati cuejaquique jucuareque tujatu ihuarayah, tuque tsahuana ishuh, —jadya tuna jucuare.

³⁶ Jadya Jesús quiqueyaju bacatsutu eraca pucaca jiteque tsajajaajecuare. Mullaticuare tujatu uva nacaca esasanashaque patsedaju. Mullatsu tujatu acui baru-daju risitsu nityatsuratsu ecuatsaju jipemerecuare tuja susu ishuh datse.

—Nebara, ejepa Elíasra junatsu butyanayah curusu juque, —jadyatu jucuare, tuque ijaribayaque.

³⁷ Tumetu Jesús quique pidyah casada juatsu, amena ishuh canajeti pidyah juatsu majucuare. ³⁸ Tuque majuyajudyatu Yusuja etare juque junudah eshuraque Dyaque Muidaque penequique chajatanacuare ebarucue eque emaque queja. ³⁹ Tuhuatu neticuare curusu tuyu cien sudaru cuana cuatsashaquique. Jesús majuyah baatsutu jucuare:

—Pushah ama cuitadyah tucueri riyaque ecuita Yusuja Ebacuaque juhah, —jadyatu jucuare.

⁴⁰ Tuhuatu jetiamah epunah cuana neticuare japadah eque capetatiyah cuanaque. María Magdalajuh aniyaque-tu tuhudyah jucuare, tumebaedyah peyah María, Santiago “Barudamah”, José jadyah ecatsejah ecuaque. Salomé, tumebaedyah peyah cuana umadah tuna tuhuh netibarecuare. ⁴¹ Jesús Galileajuh cuayah patyah equetu tumeque epunah cuana tuatsehue junenicuare, tuque tsahuah juyaque. Dutyah riyah cuanaque epunah cuanatu tuatsehue jecuare Jerusalénjuh.

Jesús emajuque tumu canih epurujuh ishatanacuareque

(Mt 27.57-61; Lc 23.50-56; Jn 19.38-42)

⁴² Ijetituh amena nubihuie cuitah jucuare. Cuethihuetuh amena jucuare huecaca ecuanajah canajarah huecaca ishuh cabajetih bahueque. ⁴³ Tumetu ijeti butemah jarihudyah, ecuitah José Arimateajuh cuinanacuareque juticuare Pilato queja. Josétuh huarajih dyaque jidah, emuique jucuare. Tuquetuh peyah huarajih cuana tsehue ecadutyatiquedyah jucuare. Jadyah amah buchah tujatu ejeneacuare

Jesús Yusuja enaruqui juishu ecuadishaque. Pilato queja junatitsu tujatu bacaticuare:

—¿Ebutyamereu ama mira Jesús curusuju emaju badeyaque? Paishati caniju, —jadya tujatu Pilato aticuaire.

⁴⁴“Jesús amena majuhua” jadya bacatsutu Pilatora ejenecarama acuare. Ihuaracuare tujatu sudaru cuana cuatsashaquique tuhua Golgotaju jucuareque. Tuque jutihuaju tujatu bacaduratsacuare:

—¿Are majuhuadya Jesús? ¿Ejetsunue cuitatu amena maju jida juhuaque? —jadyatu Pilatora acuare.

⁴⁵Sudaru cuana cuatsashaquiratu quemitsacuare:

—Jejee, yuneridyatu majuhua.

Jadya bacatsutu Pilatora acuare José:

—Butyamereitsu emaju papa ishuhua cani epuruju ishaticue.

⁴⁶Tumetu Joséra quemiticuare sahuana ishuhua eju-tuqui dyaque jidaque. Tura jadya ayaju tujatu curusujuque butyamerecuare. Butyamereitsu tujatu piruricuare sahuana tsehue. Ishaticuare tujatu tumu cani jadya ishuhua epuruju. Jesús emajuque ishatsu tujatu etsecue tachimerecuare tumu ebari tsehue. ⁴⁷María Magdalajura, María Jesúsja ecuaquera jadyatu petacuare. Bacuare tatse Jesús emajuque eju ishatanayaju.

Jesús chacha netitsuranucacuareque

(Mt 28.1-10; Lc 24.1-12; Jn 20.1-10)

16 Amena ijete nubihuaju, canajara huecaca cuetihuajutu, quimisha epuna cuanara ijimedaque quemiticuare Jesús emaju jarayaque ijimeda tsehue ati ishuhua. Ijimedaque quemira cuacuare cuanaque tuna jucuaire: María Magdala juque; María, Santiago “Barudamaja” ecuaque; Salomé jadya.

²Ijete cuinanaya tsehuedya, apudajudya cuita dumicu huecacatu epuna cuana cuahuecacacuare Jesús emajuque tumu cani epuruju ishatanachineju. ³Tuhua cuayaque tuna juajecuaire tuna cama:

—¿Aira dyadi tuque ecuanaja tumu ebari tecuya emaju cani tsecue penequique? —jadya tuna cabacaduratiajecuaire.

⁴Junatiyara tunajatu banaticuare tumu ebari canitsecue penequique tuhua ama. Etecu tuna banaticuare. ⁵Nubinaticuare tuna caniju. Nubitsu tunajatu banaticuare ehue ebari jida eque amaca juaniyaju. Eju-tuqui paja tshuetu ecajututi jucuaire. Tuque baatsu tuna dyaque jecutanacuare. ⁶Tura tuna isaratsacuare:

—Necuecutanaume. Jesús, Nazaret juque, curusuju tatatanachineque sare micuana juya. Rehua amarique. Chachatu netitsuranucahua. Nepetanacue tunara ishachineju, yuneri tuque rehua aijamaque bahue juishu. ⁷Petatsu ebajarara nederunucacue. Tura mepehua cuanaque necuejadirucue. Pedro neri neri necuejaticue. “Jesús patu icuenetadya cuaya Galileaju. Tuhadyapa tura micuana ihuatiya. Tuhadyapa tuque micuana batiya, tura micuana icuena cuejachine baedyá”, —jadya tujatu ecana cuejamerecuare.

⁸Jadya ayajutu epuna cuana masadama emaju cani juque dirunucacuare. Tsajaja cama tuna dirucuaire. Tadadaya jadya tuna bajida juatsu jucuaire. Epu ebariju dirunucayara tunajatu ni ejequedya jutidya cuejacuaire, dyaque bajida cuita juya tibu.

María Magdalaju aniya queja Jesús cabamereticuareque

(Jn 20.11-18)

⁹Jesús chacha junucatsu, netitsuratsu dumicu huecaca juque tujatu icuene cuita cabamereti ishuhua acuare María Magdalaju anicuareque, tura icuene pacarucu ijahua cuana ijehuecuinacuareque. ¹⁰Jesúsra cabamereti ishuhua ahujutu tumeque epuna cuacuare tura mepehua cuanaque cuejara, Jesús amena enetitsuranucaque. Tuna queja junatitsu tujatu ecana peya inime, paya jadya juyaju banaticuare. ¹¹“Jesús tu amena enetitsurunuca. Era cuitadyatu bahua”, jadya tura cuejayaju, tunajatu ejenecuaire ama.

Jesús beta tura mepehuaque ecatsé queja cabamereticuareque

(Lc 24.13-35)

¹²Beta tura mepehuaque ecatsé peya epuju cuayaju tatse Jesúsra cabamereti ishuhua acuare. Adeba piisi ama tatsejatu acuare, tunara babanicuare bucha ama cabamereticuare tibu. ¹³Pana adeba aatsu tatse yudijidya cuanuca jucuaire peya cuana cuejara. Jadya cuejaya bacatsutu umae cuanara ejenecarama acuare.

Jesúsra camadya ishuhua tura mepehua cuanaque cuatsashacuareque

(Mt 28.16-20; Lc 24.36-49; Jn 20.19-23)

¹⁴Peadya tunca peadya earacana tura mepehua cuanaque mesaju ararayaju tuna Jesúsra cabamereti ishuhua acuare. Jesúsra tuna nereda acuare:

—Eje umara micuana cuejachine tunara cuitadya ique chacha banucachineque. Ejenechine ama micuana ecana, tunara cuejayaju. ¿Eje bucha juatsu? ¿Eje bucha juatsu micuana niju pajida quejeneti baecua? —jadya tujatu ecana acuare.

¹⁵Isaranucacuare tujatu ecana:

—Necucue ecue quisarati dutya queja cuejara.

¹⁶Necuejacue ecana: “Ejeque, Jesús queja catyatitsu cutsameretiyaquetu Yusu queja judirubuque. Ejeque, Jesús queja catyatiyaque amatu ijahuaja etiquiju ijehuetanabuque”, jadya ecana necuejaticue. ¹⁷Eratu tyabuque eaqueja catyatiya cuanaque casa, ejeque ecuitaja ataquique ama aishu. Ecue casa tsehue tunajatu ijahua cuana ijehuecuinabuque. Ecue casa tsehue tunajatu yana cuana bape eque cuejabuque ecue quisarati. ¹⁸Inaya ni tuna bacua dyaque ujeda cuanaque, ijija ni tuna ai venenuquique, eje bucha ama tuna jubuque. Ujejeda cuanaque tunajatu jabatsu chachanebuque, —jadya tujatu ecana acuare.

Jesús barepaju tsuracuareque

(Lc 24.50-53; Hch 1.6-11)

¹⁹ Tuna cueja amena aatsutu Ecuana Cuat-sashaquique Jesús cuacuare barepaju. Aniticuaretu eaniqui muidaju Etataque Yusuja jida eque amaca.

²⁰ Tuequedyatu Jesúsra mepecuare cuanaque

cuacuare dutya queja tuja quisarati cuejara. Jesús bacue tuna tsehuedya cuacuare. Casaturacuaretu ecana. Tuna quisarati jidaque cueja juyaju tuna Jesúsra ejeque ecuitaja ataquique ama amerecuare, tunara quisarati cuejayaque Yusu jaque yunerine ishu.

Riya tupu camadya micuana cuejahua.

Marcos

LUCAS

Riyaque quiricari Lucasra huenequere. Casamati pujitu jucuaré. Turatu Pablo tajicuare Jesúsja jidaque quisarati cueja juyaju.

Turatu Jesús ECUITA jadya cuejae acuare. Huenequere tujatu Jesúsja ujejeda cuana tsehue canerecabati anicuaréque, ujejeda cuanaque chachanecuaréque, ijahua cuanara quijahuatishaya cuanaja ijahua cuana ijehuecuaréque jadya.

Tumebaedyatu Lucasra ejitaju acuare Jesús YUSUJA EBACUAQUEque. Huenequere tujatu Jesús Yusuja casa eque eje bucha jucuaréque. Tumebaedyatu tujatu huenequere Jesúsra bahuityacuareque. Riyaque quiricajuri umada huenetanacuare Jesús eje bucha jucuaréque, tura bahuityacuareque peya quirica cuana Mateora, Marcosra, Juanra jadya huenequere cuanaju aijamaque.

Riyaque quiricajuri ehue ne aniya:

Juan Ecuíta Cuana Utsaquique cuinanacuareque (capítulo 1)

Samaria juque ecuíta jidara israelita ujedá eque tsahuacuareque cuatsabiji (cap. 10)

Ebacuaquera etataque jacacuareque cuatsabiji (cap. 15)

Chipirudaque, Lázaro jadya eje bucha jucuaréque cuatsabiji (cap. 16)

Peadya tunca ecuíta pusesera ririshayaque Jesúsra chachanecuaréque (cap. 17)

Fariseo, enaruquija ishú chipiru sitaquique jadya Yusu tsehue quisaraticuaréque (cap. 18)

Zaqueo Jesús queja catyatitsu inime cacuareticuareque (cap. 19)

Catibuti ishúque quisarati

1 Riya micue quirica cuadishaya, Teófilo. Hueneya ríque quirica mique Jesucristo eje buchique bahue amere ishú. ² Umaeratu amena huenequeredya Jesús eje bucha riyaque yahuaju junahuaque. Jadique quisarati huene ma jaríque tuna tura mepehua cuana tsehue, tuque eje bucha juyaju petaqui jucuaré cuana tsehue, jadya tuna quisaraticuare. Eje bucha juhuaque pana bahue juatsu piisi tunajatu huenequere tuque jucuaré cuanaque. ³ Eratu adebacuare dutya inime eque, inime tsapema tsehue catibutihua eque terediruya tupu. Jidadya tuque adebaya riya cuanaque huene ishú, mique ecue dyaque iyuhuedaque Teófilo.

⁴ Hueneya tuque micue era riyaque cueja, mique tunara bahuityacuareque, pusha ama cuitadya yunerique mique bahue juishu.

Barepaju Yusu tsahuaquira Juan Ecuíta Cuana Utsaquique cuinanayaque cuejanacuareque

⁵ Teófilo, icuene mique cuejaya Zacarías ehuanéque Elisabet tsehue eje bucha jucuaréque. Herodes Judeaju enaruqui jucuaré patyatu jadya jucuaré. Israel eque ejuracanaquetu Zacarías bacani jucuaré. Paetu jucuaré. Abías cuare juquetu jucuaré. Tuja ehuanéquetu Elisabet bacani jucuaré. Tumeque epunatu jucuaré pae israelita Aarón bacani eque ejuracanaque. ⁶ Betadya tatse tuyu jucuaré Yusuja yacuaju. Tatse tatse anicuare Yusura cuatsashahua eque. Jadya tibu tatse ni ejeradya jutidya ni aiju jucha metse jadya acuare ama.

⁷ Bacuama tatse jucuaré, Elisabet cabacuati baecua juya tibu. Betadya tatse amena esiri jucuaré.

⁸ Jadyatu jucuaré Zacarías queja inime, tuque Yusuja etareju mere juyaju. Quimisacarucu huecaca cama tunajatu mere ishúque jucuaré. ⁹ Pae cuanaja bahue tunajatu peadya tuhuaque mepe bahue junenicuare muru ijimedaque pahua ishú Yusuja etareju Muida Cuitaque Amaju. Tume tunajatu Zacarías mepecuare muru ijimedaque pahua ishú. ¹⁰ Tura muru ijimedaque pahuayajutu jetiama ecuíta caradatihua cuanaque etare tsecue Yusu tsehue quisarati bahue jucuaré.

¹¹ Tumetu Zacarías queja cabamereticuare barepa juque Yusu tsahuaquique Yusura cuadishayaque. Tumu mesa tunara muru ijimedaque pahuati bahuejutu jida eque amaca netinacuare. ¹² Tuque baatsutu Zacarías ana ajacatacuare. Dyaque bajidatu jucuaré.

¹³ Yusu tsahuaquiratu isaracuare:

—Zacarías, bajida juume. Yusura tuque micue quisarati bacahua. Ayadya tujatu mira bacahua equedya. Micue huane Elisabet tu cabacuatiya. Peadya ebacua tujatu adadiya. “Juan” tuja ebacani paju. ¹⁴ Mique, tumebaedyá peya cuana jadya micuana pureama jubuque ebacua nana cuinanahuaju. Dyaque jida micuana jubuque, Yusura ecuíta dyaque inime metseque bucha baya tibu. Turatu ijibuque ama uva naca esasanashaque ni peya nijuqui ishúque. Tuque cuinama jarijudyatu Yusuja Espiritu tuatsehue jubuque. ¹⁶ Turatu jetiama israelita cuana inime cacuaretishabuque, Yusu iyuhueda bamere ishú.

¹⁷ Ecuana Cuatsashaquira Yusuja quisarati cuejati-bunema jarijutu micue bacuara jadya cuejabuque: “Nequihuaticue, Ecuana Cuatsashaquique junayaju

ishu". Tujatu tumeque casadya anibuque Yusu equeque quisarati cuejaquique beru Elías jucuare bae. Yusuja Espíritu tu micue bacua tsehue jubuque, béru Elías tsehue jucuare bae. Micue bacuaratu etata cuanaque queja ebacua cuanaque iyuhueda bamerebuque. Turatu Yusu adeba baecua cuanaque Yusu iyuhueda amerebuque. Jadya bajejee tujatu abuque ecuita cuana, Ecuana Cuatsashaquique jida tsehue batsa ishu, —jadyatu Yusu tsahuaquira acuare Zacarías.

¹⁸ Zacariasratu bacaduracuare Yusu tsahuaquique:

—¿Eje bucha adebae jatsu tuque eau yuneridya jadya juyaque? Esiri cuita dyadi taa ique, ecue ehuanebacue tumbaedy, —jadya tujatu acuare.

¹⁹ Yusu tsahuaquiratu quemitsacuare:

—Ique Gabriel bacani; dutya huecaca Yusuja yacuaju tuque mere juyaque ique. Turadya cuadishahua mique isara ishu, riyaque jidaque quisarati cueja ishu. ²⁰ Era cuejahuaque mira ejenehua ama tibusi iyacua quisarati baecua juya. Quisaraticaya mique, micue bacua cuinanaya tupu. Yuneridya, jadydyatu judadiya, —jadya tujatu acuare Zacarías.

²¹ Tuque jadya juya tsunumeetu jetiama ecuita etsecueju caradaticuare, Zacarías cuinanayaque ihua.

Tume tuna cabacaduratibarecuare:

—¿Eje bucha juatsutu Zacarías tsunutaya?

²² Amena tuque cuinanaetitsu tujatu ecana isaracaratse acuare. Zacariastu quisaratitaiqui ama cabaticuare. Anamatu jucuare. Adebacuaredya tunajatu Muida Cuita Amaju barepa juque ai cuana bahuque. Emetucu tsehuedya jutidya tujatu ecana piyecuejacuare tura bahuque.

²³ Amena Yusuja etareju mere ishuque huecaca tuja terehuajutu Zacarías dirucuare tuja etareju. ²⁴ Jadya juatsu tujatu ehuanequé Elisabet maqui jucuare. Pishica baditu cuinana baecua jucuare tuja etare juque. Inime tujatu jucuare:

²⁵ —Yusutu dyaque jida eatsehue! Nerecabahua tura ique bacuamaque ebisuuju, —jadyatu jucuare.

Barepa juque Yusu tsahuaquira Jesús cuinanayaque cuejacuareque

²⁶ Shucuta badi juhuajutu Yusura cuadishacuare tuque tsahuaquique Gabriel bacani Nazaret epu ebariju Galilea yahuaju. ²⁷ Epuna ehue ebari María bacani deca baecua queja tujatu cuadishacuare. Tumeque epuna ehue ebarijatu anicuare caquemiti ishuque quisarati ecuita José bacani tsehue. Josétu jucuare ecuari David eque ejuracanaque. ²⁸ Yusu tsahuaquiquetu nubitacuare María aniyaju. Nubitsu tujatu isaraticuare:

—Bandía, mama. Isaraya mique era. Yusu tu miatsehue dyaque jida. Tuquetu miatsehuedya. Turami mepehua dutya epuna cuana ducuque, —jadya tujatu aticuare.

²⁹ Amena barepa juque Yusu tsahuaquique baatsu, tuja etsuri bacatsu tujatu eje bucha adebataquima, ni daditaiqui inime bacuare. Tume tujatu inime jucuare:

—¿Eje bucha juatsu tura jadya isaranae aya? —jadyatu jucuare.

³⁰ Tumetu Yusu tsahuaquira acuare:

—Bajida juume, María. Yusutu miatsehue dyaque jida. ³¹ Ejetsunue juatsu amami carecani isaqui juya. Peadya ebacua tuque micue cuinanaya. JESUS bacani acue. ³² Tuquetu dyaque inime metseque judadiya. YUSU DYAQUE CASADAJA EBACUAQUE bacanitu judadiya. Micue bacuatu Yusura ameredadiya ecuari, tuja ebabaque David amerehua bucha. ³³ Cuatsashajacabuque ama tujatu israelita cuana. Terebuque ama tujatu ecuari juque inime, —jadya tujatu María acuare.

³⁴ Tumetu Mariara acuare:

—Ique deca baecua. ¿Eje bucha cabacuatie ejuu? —jadya tujatu acuare.

³⁵ Yusu tsahuaquiratu quemitsacuare:

—Yusuja Espíritu tu miaqueja junaya. Yusu dutya casa aniyarami jadya amereya. Jadya tibudyatu ebacua nana cuinanayaque YUSUJA EBACUAQUE bacani juya.

³⁶ Tumbaedyatu micue ata Elisabetja cuinanayadya ebacua, arepa tuque esiri juya ama bucha. Tunara “cabacuati baecua” jadya ayaquetu amena shucuta badi maquique. ³⁷ Aijamatu Yusuja ai ataqui amaque, —jadyatu Yusu tsahuaquira acuare.

³⁸ Tumetu Mariara acuare:

—Yusu Ecuana Cuatsashaquira cuatsashaya eque juishuque ique. Paju taa mira ique cuejahua eque, —jadyatu Mariara acuare.

Tuque jadya cuejatsutu Yusu tsahuaquique dirunucacuare.

María Elisabet queja tarepera cuacuareque

³⁹ Eje uma huecaca ama jadya juhuaque cuetihuajutu María cabajejetitsu cuacuare Judea emata epuju, Elisabet, Zacarías ecatsé aniyaju. ⁴⁰ Tuhua junatitsutu nubinaticuare tatseja etareju. Etareju nubinatitsu tujatu isaranaticuare tuja ata Elisabet. ⁴¹ Mariara jadya isaranatie ayajutu Elisabetja ebacua ecare cani juque bucucucuaré. Jadya juyajutu Elisabet caadebaticuare Yusuja Espíritu tuatsehueque. ⁴² Tume tujatu María jadya acuare:

—Yusurami mepehua dutya epuna cuana ducuque mique peadya. Tuquetu miatsehue dyaque jida. Tumbaedy tujatu mepehua micue bacua cuinanadadiyaque, dyaque jida tuatsehue juishu. ⁴³ ¿Ai jatsu ique, Ique Cuatsashaquija ecuque eaqueja tarepera jeishu? ⁴⁴ Mira isarayaju micue etsuri bacaya tsehuedya cuitadya tuque ecue ebacua nana ecarecani juque bucucuhua, pureama juatsu. ⁴⁵ Miquemi dyaque jida, mique tyatana ana atahuaque tyatahua tibu. Yuneri cuitadyatu Yusura yana ahua equedy judadiya, —jadyatu Elisabetra atsacuare.

⁴⁶ Tumetu María jerucuare Yusu pureama ayaque:

“Dutya ecue inime tsehue mique pureama aya, Yusu Ique Cuatsashaquique dyaque casadaque.

⁴⁷ Mique Ique Inajacamerequiradya ducuta pureama amereya.

⁴⁸ Mira jida tsehue mepehua.

Mique merequique jetiedyaque ique.
Riyaque huecaca eque amena dutyara:
‘María peadyatu aniya epuna Yusura mepehuaque,
tuatsehue dyaque jida juishu’ jadya abuaque.

⁴⁹ Mique dutya casa aniyaquemi dyaque jida juhua
eatsehue.

Miquemi juchama neri.

⁵⁰ Micuetu nerecabajacanime ama mique muibaqui
cuanaque.

⁵¹ Miquemi dyaque casada.

Casumitiya cuanara inime pireya cuanaquemi pana
yuamatura aya.

⁵² Casada cabatiya cuanaque tuquemi casadama
amereya.

Casadama cabatiya cuanaque tuquemi casada
amereya.

⁵³ Nerecada cuanaque tuquemi dutya tunara ai
sareya cuanaque tyaya.

Chipiruda cuanaque bacuemi ecana ni ai buchique
tyaya ama.

⁵⁴ Micuetu tsahua bahue Israel eque ejuracana cua-
naque, mique merequi cuanaque.

Ni eje tupu mira ecuana iyuhue tsehue bajacaya ama.

⁵⁵ Jadidya tuquemi quisarati tyahua ecuanaja ebaba
Abraham, dutya tuque eque ejuracana cuanaque
jadya.

Tereya ama tuque micue ecuana tsehue ecuana nere-
caba ishuque”,

jadyatu Mariara Yusu jeru eque acuaque.

⁵⁶ Quimisha baditu Maria Elisabet queja aniticuaque.
Jadya juatsutu dirunucacuare tuja etareju.

Juan Ecuata Cuana Utsaqui que cuinanacuareque

⁵⁷ Tumetu Elisabetja cuina ishuque huecaca juetic-
uaque. Ejitajutu acuaque peadya deca ebacua. ⁵⁸ Yusu Elis-
abet tsehue dyaque jidaque bahue juatsutu tuja ata
cuana tuaqueja cuacuare, “Dyaque jidatu Yusu miatse-
hue” jadya cuejara.

⁵⁹ Ebacua nanaja cuinana huecaca catsurutiyajutu tu-
ja ata cuana, tuque japadama aniya cuanaque jadya
chine ishu cuejatanacuare. Tumeque huecacatu
ebacua nana ecuita huitu biti tubutanacuare tunaja
bahue Israel eque ejuracanaque jadya adebate
juishuque. Etataque “Zacarías” bacani datse tunajatu
acara acuaque. ⁶⁰ Tume tuna ecuaque Elisabetra jadya
acuare:

—“Juan” bacani paju, —jadya tujatu ecana acuaque.

⁶¹ —¿Eje bucha juatsu? Aijama taa tu Juan bacani
micue ata ni peadya, —jadya tunajatu acuaque Elisabet.

⁶² Elisabetra “Zacarías” bacani acarama aya bacatsu,
“Juan’ bacani paju”, jadya ayajutu ecuita cuanara eme-
tucu tsehuedya jutidya ebacua nanaja etataque ba-
caduracuare:

—¿Ai bacani tuquemi amerecara aya? —jadya.

⁶³ Tuja emetucu tsehue piye cuejatsu tujatu ba-
cacuaque aiju huene ishuque. Inatsatsu tujatu
huenecuare, “Juan’ bacani paju”. Dutyara tunajatu
bape ebari bacuaque. ⁶⁴ Jadya huenetsutu Zacarías quis-

aratitibunenuacuare. Quisaratinuacatsu tujatu Yusu
pureama atibunecuare.

⁶⁵ Dutya tuque japadama aniya cuanaque tuna ana-
jacatacuare. Tsapecuare tunajatu quisarati dutya Judea
yahuaju emata cuanaju anitaya cuana queja Zacarías
eje bucha juhuaque. Cuatsabiji tunajatu acuaque,
ebacuaqueja ebacani cuejatsupa amena quisaratinu-
caya jadya. ⁶⁶ Dutya tumeque cuatsabiji jadya
juhuaque bahue juya cuanara tunajatu bape ba-
cacuaque. Cabacaduratibarecuare tuna:

—¿Aitu judadibuque tumeque ebacua nana? —jadya
tuna jubarecuare tuna cama.

Yuneridya tucuetu Yusu Ecuana Cuatsashaquira
naruya, tsahuaya jadya aya eje tupu tuque aniya jari
tupu.

Zacariasra jeru acuaque

⁶⁷ Tumetu Yusuja Espiritura ebacua nanaja etataque
Zacarías jerushacuare:

⁶⁸ “Yusu Ecuana Cuatsashaquique, pureama ea jucue.
Miquemi Yusu ecuana Israel eque ejuracana cuanara
muyiaque.

Emuita mique, ecuana Ijahua quejaque inajacamer-
era jehua tibu.

⁶⁹ Mira tuque ecuanaja Ecuana Inajacamerequique
casadaque cuadishahua.

David eque ejuracanaque tume.

⁷⁰ Jadya tuquemi quisarati iyacuare mique eque quis-
arati cuejaqui cuana eque béru yuequedya.

⁷¹ Inajacamerebuque micuana era dutya micuana bi-
jidamaduraqui cuana quejaque, tumebaedya micuana
ujeu baqui cuana quejaque.

⁷² Anibuque tuque ecue canerecabati micuana tse-
hue, micuana eque ejuracana cuana tsehue jadya.

Judadima ama amatu judadibuque era micuana eje
buchu aana ahuaque’ jadya mira ecuana ahua.

⁷³ Riyaque tuquemi quisarati tyacuare ecuanaja eba-
ba Abraham:

⁷⁴ Eratu mique eque ejuracana cuanaque
cuinanashabuque tuna ujeu baqui cuana quejaque, tu-
naja ique bajida tsehue ama mere ishu.

⁷⁵ Ecue cuanaque tuna amerebuque.

Tuyu tuna anishabuque ecue yacuaju’ jadya tuquemi
Abraham tyaana acuaque”,

jadyatu Zacariasra acuaque tuque pureama ayaque.

Jadya quisarati au jadya juatsu tujatu anucacuare
quisarati ebacuaque Juanja ishu.

⁷⁶ “Miquemi ecue ebacua.

Miquemi Yusu ebarucue aniya equeque quisarati cue-
jaqui judadiya.

Ecuana Cuashatsaqui que junama jarijumi tuque ju-
nayaju ishu ecuita cuana bajeje ishu jubuque.

⁷⁷ Miratu cuejabuque micue ata cuana Yusura tuna in-
ajacamerebuqueque, tunaja jucha cuana till-
abuqueque jadya.

⁷⁸ Yusura ecuana inajacamerebuque ecuana hue-
caquique junatsu, ijetera huecacayaju yahua udaya
buchu huecaera.

⁷⁹ Tura ecuana huecanaya ecuana apuda ducu aniya cuanaque, ecuana maju mubajacaya ama cuanaque.

Tura ecuana Yusu tsehue jida amerencaya, tuatsehue ecuana eje bucha tsehue ama ani ishu", jadyatu Zacarías jucuare jeru eque.

⁸⁰ Ebacua nana bacue ariari juajecuare. Quinimetiajecuare. Amena ecuita juatsutu anicuare epu ebari japada anitaya cuanaju. Tuhuatu anicuare, tuja ata israelita cuana Yusuja quisarati cuejatibuneya tupu.

Jesús cuinanacuareque

(Mt 1.18-25)

2 Tume patyatu Roma juque enaruqui Augusto bacanira cuatsashacuare dutya tuque muibaqui cuanaque tunaja dutyaja ebacani cuana quiricaju quiyatiti ishu. ² Riyaque inime, ebacani quiricaju quiyatitu jumetse jucuare Cirenio, Siriaju aniya cuanaja huaraji jucuare patya. ³ Dutya tuna cuataqui jucuare tunaja ebaba cuanaqueja epuju, tuhua ebacani cuana quiyamereti ishu.

⁴ José, David eque ejuracanaque juya tibusu cuataqui jucuare Belén bacani epuju, tuque cuinanacuareju. Tumetu José cuacuare tuja epu Nazaret bacani juque, Galilea yahua juque; tuhuaquetu cuacuare Belénju Judea yahua. ⁵ Tudyata tatse María cuinahuaque Belénju cuacuare tatseja ebacani quiyameretira. Marijatu quisarati anicuare caquemiti ishuque José tsehue.

⁶ Tatse Belénju junatियाque huecaca tujatu cuina ishuque huecaca jucuare. ⁷ Cuinanacuare tujatu bametseque ebacuaque. Cuinanahuajutu piruricuare eja tsehue. Piruritsutu huanacuare huaca cuana araara ishujutu, etare anitaya cuanaju aijama emajaca jucuare tibu.

Yusu tsahuaqui cuanara uhuisha naruqui cuanaque cuejacuareque

⁸ Tumepatyatu anicuare Belén emajacaju uhuisha cuana narusisa juya cuanaque. ⁹ Muya jutidyatu ejitaju jucuare barepaju Yusu tsahuaquique. Yusratu uhuisha naruqui cuanaque dutya huecatillamerecuare. Jadya baatsu tuna bajida jucuare. ¹⁰ Tume tuna Yusu tsahuaquira aticuare:

—Bajida nejuume. Era micuana jidaque quisarati cuejanaya dutya ecuita cuana pureama amere ishuque. ¹¹ Riyaque huecacatu David beru anicuare epuju cuinanahua Micuana Inajacamerequique. Tuhuaquetu Ecuatsashaquique, Mesías "Yusuja Emepeque" jadique. ¹² Riyaque micuana cuejanaya, micuana era cuejayaque yunerique bahue juishu. Ebacua nana petara cuaatsu tuque micuana eja tsehue epiruri jarayaju batiya, huaca cuana araara ishujutu, —jadya tujatu ecanu aticuare.

¹³ Tuque quisaratiya tsunumeetu ejitaju jucuare jetiama barepaju Yusu tsahuaqui cuanaque. Tume tuna jerucuare Yusu pureama ayaque:

¹⁴ "Hosana!

¡Arida, dyaque casada jadyatu Yusu barepaju aniyaque!

¡Inime tsapema paju Yusu pureamaturaqui cuanaque!", jadya tuna jucuare jeru eque.

¹⁵ Jadya juatsutu Yusu tsahuaqui cuanaque dirunucacuare yudijidya barepaju. Amena tuna dirunucahuajutu uhuisha naruqui cuanaque tuna cama quisaratibunecuare:

—Necuara Belénju. Nebatira tumeque inime eje bucha juhuaque, Yusura ecuana cuejamerehuaque, —jadya tuna jucuare tuna cama.

¹⁶ Jadya juatsu tuna ebajarara cuita cuacuare. Junatititsu tunajatu banaticuare María, José, ebacua nana jadya. Ebacua nanatu jaracuare huaca cuana araara ishujutu. ¹⁷ Ebacua nana banatitsu tunajatu María ecatscuejanaticuare tuna cuejatahuaque ebacua nana eje buchique. ¹⁸ Dutya tuhua jucuare cuanaque tuna uhuisha naruqui cuanara cuejayaque bacatsu anajacacuare. ¹⁹ Mariatu nime aputacuare ama uhuisha naruqui cuanara cuejahaque. Tumequedya jutidya tujatu inime tupuqui acuare. ²⁰ Uhuisha naruqui cuanaque tuna dirunucacuare. Barepa juque tsahuaquira cuejaha bae cuitadya batitsu, tunajatu Yusu pureama, mui jadya jeru eque aajecuare.

José, María ecatsera Jesús Yusuja etareju dujuacuareque

²¹ Ebacua nanaja cuinana huecaca catsurutiyajutu etataque ecatsera tunaja bahue amerecuare. Ecuita huitu biti tatsejatu tubumereticuare, israelita riya jadya adebatae juishu. Jadya aatsu tunajatu JESUS bacani iyacuare. Riyaque ebacanidyatu barepa juque Yusu tsahuaquira María iyamerecuareque tuque maqui juma jariju.

²² Pushi tunca huecaca cuetihua, tatsejatu dujuacuare ebacua nana Jerusalén epu ebariju Yusu bamereti ishu. Moisésja cacuatsashatitu jadya jucuare. Pushi tunca huecaca ebacua cuinana ishu aniyajutu etata cuanaque quibeti bahue junenicuare Yusuja yacuaju jida, asicadama cabamereti ishu. Jadya tibu tatsejatu ebacua nana dujuacuare Yusuja etareju, Yusu bamereti ishu. ²³ Jadya tatsejatu acuare, Yusura cuatsashahuaque jadya ehuene tibu: "Dutya icueneque deca ebacua cuinanayaquetu Yusuja ishu cuita camadya jutaqui". ²⁴ Yusura jadya amereya tibu tatsejatu Yusu tyataqui jucuare beta huei. Tume tatse cuacuaredya huei tyara.

²⁵ Tumepatyatu ecuita Simeón bacani Jerusalénju anicuare. Tumeque ecuitatu jida tuyuque jucuare. Turatu ihuacuare eje tupu Yusura Israel eque ejuracana cuanaque jida inimeju cuinanashadadiyaque. Yusuja Espiritu tu anicuare tuatsehue. Simeonratu iyuhueda bacuare Yusu. ²⁶ Berutu Espiritura tuque cuejacuare: "Miratu babuque Yusura riyaque yahua cuadishabuque. Tuque bamaquemi majubuque ama". ²⁷ Mariara, Joséra jadya ebacua nana Jesús Yusuja etareju cacuatsashati eque aishu beya tsunumeetu Yusuja Espiritura Simeón inime tyacuare tuque tuhua

nucadya cuaishu. ²⁸ Nubitsu tujatu María ecana jipeticuare. Jipetitsutu ebacua nana mapaticuare. Mapatsu tujatu Yusu pureama acuare.

²⁹ “Yusu Ecuana Cuatsashaquique, amena tuquemi ahuadya mira quisarati mique merequique tyaana acuareque.

Amena ique pureama juya.

Majutaqui ique, era ihuayaque ejitaju juhua tibu.

³⁰ Bahuadya tuque era, mira Ecuana Inajacamerequique cuadishahuaque.

³¹ Cuadishahua tuque mira dutya queja aniya cuanaque eje bucha inajacameree ayaque adeba ishuque.

³² Tudyatu israelita ama cuana Yusu eje buchique adebamerequique.

Tunaja hueca buchique tume.

Tuque equedyu ecuaana israelita cuanaque munitabuque.

Tuque equedyu ecuaana micue cuanaque munitabuque,” jadyatu Simeón jucuare.

³³ Joséra, Jesúsja ecuaquera jadya tatsejatu anajacata ishu acuare, Simeónra ebacua nana eje bucha judadiyaque quisarati ayaju bacatsu. ³⁴ Simeónra tatse cuejacuare:

—Yusura jida nenarucue. Metse tsehue pajuneni, —jadya tujatu ecatse acuare.

Tuequedyu tujatu María isaracuare:

—Jetiama Israel eque ejuracana cuanaque tuna micue bacua queja catyatibuque. Tuna tuna dyaque jida jubuque. Peya israelita cuana bacue tuaqueja catyatibuque ama. Tuna tuna dyaque canerecatibuque. Dutyara jujerira tunajatu micue bacua bji-damadurabuque. ³⁵ Jadya adebataetu jubuque peadya peadyara inime tupuyaque. Miquemi nerecada jubuque, micue bacua eje bucha judadiyaque baatsu. Cuchiru ebari micue enijuju tutsuhua buchami cabatibuque, —jadyatu Simeónra María acuare.

³⁶ Tumebaedyatu tuhuadya jucuare epuna Ana bacani. Tuquetu Yusu equeque quisarati cuejaquique jucuare. Tuquetu jucuare Fanuelja ebacujunaque, Asercuare juque. Anatu jucuare esiri. Ehue ebariquetu ahuequi jucuare. Tuja yahuique tshuetu anicuare pacarucu mara piji camadya. ³⁷ Tumepatyatu jucuare eahuemajuque quimisacarucu tunca pushi earacana mara. Cuinana baecuatu jucuare Yusuja etare juque. Huecada tupu, meta tupu jadya tujatu Yusu merecuare, Yusu tsehue quisarati, arama quibeti jadya juyaque. ³⁸ Simeón María tsehue quisaratiya tsunumeetu Anara jipeticuare. Yusrupaitu acuare Yusu. Yusu yusrupai aatsutu quisaratitibunecuare tuhua cuana tsehue:

—Riyaque ebacua nana ri Yusura Jerusalénju aniya cuanaque jida inimeju cuinanasha ishu cuadishahuaque. Riyaquedyu ri micuanara ihuahuaque, —jadya tujatu ecana acuare.

Nazaretju dirunucacuareque

³⁹ Yusura Moisés eque dutya cuatsashahuaque atilatsu tuna dirunucacuare Galileaju, tunaja epu Nazaretju.

⁴⁰ Ebacua nana bacue ariari juajecuare. Casada, quinimeti, bahue jadyatu juajecuare. Yusratu jacuare ama. Iyuhue tsehue tujatu narucuare.

Ebacua piji Jesús Yusuja etareju cabameretiyaque

⁴¹ Josétu María tsehue cuau cuau jucuare Jerusalénju dutya mara Pascua chine ishu. ⁴² Jesús amena peadya tunca beta earacana mara juhuaju tatsejatu dujucuare Jerusalénju, Pascua chine ishu, tatseja tumepatya jadya bahue jucuare tibu.

⁴³ Amena chine terehuajutu María, José ecatse dirunucacuare tatseja epuju. Tumetu Jesús anicuare Jerusalénju, ecuaque, José jadya baecuaque. ⁴⁴ Tatseratu Jesús ecuita cuana ducu diruya cuana bucha datse bacuare. Ajecuare tuna peadya huecaca. Amena ijete nubihuaju tatsejatu sarecuare tatseja ata cuana ducu, tatseja eadeba cuana tsehue jadya ediruuque.

⁴⁵ Dadicuare ama tatsera. Yudijidya tatse cuanucacuare Jerusalénju, tuque sarera.

⁴⁶ Quimisha huecaca juatsu tatse chamacama dadicuare Yusuja etareju, cacuatsashati bahuityaqui cuana tsehue juaniyaju, tura ecana bacadurabaretsu ijaca bacaaniyaju. ⁴⁷ Tuque quisaratiyaju bacaqui cuanaratu bape bacuare tuque dyaque bahue baatsu, tura ecana dutya jida quemitsaya bacatsu. ⁴⁸ Amena anajacacuare María, José jadya ecatse Jesús tuhua didirutsu. Tuja ecuaqueratu jadya acuare:

—¿Eje bucha juatsu mira yatse jadya jutidya ahua, deca? Tata tsehue mira yatse jidama cuita inime bamerehua mique datse saretsu, —jadya tujatu Jesús acuare.

⁴⁹ Jesúsra tatse jadya quemitsacuare:

—¿Aishu jatsu metsera sareya? ¿Adebaya ama jatsu metsera ique ecue Etataja etareju ai jutaquique? —jadya tujatu ecatse acuare.

⁵⁰ Tatseratu adebacuare ama eje buchique tura jadya ayaque. ⁵¹ Tumetu dirucuare tatse tsehue Nazaretju. Yana equedyatu jucuare. Tuja ecuaquetu eje bucha nime aputataquima jucuare dutya eje bucha juhua cuanaque. ⁵² Jesússtu daneajecuare. Dyaquedyu jutidyatu cabahuityatiajecuare. Yusu pureamaturayaque, ecuita cuana pureamaturayaque jadyatu anicuare.

Juan Ecuita Cuana Utsaquira Yusuja quisarati cuejati-bunecuareque

(Mt 3.1-12; Mr 1.1-8; Jn 1.19-28)

3 Tumetu Yusura Juan, Zacaríasja ebacuaque cuadishacuare, tuja quisarati cuejara. Juantu anicuare tsecada eje uma piji anitaya cuana queja, Tiberio Roma juque enaruquique peadya tunca pishica earacana mara jucuare patya. Tumebaedyatu Poncio Pilato, Judea juque huaraji jucuare tume patya.

Herodes tu huaraji jucuare Galileaju. Felipe, Herodes tsehuequiuetu Iturea, Traconite jadyaju huaraji jucuare. Lisancias tu Abilinia juque huaraji jucuare. Anás, Caifás jadya tatse pae dyaque muidaque jucuare.

³ Tumetu Juan quisarati cuejacuejanira cuacuare dutya queja cueri Jordán bacani jiruru queja. Juanja tuna cueja bahue jucuare tuhua cuanaque:

—Necacuaeticue inime, Yusuja micuanaja jucha cuana apupasha ishu. Necutsamereticue, yuneridya inime cacuaetihua jadique adebataqui juishu, —jadya tujatu ecana cueja bahue jucuare.

⁴ Jadyatu jucuare, beru yuequedya Yusu equeque quisarati cuejaquique Isaiasra huenecuare equedya: “Quisarati cuejatu jubuque ejeque cuana tsecada eje uma piji anitaya cuana queja.

‘NequiHuaticue, Ecuana Cuatsashaquique junayaju ishu.

Jidamaque neajacacue.

Jida tuyu nejuque, ediji benubenuque etuyune ejuu bucha.

⁵ Dutyatu ebajeje jubuque.

Duty jidama cuanaquetu etuyune jubuque.

Ediji ebajejeque buchatu jubuque, ehuedeta cuana ejequeshabare bucha, emata, uhua cuemus cuana ecuepubare bucha, ediji benu benu cuanaque etuyunebare bucha, ediji dutya tupu ama cuanaque epapabare bucha.

⁶ Dutya queja cuanaquetu bahue jubuque eje bucha inajacameree Yusura abueque”, jadyatu Isaiasra huenecuare béru.

⁷ Umada ecuita cuanatu cuacuare Juanra Yusuja quisarati cuejayaque ijacabacara, tuaqueja cutsameretira. Tuaqueja cuaya cuanaque tujatu ecana atsacuare:

—Cutsameretimaquedya necabamereticue inime cacuaetihuaque, cajuchaticarama juyaque jadya. Bacua cuana yachi tiruyaju eje buchadya huanacara ejuu bucha micuana juya. Cutsameretitsu Yusura enecaturauque ehuanau bucha tuque micuanaja inime juya. Jadya ama tuque. “Abraham eque ejuracanaque tibu, ecuana Yusura nrecaturabuque ama”, jadya micuanaja inime paju ama. Dyaque inime metseque juishuque ama tu Abraham eque ejuracanaque. Cuejaya micuana era. Yusuajatu aniya casa riyaque tumu cuana Abraham eque ejuracanaque amere ishu.

⁹ Micuana micuana acui cacacati baecuaque bucha. Acui cacacati baecuaque tu jacha tsehue cuere, pahua jadya aishuque. Jadya micuana Yusura abueque, micuana inime cacuaetihuaque ama juatsu. Acui cuere bahuera eau bucha tura micuana abueque, —jadya tuna Juanra cuejacuare.

¹⁰ Jadyatu tuque bacaqui cuanara bacaduracuare:

—Jutaquiju ¿ai ecuana Yusura amerecara aya? —jadya tunajatu acuaire.

¹¹ Tura tuna quemitsacuare:

—Jadya nejuque yuneridya micuana inime cacuaetihuaque ejitaju juishu. Ejeja beta camisa aniyajatu tyataqui peadya ejeja aijama cuitaque. Ejeja ara ishuque

aniyajatu jaquetsu tyataqui ejeja aijamaque, —jadya tujatu ecana acuaire.

¹² Tumetu juticuare Roma juque enaruquija chipiru bacaqui cuanaque cutsameretira.

—Ebahuityaquique, ¿eje bucha ecuana ejuu inime cacuaetihuaque ejitaju cabamereti ishu? —jadya tunajatu Juan acuaire.

¹³ —Dyaque cuita ecana netsujebacaume. Cacuat-sashatira tsuje bacaya tupu camadya netsuje bacacue, —jadya tujatu ecana acuaire.

¹⁴ Tumebaedyatu sudaru cuanara bacaduracuare:

—¿Ecuana bacue eje bucha jutaqui inime cacuaetihuaque ejitaju adebataqui juishu? —jadya tunajatu acuaire.

—Neseacaume ai ni ejeque casada tsehue. Misida neaume ni ejeque eje bucha jumaquedya jutidya. Pureamadya jutidya nejuque micuana tsujetyataya tsehue, —jadya tuna Juanra acuaire.

¹⁵ Ecuita cuanatu quiHuaticuare ai cuana dyaque jidaque etyatauque ihua. Tume tuna cabacaduratibarecuare tuna cama:

—¿Juan ni taa ri Mesiasdya ejuu Yusuja Emepeque, aijama ni taa? —jadya tuna jubarecuare.

¹⁶ Tume tuna Juanra dutya jadya acuaire:

—Era micuana utsaya ena tsehue, inime cacuaetihua jadique adebataqui juishu. Tsunutaya amatu peya junayaque. Tujatu dyaque casa aniya, ecue bucha ama. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique. Tume junayara micuana Yusuja Espíritu tyanaya, tujaque jadique adebataqui juishu. Tuaqueja catyaticarama juya cuanaque tujatu nrecaturadadiya ijahuaja etiquiju. ¹⁷ Ecuita trigo iruru, tsaje jadya aishuque buchique tu Junayaque. Turatu tuja cuanaque nityasicuanabuque tunaja ishu cuita emajacaju, ecuita trigo etareju equiyatiu bucha. Tuja ama cuanaque bacuetu ijehuebuque nrecatura ishu etiqui ticu baecujaju, trigo tsaque epahuata bucha, —jadya tuna Juanra cuejacuare.

¹⁸ Jadya eque, peya umada cacuejati eque jadyatu Juanra cuejacuejanicuare ecuita cuana jida iyacuaque quisarati.

¹⁹ Tumebaedya tujatu huaraji Herodes nereda bucha cuejae acuaire, Herodías tuatsehuequi Felipeja ehuaneeque tsehue baatsu. ²⁰ Herodesratu cuejayaju bacacarama acuaire. Tura cuejayaque bacataquiuetu dyaque jidama jutidya inime tupucuare. Etare apudaju jutidyatu Juan ishameracuare.

Jesús cutsamereticuareque

(Mt 3.13-17; Mr 1.9-11)

²¹ Etare apudaju ishatanama jariratu Juanra utsacuare jaridya umada tuaqueja jutiya cuanaque. Jesústu cuacuare tuaqueja cutsameretira. Tumetu Juanra Jesús utsacuaredya. Amena Jesús cutsameretitsu, Yusu tsehue quisariatijayutu barepa pacashatanacuare. ²² Bacuairetu Yusuja Espíritu huei jique tuque dyaque buteyaju. Tume tujatu barepa

juque etsuri bacacuare. Yume tucuetu jucuare tuja Etataque Yusu.

—Mique mique ecue Ebacua dyaque iyuhuedaque. Ique dyaque pureama juya miatsehue, —jadya tujatu acuaire.

Jesucristoja ecuaque eque ebaba cuanaque jucuare cuanaque
(Mt 1.1-17)

²³ Quimisha tunca maraquetu Jesús Yusuja quisarati bahuitya catibuticuare. Ecuita cuanaratu Joséja ebacuaque buchadya jutidya bacuare.

José tu Elíja ebacuaque jucuare.

²⁴ Elí tu Matatja ebacuaque jucuare.

Matat tu Levíja ebacuaque jucuare.

Leví tu Melquija ebacuaque jucuare.

Melqui tu Janaja ebacuaque jucuare.

Jana tu Joséja ebacuaque jucuare.

²⁵ José tu Matatiasja ebacuaque jucuare.

Matatías tu Amósja ebacuaque jucuare.

Amós tu Nahúmja ebacuaque jucuare.

Nahúm tu Eslija ebacuaque jucuare.

Esli tu Nagaija ebacuaque jucuare.

²⁶ Nagai tu Maatja ebacuaque jucuare.

Maat tu Matatiasja ebacuaque jucuare.

Matatías tu Semeija ebacuaque jucuare.

Semei tu Josécja ebacuaque jucuare.

Joséc tu Judája ebacuaque jucuare.

²⁷ Judá tu Joanánja ebacuaque jucuare.

Joanán tu Resaja ebacuaque jucuare.

Resa tu Zorobabelja ebacuaque jucuare.

Zorobabel tu Salatielja ebacuaque jucuare.

Salatiel tu Nerija ebacuaque jucuare.

²⁸ Neri tu Melquija ebacuaque jucuare.

Melqui tu Adija ebacuaque jucuare.

Adi tu Cosamja ebacuaque jucuare.

Cosam tu Elmadamja ebacuaque jucuare.

Elmadam tu Erja ebacuaque jucuare.

²⁹ Er tu Jesúsja ebacuaque jucuare.

Jesús tu Eliezerja ebacuaque jucuare.

Eliezer tu Jorimja ebacuaque jucuare.

Jorim tu Matatja ebacuaque jucuare.

³⁰ Matat tu Levíja ebacuaque jucuare.

Leví tu Simeónja ebacuaque jucuare.

Simeón tu Judája ebacuaque jucuare.

Judá tu Joséja ebacuaque jucuare.

José tu Jonamja ebacuaque jucuare.

Jonam tu Eliaquimja ebacuaque jucuare.

³¹ Eliaquim tu Meleaja ebacuaque jucuare.

Melea tu Menaja ebacuaque jucuare.

Mena tu Matataja ebacuaque jucuare.

Matata tu Natánja ebacuaque jucuare.

³² Natán tu Davidja ebacuaque jucuare.

David tu Isaíja ebacuaque jucuare.

Isaí tu Obedja ebacuaque jucuare.

Obed tu Boozja ebacuaque jucuare.

Booz tu Salaja ebacuaque jucuare.

Sala tu Naasónja ebacuaque jucuare.

³³ Naasón tu Aminadabja ebacuaque jucuare.

Aminadab tu Adminja ebacuaque jucuare.

Admin tu Arnija ebacuaque jucuare.

Arni tu Esromja ebacuaque jucuare.

Esrom tu Faresja ebacuaque jucuare.

Fares tu Judája ebacuaque jucuare.

³⁴ Judá tu Jacobja ebacuaque jucuare.

Jacob tu Isaacja ebacuaque jucuare.

Isaac tu Abrahamja ebacuaque jucuare.

Abraham tu Taréja ebacuaque jucuare.

Taré tu Nacorja ebacuaque jucuare.

³⁵ Nacor tu Serugja ebacuaque jucuare.

Serug tu Ragauja ebacuaque jucuare.

Ragau tu Pelegja ebacuaque jucuare.

Peleg tu Heberja ebacuaque jucuare.

Heber tu Salaja ebacuaque jucuare.

³⁶ Sala tu Cainánja ebacuaque jucuare.

Cainán tu Arfaxadja ebacuaque jucuare.

Arfaxad tu Semja ebacuaque jucuare.

Sem tu Noéja ebacuaque jucuare.

Noé tu Lamecja ebacuaque jucuare.

³⁷ Lamec tu Matusalénja ebacuaque jucuare.

Matusalén tu Enocja ebacuaque jucuare.

Enoc tu Jaredja ebacuaque jucuare.

Jared tu Mahalaleelja ebacuaque jucuare.

Mahalaleel tu Cainánja ebacuaque jucuare.

³⁸ Cainán tu Enósja ebacuaque jucuare.

Enós tu Setja ebacuaque jucuare.

Set tu Adánja ebacuaque jucuare.

Adán tu Yusuja ebacuaque jucuare.

Satanásra Jesús cajuchatishacara acuaireque

(Mt 4.1-11; Mr 1.12-13)

4 Tumetu Jesús, Yusuja Espiritura cuitadya aque-
reniyaque, cuacuare cueri Jordán emajaca queja
amaca. Tuequedyatu Yusuja Espiritura dujuare japa-
da peya queja amaca anitaya amaju. ² Tuhuadyatu ju-
cuare pushi tunca huecaca. Aramatu jucuare. Pushi
tunca huecaca cuetihuajutu amena aracara jucuare.
Satanasratu cajuchatishacara acuaire. ³ Jipetitsu tujatu
Jesús acuaire:

—Yusuja Ebacuaquepa mique, jadyami juya. Jutaqui-
ju riyaque tumu pan cacueyatishacue, —jadyatu Sa-
tanásra acuaire.

⁴ Jesusratu acuaire:

—[Aama! [Aya ama tuque era! Ehuene tu Yusuja quis-
arati: "Earaqui tsehue jipidya amatu Yusura ecuita cua-
na anishaya. Tumebaedyatu Yusuja dutya cacuat-
sashati eque anitaqui", —jadyatu Jesúsra acuaire.

⁵ Tumetu Satanásra Jesús dujuare emata dyaque
barudaque matina. Tuequeradya tujatu yaraturu piji
cuita bamerecuare dutya epu cuana riyaque yahua
juque.

⁶ —Erami huaraji amereya dutya riyaque epu cuana-
ju. Tumeque epu cuana, dutya tuhua jidaque aniya-
quetu ecuique. Era ejeque tyacara ayaque tuque tyaya.
Etyau mique era dutya ai jidaque aniyaque. ⁷ Mira ique

chichucata juatsu muiyaju, dutya riya cuanaque tuque micue ejuu, —jadyatu Satanásra acuare.

⁸Jesusratu acuare:

—Aijama, Ijahua! Micue yacuaju ique chichucata junime ama! Ehuene tu Yusuja quisarati: “Mique Cuat-sashaquique Yusu camadya muicue. Tura cuatsashaya eque peadya camadya jucue”, —jadya tujatu acuare.

⁹Jadya juatsutu Satanásra Jesús Jerusalénju dujanucacuare. Dujutsu tujatu tsuraquerecuare Yusuja etare camahua barudaju.

—Putitanacue reeque. Yuneridya ni mi Yusuja Ebacuaque, tumemi ujeda ecatiu ama, ¹⁰Yusuja quisarati jadya ehuene tibu:

“Yusuratu cuadishaya barepa juque tuque tsahuaqui cuanaque mique naru ishu,

¹¹mique pacacayaju inatsa ishu, mique ni riya piji buchique ujeda cati ishu ama, tumura ehuchiju ujeda eauju” jadya.

¹²Jesusratu acuare:

—Aama! Aya ama tuque era! Tumebaedya tu Yusuja quisarati ehuene: “Nime adebaume Yusu” jadya, —jadyatu Jesúsra Satanás acuare.

¹³Jesús datse cajuchatishacara aatsutu Satanásja inime terecuare. Tume tujatu jacacuare eje uma huecaca cuana.

Jesús Galileaju Yusuja quisarati cueja catibuticuareque (Mt 4.12-17; Mr 1.14-15)

¹⁴Jesústu dirunucacuare Galileaju. Yusuja Espirituratu jacacuare ama. Dutya tumeque emajacajutu ecuita cuanara Jesús cuatsabiji acuare. ¹⁵Dutyua huecaca tujatu ecana bahuityacuare Yusuja quisarati caradati ishuque etare cuanaju. Cuejayaque bacatsu tunajatu pureama acuare:

—Aijamatu peya ecuaana jida bahuityaquique Jesús buchique! —jadya tuna jubarecuare tuna cama.

Jesús Nazaretju juetinuacuareque (Mt 13.53-58; Mr 6.1-6)

¹⁶Jesústu cuacuare Nazaretju tuque catemuticuareju. Tuhua jari tuputu canajara huecaca cuanaju cuacuanicuare caradati ishuque etareju, tuja bahue. Tuhua nubitsutu netitsuracuare, Yusuja quisarati jebuda isara ishu. ¹⁷Inamerecuare tunajatu quirica epirurique isara ishu Isaiasra quisarati cuejacuareque, Yusu equeque cuitadya beru huenetanacuareque. Quirica inatsa, pacasha jadya aatsutu Jesúsra dadicuaré jadya ehueneque. Tume tujatu isaracuare etsuri jebuda tsehue:

¹⁸“Yusuratu tuja Espiritu eaqueja cuadishahua.

Mepehua tura ique, tuja quisarati nrecada cuanaque cueja ishu.

Cuadishahua tura ique, etare apudaju erisi netiya cuanaque inajacatanabuqueque cueja ishu, shuhui cuanaque capetatisha ishu, jidama ujeda ujeda ataya cuanaque tsahua ishu jadya.

¹⁹Tura ique cuadishahua, Yusura amena ecuita cuana tuja jidaque bamereyaque huecaca amena juetihuaque cuejara”, jadya tu ehuene Yusuja quisarati.

²⁰Yusuja quisarati isarajacatsutu Jesúsra piruricuare quirica. Piruritsu tujatu tyacuare caradati ishuque etareju mere juyaque. Tumetu anibutecuare tuna cueja ishu. Dutya caradatihua cuanaratu pana peta acuare. ²¹Tura tuna cuejacuare:

—Iyacia cuitadyari juhua riyaque ehueneque jadya judadiya jadya béru huenetanacuareque. Bacahuadya tuque micuanara, —jadya tujatu ecana acuare.

²²Dutyua tuhua cuanaratu jida quisarati acuare Jesúsja ishu. Anajacatacuare tuna, tura jidaque quisarati cuejayaju. Cabacaduratibarecuare tuna:

—Riyaque ri Joséja ebacuaque. ¿Eje bucha juatsu jatsutu dyaque jida quisaratiya? —jadya tuna jucuaré tuna cama.

²³Quisaraticuare jaritu Jesús:

—Eratu adebaya micuanara inime tupuyaque. “Casamati puji, casamaticue mita taca. Ecuonaratu mira Capernaumju ai ni ejeque ecuitaja ataquique ama achineque bacatsachine. Rehua dyadi acuedya”, jadya tuque micuana inime tupuya.

²⁴“Era micuana jadya ayaqueri yunerique. Ni ejeque quisarati dyaque jida cuanaque cuejaquitu jida batsataya ama tuque catemuticuareju. ²⁵Adebaya micuana ecuanaja yahua Israelju béru jucuaréque, Elías Yusu equeque quisarati cuejaquique anicuare patyaque. Quimisha mara peya patya patya tuputu nei jucuaré ama. Dyaque mije tuna jucuaré dutya epu cuanaju. Anicuaretu umada Israelju eahuemaju cuanaque nrecada cuanaque. ²⁶Jadya ama buchatu Yusura Elías cuadishacuare ama ni ejeque buchique tuna tsahua ishu. Cuadishacuare tujatu peya yahua queja Sarepta epu bacaniju aniya queja. Tumeque eputu epu ebari Sidón japadama jucuaré. Epuna eahuemajuque tuhua aniyaque tsahua ishu tujatu cuadishacuare.

²⁷“Micuanaratu adebayadya ecuanaja yahua Israelju junucacuareque, Eliseo Yusu equeque quisarati cuejaquique anicuare patyaque. Anicuaretu jetiama ujeje-da cuanaque pusesera ririshaya cuanaque ecuanaja yahua. Jadya ama bucha ni ejeque buchique tujatu tuhuaque chachanecuare ama. Naamán camadyatu chachanecuare, peya yahua Siria bacaniju aniyaque, —jadya tuna Jesúsra acuare.

²⁸Jadya bacatsu tuna caradati ishuque etareju aniya cuanaque dyaque cahuiticuare. ²⁹Cahuititsu ecana netitsuracuare. Cuinanashacuare tuna Jesús epu juque. Emata dyaquetu tumeque epu jucuaré. Dujucuaré tuna emata matina, tueque pacacashacara aatsutu. Iyecara datse tuna acuare. ³⁰Jadya ama buchatu Jesús quinajacamereticuare. Quinajacameretitsutu tuna patya eque cuinanacuare.

Jesúsra ecuita ijahua cuanara quijahuatishayaque quijahuatishajacacuareque

(Mr 1.21-28)

³¹ Judirunucacuairetu Jesús Capernaumju Galilea yahuaju. Canajara huecacajutu ecuita cuana bahuitya jucuare. ³² Pureama tsehue tuna anajacatacuare tura bahuityayaque bacatsu, huaraji equisaratiu bucha quisaratie juya bacatsu.

³³ Anicuairetu tumeque etareju ecuita ijahua cuanara quijahuatishayaque. Tuque quijahuatishaquiquedya jutidyatu ecuita eque quiquecuare:

³⁴ —¿Ai jitequemi jeya ecuana queja, Jesús Nazaret juque? ¿Ecuana aputasharami jeya? Adebaya mique ecuanara. Miquemi juchama. Yusu quejaquemi jehua, —jadya tujatu acuare.

³⁵ Jesusratu tumeque ijahua nereda acuare:

—¡Abacata jucue! ¡Yacua cuita cuinanacue riyaque ecuita quejaque! —jadyatu Jesúsra acuare ijahua ecuita quijahuatishaquique.

Jadya quisarati aatsutu ijahuara ecuita yahua catsaqui amerecuare dutya tuhua aniya cuanaja yacuaju. Tuque rihuishatsutu cuinanacuare tuaquejaque eje bucha ameretsu ama. ³⁶ Dutya tuque petaqui jucuare cuanaque tuna jecutanacuare. Cabacaduratibarecuare tuna:

—¿Eje bucha quisaratietu Jesús jadya ejuu? Huaraji equisaratiu bucha rejari quisarati. Cacuatshashi casa da tshuetu tura cuatsashaya ijahua cuana. Tuna bacue tuequedya juya tura amereya equedya, —jadya tuna jucuare.

³⁷ Tumeque jadya jucuarequetu tsapetanacuare dutya tumeque yahuaju. Dutya tuna bahue jucuare Jesús jadya juyaque.

Jesúsra Simón Pedroja ehuaneequeja ecuaque chachanecuareque

(Mt 8.14-15; Mr 1.29-31)

³⁸ Tumetu Jesús israelita cuanaja caradati ishuque etare juque cuinanatsu nubidirucuaire Simónja etareju. Simónja ehuaneequeja ecuaquetu dyaquene cuita, baara juyaque jaracuare. Tumetu tuhua cuanaque Jesús queja canerecaticuare tuja chachane ishu.

³⁹ Jadya bacatsutu Jesúsra jipeticuare. Jipetitsu tujatu peque netititsu petaticuare. Nereda tujatu baara acuare. Baara nereda aya tsehuedya cuitadyatu baara juyaque chacha jucuare. Tumetu netitsuratsu earaqui jucuare Jesús, tura mepehua cuanaque jadya mihua ishu.

Jesúsra umada ujejeda cuanaque chachanecuareque

(Mt 8.16-17; Mr 1.32-34)

⁴⁰ Amena ijete nubihuajutu ecuita cuanara becuare Jesús queja ujejeda cuanaque umada ujeje tsehue cuanaque. Tume tujatu ecana iyucaju emetucu tsehue jababarecuare. Jadya chachanee tujatu ecana abarecuare. ⁴¹ Umae cuanatu ijahua cuanara quijahu-

atishayaque jucuare. Jesusratu ijahua cuana ijehue-cuinacuare. Diruyaque tuna quiquecuare:

—¡Miquemi Yusuja Ebacuaque! —jadya tuna jubarecuare quique eque.

Jesusratu ijahua cuana nereda acuare. Quisaraticuare tujatu ijahua cuana acuare, ecuita cuanara tuque Mesiasque eadebauju.

Galileaju Jesús Yusuja quisarati cueja jucuareque

(Mr 1.35-39)

⁴² Huecacanucatsutu Jesús cuinanacuare epu juque, peya queja amaca anitaya amaju. Ecuita cuanaratu sareticuare. Junaticuare tuna tuaqueja. Banatitsu tujatu acuare:

—Jesús, diruume. Ecuana tsehuedya rehua anicue, —jadya tunajatu aticuare.

⁴³ Jesúsra tuna acuare:

—A, aijama eje bucha anitaqui ama rehua cabatiya. Cuataqui peya epu cuanaju jidaque quisarati cuejara. Cuejataqui tuque ecue tuhua cuanaque eje bucha narue ecana Yusura ayaque, jadya ishu ique cuadishatanacuare tibu, —jadya tujatu ecana acuare.

⁴⁴ Tumetu Jesús junenicuare Yusuja quisarati cueja juyaque caradati ishuque etare cuanaju dutya queja israelita cuana anitaya cuanaju.

Jae deru ishu cuanaque jae bicuera chajacuareque

(Mt 4.18-22; Mr 1.16-20)

5 Juneniyaquedya jutidyatu Jesús netidirucuaire Genesaret bacani bei jiruru. Ecuita cuanatu catiticuare tuque peque, Yusuja quisarati baca juyaque. ² Bacuare tujatu beta cuaba memaque bei jiruru, jae puji cuana tunaja jae deru ishuque utsara cuinanahuaju. ³ Tumetu Jesús anibutecuare Simónja cuabaju. Anibutetsu tujatu Simón acuare:

—Japajapa piji nejaca bei cuatsa.

Tuequera tujatu ecana cuejatibunecuare mejijiju cuanaque. ⁴ Amena quisaraticuare tujatu Simón cuejacuare:

—Dujucue cuaba bei deda queja, —jadya tujatu Simón acuare.

—Nemarecue micuanaja jae deru ishu cuanaque, —jadya tujatu ecana acuare tuhua cuabaju cuanaque.

⁵ Simonratu acuare:

—Ecuana Bahuityaquique, dutya meta datse ecuana jae deru jusisahua. Ahua ama tuque ecuana ni peadya jae. Jadya ama bucha mira cuatsashaya tibu, pamaretinuca ecuana jae deru ishu cuanaque, —jadya tujatu acuare.

⁶ Jadya ayaju maretsu tunajatu acuare umada jae, amena tunaja jae deru ishu cuanaque jae bicuera chaja ishu. ⁷ Tume tunajatu peya cuabaju cuanaque eme ihuara acuare, tuna tsahuana ishu. Cuaatsu tunajatu jequeshacuare beta cuaba jae tsehue. Nudyajericuairetu cuaba ecatse jae bicuera. ⁸ Jadya baatsutu Simón Pedro nuyucuare Jesúsja yacuaju.

—Japada jucue eaquejaque, Ecuana Cuat-sashaquique. Ique ecuita juchaquique jutidya, —jadya tujatu acuare.

⁹ Simón, tuatsehue juneniyaque ecitse Santiago, Juan, Zebedeoja ebacuaque ecitse, ejecutana tuna jucuaque, jae jetiama baatsu. Tumebaedy peya cuana ejecutana jucuaque. Tumetu Jesúsra cuejacuaque Simón:

—Cacasaticue. Miquemi jae puji. Iyacua mique ecuita cuana Yusu adeba mere ishuque amereya, —jadya tujatu Simón acuare.

¹¹ Jaratsuratsu tunajatu shanaquenacuare tunaja cuaba ecitse. Dutya shanaquenatsu tuna Jesús tsehue junenitibunecuare.

Jesúsra ecuita pusesera ririshayaque chachanecuareque (Mt 8.1-4; Mr 1.40-45)

¹² Jesús tumeque epuju junatihua jutu ecuita pusesese huera rami ririshayaque juticuare. Jesús baatsutu tunaja yacuaju chichucata jucuaque ebutse quini tsehue yahua tseraya tupu, tuque muiyaque. Chichucata juatsu tujatu Jesús isaratsacuare:

—Ique Cuatsashaquique, chachanecara aatsu taa mira ecue ujeje aniyaque echachaneu, —jadya tujatu acuare.

¹³ Tura jadya ayajutu Jesúsra jabacuare.

—Chachaneyadya mique era, —jadyatu Jesúsra acuare.

Jadya aya tsunumeetu pusesese aputacuare tuja ecuita juque. Chachadya tu jucuaque.

¹⁴ —Cuejacueja camadya aume ni ejequedy jutidya mique eje bucha chachae juhuaque. Aticue Moisésra amereya equedy. Riyata cuau cuitadya jucue pae queja, tuja mique pana adeba atsa ishú, “Chachadya rique” jadya tuja aishu. Cadujuticue Moisésra amerehua equedy riyaque ujeje chacha eju cuanaja Yusu tyabahueque. Jadya juatsutu ecuita cuana bahue juya mique amena chachaque, —jadyatu Jesúsra acuare.

¹⁵ Arepa Jesúsra cuejamerecarama ahua ama buchatu dutya queja tuque jadya juyaque quisarati tsapetanacuare. Jetiama ecuitatu caradaticuare Jesús quisaratijaju baca ishú, tuja ujejeda cuanaque chachane ishú jadya. ¹⁶ Jesússtu eje uma cuau jubahue jucuaque emajaca ecuita anitaya amaju, tuhua Yusu tsehue quisarati ishú.

Jesúsra ajebaecuareque ajeshacuareque (Mt 9.1-8; Mr 2.1-12)

¹⁷ Peya huecaca Jesús tuhua bahuitya bahuityayajutu fariseo cuana anibarecuare, tumebaedy cacuat-sashati bahuityaqui cuanaque. Tuna tuna jecuaque dutya Galilea jiruruque, Judea juque, Jerusalén juque jadya. Yusuja casa tsehuetu Jesúsra chachanenicuare tuhua ujejeda cuanaque. ¹⁸ Tumetu junaticuare tuhua ecuita cuana ebadequi baeju ajebaecuareque duju juyaque. Datse tuna emajaca sarecuare ecuita jetiama ducu etareju nubicara juatsu, ajebaecuareque Jesúsja yacuaju huanacara aatsu datse. ¹⁹ Amena eje bucha

nubitaqui ama cabatitsu, ecuita jetiama cuita baatsu, tuna tsuracuare ebarucue etare dyaque. Tsuratsu tunajatu eje uma teja bucha cuanaque huetsacuare etare camahua jepedaque. Huetsatsu tunajatu ajebaecuareque butyacuare ecuita jetiama ducu, Jesús netiya tuyu. ²⁰ Ujejedaque dujuqui cuanara Jesúsra ajebaecuareque eajeshauque ejeneyaque adebatsu tujatu jadya ajebaecuareque acuare:

—Micue jucha cuana tu amena eapupasha, tata —jadya tujatu acuare.

²¹ Jadya quisaratijaju bacatsutu cacuat-sashati bahuityaqui cuanara, fariseo cuanara jadya inime tupucuare:

—¿Eje bucha juatsuri riyaque ecuita jadya quisaratija? Yusu tujatu ijillahuanaya. [Ni ejeradya jutidya tu jucha cuana eapupashau, Yusura peadya camadya! —jadya tunajatu inime tupubarecuare.

²² Jesússtu bahuedya jucuaque tunara eje bucha inime tupuyaque.

—¿Eje bucha juatsu tuque micuana jadya inime tupuya: “Yusu tujatu ijillahuanaya” jadya? Jida ama tuque micuana inime tupuya. ²³ Era ni ajebaecuare eau: “Micue jucha cuana tu eapupasha” jadya, eadebau ama tuque micuana ecue casa aniyaque, eapupasha, apupashama jadicue ejitaju ama tibu. Era ni eau: “Netitsuracue. Piruricue micue jara ishúque. Aje-cue”, tumeque ura cuitadya tuque micuana eadebau ecue casa aniyaque, ajebaecuareque juneniyaju baya tibu. ²⁴ Tuque juneniya baatsu micuana bahue juya ecue tumebaedy riyaque yahua ju cha cuana apupasha ishú casa aniyaque, —jadya tujatu ecana acuare.

Tumetu Jesúsra acuare ajebaecuareque:

—Netitsuracue. Piruricue micue jara ishúque. Dirucue micue etareju, —jadya tujatu acuare.

²⁵ Jadya ayaju cuitatu ecuita netitsuracuare. Tuja jara ishúque piruritsu, huesatsutu cuinanaquenacuare tuhuaque dutyara petayaju. Tumetu dirucuare tuja etareju Yusu pureama ayaque. ²⁶ Dutya tuna anajacatuacuare. Pureama tuna Yusu acuare:

—[Dyaque jida, casada taa Yusu! Iyacua ecua baha dyaque bape ebarique, —jadya tuna jucuaque.

Jesúsra Leví tuatsehue juneni ishú ihuaracuareque (Mt 9.9-13; Mr 2.13-17)

²⁷ Jadya juu jadya juatsutu Jesús cuinacuare epu juque. Tume tujatu ecuita bacuare Roma juque enaruquija ishú chipiru tsuje bacayaque juaniyaju. Tuquetu Leví bacani jucuaque. Tunaja etsujequi sita ishú pequetu juanicuare.

—Eatsehue junenicue, —jadyatu Jesúsra acuare.

²⁸ Jadya ahua jutu Leví netitsuraquenacuare. Dutya tujatu shanaquenacuare Jesús tsehue juneni ishú.

²⁹ Jadya juatsutu Leví chine arida caticuare tuja etareju Jesús pureama aatsu. Tuhua tu jucuaque enaruquija ishú chipiru tsuje bacaqui cuanaque, umae bji-damadurataya cuanaque jadya. Tudy a tuna jetiama mesaju Jesús tsehue aracuare. ³⁰ Fariseo cuanara,

tumebaedyaca cuatsashati bahuityaqui cuanara jadyara tunajatu bacuare eje bucha juyaque. Jadya baatsu tuna quisaratitibunecuare Jesúsja ishú. Acuare tunajatu Jesúsra mepehua cuanaque:

—Riyaque ecuita cuana ri bijidamadurataya cuanaque. Micuana micuana araarataqui ama, ijijitaqui ama jadya enaruquija ishú chipiru tsuje sitaqui cuana tsehue, tumebaedyapeya jucha arida cuana tsehue, —jadya tunajatu ecana acuare.

³¹ Jesúsra tuna quisaratiyaju bacacuare.

—Chacha cuanaratu sareya ama casamati puji. Ujeje da cuanara camadyatu sareya. ³² Juchama bucha cabatiya cuanaque sarera ama jehua. Ique jehua jucha arida cabatiya cuanaque jiteque, tuna inime cacuaresha ishú, —jadya tuna Jesúsra acuare.

Eje bucha anitaqui amatu beruque inime eque, iyacua eque jadya

(Mt 9.14-17; Mr 2.18-22)

³³ Umae ecuita cuanaratu Jesús bacaduracuare:

—Juan tsehue juneniya cuanaqueri arama quibetiya Yusu muiyaque cabamereti ishú. Tumebaedyafariseo cuana tsehue juneniya cuanaque jadidya ecana juya. Yusamimi ecana tsunuda juya; arama quibetijacama ecana juya. Mira mepehua cuanaque bacue ecana araaraya, ijijiya jadya juya. Arama ecana quibeti bae-cua. ¿Eje bucha juatsu? —jadya tunajatu Jesús acuare.

³⁴ Jesúsra tuna quemitsacuare:

—Caquemitiyaju cuaishu ecueja cuanaque tuna arama quibetiya ama caquemitihuaque tuna tsehueju. Tuna quejaque dujutanahuaju piisi tuna arama quibetiya. Tumebaedyatu ecue cuanaque ique cuanucahuaju piisidya tuna arama quibetiya, —jadya tuna Jesúsra acuare.

³⁶ Jesúsra tuna bahuityayaque cuatsabiji eque cuejacuare:

—Ni ejeratu camisa iyacuaque racaya, camisa siri eraca iyacua tsehue sipi ishú. Jadya ayaque juatsutu yuamaturatanaya camisa iyacuaque. Tumetu esipiquique iyacuaque beru tsehue beta tupu ama juya. ³⁷ Tumebaedyatu ishataqui ama tupari sasana ishúque sura siri cuitaju. Tupari sasanayaratu epututashau sura siri. Tumetu eaputau sura, tupari jadya. ³⁸ Jadya tibudyatu tupari sasana ishúque sura jida iyacuaaju ishataqui.

³⁹ Ni ejeratu tupari uqueuqueque ijicara aya, tupari sasadaque ijitsu, tupari sasadaquepa dyaque jida jadya juatsu, —jadya tujatu ecana acuare.

(Riyaque cueja tsehue tuna Jesúsra bahuityacuare. Eje bucha anitaqui amatu beru inime israelita cuanara bahuityacuare eque, iyacuaque tura cuitadya bahuityaya eque jadique.)

Jesúsra mepehua cuanara trigo esa canajara huecaca-ju sepiajecuareque

(Mt 12.1-8; Mr 2.23-28)

6 Tume patyatu Jesús cueticuare euhua cuana eque canajara huecacaju. Aridatu trigo euhuaque jucua ejahuane, amena racataqui. Jesúsra mepehua

cuanaratu cuetiyaradya jutidya trigo esa sepitsu, irurutsu mucuajecuare. ² Umae fariseo cuanara baatsu tunajatu ecana cuejacuare:

—Moisésra cuatsashacuare eque ama micuana juya. Meredy micuana juya etsucaca cuana sepi, iruru, mucu jadya juyaque. Meretu jutabaecua canajara huecacaju, —jadya tunajatu ecana quemitsacuare.

³ Tuna jadya quisaratiyaju bacatsu tuna Jesúsra quemitsacuare:

—Neadebacue ecuanaja ebaba David emuique jucuaque. Tuque, tuatsehue cuaya cuanaque jadya tuna aracara jucua. ⁴ Davidtu Yusuja etareju nubicuare. Nubitsu tujatu Yusuja ishú eiyaque pan cuana inacuare. Inatsu tujatu aracuare. Tumebaedyatu tyacuare tuatsehue cuaya cuanaque. Arepa tuja, tuatsehue cuaya cuanaja jadya arataquima paju ama bucha tuna aracuare, pae cuanaja cuita camadya arataquique. Jadya ama buchatu Yusu cahuaishacuare ama, tumeque pan aratsu.

⁵ “IQUE ECUITAjatu aniya cacuatsashati canajara huecacaju ai juishuque, —jadya tuna Jesúsra acuare.

Jesúsra ecuita emetucu majuque chachanecuareque

(Mt 12.9-14; Mr 3.1-6)

⁶ Canajara huecacajutu Jesús caradati ishúque etareju nubinucacuare. Catibuticuaretu bahuitya bahuitya. Tuhuatu jucua ecuita jida equeque emetucu majuque. ⁷ Cacuatashati bahuityaqui cuanara, fariseo cuanara jadyatu Jesús jidama inime tupu tsehue petacuare. “Tura ni canajara huecacaju riyaque emetucu majuque chachaneya, tume tuque ecuanahuaraji cuana queja cuejatiyadya”, jadya tunajatu inime tupucua.

⁸ Jesússtu bahue jucua eje bucha tunara inime tupuyaque. Tume tujatu isaracuare ecuita emetucu majuque:

—Netitsuracue. Netinacue requeja tuna patya, —jadya tujatu acuare.

Jadya ahuajutu netitsuracuare tumeque ecuita. Netitsuratsutu tuna patya netiticuare. ⁹ Tumetu Jesúsra tuhua cuanaque bacaduracuare:

—Bacaduraya micuana era. ¿Ecuanaja cacuatsashati eque canajara huecacaju tuque ecuanaja jidaque ataqui, jidamaque ni taa? ¿Ejeque majutaqui baatsu echachaneudyatuque ecuanara, “Pamaju” jadya ni taa ecuanaeau? ¿Eje bucha micuana inime tupuya? —jadya tujatu ecana acuare.

¹⁰ Tumetu Jesúsra petacuare dutya tuque tabuqui cuanaque. Tuna petatsutu anucacuare ecuita emetucu majuque:

—Rirucue micue ebi, —jadya tujatu acuare.

Jadya ayajutu ecuitara rirucua ebi. Tura ebi riruya tsehuedya cuitadya tujatu emetucu chacha jucua.

¹¹ Jadya juya baatsutu Jesús ujeu baqui cuanaque dyaque cahuaiticuare. Tuna cama tuna cacuejaticuare:

—¿Eje bucha tuque ecuanaeau Jesús iyemere ishú? —jadya tuna tuna cama jucua.

Jesúsra peadya tunca beta earacana tuatsehue juneni ishú mepecuare cuanaque

(Mt 10.1-4; Mr 3.13-19)

¹² Jadya juu jadya juatsutu Jesús tsuracuare emataju Yusu tsehue quisaratira. Peadya meta yutatu Yusu tsehue quisaratisisacuare. ¹³ Huecacatsu tujatu tuaqueja ihuaracuare tuatsehue juneni ishú. Tume tujatu mepecuare peadya tunca beta earacana.

—“Jesúsja Ecuadisha cuanaque” jadya bacani eque neadebatacue, —jadya tujatu ecana acuare.

¹⁴ Ebacaniju tujatu abarecuare:

Simón (Jesúsra tujatu peya ebacani iyacuare “Pedro”).

Andrés (Simón tsehuequique)

Santiago

Juan

Felipe

Bartolomé

¹⁵ Mateo

Tomás

Santiago (Alfeoja ebacuaque)

Simón (Tuque patu Roma juque enaruquique bijidamaduraqui juyaque jucuare.)

¹⁶ Judas (Santiago tsehuequique)

Judas Iscariote (Jesús inamerequi judadicuareque) Jadya tuna jucuare tura mepecuare cuanaque.

Jesúsra jetiama ecuita cuana bahuityacuareque

(Mt 4.23-25)

¹⁷ Jesústu butecuare emata juque tuna tsehue. Tume-tu netidirucuare uhua jepedaju tura mepehua cuana tsehue. Tumebaedya anicuare umada ecuita dutya quejaque Judeaju aniya cuanaque jecuareque, Jerusalén juque, dyaque japada cuanaque Tiro, Sidón jadya quejaque. Tume cuanaque tuna junacuare Jesús quisaratiyaque bacacara aatsu, tuja chachane ishú jadya. ¹⁸ Jesúsra tuna chachanecuare. Tumebaedya tujatu ijehuecuinacuare ijahua cuana umae ecuita cuana quijahuatishaqui juya cuanaque. ¹⁹ Dutya ecuitaratu Jesús jabacara acuare tuja unaju. Tuja una jabatsudya jutidya tuna chacha jubarecuare.

Jida, jidama jadya aniya cuanaque

(Mt 5.1-12)

²⁰ Jadya juatsutu Jesúsra tura mepehua cuanaque petatsu acuare:

—Dyaque jida micuana aniya. Arepa micuana nerecada juya ama bucha, Yusura micuana naruya, baya jadya aya.

²¹ “Dyaque jida micuana aniya. Arepa micuana iyacua aracara juya ama bucha, tupuju micuana tyatanabuque dutya micuanara ai sareya cuanaque, pana jeque juya tupu.

“Dyaque jida micuana aniya. Arepa micuana iyacua peya inime juya ama bucha, tupuju micuana casaturatanabuque.

²² “Dyaque jida micuana aniya, arepa iyacua micuana Yusu jaque ama cuanara ujeu baya ama bucha, arepa tunara micuana caradati ishúque etare juque ijehueya ama bucha, arepa tunara micuana ijillahuanaya ama bucha, arepa tunara micuana bijidamaduraya ama bucha. Tunara micuana nerecaturaya, IQUE ECUITA queja catyatihua baatsu. Jadya ama bucha dyaque jida micuana aniya. ²³ Jadya atayaju, dyaque pureama neju-cue. Necanimehuallatiume, barepaju Yusura dyaque jidaque tyatsabuqueque adebatsu. Micuana camadya ama micuana jadya canerecatie juya. Jadya nerecaturaediyatu tunaja ebaba cuanaquera acuare béru Yusu equeque quisarati cuejaqui cuanaque.

²⁴ “¡Nerecapane micuana, ecue ama cuanaque, chipiruda cuanaque! Riyaque yahuaju camadya micuana pureama juya; tupuju bacue aijama.

²⁵ “¡Nerecapane micuana iyacua jetiama ai dyaque umada aniya cuanaque! Tupuju tuque micuanaja aijama jubuque.

“¡Nerecapane micuana iyacua pureama juatsu tsaya cuanaque! Quique, pau pau micuana jubuque.

²⁶ “¡Nerecapane micuana! Dyaque jidama micuana nerecada jubuque, arepa iyacua dutyara jida micuanaja ishú quisarati aya ama bucha, tupuju bacue aijama. Micuanaja ishú camadya ama jadya jida quisaratie juya. Jadya jida quisaratiediyatu jucuare micuanaja baba cuana pusha pusha bahuityaqui cuanaja ishú, —jadya tuna Jesúsra acuare.

Eje bucha iyuhuebatsae ecua ujeu baqui cuanaque aishuque

(Mt 5.38-48; 7.12)

²⁷ Jesúsra tuna bahuityanucacuare:

—Micuana ique bacaqui cuanaque micuana cuejaya. Iyuhueda nebacue micuana ujeu baqui cuanaque. Jida ecana nebacue. ²⁸ Micuana jidama quisarati tsehue aqui cuanaque jida nebacue. Yusu queja nebacabacacue micuana ijillahuana, jidama aqui cuanaja ishú. “Jida jucue ique ujeu, jidama jadya aqui cuana tsehue”, jadya Yusu neacue. ²⁹ Ejera bahuapajayaque juatsu, peya ebahua eque necatimerenucacue. Ejera micuana chompa secayaque juatsu, netyacuеды micuanaja camisa. ³⁰ Ejera ai bacayaquedy netyacue. Ejera micuana jaque ai secayaque juatsu, “Cuaretyau anucacue” jadya neaume. ³¹ Peya cuana queja necabamereticue tunara eje bucha bacara aya eque. Jadya tibudya tuna dyadi jida tsehuedya nebacue.

³² “Micuanara ni micuana iyuhueda baqui cuanaque camadya iyuhueda baya, “Ecuana ecua peya cuana bucha dyaque jida”, jadya micuanaja inime paju ama. Butsee jucha arida cuanaratu iyuhueda baya tuna iyuhueda baqui cuanaque. ³³ Micuana jida aqui cuanaque camadya ni micuana jida baya, “Ecuana ecua peya cuana bucha dyaque jida”, jadya micuanaja inime paju ama. Butsee jucha arida cuanaratu tuna jida aqui cuanaque jida baya. ³⁴ Micuanara ni chipiru tyaya ejeque micuanara cuaretyau anucayaque adebayaque camadya, “Ecuana ecua peya cuana dyaque ji-

daque”, jadya micuanaja inime paju ama. Butsee jucha arida cuanaquetu jadidya juya. Tunaratu jucha arida cuanaque tyayadya, tunara ecuarequi tyanucayaque adebatsu. ³⁵ Iyuhueda nebacue micuana ujeu baqui cuanaque. Jida ecana nebacue. Netsahuacue ecana. Netyacue ecana ai tunara bacayaque, “Cuaretyau tura anucaya”, jadya juatsu ama. Jadya juatsu micuana Yusura dyaque jidaque tyadadibuque. Yusu tu dyaque jida, tuque yusurupai abaecua cuana tsehue, jidama cuana tsehue jadya. Micuanara ni ecana jida tsehue baya, tume micuana Yusu ebarucueja ebaecua cuanaqueque ejitaju cabameretiya. ³⁶ Jida tsehue nebacue ejequedya jutidya, micuanaja Tataru micuana jida tsehue baya bucha, —jadya tujatu ecana acuare.

Peya cuana jidama juyaque cuatsabiji jutaquique ama
(Mt 7.1-5)

³⁷ Jesúsra tuna bahuityanucacuare:

—Micuanara ni peya jidama juyaque cuejaya, tume micuana Yusura eje bucha juyaque cuejayadya. Micuanara ni “Peya cuanatu inime metse” jadya aya ama, tume micuana Yusura “Inime metse” jadya ama aya. Micuana ni pana nime aputa juya peya cuanara jidama ayaque, tumetu Yusu micuana jidama juyaque pana nime aputadya juya. ³⁸ Netyacue peya cuana; Yusura dyadi micuana tyayadya. Inijeda nejuume tuna tsehue. Ijahue ecana neaume equiniqui pana jequesha ama tsehue. Nejequeshae tunaja equiniqui. Pana jequesha neacue. Cuacha cuacha jequesha tii jadya tunaja shitara neacue. Pana jequesha tii ai nudyanucataquima neamerecua. Micuana ni peya cuana ai tyaishu inijeda juya, tumetu Yusu dyadi inijedadya juya micuana jidaque tyaishu. Micuanara ni tyacara tsehue tupuya ai tyayaque, tume micuana Yusura dyaque jidaque tyaajeyadya jutidya, —jadya tujatu ecana acuare.

³⁹ Jesúsra tuna cuatsabiji cuejacuare tuna bahuityayaque:

—Eje bucha jida caaquerenitie jatsutu ejuu beta tupu shuhuique ecatsé! Tume taa tatse betadya caniju epacacadiruu. ⁴⁰ Ejeque cabahuityatiyaque tu tuque bahuityaqui bucha dyaque bahuee ama. Tuque bahuityatayaque bahue juteretsu piisitu tuque bahuityaqui bahuee bucha ejudadiu.

⁴¹ “Micuanaja cuitadya yatucaju acui tibu ebari aniyaque juatsu, ¿eje bucha juatsu jatsu tuque micuana peyaja yatuca juque aijara piji quemicara aya?

⁴² Micuanaja cuitadya yatucaju acui tibu aniyaque caadebatiaque ama, ¿tume tuque micuana peya eje bucha juatsu jadya eau: “Aijara tuque micue yatucaju aniya. Paquemi micue era”, jadya eau? [Ebaupa, ai jidique micuana shuhuique buchique! Icuene micuana cuitadya yatuca juque acui tibu necaquemiticue. Caquemititsu tuque micuana ebau jida peyaja aijara yatuca juque quemi ishú, —jadya tuna Jesúsra acuare.

(Riya tsehue tujatu ecana bahuityacuare: Neadebacue micuanaja jucha. Adebatsu neajacacue, peyaja ishú jidama quisaratimaque.)

Ecacaju acui adebataquique

(Mt 7.16-20; 12.33-35)

⁴³ Acui jidajatu juya amadya ecaca jidama arataquimaque. Acui arataquimajatu juya amadya ecaca arataquique. ⁴⁴ Dutya acuitu adebataqui ecacaju. Acui cuijaquijutu higo ni uvaja ecaca juya ama. ⁴⁵ Ecuita jidaquetu jidadya quisaratiya, jidaque inime tuja educuju aniya tibu. Ecuita jidamaque bacue jidama quisaratiya, jidamaque inime tuja educuju aniya tibu. Educuju ecuanaja inime tupu aniyaquedya tuque ecuanaja quisarati abahue —jadya tuna Jesúsra acuare.

Jesús queja nimee cuanaque, tuaqueja nimee ama cuanaque jadya
(Mt 7.24-27)

⁴⁶ Jesúsra tuna cuejanucacuare:

—Ni eje bucha “Ecuana Cuatsashaquique” jadya ataquí ama micuanaja ique, ai micuana era amereya eque juya batu. ⁴⁷ Cuejaya micuana riyaque cuatsabiji micuana huecasha ishú, ai bae eaqueja catyatitsu ecue quisarati bacaqui cuanaque jadique. ⁴⁸ Anicuairetu beta ecuita etare caticuareque ecatsé. Icueneratu deda purucua. Puru jadya aatsu tujatu tumu ebari dyaque yahua pajidaju dudu cuana puchacuare. Jida deda tujatu puchacuare ni eje tupu bucucunuca ishú ama. Peya bacue mejijiju jutidya etare caticuare. Cueri pesitanatsutu ejuri casada tsehue etare ecatsé catsaqui jucua. Icueneque etare pujija eaque casada neticuare. Rihuicuare ama, dudu cuana yahua pajidaju casada epucha tibu. Peyara etare acuareque bacue rihuicuare, mejijiju jutidya dudu cuana epucha tibu. Pana apuatere jucua.

“Era bahuityayaque bacatsu era amereya eque juya cuanaque tuna yahua pajidaju etare caticuare buchique. Tuna tuna ni eje tupu yuamaturatana ishúque ama. Era amereya eque ama juya cuanaque bacue mejijiju etare caticuare buchique. Tuna tuna pana apuatere jubuque, —jadya tuna Jesúsra acuare.

Jesúsra 100 sudaru cuana cuatsashaquija mere puji chachanecuareque
(Mt 8.5-13)

7 Jesúsra ecuita cuana isaratilla amena aatsu, cuacuare peya epu Capernaum bacaniju. ² Tuhuatatu jucua huaraji cien sudaru cuana cuatsashaquique Roma juque ecuadishaque. Anicuaire tujatu mere puji dyaque iyuhuedaque. Tumeque tuque merequiquetu dyaque ujejeda majuhuie jucua.

³ Jesúsra ujejeda cuanaque chachane juya jadya bacatsutu cien sudaru cuana cuatsashaquira ihuaracuare uma israelita cuana emuiba cuanaque.

—Necuacue Jesús queja. Necuejaticue paje rehua. Pachachanenatu ique merequique, —jadya tujatu ecana acuare.

⁴ Tura jadya ahua juya tuna cuacuare Jesús queja. Tuque jipetitsu tuna tuaqueja canerecaticuare:

—Nerecabacue taa ecuana. Chachaneticue cien sudaru cuana cuatsashaquija mere puji. Dyaquene cuita, majuhuie tuque. Nerecabacue taa sudaru cuanaja huaraji. Tuquetu dyaque jidaque. ⁵ Arepa Roma juque ama ama bucha, dyaque iyuhueda tujatu baya ecuana-ja ata israelita cuana. Turadya tuque ecuanaja amerecuare etare ecuana caradati ishuque rehua Capernaumju, —jadya tunajatu acuare Jesús.

⁶ Tunara jadya ayajutu cuacuare Jesús tuna tsehue. Jesús etare japadama juajeyaju tuna huarajira cuadishacuare tuja eadeba cuanaque Jesús cuejatsa ishu:

—Jetaqui ama taa mi ecue etareju, Ique Cuat-sashaquique. Ique israelita ama. Bahuedya ique micue cacuatsashati eque mique ecue etareju nubitaquique ama. ⁷ Jadya tibudya mique tsurutsahua ama, ique mique buchique ama juya tibudya. Nerecabacue ique. Mique eju netiya eque camadya cuatsashacue ique merequique ecue chacha juishu. ⁸ Ique ecue huaraji cuanara cuatsashayaju yana equedya jubahue. Era dyaditu sudaru cuana cuatsashayadya. Era ecue sudaru cuadishayaju, masadamadyatu cuaya. Peya ni era ihuaraya, masadamatu jeya. Era ni ecue mere puji “Acue jeeque” jadya aya, masadamadya tujatu aya. Ique bahuedya micue casa aniyaque ique merequique chachane ishu, —jadyatu huarajira cuejamerecuare Jesús.

⁹ Jadya bacatsutu Jesúsra ecuita bape bacuare tuja quejeneti baatsu. Tibene huarere juatsu tujatu tuque tupuju cuaya cuanaque petacuare.

—Riyaque Romajura taa dyaque ejene neri aya era tuja tuque merequique echachaneuque. Pusha amadya aijamatu ni ejeque ecue ata israelita ique dyaque ejenequique, —jadya tuna Jesúsra acuare.

Tumetu Jesúsra tuequeradya jutidya chachanecuare.

¹⁰ Amena etareju judirunucatsutu cuadishahua cuanara badirucare huaraji merequique chacha juhuaju.

Jesúsra eahuemajuja ebacuaque majuhuaque chacha nityatsuranucacuareque

¹¹ Jadya juatsutu Jesús cuacuare Naín bacani epuju. Tura mepehua cuanara, peya umada ecuita cuanara jadyatu tajiajecuare. ¹² Amena epu piji dyanetu Jesusra tsurutsacuare ecuita cuana ehue ebari emajuque tumu caniju ishathi ishu duju juyaju. Tumeque emajuquetu epuna eahuemajuja peadyaque piji ebacuaque jucuaque. Umada ecuita epu ebariju cuanaratu epuna tajiajecuare. ¹³ Jesusratu eahuemajuque baatsu, nrecada bacuare.

—Paume, mama, —jadya tujatu acuare.

¹⁴ Jipetsu tujatu emajura jara ishu ayaque jabatsacuare, emajuque dujuqui juya cuanaque nityatsa ishu. Jabatsayajutu emajuque duju juya cuanaque netinaticuare.

—Anitsuracue, ehue ebari emajuque, —jadya tujatu acuare emajuque.

¹⁵ Jesúsra jadya ayajutu ehue ebari emajuque chacha junucacuare. Chacha juatsutu anitsuracuare. Quis-

aratitibunecuare. Chachanetsutu Jesúsra ehue ebarija ecuaque cuejacuare:

—Jee micue bacua chacha juhua, mama, —jadya tujatu acuare.

¹⁶ Jadya baatsutu tuhua cuanaque anajacatacuare. Yusuja ishu tunajatu jida quisarati acuare:

—Yusu equeque quisarati cuejaquiquetu ecuana tsehuedya aniya! —jadya tuna jucuaque.

¹⁷ Dutya Judea yahuaju, peya epu japadama cuanaju aniya cuanaque jadya tuna bahue jucuaque Jesúsra emajuque chacha nityatsuranucaguaque.

Juan Ecuita Cuana Utsaquira Jesús bacaduramerecuareque (Mt 11.2-19)

¹⁸ Juan Ecuita Cuana Utsaquiratu bacatsacuare quisarati Jesús ai juyaque, emajuque tura chacha nityatsuranucaguaque. Juan tsehue juneniya cuanaratu cuejacuare. ¹⁹ Jadya bacatsutu Juanra ihuaracuare beta tura mepehuaque ecatse, Jesús queja cuadisha ishu, tuque bacadurati ishu:

—¿Midyami Mesías, Yusuja Emepeque rehua junataquique? ¿Ihuaya jari ni taa ecuana peya? —jadya tate Juanra Jesús bacaduramerecuare.

²⁰ Juanra cuadishahuaque ecatsetu junaticuare Jesús queja. Junatitsu tatsejatu anaticuare:

—Juan Ecuita Cuana Utsaquira yatse cuadishahua rehua mique bacadurara. ¿Midyami Mesías, Yusuja Emepeque rehua junataquique? ¿Ihuaya jari ni taa ecuana peya? —jadya tatsejatu aticuare.

²¹ Tatse junatihuajutu Jesúsra chachanecuare umada ujejeda cuanaque, dyaque jidama ujeje cuana tsehue nrecada jucuaque cuanaque. Chachanecuaretu ijahua cuanara quijahuatishaya cuanaque; tuna quejaque tujatu ijahua cuana ijehuecuinacuare. Umada shuhui cuanaquetu capetatishacuare. ²² Tume tatse Jesúsra quemitsacuare:

—Metseratu bacahuadya era ai cuejayaque. Bahuadya metsera ique ujejeda cuanaque chachane juyaju. Dirunucatsu Juan necuejadirucue metsera bahuaque, bacahuaque jadya. Necuejacue era shuhui cuanaque capetatishayaque; rudurudu cuanaque rena jida ajeshaya; pusesera ririshaya cuanaque rena chachaneya, isahue cuanaque rena quijacabacatishaya; emaju cuanaque rena nityatsuranucaya; nrecada cuanaque rena Yusu queja judiru ishuque quisarati cuejaya. ²³ Dyaque jida paju ique dyaque adebaquique, eaqueja nimee jujacayaque ama jadya, —jadyatu Jesúsra Juan cuejamerecuare.

²⁴ Juanra cuadishahuaque ecatse diruhujutu Jesúsra cuejatibunecuare Juan eje buchique:

—Jetiama micuana cuachine yachiju Juanra cuejayaque ijacabacara. ¿Ai tuque micuana batichine tuhua? Micuanaratu adebahuadya Juanra ejenecara, ejenecarama jadya ama Yusuja quisarati ahuaque. Shita cuejijira peya queja huanati, peya queja huanati eau bucha ama tuque. ²⁵ Bacaduranucaya micuana era. ¿Eje buchique ecuita batiya bucha tuque micuanaja in-

ime juchine? Bahuedya micuana, tuque ejutuqui jida piji tsehue ama ecajututique. Ejutuqui jida piji tsehue ecajututi cuanaque tuna chipiruda cuanaja, ecuari cuanaja etareju aniya. ²⁶ Bacaduranucaya micuana era. ¿Ai bucha adebatsu tuque micuana batichine? ¿Yusu equeque cuitadya quisarati cuejaquique ni taa tuque micuana batichine? Pusha amadya, Juan tu Yusu equeque cuitadya quisarati cuejaquique. Yusratu tuque mepecuare israelita cuana quisarati cueja ishu. ²⁷ Jadya tu Yusuja quisarati ehuene:

“Cuadishabuque tuque mique cuadishama jariju ique merequique.

Turatu ecuita cuana bajejebuque, tunaja mira quisarati cuejadadibuqueque bacatibune ishu”. Juan tu Yusuja quisarati cuejaquique. ²⁸ Riyaque micuana cuejaya. Juan Ecuita Cuana Utsaquiratu quisarati cuejahua dyaque saretanayaque, beru yuequedy a quisarati cuejaqui cuanara cuejahua buchique ama. Jadya ama bucha iyacua ecue cuanara cuejayaque tu dyaque jidaque, Juanra cuejacuare buchique ama. Jaididya tuque, arepa micuanara ecue cuanaque jetiedya, aishuque ama jadya baya ama bucha.

²⁹ “Dutya jujeri ebijidamadura cuanaque Juanra quisarati cuejayaque bacatsu, tunajatu inime juticuare, Yusu yuneridya tuyuque. Butsee Roma juque enaruquija ishu chipiru tsuje bacaqui cuanaque tuna inime cacuareticuare. Tuna jadya juhuaju tuna Juanra utsacuare. ³⁰ Fariseo cuanara, cacuatsashati bahuityaqui cuanara jadyara tunajatu bijidamaduracuare Yusura tunaja ishu eje bucha acara ayaque. Tuna tuna inime cacuareticuare ama; ni ecana Juanra utsacuare, —jadya tuna Jesúsra acuare.

³¹ Tume tuna Jesúsra bahuityanucacuare:

—¿Ai baetu iyacua aniya cuanaque? ¿Ai tsehue beta tupu jadya tuna eau? ³² Tuna tuna peya cuanara cuejaya eque jucarama juya. Ebacua cuana ijahue juya bucha jutidya tuna, peya ebacua cuanara ijahue aque-recara ayaju ijahue jucarama juya bucha. “Yusura tu-aqueja judiru ishuque quisarati cuejamereyaju bacatsu, pureama nejucue”, jadya ayaju bacatsu, tuna pureama jucarama juya. “Peya inime micuanaja jucha cuana aniyaque caadebatitsu nejucue”, jadya ayaju bacatsu, tuna peya inime jucarama juya. Ebacua cuana tuna tsehue tupu cuanara rauta duduyaju ijahue jucarama ejuu bucha tuna. Ebacua cuana tuna tsehue tupu cuanara peya inimeque jeru ayaju pacarama ejuu bucha tuna. ³³ Iyacua tunara yatse bijidamadurahua Juan, ique jadya. Juantu anicuare quibeti neri juyaque, ecuita cuana tsehue araara, ijiji jadya juyaque ama. Tuque jadya juya baatsu tuque micuana ahua, tuquepa equijahuati jadya. ³⁴ Tuequedy IQUE ECUITA junahua. Ique bacue earaqui ara, uva nacaca esasanashaque iji jadya juya ecuita cuana tsehue. Ique jadya baatsu micuanara “Dajicada, nijuqui arida” jadya aya. Iquepa ecuita cuanara bijidamaduraya cuanaja ecare; tumebaedya iquepa enaruquija ishu chipiru sitaqui cuana tsehue casitatiya, jadya micuanara aya.

³⁵ Era, Juanra jadya ayaque baatsutu ejitaju yatse be-

tadya Yusura bahue amereya eque juyaque, —jadya tuna Jesúsra acuare.

Fariseo Simón bacanija etareju Jesús cuacuareque

³⁶ Fariseo Simón bacaniratu Jesús ihuaramerecuare araaraquere ishu. Jadya ahujatu Jesús cuacuare tuja etareju. Junati jadya juatsutu anibutecuare araara ishu. ³⁷ Tumetu epuna decadeca aridara tumeque epuna aniyara bacacuare Jesús fariseoja etareju araara cuahua jadique. Jadya bahue juatsutu epuna cuacuare tumeque etareju. Dujucuare tujatu ijimedaque dyaque tsuje aridaque botilla alabastro eaju equinineque.

³⁸ Nubinatitsutu Jesúsja ehuchi peque anibutetsu pacuare, Jesús muibayaque caadebamereti ishu. Pa-yara tujatu paanacaca tsehue Jesúsja ehuchi nacata-shacuare. Ehuchi paanacaca tsehue nacatashatsu, tujatu etsaru tsehue tillatsu rarashacuare. Huachidyahua jadya tujatu acuare. Jadya aatsu tujatu etseri ijimedaque juracuare tuja ehuchiju. ³⁹ Jadya juyajutu fariseora Jesús ihuaraqui juhuara bacuare. Jadya baatsu tujatu inime tupucuare:

—Jesús ni tu Yusuja Ecuadishaque ama. Jadique juatsu taa tujatu eadebau tumeque epuna jidamaque. Tumebaedyatu eadebau tumeque epuna jida anieque ama, —jadya tujatu inime tupucuare.

⁴⁰ Jesusratu adebacuare Simónra eje bucha inime tupuyaque.

—Simón, bacacue. Cuejacara mique aya, —jadyatu Jesúsra acuare.

—Cuejacue taa ique, Ebahuityaquique, —jadyatu Simónra quemitsacuare.

⁴¹ —Anicuaretu ecuita chipirudaque. Beta ecuitajatu manu anicuare tuaqueja. Peadyajatu manu dyaque umada anicuare —500 ficha cuana, peadya ecuitara beta mara mere juatsu etsujequi einau tupu. Peyaja bacue peya tsehue beta tupu ama jetiedya —50 ficha cuana camadya, peadya ecuitara beta badi mere juatsu etsujequi einau tupu. ⁴² Betara tatsejatu tsujety-ataqui ama bacuare tatseja manu. Jutaquijudyatu tatse manu inamerequirira nrecabacuare tatseja manu. Jadya apupashaetu chipirudara acuare manu tatseja beta jadya.

“Iyacua era mique bacadurayaque quemitsacue, Simón. ¿Ejera tatsejatu dyaque yusrupai, iyuhueda jadya baya manu apupashaquique? —jadyatu Jesúsra acuare Simón.

⁴³ —Eratu manu dyaque jetiamaque apupashatanahuaque adebaya.

—Tuyudya, —jadyatu Jesúsra acuare.

⁴⁴ Tumetu Jesúsra huareretsu epuna petayara Simón cuejacuare:

—Bahuadyami riyaque nrecadaque epuna. Ique micue etareju nubihuaju mira huachi utsamerehua ama mique merequi cuana queja, ecuanaja bahue eque. Jadya ama bucha riyaque epunara tuque ecue utsahua tuja paanacaca tsehue. Etsaru tsehue tuja tuque ecue tillahua. ⁴⁵ Ni mira ique junayaju dyahuatsahua, ecuanaja bahue eque. Riyaque epunara taa ju-

naya tajira dyahuahuaque dyahuajacaya ama ecue ehuchiju. ⁴⁶ Ni mira etseri tsehue iyucaju pepahua eihuara cuanaque eata bucha. Tura taa ecue ehuchi nacatashua etseri ijimeda tsehue. ⁴⁷ Jadya mique cuejaya, Simón. Tura ique jadya ayaquetu cabameretihua tura ique dyaque iyuhueda bayaque, tuja jucha cuana jetiamaque apupashatanahuaque jadya. Ejeque riya piji jucha apupashatayaque bacue dyaque ama iyuhue cabameretiya, —jadya tujatu Simón acuare.

⁴⁸ Simón jadya aatsutu Jesúsra epuna isaracuare:

—Era tuque micue apupashaya jucha cuana, mama.

⁴⁹ Peya cuana tuatsehue anibareya cuanaque tuna quisaracuare tuna cama:

—¿Eje bucha anie rejari ejuu inime jucha apupasha ishu?

⁵⁰ Jesusratu epuna acuare:

—Yusurami amena inajacamerehua, mique eaqueja catyatihua tibu. Jida dirucue, mama, —jadya tujatu acuare.

Jesús tsahuaqui jucuareque epuna cuana

8 Jesústu junenicuare jetiama epu cuanaju, epu achaacha cuanaju, Yusura tuaqueja catyatiya cuanaque eje bucha narue ayaque jadya cuanaque cueja juyaque. Peadya tunca beta earacana tura mepehua cuanaratu tajitajinicuare. ² Icuenetu Jesúsja echachanedya jucuare umae epuna ijahua cuanara quijahuatishaya cuanaque, ujejeda cuanaque jadya. Quimisha epuna jadya chachae jucuare cuanaratu tajicuarenya. Jucuare tuna: María, Magdalaju anicuareque (Tujadyatu pacarucu ijahua Jesúsra ijehuecuinacuare.); ³ Juana, Chuzaja ehuaneneque, (Chuzatu Herodesja etareju mayuruma jucuare.); tumbaedyá Susana. Jetiama umae epuna cuanaratu tajicuarenya. Tunaja ai aniya cuana tsehue piji tsahua jadya tunajatu acuare.

Uhuauhua puji cuatsabiji

(Mt 13.1-9; Mr 4.1-9)

⁴ Tuhuapa Jesús jadya bacatsu tuna jetiama epu cuana juque cuinanabarecuare Jesús queja cuaishu. Casitatihuaju tuna Jesúsra bahuityacuare cuatsabiji eque.

⁵ —Anicuaretu ecuita. Cuacuaretu tuja teeju uhuauhuara. Tura uhuaajeyaquetu umae pacacacuare edijiju, yahua pajidaju. Uhuayaque tujatu etsucaca huirucuare yahuaju. Tueque ajeya cuanaratu tapapashacuare. Upati huiri cuanaratu anibutetsu mucutillacuare. ⁶ Peya etsucaca cuanatu pacacacuare yahua macana dedamaju. Huijatsutu danecuare ama. Raracuare jutidyatu euhuaque ehuija cuanaque, tuja etiri yahua nacadaju ama tibu. ⁷ Umae bacue pacacacuare acui tiri, acuija jadya jetiama ducu. Acuija cuana danetsu tujatu trigo euhuaque ehuija cuanaque iyetillacuare. ⁸ Umae etsucaca cuanatu pacacacuare yahua jidaju. Cacaticuare umada. Tee mere pujiratu jetiama huesacuare tuhua euhuaque. Peadya peadya esajutu jucuare cien tsucaca. Jadyatu jucuare teeju euhua cuanaque, —jadyatu Jesús jucuare.

Tumeque quisarati cueja amena aatsu tuna Jesúsra acuare:

—Quijacabacati aqui juatsu, nebacacue, —jadya tujatu ecana acuare.

Eje bucha juatsu ecana Jesúsra cuatsabiji eque bahuityacuareque

(Mt 13.10-17; Mr 4.10-12)

⁹ Tumetu Jesús tura mepehua cuanara bacaduracuare:

—¿Eje buchique ri riyaque cuatsabiji? ¿Ai mira ecuana bahuityacara aya? —jadya tunajatu acuare.

¹⁰ —Yusura micuana pana adebamere acara aya tura tuja cuanaque naruyaju eje bucha juyaque. Peya cuana jadya cuejae eauque, tuna cuatsabiji cuana eque jutidya cuejaya jari, tunara era bahuityayaque pana adeba eauju. Tunaratu era ayaque baya. Tume tuna baatsu bama jiu juya. Bacatsu tuna bahuityahua ama jiu juya, arepa bacahua ama bucha, —jadya tuna Jesúsra acuare.

Jesúsra pana cueja cuatsabiji uhuauhua puji equeque acuareque

(Mt 13.18-23; Mr 4.13-20)

¹¹ Jesúsra tuna bahuityanucacuare:

—Pana cueja micuana aya uhuauhua puji cuatsabiji equeque eje buchique. Etsucaca euhua cuanaquetu Yusuja quisarati jadique. ¹² Umaetu Yusuja quisarati bacatsu masadama nime aputaya, Satanásra masadama pana nime aputashamere aya tibu. Jadya tibudya tuna Yusu queja catyatiya ama; Yusura tuna Ijahua quejaque inajacamereya ama. Tuna tuna yahua pajidaque buchique. ¹³ Umaeratu ejetsunue ishu ama pureama tsehue Yusuja quisarati bacaya. Quisarati ejenehua baatsu jidama atayaju, masadama tuna ejenejacaya, pana adeba aya ama tibu. Tuna tuna yahua macana dedamaque buchique. Huijahua cuanaquetu macana quini danetsu tsunuda ama juya, etiri dedama tibu. ¹⁴ Umaera Yusuja quisarati bacaya cuanaratu ejenejacaya, riyaque yahuaju cuanaquedya jutidya dyaque inime tsapequi aya tibu. Tunajatu inime juya, chipiru anitsu cuita camadya dyaque pureama ejuu bucha. Dutya tuna tunaja bijida cuanaque camadya inime tupuqui aya. Jadya juatsu tuna Yusu muijacaya. Tuna tuna yahua acuija quinique buchique. ¹⁵ Umae cuana Yusuja quisarati bacaqui juya cuanaratu adebaajeyadya jutidya. Nime aputaya ama ecana. Tuna eje bucha anieju tuna ejitaju Yusuja biji eque aniyaque. Umae cuana tunajatu tsahuaya eaqueja catyati ishu. Tunadya tuna yahua jidaque buchique, esaju jetiama etsucaca cacacatihuaque buchique, —jadya tuna Jesúsra acuare.

Yusura eje bucha ahuaque catehuatitaquique ama

(Mr 4.21-25)

¹⁶ Jesúsra tuna bahuityanucacuare:

—Ude tuchatsu tuque ecuana tehuaya ama eperere emaque ni ishaya ama sura ducu. Etehauque tuque

ecua na iyaya ebarucue, nubitiya cuanaja jida capetati ishu. ¹⁷ Dutya etehuaquetu ejitaju judadiya. Dutya ibedaquetu adebataqui judadiya. Yusura micuana bahue ameredadiya eje bucha jue tujaque juishuque.

¹⁸ "Pana baca neacue era cuejayaque. Ejeja ai aniyajatu dyaquedy a ai aniajeya. Ejeque ai aniya bucha cabatiyaque, aimaquedy jutidya, tuja aniya cabatiyaque tujatu aputatereya, —jadya tuna Jesúsra acuare.

Jesúsja ecuaque, tuatsehuequi cuanaque jadya Jesús jiteque cuacuareque
(Mt 12.46-50; Mr 3.31-35)

¹⁹ Jesúsja ecuaque, tuatsehuequi cuanaque jadya tuna junaticuare tuaqueja. Jipetaqui ama tunajatu bacuare, tuhua jetiama ecuita jucuar tibu. ²⁰ Tumetu ejera cuana Jesús cuejaticuare:

—Micue cuaa, micue miatsehuequi cuanaque jadya rena etsecueju. Miatsehuepa tuna quisaraticara juya, —jadya tujatu Jesús aticuare.

²¹ Jadya bacatsutu Jesúsra acuare:

—Tumeque epuna tuque ecue ecuaa; tume cuanaque tuna ecue eatsehuequi cuanaque. Jadya ama bucha tuque ecue aniya peya ecue iyuhueda cuanaque. Yusuja quisarati bacatsu tueque juya cuanaque tuna tuque ecue iyuhueda cuanaque. Tunadya tuna ecue ecuaa, ecue eatsehuequi cuanaque bucha bae ayaque, —jadya tuna Jesúsra acuare.

Jesúsra cuejipa, ena pacu jadya nityacuareque
(Mt 8.23-27; Mr 4.35-41)

²² Peya huecacatu Jesúsra acuare tura mepehua cuanaque cuabaju anibutetsu:

—Bei yueque macare necarequetira, —jadya tujatu ecana acuare.

Jadya juatsu tuna carequeticuare. ²³ Carequetiyaquetu Jesús tahuicuare. Tuque tahuijarayajutu muya jutidya cuejipa casadaque jueticuare. Cuejipa juetitsutu ena pacura cuaba ebariju ena ishacuare. Jadya tibusu ena pacura cuaba nudyajeri nudyajeri acuare. Rumutanaya bucha tuna cabaticuare. ²⁴ Jadya cabatitsutu tura mepehua cuanara Jesús bushishaticuare.

—¡Ecuana Naruquique, rumutanaya ecua! ¡Ena pacura ecua nudyaya! —jadya tunajatu acuare quique eque.

Tunara jadya ayajutu Jesús cabaticuare. Netitsuratsu tujatu acuare cuejipa, ena pacu jadya:

—¡Tume tupu camadya! ¡Neticue! —jadya tujatu acuare.

Tura jadya aya tsehuedyatu cuejipa neticuare. Dutyatu pana abacatana jucuar. ²⁵ Jadya juatsutu Jesúsra acuare tura mepehua cuanaque:

—¿Eje bucha juatsu micuana bajida cuita juhua? ¿Eje bucha juatsu micuana eatsehue nime aputahua?

Tuna bacue dyaque eanajacata jucuar. Bajida ecana jucuar. Tuna taca tuna jadya jutibunecuare:

—¡Ai ecuita dyadi ri riyaque! ¡Cuejipa, ena pacu jadya taa tuja yana equedy juya! —jadya tuna jucuar.

Jesúsra ecuita ijahua cuanara quijahuatishayaque quijahuatishajacacuareque

(Mt 8.28-34; Mr 5.1-20)

²⁶ Chamacama tuna jaratsuradirucuare Gerasaju aniya cuana queja, bei yueque macare, Galilea tuyu.

²⁷ Amena Jesús cuaba juque cuinanayajutu ecuitara jipeticuare, epu japadama dyane eanisirira. Tuquetu equijahuatique jucuar. Junenicuaretu tarema, ecatacati jadya. Anianinicuaretu tumu cani cuanaju emaju cuanaque eishaju. ²⁸ Tumetu Jesús baatsu, tuque jipetitsu chichucata jucuar tuja yacuaju. Jadya ayajutu Jesúsra ijahua cuana ecuita yuamaturaqui juya cuanaque acuare:

—Necuinanacue tumeque ecuita quejaque, ijahua cuana, —jadya tujatu ecana acuare.

Tsunudatu ijahua cuanara tumeque ecuita quijahuatishajacama acuare. Naru ishutu ecuita cuanara eje uma risi datse abahue jucuar ehuachiju, ebi ecatseju jadya cadena tsehue. Ijahua cuanaja casa tsehue tujatu cadena metal eaque tibibishajacama acuare. Ijahua cuanaratu aquerenicuare eje queja anitaya ama cuana queja japada.

Jesúsra ijahua cuana tuaquejaque cuinana ishu cuat-sashahuajutu ecuita quiquecuare:

—¿Ai jitequemi jeya eaqueja, Jesús Yusu barepajuja Ebacuaque? Nerecabacue ique. Nerecaturaume taa ique, —jadyatu equijahuatira Jesús acuare jebuda quique eque.

³⁰ Jadya quiqueyajutu Jesúsra bacaduracuare ecuita:

—¿Ai bacani mique?

—¡Ique Umadaque bacani, —jadyatu ijahua cuana caquemitsaticuare ecuitaja quisarati eque.

Jadya tuna jucuar, tuna dyaque umada tuque quijahuatishayaque cuanaque juhua tibu.

³¹ —Cuadishaume ecua emajaca ebariju ijahua cuana nerecaturatanayaju, —jadyatu ijahua cuanara acuare Jesús.

³² Jetiamatu cuchi cuana araanibarecuare emata jiruru. Ijahua cuanaratu Jesús acuare:

—Panubi ecua cuchi cuanaju, —jadya tunajatu acuare Jesús.

—Nenubicue taa.

³³ Tumetu ijahua cuanara quijahuatishajacacuare tumeque ecuita. Tuaquejaque cuinanatsu tuna cuchi cuanaju nubibarecuare. Dutya cuchi cuana ijahuaqui cuanaque tuna tsajajayaque pacacadirucuare bei tihuesu baruda eque. Beiju pacacatsu tuna huiditerecuare.

³⁴ Cuchi cuana naru juya cuanaratu bacuare jadya juyaju. Jadya baatsu tuna tsajajaterecuare epu ebariju. Cuetiyara tunajatu epu cuana juque cuejabarecuare tuhua eje bucha juhuaque. Epu ebariju judirutsu tunajatu tumeque quisarati nucadya tsapedirunucacuare.

³⁵ Tunara cuejayaque bacatsutu ecuita cuana cuabarecuare eje bucha juhuaque petara. Junaticuare tuna Jesús queja. Tuhua junatitsutu tunajatu banaticuare ecuita equijahuati juhuaque, Jesús peque juaniyaju.

Ecajututi, tuja jida inime tsehue, equijahuatijaca jadya tunajatu banaticuare. Jadya banatitsu tuna dyaque cuita eanajacata jucuare. ³⁶ Jesúsra equijahuatija ijahua cuana ijehuecuinayaju baqui jucuare cuanaratu peya cuana cuejacuare eje bucha juhuaque. ³⁷ Jadya bacatsutu dutya jujeri Gerasa yahuaju aniya cuanara Jesús muda bacuare. Jadya tibudya tunajatu acuare:

—Dirucue rehuaque.

Tunara jadya ayajutu Jesús anibuteacuare cuabaju, dirunucacara juatsu. ³⁸ Cuabaju anibuteyajutu equijahuatijacara Jesús acuare:

—Ique miatsehue junenicara juya, —jadya tujatu acuare.

—Aijama. Rehuadya anicue. ³⁹ Dirunucacue micue ata cuana queja. Cuejadirucue ecana Yusura micue ishu dutya ahua cuanaque, —jadyatu Jesúsra acuare.

Tura jadya ahuajutu ecuita dirucue. Dirutsu tujatu ecana cuejaacuare dutya tuja epuju cuanaque, tuque Jesúsra eje bucha ahua cuanaque.

Jairora Jesús jipeticuareque

(Mt 9.18-19; Mr 5.21-24)

⁴⁰ Jesús bei yueque macare judiruhajutu ecuita cuanara jida pureama tsehue batsacuare. Dutyara tunajatu ihuacuare. ⁴¹ Jesús tuna tsehue quisaratiyajutu ecuita Jairo bacanira jipeticuare. Tuquetu caradati ishuque etare juque inime metseque jucuare. Jipetsutu nuyunaticuare Jesúsra yacuaju. Nuyutsutu canerecaticuare Jesús queja tuja etareju cuaishu:

⁴² —Nerecabacue ique. Ecue ebacujuna peadya tunca beta earacana maraquetu majuhue cuita. Tuque peadya piji cuita camadya tuque ecue ebacujuna. Chachaneticue ecue, —jadya tujatu Jesús acuare.

Jesús cuayaju baatsutu umada ecuitara tupujudya acuare. Naiishacuare tunaja tuque.

Jesúsra epuna ujejedaque chachanecuaque

(Mt 9.20-22; Mr 5.25-34)

⁴³ Tumeque ecuita cuana ducudyatu jucuare epuna ujejedaque. Peadya tunca beta earacana maratu amena nrecada, ujejeda jucuare. Ebacuatere tujatu jidama jucuare; ami tujatu jucuaredya jutidya. Eje uma casamati bahue cuana quejatu casamamereticuare datse. Dutya tuja chipiru aniyaquetu quijehuetillaticuare casamameretiyaque. Jadya ama buchatu ni ejeradya jutidya chachanecuaque ama. ⁴⁴ Etibene eque jipeaje tujatu Jesús acuare. Jipetsutu tujatu jabacuare tura unaju ebebacujaju ehuejitaque. Tura jabaya tsehuedya tujatu neticuare ami. ⁴⁵ Jabahuajutu Jesúsra bacaduracuare:

—¿Aira jabahua?

Dutya tuque peque cuanaquetu

—Juhua aba, —jadya jucuare.

Jadya juyajutu Pedrora acuare:

—Ecuana Bahuityaunque, jeedyu bacuemi ecuita cuanara naiishaya. ¿Eje bucha juatsu mira ecuana bacaduraya aira jabahuaque?, —jadya tujatu acuare.

⁴⁶ —Ejera cuana jabahua chacha juishu. Ecue casa chachane ishuque cuinanayaju caadebatihua. Ejeque cuana tuque chachanehua, —jadya tuna Jesúsra acuare.

⁴⁷ Amena epunatu tuque jadya juhuaque tehuataqui ama baatsu, tadadayaque Jesúsra yacuaju chichucata juticuare. Dutya tuhua ecuita cuanaja ijacaju tujatu Jesús isaracuare:

—Erami jabahua. Micue una jabatsu chacha ejuuque tuque ecue inime juhua. Tume taa jadiquedya. Micue una jabaya tsehuedya cuitadya chacha juhua, —jadyatu epunara Jesús acuare.

⁴⁸ —Mama, chachami juhua, mira era chachaneya que pana ejene ahua tibu. Cacasaticue. Inime tsapema dirucue, —jadyatu Jesúsra acuare.

Jesúsra Jairoja ebacujunaque emajuque chacha nityat-surancuareque

(Mt 9.23-26; Mr 5.35-43)

⁴⁹ Tuque quisaratiya jarijudyatu yana dujuquique juticuare Jairoja etare juque.

—Micue bacujunatu amena majuhua. Ai jiteque ni tu Ebahuityaunque cuama amena, —jadya tujatu Jairo acuare.

⁵⁰ Jadya juya bacatsutu Jesúsra jadya acuare Jairo:

—Jidama inime baume. Cacasaticue. Eaqueja nimee camadya jucue. Micue bacujuna emajuquetu chacha netitsurancaya, —jadya tujatu acuare.

⁵¹ Etareju junatitsutu Jesúsra acuare Pedro, Santiago, Juan jadya;

—Micuana camadya eatsehue nenubicue. Tuhuadya uma paneti, —jadya tujatu ecana acuare.

Nubiquerecuaque tujatu ebacujuna pijija etataque ecatsé, quimisha tura mepehua cuanaque jadya camadya. ⁵² Dutya ecuita cuana bacue quique, pau pau jucuaque ebacujuna piji majuhua etareju.

—Nepajacacue. Tumeque ebacujuna piji tu majuma. Tahuiya jutidya tuque, —jadya tuna Jesúsra anaticuare.

⁵³ Jadya bacatsutu ecuita cuanara ijaribacuare, tunara yuneri cuitadya emaju baya tibu. Ecanajetijacatu ebacujuna piji jucuare. ⁵⁴ Tuque emaju jarayaju nubitsutu Jesúsra emetucuju inanaticuare. Isaranaticuaretu emajuque:

—Ebacujuna piji, netitsuracue, —jadya tujatu acuare.

⁵⁵ Tura jadya ayaju cuitatu ebacujuna piji canajetietinucatsu, anitsuratsu netitsuracuare. Jesusratu ecuaque ecatsé jadya acuare:

—Nemihuacue.

⁵⁶ Tuja etataque ecatsé tahuiju bucha cabaticuare.

—Cueja cueja neaume ni ejeque riya jadya juhuaque, —jadya tatse Jesúsra acuare.

Jesúsra tura mepehua cuanaque tuja quisarati cuejara cuadishacuareque

(Mt 10.5-15; Mr 6.7-13)

9 Jesúsra tuna sitacuare peadya tunca beta earacana tura mepehua cuanaque.

—Ijahua cuana ijehuecuina ishuhu micuana tyaya casa. Tumebaedy micuana cuatsashaya ejeque ujeje, eje bucha ujeje tsehue cuanaque chachane ishuhu.

² Cuadishaya micuana, Yusura naruyaju eje buchique quisarati tsape ishuhu, ujejeda cuanaque chachane ishuhu jadya.

³ “Yusuja quisarati cuejara cuayaque necadujutiume ni ai buchique. Necadujutiume sari, ni shitara ni ara ishuhu cuanaque ni chipiru. Asicada juatsu catacati ishuhu jutu ishuhue necadujutiume. ⁴ Ejeque epuju junatitsu ejera jida batsayaju tuhuadya neanicue, tuja etareju peya epuju dirunucaya tupu. ⁵ Eju junatijaju tunara micuana batsacarama ayaju, masadama necuinanacue tuhuaque. Cuinanayaque neitataquenacue muru micuanaja ehuachi juque ‘Aine yatse micuana tsehue juma’ jadya tuna ayaque. Tunadya tuna inime metse, Yusuja quisarati bacacarama ahua tibu, —jadya tuna Jesúsra acuare.

⁶ Jadya ahuaaju tuna cuacuare. Cuacuare tuna dutya epu achacha cuanaju. Yusuja quisarati cueja juyaque, ujejeda cuanaque chachane jadya tuna epu cuanaju juajecuare.

Eje bucha iyetanae Juan Ecuíta Cuana Utsaquique juacuareque

(Mt 14.1-12; Mr 6.14-29)

⁷ Ecuari Herodesratu bacacuare Jesús ai juyaque, eje bucha juyaque jadya. Turatu bape bape jutidya inime tupucuaré Jesús tsehue. Umaetu juacuare: “Jesústu baya ecuita ama. Juan Ecuíta Cuana Utsaquique emajuque cacuitatitsu netitsuranucachineque tume” jadya.

⁸ Peya cuana bacue juacuare: “Elías ecacuitatiqué jutidya tume”. Peya cuana bacue juacuare: “Jesústu beru Yusu equeque quisarati cuejaquique jutidya, emajuque enetitsuranucaque”. Jadya bacatsatsutu Herodesra eje bucha adebataqui ama bacuare.

⁹ —Ique taa dyaque bahue Juan emajuque. Eradyatu pítitubumerechine. ¿Ejeque ecuita jatsu dyadi tu Jesús? Bacaya taa quisarati ejenetaquique ama, —jadyatu Herodes juacuare.

Bacara ebari tujatu acuare Jesús.

Jesúsra pishica pan, beta jae jadya umanashacuareque pishica mil ecuita cuana mihua ishuhu

(Mt 14.13-21; Mr 6.30-44; Jn 6.1-14)

¹⁰ Jidaque quisarati cuejara cuadishatanacuare cuanaque juetitsu tunajatu cuejaeticuare Jesús tuna eje bucha jutihua cuanaque. Jadya juatsu tujatu ecana dujuacuare peya queja amaca Betsaida epu japadama, tuna canajarasha ishuhu. ¹¹ Tuna cuahuaque bahue juatsu tu ecuita cuana cuacuare tuna sarera. Jesusratu batsacuare ecuita cuana tuaqueja jutihuaju. Cuejacuare tujatu ecana Yusura eje bucha narue ecuana adadiyaque. Chachanecuarétu ujejeda cuanaque.

¹² Amena ijeti nubihuietu peadya tunca beta earacana tura mepehua cuanara Jesús jipeticuare.

—Isaracue ecuita cuana. Padíru ecana epu cuanaju, epu ashaasha japadama cuanaju. Pacabacatidíru

ecana ara ishuhu cuanaque, eju tahui ishuhue jadya. Rehuarí aijama earaqui ni ai buchique tunaja ishuhu, —jadya tunajatu Jesúsra acuare.

¹³ —Cuadishaya ama tuna era. Micuanaradya ecana nemihuacue, —jadya tuna Jesúsra acuare.

—Rehua rique ecuanaja aniya pishica pan, beta jae jadya píji camadya. ¿Ai tsehue ni rique ecuana mihua-ma ecuita jetieque ama? Dutya ecuitaja ishuhu tupu eju-uque juatsu, camadya ecuana ecua earaqui bacara, —jadya tunajatu acuare.

¹⁴ Deca cuana cuita camadya epiyebaque tuna juacuare pishica mil ecuita.

—Jaquetsu jaquetsu ecana neiyabutyabarecue; peadya cuare pishica tunca, peya cuareju pishica tunca nucadya jadya ecana neiyabutyacue, —jadyatu Jesúsra acuare tura mepehua cuanaque.

¹⁵ Cuejaya equedya tuna juacuare. Dutya tunajatu ecuita cuana iyabutyacuare. ¹⁶ Jadya juatsutu Jesúsra inacuare pishica pan, beta jae jadya. Inatsu tujatu barepaju Yusu aniya queja petacuare. Petayaquetu juacuare:

—Yusurupai mique aya, Tata, mira ecuana riyaque ara ishuhue tyahua tibu, —jadya tujatu Yusu acuare.

Yusurupai au jadya aatsu tujatu pan cuana cuesi-barecuare. Jadya aatsu tujatu tyabarecuare tura mepehua cuanaque, tunaja ecuita cuana tyabare ishuhu. Tura ecana pan tyabareya tupu tujatu pan umanashacuare. Dutyaja ishutu tupu juacuare. ¹⁷ Dutya tuna araacuare, pana jeque juya tupu. Amena jadya juhuajutu Jesúsra mepehua cuanara jequeshacuare peadya tunca beta earacana jiti arida cuanaque pan tunara arabishahua cuana tsehue, jae jadya tsehue.

Pedrorra “Jesús tu Mesías Yusuja Emepeque” cuejacuareque

(Mt 16.13-19; Mr 8.27-29)

¹⁸ Peya huecacatu Jesús cuacuare peya queja amaca Yusu tsehue quisaratira. Tura mepehua cuanaque bacue tuatsehuedya juacuare. Etataque tsehue quisarati amena juatsutu Jesúsra tura mepehua cuanaque bacaduracuare:

—¿Eje buchatu ecuita cuanara ecue ishuhu inime tupuya? ¿Ai jadya tunara aya? —jadya tujatu ecana acuare.

¹⁹ Tunaratu quemitsacuare:

—Umae cuanarami aya Juan Ecuíta Cuana Utsaquique emajuque enetitsuranucaque jadya. Peya cuanarami Elías jadya aya. Peya cuanara bacuemi aya beru Yusu equeque quisarati cuejaqui emajuque enetitsuranucaque jadya, —jadya tunajatu acuare.

²⁰ —¿Micuanara bacue, ique ai jadya aya?

—Miquemi Mesías, Yusuja Emepeque, —jadyatu Pedrorra quemitsacuare.

²¹ —Necuejaume jari ni ejeque buchique ique Mesiasque, —jadya tuna Jesúsra acuare.

**Jesús eje bucha iyetanadadie juyaque cacuejatic-
uareque**

(Mt 16.20-28; Mr 8.30-9.1)

²² Jesúsra tuna cuejanucacuare:

—IQUE ECUITA dyaque canerecatitaqui. Emuiba cuanara, pae cuanaja huaraji cuanara, cacuatsashati bahuityaqui cuanara jadya dyaque nerecaturadadiya. Iyemeradadiya tunara ique. Quimisha huecaca juatsu chacha netitsuranucaya, —jadya tuna Jesúsra acuare.

²³ Jadya juatsu tuna dutya tuhua jucuare cuanaque Jesúsra isaracuare:

—Micuana eatsehue junenicara juyaque juatsu, era cuatsashaya eque neanicue, micuanaja biji eque juneniyaque nime aputatsu, arepa micuana canerecati, maju jadya jutaqui ama bucha, curusuju etata ejuu bucha. ²⁴ Micuana ni catehuatiya eaqueja ecattyatique eiyetauju, ejetsunue ama micuana anibuque. Tume micuana majubuque ni eje tupu Yusu queja judiru ishü ama. Micuana ni eaqueja catyatihua baatsu iyetaya, Yusu tsehue micuana anisiribuque, arepa micuanaja ecuita ririya ama bucha. ²⁵ Ecuita ni Yusu jipema, ijahuaja etiquiju ni judiruya, ni aishu buchique tujatu jida juhua riyaque yahuaju tuja dutya ai anihuaque, arepa dyaque chipiruda paju ama bucha.

²⁶ “Iyacu riyaque yahuajutu aniya ique eje buchique quisarati aishu bisuya cuanaque. Tunajatu bisu aniya ecue quisarati cueja ishü. Ejeque huecaca IQUE ECUITA junanucabuque. Barepaju Yusu tsahuaqui cuanara tajibebuque. Ique junanucayajutu dutyara babuque ecue Etataja casa. Bisunabuquedya ique ecue ishü bisuhua cuana tsehue. ²⁷ Pusha amadya micuana cuejaya. Umae micuana rehuaque majuhuishaya ama, dutya era ecue casa tsehue narutibuneyaque badadiya tupu, —jadya tuna Jesúsra acuare.

Jesús cabapeticuareque

(Mt 17.1-8; Mr 9.2-8)

²⁸ Jadya juu jadya juatsutu peadya semana junucatsu Jesús tsuracuare emataju Yusu tsehue quisaratira. Dujucare tujatu Pedro, Santiago, Juan jadya. ²⁹ Yusu tsehue quisaratiyaque tujatu ebutsequini cabapeticuare. Tuja unatu pajada, huecada, dyaque tiquida jucuare.

³⁰ Masadaque amatu Moisés yanume, Elías yanume jadya ejitaju jucuare hueca dyaque tiquida ducu. Tume tatse Jesús tsehue quisaratinacuare. Jesús eje bucha iyetanae Jerusalénju judadiyaque tunajatu quisarati acuare. ³² Pedro ecanatu tahui idutaquima baatsu tahuicuareadya. Cabatietitsu tunajatu bacuare Jesús hueca tiquidaja edunu, beta ecuita ecatsé tuatsehue netiyaju. ³³ Amena Moisés, Elías jadya Jesús quejaque japacuinaajeyajutu Pedro quisaraticuare:

—Ecuana Bahuityaqui que, dyaque jida taa ecuana rehua. Eau tuque ecuana quimisha erere, peadya micue ishü, peya Moisésja ishü, peya bacue Elíasja ishü, —jadya tujatu acuare.

Tuque dyaque jecutanahua tibusu ai quisarati ataqui ama jucuare. ³⁴ Pedro quisaratiyajutu barepa juque

huanira dunutillacuare. Huanira dunutilaya baatsutu Pedro ecana eanajacata jucuare. ³⁵ Tume tunajatu bacuare huani ducuque Yusu jadya quisaratiyaju:

—Riyaque rique ecue ebacua dyaque iyuhuedaque. Nebacajacaume. Eje bucha tura cuejaya eque nejuque, —jadya tuna Yusura acuare.

³⁶ Jadya quisaratijacahuaju tunajatu banucacuare ama Moisés, Elías jadya, Jesús camadya. Tunaratu ni ejeque buchique cuejacuare ama tunara eje bucha bahuaque. Jesús barepaju diruhuaju piisi tunajatu cuejacuare.

**Jesúsra ebacua piji ijahua cuanara quijahuatishayaque
quijahuatishajacacuareque**

(Mt 17.14-21; Mr 9.14-29)

³⁷ Huecacanucatsutu Jesús, tuatsehue cuahua cuanaque jadya butecuare emata juque. Butehuajutu ecuita jetiera ama tsurutsacuare. ³⁸ Tuna ducuratu Jesús jipeticuare. Jesús jipetitsu tujatu acuare:

—Nerecabacue ique. Riya ecue ebacua behua. Peadyaque piji ri rique ecue. Ijehuecuinacue ecue ebacua juque ijahua cuana. ³⁹ Mididatu amena ijahuara quijahuatishayaque. Quiqueshatilla bahue reja rique. Piririshatilla bahue tuja tuque. Manutu jubahue. Ubajasa tujatu jubahue ecuatsa eque. Ijahuara tuque ecue ebacua dyaque yuamaturaya. Casatilla, nerecatura quijahuatisha jadya aatsutu chamacama cuinana bahue ijahua ebacua piji quejaque. ⁴⁰ Canerecatihua datse ique mira mepehua cuana queja, ijahua ijehuecuinamere ishü datse. Arepa ije-huecuinacara aya ama bucha, tuna ijehuecuinatuquima bahua, —jadyatu ebacua pijija etataquera Jesús acuare.

⁴¹ Jadya bacatsutu Jesúsra tuhua cuanaque acuare:

—[Micuana micuana quejeneti baecua, cuejataqui ama jadya! Arepa micuana era ayaju bahua ama bucha, adebaya ama jaridya tuque micuana Yusuja casa. ¿Eje tupu cuita micuana eiduu? —jadya tujatu ecana acuare.

—Becue requeja micue bacua, —jadyatu Jesúsra acuare ebacua pijija etataque.

⁴² Ebacua pijira Jesús jipeajeyajutu ijahuara manu amerenuacuare. Tume tujatu yahua catsaqui amerenuacuare. Jesusratu nereda acuare ijahua ebacua piji yuamaturaqui juyaque:

—Cuinanacue riyaque ebacua piji quejaque, —jadya tujatu acuare ijahua.

Jadya quisarati aya tsehuedya cuitadyatu ebacua piji quijahuatijacuare. Quijahuatishajacatsutu Jesúsra ebacua pijija etataque cuejacuare:

—Jee micue bacua equijahuatijaca juhua, tata, —jadya tujatu acuare.

⁴³ Anajacatacuare tuna tuhua jucuare cuanaque.

—[Dyaque jida, casada jadya taa Yusu! —jadya tuna jucuare.

**Jesús eje bucha iyetanadadie juyaque cacuejatinu-
cacuareque**

(Mt 17.22-23; Mr 9.30-32)

Dutya tuhua cuanaque Jesúsra aya cuanaque baatsu eanajacata jarijudyatu Jesúsra anucacuare tura mepehua cuanaque:

⁴⁴ —Nebacacue jida era cuejayaju. Nenime aputaume bacue. Ejera cuana tsetatsu inamedadiya IQUE ECUITA, —jadya tujatu ecana acuare.

⁴⁵ Tura mepehua cuanaratu adebacuare ama eje buchique tura jadya ayaque. Arepa quisarati bacaya ama bucha, tunajatu eje bucha adebataqui ama bacuare, Yusuja adebamerema jari tibu. Tuna tuna bajida jucuare, “Pana cueja ecuana acue mira quisarati ahuaque”, jadya aishu.

¿Ejeque tu dyaque inime metseque?

(Mt 18.1-5; Mr 9.33-37)

⁴⁶ Tumetu Jesúsra mepehua cuanaque caquemitsati caquemitsati jutibunecuare:

—¿Ejeque ecuana dyaque inime metseque?, —jadya tuna cabacaduratibarecuare.

⁴⁷ Jesusratu adebacuaredya tunara eje bucha inime tupuyaque. Tume tujatu ihuaracuare ebacua piji tuhua netiya baatsu. Ihuaratsu tujatu tuque peque nityacuare.

⁴⁸ Jadya aatsu tujatu tura mepehua cuanaque cuejacuare:

—Dyaque inime metsequetu dyaque jetiedyaque bucha cabatiyaque. Micuanara ni ecue cuanaque jida tsehue batsaya, arepa tuna riyaque ebacua piji bucha paju ama bucha, idya datse micuanara jida tsehue batsaya. Micuanara ni ique jida tsehue batsaya, tume tuque micuana ecue Etata Ique Cuadishaquique jidadya batsaya, —jadya tujatu ecana acuare.

Nebijidamadurara ama Yusuja cuanaque ecuana tsehue beta tupu ama cuanaque

(Mr 9.38-40)

⁴⁹ Juantu quisaraticuare Jesús tsehue:

—Ecuana Bahuityaquique, ecuana micue quisarati cuejara cuachine patya, tuque ecuana bachine ejeque cuana ijahua cuana micue ebacaniyu ijehuecuina juyaju. Jadya baatsu tuque ecuana achine: “Jesúsja ebacaniyu rique ijahua ijehuecuinaya’ jadya ajacacue, ai mi Jesúsra mepehuaque batu”, —jadyatu Juanra Jesús acuare.

⁵⁰ Jadya ahujutu Jesúsra acuare:

—Jadya neaume. Ecuana iyuhueda baquira ecuana ujeu baya ama, —jadyatu Jesúsra acuare.

Jesúsra Santiago, Juan jadya nereda acuareque

⁵¹ Eje uma huecaca ama Yusu queja dirunuca ishunque aniyajutu Jesús tuja casada inime tsehue cuacara ebari jucuare Jerusalénju, arepa tuhua tuque canerecatiyaque bahue juya ama bucha. ⁵² Amena cui-

ta cuahuiera tujatu cuadishacuare icueneta umae ecuita cuana eju junatiyaque etare banati ishu. Tuna tuna cuaatsu, junaticuare Samaria yahua epuju. Cuacuare tuna Jesús, tuatsehue cuaya cuanaque jadya eju junati ishunque sarera. ⁵³ Tumeque epuju cuanaratu icuene cuahua cuanaque jadya atsacuare:

—Nudyatsaya ama tuque ecuana Jesús, ni tuatsehue cuaya cuanaque, micuana Jerusalénju cuaya tibu, —jadya tunajatu ecana atsacuare, Samariaju cuanara israelita cuana ujeu baya tibu.

⁵⁴ Icuene cuahua cuanaque tuna yudijidya dirunuca jucuare Jesús tsurutsa ishu. Tsurutsatsu tunajatu cuejatsacuare tumeque epuju cuanara nudyatsacarama ayaque. Juan, Santiago ecatserratu bacuare tunara cuejaetiyaju. Jadya bacatsu tatse jadya jucuare:

—¿Miratu bijida baya ecuana Yusu queja bacabaca ishu, tuja barepa juque etiqui butya ishu, tumeque epuju cuanaque iyetillamere ishu, beru Elías etiqui barepa juque butyamere ishu, Yusu queja bacabacuare bucha? —jadya tatsejatu acuare.

⁵⁵ Jadya juyaju tatse Jesúsra nereda acuare:

⁵⁶ —Jadya nequisaratieme. Micuana micuana baecua jari eje bucha juatsu ique riyaque yahuaju jehuaque. IQUE ECUITA jehua aniya cuanaque anishara, tuna iyetillara ama, —jadya tujatu ecatsere acuare.

Jadya juatsu tuna dirucuare peya epuju.

Jesús tsehue junenicara jucuare cuanaque datse

(Mt 8.19-22)

⁵⁷ Tuna ediji eque cuayajutu peadya ecuita quisaraticuare:

—Ebahuityaquique, ique junenicara juya miatsehue eju mique cuayaju, —jadya tujatu Jesús acuare.

⁵⁸ —Dyaque masada tuque. Equique chapa cuanajatu aniya cani; upati cuanaja bacue eja. IQUE ECUITA-ja bacue aijama etare tahuí ishunque, —jadyatu Jesúsra acuare.

⁵⁹ Peya tujatu jadya acuare:

—Eatsehue junenicue, eje queja ique cuayaju.

—Ecuatsashaquique, icuene tuque ecue etata narutaqui tuque majuya tupu. Tuque majuhaju, papatsu piisi miatsehue juneniya. Ihuacue jari ique, —jadya tujatu Jesús acuare.

⁶⁰ —A, aijama. Iyacuadya eatsehue junenicue. Cuejaticue ecana dutya queja aniya cuanaque Yusura eje bucha narue adadiyaque. Ique adebaya ama cuanaque tuna emaju cuanaque bucha. Tunara inime tsapequi paa ai riyaque yahuaju cuanaque, emaju cuanaque papaya tupu. Peyatu mere aniya micue ishu, —jadya tujatu acuare.

⁶¹ Peyaratu Jesús acuare:

—Ecuatsashaquique, ique miatsehue pajuneni. Icuene ecue etareju cuanaque paisarati jari, —jadya tujatu acuare.

⁶² —A, aijama. Cashanaticue micue ai beru anicuareque. Ejeque paruparuyaque catibene bajiyuyi-jsvsysjs ama mere tu jidama. Tumbaedyu ni mi Yusu mereya micue ai aniya cuanaque cashanaticarama tse-

hue, ni mi aishudya jutidya jida. —jadyatu Jesúsra acuare.

Jesúsra pacarucu tunca beta earacana ecuita Yusuja quisarati cueja ishü cuadishacuareque

10 Jadya juatsutu Ecuana Cuatsashaquira mepenu-cacuare peya cuana pacarucu tunca beta earacana ecuita. Cuadishacuare tujatu ecana beta beta cama icuene dutya epu arida cuanaju, epu achaacha cuanaju, eju tuque cuataqui epu cuanaju. Cuadishacuare tujatu ecana tuna quihuatiyaju tuque juti ishü.

²—Yusuja quisarati bacama cuanaque tuna trigo amena ejahuaneque buchique. Arepa ecana jetiama aniya jari ama bucha, eje uma ama tu quisarati tsapequi cuanaque, tee metsera mere puji cuana trigo racara ecuadishau bucha. Jadya tibudya nebacacue Yusu; pacuadishatu jetiama ecue quisarati cuejaqui cuanaque. ³Necuacue ecue quisarati cuejara. Micuana micuana muda majutaqui inime cuanaju nubi ishüque. Cuadishaya micuana era, uhuisha cuana iba cuana ducu ecuadishau bucha.

⁴“Necadujutiume chipiru ni shurumai. Zapato jutuyaque cuita camadya necadujuticue. Dutya micuanara sareyaquedya micuana tyataya. Tsunuda cuita nenetiume ejeque edijiju isaratsayaque. ⁵Ejeque etareju ni micuana nubiya, jadya ecana neisaranaticue: “Yusura inime tsapema neamerecue. ⁶Tuhua ni aniya jida jucara juya cuanaque, tume ecana jida inime tsapema paju, micuanara isaranatihua baedya. Jadya ama ni, tume ecana tuna eje bucha anicara juya equedya paani. ⁷Icueneque etareju tunara jida batsayaque neaninaticue. Nearacue, neijicue tunara tyayaquedya. Nebisuume earaqui tunara tyayaque ara ishü, mere puji tsujetyataqui juya tibu. Nenubinubini-ume etare cuana tupu, ani ishüque sare juyaque. ⁸Ejeque epuju junatitsu, ecuita cuanara ni micuana jida batsaya, nearacue tunara tyayaque.

⁹Nechachanecue tuhuaque ujejeda cuanaque. ‘Iyacua Yusura nenarucue’ jadya ecana necuejacue tumeque epuju aniya cuanaque. ¹⁰Ejeque epuju junatitsu, tuhuaque ecuita cuanara ni micuana jidama batsaya, necuinanacue tumeque epu juque. Tumeque epu patya eque cuetiyaque ecana jadya neacue tuhua aniya cuanaque: ¹¹‘Jeeque epu juque muru ecuanaja ehuaquijü badehuaque tuque ecuanita itataya, “Aine yatse micuana tsehue juma” jadique. Nenime aputaume riyaque. Ecuana micuana cuejahua micuana Yusu queja catyatitsu eje bucha judirue Yusu queja juishuque. Micuanadya micuana inime metse, Yusuja quisarati bacacarama ahua tibu’ jadya ecana neacue tumeque epu juque cuinanayaque. ¹²Tere huecaca juetihuaju tuna Yusura dyaque nerecaturabuque tujä quisarati bacacarama juya cuanaque. Sodomaju anicuare cuanaque tuna dyaque jidama jucuare. Jadya ama bucha tuna tumeque huecaca juetihuaju dyaque ama canerecatibuque, micuanara quisarati cuejayaque

bacacarama ahua cuanaque bucha ama, —jadya tuna Jesúsra acuare.

Inime cacuareticarama jucuare cuanaque
(Mt 11.20-24)

¹³Jadya quisarati amena aatsutu Jesúsra quisarati acuare tujä quisarati bijidamadurahua cuanaja ishü. Tuna cuitadya baatsu quisarati aya buchatu jucuare, arepa tuna tuhua aijama jucuare ama bucha:

—Dyaque nerecada micuana jubuque, micuana Corazínju, Betsaidaju jadya aniya cuanaque! Tiro, Sidón jadyaju anicuare cuanaque tuna dyaque jidama jucuare. Jadya ama bucha, baquena ni tuna juquena juhua Yusuja casa era micuana iyacua bamereyaque, cacuaretiquena tuna inime juquena jucuare. Jutuquena tunajatu jucuare ejutuqui sehuedaque, ai tiru, muru tsehue iyucaju casehueti jadya, inime cacuaretihua jadya ata ishü. Micuana micuana cacuaretihua ama inime, arepa era Yusuja casa tsehuedya ayaju bahua ama bucha. ¹⁴Riyaque micuana cuejaya. Ejeque huecaca Yusura jidama cuanaque nerecaturadadiyaju, tura micuana dyaque nerecaturabuque; Tiroju, Sidónju cuanaque jucuare dyaque tura micuana nerecaturabuque. Micuanajatu aniya emajaca ecue casa baishu. Tunaja baishuque aijama jucuare tibu, micuana tuna bucha dyaque micuana nerecada jubuque. ¹⁵Micuana Capernaumju aniya cuanaque, jida bucha datse micuana cabatiya. Dyaque inime metseque bucha datse micuana cabatiya. Barepaju etsurashatau bucha datse micuana cabatiya. Ijahuaaja etiquiju jutidya micuana nudyatabuque, —jadyatu Jesús jucuare.

¹⁶Jesusratu isaranucacuare tujä cuanaque ecuadisha cuanaque:

—Micuanara cuejayaju bacaqui juya cuanaratu era cuejayaque bacayadya. Micuana bijidamaduraqui juya cuanara idya bijidamaduraya. Ique bijidamaduraqui juya cuanara Ique Cuadishaquique dyadi tunajatu bijidamadurayadya, —jadya tuna Jesúsra acuare.

Pacarucu tunca beta earacana ecuadisha cuanaque juetinuacuareque

¹⁷Yusuja quisarati cuejatitsutu juetinuacuare pacarucu tunca beta earacana cuadishatacuare cuanaque pureama tsehue.

—Atichine ecuanita mira amerechineque, Ecuana Cuatsashaquique. Ijahua cuanara ecuanita muibachine, ecuanara tuna micue ebacaniju ijehuecuinayaju, —jadya tunajatu acuare Jesús.

¹⁸Jesúsra tuna acuare:

—Jejee, bahuedya ique ecue dyaque casa aniyaque, Satanásja casa bacue ecue bucha ama. Bacuaedya tuque Yusuja yacua juque pupipupiya bucha pacacae juyaju. ¹⁹Era micuana casa tyachine ni ejeque eju nerecada juishu ama, ni micuana bacuaaja ni ajiapa ujeda aishu ama, tumebaedya micuanaja Satanás dyaque ijahue aishu. ²⁰Pureama nejudue, ijahua cuana ijehuecuina ishüque casa aniya cabatitsu jipidya ama. Dyaque pureama nejudue, micuana Yusu queja

judiruya cabatitsu, micuanaja ebacani Yusuja quiricaju ehuene cabatitsu.

Jesúsra Yusu pureamaturacuareque

(Mt 11.25-27; 13.16-17)

²¹ Tumeque quisarati ayaju cuitatu Jesús Yusuja Espiritura pureama amerecuare. Jadya tibutu Jesús Yusu tsehue quisaraticuare:

—Tata, miquemi barepa, yahua jadya metseque. Bahue, inimequi bucha cabatiya cuana queja ecabameretiuquemi, mique eje buchique adebacara, bahue jucara ebari juya cuana queja cabameretihua. Yusrupai mique aya, mique jadya juhua tibu. Jadidyatu juya, mira jadya amerehua tibu, Tata, —jadya tujatu Yusu acuare.

²² Jadya juatsu tujatu isaranucacuare tuhua cuanaque:

—Ecue Etatara ique mepehua tuque cuarequi rehua ecuita cuana ejitaju amere ishü. Ecue Etatara peadya camadya ique pana adeba aya. Ique tuja Ebacuaque. Era cuita camadya tuque ecue Etata pana adeba aya. Tumbaedyatu adebaya era adebamerehua cuanara, —jadya tujatu ecana acuare.

²³ Tume tujatu tura mepehua cuanaque quisarati cuejacuare:

—Dyaque jida paju micuanara era ecue casa tsehue ayaju tunaja yatuca tsehue petaqui cuanaque.

²⁴ Neadebacue riyaque. Beru yuequedya tu Yusu equeque quisarati cuejaqui cuanara, tumbaedyatu ecuari cuanara jadya bacara ebari acuare ecue casa micuanara iyacua bayaque. Bacacara ebari tuna acuare ecue quisarati iyacua micuanara bacayaque. Jadya ama bucha tunaja anihua ama emajaca baishu ni baca ishü, —jadya tujatu ecana acuare.

Samaria juque ecuita jida jucuar cuatsabiji eque Jesúsra bahuityacuareque

(Mt 22.37-39; Mr 12.30-31)

²⁵ Jadyatu cacuatsashati bahuityaquira jipetitsu acuare Jesús, tuque nime adeba ishü.

—Ebahuityaqui, ¿eje bucha ique ejuu, Yusu queja judiru ishü ni eje tupu tuque jaca ishü ama? —jadya tujatu acuare.

²⁶ Jesusratu quemitsacuare:

—Micuetu eisaradya Yusuja quisarati. ¿Eje buchatu cacuatsashati ehuene tuhua?

²⁷ —Yusujatu cacuatsashati jadya: “Iyuhueda bacue ducuta Yusu Mique Cuatsashaquique. Yusu iyuhueda bacue ducuta; dutya micue cabijiseriti tsehue Yusu pureamaturacue, dutya micue casa tsehue, dutya micue inime tupu tsehue”. Tumbaedyatu ehuene: “Iyuhue tsehue bacue peya cuana. Mique cuitadya iyuhueda cabatiya bucha iyuhuee peya bacue”, —jadya tujatu acuare.

²⁸ —Jidadyami caquemitsatihua. Mique caquemitsatihua eque ni mi eaniu, Yusu quejami judirubuque ni eje tupu jaca ishü ama, —jadyatu Jesusra acuare.

²⁹ Cacuatshati bahuityaquiratu peya cuana queja jida cabamereti ishü, Jesús bacaduracuare:

—¿Ejeque rique ecue peya cuana iyuhueda baishuque? —jadya tujatu acuare, tuja ata cuana camadya inime tupuqui ayaque.

³⁰ Jesusratu riyaque cuatsabiji cuejacuare tuque quemitsayaque:

—Peadya ecuitatu ehuachi eque cuacuare Jerusalén juque Jericóju. Israelita tu jucuar. Tuque cuayajutu chiri puji cuanara inatsacuare. Miririshacuare tunaja tuque. Secacuare tunajatu chipiru tuque cadujutiyaque. Iyejeri jadya aatsu tunajatu ediji jiruru huanatsu shanacuare. ³¹ Tuequedya pae cuacuare tumeque ediji eque nucadya. Turatu bacuar ecuita ediji jiruru jujarayaju. Ujeda eaque baya ama buchatu barenaticuare jutidya tumeque israelita ujeda eaque. ³² Tumbaedyatu junatinucacuare pae cuana tsahuaquique. Turatu tumbaedyatu banatinucacuare ecuita ujeda eaque. Baya ama buchatu barenuacuare jutidya.

³³ “Jadya juatsu junatinucacuare ecuita Samaria juque, tumeque ediji eque nucadya. Bacuar tujatu ujeda eaque ediji jiruru jarayaju. Arepa israelita cuanara Samariaju aniya cuanaque bijidamaduraya ama buchatu Samariajura nrecabacuare ujeda eaque.

³⁴ Jipeticuaretu ujeda eaque. Jipetitsu tujatu ujeda eaque etseri tsehue tedi, sama jadya acuare. Tuque jadya samatsu tujatu querecuare tuja ujeda eaque. Masadama tujatu tura mula isaanibeyaju iyatsuracuare. Tuque iyatsuratsutu cuanucacuare. Tura cuitadya mula icuene nitya aajecuar ecuita dujuyaque. Nudyadirucaretu etare tarepe puji cuana tahu ishü. Tuhuatu ecuita Samariajura narisacuare ujeda eaque. ³⁵ Huecacatsu diruyaratu ecuita Samariajura quemicuare beta chipiru tsuje aridaque tuja shurumai juque. Tumeque chipiru quemitsu, tujatu tsujetyacuare etare metseque. ‘Narucue jida jeeque ecuita. Riyaque chipiru ni ri tupu ama, juetinucatsu mique tsujetya tillaetiya’ jadya tujatu acuare. Jadya tsahuaetu Samariajura israelita ujeda eaque acuare.

³⁶ Cuatsabiji cuejatilla amena aatsutu Jesúsra bacaduracuare cacuatsashati bahuityaqui:

—¿Ejeratu ecuita ujeda eaque iyuhue queticuare? —jadya tujatu bacaduracuare.

³⁷ —Tuque nrecabaquira, —jadyatu quemitsacuare ecuitara.

Tumetu Jesúsra jadya acuare:

—Jutaquiju mique tumbaedyatu jucue. Canerecabati tsehue peya cuana bacue, arepa micue ata ama paju ama bucha, —jadyatu Jesusra acuare.

Jesúsra Marta, María jadya cuajiticuareque

³⁸ Jesús, tura mepehua cuanaque jadya tuna cuaque nanucacuare Jerusalénju. Ediji eque cuayaque tuna junaticuare epu achachaju Jerusalén japadama. Junatihujutu epuna Marta bacanira jida batsacuare, tuja etareju nudyatsatsu. ³⁹ Tumeque epunajatu anicuare

tuatsehuequique tupujuque María bacani. Marta ai juyaque etsahuauquetu ejanaque Jesús peque jutidya anibutecuare tuque quisaratiyaju ijacabaca. ⁴⁰ Martaratu jidama inime bacuare, mere jetiama ataquique aniya baatsu. Tumetu Martara Jesús jipetitsu jadya aticuare:

—Ecuana Cuatsashaquique, ¿miratu jidama ama inime baya ecue ejana tuhua mique quisaratiyaque ijacabacaani, ique bacue casada mere jadya juyaju? Tueque cuejacue; paje, patsahuana tura ique, —jadya tujatu Jesús acuare.

⁴¹ Tudyatu Jesúsra quemitsacuare:

—Miquemi cuji cuita juya, Marta. Miratu dyaque inime tupuqui cuita aya micue mere, Yusuja quisarati ama. ⁴² Yusu jaque peadya camadya micue inime tupuqui ataquique, Mariara inime tupuqui aya bucha. Tuquetu nime aputaya ama tura ijacabacayaque.

Jesúsra eje bucha quisaratie Yusu tsehue jutaquique bahuityacuareque
(Mt 6.9-15; 7.7-11)

11 Jesústu Yusu tsehue quisaraticuare peya queja amaca. Quisaratiyacahuajutu peadya tura mepehuara isaracuare:

—Bahuityacue ecuana Yusu tsehue eje bucha quisaratie juishuque. Juanra tura mepehua cuanaque bahuityahua bucha bahuityae ecuana acue, Ecuana Cuatsashaquique, —jadya tujatu acuare.

² —Yusu tsehue quisaratiyaque, jadya neacue:

“Ecuanaja Etata barepaju aniyaque, muiba ishuque mique.

Adebaya mique ecuana juchama nerique.

Pajuetihuisha huecaca micue ecuana naru ishuque.

³ Tyacue ecuana riyaque huecaca ara ishuque ecuana sareaque.

⁴ Apupashacue ecuana jucha cuana.

Ecuana peya cuanara jidama ayaque nime aputaya bucha, jadidya ecuana jidama juya cuanaque apupashacue.

Satanásra cajuchatishacara ayaju, ecuana tsahuacue, ecuana ecajuchatiuju”, jadya neacue Yusu tsehue quisaratiyaque.

⁵ Tumebaedya tujatu ecanu cuatsabiji cuejacuare, Yusu ai bacatsu bacajaca ishuque ama.

—Ita taa mi micue ataja etareju meta patya ejutiu. Etsecue equemi etare metseque eisaratiu: “Nerecabacue ique. ¿Etyau ama mira quimisha pan? ⁶ Ecue eadebaquetu junahua ecue etareju. Aijama ecue ai tsehue batsa ishuque. Tuque mihua ishu mique bacaya”, jadya tuquemi eatiu. ⁷ Jadya mira bacayajumi micue atara equemitsau educu equera: “Aijama. ¿Eje bucha juatsu jatsumi meta patya jeya? Amena taa tuque etare yahuehua. Amena ecuana ecue ebacua cuana tsehue jarahua; canajaraya ecuana. Amena eje bucha netitsurataqui ama”, jadya turami eau. ⁸ Cuejaya mique riyaque. Bacajacaya ama ni mira, netitsurayadya tuque, mira ai bacayaque tyaishu. Mira ai

sareyaque turami tyayadya, mira bacajacahua ama tibu, ai mique tuja ata baatsu ama.

⁹ “Cuejaya micuana era. Nebacabacajacaume Yusu queja. Tyayadya tura micuana. Nebacajacaume ai sareyaque. Yusura micuana dadimereya. Canimehualatima neihuacue micuanara ai Yusu bacahuaque tura tyaya tupu. Etareju nubicara juatsu etare metsera pacashaya tupu eihua bucha ihuae neacue. ¹⁰ Ejera bacajacayaque ama tujatu tyayadya. Ejera sareyaratu dadiyadya. Ejera canimehualatima ihuayaratu badya tura bacahuaque.

¹¹ “¿Mira bayara pan bacayaju ni taa mi tumu jutidya etyau ara ishu? ¿Mira bayara jae bacayaju ni taa mi bacua jutidya etyau ara ishu? ¹² ¿Eca bacayaju ni taa mi etyau ajipa jutidya ara ishu? ¡Ni ejeque etataqueratu tura bayaque jadya eau ama! ¹³ Butsee micuana jidamaradya tuque micuana micuanara baya cuanaque jidaque tyaya. Yutsumadya Yusu barepajura tuja Espiritu micuanara bacayaju cuadishayadya, —jadyatu Jesúsra tura mepehua cuanaque acuare.

Jesús tunara “Satanásja casa rejari aniya” jadya acuareque

(Mt 12.22-30; Mr 3.20-27)

¹⁴ Jesusratu ijehuecuinacuare ijahua ecuita quisarati baecua amerequique. Ijahua cuinanahuajutu ecuita quisaraticuare. Tuhua cuanaquetu anajacatacuare quisaratiya bacatsu. ¹⁵ Umae cuanatu jucuare:

—Beelzebú, ijahua cuana cuatsashaquique tu tuatsehue. Jadya tibudya tujatu casa aniya ijahua cuana ijehuecuina ishu, —jadya tuna jucuare.

(Beelzebú taa tu Satanás bacani nucadya.)

¹⁶ Peya cuanaratu sarecuare eje bucha eque Jesús jidama aishu. Tume tunajatu acuare:

—Acue ecuana jacyaju ai bapeque inimeradya jutidya Yusuja peadya camadya ataquique, micue casa Yusu barepajuja aniyaque ecuana bahue juishu, —jadya tunajatu acuare.

¹⁷ Jesusratu adebacuare tunara eje bucha inime tupuyaque.

—Jadique juatsu taa tu Satanás tuta tacadya jutidya pana cayuamaturati ejuu. Ita taa nebacacue. Yahuaju dutya aniya cuanaque ni ecajaquetibareu cuarepe cuarepe tuna cama cati ishu, tuna camadya jutidya tuna ecatillatiu. Peadya etaretu pana rihuishatanatere ejuu. Dutya tumu etare enityatsuraquetu yahuaju tere ejuu. ¹⁸ Era ni Satanásja casa tsehue ijahua cuana eijehuecuinau, tume taa tu Satanás tuja cuana tsehuedya jutidya ecatiu. Tumetu ni ejeque ijahuadya jutidya tura cuatsashaya eque ejuu ama. Micuanara ique aya, Beelzebúja casa tsehuepa ijahua cuana ijehuecuinaya jadya. ¹⁹ Jetiama micuana tsehue juneniya cuanara dyaditu ijahua cuana ijehuecuinaya. ¿Aira tuna tyaya tumeque casa? Tuna tuna bahuedya, Beelzebúra ni ejeque casa tyayaque ama ijahua cuana ijehuecuina ishu, ijahua cuana tujaque juya tibu. Micuanara ni ejeneya Yusuja casa tsehue tunara ayaque, tume tuque micuanaja ejenetaquidya era dyadi Yusuja casa

tsehuedya ayaque. ²⁰Yusuja Espiritura casa tyaya ijahua cuana ijehuecuina ishu. Jadya tibudya tuque micuanaja inime jutaqui “Riyaque ri Yusuja Emepeque”, idya micuanara ihuacuareque.

²¹“Ecuita casadara quiyeti ishu tsehue tuja ai cuana naruyajutu dutya tuja etareju eje bucha ama juya.

²²Jadya ama buchatu peya dyaque casadaque tuaqueja ejunau tuatsehue cati ishu. Dyaque casadara ijahue aatsu, tujatu secaya dutya tuja quicueneti ishuque, dutya tuja ai anihua cuanaque jadya. Ique Satanás bucha dyaque casadaque. Aputashatillacuare tuque era tuja casa anicuareque.

²³“Ejeque ecue ishu jidama quisaratiyaquetu ique ujeuque. Ique tsahua baecuara ique jidama aya. Tumequetu era mepeyaque dacashaajeya buchique, —jadya tujatu ecana acuare.

Ijahua yudijidya judirunuca jucuareque (Mt 12.43-45)

²⁴Tuhua cuanaque tuna Jesúsra cuejanucacuare:
—Anicuaretu ijahua tura quijahuatishaya quejaque ecuinanaque. Tumeque ijahuatu junenicuare anitaya ama cuanaju ani ishuque sare juyaque. Dadicuare amatu eju ani ishuque. Dadima aatsu tujatu jadya inime tupucuaré: “Padirunuca ique eju ique cuinanashatahuaju. Tuatsehue camadya ique eaninucáu” jadya. ²⁵Tumeque ecuita queja judirunucatsu tujatu badirucuaré ni ejeque ijahua tsehue ama, etare ejabu, jida, ebajeje bucha. ²⁶Jadya baatsutu tumeque ijahuara peya ijahua cuana sareticuare. Pacarucu ijahua cuana, tuque bucha dyaque jidama cuanaque tujatu daditicuaré. Daditsu tujatu ecana beticuare. Juetinucatsu tunajatu dutyara quijahuatishanuca acuare tumeque nrecadaque ecuita. Jadya juetu ecuita juya tuque icuene juhua bucha dyaque jidama, —jadya tuna Jesúsra acuare.

Dyaque jida paju Yusuja quisarati bacatsu yana equedya juya cuanaque

²⁷Jesús jadya quisaratiyajutu epuna jetiama ecuita ducuque quiquecuare:

—Dyaque jida paju epuna mique ijehuecuinatsu susuqui juhuaque! —jadyatu epunara acuare.

²⁸—Jejee, tumeque epunatu jida, pureama cabatiya. Dyaque jidatu Yusura cuatsayaque bacatsu cuatsashaya equedya juya cuanaque, —jadyatu Jesúsra acuare.

Yusu adeba baecua cuanara Jesús Yusuja casa ejitaju juishuque amerecara acuareque (Mt 12.38-42; Mr 8.12)

²⁹Ecuita cuana Jesús queja casitativaju tujatu ecana isaratibunecuare:

—Dutya jujeritu ecuita iyacua aniya cuanaque jidamaque inime cadujutiya. “Acue ai inimeradya jutidya, ecuana mique Yusura cuadishahuaque bahue juishu” jadya ajacama taa micuanara aya. Aya ama

tuque era. Jonás jucuareque cuita camadya micuana huecashaya. ³⁰Niniveju anicuare cuanaque Jonás eje bucha jucuareque bahue juatsu, tunajatu adebacuare tuque Yusura tuna Yusuja quisarati cueja ishu cuadishahuaque. Tumebaedya micuanara IQUE ECUITA eje bucha judadiyaque baatsu, tuque micuana adebadadiya ique Yusuja ecuadishaque.

³¹“Beru yunquejanetu ecuari epuna Sabá juque beni diji queja anicuareque jecuare dyaque japadaque Salomón dyaque inimequija quisarati bacara. Ique Salomón bucha dyaque inime metseque. Jadya ama bucha micuana era cuejayaque bacacarama aya. Jadya tibudyatu tere ishuque huecaca juetihuaju, Yusura ecuita cuana tuna eje bucha jubuqueque cuejabareyaju, tumeque ecuari epunaryadya micuana pana cueja abuque Yusuja yacuaju: ‘Dyaque ecana pacanerecati Jesús yahuaju aniya patya tura cuejayaque bacacarama jucuare cuanaque’. ³²Jonásra Yusuja quisarati cuejayajutu Niniveju cuanaque inime cacuareticuare. Ique Jonás bucha dyaque inime metseque. Jadya ama bucha micuana bacacarama aya era bahuityayaque. Tumetu tumeque huecaca Yusura dutya eje bucha judadibuqueque cuejabareyaju, Niniveju anicuare cuanara micuana pana cueja abuque Yusuja yacuaju: ‘Dyaque ecana pacanerecati Jesús yahuaju aniya patya tura cuejayaque bacacarama jucuare cuanaque’ jadya, —jadya tuna Jesúsra acuare.

Ecuitaja educujuque inime udaquique (Mt 5.15; 6.22-23)

³³Jesúsra tuna cuejanucacuare:

—Ude tuchatsu tuque ecuana tehuaya ama caju ducu. Etehuauque tuque ecuana iyaya ebarucue, nubitiya cuanaque jida capetati ishu. ³⁴Yatuca tsehue ademe ecuana capetatiya. Capetatitsu ecuana canarutiya ai muda cuanaju. Yatuca ecatsé jidaju ecuana eadadya anitaqui. Yatuca ecatsé jidamaju, ecuana ecanarutiya amadya muda cuanaju. ³⁵Era micuana cuejahuque tu hueca buchique. Necanaruticue bacue ecue quisarati enime aputaju. Ecue yana equedya ama ni micuana aniya, tume micuana apudaju juneniyaque cuji juhuaque bucha. ³⁶Yuneridya ni micuanara adebaya, tume micuanara pana adeba aya ique aique, aira cuadishahuaque jadya. Tume tuque micuanaja saretiqui ama ecue ai inimeradya jutidya aishuque yunerique adeba ishu. Ude tsehue jida edijiju juneniyaque bucha micuana ejuu, —jadya tuna Jesúsra acuare.

Jesúsra fariseo cuana, cacuatsashati bahuityaqui cuanaque jadya jidama juyaque ejitaju acuareque (Mt 23.1-36; Mr 12.38-40; Lc 20.45-47)

³⁷Jesús quisaratijacahuajutu fariseora tuja etareju araarati ishu cuejacuare. Jesústu nubitsu aninaticuare mesaju, emetucu cutsatimaque israelita cuanaja bahue eque ama. ³⁸Jadya baatsutu fariseora jidama bacuare, Jesús cacuatsashati eque ama juya baatsu.

³⁹ Ecuana Cuatsashaquiratu tura inime tupuyaque adebaya tibu jadya acuare fariseo:

—Arepá micuana fariseo cuana ecuitaju asicadaque jida catillaticara juya ama buchatu Yusura micuanaja inime ducuta asicada baya. Jidama micuana juajeya. Chiri micuana juajeyadya jutidya. Micuana micuana canecu, peja jadya dyaque camadya eutsaque bucha, educuju asicadaque utsama. ⁴⁰ ¡Ecuíta inime tupu baecua cuanaque! Pusha amadya tuque ecuanaja Yusura ecuita iyahua, tumbaedyá ecuanaja educu juque inime. Ecuíta camadya ama inime tupuqui neacue, educu juque inime tumbaedyá. ⁴¹ Micuana micuana jida bucha cabatiya, micuanara nerecada cuanaque ai tyaya tibu. Micuanara ni Yusu mereya educuju inime eiyacuane tsehue, tume micuana Yusura jida asicadaque baya, peja dyaque educuju jadya pana utsa eaque bucha.

⁴² “¡Nerecapane micuana fariseo cuana! Arepá micuana cacuatsashati cuana aishuque ama jipenee eque juya ama bucha, cacuatsashati dyaque inime metse eque micuana aniya ama. Micuanajatu Yusu tyabahue cacuatsashatira casada tsehue tyamereyaque camadya. Acuihuija ijimeda cuanaque “menta”, “ruda” jadya bacani micuanaja etare taracaju cuhuatiya cuanaque, teeju cuhuatiya cuanaque jadya tuque micuanaja tyabahue. Jadya ama bucha tuque micuana jida, tuyu tsehue ama baya peya cuana. Micuanaratu Yusu iyuhuedama baya. Pusha amadya tuque micuanaja Yusu tyataqui cacuatsashati eque casada tsehue tyataquique. Jadya ama buchatu dyaque saretanaya jida, tuyu peya cuana tsehue ani ishú, Yusu iyuhueda baishu jadya.

⁴³ “¡Nerecapane micuana fariseo cuana! Caradati ishúque etareju cuaatsu micuana muida cuanaque anibahueju anibutecara juya. Ediji cuanaju juneniyaju micuana dyaque muida tsehue isaratacara juya.

⁴⁴ “¡Nerecapane micuana! Micuana micuana uhuacuare emaju cuanaque eishaque ejitajuque ama buchique. Ecuíta cuanatu cuetiya, emajuque jarayaque dyaque eque adebayaque ama. Tumbaedyá micuana jidadya batacara datse micuana juya; ai jidaque ama, —jadya tuna Jesúsra acuare.

⁴⁵ Jadya juyaju bacatsutu cacuatsashati bahuityaquira acuare:

—Jadya quisarati tsehue, fariseo cuana jipidya ama tuquemi ijillahuanaya. Ecuana cacuatsashati bahuityaqui cuanaque mira ecuana ijillahuanayadya, —jadya tujatu acuare.

⁴⁶ Jadya juatsutu Jesúsra acuare:

—¡Nerecapane micuana dyadi cacuatsashati bahuityaqui cuanaque! Casada tsehue micuana peya cuana jetiama cacuatsashati cuana eque amereya, tuna tsahuayaque ama. Abu ishúque dyaque bicueda eje bucha abutaquimaque peya abumere ishúque bajejequi buchique micuana. Micuanara cuitadyatu ni ai buchique abucarama aya, ni micuana peya abucheracará aya.

⁴⁷ “¡Nerecapane micuana! Micuana micuana jidama, micuanaja baba cuana bucha. Berutu micuanaja baba cuanara iyecuare Yusu equeque quisarati cuejaqui cuanaque. Iyacuá tuque micuana micuanaja baba cuanara iyecuare cuanaja uhuacuare cuana jida piji bajeyeya. Jadya juyaque micuana amena ejitaju juya micuanaja baba cuanaja inime cadujutiyaque.

⁴⁹ “Yusutu icueneta bahue eje bucha judadibuqueque. Jadya tibudyatu jucuaré bérú: ‘Cuadishabuque tuque tuna queja ique equeque quisarati cuejaqui cuanaque, anaquí cuanaque jadya. Umae tunajatu iyebuque. Peya cuana tunajatu ijahue ijahue abúque’ jadyatu Yusu jucuaré. ⁵⁰ Nerecaturatabuque micuana ecue cuanaque jidama ahuaju camadya ama, tumbaedyá micuanaja baba cuanara bérú yuequedyá Yusu equeque quisarati cuejaqui cuanaque iyecuare tibu. Dutya iyetacuare tibu Abel equeque, Zacarías tupu micuana jucha metse. Zacaríasta Yusuja etareju iyetanacuare, Muida Cuitaque Ama, mesa tumu eaque Yusu tyaya cuanaque iya ishúque petya majaca. Pusha amadya micuana cuejaya. Micuana iyacuá aniya cuanaque micuana nerecada atabuque Yusu dutya merequi cuanaque iyetacuareja inime.

⁵² “¡Nerecapane micuana cacuatsashati bahuityaqui cuanaque! Micuana cuitadya micuana baecua eje bucha judirue Yusu queja juishuque, ni micuana peya cuana bahue amerecara aya. Micuana micuana etsecue yahue tsehue teriqui buchique, micuana cuitadya nubi ishú ama ni ejeque nubicara juyaque nubi ishú, —jadya tuna Jesúsra acuare.

⁵³ Jadya quisarati ayaju bacatsutu cacuatsashati bahuityaqui cuanaque, fariseo cuana jadya ecahuaiti dyaque jucuaré. Jesúsja ishú tunajatu jidama quisarati acuare. Cacuatsashati eje bucha adeba aishuque tunajatu bacaduracuare. ⁵⁴ Yara tupu yara tupu tunajatu bacaduraajecuareadya jutidya. Eje buchadya Yusuja ishú jidama quisaratisha, jadya ama juatsu cacuatsashati bape cuejamere, huaraji cuana queja cueja jadya tunajatu acara ebari acuare.

Ejitaju ecuana jubuque eje buchique

12 Tume juyajutu casitaticuare eje uma mil ecuita cuana. Quitushatiya, ecatiiti jadya ecana jucuaré. Jesusratu tura mepehua cuanaque isaracuare, ecuita jetiera ama bacayaju.

—Necanaruticue fariseo cuana tsehue. Levadura buchiquetu tunara bahuityaya cuanaque. Jidadya batacara datse tuna juya, ai jidaque ama. ² Dutya ibedaquetu adebataqui judadiya. Dutya etehuaquetu ejitaju judadiya. ³ Meta quisaratiyaquetu bacataquidya juya huecadaju. Micuanara etare teritsu cuejayaquetu dutya queja cuejatanabuque, —jadya tujatu ecana acuare.

Yusu camadya mubataquique

(Mt 10.26-31)

⁴ Jesúsra tuna bahuityanucacuare:

—Nemubaume micuana iyecara juya cuanaque. Arepa tunara micuana eiyeu ama bucha, jadya aatsu tunajatu aijama casa micuana nerecatura ishu ni riya piji buchique. ⁵ Cuejaya micuana era, ejeque micuana-ja mubataquique. Nemubacue Yusu camadya. Tuja peadya camadyatu casa aniya micuana majuhuaaju ijahuaja etiquiju nudya ishu. Tuque camadya nemubacue.

⁶ “Yusuratu naruya dutya ai aniyaque. Upati huiri cuanatu tsujequi cuitaque ama. Pishicaque tu beta peadya chipiru tsuje piji. Jadya ama buchatu Yusura naruya; bahuedya tuna eje bucha juyaque. ⁷ Yusuratu adebaya dutya eje bucha micuana judadiyaque. Turatu adebaya dutya, eje uma micuanaja iyucaju etsaru aniyaque. Jutaquiju bajida nejuume. Pusha ama cuitadya micuana Yusura naruya. Upati huiri cuana naruya bucha, dyaque jida tura micuana narujacaya ama.

Ecuita cuanaja yacuaju “Jesús jaque ique” jadya juya cuanaque

(Mt 10.32-33; 12.32; 10.19-20)

⁸ “Cuejaya micuana era. Ejeque ni ecuita cuanaja yacuaju ‘Jesús jaque ique’ jadya cacuejatiya, era ecue Etata barepajuja yacuaju, tuque tsahuaqui cuanaja yacuaju jadya ‘Ecuique tume’ jadidya abuque. ⁹ Ejeque ni ecuita cuanaja yacuaju ‘Ique Jesús jaque ama’ jadya cacuejatiya, era dyaditu ecue Etata barepajuja yacuaju, tuque tsahuaqui cuanaja yacuaju jadya ‘Ecuique ama tume’ jadidya abuque.

¹⁰ “Yusuratu IQUE ECUITAja ishu quisarati jidama aya-ja jucha cuana eapupashau. Jadya ama bucha tujatu juca cuana apupashabuque ama tuja Espirituja ishu cuita jidama quisarati aya cuanaja.

¹¹ “Dujubuque tunara micuana caradati ishuque etareju huaraji cuana ecasitatiju. Epu naruqui cuanaque, inime bajejequi cuana jadyaja yacuaju micuana dujutanabuque. Huaraji cuanaja yacuaju dujutatsu jidama inime nebaume quicueneti ishu quisarati ishu ni eje bucha cuejae aya tsehue. ¹² Quisarati ishuque ura juetihuaju Yusuja Espiritura micuana huecashaya micuana eje bucha quisaratie juishu, —jadya tuna Jesúsra acuare.

Eje bucha jidama chipirura eamereuque

¹³ Umada ecuita cuanatu jucuaré Jesús tsehue. Peadyaratu jadya acuare Jesús:

—Ebahuityaquique, ecue etatara tuque yatseja majutsu shanacuare dutya tuja ai anicuare cuanaque. Cuejacue ecue eusi; patya tura ique ecue ishu aniyaque, —jadya tujatu Jesús acuare.

¹⁴ Jesúsratu acuare:

—Ique micue tataja ai jucuaré cuanaque cajuqueti ishuque cueja ishuque ama, —jadya tujatu acuare.

¹⁵ Tumebaedyatu Jesús jucuaré:

—Nebijiseriume dutya ai aniya cuanaque ni petaya cuanaque. Arepa ecuita dyaque umada chipiru tsehue ama buchatu dyaque jidama inimeju. Ejeque huecaca

tujatu majutsu, shanabuquedya dutya tuja ai cuana, —jadyatu Jesúsra acuare.

¹⁶ Jadya aatsu tuna Jesúsra bahuityacuare jeeque cuitasabiji eque.

—Anicuaretu chipirudaque. Dutya tuja tee cuanaju uhuamerecuare cuanaquetu jida huijacuaré. Jetiama tujatu huesamerecuare tuhua euhuaque. ¹⁷ Chipirudaratu inime tupucuaré: “¿Eje bucha ejuu? ¿Eju iyameretaqui ama taa baya ecue teeju era huesamereya cuanaque?” ¹⁸ Tume tujatu adebacuaré eje bucha iyamereé aishuque. “Parihuishamere tucue ecue beruque huesamereya cuanaque quiniqui cuanaque. Paamerenuca peya etare dyaque arida cuanaque. Tuhuadya tucue etare iyacua cuanaju paiyamere dutya ecue aniyaque, dutya era huesamereya cuanaque. ¹⁹ Tume tuque ecue inime juya. Amena ecue aniya umada earaqui eiyaque eje uma mara tupu. Pacanajara ique. Paaraara. Paijijiji. Iyacua pureama paju”, jadyatu chipirudaque jucuaré datse.

²⁰ Arepa ecuitaja eje uma mara chacha ani ishu cabaticuaré ama buchatu jadya ama jucuaré. Yusuratu jadya acuare: “Inimema mique. Riyaque apuna cuitadyami majuya. ¿Aija ishu cuana taa tuquemi tume cuanaque iyamerehua?” jadyatu Yusura acuare chipirudaque. Jadya majuetu tumeque ecuita jucuaré.

²¹ “Cuejaya micuana era. Jadyatu jubuque tunaja ishu cuita camadya jetiama chipiru, ai jadya caradatiya cuanaque. Arepa tuna dyaque chipirui cabatiya ama bucha, tuna Yusura nerecada, aima bucha baya, —jadya tujatu ecana acuare.

Yusura tuja cuanaque narujacayaque ama

(Mt 6.25-34)

²² Jadya junuca jadya juatsutu Jesúsra tura mepehua cuanaque bahuityanucuaré:

—Cuejaya micuana era. Netsapeume inime: “¿Ai dya-di rique araya, ijiya? ¿Ai dyadi rique jutuya?” jadya.

²³ Yusura micuana iyahua tibu, yuneri cuitadya tura micuana tyadadiya micuanaja aijamaque ara ishuque, jutu ishuque jadya. ²⁴ Neadebacue upati huiri cuana. Tunaratu inime tsapeya ama tunara sareya tsehue. Tuna tuna cuhuatiya ama ni cahuesatiya ama ara ishuque. Aijama tunaja ni eju tunaja earaqui iya ishuque. Jadya ama bucha tuna Yusura tyaya ara ishuque. Tujaque micuana. Micuana tura micuana dyaque iyuhueda baya, upati huiri cuana bucha ama. Yuneri cuitadya tura micuana tyaya micuanara ara ishuque sareyaque. ²⁵ Ni ejeradya jutidyatu tuja maju ishuque ura juetihuaju tuja ani erirunucáu ama. ²⁶ Ni micuana ataqui baya batu di taa riya pijique, ¿tume tuque micuana eje bucha juatsu inime tsapequi aya peya ai cuana?

²⁷ “Micuanajatu tsapetaqui ama inime jutu ishu cuana tsehue. Nebacuedya yachiju shasha cuana eje bucha danee juyaque. Tunaratu jidama ama inime baya jutu ishu cuana tsehue. Mere ecana juya ama chipiru jiteque, ni ecana taritariya. Jadya ama bucha tuna Yusura jida piji amereya. Salomón tu jucuaré

ecuari dyaque jida tsehue cajututitsu jida piji. Jadya ama bucha shasha cuana yachi juquetu dyaque jida piji, Salomónra ejutuqui dyaque jidaque jutucua bucha ama. ²⁸ Shasha yachi juqueri tsunuda ama juya. Tumeque huecaca camadya tu jida piji; peya huecaca bacue eijehue ejuu etiquiju. Yusura yachi juque shasha cuana dyaque jida piji amereya tibu, yuneridya tura micuana tyayadya micuanara jutu ishü sareyaque. Micuanaratu tura naruyaque ejeneya ama, arepa tuque micuana upati jeta aqui cuanaque, shasha cuana jadya naruyaju baya ama bucha. ²⁹ Yusura tura iyahuaque naruya tibu, inime netsapeume: '¿Ai dyadi tuque ecua araya? ¿Ai dyadi tuque ecua ijiya?' jadya tsehue. ³⁰ Yusu adeba baecua cuanaque tuna tumeque inime tupu tsehuedya jutidya juneniya. Micuana jadya inime tupu tsehue nejuneniume. Micuanaja taa tu aniya Etata Yusu barepa juque, micuanara ai ara ishüque, jutu ishüque jadya sareyaque tyaquique. ³¹ Pana catyati nejuque Yusu queja, tuja micuana naru ishü. Jadya anie ni micuana juya, tume tura micuana tyaya dutya micuanara sareya cuanaque.

Tere baecuaque etsujequi jida quiyatiaje ishüque
(Mt 6.19-21)

³² "Arepä micuana eje uma ama, casadama jadya juya ama bucha, bajida nejuume, ecue cuanaque. Micuanaja Tata Yusura micuana mepehua micuana eatsehue jupee huaraji aridaque juishu. ³³ Catyati neacue micuanaja aniyaque. Tumeque chipiru inayaque nerecada cuanaque netyabarecue. Nequiyatiajecue etsujequi tere baecuaque barepaju. Yusu queja micuana quiyatiajeyaque cayuamati baecua. Chiritanaya ama tuque, ni tu yuamaturaya rapara. ³⁴ Tupujacaya ama tuque ecua inime ecuanaja iyuhueda cuanaque quiyatihuaju.

Jesús junanucayaju quihuati ishüque

³⁵ "Cuejaya micuana riyaque cuatsabiji. Pana adeba neacue. Anicualetu peadya ecuita chine ishü caquemtitayaju cuacuaque. Tuja mere puji cuanatu baecua jucuare ai ura tuque juetinucayaque. 'Meta patya ni tu juetiya, jadya ama juatsu ni huecacayaju' jadya tunajatu inime jucuare. Ai ura tuque juetinucayaque baecua tibu tuna ecajututi anicualetu. Ude ecana catuchaticualetu. Tahuicualetu ama ecana. Ecabati tuna anisacuare. Equihuati tuna anicualetu eje tupu tura juetitsu isaraetiayaju masadama etsecue pacasha ishü. Tumetu patrónra tuja mere puji jida cuanaque juetitsu sumietiya ecabati tuque ihua juya cuanaque. Ejeque uradya jutidya tuque juetitsu meta patya, huecacayaju, juetitsu tujatu ecana cuejaetiya mesaju anibute ishü. Ejutuqui jidaque bacue catacati, mere ishüque jutu jadya juatsu tujatu earaqui quinineya.

"Jutaquiju micuana dyadi nequihuaticuedya ecabajejeti ique junanucayaju ishü, mere puji jida cuanaque jucuare bucha, tunaja patrón ihuayaque jucuare bucha. ³⁹ Bahue nejuque riyaque. Ni ejeque etare met-

sequetu bahue ama ejeque ura chiri puji ejutiuaque. Junayaque bahueque juatsu ecabati ejuu, chiri puji etareju chiri ejutiuaque naru. ⁴⁰ Micuana dyadi equihuatiadya nejuque ique batsa ishü. Muya jutidya micuana eanau, ejeque huecaca ique junanucayaque baecua tibu, —jadya tuna Jesúsra acuare.

Mere puji cuejataquique, cuejataquimaque jadya
(Mt 24.45-51)

⁴¹ Tumetu Pedrora bacadualetu:

—Ecuana Cuatsashaquique, ¿jadya cuejae mira ecuanaya, ecua camadya, dutyadya ni taa?

⁴² Jesuratu quemitsacuare:

—Neihuacue ique, mayuruma jidara tuja patrón iyuhuedaque juetiyaque ihuau bucha. Mere puji yana equedya juyaquetu jida, inimequique. Micuanaja pana adeba aishu micuana cuejaya riyaque. Anicualetu mayuruma. Tuja patronratu shanacualetu tuque juneniya tupu tuja etareju cuanaque naru ishü. "Dutyahuecaca ecana ara ishü cuanaque tyacue", jadya patu tuja patrónra aquenacualetu. ⁴³ Tumeque mayuruma ni amerehua eque juya, peya cuana ni tu narujacaya ama, dutya pureamatu jubuque tuja patrón juetihuaju. ⁴⁴ Pusha amadya micuana cuejaya. Tura tuja patrónja mere puji cuana jida naruhua tibu, tujatu dutya tuja ai aniya cuanaque narumereya.

⁴⁵ "Mayuruma ni cuejataquima, amerehua eque amadyatu juya. Tura ni jadya inime tupuya: 'Ecue patrón tu juetihuishaya ama. Ecue biji eque paju jari' jadya. Amena jadya juatsu tujatu peya mere puji cuana nerecaturaya; ijahue ijahue jutidyatu ecana aya. Chine mere, araara, nijuqui arida cuana tsehue, ijijiyajadya tsehue jutidyatu ecana aniquereya, tuja mere ataqui ama bucha. ⁴⁶ Tumetu tuja patrón juetiya ni tuque quihuatiyaju, ni tuque juetinucayaque ura bahueju. Jadya baetitsu tuja patrónra catsa catsa, ijehue jadya aetiya tuja etare juque. Riyaque mayurumatu canerecatibuque. Yusu adeba baecua cuanaque canerecatiya bucha canerecatietu jubuque.

⁴⁷ "Mere puji ni yana equedya ama juya, arepa tuque tuja patrónra amereyaque bahue ama bucha, tumetu dyaque nerecada atanabuque. ⁴⁸ Ejeque mere puji ni yana equedya ama juya, tuja patrónra amereyaque baecua juatsu, tumetu dyaque ama nerecaturatanabuque. Jetiama aniya cuanajatu jetiamadya tyataqui peya cuana. Tumebaedya ejera ni pana adeba aya Yusuja biji equeque bahuityataquidya tunajatu peya cuana tunara adebayaque, —jadya tujatu ecana acuare.

(Riyaque cuatsabiji eque tuna Jesúsra bahue amerecaca acuare tuque iyuhueda baqui cuanara ihuayaque; tuque iyuhuedama baqui cuanara bacue ihuaya ama jadique.)

Jesúsja inime riyaque yahuaju cuanaque catibuqueque
(Mt 10.34-36)

⁴⁹ Jesúsra tuna bahuityanucualetu:

—Etiqui jujuajeyara dutya jiji asicada cuanaque jadya tirushatsu bajejeajeya buchique ique. Ique jehua riyaque yahuaju jidamaque aputasha, eaqueja caty-atiya cuanaque tunaja educuju asicadaque aniyaque tilla jadya aishu. ⁵⁰ Eatilla jipe ecue Yusura mere amerehuaque ejuu! ⁵¹ Ique dyaque canerecatitaqui, majutaqui judadiya ique nerecada juyaque atillaya tupu. ⁵¹ ¿Micuanaja ni tu inime juya, ique junahua baatsu dutya inime jidama cuanaque, cati jadya amena terehua bucha? Jadya ama tuque. Ique adeba baecua cuanaque tuna ecue cuana tsehue cahuaitsu catibuque. ⁵² Iyacua equeque tu micuana dyaque ujeu baqui cuanaque micuanaja etareju cuanaquedy. Ita taa nebacue. Peadya etarejutu eaniu ecuita, tuja ehuaneeque, ebacujunaque, ebacuaque, ebacuaqueja ehuaneeque. Ique adeba baecua cuanaratu ique adebaqui cuanaque ujeu babuque. ⁵³ Etataqueratu ebacuaque ujeu babuque; ebacuaquera bacue etataque. Ecuateratu ebacujunaque ujeu babuque; ebacujunaquera bacue ecuaque. Yahuiqueja ecuaqueratu ujeu babuque ebacuaque jahuane; ebacuaque jahuanera bacue yahuiqueja ecuaque, —jadya tuna Jesúsra acuare.

Huecaca cuana eje buchiquepa eadebau jadique
(Mt 16.1-4; Mr 8.11-13)

⁵⁴ Jesúsra tuna cuejanucacuare:

—Nei diji equeque huani sehueda netitsuraya baatsu, micuana juya: “Nei tu netihua; iyacuari nei juya”. Tumetu micuanara quisarati ahua equedy juya.

⁵⁵ Beni mara juetihuajutu “Amena nei jujacaya” jadya micuana jubahue. Micuana micuana bahue jida amena beni maraju nei jujacayaque. ⁵⁶ Micuana aniya patyatu Yusura jetiama aya ique tuaquejaque junahuaque adebamere ishucue. Micuanaradya jutidyatu adebaya ama, arepa micuana huecaca cuana eje buchique adeba bahue ama bucha, arepa micuana riyaque yahua juque adeba bahue ama bucha. Micuana micuana jidamaque inime cadujutiya, arepa micuana dyaque inime adebabada cabatiya ama bucha.

Ecuaa ujeu baqui cuana tsehue jida jutaquique
(Mt 5.25-26)

⁵⁷ “Micuanara cuitadya neadebacue dyaque jida tuyuque. ⁵⁸ Ejera ni micuana huaraji queja cuejaya, dujucara ni tunara micuana aya, huaraji queja junatimaradya icuene jida inime nebajejecue. Icuenedya ni micuana inime ebajejeu ama, tume tunara micuana edujuu inime bajejequi queja. Dujuhaju micuana inime bajejequirá policía cuana queja edujumereu. Tume tunara micuana etare apudaju eishau. ⁵⁹ Pusha amadya micuana cuejaya. Tuhua tunara micuana entyamereu, huarajira tsujebacayaque tsujetyatillaya tupu, —jadya tuna Jesúsra acuare.

Inime cacuaretiyaque ama juatsu Yusuja queja judirubuqueque ama

13 Tumeque huecaca nucadyatu umae ecuita cuana jecuare Jesús queja. Cuejanaticuare tuna Jesús:

—Pilatoratu eje uma israelita cuana Galilea juque iyemerecuare, tuna Yusuja etareju uu cuana iyetsu Yusu tyau juyaju. ¿Eje bucha juatsu tuna iyetanacuare, tuna jucha arida baatsu ni taa?, —jadya tunajatu bacaduraticuare.

² —Micuanaratu adebaya tume cuanaque ecuita cuana Galileaju cuanaque peya cuana Galileaju cuanaque bucha jucha arida juatsu majucuaque bucha. ³ ¡Ajama! Tuna tuna peya ecuita cuana bucha dyaque jidamaque ama jucuaque. Dutya tuna jucha arida cuanaque, micuana dyadi tumebaedya. Micuana ni cacuaretiya ama micuanaja inime, Yusu queja micuana judirubuque ama. ⁴ Adebaya micuana peadya tunca quimisacarucu earacana ecuita cuana Siloéju aruhue etare rihuitsu tyanatanacuareque. ¿Eje bucha tuque micuana ecana adebaya? ¿Jerusalenju anicuare cuanaque bucha dyaque jucha aridaque ni taa? ⁵ ¡Ajama! Tuna tuna peya cuana bucha dyaque jidamaque ama jucuaque. Tuna tuna jucha arida jucuaque; micuana bacue tuna baedya. Micuana ni inime cacuaretiya ama, ni ejeque micuana Yusu queja judirubuque ama, —jadya tuna Jesúsra acuare.

Higo acui cacama cuatsabiji eque bahuityacuareque

⁶ Jadya juatsu tuna Jesúsra jadya cuejanucacuare bahuityayaque.

—Anicuaretu teeju acui higuera bacani euhuaque. Tuque uhuaquiratu sarenacuare ecaca. Dadinacuare amatu ni peadya ecaca. ⁷ Jadya juatsu tujatu ecuita tee naruquique cuejacuaque: “Quimisha mara ique amena jeujeu juyaque riyaque acui caca sarera. Ni cacacati pidya ecue riyaque jucuaque. Cuerehuanacue. Yanacana cuitari riyaque acui euhua”, jadyatu emechiquira acuare tee naruquique. ⁸ Tee naruquiratu acuare: “Riyaque mara camadya panetinuca jari. Eratu jida naruya. Huaca taraca juque mechi tsehue mechi pahua euhuaque jida juishu. ⁹ Peadya mara junucatsu cuanatu cacaqui ejuu. Cacacatinucaya ama ni, tumetu amena cueremeretaqui tumeque acui”, jadya tujatu acuare. Jadyatu jucuaque acui cacamaque, —jadyatu Jesús jucuaque.

(Riyaque cuatsabiji tsehue tuna Jesúsra bahuityacara acuare. Inime cacuaretiya ama cuanaque tuna ijehuetanabuque jadique.)

Canajara huecacaju Jesúsra epuna ereme ecatununtique tuyunecuareque

¹⁰ Canajara huecacajutu Jesús Yusuja quisarati bahuitya jucuaque caradati ishucue etareju. ¹¹ Tuhadyatu jucuaque epuna peadya tunca quimisacarucu earacana mara ujejedaque, yume tucue ijahuara jadya

amereyaque. Ebebacua tujatu ecaturunati jucuaire. Jida netitaqui amatu jucuaire. ¹² Baatsutu Jesúsra ihuaracuare:

—Jecue requeja, mama.

Tuaqueja ihuaratsu tujatu acuare:

—Mama, erami eremeque tuyuneya.

¹³ Jadya aatsu tujatu emetucu tuque dyaque huacuare tuque chachane ishu. Jadya aya tsehuedya cuitadyatu epuna ereme juneniyaque jida neticuare. Tume tujatu amena Yusu pureama acuare:

—Dyaque jida taa Yusu! —jadyatu jucuaire.

¹⁴ Caradati ishuque etare naruquique huarajitu yaque cahuaicuare, Jesúsra canajara huecacaju chachanehua baatsu. Turatu tuhua ecaradati cuanaque jadya acuare:

—Aniyatu shucuta huecaca mere juishuque. Mere huecacaju nejecue casamameretira, canajara huecacaju ama. [Canajara huecaca tu casamati huecaca ama! —jadya tujatu ecana acuare.

¹⁵ Jadya juyaju bacatsu tuna Ecuana Cuatsashaquira isaracuare dutya tuhua cuanaque:

—Jidadya batacara datse micuana juya, ai jidaque ama. Micuana micuana mere juyadya canajara huecacaju. Inajacaya micuana canajara huecacaju huaca cuana, burro cuana jadya taraca juque cuinanasha ishu, ena ijimereti ishu. ¹⁶ Riyaque epuna ri israelita, Abraham eque ejuracanaque. Amena ri peadya tunca quimisacarucu earacana mara ijahuara ujejeda amereyaque. ¿Eje bucha chachanetaquima rejari ejuu ujeje canajara huecacaju? —jadya tuna Jesúsra acuare.

¹⁷ Jesúsra jadya ayaju cabacatitsutu tuque jadya juyaju jidama baqui cuanaque cabisuticuare. Peya cuanatu pureamadya jucuaire Jesúsra ayaque baatsu.

Mostaza caca cuatsabiji eque bahuityacuareque

(Mt 13.31-32; Mr 4.30-32)

¹⁸ Bahuityanucacuare tuna Jesúsra:

—Cuejaya micuana riyaque cuatsabiji, micuana Yusura eje bucha micuana amena naruyaque bahue amere ishu. ¹⁹ Adebayadya micuana mostaza caca, teeju ehuataque. Achaachaque piji, bataqui nerique ama. Jadya ama buchatu buraratsu, huijatsu, danetsu dyaque arida juya. Tuja yaa cuanajudyatu upati huiri cuana eja catiya, —jadya tuna Jesúsra acuare.

(Riyaque cuatsabiji eque tuna Jesúsra jadique huecashacuare. Arepa catibutiyaque eje uma piji tuaqueja catyatiajeya ama bucha, tuequedya tuna riya piji, riya piji jetiama catyatiajeya.)

Levadura cuatsabiji eque bahuityacuareque

(Mt 13.33)

²⁰ Tumbaedya tujatu ecana riyaque cuatsabiji eque bahuityanucacuare:

—Bahue micuana amerecara aya eje bucha micuana amena Yusura naruyaque. ²¹ Epunatu pan ejuu. Eiyautu riya piji levadura. Quimisha equiniqui medidaju tujatu harina ehua. Tumeque riya piji levaduradyatu

duty esaca huahuaju emujashau, —jadya tuna Jesúsra acuare.

(Riyaque cuatsabiji eque tujatu ecana jadique huecashacara acuare. Levadurara dutya esaca mujashaya bucha, jadidyatu tuja quisarati dutya queja cuejatanabuque jadique.)

Eje uma ama Yusu queja judirubuqueque

(Mt 7.13-14, 21-23)

²² Jesúsra cuanucacuare Jerusalénju. Cuetiajecuaretu epu ebari cuana eque, epu achacha cuana eque.

Tumeque epu cuanaju aniya cuanaque tujatu bahuityaajecuare. ²³ Ejera cuanatu bacaduracuare:

—¿Eje uma ama tuna Yusu queja judirubuque ni eje tupu jaca ishu ama, Ecuatsashaquique? —jadya tujatu acuare.

Jesúsra quemitsacuare.

²⁴ —Yusu queja judiru ishu tu masada, ibeda jadya; etsecue quinidama eque careta careta nubie ejuu bucha tuque. Ducuta inime tsehue eje buchadya dutya acara nejecue tuaqueja judiru ishu. Cuejaya micuana era. Dutya jujeri datse tuna Yusu queja judirucara juya. Jadya ama bucha tuna judirubuque ama, ai tuna eje bucha judiru ishuque aya batudya.

²⁵ “Anicuaretu etare metseque. Nubi ishu emajaca tyau jadya aatsutu etare cateriticuare. Yusu tu etare metsesque buchique. Tere huecaca juetihuaju micuana Yusuja eaniqui etsecue netinatibuque. Ihuarabuque micuana Yusu. ‘Ecuana Cuatsashaquique, pacashacue ecuana’ jadya tuque micuana abueque. ‘Aijama. Adebaya ama micuana era. ¿Ejuque cuana taa micuana?’ jadya tura micuana abueque. ²⁶ Tume tuque micuana abueque: ‘Mira taa ecuana adebayadya. Araaracuareadya taa ecuana miatsehue. Mique taa mi ecuanaja epu cuanaju bahuitya bahuityacuare’ jadya tuque micuana abueque. ²⁷ Jadya bacatsu micuana Yusura abueque: ‘A, aijama. Micuana micuana ecue ama cuanaque. Cuejahuadya micuana era. Adebaya ama micuana era. Nenetisicuacue ique pequeque, micuana micuana jidama juhua cuanaque’ jadya tura micuana abueque.

²⁸ Abraham, Isaac, Jacob, Yusu equeque quisarati cuejaqui cuanaque jadya yuqueja Yusuja yacuaju aniya baatsu, micuana dyaque peya inime jubuque, tuna queja nubitaqui ama juya cabatitsu. Etse tari tsehue micuana pabuque tuhua nubitaqui ama cabatitsu.

²⁹ Eje uma israelita ama cuanaque tuna Yusu huaraji dyaque aridaque aniyaju judirubuque. Dutya quejaque tuna tuhua judirubuque. Junabuque tuna nei diji eque amacaque, beni diji eque amacaque, ijete cuinanaya eque amacaque, ijete nubiya eque amacaque jadya tuna caradatibuque Yusuja yacuaju pureama juishu. Caradatitsu tuna eatsehue araarapee jubuque. ³⁰ Iy- acua dyaque inime metse cabatiya cuanaque tuna inime metse ama jubuque. Iyacia jetiedya, inime metse ama cabatiya cuanaque bacue dyaque inime metse cabatibuque, —jadya tuna Jesúsra acuare.

Jesús Jerusalénju cuanara bijidamadurayaque caadebatitsu pacuareque
(Mt 23.37-39)

³¹ Amena tuque quisaratijacahuajutu junacuare uma fariseo cuana.

—Dirucue rehuaque. Herodesrami iyemerecara aya, —jadya tunajatu Jesús acuare.

³² Tura tuna acuare:

—Herodes tu inime adebabadaque. Necuejadirucue jadya: “Eje uma huecaca ama mere juya jari. Cuinanashaya jaridya tuque ijahua cuanara quijahuatishaya cuanaja ijahua cuana. Ujejeda cuanaque tuque chachaneya. Jadya juatsu tuque ecue mere tereya”. ³³ Juneniya jari ique Jerusalén queja amaca iyacua, metajudya, tibene jadya. Jerusalén tu Yusu equeque cuitadya quisarati cuejaqui cuanaque iyetana ishucue, —jadya tujatu ecana acuare.

³⁴ Jadya quisarati amena aatsutu Jesúsra quisarati acuare Jerusalénju aniya cuanja ishucue. Tuna cuitadya baatsu quisarati aya buchatu jucuare, arepa tuna tuhua ama jucuare ama bucha.

—Micuana Jerusalénju aniya cuanaque, micuanaja epu ebarijutu Yusu equeque quisarati cuejaqui cuanaque tumu tsehue iyetajacama jucuare. Eje uma narucara ebari datse micuana ahua. Tacure jabacua cuana ecuaquera yajapara emaque ishatsu enaruu bucha, narue datse micuana acara ahua. Micuanajatu ecue jadya narue aishu bijidama juhua. Dutya jujeri micuana eaqueja catyaticarama juhua. ³⁵ Nebacacue. Yusratu tuja epu ebari narujacabuque, tumebaedya tuhua anibuque cuanaque. Banucabuque ama micuanara ique, “Jida paju Yusuja ebanijutu junayaque”, dutya israelita cuana jadya judadiya tupu, —jadyatu Jesús jucuare.

Jesúsra ecuita emujatereque chachanecuaque

14 Canajara huecacajutu Jesús cuacuare fariseo huarajija etareju araara ishucue. Tuhua jucuare cuanara tunajatu Jesús narucua tura eje bucha canajara huecacaju ai ayaque. ² Tumebaedyatu tuhucua jucuare ecuita ujejedaque emujatereque. ³ Jesusratu bacaduracuare cacuatsashati bahuityaqui cuanaque, fariseo cuana jadya:

—¿Ecuanaja cacuatsashatijutu ehuene, ecuita ujejedaque canajara huecacaju, chachanetaquique, aijama ni taa? —jadya tujatu ecana acuare.

⁴ Tuna bacue abacatadya jutidya jucuare. Caquemitsaticuare ama tuna. Jadya juatsutu Jesúsra ecuita emujatereque jabatsu chachanecuaque. Chachanetsu tujatu —jida dirucue micue etareju, —jadya acuare.

⁵ Jadya juatsutu Jesúsra fariseo cuana anucacuare:

—Micuana micuana mere juyadya canajara huecacaju. Micuanaja bacua, jadya ama juatsu juye canajara huecacaju epacacau cani dedaju. Tumeque uradya tuque micuana ecuinanashatiu, arepa canajara huecaca paju ama bucha. ¿Yuneridya? —jadya tuna Jesúsra acuare.

⁶ Eje bucha quemitsataqui ama tunajatu bacuare.

Ecuana taca camuibati jutaquique ama

⁷ Jesusratu bacuare eihuara cuanaque eaniqui dyaque jida muida cuanaque iyabutya ishucue eaniqui sare juyaju mesaju. Jadya juya baatsu tujatu ecana cuejacuare:

⁸ —Eju tunara chine ishucue araara ishucue cuejahuaju, neanibuteume eaniqui muida cuanaque iyabutya ishucue. Muidaque iyabutya ishucue eaniqui ni mi met-seneya, ¿eje buchami ejuu, peya eihuaraque mique bucha dyaque muidaque jutihuaju? ⁹ Metse cuejaqui juhuarami jadya eau: “Netitsuracue tumeque eaniqui juque. Riyaque ecuita tuhua paanibute”. Tumemi bisu majaca nrecada cuana ducu anidirutaqui. Jadyatu juya tuna taca camuibati juya cuanaque. ¹⁰ Tume amena tunara araara ishucue ihuarayaju, neanibuteume nrecada cuana tsehue. Jadya juyajumi mique ihuaramerequire jadya eau: “Netitsuracue. Anibuteticue tuhua dyaque muida cuanaja eaniquiju”, jadya tura mi eau. Tume tuna dutya peya cuana ecueja cuanaque bahue ejuu mique muibataquique. Jadyatu juya tuna taca camuibati juya ama cuanaque. ¹¹ Yusratu dyaque inime metse cabatiyaque aishu ama amereya. Aishucue ama cabatiyaquetu dyaque inime metse Yusura amereya, —jadyatu Jesúsra eihuara cuanaque acuare.

¹² Tumebaedya tujatu tuque ihuaramerequique acuare:

—Chine catiyaque, micue ata cuana cuita camadya ihuaraume ni micue miatsehuequi cuanaque, micue eadeba cuanaque, micue epuju chipiruda inime metse cuanaque. Ihuaraya ni mi eadeba cuanaque, chipiruda cuanaque camadya, tume tunarami tuna chine catiyaque cuare ihuara jutidya eau. Jadya mique juhujumi tume tsujema tyatana juya. ¹³ Jadya ama juatsu, chine catinucayaque, ihuaracue nrecada cuanaque, ebi tubu cuanaque, rudurudu cuanaque, shuhui cuanaque jadya. ¹⁴ Arepa micue nrecada cuanara, ujejeda cuanara jadya chine ishucue ihuaranucataquima baya ama bucha, miquemi dyaque pureama micue canerecabatimi ecana bamerehua tibu. Amena ishucue huecacaju Yusura emaju cuanaque nityatsuranucatsu turami dyaque jida abucue, mira tume cuanaque nrecabahua tibu.

Chine ishucue eihuara cuanaque equeque cuatsabiji

(Mt 22.1-10)

¹⁵ Jadya juya bacatsutu tuhua mesaju juaniyara Jesús jadya acuare:

—Dyaque jida taa Yusu huaraji dyaque arida aniyaju judiruya cuanaque, tuatsehue araara ishucue ecueja cuanaque.

¹⁶ Tura jadya ayajutu Jesúsra cuejacuare riyaque cuatsabiji tuna bahuityayaque, dutya ecuejaque ama Yusu queja judiruyaque.

—Anicualetu ecuita chipirudaque. Tuquetu cabajeticuare chine arida juishu. Ihuaramerecuare tujatu

ecana jetiama chine ishu. ¹⁷ Earaqi amena juhuaju tujatu cuadishacuare tuque merequi tuja ecueja cuanaque ihuarara. "Nejecue. Amenatu iyatanahua", jadya tujatu cuejamerecuare. ¹⁸ Cuejatahua ama bucha ecana cuacarama jucuar. Tudy tunajatu cuejacuar tuna cuejaqui juhuaque eje bucha juatsu tuna cuataqui ama juyaque. Icueneratu jadya acuare: "Cuaya ama ique chinera. Iyacu cuitadya ique yahua caquemitihua tee ishuque. Cuataqui ique tumeque petara. Cuejadirucue chine metseque; panerecaba tura ique". ¹⁹ Peyaratu jadya acuare: "Cuaya ama ique chinera. Quemihua tuque pishica yunta juye cuana. Tume cuanaque adebara cuaya. Cuejadirucue chine metseque; panerecaba tura ique", jadya tujatu acuare. ²⁰ Quimisha ishuratu jadya acuare: "Cuaya ama ique chinera. Iyacuadya taa huanequi juhua. Jadya tibu taa eje bucha cuataqui ama juya. Cuejadirucue chine metseque; panerecaba tura ique", jadyatu peyara acuare. ²¹ "Ecuejaquiquetu dirunucacuare. Judirunucatsu tujatu tuja patrón cuejadirucuar: 'Dutya mira ihuaramerehua cuanaque tuna jecarama juya'. Tura jadya cuejadirujutu chine metseque cahuaicuar dyaque. 'Ebajarara cuacue epu quini cuana, epu tipare aniya cuana queja. Queticue requeja nerecaca cuanaque, bima cuanaque, rudurudu cuanaque, shuhui cuanaque jadya eatsehue tuna araara ishu' jadya tujatu acuare. ²² Tura jadya cuatsashahuajutu ecuejaquique cuacuare tuja yana equedya. Jadya cuejatitutu judirunucacuare. 'Mira cuatsashahua eque tuque ahua. Jetiama rena quetihua nerecaca cuanaque, ujejeda cuanaque. Aniya jaridya emajaca jetiama ecuitaja ishu' jadya tujatu acuare tuque merequique. ²³ Jadya juyajutu patrónra jadya acuare: 'Cuanucacue peya epu cuanaju, tee cuanaju. Tuqueja cuanaque ihuaraticue. Paje ecana ique chine catiyaju. Eje uma ecue etareju nubiya tupu ecana panubi. ²⁴ Jeeque micuana cuejaya. Paaraarana ama ni ejeque era icuene ihuarahua cuanaque' jadyatu chine metseque jucuar, —jadya tuna Jesúsra cuejacuar.

Masadama amatu Jesúsja cuanaque aniya bae anie juishuque
(Mt 10.37-38)

²⁵ Jerusalénju diruyaquetu Jesús tuhuaque cuanucacuare. Ecuaita cuana jetiamaratu Jesús tupujudya acuare. Tuna queja huarere juatsu tujatu ecana isaracuare:

²⁶ —Eaqueja catyaticara juya cuanaque, ecue jucara juya cuanaja ique dyaque iyuhueda bataqui, tuja etataque, ecuaque, ehuaneeque, ebacua cuanaque, tuatsehuequi cuanaque bucha iyuhuee ama. Ique tunaja pureama ameretaqui, tuna pureama ejuuque. Jadya ama ni juya, tumetu ecue jutaqui ama. ²⁷ Micuana eatsehue junenicara juyaque juatsu, ecue yana equedya nejuque, arepa micuana canerecati, maju jadya jutaqui ama bucha, curusuju etata ejuu bucha. Ique jiteque iyetacara juyaju, iyetacarama juyaquetu ecuique jutaqui ama. ²⁸ Eaqueja catyatimaquedya yuneri nejuque

eatsehue junenisiriyaque, canimehuallaticarama tsehue. Cuejaya micuana riyaque cuatsabiji micuana huecasha ishu. Anicuaretu ecuita etare iyacuaque caticara juyaque. Etare tibunema jarira tujatu inime tupucuar ama dutya tura etare ishu sareyaque tuja aniyaque, aijama jadique. ²⁹ Tumetu etare catibuticuar, dutyadya tuja etare atilla ishu aniya jadique baecuaquedya jutidya. Dudu cuana puchabaretsu tuja aijama jucuar ejaqui espiqui jadya tsuje tyaishu. Tuja dudu cuana camadya epucha eque tuna jetiama cueti cueti jucuar. Petatsu tunajatu ijaribacuare. ³⁰ "Nepetacue riyaque dudu cuana camadya. Inimema shana ri ecuita! Etareri caticara juchine, atilla ishu tupu aniyaque baecuaquedya jutidya".

³¹ "Cuejanucaya micuana era. Anicuaretu ecuari peya yahua juque ecuari tsehue catira cuahuaque. Tuquetu peadya tunca mil sudaru cuana cuatsashaquique jucuar. Peya yahuajuja bacue beta tunca mil sudaru cuana anicuare. Catira cuamaradyatu icueneque ecuarira jida inime etupuu: '¿Jahuedya tuque eau peya cuana, aijama ni taa?' jadya. ³² Juya ni tuja inime: 'Eje bucha ijahuee ni tuque ama sudaru jetiamaque' peya japada jarijudya tujatu cuadishaya icueneta ecuejaqui cuanaque: 'Necahuaiti ama. ¿Eje bucha yatse ejuu jida, catima ani ishu?' jadya aishu.

³³ "Jutaquijudya, eaqueja catyatimaradya jida inime netupucue, yuneridya micuana dutya ai aniya cuanaque cashanaticara tsehueque, aijama jadique. Eatsehue junenicara juyaquetu ecue yana equedya jutaqui, —jadya tujatu ecana acuare.

Banu huaja tereyaque
(Mt 5.13; Mr 9.50)

³⁴ Jesúsra tuna cuejanucacuare:

—Banu tu jida. Banuja, ni banu huaja etereu, aijamatu ni eje bucha banuqui amerenuca ishuque. ³⁵ Jida amatu ni mechí jida amere ishu, ni aishu buchique. Ijehuetaquidya tuque jidama tibu. Tumebaedya micuana, micuana ni ecue yana eque jujacaya, tume micuana ni aishu buchique. Micuana quijacabacati aqui juatsu, nebacacue, —jadya tuna Jesúsra acuare.

Uhuisha cuji ejuque cuatsabiji eque bahuityacuareque
(Mt 18.10-14)

15 Jetiama enaruquija ishu chipiru tsuje bacaqui cuanaque, peya ebijidamadura cuanaque jadya tuna cajipeticuar Jesús queja, tura cuejayaque ijacaba ishu. ² Fariseo cuana, cacuatsashati bahuityaqui cuanaque jadya tuna quisaratitibunecuar Jesúsja ishu:

—Jeeque ecuitaja taa bijida jucha arida cuana tsehue juneni ishu. Tuna tsehuedya araraya jadyatu juya, —jadya tuna jucuar.

³ Jadya juatsu tuna Jesúsra riyaque cuatsabiji cuejacuar:

⁴ —Peadya ecuitaja cien uhuisha eaniu. Peadya tuja cuji ejuu. ¿Eje buchatu tumeque ecuita ejuu? Eshanau jari di taa tujatu puscurucu tunca puscurucu earacana taracaju. Eishautu eju aija eje bucha ataqui amaju.

Jadya shanatsutu pereu amadya ecuau uhuisha cuji ejuque sarera. Esareudya tujatu dadiya tupu. ⁵ Daditsu, pureama aatsu tujatu yaracacaju hueishatsu edujuu. ⁶ Etareju judirutsutu eihuarau tuja ata cuana, tuja eadeba cuanaque jadya. Jadya tujatu ecana eau: "Pureama nejura, era ecue uhuisha cuji ejuque dadihua tibu".

⁷ "Pusha amadya micuana cuejaya. Barepaju cuanaquetu pureama juya, Yusuja cuanaque jetiama tuja yana equedya juya baatsu. Jadya ama bucha tuna dyáque pureama juya, peadya jucha aridaque inime cacuaretiya baatsu, —jadya tujatu ecana acuare.

Chipiru eaputa cuatsabiji eque bahuityacuareque

⁸ Jesúsra tuna bahuityanucacuare:

—Peya micuana cuejaya. Anicuaretu epuna. Peadya tunca ficha chipiru tuja anicuareque, peadya ni ecaaputashatiu, ¿ai tu ejuu? Etuchau tu ude. Tucha jadya aatsu tujatu tsucuta etare ejabuu inime eque chipiru pana sare ayaque. Chamacama tujatu edadiu. ⁹ Daditsu tujatu eihuarau tuja ata cuana, tuja eadeba cuanaque jadya. "Pureama nejura. Dadihua tuque ecue chipiru aputahuaque", jadya tujatu ecana eau. Jadyatu epuna chipiru caaputashatiyaque ejuu.

¹⁰ Pusha amadya micuana cuejaya. Ejeque ecuita jucha aridaque inime cacuaretiyajutu dyaque pureama juya barepaju Yusu tsahuaqui cuanaque, —jadya tujatu ecana acuare.

Inime cacuaretitsu, etataque queja ebacuaque judirunucacuareque cuatsabiji

¹¹ Jesúsra tuna bahuityanucacuare:

—Peya micuana cuejaya. Anicuaretu ecuitaja beta ebacuaque ecatsé. ¹² Ebacuaque tupujuratu jadya etataque acuare: "Tyacue ique, mique majuhuaaju ecue jubuqueque". Jadya tura ahuaajutu etataquera tyacuare chipiru, ai cuana jadya tuja ishucue. ¹³ Eje uma huecaca piji juatsutu ebacuaque tupujuque casitaticuare tuja ai aniya cuanaque. Catyati caticuare tuja ai cuana. Chipiru inatsutu dirucuaré japada anape cuana queja. Tuhua judirutsu tujatu baya ijehue chipiru acuare tuja biji eque. ¹⁴ Amena tuja chipiru pana tere juhuaju tuna dyaque mije jucuare tumeque yahuaju. Tumetu ehue ebari arara majuya bucha cabaticuare. ¹⁵ Jadya juatsutu cuacuare mere sarera. Ecuita chipirudaque tumeque yahuaju aniya queja canerecatiticuare: "Micue mere aniyaque juatsu, micue mere paa. Aijama rique ecue ara ishucue", jadya tujatu aticuare chipirudaque. Ecuitaratu cuadishacuare cuchi cuana naru ishucue. ¹⁶ Dyaque cuita aracara juatsu tujatu cuchi cuanara arayaque bijisericuare. Ni ejeradya jutidyatu ara ishucue tyacuare.

¹⁷ "Jadya tibudya tujatu inime tupucuaré tuque juneniyaque. 'Ecue etataja mere puji cuanaja taa tu aniya ara ishucue jetiama. Ique taa rehua arara majuya. ¹⁸ Ecue etata queja tucue padirunuca. Jadya paadiru: "Ecue etata, cajuchatihua taa ique Yusu tse-

hue, miatsehue jadya. ¹⁹ Mere taa amerecúe. Micue bacua bucha bae aume. Micue mere puji bucha bae jutidya acue", jadya era ecue etata paadiru' jadya tujatu inime tupucuaré. ²⁰ Jadya inime tuputsutu judirunucacuare tuja etataqueja etareju.

"Tuque japada jariju cuitadyatu etataque esirira batsacuare diruyaju. Batsatsu tujatu nerecabacuare. Tsajaja tsurutsa, macacatsa, dyahua jadya tujatu atsacuare. ²¹ 'Tata, cajuchatichine taa ique Yusu tsehue, miatsehue jadya. Micue bacua bucha batsae aume. Eje bucha micue bacua ique jadya ataqui ama mique baya' jadya tujatu acuare tuja etataque. ²² Etataqueratu ebacuaque quisaratiyaju bacaya ama bucha jadya acuare tuque merequi cuanaque: 'Ebajarara ejutuqui jida pijique nequeticue. Nejutumerecúe ecue ebacua. Nejutumerecúe metara, zapato jadya. ²³ Neiyeticue huaca ecuanara tsericuinashayaque. Nearaarara. Chine nejura. ²⁴ Riyaque ecue ebacua era emaju bucha bayaqueri chacha juetinucahua. Era eaputa bucha dutya huecaca adebayaqueri juetinucahua' jadya tujatu ecana acuare. Jadya juatsu tuna catibuticuare chine.

²⁵ "Tuna jadya juyajutu ebacuaque icueneque teehu mere juyaque judirucuaré. Etare jipeajeyaque tujatu bacajecuaré tuna dudududuyaju, ijahue jadya juyaju.

²⁶ Judirutsu tujatu dudududuyaju bacatsu tuna merequique tueque cuetiya baatsu ihuaracuare.

Ihuaratsu tujatu bacaduracuare: '¿Ai tuna juya? ¿Eje bucha juatsu tuna dudududuya, ijahue jadya juya?'

²⁷ 'Micue jautu juetihua. Micue tataratu iyemerehua huaca tseridaque, tuja ebacuaque jida chacha juetinucahua baatsu' jadyatu tuna merequira acuare. ²⁸ Jadya bahue juatsutu euji que dyaque cahuaiticuare, yanacana chipiru ijehue pujija ebacaniju chine juya baatsu. Cahuaicititsutu nubicarama jucuare. Tuja ebacuaque icueneque cahuaicititsu nubicarama juya baatsutu esirique cuinanaticuare. 'Nubicue, ebacua. Baeticue ecue jau. Juetinucahua rique' jadya tujatu aticuare. ²⁹ Turatu etataque jadya atsacuare: 'Aijama. Miquemi bahuedya eje uma mara era merehuaque eje bucha tsehue ama, ni micue yana acarama tsehue ama. Jadya ama bucha micue ique ni eje tupu etya uhuisha jabacua ecue iyuhueda cuana tsehue chine juyaque ara ishucue. ³⁰ Jeeque micue bacuaratu yanacana ijehue ahua micue chipiru epuna jidama cuana tsehue. Iyacu tuque juetihua tuquemi tuja ishucue iyemerehua huaca tseridaque chine juyaque ara ishucue' jadya tujatu etataque atsacuare.

³¹ "Ecue ebacua, mique taa mi eatsehuedya. Dutya ecue aniyaque tu micuicuedya. ³² Iyacu taa chine dyaque jida, pureama jadya nejura. Micue jau, era emaju bucha bayaquetu chacha juetinucahua. Era eaputa bucha ecue inime juyaqeri juetinucahua' jadya tujatu ebacuaque acuare, —jadya tuna Jesúsra cuejacuare riyaque cuatsabiji.

(Ri yaque cuatsabiji tsehue ecuana Jesúsra bahuityacara aya ecuana ejeque jucha aridaque inime

cacuaretiyaju Yusu queja catyatiyaju ecuana pureama juishu.)

Mayuruma jidamaque cuatsabiji eque bahuityacuareque

16 Jesusratu tura mepehua cuanaque bahuityanucacuare:

—Peya micuana cuatsabiji cuejaya micuana bahuitya ishü. Anicuaretu chipirudaque, tuja mayuruma jadya. Umae cuanaratu cuejacuare tuja patrón: “Micue mayurumaratu yanacana quemidya jutidya aya micue chipiru, ai jida tsume aishu ama”.² Jadya bacatsutu tuja patrónra ihuaracuare mayuruma. “¿Eje buchique tunara jadya cuejaha? Bamerecue ique mira ecue mere puji cuanaja manu cuana huenechine cuanaque. Amenami ecue mayuruma jujacaya”, jadyatu chipiru metsera acuare.³ Jadya bacatsutu mayurumara inime tupucuaré: “Amena taa ecue mere aijama. ¿Eje bucha anie juya? Casadama taa ique tee mere juishu. Bisuya taa ique tsujema bacabaca juneni ishü. ⁴A, adebahua tuque era. Adebahua tuque ique rehuaque cuinanahuaju aira batsayaque”.

⁵“Jadya juatsu tujatu ihuaramerecuare peadya peadya mere puji cuana manuqui cuanaque. Icuene junahuaque tujatu bacaduracuare: ‘¿Eje uma tuque micue manu aniya ecuana merequi juchine queja?’⁶ Turatu quemitsacuare: ‘Umada tuque ecue manu aniya, pushi mil litro jujeri olivo tseri’ jadya tujatu acuare. ‘Jeedyá micue manu quirica. Era tuque micue manu aniyaque jaquechine. Amena tuque micue aniya patya jaque camadya, beta mil litro jujeri olivo tseri camadya. Anibutecue. Ebajarara iyacuaque manu quiricaju micue ebacani huenece’.

⁷“Jadya juatsu tujatu bacaduracuare peya: ‘¿Eje umatu micue manu aniya?’ jadya tujatu acuare. ‘Umada tuque ecue manu aniya. Cien arrobas trigo tupu tuque ecue manu’ jadya tujatu acuare. ‘Jeedyá micue manu quirica. Era tuque micue cuarechine micue manu. Micue icuene juchine tupu ama tuque micue manu, quimisacarucu tunca arrobas trigo tupu camadya’ jadyatu mayurumara acuare.

⁸“Chipiru metsequetu bahue jucuare mayuruma ai juhuaque. ‘Arepá tura ique ijahue ahua ama bucha, tuquetu dyaque inime adebabada. Aniyatu umada tuque rehuaque cuinanahuaju tuque batsaqui cuanaque’ jadyatu tuja patrón jucuare, —jadya tuna Jesúsra cuejacuare.

(Jesusratu jadya quisarati acuare. Yusu adeba baecua cuanaquetu dyaque bahue tunaja chipiru tsume; Yusuja cuanaque bacue jadya ama jadique.)

⁹Jesúsra tuna bahuityanucacuare:

—Pusha amadya micuana cuejaya. Peya cuana tsehue jida juishu cabamereti ishü jadya micuanaja chipiru netsumecue. Micuana jadya juyaque juatsu, micuanaja chipiru terehuaju micuana jida batsatabuque micuana maju baecua anidiruyaju.

¹⁰“Ejera ni peya tuja riya piji aniya tsehue ijahue aya ama, tumbaedyá tujatu jetiama tsehue ijahue aya

ama ni ejeque. Ejera ni riya piji tuja aniya tsehue ejeque ijahue aya, tumbaedyá tujatu jetiama anitsu ijahue eau.¹¹ Micuana ni baecua riyaque yahuaju chipiru tsume, tume taa micuana ni aira buchique Yusu jaque ai narumereya ama.¹² Micuana ni baecua peyaja ai naru, tume micuana yuneri cuitadya baecua micuana jaque cuita ai canaruti.

¹³“Ni ejera buchiquetu emereu ama beta patrón. Jadya jucara juyaque juatsu, tuque micuana, peya ujeu, peya bacue iyuhueda jadya jutidya ebau. Peyatu nijuta ducuta jadya tsehue emereu, peya bacue merecarama tsehue. Eje bucha anie ni micuana juma Yusuja biji eque, micuanaja ishü cuita camadya chipiru radanitya jadya juatsu, —jadya tujatu ecana acuare.

¹⁴Fariseo cuanatu chipiru dyaque iyuhueda baqui jucuare. Jadya bacatsu tunajatu Jesús ijaribacuare.

¹⁵Jadya juatsu tuna Jesúsra acuare:

—Micuanajatu inime juya micuana jida, inime cujisha baecua bucha. Yusura micuana yuneri eje buchique adebaya. Yusu adeba baecua cuanara iyuhueda bayaquetu Yusuja ujeu, —jadya tujatu ecana acuare.

Cacuatsashati, iyacuaque jidaque quisarati jadya

¹⁶Jesúsra tuna bahuityanucacuare:

—Yuequedyá yahua nanada equedyatu ecuita cuanaja inime juhua, Moisésja cacuatsashati equedyá anitsu, Yusu equeque quisarati cuejaqui cuanara cuejaya eque anitsu, Yusu queja judiruya jadya datse. Juan Ecuita Cuana Utsaquira micuana cuejacuaredya micuana inime cacuareti ishüque. Tuequequedyatu cuejatanahua Yusura eje bucha narue dutya ecuita cuana ayaque. Jadya bacatsu datse tuna dutya jujeri eje buchadya judirucara juya Yusu queja.

¹⁷“Yusura cuatsashahuaquetu ni eje tupu apupashatanaya ama. Peadya quisarati tujatu bareya ama. Barepa, yahua jadya aniya jari tuputu cacuatsashati cuana tere nime ama.

Ecaquemitique cajacatitaquiquemaque Jesúsra bahuityacuareque

(Mt 19.1-12; Mr 10.1-12)

¹⁸“Micuana ni micuanaja huane neri tsehue cajacatitsu, peya epuna tsehue caquemitinucaya, tume micuana cajuchatiya. Yusuja yatucaju tuque micuanaja icueneque epuna huane neri jaridya, ai tupujuque ama. Micuana ni epuna peyaja eijehue tsehue caquemitiya, tumbaedyá micuana cajuchatiya, peya jaque micuana micuana jaque eata aya tibu, —jadya tujatu ecana acuare.

Ecuita chipirudaque, Lázaro jadya jucuareque

¹⁹Jesúsra tuna bahuityanucacuare:

—Anicuaretu ecuita chipirudaque. Ejutuqui jidaquetu dutya huecaca jutucuare. Dutya huecacatu chine mere jetiama earaqui bajeje, araara jadya jucuare.²⁰ Anicuaretu nrecadaque Lázaro bacani. Dyaque ujejedaquetu jucuare, tuja ecuita pusese camaque. Chipiruda-

ja etare tsecuetu yahuaju anianini bahue jucuaire. ²¹ Eje buchadya jequecara jadyatu jucuaire chipirudaja ara cuesusu tsehue, arabishatsu ijehueya tsehue jadya. Casadama cuita tibusu chapa cuanara tuja pusesa cuana tecueyaju eje bucha camuyatitiqui ama jucuaire.

²² "Chamacamatu ecuita nerecadaque majucuaire. Barepa juque Yusu tsahuaqui cuanaratu dujucuaire Yusu queja ecatyati cuanaque majutsu judiruyaju, ecuanaja ebaba emuibaque Abraham peque. Chipirudaquetu tumebaedya majunucacuarenya. Papatanacuarenya tuque. ²³ Chipirudaquetu majutsu tuyu judirudya ijahuaja etiquiju jucuaire, Yusu adeba baecua cuanaque judiruyaju. Dyaquetu canerecaticuare. Dyaque nerecada juyara tujatu japada equera bacuaire Abraham, Lázaro jadya. ²⁴ Tumetu chipirudaque quiquecuare: 'Nerecabacue ique, tata Abraham. Cuadishacue Lázaro; paje, pabana tura ique. Tuja emetuc sapara huitu enaju mutyatsu tura ecue yana riyá piji cuita pabaneshana. Dyaque cuita taa etiquiju canerecaticuare' jadya tujatu Abraham acuare. ²⁵ Abrahamratu acuare: 'Tata, adebacue. Chacha jariju tuque micue anihua dutya ai mira bijida bahuaque. Lázaro bacue dyaque nerecada jucuaire. Iyacuatu Yusura casaturaya. Mique bacue nerecada juya. ²⁶ Jadya juatsu jipidya ama tuque Lázaro cuadishaya ama miaqueja. Aniyatu ecuaña patya emajaca dyaque dedaque. Ni ejequedyá jutidyatu ecarequetiu rehuaque tuqueja ni tuhuaque requeja' jadyatu Abrahamra acuare chipirudaque.

²⁷ "Jutaquiju nerecabacue ique. Cuadishacue Lázaro ecue etataja etareju aniya cuana queja, tata. ²⁸ Tuhua tuque ecue aniya pishica ecue eatsehuequi cuanaque. Cuadishacue. Pacuejatitu ecana. Chacha jarijudya ecana inime cacuaireti. Tuna inime cacuairetiyaque ama juatsu, tuna tuna dyadi rehua canerecati ishujú juetibuque' jadya tujatu Abraham acuare. ²⁹ Abrahamratu acuare: 'Tunajatu aniyadya eje bucha bacae aishuque Moisésra, Yusu equeque quisarati cuejaqui cuanara jadya huenequereque. Cuejayaju bacatsu tuna paejene tumeque ehueña cuanaque'.

³⁰ Jadya ajaju bacatsutu chipirudara acuare: 'Tata, bacaya ama tunaja tuque. Ejeneya ama tunajatu ehueña cuanaque. Ejeque emajuque chacha netitsuranucuhuaque batsatsu camadya tuna inime ecacuaireti' jadyatu chipirudara acuare. ³¹ 'Bacacarama ni tuna aya Moisésra, Yusu equeque quisarati cuejaqui cuanara jadya huenequereque cuanaque, bacaya amadya tunajatu ni ejeque emajuque batsatsu' jadyatu Abrahamra acuare. Jadyatu jucuaire beta ecuita ecatsé, —jadya tuna Jesúsra cuejacuaire.

Peya cajuchatishaquique dyaque canerecatibuqueque
(Mt 18.6-7, 21-22; Mr 9.42)

17 Jesusratu acuare tura mepehua cuanaque:
—Majuma jari tuputu ecuita cuana cajuchaticara jujacaya ama. Dyaque nerecadatu jubuque ejeque cajuchatishayaque. ² Dyaque jidatu majutaqui juhua ebacua cuana bucha cuanaque ca-

juchatishaquique. Dyaque jidatu tumu erieri ishuque epituju risitsu bei dyaque dedaju ijehuetiqui juhua, ejeque cajuchatishamaque maju ishú. ³ Necanaruticue eje bucha juyaque.

"Micuana tsehuequi buchique ni cajuchatiya, nereda neacue. Tuque ni inime cacuairetiya, nenerecabacue; nenime aputacue tura eje bucha ahuaque. ⁴ Ita taa nebacue. Ejera micuana jidama ajacama eau, jadya apidya jadya ama, tura micuana jidama juatsu eau, 'Inime cacuairetihua. Cahuairetishanucacarama mique anucaya' jadya anajacama eau. Jadya tura ayaju, nenerecabacue; nenime aputacue tura eje bucha jidama ahuaque, —jadya tuna Jesúsra acuare.

Jesús queja catyatitsu, ecuanaja casa aniyaque

⁵ Jesúsra mepehua cuanaratu Jesús isaracuare. ("Ecuadishata cuanaque" bacani tuna jucuaire.)

—Tsahuacue ecuaña miaqueja dyaque nimee juaje ishú, —jadya tunajatu acuare.

⁶ —Micuanara ni ejenequena juhua, paju era micuanaja ataquimaque aishu casa tyayaque, ni aidya jutidya tuque micuana ataquima ama ebau. Jeeque acui morera bacani ni micuana eau: "Mutsautanacue rehuaque. Netisicuaque ena cuanaja ecuaque patya", micuanaja yana equedyatu ejuu acui, era casa tyahuaque ejenehuaque juatsu.

Mere puji que eje bucha jutaquique

⁷ "Jadya micuana cuejaya. Ecuitaja eani tuja mere puji tuja tee cuanaju, jadya ama juatsu, huaca cuana naruquique. Tuja mere puji chinequeja piji tuja mere juque juetiyaju, ¿tuja patronratu canajara ishú emajaca yume tyatsadya eau? 'Anibuteque. Canajarabaca, araara jadya juatsu canajaracue' jadya tujatu eau? ⁸ ¡Ajama! Jadya eauque, 'Nahui caticati jadya juatsu ique ararayaju merenacue. Ique amena juhuaaju piisi mique araracue' jadya tujatu eau. ⁹ Patronratu yusurupai aya ama tuja mere puji, tura cuatsashahuaque camadya ahua tibu. ¹⁰ Tumebaedya micuana, Yusura amereyaque atillatsu muita ishúque bucha necabacatieme. 'Ecuánaratu ecuanaja ai ataquique camadya ahua' jadya necuejacue Yusu, —jadya tuna Jesúsra acuare.

Jesúsra pusesera ririshayaque peadya tunca ecuita cuana chachanecuaque

¹¹ Jesúsra Jerusalénju cuayaque cueticuaire Samaria, Galilea jadya eque. ¹² Peadya epu achaacha equetu cueticuaire. Cueticuyajutu peadya tunca ecuita pusesera ririshaya cuanaque tuque tsurutsa ishú cuinanacuare. Japajapa piji tuna netinaticuaire. ¹³ Netinatitsu tuna quiquecuare:

—Nerecabacue taa ecuaña, Jesús. Chachanecue ecuaña, Ebahuityaquique, —jadya tunajatu acuare quique eque.

¹⁴ Jesúsra tuna baatsu isaracuare:

—Pae queja necabamereticue, micuana chacha juhuaque tuna bahue juishu, —jadya tuna Jesúsra acuare.

Tume cuayaquedya jutidya tuna chacha jucuare Jesúsja casa eque. ¹⁵ Peadya camadyatu yudijidya cuanuca jucuare Jesús queja, chacha juhua cabatitsu. Cuanucayaquetu juajecuare:

—Dyaque jida taa Yusu! —jadyatu quique eque juajecuare.

¹⁶ Jesúsja yacuajutu nuyunaticuare. Ebutsequini tsehue yahua tseraya tuputu huipuchitanacuare.

—Yusurupai mique aya, mira chachanehua tibu, —jadya tujatu Jesús aticuare.

Jadya yusurupai atietu ecuitara cuanucatsu acuare, arepa tuque samaritano juya ama bucha. Puscurucu israelita cuana bacue yudijidya cuanuca jucuare ama Jesús yusurupai ara.

¹⁷ —Peadya tunca ecuita taa tuque chachanehua. ¿Are peya cuana? ¿Puscurucu taa tu bataqui ama?

¹⁸ Arepa peya yahua juque ama bucha taa ri riyaque jenucahua Yusu pureama ara. ¿Eje bucha juatsutu umae puscurucu jenucahua ama? Tuna taa tuna ecuanaja ata cuana, —jadyatu Jesús jucuare.

¹⁹ Jadya juatsu tujatu Samaria juque isaracuare:

—Netitsuracue. Dirucue. Miquemi chacha juhua, mira era eje bucha eauque pana ejene ahua tibu, —jadyatu Jesúsra ecuita acuare.

Eje bucha Yusura naruyaju jubuqueque

(Mt 24.23-28, 36-41)

²⁰ Peya huecacatu fariseo cuanara Jesús bacaduracuare:

—¿Eje bucha juyaju ecuana caadebatibuque Yusura dutya ecuita cuana riyaque yahuaju aniya cuanaque narutibuneyaque?

Tura tuna quemitsacuare:

—Yusura narutibunehujutu ejitajuque ama jubuque, ni eje bucha adebataqui. ²¹ Arepa umae cuana jadya ejuu ama bucha, “Amenari riyaque epu Yusura narutibunehua”, jadya ama juatsu “Yuqueja anape cuana queja tuque”, pusha pusha jutidya tume. Yusura narutibuneyaqueju ejitaju ama, —jadya tujatu ecana acuare.

²² Jadya juatsu tujatu isaracuare tura mepehua cuanaque:

—Ecue cuanaquetu canerecatidadibuque. Eje tupu ecue cuanaque nerecaturatayaju micuana jubuque: “Areque Jesús ECUITA rehua ecuana tsehuedya ejuu ecuana casatura ishú” jadya. Ique ejitajuque ama tuhua jubuque. ²³ “Rehuadya ri Mesías”, jadya ama juatsu “Tuhua tu Mesías”, jadya ni tu umae jubuque. Neejeneume. Necuinanaume ique sarera, ique rehua ama juya. ²⁴ Aira cuejatsu ama micuana IQUE ECUITA junanucaguaque bahue jubuque. Dutyajadyatu babahue pupipupiyaque dutya queja; jadidya ique dutyara babuque junanucayaju.

²⁵ “Icuene ique dyaque nerecada jutaqui jari. Iyacua ecuita aniya cuanara bijidamadurabuque. ²⁶ Noé aniya

patya, tuque cuaba ebariju nubima jarijutu ecuita jidama cuanaque anicuare; ni ecana Yusura nerecaturayaju canerecati ishú equihuati jucuare. Jadidyatu jubuque ique junanucahuie. ²⁷ Tume patya beru ena eque teretama jarijutu ecuita cuana anicuare tuna anietibehua buchadya jutidya. Araaraya, ijijiyi, huanequi, ahuequi jadya anie tuna jucuare Noé cuaba ebariju nubicuare tupu. Muya jutidyatu ena shumaumaque ama jueticuare, tunara ihuayaju ama. Dutya tuna huiditerecuare. ²⁸ Lot aniya patya jucuare buchadyatu junucabuque. Ecuita cuanatu anicuare tuna anietibehua buchadya jutidya. Araaraya, quemiquemiya, catyati, uhuahuaya, etare catiya jadya anie tuna jucuare. ²⁹ Lot, Sodoma juque cuinanayaque huecacatu Yusura pacacashacuare barepa juque etiqui, macana huiri cuana epacacau bucha. Dutya tuna majuterecuare. ³⁰ Jadidyatu jubuque IQUE ECUITA ejitaju junayaque huecaca. Ique junabuque ni aira ihuayaju ama.

³¹ “Muya jutidya ique junanucabuque. Tumeque huecaca tuna etare ebarucue ecamahua jepeda cuana juque ai etare ducu inaquenama butetaqui huana ishú. Teeju mere juya cuanaque ecana judirunucataqui ama etareju tunaja ai jiteque. Tuhuaquedya tuna huanaataqui. ³² Neadebacue Lotja ehuaneeque jucuareque. Tuque yudijidya cuanuca jucara juyajutu Yusura iyeacuare. ³³ Micuana ni catehuatiya eaqueja ecatyatique eiyetauju, ejetsunue ama micuana anibuque. Tume micuana majutsu ni eje tupu Yusu queja judirubuque. Micuana ni ique jiteque, ejenetsu jadya iyetaya, tume micuana Yusu quejadya anisiribuque, arepa micuanaja ecuita ririya ama bucha.

³⁴ “Ique junanucayajutu ecue cuanaque enityasicua jubuque ecue ama cuana ducuque. Beta ecatsé tuhua cuinetse cuartoju etahuiu. Ecuiquetu Yusu queja dujutanabuque. Peya bacue shanatanabuque. ³⁵ Beta epuna tuhua cuinetse eerieriu. Ecuiquetu dujutanabuque Yusu queja. Peya bacue shanatanabuque. ³⁶ Beta ecuitatu teeju cuinetse mere ejuu. Ecuiquetu Yusu queja dujutanabuque. Peya bacue shanatanabuque, —jadya tuna Jesúsra acuare.

³⁷ Jadya juya bacatsu tunajatu bacaduracuare:

—¿Eje tsunutu jadya jubuque, Ecuana Cuat-sashaquique?

Tura tuna quemitsacuare quisarati jida eadeba tsehue:

—Eju ai emajuque ririyajutu jamani cuana caradatiya aija cuejatsu ama. Tumebaedyatu jubuque ique junanucayaju. Dutya tuna bahue jubuque, aija cuejatsu ama, —jadya tuna Jesúsra cuejacuare.

Eahuemajuque, huaraji inime bajejequique jadya cuatsabiji eque bahuityacuareque

18 Jesúsra tuna bahuityacuare cuatsabiji Yusu queja tunara bacayaque tyaya tupu bacabaca ishú.

² —Anicuaretu epuju huaraji inime bajejequique.

Jadique inime tujatu ijehuecuare ama: “Eratu aya ai acara ayaque. Eratu inime baya ama Yusura, ecuita

cuanara jadya ecue ishü inime tupuyaque" jadya. ³Tumeque epuju nucadyatu anicuare eahuemajuque. Castere baecuatu jucuaré huaraji queja cuau cuau juyaque. "Tahuacue ique. Bajecue riyaque inime ique jidama aquí juhua tsehue", jadya tujatu ajacama acuare. ⁴Tsunudatu huarajira tsahuacarama acuare. Epunaratu bacajacuaré ama. Amena chamacama huarajira inime tupucuaré: "Mui baecua tuque ecue Yusu, ni ejequedyá jutidyá. ⁵Jadya ama bucha, pat-sahua tucue era, tuque eaqueja jejaca ishü. Jējuedyá jutidyari ejuu. Amena tuque bacacarama aya", jadyatu huaraji jucuaré. Jadya bajetetu huaraji jidama cuitara acuare inime, —jadya tuna Jesúsra acuare.

⁶Tuequedyatu Ecuana Cuatsashaquique Jesús jucuaré:

—Bachua micuana huaraji jidamaque jucuaréque cuatsabiji. ⁷Butsee tumeque huaraji jidamaratu tsahuacuare eahuemajuque tuaqueja cuau cuau jucuaréque. Yusuratu tsahuayadya tuja cuanaque, huecada tupu meta tupu jadya tuaqueja bacabacaya cuanaque. ¿Quemitsa ishü tsunutaya bucha tuque micuana baya? ¡Ajama! ⁸Pusha amadya micuana cuejaya. Tuquetu tsunutaya ama tuja cuanaque tsahua ishü. ¿IQUE ECUITA junanucahuajutu riyaque yahuaju anibuque tunara bacayaque yuneri cuitadya Yusura tyayaque ejenequi cuanaque? —jadya tujatu ecana acuare.

Fariseo, enaruquiya ishü chipiru tsuje bacaquique jadya cuatsabiji eque bahuityacuareque

⁹Tuhuatü jucuaré umaé peya cuana bijidamaduraqui cuanaque, tuna dyaque jida bucha cabatiya cuanaque. Jesusratu cuejanucuaré riyaque cuatsabiji, tuna adébamere, huecasha jadya aishü.

¹⁰—Anicuaretu beta ecuita ecatse. Peadyatu fariseo jucuaré. Peya bacue enaruquiya ishü chipiru tsuje bacaquique jucuaré. Fariseojatu inime jucuaré, peya cuana bucha ama tuque cuita camadya dyaque jidaque bucha. Cuacuare tatse Yusuja etareju Yusu tsehue quisaratira. ¹¹Fariseotu netinaticuaré ejitaju dutyaja peta ishü. Netinatitsutu Yusu tsehue quisaraticuaré. "Yusu, yusurupai mique aya; mira ique peya cuana bucha dyaque jida tuyu iyahua. Ique chiri baecua ni ique jidama ni epuna metsequi tsehue eani. Yusurupai mique aya, yumeque enaruquiya ishü chipiru tsuje bacaquique jidamaque buchique ama ique. ¹²Dutya badiju quimisacarucu huecaca arama quibeti bahue mique era muiyaque cabamereti ishü. Jetiama mique tyabahue ecue chipiru, ai ecue aniya cuanaque. Peadya tunca ecue aniyaque, mique peadya tyabahue micue ishü, —jadyatu fariseora Yusu acuare.

¹³"Ecasumitiuque, enaruquiya ishü chipiru tsuje bacaquique bacue jucaquidyá jutidyá cabaticuaré. Ecuita cuanaja ijacaju amatu Yusu tsehue quisaraticuaré. Bisutsu tujatu petacarama acuare ebarucue queja. Yacuatu camiriticuare tuja juca aniyaque caadabatitsu. Jucuaré: "Nerecabacue taa ique, Yusu. Ique juca aridaque. Apupashacue ecue juca cuana" jadya tujatu

Yusu acuare. Yusu tsehue quisarati jadya juatsu tatse dirucuaré tatseja etareju. Jadya tatse jucuaré.

¹⁴"Yusuratu apupashacuaré enaruquiya ishü chipiru tsuje bacaquija juca cuana, fariseo jaque bacue aijama. Jeeque micuana cuejaya. Yusuratu dyaque inime metse cabatiyaque aishü ama amereya. Aishuque ama cabatiyaquetu dyaque inime metse Yusura amereya, —jadya tuna Jesúsra acuare.

Jesúsra "Yusura jida panaru ebacua cuana" jadya acuareque

(Mt 19.13-15; Mr 10.13-16)

¹⁵Tumetu umaé ebacua cuana etata cuanaquera Jesús queja dujubarecuare.

—Emetucu micue iyacue ebacua cuanaja iyuca dyaque. Bacacue ecana Yusu queja, tuja ecana jida naru ishü, —jadya tunajatu Jesús acuare.

Jesúsra mepehua cuanara tuna jadya baatsu, nereda jutidyá atsabarecuare ebacua cuana tsehue cuacuare cuanaque:

—Nepereume Jesús, —jadya tunajatu ecana acuare.

¹⁶Jesusratu ihuaracuareadya tuaqueja ebacua cuana.

—Pajedyá ebacua cuana eaqueja. Necuadishaume ecana eaquejaque. Esiri cuanaque camadya ama, tumbaedyá tuna dyadi tuna Yusu jaquedyá. ¹⁷Pusha amadya micuana cuejaya. Yusura dutya naruhaju tuaqueja judirucara juya cuanaquetu era cuatsashaya eque jutaqui ebacua cuejataquique bucha, —jadya tuna Jesúsra acuare.

Ecuita chipirudaque Jesús tsehue quisaraticuaréque

(Mt 19.16-30; Mr 10.17-31)

¹⁸Peya huecacatu ecuita inime metsera Jesús bacaduraticuaré:

—Jidaque Ebahuityaquique, ¿ai mere tuque jidaque eau, Yusu queja judiru ishü ni eje tupu tuque jaca ishü ama? —jadya tujatu Jesús aticuare.

¹⁹Jesusratu quemitsacuare:

—¿Adebayadyami eje buchique quisarati ahuaque? ¿Eje bucha juatsu mira "Jidaque Ebahuityaquique" jadya aya? Yusu peadya camadya tu jidaque.

²⁰Bahuedyami Yusura cuatsashahuaque. "Peyaja ehuanéque micuque bucha aniquere aume. Quiyeti puji juume. Chiri puji juume. Ni ejeque buchique pusha pusha aume. Muibacue mique baquique, mique susuquique jadya". Jadyatu Yusura cuatsashacuaré béru, —jadyatu Jesúsra acuare.

²¹—Dutya riyá cuanaque cacuatsashati cuana tuque muibacuare nanada equeradya, —jadyatu ecuitara acuare.

²²Jadya bacatsutu Jesúsra jadya acuare:

—Aniya jari tuque micue eje bucha ataquique. Dutya micue aniya cuanaque catyati aticue. Catyati aatsu tyabarecué chipiru nereda cuanaque. Dutya micue ai catyati aatsu, juetinucacue eaqueja eatsehue juneni ishü. Eaquejami ecatyati; tume tuque micue eaniu Yusuja cuanaja ishü tuja barepaju aniyaque, —jadyatu Jesúsra acuare.

²³ Jadya ayaju bacatsutu dyaque peya inime jucuaire, tuja dyaque jetiama aniyaque catyati acarama acuare tibu.

²⁴ Tuja ai aniya cuanaque cashanaticarama juyaque baatsutu Jesúsra acuare:

—Jetiama ai aniya cuanaratu dyaque ibeda, masada baya eaqueja pana catyati juishu, Yusura dutya naruyaju judirutaqui juishu. ²⁵ Cahuayutu etsucuija cani eque eje bucha cuetitaqui ama. Tumebaedy a tuna tunaja ai aniyara eje bucha judirutaqui ama amereya Yusu queja, —jadya tujatu ecana acuare.

²⁶ Jadya juya bacatsutu tuque bacaqui cuanaque jucuaire:

—Chipiruda cuanaque ni Satanás quejaque quinajacameretitaqui ama cabatiya, ¿ejeque jatsutu tuaquejaque equinajacameretiu? —jadya tuna jucuaire.

²⁷ —Ecuíta ni tu tuta taca eje bucha quinajacameretie juma Satanás quejaque. Yusura peadya camadya tuna einajacamereu, —jadya tujatu ecana acuare.

²⁸ Jadya bacatsutu Pedrora acuare:

—Ecuana Cuatsashaquique, ecuana ecuana dutya cashanatihua miatsehue juneni ishú, —jadya tujatu acuare.

²⁹ —Pusha amadya micuana cuejaya. Micuana ni cashanatiya dutya micuanaja ai aniyaque Yusura eje bucha narue ayaque quisarati cueja ishú, Yusura micuana tyaya dutya micuanara riyaque yahuaju sareyaque. Tura micuana tyaya micuanara sareya tupu. Micuana ni etare cashanatiya, tura micuana tyaya eju ani ishúque. Cashanatiya ni micuana micuanaja huane, micuana tsehuequi cuanaque, micuanaja tata, micuanaja cuaa, micuanaja bacua cuana, tura micuana peya cuana queja iyuhue tsehue narumereya tunaja ata neri bucha. Micuana majuhaju tura micuana barepaju tuatsehue anishasiribuque ni eje tupu tuque jaca ishú ama, —jadya tuna Jesúsra acuare.

Jesús eje bucha iyetanae juyaque cacuejati quimisha ishú cacuejatinucuaque

(Mt 20.17-19; Mr 10.32-34)

³¹ Jesúsra tuna peya queja amaca duju acuare peadya tunca beta earacana tura mepehua cuanaque, tuque eje bucha juyaque cueja ishú:

—Micuana micuana bahuedya Jerusalénju ique cuayaque. Tuhadya ique eje bucha juya, beru Yusu equeque quisarati cuejaqui cuanara ique eje bucha judadiyaque cuejaha equedy. ³² Israelita ama cuana queja tunara inamereya. Ijahue jahue tunara aya. Ijil-lahuana, ecuedira jadya tunara aya. ³³ Ebi tsehue au, catsacatsa jadya tunara aya. Jadya aatsu tunara iyeya. Quimisha huecaca majutsu chacha netitsuranucaya, —jadya tuna Jesúsra acuare.

³⁴ Tura mepehua cuanaratu adebataqui ama bacuaire eje buchique tura cuejahaque. Yusura tunajatu inime tachicuaire, tunara Jesús quisaratiyaque eadebauju. Jadya tibu tunajatu adebacaire ama.

Jesúsra Jericó juque shuihique capetishacuareque
(Mt 20.29-34; Mr 10.46-52)

³⁵ Jesús, tura mepehua cuanaque jadya tuna Jericó epuju cajipetiajucuaire. Tuhadyatu shuihique ediji jiruru anianinicuaire cuetiya cuanaque chipiru baca juyaque. ³⁶ Ecuíta umadaque cuetiyaju bacatsu tujatu ecana bacaduracuare:

—¿Eje buchatu juya? ¿Ejequetu cuetiya? —jadya tujatu ecana acuare.

³⁷ —Jesús Nazaret juquetu cuetiya, —jadya tunajatu acuare.

³⁸ Jadya ayaju bacatsutu quiquecuare:

—¡Jesús, miquemi Yusuja Emepeque, David eque ejuracanaque! Nerecabacue taa ique, —jadya tujatu quique eque acuare.

³⁹ Jesúsra icueneritya aajeya cuanaratu nereda acuare, tuque abacasha ishú. Tuque bacue jadya ayaju dyaque jebuda quiquecuare:

—¡Miquemi Yusuja Emepeque! ¡David eque ejuracanaque mique! ¡Nerecabacue taa ique!, —jadyatu jebuda quiquecuare.

⁴⁰ Tuque juaniya tuyu junatitsutu Jesús netinaticuaire. Cuatsashacuaretu tuhua cuanaque:

—Requeja nebecue shuihique.

Shuihique tuaqueja cajipetihaju tujatu bacaduracuare:

⁴¹ —¿Eje buchami eaqueja catimerecara juya?

—Ecuatsashaquique, capetishanucacue ique.

⁴² —Amenami capetatiya. Erami capetishahua, mira era mique ecapetishauque ejenehua tibu, —jadyatu Jesúsra acuare.

⁴³ Tura jadya aya tsehuedya cuitatu capetaticuaire. Tajiaceuaretu Jesús ediji eque, Yusu pureama ayaque.

—Dyaque jida, casada taa Yusu! —jadyatu juajecuaire.

Tuhua jucuaire cuanaratu jadya baatsu Yusu pureama acuare,

—¡Ejee, casadadya tu Yusu! ¡Jidadya tuque! —jadya tuna, tuna dyadi jucuaire.

Zaqueora Jesús bacara ebari acuareque

19 Tudyatu Jesús judirucuaire Jericóju. Tuhua judiruhuaquetu cueticuaire tumeque epu eque.

² Tuhuatú anicuaire ecuita chipirudaque Zaqueo bacani. Tuquetu jucuaire enaruquija ishú chipiru tsuje bacacui cuanaja huaraji. ³ Jesús pa cuetiya jadya bacatsu tujatu bacara ebari acuare. Tuque ecuita barudama juya tibu, tujatu eje bucha petataqui ama bacuaire ecuita cuana ducu netiyara. ⁴ Tsajajaajetsutu icuenereta tsuranati jucuaire acui sicómoro bacaniju, japadama cuetiyaju Jesús batsacara aatsu. ⁵ Jesusratu tueque cuetiyara bajiyudirucuaire ebarucue. Bajiyutsu tujatu bacuaire acuiju tsuratsu yaaju juaniyaju. Baatsu tujatu isaracuare:

—Bandía, Zaqueo. Buteque ebararara. Ique micue etareju riyaque huecaca nubidiruya, —jadya tujatu Zaqueo acuare.

⁶Jadya ayajutu Zaqueo ebajarara butecuare. Jida inime tsehuetu Jesús batsacuare, tuja etareju nudyatsatsu. ⁷Zaqueoja etareju nubiya baatsutu tuhua jucuare cuanaque Jesúsja ishú quisaratitibunecuare, tuque enaruquija ishú chipiru bacaquija etareju nubiya baatsu.

—Ita nepetacue. Jesússtu nubitihua ecuita jucha aridaja etareju, —jadya tuna jubarecuare.

⁸Zaqueotu juneticuare Jesúsja yacuaju.

—Tyaya tuque nrecada cuanaque patya jaque dutya ecue aniyaque, Ecuana Cuatsashaquique. Era tuna eje uma ijahue acuare. Ecue tsuje bacataquique dyaquedya tuna tsuje bacabanicuare, enaruquija ishú chipiru sitayaque. Era peadya peso chirihuaque tuna pushi peso cuaretyau abareya, —jadyatu Zaquerora acuare Jesús.

Jadya cacuejatietu jucuare tuque jidama juhuaque, tumbaedyá inime cacuaretihuaque.

⁹Tudyatu Jesúsra acuare:

—Berutu Abraham Yusu queja nimee anicuare. Jadidyari riyaque ecuita tuque eque ejuracanaque Ijahua quejaque quinajameretihua tuque eaqueja catyatihua tibu. ¹⁰Ique riyaque yahuaju junahua Yusu adeba bae-cua cuanaque sarera tuna Ijahua quejaque inajacamerera jadya, uhuisha cuji eju bucha cuanaque, —jadyatu Jesúsra acuare.

Chipiru umanashaqui cuanaque cuatsabiji eque bahuityacuareque

(Mt 25.14-30)

¹¹Jerusalén japadama juajeya cabatitsu tunajatu peadya peadyaja inime jucuare.

—Masadama ni tu Jesús huaraji dyaque casadaque ejuu riyaque yahuaju, —jadya tuna jucuare.

Jadya tibudya tuna Jesusra cuejacuare riyaque cuatsabiji inime yunerique ama bajeje ishú.

¹²—Anicuaretu ecuita dyaque inime metse eque ejuracanaque. Peya yahuaju japada cuacaruquetu jucuare, ecuari bacanisha ishú, jadya aatsu tuja yahuaju dirunuca ishú. ¹³Cuinanama jarira tujatu ihuaracuare peadya tunca tuque merequi cuanaque. Tyabarecuare tujatu ecana peadya peadya ficha cuana chipiru tsuje aridaque. “Ique juneniya jari tupu jeeque chipiru tsehue quemí quemí, catyati jadya nejucue. Neumanashacue ecue chipiru,” jadya tujatu peadya peadya cama mere puji cuana abarecuare.

¹⁴“Tuja epuju cuanaratu ujeu bacuare.

Cuadishacuare tunajatu icuene ecuejaquique tuque cuayaque epuju. ‘Bijidama tuque ecua baya jeeque ecuita ecuanaja ecuari juishu’ jadya tunajatu cuejamerecuare. ¹⁵Japada cuaatsutu ecuari bacanishatanacuare. Jadya juatsutu juetinucacuare tuja epuju. Juetinucatsu tujatu ihuaramerecuare tuja mayuruma. ‘Ihuaramerecúe era cuayara chipiru tyaquenacuare cuanaque. Bahue jucara juya tunara chipiru eje bucha acuareque, eje uma tuna umanashacuareque’ jadya tujatu acuare.

¹⁶“Icuenequetu juticuare tuja yacuaju. ‘Tsumechine tuque micue chipiru mira tyacuareque. Tuatsehue tuque umanashamerechine peadya tunca ficha dyaque tsuje aridaque’ jadya tujatu aticuare.

¹⁷“Jadya ayaju bacatsutu ecuarrira acuare: ‘Jida. Miquemi jidaque mere puji. Miratu pana tsume ahua era riyá piji tyacuareque. Tume mique tyaya mere dyaque muidaque. Bacanishaya mique era peadya tunca epu cuanaju aniya cuanaque naru ishú’ jadya tujatu acuare tuja mere puji. ¹⁸Tuequedyatu peya ecuarririra yacuaju jutinucacuare. ‘Tsumechine tuque micue chipiru mira tyacuareque. Tuatsehue tuque umanashamerechine pishica ficha dyaque tsuje aridaque’ jadya tujatu aticuare. ¹⁹Jadya ayaju bacatsutu ecuarrira acuare: ‘Bacanishaya mique era pishica epu cuanaju aniya cuanaque naru ishú’ jadyatu tuja patrónra acuare.

²⁰“Jadya juatsutu peya jutinucacuare ecuarririra yacuaju. ‘Jeedya micue chipiru mira ique tyacuareque. Eracaju dunutsu tuque iyacuare. ²¹Bajida juchine mira era aputashahuaju cuana jidama eauju. Ique bahue micue peya cuana tsehue canerecabati aijamaque. Ique taa bahuedya jucuare mira ecue riyá piji aniyaque secanucabuqueque. Arepa ecuanara iruruya ama bucha, dutyadya tu micue ishúque. Arepa ecuanaradya tee cuana uhuahua ama bucha, miratu huesamereya micue ishú cuita camadya’ jadya tujatu aticuare.

²²‘Miquemi mere puji cuejataquimaque. Iyacuami bahue juya. Nrecaturaya mique era, mira quisarati ahua equedya. Adebachinemi ecue canerecabati aijamaque. Ecue ishupa dutya micuanara iruruchineque. Era camadyapa tsumehua dutya ecue ishú camadya micuanara uhuahuaque. ²³Jadya mira ejeneya tibu taa tuquemi dujuquena cuana dyadi juquena jucuare chipiru umanashaqui cuana queja. Tume taa tuque junanucatsu ecue chipiru era mique tyacuareque, tumeque chipiru eumanaque tsehue inapee aquena juhua’ jadyatu tuja patrónra acuare. ²⁴Jadya tujatu ecana acuare tuhua cuanaque: ‘Nsecacue chipiru tumeque mere puji cuejataquimaque. Netyacue peadya tunca chipiru umanashaqui juhuaque’ jadya tujatu ecana acuare. ²⁵‘Aniya tujatu peadya tunca chipiru, jadya tunajatu patrón acuare. ²⁶‘Pusha amadya micuana cuejaya. Ejeja aniyaketu dyaque tyatanabuque. Tuja aniyaque dyaquedyatu tyatanabuque. Ejera ni jidama tsumeya tuque tyatahuaque, secatabuquedya tuque, arepa riyá piji tuja aniya ama bucha. ²⁷Peya micuana cuejaya. Jadyatu juya ique ujeu baqui cuanaque, ecue naru ishú bijidama baqui juhua cuanaque. Nerisicue. Nebecue requeja. Neiyecue ecana ecue yacuaju’ jadya tuna ecuarrira acuare. Jadyatu jucuare chipiru umanashaqui cuanaque, —jadya tuna Jesúsra acuare.

(Riyaque cuatsabiji eque tuna Jesúsra huecashacuare, Yusu ecuanaja dutya casa tsehue mere-taquique tura ecua casa tyaya tsehue.)

Jesús Jerusalénju judirucuaque

(Mt 21.1-11; Mr 11.1-11; Jn 12.12-19)

²⁸ Tumeque quisarati cuejatillatsutu Jesús cueticuare tuhuaque tura mepehua cuana tsehue Jerusalénju judiru ishu. ²⁹ Emata baruda cuita ama Olivo Acui Quini bacaniju tuna junaticuare. Beta epu ecatse Betfagé, Betania jadya japadama tuna jucuare. Junatitsutu Jesúsra icueneta cuadisha acuare beta tura mepehuaque ecatse.

³⁰ —Ecuana yacua tuyu epu achaachaju necuacue. Tuhua junatitsu tuque metse banatiya burro erisique netiyaju, ni aija bucha isaanimaque. Nepisuticue. Pisutsu ecue nebecue. ³¹ Ejera ni metse bacaduraya: “¿Aishu tuque metse pisuya?” “Ecuana Cuatsashaquiratu sareya”, jadya neacue, —jadya tatse Jesúsra acuare.

³² Tudyatu cuadishahuaque ecatse cuacuare. Banaticuare tatse burro isaanimaque Jesúsra cuejahua equedya. Banatitsu tatse pisucuare. ³³ Burro pisuyaju baatsu tatse emetse cuanaquera bacaduracuare:

—¿Aishu tuque metse ecuanaja burro pisuya?
—jadya tunajatu ecatse acuare.

³⁴ —Ecuana Cuatsashaquira pari sareya, —jadya tatsejatu ecana acuare.

³⁵ Pisutsu tatsejatu dujucuare burro Jesús queja. Judirueretsu tatsejatu tatsera jutuya tsehue titecuare. Tume tatsejatu bajeje amena aatsu Jesús isaanimerecuare. ³⁶ Jesúsra isaanihuaju tunajatu jetiama tuhua cuanara tunaja jutu ishu cuanaque pijabarecuare edijiju, tuque muiyaque. ³⁷ Judirucuaque tuna emata Olivo Acui Quini jiruru. Dutya umada ecuita cuana tuatsehue ajeya cuanaque jerutibunecuare ecana pureama tsehue. Yusu tunajatu pureama acuare, Jesúsra Yusuja casa bamere ishu dutya ahuaque baatsu.

³⁸ —¿Jida paju ecuari Yusuja ebananiju jeyaque! ¡Amenatu Yusuja cahuaiti terehua ecuita cuana tsehue! ¡Arida, dyaque casada jadyatu Yusu barepajuque! —jadya tuna jubarecuare quique eque.

³⁹ Ecuita cuana ducutu fariseo cuana jucuare. Jadya quisarati bacatsu tunajatu Jesús acuare:

—Ebahuityaquique, nereda acue miatsehue cuaya cuanaque; jadya ecana paquisarati ama, —jadya tunajatu Jesús acuare.

⁴⁰ Tume tuna Jesúsra acuare:

—Ique pureama ataqui tibu tunara jadidya aya. Ecuita cuana ique pureama aqui cuanaque ni eabacashau, tume taa Yusura tumu cuana queja pureama eamereu, —jadya tuna Jesúsra acuare.

⁴¹ Amena epu aridaque japadama juetiyara tujatu petacuare epu. Petatsu tuna Jesúsra enapacuare tumeque epu ebariju aniya cuanaque nrecada judadiyaque adebatsu.

⁴² —Arepa micuanara ique iyacua pureama aya ama bucha, micuanaratu adebaya ama eaqueja catyatihuaju micuana Yusura jida ebajiyunucuaque. Areque micuana pana adeba eau. Aijama, eje bucha adebaene

tuque micuana ama. Ibecuinahuatu micuanaja ishu. ⁴³ Juetibuquetu huecaca jidamaque micuana canerecati ishuque. Micuana ujeu baqui cuanaratu tibarillabuque micuanaja epu ebari. Nityatsurabuque tunajatu mechi uyuuyu esipique micuanaja epu pana teritilla aishu. Dutya eque tunara micuana iye ishu tabutillabuque. ⁴⁴ Dutya tunara micuana iyetillabuque. Micuanaja etare cuanatu terebuque, ni peadya tumutu anibuque ama cadyaquetitsu. Arepa micuana Yusura Ijahua quejaque eje bucha quinajacameretie juishuque bahue amerehua ama bucha, tuque micuana bijidamadurahua. Jadya tibu micuana canerecatiabuque, —jadyatu Jesús jucuare ai ecuita cuana Jerusalén juque eisarau bucha.

Jesúsra catyati puji cuana Yusuja etare juque ijehuecuinatillacuaque

(Mt 21.12-17; Mr 11.15-19; Jn 2.13-22)

⁴⁵ Jadya juu jadya juatsutu Jesús Yusuja etareju nubidirucuaque. Nubitsutu dyaque cahuaiticuare, tuhua eje bucha juyaque baatsu. Jadya tibu tujatu ecana etsecueju pana ijehuecuinatilla acuare catyati puji cuana, bacabaca puji cuana jadya. ⁴⁶ Cuinanashayaque tujatu ecana jadya acuare:

—Yusuja quisarati tu jadya ehuene: “Ecue etare tu eatsehue quisarati ishuque etare bacani’ jadyatu Yusu beru jucuare”. Jadya ama bucha tuque micuana chiri puji cuana catehua ishuque cani bucha jutidya amereya, —jadya tuna Jesúsra acuare.

⁴⁷ Jerusalénju judirutsutu Jesús dutya huecaca Yusuja etareju cuau cuau jucuare, Yusuja quisarati bahuitya juyaque. Pae cuanaja huaraji cuanara, cacuatsashati bahuityaqui cuanara, epu juque huaraji cuanara jadyatu Jesús iyecara ebari acuare. ⁴⁸ Terecuare ama tunaja inime eje bucha iyemeree tuque eauque. Eje bucha eque eje bucha ataqui amatu jucuare, ecuita cuanara quisaratiyaju jida bacacuare tibu.

¿Airatu Jesús cuatsashacuare tura aya cuanaque aishu?

(Mt 21.23-27; Mr 11.27-33)

20 Peya huecacatu Jesúsra Yusuja etareju ecuita cuana Yusuja quisarati bahuityanucacuare, Yusu queja judiru ishuque quisarati cueja. Tuque jadya quisaratiyajutu junacuare pae cuanaja huaraji cuana, cacuatsashati bahuityaqui cuanaque, israelita cuanaja emuiba cuanaque jadya. ² Jipetitsu tunajatu bacaduracuare:

—¿Airami ejeque ecuitaja ataquique ama aishu cuatsashahua? ¿Aija casa tsehue tuquemi jadya aya? —jadya tunajatu acuare Jesús.

³ Jesúsra tuna quemitsacuare:

—Era micuana tumbaedyu bacaduraya. Nequemit-sacue ique. ⁴ ¿Airatu Juan cuatsashacuare ecuita cuana utsa ishu? ¿Yusura, ecuita cuanara ni taa? —jadya tuna Jesúsra bacaduracuare.

⁵ Tume tuna, tuna cama quisaraticuare:

—“Yusuradyatu cuadishahua”, jadya ni ecuana eau, tume tura ecuana ebadurau: “¿Eje bucha juatsu jatsutu tuque micuana Juanra cuejacuareque ejeneacuare ama?” jadya tura ecuana eau. ⁶ “Ecuata cuanaja ecuadishaquedya jutidyatu jucuaré”, jadya ni ecuana eau, tumetu dutya jujeri ecuita cuana ecahuaitiu ecuana tsehue. Tume tunara ecuana eiyetu tumu tsehue. Juan tunajatu Yusu equeque quisarati cuejaquique bucha adebaya, —jadya tuna cacuejaticuare.

⁷ Chamacama tunajatu quemitsacuare:

—Baecua ecuana aira Juan ecuita cuana utsa ishutu cuatsashacuareque, —jadya tunajatu Jesús acuare.

⁸ —Jutaquiju micuana era cuejaya amadya aira ique ecuitaja ataquique ama aishu cuatsashahuaque, —jadya tuna Jesúsra acuare.

Mere puji jidama cuanaque cuatsabiji eque bahuityacuareque

(Mt 21.33-44; Mr 12.1-11)

⁹ Jadya juatsutu Jesús catibutinucacuare ecuita cuana bahuitya. Riyaque cuatsabiji tujatu ecana cuejacuare, tuna bahuitya ishutu.

—Peadya ecuitajatu tee aridaque anicuare. Tee ameretsu tujatu uva uhuamerecuare. Umae ecuita cuana queja tujatu tee narumerecuare. Tura tuna acuare: “Micuanara ni ecue tee naruya, tume ecuana uva jahuanehuaju cajuquetiya micuana tsehue”. Tuna tuna endya jucuaré. Tume cuanaque bajejetsutu emechiqui cuacuare japada peya yahuaju. ¹⁰ Uva jahuane mara juetihuaju tujatu tuque merequique cuadishacuare tee naruqui cuana queja. “Cuacue ecue teeju mere juya cuana queja. Cuejaticue ecana; pacuadisha tuna ecue ishucue uva epituque”, jadya tujatu ecana cuejamerecuare. Jadya ahujatu cuacuare. Jutihujatu tee naruqui cuanara inatsacuare. Mirimiri tunajatu atsacuare. Mema tuna cuadishacuare, ni peadya uva caca tsehue. ¹¹ Jadya juhua bacatsutu emechiquira cuadishanucacuare peya tuja mere puji. Tumeque tunajatu ijahue ijahue, miririsha jadya atsacuare. Memadya tuna cuadishanucacuare, ni peadya uva caca tsehue. ¹² Tuequedyatu emechiquira cuadishanucacuare peya mere puji nuca. Tumeque tunajatu ujeda atsacuare. Ujeda aatsu tunajatu tee tibene ije-hueticuare.

¹³ “¿Eje bucha juya?” jadyatu inime tupucuaré tee metsera. ‘A, adebahua tuque era. Pacuadisha era ecue ebadua neri, dyaque iyuhuedaque. Jida tunajatu emuibatsau’ jadya datse tujatu inime jucuaré. Jadya inime tuputsu tujatu ebaduaque neri cuadishacuare.

¹⁴ Ebaduaquera jipeajeyajutu tee naruqui cuanaque jadya jucuaré tuna cama: ‘Riyaquedya ri tee metseja ebaduaque neri. Eje tupu etataque majuhujuri riyaquedya tee metse judadiya. Neiyetsara. Ecuandya emechiqui nejura’ jadya tuna jucuaré. ¹⁵ Inatsacuare tunara. Inatsatsu tuna tee juque cuinanashacuare. Cuinanashatsu tuna iyecuaré. Jadyatu tee naruqui cuanaque jucuaré, —jadya tuna Jesúsra cuejacuare.

Tume tuna Jesúsra bacaduracuare tuque quisaratiyaju bacaqui cuanaque:

—¿Eje buchatu anabuque tee naruqui cuanaque emechiquira? ¹⁶ Era micuana cuejaya. Juetitsu tujatu iyemerenubuquedya tee naruqui cuanaque. Peyadya tujatu mere puji cuana sarenabuque tee naru ishutu, —jadya tujatu ecana cuejacuare.

Jadya bacatsu tuna jucuaré:

—¿Jadya paju ama!

¹⁷ Jesúsra tuna petacuare.

—Ehuenedya tu Yusuja quisarati jadya. ¿Eje buchique tume?

“Tumu etare puji cuanara tsumecarama acuarequetu tumu dyaque saretanayaque judadicuare.

Ecuana Cuatsashacuiratu dyaque saretanayaque amerecuare”, jadya tu ehue.

¹⁸ Ejeque chicatsu tumeque tumu dyaque rihuiyaquetu dyaque ujeda catibuque. Tumu ni ejeque dyaque rihuiya muru tujatu tyanatsu amerebuque.

(Riyaque quisarati eque tuna Jesúsra bahuityacuare. Tuque bijidamaduraqui cuanaquetu dyaque nerecatu-ratanabuque.)

Yusu tuja ishucuedya tyataquique

(Mt 22.15-22; Mr 12.13-17)

¹⁹ Riyaque cuatsabiji bacatsutu pae cuanaja huaraji cuana, cacuatsashati bahuityaqui cuanaque jadya dyaque cahuaicuaré, tunara cuitadya Jesús bijidamadurahuque caadebatitsu, mere puji cuanara tee metseja ebaduaque bijidamadurahu bucha. Eje buchadya inacara datse tunajatu acuare Jesús. Eje bucha jadya ataqui ama tunajatu bacuaré, ecuita cuana ecahuaitiuque adebatsu. Jutaquiju tunajatu in- acuaré ama tumeque ura cuitadya, ecuita cuana mu- batsu.

²⁰ Jadya juatsu tuna quinimeticuaré Jesús ina ishutu. Inime bajejetsu tunajatu eje uma ecuita cuana Jesús queja cuadishacuare.

—Necuacue Jesús isarara. Jida tuyu cuita bucha necabamereticue. Jadya juya ama bucha enaruquija ishutu jidama nequisaratishacue. Tume inatsu nedujura huaraji cuana queja, —jadya tunajatu ecana cue- jamerecuare.

²¹ Jadya juatsutu tumeque ecuadisha cuanaque cuacuare Jesús isarara.

—Ebahuityaqui, ecuana ecuana bahue mique jida, tuyuque. Miratu bahuityaya Yusuja inime eque ani ishucue, ni ejeque buchique mubatsu ama. Micue ishutu ecuita dutya tupu. ²² Jutaquijudyu ecuana cue- jacue. ¿Ecuana cacuatsashati eque, tuque ecuana ecuana naruquique Roma juque tsujetyataqui, tsujety- ataqui ama ni taa? —jadya tunajatu Jesús aticuare.

²³ Jesusratu adebacuaredya tunara jidama inime tupuya tsehue jadya bacaduratiyaque.

²⁴ —Nebamerecue ique ficha enaruquija chipiru tuque tsujetya ishucue. Papeta era. —jadya tujatu ecana acuare.

Petatsu tuna Jesúsra bacaduracuare:

—¿Aija ebutsequini ri riyaque fichaju eiya? ¿Aija ebanani ri rehua ehue?

—Enaruquique muidaque César bacani jaque tume, —jadya tunajatu quemitsacuare.

²⁵ —Jutaquiju netyacue enaruqui César tuque tyaihuquedya. Yusu netyacue Yusuja ishuhuedya, —jadya tuna Jesúsra acuare.

²⁶ Yuhua dutyaja yacuaju tunajatu eje bucha jidama quisaratishataquima bacuare. Anajacatacuare jutidya tuna tuque jadya caquemitsatihuaaju bacatsu. Abacatanacuarenya jutidya tuna.

Emaju cuanaque netitsuradadinucabuqueque

(Mt 22.23-33; Mr 12.18-27)

²⁷ Tumeque huecaca nucadyatu saduceo cuanara Jesús baticuare. Tunaradyatu ejeneacuare ama emaju cuanaque netitsuranucayaque. Junatitsu tunajatu Jesús isaranaticuare:

²⁸ —Ebahuityaquique, Moisésra taa tu riyaque cuatsashacuare. “Ejeque ecuita ni majuya cabacuati maque, tuatsehuequiquetu caquemitinucataqui eahuemaju tsehue, tuatsehue cabacuati ishuhue, icueneque ebacua emajuja ebacuaque bucha ishuhue”, jadyatu Moisésra cacuatsashati hueneacuare béru. ²⁹ Riyaque cuatsabijimique ecuita aya; ijariba ishuhue jutidya tu ecuita emajuque chacha netitsuranucaya jadique. Anicuaretu ecuitaja pacarucu ebacua cuanaque. Icueneque ebacuaquetu caquemiticuare. Huanequi juu jadya juatsutu majucuare bacuamaque. ³⁰ Majuhuaajutu ejuque beta ishuhue caquemitinucacuare eahuemaju tsehue. Beta ishuhuetu tumbaedyu majunucacuarenya bacuamaque. ³¹ Quimisha ishuhue ejuquetu caquemitinucacuare eahuemaju tsehue. Tumbaedyatu junucacuare. Bacuamaquedyatu majunucacuare. Jadya ecana jubarecuare; pacarucudyatu tumeque epuna tsehue cama ecana caquemititsu majutibecuare bacuamaque tere. ³² Tumeque nrecadaque epunatu pacarucu ahuee juhuaque majucuaedyu, yahue cuanaque majuterehuaaju. Jadya tuna jucuare.

³³ “Ecuanaami bacaduraya riyaque. Yuneridya ni majuya cuanaque chacha netitsuranucabuque, ¿ejeja ehuanquetu jubuque chacha netitsuranucatsu, riyaque yahuaaju tuque pacarucu ahuee juhua tibu? —jadya tunajatu Jesús bacaduracuare.

³⁴ Jesúsra tuna quemitsacuare:

—Micuana micuana cuji juya. Riyaque yahuaaju camadyatu ecuita cuana caquemitiya. ³⁵ Yusuja yacuaju judirubuque cuanaque netitsuranucatsu tuna caquemitinucabuque ama barepaju. ³⁶ Maju, netitsuranuca jadya juatsu tuna majunucanime ama. Barepaju Yusu tsahuaqui cuanaque tuna caquemiti baecua. Jadidyatu emaju cuanaque; netitsuratsu tuna caquemitinucabuque amadya. Yusu jaque tuna jubuque; tuja ebacua cuanaque tuna jubuque. ³⁷ Yuneridyatu emaju cuanaque chacha netitsuranucabuque. Neadebacue Moisésra cuitadya hueneacuareque, acui huija jujuyaque murutayaque ama tura hueneacuareque. Yusu-

tu jucuare: “Ique Ecuatsashaquique. Ique Yusu, Abraham, Isaac, Jacob jadyara iyacua muiyaque”. ³⁸ Yusu tu chacha cuanara muiyaque, emaju cuanara ama. Jadya tibudya yuneridyatu Abraham, Isaac, Jacob jadya ecana enetitsura. Yusuratu dutya enetitsura baya, arepa majuhua ama bucha, —jadya tuna Jesúsra acuare.

³⁹ —Dyaque jidami caquemitsatihua, Ebahuityaquique, —jadyatu acuare umae cacuatsashati bahuityaqui cuanara.

⁴⁰ Tumetu saduceo cuanaja inime terecuare bacaduranuca ishuhue.

Mesías tu ecuita camadya ama, ecuita cuana dyaque inimequique

(Mt 22.41-46; Mr 12.35-37)

⁴¹ Jesúsra tuna jadya cuejacuare:

—Micuanajatu inime juya: “Mesías Yusuja Emepequetu ejeque ecuita baedya jutidya judadibuque, David eque ejuracanaque jubuque tibu”. Micuana micuana cuji juya, jadya inime tuputsu. ⁴² David cuitadyatu bahue jucuare Mesías ecuita camadya ama jubuqueque, ecuita cuana bucha dyaque inimequique. Salmos quiricaju tuque ecuanaja Davidra cuitadya hueneacuareque eisara:

“Yusuratu Ique Cuatsashaquique jadya cuejacuare: ‘Anibutecue ecue jida eque amaca muitaj ishuhue, ⁴³ era mique ujeu baqui cuanaque dutya jahue atillaya tupu, Ique Cuatsashaquique’” jadya.

⁴⁴ “Davidradyatu Mesías ‘Ique Cuatsashaquique’ jadya acuare, arepa tueque ejuracanaque ama bucha. Yuneridya cuitadyatu Mesías ecuita jutidya ama ejuu; ecuita cuana bucha dyaque inimequiquedya tume, —jadya tunajatu ecana acuare.

Jesúsra cacuatsashati bahuityaqui cuanaque jidama juyaque ejitaju acuareque

(Mt 23.1-36; Mr 12.38-40; Lc 11.37-54)

⁴⁵ Jesúsratu isaracuare tura mepehua cuanaque, jeticuaitara bacayaju ama.

⁴⁶ —Necanaruticue cacuatsashati bahuityaqui cuana tsehue. Tuna aniya bae neaniume. Tunaratu una junudaque jutuya, peya cuana queja Yusu adebaqui jadya cabamereti ishuhue datse. Epu patya eque cuetiyaju tuna dyaque muida tsehue isaratacara juya. Caradati ishuhue etareju cuaatsu tuna muida cuanaque anibahueju anibutetiya. Chine cuana ishuhue araaratayaju cuaatsu tuna emuita cuanaja eaniqui cuanaju cama tuna eaniqui metsene juya. ⁴⁷ Arepa ecana eahuemaju cuanaque tsahuaya bucha cabatiya ama bucha, yuneridya cuitadya tunajatu eahuemaju nrecada cuanaque tunaja ai aniya cuanaque secatillaya, tuna tunaja etarejuque cuitadya ijehuecuinaya tupu. Yusu tsehue quisaratiaque tuna tsunuda quisarati bahue dutyaja ijacaju, tuna queja “Yusu adebaqui cuita rena”, jadya catimere ishuhue datse. Yusura tuna dyaque nrecaturabuque, —jadya tuna Jesúsra acuare.

Eahuemaju nrecadara chipiru Yusuja ishu iyacuareque
(Mr 12.41-44)

21 Jesústu juanicuare Yusuja etareju. Petacuare tujatu chipiruda cuanara Yusuja ishu chipiru cajuju ishaya. ² Tumebaedyatu banucacuare eahuemaju dyaque nrecadara beta ficha piji cobre ishahiyaju, tsuje aridaque ama, ai tsujequi cuitaque ama. ³ Baatsutu Jesús jucuare:

—Pusha amadya micuana cuejaya. Yusuratu dyaque tsuje arida baya epuna nrecada eahuemajura ishahuaque, chipiruda cuanara jetiama ishahuaque bucha ama. ⁴ Tunaratu ishahua tunaja anidadiyaque jutidya. Jeeque epuna nrecadara taa tyatillahua tuja dutya aniyaque piji, tuja ai caquemiti ishu ejuuque, —jadya tujatu ecana acuare.

Jesús “Yusuja etaretu pana rihuishatana jubuque” jadya jucuareque
(Mt 24.1-2; Mr 13.1-2)

⁵ Umae cuanatu quisaraticuare:

—Dyaque jida piji taa Yusuja etare! Tumu jida piji cuana tsehue taa ea! Ai jida piji cuana tsehue taa eba-jeje ecuita cuanara Yusu tyahua tsehue, —jadya tuna jucuare Yusuja etare petatsu.

⁶ Tuna jadya juyaju bacatsutu Jesús jucuare:

—Juetibuquetu huecaca Yusuja etare, etsecueju dutya ai ea cuanaque pana rihuishatanatere jubuque. Anibuque amatu tumu ecadyaqueti. Dutya tumu etare enityatsuraquetu yahuaju tere jubuque, —jadyatu Jesús jucuare.

Terehuie adeba ishuque jubuqueque
(Mt 24.3-28; Mr 13.3-23)

⁷ Jesúsra mepehua cuanaratu bacaduracuare:

—Ecuana Bahuityaquiue, cuejacue ecuana. ¿Eje tuputu jadya judadiya? ¿Aiju ecuana caadebatibuque yahua tereyaque huecaca japadamaque? —jadya tunajatu bacaduracuare.

⁸ —Nimequi tsehue nequihuaticue. Ijahue necatimereume. Ique junanucahuie tuna jetiama junabuque iquepa ejuu jadya juya cuanaque. “Idya Mesías, Yusuja Emepeque”, jadya tuna jetiama jubuque. Peya cuanara bacue anabuque: “Amena tu piji dyane Cristo junanucayaque”. Neejeneume! Tuna tsehue nejuneniume tunaja pusha pusha cabahuityati ishu. ⁹ Dutya quejadya jutidya tuna catibuque. Japadama tuque micuana ecana catiyaju bacabuque. “Peya yahuaju aniya cuanaque patuna cahuitya tunaja huaraji cuana tsehue”, jadya tuque micuana bacabuque. Jadya bacatsu “Masadamatu tere juetiya”, jadya micuanaja inime paju ama. Dutya tume cuanaquetu jadya jubuque icuene. Tere ishuque ama jari tume.

¹⁰ “Riyaque yahuaju cuanaque tuna peya yahuaju cuana tsehue catibuque. Anape cuanaquetu catibuque peya anae cuana tsehue. ¹¹ Bucucubuquetu yahua

duty queja muda. Eje uma epu cuanaju tuna dyaque mije jubuque. Ujeje cuanatu tsapetanabuque dutya queja. Barepajutu ejitaju jubuque ai muda cuanaque. Babuque tuque micuana jetiama micuana tere japadamaque adebamere ishuque.

¹² “Duty riya cuanaque ejitaju juma jariju micuana ujeu baqui cuanara micuana nrecada abuque eaqueja ecatyati baatsu. Inabuque tunara micuana caradati ishuque etareju huaraji cuana queja duju ishu. Etare apuda cuanaju micuana ishatanabuque. Dujubuque tunara micuana ecuari cuanaja yacuaju, enaruqui cuanaja yacuaju, eaqueja ecatyati baatsu. ¹³ Tume tuque micuanaja emajaca anibuque ique eje buchique tuna cueja ishu. ¹⁴ Huaraji cuanaja yacuaju dujutanayaju jidama inime nebaume quicueneti ishu quisarati aishu. ¹⁵ Eradya micuana dyaque inimequi amerebuque quisarati ishu. Ni ejequetu micuana eje bucha aquiue casada jubuque ama micuana ana tsurutsa ishu.

¹⁶ Micuanaja ata cuanara cuitadya Yusu adeba baecua cuanara micuana menajetyabuque micuana ujeu baqui cuana queja. Micuanaja tata cuanara, micuana tsehuequi cuanara, micuana japadama aniya cuanara, eadeba cuanara jadya micuana tsautyabuque micuana ujeu baqui cuana queja. Umae micuana iyetanabuque. ¹⁷ Dutya jujerira micuana ujeu babuque, eaqueja ecatyati baatsu. ¹⁸ Jadya ama bucha Yusura micuana narujacaya ama. Aputashabuque ama tujatu ni peadya etsaru micuanaja iyuca juque. ¹⁹ Eaqueja nimee ni micuana jujacaya ama, Yusura micuana tuaqueja dujubuque tuatsehue anisiri ishu, ni eje tupu tuque jaca ishu ama.

²⁰ “Sudaru jetiama cuanara Jerusalén epu ebari amena tabuhua baatsu, micuana caadebatibuque amena tillatanayaque. ²¹ Tumetu Judeaju cuanaque huanataqui emata cuanaju catehua juishu. Jerusalénju cuanaque tuna cuinanataqui tuhuaque. Teeju mere juya cuanaque tuna judirunucataqui ama epuju. Tuequedya tuna huanataqui. ²² Yusu adeba baecua cuanaque nrecatura ishuque huecacatu juetibuque; Yusura yana iyacuare eque cuitadyatu judadibuque. ²³ Dyaque nrecadatu jubuque epuna maqui cuanaque, bacua nanaqui cuanaque jadya. Tuna tuna eje bucha huanataqui ama ebajarara cabatibuque. Riyaque yahuaju aniyaquetu dyaque nrecada jubuque. Dyaque jidama, ni eje tupu jadya canerecatie juhua bucha ama, ni yahua ejitaju juhua equeque. Yusuratu dyaque canerecatishabuque tuque adeba baecua cuanaque. ²⁴ Eje uma tuna catiyaque majubuque. Peya cuana tunajatu dujubuque risitsu japada peya yahuaju. Israelita ama cuanaratu pana tilla abuque Jerusalén epu ebari. Tunaratu israelita cuana nrecaturabuque Yusura huecaca iyahua tupu, israelita ama cuanara jidama adadiyaque tereya tupu, —jadya tujatu ecana acuare.

ECUITA junanucayaju eje bucha jubuqueque
(Mt 24.29-35, 42-44; Mr 13.24-37)

²⁵ Jesúsra tuna bahuityanucacuare:

—Anibuquetu ique masadama junanucayaque adeba ishuque. Cabapetibuquetu ijete, badi, purari cuana jadya. Dutya ecuita cuanatu enime aputa, tadadaya jadya jubuque, bajida cuita juatsu. Enaja ecuaquetu sicacada jubuque. Ena pacu cuanatu netitsurabuque dyaque muda. ²⁶ Ecuita cuanatu manu, emaju bucha jadya jubuque bajida juatsu, yahua eje bucha juyaque adebatsu. Barepaju casada aniya cuanaque tuna piririterebuque. ²⁷ Tuequedya tunara IQUE ECUITA huani ducu junanucayaju batsabuque. Ecue dyaque casa tsehue junanucabuque. Cabameretibuque ique eje bucha muitaeque. ²⁸ Jadya juyaque catibutiya baatsu necacasaticue jutidya. Pureama tsehue, quihuati jadya jutidya nejudue. Bahuedya micuana jubuque masadama ique junanucayaque micuana inajacamere ishu, —jadya tuna Jesúsra acuare.

²⁹ Turadya tuna jeeque cuejacuare bahuityayaque:

—Ita taa acui higuera bacani neadebacue, peya acui cuana jadya. ³⁰ Yaa cuana catapananatiyaju baatsu, micuana bahue amena nei mara catibutiyaque.

³¹ Tumebaedya micuana dutya riya cuanaque era cuejahua cuanaque juajeya baatsu, bahuedya micuana jubuque Yusura amena masadama dutya ecuita cuana narudadiyaque.

³² “Pusha amadya micuana cuejaya. Dutya riya cuanaquetu judadibuque iyacua ecuita cuana aniyaque majuma jarijudya. ³³ Arepa barepa, yahua jadya pana cuaretana jubuque ama bucha, dutya micuana era cuejahua cuanaquetu cuaretanatsu ama jadya judadibuque.

³⁴ “Necanaruticue. Daja iji iji, nijuqui jadya nejudue. Riyaque yahua juquedya jutidya inime tupuqui neaume. Tume cuanaquedya jutidya ni micuana inime tupuqui aya, tume micuana junanucayara muya jutidya aya, cuanubi trampa muya jutidya einau bucha. ³⁵ Dutya jujeri yahuaju aniya cuanaque muya jutidya tuna atanabuque ique junanucayaju, tunara ique ihuaya ama tibu. ³⁶ Nimequi tsehue neihuacue. Jadya bacabacae Yusu queja nejudue: ‘Ecuanaja Etata, tsahuacue ecuaana, ecuanaja dutya idu ishu miaqueja nimee jujacama, bisuma ECUITAja yacuaju cabamereti ishu’ jadya Yusu nebacacue, —jadya tuna Jesúsra acuare.

³⁷ Huecadaju tuna Jesúsra bahuityacuare Yusuja etareju epu ebariju. Chineju bacue cuinanacuare epu juque Olivo Acui Quiniju tahuidiru ishu. ³⁸ Dutya jujeri ecuitatu juti bahue jucuare apudajudya cuita Yusuja etareju tuque quisaratiyaju ijacabacara.

Jesús ujeu baqui cuanara tuque inamere ishu inime bajecuaque

(Mt 26.1-5, 14-16; Mr 14.1-2, 10-11; Jn 11.45-53)

22 Japadama israelita cuanaja chine Pascua bacani jucuare, tunaja ebaba cuanaque Egipto juque cuinanacuareque adeba ishuque chine. Tumeque chine ishu tunajatu araanacuare pan levadura-maque. ² Pae cuanaja huaraji cuanara, cacuatsashati bahuityaqui cuanara jadyatu inime tupucuare Jesús eje

bucha iyemeree aishuque. Etehua inamere tunajatu acara acuare. “Ecuita cuanatu ecuanara Jesús inamere-cara ayaque bahue juatsu, ecahuaitiu ecuaana tsehue”, jadya tunajatu inime jucuare.

³ Tumetu Judas Iscariote Satanásra netiquerecuare, Jesúsra mepehuaquedya datse. Inimetu tupumerecuare Jesús eje bucha inameree aishuque tuque ujeu baqui cuana queja. ⁴ Tumetu Judas cuacuare pae cuanaja huaraji cuana tsehue, Yusuja etareju mere juya cuanaja huaraji cuana tsehue jadya quisaratira. Cuejaticuare tujatu ecana eje bucha inameree Jesús aishuque. ⁵ Tura jadya quisarati ayaju bacatsu tuna pureama jucuare.

—Mira ecuaana Jesús menajetyahuaju, mique ecuaana chipiru tsehue tsujetyaya, —jadya tunajatu acuare.

⁶ Tuque bacue endya jucuare. Tumeque huecaca equequetu Judasra Jesús eje bucha inameree aishuque sarecuare. Etehua inamere tujatu acara acuare.

Jesúsra Pascua earaqui tura mepehua cuana tsehue aracuareque

(Mt 26.17-25; Mr 14.12-21; Jn 13.21-30)

⁷ Jueticuaretu icueneque huecaca Pascua chine ishu, pan levaduramaque tunaja ara bahueque huecaca. Tumeque huecaca nucadya tunajatu iye bahue jucuare uhuisha jidaque Yusuja ishuque. ⁸ Jesusratu cuadishacuare Pedro, Juan jadya. Cuejacuare tujatu ecatsé:

—Nebajejeticue ecuanaja riyaque chineju Pascua ishu ara ishuque, —jadya tujatu ecatsé acuare.

⁹ Tatserratu bacaduracuare:

—¿Ejumi bajejemerecara aya?

¹⁰ —Jerusalénju nebajejeticue. Tuhua junatitsu tuque metse tsuruya ecuita suraju ena duju juyaque. Tudyu netupuajecue. Tupujudya aajetsu, ejeque etareju tuque nubidiruyaju baatsu tuhuadya nenubicue.

¹¹ Etare metseque jadya neaticue: “Ecuana Bahuityaquiramí bacaduramereya: ‘¿Eje dyanepa micue etareju emajaca tuque tura mepehua cuana tsehue Pascua ishu araara ishu?’” jadya nebacaduraticue.

¹² Metsera jadya ayaju tura metse bamereya tuja etareju emajaca aridaque beta ishuque pisoju. Tuhuadyatu aniya dutya ecuanara sareyaque. Tuhuadya nebajejecue ara ishuque, —jadya tatse Jesúsra acuare.

¹³ Jadya ahuaju tatse cuacuare. Junaticuare ecatsé epu ebariju. Junatihujutu jucuare dutya tatse Jesúsra cuejadadihua bae cuitadya. Bajenenaticuaredya tatse chineju ara ishu cuanaque.

¹⁴ Amena araara ishuque ura juetihuajutu Jesús, tura mepehua cuana tsehue anibutecuare mesaju.

¹⁵ —Camadya ishu rique aya riyaque chine riyaque yahuaju. Jadya tibudya, eje buchadya araacara ebari juya micuana tsehue, ique majuma jariquedya. ¹⁶ Yusu tsehue enaruqui jupee juyaque huecaca piisi tuque riyaque chine anucabuque, jucha cuana tillataqui juishu iyetanatsu, uhuisha beru iyetana bahue junenicuare bucha iyetanae juatsu, —jadya tuna Jesúsra acuare.

¹⁷ Jadya juatsu tujatu canecu juque uva nacaca esasanashaque inacuare. Canecu inatsutu —Yusurupai mique aya, Tata, —jadya Yusu acuare. Yusurupai jadya aatsu tujatu ecana acuare: —Neijicue jeeque. Riya piji riya piji necajaqueticue. ¹⁸ Riyaque micuana cuejaya. Riyaque yahuaju Pascua chine micuana tsehue anucaya ama; ijinucanime ama tuque ecue uva nacaca esasanashaque. Jadya ama buchatu tumeque huecaca era Yusu tsehue narupée ayaque huecaca juetihuaju piisi tuque ijibuque, —jadya tuna Jesúsra acuare.

Ecuana Cuatsashaquique majucuaque adeva ishu araarataquique

(Mt 26.26-29; Mr 14.22-25; 1 Co 11.23-26)

¹⁹ Jadya juatsu tujatu inanucacuare pan. Pan inatsu tujatu —Yusurupai mique aya, Tata, —jadya Yusu acuare. Yusurupai jadya aatsu tujatu pan cuesicuare. Cuesitu tujatu tuatsehue anibareya cuanaque tyabarecuare. —Riyaque rique ecue ecuita, micuana jiteque maju ishu catyatiyaque. Micuana jadya araarae juyaque, neadebacue ique micuana jiteque majuyaque, —jadya tujatu ecana acuare.

²⁰ Araara amena juatsutu Jesúsra canecu juque uva nacaca esasanashaque inanucacuare. Canecu inatsu tujatu acuare: —Riyaque rique ecue ami, micuana jiteque quije-huetiyaque. Ique ecue ami quijehuetitsu majuhuajutu Yusura iyaya iyacuaque inime micuana tuaqueja judiru ishuque.

²¹ “Peya micuana cuejaya. Ique inamerequi juyaqueri rehuadya eatsehuedya mesaju. ²² IQUE ECUITA majuyadya. Iyeyadya tunara ique, Yusuja inime jadya juya tibu. Dyaque nrecadatu jubuque ique ujeu baqui cuana queja inamerequi juyaque! —jadya tuna Jesúsra acuare.

²³ Jadya ahuaju tuna cabacaduratibarecuare tuna cama: —¿Ejeque ecuana jadya ejuu? ¿Aija ishu tujatu quisarati aya? —jadya tuna tuna cama jucuaque.

Dyaque inime metseque bucha cabatitaquique ama

²⁴ Tuequedya tuna caquemitsati caquemitsati jucuaque ejeque ecana dyaque inime metse juyaque.

²⁵ Tume tuna Jesúsra isaracuare:

—Yusu adeva baecua cuanajatu inime juya dyaque inime metse cuanaque camadya cacuatsashati ishuque bucha. Ecuari cuanajatu casada tsehue cuatsasha bahue tunaja epu cuanaju aniya cuanaque. Huaraji cuana tuna casada tsehue camuimereti bahue tunaja jetiedya cuana queja. ²⁶ Micuana micuana jadya jutaqui ama. Inime metse cuanaque tuna jetiedya cuanaque bucha cabatitaqui. Ecuatsashaqui cuanara tuna peya cuana mere, tsahuataqui. ²⁷ Riyaque yahuajutu dyaque inimequi cuanaque anibuteya araara ishu mesaju, tunaja jetiedya cuanara mereyaju. Amena ique micuana queja jecuaque ejeque jetiedyaque in-

imemaque bucha, micuana tsahua ishu, micuana queja ique cameremereti ishu ama.

²⁸ Micuana micuana eatsehue jujacahua ama ique dyaque canerecatiyaque huecaca. ²⁹ Jadya tibu micuana tyaya casa enaruqui juishu. Ecue Etatara ique enaruqui juishu casa tyahua bucha, tyaedya micuana era casa tyaya. ³⁰ Ecuari tuja eadeba cuana tsehue ejuu bucha araara, ijiji jadya, jadidya micuana eatsehue jubuque Yusuja yacuaju. Micuana micuana ique muitaya bucha muitaedya jubuque, enaruqui cuanaja eaniquiju anibutehuaju. Micuanaratu narubuque peadya tunca beta earacana cuare cuanaque Israel eque ejuracana cuanaque.

Jesúsra Pedro “Adebaya ama tuque era” jadya juyaque cuejacuaque

(Mt 26.31-35; Mr 14.27-31; Jn 13.36-38)

³¹ Jadya quisarati amena aatsutu Ecuana Cuatsashaquira Simón Pedro isaracuare peya cuanaja ijacaju.

—Satanasratu Yusu queja bacacuare, mique eaqueja nimee amerejacacara aatsu, Simón. Trigo tsaque etsajeu bucha tuque. Trigo asicadaque cuinanasha, jida arataquique camadya ani jadya ishu etsajeu bucha. Jadidya tuque, mira canerecati idutsu, tume tuquemi dyaque jida Yusu emereu. ³² Ique mique jiteque bacabacahua, mique eaqueja nimee jujaca ishu ama. Yara tupu mira jacaya; tumemi eaquejadya juetincaya. Eaqueja nimee junucatsu micue ecare cuana casaturacue eaqueja nimee juishu, —jadyatu Jesúsra acuare Simón.

³³ —Ecuemi jacanime ama, Ecuana Cuatsashaquique. Ique bajidama miatsehue apuda etareju nubi ishu, ni miatsehue majupee juishu jadya, —jadyatu Simónra acuare.

³⁴ —Cuejaya mique, Pedro. Riyaque meta, tacure quiquehuiemi catehuati quimisha juya. “Adebaya ama tuque era”, jadya aquimisha mira aya, —jadyatu Jesúsra Pedro acuare.

Nimequi tsehue nequihuaticue

³⁵ Jadya juatsu tuna Jesúsra bacaduracuare:

—Era micuana shurumaima, chipiruma, zapatuma jadya ecue quisarati cuejara cuadishaya patya ¿ai tuque micuanaja aijama jucuaque?

—Aijama. Anicualedya tuque ecuanaja ecuanara ai sareya cuanaque, —jadya tuna caquemitsaticuaque.

³⁶ —Iyacua bacue shurumai, chipiru jadya aniyaque juatsu, necadujuticue. Ejeja ni aijama quicueneti ishuque, catyati micuanaja neacue camisa, quicueneti ishuque quemis ishu. ³⁷ Dutya Yusuja quisaratiju ehuenecue ique eje bucha judadiyaque jadidya pajudadi. Ehuenecue tuque: “Yusuja Emepeque ujeu baqui cuanaratu quiyeti puji bucha abuque”. Amena tu ejetsunue ama tunaja ique jadya aishuque, —jadya tujatu ecana acuare.

³⁸ —Jeedya rehua beta cuchiru ebari, Ecuana Cuatsashaquique, —jadya tuna jucuaque.

—Tume tupu camadya! —jadya tujatu ecana acuare.

Jesús Etataque tsehue Getsemaníju quisaraticuareque
(Mt 26.36-46; Mr 14.32-42)

³⁹ Jadya juatsutu Jesús cuinanacuare epu ebari juque. Tuja bahuedyatu cuacuare uhua cuemusú Olivo Acui Quini bacaniju. Tura mepehua cuanaratu cuayaju tajiticuare. ⁴⁰ Tuhua junatitsu tujatu ecana acuare:

—Nebacabacacue Yusu queja, micuana Satanásra ique jacamerecara ayaju micuanaja idu ishú, —jadya tuna Jesúsra acuare.

⁴¹ Tume tuna Jesúsra jacacuare, tumu casa tupu dyane emareu tupu japae. Tuna jacatsutu chichucata junaticuare. Chichucata juatsutu Yusu tsehue quisaraticuare:

⁴² —Tata, nrecada ique amerecarama ayaque juatsu, ebacau datse mique era, ique canerecati ishú ama. Riya ique nrecada jutaquique tu ai patseda buchique. Jadya ama bucha ecue biji eque ama paju. Micue biji eque paju, —jadyatu Jesúsra acuare tuja Etataque.

⁴³ Tuque jadya juyajutu cabamereticuare barepa juque Yusu tsahuaquique, tuque casatura ishú. ⁴⁴ Tuja dyaque canerecati tshuetu bacabacacuare. Tuja ducuta dyaque canerecati tshuetu jucuaré. Hueruru tujatu ami patataya bucha jucuaré yahuaju, tuque Yusu queja bacabacayaju.

⁴⁵ Yusu tsehue quisaratiyaque netitsuratsutu cuanacuare tura mepehua cuana queja. Dyaque cuita peya inimeratu huenanashacuare. Baticuaretu ecana tahuijarabareyaju.

⁴⁶ —¿Eje bucha juatsu micuana tahuiya? Necabaticue. Netahuiume. Nebacabacacue Yusu queja, micuana Satanásra ique jacamerecara ayaju, micuanaja idu ishú, —jadya tujatu ecana acuare.

Jesús erisique dujutanacuareque
(Mt 26.47-56; Mr 14.43-50; Jn 18.2-11)

⁴⁷ Jesús quisaratiya jarijutu Judas junaticuare, tura mepehuaquedya datse. Tuque tupujudyatu junaticuare jetiama ecuita cuana. Junatitsutu Judasra Jesús jipenatitsu dyahuacuare. ⁴⁸ Jadya tura ayaju Jesúsra jadya acuare:

—Judas, ¿dyahuatsu mira menajetyaya, IQUE ECUITA ique ujeu baqui cuana queja? —jadya tujatu acuare.

⁴⁹ Jesúsra mepehua cuanaratu jadya juya bacatsu, bacaduracuare:

—¿Quicuenetiya ecuana ecuanaja cuchiru ebari tsehue, Ecuana Cuatsashaquique?

⁵⁰ Peadyaratu pae dyaque muidaque merequique ujeda acuare; jida equeque amaca eque ijaca tujatu pejucuaré. ⁵¹ Jadya ayajutu Jesúsra acuare:

—Jadya neaume. Tume tupu camadya! —jadya tujatu acuare.

Jadya ahujutu Jesúsra jabacuare ijaca peju-tanahuaque. Jabatsu tujatu ijaca chachanecuare.

⁵² Jadya juatsu tujatu isaracuare pae cuanaja huaraji cuana, Yusuja etareju mere juya cuana naruqui cuanaque, israelita cuanaja emuiba cuanaque jadya:

—Micuana micuana jehua cuchiru tsehue, acui tsehue jadya ique inara, chiri puji inara ejeu bucha.

⁵³ Anichinedya tuque micuanaja emajaca ejudya jutidya ique ina ishú cuchiruma, acuima. Dytá huecaca taa ique Yusuja etareju Yusuja quisarati bahuitya juchine. ¿Tume micuanara eje bucha juatsu inachine ama tuhua? Amena micuana Yusura emajaca tyahua ique ina ishú. Amenatu dyaque casadaque Ijahua, Yusu tsehue ecahuaitique, tuja biji eque juya, —jadya tujatu ecana acuare.

Pedrorá “Adebaya ama tuque era” jadya acuareque
(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jadya juatsu tunajatu inamerecuare Jesús. Inameretsu tunajatu Jesús dujucuaré pae dyaque muidaja etareju. Tumetu Pedrorá tunara Jesús dujuyaju japa tupuaje acuare. ⁵⁵ Etareju judirutsu tunajatu etsecueju etiqui ruquedirucuaré. Ruquetsu tuna etiqui bahui jucuaré. Pedro bacue tuhuadya tuna tsehuedya jucuaré. ⁵⁶ Etiqui jujuyara udayaju baatsutu tuhua mere juya epunara Pedro junetiya baatsu petatsu acuare:

—Riyaque ecuita ri Jesús tsehue junenihuaquedya, —jadyatu epunara acuare.

⁵⁷ —Aijama, mama! Adebaya ama tuque era! —jadyatu Pedrorá acuare.

⁵⁸ Yara tupu juatsutu peyara banucacuare.

—Mique taa mi Jesús tsehue junenihuaquedya, —jadya tujatu acuare.

—A, aijama! Tuatsehue juneninime ama ique! Adebaya ama tuque era! —jadyatu Pedrorá acuare.

⁵⁹ Peadya ura tupu junucatsutu peyara jadya anucacuare:

—Yuneri cuitadya ri riyaque ecuita Jesús tsehue junenihuaquedya, Galilea juque nucadya tibu.

⁶⁰ —Aijama, tata! Eje buchique cuana taa mira jadya aya; ique taa baecua. Adebaya ama tuque era! —jadyatu Pedrorá acuare.

Tuque jadya quisaratiyaju cuitatu tacure quiquecuare. ⁶¹ Tumetu Ecuana Cuatsashaquira huareretsu Pedro petacuare. Jadya baatsutu Pedro huecatanacuare. Adebacuaretu Jesúsra cuejachineque: “Riyaque meta tacure quiquehuiemi catehuati quimisha juya. ‘Adebaya ama tuque era’ jadya aquimisha mira aya”. ⁶² Jadique adebatsutu Pedro cuinanatsu paa ebari jucuaré.

Jesús tuna ijillahuanacuareque
(Mt 26.67-68; Mr 14.65)

⁶³ Jesús naruqui cuanaratu Jesús ijillahuanacuare. Atuca penetsu tunajatu bahuapajacuare.

⁶⁴ —Caadebaticue. ¿Aira taa mi bahuapajahua? —jadya tunajatu acuare.

⁶⁵ Ijillahuanajacuare ama tunaja tuque.

Jesús israelita cuanaja huaraji arida cuana ecasitati ducu dujutanacuareque
(Mt 26.59-66; Mr 14.55-64; Jn 18.19-24)

⁶⁶ Amena huecacahuajutu casitaticuare israelita cuanaja emuiba cuanaque, pae cuanaja huaraji cuana, cacuatsashati bahuityaqui cuanaque jadya. Dujumerecuare tunajatu Jesús huaraji inime cuana bajejequi cuanaja yacuaju.

⁶⁷ —¿Midyami Mesías, Yusuja Emepeque? Pusha pusha ecuana aume, —jadya tunajatu acuare.

Tura tuna quemitsacuare:

—Era ni micuana “Jejee” jadya aya, ejeneya ama micuanara ique. ⁶⁸ Era ni micuana ebadurau: “¿Ejeneya micuana ique Yusuja Emepeque?”, equemitsau ama micuanara ique. ⁶⁹ Iyacu eque micuanara IQUE ECUITA baya Yusu Dutya Casa Tsehueja yacuaju, ecue casa ique cabameretiyaju, —jadya tuna tura acuare.

⁷⁰ Jadya juyaju tunajatu dutyara bacaduracuare:

—¿Jutaquiju ni taa mi midya Yusuja Ebacuaque?

—Jejee, Yusuja Ebacuaquedya ique, micuanara ahua quedya, —jadya tuna Jesúsra acuare.

⁷¹ —Sareya ama tuque ecuana peyaja riyaque jidama juchineque cueja ishú. Ecuana cuitadyatu bacahua tura quisarati jidamaque ayaju, —jadya tuna jucuare.

Jesús Pilato queja dujutanacuareque
(Mt 27.1-2, 11-14; Mr 15.1-5; Jn 18.28-38)

23 Jadya juatsu tuna dutya huaraji cuana netit-suracuare, “Amena tuque ecuana dutya quisarati atillahua” jadya ishú. Dujumerecuare tunajatu Jesús Pilato queja. ² Tuhua junatitsu tuna cuejati-bunecuare Pilato, Jesús eje bucha ejuuque.

—Riyaque ecuitarari ecuanaja yahuaju aniya cuana queja muimerecarama aya Roma juque enaruqui. Tsujetyataqui amapa tuque ecuanaja ecuana naruquique. Tumebaedyatu Mesías, ecuanaja ecuari jadya catiya, —jadya tunajatu acuare Pilato.

³ Jadya juyajutu Pilatoru bacaduracuare:

—¿Midyami israelita cuanaja ecuari?

—Jejee, mira aya equedya, —jadya tujatu acuare.

⁴ Jadya juatsu Pilatoru acuare pae cuanaja huaraji cuana, ecuita jetiamaque tuhua aniya cuanaque:

—Dadiya ama taa era ni eje buchique inime jidamaque riyaque ecuitaja.

⁵ Jadya bacatsutu Jesús ujeu baqui cuanara dyaque jebuda quique eque acuare:

—Dutyu queja tujatu ecuita cuana sicacaturaya.

Junenichinetu dutya Judea yahuaju, Galilea eque Jerusalén tupu jadya juyaque, —jadya tunajatu acuare.

Jesús Herodesja yacuaju dujutanacuareque

⁶ Jesús pa dutya Galileaju junenichine jadya bacatsutu Pilatoru bacaduracuare:

—¿Galilea juque ri riyaque ecuita?

⁷ Tunara bacue “Jejee, tuhuaquedya tume”, jadya ahua, tujatu dujumerecuare Herodes queja, Herodesradya Galileaju cuanaque narucuare tibu. Tuquetu bahuedya jucuare Herodes Jerusalénju jehuaque.

⁸ Jesús baatsutu Herodes dyaque pureama jucuare, beru tura bacara ebari acuareque baya tibu. Ecuita cuanara tuque eje bucha juyaque cuejayaju bacatsu, Herodesra tuja yatuca tsehue bacara acuare Yusuja casa bamereyaque ayaque. Jadya tibusu Herodes tuja yacuaju Jesús dujutanahuaju pureama jucuare. ⁹ Dutya aidya jutidya tujatu bacaduracuare. Jesusratu quemitsacuare ama ni riyu piji buchique. ¹⁰ Pae cuanaja huaraji cuana, cacuatsashati bahuityaqui cuanaque jadya tuna tuhua jucuare. Tunaratu Herodes eje buchapa Jesús equisaratiu, jadique pusha pusha cueja-jacuare ama. ¹¹ Tumetu Herodesra, sudaru cuana tuhua jucuare cuanara jadya ijillahuanacuare. Jutumerecuare tuna ejutuqui jidaque ecuarira jutuyaque, tuque ijariba ishú ijaque ayaquedya jutidya. Jadya aatsutu Herodesra cuadishanucacuare Pilato queja. ¹² Berutu Pilato, Herodes tsehue ujeu cabaticuare. Herodesra Jesús Pilato queja cuadishahuaju tatse jida junucacuare.

Pilatoru “Jesús pamajudya” jadya acuareque
(Mt 27.15-26; Mr 15.6-15; Jn 18.39-19.16)

¹³ Jadya juatsu Pilatoru sitacuare pae cuanaja huaraji cuana, israelita cuanaja huaraji cuana, ecuita cuana jadya.

¹⁴ —Micuanarari bemerenucahua riyaque ecuita eaqueja. Ecuita cuanapa rejari sicacaturaya. Micuanaja yacuajudya tuque bacadurahua. Arepa micuanara turapa cacuatsashati muibachine ama jadya aya ama bucha, era taa ri dadiya ama ni riyu piji buchique ecajuchatique. ¹⁵ Herodesra tumebaedya dadihua ama tuque jidama ejuuque. Herodesra tuque ecajuchatique adebahaque juatsu, eje bucha cuadishanucacae jatsu tujatu aquena juhua rehua. Eje bucha iyemeree jatsu rique eau. ¹⁶ Catsacatsa camadya tuque amereya. Catsacatsa ameretsu tuque inajacaya, —jadya tujatu ecanu acuare.

¹⁷ Tunaja bahuetu jucuare Pascua ishú peadya ecuita etare apudaju erisi netiyaque inajaca. Ecuita cuanara ejeque inajacamerayaque camadyatu Pilatoru inajacamerenicuare. ¹⁸ Pilatoru Jesús tuque inajacameraya jadya ayaju tuna dutya quiquetibunenuacuare:

—¡Pajuani! ¡Iyemerecue Jesús! ¡Barrabás inajacacue! ¡Jesús inajacamerume!

¹⁹ Barrabástu quiyeti puji, ecuita cuana queja huaraji cuana muimerecarama amerequique jadya jucuare. Jadya tibu tunajatu etare apudaju nityacuare. ²⁰ Pilatoru inajacacara acuare Jesús. Jadidya tujatu ecuita cuana anucacuare datse:

—Inajacaya rique era, catsacatsa ameretsu.

²¹ Jadya bacatsu tuna quiqueterecuare jutidya:

—¡Curusuju tatamerecue! ¡Tuhua pamaju! ¡Curusuju tatamerecue!

²² Cueva quimisha ishu tuna Pilatora acuare:

—¿Eje bucha juatsu? ¿Ai tujatu jidama achine? Era taa dadiya ama eje bucha juatsu iyemere ishuque. Catsa catsa ameretsu painajacamere, —jadya tuna Pilatora acuare.

²³ Ecuiteda cuanatu dyaque jebuda quiqenuacuare Jesús iyemere ishu:

—¡Curusuju tatamerecuel! ¡Curusuju tatamerecuel!

Quiquejacacuare ama ecana. Dyaque quique quique juatsu tunajatu Pilato ejetanashacuare. ²⁴ Pilatoratu amena tunaja biji equedya acuare.

—Micuanara acara aya equedya paju, —jadyatu jucuaere.

²⁵ Tumetu Pilatora sudaru cuana jadya acuare:

—Neinajacacue Barrabás quiyeti puji, ecuita cuana queja huaraji cuana muimerecarama amerequique. Jesús neiyecue, israelita cuanara amerecara aya equedya, —jadya tuna Pilatora acuare.

Jesús curusuju tatatanacuareque

(Mt 27.32-44; Mr 15.21-32; Jn 19.17-27)

²⁶ Sudaru cuanaratu Jesús dujucuaere tuhuaque iye ishu. Epu ebari juque cuinanayara tunajatu tsurutsacuare ecuita Cirene juque, Simón bacani. Eje queja japada juneniyaque tunajatu tsurutsatsu casada tsehue curusu mapamerecuare. Curusu mapa jadya aatsutu Simónra Jesús icuenereniyaya acuare.

²⁷ Jetiama ecuita cuanaratu tupujudya acuare. Tuna tupujutu jetiama epuna cuana cuacuare Jesús jiteque peya inime, paya jadya juajeyaque. ²⁸ Tibene bajiyu aatsu tuna Jesúsra jadya acuare:

—Mama ecana Jerusalénju aniya cuanaque, ique riya neredada juya baatsu camadya ama nepacue.

Nepacue, micuana, micuanaja bacua cuana jadya canerecatidadiyaque adebatsu. ²⁹ Micuanaja epuju aniya cuanaque tuna dyaque neredada judadibuque. Dyaque jidama neredada juya cabatitsu tunajatu epuna bacuama cuanaque jadya abuque: “Micuana micuana dyaque inime tsapema, epuna cuana bacuaqui cuanaque bucha ama. Tuna tuna huenanaya tunaja ebacua cuanaque canerecatiya baatsu. Micuana micuana huenanataqui ama” jadya. ³⁰ Jerusalénju cuanaratu dyaque canerecatiya cabatitsu quiqebuque tumu ebari cuana emata cuana juque: “Ecuana dyaque nepacacacue ecuana iye ishu. Rihuitsu ecuana netyanacue”. ³¹ Cuati raramaque ni ecuana ruqueya, tume taa tuque ecuana yuneri cuitadya cuati eraque ruqueya. Tumebaedya ique, jucha metseque ama dyaque canerecatiya; yutsumadya micuana jucha metse cuanaque dyaquedya micuana canerecatibuque, —jadya tuna Jesúsra acuare.

³² Jesús tsehue dujupeedya tunajatu acuare beta quiyeti puji ecatse curusuju tata ishu. ³³ Jadya junatie tuna jucuaere uhua cuemusú “Emaju iyuca baeque” bacaniyu. Tuhua junatitsu tunajatu Jesús curusuju tatacuare. Tumebaedya tunajatu quiyeti puji ecatse tatacuaredya, Jesúsja jida eque amaca, peya jani eque amaca jadya. ³⁴ Tunara curusuju tatayajutu Jesúsra:

—Tata, nerecabacue ecana. Apupashacue tunaja jucha. Baecua tuna eje bucha juyaque, —jadya acuare.

Curusuju amena tatatsutu sudaru cuana dadu ijahue jucuaere, Jesúsra jutuhua cuanaque ejeja ejeja juyaque tuna cama cajuquetibare ishu. ³⁵ Jetiamatu ecuita tuhua jucuaere capetatiyaque. Israelita cuanaja huaraji cuanaratu Jesús ijahue ijahuedya acuare:

—Peya cuana inajacamere ishupa tuja casa aniya. Iy- acua tuque tuta taca paquinajamereti, yuneridya tuque Mesías, Yusuja Emepeque juatsu, —jadya tuna jucuaere.

³⁶ Sudaru cuanaratu ijahue ijahuedya acuare Jesús. Ijillahuanacuare tunaja tuque. Jipetitsu tunajatu iji ishu tyacara acuare uva nacaca patsedaque.

³⁷ —Yuneridya ni mi israelita cuanaja ecuari, quicue- neticue. Butecue curusu juque, —jadya tunajatu ijahue ayaque acuare.

³⁸ Shuracuare tunajatu curusuju Jesúsja iyuca dyaque ehuenecue. Huenecuare tunajatu quisarati griego cuanaja yana eque, Roma juque huaraji cuanaja yana eque, israelita cuanaja yana eque jadya. “Riyaque ri israelita cuanaja ecuari” jadyatu ehue jucuaere.

³⁹ Peadya quiyeti puji tuhua curusuju etata bade- yaratu ijillahuanacuare Jesús.

—Mique ni Mesías, Yusuja Emepeque, quinaja- camereticue. Yatse dyadi inajacamerecuedya. Buty- acue yatse curusu juque, —jadya tujatu acuare.

⁴⁰ Tura jadya ayaju bacatsutu peya quiyeti pujira nereda acuare:

—¿Miratu Yusu mubaya ama? Yatse yatse tuque bae neredada atahuaquedya. Yatse yatse tumebae majue juyaquedya. ⁴¹ Yatse yatse yunerijudya neredada ataya, yatsedya jucha metse tibu. Riyaque ecuita ri juchama, —jadya tujatu peya acuare.

⁴² Jadya peya aatsu tujatu Jesús jadya acuare:

—Mique enaruqui juatsu, micue canerecabati tsehue ique bacue, —jadya tujatu acuare.

⁴³ —Pusha amadya mique cuejaya. Iyacuadya yatse majuya. Eatsehuedyami Yusuja yacuaju judiruya, —jadyatu Jesúsra acuare.

Jesús curusuju majucuaereque

(Mt 27.45-56; Mr 15.33-41; Jn 19.28-30)

⁴⁴ Barepatyatu ijete apunateracuare. Tumetu dutya yahua apuda jucuaere quimisha ura dyane, las tres chinequeja tupu. Yusuja etare juque junuda eshu- raque Dyaque Muidaque penequiquetu patya cha- jatana jucuaere. ⁴⁶ Jesússtu majuyaque quiqecuare:

—Tata, amena taa majuya. Ecue yatananatu miaque- ja judiruya, —jadya tujatu acuare tuja Etataque Yusu.

Jadya quisarati aatsutu Jesús amena ishu canajeti pidya juatsu majucuaere.

⁴⁷ Tuhuaryatu jucuaere cien sudaru cuana cuat- sashaquique. Jesús eje bucha majue juhua baatsutu jadya jucuaere:

—¡Pusha ama cuitadya tucueri riyaque ecuita jucha metse ama juhua! —jadyatu Yusu pureama ayaque jucuaere.

⁴⁸ Jetiamatu ecuita cuana casitaticuare tuhua, jadya juyaque peta ishu. Jadya baatsu tuna dirunucacuare tunaja etare cuanaju. Tume diruyaquedya tuna yacua camiritiajecuare, tuna peya inime juyaque cabamereti ishu. ⁴⁹ Jesúsja umada eadeba cuanaque, epuna cuana Galilea eque tuque tajibe juchine cuanaque jadya tuna neticuare japada, dutya eje bucha juyaque peta juyaque.

Jesús emajuque tumu cani epuruju ishatanacuareque
(Mt 27.57-61; Mr 15.42-47; Jn 19.38-42)

⁵⁰ Anicuairetu ecuita José bacani epu Arimatea Judea yahuaju anicuaireque. Huaraji dyaque jida, emuiquetu jucuare. Tuquetu peya huaraji cuana tsehue ecadutyatiquedya jucuare. Arepa israelita cuanaja huaraji juya ama buchatu tuja jadya ama inime jucuare Jesús iye-merecara juhua cuana tsehue. Ejenecuare tujatu Jesús Yusuja enaruqui juishu ecuadishaque. ⁵² Tudyatu cuacuare Pilato queja. Junatitsu tujatu Pilato bacaticuare:

—¿Ebutyamereu ama mira Jesús curusuju emaju badeyaque? Paishati caniju, —jadya tujatu Pilato aticuaire.

Pilatoratu acuare:

—Butyameretsu emajuque cani epuruju ishaticue.

⁵³ Tura jadya ayaju tujatu curusu juque butyamereticuare. Butyameretsu tujatu piruricuare sahuana tsehue. Ishaticuare tujatu tumu cani jadya ishu epuruju, tsumemaju. ⁵⁴ Jesús majucuareque huecacatu jucuare israelita cuana canajara huecaca ishu cabajejeti huecaca. Ejetsunue amatu canajara huecaca ishuque jucuare ni ejeque mere juishuque ama. Jadya tibu tujatu aijama jucuare emajaca emajuque pana bajeje aishu.

⁵⁵ Epuna cuana Jesús tajiaje jucuare cuanaque Galilea equeque cuanaratu Jesús emajuque ishatanayaju bacuare. Baticuare tuna eje bucha ishae tuna emajuque ayaque. Petacuare tunajatu Jesús emajuque ishatanayaju. ⁵⁶ Jadya juatsu tuna dirunucacuare tuna junachineque etareju. Etareju judirunucatsu tunajatu bajejendirucare ijimeda cuanaque, esamaqui teditedi ishu cuanaque israelita cuanaja emaju cuanaque ishama jariju tsume bahue jucuare cuanaque. Tume cuanaque bajeje amena aatsutu epuna cuana canajaratibunecuare canajara huecacaju, tumeque huecaca ni ejeque buchique mere juishuque ama jucuare tibu.

Jesús chacha netitsuranucacuareque
(Mt 28.1-10; Mr 16.1-8; Jn 20.1-10)

24 Amena dumicu huecacaju, semanaju icueneque huecaca, apudajudya cuitatu epuna cuana cuahuecanucacuare Jesús emajuque tumu cani epuruju ishatanachineju, ijimedaque tunara bajejehineque duju juyaque. ² Junatiyara tunajatu banaticuare tumu ebari cani tsecue penequique peya queja amaca etecu. ³ Nubinaticuare ecana caniju. Nubitsu tuna banaticuare ama Jesús emajuque jarayaque. ⁴ Baecua tuna jucuare eje bucha juhuaque. Ejecutana tuna jucuare. Tume tunajatu bacuare beta ecuita jiuque ecatsé tuna

peque netiyaju. Ejutuqui tiquida tsehue tatse ecajututi jucuare. ⁵ Tuna bacue dyaque bajida cuita jucuare. Yahua queja huipuchitana ecana jucuare bajida juatsu. Tumeque ecuita ecatsé tuna acuare:

—¿Eje bucha juatsu tuque micuana emajuque cani ducu sareya chacha juneniyaque? ⁶ Rehua ama rique. Chachatu netitsuranucahua. Neadebacuadya eje bucha tura micuana Galileaju jariju cuejahuaque: ⁷ “IQUE ECUITApá ecuita jucha arida cuana queja catyati atanaya. Curusuju tatatsu tunara iyeya. Netitsuranucaya quimisha huecaca juatsu”, jadya tura micuana cuejachine, —jadya tuna ecuita ecatsé tuna acuare.

⁸ Jadya ayaju tunajatu adebacuare Jesúsra quisarati achineque. ⁹ Jadique adebatsu tuna Jerusalénju dirunucacuare tumu cani juque cuinanatsu. Judirutsu tunajatu cuejadirucare dutya tunara eje bucha bati-hua cuanaque Jesúsra mepehua cuanaque, peya ecuita cuana jadya. ¹⁰ Riyaque cuatsabiji ecuadisha cuanaque cuejaquique epuna cuanatu jucuare: María, Magdala epu juque; Juana; María, Santiagoja ecuaque; peya epuna cuana Jesús tajiique juchine cuanaque jadya. ¹¹ Ecuadisha cuanaratu ejenetaqui ama bacuare epuna cuanara cuejayaju. “Riyaque epuna cuana rena ejecutana jutidya. ¡Eje bucha jue ni tu tunara cuejaya bae juma!”, jadya tunajatu inime jucuare.

¹² Jadya ama buchatu Pedro netitsuratsu tsajaja aje-cuare caniju, yuneri, yuneri ama jadicuare bahue jucara juatsu. Tuhua junatitsutu remenaticuare educuju peta ishu. Bacuare ama tujatu emajuque, sahuana cuana camadya. Eanajacataquetu dirucuare etareju, eje bucha tumeque juhuaque baatsu.

Emaús dijiju Jesús cabamereticuareque
(Mr 16.12-13)

¹³ Tumeque huecaca nucadyatu Jesúsja emepeque ecatsé cuacuare Emaús bacani epuju. Tumeque eputu jucuare peadya tunca peadya earacana kilómetro dyane Jerusalén eque. ¹⁴ Cuayaquedya jutidya tatse cuatsabiji juajecuare eje bucha juhua cuanaque. ¹⁵ Tuque eje bucha juchineque adebatsu cabacaduratiyajeyaju tatse, Jesúsra cuitadya jipeajecuare. Adaditsutu tatse tsehuedya cuacuare. ¹⁶ Adeba piisi ama tatsejatu acuare, tunara babanicuare bucha ama cabamereticuare tibu.

¹⁷ Tume tatse Jesúsra bacaduracuare:

—¿Ai metse cabacaduratiyajeya? ¿Eje bucha juatsu metse peya inime cuita baya? —jadya tujatu ecatsé acuare.

¹⁸ Cleofas bacaniratu quemitsacuare:

—¿Baecua jatsumi Jerusalénju eje bucha inime juchineque? Dutya taa tuna riya cuita juchineque bahue. ¿Mique peadya camadya ni mi baecua riyaque quisarati?

¹⁹ —¿Aitu eje bucha juchine? —jadya tatse Jesúsra acuare.

—Jesús Nazaretju anichineque juchineque mique jadya aya. Tuquetu Yusu equeque quisarati cue-

jaquique juchine. Turatu anenichine jetiama ai ni ejeque ecuitaja ataquique ama, Yusuja peadya ataquique. Yusuja quisarati tujatu cuejacuejanichine. Tura ayaque baatsu, bacatsu jadya tuna dutya jujerira adebachine jida tuyuque ecuita. Anenichine tujatu Yusuja biji eque camadya. ²⁰ Pae cuanaja huaraji cuanara, ecuana naruqui cuanara jadyatu tuque ujeu bacuare. Inamerechine tunaja tuque. Inameretsu tunajatu iyemerechine. Sudaru cuana queja tuna curusuju tatamerechine. ²¹ Ecuana jatu inime juchine tuque Mesiasra cuana ecuana israelita cuana ijahue ijahue atayaque cuinanasha ishuque bucha datse. Amenatu quimisha huecaca tuque iyetanachineque. Ecuana bacue aninucachine jucuare baedya jutidya.

²² "Eje bucha tuputillataqui ama ecuana inime baya. Riyaque apudajudya huecacama jarijutu cuahua umaepuna cuana caniju Jesús emajuque bajejera. ²³ Aijama tuna emajuque batihua. Aijama baatsu tuna ecuana queja judiruhua. Cuejahua tunara ecuana eje bucha batihuaque. Cuejatihua tunara ecuana: 'Ecuita jiuque patu bahua, Yusu tsahuaquique ecatse. Cuejahua tatsera ecuana: "Jesús pa chacha" jadya'. ²⁴ Ecuana eadebaque ecatse cuahua emajuque ishatanachineque petara. Jesús emajuque tatsejatu bahua ama, —jadya tatsejatu Jesús cuejaajecuare.

²⁵ Tatsera cuatsabiji ayaque bacatsu tatse Jesúsra acuare:

—[Metsejatu cuejayaju jaraya ama cuitadya! Metsera Yusu equeque cuitadya quisarati cuejaqui cuanara cuejahuaque pana adeba ahuaque juatsu taa metse bahue ejuu jadya judaditaquique. ²⁶ ¿Canerecati, maju jadya ishuque ama jatsutu Mesías juchine, Yusuja yacuaju muitama jarijudya? —jadya tujatu ecatse acuare.

²⁷ Cuejatibunecuare tujatu ecatse dutya tuque eque huenetanacuareque Yusuja quisaratiju. Moisésra huenecuare eque tujatu ecatse cuejatibunecuare. Cuejaajecuaretu Yusu equeque quisarati cuejaqui cuanara huenecuare cuanaque. Jadya tsehue tujatu ecatse adebamerecuare yuneri cuitadya Yusura eje bucha judadiya jadya acuare eque cuitadya judadichineque.

²⁸ Tuna cuayaque epuju junatitsutu Jesús cuaya jidudya jutidya jucuare. ²⁹ Tatse tatse canerecaticuare tuhuadya tuque tatse tsehuedya junatishacara aatsu. —Rehuadya anicie yatse tsehue. Amenari chinehua. Apunayari amena, —jadya tatsejatu acuare.

Jadya juatsutu Jesús nubidiruare tatse tsehue. ³⁰ Mesaju tuna anibutecuare araara ishu. Ara ishu tujatu pan inacuare. Pan inatsutu Jesúsra Yusu acuare: —Yusurupai mique aya, Tata, mira ecuana jeeque earaqui tyahua tibu.

Yusurupai jadya aatsu tujatu ecatse tyacuare cuesitsu, cuesitsu. ³¹ Jesúsra pan cuesitsu tyayaju tatse chamacama Yusura adebamerecuare tuque Jesúsque. Jadya juatsutu aputacuare tatse tsehueque.

³² Cacuejaticuare tatse:

—Pusha ama cuitadya yatse jida cabatihua. Anajacata ishu tuque yatse ahua, tura Yusuja quisarati pana cueja abeabeyaju, —jadya tatse cacuejaticuare.

³³ Jadya juatsu tatse mesa juque yume netitsura juatsu dirunucacuare Jerusalénju. Judirunucatsu tatse yume barediru cuitadya jucuare peya cuana peadya tunca peadya earacana Jesúsra mepehua cuana queja, tumbaedy peya cuana Jesús queja catyatihua cuana queja. ³⁴ Tatse tuhua nubidiruhua jadya juacuare cuanara jadya atsacuare:

—Pusha amadyatu Ecuana Cuatsashaquique netitsuranucuhua. Chacha tuque. Pedro quejatu cabameretihua, —jadya tunajatu ecatse atsacuare.

³⁵ Jadya atsayajudya tatsejatu cuejacuare tatse Emaúsju cuayaque eje bucha juhuaque. Jadya tatse cacuejaticuare:

—Jesúsra pan cuesiya baatsu tuque yatse chamacama adebahua.

Jesús tura mepehua cuana queja cabamereticuareque
(Mt 28.16-20; Mr 16.14-18; Jn 20.19-23)

³⁶ Tuna quisaratiya jarijutu Jesús cuitadya cabamereticuare tuhua tuna queja.

—Netsapeume inime, —jadya tujatu ecana acuare isarayaque.

³⁷ Tuna bacue dyaque ejecutana cuita, bajida jadya jucuare. Yatanana cuana baya bucha tunajatu inime tupucuare.

³⁸ —¿Eje bucha juatsu micuana dyaque cuita ejecutana? ¿Eje bucha juatsu micuanara ique ama bucha baya? ¿Eje bucha juatsu micuana cabacaduratiya "¿Airi riyaque?", ique ejuuque adebaya ama bucha.

³⁹ Nepetacue ecue emetucu, ecue ehuachi jadya. Idya cuitadya ique. Nejabacue. Nepetacue ique. Yatanana jatu aijama erami ni etsau micuanara ecue baya bucha, —jadya tuna Jesúsra acuare.

⁴⁰ Jadya cuejatsu tujatu ecana bamerecuare emetucu, ehuachi jadya. ⁴¹ Jadya bacatsu tuna anajacatuacuare. Pureama ecana jucuare. Pana cueyane ama jari tunajatu acuare tuque Jesúsque. Pana caadebamereti juishu tujatu ecana jadya acuare:

—¿Aniya micuanaja rehua ai ara ishuque? —jadya tujatu ecana bacaduracuare.

⁴² Jadya juyaju tunajatu tyacuare peadya cuesi jae ecuahuique, huaja jadya. ⁴³ Tyayaju tujatu inatsacuare. Inatsu tujatu aracuare. ⁴⁴ Jadya juatsu tujatu ecana acuare:

—Ique iyetama jariju, ique micuana tsehue jariju, micuana cuejachine: "Yusura tuja quisaratiju cuejacuare bae cuitadya ique judadiya, Moisés eque, Yusu equeque quisarati cuejaqui cuana eque, Salmos cuana huenequi jucuare cuana eque jadya". Riya cuita eje bucha juchine cuanaquetu dutya era micuana jadyatu judadiya jadya achine equedya juchine, —jadya tuna Jesúsra acuare.

⁴⁵ Jadya juatsu tujatu ecana huecashacuare Yusuja quisarati ehueque.

⁴⁶ —Riyaquedya tu Yusura jadyatu judadiya jadya acuareque. Riyaquedya tu jadya ehuenecue: “Mesías tu canerecati, maju jadya ishuque. Quimisha huecaca emajuquetu chacha netitsuranucabuque. ⁴⁷ Mesiasja ebacaniju tuna cuabuque dutya queja quisarati cuejara. ‘Mesías queja catyatitsu necacuareticue inime, Yusura micuanaja jucha cuana tilla ishu’ jadya tuna cuejamerebuque. Cuejatibunebuque tunajatu Jerusalén eque. Tuequedya tuna dutya queja cuadishabuque”. Riyaquedya tu Yusura jadyatu judadiya jadya acuareque.

⁴⁸ “Micuanaratu bahuadya ique eje bucha juhuaque. Jutaquiju peya cuana necuejacue dutya micuanara bachineque, bacachineque jadya. ⁴⁹ Eratu cuadishaya micuana queja Ecue Etatara micuanaja cuadisha ana ahuaque. Neanicue jari rehuadya Jerusalénju ebaru-cueque Micuana Casaturaquique juetiya tupu, —jadya tujatu ecana acuare.

Jesús barepaju tsuracuareque

(Mr 16.19-20; Hch 1.6-11)

⁵⁰ Jadya juatsu tuna Jesúsra dujuacuare epu ebari juque, peya queja amaca Betania piji dyane. Emetucu tujatu tuna dyaque huesacuare. Jadya aatsu tujatu ecana acuare:

—Yusuja casa micuana tsehue paju. Yusura necasaturacue.

⁵¹ Jadya quisarati aatsutu dirucuare tuna quejaque. Barepajutu dujutanacuare. ⁵² Barepaju cuaya baatsu tunajatu pureama acuare:

—Dyaque jida taa Jesús! Dyaque casada, emui jadya taa tuque!

Tuque pureama au amena aatsu tuna dirunucacuare Jerusalénju tunaja pureama tsehue. ⁵³ Dutya huecaca ecana Yusuja etareju tuque pureama ajacama juacuare. Jadyatu juacuare.

Riya tupu camadya.

Lucas

JUAN

Riyaque quirica ri Juan Jesúsra mepecuarera huenequaque. Juantu Jesúsja dyaque iyuhuedaque jucuaire. Jesús queja nimee neritu jucuaire.

Juanratu 'Jesús YUSUJA EBACUAQUE' jadya acuare, Yusu neri jadya. Turatu huenequaque, Jesússtu hueca buchique, Yusu adebamerequique juhua tibu. Huenequaretu, Jesús tu ECUANA ANISIRISHAQUIQUE jadya. Eje uma cueja tuna Juanra acuare Jesús queja nimee juhua tuque ecuanaja Yusura jucha cuana apupashaya, ecuanaja majunuca baecua ani ishu jadya. Juanratu cuejacuaire Jesúsra ecuitaja ataquique ama acuareque, bahuityacuareque jadya, Jesús Yusu tsehue beta tupuque adebamere ishu.

Riyaque quiricarari cuejaya:

Jesús Nicodemo tsehue chineju quisaraticuareque (capítulo 3)

Jesús Samaria juque epuna tsehue quisaraticuareque (cap. 4)

Jesúsra tura mepehua cuanaque tyaana acuareque (cap. 14-16)

Jesús Etataque tsehue quisaraticuareque (cap. 17)

Riyaque quiricarari cuejaya Jesús riyaque yahuaju cuana tsehue beta tupu jadya caticuareque:

"Ique earaqui neri buchique Yusuja ecuidishaque" (6.35)

"Ique hueca buchique" (8.12)

"Idya Yusu queja enubicuare" (10.9)

"Ique uhuisha metseque uhuisha cuana jida canarutiyaque buchique" (10.11)

"Idya emaju cuanaque nityatsuraquique" (11.25)

"Idya Yusu Etata queja judiru ishuque. Idya yunerique adebamerequique. Idya eanisirishaquique" (14.6)

"Ique uva cunu buchique" (15.5)

Jesús tu YUSU ADEBAMEREQUIQUE

1 Yuequedya, yahua iyama jarijutu Jesucristo anicuaire yama. Tuquetu QUISARATI jucuaire, YUSU ADEBAMEREQUIQUE jadique. Tuquetu Yusu tsehuedya anicuaire. YUSU EJE BUCHIQUE ADEBAMEREQUIQUE tu jucuaire. Yusu cuitadyatu jucuaire. ² Yahua iyama jarijutu tuque Yusu tsehuedya anicuaire. ³ Betaradya tatsejatu Yusu tsehue dutya aniyaque iyacuare. Tura ni iyaquena ama juquena juhua dutya aniyaque, ni ai buchiquetu eaniu ama. ⁴ Riyaque YUSU EJE BUCHIQUE ADEBAMEREQUIQUE tu ecuita cuana iyacua ani tyaquique. Tura ecuanaja bamereya Yusu queja eje bucha judirue juishuque, ude tsehue udatsu ediji ebamereu bucha. ⁵ Turatu Yusu adebamereya tuque adeba baecua juhua cuanaque, apuda ducu huecadaque ejuu bucha. Tuatsehue cahuaitiya cuanaratu casa secataqui ama baya, apuda ducu juneniya bucha cuanara.

⁶ Yusuja quisarati Jesúsja cuejatibunema jarijutu anicuaire Yusuja peya ecuidishaque. Tumequetu Juan bacani jucuaire. ⁷ Tuquetu icueneta junacuare Jesús eje buchique cueja ishu, dutyaja tunaja Jesús queja nimee juishuque emajaca ani ishu. Cudatitsu eju cuayaque adebataqui ejuu bucha, jadya tu Jesús eque Yusu queja judiru ishuque adebataqui. ⁸ Juan amatu EUDAQUIQUE jucuaire. Tuquetu junacuare tumeque EUDAQUIQUE eje buchique cuejara cuita camadya. ⁹ Juan

tuque eje buchique cuejaya tuputu Jesús yuneri cuita EUDAQUIQUE caadebameretihuie jucuaire. Tuquetu amena dutya riyaque yahuaju cuanaque Yusu adebamerehuie jucuaire.

¹⁰ YUSU ADEBAMEREQUIQUE, QUISARATI yatu riyaque yahuaju junacuare. Rehuadyatu aninacuare. Arepa turadya yahua iyahua ama bucha, yahuaju dutya ai aniyaque iyahua ama bucha, dutyara jujeri tunajatu jida ama batsacuare. ¹¹ Tuja yahuajudyatu junacuare, tuja ata israelita cuana aniyaju. Jadya ama bucha tuna dutya jujeri tuaqueja catyaticarama jucuaire. ¹² Peya cuanara bacue jida tsehue batsacuare. Tunadya tuna tuaqueja catyaticuare. Tunadya tujatu ecanaja Yusu jabacua ameredadihuia. ¹³ Tuja ebacuaque tura ecuanaja amerehua, ecuanaja etatara ecuanaja susuqui tsehue baatsu bucha ama, aiju cabijiserititsuque ama. Yusura cuitadya ecuanaja tuja ebacuaque amerehua. ¹⁴ Jesucristo YUSU ADEBAMEREQUIQUE tu ecuita jucuaire. Riyaque yahuajutu ecuanaja ducu aninacuare. Arepa ecuanaja jucha arida ama bucha tura ecuanaja dyaque iyuhueda bahua. Tura ecuanaja Yusuja quisarati neri cuejahua. Ecuanaraja tujatu jidaque bacuaire, casa tuja aniyaque, tuque Yusuja Ebacuaque peadyaque juya tibu. ¹⁵ Juan Ecuita Cuana Utsaquiratu jetiama ecuita cuejacuaire Jesúsja quisarati. Jesús tuaqueja junahuaju tujatu acuare:

—Jeequedya micuana era jeya jadya cuejachineque. Ique ejitaju juma jarijutu tuque anicuaire yama, arepa ique tuja icueneque paju ama bucha. Jadya tibudyatu

tuque dyaque emuique, ique bucha ama, —jadya tujatu ecana acuare.

¹⁶ Jesúsra ecuana dyaque iyuhueda bajacaya ama, arepa ecuana cajuchatiya ama bucha. Baajeyadya jutidya tura ecuana jida tsehue, tura ecuana dyaque iyuhueda baya tibu. ¹⁷ Moisés equetu Yusura ecuanaja baba cuana tuja cacuatsashati cuana adebamerehua eje bucha anie juishuque. Jesucristo eque bacue ecuana Yusura bamerehua tura ecuana dyaque iyuhueda bayaque, arepa ecuana cajuchatiya ama bucha. Tuque equedya ecuana Yusura adebamerehua tuja quisarati yunerique. ¹⁸ Ni ejejadya jutidya tu Yusu eba. Jadya ama bucha tu peadyaque Ebacuaqueja camadya eba. Tuquetu Yusu tsehueque camadya. Tuquetu Yusu Etataque cuitadya. Tura cuitadya ecuana Yusu eje buchique bamereya.

Juan Ecuita Cuana Utsaquira Jesús eje buchique cuejacuareque

(Mt 3.11-12; Mr 1.7-8; Lc 3.15-17)

¹⁹ Israelita cuanaja huaraji cuanatu bahue jucara jucare Juan aique. Jadya tibudya tunajatu Jerusalén equeque cuadishacuare tuatsehue quisarati ishu. Cuadishacuare tunajatu umae pae cuana, pae cuana tsahuaqui cuanaque levita bacani cuana jadya.

—¿Ai mique? ¿Midyami Mesías Yusuja Emepeque? —jadya tunajatu bacaduramerecuare.

²⁰ Junatitsu tunajatu bacaduranaticuare. Juantu tuta tacadya jutidya tuque eje buchique cacuejaticuare: —Ique Mesías ama, —jadya tujatu ecana acuare.

²¹ Tume tunajatu yudijidya bacadura anucacuare: —¿Midyami Elías, Yusu equeque quisarati cuejaquique? —jadya tunajatu acuare.

—Aama, ique Elías ama.

Yudijidya tuna bacaduranucacuare:

—¿Midya ni taa mi Yusu equeque quisarati cuejaquique ecuanara ihuayaque? —jadya tunajatu acuare.

Tura tuna quemitsacuare:

—A, aijama. Ique ama micuanara ihuayaque, —jadya tujatu ecana acuare.

²² Tudy a tunajatu anucacuare:

—¿Ai jatsu mique? Cuejacue ecuana, ecuana cuadishaqui cuanaque ecuanaja cuejadiru ishu. ¿Mique aique? ¿Ai juyaque? jadique.?

²³ Tudy tuna Juanra quemitsacuare:

—Ique tsecada eje uma piji anitaya cuana queja quisarati cueja juyaque. “Nequihiuaticue Ecuana Cuatsashaquique junayaju ishu. Jida tuyu nejucue, ediji benubenuque etuyune ejuu bucha,” jadya tuna cuejaya, Isaiasra cuejacuare baedya, —jadya tuna Juanra cuejacuare.

²⁴ Fariseo cuanara cuadishaya cuanaratu anucacuare. ²⁵ Bacaduracuare tunaja tuque:

—¿Eje bucha juatsu jatsu tuquemi ecuita cuana ut-saya, ai mi Mesías, ni Elías ni Yusu equeque quisarati cuejaquique ecuanara ihuayaque batu di taa? —jadya tunajatu Juan acuare.

²⁶ Jadya bacatsu tuna Juanra acuare:

—Era tuna ena tsehue camadya utsaya, inime cacuaretihua jadique adebataqui juishu. Peya bacue aniya micuana ducu rehua. Ique buchique ama dyaque inime metseque. Tumequetu micuanara adebaya ama. ²⁷ Tsunutaya amatu riyaque yahuaaju mere catibuti ishu. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique, —jadya tujatu ecana acuare.

²⁸ Riyaquetu epu Betania bacaniju jadya jucuaré, Jordán cueri yueque macare. Tuhua tujatu inime cacuaretiya cuanaque utsautsanicuare.

Jesús UHUISHA BUCHA IYETAE ATACUAREQUE

²⁹ Jadya juu jadya junucatsutu Juanra bacuare Jesús tuaqueja jutiyaju. Tuque batsatsutu Juanra acuare tuhua jucuaré cuanaque:

—Nepetacue. Jeequedya ri UHUISHA BUCHA IYETAE ATADADIYAQUE. Yusuja Ecuadishaque riyá, ecuanaja jucha cuana apupasha ishuque. ³⁰ Jeequedya tuque quisarati achine peya huecaca ique jadya juya patya: “Tsunutaya ama tu riyaque yahuaaju peya dyaque inime metseque mere catibutiyaque. Tuquetu dyaque inime metseque, ique buchique ama. Ique ejitaju juma jariju-tu tuque anihua”. ³¹ Icuene ique baecua juchine Jesús Mesiasque. Jadya ama buchatu era ecue ata israelita cuana Mesías queja catyatishacara achine. Jadya tibudya tuque utsachine inime cacuaretiya cuanaque, —jadya ecuana Juanra acuare:

³² Juanra ecuana cuejanucacuare tura tuja yatuca eque bahuaque:

—Huei jiuque tuque Yusuja Espíritu barepa juque buteyaju bachine. Jesús dyaquetu butechine. Jadya baatsu tuque ecue chamacama inime jutichine Jesús Mesiasque. ³³ Jadya bama jariju ique baecua juchine Jesús aique. Yusura icuenetadya cuejacuare: “Ecue Espíritu tuquemi ecue Emepe dyaque eje tupu buteyaju badadiya. Tuque dyaque tuque ecue Espíritu anibuteya. Iyacua mique cuadishaya ecuita cuana ena tsehue utsara. Mira tuna utsaya inime cacuareti-huaque adebataqui juishu; jadidya tuque tyadadiya ecue Espíritu, ecuique jadya adebataqui juishu”, jadya ique Yusura cuejacuare icuenetadya. ³⁴ Yusura cuejacuare bae cuitadya tuque bachine. Yuneri cuitadya micuana cuejaya Jesús Yusuja Ebacuaqueque, —jadya ecuana Juanra acuare.

Jesúsra tuatsehue juneni ishu mepecuare cuanaque

³⁵ Huecacanucatsutu Juan tuhua junucacuare yatse tsehue. ³⁶ Bacuare tujatu Jesús cuetiayaju. Petadaditsu yatse Juanra jadya acuare:

—Nepetacue. [Tumequedya tu UHUISHA BUCHA IYETAE ATADADIYAQUE! —jadya tura yatse acuare.

³⁷ Jadique quisarati bacatsu yatse Jesús tsehue junen-itibunecuare Juan jacatsu. ³⁸ Jesússtu etibene queja cabajiyuti jucuaré. Cabajiyutitsu tura yatse batsacuare tuque tupuju cuayaju.

—¿Ai tuque metse sareya? —jadya tura yatse at-sacuare.

Yatseratu quemitsacuare:

—Ebahuityaquique, ¿ejumi aniya?

³⁹ —Nejecue. Necuara eju ique junachineju, —jadya tura yatse acuare.

Jadya ahuaaju yatse tuatsehuedya cuacuare. Las cuatro chinequeja ecuana junaticuare tuque juticuareque etareju. Tuhuadya ecuana tumeque etareju tuatsehue anichinepecuare.

⁴⁰ Andrés tsehue yatse jucuaré, Simón Pedro tsehuequi tsehue. Icuene yatse Juan tsehue junenicuare. Tuequedya yatse Jesús tsehue junenitibunecuare, tura bahuityayaque cabahuityati ishu. ⁴¹ Jesús tsehue quisaratitsutu Andrés masadama cuacuare tuatsehuequi Simón sarera. Banatitsu tujatu anaticuare:

—Mesías tuque yatse bahua, —jadya tujatu anaticuare.

(“Cristo” jadique tu Mesías.)

⁴² Andresratu Simón dujucuaré Jesús queja. Tudyatu Jesúsra batsatsu jadya atsacuare:

—Miquemi Simón bacani, Jonás bacanija ebacuaque. Iyacia tuque micue peya ebacani iyaya. Cefas bacani mi juya, —jadya tujatu Simón acuare.

(Cefas tu “Pedro” jadique griego yanaju, “Tumu Ebari” jadique.)

Jesúsra Felipe, Natanael jadya tuatsehue juneni ishu ihuaracuareque

⁴³ Huecacanucatsutu Jesús jucuaré:

—Cuaya Galileaju —jadya.

Tuhua cuayara tujatu tsurutsacuare ecuita Felipe bacani. Tuque tsurutsatsu tujatu

—Jecue. Eatsehue junenicue, —jadya atsacuare.

⁴⁴ Felipetu anicuare epu ebari Betsaida bacaniju, Andrés, Pedro ecatsé aniyaju.

⁴⁵ —Jejee, juneniyadya miatsehue.

Jadya juatsutu Felipe cuacuare Natanael sarera.

—Tsuruhua tuque yatse Mesías Yusuja Emepeque. Bérutu Moisésra huenequere Yusura cuadishadadiyaque jadya ayaque. Tumebaedyatu Yusu equeque quisarati cuejaqui cuanara huenequere tuque jadya ayaque. Iyacia ecuana bahue tuque aique. Jesús tume; Joséja ebacuaque, Nazaret juque jeyaque tume, —jadyatu acuare Natanael Felipera.

⁴⁶ Natanaelratu acuare:

—¿Eje bucha jadya jue tu ejuu! Aijama tu ai jidaque Nazaret juque. Miquemi cuji cuita eju, —jadya tujatu acuare:

—Necua. Baticue, —jadyatu Felipera acuare.

⁴⁷ Jesusratu batsacuare Natanael tuaqueja cuayaju. Batsatsu tura ecuana acuare:

—Riya junayaque ri yuneri Israel eque ejuracanaque neri. Tuquetu ecuita tuyuque. Tujatu ni ejeque buchique ijahue abaecua, —jadya tura ecuana acuare.

⁴⁸ Natanaeltu cabacatiajecuare jadya ayaju. Cabacatitsu tujatu Jesús isaracuare:

—Bandía. Bama taa micue ique. ¿Eje bucha adebae aatsumi ique eba bucha cuita quisaratiya? —jadya tujatu Jesús acuare.

—Yusuja casa eque mique icuenedya bahua ique bahua ishu mique Felipeja ihuarama jarijudya. Arepa ique tuhua miatsehue ama juhua ama bucha, Yusura bamereyaju mique bahua higuera aputa emaque juaniyaju, —jadya tujatu acuare.

⁴⁹ Jadya ayatu Natanaelra acuare:

—Ebahuityaquique, miquemi Yusuja Ebacuaque. [M]idyami Israel eque ejuracana cuanaque naru-dadiquique!

⁵⁰ Jesusratu acuare:

—¿Miratu ique Mesiasque ejenehua, era mique higuera aputa emaque juaniyaju bahua jadya ayaju, era ecuita cuanaja ataquimaque eau jadique bahue juatsu? Dyaquedyami eaqueja nimee judadiya, dyaque ibedaque era ayaju baatsu, —jadya tujatu acuare.

⁵¹ Tuequedya ecuana Jesúsra acuare:

—Pusha amadya micuana cuejaya. Yatuca cabapetit-sutu tuque micuana barepa epacashatana babuque. Babuque tuque micuana barepaju Yusu tsahuaqui cuanaque ique merera buteyaju tsurayaju jadya. Babuque tuque micuana ecana IQUE ECUITA mere juyaju, —jadya tura ecuana acuare.

Canáju caquemititayaju Jesús tuque Yusuja casa tsehueque cabamereticuareque

2 Jadya juu jadya juatsutu beta huecaca anicuare caquemiti ishuque chine Canáju. Tumeque eputu Galilea yahuaju jucuaré. Jesús, Jesúsja ecuaque, ecuanatuhua mepehua cuanaque jadya ecuana chine ishu cuacuare, dutyadya ecuana cuaishu cuejatanahua tibu. ³ Ecuana tuhuajudyá tunajatu uva nacaca esasanashaque eijiqui terecuare chine terema jarijudya. Tunara cuejahujutu ecuaquera cuejaticuare Jesús:

—Aijama patunajatu amena eijiqui uva nacaca esasanashaque, —jadya tujatu aticuare.

⁴ Jesusratu acuare:

—¿Aishu jatsu mira ique tumeque cuejaya, mama? Juetima jari tuque ecue Yusuja casa bamere ishuque, —jadya tujatu acuare ecuaque.

⁵ Jadya tura aya ama buchatu ecuaquera quijimereti puji cuana acuare:

—Ecue ebacuara cuejaya equedya nejuque.

⁶ Anicuaretu tuhua shucuta sura tumu bucha pajie ea cuanaque. Aridatu sura cuana jucuaré. Quimisacarucu tunca jadya ama juatsu cien litro tunajatu sura cuanaju ena isha bahue junenicuare. Israelita cuanajatu ena tuhua eishaque tsume bahue junenicuare emetucu cuana cutsati ishu, emaricaca cuana jadya, tunaja bahue utsa ishu. ⁷ Tudyatu Jesúsra quijimeretiya cuanaque acuare:

—Nejequeshabarecue jida ena tsehue tumeque sura cuana, —jadya tujatu ecana acuare.

Jequeshacuarehya tunara. Jida cuachacuacha tuna sura cuana ena tsehue jequeshabarecuare. ⁸ Amena tunara jequeshahua baatsu tuna Jesúsra acuare:

—Iyacia netsehuacue riya piji. Nechibamereticue chine metseque.

Tura jadya ahuaaju, tunajatu riya piji tsehuacuare. Tsehuatsu tunajatu chibamereticuare chine metseque.

⁹ Enatu cabapeticuare uva nacaca esanashaque. Chine metseratu chibatsacuare. Tuquetu baecua jucuaere eje bucha juhuaque, aira ena uva nacaca esanashaque cabapetishahuaque. Quijimereti puji cuana camadya tuna bahue jucuaere, tunaradya sura cuanaju ena jequeshabarehua tibu. Dyaque jida cuita baatsu tujatu huanequi juhuaque ihuaracuare. ¹⁰ Amena huanequi juhuaque jutihuajutu chine metsera at-sacuare:

—Icuene cuita tuque ecuanaja eihuara cuanaque uva nacaca esanashaque dyaque jidaque ijimere bahue. Tunara amena nime tupu ijihuaju tuque ecuanana amena uva nacaca jida cuitaque ama ijimere bahue. Mira taa ecana jadya ama ahua. Chine terehuie jutidyami uva nacaca dyaque jidaque cuinanashahua, —jadya tujatu acuare.

¹¹ Jesúsra jadya ahuaque baatsu, ecuanana tura mepehua cuanara tuque ecuanana ejeneacuare tuja Yusuja casa aniaque. Caná Galilea yahuajutu Jesúsra ena cabapetishacuare uva nacaca esanashaque. Tuhua tujatu ametse acuare ni ejeque ecuitaja ataquique ama. Tuhuatu cabameretimetse jucuaere tuque Yusuja casa tsehueque.

¹² Jadya juatsutu Jesús Capernaumju dirucuare. Ecuaque, tuatsehuequi cuana tsehue jadya tuna dirucuare. Ecuana tumbaedyu dirucuare tuna tsehue. Tuhua ecuanana anidirucuare eje uma huecaca cuana.

Jesúsra catyati puji cuana Yusuja etare juque ijehuecuinatillacuareque

(Mt 21.12-13; Mr 11.15-18; Lc 19.45-46)

¹³ Pascua chine bacanitu piji dyane cuita jucuaere, ecuanaja baba cuana Yusura Egipto juque cuinanashacuareque adeba ishucue. Jadya tibudyatu Jesús cuacuare Jerusalénju. Ecuonaratu tajiacecuare. ¹⁴ Tuhua junatitsutu Jesús cuacuare Yusuja etareju. Nubinatitsutu tujatu ecana banaticuare jetiama Yusu tyaishu juye, uhuisha, huei jadya catyati juya cuanaque. Tumbaedyatu bacuare chipiru cuare juya cuanaque. Tume cuanaratu peya epu cuana juque chipiru cuarecuare. Yusu mui ishucu, jadya jutaquiju ama tuna jadya jucuaere. ¹⁵ Jadya baatsutu Jesús tuna tsehue cahuaiticuare. Cahuaiticuare capaticuare huacabiti. Huacabiti tsehue tujatu ecana pana ijehuecuinatilla acuare tuhua Yusuja etareju catyati juya cuanaque. Tumbaedyatu juye, uhuisha cuana catyati juya cuanaque ijehuecuinacuare. Dacashatillacuare tujatu chipiru amena cuarehua cuanaque. Tipacatillacuaretu mesa cuana. ¹⁶ Jadya tujatu acuare huei catyati puji cuana:

—Nedujutillacue micuanaja dutya ai rehua ania cuanaque. Riyaque etare ri ecue Etata mui ishucue. Mercado ama riya. Catyati, bacabaca jadya ishucue ama riya, —jadya tujatu ecana acuare.

¹⁷ Jadya juya bacatsu, ecuanana tura mepehua cuanara tuque ecuanana adebacuare Yusuja quisarati jadya ehueque:

“Yusu, micue etare tuque dyaque muibaya.

Ejequeja buchique tuque bijidamaduramerecarama aya” jadya.

¹⁸ Jadya Jesúsra ahuaque baatsutu israelita cuanaja huaraji tuhua jucuaere cuanara Jesús acuare:

—¿Airmi casa tyahua Yusuja etare juque ijehuecuinatilla ishucue? Acue Yusuja casa bamere ishucue yuneridya tura mique jadya aishu cuatsashahuaque ecuanana ejenemere ishucue, —jadya tunajatu Jesús acuare.

¹⁹ Jesúsra tuna quemitsacuare:

—Arapa micuanara Yusuja etare rihuishaya ama bucha, eratu quimisha huecacaju nityatsuradadincaya, —jadya tuna Jesúsra acuare.

²⁰ —Eje bucha nityatsuranucae ni tuquemi quimisha huecacaju anucama! Pushi tunca shucuta earacana mara tuna tsunutacuare riyaque etare ayaque, —jadya tunajatu Jesús acuare.

²¹ Tunaja adebataquique amatu Jesúsra jadya acuare quisarati. “Yusuja etare” jadya Jerusalén juque etare ama tujatu jadya acuare. Tudyu cuitadyatu jadya caticuare, tuque Yusuja eaniqui juya tibu. ²² Jadya tibudya Jesús emajuque chacha netitsuranucahuaju ecuanana tura mepehua cuanara adebacuare tuja quisarati. “Yusuja quisarati tu ehue yuneridya Jesús majutsu chacha netitsuranucabuqueque. Jesúsra ecuanana icueneta cueja ahuaque tu yuneriquedya”, jadya ecuanana jucuaere tuque emajuque netitsuranucahuaque baatsu.

Ecuitara eje bucha inime tupuya cuanaque Jesúsra dutya adebatillayaque

²³ Jesús tunajatu Jerusalénju Pascua chine ishucue jetiama ejeneacuare tuque Mesiasque. Yusuja casa tsehue ayaque baatsu tunajatu ejeneacuare. ²⁴ Jesúsra tuna adebacuarehya tuna yuneri ama tuaqueja catyatiyaque. Tura Yusuja casa tsehue inimeradya jutidya ayaque bacara aatsudya jutidya tupujudya ayaque adebaya tibu, tura tuna ejitaju cuita “Ique Mesías” jadya acuare ama. ²⁵ Ni ejeja buchiquetu tuque ecuita cuana eje buchique cuejataqui ama jucuaere, tura cuitadya ecuita cuana eje bucha inime cadujutiyaque, inime tupuyaque jadya adebaya tibu.

Nicodemo Jesús tsehue quisaraticuareque

3 Anicuaretu ecuita Nicodemo bacani. Tuquetu huaraji israelita cuanaja emuique jucuaere. Fariseo tu jucuaere. ² Chinejutu Jesús tsehue quisaratira cuacuare. Junatitsutu tujatu isaranaticuare Jesús:

—Banuchi, Ebahuityaquique. Bahue ecuanana mique bahuitya bahuitya puji, mique Yusuja Ecuadishaque. Ni ejera bucharatu mira Yusuja casa

tsehue ayaque eau ama, Yusura casa tyayaque ama ju-atsu, —jadya tujatu anaticuare Jesús.

³ —Pusha amadya mique cuejaya. Eje bucha narue ni tu Yusura ama ejeque yudijidya cananatinuca junuca-maque, —jadyatu Jesúsra acuare.

⁴ —¿Eje bucha cananatinuca ecuana ejuu amena esirique? ¡Eje bucha jadya jue ecuana ejuu! ¡Eje bucha nubinuca ecuana ejuu ecuana susuqui cuanaja ecarecaniju yudijidya cuinanana juishu! —jadyatu Nicodemora acuare.

⁵ Jesusratu acuare:

—Yusuja Espíritu eque iyacuanemaquetu Yusura naruyaju eje bucha nubidirutaqui ama, tumbaedy utsamaque. ⁶ Ecuana susuquija ecarecani juque cuinanahuaju ecuana ecuana baqui cuanaja ebacuaque. Yusuja Espiritu eque eiyacuaneeque bacue ecuana, Yusuja ebacuaque, Yusuja Espiritura ecuana Yusu jaque amerehua tibu. ⁷ Bape baume riyaque quisarati, cananatinucataqui mique jadique. ⁸ Cuejijitu riyaque yahuajura ni ejera buchara naruya ama. Tuuyaju bacatsu, ejaqui cuana bucuushayaju baatsu tuque ecuana cuejiji adebaya. Jadya ama bucha ecuana adebaya ama ejuque cuinanahuque ni eju ne-tidiruyaque. Tumbaedy cuitadyatu Yusuja Espíritu eque cananatinucahua cuanara adebaya ama tuna Yusura eje bucha iyacuanee ahuaque. Jadya ama bucha tunajatu tuja casa bayadya, —jadyatu Jesúsra Nicodemo acuare.

⁹ —¿Eje bucha cuana taa? Adebataqui ama tuque baya, mira ique riyaque cuejayaque, —jadyatu Nicodemora acuare.

¹⁰ —Mique taa mi Israel eque ejuracana cuanaque bahuityaqui. Mira taa tuna Yusuja quisarati bahuityaya. ¿Eje bucha juatsu jatsu tuquemi cueyane-taqui ama baya era cuejayaque? ¹¹ Pusha amadya mique cuejaya. Era pana adeba ayaque mique cuejaya. Ecue yatuca tsehue ebaque mique cuejaya. Jadya ama buchatu mira adebaya ama. ¹² Riyaque yahua juque era cuejayaquemi adebataqui ama baya. ¡Eje bucha adebaedy tuquemi ama era Yusu quejaque cuejayaque!

¹³ "IQUE ECUITA era peadyami Yusu eje buchique pana cueja eau. Ni ejeque buchiquetu tuja yacua juque butehua, ique cuita camadya. ¹⁴ Béru ecuanaja baba cuana japada anianinicuare patya, cuatsashaya eque jucarama juya cuanaque tuna bacua dyaque uje-da cuanara acuare. Yusratu Moisés bacua cueya bronce eaque ameretsu acuiju shuramerecuare. Bacuara ahuara bacua cueya eaque petayajutu Yusura chachaneuare. Tumbaedy IQUE ECUITA acuiju tatatanadadiya. Jadya iyetae judadiya. ¹⁵ Dutya eaqueja catyatiya cuanaque tuna iyacuanetanaya. Majutsu tuna Yusu queja judirubuque ni eje tupu jacanuca ishuma, —jadyatu Jesúsra Nicodemo acuare.

Yusura dutya ecuita cuana iyuhueda bayaque

¹⁶ Yusratu dutya dyaque iyuhueda baya. Jadya tibudya tujatu tuja peadyaque Ebacuaque ecuana

jiteque maju ishuma cuadishahua. Tuja Ebacuaque queja ni ecuana catyatiya, ijahuaja etiquiju ecuana judirubuque ama. Yusu tsehue ecuana anisiribuque.

¹⁷ Yusratu riyaque yahuaju cuanaque nerecaturacarama acuare. Jadya tibudya tujatu Ebacuaque riyaque yahuaju cuadishahua, tuaqueja catyatiya cuanaque in-ajacamere ishuma, tuna ijahuaja etiquiju judiru ishuma.

¹⁸ Yusuja Ebacuaque queja catyatiya cuanaque tuna Yusura jucha metse ama baya. Amena tuaqueja catyatiya cuanaque bacue Yusura jucha metse baya, tuna tuja Ebacuaque queja catyatihua ama tibu. ¹⁹ Huecajutu ejitaju eje buchique; jadidyatu Yusuja Ebacuaque riyaque yahuaju junahua Yusuja biji eque jadique bamere ishuma. Jesús queja nimee ama cuanaque tuna Yusuja biji eque ama aniya. Tunadya tuna apuda ducu juneniya buchique. Jadya tibudya tuna Yusuja Ebacuaque queja catyaticarama juya. ²⁰ Jidama juya cuanaratu apuda ducudya jidamaque aya, huecadaju ama. Japada tunajatu hueca jacaya, tuna jidama juyaque ejitaju ejuu tibu. Tumbaedy Yusu uje cuanara Jesúsja quisarati bacacarama aya, tura tunaja jucha cuana ejitaju eauju. ²¹ Yusuja quisarati yuneri eque aniya cuanaque tuna Jesús queja cajipeticara juya, tuna Yusura amereya eque juyaque caade-bamereti ishuma. Huecaju juneniya cuana buchique tuna.

Juan Ecuita Cuana Utsaquira Jesús eje bucha juyaque cuejanucacuareque

²² Jadya juatsutu Jesús Judea yahuaju cuacuare. Ecuana bacue tuatsehuedya cuacuare. Eje uma huecacadya ecuana tuhua jucuaque, tuaqueja nimee juya cuanaque utsa juyaque. ²³ Juantu ecuana eque eje japa amadya jucuaque. Enonjutu cutsameretiya cuanaque utsa jucuaque Salím japadama, tuhua cueri aniya tibu. Jetiama tuna cuacuare tuaqueja cutsameretira. ²⁴ Jadyatu jucuaque Juan etare apudaju ishatanama jariju.

²⁵ Umae Juan tsehue juneniya cuanaque tuna caquemitsatibunecuare peadya israelita tuhua jucuaque tsehue, tunaja bahue eque Yusuja yacuaju jida cajuchati-ma juishu tibu eque.

²⁶ Tuna cama caquemitsati caquemitsati juatsu tuna Juan queja cuacuare.

—Ebahuityaqui, reeque japadama taa tumbaedy aniya ecuita cuana utsa juyaque. Icuene mique Jordán yueque macare juchine patyatu tuque miatsehuedya juchine. Cuejachinedya mira ecuana tuque Mesiasque. Dutya jueri tuna tuaqueja cuaya cutsameretira. ¿Jidadya tu jadya juishu? —jadya tunajatu aticuare.

²⁷ Juanra tuna quemitsacuare:

—Yusura yatse casa tyahua tuque mere ishuma. Ni ejera buchiquetu emereu ama tuja cuitadya casa tyamaque. ²⁸ Micuanara cuitatu bacahuadya era ejitaju cuejayaju ique ama Mesías Yusuja Emepeque jadique. Cuejahua micuana era, tuque junama jarijudya ique icuene cuadishahua tuque junayaque cueja ishuma. ²⁹ Caquemitiyaju cuejatahuaquetu pureama juya, arepa tuque ama caquemitiyaque ama bucha.

Huanequi juyaque pureama juyajudya jutidyatu pureama juya. Tumebaedya ique iyacua pureama juya ecuita cuana Jesús queja catyatiya baatsu, tuque Mesías juya tibu. ³⁰ Dyaquedya tunajatu Jesúsja quisarati bacaa-jeyadya jutidya. Ecue quisarati tunajatu bacajacaya, —jadya tuna Juan Ecuita Cuana Utsaquira acuare.

Jesús Yusu quejaque jecuaque

³¹ Yusu quejaque junahuaque tu dyaque emui, dyaque bahue jadique. Riyaque yahuaju ejitaju juya cuanara bacue jacataqui ama baya, riyaque yahua juque camadya tuna adebaya. Riyaque yahua juque camadya tunajatu cuatsabiji aya. Barepa juque junahua bacue dutya adebaya. ³² Turatu Yusu queja bahuaque, bacahuaque jadya quisarati cuejaya. Jadya ama bucha dutyara jujeri ejenecarama aya tura cuejayaque. ³³ Tura cuejayaque ejenequi cuanaque tuna juya: “Yuneri cuitadya tu Jesús Yusuja Ebacuaque, Yusu cuitadya jadya juhua tibu”, jadya jubahue. ³⁴ Tuquetu Jesús Yusuja Ecuadishaque. Turatu Yusuja quisarati yunerique cuejaya, Yusuja Espiritura casaturajacaya ama tibu. ³⁵ Yusuratu dyaque iyuhueda baya tuja Ebacuaque. Jadya tibudya tujatu Ebacuaque casa tyahua dutya naru ishü. ³⁶ Yusuja Ebacuaque queja catyatiya cuanaque tuna Yusu tsehue tere baecua anibuque. Majutsu tuna Yusu queja tuque jacanuca ishü ama judirubuque. Yusuja Ebacuaque queja catyatiya cuanara bacue Yusu jipebuque ama. Dyaque nrecada nrecaturajacatsu ama tujatu ecana nrecaturabuque.

Jesús Samaria juque epuna tsehue quisaraticuaque

4 Fariseo cuanaratu quisarati bacatsacuare Jesús tsehuepa ecana amena dyaque umada juneniya, Juan tsehue bucha ama. Utsaya patu ecana dyaque jetiama, Juanra utsaya bucha ama jadya. ² Jesúsra cuita amadya tuna utsacuare; ecuaña tura mepehua cuanara tuna utsacuare. ³ Fariseo cuana tuja ishü quisaratiyaque bahue juatsutu Jesús Judea juque dirunucacuare. Tuatsehue dirupeedya ecuaña jucua Galileaju.

⁴ Tume ecuaña Galileaju judirutsu Samaria eque cuetitaqui jucua. ⁵ Samaria yahua eque juneniyaque ecuaña Sicar epu bacaniju judirucua. Tumeque eputu japadama jucua Jacobra béru ebacuaque yahua tyacuareque. ⁶ Jesússtu ena cani peque judirucua. Tumeque ena canitu jucua béru Jacobra purucuaque. Japada ajehua tibutu Jesús dyaque ecastere jucua. Jadya tibudyatu ena cani peque anibutedirucua. Barepatya huietu jucua. ⁷ Ecuaña ecuaña epuju cuacuare ara ishü cuanaque quemira. Ecuaña epuju cuahuajutu juticuare epuna tuhua Samariaju aniyaque. Ena jitequetu juticuare. Epuna jutihuajutu Jesúsra isaratsacuare:

—Bastare, mama. ¿Ena piji mira eijimereu ama?
—jadya tujatu acuare.

⁹ —Aijama, ijimereya ama mique era. Mique taa mi israelita jutidya. Ique taa Samaria juque. ¿Eje bucha juatsu, jatsu, mira ena iji ishü bacaya? —jadyatu epunara Jesús acuare.

(Tumeque epunatu bahuedya jucua israelita cuana Samariaju cuana tsehue cajipeticarama juyaque, ni peadya canecu ena Samariaju cuanara ai ijiquerecarama ayaque. Jadya tibudya tujatu jadya quemitsacuare.)

¹⁰ Tudyatu Jesúsra quemitsacuare:

—Yusurami dyaque jida tsehue bacara aya. Miratu adebaya ama. Erami ena iji ishü bacaya. Mira ique adebaya ama ique aique. Ique aique adebayaque juatsu, mira ique ebacau ena iji ishü. Mira ique ena bacayaque juatsumi era etyau. Ijitsumi eiyacuane ejuu. Majutsumi Yusu queja ejudiruu tuque jacanuca ishü ama, —jadya tujatu acuare.

¹¹ —Tata, aijama taa tuque micue ai tsehue ena tsehua ishüque. ¿Eje bucha tsehuae jatsu tuquemi eau ena ique Yusu jaca baecua anidirusha ishüque?

¹² Ecuaña ebaba Jacobra taa tu riyaque ena cani juquedya ijicuare béru. Tuja ebacua cuanaquera, tuja uu cuanara jadyari rehuaquedya ena ijicuare. Tume patya equequetu ecuaña ata cuanara ena rehuaque ijicuare riyá cama jaridya. Ecuaña ebaba emuira ena cani shanacuare juquedya rique ecuaña ijiya jari. ¿Mique ni taa mi tuque dyaque inime metseque catabiya? —jadyatu epunara acuare.

¹³ —Riyaque cani juque ena ijitsumi masadama ijicara junucaya. ¹⁴ Era ena tyayaque ijitsumi ijicara junucanime ama ni riyá puji buchique. Era ena tyayaque tu bapeque. Muhuehueya buchatu judadiya ena ura baecuaque. Jadiquetu era tyaya. Terebuque ama tuque. Ijitsumi tere baecua anisiribuque. Majutsumi Yusu queja judirubuque, tuque jacanuca ishü ama, —jadyatu Jesúsra acuare.

¹⁵ —Tata, tyacue ique tumeque ena ijicara junuca ishü ama, dutya huecaca risharisha ena jiteque junuca ishü ama, —jadya tujatu acuare.

¹⁶ —Ihuaraticue micue ahue. Tuatsehue jenucacue rehua, —jadyatu Jesúsra acuare epuna.

¹⁷ —Ahuema ique, —jadyatu epunara acuare.

—Pusha amadyami juya. Aijamadya tuque micue ahue. ¹⁸ Miquemi pishica ahue juhua. Iyacuami aniya peya ecuita tsehue. Micue ahue ama tume.

¹⁹ —Tata, amena mique adebaya, mique Yusuja casa tsehue quisaratiyaque, mira ique micue bamaque pana adeba ahua tibu. ²⁰ “Yuneridya tuque ecuaña Yusu rehua emata Gerizimju camadya muitaqui”, jadyatu ecue ebaba ecana icuene rehua Samariaju anicuare cuanaque jubahue jucua. Micuana israelita cuana bacue micuana jubahue “Tuyudya tu Jerusalénju cuita camadya Yusu mui ishü, peya epuju ama”, —jadyatu epunara acuare.

²¹ Jesusratu acuare:

—Ejenecue era cuejayaque, mama. Juetiyatu huecaca ecue Etata Yusu dutya queja muitanadadiyaque, jadya ishü cuitaju camadya ama. Jetaqui ama micuana ni rehua riyaque emataju tuque muira, ni Jerusalénju

tuque muira. ²² Iyacuatu micuana Samariaju cuanara adebaya ama Yusu eje buchique, arepa micuana muiya jadya juya ama bucha. Ecuana israelita cuanara bacue ecuana adebaya tuque eje buchique. Yusu Neri tuque ecuana muiya. Yusratu mepecuare Israel eque ejuracanaque Einajacamerqui juishu. ²³ Masadamatu ecuita cuanara Yusu muidadiya tuque eje bucha muitacara juya eque. Tuja inime eque tuna anibuque. Yusuja Espirituja casa eque tunajatu mui neri adadiya. Jadyatu ecuanaja Etata Yusuja bijida tuque jadya muiqui cuanaja mui ishu. ²⁴ Yusu tu cuitama. Ejitajuque ama tume. Tuja Espiritu equetu caadebameretiya. Tuja Espiritu eque cuita camadya tuque micuana tuque emuita bucha muie eau Yusu, tuja quisarati yuneri eque cuita camadya, —jadyatu Jesúsra epuna acuare.

²⁵ —Jejee, adebayadya tuque era ejeque huecaca Yusuja Emepeque, Mesías junabuqueque. Tuque junatsu, tura ecuana bahuityanabuque ecuana bahue juttaquique, —jadyatu epunara acuare.

²⁶ —Idya Mesías, miatsehue iyaja cuita quisaratiyaque, —jadyatu Jesúsra acuare.

²⁷ Jesús tumeque epuna tsehue quisaratiyaju ecuana tura mepehua cuanaque judirunucacuare. Bape ecuanabadirucare tuque epuna tsehue quisaratiyaju. Jadya ama bucha, “¿Eje bucha equemi tumeque epuna tsehue quisaratiya? ¿Ai tuquemi bacahua?” ni ejera tuque ecuana jadya bacadurataqui ama bacuare Jesús.

²⁸ Tumetu epuna tuja sura ena cani peque shanaque-natsu cuacuare epuju. Ejeque tsuruyaquedya jutidya tujatu cuejaajecuare:

²⁹ —Necuara ena caniju. Yuhuatú aniya ecuita. Adebamaradya jutidya tura ique eje buchique cuejehua. ¿Tudya ni tu Mesías? ¿Tudya ni tu Yusuja Emepeque? —jadya tujatu ecana cuejaajecuare.

³⁰ Jadya bacatsu tuna epu juque cuinanatsu cuacuare Jesús queja. ³¹ Ecuita cuana junatimaju tuque ecuana Jesús acuare:

—Jee taa ecuana ara ishu cuanaque quemitihua cuanaque. Nearaarara, —jadya tuque ecuana Jesús acuare.

³² —Ecuetu aniya era ai sareyaque micuanara adebayaque ama, —jadya tura ecuana acuare.

³³ —¿Aira cuana ni taa rejari behua ara ishuque? —jadya tuque ecuanaja inime jucuare.

³⁴ Ecuana ara ishuque adebayaju ecuana Jesúsra quemitsacuare:

—Ecuetu ataqui Ique Cuadishaquira amerehuaque. Tura amerehuaque tuque ecue atillataqui. ³⁵ “Pushi badi juatsutu amena tupu ecuanara uhuahuaque huesa ishu”, jadya micuana jubahue. Era micuana cuejaya. Nepetacue junabareya cuanaque. Tunaratu sareya ejeja tsahuatsu masadama eaqueja catyati ishu. Tuna tuna teeju euhuaque amena ejahuane buchique. ³⁶ Euhuaque huesaqui cuanaque etsujequi inatsu pureama juya bucha, tume bae cuitadyatu Yusu merequi cuanaque pureama jubuque, peya cuana eaqueja catyatiyaju baatsu. Tuna ai juyaque tu ejitajudya judadiya;

tumequetu tere baecuaque. Yusratu dyaque jida amerebuque dutya tuque merequi cuanaque, tunaja mere ejitaju ama bahuishaya cuanaque, tumebaedya masadama ejitaju baya cuanaque. ³⁷ Jadique quisarati tu yuneriquedya: “Peadya tu uhuahua puji; peya bacue jahuanehuaju huesaqui”. Tumebaedyatu umaera tsahuaya icuene cuita ecue quisarati bacaqui juhua cuanaque eaqueja catyati ishu, peya cuana quisarati cuejaqui cuana eque. ³⁸ Cuadishaya micuana era ecue quisarati iyacuaque cuejara. Micuana micuana peyara uhuahuaque huesaqui buchique, peya cuanara icuene quisarati yunerique cuejehua tibu. Micuana quisaratiyaju bacaqui cuanaque tuna eaqueja catyati-dadiya, ai micuanara jipidya cuejayaju ama, peya cuanara icuene cuejehua tibu, —jadya ecuana Jesúsra acuare, ecuita cuana tuaqueja junayaju.

³⁹ Epunara tuja epuju cuanaque Jesús bana ishu cuejabareyaquepa tujatu ecana acuare:

—Dyaque taa tuja casa aniya! Tuja ique bamaque cuitadya tura adebahua ique eje buchique.

Tura cuejayaque bacatsu tunajatu umadara ejenecuaré Jesús, Mesíasque Yusuja Emepeque.

⁴⁰ Quisaratiyaju bacatsu tunajatu bacacaradya jutidya acuare. Jadya tibudya tunajatu tuaqueja jutitsu

—Rehuadya ecuana queja eje uma huecaca cuana anicue jari, —jadya aticuare.

Tumetu Jesús beta huecaca tuna queja anicuare.

⁴¹ Tura cuitadya cuejayaju bacatsu tuna dyaque umada tuaqueja catyaticuare. Ejenecuaré tuna tuque Mesías jadique. ⁴² Jesús queja catyatihua cuanaratu epuna acuare:

—Icuene cuita tuque ecuana ejenehua tuque Mesíasque, mira cuejayaju bacatsu jutidya. Iyacuatu ecuanara cuitadya bacahua. Catyatihua ecuana tuaqueja. Amena tuque ecuana adebaya Yusura tuque riyaque yahuaju cuanaque Ijahua quejaque inajacamerera cuadishahuaque, —jadya tunajatu epuna acuare.

Jesúsra huarajija ebacuaque chachanecuareque

⁴³ Beta huecaca juatsu ecuana Jesús tsehue Samaria juque cuanucacuare, Galilea yahuaju. ⁴⁴ “Yusuja quisarati cuejaquiquetu peya epuju cuanara muibaya; tuja epuju cuanara cuita bacue muibaya ama”, jadyatu Jesús beru jucuare. ⁴⁵ Jadya ama bucha tunajatu Jesús Galileaju junatihuaju tuhua cuanara jida batsacuare. Tuna dyadipa tuna Jerusalénju Pascua chine ishu cuacuaredya. Tuhuadya tunajatu bacuare Jesúsra ayaque ni ejeque ecuitaja ataquique ama. Jadya tibudya tunajatu pureama tsehue batsacuare.

⁴⁶ Tuequedyatu Jesús Caná Galilea yahuaju yudijidya dirunuca jucuare, icuene ena uva nacaca cabapetishacuareju. Tuhuatu jucuare huaraji, ecuari merequique. Ebacuaque tujatu dyaque ujejeda jucuare Capernaumju. ⁴⁷ Jesús junanucahuajutu huaraji ecuita cuanara cuejacuare:

—Jesús ri rehua. Juetinucahuatu Judea juque.

Jadya cuejahuaju tujatu Jesús isaraticuare. Canerecaticuaretu tuaqueja:

—Nerecabacue taa ique. Ecue ebacua taa majutaqui cuita. Necua ecue etareju. Ecue ebacua chachaneticue, —jadya tujatu aticuare.

⁴⁸ Tudyatu Jesús jucuare:

—Ni ejeque buchique micuana eaqueja catyaticara juya, Yusuja casa bamere ishuque era ayaju bamaque, ni ejeque ecuitaja ataquique ama ayaque bamaque.

⁴⁹ Huarajitu quisaratinucacuare:

—Ecuatsashaquique, jecue ebajarara, ecue ebacua majuma jarijudya.

⁵⁰ —Dirunucacue micue etareju. Micue bacua tu amena chacha. Majuya ama tuque, —jadyatu Jesúsra acuare.

Huarajiratu ejeneacuare Jesúsra tuja ebacuaque chachanehuaque, arepa japada ama bucha. Amena tuque ejenetsutu dirucua tuja etareju. ⁵¹ Tuya tujatu tsurutsacuare edijiju tuja mere puji cuana. Isaratsacuare tuna tunaja patrón:

—Micue bacua tu chacha. Amenatu dyaque mejemeje cuita juhua, —jadya tunajatu atsacuare.

⁵² Tudyatu ecuitara bacaduratsacuare tuja mere puji cuana:

—¿Ai ura dyane ecue ebacua jida mejemeje juhua? —jadya tujatu ecana atsacuare.

—Riyabarepa a la una tujatu baara netichine, —jadya tunajatu atsacuare.

⁵³ Jadya cuejayajutu ecuita huecatanacuare: “Tumeque ura cuita di taa riyabarepa Jesúsra ‘Micue bacua tu amena chacha’ jadya achine”.

Tumetu Jesús queja catyaticuare. Tumbaedy a dutya tuja etareju aniya cuanaque Jesús queja catyatibarecuare.

⁵⁴ Riyaquetu jadya jucuare Jesús Galilea juque Judeaju judiruhua. Canáju tujatu bamere beta ishu Yusuja casa bamerecuare, ejeque ecuitaja buchique ataquique ama aatsu.

Jesúsra ajebaecuaque ajeshacuareque

5 Jadya juu jadya junucatsutu Jesús Jerusalénju yudijidya cuanuca jucuare. Tuhuatu israelita cuana chine jucuare. ² Tuhua Jerusalénjutu ena cani dyaque quinidaque anicuare. Israelita cuanaja yana equetu tumeque ena cani Betzata bacani jucuare. Tumeque ena canitu jucuare epu tachiquique uhuisha cuana epuju nubiquique cani japadama. Anicuaretu pishica etare caca cuana ujejeda cuanaque jara ishuque. Etare caca cuanaja etabutu jucuare. ³ Tuhuatu jarabarecuare umada ujejeda cuanaque. Anicuaretu shuhui cuanaque, ajebaecua cuanaque, ecuruti cuanaque jadya. Tuhuadya tunajatu ihuacuare ena muhuhueyaque. ⁴ Juatsudya juatsudyatu barepa juque Yusu tsahuaquique bute bahue jucuare ena cani ebari juque ena muhuhuesha ishu. Tura ena muhuhueshayajudyatu ujejeda cuanaque ena caniju nubi bahue junenicuare. Ena muhuhueyaju icuene nubiyaque camadyatu chacha jubahue jucuare.

⁵ Tuhuatu jaracuare ecuita eje uma mara ujejedaque. Quimisha tunca quimisacarucu earacana mara ajebae-

cuaquetu jucuare. ⁶ Tuhua nubitsutu Jesúsra bacuare tumeque ecuita. Turatu adebacuaedy tumeque ecuita mara mara ajebaecuaque jarayaque. Isaranaticuare tuja tuque:

—¿Netitsuracarami juya, tata? —jadya tujatu bacaduranaticuare.

⁷ —Jejee, Ecuatsashaquique. Netitsuracara taa juya. Jadya ama buchari aijama ejeque ique ena muhuhueyaju isha ishu. Ique bucucutaqui ama juya tibu, peya cuanara bareya jutidya, —jadyatu ajebaecuaacuare Jesús

⁸ —Netitsuracue. Huesacue micue jara ishuque. Dirucue micue etareju, —jadyatu Jesúsra acuare ujejedaque.

⁹ Jadya Jesúsra ahuaju cuitadyatu ecuita netitsuratsu ajecuare. Ajetsutu cahuesatiquenacuare tura jara ishu ahuaque. Cahuesatitsutu diruquenacuare. Canajara huecacajutu Jesúsra ecuita ebucucujacaque chachaneacuare. ¹⁰ Israelita huaraji cuanaratu bacuare tura jara ishu ahuaque cadujutyaju.

—Riyaque huecaca ri canajara huecaca. Ecuanaja cacuatsashati eque amami juya. Dujuta baecuatu ni ai buchique canajara huecacaju, —jadya tunajatu acuare.

¹¹ —“Huesacue micue jara ishuque. Dirucue micue etareju”, jadya ique ajeshaquira ahuá, —jadya tuna acuare ecuita chacha juhua.

¹² —¿Aira jatsumi jadya ahuá: “Huesacue micue jara ishuque. Dirucue”, jadya? —jadya tunajatu bacaduracuare.

¹³ Ajebaecuaque netitsurahuquetu baecua jucuare tuque ajeshaquique ai bacanique. Tuque ajeshatsutu Jesús masadama cuinanacuare ecuita jetiama ducuque. Jadya tibutu ecuitara eje bucha bacadurataqui ama bacuare tuja ebacani. ¹⁴ Jadya junucatsutu Jesúsra ecuita tsurunucacuare Yusuja etareju.

—Amena mi juneniya. Cajuchatinucaume. Eajejanucau mique, —jadyatu Jesúsra acuare.

¹⁵ Tuhuatu ecuitara adebacuare Jesús tura nityatsuratsu ajeshahuaque. Tumetu cuinanacuare. Cuinanatsutu israelita cuanaja huaraji cuana tsehue quisaratira cuacuare.

—Jesusradya tucue ajeshahua, —jadya tujatu ecana aticuare.

¹⁶ Israelita cuanaja huaraji cuana tuna dyaque ecahuaiti jucuare Jesús tsehue, tura ujejedaque canajara huecacaju chachanehua baatsu. Quisaratitibunecuare tuna tuja ishu. Ujeu tsehue tunajatu petacuare.

¹⁷ Jesússtu bahuedya jucuare tuna tuatsehue dyaque ecahuaitique. Acuare tujatu ecana:

—Ecue Etatatu dutya huecaca mere juya; ique tumbaedy mere jujacaya ama, —jadya tuna Jesúsra acuare.

¹⁸ Jadya tuque juyaju bacatsutu israelita cuanaja huaraji cuanara dyaque iyecara acuare. Iyecara tunajatu acuare, tura canajara huecacaju ahuaque tunara tumeque huecaca ataquí ama bucha bayaque ahuá baatsu. Jadya juatsu camadya ama tuna tuatsehue dyaque ecahuaiti jucuare. Iyecara tunajatu acuare

tuque Yusu tsehue beta tupu jadya catiyaju, Yusupa tuja Etataque cuitadya jadya juyaju bacatsu.

Yusuja Ebacuaquera Etataqueja casa tsehue dutya acuareque

¹⁹ Jesusratu israelita cuanaja huaraji cuana anu-cacuare:

—Pusha amadya micuana cuejaya. Era quisarati ayaque, ai era ayaque tuque ecue casa tsehue ama aya, ni riya piji buchique. Dutya tuque aya ecue Etataja casa tsehue. Ecue Etatara ayaju ebaque camadya tuque aya. Ecue Etatara ayaque era dyaditu jadidya aya, ique tuja Ebacuaque juya tibu. ²⁰ Ecue Etatara ique dyaque iyuhueda baya, tuja Ebacuaque tibu. Turatu ique tyaishu ni ai en aya ama. Dutya tuja casa tura tyahua, tura ai ayaque ecue dyadi aishu. Tuja casa tsehue tuque ujejeda cuanaque chachaneya. Ayadya tuque dyaque ibedaque tuja casa bamere ishü. Baatsu micuana anajacataya. ²¹ Ecue Etataratu emaju cuanaque yudijidya nityatsuranuca aya. Chacha tujatu ecana amerenucaya. Tuatsehue tujatu ecana anishanucaya tere nuca ishü ama. Eratu tumebaedyä emaju cuanaque nityatsuranucaya. Ecue jadya inimeque juatsu tuna chachadya amerenucaya, ique tuja Ebacuaque tibu. ²² Ecue Etatara ama “Tuna ecajuchati” jadya abüque. Ique tura tyahua casa “Dutyä jidama cuanaque ecajuchati” jadya aishu. ²³ Jadya tura ique amerehua dutyaja tunaja ique mui ishü, tuque muitaya bae cuitadya ique muita ishü. Ique ni micuanara muiya ama, jutaquiju taa tuque micuana ecue Etata Ique Cuadishaquique muiya amadya.

²⁴ “Pusha amadya micuana cuejaya. Era cuejaya eque aniya cuanaque, Ique Cuadishaqui queja catyatiya cuanaque tuna tere baecua anibuque. Yusu queja tuna judirubuque ni eje tupu jacanuca ishü ama. Yusratu ni riya piji buchique juchaqui baya ama tuaqueja catyatiya cuanaque. Icuene tunajatu Yusu japada bacuare. Emaju bucha tuna junenicuare. Iyacuä tuna amena chacha aniya. ²⁵ Pusha amadya micuana cuejaya. Iyacuä emaju bucha cuanaratu bacaya era cuejayaque. Yusuja Ebacuaque queja catyatitsu, tuna Yusuja yacuaju anibuque. ²⁶ Jadya anie tuna Yusu tsehue terenuca ishü ama jubuque, ecue Etataja tuna jadya anisha ishü casa aniya tibu. Tumebaedyä tura ique tyahua tumeque casa eaqueja catyatiya cuanaque tere baecua anisha ishü. ²⁷ IQUE ECUITA tibu, ecue Etatara cuatsashahua jidama cuanaque nrecatura ishü, cuejaya equedyä aniya cuanaque jidaque tyaishu jadya. ²⁸ Neanajacataume era jadya cuejayaju. Juetibuquetu huecaca eje tupu dutya emaju cuanara ecue etsuri bacabuqueque. ²⁹ Netitsurabarebuque tuna tunaja uhuacuare cuana juque. Jida juhua cuanaque tuna chacha aninucabuque, ni eje tupu majunuca ishü ama, Yusu jacanuca ishü ama. Jidama juhua cuanaque tuna chachadya aninucabuque. Netitsuranucatsu tuna canerecati ishüju nubidirubuque ni eje tupu tuhuaque cuinanancuca ishü ama, —jadya tujatu ecana cuejacuare.

Jesús Yusuja casa tsehue dutya ayaque cabamereticuareque

³⁰ Jesúsra tuna bahuityanucacuare:

—Dutyä era ayaque tuque aya ecue cuita casa tsehue ama. Yusuja casa tsehue tuque aya. Eratu nrecaturabuque era amereya eque ama aniya cuanaque. Amereya eque aniya cuanaque bacue jidaque tyabuque. Dutyä era ayaque tu tuyu. Ecue Etatara amereyaque cuita camadya tuque aya. Ecue inime equedyä jutidya ama tuque aya, tuja inime eque, Ique Cuadishaquija inime eque. ³¹ Ique ni ecue taca ishüdyä jutidya equisaratiu, idya jutidya ni ejuu “Dutyä tuque aya Yusuja casa tsehue”, eejeneu amadya micuanara ique. Peyajatu ataquidya ecue ishü jida quisarati. ³² Aniyatu peya ecue ishü jida quisarati ayaque. Tumeque tu ecue Etata. Tuquetu bahue ique eje buchique. Ique bahuedya tuque yuneri quisaratiyaque. ³³ Icuene tuque micuana ecuita cuana cuadishacuare Juan Ecuita Cuana Utsaqui queja, eje buchique ique jadique bacadurati ishü. Tura ique eje buchique cuejahuaquetu yuneriquedyä. ³⁴ Huecashaya micuana era, tura ique jadya ayaque quisarati jadya acuareque, micuana eaqueja catyatitsu quinajacameretitaquique. Jadya ama bucha tuque sareya ama ni ejeque ecuita ique aique pana adebamere aishuque. ³⁵ Ude tsehue cudatitsu ecuana bahue eje eque cuayaque. Juan tu ude buchique jucuare. Turatu Yusuja quisarati cuejacuare micuana Yusuja biji eque ani ishüque bahue juishü. Ejetsunue ama micuana pureama juhua tura cuejayaque bacatsu.

³⁶ “Aniyatu peya eje bucha eque ique eje buchique bahue jutaquique. Riyaque tu era Yusuja casa tsehue ayaque. Arepa micuana Juan Ecuita Cuana Utsaquira ique eje buchique cuejacuare ama bucha, era cuitadya ayaque baatsu, pana ejenedya tuque micuana aya ique Mesiasque. Ecue Etatara amereyaque era ayaju baatsu tuque micuana pana ejene eau ique yuneridya Yusuja Ecuadishaque. ³⁷ Ecue Etata Ique Cuadishaquiratu tumebaedyä ecue ishü jida quisarati aya. Jadya ama bucha micuana tura cuejayaque bacacarama aya, ni micuana bacara aya tudya cuitadya caadecameretiyaju. ³⁸ Arepa micuana tuja quisarati bacahua ama bucha, tuque micuana ejenehua ama, ni micuana tura amereya eque aniya. Adebataqui ama micuana baya, eaqueja catyaticarama juya tibu, tura cuitadya cuadishahua queja. ³⁹ Micuanaratu pana adeba acara tsehue isaraya Yusuja quisarati. Tuyudyä tuque micuana adebaya isaratsu bahue micuana judadiya eje bucha anie tere baecua ishü jutaquique. Pana isara aatsu micuana bahue ejuu ique eje buchique. ⁴⁰ Jadya ama bucha micuana eaqueja catyaticarama juya. Eaqueja ni micuana ecatyatiu, Yusu queja micuana anidirubuque eje tupu jacanuca ishü ama.

⁴¹ “Eratu jidama ama inime baya ecuita cuanara ique muiya amaju. ⁴² Eratu adebaya eje bucha micuana inime cadujutiyaque. Eratu adebaya micuanara Yusu

iyuhuedama bayaque. ⁴³ Ique riyaque yahuaju junahua ecue Etata Yusura cuatsashayaju. Jadya ama bucha micuanara jida ama batsahua ni micuana eaqueja catyaticara juhua. Ejeu ni peya tuja inime tacaquedya jutidya, tumeque camadya tuque micuana jida ebat-sau. Tume micuana tuaqueja ecatyatiu. ⁴⁴ Micuana micuana eje buchadya camuimereticara juya ecuita cuana queja. Jadya ama bucha micuana Yusu queja eje buchadya camuimereticara juya ama. Jadique juatsu yuneridya micuana eaqueja catyatiya ama. ⁴⁵ Paju ama micuanaja inime era cuita camadya ecue Etataja yacuaju, "Riya cuanaque ri jucha metse", jadya aya bucha. Yusura tuyu juyaju baya bucha micuana cabatiya, Moisésra cuatsashahua eque anicara juya cabatitsu. Jadya ama bucha micuana Moisésra cuitadya eaqueja catyaticarama juhuaque cuejabuque. ⁴⁶ Moisesratu huenequere ique jadya ayaque. Yuneridya ni micuana ejenequena juhua Moisésra huenehuaque, tume micuana eaqueja catyaticuena juhua. ⁴⁷ Ejeneya ama micuana tura huenehuaque. Yuneri cuitadya tuque micuana era cuejayaque ejeneya ama, —jadyatu Jesúsra acuare israelita cuanaja huaraji cuana.

Jesúsra pishica pan, beta jae jadya umanashacuareque pishica mil ecuita cuana mihua ishú
(Mt 14.13-21; Mr 6.30-44; Lc 9.10-17)

6 Jadya juu jadya juatsutu Jesús cuacuare bei Galilea yueque macare. Tumeque beitu Tiberias bacani nucadya jucuare. ² Jesús tuhuaque bahue juatsutu jetiama ecuita cuana cuacuare tuaqueja, Yusuja casa tsehue ujejeda cuanaque chachaneyaju bachineque juatsu. "Peya ai cuana tujatu eau ejeque ecuitaja ataquique ama", jadya tunajatu inime jucuare. ³ Jesúsra ecua tsehue emataju tsuracuare. Tsuratsu ecua anibutecuare tuhuaque. ⁴ Tume patyatu israelita cuana chine catihuie jucuare. Tumeque chine bacanitu Pascua jucuare. ⁵ Tudyatu Jesúsra anibutetsu batsacuare jetiama ecuita cuana tuaqueja cuayaju. Tuna cuayaju batsatsu tujatu Felipe bacaduracuare:

—¿Ejuque tuque ecua pan ebacau riya jetiama ecuitaja ara ishú?

⁶ Jadya tujatu bacaduracuare Felipe, Felipera eje bucha quemitsae ayaque bacacara aatsu. Jesúsra icueneta bahue jucuare eje bucha mihuae dutya eauque. ⁷ Feliperatu quemitsacuare:

—Juhua aba. ¿Ejuque cuana taa tuque yatse equemiu? Tupu ama taa tu ejuu ni beta ciento ficha, peadya ecuita shucuta badi mere ejuuque etsujequi tupu, peadya peadyaja riya piji riya piji ara ishú, —jadyatu Felipera acuare.

⁸ Andrés, ecue ecaretu Jesús tsehue quisaratiticuare. Tumequetu Simón Pedro tsehuequique jucuare.

⁹ —Rehuari ebacua pijija aniya pishica pan cebada eaque, beta jae jadya. Jadya ama bucha ejebu tupue ni tu juma, jetiamaque ecuita mihua ishú, —jadyatu Andrésra Jesús acuare.

¹⁰ —Necuejacue ecuita cuana; paanibute ecua dutya, —jadya tura ecua acuare.

Iyabutyacuare ecua ecuita cuana. Tume tuna dutya tuhua anibutecuare nutsa dyaque. Jetiama ecuitatu jucuare. Deca cuana cuita camadya epiyebaque tuna jucuare pishica mil ecuita; tumbaedyá jetiama epuna, ebacua cuana jadya jucuare.

¹¹ Tudyatu Jesúsra inaticuare pishica pan.

—Yusurupai mique aya, Tata, mira ecua riyaque ara ishúque tyahua tibu, —jadya tujatu Yusu acuare.

Yusurupai au jadya aatsu tura ecua pan cuesi-baretsu tyabarecuare. Tura ecua pan tyabareya tupu tujatu jetiama umanashacuare. Tume tuna ecuanara tyabarecuare dutya anibutecuhua cuanaque. Tumbaedyatu jae anucacuare. Yusu yusurupai aatsu, tura ecua tyabarecuare, ecuita cuana tyabare ishú. Tura ecua tyabareya tupu tujatu jetiama umanashacuare. Tume tuque ecua anibarehua cuanaque tyabarecuare. Dutya tuna araaracuare, pana jeque juya tupu. ¹² Amena dutya jequebarehuaju ecua Jesúsra ihuaracuare:

—Ecuesi cuana nemepecue arabishahua cuanaque; ni peadya ecuesi paaputa ama, —jadya tura ecua acuare.

¹³ Tudyá ecua ejara cuana mepecuare. Mepetsu ecua jequeshacuare peadya tunca beta earacana jiti arida cuanaque. ¹⁴ Amena ecuita cuana Jesúsra Yusuja casa bamere ishú pan umanashahuaju baatsu, tuna jadya jucuare:

—Pusha ama cuitadya ri riyaque ecuita Yusura riyaque yahuaju cuadisha ana ahuaque tuja quisarati ecua cueja ishú. Riyaque ecuitadya tucue tuque ecua ihuayaque, —jadya tuna jucuare.

¹⁵ Tunara casada tsehue ecuari juishu dujucara ayaque caadebatitsutu Jesús peya queja amaca netisicuacuare, riyaque yahuaju ecuari juishu ama junahua tibu. Tuta taca pijitu cuacuare emata dyaque barudaju.

Jesús ena dyaque eque ajecuareque
(Mt 14.22-33; Mr 6.45-52)

¹⁶ Jjeti nubihuaju, amena apunahuaju ecua Jesúsra mepehua cuanaque bei jiruru butecuare. ¹⁷ Jesús tsehue ama ecua jucuare. Tume ecua anibutecuare cuabaju. Cuabaju anibutetsu ecua carequeticara jucuare yueque macare, epu ebari Capernaum bacaniju judiru ishú. Ecua amena carequetiyajutu apuna jida jucuare; dyaque apuda jucuare. ¹⁸ Tudyatu cuejipa casadaque jueticuare. Ena pacu casada muda jucuare. ¹⁹ Amena ecua pishica jadya ama juatsu shucuta kilómetro cuana diruhaju tuque ecua Jesús batsacuare ena dyaque eque ajetsu ecua queja diruyaju. Mubatsacuare tuque ecuanara, yatanana bucha baatsu. ²⁰ Ecua bajida juya baatsu ecua Jesúsra quiquecuare:

—[Bajida nejuume! ¡Idya ique! —jadya tura ecua acuare.

²¹ Tuja etsuri bacatsu ecua bajida jujacuare. Jida pureama tsehue tuque ecua iyabutyatsacuare

cuabaju. Jadya juu jadya juatsu ecuana judirucuaré bei yueque macare Capernaum japadama.

Ecuita cuanara Jesús sarecuareque

²² Huecacanucatsutu Jesús sare juya cuanara Jesús tsurucuaré ama. Bei jiruru queja judirutsu, tuna bahue judirucuaré Jesúsra mepehua cuanaque Jesús tsehue ama cuahuaque, peadya cuabaju cuita camadya tumeque cuabaju anibutetsu cuahuaque. ²³ Tuna Jesús eju cuahuaque bacadurani juyajutu Tiberias juque cuaba cuana junatibarecuare. Jaratsuracuare tuna riyabarepa buchaju pan tyahuaju Ecuana Cuat-sashaquira yusurupai ahuaaju, ecuita cuanara pan arachineju. ²⁴ Jadya equetu Jesús sare juya cuanaque tuque tuhuaque ama bahue jucuaré. Tumebaedya ecuana tura mepehua cuanaque ecuana tuhua amadya jucuaré. Tume tuna Tiberias juque cuaba ebari cuana junahuaju anibutebarecuare bei rique ishú. Capernaum ebuteju jaratsuratsu tuna Jesús sara cuacuare.

Jesús earaqui buchique

²⁵ Bei yueque macare carequetitsu tunajatu Jesús banaticuaré. Banatitsu tunajatu bacaduranaticuaré:

—¿Eje tupumi junachine, Ebahuityaquique? Mique sare juyaque ecuana riya, —jadya tunajatu anaticuaré.

²⁶ —Pusha amadya micuana cuejaya. Riyabarepa micuana arachine pan jae jadya era tyahuaju. Jequeya tupu micuana arachine. Jadya juatsu micuanara iyacua sarenucaya ecue mihuanuca ishú. Era riyabarepa achineque eje buchique jadique pana adeba aatsu ama micuanara sareya. ²⁷ Inime tupuqui neaume earaqui masadama tereyaque, riyaque yahuaju jari tupu micuanara arayaque. Aniyatu peya micuanaja ishú earaqui buchique. Tumera micuana iyacuaneya terenuca ishú ama ani ishú. Tumequetu IQUE ECUITARA tyayaque. Ecue Etata Yusu pureamaturayaque aniya tibu, tura cuejahua: “Tyacue ecuita cuana riyaque earaqui buchique, tuna tere baecua anisha ishúque”, —jadya tuna Jesúsra acuare.

²⁸ Tura jadya ayaju tunajatu bacaduracuare:

—¿Eje bucha anie ecuana ejuu Yusu pureamaturajaca ishú ama? —jadya tunajatu acuare.

²⁹ —Yusura micuana tura cuadishahua queja catyaticuaré aya. Idya tura cuadishahuaque. Jadya tibudyatu tuja bijida eaqueja micuana catyati ishú, —jadya tuna Jesúsra acuare.

³⁰ —Acue ecuanaja yatucaju ejeque ecuitaja ataquique ama, ecuanaja mique Mesiasque ejene ishú. ¿Ai tuquemi aya Yusuja casa tsehue ejeque ecuitaja ataquique ama? ³¹ Ecuana baba cuana japada midida ama anitaya cuanaju juneniyaju, tuna Moisésra dutya huecaca ara ishúque tyacuare, maná pan jiuque. Yusuja quisarati tu ehúene: “Duty huecaca tuna Moisésra tyacuare ara ishúque pan Yusura barepa juque cuadishayaque”, —jadya tunajatu acuare Jesús.

³² —Pusha amadya micuana cuejaya. Arepa ecuanaja baba cuana Moisésra maná tyacuare ama bucha, tyacuare ama tujatu ecana earaqui neri barepa juque. Ecue Etata tu tumeque earaqui neri tyaquique. Tuquetu tere baecua anisha ishúque tyaquique. ³³ Béru Yusura barepa juque maná cuadishacuare bucha, tumebaedya tura ique barepa juque cuadishahua. Riyaque yahuaju ani ishú arataquique bucha, tumebaedya micuana eaqueja catyatitaqui Yusu tsehue majubaecua ani ishú, —jadya tuna Jesúsra acuare.

³⁴ —Tumeque earaqui ecuana tyacue dutya huecaca, Ecuatsashaquique.

³⁵ Jesúsra tuna acuare:

—Idya earaqui neri buchique Yusuja ecuadishaque. Idya eanishaquique. Araaratsu micuana masadama aracara junucaya. Ijijitsu micuana masadama ijicara junucaya. Eaqueja nimee juyaju micuana era pureamatura neri aya. ³⁶ Jadya ama bucha micuana eaqueja catyaticarama juya, era micuana cuejahua baedya. ³⁷ Dutya, ecue Etata eaqueja amerehua cuanaque tu ecue cuanaque. Eaqueja catyaticara juya cuanaque tuque eaqueja ihuaraya. Bijidamadura nime ama tuna ecue. ³⁸ Ique barepa juque jehua ecue inime eque juishu ama, ecue Etataja inime eque juishu. Ique jehua Ique Cuadishaquija inime eque juishu. ³⁹ Ique Cuadishaquira narumerecara aya dutya tura eaqueja amerehua cuanaque. Jadya tibudya tunara jacaya ama. Era tuna chacha nityatsuranucabuque tere huecacaju Ique Cuadishaquija inime eque. ⁴⁰ Ecue Etataratu dutya ique adebaqui cuanaque, dutya eaqueja catyatiya cuanaque tere baecua anishacara aya. Eje tupu jacanuca ishú ama tujatu ecana tuaqueja amerecara aya. Era cuitadya tuna tere huecacaju chacha nityatsuranucabuque, —jadya tuna Jesúsra acuare.

⁴¹ Israelita cuanaja huaraji cuanatu cahuaiticuaré jutidya tuque quisaratiyaju bacatsu. Quisaratibarecuare jutidya tuna Jesúsja ishú.

—Earaqui neri Yusura barepa juque cuadishahuaquepa tume, jadyatu juya. ⁴² Jeequedya ri Jesús, Joséja ebacuaque. Adebaya tuque ecuana tuja etataque, ecuaque jadya. Tume jatsutu ¿eje bucha juatsu “Idya barepa juque ecuadishataque” jadya juya. Pusha pusha arida tuque, —jadya tuna jucuaré.

⁴³ Tuna jadya quisaratiyaju, tuna Jesúsra jadya acuare:

—Jadya nequisaratieme. ⁴⁴ Ecue Etata Ique Cuadishaquiratu ecuita cuana eaqueja catyaticuaré. Tura ni ecana jadya amereya ama, tume tuna eaqueja ecatyatiu amadya. Eaqueja catyatiya cuanaque tuna tere huecacaju emajuque nityatsuranucabuque. ⁴⁵ Icuene beru Yusu equeque quisarati cuejaqui cuanaratu huenequere: “Yusura cuitadya tuna cuejabuque dutya eje bucha tujaque juishuque” jadya. Ecue Etata cuejayaju bacaya cuanaque cuita camadya, tura cuejaya equedya aniya cuanaque cuita camadya tuna eaqueja catyaticuaré.

⁴⁶ "Pusha ama cuitadya ni ejeque riyaque yahuaju-jatu bama ecue Etata. Ecue camadya tuque ecue Etata eba, ique tuaquejaquedy a jehua tibu. ⁴⁷ Pusha amadya micuana cuejaya. Eaqueja catyatiyaque juatsu micuana terrenucanime ama. Anisiribuque micuana Yusu tsehue. ⁴⁸ Idya cuitadya earaqui buchique Yusuja ecuadishaque. Idya tere baecua anishaquique. ⁴⁹ Egipto juque cuinanatsu ecuanaja baba cuanara aracuare maná barepa juque Yusura cuadishayaque. Jadya ama bucha tuna majucuar. ⁵⁰ Aniyatu peya earaqui buchique barepa eque jecuareque. Tuaequeja catyatiyaque juatsu micuana terenuca ishú ama anibuque. ⁵¹ Idya cuitadya ique barepa juque junahuaque. Idya chacha anishaquique. Eaqueja catyatiya cuanaque tuna majunucabuque ama. Ique majudadiya, riyaque yahuaju cuanaque Yusu tsehue siri anisha ishú. Idya cuitadya catyatibuque, riyaque yahuaju cuanaja earaqui bucha, —jadya tuna Jesúsra acuare.

⁵² Jadya bacatsutu israelita cuanaja huaraji cuana tuna cama caquemitsati caquemitsati jutibunecuar:

—¿Eje bucha tyae tura ecuana eau tuja ecuita cuitadya ecuanaja ara ishú? [Eje bucha jadya juetu ejuu! —jadya tuna jubarecuare.

Adebataqui ama tunajatu bacuar tura eje buchique jadya ayaque.

⁵³ Jesúsra bahue jucuar eje bucha tuna tuna cama quisaratiyaque.

—Pusha amadya micuana cuejaya. Micuanara ni ecue erami araya ama, judirutaqui ama micuana Yusu queja tuque jacanuca ishú ama. ⁵⁴ Dutya micuana ecue erami ara juya cuanaque, ecue ami iji juya cuanaque micuana tere baecua anibuque, IQUE ECUITA juya tibu. Tere huecacaju tuque emaju cuanaque cani juque ecuita iyacua tsehue nityatsurabuque. ⁵⁵ Ecue ecuita tu earaqui neri buchique. Ecue ami bacue eijiqui neri buchique. ⁵⁶ Ecue erami ara juya cuanaque, ami iji juya cuanaque tuna eatsehue peadya camadya bucha, ique tuna tsehue peadya camadya bucha. ⁵⁷ Ecue Etata Ique Cuadishaquiquetu chacha aniya. Maju baecua tuque. Tuque aniya tibu, ique dyadi aniyadya. Tumebaedyatu era ecue erami ara juya cuanaque anishaya. Era tuna eiyacuane amereya. ⁵⁸ Jadya tu earaqui neri barepa juque junahuaque. Maná ecuanaja baba cuanara aracuare buchique ama tume. Arepa tuna aracuare ama bucha, dutya tuna majuterecuare. Ique barepa juque earaqui butecuare buchique. Dutya, ecue erami araqui juya cuanaque tuna maju baecua aninucabuque, —jadya tuna Jesúsra acuare.

⁵⁹ Jadya tuna Jesúsra bahuityacuare ecuita cuana Capernaumju caradati ishúque etareju.

Jesús eque cuita camadya ecuana maju baecua anibuqueque

⁶⁰ Jadique Jesúsra bahuityayaque bacatsutu jetiama tuque ijacabacaqui cuanara bijidamaduracuare tuja quisarati.

—Riyaque tura cuejayaque ri ibeda ejene ishú, adeba ishú jadya. Cujishaya cuita jutidya tura ecuana. Ni ejeratu eadebau ama, —jadya tuna jucuar.

⁶¹ Jesúsra bahuedy a jucuar tuna cama eje bucha cacuejatiyaque. Adebacuareadya tujatu ecana tunara tuja quisarati bijidamadurayaque. Jadya tibudya tujatu ecana bacaduracuare:

—¿Ecue quisarati tsehue ni taa micuana canimehualatishahua? ⁶² Iyacua micuana eaqueja catyaticarama juya. ¿Eaqueja ni micuana ecatyatiu, IQUE ECUITA ecue eaniqui juque butecuareque tsuranucayaju baatsu?

⁶³ Riyaque yahuaju cuanaquetu tere baecua eaniu, earaqui aratsu ama. Yusuja Espiritura camadya micuana maju baecua anishaya. Era cuejahaque ejenehua cuanaque cuita camadya tuna Yusuja Espiritu tsehue. Tuna cuita camadya tuna tere baecua anibuque.

⁶⁴ Jadya ama bucha micuana uma eaqueja catyatima jari, —jadya tuna Jesúsra acuare.

Jesúsra icuenetadya bahue jucuar eje cuanaque tuaqueja catyaticarama juhua cuanaque, ejera tuque ujeu baqui cuana queja inamedadiyaque jadya.

⁶⁵ Bahuityanucacuare tujatu ecana:

—Dutya ama micuana ecuique. Jadya tibudya micuana cuejanucaya. Ecue Etatara eaqueja nimee amereya cuanaque cuita camadyatu eaqueja catyatiya, —jadya tujatu ecana acuare.

⁶⁶ Jadique quisarati ayaju bacatsutu jetiama tuque quisaratiyaju pana baca juya cuanara Jesús jacacuare. Juneninucacuare ama ecana tuatsehue, tuque quisaratiyaju baca ishú.

⁶⁷ Tume ecuana Jesúsra bacaduracuare:

—¿Micuanara ni taa umaera aya bae jacacaradya aya? —jadya tura ecuana acuare.

⁶⁸ Simón Pedroratu quemitsacuare:

—Aijama, Ecuana Cuatsashaquique. Aijamatu peya ecuana Yusuja quisarati bahuityaquique. Mira peadya cuita camadya ecuana bahuityaya Yusu tsehue anisiri ishú eje bucha iyacuanetanae juishuque. ⁶⁹ Miquaqueja cuita camadya ecuana catyatihua. Bahuedy a ecuana mique cuita camadya Yusuja Ecuadishaque. Bahuedy a ecuana mique cuita camadya juchama nerique, —jadyatu Pedrora acuare.

⁷⁰ —Era micuana mepehua, micuana peadya tunca beta earacana. Jadya ama buchatu peadya micuana ducuque Satanás merequi juya, —jadya ecuana Jesúsra cuejacuar.

⁷¹ Jadya quisarati ayaquetu Jesúsra yana acuare Simón Iscarioteja ebacuaque Judas bacani jadya ayaque. Tumeque Judasya tu ecuana Jesús tsehue juneniya patya ecuana tsehue junenicuareque. Jadya ama buchatu Judasra cuitadya inamerecuare Jesús tuque ujeu baqui cuana queja.

Jesús tsehuequi cuanaque tuaqueja catyaticarama jucuarque

7 Jadya juatsutu Jesús junenicuare Galilea yahua epu cuanaju. Israelita cuanaja huaraji cuana tuque iyecara jucuar cuanaque tuna Judeaju jucuar.

Jadya tibudyatu tuqueja junenicarama jucuare. ² Israelita cuanaja chine ebaritu piji dyane jucuare. Riyaque chine juya tupu ecuana erere cuana catitsu tuhua ani bahue jucuare, ecuanaja baba cuana erere cuanaju béru anianinicuareque adebayaque. ³ Tuatsehuequi cuanaratu Jesús acuare:

—Rehua aniume. Judea yahuaju dirucue; Jerusalénju dirucue chine ishu. Tuhuatú jetiama micue quisarati bacacara juya cuanaque. Tuhua adirucue Yusuja casa tsehue ni ejeque ecuitaja ataquique ama, tunaja dyadi mira aya cuanaque baishu. ⁴ Jetiamaja eadeba jucara juyaratu etehua bamere ama aya tuja casa. Jadya eju- uque tunajatu aya eje buchadya dutyara petayaju acara. Mira ecuanaja baishu ejeque ecuitaja ataquique ama aya tibu, acuedya jetiama ecuitaja yacuaju, —jadyatu tuatsehuequi cuanara acuare, tuque ijarib- ayaque.

⁵ Tuatsehuequi cuanaquetu tuaqueja catyatima jari jucuare. Ejeque ecuitaja ataquique ama aishuque camadya bucha tunajatu inime jucuare.

⁶ —Huecaca rique ecue juetima jari ecue casa dutya ecuita bamere ishuque. Micuanara camadyatu eau eje tupudya jutidya micuanara ai acara ayaque. Jerusalén- ju cuacara juatsu, micuana cuayadya. ⁷ Yusuja ama cuanaquetu micuana tsehue cahuaitya ama. Eatsehue bacue ecana dyaque cahuaitya, era tuna jidama aniyaque cuejajacaya amaju. Jadya tibu tunara ique ujeu baya. ⁸ Necuacue micuana Jerusalénju chine jutayaju. Ique cuaya ama jari. Juetima jaritu huecaca tuhua ique casa cabameretiyaque, —jadya tuna Jesús- ra acuare.

⁹ Tuque jadya au jadya juatsutu tuatsehuequi cuanaque Jerusalénju cuacuare. Jesús bacue ejetsunue cuita ama Galileaju aninucacuare.

Jesús chine ishu tuna erere cuana catiyaju cuacuareque

¹⁰ Eje uma huecaca tuatsehuequi cuanaque chine ishu cuahuaju amatu Jesús cuacuaredya. Batayaju amatu cuacuare, etehua cuau jipenee. ¹¹ Israelita cuanaja huaraji cuanaratu Jesús ujeu baatsu sarecuare. Chinera cuahua cuanaque ducu tunajatu bacaduranicuare: —¿Bahua amami Jesús? —jadya tunajatu ecana bacaduranicuare.

¹² Tuhua jucuare cuanaque tuna Jesúsja ishu quisaraticuare. Etehua quisarati jipenee tuna jucuare.

—Jesús tu dyaque jidaque, —jadya tuna umae jucuare.

—Aijama, jidaque ama tume. Pusha pusha aridaque tume, —jadyatu jucuare peya cuana.

¹³ Arepa ecana jetiama Jesúsja ishu quisaratiya ama bucha, ejitaju cuita ama tunajatu quisarati acuare israelita huaraji cuanara ebacaju, tunara Jesúsja ishu jida quisarati ayaju bacatsu enerecaturauju caadebatitsu.

¹⁴ Amena chine patya patya dyane, chine terehuetu Jesús nubiticuare Yusuja etareju. Nubitsutu catibutic-

uare tuhua cuanaque bahuitya. ¹⁵ Israelita cuanaja huaraji cuanatu tuque jadya bacatsu anajacacuare.

—¿Eje bucha juatsu jatsu ri riyaque dyaque inime adebabada cuita? Tuque taa tu ecuana cabahuityatihua bucha ama cabahuityatihua. Tujatu ecuita cuana bahuityataqui ama, —jadya tunajatu ecana acuare tuhua anibareya cuanaque.

¹⁶ Jesúsra tuna quemitsacuare:

—Ecue casa tsehue camadya ama tuque ecuita cuana bahuityaya, Ique Cuadishaquija casa tsehue. ¹⁷ Ecue Etata Yusura cuatsashaya eque juya cuanaque tuna bahue ique Yusuja inime eque quisaratiyaque, ai ecue inime ama. ¹⁸ Aniyatu umae tunaja inime equedya jutidya ecuita cuana bahuitya juya cuanaque, Yusura casa tyaya tsehue ama. Tume cuanaque tuna jadya juya muita ishu cuita camadya. Peya cuana bacue jadya ama. Yusu Tuna Cuadishaquija casa tsehue tunajatu ecana bahuityaya. Tuja cuanaque tuna jadya juya Yusu muimere ishu, tunadya jutidya camuimereti ishu ama. Tuna tuna yuneri quisaratiya. Tunaratu ni ejeque ijahue aya ama.

¹⁹ “Moisesratu hueneacuare micuana dutya tuja cacuatsashati eque ani ishu datse. Jadya ama bucha micuana ni ejequedya jutidya tume cuanaque cacuatsashati eque cuita aniya. ¿Eje bucha juatsu jatsu micuanara iyecara aya? —jadya tuna Jesúsra acuare.

²⁰ Jetiama Yusuja etareju jucuare cuanaratu bacacuare Jesús jadya quisaratiyaju.

—Miquemi equijahuatique jutidya. ¿Aira jatsumi iyecara aya? —jadya tunajatu acuare.

²¹ Jesúsra tuna acuare:

—Icuene tuque ecue bamere pidya achine casa canajara huecacaju, ujejedaque chachanetsu. Ique jadya juya baatsu micuana eatsehue cahuaitechine, canajara huecacaju mere juhua baatsu. ²² Béru tuna Moisésra deca nana ebacua cuana ecuita huitu biti catibutishacuare cuinana huecaca catsurutihuaju, achaacha eque israelita jadique adebataqui juishu. Riyaque cacuatsashati aijama jarijutu ecuanaja baba cuana ecuita huitu biti catubuti bahuedya jucuare. Arepa canajara huecaca ama bucha, tuque micuana ebacua nana cuana ecuita huitu tubutaqui tumeque huecaca, cuinana huecaca catsurutiyaju. ²³ Canajara huecacaju micuana jubahuedya jadya, Moisésra cuatsashahua eque ama ejuu tibu. Micuana tumeque huecaca jadya juya tibu, ¿eje bucha juatsu jatsu micuana eatsehue cahuaitya era ujejedaque canajara huecacaju chachanechine baatsu? Micuanara ique aya iquepa Moisésja cacuatsashati eque ama juya jadya.

²⁴ Masadama ejeque misida neaume pana bau amaque yuneridya tumeque inime metseque bacuaque. ‘Jidamatu juhua’ jadya neaume ejeque baatsudya jutidya. Cajuchatiya bucha datse ni tuque micuana ebau cajuchatiyaque ama. Micuanara ni ejeque jidama juya jadya aya, pana bahue nejucue yuneridya tumeque jidama juhuaque, —jadya tuna Jesúsra acuare.

Jesús “Yusu quejaque ique” jadya cacuejaticuareque

²⁵ Tumetu umae Jerusalénju cuanaque tuna cama quisaratitibunecuare:

—¿Jeequedya ama ri ecuanaja huaraji cuanara iye-cara ayaque? ²⁶ Nepetacue. Jee di taa junetiya. Ecuita cuana bahuitya juya dutyaja yacuaju. Ni ejeradya jutidya inatsu etare apudaju ishaya. ¿Cacuaretihua ni taa tu inime ecuanaja huaraji cuana? ¿Chamacama ni taa tunajatu ejenehua tumeque ecuita yuneridya Mesiasque? ²⁷ Riyaque taa ri eje bucha jue juma Mesías. Bahuedya ecuanara ryaque ejuque jehuaque. Mesías neritu muya jutidya junabuque. Ni ejeque buchiquetu bahue jubuque ama ejuque junayaque, —jadya tuna jucuaire.

²⁸ Jesúsra tuna bahuityacuare jari Yusuja etareju. Tuna quisaratiyaque bacatsutu etsuri jebuda tsehue quisaraticuare:

—Micuanajatu inime juya ique adebaya bucha. Bahue bucha micuana cabatiya ique ejuque jecuaireque. Cuji micuana juya. Ecue inime taca eque camadya ama jecuaire, Ique Cuadishaquija inime eque. Tuquetu pusha pusha baecua; dutya tura quisarati ayaquetu ejenetaqui. Adebaya ama tuque micuanara. ²⁹ Era camadyatu pana adeba aya, ique tuaquejaquedya jecuaire tibu, tura ique cuadishacuare tibu, —jadya tuna Jesúsra acuare.

³⁰ “Yusuja Ecuadishaquedya ique” jadya quisarati aya bacatsu tuna cahuaiticuare. Inatsu tunara tibene risi acara acuare. Jadya ama bucha ni ejeradya jutidya inacuare, eje uma huecaca tunaja tuque ina ishique huecaca anicuare jari tibu. ³¹ Umaeratu ejeneacuare tuque Mesiasque.

—Ebacadya tuque ecuanaja Mesías neri junatsu patu abuque ni ejeque ecuitaja ataquique ama Yusuja casa bamere ishuhua jadique. Jesúsra ecuitaja ataquique ama aya tibu, jutaquiju taa tu yuneri cuitadya tumeque Yusuja Ecuadishaque, —jadya tuna jucuaire.

Fariseo cuanara Jesús inamere ishuhua ecuita cuana cuadishacuareque

³² Fariseo cuanara tuna jetiama, Jesússpa yuneridya Mesías neri jadya juyaju bacacuare. Jadya bacatsu tuna cuacuare pae cuanaja huaraji cuana tsehue quisaratira. Dutyara tupu inime bajejetsu tunajatu ihuaracuare Yusuja etare naruqui cuanaque.

—Neinaticue Jesús, —jadya tunajatu ecana acuare.

³³ Tuna tumeque inime bajeje juya tuputu Jesúsra ecuita cuana cuejaajecuarenya jutidya:

—Ejetsunue cuita ama micuana tsehue aninucaya. Masadama dirunucaya Ique Cuadishaqui queja.

³⁴ Sareya datse micuanara ique. Banucaya ama micuanara ique. Eju ique judiruyaju micuana judirutaqui ama, —jadya tuna Jesúsra acuare.

³⁵ —¿Eju jatsuri ryaque ediruu ecuanaja daditaquima baishu? ¿Ecuana ata cuana peya yahua cuana aniyaju ni taa ri dirucara juya? ¿Israelita cuana griego cuana

ducuque ni taa ri anisicuaya? ¿Bahuityacaradya ni taa tujatu aya tumebaedya israelita ama cuanaque dyadi?

³⁶ Ecuana patu sarebuque. Banucaya amapa tuque ecuanara. Ecuana judirutaqui ama eju tuque judiruyaju. Etehua buchique tume. Adebaya ama tuque ecuanara, —jadyatu israelita cuanaja huaraji cuana tuna camadya jutidya jubarecuare.

Jesús tu ena cani juque ena tiku baecua buchique

³⁷ Jesúsra ecuita cuana tsehue quisaratinucacuare. Amena ishuhua chine huecacatu jucuaire, huecaca dyaque muidaque. Netitsuratsutu Jesús quisaraticuare:

—Eaqueja necatyaticue, micuana majunuca baecua anicara juya cuanaque. Nejecue eaqueja, ijicaraque espereju ebutetiu bucha. ³⁸ Ehuene tu Yusuja quisarati: “Eaqueja catyatiya cuanaque tuna eiyacuane juya terenuca baecua ani ishuhua. Tuna ducudyatu jubuque ena cani tiku baecua buchique”, —jadya tuna Jesúsra acuare.

³⁹ Jadya cuajayaque tuna Jesúsra cuejacuare; Yusuja Espiritujatu jacanime ama Jesús queja catyatiya cuanaque. Ena cani tiku baecuaque bucha, jadidyatu Yusuja Espirituja jaca baecua juya Jesús queja catyatiya cuanaque. Jadyatu Jesús jucuaire, Yusuja Espiritu ryaque yahua ju nama jariju. Junataqui ama jaritu jucuaire, Jesús Yusuja yacuaju muita ishuhua judirunucama jari tibu.

Ecuita cuanara bape bapedya jutidya Jesúsja ishuhua inime tupucuareque

⁴⁰ Jesús jadya quisaratiyaju bacatsutu tuhua jucuaire cuanara bape bape inime tupucuare Jesúsja ishuhua.

—Pusha ama cuitadya ryaquedya ri Yusu equeque quisarati cuejaquique. Mesías junabuque cuejaquiquedya tume, —jadyatu umae jucuaire.

⁴¹ —Tuque ama tume, —jadyatu peya cuana jucuaire.

—Tuquetu Mesías cuitadya.

Peya cuana bacue jadya jucuaire:

—Aijama, tuque ama tu Mesías. ¡Eje bucha jadya jue ni tu juma! Tuque Galilea juque junahua tibu, eje bucha jue ni tu Mesías juma. Mesías neritu Galilea juque ama junabuque. ⁴² Yusuja quisarati ehue equetu Mesías David eque ejuracanaque jubuque. Belénjutu cuinanabuque, ecuanaja ebaba David emuique anicuare epu juque, —jadya tuna jubarecuare.

⁴³ Tumetu ecuita cuanaja juticuare amadya inime Jesús eje buchique. Caquemitsati caquemitsati jutidya ecana jucuaire tuna cama. ⁴⁴ Umae cuanaratu inacara acuare. Jadya ama bucha ni ejera inacuare.

Israelita cuanaja huaraji cuana Jesús queja catyaticarama jucuaireque

⁴⁵ Yusuja etare naruqui cuanaque tuna Jesumadya judirunucacuare fariseo cuana queja, pae cuana queja

jadya. Jesús dujuya ama baatsu, tunajatu ecana bacaduratsacuare:

—¿Eje bucha juatsu jatsu tuque micuana betihua ama?

⁴⁶ Enaruqui cuanara tuna quemitsacuare:

—Dyaque jida ecuana bacahua tura quisarati cuana cuejayaque. Aijama tu peya, tuque bucha dyaque jida quisaratiyaque, —jadya tunajatu ecana acuare.

⁴⁷ —¿Micuana dyadi tura micuana ijahuedya ahua?

⁴⁸ Huaraji emuita cuanaque tuna tuaqueja catyatihua ama ni ejeque. Ni ejequedya jutidya ecuana fariseo cuana tuaqueja catyatihua ama. ⁴⁹ Ecuitedya cuanaque cuita camadya tuna tuaqueja catyatihua. Jadya tuna juya, ecuanaja cacuatsashati pana adeba aya ama tibu. Tuna tuna aishuque ama. Yusura tuna nerecaturabuque, —jadyatu jucuare israelita cuanaja huaraji cuana.

⁵⁰ Tuhuatu jucuare fariseo Nicodemo bacani. Tudyatu Jesús tsehue chineju quisaratira cuacuareque jucuare. Isaracuare tujatu fariseo cuana tuja ecare cuana:

⁵¹ —Dutyara tuque ecuana pana adeba aya ecuanaja cacuatsashati. Tumeque cacuatsashati eque tu tuyu ama ejeque jucha metse aishu, tumeque ecuita tsehue cuitadya quisaratimaque. Pana bahue ecuana jutaqui yuneridya tume jidama juchine jadya atayaque jidama juchineque. Jutaqui "jidamami juchine", jadya amaquedya Jesús, neihuarara ecuanaja yacuaju tuque cuita quisaratisha ishü, —jadya tuna Nicodemora acuare.

⁵² Tunaratu acuare:

—Mira taa tu inime tupuya Galileaju cuanara inime tupuya baedya. Mique taa mi Yusuja quisarati adebayaque ama buchadya quisaratiya, —jadya tunajatu ijaribayaque acuare.

—Jesús pa Yusuja quisarati cuejaquique, jadya tuna juya. Isaracue Yusuja quisarati. Tumeque quisarati eque tu ni ejeque Yusuja quisarati cuejaquique Galilea eque junaya ama, —jadya tunajatu acuare pusha pusha ayaque.

⁵³ Jadya juatsu tuna dirubarecuare tunaja etare cuanaju.

Fariseo cuanara epuna deca tsehue daditsu Jesús queja dujucuareque

8 Tudyatu Jesús tsuracuare uhua cuemusu Olivo Acuí Quini bacaniju. ² Peya huecaca apudajudyatu cuanucacuare Yusuja etareju. Jetiama ecuitaratu jipeticuare. Jipetihua jutu Jesús anibutecuare. Anibute jadya juatsu tujatu ecana bahuityatibunenuacuare.

³ Tumidyatu cacuatsashati bahuityaqui cuanara, fariseo cuanara jadya dujucuare Jesús queja peadya epuna. Arepa tuja yahuique neri aniya ama buchatu peya epuna cuanaja yahuique tsehue ani bijida jucuare. Fariseo cuanara patu peya deca tsehue jarayaju siraracuare. Tumepa tunajatu Jesús queja dujutsu, dutyaja yacuaju nityacuare tunaja peta ishü. ⁴ Tuhua iyabutyatsu tuna Jesús tsehue quisaratitibunecuare:

—Ebahuitya quique, riyaque epuna tuque ecuana peya epunaja yahuique tsehue sirarahua. ⁵ Riyaque epuna tuque ecuana dyaque inime metse baya. Moisésra cuatsashahua equetu tumu tsehue iyetaqui epuna peya deca tuja caquemitiqueremaque jaraquereyaque. Mira bacue ¿eje bucha baya? ¿Tumu tsehue iyetaqui, iyetaqui ama ni taa? —jadya tunajatu acuare tuque nime adebayaque.

⁶ Tunaratu Jesús jidama quisaratishacara acuare, tuque jucha metse amerecara aatsu. Tura tuna quemitsacuare ama. Huipuchitanatsutu remecuare jutidya. Reme jadya juatsu tujatu emetucu sapara tsehue yahuaju huenetibunecuare. ⁷ Bacadurajacuare ama tunaja tuque. Remehuaquetu netitsuranucacuare. Pana neti junucatsu tujatu ecana acuare:

—Ejeque ni micuana cajuchatima cabatiya ni riyá piji buchique, turadya riyaque epuna tumu tsehue maremetse paa, —jadya tujatu ecana acuare.

⁸ Yudijidya remenucatu jucuare Jesús. Remenuca jadya juatsu tujatu huenenuacuare yahuaju. ⁹ Amena tuja quisarati bacatsu dutyadya ecana juchaquique caadebatibarecuare, dutya jidama inime tupuhuaque adebatsu. Dutya ecana peadya peadya cuinanabarecuare. Esiri cuanaque tuna icuene cuinanacuare, tupuju dutya ecuita cuana. Cuinanatsu tuna Jesús camadya epuna tsehue shanacuare. Amena dutya cuinanaterehuajutu Jesús neticuare. ¹⁰ Peya ecuita cuana cuinanaterehua baatsu tujatu epuna jadya acuare:

—¿Are mique jidama acara juhua cuanaque, mama? ¿Ni ejera buchiquemi tumu tsehue marehua?

¹¹ Tudyatu acuare epunara:

—Aama cuitadya, tata, ni ejera bucha. Dutya tuna cuinanaterehua.

Tudyatu Jesúsra acuare:

—Ni erami cuejaya amadya micue jucha tibu iyetanataquique. Dirucue. Cajuchatinucaume camadya, —jadya tujatu acuare.

Jesús tu hueca buchique

¹² Yudijidyatu Jesúsra isaranucacuare ecuita cuana Yusuja etareju:

—Ique hueca buchique. Yusuja quisarati micuana bahuityaya, micuana dyaque jida tuyu ani ishü. Eratu anishasiriya eaqueja nimee juya cuanaque. Jacaya amadya tuna era. Adebamereya tuna Yusu, tuna ni eje tupu apudaju juneniya cuanaque bucha juishu ama, —jadya tujatu ecana acuare.

¹³ Tura jadya ahua jutu fariseo cuanara jadya acuare:

—Miquemi micue inime tacadya jutidya quisaratiya. Jadya tibudya tuque ecuana ejenetaqui ama baya mira cuejayaque, peya mique eje buchique micue ishü quisaratitaqui tibu, —jadya tunajatu acuare.

¹⁴ —Arepa ecue inime tacadya jutidya quisaratiya ama bucha, era cuejayaquetu yunerique. Ique bahue ejuque ique junahuaque, eju diruyaque jadya. Micuanara bacue adebaya ama. ¹⁵ Arepa micuanara ique eje buchique adebaya ama ama bucha, micuanara "ecajuchati" jadya aya. Riyaque yahuaju cuanaja inime

tupudya jutidya tuque micuana aya. Era bacue ni ejeque buchique “Ecajuchati mique” jadya aya ama, arepa era dutya adebaya ama bucha. ¹⁶Jadya ama bucha, era ni eau “Riyaque ri ecajuchati”, yuneri ecajuchatidya tuque. Era ni aya “Jeequeri ecajuchati”, era camadya amatu jadya aya. Ecue Etataratu tumbaedy aya. ¹⁷Ecuanaja cacuatsashati Moisésra huenecuareque tu jadya: “Beta ebaqui juhua ecatsera ni tume bae cuinetse aya quisarati, tatsera cuejayaque tu yuneri”. ¹⁸Aniyatu beta ecue ishuhua quisaratiyaque, idya cuitadya, tumbaedy ecue Etata Ique Cuadishaquique. Tume bae cuinetse quisarati aya tibu, ejenetaquidya yatse, —jadya tuna Jesúsra acuare.

¹⁹—¿Ejeque tuque micue Tata? —jadya tunajatu bacaduracuare.

—Ique micuanara adebaya ama. Yutsumadya ecue Etata adebaya ama tuque micuanara. Ique ni micuana eadebau, tumbaedy tuque micuana ecue Etata eadebau, —jadya tuna Jesúsra acuare.

²⁰Jeeque tuna Jesúsra cuejacuare Yusuja etareju bahuityayaque. Tuquetu ecuita cuanara Yusuja ishuhua chipiru ishayaque equiniqui peque juneticuare. Tuque ujeu baqui cuanaratu tibene risi aishuhua inacara acuare. Jadya ama buchatu ni aira buchique inacuare ama, risi-ta ishuhua huecaca tuja juetima jari tibu.

“Eju ique diruyaju micuana judirutaqui ama” jadya Jesús jucuaque

²¹Yudijidya bahuityanuca tuna Jesúsra acuare:

—Masadama rehuaque dirunucaya. Yanacana cuita micuanara sareya. Banucaya ama micuanara ique. Eju ique dirunucayaju, micuana judirutaqui ama, —jadya tujatu ecana acuare.

²²Tumetu israelita cuanaja huaraji cuana cabacadu-ratibarecuare tuna cama:

—¿Tuta taca quiyeti ni taa ri juya? ¿Jadya tibu di taa ri jadya juya “Judirutaqui ama micuana eju ique dirunucayaju”? —jadya tuna jucuaque.

²³—Micuana micuana rehuaque riyaque yahua juque. Ique bacue yuqueja barepa juque, riyaque yahua juque ama. ²⁴Micuana micuana Yusuja jucha se-camaque majubuque. Micuanara ni ique ejeneya ama Yusuja Ecuadishaque jadicuare, eaqueja nimee ama ni micuana juya, tume micuana majudadiya micuanaja jucha cuana apupashamaque, —jadya tuna Jesúsra acuare.

²⁵—¿Ai jatsu mique? —jadya tunajatu bacaduracuare.

Tume tuna Jesúsra quemitsacuare:

—Bahuedya ni micuana. Eje uma cuejadya micuana ahua amena. ²⁶Aniya jari tuque ecue jetiama micuana cuejacara ayaque. Adebamerecara micuana aya micuana ecajuchatique. Arepa micuanara ique ejeneya ama ama bucha, era cuejayaque tu yunerique, Ique Cuadishaquique pusha pusha baecua tibu. Tura ique bahue amerehuaqueri era cuejaya riyaque yahua jucha cuanaque, —jadya tuna Jesúsra acuare.

²⁷Jesusratu Etataque Yusu jadya ayaque jadya quisarati acuare. Jadya ama bucha israelita huaraji cuanara adebacuare ama. ²⁸Jadya tibudya tujatu ecana pana cueja aajecuareadya jutidya.

—Iyacua micuanara adebaya ama ique aique. Ique curusuju tatameretsu eje umara micuanara adebabuque ique Yusuja Emepeque. Chamacama micuana umae bahue jubuque era ecue inime taca eque ama ayaque. Chamacama micuana bahue jubuque, era ecue Etata cuita camadya bahue amereyaque era cuejayaque. ²⁹Eratu ajacaya ama Ique Cuadishaquira amereyaque. Jadya tibudyatu tuque eatsehuedya. Jacanime ama tuja ique, —jadya tuna Jesúsra acuare.

³⁰Jadya Jesúsra cuejayaju bacatsu tuna umada catyaticuare tuaqueja.

Yusuja cuanaque, Ijuhaja cuanaque jadya

³¹Jesústu israelita cuanaja huaraji cuana tsehue quisaratinucacuare, tura cuejayaque ejenequi juhua cuana tsehue:

—Micuana ni era amereya eque juajeyadya jutidya, tume micuana yuneridya ecue cuanaque. ³²Yuneridya ni micuana ique eje buchique cabahuityatiya, adebadadiyadya tuque micuana yunerique era cuejayaque. Pana adeba aatsu micuana einajacaque bucha. Metsequi bucha micuana jujacaya, —jadya tuna Jesúsra acuare.

³³—[Ecuana ecuanara Abraham eque ejuracana cuanaque! Ni eje tupu ecuanara emetsene cuanaque bucha! ¿Eje bucha juatsu jatsumi “Metsequi cuana bucha ecuanara jujacaya” jadya juhua? —jadya tunajatu acuare Jesús.

³⁴—Cajuchaticaraque cajuchatiya cuanaque tuna emetsene cuanaque bucha, cajuchaticaraque ama cabatiya tibu. Tunaja ishutu eje bucha cajuchaticaraque ama, emetseneja tuque metseque eje bucha jacataqui ama bucha. Satanás tu cajuchatiya cuanaque metseque. ³⁵Metsequiquetu emechiqui jaque ejujacaadya, emechiquira catyati ahuaju. Emechiquija ebacuaque bacue, tuja ebacuaque jujacanime ama. Narujacaya amadya tuja tuque. ³⁶Ique Yusuja Ebacuaque. Era micuana inajacamerehuaju tumetu Satanás ama micuana metseque. Amena micuana tura cuatsashaya eque jutaqui ama. Pana einajacadya micuana juya. ³⁷Arepa micuana Abraham eque ejuracanaque ama bucha, micuanara ique iyecara aya, micuanara era bahuityayaque ejenecarama aya tibu. ³⁸Ecue Etata bahuityayaque micuana era bahuityaya. Satanás tu micuanaja tata. Micuanaratu tura cuatsashayaque ajacaya ama, —jadya tuna Jesúsra acuare.

³⁹—[Aijama! Abraham tu ecuanara etata. Tuque anicuaque bucha ecuanara aniya, —jadyatu israelita cuanaja huaraji cuanara quemitsacuare.

—Arepa micuana Abraham eque ejuracanaque juya ama bucha, micuana tuque anicuaque bucha ama aniya. Yuneridya ni micuana Abraham anicuaque bucha anicara juya, tume taa micuana Yusura amereya eque

eaniu tuque anicuare bucha. ⁴⁰ Jadya ama bucha, arepa era micuana yunerique ecue Etata Yusura bahuityahuaque cuejehua ama bucha micuanara iye-cara aya. [Abraham tu jadya ejuu ama! Turatu ejenequere Yusuja yunerique quisarati cuejayaju. ⁴¹ Satanás juya bae cuitadya micuana juya. Tuque tuque micuanaja tata buchique, —jadya tuna Jesúsra acuare.

—[Aijama, jadya ama tuque! Yusuja biji eque ecuananiya. Yusu peadya camadya tuque ecuanaja Tata, —jadya tunajatu Jesús acuare.

⁴² —Ique Yusu quejaque jehua. Tuja casa eque junahua riyaque yahuaju. Yuneridya ni micuanaja Yusu Tata ejuu, iyuhueda micuanara ebau. Ique jehua ecue inime taca camadya ama. Yusura cuadishaya tibu ique jehua. ⁴³ Ecue quisarati tu micuanaja ishu etehua buchique, micuana tueque jucarama juya tibu.

⁴⁴ Micuanaja tata tu Ijahua jutidya. Micuana micuana junenicara juya tuja biji eque. Ijahuatu yuequedya quiyeti puji juhua. Tuquetu yuneri quisarati baecua; pusha pushadya jutidyatu tuque juya, tuque pusha pusha arida tibu. Tuque equequedya tu dutya yuneri quisarati baecua cuanaque. ⁴⁵ Ique bacue pusha pusha baecua. Jadya ama bucha micuanara ejenequere aya.

⁴⁶ Dutyara micuanara adebaya ique cajuchatimaque. Ni ejeja micuanaja “ecajuchati” jadya ataqui ama. Juttaquiju jatsu micuanara zeje bucha juatsu ejenequere aya era yunerique cuejayaju? ⁴⁷ Yusuja cuanaquetu tuja quisarati equedya juya. Yusu jaque ama micuana. Jadya tibudya tuque micuana Yusuja quisarati bacacarama aya, —jadya tuna Jesúsra acuare.

Jesús tu dyaque inime metseque Abraham bucha ama

⁴⁸ Israelita cuanaratu acuare:

—Yuneridya mique ecuananiya ijahua cuanara quijahuatishayaque jadya achine. Masa dyadi mi Samaria juque, ecuanara quisarati ahua baedya, —jadya tunajatu acuare.

⁴⁹ —Ique equijahuatigue ama. Ni ejeque ijahuara ique cuatsashaya ama. Eratu ecue Etata muiya. Micuanara bacue ique muiya ama. ⁵⁰ Arepa ique ita taca camuiticarama juya ama bucha, ecue Etatara ique muimerecara aya. Turatu nerecatuabuque ique muicarama juya cuanaque. ⁵¹ Pusha amadya micuana aya. Ejeque era cuejaya eque aniyaque tu maju ishuque ama, —jadya tuna Jesúsra acuare.

⁵² Tumetu israelita cuanaja huaraji cuanara acuare:

—Jadya mira cuejayaju bacatsu, ecuananiya bahuedya mique equijahuatigue. Abrahamtu Yusura amerehua eque anicuare. Jadya ama buchatu majucuarere. Beru Yusuja quisarati cuejaqui jucuarere cuanaque tuna Yusura amerehua eque anicuare. Jadya ama bucha tuna majucuarere. Tume jatsumi zeje bucha juatsu “Ejeque era cuejaya eque aniyaque tu maju ishuque ama” jadya juya? ⁵³ Abraham, Yusuja quisarati cuejaqui cuanaque jadya tuna majucuarere. ¿Ejetsunuetu micue tunaja bucha dyaque casa aniya maju ishu ama? ¿Ai bucha jatsumi mique cabatiya? —jadya tunajatu acuare.

⁵⁴ Jadya tuna juyaju bacatsu tuna Jesúsra acuare:

—Ique ni ita tacadya jutidya ecasumituu, tume taa ni aira buchique eejeneu ama. Jadya ama bucha ita taca ama camuimeretiya; ecue Etatara muimereya, tumeque micuanara micuanaja Tatapa Yusu ejuu jadya ayaquedya. ⁵⁵ Micuanaratu adebaya ama. Era camadyatu pana adeba aya. Ique ni “Yusutu era adebaya ama”, jadya ejuu, pusha pusha arida ejuu, micuana bucha. Tume bacue eratu yuneri adebaya. Eratu aya tuja eje bucha quisarati juya equedya. ⁵⁶ Abrahamtu dyaque pureama jucuarere, ejeque huecaca ique, Einajacamerequique junaya jadya bahue juatsu. Ique baatsutu dyaque pureama jucuarere, —jadya tuna Jesúsra acuare.

⁵⁷ —[Eje bucha jadya juemi ejuu! Aijama jari taa tuque micue ni pishica tunca mara. ¿Tume jatsumi eje buchique “Abraham tuque ecue eba” jadya juya? —jadyatu israelita cuanaja huaraji cuanara acuare.

⁵⁸ —Era cuejayaque tu yuneridya. Ique anihua Abraham ejitaju junime ama jariju, —jadya tuna Jesúsra acuare.

⁵⁹ Jadya ayaju tunajatu tumu inacuare, tuque iyecara aatsu. Tunara jadya ayajutu Jesús etehua cuinana jucuarere Yusuja etare juque.

Jesúsra yuequedya shuhuique capetatishacuareque

9 Jesusratu badirucuarere ecuita yuequedya shuhui ecuinanaque.

² —Ebahuityaquique, pusha amadya ni ri riyaque aija juchaju cuana jadya cuinanahua. ¿Shuhui ri, ecuaque, etataque ecatsa cajuchatihua tibu, tuja cuita juchajudya ni taa? ¿Aija juchajuri riyaque shuhui cuinanacuare? —jadya tuque ecuananiya bacaduracuare.

³ Jesúsra ecuananiya quemitsacuare:

—Micuana micuana dyaque cuji eju. Ni ejeja juchaju amatu tuque jadya cuinanahua. Jadyatu cuinanahua, ai tuja juchaju ama ni tuja etataque ecuaqueja juchaju ama. Riyaque ecuita tu shuhui, tuque capetatiya baatsusu, peya cuana Yusuja dyaque casa aniyaque bahue juishu. ⁴ Yusura ique cuadishahua tuque cuarequi mere juishu. Huecada tupu camadya ecuananiya mere juya bucha, jadidya tuque ecuananiya meretaqui emajaca aniya jari tupu. Apunahuaju bacue ecuananiya amena mere jucacaya. Jadidyatu juetibuque huecaca ecuananiya tuque merejadadiyaque. ⁵ Ique riyaque yahuaju aniya tupu, ique hueca bucha, era micuana Yusu adebamereya tibu, —jadya ecuananiya Jesúsra acuare.

⁶ Jadya quisarati aatsu tujatu ecuedi pushacuare yahuaju. Uyuuyu pijitu acuare tuja ecuedi tsehue. Tumeque uyuuyu tsehuedya tujatu pepacuare shuhuija yatucaju, tuque capetatisha ishu.

⁷ —Cuacue. Cajibururutiticue enahuicuare Siloé bacaniyu, —jadyatu Jesúsra shuhuique acuare. (Siloé jadique tu “ena jiriquini peya ejiri quiniyu pacacadiruyaque”).

Cuaatsutu shuhuique cajibururutiticuarere. Juetinucatsutu capetaticuarere amena. ⁸ Jadya baatsutu tumeque ecuita aniya peque aniya cuananiya tumebaedya icuene

tuque chipiru bacaani juyaju baqui jucuare cuanara jadya acuare:

—Nepetacue. Riyaque ecuitadya ri chipiru baca juyaque anianicuareque, —jadya tuna jucuare.

⁹—Tudya tume. Tumeque ecuitadya tume, —jadyatu umaera acuare.

—Aijama! Tumeque bataqui cuitadya tuque. Jeeque ecuita ri peya. Tuque ama tume, —jadyatu peya cuana jucuare.

Tumetu Jesúsra capetatishahuaque jadya cacuejaticuare:

—Idya ique; shuhui cuinanacuarequedya ique.

¹⁰—¿Eje bucha capatatiemi juhua? —jadya tunajatu bacaduracuare.

¹¹—Tumeque ecuita Jesús bacaniratu uyuuyu piji ahua. Tumeque uyuuyu tsehue pijidya tura yatucaju pepahua. Tuequedya tura ahua: “Cuacue Siloéju. Cajibururutiticue.” Jadya tura ahuajudya ique cuahua. Cajibururutitihua. Cajibururutititsu amena capetatihua, —jadya tujatu ecana acuare.

¹²—¿Eje dyane jatsu tumeque ecuita? —jadya tunajatu acuare.

—Juhua aba. ¿Eje queja cuana taa rique? —jadya tujatu ecana acuare.

Fariseo cuanara ecuita shuhuique capetatihuaque bacadura bacadura acuareque

¹³Canajara huecacajutu Jesúsra tuja ecuedi tsehue uyuuyu aatsu shuhuique capetatishacuare. Jadya tibudyatu umaera capetatihuaque fariseo cuana queja dujucuare. ¹⁵Junatihujutu fariseo cuanara bacadurat-sacuare:

—¿Eje bucha capetatiemi juhua?

—Jesúsra pepahua uyuuyu tsehue yatucaju. Jadya ahuaju cajibururutitihua. Cajibururutititsu amena capetatihua, —jadya tujatu ecana quemitsacuare.

¹⁶Tuequedya umae fariseo cuana jadya jucuare:

—Tuque capetatishaquiquetu canajara huecacaju mere juhua. Jadya tibudya ni tu Yusu equeque amadya, cacuatsashati cuana eque ama juya tibu.

Peya fariseo cuana bacue jadya jucuare:

—Shuhui cuanaque capetatishaquiquetu juchamaque ejuu. ¶Eje bucha bameree ni tu ama Yusuja casa cajuchatiyara! —jadya tuna jucuare.

¹⁷Adebataqui ama baatsu tunajatu yudijidya bacaduranuca acuare Jesúsra capetatishahuaque:

—¿Eje bucha tuquemi inime tupuya tumeque ecuitaju? Tura mique capetatishahua tibu, ¿ai bucha tuquemi adebaya? —jadya tunajatu acuare.

—Tudyatu Yusu equeque quisarati cuejaquique. Tuquetu Yusuja Ecuadishaque, —jadya tujatu ecana acuare.

¹⁸Israelita cuanaja huaraji cuanaratu ejenecarama acuare.

—Shuhui ama tucuetu cuinanacuare, —jadya tuna jucuare.

Jadya tibudya tunajatu ihuaracuare tuja etataque, ecuaque jadya bacadura ishu.

¹⁹—¿Metseja bacuadya ri riyaque ecuita?

—Jejee, yatseja ebacuadya tume.

—¿Shuhui cuinanacuare?

—Jejee, shuhuidyatu cuinanacuare.

—¿Tume jatsuri iyacua eje bucha capetatie juya?

²¹—Juhua aba. ¿Eje bucha capetatie cuana taa tu juhua? Baecua yatse aira tuque capetatishahuaque. Tuquetu amena esiri. Ebacua piji ama tuque. Ita nebacaduracue tuque. ¶Eje bucha cacuejatimaedyatu juma! —jadya tuna etataque ecatsera acuare.

²²Tatsejatu inime jucuare:

—Ecuana huaraji cuanatu juchine: “Nubitaqui amatu caradati ishuque etareju ‘Jesús tu Yusuja Emepeque’ jadya ejenequi juyaque”.

Jadya tibudya tatse huaraji cuana mubatsu jadya caquemitsacuare. ²³Jadya tibudya tuna ecuaque etataque ecatsera jadya acuare: “Ita taa nebacaduracue. Tuquetu amena esiri. Ebacua piji ama tuque”.

²⁴Yudijidya ihuaranuca tuna anucacuare capetatihuaque.

—Tuyu ecua cuejacue, Yusura mira dutya quisarati ayaque bacayaque adebatsu. Ecuana ecua bahue mique capetatishaquijuhuaquetu jucha aridaque. ¿Jadidya?

²⁵—Ique baecua tuque juchaqui, juchama jadique. Camadya ique bahue. Ique yuequedya shuhui capetatiyaque ama tura capetatishahua, —jadya tujatu ecana acuare.

²⁶Yudijidya bacadura tunajatu anucacuare tumeque ecuita:

¿Eje bucha capetatishae cuita turami ahua? —jadya tunajatu acuare.

²⁷—Amena micuana cueja beta ahua. Ejenecarama micuanara aya. ¿Aishu jatsu micuana yudijidya cuejanuca cuejanuca eau? ¿Micuana ni taa micuana junenicaradya juya tuatsehue? —jadya tuna ecuitara acuare.

²⁸Ecahuaiti tuna jucuare tuatsehue. Ijillahuanacuare tunaja tuque.

—¶, aijama! Ecuana ecua tuatsehue junenicarama juya. Mique taa tuatsehue junenicue, ecua aijama. Ecuonaratu ejeneya Moisésra huenecuareque camadya. ²⁹Ecuana ecua bahue Yusu Moisés eque quisaraticuareque. Jesús bacue ecua adebaya ama ni riya piji buchique, ni ecua bahue aira cuadishahuaque, —jadya tunajatu acuare.

³⁰Ecuitara tuna jadya anucacuare:

—Micuana micuana dyaque inime adebabada cabatiya. Jadya ama bucha micuana baecua aira cuadishahuaque. Baecua micuana ejuque tuque juhuaque ique capetatishaquique. ¶Era taa bape baya, micuana tuque ejuque baecua baatsu! ³¹Ecuana ecua bahue, Yusura juchaquique tuatsehue quisaratiyaju bacayaque ama. Turatu bacaya tuja biji eque aniya cuanaque cuita camadya. Tuque miqui cuanaque camadya tujatu ecana bacaya. ³²Yahua nanada equeque riyaque huecaca tuputu ni ejejadya jutidya ecapetatishau shuhui cuanaque. Jadya ama bucha

Jesúsra iyacua capetatishahua. ³³ Tuque ni Yusuja Ecuadishaque ama ejuu, eje bucha capetatishaedy a tura ama. Yusuja casa tshueque ama tu aidya juma, —jadya tuna ecuitara acuare.

³⁴ —Miquemi peya cuana bucha dyaque jucha ari-daque! Micue juchajudyami shuhui cuinanacuare. Mique jadya ama bucha, mira ecuana ecuana cuitadya bahuityacara aya, —jadya tunajatu acuare.

Cuinanashacuare tunajatu tunaja yacua juque.

Jesús queja catyaticarama juya cuanaque shuhui buchique

³⁵ Jesústu bahue jucuare tumeque ecuita tunara tunaja yacua juque cuadishahuaque. Tuequedya tujatu tsuruticuare quisaratiqere ishü. Tsurutsatsu tujatu jadya bacaduratsacuare:

—¿Midyami ECUITA queja catyatihua? —jadya tujatu atsacuare.

³⁶ —¿Ejeque tuquemi jadya aya, tata? Bamerecúe ique, ique ejeque mira jadya ayaque bahue juishu, ique tuaqueja catyati ishü, —jadya tujatu acuare.

³⁷ —Tudya tuquemi iyacua cuita petaya. Tuatsehuedyami quisaratiya. Idya IQUE ECUITA.

³⁸ Jadya bacatsutu nuyucuare Jesúsja yacuaju, tuque muiyaque.

—Iyacua ique miaqueja catyatiya, Ique Cuat-sashaquique, —jadya tujatu acuare.

³⁹ —Ique riyaque yahua ju hua eaqueja catyatiya cuanaque jidaque tyaisü, ique bijidamaduraqui cuanaque nerecatura jadya aishu. Yusuja quisarati adebaya ama cuanaque tuna shuhuique bucha. Ique jehua tuna Yusuja quisarati adebamerera, tuna shuhuique bucha ama juishu. Peya cuanatu yanacana adebayapa tuna Yusuja quisarati jadya juya. Jehua ique tunara adebaya ama jadique bamerera, capetatiya bucha cuanaque shuhui amerera, —jadya tuna Jesúsra acuare.

⁴⁰ Jadya quisaratiyaju bacatsutu umae fariseo cuana tuque peque cuanaque jadya jucuare:

—¿Ecuana ni taa mira ecuana shuhui buchadya baya? —jadya tunajatu acuare.

⁴¹ Jesúsra tuna acuare:

—Aijama ni micuanaja Yusu eje bucha adebae aishuque ejuu, dyaque cuita ama micuana ecajuchati ejuu. Tume micuana dyaque ecajuchati, tura cuat-sashaya eque ama aniya tibu, arepa micuana pana adeba aya jadya juya ama bucha. Yusura micuana shuhuique bucha baya.

Jesúsra uhuisha naruquique cuatsabiji cuejacuareque

10 Yume bucha isaranucadyatu Jesúsra acuare fariseo cuana:

—Peadya ecuitatu uhuisha taracaju etsecue eque ama nubicuare. Taraca dyaque eque tsuratsu jutidyatu nubicuare. Tumequetu emechiqui ama jucuare, chiri puji jutidya. Uhuisha cuana ina, duju jadya aishu jutidyatu nubicuare. ² Anicuaretu peya ecuita. Tumetu

etsecue eque nubicuare. Tuquetu uhuisha cuana metseque neri jucuare. ³ Etsecue naruquiratu etsecue pacashaya uhuisha naruquique neri nubi ishü. Tume tujatu uhuisha tunaja ebacani eque cama ihuarabareya. Uhuisha cuanara tujatu etsuri adebaya. Tura tuna taraca juque etsecue eque cuinanashaya. ⁴ Tuna cuinanashatsu tuna turadya huidujuya. ⁵ Tunara adebayara ama huidujucara ayaju tunajatu tupujudya aya ama. Huanaya jutidya tuna, tuja etsuri adebaya ama tibu, —jadya tuna Jesúsra acuare.

⁶ Jadya cuatsabiji cuejayaque tuna Jesúsra acuare; tuja cuanaratu tuque adebaya, uhuisha cuanara enimetseque neri eadebau bucha. Jadya ama bucha tuna huecatanacuare ama tura cuejayaque. Ai ibeda buchiquetu tunaja ishü jucuare.

Jesús tu uhuisha naruquique neri buchique, tuja cuanaque jida naruquique

⁷ Jadya tuna Jesúsra bahuityanucacuare:

—Pusha amadya micuana cuejaya. Ique etsecue buchique, uhuisha cuana nubiquique etsecue buchique. Ique equetu Yusu queja nubidirutaqui.

⁸ Ique junama jariju tuna jetiama junacuare. Yusuja ecuadishaquepa jadya tuna jucuare; yuneri ama. Tunnadya tuna chiri puji cuana buchique; uhuisha metsequi cuanaque dujucara juya buchique tuna. Eaqueja catyatihua cuanaque tunajatu eaquejaque nime hual-lacara datse aya. Ecue cuanara tunajatu quisarati bacaya ama, uhuisha cuanara tuna metseque ama bacacarama eau bucha. ⁹ Idya Yusu queja enubicuare. Uhuisha cuanatu taracaju nubihuaju aija eje bucha ataqui ama; jadidya tuque eaqueja catyatiya cuanaque inajacamerebuque. Uhuisha cuana nutsa jidaju araara ishü dujuta bahue bucha, jadidyatu era tyaya ecue cuanaque tunara sareya cuanaque.

¹⁰ “Chiri pujitu nubi bahue chirira, uhuisha cuana tsapetilla ishü, iye jadya aishu. Jadya ishü camadyatu nubi bahue taracaju. Ique bacue jecuare eaqueja catyatiya cuanaque dyaque jida, pureama ani ishü, tuna ani siri ishü. ¹¹ Ique uhuisha metseque uhuisha cuana jida canarutiyaque buchique. Uhuisha jida naruquique tuja uhuisha cuna jiteque equiyemereti bucha, jadidya ique iyetadadiya ecue cuanaque jiteque. ¹² Et-sahuaquiratu uhuisha cuana naruya etsujequi ina ishü cuita camadya, ai tuna narucara aatsu ama. Tuquetu tuna naruquique ama ni tuna metseque. Jadya tibudya tujatu iba batsatsu, uhuisha cuana shanaya. Tujaque ama tibu, tujatu ecana icueneya ama. Tumetu ibara aracara ayaju uhuisha cuana dutya queja tsapetanatereya. ¹³ Jadya tu Yusuja ama ecuadisha cuanaque. Naruya ama tunajatu ecue cuanaque. Shanaya jutidya tunajatu ai mudaque baatsu.

¹⁴ “Ique uhuisha naruqui neri buchique, ecue cuanaque jida naruquique. Adebaya tuque ecue cuanaque. Ecue Etatara ique adebaya, iyuhueda jadya baya. Era dyaditu adebaya, iyuhueda jadidya baya. Tume bae nucadyatu era ecue cuanaque adebaya, iyuhueda jadya baya. Tunara bacue ique iyuhuedadya

baya. Uhuisha naruquira tuja uhuisha cuana jida naruya bucha, tumbaedyatua ique ecue cuana jiteque iyetadadiya. ¹⁶ Dutya uhuisha cuana tu peadya taracaju yuhua cama ama. Tumbaedyatu ecue cuanaque riyaque epuju camadya ama aniya; dutya queja tuna aniya. Tuna tuna eaqueja catyatidadiya. Tuna tuna era anishacara aya eque anidadibuque. Peadya camadya bucha tuna amereya, uhuisha cuana peadya cuareque camadya bucha. Ique peadya camadya tuna naruquique judadiya.

¹⁷ "Ique iyetanadadiya tuna Ijahua quejaque inajacamere ishü. Majutsu chacha netitsuradadinucaya. Tume ecue Etatara dyaque iyuhueda baya tuja inime juya eque ique tuna inajacamere ishü iyetanadadiya tibu. ¹⁸ Ique ecue inime taca eque iyetanadadiya eaqueja catyatiya cuanaque inajacamere ishü. Jadya jutaquique ama juatsu, ni aira buchique ique eiyeu ama. Aniya ecue inime iyeta ishü. Chacha netitsuranuca ishü ecue inime aniyadya. Jadyatu ecue inime tacaquedyatua jutidya, tumbaedyatua ecue Etatara inime ique majutsu netitsuranucaya, —jadya tuna Jesúsra acuare.

¹⁹ Jadya cuejayaju bacatsutu israelita cuanaja huaraji cuanaja dutya tupu ama inime jucuaré Jesús bacanuca ishü.

²⁰ —Tumequetu ijahua cuanara quijahuatishayaque. Equijahuatiqué tume. ¿Eje bucha juatsu jatsu tuque micuana bacayadya jutidya? —jadya tuna jucuaré jetiama.

²¹ —Aijama, equijahuatiqué ama tume. Ni ejeque equijahuatiquetu tuque quisarati bucha jida piji equisarati ama. Eje bucha capetatihanuca ni tu ama equijahuatira shuhui cuanaque, tura ahua bucha, —jadyatu peya cuana jucuaré.

Israelita cuanaja huaraji cuanara Jesús bijidamadracuareque

²² Eje uma huecaca junucatsutu israelita cuanaja huaraji cuana tsehue Jesús quisaratinucacuare. Eje uma badi cuetihuaju tuna chine junucacuare Jerusalénju. Mara cuetihuie tuque ecuanaja chine abahue jucuaré, ecuanaja baba cuanara Yusuja etare asicada cuanaque pana cuinanasha acuareque adeba ishüque. ²³ Jesús tu junenicuare Yusuja etare ehueji quinida emaque Salomón Adebá Ishüque bacaniju. ²⁴ Israelita huaraji cuanara baatsu tunajatu tabucuaré. Bacaduracuare tunaja tuque:

—¿Midyami Mesías Yusuja Emepeque? Ejitaju debataqui ecuaná cuejacue mique jadique juatsu, ecuanaja ejene piisi aishü. Beru mira ecuaná amena cuejacuejanichine ecuanaja debataqui ama, —jadya tunajatu acuare.

²⁵ Tudyá tuna Jesúsra quemitsacuare:

—Jadya datse micuana cuejahuá ique aique. Ejene carama micuanara ahua. Eje uma audya tuque ahua Yusuja casa bamere ishü. Tume cuanaque aatsudyá micuana ejitaju bamerehua ique Mesíasque, Yusuja Emepeque. ²⁶ Micuanaratu ejeneya ama ique

Mesíasque, micuana ecuique ama tibu. ²⁷ Ecue cuanara ique adebaya ique aique. Eratu adebaya eje cuanaque ecue cuanaque. Uhuisha cuana tuna naruquira amereya eque juya bucha, jadyatu ecue cuanaque era amereya equedyá juya. ²⁸ Eratu ecue cuanaque majunuca baecua anishaya. Ni eje tupu jacanuca ishü ama tuna Yusuja yacuaju judirubuque. Aija secanime ama ique. ²⁹ Ecue Etatara tuna eaqueja nimee amerehua. Aijamatu peya tuque bucha casaque. Ni aira buchique tuna ecue Etatara emetucu juque secaya ama. ³⁰ Ecue Etatara casa aniya bae cuita nucadyatu ecue casa aniya, —jadya tuna Jesúsra acuare.

³¹ Jadya tuque juyaju bacatsutu israelita cuanaja huaraji cuanara amena inaticuare tumu, tuque iyecara aatsu.

³² —Eje uma audya tuque micuanaja yacuaju achine ai jidaque ecue Etatara casa tsehue. ¿Ai, eje buchique era achine baatsu micuanara tumu tsehue acara aya? —jadya tujatu ecaná acuare.

³³ —Miquemi ecuita jutidya; miquemi Yusu tsehue beta tupu ama. Pusha pusha juyaquemi Yusu tsehue beta tupupa mique jadya juya. Miratu Yusu cahuaishaya micue quisarati tsehue. Jadya tibu mique ecuaná tumu tsehue acara aya, ni mira ai jidaque ahua tibu ama, —jadya tunajatu acuare.

³⁴ Jesúsra tuna quemitsanucacuare:

—Micuanaja cacuatsashatiju tu ehue Yusu jadya jucuaréque: "Micuana micuana yusu cuana". (Jadya tujatu quisarati ahua ecuatashaqui cuanaque jadya ayaque, Yusuja casa eque ecaná enaruqui juhua baatsu.) ³⁵ Bahuedya ecuaná Yusuja quisarati ehueque pusha pushaque ama, ni riyá piji buchique. Yusura cuitadyatu acuare tura tuja quisarati bacamerehua cuanaque "yusu cuana" jadya. ³⁶ Yusura cuitadya ique mepehua riyaque yahua ju cuanaque Ijahua quejaque inajacamere ishü. Turadya ique rehüa cuadishahua. ¿Eje bucha juatsu micuana erapa Yusu cahuaishaya jadya aya, ique Yusuja Ebacuaque jadya juhua baatsu, beta tupu tuque yatseja casa aniya jadya ique juhua baatsu? ³⁷ Era ni ecue Etatara ayaque aya ama, jutaquiju neejeneumedyá ique tuaquejaque jehuaque. ³⁸ Era cuejahuaque bacatsu ni micuanara ejene carama aya, era Yusuja casa bamere ishü ahua eque neejeneque. Micuanara ni yuneridya ejeneya ique Mesíasque, tume micuanara yuneridya ejeneya ecue casa ecue Etatara casa tsehue beta tupuque, —jadya tuna Jesúsra acuare.

³⁹ Jadya juyaju bacanucatsutu israelita cuanaja huaraji cuanara jucuaré anucacuare risitsu. Jesús tu huananucacuare jutidya.

⁴⁰ Jesús, ecuaná tura mepehua cuanaque jadya ecuaná dirunucacuare Jordán cueri yueque macare. Tuhua ecuaná judirunucacuare Juan ecuita cuana utsa icuene jucuaréju. ⁴¹ Umada ecuita cuanaratu baticuare tuque quisaratiyaju bacacara aatsu.

—Juan Ecuita Cuana Utsaquiratu acuare ama ni ai buchique ecuita ataquimaque. Jadya ama bucha tura ecuaná cuejahuá riyaque ecuita eje buchique.

Dutyadya tujatu cuejahua riyaque ecuita eje buchique yuneridya, —jadya tuna jucuare.

⁴² Tume tuna Jesús queja tuhuaque jetiama catyaticuare.

Lázaro majucuarique

11 Anicuaretu ecuita Lázaro bacani. Cujejedaditicuare tuque. Tuquetu María, Marta jadya tsehuequique jucuare. Betaniaju tuna anicuare. ² Mariatu Ecuana Cuatsashaquija ehuchaju etseri ijimedaque juratillaqui jucuareque jucuare, juratsu etsaru tsehue tillaqui jucuareque. ³ Tatse tsehuequique ujejeda juhuaju tatsejatu Jesús cuejamerecuare.

—Ecuana Cuatsashaquique, Lázaro micue iyuhuedaque tu dyaquene cuita, —jadyatu cuejamerehuara Jesús cuejaticuare.

⁴ Jadya quisarati bacatsutu Jesús jucuare:

—Jejee, ujejeda dyaquene cuita tuque. Yusu casa cabamereti ishutu jadya juya. Yusu, ique jadya muita ishutu jaya juya. Ai tuque maju ishuta ama tu jadya, —jadyatu Jesús jucuare.

⁵ Iyuhuedatu Jesúsra Marta, María, Lázaro jadya bacuare. ⁶ Arepa tuna iyuhueda baya ama bucha, Lázaro ujejeda dyaquene cuita jadya bacaya ama buchatu yume cuau ama jucuare. Aninucacuaretu tuhua beta huecaca.

⁷ Jadya juatsu ecuana Jesúsra acuare:

—Necuanucara iyacua Judeaju, —jadya tura ecuana acuare.

⁸ —Ecuana Bahuityaquique, amena ishuta mique Jerusalénju jutihuaju taa mi israelita cuanaja huaraji cuanara tumu tsehue iyecara achine. ¿Tumemi eje bucha juatsu tuhua cuacara junucaya? —jadya tuque ecuana acuare.

⁹ —Cuayadya ique. Ijetira ecuana peadya tunca beta earacana ura udaya dutya huecaca. Ejeque huecadaju ajeyaquetu chicaya ama, tura riyaque yahua juque hueca eque petaya tibu. ¹⁰ Ejeque meta ajeyaquetu echicau, tuja hueca ama tibu, —jadya ecuana Jesúsra acuare.

(Jadiquetu Jesúsra quisarati jadya acuare. Tuquepa eje bucha iyetae juma Yusura huecaca iyahuaque juetimaju.)

¹¹ Yara tupu juatsu tura ecuana cuejanucacuare:

—Ecuana iyuhuedaque Lazarotu tahuiya. Pacabatishati era, —jadya tura ecuana acuare.

¹² —Tahuiyaque juatsutu mejemeje juya, Ecuana Cuatsashaquique, —jadya tuque ecuana acuare.

¹³ Jadya quisarati ayaquetu Jesúsra “Lazarotu majuchine” jadique jadya acuare. Ecuana ratu cuji cuita juatsu “Lázaro tahuiya” cuana bucha jutidya bacuare.

¹⁴ Tume ecuana Jesúsra pana cueja acuare ecuana bahue ishuta:

—Lazarotu amena majuchine. ¹⁵ Cuachine ama ique tuque ujedaque bahue juya tsehuedya. Iyacua micuana ecue casa bamereya, micuana eaqueja nimee juishu. Micuana ni eaqueja nimee camadya juya, tume

ique dyaque pureama juya. Ita iyaja cuita emajuque nebatira, —jadya tura ecuana acuare.

¹⁶ —Ecuana dyadi tuatsehue necuaradya. Tuatsehue iyepee tuna neara, —jadya ecuana Tomásra acuare, pere cuinanacuare.

Jesús tu emaju cuanaque chacha amerequique

¹⁷ Junaticuare ecuana Betaniaju. Tumeque eputu Jerusalén japadama jucuare, quimisha kilómetro jujeri. Lázaro aniyaju junatima jarijudyatu umae cuinanacuare Jesús cuejara.

—Lazarotu amena majuchine. Pushi huecaca tuque ecuana amena emajuque papachineque, —jadya tunajatu cuejatsacuare.

¹⁹ Enuuque ecatse Marta, María jadya tatse paya jadya jucuare. Jetiama tatseja ata cuana peya cuana jadya tuna cuacuare tatse nime perera. ²⁰ Marta tunajatu cuejacuare Jesús amena japadama juajeyaque. Bahue juatsu tujatu cuinanatsu tsurutsacuare. María bacue cuinanacuare ama etare juque. ²¹ Martatu juticuare ecuana queja.

—Ique Cuatsashaquique, mique rehua juchineque juatsu taa ecue enuu majuquena ama juchine. ²² Ique taa bahue Yusura mique mira dutya bacayaque tyayaque. Mira ni tuque eisarau ecue eatsehuequija ishuta, Yusura taa tuque micue quisarati ebacau, —jadya tujatu atsacuare Jesús.

²³ —Micue nuutu emaju jaraya ama, —jadyatu Jesúsra acuare.

²⁴ —Jejee, adebayadya tuque era, tuque emaju jarasiriyaque ama. Bahuedya ique tuque dutya emaju cuanaque netitsuranucayaque huecaca chacha netitsuranucabuque, —jadyatu Martara Jesús acuare.

²⁵ —Idya emaju cuanaque chacha amerequique. Idya emaju cuanaque nityatsuraquique. Eaqueja catyatiya cuanaque, arepa majuya ama bucha tuna chacha netitsuranucabuque. ²⁶ Eaqueja catyatiya cuanaque tuna majutsu, chacha netitsuranucabuque. Yusuja yacuaju tuna chacha anibuque majunuca ishuta ama. ¿Ejeneyadya mira? —jadyatu Jesúsra acuare.

²⁷ —Jejee, Ique Cuatsashaquique. Ejeneyadya tuque era. Midyami Mesías, Yusuja Emepeque. Yusuja Ebacuaque mique. Midya mique ecuana ihuacuareque, —jadyatu Martara Jesús acuare.

Jesúsra Lazaroja uhuacuare enapacuareque

²⁸ Jadya quisarati amena aatsutu Marta cuacuare ejanaque María cuejara. Inime eque piji tujatu cuejacuare peya cuanara ebacaju:

—Ecuana Cuatsashaquique ri rehua. Ihuaramerehua tura mique. Jecuapa, —jadya tujatu aticuare.

²⁹ Jadya bacatsutu nere netitsuraquena jucuare. Jadya juatsutu Jesús tsehue quisaratira cuacuare. ³⁰ Junatima jari ecuana Jesús tsehue epuju jucuare. Martara tsurutsahuaju jari ecuana jucuare. ³¹ Tuequedyatu tuja ata cuana María nime perera cuahua cuanaque tuque nere netitsura juatsu cuinanaquenayaju baatsu,

tuna tupujudya acuare, tuque uhuacuareju enuuque enapara cuana cuaya bucha baatsu.

³² Tumetu Mariara ecuana queja junatitsu bacuare Jesús. Junatitsutu nuyunaticuare Jesúsja yacuaju.

—Ique Cuatsashaquique, mique rehua juchineque juatsu taa ecue enuu majuquena ama juchine, —jadya tujatu aticuare.

³³ Mariatu paya jadya jucuare. Tumebaedya tuque tajiage juhua cuanara paquerecuaredya. Tuque dyaque peya inime baatsutu Jesús dyadi niju pau, peya inime jadya jucuare. Dyaque peya inime ishutu ecana acuare. ³⁴ Tume tujatu ecana bacaduracuare tuhua jucuare cuanaque:

—¿Eju tunajatu Lázaro emajuque ishachine?

—Banacue, Ecuana Cuatsashaquique, —jadya tunajatu acuire.

³⁵ Tuhua junatitsutu Jesúsra enapacuare.

³⁶ Paya baatsutu israelita cuana tuhua jucuare cuanaque jadya jucuare:

—Dyaque iyuhueda tujatu Lázaro yanume juchine!

³⁷ Umae cuana bacue jucuare:

—Riyajari casa aniya atucama cuanaque capetatisha ishú. ¿Eje bucha amae di taa rejari aquena juchine Lázaro maju ishú ama? —jadya tuna jucuare.

Jesúsra Lázaro emajuque chacha nityatsuracuareque

³⁸ Tumetu Jesús cuacuare Marta, María, peya cuana tuhua jucuare cuana tsehue Lazaroja uhuacuareju. Dyaquetu capeyainimeticuare. Lazarotu eisha jucuare tumu ebari caniju. Cani tsecuetu tumu ebari tsehue etumu jucuare. ³⁹ Tuhua junatitsu tuna Jesúsra cuatsashacuare:

—Nenityasicuacue tumeque tumu etsecue penequique, —jadya tujatu ecana acuare.

—Jadya juume, Ecuana Cuatsashaquique. Riya taa tu ecayumati amena. Pushi huecaca tuque ecuana amena ishachineque, —jadyatu Marta majuchineja enuquera Jesús acuare.

⁴⁰ —Yuneridya ni mi eaqueja nimee juya, Yusurami tuja casa bamereya micue yacuajudya. ¿Jadya ama jatsú mique ahua? Ique pana ejene acue, —jadyatu Jesúsra acuare.

⁴¹ Tura jadya ahaju tunajatu tumu nityasicuacuare. Ebarucue queja bajiyutsutu Jesús Yusu tsehue quisaraticuare:

—Ecue Etata, yusurupai mique aya, mira ique bacaya tibu. ⁴² Adebaya tuque era, mira ique dutya huecaca era isarayaju bacayaque. Etsuri jebuda tsehuedya mique isaraya, rehua eatsehue cuanaja baca ishú, tunaja yuneridya ique micue ecuadishaque ejene ishú, —jadyatu Jesúsra Yusu acuare.

⁴³ Jadya juu jadya juatsu tujatu isaracuare jebuda:

—Lázaro, cuinanacue tuhuaque!

⁴⁴ Tumetu emajuque chacha netitsuracuare. Cuinanacuaretu caniju ishatanachineque. Chamacamatu cuinanacuare emetucu ecatse ehuachi ecatse jadya pirurichineque jirama tibu. Tuja ebutsequini bacue eraca tsehue edunu jadique.

—Pana jira neacue. Pabucucu, —jadya tuna Jesúsra acuare.

Jadya ayaju tunajatu jiracuare.

Jesús ujeu baqui cuanara tuque inamere ishú inime bajejecuareque

(Mt 26.1-5; Mr 14.1-2; Lc 22.1-2)

⁴⁵ Jadya Jesúsra ahuaque baatsutu umada israelita cuana María tajira cuahua cuanaque catyaticuare Jesús queja. ⁴⁶ Peya cuana bacue cuacuare fariseo cuana queja, Jesúsra eje bucha ahuaque cuejara. ⁴⁷ Tumetu fariseo cuanara pae cuanaja huaraji cuana cuejaticuare. Masadama tuna dutya israelita cuanaja huaraji cuana dyaque arida cuanaque casitaticuare.

—¿Eje bucha tuque ecuana Jesús eau? Dutyara bayaju taa tu aya Yusuja casa bamere ishúque. Jadya tibu taa ecana amena jetiama tuaqueja catyatiya. ⁴⁸ ¿Eje bucha jatsu tuque ecuana eau, tuja tume cuanaque ajaca ishú? ¿Eje bucha jatsu tuque ecuana eau, ecuita cuana tuaqueja catyatijaca ishú? Tuja cuanara ni ecuari bacanishaya, tume taa tu ecuanaja enaruqui Romajura ecuadishau rehua sudaru cuana ecuanaja epu tilla ishú. Tume taa tunajatu Yusuja etare erihuishatillanau. Ecuana baba cuanaja bahue eque taa tunara ecuana eanishajacau, —jadya tuna tuna cama jucuare.

⁴⁹ Caifástu tumeque mara pae dyaque muidaque jucuare. Tuquetu quisaraticuare:

—Micuana micuana baecua ni ai buchique. ⁵⁰ Dyaque jida neiyera jutidya Jesús, dutya ecuana etillatau tibu. Dyaque jida peadya camadya pamaju, dutya ecuana emajuju, —jadya tuna Caifásra acuare.

⁵¹ Turatu adebacuare ama eje buchique tura quisarati ayaque. Arepa tuque tumeque mara pae dyaque muidaque juya ama buchatu Jesús tsehue cahuaitecuare jutidya. Jadya ama buchatu Yusura adebamerecuare Jesús israelita cuanaja ishú majudadiyaque. Jadyatu quisaraticuare ai tuja taca inime ama. Yusura adebamereyaque tujatu quisarati acuare. ⁵² Jesústu israelita cuanaja ishú camadya ama majudaditaqui jucuare. Tuquetu majudaditaqui jucuare dutya queja cuanaja ishú, dutya ecuana peadya camadya bucha juishu. ⁵³ Caifásja quisarati bacatsutu tumeque huecaca eque israelita cuanaja huaraji cuanara Jesús iye ishú inime bajejetibunecuare.

⁵⁴ Jadya tibudyatu Jesús amena ejitaju cuita israelita cuanaja epu ebari cuanaju junenicarama jucuare. Tumetu Judea juque cuinanatsu, ecuana tsehuedya dirunucacuare Efraín bacani epuju. Tumeque eputu jucuare tsecada anitaya cuanaque japadama. Tuhuadya ecuana tuatsehue anidiruare.

⁵⁵ Jetiama israelita cuanatu epu cuana juque cuabarecuare Jerusalénju, amena Pascua chine japadama juajeya baatsu. Tumeque chine ishú tuna tunaja bahue cabajejetitaqui jucuare. ⁵⁶ Fariseo cuanara, pae cuanaja huaraji cuanara patuna amerecuare:

—Ejeque ni micuana bahue juya Jesús ejuque, necuejacue ecuana, ecuanaja inati ishú —jadya.

Jadya tibudyatu Yusuja etareju ai jidamaque eaniu cuanaque cabajejetira cuahua cuanara sarecuare Jesús. Cabacaduratibarecuarepa ecana tuna cama: —¿Eje bucha ni tu juya? ¿Ejedyatu Jesús chine ishu, aijama ni taa? —jadya tuna jubarecuare.

Mariara Jesúsja ehuchiju etseri ijimedaque juracuareque

(Mt 26.6-13; Mr 14.3-9)

12 Shucuta huecaca Pascua chine aniya jariju ecuaná Jesús tsehue cuacuare Betaniaju, Lázaro anicuareju, tura Lázaro chacha nityatsuranucachineju.

² Ecuaná junatihua jutu umae Jesúsja eadeba cuanara Betaniaju anicuare cuanara bajecuaré earaqui chineju tuatsehue araara ishu. Martara tuna tsahuacuare earaqui iya. Lazarotu mesaju Jesús tsehue araara anicuare, ecuaná, peya cuana jadya. ³ Tumetu Mariara etseri ijimedaque becuare kilo patya jaque dyane, nardo bacani, ijimedaque eaque. Tumequetu tsuje aridaque jucuare. Tumeque nardodyatu Mariara Jesúsja ehuchiecatseju juracuare. Juratsu tujatu tillacuare etsaru tsehue. Ijimedaquetu etare quini pashutanacuare. ⁴ Judas Iscariote Jesúsra mepehuaquedyatu dyaque ecahuaiti jucuare María tsehue. Tumequedyatu Jesús ujeu baqui cuana queja inameredadiqui juyaque jucuare.

⁵ Cahuaititsutu jucuare:

—¿Eje bucha juatsu jatsutu tumeque epunara ijimedaque catyati ahua ama? Umada tujatu chipiru inaquena juhua, quimisha ciento ficha dyaque. Peadya mara mere juatsu etsujequi einau tupu tuque. Jetiamatu nrecada cuanaque etsahuauque chipiru inatsu, —jadyatu Judas jucuare.

⁶ Jadyatu quisaraticuare, ai nrecada cuanaque tsahuacara aatsu ama, chiri arida juatsudya jutidya. Tuquetu ecuanaja chipiru naruquique jucuare. Tuhuadya tujatu chirichirinicuare tuhua ishatanayaque tuja ishu.

⁷ —Nereda María aume. Tujatu tumeque ijimedaque eiya juhua ique iyetahuaju papamajudya pepa ishu, —jadya tujatu Judas acuaré.

⁸ —Micuana ducutu jujacaya amadya nrecada cuanaque, ique bacue aijama. Ique micuana tsehue junenisiriya ama, —jadya tura ecuaná acuaré.

Lázaro tuna iyecara acuaréque

⁹ Umada israelita cuanatu Jesús Betania epuju junatihuaque bahue juatsu cuacuare tuaqueja. Cuacuare tuna ai Jesús jipidya baticara aatsu ama. Tumebaedya tunajatu Lázaro bacara acuaré, Jesúsra emajuque nityatsuranucacuareque. ¹⁰ Jesúsra Lázaro emajuque nityatsurachine tibutu umada israelita cuana Jesús queja catyaticuare. Jesús queja catyatitsu tunajatu pae cuanaja huaraji cuana amena bacacarama acuaré, Jesús cuita camadya. Jadya tibudyatu pae cuanaja huaraji cuanara Lázaro dyadi iyecaradya acuaré.

Jesús Jerusalénju judirucuareque

(Mt 21.1-11; Mr 11.1-11; Lc 19.28-40)

¹² Jesús ehuchiju pepatanahuaque peya huecaca nucatu jetiama Jerusalénju Pascua chine bacara cuaya cuanaque bahue jucuare Jesús amena tuhua junatihueque, amena tuque edijiju juajeyaqué. ¹³ Bahue juatsu tuna ejaqui cuana rarubaretsu, ejaqui cuana inabaretsu cuinanabarecuare Jesús tsurutsa ishu. Jadyatu ecuanaja bahue jucuare ecuarí junayaju ejaqui cuana inatsu tsurutsa. Quiqueajecuare ecana:

—¡Hosana! ¡Jida paju Yusuja ebacaniju jeyaqué! ¡Jida paju ecuanaja ecuarí, Israel eque ejuracana cuanaque naru ishu jeyaqué! —jadya tuna jubarecuare quique eque.

¹⁴ Ecuita jetiamaque tsurutsamaquedya patu burruju anitsuratsu Jesús cuacuare. Yusuja quisarati béru cuejatacuare bae cuitadyatu jucuare:

¹⁵ “Bajida nejuume, Siónju aniya cuanaque.

Micuanaja ecuaritu micuana queja junaya.

Burro dyaque equetu junaya”, jadyatu ehue

Yusuja quisarati. (Sion bacanidyatu Jerusalén jucuare.)

¹⁶ Dytá tume cuanaque baatsu, bacatsu ecuaná Jesúsra mepehua cuanara tuque ecuaná adebacuaré ama eje buchique jadya juyaqué. Ecuanaja ishutu etehuaque jucuare. Jesús emajuque netitsuranucahuaju, tuque Yusuja yacuaju judirunucahuaju ecuaná chamacama huecatanacuare Yusuja quisarati jadya ehueque. “Jesús jadya judadihuaquetu Mesías jadya judadiya jadya ehue eque cuitadya judadihua”, jadya tuque ecuanaja chamacama inime jucuare.

¹⁷ Jesús Jerusalénju cuana jarijudyatu tura Lázaro emajuque nityatsurayaju baqui juchine cuanara cuejacuaré peya cuana eje bucha juchineque. ¹⁸ Jadique quisarati bacatsachine tibutu ecuita jetieque ama cuinanacuare Jesús tsurutsa ishu. Bacara tunajatu acuaré emajuque chacha nityatsuranuca ishu casa aniyaque. ¹⁹ Jetiamara Jesús pureama ayaque bacatsutu fariseo cuana tuna cama quisaraticuare:

—¡Nebacacue eje bucha juyaqué! ¡Eje bucha jatsu ecuaná ejuu! Dytá taa tuna tuque bacaya, ecuaná ebacauque, —jadya tuna jucuare.

Griego cuanara Jesús sarecuareque

²⁰ Tuhuatu umae griego cuana jucuare Jerusalénju, israelita cuana tsehue Pascua chine cuetishara cuacuare cuanaque. Yusu muira tuna cuacuare. ²¹ Tunaratu jipeticuare Felipe. Felipetu jucuare Betsaida epu juque, Galilea yahua juque. Jipetitsu tunajatu isaraticuare:

—Jesús tsehue ecuaná quisaraticara juya, tata, —jadya tunajatu Felipe acuaré.

²² Jadya ahua jutu Felipe cuacuare Andrés queja.

—Griego cuana patu Jesús tsehue quisaraticara juya, —jadya tujatu Andrés aticuare.

Tuequedya tatse cuacuare Andrés tsehue Jesús queja.

—Griego cuana patu miatsehue quisaraticara juya, —jadya tatsejatu Jesús aticuare.

²³ Jadya bacatsu tatse Jesúsra acuare:

—Masadamatu juetiya huecaca IQUE ECUITA iyetanayaque, emajuque netitsuranucayaque. Jadya ejitaju jue tuque ecue casa, jidaque juya. ²⁴ Pusha amadya metse cuejaya. Ecaca ecuana uhuaya. Uhuahuajutu ecaca uhuahuaque pana cabapeti neri juya. Pana cabapeti juyaque ama juatsu, peadya ecaca camadya aniya. Cabapetiyaque juatsu, buraratsu, danetsutu umada ecaca juya. Tumebaedya ique majutaqui jetiama ecana eaqueja catyati ishu. ²⁵ Tumebaedya riyaque yahuaju eje bucha tsehue ani dyaque bijida cuanara tunajatu majutsu Yusu dyaque japada babuque. Riyaque yahuaju eje bucha tsehue ani bijidamaduraqui cuanaque tuna Yusu queja anidiribuque ni eje tupu jaca ishu ama. ²⁶ Yuneri cuitadya ecue inime eque anicara juya cuanaquetu era cuatsashaya eque juya. Era cuatsashaya eque jujacaya ama cuanaque tuna eatsehue anisiribuque. Tuna tuna ecue Etatara muitsabuque, —jadya tatse Jesúsra acuare dutyaja ijacaju.

Jesús majuyaque cacuejaticuareque

²⁷ Jesústu dutyaja ijacaju quisaratinucacuare:

—Bahuedya ique ejetsunue amatu amena ique iyetana ishuque. Dyaque taa peya inime cabatiya. ¿Eje bucha dyadi tuque era ecue Etata aya: “Tata, peya eje bucha eque micue inime eque jutaquique juatsu taa mique eau, ‘Jadya nerecaturae taa aume’”, jadya ni taa eau. Jadya ama bucha maju ishudya riyaque yahuaju junahua tibu, —jadya tujatu ecana acuare.

²⁸ Tumetu Jesúsra tuja Etataque acuare:

—Tata, micue dyaque casa, jidaque jadya aniyaque ique eje bucha juya eque pabamere, —jadya tujatu tuja Etataque acuare dutyaja ijacaju.

Jadya ahujutu barepa juque quisarati bacataqui juquare:

—Amenatu era bamerehua ecue dyaque casa, jidaque, ique emui juishu. Bamerenucayadya tuna era, “Dyaque jida, casada jadya taa mi, Yusu”, jadya tuna juishu, —jadyatu Yusu barepa juque quisaraticuare.

²⁹ Tuhua ecuana tsehue juquare cuanaratu bacacuare etsuri barepa juque. Umaeratu bacacuare tiritiya bucha.

—Tiritiya tuque.

—Aijama, tiritiya ama tuque. Barepa juque Yusu tsahuaquique jutidyatu quisaratiya, —jadyatu umae cuji cuita juatsu juquare.

³⁰ Tume ecuana Jesúsra isaracuare, tumebaedya peya cuana tuhua juquare cuanaque:

—Ecue Etatatu barepa juque quisaratihua ique cuejayaque ama. Micuanadya tura micuana cuejahua.

³¹ Amenatu ejetsunue ama Yusuja tuaqueja catyatima cuanaque “Micuana micuana jucha metse” jadya aishu. Ejetsunue amatu bataqui ama ecue ama cuanaque cuatsashaquique ecue casa seca ishu. ³² Ique curusuju tatatanaya maju ishu. Ique tuhua curusuju etata

badeya baatsu tuna jetiama eaqueja catyatiya, —jadya ecuana Jesúsra acuare.

³³ Riyaque quisarati tsehue tura ecuana cuejacuare eje bucha majue juyaque. ³⁴ Tuhua juquare cuanaque tuna juquare:

—Moisésra hueneacuare equetu Mesías patu anisiribuque. ECUITa curusuju tatatanaya maju ishu. Jutaquiju ni taa tu ¿ECUITA, Yusuja Emepeque ecuanara ihuayaque? —jadya tunajatu Jesús acuare.

³⁵ Tume tuna Jesúsra quemitsacuare:

—Ique hueca buchique, micuana Yusuja quisarati adebamerera jehua tibu. Ejetsunue ama micuana tsehue rehua juneniya jari. Eaqueja micuana catyatitiqui, emajaca aniya jari tupu. Necatyaticue, canerecati ishujudiru ishu ama. Apuda ducu juneniya cuanaque tuna baecua eju cuayaque; jadyatu eaqueja catyatiya ama cuanaque baecua canerecati ishujudiryuque.

³⁶ Eaqueja necatyaticue ique micuana tsehue jari tupu. Eaqueja ni micuana catyatiya, tume micuana huecadaju juneniya cuana buchique juya, —jadya tuna Jesúsra acuare.

Jadya quisarati aatsutu Jesús ecuita jetiama ducuque cuinanacuare. Baecua tuna juquare eju tuque diruhuaque.

Israelita cuana Jesús queja catyaticarama juquareque

³⁷ Arepa Jesúsra tunaja yacuaju Yusuja camadya ataquique acuare ama bucha tuna dutya jujeri cuitadya tuaqueja catyaticarama juquare. ³⁸ Isaías Yusu equeque quisarati cuejaquira icueneta huene acuare eque cuitadyatu judadicuare:

“Ecuana Cuatsashaquique, ecuanara tuna jetiama cuejaya micue quisarati yunerique.

Jadya ama bucha tuna eje umara piji camadya ejenehua.

Arepa tunara micue casa baha ama bucha, eje umara piji camadyatu adebaya bahaque” jadya.

³⁹ Jadya equetu dutya jujeri israelita cuana Jesús queja catyatihua ama, ecuanaja baba cuana béru juquare bucha. Dutya jujeri ecuanaja baba cuanaratu ejeneacuare ama Isaíasra quisarati cuejacuareque.

⁴⁰ Isaiaustu jadya junucacuare beru:

“Yusura tuna adebamerehua ama tunara petahuaque.

Tura tuna adebamerehua ama.

Jadya tibu tuna tuaqueja catyatihua ama, arepa ecana Yusura tuja casa bamerehua ama bucha, arepa tuna tuja quisarati bacahua ama bucha.

Cacuaretihua ama ecana inime Yusu queja junuca ishu,

Tuja tuna inajacamere ishu”,

jadyatu Isaíasra hueneacuare béru.

⁴¹ Jadya tujatu hueneacuare, Yusura tuque Jesús eje bucha judadiyaque bahue amerecuare tibu. Riyaque bahue juatsutu Isaíasra icuenetadya ahua quisarati Jesúsja ishu.

⁴² Arepa dutyara jujeri israelita cuanara Jesús bijidamaduraha ama bucha, umae camadya tuna tu-

aqueja catyatihua. Umae dyaque inime metse cuanaque tuna tuaqueja catyatihua. Jadya ama buchatu tume cuanaque ejitaju ama cacuejaticuare Jesús queja catyatihuaque, fariseo cuana mubaya tibu, tuna Jesús queja catyatihuaque cacuejatiyaju fariseo cuanara caradati ishuque etareju ecasitatiquereuque ama adebaya tibu. ⁴³ Tume bajida cuanaratu ecuita cuana pureamaturacara acuare, Yusu ama.

Yusura Jesúsja quisarati bijidamaduraqui cuanaque ecajuchati babuqueque

⁴⁴ Jesússtu quisaraticuare:

—Ejeque eaqueja catyatiyaquetu eaqueja jipidya ama catyatiya, tumbaedy a Ique Cuadishaqui queja. ⁴⁵ Ejera ni ique yuneridya adebaya, tumbaedy tujatu adebaya Ique Cuadishaquique. ⁴⁶ Ique hueca buchique riyaque yahuaju junahua, eaqueja catyatiya cuanaja Yusuja quisarati adeba ishu. Jehua ique, tuna apuda ducu juneniya cuanaque bucha juishu ama, huecadaju juneniya cuanaque bucha juneni ishu. ⁴⁷ Micuanaratu ecue quisarati bacaya, era amereya eque juyaque ama, era ama micuana “jucha arida” jadya aya. Micuanaja juchajudya micuana canerecatibuque. Ique junahua riyaque yahuaju micuana “Ecajuchati micuana” jadya aishu ama, eaqueja catyatiya cuanaque inajacamere ishu. ⁴⁸ Arepa ecue inime ama tuna canerecatibuque ama buchatu aniya ique bijidamaduraqui cuanaque nerecaturaquique, ecue quisarati bacayaque ama juatsu. Tere huecaca juetihuaju Yusura cuitadya micuana abuque: “Micuana micuana ecajuchatique”. Jadya tujatu ecana abuque, tunara era cuejahaque ejenehua ama tibu. ⁴⁹ Ecue casa eque ama ique quisaratiya, mere jadya juya. Ecue Etata Ique Cuadishaquira casa tyaya tibu tuque mereya. Eratu cuejaya, bahuityaya tura ique amereya eque. ⁵⁰ Micuana ni ecue Etatara cuatsashaya eque aniya, tume micuana tuatsehue anisiribuque majunuca ishu ama. Riyaque tura ique bahue amerehuaque micuana era cuejaha, tura ique amerehua baedy, —jadya tuna Jesúsra acuare.

Jesúsra tura mepehua cuanaja ehuchi utsacuareque

13 Tumequetu jucuar Pascua chine reeque tibene. Jesússtu bahuedya jucuar masadama majuyaque, ejetsunue ama Etataque queja tsura ishuque bataqui amaque. Jesusratu dyaque iyuhueda bacuar riyaque yahua juque tuja cuanaque. Tume tura ecua diruma jarira bamerehua dyaque tuja iyuhue aniyaque ecua tuja cuana tsehue. ² Jesússtu araaracuare ecua tsehue. Judas, Simón Iscarioteja ebacuaqueratu Jesús israelita cuanaja huaraji cuana queja inamerecara acuare. Icuene patu Ijahuara jadya inime tupumerecuare. ³ Jesússtu caadebaticuare tuque tuja Etataquera dutya casa tyacuareque. Bahuedyatu tuque jucuar tuque Yusu quejaque jehuaque, Yusu quejadya diruncayaque. ⁴ Ecua araraya jari tsunumeetu tuque netitsuracuare. Netitsuratsu tujatu

dyaque jutuyaque tacacuare. Catacatitsutu paño tsehue etimaju carisitacuare. ⁵ Carisititsu tujatu ena juracuare bañadorju. Peadya peadya tura ecua huachi utsabarecuare. Icueneque utsatsu tujatu paño tsehue huachi tillacuare. Tuequedyatu beta ishuque utsatsu tillanucacuare. Jadidya tura ecua dutya huachi utsatillacuare.

⁶ Simón Pedro queja judirutsutu Jesúsra huachi ut-sacara acuare. Pedrotu bahuedya jucuar mayurura tuja jetiedyaque huachi utsataquique ama. Jadya tibudya tujatu Jesús acuare:

—Ecua Cuatsashaquique, ¿eje bucha huachi utsae mira eau?

⁷ —Utsaya tuque micue era. Iyaja cuita tuquemi adebaya ama eje bucha juatsu era jadya ayaque. Tupuju tuquemi adebaya, —jadya tujatu Pedro acuare.

⁸ —A, aijama. Ecue ehuchi tuque micue utsanime ama.

—Era ni micue utsaya ama, tumemi ecuique ama, —jadyatu Jesúsra acuare Pedro.

⁹ Jadya bacatsutu Simón Pedroro jadya acuare:

—Jutaquiju ehuchiju camadya ama utsacue, Ecua Cuatsashaquique. Jutaquiju ecue utsacuedya emetucu, iyuca jadya.

¹⁰ —Ejeque iyaja cuita enahuiquetu utsataqui ehuchiju camadya, ecuita jidadya asicadama tibu. Yusura micuanaja jucha cuana apupashahuaju micuana butseeju nahuihua bucha. Yusura tuque micuanaja jucha cuana amena apupashahua. Aniyatu rehua peadya tuja jucha cuana apupashamaque. Tumequedy tu asicadaque buchique, —jadya ecua Jesúsra acuare.

¹¹ Jesússtu bahuedya jucuar ejera ecua tuque ujeu baqui cuana queja inamereyaque. Jadya tibudyatu “Aniyatu peadya micuana ducu jucha cuana apupashamaque”, jadya jucuar.

¹² Ecua dutya huachi utsatilla jadya aatsutu Jesús dyaque jutu ishuque cajututinucacuare. Cajututinucatsutu mesaju anibutenucacuare ecua tsehue.

—¿Adebayadya micuana era eje bucha juatsu micuana ehuchiju utsahuaque? ¹³ Micuanara ique “Ecua Bahuityaquique, Cuatsashaquique” jadya isarae aya. Tuyudya micuanara jadya isarae aya, ique jadiquedy tibu. ¹⁴ Arepa ique Micuana Cuatsashaquique, Bahuityaquique ama bucha, era micuana huachi utsahua, peya cuana tsahua juyara aya bucha. Jadya tibudya micuana jadya cutsatie ehuchi necaticue, peya cuana tsehue yurameta catsahuaticaraque cabamereti ishu. ¹⁵ Era micuana bamerehua micuana eje bucha jutaquique. Jutaquiju necatsahuaticue peya cuana tsehue, era micuana tsahuahua bucha. ¹⁶ Pusha amadya micuana cuejaya. Mere puji tunajatu patrón muibaya bucha mui bae ama aya. Ecuadishaque bacue tuque cuadishaquique bucha muie ama aya. ¹⁷ Micuanaratu bacayadya, jeeque era jadya ayaque. Micuanara ni peya cuana tsahuaya, era micuana tsahuahua bae, dyaque jida micuana judadiya.

¹⁸ “Dutya ama micuana Yusura dyaque jida amereya. Era micuana peadya peadya adebaya era mepehuaque. Peadyara micuanara ique ujeu baqui cuana queja inamereya. Yusuja quisarati ehue baedyatu juya: “Eatsehue ararayara ique bijidamadurabuque”.
¹⁹ Icuena cuejadya micuana aya ryaque, ique inameretama jarjudya. Era cuejahua bae cuitadya juhuaju, tuque micuana ejeneya ique Mesiasque, era micuana cuejahua baedyas. ²⁰ Ejera ni era cuadishayaque jida batsaya, tumbaedyas tunara ique jida batsaya. Ejera ni ique jida batsaya, tumbaedyas tunajatu Ique Cuadishaquique jida batsaya, —jadya ecuanas Jesúsras acuare.

Jesús tuque ujeu baqui cuana queja Judasra inamereyaque cacuejaticuareque
 (Mt 26.20-25; Mr 14.17-21; Lc 22.21-23)

²¹ Jadya ecuanas cuejatsutu Jesús dyaque capeyas inimeticuare.

—Yuneridya peadyara micuanara ique ujeu baqui cuana queja inamereya, —jadya tujatu quisarati acuare dutyas ecuanas baca ishú.

²² Jadya quisaratiyaju bacatsu ecuanas yurametas capetatibares jucuares. Bape bapedyas jutidyas tuque ecuanas inimes tupucuare ejeque tura jadyas ayaque.

²³ Ique Jesús aniyas peque anicuare, ique Jesús jas dyaque iyuhuedaque jucuaresque. ²⁴ Tume ique Simón Pedras tuja emetucu tsehue piyecuejacuares. Bacaduramerecaras tura Jesús acuare ejeras inamereyaque.

²⁵ Tume ique Jesús quejas jipetanacuare. Tuaquejas panas cajipetis juatsus tuque bacaduracuare:

—Ecuana Cuatsashaquique, ¿airamis inamereyas?
 —jadyas tuque acuare.

²⁶ —Pan cuesi tuque enamejus mullayas. Mullatsus micuanas ejequedyas tyayas. Ejeque eras tyayaque, tudyas tume, —jadyas Jesúsras acuare.

Jadyas juatsus tujatus mullacuare pan cuesis. Tume tujatus tyacuare Judas Iscariote, Simón jas ebacuaque. ²⁷ Judasratu pan cuesis inatsacuare Jesúsras tyayaque. Inatsahuajutus Ijahuas tuaquejas nubicuare tuque tura amereyas eque ameres ishú.

Jadyas ahuajutus Jesúsras Judas acuare:

—Mira eje bucha acaras ayaque, acue iyajas cuitadyas, —jadyas Jesúsras acuare.

²⁸ Ecuanasratu adebacuares ama eje buchas juatsus Jesúsras jadyas isarases ahuaque. ²⁹ Judastus jucuares chipirus quiniquique cacas naruquique. Umajes tuque ecuanas inimes jucuares:

—Jesusratu Judas jadyas ahua, earaquis chine ishú aras ishú quemiras cuaisus.

Peyas cuanajatus inimes jucuares:

—Jadyas tujatus ahua, Judas quejas nrecadas cuanaque chipirus tyamerecaras aatsus, —jadyas tuque ecuanas cujis cuitas juatsus inimes tupucuare.

³⁰ Judastu pan inatsas jadyas aatsus apudas ducus diruquenacuare.

Iyacuaque cacuatsashati: “Yurametas iyuhuedas cabatis ishúque”

³¹ Judas cuinanahuajutus Jesús quisaraticuare:
 —Masadamas IQUE ECUITA muitayas. Ique eje buchas atayas equetu ecue Etatas muitayas. ³² Eras Yusujas casas dyaque aniyaque bamereyas buchadyas tura bamerenucayadyas ecue casas dyaque aniyaque. Tsunutayas amatu jadyas juyaque. ³³ Amenas tsunudamas micuanas tsehue aniyas, micuanas ecue ebacuas buchas cuanaque. Sareyas datse micuanaras ique. Iyacuas micuanas cuejajas, ecuanas huarajis cuanas icuene cuejachineque: “Ique eju diruyaju micuanas judirutaquis amas”. ³⁴ Jeeque cacuatsashatis iyacuaque micuanas cuejajas: “Iyuhuedas necabaticue micuanas camas. Eras micuanas iyuhuedas bayas buchas iyuhueedyas micuanas necabaticue dutyas peyas cuanas tsehue”. ³⁵ Iyuhuedas nis micuanas cabatias dutyas peyas cuanas tsehue, tume tuna dutyas bahue judadiyas micuanas ecue emepeque.

Jesúsras Pedras “Adebayas amas tuque eras” jadyas juyaque cuejacuaresque

(Mt 26.31-35; Mr 14.27-31; Lc 22.31-34)

³⁶ Simón Pedrasratu Jesús bacaduracuare:
 —¿Ejumis diruyas, Ecuana Cuatsashaquique?
 —Eju ique diruyaju, eje buchas tuputaquis amas micue ique iyacuas. Tupujumis dirubucuedyas ique eju diruyaju, —jadyas Jesúsras acuare.

³⁷ —¿Eje buchas juatsus miatsehue dirutaquis amas, Ecuana Cuatsashaquique? Ique bajidamas mique jiteque majus ishú, —jadyas Pedras acuare.

³⁸ —¿Pushas amadyamis ique jiteque majus ishúque? Jeeque mique cuejajas. Ryaque metas, tacures quiquehuiemis catehuatis quimishas juyas. “Adebayas amas tuque eras”, jadyas aquimishas miras aya, —jadyas Jesúsras acuare Pedras.

Jesús tu ecuanas Etatas quejas judirus ishúque

14 Jesúsras ecuanas bahuityanucacuare:
 —Inimes tsapes nejuumes. Peyas inimes nejuumes. Yusus quejas nimes micuanas amenas juhús. Eaquejas nimes nejuucedyas. ² Ecue Etatas aniyajutus aniyas dyaque umadas anis ishú cuanaque. Yunerique amas juatsus taa micuanas cuejaquenas amas juquenas juhús. Ique diruyas tuhús micuanas anis ishúque bajejedirus ishú. ³ Dirutsus, micuanas anis ishúque pabajedirus; amenas aatsus, yudijiyas junanucabuque micuanas jiteque, micuanas eatsehue dirus ishú. Tuhús micuanas aniqueredirubuque ique jacanucas ishú amas. ⁴ Bahuedyas micuanas ique eju diruyaque. Bahuedyas micuanas tuhús eje buchas judirues juishúque, —jadyas ecuanas Jesúsras acuare.

⁵ Tomás tus quisaraticuare:
 —Ecuana Cuatsashaquique, baecuas ecuanas mique eju diruyaque. ¿Eje buchas bahuees jatsus ecuanas tuhús eje buchas judirues juishúque ejuu?

⁶ Jesúsras ecuanas acuare:

—Idya Yusu Etata queja judiru ishuque. Idya yunerique adebamerequique. Idya eanisirishaquique. Eaqueja catyatiya cuanaque cuita camadyatu Etata queja judiribuque, peya cuana bacue aijama. ⁷ Micuanara ique adebayaque juatsu, tuque micuana adebaya ecue Etata. Iyacia tuque micuana adebaya ecue Etatara ahua cuanaque, era ahua cuanaque micuanara bahua tibu, —jadya ecuana Jesúsra acuare.

⁸—Ecuana Cuatsashaquique, bamerecue dyadi ecuana Etata. Tumeque cuita camadya tuque ecuana bacara aya. Tume ecuana pureama juya, —jadyatu Felipera acuare.

⁹—Felipe, ¿eje bucha juatsumi jadya quisaratiya? Ique amena tsunuda micuana tsehue junenihua. ¿Eje bucha juatsu dyadi tuquemi adebaya ama jari? Ejera ique bahuaratu bahuadya ecue Etata. ¿Eje bucha juatsu dyadimi “Bamerecue ecuana Etata Yusu”, jadya juya? ¹⁰ Ique, ecue Etata Yusu, jadya yatse peadya camadya. Ique tuatsehue; tuque bacue eatsehue. ¿Ejeneya amami riyaque, Felipe? —jadyatu Jesúsra acuare.

Isaranucacuare tura ecuana:

—Era micuana cuejayaquetu ecue inime tacaque camadya ama. Ecue Etata tu eatsehuedya. Tudyá cuitadyatu ique eque mere juya. ¹¹ Neejenecue ecue quisarati. Ique, ecue Etata jadya yatse peadya camadya. Micuanara ni ejenecarama aya ecue quisarati, neejenecue micuanara era Yusuja casa tsehue ai era ahuaque bahua tibu. ¹² Pusha amadya micuana cuejaya. Paju ama micuanaja inime eatsehue ama tibu ecue casa tsehue ama bucha. Dutya eaqueja catyatiya cuanaratu ayadya era ahuaque. Ecuetu amena aijama juya dyaque cuita emajaca ique cuita rehua riyaque yahuaju mere juishu, ique ecue Etata queja diruya tibu. Ecue cuanaja bacue dyaque emajaca aniya tuque mere aishu, era aya bucha dyaque aishu. ¹³ Dutya micuanara ecue ebacaniju bacayaju eratu aya, ecue Etataja casa, jidaque jadya ejitaju amere ishu. ¹⁴ Micuanara “Acue ecue micue ebacaniju” jadya ayaju eratu dutya micuanara bacayaque aya, —jadya ecuana Jesúsra acuare.

Jesúsra Yusuja Espíritu cuadisha ana acuareque

¹⁵ Jesúsra ecuana isaranucacuare:

—Micuanara ique iyuhueda bayaque juatsu, ecue yana equedya nejuque. ¹⁶ Ique ecue Etata queja bacabacaya, Micuana Tsahuaquique tuja cuadisha ishu. Junabuquetu micuana queja, micuana tsehue anisiri ishu; shananime ama tuja micuana. ¹⁷ Tuquetu Yusuja Espíritu cuitadya, Yunerique Ejitaju Amerequique. Yusuja cuanaque amatu riyaque Espíritura cuatsashaya eque ejuu ama. Tunaratu tuque adebaya ama, ni tuna adebaya tuque ai juyaque. Micuanara bacue tuque adebaya, micuana tsehue aniya tibu. Micuana peadya peadya tsehuetu anisiribuque. Shananime ama tuja micuana.

¹⁸ “Jacanime ama micuana ecue ejequeja tsahuameremaque. Junanucabuque ique micuana tse-

hue anina ishu. ¹⁹ Ejetsunue juatsu ama ecue cuanara ama banucaya ama. Micuanara camadya masadamadya banucaya. Ique majutsu chacha netit-surancaya tibu, micuana dyadi tumebaedya majutsu chacha netitsuradadinucaya. ²⁰ Ique, Ecue Etata jadya yatse peadya camadya. Micuana micuana peadya camadya bucha eatsehue, ique bacue micuana tsehue. Yusuja Espíritu micuana queja junahuaju tuque micuana pana adeba abuque riyaque. Ai etehua buchique amatu jubuque. ²¹ Era cuatsashaya eque juya cuanara yuneridya iyuhueda baya, ecue quisarati bacaqui cuanara. Ecue Etataratu ique iyuhueda baqui cuanaque iyuhueda baya. Era dyadi tuna tumebaedya iyuhueda baya. Era tuna pana adebamere aya ique aique, ique tunaja pana adeba aishu, —jadya ecuana Jesúsra acuare.

²² Jadya juya bacatsutu Judasra bacaduracuare: (Judas Iscariote amatu jucuaré, peya Judas.)

—Ecuana Cuatsashaquique, ¿eje bucha caadebameretiemi juya ecuana queja, peya cuana queja caadebamereti ama jadya? —jadya tujatu acuare.

²³ —Ique iyuhueda baqui cuanaquetu ecue yana equedya juya. Ecue Etata tuna iyuhueda bayadya. Ique, ecue Etata jadya yatse tuna tsehue aninaya; jacanime ama tuna yatseja. ²⁴ Ique iyuhuedama baqui cuanara tuque ecue yana aya ama. Jadya micuana cuejaya, ecue casa eque jipidya ama, ecue Etata Ique Cuadishaquija casa. ²⁵ Riyaque micuana cuejaya, ique micuana tsehue jari tupu. ²⁶ Ecue Etataratu tuja Espíritu cuitadya cuadishaya micuana queja. Ecue inime juya equetu tura cuadishaya. Yusuja Espíritu cuitadyatu Micuana Icuenequique. Tura micuana yunerique bahuityaya. Dutya micuana era cuejahua cuanaque tura micuana huecashaya. ²⁷ Era micuana inime tsapema, dyaque jida amereya, ique bucha. Yusuja cuanara ama ni micuana eje bucha inime tsapema amerey ama, era micuana aya bucha. Era micuana inime tsapema anishaya, arepa eje buchadya jutidya inime jidama cuanaque aniya ama bucha. Tupupe tupupe inime neaume, era shanaya cabatitsu. Jidama inime nebaume. Bajida nejuume. ²⁸ Bacahuadya tuque micuanara, era “Ique ecue Etata queja dirutsu, junanucaya yudijidya micuana tsehue anisiri ishu”, jadya ayaju. Ecue Etata tu ique bucha dyaque emuque. Micuanara ique iyuhueda baya tibu, micuana pureama jutaqui ique ecue Etata queja diruyaju. ²⁹ Ique ecue Etata queja diruma jariradya micuana dutya riya cuanaque cuejahua. Tume jadya ique judadihuaju micuanara pana ejenedya aya era yuneridya quisarati ahuaque.

³⁰ “Tsunutaya amatu Yusuja ama cuanaque cuatsashaquique. Jadya tibudya tuque ecue aijama dyaque cuita emajaca micuana cueja ishu. Tura ique casa secacara aya; eje bucha casa secacae ni tura ama. ³¹ Eratu aya ecue Etatara amereyaque cuita camadya, era tuque dyaque iyuhueda baya tibu. Dutyatú jutaqui eje bucha tura ecue ishu inime pirehua eque, tuja ama cuanaque bahue juishu ique tuja inime eque juyaque.

“Nenetitsuracue. Nedirura rehuaque, —jadya tura ecuana acuare.

“Ique uva cunu buchique” jadya Jesús caticuareque

15 Jesúsra ecuana isaracuare:

—Ique uva cunu neri buchique. Ecue Etata tu uva cunu naruquique buchique. ² Dutya eaqueja catyatiya cuanaque tuna era daneshaya buchique. Era cuatsashaya eque ama juya cuanaque tuna cacacatiya ama bucha cuanaque. Tume cuanaque tuna Yusura ijehueya. Era cuatsashaya eque juya cuanaque tujatu ecana dyaquedya tsahuaya, tunaja jidamaque secatsu, era cuatsashaya eque amere ishü. ³ Ecue Etatara micuana amena secacuaredya jidama cuanaque, micuanara era cuejayaque bacahua tibu. Micuana micuana yaa cuana ebajejeque buchique. ⁴ Eatsehue ecadutyati neanicue. Eatsehue ni micuana ecadutyati aniya, tume ique micuana tsehue ecadutyati aniya. Yaa ni cunuju casipitima, ejebu cacacatie ni tu juma, ecasipitique juatsu camadya. Tumebaedya micuana ecue Etataja inime eque micuana ejuu ama eatsehue ecadutyatique ama juatsu.

⁵ “Ique uva cunu buchique; micuana micuana cunu yaa cuana buchique. Micuana ni eatsehue ecadutyati aniya, ique ni micuana tsehue ecadutyati aniya, tume micuana Yusuja inime eque juya. Yaa ecaca cuedaque bucha micuana juya. Eatsehue ni micuana ecadutyati ama aniya, eje bucha pureamaturae ni tuque micuana Yusu ama ni eje bucha eque. ⁶ Micuana ni eatsehue ecadutyati anicarama juya, Yusura micuana tee naruquira yaa cacacati baecuaque ebau bucha bae aya. Tumeque yaa cuanatu rarutaqui. Rarutsutu eijehueta rara ishü. Rarahua baatsutu tee pujira mepe radanitya jadya aatsu pahuaya. Jadidyatu jubuque eaqueja catyatima cuanaque.

⁷ “Eatsehue cadutyatitsu neanicue. Era cuatsashaya eque nejudue, era bahuityahuaque nime aputama. Jadya ni micuana juya, Yusura micuana tyaya micuanara bacayaque. ⁸ Micuana ni Yusuja inime eque aniya, tume tuque micuana micuanaja ani jida eque bamereya Yusu jida casadaque. Tume tuna bahue juya micuana yuneri cuitadya ecuique. ⁹ Ique ecue Etatara iyuhueda baya bucha, iyuhuee micuana era baya. Jutauquiju jida inime tsapema neanicue, era micuana iyuhueda bayaque adebatsu. ¹⁰ Ique ecue Etatara cuatsashaya eque jujacaya ama. Jadya tibudya ique inime tsapema, ique ecue Etatara iyuhueda bayaque caadebatitsu. Jutauquiju micuana ni era cuatsashaya eque jujacaya ama, dyaque jida micuana judadiya, era micuana iyuhueda bayaque caadebatitsu.

¹¹ “Jadya micuana isarahua, micuana dyaque jida inime tsapema cuita juishu, era micuana jida inime tsehue amereya bucha. ¹² Jeeque cacuatsashati micuana cuejaya: “Iyuhueda necabaticue micuana cama. Era micuana iyuhueda baya bucha, iyuhueedya micuana necabaticue dutya peya cuana tsehue”. ¹³ Ecuana ni iyetacarama ama juya, peya eiyetauju, yuneridya ecuanacabameretiya iyuhueda bayaque. ¹⁴ Micuana ni era

cuatsashaya eque juya, yuneridya micuana ecue iyuhueda cuanaque. ¹⁵ Patronratu tuja mere puji cuana tura dutya inime pireyaque cuejaya ama, tuja iyuhueda cuanaque camadya. Era micuana aya “ecue mere puji cuana” jadya ama, “ecue iyuhueda cuanaque” jadya, era micuana ecue Etatara dutya ique cuejahuque cuejahu tibu. ¹⁶ Ique micuanara ama mepehua Micuana Cuatsashaquique juishu. Era micuana mepehua ecue iyuhueda cuanaque juishu. Era micuana mepehua Yusuja inime eque juishu, tuaqueja nimee jujaca ishü ama. Ecue Etatara micuana dutya tyaya ecue ebacaniju bacayaju. ¹⁷ Riyaque micuana amerencucaya: “Iyuhueda necabaticue peya cuana tsehue”, —jadya ecuana Jesúsra acuare.

Jetiera ama Jesúsja cuanaque ujeu babuqueque

¹⁸ Jesúsra ecuana bahuityanucacuare:

—Yusuja ama cuanara micuana ujeu bayaju, jidama inime nebaume. Neadebacue, ique tunara icuene ujeu bahuque. ¹⁹ Micuana ni riyaque yahua juquedya jutidya ejuu, Yusu ujeu baqui cuana tsehue ni micuana jida ejuu, tume tunara micuana iyuhueda ebau. Era micuana mepehua micuana riyaque yahua juque cuita camadya juishu ama. Jadya tibudya micuana Yusuja ama cuanara ujeu baya, micuana tuna bucha ama aniya baatsu. ²⁰ Neadebacue micuana era icuene cuejahuque: “Mere puji tunajatu patrón muibaya bucha muie ama aya”. Ique tunara baya bae, baedya tunara micuana abuque. Ique jidama ijahue jahue aqui juhua cuanara micuana tumebaedya jahue jahuedya aya. Ecue quisarati eque anihua cuanaque tuna micuanaja quisarati equedya aniya. ²¹ Jidama tunara micuana abuque, micuana ecuique baatsu, tunara Ique Cuadishaquique adebaya ama, tuaqueja nimee ama jadya juya tibu.

²² “Ique ni jequena ama juhua tuna Yusuja quisarati cuejara, tume tuna jucha metse ama ejuuque tunaja jucha cuanaju. Amena iyacua tuna ‘Jucha metse ama ecuana’ jadya jutaqui ama tunaja jucha cuanaju. ²³ Ique ujeu baqui cuanaratu ujeudya baya ecue Etata. ²⁴ Eratu dutyaja yacuaju ahua ejeque ecuitaja ataquique ama, Yusuja casa bamere ishü. Jadya ama bucha tunara dutyara jujeri bijidamadurahua. Era ni aquena ama juhua tunaja yacuaju, ‘Micuana micuana jucha metse, eaqueja catyatihua ama tibu, arepa ecue casa bahua ama bucha’ jadya tuna Yusura eauque ama. Amena tuna jucha metse, petatsu bijidamadurahua tibu. Tunara ique ujeu baya, tumebaedya ecue Etata. ²⁵ Riyaque jadya juyaqueri tunaja cacuatsashati-ju ehue equedya juhua: ‘Era tuna ni aiju buchique jidama ahua ama. Jadya ama bucha tunara ique dyaque ujeu bahua’ jadyatu icuenetadya huenetanahua Yusuja quisarati.

²⁶ “Eratu bacaya Etata tuja Espíritu cuadisha ishü. Turatu micuana tsahua ishü cuadishaya. Micuana yunerique cuejaratu junaya. Tura micuana ique eje buchique huecashanaya. ²⁷ Micuanaratu tumebaedya cuejabuque peya cuana ique eje buchique. Micuana

micuana eatsehuedya junenitibunehua, ique riyaque yahuaju mere jutibuneyaju. Jadya tibu tuque micuana ayadya quisarati micuanara bahuaque, bacahuaque jadya.

16 “Jadya micuana cuejaya. Ecue cuanaque baatsu tunara micuana nerecaturadadiya. Icueneta cuejadya micuana aya, jadya juya cabatitsu micuana ecanimehuallatiuju. ² Micuana ujeu baqui cuanara micuana caradati ishuque etare cuanaju nudyajacabuque. Umae tunara micuana iyebuque. Micuana iyeyaque tuna Yusuja biji eque juya bucha cabatibuque. ³ Jadya tunara micuana abuque, ecue Etata, ni ique yuneri cuitadya adebaya ama tibu. ⁴ Icuenetadya micuana jadya cuejaya, tunara micuana ijahue ijahue ayaju, ‘Jesúsra cuejehua baedya taa tunara ecuana aya’ jadya micuanaja inime juishu, —jadya ecuana Jesúsra acuare.

Yusuja Espiritura eje bucha adadiyaque

Jesúsra ecuana bahuityanucacuare:

—Beru micuana riy cuanaque cuejehua ama, ique micuana tsehue jari tibu. ⁵ Masadama judirunucaya Ique Cuadishaqui queja. Jadya ama bucha micuanara ni ejera ahua ama: “Pana cueja cuita ecuana acue mique eju diruyaque” jadya. ⁶ Ique ecue Etata queja judirunucaya baatsu, eatsehue pureama ejuuque, dyaque peya inime micuana juya, rehuaque dirunucaya jadya bacatsu. ⁷ Pusha amadya micuana cuejaya. Micuanaja ishu dyaque jida ique dirunuca ishu. Ique ni ecue Etata queja ediruu ama, ejetiu amatu Micuana Tsahuaquique, Nime Casaturaquique. Ique judirutsu tuque micuana queja cuadishadiruya. Jadya tibudya peya inime nejuume. ⁸ Eje tupu tuque junatsu “Micuana micuana ecajuchati”, jadya tujatu anaya riyaque yahuaju cuanaque. Bahue tujatu ecana amerenaya Yusura eje bucha tuyuque bayaque. Bahue tujatu ecana amerenaya Yusura ecajuchati cuanaque nerecaturabuque. ⁹ “Micuana micuana jucha metse, Jesús queja catyatihua ama tibu”, jadya tujatu ecana anaya. ¹⁰ Tura tuna bahue amereya Yusura ai tuyu bayaque. Jadyatu tura aya, ique rehua ama juya tibu. Ejetsunue juatsu ama micuanara bajacaya, ique ecue Etata queja tsuraya tibu. ¹¹ Yusuratu amena cuejahuadya icuene: “Riyaque yahuaju cuanaque cuat-sashaquiquetu canerecati ishujú ijehuetanabuque”. Jadya tibudyatu Yusuja Espiritu junatsu, “Yusura ecajuchati cuanaque nerecaturabuque”, jadya tujatu ecana aya.

¹² “Umada tuque ecue aniya jari micuana cueja ishuque. Jadya ama bucha tuque micuana iyacua eadebau ama, micuana dyaque peya inime juya tibu. ¹³ Yusuja Espiritu tu Yunérique Ejitaju Amerequique. Tuque junatsu, tura micuana bamerenaya, bahuityanaya yunérique. Tuquetu tuja inime taca ama quisaratinaya. Etatara amereyaque camadya tujatu cuejanaya. Cuejanaya tujatu micuana eje bucha judadiyaque. ¹⁴ Tura ique muinaya. Tura ecue quisarati pana adeba aya tibu, tura micuana huecashanaya era

micuana cuejehuaque. ¹⁵ Eje bucha ecue Etatara quisarati aya, tume bae nucadyatu era aya. Jadya tibudya micuana ecue jadya cueja bahue juhua: ‘Yusuja Espiritura micuana ecue quisarati huecashanaya. Tume tura micuana dyaque jida cuitadya adebamerenaya’ —jadya ecuana Jesúsra acuare.

“Arepá micuana peya inime juya ama bucha, pureama micuana judadiya”

¹⁶ Jesúsra ecuana bahuityanucacuare:

—Ejtsunue juatsu ama micuanara amena bajacaya. Tuequedya micuanara ejetsunue juatsu ama banucaya. Amena diruya ecue Etata queja, —jadya ecuana Jesúsra acuare.

¹⁷ Umae ecuana tura mepehua cuanaque ecuana cabacaduratibarecuare:

—¿Eje buchique tujatu jadya aya? Ejtsunue juatsu amapa ecuana bajacaya. Tuequedyapa ecuana ejetsunue juatsu ama banucaya jadya. Etataque queja patu diruya. Jadya tibupa tuque ecuana banucaya ama. ¹⁸ ¿Eje bucha juatsu dyadi “Ejtsunue juatsu ama micuanara banucaya”, jadique? Adebataqui ama tuque ecuana baya tura cuejayaque. Etehua buchique tu ecuana ishu, —jadya ecuana jubarecuare.

¹⁹ Jesusratu adebacuare eje bucha ecuana bacaduracara ayaque. Jadique adebatsu tura ecuana acuare:

—Era micuana ahua: “Ejtsunue juatsu ama micuanara amena bajacaya. Tuequedya micuanara ejetsunue juatsu ama banucaya”. ¿Riyaque tuque micuana adebataqui ama baya? ¿Riyaque micuanara bacaduracara aya? ²⁰ Pusha amadya micuana cuejaya. Dyaque peya inime, paya jadya micuana ique iyetahuaju juya. Yusuja ama cuanaque bacue dyaque pureama jutidya. Ejtsunue ama camadya micuana peya inime juya. Tuequedya micuana dyaque jida cabatinucaya.

²¹ Ebacua cuinana ishu ujenahuajutu epuna dyaque peya inime juya, canerecati ishuque ura juetihua baatsu. Ebacua nana cuinanahuajutu epuna dyaque jida cabatinucaya. Amena tujatu ujera nerecaturahuaque adebajachua. Ebacua nana camadya tujatu adebaya.

²² Jadidya micuana. Iyacua cuita micuana peya inime juya, era masadama shanaya cabatitsu. Amena ique micuana queja junanucahuaju, micuana dyaque pureama cabatinucaya, ni aija pureama amerejacaqui.

²³ “Micuana Tsahuaquique junatsu tura micuana bahuityanaya. Jadya tibudya tuque micuana sareya ama ecue bahuitya ishu, tura micuana bahuityanaya tibu. Pusha amadya micuana cuejaya. Micuanara ni ecue Etata ai bacaya ecue ebacaniju, tura micuana tyaya dutya micuanara bacayaque. ²⁴ Riya cama tuque micuanaja Yusu bacama ai ecue ebacaniju. Nebacacue. Jadya bacae aatsu tuque micuanaja juetiya bacahuaque. Micuanara bacayaque baatsu micuana dyaque pureama juya, —jadya ecuana Jesúsra acuare.

Jesúsra Yusu adeba baecua cuanaque cuat-sashaquique casa secabuqueque

²⁵ Quisaratincatsutu Jesús jucua:

—Dutya riya cuanaque micuana cuatsabiji eque bahuityahua. Riyaque yahua juque ai cuana tsehue cuejapee micuana ahua, Yusu eje buchique micuana cuejacara aatsu. Masadamatu juetiya huecaca ecue Etata eje buchique micuana pana bahue juishuque. Ai etehuaque buchique amatu amena juya. ²⁶ Tumeque huecaca micuana ecue Etata tsehue piisidya quisarati-taqui, ecue ebananiju bacabacayaque. Micuanaja ique saretaqui ama ecue Etata bacanuca bacanuca aishu, micuana cuita tuatsehue quisaratitaqui tibu. ²⁷ Ecue Etatara cuitadya micuana iyuhueda baya tibu, tura micuana bacayadya tuatsehue quisaratiyaju. Tura micuana iyuhueda baya, micuanara ique iyuhueda baya tibu. Tumebaedya tura micuana iyuhueda baya, tuja yacua juque ique jecuaque micuanara ejeneya tibu. ²⁸ Yuneridya ique riyaque yahua juque. Masadama dirunucaya riyaque yahua juque. Dirunucatsu judirunucaya ecue Etata queja, —jadya ecuaana Jesúsra acuare.

²⁹ Jadya bacatsu tuque ecuaana Jesús acuare:

—Amena mira ecuaana ejitaju cuejahua. ³⁰ Iyacua ecuaana bahue juhua mique dutya bahueque. Ecuanaja bacadurama jarijudya tuquemi adebahua ecuanara bacaduracara ahuaque. Jadya tibudyami ni ejeja bacadurataqui amadya. Jadya tibudya rique ecuaana ejeneyadya mique Yusura cuadishahuaque, —jadya tuque ecuaana acuare.

³¹ —Arepa micuana ique Yusu equeque ejeneya ama ama bucha ziyacua tuque micuana adebayadya micuana dutya era cuejahuaque? ³² Masadama micuanara jatillaya. Tsapetanatereya micuana. Peadya peadya micuana micuanaja etare cuanaju huanatereya eiyetauju. Arepa micuanara jacaya ama bucha, ita taca ama juya. Ecue Etataja ique jacanime ama. ³³ Cuejahuadya micuana era eje bucha juyaque, micuana inime tsapema juishu, micuana eatsehue peadya camadya juya tibu. Micuana riyaque yahua jari tupu micuana nrecada juya jari. Netsapeume inime. Bajida nejuume. Eratu casa secahua amena Yusu adeba baecua cuanaque cuatsashaquique, —jadya ecuaana Jesúsra acuare.

Jesús tuja cuanaja ishuhua Yusu queja bacabacacuaque

17 Quisaratincatsutu Jesúsra ebarucue queja petacuare, barepaju Etataque aniya queja —Tata, masadama taa tunara iyeya, mira inime pihua baedya. Ejitaju amerecua ique micue bacua emuique, ecue dyadi mique emuique bamere ishuhua. ² Jetiama riyaque yahua cuanaque tuquemi eaqueja nimee amerehua. Mira tyahua micue casa. Jadya tibudyatu ecue cuanaque anisiribuque terenuca ishuhua ama. ³ Maju baecua anibuque cuanaque tuna miaqueja nimee juya cuanaque, tumebaedya eaqueja nimee

juya cuanaque. Mique peadya mi Yusu. Ique micue bacua mira cuadishahuaque.

⁴ “Ique riyaque yahua jari tupu tuque bamerehua mique emuique. Atillahua tuque mira ique amerehuaque. ⁵ Tata, ique miaquejaque jema jariju, ique emui juhua mique muitaya bae. Yatseja yahua iyama jarijutu jadya juhua. Ique miaqueja judirunucahuaju, ique muimerenucacue.

⁶ “Tata, era tuna bahue amerehua mique eje buchique, mira eaqueja nimee amerehua cuanaque. Tuna tuna micuiquedya juhua. Mira tuna eaqueja nimee amerehua. Era mique eje buchique quisarati aya bacatsu, tuna micue quisarati eque juhua. ⁷ Amena tuna bahue micue casa tsehue era dutya ai ayaque. ⁸ Dutya mira ique cuejamerehuaque tuna cuejahuadya. Tunaratu ejenecuaedya era bahuityahuaque. Jucua tuna ecue yana equedya. Tuna tuna bahue jutibunehua yuneridya ique miaquejaque jehuaque. Ejenetibunecuaque tunajatu mira ique rehua cuadishahuaque.

⁹ “Tata, miaqueja ique bacabacaya tunaja ishuhua, micue ecana naru ishuhua. Bacaya mique, ique adeba baecua cuanaja ishuhua ama, mira eaqueja nimee amerehua cuanaja ishuhua cuita camadya. Tuna tuna micuiquedya.

¹⁰ Dutya eaqueja nimee cuanaque tuna micue cuanaque. Jadya tibudya tuna ecuiquedya. Ique emuiquetu ejitaju juya tuna eje bucha juya eque.

¹¹ “Masadama dirunucaya riyaque yahua juque, miaqueja judirunucua ishuhua. Jadya ama buchatu eaqueja catyatihua cuanaque riyaque yahua jari. Tata, miquemi juchama nerique. Mira ecue amerehua cuanaque micue casa tsehue narucue. Peadya camadya bucha ecana amerecua, ique miatsehue bucha. ¹² Mira ique micue casa tyahua. Ique yahua tuna tsehue jariju tuna tsahuahua, micue casa tsehue, tuna eaqueja nimee ejujacaju. Peadya camadyatu eaqueja nimee jujacahua; umae cuana tuna eaqueja catyatijaya jari. Ehuenedya tu micue quisaratiyu peadya eaqueja nimee jujacadadiyaque. Jadidyatu juhua, tuhua ehue bae cuitadya.

¹³ “Amena masadama judirunucaya miaqueja, Tata. Ique yahua jari tupu mique isaraya ecue cuanaja ishuhua, micue ecana dyaque pureama amere ishuhua, ique bucha. Era tuna pureama neri amerecara aya. ¹⁴ Era tuna cuejajacahua ama micue quisarati. Tuna tuna riyaque yahua mique adeba baecua cuanaque aniya bucha ama. Ique aniya bucha, tuna aniya. Jadya tibudya tuna micue cuanara ama ujeu baya.

¹⁵ ‘Cuananashacue ecana riyaque yahua juque’ jadya ama mique aya. Bacaya mique, micue tuna naru ishuhua, Ijuhuara ecana ecajuchatishauju. ¹⁶ Riyaque yahua ri ecue eaniqui neri ama. Mique adeba baecua cuanaque aniya bucha ama ique aniya. Riyaque yahua ri ecue cuanaja eaniqui neri ama; ni dyadi ecana mique adeba baecua cuanaque aniya bucha aniya. ¹⁷ Tata, micue inime eque ecana anishaajecuedya jutidya, micue quisarati yuneri eque. Micue quisarati camadya tu yunerique. ¹⁸ Mira ique riyaque yahua cuanaque micue

quisarati cueja ishü cuadishahua bucha, tumebaedya tuque ecue cuanaque cuadishaya micue quisarati cuejara dutya queja riyaque yahua. ¹⁹ Ique miaqueja catyatiya mira inime iyahua eque ani ishü, ecue cuanaque yuneridya micue amere ishü, tuna micue inime eque ani ishü.

²⁰ "Tata, riyä eatsehue junenihua cuanaja jida ishü camadya ama miatsehue quisaratiya. Riyä cuanara micue quisarati cuejayajutu peya cuana eaqueja catyatidadiya. Tume eaqueja catyatidadiya cuanaja jida ishü miatsehue quisaratiya. ²¹ Dutyä tume cuanaque ecanä tsahuacue, peadyä camadyä bucha tuna juishu, Tata. Mique, ique jadyä yatse peadyä camadyä. Miquemi eatsehue; ique bacue miatsehue. Tuna dyadi yatse peadyä camadyä buchadyä paju. Tuna yatse bucha juyaque juatsu, eaqueja nimee ama cuanaque bahue paju mira ique cuadishahuaque. ²² Mique emui juhua bucha, jadidya tuna emui amereya, tuna peadyä camadyä juishu, yatse miatsehue bucha peadyä camadyä. ²³ Ique tuna tsehue peadyä; miquemi peadyä eatsehue. Jadyä tibudya tuna yatse tsehue peadyä cuita camadyä. Yatse tsehue peadyä camadyä baatsutu eaqueja nimee ama cuanara ejeneya ique mira cuadishahuaque. Adebadiya tunaja tuque mira ecue cuanaque iyuhueda bayaque, ique iyuhueda baya baedya. ²⁴ Tata, mira tuna eaqueja nimee amerehua. Era tuna eatsehue amerecara aya micue yacuaju, ique muitayaque bamere ishü. Yuequedyadyä mira muimerehua; yatseja yahua iyama jarijudya mira iyuhueda bahua. ²⁵ Miquemi tuyu, Tata. Cajuchatima mique ni cajuchati pidya. Eaqueja nimee ama cuanarami adebaya ama. Era camadyami dyaque jida adebaya. Riyä era mepehua cuanaratu pana ejene aya ique mira cuadishahuaque. ²⁶ Adebamerecuare mique era tuna queja. Adebamereajeyadyä jutidya mique era. Cuejajacaya ama tuna era, mira ecanä dyaque iyuhueda bayaque. Jadyä tuna cuejahua, tuna peya cuana tsehue yurameta iyuhueda cabati ishü, mira ique iyuhueda baya bucha cuita tuna dyadi iyuhueda cabati ishü. Jadyä tuna cuejahua, ique tuna tsehue peadyä camadyä juishu, —jadyatu Jesús quisaraticuare tuja Eataque Yusu tsehue.

Jesús erisque dujutanacuareque

(Mt 26.47-56; Mr 14.43-50; Lc 22.47-53)

18 Jesús Etataque tsehue quisarati amena juhuaju ecuana Jerusalénju cuacuare. Cuacuare ecuana espere jiri quini eura eque Cedrón bacani yueque macare. Tuhuatu olivo acui quini jucuaré. Tuhua junatitsu ecuana nubinaticuare. ² Eje uma casitatidyatu Jesús jucuaré tuhua dutyä ecuana tura mepehua cuana tsehue. Jadyä tibudyatu Judasra, arepa tuque ecuana tsehue ama ama bucha, pana adeba acuare tumeque acui quini. Tuhua tujatu Jesús tuque ujeu baqui cuana queja inamere ishü inime jucuaré. ³ Tuhua ecuana ejetsunue ama cuita junatihujutu Judas juticuare, tuta ama. Pae cuanaja huaraji cuanara, fariseo cuanara jadyä patu cuadishacuare peadyä

cuare sudaru cuana, tumebaedya umae Yusuja etare naruqui cuanaque, Jesús inati ishü. Acui, cuchiru jadyä tunajatu cati ishü dujucuaré. Tumebaedya lámpara, ude esapucaca jadyä tsehue tuna cudatijecuaré.

⁴ Jesús tu caadebaticuare tuque eje bucha juyaque.

Tsurutsatsu tujatu ecanä bacaduratsacuare:

—¿Ai tuque micuana sarenaya? —jadyä tujatu ecanä atsacuare.

⁵ —Sareya tuque ecuana Jesús Nazaret juque.

—Idya ique, —jadyä tuna Jesúsra acuare.

Judas, tuque inamerequi juyaquetu tuhuadyä jucuaré tuna jadyä quisaratiyaju. ⁶ Jesúsra "Idya ique" jadyä ayaju tuna tijerutanatsu yahua catsaqui jucuaré.

⁷ Tume tuna Jesúsra yudijidya bacadura anucacuare:

—¿Ai tuque micuana sarenaya?

—Jesús Nazaret juque, —jadyä tunajatu quemitsanucacuare.

⁸ —Cuejahuadyä micuana era, "Idya ique" jadyä. Ique micunara sareyaque juatsu, era mepehua cuanaque neinaume. Padiru ecanä, —jadyä tuna Jesúsra acuare.

⁹ Jesús tu bahuedya jucuaré canimehuallatima canerecatiyaque idu ishü ecuanaja casa aijamaque jari. Jadyä tibudya patu jucuaré: "Era mepehua cuanaque ecue neinaume. Padiru ecanä". Tume tunara ecuana inacuaré ama, Jesúsra cuitadyä quisarati achine eque juishu: "Tata, ni ejeque buchiquetu mira eaqueja catyatishahuaque eaqueja nimee jujacahua ama". ¹⁰ Tunara Jesús inaya baatsutu Simón Pedrora cuchiru baina juque Jupucuaré. Juputsu tujatu pae dyaque muidaja mere pujija ijaca pejucuaré. Jida eque amaca eque ijaca peju tujatu Malco bacani acuare.

¹¹ —Cuchiru tsehue icuenecara aume, Pedro. Ishacue micue cuchiru bainaju. Pacanerecatidya ique, ecue Etatara jadyä inime pirehua tibu, arepa ique canerecatiyaque ai patsedaque iji ishüque bucha paju ama bucha, —jadyatu Jesúsra acuare Pedro.

Anás queja Jesús dujutanacuareque

(Mt 26.57-58; Mr 14.53-54; Lc 22.54)

¹² Sudaru cuanara, huaraji merequi cuanara, Yusuja etare naruqui cuanara jadyaratu Jesús inaticuare. Inat-su tunajatu risicuare. ¹³ Icuene cuita tunajatu dujucuaré Anásja etareju. Anástu Caifásja ehuaneequeja etataque jucuaré. Caifástu jucuaré tume patya pae dyaque muidaque. ¹⁴ Caifasradyatu icuene israelita cuanaja huaraji cuana jadyä acuare: "Dyaque jida peadyä camadyä pamaju, ecuana dutyä emajuuju".

Pedrora "Adebaya ama tuque era", jadyä acuareque

(Mt 26.69-70; Mr 14.66-68; Lc 22.55-57)

¹⁵ Tunara Jesús dujuya baatsu tuque yatse Simón Pedro tsehue tupujudya aajecuaré tunara Jesús dujuyaju. Ique pae dyaque muidaja eadeba jucuaré. Jadyä tibudya Jesús tupuju nubinaticuare. ¹⁶ Pedrotu nubinaticuare etsecuetsauju camadyä. Pedro eatsehue etare ducu nubihua ama baatsu, ique yudijidya cuinanauca jucuaré etsecue naru juya tsehue quisaratira.

—Pedro ecue ecare nudyacue, —jadya tuque epuna aticuare.

Era jadya ahuajutu epunara etsecue pacashatsu nudyacuae. ¹⁷ Tuque nubihuajutu epunara bacaduracuare:

—¿Aremi mique tumeque ecuita Jesús bacani tsehue junenihuaque ama? —jadyatu etsecue naruquira acuare Pedro.

—¿Aijama! ¿Adebaya ama tuque era! Tuatsehue junenihuaque ama ique, —jadyatu catehuaticuare Pedro.

¹⁸ Bada tu jucuaire. Jadya tibudyatu pae dyaque muidaque merequi cuanaque etiqui caruqueticuare. Etiqui cunu netibaretsu tuna etiqui bahui jucuaire sudarru cuana tsehue. Pedrotu cajipeticuarenya etiquiju cuquenashati ishu.

Anásra Jesús bacaduracuareque

(Mt 26.59-66; Mr 14.55-64; Lc 22.66-71)

¹⁹ Anásja etarejutu pae cuanaja huarajira cacuejamereticara juatsu Jesús bacaduratibunecuare:

—Cuejacue ique mira mepehua cuanaque. ¿Eje cuanaque tuna? ¿Ai tuna juya? ¿Ai tuquemi ecana bahuityachine? —jadya tujatu acuare.

²⁰ Jesusratu quemitsacuare:

—Etehua quisarati ama juchine. Dutya jujerija ijacaju quisarati bahue juhua. Dutyaja ijacaju tuna bahuitya bahue juhua etehua ama ecuanaja caradati ishuque etare cuanaju, tumbaedyu Yusuja etareju, dutya ecuanaja ata cuana caradati bahueju. ²¹ Ique quisaratiyaju bacaqui juhua cuanaque tuna bahue jida era ai bahuityahuaque. ¿Aishu jatsu mira ique bacaduraya? Ique quisaratiyaju bacaqui juchine cuanque bacaduracue. Tuna tuna bahue ique eje bucha quisaratichineque, —jadyatu Jesúsra acuare Anás.

²² Peadya ecuita Yusuja etare naruquiquetu Jesús cacuemitsatijaju bacatsu cahuaiticuare. Bahuapajacuaire tuja tuque.

—Jadya ama tu pae dyaque muidaque equemitsata. ¿Eje bucha juatsu tuquemi muibaya ama? —jadya tujatu acuare.

²³ —Era muida tsehue ama quemitsahuaque juatsu, cuejacue rehua cuanaque ique jidama juhuaque. Muida tsehuedya tuque quemitsahua. ¿Tume jatsu mira eje bucha juatsu bahuapajaya? —jadyatu Jesúsra acuare.

²⁴ Tumetu Anásra cuadishacuare risimeretsu Caifás pae dyaque muida queja.

Pedroru “Adebaya ama tuque era”, jadya anucacuareque

(Mt 26.71-75; Mr 14.69-72; Lc 22.58-62)

²⁵ Jesús, Caifás queja dujutanahuaju tucue patu Pedro etare tsecue etiqui bahuinitya jucuaire jari.

—¿Mique amami risitanahua tsehue junenihuaque? —jadyatu Pedro acuare tuhua etiqui bahui jucuaire cuanara.

—¿Aijama! ¿Adebaya ama tuque era! ¿Ique tuatsehue junenihuaque ama! —jadyatu Pedro catehuatinucacuare.

²⁶ Yume isaranucadyatu pae dyaque muidaque merequira acuare. Tumeque ecuitatu Pedroru ijaca pejucuaireja ata jucuaire.

—Pusha pushami juya. Erami bahua Jesús tsehue Olivo Acui Quiniju, —jadya tujatu acuare Pedro.

²⁷ —¿Ique ama! Peya dyadi ni tuquemi bahua. Adebaya ama tuque era, —jadya tujatu anucacuare.

Tuque jadya quisaratiyaju cuitatu tacure quiquecuare.

Jesús Pilato queja dujutanacuareque

(Mt 27.1-2, 11-14; Mr 15.1-5; Lc 23.1-5)

²⁸ Israelita cuanaja huaraji cuanara bacadura amena ahuajutu Jesús Caifásja etare juque dujutanacuare. Turatu dujumerecuare Pilato queja. Pilatotu Roma juque enaruqui cuarequi jucuaire. Apudajudya tunajatu enaruquija etareju dujucuaire. Israelita cuanatu nubicuare ama Pilatoja etareju, tuque israelita ama tibu. Nubiquena ni ecana jucuaire, caasicatiquena tuna jucuaire tunaja cacuatsashati eque. Pascua chine ishu araaratayaju ecana earaarauque ama. ²⁹ Tuna nubicarama juya baatsutu Pilato tuja etare juque cuinanacuare tuna tsehue quisaratira.

—¿Eje bucha juatsu rique micuana risitsu beya riyaque ecuita? ¿Ai rejari jidama achine? —jadya tujatu ecana aticuare.

³⁰ —Jidama juhuaque ama juatsu, tuque ecuana bequena amadya juquena juhua rehua miaqueja. Ecuanaja baba cuanaja cacuatsashati eque amatu juhua, —jadya tunajatu acuare.

³¹ —Micuanara nucadya nedujunucacue. Micuanaradya jutidya nenerecaturacue micuanaja baba cuanaja eje bucha cacuatsashati eque, —jadya tuna Pilatoru acuare.

—Ecuanaja cacuatsashati equetu iyetaqui. Jadya ama bucha ecuana israelita cuanajatu aijama inime ni ejeque curusuju tatatsu iye ishu. Micuana Romaju cuanaja camadyatu jadya ataqui, —jadya tunajatu acuare.

³² Icuenetadyatu Jesús cacuejaticuare tunara curusuju tatatsu iyedadiyaque. Arepa israelita cuanaja huaraji cuana tuque eje bucha cacuejatichineque baecua jucuaire ama bucha, tunajatu acuare tuque cacuejatichine eque cuitadya. ³³ Jadya bacatsutu Pilato etare ducu nubitinucacuare. Ihuaramereticuare tujatu Jesús. Ihuaratsu tujatu bacaduracuare:

—¿Midyami israelilta cuanaja ecuari? —jadya tujatu acuare.

³⁴ —¿Micue adebadya jutidyami jadya quisaratiya? ¿Ejera cuana ni taa mi cuejahua? —jadyatu Jesúsra acuare.

³⁵ —Ecue adeba ama tume. Ique israelita ama. Micue yahuaju cuanara cuitadyami behua eaqueja. Israelita cuanaja huaraji cuanarami eaqueja menajetyahua. ¿Eje bucha jatsumi juchine? ¿Mique pami juya tunaja

huaraji dyaque inime metseque jadya? —jadyatu Pilatoru acuare Jesús.

³⁶ —Ique riyaque yahua juque ecuari ama. Riyaque yahua juque ecuari juatsutu ecue cuanaque ique icueneyaque ecatiu, israelita cuanaja huaraji cuana queja ique menajetyata ishü ama. Ecuaridya ique, riyaque yahua juque ecuari cuana buchique ama, —jadyatu Jesúsra acuare.

³⁷ Jadya ayajutu Pilatoru jadya acuare:

—¿Jutaquijumi mique ecuari?

—Jejee, jadidya ique, mira aya equedya. Quisarati yunerique cuejara ique jehua riyaque yahua ju. Dutya yunerique bahue jucara juyaratu ijaca bacaya era cuejayaque, —jadyatu Jesús acuare.

³⁸ —¿Eje bucha bahuee jatsu yatse ejuu ai yunerique? —jadyatu Pilatoru acuare.

Pilatoru “Jesús pamajudya” jadya acuareque

(Mt 27.15-31; Mr 15.6-20; Lc 23.13-25)

Jadya bacaduratsatu cuinananucacuare Pilatoru israelita cuanaja huaraji cuana tsehue quisaratinuca ishü.

—Ecue inime ri riyaque ecuita eje bucha cajuchatie juma. Era taa ri dadiya ama ni riya piji buchique ecajuchati. ³⁹ Micuanaja bahue tuque Pascua chine ishü inajacaya peadya erisque micuanara inajacamerecara ayaque. ¿Inajacamerecaradya micuanara aya Jesús micuanaja ecuari? —jadyatu Pilatoru acuare israelita cuanaja huaraji cuana.

⁴⁰ Jadya bacatsu tuna yudijidya quique junucacuare jebuda:

—¡Ajama! ¡Inajacamereume Jesús! ¡Ecuonaratu Barrabás inajacamerecara aya! —jadya tuna jucuaque eque.

Barrabástu chiri piji, quiyeti puji jadya jucuaque.

19 Tumetu Pilatoru tuja sudaru cuana cuat-sashacuare:

—Catsacatsa neacue Jesús, —jadya tujatu ecana acuare.

Catsacatsadya tuna acuare. ² Catsacatsa amena aatsu tunajatu ecuari edujuta bucha dujue acuare, ijahue ayaquedya jutidya. Cunu cuijaquique tunajatu iyucaju jutumere ishü picacuare. Jadya aatsu tunajatu Jesúsja iyucaju jutumerecuare. Dyaque jutuyaque tacatsu tunajatu jutumerecuare una sehuesahuauque, ecuari arida cuanaja ejutuqui tsehue, tuque ijaribayaquedya jutidya. ³ Jadya tunajatu jipetitsu acuare:

—¡Emuitana paju israelita cuanaja ecuari muidaque!

Jadya aatsu tunajatu butsequini pajacuare.

⁴ Pilatoru cuinananucacuare israelita cuanaja huaraji cuana quejaque.

—Ihuamerenucaya tuque micuanaja yacuaju. Ecue inime tu tura ni ai buchique jidama ahua ama, —jadya tuna Pilatoru acuare.

⁵ Tumetu Pilatoru Jesús etare juque cuinانشacuare ecuita cuanaja yacuaju neticuina ishü. Cunu cuijaquique epicaquetu ejutumere jaridya iyucaju jucuaque. Ecajututi jaritu jucuaque dyaque eramaqui sehuesahuau tsehue.

—¡Nepetacue! ¡Jeedy a ri ecuita! —jadya tuna Pilatoru acuare.

⁶ Pae cuanaja huaraji cuanara, Yusuja etare naruqui cuanara jadya tunajatu petacuare Jesús. Petatsu tuna quequetibunecuare:

—¡Curusuju tatamerecue! ¡Curusuju tatamerecue!

¡Tuhua pamaju! —jadya tuna jucuaque.

—Micuanara jucha metse baya tibu, jutaquiju micuanara cuitadya neinacue. Micuanara cuitadya curusuju netatacue. Ecue inimeju tu tuyu ama ecuanaja iyemere ishü. Turatu ai jidamaque ahua ama, —jadya tuna Pilatoru acuare.

⁷ —Tuyudya tu iye ishü. Tuquetu ecuitadya jutidya.

Jadya ama bucha tudya cuitadyatu “Yusuja Ebacaque ique” jadya juchine. Tuque jadya juchine tibu iyetaquidya tuque ecuanaja ebaba ecanaja cacuat-sashati eque jadya tibu.

⁸ Pilatoru dyaque bajida jucuaque, Jesús “Ique Yusuja Ebacuaque” jadya juchineque bahue juatsu. ⁹ Educuju nudyatsu tujatu Jesús bacaduracuare:

—¿Ejuque mique? —jadya tujatu acuare.

Jesusratu quemitsacuare ama cuitadya.

¹⁰ —¿Eje bucha juatsu mira quemitsacarama aya?

Ecuetu aniya casa mique era eje bucha amerecara aya eque aishü. Era ecana eau “Neinajacacue riyaque”; einajacaudya tunara mique. Era ecana eau “Curusuju netatacue maju ishü”, etataudya tunara mique. ¿Bae-cuami ecue tumeque casa aniyaque? —jadyatu Pilatoru acuare.

¹¹ —Micuetu casa aniya, Yusura tyahua tibu ademe.

Yusura ni mi tyaquena ama juquena juhua tumeque casa, miquemi ni ai buchique ejuu ama. Mira ni ique iyemereya, Yusurami jucha metse baya. Dyaquedya tu ecajuchati ique miaqueja menajetyaqui juhuaque. Tumeque tu dyaque jucha arida, —jadyatu Jesúsra acuare Pilatoru.

¹² Amena Pilatoru Jesúsra jadya cuana ayaju bacatsu tujatu eje buchadya inajacacara datse acuare. Ecuita cuanaratu adebacuaredya tura Jesús inamerejacacara ayaque.

—Jesús patu tudya cuitadya ecuari dyaque aridaque jadya juchine. Roma juque enaruqui aridaquetu cahuaitiya ecuari arida jadya catiya cuana tsehue. Mira ni inajacamereya tumeque ecuari arida tsehue cahuaitihuaque, tumetu tuque dyaque ecahuaiti juya miatsehue, —jadya tunajatu acuare Pilatoru quique eque.

¹³ Jadya bacatsutu Pilatoru anibutenucacuare inime cuana bajeje ishüque eanicuareju. Tumeque jadya ishüquetu “Gabata” bacani jucuaque, “Tumu jepedaque neti ishüque” jadicue. ¹⁴ Barepatya tu jucuaque, Pascua chine huecacape juyaju. Israelita cuanatu chine juishu cabajejeticuare.

—Jeedy micuanaja ecuari, —jadya tuna Pilatoru acuare israelita cuanaja huaraji cuana.

¹⁵ —¡Pamaju! ¡Pamaju! ¡Curusuju tatamerecue!

—jadya tuna jubarecuare quique eque.

—¿Micuanaratu micuanaja ecuari curusuju tatameretsu iyemerecara aya? —jadya tuna Pilatora bacaduracuare.

—Riyaque ama tuque ecuanaja ecuari! [César camadya tuque ecuanaja ecuari! [Aijama tu peya! —jadya tuna jubarecuare pae cuana cuatsashaqui cuanaque.

¹⁶ Tunara quisarati ayaju bacatsutu Pilato jucuare:

—Micuanara amerecara aya equedya paatana.

Tume tujatu Jesús menajetyacuare sudaru Romaju cuanaque, tunaja curusuju tata ishu.

Jesús curusuju tatatanacuareque

(Mt 27.32-44; Mr 15.21-32; Lc 23.26-43)

¹⁷ Inatsu tunajatu Jesús Pilatoja etare juque cuinanashacuare. Cadujutishacuare tunajatu curusu uhua cuemusú Emaju Iyuca Baeju. (Hebreo yanaju tu “Gólgata” bacani). ¹⁸ Tuhua tunajatu curusuju tatacuare. Tumebaedya tuna beta ecuita tatacuaredya curusuju, Jesúsja jida eque amaca, peya jani eque amaca jadya. ¹⁹ Pilatoratu huenemerecuare tauraju Jesúsja curusu iyucaju: “Riyaque ri Jesús Nazaret juque, israelita cuanaja ecuari” jadique. ²⁰ Jadiquetu ehue ne jucuare quimisha yana eque, hebreo, griego, latín jadya eque. Jesús tuna curusuju tatacuarequetu Jerusalén epu ebari japadama jucuare. Jetiama tuna tueque cuetiya, cuinanaya jadya jucuare epu ebari juque. Jadya tibudya tunajatu jetiera ama curusuju ehuenequé isaracuare. ²¹ Pae cuanaja huaraji cuanaja biji ama tu ehuenequé jucuare. Tume tunajatu Pilato acuire:

—¿Aishu tuquemi “Israelita cuanaja ecuari” jadya huenemerehua? Dyaque jida “Riyarari quisarati achine. Tuquepa israelita cuanaja ecuari” jadya, jadya tuquemi huenemerehuaqui ahua, —jadya tunajatu acuire.

²² —Aijama. Cuareya ama tuque era, era huenemerehuaque.

²³ Jesús curusuju tatatanama jarjutu sudaru cuanara tacacuare tura jutuyaque. Curusuju tata amena aatsutu pushi sudaru cuana tura jutuhua cuanaque caja-quetibarecuare. Anidadicuaretu tura educuju jutuyaque, ejutuqui yuta tutsu eaque barudaque. Pushiradya jutidya tunajatu bijida bacuare.

²⁴ —Nechajara ama. Dadu jutidya ijahue neara. Dado cuana eje bucha cuinanaya eque ecuaana bahue juya aija tura educuju jutuyaque juyaque, —jadya tuna jucuare.

Jadya juatsu tuna ejeja masa ecuanaja juya jadya jucuare. Jadyatu jucuare, Yusuja quisarati ehue ne equedya.

“Cajaqueticuare ecana era jutuyaque.

Dadu ijahue ecana jucuare era educuju jutuyaque metsene ishu”.

Tumetu béru huenetanacuare bae cuitadya jucuare.

²⁵ Jesúsja ecuaquetu curusu peque neticuare. Ecuaque tsehuequetu tuhuadya jucuare. María, Cleofasja ehuanequetu tuhuadya jucuare, tumebaedya peya María Magdalaju anicuareque. Tumeque pushi epuna cuana tuna curusu peque neticuare. ²⁶ Je-

susratu ecuaque bacuare tuhua netiyaju. Tumebaedya ique tuhua neticuare Jesúsja ecuaque peque. Jesúsra ique dyaque iyuhueda bacuare.

—Mama, jeeque ri era mepehuaque. Tumeque micue, micue bacua neri bucha paju. Tura tuja ecuaque neri enaruu bucha narue acue, —jadya tujatu María acuire.

²⁷ Jadya juatsu tura isaracuare:

—Riyaque epuna micue, micue paju cuaa neri bucha. Micue cuaa enaruu bucha narue acue, —jadya Jesúsra acuire.

Tura jadya ahujaju tuque Jesúsja ecuaque ecue etareju baishu dujucuare.

Jesús curusuju majucuareque

(Mt 27.45-56; Mr 15.33-41; Lc 23.44-49)

²⁸ Jesús tu bahuedya jucuare tuque ameretahuaque amena atillayaque.

—Ijicara juya, —jadyatu jucuare, Yusuja quisarati ehue ne eque juishu.

²⁹ Tuhua tunajatu equiniquiju anicuare uva nacaca esasanashaque patsedaque. Tume tunajatu mullaticuare uva nacacaju siiji ishuque huapeje buchique. Mullatsu tunajatu risicuare acui hisopo bacani yaaju. Nityatsuratsu tunajatu jipemerecuare Jesúsja ecuaatsa tuyu, tuja susu ishu. ³⁰ Jesusratu susucuare uva nacaca esasanashaque patsedaque. Susuyaque cuitatu jadya jucuare:

—Dutya ecue mere tuque amena atillahua, —jadyatu jucuare.

Jadya quisarati ayaquetu Jesúsja iyuca huejitacuare. Amena ishu canajeti pidya juu, maju jadyatu jucuare.

Sudarura tsati tsehue Jesús epereju sacuacuareque

³¹ Israelita cuanaja huaraji cuanaratu curusuju eshura cuanaque tumeque meta ni huecacape jadya badeshacarama acuire, canajara huecaca chinequeja ijete nubiyaju catibutiya tibu. Jadya juatsu tuna Pilato enaruqui tsehue quisaratira cuacuare.

—Cuatsashacue micue sudaru cuana. Masadama maju ishu tuna etsaca cuanaju paraquebareti ijete dyaque cuita chinemajudya. Tuna pana maju juhua baatsu tuna pabutyabare curusuque emaju cuanaque, —jadya tunajatu aticuare.

Amena ijete nubidiruyaju Pascua catibutiya tibu tunajatu bacaticuare. ³² Tumetu Pilatora cuadishacuare tuja sudaru cuana. Cuacuaredya ecana Golgotaju. Junatitsu tunajatu raquecuare peadya curusuju etata badeyaja etsaca, tuque masadama maju ishu, Jesús tsehue tatatanapee juhuaque. Tuequedya tuna peyaja etsaca ecatsé raquenucacuare. ³³ Amena Jesús queja judirutsu tunaja bacuare Jesús majuhujaju. Tume tunajatu etsaca raquecuare ama. Icueneta huenedyatu ea jucuare Yusuja quisarati: “Raquedadiya ama tunajatu tuque micue ni peadya etsau”. Peadya sudaruratu pere sacuacuare tsati huitu cueruda tsehue. Sacuayaju cuitadya tujatu ami ena tsehue ujauja cuinanacuare. Peya tu Yusuja quisarati ehue ne: “Petadadiya tunajatu

tsati tsehue esacuaque". Jadidyatu Jesús jucuare, icuenaeta huene ea baedyá. Era cuitadyatu bacuare Jesús sudaru cuanara majuhuaaju eje bucha ayaju. Hueneya rique micuanaja era cuitadya bacuareque. Era hueneyaque ri yunerique. Yuneri cuitadya jadya jucuareque rique micuanaja hueneya, micuana dyadi Jesús queja catyati ishu.

Jesús emajuque tumu cani epuruju ishatanacuareque
(Mt 27.57-61; Mr 15.42-47; Lc 23.50-56)

³⁸ José Arimateaju anicuarequetu cuacuare Pilato queja. Arepa tuque Jesús queja ecatyati ama buchatu cacuejatima jucuare ni eje queja. Tuquetu bajida jucuare israelita cuanaja huaraji cuanara enerecaturaju.

—¿Ebutyamereu ama mira Jesús curusuju emaju badeyaque? Paishati caniju, —jadya tujatu Pilato aticuare.

—Jidadya, butyameretsu emaju papa ishu cani epuruju ishaticue, —jadyatu Pilatorá acuare.

Tumetu José cuacuare Gólgataju. Butyameretsu tujatu emajuque dujucuare tumu ebari cani epuruju.

³⁹ Nicodemotu cuacuaredya José tsehue. Tumequedyatu Jesús tsehue chineju quisaratira cuacuareque. Emaju caniju cuayaque tujatu arida ijimedaque dujumerecuare, quimisha tunca kilo cuana, emaju dyaque paque ishu. Tumeque ijimedaquetu acui madi ijimeda tsehue eujaque tsuje aridaque jucuare, mirra, áloe bacani. ⁴⁰ José, Nicodemo jadyara tatsejatu queticuare Jesús emajuque. Emajuque piruri ishu behuaque tatsejatu ijimeda tsehue nacatashacuare.

Epiruriquique ijimeda tsehue nacatashatsu tatsejatu Jesús emajuque piruricuare. Jadya tuque ecuanaja bahue jucuare emajuque papatima jariju eraca arida tsehue piruri. ⁴¹ Jesús curusuju tatatanahuaque japadamatu jucuare olivo acui quini. Tuhuatu cani jucuare emaju cuanaque isha ishuque, butseeju epuruque. Ishamatu jucuare ni ejeque emajuque buchique. ⁴² Huecacape piji cuitadyatu amena canajara huecaca catibuticuare, mere jutaquique ama. Tumeque cani japadama juya tibu, tatsejatu tuhuadya Jesús ishaticuare, ebajarara juya tibu.

Jesús chacha netitsuranucacuareque
(Mt 28.1-10; Mr 16.1-8; Lc 24.1-12)

20 Domico huecaca apudajudya cuitatu María Magdala juque cuahuecacuare Jesús emajuque tumu cani epuruju ishatanachineju. Tsunuda apuapu jariju cuitadyatu cuacuare. Tudyá tujatu junatiya tajira cuitadya banaticuare tumu ebari cani tsecue penequique etecu. Aira cuana tujatu emajuque chiri-hua bucha bacuare. ² Tumetu epuna tsajaja cama cuacuare yatse queja. Simón Pedro, ique Juan Jesúsja dyaque iyuhueda jucuare quejatu juticuare.

—Chirihua tunajatu Ecuana Cuatsashaquique emajuque. Adebataqui ama eju cuana taa tuna iyacuahua, —jadya tura yatse aticuare.

³ Jadya tura ayaju yatse Pedro tsehue epu juque cuinanatsu caniju cuacuare. ⁴ Betadya yatse tsajaja cama cuacuare. Ique dyaque huenida cuita tsajajaajetsu icuene junaticuare emaju caniju. ⁵ Cani ducu peta ishu remecuare ique. Tume tuque remetsu cuajinaticuare. Bacuare tuque sahuana cuita camadya Jesús piruriqui juchineque cani ducu eiya. Nubicuare ama ique. ⁶ Tudyatu Simón Pedro ique tupujudya junaticuare. Junatitsutu Pedro nubinaticuare cani ducu. Tura batinucacuaredya sahuana tunara Jesús piruriqui achineque eiyaque. ⁷ Tumebaedyatu bacuare tunara Jesús iyuca dunuqui achineque. Tumeque eracatu tunara ecuita piruriqui achine tsehue ama jucuare. Peya queja amacatu piruri iya jadya ea jucuare. Emajuquetu tuhua ama jucuare. ⁸ Pedro tupuju junatihuaque nubinatihuaaju ique icuene junatihuaque tupuju nubicuare emajuque caniju ishachine ducu. Banaticuare tuque eje bucha juhuaque. Baatsu tuque ejenecuare yuneridya Jesús majutsu chacha junucahuaque. ⁹ Adebacuare ama jari tuque ecuana Yusuja quisarati: "Mesiastu majutsu chacha netitsuranucabuque" jadicue. ¹⁰ Tume yatse cuinanatsu etareju dirunucacuare.

María Magdalaju aniya queja Jesús cabamereticuareque
(Mr 16.9-11)

¹¹ María Magdalaju aniyaquetu emaju caniju cuanucacuare yatse tuhuaque cuinanama jarijudya. Tuquetu neticuare cani tsecue peque, payaque. Paatsutu huipuchitanacuare cani ducu cuaji ishu. ¹² Tudyá tujatu bacuare beta barepa juque Yusu tsahuaquique ecatse. Ejutuqui pajada tsehue ecajututi tatse jucuare. Jesús emajuque jarahuaaju tatse juanicuare. Peadyatu anicuare Jesúsja iyuca juhua queja amaca. Peya bacue anicuare Jesúsja ehuaqui juhua queja amaca. ¹³ Tudyatu Yusu tsahuaqui ecatsera bacaduracuare:

—¿Eje bucha juatsumi paya, mama?

—Paya ique, Ique Cuatsashaquique emajuque tunara ejera cuana chirinahua baatsu. Ique baecua eju cuana taa tunara ecue iyatihua, —jadya tujatu ecatsacuare.

¹⁴ Jadya juatsutu María cahuallaticuare. Tudyá tujatu bacuare Jesús junetiyaju. Arepa petaya ama bucha tujatu cueyanecuare ama Jesús. ¹⁵ Turatu bacuare tumeque ecuita ehua cuanaque naruquique bucha jutidya. Tudyatu Jesúsra bacaduracuare:

—¿Eje bucha juatsumi paya, mama? ¿Ai tuquemi sareya? —jadyatu Jesúsra acuare.

—Ique Cuatsashaquique emajuque tuque sareya. Mira peya queja dujuhuaque juatsu, cuejacue ique eju mira iyatihuaque. Eratu emajuque caniju iyamerencacacara aya, —jadyatu Maríara acuare.

¹⁶ Tudyatu Jesúsra acuare:

—¡María!

Jadya bacatsu tujatu cueyanecuare tuque Jesúsque. Bajiyu tsuratsu tujatu acuare tuja yana eque, israelita cuanaja yana eque:

—[Rabuni! —jadyatu Mariara acuare. (Rabuni tu “Ebahuityaquiue” jadique.)

¹⁷ —Jipeume ique. Ecue Etata queja tsurama jari. Dirucue ecue eatsehuequi cuana queja, era mepehua cuana queja. Cuejadirucue ecana: “Jesús patu Etataque queja, tumbaedyá micuanaja Tata queja jadya tsuraya. Tsuraya patu tuja Yusu queja, tumbaedyá micuanaja Yusu queja”, —jadyatu Jesúsra cuejamerecuare María queja.

¹⁸ Tume ecuana María Magdalajura cuejaticuare. Ecuana queja jutitsu tura ecuana cuejaticuare:

—Eratu Ecuana Cuatsashaquiue bahua. [Enetitsuranuca tuque!

Jadya ecuana aatsu tura ecuana cuejacuare tuque Jesúsra cuejamerehuaque.

Jesús tura mepehua cuana queja cabamereticuareque
(Mt 28.16-20; Mr 16.14-18; Lc 24.36-49)

¹⁹ Tumeque domicu huecacadya ecuana chineju casitaticuare ecuana Jesúsra mepehua cuanaque. Dutya etsecue cuanatu eteritilla jucuare. Ecuana huaraji cuana tuque ecuana mubacuare. Arepa etsecue cuana eteri ama buchatu Jesús etsecue pacashama nubi jucuare. Isaranaticuare tura ecuana:

—Banuchi. Are micuana bajida juya ama, —jadya tura ecuana anaticuare.

²⁰ Jadya aatsu tura ecuana bamerecuare tuja emetucu ecatse curusuju tatatanahuaque. Tumbaedyá tura ecuana bamerecuare tuja epere tsati tsehue esacuaque. Pureama ecuana jucuare Jesús chacha banucaya tibu.

²¹ —Netsapeume inime. Pureama nejucue. Ique ecue Etatara riyaque yahuaju tuja quisarati cueja ishucadishacuare. Jadidya micuana era dyadi cuadishayadya jidaque quisarati cuejara, —jadya tura ecuana acuare.

²² Jadya yana au jadya aatsu tura ecuana jujacuare.

—Ecue Espiritu pajuna micuana queja. ²³ Ejeja ni micuana jucha cuana nrecabaya, Yusuratu apupashayadya. Ejeja ni micuana jucha cuana nrecabaya ama, Yusura tunajatu apupashaya amadya, —jadya tura ecuana acuare.

Tomás Jesúsra cabamereti ishucacuareque

²⁴ Tomasjatu bama jari jucuare Jesús enetitsuranucaque. Tomástu Jesúsra mepehuaquedyá jucuare. Jadya ama buchatu ecuana ecasitatiju tuhua ama jucuare, Jesúsra peya cuana cabamereti ishucacuare. Tomasja peya ebacanitu jucuare “Pere Ecuinanaque”.

²⁵ Tuque tsurunucatsu, tuque ecuana cuejacuare:

—Bachine tuque ecuana Ecuana Cuatsashaquiue. [Chacha nuca tuque! —jadya tuque ecuana acuare.

—Ejeneya ama micuana era. Tuja emetucu tacua ecatseju tunara tachineque cani baatsu, tuhua ecue emetucu sapara ishatsu, tumbaedyá tuja epere sacuatanachineju, tume camadya tuque chacha netitsuranucahuaque eejeneu, —jadya ecuana Tomásra acuare.

²⁶ Tudyá quimisacarucu huecaca juatsu ecuana casitatinucacuare yuhua cama. Tomástu ecuana tsehuedya jucuare. Dutya eteriqui cuana eteritilla jucuare. Jesúsra nubicuare etsecue pacashama. Netitucua ecuana ducu. Isaracuare tura ecuana:

—Banuchi. Are micuana bajida juya ama, —jadya tura ecuana acuare.

²⁷ Tuequedyá tujatu Tomás isaracuare:

—Tomás, jipenacue ique. Petacue ecue emetucu tacua ecatse. Ishanacue micue emetucu sapara tunara ique curusuju tatatsu caninechineju. Rirucue micue ebi. Ishacue micue emetucu tsati tsehue tura ecue epere sacuachineju, pana ejene micue ique chacha netitsuranucahuaque aishu. Yatananadya jutidya ama ique. “[Eje bucha chacha netitsuranuca ni tu juma!”, jadya micue inime paju ama. Ejenecue mique tunara cuejahuaque, —jadyatu Jesúsra acuare Tomás.

²⁸ —[Miquemi Ique Cuatsashaquiue! [Miquemi Yusu Neri! —jadyatu Tomásra acuare Jesús.

²⁹ —Tomás, mira ejenehua ique chachaque, ique cuita bahua tibu ademe. Peya cuanara ejeneya, ique ni riyá piji buchique bamaque. Dyaque jida pureama tuna jubuque, —jadyatu Jesúsra acuare.

Eje bucha juatsu Juanra riyaque quirica huenecuareque

³⁰ Riyaque yahuaju jariratu Jesúsra jetiama ahua ai cuana ecuanaja yacuaju Yusuja casa bamere ishucacuare. Jetyama tura ahua cuanaque tuque cuejaya ama riyaque quiricaju. ³¹ Eje uma cuana camadya rique huenehua. Riyaque quirica rique huenehua micuanaja Jesús Mesiasque ejene ishucacuare, Yusuja Ebacuaqueque jadya. Huenehua rique era, micuana tuaqueja catyatitsu tuatsehue siri ani ishucacuare.

Jesús pacarucu tura mepehua cuana queja cabamereticuareque

21 Tume cuanaque jadya juu jadya juatsutu Jesús ecuana tura mepehua cuana queja cabamereticuare. Bei Tiberias jiruru ecuana jucuare. ² Pacarucu ecuana jucuare tuhua. Jadya ecuana jucuare: ique Juan, Simón Pedro, Tomás (Pere bacani jucuareque), Natanael (Caná Galilea yahua juque), ecue eatsehuequiue, peya beta ecatse jadya.

³ —Ique jae derura cuaya, —jadya ecuana Simón Pedroru acuare.

—Ecuana dyadi ecuana cuayadya miatsehue, —jadya tuque ecuana acuare.

Anibutecuare ecuana cuabaju. Cuacuare ecuana jae derura. Tumeque meta ecuana acuare cuana ama cuita ni peadya jae. ⁴ Amena huecacayaju tibu pajatayajutu Jesús cabamereticuare bei jiruru. Ecuana cuayanecuare ama tuque Jesúsque. ⁵ Tura ecuana quiquecuare:

—Tata ecana, zeje dyane micuana jae ahuaque?

—Aijama cuita. Ahua ama rique ecuana ni peadya buchique, —jadya tuque ecuana quemitsacuare.

⁶—Nemarecue micuanaja jae deruquique cuaba jida eque amaca. Jadya ae tuque micuana jetiama jae eau, —jadya tura ecuana acuare.

Tura jadya cuejayaju ecuana tura cuejaya equedya jucuare. Jae deruquique tuque ecuana marecuare. Jadya ahuaju, jae deruquique marahuejutu jae jetiama nubicuare. Repetaqui ama ecuana jae deruquique bacuare.

⁷—[Ecuana Cuatsashaquique tume! —jadyatu era Jesúsja dyaque iyuhuedara Pedro acuare.

Jadya ayaju bacatsutu Pedro cajututicuare dyaque jutu ishuque. Cajututitsutu beiju pacacacuare Jesús queja masadama juti ishu. ⁸Japada cuita ama tuque ecuana mejiji bacuare, cien metro dyane camadya. Tume ecuana cuaba eque cajipeticuare, jae deruquique repeaje juyaque jae jetiama tsehue. ⁹Jaratsuratsu tuque ecuana Jesús bacuare jae cuahuiani juyaju. Pan bacue tujá anicuredya.

¹⁰—Nebecue umae jae micuanara iyajacuita ahuaque, —jadya ecuana Jesúsra acuare.

—Tumidya tuque dujuya, —jadyatu jucuare Simón Pedro.

¹¹Cuacuretu cuabaju jae jiteque. Mejijiju tujatu repecuare jae deruquique ejequeque. Anicuretu peadya ciento pishica tunca quimisha earacana jae. Arepa jae jetiama ama buchatu ederuquique chajatanacuare ama.

¹²—Nearaanacue, —jadya ecuana Jesúsra acuare.

Chamacama tuque ecuana cueyanecuare tuque Jesúsque, Ecuana Cuatsashaquique. Jadya tibudyatu ni ejera buchique bacaduracuare ama tuque aique.

¹³Tumetu Jesúsra queticuare jae etijaqui juque. Inaticuaretu pan. Tyabarecuare tura ecuana pan, jae jadya ecuana mihua ishu. ¹⁴Tuequedya tura ecuana majutsu chacha netitsuranucatsu cabamereti quimisha ishu cabamereti ishu acuare ecuana tura mepehua cuanaque.

Jesús, Simón Pedro tsehue quisaraticuareque

¹⁵Amena araara amena juatsutu Jesús, Simón Pedro tsehue quisaraticuare.

—Simón Jonásja ebacuaque, ¿ducuta mira iyuhueda baya, riyaque yahua juque iyuhueda baya bucha ama? —jadya tujatu acuare.

—Jejee, Ique Cuatsashaquique. Miratu adebaya era mique iyuhueda bayaque, —jadyatu Pedrora quemitsacuare.

—Bahuityacue ecue quisarati butseeju eaqueja catyatiya cuanaque. Uhuisha naruquira tuja uhuisha cuana naruya bucha, narue ecana acue, —jadyatu Jesúsra acuare Pedro.

¹⁶Yudijidya bacaduranucatu Jesúsra acuare Pedro:

—Simón Jonásja ebacuaque, ¿ducuta mira iyuhueda baya?

—Jejee, Ique Cuatsashaquique. Miratu adebaya era mique iyuhueda bayaque.

—Bahuityacue ecue quisarati eaqueja catyatihua cuanaque. Uhuisha naruquira tuja uhuisha cuana

naruya bucha, narue ecana acue, —jadya tujatu acuare.

¹⁷Bacadura quimisha ishutu Jesúsra bacaduranucacuare:

—Simón, Jonásja ebacuaque, ¿iyuhuedadya mira baya? —jadya tujatu anucacuare.

(Bacadura quimisha ishutu Jesúsra bacaduracuare: “¿Iyuhueda mira baya?” jadya, “¿Ducuta mira iyuhueda baya?” jadya ama.)

Jadya bacadurayajutu Pedro peya inime jucuare.

—Jejee, Ique Cuatsashaquique. Miratu dutya adebaya. Adebaya tuquemi mique era iyuhueda bayaque, —jadya tujatu acuare Jesús.

—A, jutaquiju bahuityacue ecue quisarati eaqueja catyatiya cuanaque. Uhuisha naruquira tuja uhuisha cuana naruya bucha, narue ecana acue. ¹⁸Pusha amadya mique cuejaya, Simón. Mique ehue ebari jarijumi cuahuadya mique eju cuacara juyaju. Cajututitsumi cuahua mique eju cuacara juyaju camadya. Amena esiri juatsumi carirutibuque ebi ecatse, peya cuanaja mique risi ishu. Dujubuque tunara mique eju mique cuacarama juyaju, —jadyatu Jesúsra acuare Pedro.

¹⁹Jadya quisarati tsehue ayaquetu Jesúsra Pedro acuare, Pedro eje bucha majue judadiyaque. Adebamerecuare tujatu Pedro aiju caadebameretiyaque tuque majuya eque Yusu eje bucha muitanae juyaque. Tuequedyatu Jesúsra Pedro anucacuare:

—Ecue inime eque jucue, Pedro.

²⁰Ique Jesúsja iyuhueda jucuareque tatseja etibene queja neticuare. Idya jucuare tuque inatama jariju chineju araaraque Jesús peque araaraque. Idya tuque bacaduraqui jucuareque: “¿Airami mique ujeu baqui cuana queja inamereya?” jadya. Etibene queja cabajiyuti juatsu Pedrora bacuare. ²¹Ique baatsu tujatu bacaduracuare Jesús:

—Ique Cuatsashaquique, ¿eje buchari jubuque riyaque yatseja etibene queja netiyaque? —jadya tujatu acuare Jesús.

²²—Jidama inime baume tuque eje bucha judadiya tsehue. Era cuatsashaya eque juishuque camadya inime tupuqui acue. Tuque jidama inime ishu aume. Eratu ique junanucaya tupu chacha iyacara aatsu, eiyaudya. Tuja ishu jidama inime baume, —jadyatu Jesúsra acuare.

²³Jadya tibudyatu Jesús queja catyatiya cuanaja ique majudadiya ama cuana bucha inime jucuare. Jesúsratu Pedro cuejacuare ama ique majudadiyaque ama. Tuquetu jucuare: “Eratu ique junanucaya tupu chacha iyacara aatsu, eiyaudya. Jidama inime baume tuque eje bucha judadiya tsehue”, jadya tujatu acuare.

Amena ishuque quisarati

²⁴Erari huenehua era cuitadya petahuaque, ecue ija-ca tsehue bacahuaque jadya. Ique Jesúsra dyaque iyuhueda bacuareque. Dutya, ecuana Jesús queja catyatiya cuanaque ecuana bahue era huenehuaque yunerique. Era huenehua baedya tu dutya.

²⁵ Riyaque yahuaju jari tuputu Jesúsra jetiama ai cuana acuaire. Dutya cuita ama riqe cuejaya riyaque quiricaju. Era ni dutya huenequena jucuaire Jesús jucuaire cuanaque, tura quisarati acuaire cuanaque, dyaque je-

tiamari quirica ejuu. Aijamatu emajaca juquena jucuaire dutya quirica iya ishu.

Riya tupu camadya jari ri ehueque.

Juan

HECHOS

Riyaque quirica: ri Lucasra huenequareque. JIDAQUE QUISARATI LUCASRA HUENECUAREQUE huenequi jucuarera nucadyari huenequare. Huenequare rejari Jesús majutsu netitsuranucatsu jucua cuanaque. Catibutiyaratu Lucasra huenequare Jesús Etataque queja tsuracuareque. Cuejacuare tujatu Jesús junanucabuqueque. Jesusratu cuadishacuare tuja cuanaque, tunara cuitadya bacahuaque, bahuaque jadya cuejara cuaishu. Cuejamerecuare tujatu ecana tuja quisarati dutya ecuita riyaque yahuaju aniya cuanaque. Jerusalén eque tujatu ecana catibutishacuare israelita cuana eque, tuequedya peya queja israelita ama cuanaque. Riyaque quiricaju ri tuna Jesúsra cuatsashaya equedya jucuaque, dutya queja tuja quisarati cueja juyaque. Pedrora, peya cuanara jadyatu Jesúsja quisarati cuejacuare israelita cuana (capítulos 1-9). Pedrora, Pablora jadyara tatsejatu Jesúsja quisarati cuejacuare israelita ama cuanaque (capítulos 10-28). Riyaque quiricajuri aniya Yusuja Espiritu riyaque yahuaju junacuareque. Tuque Jesús queja catyatihua cuana queja junahuaju tunajatu bajida tsehue ama Jesúsja quisarati cuejacuare. Acuaire tuna Yusuja casa bamere ishucuaque jadya. Tumebaedyari riyaque quiricaju aniya Jesús queja catyatimetse jucua cuanaque tuna eje bucha anie jucua cuanaque, tuna nerecada atacuaire cuanaque jadya. Arepa canerecatiya ama bucha tuna canimehuallaticuaire ama. Jesús queja nimee cuita camadya tuna jucuaire. Jadya tuna baatsutu peya cuana tumebaedyatuaqueja catyaticuaire.

Jesúsra Yusuja Espiritu cuadisha ana acuareque

1 Era rique micue quirica cuadishaya, ecue eadebaque Teófilo. Riyaque ri beta ishucue quirica micue ishucua cuadishayaque. Icueneque quiricaju mique cuejachine Jesús riyaque yahuaju jari tupu ai jucuaque. Huenechine tuque era tuque ai jucuaque, bahuityacuareque, tuque rehua mere catibuticuaire equeque, ² tuque barepaju tsurachineque huecaca eque tupu. Diruma jarira tujatu mepecuaire peadya tunca beta earacana tuja quisarati cuejara cuadisha ishucua. Curusujutu majucuaire. Majutsutu chacha nityatsuranucacuare. Nityatsuranucatsutu riyaque yahuaju juneninucacuare jari pushi tunca huecaca tsuramaque jari. Tumeque pushi tunca huecaca juneniyaque jaritu eje uma cabamereti jucuaire tuja ecuadisha cuana queja. Jetiamadya tujatu ai acuare yuneridya tuque chachaque caadebamereti ishucua. Eje uma cuejadya tujatu ecana ahua Yusura eje bucha narue dutya adadiyaque. Yusuja Espiritu eque tujatu ecana cuejahua eje bucha cuejae tuja quisarati aishucua.

⁴ Tuja ecuadisha cuana tsehue jarira tujatu ecana jadya acuare:

—Necuinanaume jari Jerusalén juque. Rehuadya neanicue jari Yusuja Espiritu micuana queja junaya tupu. Ecue Etataratu cuadishaya micuana queja tura cuadisha ana ahuaque. Icueneta cuejadya micuana ahua tumeque Espiritura micuana tsahuayaque.

⁵ Icuene tuna Juanra ena tsehue utsacuare inime cacuairetihua jadicue ejitaju juishu. Eje uma huecaca juatsu ama tuque micuanaja Yusura tuja Espiritu cuitadya cuadishaya micuana tuque mere ishucua casa

tyaishu, —jadyatu Jesúsra acuare tuja ecuadisha cuanaque.

Jesús barepaju tsuracuareque

(Mr 16.19-20; Lc 24.50-53)

⁶ Jesússtu tuja ecuadisha cuana tsehue ecasitati jucuaire. Casitatitsu tunajatu Jesús acuare:

—Ecuana Cuatsashaquique, ¿riyaque huecaca eque mi mira ecuana israelita cuana tyaya casa ecuana yahua canaruti ishucua, romano cuanara ecuana enaruuju? —jadya tunajatu Jesús acuare.

⁷ Jesúsra tuna quemitsacuare:

—Ecue Etatara huecaca iyahuaque juetihuajutu tura adadiya tura eje bucha inime pirehua eque. Micuana bahue ishucua ama tu eje tupu, jadya ama juatsu ejeque huecaca jadya judadiyaque. Yusuja peadya camadyatu casa aniya tumeque bahue juishucua. ⁸ Yusuja Espiritu micuana queja junatsu, tura micuana tyanaya casa micuanaja ecue quisarati cueja ishucua. Icuene cuita necuejacue ecue quisarati rehua Jerusalénju, tuequedya Judea epu cuanaju, Samariaju jadya. Dutya yahuaju epu cuana dyaque japada cuanaju ecue quisarati necuejaticue, —jadya tuna Jesúsra acuare.

⁹ Jadya Jesúsra cueja amena ahuaaju tuna capetatinetibareyajutu Jesús huesatanatsu dirucuaire. Tsurayaquetu huani ducu aputacuare. Banuca ishucua ama tuna bajacacuare. ¹⁰ Jesús tsurahuaque tunara ebarucue queja petanityabareyajutu beta Yusu tsahuahuquique ecatse cabamereticuaire. Pajada tatsejatu una jucuaire. Jesúsja ecuadisha cuana queja tatsejunacuare.

¹¹ —Tata ecana Galileaju cuanaque, ¿ai tuque micuana ebarucue queja petanityabareya? Jesústu diruhua micuana quejaque. Tuque micuana barepaju tsurayaju bahua bucha, jadya junanucaedyatu ejeque huecaca jubuque Yusu quejaque, —jadya tatsejatu ecana acuare.

Jesúsra mepecuare cuanaque casitaticuareque

¹² Tumetu Jesúsra mepecuare cuanaque Jerusalénju judirunucacuare, uhua cuemusú Olivo Acui Quini bacani juque butenucatsu. Tumeque uhua cuemusutu Jerusalén japadama jucuare, peadya kilómetro dyane. Eje japa amatu jucuare. Canajara huecacaju tunajatu cacuatsashati eque tume tupu eajeshataquetu jucuare. ¹³ Epu aridaju tuna judirucuare. Tuhua junatitsu tuna cuacuare tuna aninaticuare etareju. Tuna anidiruqui juyaju etareju tuna nubidirucuare. Tsuracuare tuna beta ishuque pisoju. Jucuare tuna: Pedro, Juan, Santiago, Andrés, Felipe, Tomás, Bartolomé, Mateo, peya Santiago, Simón, Judas jadya. Santiagotu Alfeoja ebacuaque jucuare. Simóntu jucuare Roma juque enaruquique bijidamaduraqui juyaque. Judastu Santiago ebacuaque jucuare, Jesús inamerequi jucuareque ama. ¹⁴ Casitatijacama tuna jucuare Yusu tsehue quisarati ishú. Jesús tsehuequi cuanaque tuna tuhuadya jucuare. María, Jesúsja ecuaquetu tuhuadya jucuare. Peya epuna cuana tuhuadya jucuare. Tunadya tuna dutya casitati bahue junenicuare Yusu tsehue quisarati ishú.

Jesús queja ecatyati cuanara Judas cuarequi Matías mepecuareque

¹⁵ Eje uma huecaca juatsu amatu Jesús queja ecatyati cuanaque ecasitati jucuare. Jetiama, peadya ciento beta tunca earacana tuna ecasitati jucuare. Pedroru tuna isaratibunecuare:

¹⁶ —Ecue eatsehuequi cuanaque, nebacacue ique. Béru eje uma maratu Davidra icueneta huene acuare Judas Iscariote judadiyaque. Yusuja Espirituratu huene emerecuare. Davidra Yusuja quisarati icueneta huene acuare bae cuitadyatu judadichine. Riyaque Judasradyatu Jesús inamerechine tuque ujeu baqui cuana queja. ¹⁷ Judastu ecuanaja ecare datse juchine. Ecuana tsehue mere jupee juishuque tucue patu emepe jucuare. ¹⁸ Jesús ujeu baqui cuana queja inamereya tsuje tunajatu chipiru tyachine. Tuequedya tujatu ecana yudijidya tyanuca achine chipiru tura jidama tsehue inahuaque. Tumeque chipiru tsehue tunajatu uhua quemichine. Judastu tuta taca quiyeti juchine. Pacacatsu tujatu pututachine edumijiti. Dutya tujatu esere cuana cuinanaterechine. Jadya majuetu juchine. ¹⁹ Jerusalénju aniya cuanaratu bacatsachine quisarati Judas juchineque. Bahue tuna judadichine tuque tuhua ami quijehuetitsu majuchineque. Jadya tibudya tunajatu tumeque yahua Acéldama jadya bacanishachine, “Quiyeti pujija chipiru tsehue equemique emaja-

ca” jadique. ²⁰ Quirica Salmos bacaniju tu jadya ehue:

“Etaretu cashanatibuque.

Ni ejeratu isaanibuque ama”.

Tumebaedya tu ehue Salmosju:

“Pea tuque cuarequi paju”.

Jadyatu icueneta huenetanadya jucuare Yusuja quisarati.

²¹ “Aniyari rehua ecua Ecuana Cuatsashaqui tsehue junenitibunecuare patya eque junenicuare cuanaque. ²² Junenicuare tuna Jesús tsehue tuque Juanra utsacuare patya equeque, tuque Etataque queja barepaju tsurachine tupu. Tunadya tuque ecuanaja peadya mepetaqui, ‘Jesús enetitsuranucaque’ quisarati cuejamere juishu, —jadya tuna Pedroru acuare:

²³ Dutya tupu tunajatu inime jucuare. Jadya tibu tunajatu beta mepecuare. Peadyatu José Barsabás jucuare. (Pea tujatu ebacani jucuare Justo.) Pea tunajatu mepecuare Matías. ²⁴ Jadya juatsu tuna Yusu tsehue quisaraticuare:

—Ecuana Cuatsashaquique, miratu adebaya peadya peadya eje buchique dutyaja inime tupu cuana. Bamerecú ecua; ejeque riquemi ecatse mepehua Judas cuarequi mique merequi juishuque. Judasrami amena merejacahua. Judiruhuatu eju tuque judiru ishú, —jadya tunajatu acuare Yusu.

²⁶ Tunaja bahue tunajatu quemicuare dadoju ejeque ecatse Yusura mepehua jadique bahue juishu. Jadya adebae tunajatu acuare Matías, Judas cuarequi emepeque. Tumeque huecaca equetu Matiasra Yusu merecuare peadya tunca peadya earacana Jesúsja ecuaisha cuana tsehue.

Yusuja Espíritu junacuareque

2 Pentecostés chine juetihuajutu Jesús queja dutya ecatyati cuanaque ecasitati jucuare ecasitaticuareju cama. Pentecostés chinetu jucuare israelita cuanara ehua cuanaque huesayaque chine. ² Muya jutidyatu Yusuja Espíritu tuna queja butecuare. Sicacada tunajatu barepa equeque buteyaju bacacuare, cuejipa casadaque tuuetibeya bucha. Dutya etareju cuanaratu bacacuare tumeque sicacadaque. ³ Tume tunajatu bacuare ai cuana achacha piji etiqui juju bucha. Etiqui buchiquetu tunaja iyuca cuana dyaque peadya peadyaju netibarecuare. ⁴ Jadya junaetu Yusuja Espíritu jucuare tuna peadya peadya queja. Tuna queja butetsu tujatu ecana bape bape yana eque quisaratitibunecuare, peya yahua cuanaja yana cuana eque.

⁵ Tume patyatu jetiama israelita cuana jucuare Jerusalénju Yusu muijaca baecua jucuare cuanaque, Moisésja cacuatsashati eque aniya cuanaque. Dutya yahua juque jujeri tuna juticuare. ⁶ Eje bucha juyaque bacatsu tuna cuacuare Jesús queja ecatyati cuana queja. Tuhua junatitsu tunajatu Jesús queja nimee cuanaque quisaratibareyaju bacacuare. Bape bape yana eque tunajatu ecana quisaratiyaju bacacuare. Tuna quisarati cueja juyaju bacaqui cuanaja yana eque quis-

aratiyaju tunajatu bacacuare. Jadya bacatsu tuna eje buchadya jucara jucuaré. ⁷ Dyaque ejecutana tuna jucuaré. Bape tunajatu bacacuare. Cacuejatibarecuare tuna tuna cama:

—[Nebacacue! Dutya riya quisaratiya cuanaque taa rena Galileaju cuanaque. ⁸ Jadya ama bucha taa rena Galileaju cuanaja yana eque ama quisaratiya, ecuanaja yana eque jutidya. ¿Eje buchique jatsu rique ecuana ecana ecuanaja yana eque quisaratiyaju bacaya ecuananada equedya quisaratihua eque? Ecuana taa ecuanaja eje uma peya yahua cuana juque. ⁹ Umae ecuanaja Partia juque, peya cuana bacue Mediaju, Elamju cuanaque. Umae bacue ecuanaja Mesopotamiaju, Judeaju cuanaque. Umae ecuanaja Capadocia juque, Pontoju, Asiaju cuanaque jadya. ¹⁰ Umae ecuanaja Frigiaju cuanaque, Panfiliaju, Egiptoju cuanaque jadya. Peya cuana bacue ecuanaja Africa juque, Libia yahua juque Cirene japadamae. Umae bacue ecuanaja Romaju cuanaque. ¹¹ Umae ecuanaja jechine Creta juque, Arabiaju cuanaque jadya. Umae ecuanaja Israel eque neri ejuracana cuanaque. Dutyaradya tuque ecuanaja Yusu Neri muiya israelita cuanara, israelita cuanara ama jadya. Dutyadya ecuanaja Moisésja cacuatsashati eque aniya. Arepa ecuanaja umada peya yahua cuana juque ama bucha tuque ecuanaja ecana bacaya ecuanaja yana eque quisaratiyaju. Bacayadya ecuanaja ecana jida quisaratiyaju, —jadya tuna jubarecuare.

¹² Dutyara tunajatu bape bacuare eje bucha debataqui ama jadya. Jadya tibudya tuna cabacadurati-barecuare:

—¿Eje buchique ri riya jadya juyaque? —jadya ecana jubarecuare.

¹³ Umaera bacue ijaribacuare jutidya Jesús queja ecatyati cuanaque.

—Nijuqui tibu tuna jadya quisaratiniya, —jadyatu jucuaré uma cuana.

Pedroru ecuita cuana isaracuareque

¹⁴ Pedrotu netitsuracuare ecuita cuana isara ishú. Peadya tunca peadya earacana Jesúsja ecuadisha cuanaque tuna tumbaedyá tuhuadya jucuaré. Etsuri jebuda tsehue tujatu isaratibunecuare israelita cuana, Jerusalénju aniya cuanaque tuhua jucuaré cuanaque jadya:

—Tata ecana, nebacacue ique. Nebacacue jida era cuejayaque. ¹⁵ Nijuqui ama ecuanaja, micuanara inime tupuya bucha. Barepatya ama jari taa rique; las nueve pijidya taa rique. Ecuana israelita cuanaja tuque ecuanaja uva nacaca sasadaque iji baecua apudajudya cuita. Cuejaya micuana era, ecuanaja eje bucha juatsu jadya quisaratihuaque. ¹⁶ Riyaqueri jadya juya, Yusura icueneta cueja acuareque Joel tuja quisarati cuejaqui eque:

¹⁷ “Amena ishúque huecaca cuanaju tuque ecue Espíritu cuadishabuque yahuaju.

Israelita cuanaja ishú camadya ama, israelita ama cuanaja ishú tumbaedyá tuque cuadishabuque.

Micuana eque juracanaya cuanaratu ecue quisarati tsapebuque.

Ecuita cuanara, epuna cuanara jadyatu quisarati tsapebuque.

Tahuijutu ecue Espiritura bahue amerebuque quisarati yunerique ehue ebari cuana, tumbaedyá esiri cuanaque.

¹⁸ Tumeque huecaca cuanaju tuque ecue Espíritu cuadishabuque ique merequi cuana queja, ecuita cuana queja, tumbaedyá epuna cuana queja. Tunaratu cuejabuque ecue quisarati, era ecana jadya quisaratishabuque tibu.

¹⁹ Barepaju tsehue tuna ecue dyaque casa aniyaque bamerebuque.

Tumbaedyá tuque ecue casa bamerebuque yahuaju cuana tsehue.

Amitu juribuque.

Etiquitu jujubuque.

Huani misidaquetu netitsurabuque.

²⁰ Ijetitu huecadama jubuque.

Baditu ami bucha pudee jubuque.

Jadyatu jubuque Ecuana Cuatsashaquique junanucama jariju, emuique, casadaque jadya cabameretima jariju.

²¹ Dutya tuaqueja catsahuamereti ishú tuque bacaqui cuanaquetu einajaca jubuque,”

jadyatu Yusura quisarati acuare tuja quisarati cuejaqui Joel eque.

²² Pedroratu tuhua jucuaré cuanaque quisarati cuejanucacuare:

—Micuana Israel eque ejuracana cuanaque, nebacacue era cuejanucayaque. Cuejaya micuana Jesús Nazaret juque eje buchique. Tuque riyaque yahuaju jarira tujatu jetiama acuare ejeque ecuitaja ataquique ama micuanaja yacuaju. Jetiama tujatu acuare micuanara bape bacuare cuanaque. Dutya riya cuanaquetu Yusura amerecuare tura tuque cuadishahuaque yunerinemere ishú. ²³ Jadya ama buchatu micuanaradya inamerehua. Micuanaratu ecuita jidama cuana queja curusuju tatamerehua tuque iye ishú. Dutya riya cuanaquetu jadya judadihua Yusura inime pirehua equedya. Tuquetu icuenetadya bahue juhua micuanara jadya adadiyaque. ²⁴ Jesús majuhuaju emajuquetu Yusura chacha nityatsuranucagua. Emajuque tujatu nityatsuranucagua, Jesús emaju eje bucha jarasiritaquima tibu. ²⁵ Berutu ecuari Davidra huenecuare Jesús jadya ayaque:

“Ique bahue Ique Cuatsashaquique dutya huecaca eatsehueque.

Jacanime ama tuja ique.

Tuque eatsehue tibu, bajida ama juya.

²⁶ Jutajuyadya ique dyaque pureama juya.

Pureama tsehue tuque ajacaya ama quisarati Yusu jidaque.

Arepa ique majuya ama bucha, pana ejenedya tuque aya, dutya eje bucha judadiyaquetu ecue jida ishúque.

²⁷ Pana ejenedya tuque aya, Ique Cuatsashaquira ique emajusiri ama huanabuqueque.

Tuhuadya jutidya tura riri ishu huanasiribuque ama, ique tujaque, tuque merequique jadya juya tibu.

²⁸ Eratu Yusu aya:

‘Mira ique bahue amerehua maju baecua ani ishu.

Mira ique dyaque jida pureama amerehua, miatsehue ique anidirubuque tibu, Yusu’’,

jadyatu Davidra béru huenecuare.

²⁹ ‘Ecue ata cuana, pana cueja micuana aya Davidra huenecuareque. Tuta taca jadya catiyaque amatu jadya jucuare, ‘Huanasiribuque ama tura ique ecue ecuita riri ishu’ jadya huenetsu. Béru amena mara maratu ecuanaja ebaba David majucuareque. Majuhujutu tuja ecuita ishatanacuare tumu caniju. Tuhuadya tujatu ecuita riricuare. Riya camatu naranaya jaridya tuja uhuacuare tuque ishatanacuareque. ³⁰ Chacha aniya jari tuputu Yusuja quisarati cueja juhua. ‘Peadya mique eque ejuracana-quetu Mesías jubuque, Ecue Emepeque. Mira israelita cuana naruya bucha, jadya naruedya tujatu ecue cuanaque abuque. Yuneridya mique jadya aya, era jadya adadiyaque’ jadya patu Yusura acuare. ³¹ Jadya equetu David icueneta bahue jucuare Yusura Mesías cuadishadadiyaque. Tuquetu bahuedya jucuare Yusura Mesías emajuque nityatsuranucabuqueque. Jadya tibudyatu jucuare: ‘Emajuque caniju eishaquetu jarasiribuque ama, ni tuja ecuita riribuque ama’ jadya.

³² Yusradyatu Jesús majuhuaque chacha nityatsuranucachine. Ecuaranatu bachine Jesús tuque netitsuranucahuaju. Iyacua micuana ecuanara yuneridya cuejaya tuque chachaque. ³³ Yusratu barepaju dujunucahua tuja yacuaju. Iyacuatu tuque muita ishujutu Etataqueja jida eque amaca. Yusu patu jucuare: ‘Jesusratu ecue Espíritu cuadishaya tuaqueja catyatihua cuana queja’ jadya. Riyaque Yusuja Espíritu equedya ecuanara iyacua quisaratiya. Micuanara petayaque, bacayaque jadyatu tura jadya amereyaque. ³⁴ Davidja ecuita barepaju tsurama jarijudya. Jadya ama buchatu Davidra quisarati anucacuare béru:

‘Yusratu Ique Cuatsashaquique jadya cuejacuare:

‘Anibutecue ecue jida eque amaca muita ishu,

³⁵ era mique ujeu baqui cuanaque dutya ijahue atillaya tupu, Ique Cuatsashaquique’.

Jesús jadya ayaque tujatu jadya quisarati acuare.

³⁶ ‘Nebacacue jari ique, dutya micuana Israel eque ejuracana cuanara. Jesús, micuanara curusuju tatamerechinequetu Yusura Mesías amerecuare. Tumebaedyatu Ecuana Cuatsashaquique amerehua, —jadyatu Pedrora cuejacuare tuhua jucuare cuanaque.

³⁷ Jadya juya bacatsu tuna dyaque peya inime jucuaque, jidama juhuaque caadebatitsu.

—Ecuanaja ata cuana, ¿eje bucha ecuanara jutaqui?

—jadya tunajatu bacaduracuare Pedro, Jesúsja ecuanara cuanaque peya cuana jadya.

³⁸ Tume tuna Pedrora quemitsacuare:

—Jesús queja catyatitsu necacuareticue inime, Yusuja biji eque ani ishu. Necutsamereticue Jesucristoja ebacaniju. Jadya nejucue Yusura micuanaja jucha cua-

na apupasha ishu. Turatu cuadishaya tuja Espíritu micuana tsehue anisiri ishu, micuana tsahua ishu.

³⁹ Yusratu tuja Espíritu cuadisha ana ahua micuana queja, micuana eque ejuracana cuana queja, riyaque yahuaju dutya queja aniya cuana queja jadya. Jadya eque tujatu cuadishahua dutya tura tuaqueja ihuaraya cuanaja ishu, —jadya tuna Pedrora acuare.

⁴⁰ Nereda bucha cuejae tujatu ecana acuare yana muida tsehue:

—Dutyaju jeri iyacua aniya cuanaque tuna jidamaque inime cadujutiya. Tuna tuna Yusu queja judirunime ama. Necacuareticue inime tuna nerecatu-ratadadiya bucha nerecatuatae ejudadiu tibu, —jadya tuna Pedrora acuare.

⁴¹ Pedrora cuejayaque bacatsu tuna jetiama inime cacuareticue. Quimisha mil tuna inime cacuaretitsu Jesús queja catyaticuare. Cutsamereticuare ecana Jesúsja cuanaque jadya cabamereti ishu. ⁴² Jesúsja ecuanara cuanara bahuityayaque pana baca aatsu tunajatu ejenejacuare ama. Tunaja aniya cuanaque ecana dutya tupu catyatie jubarecuare. Casitatinicuare ecana Yusu tsehue quisarati ishu. Ecuana Cuatsashaquique adeba ishu tuna yuhua cama casitati bahue jucuaque.

Jesús queja ecatyati cuanaque eje bucha anie jucuaque

⁴³ Yusuja casa tsehuetu Jesúsja ecuanara cuanara ejeque ecuitaja ataquique ama acuare. Jadya baatsutu Jesús queja catyatima cuanaque dyaque anajacatuacuare. ⁴⁴ Jesús queja ecatyati cuanaque tuna yuhua cama nimee ecadutyati jucuaque. Caradatijacama tuna junenicuare. Aiqui cuanaratu tyacuare tunaja ai aniyaque aima cuanaque. ⁴⁵ Catyati ecana caticuare tunaja aniya cuanaque. Tunaja ai cuana catyati aatsu tunajatu chipiru tsumecuare peya cuanara ai sareya cuanaque quemi ishu. ⁴⁶ Dutya huecaca ecana caradatinicuare Yusuja etareju. Tunaja etare cuanaju tuna caradatijacama junenicuare araara ishu, Jesús majuhuaque adeba ishu. Pureama epuri jadya tsehue tuna araanicuare. Jida tuna cabatibarecuare peya cuana tsehue. ⁴⁷ Yusu tunajatu pureamaturajacacuare ama. ‘Dyaque jida taa mique ecuanara tsehue’, jadya tunajatu ajacacuare ama. Dutyaju jeri Jerusalénju cuanara tuna jida, iyuhueda jadya bacuare. Huecacaju huecacajutu Yusura peya cuana Jesús queja catyatishamereajecuare. Tume cuanaque Jesús queja catyatihuaju tuna Yusura Ijahua quejaque inajacamerecuare. Jadya eque tuna Jesús queja nimeedya jutidya juajecuare. Tuque pureama aishu ecana casitajiacuare ama.

Ecuita yuequedya ruduruduque chacha jucuaque

3 Pedro, Juan jadya tatse cuacuare Yusuja etareju las tres chinequeja, israelita cuana Yusu tsehue quisarati bahue uraju. ² Tuhuatu ecuita yuequedya rudurudu ecuinanaque juanicuare. Dutyaju huecaca tu-

najatu iyati bahue jucuare Yusuja etare tsecue. Tumeque etsecuetu "Etsecue Jida Pijique" bacani jucuare. Iya bahue tunajatu etsecuetsau junenicuare, chipiru cuana piji ecuita cuana etareju nubiya cuanaque bacatsa bacatsa aishu. ³ Tumeque huecaca tujatu batsacuare Pedro, Juan jadya Yusuja etareju nubinatijaju. Batsatsu tujatu ecatsa chipiru bacatsacuare. ⁴ Pedro, Juan ecatsa tujatu petacuare.

—Petacue yatse, —jadyatu Pedrora acuare.

⁵ Rudurudura tatse petahuaquedya peta acuare, tatersa chipiru tyaya bucha cabatitsu. ⁶ Pedroratu isaranacuare:

—Aijama tuque ecue chipiru. Aijama tuque ecue oro ni plata. Jadya ama bucha mique tsahuaya. Jesucristo Nazaretjuja ebacaniju mique cuatsashaya: "Netituracue". Ajecue", —jadya tujatu ruduruduque acuare.

⁷ Jadya aatsutu Pedrora emetucu jida eque amaca inaticuare nityatsura ishu. Muya jutidya tujatu cacaticuare ehuachi, ehuachi tsuru ecatsa jadya.

⁸ Tudyatu ecuita netitsurayaque putitanaquenacuare pureama tsehue. Amena ajetibunetsutu nubidirucuare Yusuja etareju Pedro, Juan ecatsa tsehue. Tudyatu putitana putitana jadya junenicuare pureama juatsu.

—Idyaque casada, jida jadya taa mi eatsehue, Yusu! —jadyatu jucuare.

⁹ Dutya tuhua jucuare cuanaratu bacuare juneniyaju. Bacuare tunajatu Yusu pureama au juyaju. ¹⁰ Tuna camadya jutidya tuna quisaratibarecuare, bape baatsu.

—Adebaya tuque ecua tumeque rududuruque "Etsecue Jida Pijique" bacaniju anibijida juchineque, cuetiya cuanaque chipiru bacaqui juchineque. ¿Eje bucha ajee jatsutu ejuu? —jadya tuna jucuare.

Juneniya baatsu tunajatu eje bucha adebataqui ama bacuare.

Pedrora ecuita jetiama ecasitatique isaracuareque

¹¹ Chacha juhuaratu jacacarama acuare Pedro, Juan jadya. Quimishadya tuna Yusuja etare ehueji quinida emaque jucuare, "Salomón Adebahue" bacaniju. Pana anajacata ejuquetu dutya tuhua jucuare cuanaque tuna queja tsajaja jucuare. ¹² Tuna jadya umada cuita caradatiya baatsutu Pedro tuna tsehue quisaraticuare:

—Pana baca neacue, ecue ata cuana Israel eque ejuracana cuanaque. ¿Eje bucha juatsu jatsutu micuana dyaque anajacataya riyaque baatsu? ¿Eje bucha juatsu jatsutu micuanara yatse petaya? ¿Tupuya tuque micuana inime yatsera yatseja casa tsehue cuana chachanehua bucha? A, aijama. Yatseja casa eque ama tuque yatse riyaque chachanehua. Tuquetu chachanetanahua, yatse jida juatsu ama. ¹³ Jesusja casa tsehuetu chacha juhua. Ecuana Etata Yusratu Ebacuaque Jesusja casa tsehue chacha amerehua, Jesus emui juishu. Riyaque Yusudya tu ecuanaja baba cuana Abraham, Isaac, Jacob ecanara muicuareque. Arepa Jesus Yusu Merequique juhua ama bucha tuque micuana huaraji cuana queja inamerechine, tuque iyemere ishu. Pila-

toratu Jesus inamerejacacara achine. Jadya ama buchatu micuanara "Curusuju pamaju" jadya achine.

¹⁴ Jesustu dyaque jidaque jucuare, cajuchatima nerique, tuyu nerique. Jadya ama bucha tuque micuana Pilato queja inajacamerecarama achine. Micuanaratu quiyeti puji inajacamerechine, Jesús einajacamereuque. ¹⁵ Micuanaratu iyemerechine Ecuana Inajacamerequique. Jadya ama buchatu Yusura emajuque nityatsuranucachine. Ecuana panu ejenedya aya Jesús chachaque, emajuque enetitsuraque, ecuanaradya bachine tibu. ¹⁶ Jesúsja casa tsehuetu riyaque rudurudu juhuaque chachanetanahua. Bayadya tuque micuana jida juneniyaju. Micuanaratu adebayadya. Yatseratu panu ejenedya ahua tura echachaneuque. Micuanaja yatacujadyatu Jesusra panu chacha amerehua, yatsera tura eauque panu ejene aya baatsu.

¹⁷ "Ecue ata cuana, micuanara micuanaja huaraji cuana tsehue Jesús iyeya patya tuque micuana adebachine ama micuana eje bucha juyaque. Eratu adebayadya micuanara tuque Mesiasque adebayaque ama. ¹⁸ Icuene tuque equeque quisarati cueja puji cuana eque patu Yusura cuejacuare Mesías canerecatidadiyaque, majudadiyaque jadya. Achinedya tujatu tura amerecara ahua bae cuitadya, tura inime pirehua bae. ¹⁹ Iyacua necacuareticue micuanaja inime cuana. Necajuchatijacacue. Nejuetinucacue Yusu queja, tura micuanaja jucha cuana apupasha ishu. ²⁰ Micuana ni jadya juya, tume micuana Yusura inime tsapema amereya. Pureama tura micuana amereya, ijicaraqe ena ijitsu ejuu bucha. Ejeque huecaca tujatu cuadishanucabuque Jesus riyaque yahuaju. Yuequedyadyatu tuque mepetanahua micuana inajacamere ishu. ²¹ Iyacuatu Jesus barepaju Etataque Yusuja yacuaju netiya. Berutu Yusu tuque equeque quisarati cuejaqui cuana eque jucuare: 'Ejeque huecaca tuque dutya iyacuanebuque'. Tura jadya aishuque huecaca juetihuaju tujatu Jesús cuadishanucabuque. ²² Moisésra quisarati acuare baetu judadibuque:

"Ecuana Cuatsashaquiquetu Yusura micuana queja cuadishabuque, micuanaja atadya.

Tura micuana Yusuja quisarati cuejadadibuque.

Ique tuja quisarati cueja ishu cuadishahua bucha, jaididya tujatu cuadishabuque tumeque.

Dutya tura cuatsashaya eque jajudadidya nejucue.

²³ Yusratu bijidamadurabuque dutya tumera cuatsashaya eque jucarama juya cuanaque.

Yusu jaque ama tuna judadibuque", jadyatu Moisés jucuare beru Jesús junama jariju.

²⁴ "Yusu equeque quisarati cuejaqui cuanaratu cuejacuare Mesías junahuaju eje bucha judadibuqueque. Jadyatu Samuel jucuare, tumbaedyu dutya peya cuana. ²⁵ Micuana micuana tume Yusu equeque quisarati cuejaqui cuanaque eque ejuracana cuanaque.

Yusratu quisarati iyacuare ecuanaja baba cuana tsehue tura ecanu jidaque tyadadibuqueque. Tuna camadya ama tujatu ecanu jidaque tyaana acuare, ecuanu tumbaedyu. Neadebacue Abraham béru tyatana ana atacuareque. 'Peadya mique eque juracanadadiya

eque dyaque jida jubuque yahuaju dutya queja aniya cuana tsehue' jadyatu Yusura Abraham acuare béru.
²⁶ Jadya juatsutu Yusura tuja Ebacuaque Jesús cuadishacuare riyaque yahuaju. Cuadishacuare tujatu ecuaña israelita cuana jida amere ishu. Cuadishacuare tujatu ecuaña inime cacuaresha ishu, ecuaña jidamaque amerejaca ishu, —jadyatu Pedrora tuhua jucuaque cuanaque acuare.

Pedro, Juan jadya huaraji cuana queja duju-tanacuareque

4 Pedro, Juan jadyara ecuita cuana isaraya jarijutu juticuare pae cuana. Tumebaedyatu juticuare Yusuja etare naruqui cuanaja huaraji, tumebaedya saduceo cuana. ² Tuna tuna dyaque ecahuaiti jucuaque Pedro, Juan ecatsé tsehue, tatsera jadya quisarati ahua tibu: "Yuneridyatu Yusura emaju cuanaque chacha nityatsuranucabuque, tura Jesús emajuque chacha nityatsuranucachine tibu". Jadya bacatsu tuna dyaque cahuaiticuare tatsé tsehue. ³ Inameretsu tunajatu ecatsé risimerecuare. Risimeretsu tunajatu ishamereticuare etare apudaju peadya meta tupu, amena chinehua tibu. ⁴ Arepa Pedro, Juan ecatsé etare apudaju eishatana ama bucha, umada tatsé quisaratiyaju bacaqui cuanaque tuna Jesús queja catyaticuare. Pishica mil ecuita tuna tuaqueja catyaticuare, epuna, ebacua jadya piyabamaque.

⁵ Huecacapetu huaraji cuana Jerusalénju cuanaque casitaticuare etare inime cuana bajeje ishujú. Casitaticuare tuna israelita cuanaja huaraji cuana, emuiba cuanaque, cacuatsashati bahuityaqui cuanaque jadya.

⁶ Anástu tuhua jucuaque. Tumequetu pae dyaque muidaque jucuaque. Caifás, Juan, Alejandro jadya tuna tuhua jucuaque, tumebaedya pae dyaque muidaja ata cuana. ⁷ Cuadishacuare tunajatu sudaru cuana:

—Nequeticue Pedro, Juan ecatsé etare apuda juque.

Tunaja yacuaju nityatsu,

—¿Aira metse tyachine casa rudurudu juhuaque chachane ishu? ¿Aija casa tsehue tuque metse aya tume cuanaque? —jadya tunajatu ecatsé bacaduracuare.

⁸ Tumetu Pedro huaraji cuana tsehue quisaraticuare. Bajida tsehue ama tujatu ecana quemitsacuare, Yusuja Espiritura casa tyaya tibu:

—Isaraya micuana era, micuana epu juque huaraji cuana, tumebaedya emuiba cuanaque. ⁹ Micuanara yatse bacaduraya eje bucha tsahuae yatsera yuequedya rudurudu cuinanahuaque achineque. Eje bucha chachanee yatsera achineque micuanara yatse bacaduraya. ¹⁰ Yuneridya ni micuana bahue jucara juya, era micuana cuejaya, dutya israelita cuana bahue ishu. Riyaque ecuita iyacua cuita micuanara yacua juqueri Jesúsja casa tsehue chacha juchine, Nazaretju anicuareja casa eque. Tumeque Jesúsdyá tuque micuana curusuju tatameretsu iyechine. Jadya ama buchatu Yusura emajuque chacha nityatsuranucachine.

¹¹ Micuanaratu bijidamadurachine. Etare puji cuanaja tumu eijehueque, dyaque saretanayaque judadihua

bucha, jadidyatu micuanara bijidamadurahuaque dyaque inime metseque judadihua. ¹² Jesús peadya tu Einajacamerequique. Aijamatu peya jucha cuana tillaquique. Yusuratu iyahua tuque peadya camadya ecuaña Ijahua quejaque inajacamere ishu. Eje bucha inajacameree ni ecuaña peyara ama, —jadya tuna Pedrora acuare.

¹³ Bajida tsehue amatu Pedro, Juan ecatsé israelita cuanaja huaraji cuana jadya isaracuare. Tatsé cuejayaju tuna anajacatacuare.

—¿Eje bucha juatsu tatsé ecuaña bajida tsehue ama isaraya? Tatsé taa tatsé dyaque jida ebahuityaque ama. Inime metseque ama taa tatsé. Jadya ama bucha ecatsé dyaque iyuca jararadaque equisaratiu bucha quisaratie juya. ¿Jadidya tatsé ejuu, Jesús tsehue tsunuda junenihua tibu? —jadya tuna tuna cama jucuaque.

¹⁴ Ecuita chachanetanahuaquetu tuhuadya juneticuare. Eje bucha, "Tumeque ecuita tu chacha ama", jadya ataqui ama tuna jucuaque, tuque Pedro, Juan ecatsé tsehuedya neticuare tibu. ¹⁵ Tume tunajatu cuinanashacuare tunaja yacua juque Pedro, Juan, echachaneque jadya. Tuna cuinanahuaaju tuna cacuejaticuare:

¹⁶ —¿Eje bucha rique ecuaña riyaque ecuita ecatsé eau? "Tumeque ecuitatu chacha ama" jadya ni ecuaña ejuu, ecuita cuanatu etsau ecuaña tsehue. Dutya jujeri Jerusalénju cuanaque tuna bahue tatsé ejeque ecuitaja ataquique ama achineque, yuneridya tumeque ecuita chacha juchineque. Tehuataqui ama tuque ecuanaja. ¹⁷ Dyaquedya jutidya tatséjatu Jesúsja casa cuejaajeya. ¿Eje bucha cuejamerejaca jatsu tuque ecuaña ecatsé eau? Neihuaramerenucara ecatsé; rehua ecatsé pajenuca. Jidama aana ecatsé neara. "Necuejajacacue Jesúsja quisarati. Ecuanara metse dyaque nerecaturaya, metsera Jesúsja quisarati cuejajacayaque ama juatsu", jadya ecatsé neara, —jadya tuna cacuejaticuare.

¹⁸ Tume tunajatu ihuaratsu ecatsé jadya acuare:

—Necuejanucaume ni ejeque buchique Jesúsja quisarati. Nebahuityanucaume ni ejeque buchique, —jadya tunajatu acuare Pedro, Juan jadya.

¹⁹ Tatsé tuna acuare:

—Yusura cuitadya yatse cuadishahua Jesúsja quisarati cueja ishu. Icuenetu Yusura cuatsashaya eque juttaqui, micuanara cuatsashaya eque ama. ²⁰ Yatsera cuitadyatu bahua tuque eje bucha juyaque. Yatsera cuitadyatu yatseja ijaca tsehue bacahua tura bahuityayaque. Jadya tibu tuque yatse cuejajacanime ama tuja quisarati, —jadya tuna Pedrora acuare.

²¹ Tume tatsé huaraji cuanara jidama aana acuare. Nereda tunajatu ecatsé acuare. Jadya aana aatsu tunajatu ecatsé inajacamerecuare. Ecuita cuanatu jucuaque: —Dyaque jida, casada jadya taa Yusu, ruduruduque chachanehua tibu!

Tumetu huaraji cuanara nerecaturacuare ama Pedro, Juan jadya. "Ecuanara ni ecatsé enerecaturau, ecuita

cuanatu dyaque ecahuaitiu ecuana tsehue”, jadya tunajatu inime jucuare.

²² Ecuaita Yusuja casa tsehue chachanetanahuajatu anicuare pushi tunca mara bare.

“Casaturacue ecuana mique mere ishü”, jadya Jesús queja ecatyati cuanara Yusu bacacuareque

²³ Tunara inajacahuajutu Pedro, Juan jadya cuacuare Jesús queja ecatyati cuana queja. Tuhua junatitsu tatsejatu ecana cuejanaticuare dutya tatse eje bucha atanachineque. Cacuejaticuare ecatse pae cuanaja huaraji cuanara, emuiba cuanara jadya ahuaque.

²⁴ Jadya bacatsu tuna dutya quisaraticuare Yusu tsehue:

—Ecuana Cuatsashaquique, miquemi Yusu. Miquemi Dutya Iyaquique. Miratu iyacuare barepa, yahua, cueri cuana jadya. Dutya aniyaque tu mira iyahuaque.

²⁵ Micue Espiritu eque tuquemi micue mere puji David queja huenemerecuare:

“¿Eje bucha juatsutu israelita ama cuanaque dyaque ecahuaiti?

¿Eje bucha juatsutu ecuita cuanara inime tupuqui aya aishu jidaque ama?

²⁶ Ecuari cuana tuna casitatiya epu juque huaraji cuana tsehue.

Dutyara tupu inime tuputsu Ecuana Cuatsashaquique jidama aishu.

Bajejeya tuna inime Mesías Yusuja Emepeque ijahue ijahue aishu”, jadyatu Davidra huenecuare beru.

²⁷ Tumebae cuitadyatu judadichine, Tata. Huaraji cuanatu casitatchine riyaque epu ebari juque. Herodes, Poncio Pilato jadya tatse israelita cuana tsehue, israelita ama cuana tsehue jadya casitatchine, micue Bacua Jesús jidama ijahue ijahue aishu. Arepa tuque juchama neri juhua ama bucha, arepa tuque mique merequi juhua ama bucha, taa ecana casitatchine micue Emepeque Mesías ujeu baatsu. ²⁸ Dutya tuna eje bucha juchinequetu mira icueneta iya inime achine equedya judadichine. ²⁹ Tata, miquemi bahuedya huaraji cuana ecuana tsehue dyaque cahuaiti yaque. Nerecaturacara tunara ecuana aya. Ecuana ecuana mique merequi cuanaque. Tsahuacue ecuana micue quisarati bajida tsehue ama cuejajaca ishü ama. ³⁰ Casaturacue ecuana micue casa tsehue ujejeda cuanaque chachane ishü. Tyacue ecuana micue casa ejeque ecuitaja ataquimaque aishu, ecuita cuanaja mique ecuana tsehueque adeba ishü. Amerecue ecuana Mique Merequi juchama nerija casa eque, —jadya tunajatu Yusu acuaire.

³¹ Tuna Yusu tsehue quisaratijacahuaju tuna ecaradati jarijutu Yusuja casara etare bucucushacuare, Yusuja Espiritu tuna queja buteyaju. Tuna peadya peadya quejatu junacuare. Tura tuna casaturacuare Jesusja quisarati bajida tsehue ama cuejajaca ishü ama.

Jesús queja ecatyati cuanaque peya cuana tsehue jida yurameta cabati, catsahuati jadya jucuareque

³² Jesús queja ecatyati cuanaque tuna dutya jida dutya tupu cabatie jucuare. Arepa jetima jucuare ama bucha peadya camadya inime tupu bucha ai acaraque jadya tuna jucuare. Inijeda ama tuna jucuare. Yurameta catyatie tuna jucuare tunaja ai aniyaque peya cuana tsehue. ³³ “Ecuana Cuatsashaquiquetu chacha netitsuranucachine. Ecuana radyatu bachine Jesús emajuque chacha enetitsuranucaque”. Riyaque quisaratitu Jesúsja ecuadisha cuanara cuejajacacuare ama. Yusura tuna dyaque casa tyacuare tuque mere ishü. Tuquetu dyaque jida jujacacuare ama Jesús queja dutya ecatyati cuana tsehue. ³⁴ Ni ejejadya jutidya tunajatu ai aijama jucuare ama. Yahua, jadya ama juatsu etare tuna catyati caticuare. Tume cuanaque catyati aatsu chipiru inatsu tunajatu Jesusja ecuadisha cuana queja duju bahue jucuare. ³⁵ Jesusja ecuadisha cuanajatu tumeque chipiru nrecada cuanaque tyabahue jucuare. ³⁶ José bacani ecuitatu nrecada cuanaque tsahuaquique jucuare. Chipreju ecuinanaquetu jucuare. Leví eque ejuracanaquetu jucuare. Jesúsja ecuadisha cuanaratu bape bacaniyadya acuaire “Bernabé” bacani, “Ecasaturaquique” jadique. ³⁷ Tujatu anicuare yahua. Catyati tujatu acuaire. Catyati aatsu tujatu dujucuare chipiru, ecuadisha cuanaja peya cuana tyabare ishü.

Ananías, Safira jadyara Yusu ijahue acara datse acuaireque

5 Anicuaretu Jesús queja ecatyatique, Ananías bacani. Yusu tujatu ijahue acara datse acuaire. Tuja ehuanequetu Safira bacani jucuare. Uhua tatse catyati caticuare. ² Chipiru inatsu tujatu ehuanequete acuaire:

—Uhua catyati aatsu chipiru inahuaque umae yatseja ishü nejaque. Ecuadisha cuanaque chipiru tyatiyaque, “Dutya etsujequi inachineque rique beya” jadya paati, —jadyapa tujatu ehuanequete acuaire.

Safiratu en cuita jucuare.

Tume tujatu chipiru tyatiyaque acuaire Pedro:

—Dutya etsujequi inachineque rique beya, —jadya tujatu acuaire pusha pusha.

³ Tumetu Pedrora yana casada tsehue atsacuare:

—¿Eje bucha juatsumi Satanásja biji eque juya, Ananías? ¿Eje bucha juatsu tuquemi Yusuja Espiritu ijahue acara aya? “Dutya etsujequi inachineque rique beya”, jadyami junaya, arepa metseja ishü ejaque iyasicuahua ama bucha. ⁴ Ni aira buchiquemi casada tsehue micue chipiru bemereya ama. Icuenetu micuiquedya juhua yahua mira eje bucha amerecara aya eque aishu. Tuequedya etsujequi micuequedya juhua. Mique pusha pusha juhuaque tu amena jidama. ¿Eje bucha juatsu mira ecuana ijahue acara aya? Ecuana camadya ama mira ecuana pusha pusha aya, Yusu tumebaedya, —jadyatu Pedrora acuaire.

⁵Jadya yana ayaju bacatsutu Ananías rihuicuare. Ri-huitsutu majucuaire. Dutya tuna Ananías eje bucha majue juhuaque bahue juatsu dyaque bajida jucuaire.

⁶Masadamatu juticuare umae ehue ebari cuana. Junatitsu tunajatu pirurinaticuare emajuque. Piruri amena jadya aatsu tunajatu dujucuaire caniju ishathi ishu.

⁷Quimisha ura juatsutu juticuare emajuja ehuanegue juhuaque. Tuquetu baecua jari jucuaire yahuique majuhuaque. ⁸Pedroratu bacaduratsacuare: —Beru beru pijitu Ananías junahua metse uhua catyati catitsu chipiru inachineque tyara. ¿Tura chipiru behuaquetu dutya metsera inachinequedya?

—Jejee. Tura mique tyanahuaquetu dutya yatsera chipiru inachinequedya juhua, —jadya tujatu pusha quemitsacuare.

⁹—¿Eje bucha juatsu tuque metseja jadya inime juchine? ¿Eje bucha juatsu tuque metse Yusuja Espiritu ijahue acara aya? Petacue, micue ahue majuhuaque papara cuahua cuanaque juetibareyaju. Mique tunarami papatinucayadya, —jadya tujatu acuare.

¹⁰Muya jutidyatu rihuicuare epuna majunuca ishu Pedroja yacuaju. Tudyatu nubidirucuaire ehue ebari cuana. Nubidirutsu tuna badirucuaire epuna emajuque. Tume tunajatu epuna emajuque dujunucacuare caniju ishathi ishu, yahuique eisha jiruru cuita nucadya.

¹¹Jesús queja dutya ecatyati cuanaque, tumebaedya peya cuana peya queja epu ebariju cuanaque jadya tuna bahue jucuaire Ananías, Safira eje bucha juhuaque. Bahue juatsu tuna dyaque bajida jucuaire, tuna dyadi Yusura tumebaedya eauju.

Jesúsja ecuadisha cuanara Yusuja casa bamerecuareque

¹²Ecuadisha cuanaratu Yusuja casa tsehue Jerusalénju acuare jetiama ni ejeque ecuitaja ataquique ama. Inime tillaquí tunajatu acuare tunara tunaja yacuaju ayaque baatsu. Dutya tuna Jesús queja ecatyati cuanaque casitati bahue jucuaire Yusuja etare ehueji quini-da emaque “Salomón Adeba Ishuque” bacaniju.

¹³Umanaajecuaireduya jutidyatu Jesús queja ecatyati cuanaque. Ecuita, epuna jadya tuna tuaqueja catyaticuare. Jadya juyaque tuna peya cuana tsehue casitatinicuare. Dutya jujeri Jerusalénju cuanaratu jida quisarati acuare Jesús queja ecatyati cuanaja ishu, arepa tuna tuaqueja nimee ama cuana tsehue casitati ishu bajida jucuaire ama bucha. ¹⁵Jesúsja ecuadisha cuanaratu chachanecuare ujejeda cuanaque Yusuja casa tsehue. Pedro cuetiyaque bahue juatsutu ecuita cuanara tunaja ata ujejeda cuanaque epu patya ediji cuanaju cuinanshabarecuare. Tuhua tuna ujejeda cuanaque huesa ishu cuanaju jarabarecuare. Tuque cuetiyaju tuja aputa tuna dyaque eque cuetitsutu ujejeda cuanaque chacha jubarecuare. ¹⁶Jerusalénjutu ecuita cuana juna bahue jucuaire japadama epu cuana juque. Bebarecuare tuna ujejeda cuanaque Pedro queja. Tumebaedya tuna becuare ijahua cuanara quijahuatishaya cuanaque. Dutya tujatu ecana chacha amerecuare Yusuja casa tsehue.

Jesúsja ecuadisha cuanaque jidama ujeta ujeta atacuareque

¹⁷Pae dyaque muidaque, saduceo cuana jadya tuna dyaque cahuaicuare, ecuita cuanara tunara cuejayaque ebacauque, Ecuadisha cuanaque jutidya tunara ijacabacaya baatsu. ¹⁸Jesúsja ecuadisha cuanaque tuna inamerecuare. Etare apudaju tuna ishamerecuare, yuneri jidama ecajuchati cuana tsehue. ¹⁹Metatu junacuare Yusu tsahuaquique barepa juque etare apudaju. Junatsu tujatu pacashacuare etsecue ebari. Etare apudaju etsecue pacashatsu tujatu ecana cuinanashacuare.

²⁰—Nedirucue. Apudajudya necuacue Yusuja etareju. Tuhua necuejacue quisarati ecuita cuana Yusu queja eje bucha judirue juishuque, —jadya tujatu Pedro ecana acuare.

²¹Jadya bacatsu, peya huecaca apudajudya cuita tuna cuacuare Yusuja etareju. Junatitsu tuna nubicuare. Nubitsu tuna catibuticuare Yusu queja judiru ishuhue quisarati cueja. Pae dyaque muidara, tuatsehue cuanara jadya tunajatu dutya israelita emuiba cuanaque ihuaramerecuare. Dutya inime bajejequi cuanaque tunajatu ihuaramerecuare. Tume cuanaratu acuare sudaru cuana:

—Nequeticue ecana. Paje ecuanaja yacuaju Jesúsja quisarati cuejaqui cuanaque etare apudaju eisha cuanaque.

²²Jadya ahuajutu sudaru cuana etare apudaju cuacuare. Tuhua junatitsu tunajatu ecana banaticuare ama. Datse batitsu tuna pae dyaque muida queja dirunucacuare.

²³—Jesúsja quisarati cuejaqui cuanaquetu aijama etare apudaju. Junatitsu tuque ecuanana eteriqui eyahue banatihua. Sudaru cuana tumidya eteriqui peque netiya narunaruya cuanaque. Pacashatsu ecuanana nubihua. Datse ecuanana ecana pana sare ahua. Dadihua ama ecuanana ecana ni ejudya jutidya, —jadya tunajatu huaraji cuana cuejadirucuaire.

²⁴Jadya bacatsutu dutya huaraji cuanara dyaque cuita inime tsapecuare. Pae dyaque muidaque, Yusuja etare naruqui cuanaja huaraji, pae cuanaja huaraji cuana dutya tuna eje bucha jutaqui ama cabaticuare. Cabacaduratibarecuare tuna:

—¿Eje buchatu Jesúsja quisarati cuejaqui cuanaque juhua? ¿Eju tuna? —jadya tuna jubarecuare.

²⁵Tuna jadya juyaju cuitatu peadya ecuita junaticuare.

—Nebacacue. Ecuita cuana micuanara etare apudaju riabarepa ishamerechine cuanaque tuna Yusuja etareju. Jesúsja quisarati bahuitya tuna juya, —jadya tujatu huaraji cuana acuare.

²⁶Jadya bacatsutu Yusuja etare naruqui cuanaja huaraji cuacuare enaruqui cuana tsehue Jesúsja ecuadisha cuanaque jiteque. Inamerenuacuaretu ecana. Jadya ama bucha tunajatu ecana ujeta acuare ama, ecuita cuanara tumu tsehue eiyeuque bajida juatsu. Tume tunajatu eje bucha tsehue ama dujucuaire

hwaraji cuana ecasitatiju. ²⁷ Jesúsja ecuadisha cuanaque tunaja yacuaju junatihujaju tuna pae dyaque muidara isaracuare:

²⁸ —Ecuana micuana “Nebahuityajacacue ecana Jesúsja quisarati” jadya achine. Jadya ama bucha micuana ecuana bacaya ama. Ecuejajacauque, micuana cuejaajeyadya jutidya. Dutya jujeri Jerusalénju cuanara amena bacachine riyaque quisarati. Ecuana rapa Jesús iyemerechine jadya aatsu micuana ecuana jucha metse amerecara aya, —jadya tuna pae dyaque muidara acuare.

²⁹ Tumetu Pedrora, peya cuana Jesúsja ecuadisha cuanara jadya acuare:

—Ecuana cuanara cuatsashayaque, Yusura cuatsashayaque bucha ama tibu, jutaquiju ecuaa Yusura cuatsashaya eque jutaqui, ecuita cuanara cuatsashaya eque ama. ³⁰ Micuanaratu Jesús curusuju tatamerechine. Jadya iyemeree tuque micuana amerechine. Yusura bacue nityatsuranucachine emajuque. Ecuana jaba cuanara muicuareque Yusuratu chacha nityatsuranucachine. ³¹ Tumequetu Yusura iyacua iyahua hwaraji dyaque inime metseque. Iyacua tu tuque emuitaju Yusuja jida eque amaca. Jesús tu Ecuana Cuatsashaquique. Tuque tu Ecuana Inajacamerequique. Jadyatu Yusura ahua, tura Israel eque ejuracana cuanaque inime cacuaretishacara aya tibu. Turatu israelita cuana Jesús queja catyatishamerecara aya, tunaja jucha cuana apupasha ishu. ³² Ecuana radyatu dutya riyu cuanaque pana adeba aya. Jadya tibudya micuana ecuana jadya cuejaya. Yusuradyatu tuja Espiritu cuita tura cuatsashaya eque juya cuana queja amereya. Tumeque Espirituradya ecuana dutya riyu ai cuana cuejamereya, —jadya tuna Pedrora acuare.

³³ Hwaraji cuanatu jadya bacatsu cahuaicuare dyaque. Ecuadisha cuanaque tuna eje buchadya iycara acuare. ³⁴ Tumetu peadya tuna ducuque netituracuare. Tuquetu Gamaliel bacani jucuare; inime cuana bajejequique tu jucuare. Tumequetu fariseo jucuare, israelita cuanaja cacuatsashati bahuityaquique. Dutya emuitu jucuare. Tuquetu tuatsehue hwaraji cuana tsehue quisaraticuare:

—Ecue ata cuana, pacuinana yaratupu ecuanaja yacua juque riyu Jesúsja quisarati cuejaqui cuanaque. Ecuana cama nequisaratira jari, —jadya tujatu ecana acuare.

Tume tunajatu quisarati cuejaqui cuanaque tuhuaque cuinanashacuare. ³⁵ Tuna cuinanahuajutu Gamaliel quisaratinucacuare:

—Israel juque hwaraji cuana, nebacacue ique. Pana tupu inime neara inime tsapema riyaque ecuita cuana ecuana eje bucha acara ayaque. ³⁶ Neadebara ecuita Teudas bacani eje bucha jucuareque. Quisaraticuaretu “Ique dyaque inime metseque. Nebacacue era cuejayaque camadya”. Jetiama tuna tuatsehue junenicuare, tura quisarati cuana ayaque baca juyaque. Pushi ciento tuna tuatsehue casitaticuare. Jadya ama buchatu masadama iyetacuare. Tuque majuhujutu dutya tuatsehue junenihua cuanaque

tsapetanaterecuare. Judiruterecuare ecana tunaja etare cuanaju. Tura dutya acara ayaque aputaterecuare. ³⁷ Tuequedya peya aninucacuare Judas bacani. Tuquetu Galilea juque jucuare. Roma juque enaruquiru ecuita cuana piyebamereyaju turatu jetiama ecuita cuana tuatsehue junenishacuare tuja quisarati bacamereyaque. Tuequedya tumeque tumebaedya iyetananucacuare. Tuque majuhujutu dutya tuatsehue juneniya cuanaque tsapetanaterecuare. ³⁸ Jutaquijudya micuana jadya aya. Eje bucha neara ama tume cuanaque Jesúsja quisarati cuejaqui cuanaque. Neinajaradya ecana. Nenerecaturara ama ecana. Tunara eje bucha ayaque ni tunaja casa tsehuequedya jutidya, tumetu dutya tunara acara ayaque teredadiya. ³⁹ Yusuja casa tsehue ni tuna aya, eje bucha aputashae ni tuque ecuana ama. Yusu tsehue cuita di taa ecuana ecatiu ecuana yuamaturacara ayaque juatsu. Muda tu Yusu tsehue catuputi ishu, —jadya tuna Gamalielra cuejacuare.

Dutya tupu tunajatu inime jucuare Gamalielra quisarati ahua eque. ⁴⁰ Ihuaramerenucacuare tunajatu ecuadisha cuanaque. Eiyemereuque, tunajatu ecana catsamerecuare jutidya. Catsacatsa amena aatsu tunajatu ecana acuare:

—Necuejanucaume ni ejeque buchique Jesúsja quisarati.

Jadya aatsu tunajatu ecana inajacamerecuare.

⁴¹ Cuinanatsu tuna dyaque pureama jucuare.

—Yusutu ecuana tsehue dyaque jida juhua. Canerecatihua ecuana, ecuana Jesús queja nimee juya tibu. Turatu adebahuadya ecuana canimehuallati nimeque ama, arepa ecuana canerecatiya ama bucha, —jadya tuna jucuare.

⁴² Ecuadisha cuanaratu Jesúsja quisarati cuejajacacuare ama. Bahuitya bahuityanicuare ecana Yusuja etareju, etare cuanaju jadya. Cuejajacacuare ama tuna Jesús Mesiasque.

Jesús queja ecatyati cuanaque tsahua ishu mepetanacuareque

6 Tume patya tuna Jesús queja umada catyatiajecuaredya jutidya. Griego eque quisaratiya cuanaju hebreo eque quisaratiya cuanaja ishu quisaratitibunecuare ai tyatayaju:

—Eahuemaju cuanaque dutya huecaca earaqui tyatanayajutu hebrea cuana dyaque umada tyatanaya, griega cuana bucha ama, —jadyatu griego eque quisaratiya cuanaque jucuare.

² Tumetu peadya tunca beta earacana Jesúsja ecuadisha cuanara ihuaracuare Jesús queja dutya ecatyati cuanaque. Tuna caradatihuaju tuna quisaraticuare:

—Ecuana mere tu Yusuja quisarati cueja. Tuyu ama tu ecuana riyaque mere ajaca ishu, earaqui ecuana cuita eahuemaju cuanaque jaquetsu tyabare ishu. ³ Jutaquiju micuana ducuque pacarucu ecuita nemepecue earaqui jaquebare ishu. Nemepecue micuana ejeque ijahue cati baecua baya cuanaque. Nemepecue

Yusuja Espiritura cuatsashaya eque juya cuanaque, dyaque bahue cuanaque. Jadya cuanaque nemepecue. Tumeque ecuita cuana netyara mere eahuemaju nerecada cuanaque earaqui tyabare ishu. ⁴ Ecuana tumeque mere eauque, Yusu tsehue nequisaratijacara ama, tuja quisarati necuejajacara ama. Riyaque mere camadya ecuanara neara, —jadya tuna acuare peadya tunca beta earacana ecuadisha cuanara.

⁵ Dutyaja tupudya tunajatu jadya inime jucuaire. Icuene cuita tunajatu mepecuaire Esteban. Tuquetu dyaque Jesús queja nimeeque jucuaire. Yusuja Espirituja inime equetu anicuaire. Tuequedya tuna mepecuaire Felipe, Prócoro, Nicanor, Timón, Parmenas, Nicolás jadya. Nicolástu Antioquía juque jucuaire. Israelita amatu jucuaire. Jadya ama bucha tujatu Jesús queja catyaticuaire. Jadya ama bucha tujatu Jesús queja catyaticuaire. Jadya ama bucha tujatu Jesús queja catyaticuaire. Jadya ama bucha tujatu Jesús queja catyaticuaire. Jadya ama bucha tujatu Jesús queja catyaticuaire. ⁶ Riya cuanaque pacarucu mepetsu tunajatu dujucuaire Jesúsja ecuadisha cuana queja. Quisaraticuaire tuna Yusu tsehue mepehua cuanaja ishu. Ebi rirutsu tuna mepehua cuanaja iyuca dyaque emetucu iyabacuare, Jesús queja ecatyati cuanaque tsahua ishu mepetanahuaque jadíque.

⁷ Jesúsja quisarati bacatsu tuna tuaqueja nimeedya jutidya jetiama juajecuaire. Jetiama tuna Jerusalénju cuanaque tuaqueja catyaticuaire, tumbaedyia israelita cuanaja pae cuana. Jesús queja catyatitsu tuna casitaticuaire tuja cuana tsehue.

Esteban risitanacuareque

⁸ Yusutu dyaque jida jucuaire Esteban tsehue. Tyacuairetu tuja casa ni ejeque ecuitaja ataquique ama aishu. Tumeque Yusuja casa tsehue tujatu acuare pusha amadya Yusu tuatsehueque bamere ishuque. ⁹ Umae israelita cuanaratu ujeu bacuaire. Tume cuanaquetu casitati bahue jucuaire “Tsjema Mere Ijehue Ishuque Einajaca Cuanaja Caradati Ishuque Etare” bacaniju. Caquemitsati caquemitsati tuna Esteban tsehue jucuaire. Cirene cuana tsehue jupee Alejandría, Cilicia, Asia yahuaju cuana tsehue tuna tuatsehue cati cati jucuaire. ¹⁰ Anatsurutsataqui ama tunajatu bacuaire Esteban dyaque bahue tibu. Jadyatu jucuaire, Yusuja Espiritura huecashaya eque quisaratiya tibu. ¹¹ Esteban jucha metse acara aya tibu, tunajatu peya cuana acuare:

—“Bacahua tuque ecuaire Esteban Moisésja ishu, Yusuja ishu jadya jidama quisaratiyaju”, jadya ni micuana juya, tsujetyaya micuana ecuanara, —jadya tunajatu ecanacuare.

¹² Jadyatu pusha pusha jucuaire tumeque ecuita cuana Estebanja ishu. Jadya quisarati bacatsu tuna Esteban tsehue dyaque cahuaiticuare. Emuiba cuanaque, cacuatsashati bahuityaqui cuanaque jadya tuna dyaque cahuaiticuare tuatsehue. Tume tunajatu dutyara tabucuaire. Tabutsu tunajatu inacuare. Inatsu tuna dujucuaire israelita cuanaja huaraji cuana queja.

¹³ Tuhuaadya tunajatu pusha pusha arida cuanaque dujucuaire.

—Ecuana rari bacachine riyaque ecuita Yusuja ishu jidama quisarati ayaju. Yusuja etareja ishu tujatu jidama quisarati anucachine. Moisésja cacuatsashatiya ishu tujatu jidama quisarati achine. ¹⁴ Achine tujatu quisarati: “Jesús Nazaretju anicuarera patu Yusuja etare pana rihuishatilla eau” jadya. Tumbaedyapa “Jesúsra dutya cacuatsashati cuana Moisésra ecuaire amerehuaque cuareya”. Jadyatu ecuanara cuitadya bacachine, —jadya tuna pusha pusha jucuaire.

¹⁵ Jadya cuejayaju bacatsutu dutya huaraji cuana inime cuana bajejequi cuanara Esteban petacuare. Ebutsequini tujatu jucuaire Yusuja yacuaju netiyaja ebutsequini bucha, Yusu tsahuaquija bucha. Jadyatu bacuaire dutya tuhua jucuaire cuanara.

Esteban huaraji cuanaja yacuaju catachiticuaireque

7 Tumetu pae dyaque muidara bacaduracuare Esteban:

—¿Yuneridya rena quisaratiya micue ishu?

² Estebanratu isaracuare dutya tuhua cuanaque:

—Tata ecanacuare, nebacacue ique. Ecue ata cuana, nebacacue ique. Yusu Ecuana Etata tu dyaque casada. Tuquetu cabamereticuaire ecuanaja ebaba Abraham queja, tuque Mesopotamiaju jucuaire patya, Haránju anidiruma jariju. ³ “Cuinanacue micue yahua juque. Shanacue micue ata cuana. Dirucue era yahua bamereyaju”, jadya patu Yusura Abraham acuare béru. ⁴ Tumetu Abraham dirucuaire Caldea yahua juque. Anidirucuairetu Haránju. Eje uma mara juatsu tujatu etataque majucuaire tuhua. Tuque majuhuaire Yusura Abraham ihuaracuare riyaque yahuaju ecuaire iyacua aniyaju. ⁵ Arepa tuque rehua Canaanju anicuaire ama bucha, metsenemerehua ama tujatu yahua ni riyapi buchique. Jadya ama bucha patu Yusura Abraham acuare: “Mique majuhuaire dutya riyaque yahua jubuque mique eque juracanaya cuanaja ishu. Metsenebuque tunaja tuque”, jadyapa tujatu acuare, Abrahamja ni peadya ebacua aijama jariju. ⁶ Tumbaedyatu Yusura Abraham acuare: “Mique eque juracanaya cuanaque tuna Canaanju cuinanabuque peyaja yahuaju anidire ishu. Tsunuda eje uma mara tuna anibuque tumeque yahuaju, pushi ciento mara. Tumeque yahua metse cuanaratu mique eque juracanaya cuanaque nerecada, ijahue ijahue jadya abucue. Tsjema tunajatu ecanacuare mere amerebuque. ⁷ Jadya ama bucha tuque dyaque nerecaturabuque mique eque juracanaya cuanaque nerecaturaqui cuanaque. Tuequedyatu mique eque ejuracana cuanaque cuinanabuque tuhuaque. Junabuque tuna riyaque yahuaju; rehua tunara muinabuque”, jadya patu Yusura Abraham acuare béru. ⁸ Yusratu Abraham tsehue inime bajejeque: “Mique, dutya mique eque juracanaya cuanaque jadya micuana ecuita huitu biti catubumeretitaqui Yusuja cuanaque jadya adebataqui juishu”, jadyatu Abraham Yusura cuatsashacuare. Tuequedyatu tujatu ebacuaque Isaac cuinanacuare. Cuinana huecaca catsurutiyajutu Abrahamra ecuita huitu biti tubucuaire Yusura amerehua equedyatu.

Isaac esiri juhuaju, tuja ebacuaque Jacob cuinanahua-ju, tubunucacuare dya tura inime iyahua equedya. Jacob amena esiri juhuaju, anicuare tujatu peadya tunca beta earacana ebacua cuanaque. Dutyadya tujatu ebacua cuanaque ecuita huitu biti tububarecuare. Riya peadya tunca beta earacana ecuita cuana ri peadya tunca beta earacana cuare israelita cuana eque ejuracana cuanaque.

⁹ “Peadyatu Jacobja ebacuaque José bacani jucuare. Tuja tuatsehuequi cuanaratu José dyaque jishacuare, etataquera tunaja ejuque tuna iyuhueda baya bucha iyuhuee ama baya bucha cabatitsu. Catyati tunajatu José acuare Egiptoju cuaya cuana queja. Tunaratu dujucuare tuhua japada. Josétu Yusu tsehue junenicuare. Egiptoju Yusura José narucuare. ¹⁰ Nime casaturacuaretu peya inime juyaju. Yusratu dyaque bahue amerecuare. Jidatu anishacuare. Faraón Egipto juque ecuari quejatu José iyuhueda bamerecuare. Egipto naruquitu Faraónra amerecuare, tuque iyuhueda baatsu. Dutya tuja etareju aniya cuanaque tujatu narumerecuare, —jadya tuna Estebanra cuejacuare.

¹¹ Cuejanucacuare tujatu ecana:

—Adebayadya micuana, José Egipto naruqui jucuare patya dyaque mije jucuareque. Tumebaedya Canaánju ecana mije jucuare. Daditaqui ama ecuanaja baba cuanara ara ishuhua cuanaque bacuare. ¹² Jacobtu bahue jucuare Egiptoju trigo aniyaque. Jadya bahue juatsu tujatu cuadishacuare tuhua tuja ebacua cuanaque, ecuanaja baba cuana jucuareque. Cuadishacuare tujatu ecana trigo bacara. Cuametse juatsu tuna caadebaticuare ama tuna tuatsehuequira trigo tyayaque. ¹³ Tuna cuabeta ishuhua cuahuajutu José caadebamereticuare euji cuanaque queja. “Idya ique, José, micuana tsehuequique”, jadya tujatu ecana acuare. Faraón tujatu cuejacuare, tuja euji cuanaque adeba ishuhua. ¹⁴ Tuatsehuequi cuanaque Canaánju dirunucahuie tuna Joséra acuare: “Nejeticue etata tsehue rehua, dutya ecuanaja ata cuana tsehue”. Tume tuna dutya Egiptoju aneticuare. Pacarucu tunca pishica earacana tuna anisicuacuare. ¹⁵ Tuhuadyatu Jacob majuya tupu anidirucuare. Tuhua nucadya tujatu majucuare dutya tuja ebacua cuanaque, ecuanaja baba cuana. ¹⁶ Tsunuda eje uma mara cuetihuajutu ecuanaja ebaba ecanaja etsau cuana dujutanacuare Siquemju Canaán yahuaju. Eje uma mara aniya jariradya patu Abrahamra yahuacuare icueneta quemi acuare tuhua tuja ata cuana majuya cuanaque papa ishuhua. Hamorja ebacua cuanaquera patu catyati acuare chipiru tsuje. Tuhuatu papatanacuare ecuanaja ebaba ecanaja etsau cuana, —jadya tuna Estebanra acuare.

¹⁷ Huecashaajecuare dya jutidya tujatu tunaja ebaba cuanaque jucuare cuanaque.

—Egiptoju aniya jariquetu ecuanaja baba cuana umanaajecuare dya jutidya dyaque umada. Ejetsunue ama tuna Egipto juque cuinana ishuhua bataqui amajutu Yusura icuenetadya Abraham jadya tuque adadiya jadya acuareque. ¹⁸ Tuequedyatu peya ecuari catibuticuare Egipto naru. Iyacuare ecuariratu jidama acuare

israelita cuana, arepa tuna José eque ejuracana cuanaque ama bucha. Bama tujatu José jucuare, tuque amena tsunuda majuhuaju ecuari jucuare tibu.

¹⁹ Tumeque ecuariratu dyaque nerecaturacuare ecuanaja baba cuana. Ijahue jahue tujatu ecana acuare. “Ebacua cuana cuinanayaju, deca baatsu, etsecueju neijehuecue maju ishuhua”, jadya tujatu ecana casada tsehue ijehuemerecuare ebacua cuanaque butseeju cuinana cuanaque. Jadya tujatu ecana amerecara acuare ecuanaja baba cuana umanajaca ishuhua. ²⁰ Tume patyatu cuinanacuare Moisés. Tumeque ebacua nanatu Yusuja dyaque iyuhueda jucuare. Etataque ecateratu etehua temusha acuare etareju quimisha badi tupu. ²¹ Tatseja etareju tatsejatu amena etehua naru ataqui ama bacuare. Jadya juatsu tatsejatu jitiye ishatsu enaju iyaticuare. Majucuare ama tuque. Tume tu ecuarija ebacujunaquera dadicuare. Daditsu tujatu tuja ebacuaque neri etemushau bucha temushae acuare. ²² Ecuariya yutsecuaque bucha juya tibusu Moisés Egipto juque dyaque bahue cuanara bahuityacuare. Jetiera amatu sumicuare. Dyaque jidatu quisarati bahue jucuare. Casa tsehuetu mere jucuare, —jadyatu Estebanra quisarati acuare.

²³ Cuejanucacuare tujatu ecana:

—Peya huecacatu Moisés cuacuare tuja ata israelita cuana cuajira. Ecuitatu amena jucuare. Pushi tunca mara tujatu anicuare. ²⁴ Tuque tuna tsehue tujatu bacuare peadya egiptojura israelita ujeda nerecada ayaju, arepa tumeque jidama juma ama bucha. Jadya baatsu tujatu icueneticuare. Tsahuaticuare tuja tuque. Iyecuaretu egicio, tuja ata israelita icueneyaque. ²⁵ “Ecue ata cuanaratu adebayadya Yusura ique tuna inajacamere ishuhua iyahuaque”, jadya tujatu inime tupucuare. Tunaratu adebacuare ama. ²⁶ Huecacanucatsu piji cuitadyatu Moisés cuanucacuare israelita cuana aniyaju. Bacuare tujatu beta israelita ecatsa catiyaju. Catishajacacara tujatu ecatsa acuare catiyaque. “Metsetaa metseta. ¿Eje bucha juatsu jatsu metseta catiya?” jadya tujatu ecatsa acuare. ²⁷ Tuja ecare ujeda aquiquetu cahuaiticuare Moisés tsehue, tura catishajacacara ayajudya jutidya. Itushacuare tuja tuque. “¿Aira jatsumi ecuanaja huaraji juishu bacanishachine? ¿Aira jatsumi iyachine ecuanaja inime jidama cuanaque bajejequi juishu? ²⁸ ¿Ique ni taa mira iyecaradya anucaya, riyabarepa egipcio achine bucha?” jadyapa tujatu acuare Moisés. ²⁹ Jadya bacatsutu Moisés bajida juatsu huanacuare. Dirucuaretu Madián bacani yahuaju. Tuhuadyatu caquemiticuare madianita tsehue. Ejitaju tatse acuare beta ebacua.

³⁰ “Pushi tunca mara juatsutu peya huecaca Moisés jecuare epu cuana tscada anitayaju, emata Sinaí bacani japadamaju. Peadya Yusu tsahuacuiratu cabamereti ishuhua acuare. Moisesratu bacuare acuihuia, acuihuia jujuyaju ai tiruyaque murutayaque ama.

³¹ Jadya tumeque baatsutu Moisés dyaque anajacatuacuare. Tume tujatu jipeticuare pana peta acara aatsu. Jipetitsu tujatu Yusura isarayaju cabacaticuare. ³² Ique Yusu micue baba ecanara muiyaque. Ique Yusu, Abra-

ham, Isaac, Jacob jadyara muiyaque' jadya tujatu Yusu quisariatijaju bacacuare. Jadya bacatsutu Moisés dyaque bajida jucuare. Bajida juatsutu tadadati-bunecuare. Petataqui ama tujatu bacuare. ³³ Isaranucacuaretu Yusura: 'Mique ecue yacuaju tibu, catacaticue zapato, mira ique muiyaque cabamereti ishu.

³⁴ Ique taa bahue ecue cuanaque Egiptoju dyaque nerecaturatayaque. Ijahue ijahue tuna ataya. Bacajacaya ama tuque tuna payaju. Amena ique jehua tuna jida inimeju cuinanasha ishu, Egipto juque cuinanasha ishu. Iyacia mique cuadishaya tuna inajacamera' jadya patu Yusura acuare Moisés béru.

³⁵ "Yusuratu Moisés cuadishanucacuare Egiptoju, israelita cuana tsahua, inajacamere jadya aishu. Barepaju Yusu tsahuaquique acui huija jujuyaque tirucuaré ama eque tujatu cuadishacuare. Arepa israelita cuanara bijidamaduracuare ama bucha, arepa tuna '¿Aira jatsumi ecuanaja huaraji juishu bacanishachine? ¿Aira jatsumi ecuanaja inime jidama cuanaque bajejequi juishu iyachine?' jadya acuare ama bucha, Yusuratu cuadishacuare tuna tsahua ishu. ³⁶ Moisésdyatu ecuanaja baba cuana Egipto juque cuinanashaquique jucuare. Tunaja yacuaju tujatu acuare Yusuja casa tsehue ni ejeque ecuitaja ataquique ama. Inime tillaqui tujatu ecana amerecuare. Egipto eque diruyaque, Bei Pudedaque riquequereyaque, pushi tunca mara tsecada anitaya cuana eque juneniyaquetu Moisésra tunaja yacuaju acuare ejeque ecuitara ayaque ama.

³⁷ Tumeque Moisésradyatu israelita cuana cuejacuare: 'Micuana eque ejuracana cuana quejatu Yusura cuadishabuque tunaja ata, tuna Yusuja quisarati cuejara. Ique micuana cueja ishu cuadishahua bucha, jaidyda tujatu tumeque cuadishabuque' jadya tuna Moisésra cuejacuare. ³⁸ Rियाque Moisésradyatu huidujucuare ecuanaja baba cuana epu cuana tsecada aniya eque junenicuare patya. Tuaequeja cuitadyatu junacuare quisarati cuejaquique Yusuja yacia juque. Emata Sinaíju tujatu cabamereti ishu acuare. Tudyatu barepajura cuejacuare Yusuja cacuatsashati cuana tuna eje bucha jutaquique. Moisésratu yudijidya cuejanuca acuare riyaque cacuatsashati cuana ecuanaja baba cuana. Huenecuare tujatu peadya peadya tata eque umanaetibeya cuanaque bahue amereetibe ishu, ecuanu tumebaedya iyacia, —jadya tuna Estebanra acuare.

³⁹ Cuejanucacuare tujatu ecana:

—Ecuana baba cuanaratu Moisésra cuejayaque bacacarama acuare. Bijidama tuna bacuare tuna naruqui juishu. Dyaque tuna inime tupuqui acuare Egipto juque ani. Yudijidya dirunucacara ebari ecana jucuare.

⁴⁰ Jadya tibu tuna Moisésja euji que Aaron bacani tsehue quisaratiticuare, Moisés emataju tsurahuaju: "Acue ecuanaja yusu jiu cuanaque oro. Tume cuanara ecuanu pahuiduju ecuanu Egiptoju dirunucayaju. Arepa ecuanu Moisésra Egipto juque huidujuhua ama bucha, baecue ecuanu eje bucha tuque juchineque", jadya tunajatu Aaron aticuare. ⁴¹ Acuare tunajatu huaca cueya cueya oro. Iyecuare tuna uhuisha cuana

cueya cueya cuatsaqui. Tudyu tunajatu pureama, mui jadya acuare. Chine tuna jucuare tumeque yusupa ejuu jadyaja ebanijiu. Muicuare tuna, tunaradya jutidya tunaja emetucu tsehue cueya cueya aatsu.

⁴² Jadya juhua baatsu tuna Yusura narujaca jipenee acuare; icuene naruhua bucha ama tujatu ecana narunucacuare, tuna cueya cueya queja nimee juhua baatsu, tuaqueja nimee ejuuque. "Paadya tuna tunara jidamaque acara ayaque", jadya tujatu inime jucuare. Tume tunajatu muicuare ijete, badi, purari cuana jadya. Yusura tuja quisarati cuejaqui cuana eque quisarati acuare bae cuitadyatu judadicuare:

"Israelita cuana, micuanara ique ama tyahua uu eiye cuanaque, micuana pushi tunca mara epu cuana tsecada aniyaju juneniya patya.

⁴³ Ique emuique, micuanaradya jutidya cueya cueya ahuque tuque micuana muihua.

Micuanaratu tume cuanaque yusu cuanapa jadya ahu.

Micuanaratu Moloc cueya cueya aatsu, tuque muiqui etare aatsu nityahua.

Tumeque etare tuque micuana eju micuana juneniya aquerenihua.

Muicuare micuana purari Refán bacani.

Tume micuana tuja cueya cueya caticuare.

Jadya tibu micuana nerecaturabuque.

Micuanaja yahua juque micuana cuinanashabuque, japada.

Babilonia yahua yueque tibene micuana cuadishabuque", jadya patu Yusuja quisarati jucuare tuja quisarati cueja puji cuanara cuejacuareque, —jadya tuna Estebanra acuare.

⁴⁴ Isaranucacuare tujatu huaraji cuana:

—Epu cuana tsecada aniyaju juneniya patyatu ecuanaja baba cuanara aquerenicuare ebiti eju judirutsu etare caca nityadiru ishu. Etare cacatu jucuare tuna Yusu mui ishuque. Educujutu anicuare beta tumu jepedaque, bejedaque jadya. Tumeque tumu ecatsejutu ehue jucuare Yusuja cacuatsashati cuana. Icuene-tadya patu Yusura Moisés bamerecuare ebiti etare caca eje bucha ataeque, ai educuju iyayaque jadya. Tume tunajatu Yusura Moisés amerecuare bae cuitadya acuare. ⁴⁵ Egipto juque cuinanacuare cuanaque majuterehuajutu tunaja ebacua cuanaquera dujucuare tumeque etare caca Yusu mui ishuque Canaán yahuaju judirutsu, yahua Yusura tyaana acuareju judirutsu. Josuétu tuque tsahuaquique iyacuaque jucuare. Tuna tuhua judiruhajutu jetiama peya anae cuanaque tuhua jucuare. Yusuratu ecuanaja baba cuana queja ecana cuinanashamerecuare, tuna cuitadya tuhua anidiru ishu. Tuhua tunajatu Yusu muicuare etare cacaju David ecuari jujacaya tupu.

⁴⁶ Yusuja iyuhuedaquetu David jucuare. Dyaque jidatu jucuare tuatsehue. "Eratu acara aya etare arida, jida pi-ji mique tuhua ani ishu. Ecuana ebaba Jacob tu mi-queja nimee jucuare. Ique tumebaedya miaqueja nimee nucadya. Jadya tibudya tuque micue etare ari-

daque acara aya”, jadya patu Davidra acuare Yusu.
⁴⁷Yusuratu David amerecarama acuare. Ebacuaque Salomonratu etare acuare, David majuhaju.

⁴⁸“Jadya ama buchatu Yusu ecuitaja etare eauju camadya ama aniya. Dutya Iyaquiquetu aniya ama ecuanara ‘Yusuja Etare’ jadya ayaju camadya ama. Neadebacue tura tuja quisarati eque cuejahuaque:

⁴⁹“Barepa tu ique aniqui buchique.
 Yahua bacue ecue ehuchi iyabutya ishuh buchique.
 Eje bucha anie ni ique juma ejeque etarejudya jutidya micuanaja eaju.

Eje bucha anie ni ique juma peadya etareju camadya.
⁵⁰Jutaquiju ¿ai jatsu tuque micuana eau ecue ishuh?
 Idya di taa dutya ai iyaquique”,

jadyatu Yusu jucuaque, —jadya tuna Estebanra acuare.

⁵¹Cuejaajecuaquedya jutidya tujatu ecana:
 —[Micuana micuana cuejataqui ama! Micuanaratu Jesúsja quisarati ijacabacacarama aya. Jaraya ama tuque micuanaja iyucaju. Micuana micuana Yusu adeba baecua cuanaque bae jutidya. Yusuja Espiritu tuque micuana ijacabacaya ama. Micuanaja baba cuana baedya jutidya micuana. ⁵²Tunaratu nerecatuacuare Yusuja quisarati cuejaqui cuanaque. Micuanaja baba cuanaratu iyecuaque quisarati cueja puji cuana, “DYAQUE JIDAQUE tu junabuque”, jadya cuejaqui cuanaque. Tumeque DYAQUE JIDAQUE tu junahua. Tuja ebacanitu Jesús jucuaque. Tuque junahuaju tuque micuana inamerechine tuque ujeu baqui cuana queja. Micuanaratu curusuju tatameretsu iyemerechine.
⁵³Micuanaja baba cuanatu Yusura tuja cacuatsashati cuana cuejahua barepaju tuque tsahuaqui cuana eque. Micuanaratu pana adeba aya. Jadya ama bucha micuana tumeque cacuatsashati eque ama juya, —jadya tuna Estebanra acuare.

Esteban iyetanacuareque

⁵⁴Estebanra cuejahuaque bacatsu tuna dyaque cahuaiticuare. Etse tari tuna jucuaque tuatsehue cahuaitiyaque. ⁵⁵Yusuja Espirituratu Esteban dyaque nime arituracuare. Ebarucue queja atucatu jucuaque. Capetatiyara tujatu bacuaque Yusuja hueca. Bacuaquatu Jesús Yusuja jida eque amaca netiyaju.

⁵⁶—[Nepetacue! Yusuja eaniqui tuque baya. Baya tuque Jesús ECUITA Yusuja jida eque amaca netiyaju, —jadyatu Esteban jucuaque.

⁵⁷Jadya bacatsutu huaraji cuana dyaque cahuaiticuare. Tuna cuitadya tuna jebuda quiquecuare. Ijaca cani tuna catumuticuare tuque bacacarama aatsu. Casada quiquetsu tuna dutya tuaqueja tsajajateru jucuaque. ⁵⁸Inacuare tunara. Inatsu tunajatu epu ebari juque cuinanashacuare, tumu tsehue iye ishuh. Camisa cuana ecana catacatibarecuare. Tume tunajatu ecuita Saulo bacani queja narumerecuare camisa cuana. Tuhua tunajatu Esteban tumu tsehue iyecuaque. ⁵⁹Tunara tumu tsehue marereshayajutu Esteban Jesús queja bacabacacuare:

—Ique Cuatsashaqui Jesús, batsacue ique miaqueja jidiruyaju, —jadya tujatu Jesús acuare.

⁶⁰Nuyucuare tuque. Nuyutsutu quiquecuare jebuda:
 —Ique Cuatsashaquique, tillacue tunaja riyaque jucha iyaja cuita tunara abuyaque, —jadya tujatu Jesús acuare.

Jadya quisarati amena aatsutu majucuare.

8 Yusu muiqui cuanaratu papaticuare

Esteban emajuque. Enapacuare tunaja tuque.

Saulora Jesús queja ecatyati cuanaque jidama nerecatu- uratibunecuareque

Esteban iyetahuaju baatsutu Saulo dyaque jida caticuare. Esteban iyetanacuare equequetu Jesús queja nimee ama cuanara Jesús queja ecatyati cuanaque dyaque ijahue ijahue acuare. Jadya equetu ecatyati cuanaque dutya epu cuana queja tsapetanaterecuare. Umaetu huanacuare peya epu cuanaju Judea yahuaju. Peya cuanatu Samaria yahuaju huanacuare. Jesúsja ecuaadisha cuanaque tuna huanaterecuare ama. Ancuaredya tuna Jerusalénju. ³Saulotu catibuticuare Jesús queja ecatyati cuanaque nerecatura. Dutya jujeri etare cuanajutu nubinubinicuare tuna ina juyaque. Inacuaretu ecuita, epuna cuana tumebaedya. Inatsu tujatu ecana etare apudaju ishacuare.

Jesúsja quisarati Samariaju cuejatanacuareque

⁴Jerusalén juque tsapetanacuare cuanaratu cuejacuare Jesúsja quisarati dutya queja. Judeaju, Samariaju jadya tunajatu quisarati tsapecuare. ⁵Jesús queja ecatyati cuanaque ijahue ijahue atayajutu Felipe huanacuare Jerusalén juque. Cuacuaretu Samariaju. Tuhuatutu tura cuejacuare Jesús Mesías eje buchique. ⁶Yusuja casa tsehue tujatu acuare jetiama ejeque ecuitaja ataquique ama. ⁷Tume tujatu Yusuja casa tsehue ijahua cuanara quijahuatishaya cuanaja ijahua cuana ijehuecuinauare. Ijahua cuanatu quiquetereyaque cuinanacuare tuna quejaque. Tumebaedya tujatu chachanecuare jetiama ecuita maju cuanaque, rudu-rudu cuanaque jadya. ⁸Jutaquijudya tuna dyaque pureama jucuaque tumeque epuju cuanaque.

⁹Tuhuatutu anicuare maru Simón bacani. Ijahuepa tujatu ajacacuare ama Samaria juque ecuita cuana. Tuquepa ecuita dyaque inime metseque. ¹⁰Dutya jujeri tuhua cuanaratu ejeneacuare Simónra cuejayaque. Ecuita jetiedya cuanara, inime metse cuanara jadya tunajatu pana baca acuare. “Riyaque ecuitajatu aniya Yusuja casa”, jadya tunajatu Simónja ishuh quisarati acuare. ¹¹Eje uma maratu Simón maru jucuaque. Jetiamaratu tura cuejayaque pana ejene acuare, tura dyaque ijahue ahua tibu.

¹²Feliperatu Jesúsja quisarati cuejaajecuaquedya jutidya Samariaju. Cuejacuare tujatu ecana Yusura amena dutya narutibunehuaque. Cuejacuare tujatu ecana jidaque quisarati Jesucristo eje buchique. Cuejayaju bacatsu tuna Jesús queja jetiama catyaticuare. Jadya juatsu tuna cutsamereticuare “Jesús jaque ecuaana” jadya cabamereti ishuh. Jetiama ecuita, epuna jadya tuna cutsamereticuare. ¹³Simóntu Jesús queja catyatic-

uaredya. Cutsamereticuare tuque. Junenitibunecuare-tu Felipe tsehue. Ejeque ecuitaja ataquique ama ayaju bahue juatsu, tunajatu inime tillaquí acuare. Dutya tume cuanaque ayaju baatsutu Simón dyadi inime tilladya jucuare.

—¿Eje bucha ae tujatu aya riya cuanaque? —jadya tujatu inime tupucuare.

¹⁴ Jesúsja ecuadisha cuanaque tuna Jerusalénju jucuare jari. Bacatsacuare tunajatu quisarati Samariaju cuanarapa Jesúsja quisarati amena ejeneya jadya. Jadya bahue juatsu tunajatu cuadishacuare tuhua Pedro, Juan jadya. ¹⁵ Juticuare tatse Samariaju Jesús queja ecatyati cuana queja. Junatitsu tatse Yusu queja bacabacuare tunaja ishu. Yusuja Espiritu tu junama jari jucuare tuna queja ni eje quejadya jutidya. Cutsamereticuare tuna Jesús Ecuana Cuatsashaquija ebanijú camadya.

Tumetu Pedro, Juan jadya Yusu tsehue quisaraticuare tunaja ishu:

—Tata, cuadishacue micue Espiritu Samariaju Jesús queja ecatyati cuanaja ishu, —jadya tatsejatu bacacuare.

¹⁷ Jadya Yusu queja bacabacatsu tatsejatu iyacuare emetucu tunaja iyuca dyaque. Jadya juyajutu Yusuja Espiritu junacuare tuna queja.

¹⁸ Simonratu bacuare Yusuja Espiritu junahuaque Jesúsja ecuadisha ecatsera emetucu tunaja iyuca dyaque ebi rirutsu emetucu iyayaju. Jadya baatsu tujatu ecatsé chipiru cuejacuare tuja tumeque casa ani ishu.

¹⁹ —Ecue dyadi paanidya tumeque metseja aniaque. Metsera emetucu ejeja iyuca dyaque iyayajutu tuaqueja Yusuja Espiritu junaya. Tsuje tyaya metse era, metsera Yusuja Espiritu juna ishuque casa tyayaju, —jadya tujatu ecatsé acuare.

²⁰ Jadya juyajutu Pedrora yana ujeda tsehue quemitacuare:

—Yusura pana aputasha acue. Micue chipiru tumbaedyatu pana aputasha paa. Cuji cuita juatsu tuquemí inime tupuya Yusuja Espiritu chipiru tsehue equemita bucha. Tsujematu Yusura tuja cuanaja ishu cuadishaya. Eje bucha juetie ni tu juma chipiru tsuje!

²¹ Mira ni tu eje bucha meree ama Yusu ecuanara mereya bucha. Eje bucha tyae n imi Yusura tuja casa ama ecuana tyahuaque. Miquemi jida ama Yusura baya. ²² Inime cacuareticue. Ajacacue mira jidamaque ayaque. Yusu queja canerecaticue: “Tata, eratu dyaque jidama inime tupuya. Apupashacue ecue jucha cuana”, jadya Yusu acue. ²³ Eratu adebaya micue eje buchique inime. Yusuja Espiritu era peya cuanaja ishu iyabutayaju mira dyaque jishahua. Miratu jidamaque inime tupuqui ajacaya ama, —jadyatu Pedrora acuare.

²⁴ —Nequisaraticue Ecuana Cuatsashaqui tsehue ecue ishu. Nebacacue; patilla tura ecue jucha, tura ique metsera cuejehua bae nerecaturae eau tibu, —jadya tatse Simónra acuare.

²⁵ Jesúsja quisarati cueja amena aatsu, tatseja ishu eje bucha Yusura ahuaque cueja amena aatsutu Pe-

dro, Juan ecatsé Jerusalénju yudijidya dirunuca jucuare. Yudijidya dirunuca juyara tatsejatu Yusu queja judiru ishuque quisarati cuejaajecuare epu cuanaju Samaria yahuaju.

Felipe ecuita Etiopiaju aniya tsehue quisaraticuareque

²⁶ Jadya juatsutu Ecuana Cuatsashaquira cuadishacuare barepa juque etsahuaquique Felipe queja. Junaticuaretu Felipe queja. Junatitsu tujatu isaranaticuare:

—Cabajejeticue, Felipe. Cuacue beni diji queja amaca Jerusalén diji Gaza eque cuetiyaju, —jadya tujatu Felipe anaticuare.

²⁷ —Pacua taa ique, —jadyatu Felipera acuare.

Tumetu masadama cabajejeticue. Cabajejetitsutu cuacuare. Tume cuayaquetu catsuruticue ecuita Etiopiaju tsehue. Tumeque ecuitatu tuja yahuaju inime metseque jucuare. Turatu merecuare ecuari epuna. Chipiru naruquiquetu jucuare. Tuque Jerusalénju Yusu muira cuachineque jetinucayara tujatu Felipe tsurutacuare. ²⁸ Tuja yahuaju dirunucayaquetu jucuare. Caretu bae tshuetu dirunucacuare. Diruyara tujatu isaraajecuare Yusuja quisarati etsuri jebuda tsehue. Isaraajecuare tujatu Isaías Yusuja quisarati cuejaquira béru hueneacuareque.

²⁹ —Jipeticue. Tsurutsacue tumeque ecuita ediji eque jetiyaque, —jadyatu Yusuja Espiritura acuare Felipe.

³⁰ Tumetu Felipera tsajajatsurutsa acuare. Jipetsu tujatu bacacuare tura Isaíasra hueneacuareque quirica isarayaju.

—¿Adebayadyami eje buchique isarayaque? ¿Adebayadyami ai jadya ayaque tume mira isarayaque? —jadyatu Felipera bacaduratsacuare.

³¹ —Aijama. ¿Eje bucha adebae jatsu rique eau? Aira cuejayaju jatsu rique eadebau. Jecue; tsuracue. Ique peque anibutecue, —jadyatu etiopera acuare Felipe.

³² Isaíasja quisarati Yusuja quisaratiju ehuenequetu jucuare riya cuanaque:

“Uhuisha iye ishu edujuta bucha dujutaetu jucuare iyeta ishu.

Uhuisha tunara eshu ayaju quiquetereya ama buchatu quicueneti queja inime ama jucuare.

Arepa tuna ujeda ujeda acuare ama bucha tujatu abacata idu acuare.

³³ ‘Tudyatu jucha metse’ jadya tunajatu acuare, arepa jadique ama ama bucha.

Ni airatu icueneacuare ama.

Dyaque jidamatu ecuita cuana tuatsehue jucuare. Daditaqui amatu quisatati eje bucha cuejae aishu.

Iyecuare tunaja tuque”,

jadyatu jucuare Isaíasja quisarati etiopera isaraajecuareque.

³⁴ —Cuejacue ique riyaque quisarati. ¿Aija quisarati rejari cuejaya riyaque Yusu equeque quisarati cuejaquira? ¿Tujaquedya jutidya ni taa? ¿Peyaja quisarati ni taa rejari jadya aya? —jadyatu acuare etiopera Felipe.

³⁵ Tumetu Felipera pana cueja acuare eje buchique jadique.

—Jesús rejari jadya aya, —jadya tujatu acuare.

Pana cueja ejitaju tujatu Yusuja quisarati acuare.

³⁶ Ediji eque diruyaque tatse judirucuaré ena aniyaju. Tuhua judirutsutu etiopera Felipe bacaduracuare;

—Petacue. Rehua taa ri ena aniya. ¿Eutsaudya mira ique? —jadya tujatu bacaduracuare.

³⁷ —Mique ni Jesús queja catyatiya dutya micue ducuta inime tsehue, tume mique eutsaudya, —jadyatu Felipera acuare.

—Eratu ejeneya Jesús Yusuja Ebacuaqueque. Iyaja cuitadya ique tuaqueja catyatiya, —jadyatu ecuitara acuare.

³⁸ Yume nityamere cuitadya tujatu acuare caretu caretu dujuqui queja. Caretu juque butetsu tatse betadya enaju buteticuare. Tuhuadyatu Felipera ut-sacuare. ³⁹ Tatse ena juque tsurahuajutu Felipe Yusuja Espiritura huesatsu dujuare. Tumetu etiopera banuacuare ama. Dirunucuaré etiope dyaque pureama tsehue, Jesús jaque amena juhua cabatitsu. ⁴⁰ Epu Azoto bacanijutu Felipe ejitaju judirucuaré. Epu cuanajutu juajecuare, Jesúsja quisarati jidaque cueja juyaque, Cesareaju judiruya tupu.

Saulo inime cacuaeticuareque

(Hch 22.6-16; 26.12-18)

9 Saulotu cahuaititibunecuare Jesús queja ecatyati cuana tsehue. Eje buchadya iyetillacara tujatu ecana acuare. Pae dyaque muida quejatu cat-sahuamereticara juare Ecuana Cuatsashaquija cuanaque nrecatura ishú. Jadya juatsutu tuatsehue quisaratira cuacuare.

² —Ique cuacura juya Damascoju Jesús queja ecatyati cuanaque sarera. Mira cuatsashayaju cuayaque ique jadique quirica tyacue. Ique Damascoju junatitsu cuaya caradati ishúque etare cuanaju riyaque quirica huaraji cuana bamerera. Quirica isaratsu tunara pacueja eje cuanaque Jesús queja ecatyati cuanaque. Bahue juatsu painanati ecana dutyadya jutidya ecuita, epuna cuana jadya. Pabeti ecana Jerusalénju, —jadyatu Saulora aticuare pae cuana cuatsashaquique.

³ Jadya ahuaajutu Saulo cuacuare Damascoju. Ediji eque cuayaquetu Damasco epu ebari piji dyane juajecuare. Muya jutidyatu barepa eque huecara pana udatilla atsacuare. ⁴ Hueca baatsutu Saulo huipuchitanatsu yahuaju rumucuta rihui juare. Rihuitsu jaryara tujatu etsuri bacacuare:

—Saulo, Saulo, ¿eje bucha juatsu mira nrecaturaya?

⁵ Jadya bacatsutu Saulora bacaduracuare:

—¿Aira isaraya?

—Ique Jesús, idya mira nrecaturayaque. Mira ique bijidamadurayaquemi mita tacadya jutidya jidama catiya. Juye tuta tacadya jutidya enimetsequera muyayaju acui tapatsu ujeda ecaticuare buchique mique.

⁶ Jadya bacatsutu Saulo bajida juatsu tadadacuare.

—¿Ai mira amerecara aya, Ique Cuatsashaquique?

—Netitsuracue. Damascoju piisi tuyu cuau jucue.

Tuhua tunarami cuejatsaya mique ai jutaquique,

—jadyatu Ecuana Cuatsashaquira acuare.

⁷ Tumetu Saulo tsehue cuacuare cuanaque dyaque jecutanacuare. Inime tillaquí tuna acuare. Arepa tunara tumeque etsuri bachua ama bucha, tunajatu bacuare ama ni ejeque buchique. ⁸ Tumetu Saulo netitsuracuare yahuaju juarayaque. Netitsuratsu tujatu busacuare yatuca. Busatsutu capetatitaquí ama jucuaré. Shuhuitu jucuaré. Jutaquijudyatu tuque tajiage juya cuanara ebiju inatsu dujuare. Junatiquerecuare tuna Damascoju. ⁹ Tuhuatú quimisha huecaca capetatitaquí ama jucuaré. Arama, ijima jadyatu jucuaré.

¹⁰ Tuhuatú anicuare ecuita Ananías bacani, Jesús queja ecatyatique. Cabamereticuaretu Jesús tahuíju tuaqueja. Cabameretitsu tujatu isaracuare:

—[Ananías!

—Riyadya ique. Bacayadya mique era, Ique Cuatsashaquique.

¹¹ —Netitsuracue. Cuacue ediji “Tuyu” bacani eque, ecuita Tarso juque Saulo bacani sarera. Judasja etarejutu junachine. Iyacua cuitatu eatsehue quisaratiya.

¹² Tahuíju ebau bucha bae tujatu ejeque cuana ahua. Bahuadya tura mique tuhua nubitsu micue emetucu tuque dyaque iyayaju tuque capetatinuca ishú. Jadyatu Saulora bahua tahuíju bucha. Jadya tibudya baticue, —jadyatu Jesúsra acuare Ananías.

¹³ Jadya bacatsutu Ananías bajida jucuaré. Acuare tujatu tuque:

—Ique Cuatsashaquique, eje umaja taa ique ecueja tumeque ecuita Saulo bacani eje buchique. Tura patu dyaque nrecaturaya Jerusalénju micue cuanaque, jida juya cuanaque. ¹⁴ Jechine patu rehua micue cuanaque risitsu duju ishú. Pae cuanaja huaraji cuanara patu cuatsashahua ecuaana jidama aishu, —jadyatu Ananiasra acuare Jesús.

¹⁵ —Cuacue. Baticue. Tumeque ecuita tu amena ique merequique. Eratu tuque mepehua ecue quisarati cuejaquí juishu. Cuejabuque tujatu ecana jetiama. Israelita ama cuanaque, tuna naruquí cuanaque, israelita cuana jadya tujatu ecue quisarati cuejadadiya. ¹⁶ Eratu bahue ameredadiya Saulo tuque dyaque canerecatedadiyaque ecue quisarati cuejayaque, —jadyatu Jesúsra acuare.

¹⁷ Tudyatu cuacuare Ananías Saulo junachineque etareju. Nubinatitsu tujatu emetucu ecatsé iyacuare Sauloja iyuca dyaque. Isaracuare tujatu tuque:

—Bandía, Saulo. Miquemi ecue eatsehuequique.

Ecuana Cuatsashaquira cuadishahua miaqueja. Edijiju miaqueja cabameretichinera cuadishahua rehua mique capetatisha ishú. Tura ique cuadishahua, miaqueja Yusuja Espiritu iyabutya ishú, —jadyatu Ananiasra acuare Saulo.

¹⁸ Tuque quisaratiyaju cuitadya tujatu pacacuare yatuca juque jae bití buchique. Jadya juatsutu jida capetatinucacuare. Tumetu netitsuracuare tujatu etahuíqui juque. Cutsamereticuare tuque Jesús queja

catyatihuaque jadique adeba ishu. ¹⁹ Jadya juatsutu chamacama amena araaracuare. Araaratsutu amena cacasatinucacuare. Eje uma huecaca pijitu anicuare Jesús queja ecatyati cuana tsehue tuhua.

Saulora Jesúsja quisarati Damascoju cuejacuareque

²⁰ Damascoju jari tuputu Saulora Jesúsja quisarati cuejajacuare ama. Cuacualetu israelita cuanaja Yusu mui ishu caradati ishuque etare cuanaju.

—Jesús tu Yusuja Ebacuaque, —jadya tujatu ecana cuejaajecuare.

²¹ Tuque jadya bacaqui cuanaquetu anajacatacuare.

—¿Jeeque ecuita ama jatsu ri Jerusalénju Jesús queja ecatyati cuanaque nrecaturaquique? ¿Jeeradya ama tuna iyetillacara achine? ¿Jesúsja cuanaque risitsu dujura ama jatsuri jechine? ¿Tuna risitsu duju pae cuanaja huaraji cuana queja Jerusalénju duju jadyara ama jatsuri jechine? —jadya tuna jubarecuare.

²² Saulora tuna baji tsehue ama cuejaajecuarenya jutidya Jesúsja quisarati. Israelita cuana Damascoju anicuare cuanaque tujatu cuejaajecuare Jesús Mesiasque, Yusuja Emepeque. Quisarati dyaque bahue tsehue tujatu ecana isaracuare. Anatsurutsataqui ama tuna bacuare.

Saulo israelita cuanaja huaraji cuana quejaque huanacuareque

²³ Ejetsunue juatsu amatu israelita cuana Saulo tsehue dyaque cahuaicuaque. Casitaticuaque tuna tuque eje bucha iyee aishuque inime bajeje ishu. ²⁴ Dutya huecaca tunajatu epu tsecue enubitaquiju narucuare cuinanayaju iye ishu. Jadya ama buchatu ejera cuana cuejacuare Saulo tunara eje bucha acara ayaque.

²⁵ Jesús queja ecatyati cuanaratu huanashacuare. Peadya meta tunajatu ishacuare jiti ebariju. Butyacuare tunajatu meta epu tachiqui tumu eaque dyaque eque. Jadya huanaetu Saulo jucuare Damascojuque.

Saulo Jerusalénju dirucuareque

²⁶ Damascojuque cuinanatsutu Saulo Jerusalénju judirucuare. Judirutsu tujatu Jesús queja ecatyati cuanaque jipecara datse acuare. Dutyara tunajatu mubacuare, tuque Jesús queja ecatyatique ejeneacuare ama tibu. ²⁷ Bernabéra peadyatu ejeneacuare tuque Jesús queja ecatyatique. Dujucuare tujatu Jesúsja ecuadisha cuana queja.

—Yuneridya tu Saulo Jesús queja ecatyatique. Ecuana Cuatsashaquiratu cabamereti ishu achine tuque Damascoju cuayaju. Jesusratu isarachine. Damascoju jari tuputu Saulora baji tsehue ama Jesúsja quisarati cuejachine, —jadya tuna Bernabéra acuare.

²⁸ Jadya bacatsutu Ecuadisha cuanara batsacuare pureama tsehue. Tuna tsehuedyatu baji tsehue ama Ecuana Cuatsashaquija quisarati cueja jucuare.

²⁹ Caquemitsati caquemitsatitu jucuare israelita cuana griego yana eque quisaratiya cuana tsehue. Ejeneacara-

ma tunajatu acuare tura cuejayaque. Dyaque jutidya tuna cahuaicuaque iyecara acuare. ³⁰ Jesús queja ecatyati cuanaque tuna bahue jucuare tunara iyecara ayaque. Jadya bahue juatsu tunajatu Saulo dujucuare Cesarea-ju. Tuhuaquedya tunajatu ena eque cuadishacuare Tarso epuju, tuque catemuticuare epuju. ³¹ Jida tunajatu bacuare Jesús queja ecatyati cuanaque Judea, Galilea, Samaria yahua cuanaju aniya cuanara. Jesús queja ecatyati cuanaque tuna tuaqueja nimeedya jutidya juajecuare. Cuatsashaya eque ecana jucuare. Dyaque tuna muibaajecuare. Yusuja Espirituja inime eque tuna aniajecuarenya jutidya. Tura bacue ecana tsahuajacuare ama. Dyaque umadadya jutidya tuna Jesús queja catyatiajecuare.

Eneas chacha nityatsuracuareque

³² Pedroratu Jesús queja ecatyati cuanaque cuajiajecuare. Baticualetu Lidaju aniya cuanaque. ³³ Tuhuaatu anicuare ecuita Eneas bacani. Quimisacarucu mara patu ebucucujacaque jaracuare. Pedrora patu batitsu acuare:

³⁴ —Iyacua cuitadyami Jesucristora nityatsuraya, Eneas. Netitsuracue. Huesacue micue etahuiqui; ajecue, —jadyatu Pedrora acuare.

Jadya aya tsehuedyatu Eneas netitsuracuare. Bucucutaqui, ajetaqui jadyatu jucuare. ³⁵ Dutya jujeri tuna Lida juque, Sarón juque jadya aniya cuanaque jecuare Eneas aniyaju tuque bara. Banacuare tuna enetitsura juneniyaju jadya. Tuque jadya baatsu tunajatu ijehuecuare beruque tunaja quejeneti cuana. Cacuaeticuaque ecana inime. Catyaticuaque ecana Ecuana Cuatsashaqui Jesús queja.

Yusuja casa tsehue Pedrora Dorcas emajuque nityatsuranucacuareque

³⁶ Tume patyatu epu Jope bacaniju anicuare epuna Tabita bacani. Griego cuanaja yanaju tu tumeque ebanani “Dorcas” jadique. Tuquetu Jesús queja ecatyatique jucuare. Tsahua bahue tujatu nrecada cuanaque jucuare tunaja ai aijama juya cuana tsehue. Ajacacuare ama tujatu jidaque peya cuanaja ishu. ³⁷ Pedro Lidaju jarijutu Dorcas ujejeda jutibunecuare. Ujejeda juatsutu majucuare. Emajuque tunajatu utsatsu bajecuare papati ishu. Utsa amena jadya aatsu tunajatu emajuque ebarucue beta ishu pisuju tuna dujucuare. ³⁸ Jesús queja ecatyati cuanaque tuna bahue jucuare Pedro Lidaju juque, Jope japadama. Bahue juatsu tunajatu cuadishacuare beta ecuita Lidaju Pedro cuejara. Pedro queja junatitsu tatse cuejanaticuaque:

—Pedro, mique jiteque yatse jehua. Dorcastu majuhua. Necuara Jopeju. Netsunutara ama, —jadya tatsejatu Pedro aticuare.

³⁹ Jadya yana bacatsutu dutya cabajejetitsu Pedro ebajarara cuacuare tatse tsehue. Junaticualetu Dorcas majuhuaque etareju. Tuhua junatihuaaju tunajatu dujucuare tumeque epuna emajuque jarayaju. Jetiamatu tuhua jucuare eahuemaju cuanaque majuhuaaja eade-

ba cuanaque, majuhuaque enapa juyaque. Bamerecuare tuna Pedro una cuana, camisa cuana jadya tuna ja ishü Dorcasra achine cuanaque. ⁴⁰ Tudyä tuna Pedrorä dutyä cuinanashatillacuare. Tuna cuinanashatillatsutu Pedro amena nuyucüare. Nuyutsutu Yusu tsehue quisaraticuare. Petacüaretu epuna emajuque.

—Tabita, netitsuracue, —jadya tujatu acüare epuna emajuque.

Jadya ayaju tujatu busacüare yatuca. Tudyatu Pedro baatsu Tabita anitsuracüare. ⁴¹ Anitsurahuaju tujatu emetucuju inaticuare. Nityatsuracüare tura. Jadya juatsu tujatu ihuaracüare eahuemaju cuanaque, Jesús queja ecatyati cuanaque jadya:

—Nejecue. Nebanacue emaju juhuaque. Chachari junucahua, —jadya tujatu ecana acüare.

⁴² Dutyä jujeri Jopeju cuanaratu bacacüare Dorcaspa emajuque netitsuranucahua jadique. Jadya bacatsu tuna jetiama Ecuana Cuatsashaqui Jesús queja catyaticuare. ⁴³ Pedrotu tsunudadya anicüare Simónja etareju. Simóntu ebiti acüi bitit tsehue jinashatsu püdeda amerequique jucüare.

Pedro, Cornelio jadya

10 Anicüaretu Cesarea bacani epuju ecüita Cornelio bacani. Israelita amatu jucüare. Tuquetu cien sudaru cuana cuatsashaquique jucüare. Riyaque cuare sudaru cuanatu ebanishä jucüare “Italiaju Cuanaque” jadya. ² Corneliotu ecüita jidaque jucüare. Yusu queja ecatyatitu jucüare, arepa israelita ama jucüare ama bucha. Tumebaedya tuja etareju cuanaque Yusu queja ecatyati jucüare. Turatu israelita nrecada cuanaque tsahuacüare chipiru tsehue. Yusu tsehue quisarati bahuetu jucüare dutyä huecaca. ³ Peya huecaca las tres chinequejatu bacüare tahuiju bucha barepa juque Yusu tsahuaquique. Tumequetu juticüare tuqueja. Isaracüare tuja tuque:

—Bastare, Cornelio.

⁴ Jadya bacatsutu Corneliora pana peta acüare. Bajidatu jucüare. Bacaduracüare tuja tuque:

—¿Ai jitequemi jehua, tata? —jadyatu Corneliora acüare.

—Yusuratu mira tuque isarayaju bacajacaya ama. Tuquetu bahuedya mira israelita nrecada cuanaque tsahuajacayaque ama. ⁵ Cuadishacue mere puji cuana Jopeju, Simón Pedro ihuarati ishü. ⁶ Tuquetu peya Simónja etareju, ebiti acüi bitit tsehue jinashatsu püdeda amerequi queja. Etare tujatu cueri cuanaja ecuaque peque. Turami cuejanaya mique eje bucha juishuque, —jadyatu barepa juque Yusu tsahuaquira acüare Cornelio.

⁷ Quisarati cuejaquique diruhajuju Corneliora ihuaracüare quimisha tuque tsahuaqui cuanaque. Beta tatse tuja etareju mere puji jucüare; peya bacue sudaru. Quimishadya tuna Yusu queja ecatyatique jucüare. ⁸ Cuejacüare tujatu ecana dutyä eje bucha Yusu tsahuaquira cuejähua cuanaque. Cueja amena aatsu tujatu ecana cuadishacüare Jopeju.

⁹ Cuaatsu tuna apunanatitsu edijiju tahuinaticuare. Huecacanucatsu tuna cuanucacüare. Tuna Jope japadama junatihujutu barepatya Pedro tsuracüare etare camahua jepeda dyaque tuque Yusu tsehue quisarati bahueju. ¹⁰ Tuhua Yusu tsehue quisaratsutu dyaque cuita aracara jucüare. Tunara tuja earaqui barejejaju cuitadya tujatu bacüare ai cuana tahuiju bucha. ¹¹ Bacüaretu barepa pacashatanaya bucha. Bacüare tujatu ai cuana taa sahuana ebari buchaju. Pushi etsucu cuanajutu sahuana etisune jucüare. Yuhaju butyayaju tujatu bacüare. ¹² Tuaequeja butetu jucüare. Sahuana ducu tujatu jetiama cuanubi cuana, uu cuana, bacua cuana, upati cuana jadya bacüare. Educujutu anicüare israelita cuanaja arata baecua cuanaque. ¹³ Tumetu Pedrorä Yusu quisaratiyaju bacacüare:

—Netitsuracue, Pedro. Iyecue tume mira petaya cuanaque. Iyetsu aracue, —jadyatu Yusura acüare.

¹⁴ —¿Aijama, Ique Cuatsashaquique! Eje bucha arae tuque eau tume cuanaque asicada baatsu israelita cuanaja ara baecua cuanaque. Aranime ama tuque ecue Moisésra aramerecarama ayaque, —jadyatu Pedrorä acüare.

¹⁵ Bacanucüaretu Yusu quisaratiyaju:

—Aracue. Asicada bucha baume ni ejeque earaqui buchique era mique aramereyaque, —jadyatu Yusura acüare.

¹⁶ Cueja beta ishutu Pedro Yusura

—Aracue, —jadya acüare.

Tuque bacue jucüare:

—Aranime ama tuque ecue —jadya.

Quimisha ishujutu tumebaedya jucüare. Quimisha ishujutu sahuana buchique tsuranucacüare barepaju. ¹⁷ Pedroratu adebataqui ama bacüare eje buchique tura jadya bahuaque.

—¿Ai Yusura bahue amerecara aya riya tahuiju bucha eque?

Tupupe tupupe tujatu inime acüare. Tuque tumeque inime tupu tsehuejutu Corneliora cuadishaya cuanaque junaticuare epuju.

—¿Eje queja ri Simónja etare? —jadya tunajatu Jopeju aniya cuanaque bacaduraajecüare.

Junaticuare ecana etareju. ¹⁸ Tuhua junatitsu tuna bacaduracüare:

—¿Rehuadya ri ecüita Simón Pedro bacani?

¹⁹ Pedrotu ebarucue ecamahua jepeda dyaque jucüare jari bahuaque inime tupu tsehue. Tumetu Yusuja Espiritura isaracüare:

—Quimisha ecüitatu junahua mique sare juyaque.

²⁰ Netitsuracue. Butecue. Cuacue tuna tsehue, arepa ecana israelita ama paju ama bucha. Cuacara cuacarama jadya juume tuna tsehue. Era cuitadya tuna cuatsashahua mique jiteque, —jadyatu Yusuja Espiritura acüare.

²¹ Tumetu Pedro butecüare, Corneliora cuadishahua cuanaque isarara.

—Idya ique micuanara sarenayaque. ¿Eje bucha juatsu micuana jehua? —jadya tujatu ecana acüare.

²² —Corneliora ecuana cuadishachine. Tuquetu ecuita inime metseque. Cien sudaru cuatsashaquique tume. Dyaque jidaque tume. Dyaque Yusu queja nimeequetume. Dutya israelita cuanaratu jida juyaju baya. Barepa juque Yusu tsahuaquiquetu junachine tuaqueja. Tudyta tujatu achine: “Cornelio, cuadishacue mere puji cuana Jopéju, Simón Pedro ihuarati ishu. Paje micue etareju. Turami cuejanaya mique eje bucha juishuque”, jadya patu Yusu tsahuaquira Cornelio achine, —jadya tunajatu anaticuare Pedro.

²³ —Cuayadya ique metajudyta micuana tsehue, —jadya tujatu ecana acuare.

Jadya aatsu tuna Pedrora ihuaracuare etareju nudya ishu. Tuhuadya tuna tahuicuare tumeque meta.

Peya huecacatu Pedro cuacuare tuna tsehue. Umae cuana Jesús queja ecatyati cuanaque Jopeju anicuare cuanaratu tajiticuare Pedro. Edijiju tuna tahuidirucuaque. ²⁴ Peya huecaca tuna judirucuaque Cesareaju. Corneliora ihuayaju cuita tuna tuja etareju junaticuare. Tuna judiruma jarijutu Corneliora cuejamerebarecuare tuja etareju cuaishu tuja ata cuana, eadeba cuanaque jadya. Tuna tsehuedya tujatu ihuacuare Pedro junatiyaque. ²⁵ Pedro etareju junatihujutu Corneliora cuinanatsu tsurutsacuare. Nuyunaticuaretu Pedroja yacuaju. ²⁶ Yume nityatsuratitu Pedrora acuare.

—Netitsuracue. Ique mique baeque ecuitadya. Yusu ama ique, —jadyatu Pedrora acuare Cornelio.

²⁷ Tuatsehue quisaratiyaque nubinataratu Pedrora banaticuare umada tuhua caradatihua cuanaque. ²⁸ Isaracuare tujatu ecana:

—Ique, ecue ecare cuana jadya ecuana israelita cuana; micuana bacue israelita ama. Ecuana cacuat-sashati eque ecuana nubitaqui ama israelita ama cuana etareju. Casitatitaqui ama ecuana. Bahuedya micuana riyaque. Jadya ama bucha ique Yusura butseeju bahue amerechine, ecue ni ejeque buchique asicada bucha baishu ama, “Miquemi Yusura en ama aya tuaqueja jeyaju” jadya cueja ishu ama. Israelita ama cuana tsehue casitaticarama jadya jutaqui ama ique.

²⁹ Cornelioja mere puji cuanara ihuaratiyaju jechine ique. Tsunutachine ama ique, micuana israelita ama cuana queja juna ishu. Jecara jecarama jadya tsehue ama jechine, —jadya tujatu ecana acuare.

—¿Eje bucha juatsu mira ihuaramerechine, Cornelio? —jadya tujatu acuare.

³⁰ Cornelioratu quemitsacuare:

—Ique juchineque mique cuejaya amena pushi huecaca dyane riyaque ura nucadya. Rehua ecue etareju Yusu tsehue quisaraticuare, ique jubahue buchadya, las tres chinequeja. Tumbaedy arama quibetichine Yusu muiyaque. Jadya juyajutu barepa juque Yusu tsahuaquique cabameretichine, Yusura cuadishayaque, una tiquidaque. ³¹ Eatsehuetu quisaraticuare. “Cornelio, Yusratu mira tuque isarayaju bacajacaya ama. Tuquetu bahuedya mira israelita nerecada cuanaque tsahuaquique ama.

³² Cuadishacue mere puji cuana Jopeju, Simón Pedro ihuarati ishu. Tuquetu peya Simónja etareju, ebiti acui

biti tsehue jinashatsu puleda amerequi queja. Etare tujatu cueri cuanaja ecuaque peque”, jadya barepa juque quisarati bequira cuejachine. ³³ Masadama tuque ecue mere puji cuana cuadishachine mique ihuarara. Yusrupai mique aya, mique junahua tibu. Yusura ecuana petaya tuja quisarati baca ishu casitatu huaju. Cuejacue ecuana dutya mique Yusura ecuana cuejamereyaque, —jadyatu Corneliora Pedro acuare.

Pedrora ecuita cuana Cornelioja etareju Jesúsja quisarati cuejacuareque

³⁴ Tumetu Pedrora isaracuare israelita ama cuanaque:

—Iyacua ique bahue Yusura ecuana dutya tupu bayaque israelita cuana, israelita ama cuanaque jadya. Ni ejeque buchique tura ecuana bape ama baya.

³⁵ Yusu tu jida ecuana tsehue, dutya ecuana tuja inime eque juya cuana tsehue. Turatu dutya jida tsehue baya tuque muiqui cuanaque, ejeque yahua juquedya jutidya. ³⁶ Yusratu israelita cuana quisarati jidaque Jesús eje buchique bacamerehua. Jesucristo queja catyatitsu cuita camadya ecuana Yusu tsehue ecajipeti ejuu. Jesús tu Dutya Cuatsashaquique. ³⁷ Micuana micuana bahuedya icuene cuita Juanra Yusuja quisarati dutya queja cuejacuareque. Israelita cuana anicuare cuanaju Galilea equetu catibutecuare. Turatu quisarati ajacacuare ama: “Necacuareticue inime. Necutsamereticue. Masadamatu junaya Yusuja Emepeque”. ³⁸ Yusratu tuja Espíritu cuitadya Jesús Nazaretju queja cuadishacuare. Tuja casa cuitadya tujatu tyacuare. Jesús tu dutya queja junenicuare ai jidaque ayaque. Quijahuatishajacuaquere ijuhua cuanara quijahuatishaya cuanaque. Micuanaratu adebayadya riyaque. Jadyatu Jesús jucuaque, Yusu tuatsehue tibu. ³⁹ Ecuana cuitadyatu dutya bacuaque Jesúsra Jerusalénju acuare cuanaque, Judea yahua tuja queja acuaque. Jadya juatsu tunajatu iyemerecuare curusuju tatameretsu. ⁴⁰ Majuhuaque quimisha huecaca juatsutu Yusura chacha nityatsuranacuare.

Chacha junucatsutu Jesús cuitadya ecuana queja cabameretinuacuare ecuana tura mepecuare cuana queja. ⁴¹ Dutya queja ama, ecuana queja camadyatu cabamereticuare. Yusura ecuana mepecuare, peya cuana Jesús eje buchique cueja ishu. Araara, iji ishuque iji jadya ecuana jucuaque Jesús tsehue, tuque emajuque chacha netitsuranucahuaju.

⁴² Cuadishacuare tura ecuana ecuita cuana tuja quisarati cueja ishu. Acuare tura ecuana: “Tere juetihuaju tuque cuejabuque dutya eje bucha judadiyaque, emaju cuanaque, majuma cuanaque jadya. Yusura ique amerehua eque tuque abuque. Riyaque ecana necuejaticue”, jadya ecuana Jesúsra acuare. ⁴³ Béru yuequedyatu Yusu equeque quisarati cuejaqui cuanara icueneta cueja acuare Jesús eje buchique. Yusuja Emepequepa junabuque. Tumerapa tu dutya tuaqueja catyatihua cuanaja jucha cuana apupashabuque, —jadya tuna Pedrora cuejacuare.

Yusuja Espiritu israelita ama cuana queja junacuareque

⁴⁴ Pedrora riyaque quisarati cuejaya jarijutu Yusuja Espiritu junacuare tuja quisarati baca juya cuana queja. Israelita ama cuana quejatu junacuare. ⁴⁵ Yusuja Espiritu israelita ama cuana queja junaya baatsutu Pedro tsehue Jope juque junahua cuanaque anajacatacuare. Tuna tuna israelita cuana jucuare. Israelita cuana queja cuita camadya Yusuja Espiritu junaya bucha tunajatu inime jucuare. ⁴⁶ Israelita ama cuanaque tuna bape yana eque quisaratibunecuare tunara cuita adebayaque amadya.

—Yusu, dyaque jida taa mique, —jadya tuna jucuare.

Jadya bahueetu israelita cuana jucuare Yusuja Espiritu israelita ama cuana queja junahuaque.

⁴⁷ —Yusuja Espiritu tu junahua tuna queja. Ecuana queja junahua bucha junaedyatu israelita ama cuana queja juhua. Aijama taa tu eje bucha eque riyu cuanaque utsama aishu ama, —jadyatu Pedro jucuare.

⁴⁸ Acuare tujatu israelita ama cuanaque:

—Necutsamereticue micuana amena Jesucristo jaque jadya adebata ishu.

Jadya juatsu tunajatu acuare:

—Rehuadya ecuana tsehue eje uma huecaca cuana anicue jari, —jadya tunajatu Pedro acuare.

Tunara amereya equedyatu jucuare.

Pedrora Jesús queja ecatyati cuanaque eje bucha juyaque cuejacuareque

11 Judeaju cuanaratu bacatsacuare quisarati Cesareaju jucuare cuanaque. Jesúsja ecuadisha cuanaque, tumbaedyu uma Jesús queja ecatyati cuanara bacacuare israelita ama cuanara Jesús eje buchique quisarati ejenechineque. ² Pedro Jerusalénju judirunucahuajutu uma Jesús queja ecatyati cuanara nereda atsacuare, Cesareaju cuanaque ecuita huitu biti catubutishahua ama tibu:

³ —¿Eje bucha juatsumi jidama juchine tuhua Cesareaju? ¿Eje bucha juatsumi catubutima cuanaja etareju nubichine? ¿Eje bucha juatsumi casitatitsu ararachine tuna tsehue? —jadya tunajatu Pedro acuare.

⁴ Tume tuna Pedrora pana cueja acuare eje bucha juchineque:

⁵ —Ique Jopeju Yusu tsehue quisaratiyara tuque batsachine ai cuana tahuiju bucha. Bachine tuque ai cuana taa sahuana ebari buchaju. Pushi etsucu cuanajutu sahuana etisune juchine. Butechinetu barepa juque. Junachinetu eaqueja. ⁶ Pana peta tuque achine. Petatsu tuque bachine cuanubi cuana, uu cuana, bacua cuana, upati cuana jadya tuque bachine. Dutyatu juchine ecuanaja arata baecua cuanaque. ⁷ Tume tuque bacachine Yusu quisaratiyaju: “Netitsuracue, Pedro. Iyecue tume mira petaya cuanaque. Iyetsu aracue”, jadya Yusura achine. ⁸ “Aijama, Ique Cuashashaquique! Eje bucha arae tuque eau tume

cuanaque asicada baatsu israelita cuanaja ara baecua cuanaque. Aranime ama tuque ecue Moisésra aramerecarama ayaque”, jadya tuque achine. ⁹ Tume Yusu quisaratinucachine barepa juque: “Aracue. Asicada bucha baume ni ejeque earaqui buchique era mique aramereyaque”, jadya tura achine. ¹⁰ Cueja quimisha ishu Yusura achine: “Aracue” jadya. “Aranime ama tuque ecue”, jadya achine. Quimisha ishujutu sahuana buchique tsuranucachine barepaju. ¹¹ Tuequedyatu quimisha ecuita junachine ecuana aniyaju. Israelita ama cuanaque tuna juchine. Cornelio Cesareaju aniyara tuna cuadishachine ique sarera, ique tuja etareju cuaishu. ¹² Yusuja Espiritura cuejachine: “Cuacue tuna tsehue, arepa ecana israelita ama paju ama bucha. Cuacura cuacarama jadya juume tuna tsehue”, jadya tura achine. Riya Jesús queja shucuta ecatyati rehua eatsehue cuanara tajichine. Dutya ecuana cuachine Cesareaju. Nubichine ecuana Cornelioja etareju, israelita amaja etareju. ¹³ Nubihuaju tura ecuana cuejachine: “Barepa juque Yusu tsahuaquiquetu eaqueja junachine. Bachine tuque rehua ecue etareju netiyaju. ‘Cuadishacue mere puji cuana Jopeju, Simón Pedro ihuarati ishu. ¹⁴ Turami cuejanaya Yusu queja judiru ishuque quisarati, mique, micue etareju cuanaque jadya Yusu queja judiru ishu”. Riyaque ecuana Corneliora cuejachine ecuana tuaqueja junatihaju. ¹⁵ Tura ique jadya cuejahuajutu era isaratibunechine tume israelita ama cuanaque Jesús eje buchique. Era tuna quisarati jidaque cuejayajutu Yusuja Espiritu junahua tuna queja. Ecuana israelita cuana queja juchine bucha, jadya junaedyatu tume israelita ama cuana queja juchine. ¹⁶ Tume tuque adebachine Ecuana Cuatsashaqui Jesúsra jadya acuareque: “Icuene tuna Juanra ena tsehue utsacuare inime cacuairetihua jadique ejitaju juishu. Tuequedyu tuque micuanaja Yusura tuja Espiritu cuitadya cuadishaya micuana ecue cuanaque ejitaju juishu”, jadya ecuana Jesúsra acuare icuene. ¹⁷ Ecuana Ecuana Cuatsashaqui Jesucristo queja catyatihujutu Yusura tuja Espiritu cuitadya ecuana queja cuadishahua. Tume israelita ama cuana queja tujatu iyabutyahuadya tuja Espiritu ecuana queja iyabutyacuare baedyu. Jida amatu Yusura cuitadya eje bucha achineque ecue bijidamadura yuamatura jadya aishu, —jadya tuna Pedrora acuare.

¹⁸ Tumetu Jesús queja ecatyati cuanaque Jerusalénju anicuare cuanara bacacuare tuque juchineque. Jadya cuejahuaju tunajatu terecuare cahuai. Abacatanacuare ecana. Pureama tuna acuare Yusu:

—Dyaque jida taa Yusu! Ecuana camadya ama ecuana Yusuja jutaqui, tumbaedyu israelita ama cuanaque. Tuna ecuana juhua bucha inime cacuairetihaju tuna anisiribuque tuatsehue, —jadya tuna jucuare.

Jetiama ecana Antioquiaju cuanaque Jesús queja catyaticuareque

¹⁹ Esteban tuna iyehujutu Jesús queja ecatyati cuanaque huanabarecuare eje uma epu cuanaju, Jesúsja ama cuanara ecana dyaque cuita nerecaturaya tibu.

Umae cuana tuna huanacuare japada. Umaetu huanadiru jucuare Fenicia yahuaju, Chipreju, epu ebari Antioquia tupu. Tuhua tunajatu Jesucristoja quisarati cuejajacuare ama. Israelita cuana camadya tunajatu Jesúsja quisarati cuejacuare, israelita ama cuanaque bacue aijama. ²⁰ Umae Jesús queja ecatyati cuanaque Chipre juque, Cirene juque jadya tuna Antioquiaju cuacuare. Tuhua junatitsu tunajatu cuejacuare israelita ama cuana Jesúsja quisarati. ²¹ Yusuratu dyaque tsahuacuare Jesúsja quisarati cuejaqui cuanaque. Quisarati bacatsu tunajatu jetiamara ejenejacuare tunaja ebaba cuanaquera ejeneacuare cuanaque. Tume tuna Ecuana Cuatsashaqui Jesucristo queja catyaticuare.

²² Tumetu Jesús queja ecatyati cuanaque Jerusalénju cuanara quisarati bacatsanucacuare jetiamapa Antioquiaju cuanaque Jesús queja catyaticuare jadya. Tumeque bahue juatsu tunajatu Bernabé tuhua cuadishacuare. ²³ Bernabé Antioquiaju junaticuare. Yusura tuhua cuanaque dyaque jida tsehue baya baatsu dyaque pureama jucuare.

—Ecuana Cuatsashaqui queja nimee nejuajecuedya jutidya. Neejenejacuame tuja quisarati, —jadya tujatu ecana acuare.

²⁴ Bernabé tuna tsahuacuare jetiama peya cuana Ecuana Cuatsashaqui queja catyati ishuh. Bernabé ecuita jidaque jucuare. Yusuja Espiritura cuatsashaya equetu jucuare. Ducuta Jesús queja catyaticuare.

²⁵ Bernabé tuhuaque cuinanatsu cuacuare Tarsoju Saulo sarera. ²⁶ Tuque daditsu tatse yudijidya judirunuca jucuare Antioquiaju. Tuhua tatse anidirucare peadya mara Jesús queja ecatyati cuana tsehue. Jetiama tatsejatu ecana Jesúsja quisarati bahuityacuare. Antioquiajutu ecuita cuanara Jesús queja ecatyati cuanaque “Cristoja cuanaque” jadya bacanishametse acuare.

²⁷ Bernabé, Saulo ecatsé Antioquiaju jarijutu Yusu equeque uma quisarati cuejaqui cuanaque tuhua jucuare. Jerusalén juque tuna junacuare. Jesús queja ecatyati cuana tsehue tuna casitaticuare. ²⁸ Peadya tuna tsehuequetu Agabo bacani jucuare. Yusuja Espiritura patu icuenetadya bamereacuare eje bucha judadibueque. Tume tuna netitsuratsu Agabora isaracuare:

—Mijetu jubuque dutya Judea yahuaju, —jadyatu jucuare.

(Claudio ecuari juyaque marajutu Agabora cuejacuare bae cuitadya judadicuare.)

²⁹ Agabora cuejahuaque bacatsutu Antioquia juque Jesús queja ecatyati cuanara tsahuacura acuare Jesús queja ecatyati cuanaque Judea yahuaju anicuare cuanaque.

—Necuadishara chipiru ecuana tsehuequi cuanaja ishuh, tuna earaqui aniya jari tupu caquemiti ishuh. Ecuana eje bucha tsahuataqui baya eque ecana netsahuara, —jadya tuna jucuare.

³⁰ Tume tunajatu sitacuare chipiru tunara eje uma tyataqui baya tupu. Dutya amena chipiru sitatsu tuna-

jatu cuadishacuare Judea juque Jesús queja ecatyati cuanaja huaraji cuana queja. Bernabé, Saulo jadya tsehue tunajatu cuadishacuare.

Santiago iyetanacuareque, Pedro etare apudaju ishatanacuareque jadya

12 Ecuari Herodestu catibuticuare Jesús queja ecatyati cuanaque nerecatura. ² Cuadishacuare tujatu sudaru cuana:

—Neiyeticue Santiago, Juan tsehuequique. Cuchiru tsehue neiyeticue.

Jadya ayaju tunajatu cuchiru tsehue piti tubuticuare. ³ Israelita cuana Jesús queja catyatima cuanaque tuna dyaque pureama jucuare Santiago iyetanahuaju. Tumetu Herodesra dujumereacuare risitsu Pedro. Riyaquetu jadya jucuare, Pascua bacani chine ishuh cuita, israelita cuanaja pan levaduramaque ara bahueque huecacaju. ⁴ Tunara Pedro inahuajutu Herodesra ishameraacuare etare apudaju. Cuadishacuare tujatu peadya tunca shucuta earacana sudaru tuque naru ishuh, pushira naru pushiradya cuare narunuca; jadya narue tunajatu acuare.

—Pascua chine cuetihuaju tuque ecuita cuanaja yacuaju nitya ishuh ihuaramereya. Dutyaja yatucaju tuque iyemereya, —jadyatu Herodesra inime tupucuare.

⁵ Pana narutu sudaru cuanara acuare Pedro, tuque ehuanaju. Tuque tuhujutu Jesús queja ecatyati cuanaque Yusu queja inime patya bacabaca jucuare tuja ishuh. Bacabacajacuare ama ecana tuja ishuh.

Yusura Pedro etare apuda juque cuinanashacuareque

⁶ Tumeque chineju, Herodesra tuque iye ishuhue huecaca iyahuaque juetima jarijutu Pedro tahuicuare tuhua beta sudaru patya. Jidatu erisi jucuare beta cadena metal tsehue. Peya enaruqui cuanaquetu etsecueju neticuare etare apudaja eteriqui naru. ⁷ Muya jutidya cuitatu juticuare barepa juque Yusu tsahuaquique. Juticuaretu Pedro eishaju. Huecaratu huecatillacuare etare apuda ducu. Barepajuratu Pedro epereju pajacuare emetucu tsehue, tuque cabatisha ishuh. Cabatishatsu tujatu acuare:

—Netitsuracue ebajarara, Pedro.

Cadena ecatsetu Pedroja ebi risiquique pacacuare.

⁸ —Cajututihushacue. Canaiticue. Jutucue micue chinela, —jadyatu barepajura acuare Pedro.

Tumetu tura cuejaya equedya jucuare. Tuque cajutu- ti amena juhujutu tujatu acuare:

—Jutucue micue caramati ishuhue. Cajututitsu ique tupuju jeticue, —jadyatu barepaju Yusu tsahuaquira acuare.

⁹ Tume tatse betadya Pedro eisha juque cuinanacuare. Pedrotu barepa juque tupuju cuinanayaque cuinanaya ama bucha cabaticuare. Tahuiju ama bucha tahuiju bucha jadya jutidyatu cabaticuare. ¹⁰ Barecuare tatse icueneque enaruquique. Tupuju tatse beta ishuhue barenuacuare. Judirucare

ecatse amena ishuque etsecueju. Tumeque etsecuetu fierro eaque jucuare. Dyaque arida, bicueda jadyatu jucuare. Amena ishuque etsecue epuju cuinana ishuquetu jucuare. Tatse tumeque etsecueju cajipetiyajutu Yusura tuja inime taca pacashatana amerecuare. Cuinanacuare ecatse. Edijiju ajequerebacatsutu Yusu tsahuaquira jacacuare.

¹¹ Tumetu Pedro nime jueticuare. Adebacuaretu tahuiju ama jadya juyaque.

—Yuneridya tucue inajacameretahua. Yusuratu cuadishahua barepa juque tuque tsahuaquique ique etare apuda juque cuinanasha ishu, Herodesja ique eje bucha aishu ama. Arepa israelita cuanara iyecara aya ama bucha, Yusura taa inajacamerehua, —jadyatu Pedro jucuare.

¹² Einajacaque pana caadebati juatsutu Pedro Mariaja etareju cuacuare. Tumeque Mariatu Juan Marcosja ecuaque jucuare. Jetiamatu Jesús queja ecatyati cuanaque tuhua casitaticuare Pedroja ishu Yusu queja bacaba ishu. Etare apuda juque cuinanashamere ishu tuna bacabacuare. ¹³ Pedrotu etare tsecue judirucua. Judirutsu tujatu dududirucua eteriqui. Ihuaracuaretu etsecue capacashamereti ishu. Epuna ehue ebari Rode bacanitu etsecueju junacuare, aira eteriqui duduyaque cuajira. ¹⁴ Tura isarayaju cabacatitsu tujatu adebacuare Pedroja etsuri. Tuja etsuri bacatsutu dyaque pureama juatsu yume cuanucadya jucuare peya cuana cuejara, Pedro nudya ishu etsecue pacashamaquedya.

—[Pedro] y tu etsecueju! —jadya tuna Rodera aticuare.

¹⁵ —[Ajama!]Eje bucha juetu tuque ejuu! Peta jida ama tuquemi ahua. [Eje bucha Pedro ni tu juma! —jadya tunajatu abarecuare.

—[Pana petadya tuque ahua!]Pedro] y tume! —jadya tuna Rodera acuare.

—[Tuque ama tume! Barepa juque Yusu tsahuaquique tu ejuu, Pedro naruquique, —jadya tuna jucuare.

¹⁶ Pedroratu dudunityacuare] y jutidya eteriqui, capacashamereti ishu. Chamacama tunajatu eteriqui pacashaticuare. Bacuare tuna. Tuque baatsu tuna inime tsapema jucuare. Inime tuputsu tuna tuna camadya jutidya cabacaduratibareya jadya jucuare.

¹⁷ Emetucu ahua] tsehu] y jutidya tujatu ecana cuejacuare tuna abacatana ishu. Cuejacuaretu ecana eje bucha cuinanashae Yusura ahuaque etare apuda juque.

—Necue] y Jesús queja ecatyati cuanaque rehua casitatihua ama cuanaque ique eje bucha juhuaque, Santiago neri neri Ecuana Cuatsashaqui tsehuequique, —jadya tujatu ecana acuare.

Jadya tuna aatsutu cuinanatsu dirucua peya queja.

¹⁸ Huecacahuajutu sudaru cuanara Pedro etare apudaju datse sareticuare. Dadicuare ama tunara. Eje bucha adebataqui ama tunajatu bacuare Pedro eje bucha juhuaque.

—¿Eje bucha cuinanae jatsuri juhua rehuaque?

—jadya tuna jubarecuare.

—¿Eju jatsuri cuahua?

¹⁹ Herodesratu saremereticuare. Dadicuare ama tuna. Ihuaracuaretu sudaru cuana.

—¿Eje bucha cuinanaetu Pedro juhua etare apuda juque? —jadya tujatu ecana bacaduracuare.

Eje bucha quemitsataqui ama tunajatu bacuare.

Tume tujatu ecana iyemerecuare, tunara erisique huanashahua tibu.

Jadya juatsutu Herodes cuinanacuare Judea juque. Dirutsutu anidirucua Cesarea] y.

Herodes majucua] y

²⁰ Herodestu ecahuaiti jucuare ecuita Tiro, Sidón jadyaju anicuare cuana tsehue. Tuna tsehue ecahuaiti juya tibu tujatu tunaja ara ishu cuanaque cuadishajacacuare. Tumetu tumeque epu ecatse] y cuanara cuadishacuare Herodes tsehue inime baje] y ishu cuanaque. Ecuadisha cuanajatu dyaque eadeba jucuare ecuari merequique, Blasto bacani. Tumetu icuene cuita Blasto tsehue quisaratira cuadishatahua cuanaque cuacuare.

—Blasto, mique jiteque ecua] y jehua. Ecuana ecuari isaraquereticue, tuque ecua] y tsehue cahua] y tija ishu, eara] y ecua] y tyatananuca ishu, —jadya tunajatu acuare.

²¹ Herodesratu iyacuare huecaca tuna tsehue quisarati ishu. Tumeque huecaca juetihuajutu cajututicuare ejutu] y huecaca cuana dyaque inime metse] y jutu bahue tsehue. Tumeque jututsutu anibutecuare huaraji muida cuanaja eaniqui] y tuna isara. ²² Tuja quisarati bacatsu tuna quiquecuare:

—[Miquemi ecuita ama!]Yusu mique! —jadyatu ecuita cuanara acuare quique eque.

²³ Bacatsu tuna Herodesra nereda acuare ama ni abacashacuare. “Yusu camadya nemi] y ique ama”, jadya cuana tujatu ecana acuare ama cuitadya. Jadya tibusu Yusura barepaju tuque tsahuaquique yume cuadisha cuitadya acuare tuque u] y jed] y amere ishu. Etsena queja tujatu educu] y esere cuana aramerecuare. Masadama cuitatu majucua] y.

²⁴ Dyaque umada ecuitaratu bacacuare Jesús] y quisarati. Dutya queja Jesús queja ecatyati cuanaratu peya cuana cuejacuare tuja quisarati.

²⁵ Bernabé, Saulo jadyaratu Jesús queja ecatyati cuanaja huaraji cuana tyaticuare chipiru nerec] y cuanaja ishu Jerusalén] y. Tuque tyatitsu tatse dirunucacuare tuhuaque. Judirunucacuare tatse Antio] y quia] y. Juan Marcostu tatse tsehu] y cuacuare.

Bernabé, Saulo jadya tatse peya queja Jesús] y quisarati cue] y jati ishu mepetanacuare] y

13 Antio] y quia] y jutu Jesús queja ecatyati cuana ducu anicuare Jesús] y quisarati cue] y, bahuit] y jadya juya cuanaque. Jucuare tuna Bernabé, Simón, Lucio, Manaén, Saulo jadya. Simon] y jutu peya ebacani an-

icuaire; “Sehuedaque” bacanitu jucuaire. Luciotu Cirene juque jucuaire. Manaén patu Herodes Galilea naruqui jucuaire tsehue catemutipee jucuaire. ² Peya huecacatu Jesús queja ecatyati cuanaque ecasitati jucuaire tuque mui ishu. Arama tuna equibeti jucuaire tuque muiyaque. Tuna tuhuaju tuna Yusuja Espiritura is-aracuare:

—Eratu mepehua Bernabé, Saulo jadya. Iyacia ecatsa necuadishacue Yusuja mere aishu, —jadya tuna Yusuja Espiritura acuare.

³ Yusu tsehue quisarati ishu arama quibetitsu emajaca anitsutu Jesús queja ecatyati cuanara emetucu tatseja iyuca matina iyacuare tatse Yusura mepehuaque jadique bamere ishu. Emetucu iya amena aatsu tunajatu Yusuja mere aishu cuadishacuare.

Ecuadisha ecatsera Chipreju Jesúsja quisarati cuejacuareque

⁴ Yusuja Espiritura cuadishayajutu Bernabé, Saulo jadya cuacuare Chipre cububuju. Juan Marcos tatsejatu etsahuaqui dujucuaire. Tumeque ecububuju junati ishu, tuna icuene cuita junaticuare Seleuciaju. Tuhuaquedya tuna cuaba ebariju anibutenacuare Chipreju cuaishu. Junaticuare ecana Chipreju Salamina ebuteju. Junatitsu tuna Jesúsja quisarati cueja jutinunecuare. Nubicuare ecana israelita cuanaja caradati ishuque etare cuanaju Jesús eje buchique cueja ishu.

⁶ Batillacuare tuna dutya epu aniya cuanaque ecububuju. Judirucuare ecana epu Pafos bacaniju. Tuhua tunajatu tsurucuare israelita Barjesús bacani. Tuquetu maruhuisa jucuaire. Ijahue tujatu ecuita cuana acuare. Pusha pusha tsehuetu “Eratu quisarati cuejaya Yusu equeque cuitadya”, jadya jucuaire. ⁷ Tuquetu Sergio Pauloja etajiqui jucuaire. Sergio Paulotu dutya tumeque ecububuju anicuare cuana naruquique jucuaire. Riyaquetu dyaque inime jararaqida cuita jucuaire. Ihuaramerecuairetu Bernabé, Saulo jadya Jesúsja quisarati bacacara aatsu. ⁸ Barjesusjatu peya ebacani “Elimas” jucuaire griego yana eque. Enaruquique tujatu Jesúsja quisarati bacamerecarama acuare. Tuquetu dyaque ecahuaiti jucuaire Bernabé, Saulo jadya tsehue. Sarecuare tujatu eje buchique enaruquique Jesús queja catyatisha ishu ama.

⁹ Saulojatu beta ebacani anicuare. Griegojutu “Saulo” bacani jucuaire, hebreoju “Pablo” jadique. Tuquetu Yusuja Espirituja biji eque juneniyaque jucuaire. Petatsu tujatu maruhuisa Elimas isaracuare:

¹⁰ —Miquemi pusha pusha puji. Jidama cuita mique. Miquemi Satanás jaque. Miratu ujeu bajacaya ama dutya jidaque. Ecuana Cuatsashaqui queja catyatitsu ecuana juneniya ediji tuyu eque bucha. Miratu micue pusha pusha tsehue ecuita cuana ejenemerecarama aya tuja quisarati. Tuaejemi ecana catyatishacarama aya. Ediji tuyu eque ama ajeshaya bucha tuquemi ecana amereya. ¹¹ Iyaja cuitami Yusura nerecaturaya. Shuhui turami amereya. Eje uma huecaca cuanami capetatiya ama. Ni ai buchique tuquemi petaya ama, —jadyatu Pablora acuare.

Muya jutidyatu maruhuisa shuhui jucuaire. Dutya tuja ishu apuda jucuaire. Ni ai buchiquetu petacuare. Jababanicuare tuque ejeque dadicara aatsu ebiju inatsu carepemereti ishu. ¹² Sergio Pauloratu bacuare Elimas jadya juhuaju. Jadya baatsutu Jesús queja catyaticuare. Ecuana Cuatsashaqui quisarati bacatsu tujatu adebacuare yunerique. Bacamapa tujatu jucuaire jadya cuanaque bahuityayaque.

Pablo, Bernabé jadya Antioquiaju Pisidia yahuaju cuacuareque

¹³ Tuequedyatu Pablo tuatsehue juneniya cuana tsehue cuanucacuare Pafos juque. Ena eque tuna cuacuare Panfilia yahuaju. Junaticuare ecana Perge ebuteju. Tuhua tatse shanatsutu Juan Marcos Jerusalénju judirunucacuare. ¹⁴ Pablo, Bernabé jadya tatse cuanucacuare Perge juque. Cuanucacuare tatse ediji eque Antioquiaju judiruya tupu. Tumeque Antioquiato Siria yahuaju ama jucuaire. Pisidia yahuajutu jucuaire. Canajara huecacaju tatse cuacuare israelita cuanaja caradati ishuque etareju. Nubitsu tatse anibutenacuare. ¹⁵ Tunaja bahuetu israelita cuana tuhua cuanaque Yusuja quisarati isara jucuaire etsuri jebuda tsehue. Isaracuare tunajatu Moisésra, Yusu equeque quisarati cuejaqui cuanara jadya hueneacuare cuanaque. Tuequedya tuna quirica isara amena jucuaire. Caradati ishuque etareju ecuatsashaqui cuanaratu Pablo, Bernabé jadya cuejamerecuare:

—Tata ecatsa, aniya ni metseja ai ecuana cueja ishuque, necuejacue. Aniya ni metseja ecuana casatura ishuque, necuejacuedya ecuana iyaja cuita, —jadya tunajatu ecatsa acuare.

¹⁶ Tumetu Pablo netitsuracuare. Emetucu tsehue tujatu ahuaracuare ecuita cuana abacasha ishu. Jadya juatsutu quisaratitibunecuare:

—Ecue ata cuana israelita cuana, nebacacue ique. Micuana israelita cuana ama cuana Yusu Neri muiqui cuanaque, nebacacue ique quisaratiyaju. ¹⁷ Béru yuequedyatu Yusura ecuanaja baba cuana mepecuare, Israel eque ejuracana cuanaque. Tuna tuna tumeque Yusu Neri queja nimee jucuaire. Tuna tunaja yahuaju ama Egipto bacaniju aniya jariju tujatu ecana dyaque jetiama umanashacuare. Tuquetu tuna tsehue dyaque jida jucuaire. Tuja casa tsehue tujatu ecana cuinanashacuare Egipto juque. ¹⁸ Eje uma mara tuna epu cuana tsecada aniyaju junenicuare. Pushi tunca mara tuna junenicuare. Narujacuare ama tujatu ecana, arepa tuna eje uma au ama tura cuatsashayaque acuare ama bucha. ¹⁹ Pacarucu bape bape yana cuana equeque tuna Canaánju anicuare. Yusura tuna pana aputashatilla acuare, tuja cuanaque tuhua ani ishu, ecuanaja baba cuana tuhua ani ishu. Tume anie cuanaque tuna aputashatillacuare, ecuanaja baba cuana tunaja epu cuana metsenemere ishu. ²⁰ Israel Egiptoju dirucuare equeque, tuque ejuracana cuanaque Canaánju yudijidya anidirunuca jucuaire equequetu 450 mara dyane jucuaire. Tuhua Canaánju tuna Yusura huaraji inime cuana bajeje puji cuana eque

narucuaire. Samuel tu amena ishuque inime cuana bajeje ishuque jucuaire enaruquique. Tuquetu Yusu equeque quisarati cuejaquique jucuaire.

²¹ "Samuel aniya patyatu ecuita cuana jucuaire: 'Amena ecuana Yusu queja canarumereticarama juya inime cuana bajejequi cuana eque. Ecuari cuana queja ecuana canarumereticara juya, peya yahua cuanaju bucha' jadyatu ecuita cuana jucuaire. Tumetu Yusura Saúl mepecuaire ecuari juishu. Tuquetu Cisja ebacuaque; ecuanaja ebaba Benjamín eque ejuracanaquetu jucuaire. Pushi tunca mara tujatu israelita cuana narucuaire. ²² Tupujutu Yusura bijidama bacuaire Saúl ecuari juishu. Turatu mepecuaire David ecuari iyacuaque juishu. 'Pana adeba tuque David aya, Isaíja ebacuaque. Tumeque ecuita tu ecue bijidaque. Turatu aya dutya era amereyaque' jadya patu Yusu jucuaire, David jadya ayaque. ²³ Icuenetadya patu Yusu jucuaire: 'Cuadishabuque tuque israelita cuana queja David eque juracanayaque tuna inajacamere ishu'. ²⁴ Jesús, Yusuja quisarati bahuitya catibutima jarijutu Juanra israelita cuana acuare: 'Necacuaireticue inime. Necutsamereticue Yusu queja nimee jadicue ejitaju juishu' jadya tujatu ecana acuare. ²⁵ Jucuairetu Juan tuque Yusura amerehuaque atillahuie: 'Ique ama micuanara ihuayaque. Mesías ama ique. Tsunutaya amatu peya junayaque. Tujatu dyaque casa aniya, ecue bucha ama. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique' jadyapa tuna Juanra acuare, —jadyatu Pablora isaracuare Antioquiaju cuanaque.

²⁶ Isaranucacuare tujatu ecana:

—Ecue ata cuana Abraham eque ejuracana cuanaque, nebacacue ique. Micuana israelita ama cuanaque Yusu neri muiqui cuanaque, nebacacue ique quisaratiyaju. Yusura micuana bahue amerecara aya eje bucha tuaqueja judirue juishuque. ²⁷ Dutya jujeri Jerusalénju cuanaque tuna baecua jucuaire Jesús Ijahua quejaque inajacamere ishu ecuaadishaque. Tuna huaraji cuana tuna baecuadya jucuaire. Canajara huecacaju cama tunajatu caradati ishuque etare cuanaju Yusuja quisarati isaranucuaire. Isaracuare tunajatu Yusu equeque quisarati cuejaqui cuanara hueneuaire cuanaque. Jadya ama bucha tunajatu adebacuaire ama isarayaque. ²⁸ Jerusalénju cuanaratu Pilato bacacuare tuja iyemere ishu, arepa tuna eje bucha iyemere aishuque dadicuaire ama ama bucha, arepa tuja ni ejeque jucha aijama jucuaire ama bucha. ²⁹ Icuenetadyatu Yusu equeque quisarati cuejaqui cuanara hueneuaire Jesús jadya ayaque. Yusuja quisarati tu najatu hueneuaire tuque eje bucha judadiyaque. Dutya judadicuaire tunara cuejacuaire eque cuitadya. Jesús curusuju majuhuajutu Joséra emajuque butyamereuaire. Butyatsu tujatu cani ducu ishamereuaire. ³⁰ Yusratu yudijidya nityatsuranuca acuare tuque quimisha huecaca majuhuaju. ³¹ Netitsuranucatusu Jesús cabamereticuaire tura mepecuaire cuana queja. Tuque iyetanama jariju tuna junenicuaire tuatsehue jetiama epu cuana juque bahuiya, Galilea eque

Jerusalén tupu. Chacha netitsuranucatsu tuna Jesúsra cabamereti ishu acuare. Juneninucacuaredyatu tuna tsehue eje uma huecaca. Iyacuatu tuque enityatsuratanaque baqui jucuaire cuanara tuja quisarati cuejaya dutya queja. Tunaratu tuja quisarati cuejaya Israel eque ejuracana cuanaque.

³² "Yatsera micuana tumebaedya cuejaya Jesús eje buchique quisarati. Tudyatu Yusura ecuanaja baba cuana cuadisha ana acuarequedya. ³³ Tura aana ahua bae cuitadyatu jucuaire. Ecuana ecuanaja tuna eque ejuracana cuanaque. Ecuanaja ishutu Yusura acuare tura aana ahuaque Jesús yudijidya nityatsuranuca ahuaque. Yuequedyadyatu Yusu jucuaire, Jesús emajuquepa nityatsuranucaya jadya. Tura quisarati acuareque tu ehue Yusuja quisarati beta ishuque Salmosju:

"Miquemi ecue ebacua.

Iyacu tuquemi ecuita cuana bamereya, ique micue tataque".

³⁴ "Tumebaedyatu béru Yusura cuejacuaire emajuque patu nityatsuradadiya, tuja ecuita riri ishu ama jadya. Jadyatu Yusu jucuaire, jadya quisarati ayaque:

"Jida tuque ameredadiya miatsehue.

David tsehue ique jida jucuaire bucha, jadidya judadiya miatsehue.

Yuneridya jadidya judadiya".

³⁵ Peya tu Salmo quiricaju ehue jadya:

"Ririshabuque amami micue iyuhuedaja ecuita, mique merequi juhuaia ecuita", jadyatu Davidra quisarati acuare béru.

³⁶ "Adebayadya ecuanaja David tuta taca ama jadya caticuaireque. Davidtu majucuaire. Tuque majuma jarijutu Yusuja biji eque anicuaire. Jida tujatu israelita cuana narucuaire. Majuhuaju tunajatu emaju caniju ishacuaire. Tuja ebaba cuanaque majuhuaju ishatanacuarejudya tunajatu ishacuaire. Davidtu majutsu riritereuaire. ³⁷ Jesús bacue riricuaire ama, Yusura yudijidya emajuque nityatsuranucacuare tibu, —jadya tuna Pablora cuejacuaire.

³⁸ Pablora Antioquiaju cuanaque cuejanucacuare:

—Ecue ata cuana, bahue micuana yatsera amerecara aya; Jesús equetu Yusura jucha cuana apupashaya. Riyaque Jesúsdy a micuana cuejaya. ³⁹ Jesús queja catyatitsu cuita camadya tuque micuanaja jucha cuana etillatanau. Moisésja cacuatsashati eque juatsu amatu jucha cuana apupashatanaya, Jesús queja catyatitsu cuita camadya. ⁴⁰ Beru patu Yusu equeque quisarati cuejaqui cuanara quisarati acuare, tuque bijidamaduraquepa canerecatidadibuque jadya. Necanaruticue micuana, tunara cuejacuaire eque ejuuju.

⁴¹ "Micuanaratu ecue quisarati ejeneya ama.

Micuana micuana quijaribati arida cuanaque.

Inime tilla nejucue.

Baji micuanaja paani.

Iyetanadadiya micuana, ecue quisarati ejenecarama aya tibu.

Idya Yusu.

Micuanaja yacuajudya tuque aya ejeja ataquique ama.

Jadya ama bucha micuanara ejenedadiya ama.

Peya cuanara era ahuaque cuejayaju tuque micuana ejenebuque ama”,

jadyatu Yusura quisarati acuare béru tuja quisarati cuejaqui cuana eque, —jadya tuna Pablora acuare.

⁴² Jadya aatsutu Pablo tuatsehue juneniya cuanaque jadya tuna caradati ishuque etare juque cuinanacuare. Tuna cuinanayaju tuna ecuita cuanara acuare:

—Peya canajara huecacaju ecuaña Jesús eje buchique necuejananucacue, —jadya tunajatu ecana acuare.

⁴³ Tume caradatihuaque diruterehuajutu umada israelita cuanara tajicuare Pablo, Bernabé jadya. Tumebaedy tatse jetiama israelita ama cuana Yusu muiqui cuanara tajicuare. Tatsera tuna casaturacuare.

—Yusura micuana dyaque iyuhueda bayaque caedebatitsu tuque pureamaturayaque neaniajecuedya jutidya, —jadya tatsejatu ecana acuare.

⁴⁴ Semanape piji cuitadya tuna canajara huecacaju dutya jujeri epu ebariju cuanaque casitaticuare Ecuana Cuatsashaquiya quisarati baca ishu. ⁴⁵ Jetiama ecuita ecaradatique baatsutu israelita cuanaja huaraji cuana cahuaiticuare Pablo, Bernabé jadya tsehue. Tuna cuita camadya quisaratiyaju bacatacara tuna jucuaré tatse jetiama ecuitara quisaratiyaju bacayaju. Tume tunajatu Pablo ecatsé dyaque cuita jishatsu quemitsape ijil-lahuana jadya atibunecuare:

—Pablo ecatsera micuana pusha pusha cuejaya, —jadya tunajatu ecana acuare.

⁴⁶ Tumetu Pablo, Bernabé jadya quisaraticuare casa-da tsehue, bajida tsehue ama:

—Micuanadya micuana ecuanaja icuene cuita Jesúsja quisarati bacameretaqui jucuaré micuana israelita cuana. Jadya ama buchatu micuanara bijidamaduraya. Micuanaratu micuanaja mere equedya jutidya Yusu queja judirutaqui ejuu bucha adebaya. Jadya tibudya tuque tuque yatse iyacua israelita ama cuanaque Jesúsja quisarati cuejaya. ⁴⁷ Yusratu béru quisarati acuare:

“Micuana micuana era iyahua, ecue quisarati dutya quejaque cueja ishu.

Hueca bucha micuana jubuque, eje bucha inajacameree era eauque cueja.

Dyaque japada micuana cuabuque, ique eje buchique bahue amereyaque”,

jadyatu Yusura quisarati acuare béru.

Jutaqui tuque yatse israelita ama cuanaque cuejaya, —jadyatu Pablora israelita cuana acuare.

⁴⁸ Jadya bacatsutu israelita ama cuanaque dyaque pureama cuita jucuaré.

—Dyaque jida taa Yusuja quisarati! —jadya tuna jutibunecuare.

Yusura tuaqueja judiru ishu mepecuare cuanaquetu Jesús queja catyaticuare. ⁴⁹ Jadya equetu Jesús queja ecatyati cuanara cuejajacuare ama dutya queja Ecuana Cuatsashaquiya quisarati. Tumeque yahua

duty epu cuanaju tuna quisarati cueja jucuaré. ⁵⁰ Israelita cuanatu Pablo, Bernabé jadya tsehue dyaque jutidya cahuaiticuare. Tunaratu ecuita cuana inime metse cuanaque tatse tsehue cahuaitishacuaredya. Cahuaitishacuare tuna epuna inime metse cuanaque. Tumeque epuna cuanatu Jesús queja catyatima jucuaré, arepa Yusu muicuare ama bucha. Dutya tume cuanaque tunajatu ana cuejacuare Pablo, Bernabé ecatsé tumeque yahua juque ijehuemere ishu.

⁵¹ Cuinanayaquetu Pablo ecatsé ehuachi juque muru quitatitiquenacuare. Jadya tatsejatu ecana acuare, “Rehua cuanaque ri jucha metse” jadique, quisarati bacacarama juya tibu. Jadya juatsu tatse cuacuare Iconioju. ⁵² Jadya ama buchatu Antioquía juque Jesús queja ecatyati cuanaque pureama jucuaré, Jesús jaque cabatitsu. Tuna tuna Yusuja Espirituja biji eque anicuare. Tuque bacue tuna tsehuedya jucuaré.

Pablo, Bernabé tsehue Iconioju cuacuareque

14 Pablo, Bernabé jadya tatse Iconioju israelita cuanaja caradati ishu etareju nubidirucuare.

Tuhuadya tatsejatu Jesús eje buchique quisarati cuejacuare. Jetiama tuna Jesús queja catyaticuare israelita cuana, israelita ama cuanaque jadya. Jadya baatsutu israelita cuana tuaqueja catyaticarama juhua cuanaque dyaque cahuaiticuare. Quisaraticuare ecana israelita ama cuana Jesús queja catyatima cuana tsehue. Pusha pusha ecana jucuaré Pablo ecatséja ishu. Jidama tunajatu ecana inime tupumerecuare tatseja ishu, Jesús queja ecatyati cuanaja ishu jadya. ³ Jadya ama buchatu Pablo ecatsé dirushacuare ama. Tsunuda tatse tuhua anicuare, jetiama ecana Jesús queja catyatihua baatsu. Cuejacuare tatse Ecuana Cuatsashaquiya quisarati bajida tsehue ama.

—Yusura micuana dyaque iyuhueda baya, —jadya tatse ecuita cuana cuejacuejanicuare.

Yusuja casa tsehue tatsejatu ni ejeque ecuitaja ataquique ama acuare. Yusura tatse jadya amerecuare, ecuita cuana tuja quisarati yunerique bahue amere ishu. ⁴ Umada ecuita cuana tumeque epuju anicuare cuanara tatse ejeneacuare ama. Dutyara tupu ama tuna inime tupucuare. Umaetu israelita cuanara inime tupuya eque jucuaré. Peya cuana bacue jucuaré Pablo ecatséja inime eque.

⁵ Tumetu Iconioju cuanaque tuna cama quisaraticuare, israelita cuana, israelita ama cuanaque jadya. Huaraji cuana tsehue tunaja dutyaja tupu inime jucuaré Pablo, Bernabé jadya jidama ijahue ijahue aishu.

—Neiyera ecatsé tumu tsehue, —jadya tuna jucuaré.

⁶ Pablo, Bernabé jadya tatse bahue jucuaré tunara iyecara ayaque. Bahue juatsu tatse Listra, Derbeju jadya huanacuare. Tumebaedy tatse cuacuare epu cuana japadama. Jeeque beta epu tu Licaonia yahua juque. ⁷ Tuhua tatsejatu cuejacuaredya jidaque quisarati Jesús eje buchique.

Pablo tuna Listraju tumu tsehue iyejericuareque

⁸ Tuhua Listrajutu anicuare ecuita ajebaecuaque. Huachi jidamaque cuinanacuare tibusu ajebaecua jucuaque. ⁹ Jeeque ecuitaratu bacaanicuare Pablora Jesúsja quisarati cuejayaque. Pabloratu pana peta acuare. Petatsutu Pablora inime tupucuaque:

—Riyaque ecuitara taa ri ejeneya Yusura ajebaecuaque eajeshauque, —jadyatu Pablora inime tupucuaque.

¹⁰ Tumetu Pablora jadya acuare etsuri jebuda tsehue:

—Netitsuracue. Pana neti jucue.

Tura jadya ayajutu ecuita putitanacuare. Ajeti-bunecuare. Etsaca ecatsé tujatu jida ajetaqui jucuaque.

¹¹ Umada ecuitaratu bacuaque Pablora ajebaecuaque ajeshahuaju. Baatsu tuna quiquetibunecuare tunaja yana eque, Pabloja yana eque ama:

—Yusu ecatséri ecuaque queja cabameretihua!
 ☐Cacuitatitsu retse ecuaque queja cabameretihua!
 —jadya tuna jucuaque.

¹² —Riyaque ecatsé rique ecuanaja yusu ecatsé.

Tumeque tu Zeus, —jadyatu Bernabé petatsu jucuaque.

—Tumeque tu ecuanaja yusudya. Riyaque ri Hermes, —jadyatu Pablo petatsu jucuaque.

Jadya tuna Pablo, Hermes bucha adebacuaque, tuque dyaque quisaratihua tibu.

¹³ Tuna jadya quiquetereya tsunumeetu pae Pablo, Bernabé ecatsé paera jipeticuaque. Tuquetu Zeus merequique jucuaque. Zeus mui ishucue etarejutu mere jucuaque. Tumeque etare cacatu epu ejunacuareju jucuaque. Quetimerecuare tujatu toro cuana, tatseja ebacaniju iyemere ishucue. Shasha cuanatu paera tatse bajeje ishucue quetimerecuare. Paera, ecuita cuanara jadyatu Pablo, Bernabé jadya muicara acuare; tunaja yusu cuana mui ea bucha tunajatu ecatsé muicara acuare.

¹⁴ Ecuita cuanara Yusu mui ea bucha muicara ayajutu Pablo, Bernabé ecatsé dyaque peya inime jucuaque. Cachajaticuaque tatse tatseja una, peya inime juyajudique cabamereti ishucue. Quiqueajecuaque tatse tuna queja:

¹⁵ —Tata ecana, ¿aishu micuana jadya juya? Yusu ama yatse, ecuitadya jutidya. Micuana buchique cuitadya yatse. Jidaque quisarati micuana cuejara yatse jechine, micuanaja yusu cueya cuana muijaca ishucue. Yanacana tuque micuana muiya. Ni aishu buchique tuna jida ama. Tume cuana queja nimee nejujacacue. Yusu Neri queja nimee nejujucue. Tuquetu Yusu Chachaque. Turatu barepa iyacuare. Yahuatu iyacuare. Cueri cuanaja euaquetu iyacuare. Dutya tume cuanaju aniyaque tujatu iyacuare. Jadya eque tu tuque dutya iyaquique. ¹⁶ Berutu ecuita cuana Yusu Nerija inime eque ama anicuare. Tunaja inime equedya jutidya tuna anicuare. Yusura patu quisarati acuare: “Eaqueja nimee jucarama juya cuanaque paani tuna eje bucha tunadya jutidya anicara juya eque”.

¹⁷ Jadya ama buchatu tuna tsehue jida jujacahua ama. Jadya bameree tujatu ecana ahua tuque peadya camadya Yusu nerique. Turadya tuque micuanaja tee

cuana nei queja amereya, micuana cuhuatiya cuanaque jida huija ishucue. Turadya micuana tyaya dutya micuanara ara ishucue cuanaque sareyaque, micuana pureama juishucue. Jadya bae tura micuana jida aya, micuana tuaqueja catyati ishucue, —jadya tatsejatu ecana acuare.

¹⁸ Jadya tuna Pablo, Bernabé ecatsé acuare tunaja tatseja ebacaniju uu cuana iye ishucue ama, tunara tatse cueya cueya cuana ebajejeu bucha bajejee eauju. Jadya ama bucha tuna eje bucha jadya amerejacataqui ama bucha jujericuare.

¹⁹ Judirucuaque israelita cuana Antioquía juque, Iconio juque jadya. Tuna tuna Jesús queja ecatyatique ama jucuaque. Cahuaitishacuare tuna ecuita cuana, tunaja Pablo, Bernabé jadya ujeu baishucue. Tumetu ecuita cuanara Pablo tumu tsehue marereshacuare. Iyehua bucha tuna cabaticuaque. Tume tunajatu epu juque repeajetsu ijehueticuare etsecueju. Tuhudya tunajatu shanacuare. ²⁰ Jesús queja ecatyati cuanaque tuna caradaticuaque tuque jarayaju. Tunara tuhua petayajudyatu netitsuracuare. Yudijidya judirunucatu jucuaque epuju. Jadya juu huecaca nuca jadya juatsutu Bernabé tsehue cuacuare Derbeju.

²¹ Tuhua tatsejatu cuejatinucuaque quisarati jidaque Jesús jucha cuana tsujetyaqui majucuaque. Jadya bacatsu tuna jetiama Jesús queja catyaticuaque. Tuequedya tatse judirunucuaque Listraju, Iconioju, Antioquiaju jadya. ²² Tumeque epu cuana eque cuetiyara tatsejatu casaturacuare Jesús queja ecatyati cuanaque.

—Jesús queja nimeedya jutidya nejuajecue. Dyaque tu canerecati anibuque Jesúsja cuanaja ishucue, —jadya tatsejatu ecana aeticuaque.

²³ Dutya epu cuanaju tatsejatu Jesús queja ecatyati cuanaque naru ishucue cuanaque iyabarecuare. Arama quibeti jucuaque, Yusu tsehue quisarati ishucue emajaca ani ishucue. Naru ishucue cuanaque iyabaretsutu Pablo, Bernabé ecatsé quisaraticuaque tunaja ishucue Jesús tsehue.

—Ecuana Cuatsashaquique, jida narucue micue cuanaque naruqui mira mepehua cuanaque. Miaqueja tuna catyatihua, —jadya tatsejatu Jesús bacacuare.

Pablo, Bernabé jadya Antioquiaju Siria yahuaju judirunucuaque

²⁴ Pablo, Bernabé jadyatu cueticuaque Pisidia yahua eque. Judirucuaque tatse Panfilia yahuaju. ²⁵ Tueque cuetinucayara tatsejatu cuejaetibenuacuare Jesúsja quisarati Pergeju. Juetinucuaque ecatsé Ataliaju.

²⁶ Tuequedya tatse dirunucuaque ena eque Antioquiaju judirunucuaque ishucue. Riyaque epu juquedya tatse cuacuare Jesúsja quisarati cuejara. Tatse cuinanama jarijudyatu Jesús queja ecatyati cuanaque tuhua anicuare cuanaque Yusu queja bacabacuare tatseja ishucue: “Narucue ecatsé jida, tatsé mique mereya tibu, tatse micue quisarati cueja juyaju”, jadyapa tunajatu bacacuare icuenetadya. Tumeque mere amena aatsu patu Pablo, Bernabé ecatsé Antioquiaju judirunucuaque. ²⁷ Tuhua Antioquiaju judirutsu tatse-

jatu sitacuare Jesús queja ecatyati cuanaque. Pablora tuna cuejacuare dutya tatse eque Yusura eje bucha ahua cuanaque:

—Yusura yatse tsahuachine dyaque yatse Jesúsja quisarati cueja juyaju. Yusuja jadya inime juya tibusu jetiama israelita ama cuanaque Jesús queja catyatichine tuja quisarati bacatsu, —jadya tuna Pablora cuejacuare.

²⁸ Pablo, Bernabé ecatsatu anidirucuaré tuhua tsunuda Jesús queja ecatyati cuana queja.

Jesús queja ecatyati cuanaque naruqui cuanaque Jerusalénju casitaticuareque

15 Tume patyatu umae ecuita cuana judirucuaré Judea yahua juque Antioquiaju. Judirutsu tunajatu Jesús queja ecatyati cuanaque cuejatibunecuaré:

—Berutu Moisésra cacuatsashati iyacuare israelita deca nana cuana ecuita huitu biti catubuti ishu Yusu jaque jadya adeba ishu. Yusu queja ni micuana judirucara juya, catubumeretitaquidya micuana, arepa micuana israelita cuana ama juya ama bucha. Catubutiya ama ni micuana, Yusura micuana Ijahua quejaque inajacamerebuque ama, —jadya tunajatu ecana cuejacuare.

² Jadya bacatsutu Pablo, Bernabé jadyara acuaré ecuita cuana:

—Yuneri ama tuque; neejeneume ecana, —jadya tatsejatu ecana acuaré.

Caquemitsati caquemitsati tatse jucuaré Judeaju cuana tsehue. Tuna dutya cati cati juyajutu Antioquiaju cuanaque baecua jari jucuaré ecuita huitu biti catubutitaquique, jadya ama juatsu catubitaqui ama jadicque.

—Necuadishara eje uma ecuita Jerusalénju inime bajeje ishu. Jesúsja ecuadisha cuana tsehue ecana tuhua paquisaratiti. Emuiba cuana tsehue ecana paquisaratiti, —jadya tuna jucuaré.

Jadya quisarati aatsu tunajatu mepecuaré Pablo, Bernabé, umae peya cuana jadya.

³ Jesús queja ecatyati cuanara cuadishaya cuanaque tuna Antioquia juque cuacuare. Cuayaque tuna cueticuaré Fenicia, Samaria yahua ecatsé eque. Cuayaque tuna epu cuanaju junatitsu Jesús queja ecatyati cuana tsehue caradatiacuaré.

—Jetiama israelita ama cuanaratu amena ejenejacachine tunara icuene ejenehua cuanaque. Jetiama tuna Jesús queja catyatichine, —jadya tunajatu ecana cuejaacuaré.

Jadya bacatsutu Feniciaju cuanaque, Samariaju cuanaque jadya dyaque pureama jucuaré. ⁴ Cuadishataya cuanaque Jerusalénju junatihua jutu Jesús queja ecatyati cuanaque naruquirá ecana jida batsacuare. Jesúsja ecuadisha cuanara, emuiba cuanara jadya ecana jida batsacuare. Pablora tuna cuejacuare Yusura tuna eque dutya ahuaque. ⁵ Umae fariseo cuana tuhua jucuaré cuanaque tuna quisarati ishu netitsuracuare. Tuna tuna Jesús queja ecatyati cuanaque jucuaré, arepa fariseo cuana ama bucha.

—Israelita ama cuanaque Jesús queja catyatitsu tuna Moisésra ecuaña dutya cacuatsashati cuana iyahua eque anitaqui. Ecuaña baedya tuna ecuita huitu biti catubumeretitaqui, Yusu jaque jadicque adebataqui juishu. Jadya tuque ecuanaja ecana bahuityataqui, —jadya tuna quisaraticuaré.

Jadya eque tunajatu Pablora inime tupuya bucha ama inime tupucuaré.

⁶ Tümetu Jesúsja ecuadisha cuanara casitaticuarecuare Jesús queja ecatyati cuanaque naruqui cuanaque, riyaque inime bajeje ishu.

—¿Israelita ama cuanaque tuna ecuita huitu biti catubutitaqui, aijama ni taa? —jadya tuna cabacaduraticuaré.

⁷ Tsunuda tunajatu tumeque quisarati acuaré dutyara tupu inime tupu ishu. Tuequedyatu chamacama Pedro netitsuracuare quisarati ishu:

—Ique amena beru Yusuja emepeque israelita ama cuanaque Yusu queja judiru ishuque quisarati cueja jucuaré. Micuanaratu adebayadya riyaque. Turatu Jesúsja quisarati bacamerecara aya. Tura tuna Jesús queja catyatishacara aya. ⁸ Yusuratu dutyaja inime tupu adebaya. Israelita ama cuana queja tujatu tuja Espiritu cuitadya cuadishahua, ecuaña queja cuadishahua bucha. Jadya bamereé tujatu ahua tuna dyadi Jesús queja catyati ishu. ⁹ Yusuratu dutya tupu baya, israelita cuana, israelita ama cuana tsehue. Tuna Jesús queja catyatiyaju tujatu ecana ecuanaja jucha cuana tillahua bae tillaedya aya. ¹⁰ Yusura tujaque amerehua tibu ¿eje bucha juatsu jatsu tuque micuanara tura ahuaque yuamaturacara aya? Ecuanaja baba cuanaratu eje bucha ataqui ama bahua dutya cacuatsashati cuana ehue eque juishu. Iyacuatu ecuanara eje bucha ataqui ama neridya baya dutya cacuatsashati eque. Tume jatsu tuque micuana ¿eje bucha juatsu israelita ama cuanaquetu dutya cacuatsashati eque anitaqui jadya aya, ecuaña israelita cuanaradya eje bucha ataqui ama bayaque? Riyaque tu micuanara cuitadya ai dyaque bicuedaque abumereya buchique.

¹¹ Yusura ecuaña tsujema inajacamere aya Ecuaña Cacuatsashaqui queja catyatitsu eque, ecuaña israelita cuana, tumebaedya israelita ama cuanaque, —jadya tuna Pedrora cuejacuare.

¹² Tume tuna dutya abacatanacuare. Tuequedyatu Pablo, Bernabé ecatsera casitatihua cuanaque isaracuare:

—Yusura yatse cuadishahua Yusu queja judiru ishuque quisarati israelita ama cuanaque cueja ishu. Yatse equetu casa cabameretihua israelita ama cuana ducu, —jadya tatsejatu ecana acuaré.

¹³ Santiagoratu tatse tsehue tupupeé inime acuaré. Tatse tsehue quisarati amena juatsu tujatu tuhua cuanaque isaratibunecuaré:

—Tata ecana, nebacacue ique. ¹⁴ Bacahuadya micuanara Simón Pedrora cuejahuaque. Butseejupa Yusu cabameretichine tuja jidaque israelita ama cuana queja. Cuejahua tura ecuaña, israelita ama cuanaquepa amena Yusuja jutaqui, Jesús queja catyatiya cuanaque.

¹⁵ Jadyatu Yusura ahua, béru tuque eque quisarati cuejaqui cuanara jadya tujatu adadiya jadya acuareque. Ehuenedya tu Yusuja quisarati:

¹⁶ “Ique Yusu.

Junanucabuque ique micuana queja.

Arepa David eque ejuracana cuanara jacacuare ama bucha tuna eaqueja nimee amerenucabuque.

Camuimeretinucabuque ique.

Ecue inime eque tuna anishanucabuque.

Etare erihuitereque era yudijidya nityatsuranuca aya buchatu jubuque.

¹⁷ Jadya tuna abuque dutya queja cuanaque eaqueja catyati ishu, israelita ama cuanaque eaqueja catyati ishu.

Dutyá israelita ama cuanaque era ihuarahuaquetu ecuique jubuque.

¹⁸ Ique Micuana Cuatsashaquique juya tibu, riyaque micuana bahue amerehua.

Béru yuequedyá rique ecue inime jadique ejitaju ahua”,

jadyatu Yusura quisarati iyahua tuja quisarati cuejaqui cuana eque.

¹⁹ Santiagora jadya cuejanucacuare:

—Ecue inime tupu tu riyá cuanaque. Israelita ama cuanaque tuna Jesús queja catyatihua. Beruque quejeneti cuana tunajatu amena iyahua. Tupupe tupupe ecana inime netupumerera ama. Casada tsehue ecana Moisésja cacuatsashati eque anishacara neara ama.

²⁰ Quirica eque ecana jadya juishuque cuita camadya necuejara: “Nearaume erami yusu cueya cueya cuanaja yacuaju iyahuaque. Micuanaja caquemitiqueremaque nejaraquereume. Nearaume erami cuanubi, uu jadya pana sucucurusha ami amaque. Neijiume ami”.

Riyaque cuita camadya ecana necuejara. ²¹ Béru yuequedyatu canajara huecaca cuanaju Moisésja cacuatsashati cuana isaratanahua caradati ishucue etare cuanaju. Dutyá epu cuanajutu aniya ejeque tumeque cacuatsashati bahuitya juya cuanaque. Jutaquiju israelita cuana ecahuitishau tibu, israelita ama cuanajatu ataquí riyá era cuejahua cuanaque, —jadya tuna Santiagora cuejacuare.

Israelita ama cuanaja Jesús queja ecatyati cuanaja quirica cuadishatanacuareque

²² Jesúsja ecuadisha cuanara, emuiba cuanara jadya tunajatu jida bacuare Santiagora cuejahuaque, tumbaedyá Jesús queja dutya umae ecatyati cuanara. Tumetu enaruqui cuanara huenequere quirica Antioquiáju Jesús queja ecatyati cuanaja ishu. Mepecuare tunajatu Judas, Silas jadya quirica duju ishu. Betadya tatse ecuita dyaque inime metseque ecatsé jucuaré. Judasjatu peya ebacani anicuare “Barsabás”. Tatse tunajatu cuadishacuare Pablo, Bernabé jadya tajira tuhuaque dirunucayaju. ²³ Tuna tsehue tunajatu quirica cuadishacuare. Jadya tunajatu huenequere:

“Ecuánara rique micuanaja riyaque quirica cuadishaya, ecuana Ecuadisha cuanara, Jesús queja ecatyati cuanaque naruqui cuanara, tumbaedyá

dutyá tuaqueja ecatyati juhua cuanara jadya. Isaramereya micuana ecuanara israelita ama cuanaque ecuaña tsehuequi cuanaque. Micuana Antioquiáju, Siriaju, Ciliciaju cuanaque micuana ecuanara isaramereya. ²⁴ Riya cuitari ejeque cuana cuachine micuana queja. Ecuánara cuatsashayaju ama rena cuachine. Tupupe tupupe tunara micuana inime amerechine. Adebataqui ama tuque micuana bachine tunara cuejachineque. ‘Yusu queja judirucara juatsu micuana ecuita huitu bití catubumeretitaquí israelita cuana bucha. Moisésja cacuatsashati eque cuita micuana anitaquidya’ jadya tunara micuana cuejatichine. ²⁵ Jadya bahue juatsu ecuaña casitatichine riyaque inime bajeje ishu, dutyáju tupu ecuanaja inime juishu. Amena tuque ecuaña beta ecuita mepeya micuana queja cuadisha ishu. Pablo, Bernabé ecatsé tsehue tatse cuaya. Ecuánaja iyuhueda ecatsé tsehue. ²⁶ Umada cuautu Bernabé, Pablo jucuaré tuhua eiyetauju, muda aniyaju, Ecuana Cuatsashaquí Jesucristoja quisarati cuejara.

²⁷ Cuadishaya tuque ecuanara ecatsé Judas, Silas jadya. Tatsera micuana pana cueja atiyá dutyá ecuanara inime tupuchine cuanaque, rehua quiricaju ecuanara huenehuaque. ²⁸ Ecuánara ni Yusuja Espiritura micuana amerecarama aya dyaque ibeda cuitaque. Micuanajatu ataquí riyá cuanaque cuita camadya: ²⁹ Nearaume erami yusu cueya cueya cuanaja yacuaju iyahuaque. Neijiume ami. Nearaume erami cuanubi, uu jadya pana sucucurusha ami amaque. Micuanaja caquemitiqueremaque nejaraquereume. Jadya camadya micuana ecuanara cuejaya. Riya cuanaque cacuatsashati eque ni micuana aniya, tume micuana jida juya. Dutyá micuanaja jida pajuaje. Riya tupu camadya”.

Jadya Jerusalénju Jesús queja ecatyati cuanaque naruqui cuanara quirica huenequere israelita ama cuanaja ishu.

³⁰ Cuadishatahua cuanaratu quirica Antioquiáju duju cuare. Tuhua junatitsu tunajatu radacuare Jesús queja dutyá ecatyati cuanaque. Tyacuare tuna quirica.

³¹ Jesús queja ecatyati cuanaque naruqui cuanaratu etsuri jebuda tsehue isaracuare dutyáju baca ishu. Jadya bacatsutu dutyá dyaque pureama jucuaré. Dyaquepa tuna cacasaticuare Jerusalénju cuanara cuejahua cabatitsu. ³² Judas, Silas jadya tatse Yusu equeque cuitadya quisarati cuejaquiquedyá jucuaré. Tatsera Jesúsja quisarati cuejahua jutu Jesús queja ecatyati cuanaque cacasaticuare. Tatsera tuna nime casaturacuare. ³³ Tuhua tatse aniticuare eje uma huecaca cuana. Jadya juatsu tatse Jesús queja ecatyati cuanara isarayaque jadya acuare:

—Yusura nenarucue metse diruyaju, —jadya tunajatu ecatsé acuare.

Tatse cuadishaquí cuana queja judirunuca ishu tatse yudijidya judirunuca jucuaré. ³⁴ Silastu anicara datse jucuaré.

³⁵ Pablo, Bernabé jadya tatse anicuare jari Antioquiaju. Tatsera tuna cuejacuare jari quisarati Ecuana Cuatsashaquique eje buchique. Peya cuana tsehue bahuityapeedyata tatsejatu acuare tuja quisarati.

Pablo, Bernabé tsehue cajacaticuareque

³⁶ Eje uma huecaca junucatsutu Pablora jadya acuare Bernabé:

—Necuanuca Jesús queja catyaticuare cuanaque casaturara icuene yatse epu cuanaju junenicuare cuanaju. Bahue jucara juya tuna tuaqueja nimeedyata jari eje buchique, —jadya tujatu acuare.

³⁷ Bernaberatu dujucara ebari datse acuare Juan Marcos. ³⁸ Pablora bacue dujucarama acuare.

—Aijama, cuataqui amatu yatse tsehue. Icuene tura yatse jacacuare Panfiliaju. Merenucacarama tujatu Yusu acuare, —jadyatu Pablora Bernabé acuare.

³⁹ Arepa tatse cuinetse cuitadya dyaque quisaraticuare ama buchatu eje bucha bajejetaqui ama inime jucuare. Jadya tibudya tatse cajacaticuare. Bernaberatu dujucarama Marcos. Ebuteju junatitsu tatse anibutenaticuare cuaba ebariju. Cuacuare tatse Chipreju.

Cuabeta ishuh Pablo Jesúsja quisarati cuejara cuanucacuareque

⁴⁰ Pablora Silas mepecuare tuja etajiqui juishu. Tatse cuama jarijutu Jesús queja ecatyati cuanaque Antioquiaju cuanaque Yusu tsehue quisaraticuare tatseja ishuh:

—Tata, narucue micue iyuhue tsehue micue mere puji ecate, —jadya tunajatu Yusu bacacuare.

Yusu tsehue quisarati amena juatsu tatse cuacuare Pablo, Silas jadya. ⁴¹ Cueticuare tatse Siria, Cilicia jadya eque. Casaturaajecuar tatse Jesús queja ecatyati cuanaque.

16 Pablo, Silas jadya tatse yudijidya judirunuca jucuar Derbe, Listra jadyaju. Listrajutu anicuare Jesús queja ecatyatique Timoteo bacani. Tuja ecuaquetu israelita jucuar, Jesús queja ecatyatiquedyata. Tuja etataque bacue israelita ama jucuar, griego. ² Listraju, Iconioju cuanaque Jesús queja ecatyati cuanaratu jida quisarati acuare Timoteoja ishuh. ³ Pablora Timoteo tuque tajiqui datse dujucara acuare. Jadya ama buchatu Timoteo ecuita huitu biti catubumeretima jucuar, tuja etataque israelita ama jucuar tibu. Tumetu tuna tsehue cuama jarijudya Pablora tubumerecuare israelita cuanaja bahue. Jadya tujatu amerecuare, tuna cuayaque epuju jetiama israelita cuana anicuare tibu. Tume cuanaratu pana adeba acuare Timoteo griego jabacuaque. ⁴ Jadya juatsutu Pablo, Silas, Timoteo jadya Listraju jetiama epu cuana eque cuetiajecuar. Isaracuare tunajatu quirica Jerusalén eque cuadishayaque ecatyati cuanaja huaraji cuana, emuiba cuanaque patya netitsu. ⁵ Tumetu Jesús queja ecatyati cuanaque cabahuityatiajecuaredya jutidya Yusu pureamatura. Umanaajecualedya jutidyatu Jesús queja ecatyati cuanaque.

Pablora Macedonia juque ecuita tahuiju bucha bacuareque

⁶ Yusuja Espirituratu Pablo, Silas, Timoteo jadya cuejamerecarama acuare quisarati Asia yahuaju. Jadya tibu tuna cuacuare Frigia, Galacia jadyaju camadya.

⁷ Junaticuare tuna Misia yahua jiruru. Bitinia yahuaju tuna cuacara datse jucuar. Jadya ama bucha tuna Jesúsja Espiritura tuhua cuejamerecarama acuare.

⁸ Tume tuna tuyu cueti Misia eque jucuar. Junaticuare ecana ebute Troas bacaniju epuju. ⁹ Tuhuatu Pablora tahuiju bucha bacuare ecuita netiyaju. Tumequetu jucuar Macedonia juque.

—Carequetique Macedoniaju. Tsahuaticue ecua, —jadya tujatu Pablo acuare tahuiju.

¹⁰ Tume patya ique Lucas tuhudya jucuar Pablo tsehue Troasju. Yume cabajejetidya ecua jucuar Macedoniaju cuaishu, Pablo jadya tahuiju. Pana caadebati ecua jucuar Yusura cuitadya ecua tuhua cuadishayaque jidaque quisarati Jesús eje buchique cueja ishuh.

Lidia Jesús queja catyaticuareque

¹¹ Cuinanacuare ecua Troas juque cuaba ebari eque. Tume tuyu cuau ecua jucuar ecububu ebari Samotracia bacaniju. Peya huecaca ecua judirucuar Neápolis epuju. ¹² Tuequedyata ecua Filiposju cuacuare. Tuhuatu anicuare jetiama ecuita cuana epu ebari Roma juque ejueti cuanaque. Filipos tu epu dyaque aridaque jucuar Macedonia yahuaju. Tuhua ecua tsunuda huecaca ama netinaticuare. ¹³ Canajara huecacaju ecua cuacuare cueri jiruru queja israelita cuana Yusu tsehue quisarati bahueju. Tuhua ecua tuna tsehue caradaticuare. Eje uma epuna cuanatu tuhua ecaradati jucuar. Cuejacuar ecana ecuanara jidaque quisarati Jesús eje buchique. ¹⁴ Tuhuatu anicuare epuna Lidia bacani. Tuquetu jucuar Tiataraju aniyaque. Tumeque epunatu ejutuqui sehuesahuau tsuje aridaque catyati puji jucuar. Yusu muiquitu jucuar. Quisarati bahuetu jucuar Yusu tsehue. Bacacuare tujatu jida inime tsehue Pablora cuejayaque, Yusura pana bacamere aya tibu. Pana baca aatsutu Jesús queja catyaticuare. ¹⁵ Cutsamereticuare tuque, Jesús queja catyatihua jadique ejitaju juishu. Tumebaedya tuja etareju cuanaque cutsamereticuaredya. Jadya juatsu tura ecua amena bacacuare: —Micuanara ni ique Ecua Cuatsashaqui queja ecatyatique ejeneya, nenubicue rehua ecue etareju, —jadya tura ecua acuare.

Tura jadya ahuaju ecua tuja etareju anibacuare Filiposju anibacuare jari tupu.

Pablo, Silas tsehue Filiposju etare apudaju ishatanacuareque

¹⁶ Ecua Filiposju jarira tuque ecua epuna ehue ebari ijahua cuanara quijahuatishayaque banaticuare. Ecua cuana Yusu tsehue quisarati bahueju cuayara

tuque ecuana banaticuare. Tumeque ijahuaja casa equetu tuja casa anicuare eje bucha judadiyaque cueja ishu. Tura chipiru inayaquetu tuque metse cuanaja ishu jucuare, tuque metsequique jucuare tibu.

¹⁷ Tumeque epuna ehue ebarira ecuana tupujudya aajecuare. Quiqueajecuetu ecuana tupuju:

—Riyaque ecuita cuana rena Yusu merequi cuanaque. Yusu barepaju aniyaque renajari mereya. Ecuana Yusu queja eje bucha judirue juishuque quisarati cuejaqui cuana rena, —jadyatu epuna ehue ebari jebuda quiqueajecuare.

¹⁸ Jadyatu tumeque epuna dutya huecacadya jutidya jucuare. Amenatu Pablo ecahuaiti jipenee cuita jucuare. Jadya bacahuillatsu tujatu tibene bajiyu acuare epuna ehue ebari. Tume tujatu ijahua acuare:

—Jesúsja ebacaniju mique jadya aya. Tumeque epuna quejaque cuinanacue; jacacue tumeque epuna.

Pablora jadya cuinanashayajutu ijahuara pana jaca acuare. ¹⁹ Tumeque epuna ijahuara jacahua baatsutu epuna ehue ebari metse cuanaque dyaque cahuaiticuare Pablo, Silas jadya tsehue.

—Amena tujatu cuejanime ama eje bucha judadiyaque, tumeque ijahuara jacahua tibu. Amena tujatu chipiru inajacahua ecuanaja ishu, —jadya tunajatu inime tupucuare.

Jadya juhuaju tunajatu Pablo, Silas ecitse inamerecuare. Inameretsu tunajatu ecitse dujumerecuare ecuita cuana tarepe jubahueju huaraji cuana queja.

²⁰ Inime bajeje puji cuana queja tunajatu bamereticuare.

—Riyaque ecuita ecitse ri israelita ecitse. Retserari bape bape inime tupumereya ecuanaja epuju cuanaque. ²¹ Tatsera ecuana bahuityacara aya tatseja bahuequedya jutidya. Tuyu ama tu ecuana peya yahuaju cuanaja bahue eque juishu. Tatsera amereya eque ecuana jutaqui ama, ecuana ecuana Roma juque enaruqira cuatsashaya eque camadya juya, —jadya tunajatu ecanacuare.

²² Tume tuna dutya tuhua jucuare cuanaque dyaque cahuaiticuare Pablo, Silas jadya tsehue. Tume tatse huaraji cuanara tacamerecuare tatsera jutuyaque. Tacameretsu tunajatu ecitse catsa catsa amerecuare acui tsehue. ²³ Catsa amena au jadya aatsu tunajatu ecitse ishamerecuare etare apudaju.

—Pana naru bacue ecitse neacue ecuinanaju, —jadya tunajatu etare apuda naruquique cuatsashacuare.

²⁴ Jadya bacatsu tujatu ecitse nudycuare yuqueja educuju cuita. Tume tujatu ecitse pana calla cuita ehuchi ecitse acuare cepuju, tatse ehuanaju.

²⁵ Metapatyatu Pablo, Silas ecitse Yusu tsehue quisaraticuare. Jerucuare ecitse jida pureama tsehue Yusuja ishu. Tume peya cuana etare apudaju netiya cuanara tatse bacacuare jeruyaju. ²⁶ Tatse jadya juyajutu muya jutidya yahua bucucucuare. Dutya etare apudaju bucucucuare dudu cuana, esipi cuanaque jadya. Pacashatanacuare dutya eteriqui cuana. Eisha cuanaque risiqui ea cuanaquetu pana tibitanatere ju-

cuare. ²⁷ Jadya juyajutu etare apuda naruquique cabaticuare. Cabatitsu tujatu bacuare eteriqui cuana epacashatanatere. Jadya baatsu tujatu inacuare tuja cuchiru cuerudaque tuta taca quiyeti juishu.

Quiyeticaratu jucuare, etare apudaju eisha cuanaque huanaterehua bucha baatsu. ²⁸ Amena quiyeticara cuita juyajutu Pablo jebuda quiquecuare:

—Quiyetiume! Riyadya ecuana dutyadya. Ni ejeque buchique ecuana huanahua ama, —jadya tujatu acuare.

²⁹ Tumetu etare apuda naruqira ude bacacuare. Ude tyahuajutu ude inatsu nubiticuare. Tsajaja nubitutu jucuare Pablo, Silas jadya queja. Tadadaya jadyatu jucuare bajida juatsu. Nuyucuaretu tatseja yacuaju.

³⁰ Jadya juatsu tujatu ecitse dujucuare etare apuda juque. Tuja etarejudya tujatu ecitse dujucuare.

—Tata ecitse, ¿eje bucha ejuu Yusu queja judiru ishu? —jadya tujatu ecitse bacaduracuare.

³¹ —Yusu queja judiru ishu Ecuana Cuatsashaqui Jesús queja catyaticue dutya micue etareju aniya cuana tsehue, —jadya tatsejatu cuejacuare.

³² Cuejacuare tatsejatu tumeque ecuita Jesúsja quisarati, tumebaedya tuja etareju aniya cuanaque jadya.

³³ Arepa metapatya juya ama bucha tatse etare apuda naruqira cuinanaqueretsu utsacuare acui tsehue catsacatsa ayaque pucucushahua cuanaque. Tuhua dutya tuja etareju aniya cuana tsehuetu cutsamereticuare, Jesús queja catyatihuaque jadique ejitaju juishu.

³⁴ Jadya juatsu tujatu ecitse nubiquerenuacuare Pablo, Silas jadya tuja etareju, tatse mihua ishu. Tuja etareju cuana tsehuetu pureama jucuare, Jesús queja catyatihua cabatitsu.

³⁵ Huecacatsu apudajudya cuitatu huaraji cuanara cuadishacuare sudaru cuana etare apuda naruqui queja.

—Inajacacue jeeque beta ecuita ecitse. Cuinanashacue ecitse etare apuda juque, —jadya tunajatu ecanacuamerecuare. ³⁶ Sudaru cuanaratu cuejaticuare etare apuda naruquique huaraji cuanara cuejamerehuaque. Jadya cuejamerehuaju tujatu Pablo, Silas jadya cuejaticuare:

—Huaraji cuanara cuadishahua metse inajacamere ishu. Necuinanacue amena. Yusura nenarucue metse eju judiruyaju, —jadya tujatu ecitse aticuare.

³⁷ Pablotu etehua inajacatacarama jucuare. Tume tujatu sudaru cuana cuejacuare:

—Jida yatse nebacue. Romaju cuanaque ebau bucha bae yatse neaacue, quirica yatseja tuhuaque enaruquija ehuenecue aniya tibu. Roma juque enaruqira cuatsashaya equedya yatse juya. Dutyara petayaju yatse catsacatsa atanachine. Tunara yatse inime cuana bajejequi cuanaja yacuaju quicueneti ishu emajaca tyachine ama. Yuneridya ni yatse inime metse, inime metse ama jadique baecuaque tunara yatse etare apudaju ishamerechine. Iyacia tunara yatse etehua inajacamere acara aya. ¶Jadya tuna jutaqui ama! Huaraji cuitadyatu jetaqui yatse dutyaja yatucaju inajacana ishu, —jadyatu Pablora sudaru cuana atsacuare.

³⁸ Jadya atsayajutu sudaru cuana masadama yudijidya dirunuca jucua huaraji cuana queja. Cuejadirucua tunajatu eana Pablora quisarati ahuaque.

—Tumeque ecuita ecitseja patu aniya quirica cuana enaruqui Roma juque ebacani equiyatique. Tura cuatsashaya equedyapa tatse juya, —jadya tunajatu eana cuejadirucua.

Huaraji cuanatu dyaque bajida jucua, tatseja quirica cuana enaruqui dyaque aridaque Romajuja ebacani ehuenque aniya jadya bacatsu. ³⁹ Tume tuna cuacuare etare apudaju. Canerecatiticua tuna Pablo, Silas ecitse queja tatseja eana nrecaba ishu:

—Nenerecabacue ecua. Ecua jucha metse jadya neaume, —jadya tunajatu ecitse aticua.

Cuinanashaticua tunajatu ecitse etare apudaju.

—Necuinanacue riyaque epu ebari juque, —jadya tunajatu ecitse acua.

⁴⁰ Etare apudaju juque cuinanatsu tatse cuacuare Lidia etareju. Tuhua tatse quisaratiticua Jesús queja ecatyati cuana tsehue. Casaturaticua tatsejatu eana. Tuna casaturadiru jadya juatsu tatse dirucua epu juque.

Pablo, Silas tsehue Tesalonicaju cuacuareque

17 Filipos juque cuinanatsutu Pablo, Silas ecitse cuacuare Anfipolisju, tuequedya Apolonijaju. Tuequedya ecitse judirucua Tesalonicaju. Tuhuat anicua israelita cuanaja caradati ishuque etare.

² Dutya canajara huecacaju tatse cuau cuau jucua. Quimisha canajara huecacajutu Pablora ecuita cuana Yusuja quisarati ehuenque bahuityacua. ³ Cuejacuaretu eana Yusuja quisarati Mesías eje buchique ehuenque:

—Beru yuequedyatu Yusu equeque quisarati cuejaqui cuanara huenucua Mesías canerecatidibuque. “Majudadiya tuque. Majutsutu chachanetitsuranucabuque”, jadya tuna jucua. Jadyatu judadicua Jesús Nazaret juque tunara icueta huene acua bae cuitadya. Tudy micuana era cuejaya. Tumeque Jesúsdy tu Mesías, Yusuja Emepeque, —jadya tujatu eana acua.

⁴ Jadya ayaju bacatsutu umae israelita cuana Jesús queja catyaticua. Tuaequeja catyatsutu tuna Pablo, Silas ecitse tsehue junenicua. Tsahuatsahuanicua tunajatu ecitse. Tumebaedya eana catyaticua Jesús queja umada griego cuana Yusu Neri muiqui cuanaque. Tumebaedya umada epuna cuana inime metse cuanaque tuna Jesús queja catyaticua. ⁵ Israelita cuana tuaqueja catyatiya ama cuanaque tuna dyaque cahuaicua Pablo ecitse tsehue. Cahuaicua tuna, umada tunaja ata cuana Jesús queja catyatihua baatsu. Sitacua tuna jidama, dyai usi cuanaque ni aishu bucha jida ama cuanaque. Casitatishatsu tuna jidama quisaratishacua Pablo, Silas ecitse ishu, tuna tumebaedya tatse tsehue cahuaicua ishu. Sicaturacua tuna ecuita cuana. Dutya jujeri tumeque epuju aniya cuanaque tuna tatse tsehue cahuaicua. Jasónja

etareju tuna Pablo, Silas ecitse sareticua, tatse cuinanasha ishu. Inacara tunajatu ecitse acua ecuita cuanaja yacuaju duju jidama amere jadya aishu.

⁶ Dadicua ama tunajatu ecitse tuhua. Tume tunajatu inacua Jasón. Tumebaedya tuna inacua peya cuana Jesús queja ecatyati cuanaque tuhua jucua cuanaque. Inatsu tunajatu huaraji cuanaja yacuaju duju cuare. Quiquecua eana:

—Pablo, Silas ecitse tu ecuita cuana yuamaturaque! Epu cuana tupu tatse juneniya dutya queja cuanaque yuamatura juyaque. Iyacu retse ecuanaja epuju tumebaedya junachine. ⁷ Jasónra tatse tuja etareju nudyatsachine. Tatse tatse Roma juque enaruquir cuatsashaya eque ama juya. César patu ecuatshaque neri ama. Peya patu aniya, Jesús baci, jadya tatse juya, —jadya tunajatu epu juque huaraji cuana acua.

⁸ Jadya bacatsutu ecuita cuanara, huaraji cuanara dyaque jidama inime bacua. Dyaque ecahuaiti tuna jucua. ⁹ Jasón queja, peya cuana queja jadya tuna chipiru catyamereticua.

—Necuinanashacua Pablo, Silas jadya ecuanaja epu juque. Tatse cuinanahuaju piisi micuana ecuanara micuanaja chipiru tyanucaya, —jadya tunajatu eana acua.

Jasónra, peya cuanara jadya chipiru tsehue tsujetyahuaju tunajatu eana inajacua.

Pablo, Silas jadya Bereaju cuacuareque

¹⁰ Huaraji cuana Pablo, Silas jadya tsehue dyaque ecahuaiti baatsu tunajatu ecitse masadama tumeque chineju cuitadya Jesús queja ecatyati cuanara epu juque huanashacua. Betadya tatse yume diru jucua Berea queja amaca. Tuhua judirutsu tatse cuacuare israelita cuanaja caradati ishuque etareju.

¹¹ Tuhua cuanaquetu Pablora Jesúsja quisarati bahuityacua. Bereaju cuanaque tuna Tesalonicaju cuanaque bae ama jucua. Bacacama ama tunajatu Pablora bahuityayaque acua. Bacacara ebaridya jutidya tuna acua. Dutya huecaca tuna isaracua Yusuja quisarati, eje yuneri ri Pablo, Silas jadya quisaratiya jadique adeba ishu. ¹² Yusuja quisarati isaratsu, Pablora cuejayaque bacatsu tuna jetiama israelita cuana Jesús queja catyaticua. Tumebaedya griego cuana umada catyaticua tuaqueja. Epuna inime metse cuanaque, deca griego cuana jadya tuna jadya jucua.

¹³ Israelita cuana Tesalonicaju aniya cuanaratu bacua Pablo Bereaju Jesúsja quisarati cueja juyaque. Tume bahue juatsu tuna tuhua cuacuare. Junatitsu tunajatu eana capuritishanicua. ¹⁴ Jesús queja ecatyati cuanaratu Pablo masadama tsahuacua tuhuaque cuinana ishu. Ena jiruru queja tunajatu duju cuare. Silas, Timoteo ecatsutu Pablo tsehue dirupe ama jucua. Bereaju tatse anicua jari. ¹⁵ Tuque huanayaju tsahuacua jucua cuanaratu Pablo Atenasju duju cuare. Tuna Atenas juque cuinanama jariju,

—Necuejacue Silas, Timoteo ebajarara ecatsé paju. Pacatsuruti ecuana Atenasju, —jadya tuna Pablora cuejamerecuare.

Riyaque quisarati tatse cuejamereyaque cuejahuaju tuna dirunucacuare.

Pablora Jesúsja quisarati cuejacuareque

¹⁶ Pablota Silas, Timoteo jadya Atenasju ihua jucuare. Atenas epu ebariju dutyajupa tunajatu umada cueya cueya cuana neticuaire. Jadya baatsutu Pablo dyaque capeya inimeticuaire, ecuita cuanara peadyaque Yusu Neri ama muiya baatsu. ¹⁷ Dutya huecacatu tumeque epu ebariju cuana tsehue quisaraticuaire. Caradati ishuque etare cuanajutu quisaraticuaire israelita cuana tsehue, tumbaedyá israelita ama cuana Yusu Neri muiqui cuana tsehue. Dutya huecaca quisaraticuaire ecuita cuana tarepe bahueju tura tuhua tsuruya cuana tsehue. ¹⁸ Anicuairetu umae dyaque iyuca jararada cuanaque. Epicúreo cuana, estoico cuana jadya tunajatu ebanani jucuare. Pablo tsehue tuna caquemitsatijacama jucuare. Tumeque iyuca jararada cuanaque tuna quisaraticuaire tuna cama Pablo eje buchique:

—¿Ai quisaratitu aya tume bahuepa ejuu jadyara? Tuquetu adebayaque ama quisaratiya, —jadyatu umae jucuare.

—Quisarati bahue jiu taa tuque. Peya Yusu ecuanara adebayaque ama cuejacara aya bucha cuita tuque, —jadyatu peya cuana jucuare.

Jadya tuna jucuare, Pablora Jesús eje buchique quisarati ayajudya jutidya bacatsu. “Riyaque Jesússtu emajuque chacha netitsuranucacuare”, jadique quisaratitu tura ajacacuare ama. ¹⁹ Tumetu Pablo bahue cuanara dujucuare tuna eje bucha inime iyacua cuanaque quisarati ishu casitati bahueju. Tumequedyatu Areópago bacani jucuare. Tuhua tunajatu bacaduracuare:

—¿Ai tu tumeque mira iyacuaque bahuityayaque? Cuejacue ecuana. ²⁰ Mira bahuityayaque tu bape iyacuaque. Ecuana jatu bacama neri mira cuejayaque. Pana cueja ecuana acue tumeque quisarati eje buchique jadya, —jadya tunajatu acuare.

²¹ Atenasju anicuaire cuanaratu bacacaradya jutidya acuare ejeque iyacuaque bahuityayaque. Tumbaedyá peya yahuaju cuanara tuhuaque junaya cuanara bacacaradya jutidya tunajatu ai iyacuaque acuare. Dutya jujeri tuna ai iyacuaque cueja bahuitya jadya camadya jucuare. Jetiama ecuitatu tuhua Areopagoju jucuare, dyaque bahue cuanaque camadya ama, tumbaedyá dutya tumeque epu ebariju cuanaque. ²² Tumetu Pablo netitsuranucuaire tunaja yacuaju Areopagoju tuna isara ishu:

—Tata ecana Atenasju cuanaque, isaraya micuana era. Nebacacue ique. Dyaque cuita cueya cueya ea cuanaque micuanaja epu ebariju baatsu, bahue ique micuanara dyaque yusu cuanaju inime tupuqui ayaque. ²³ Ique cueya cueya cuana petapetani juhua. Bahua tuque micuanara eju muiyaju. Bajiyutsu tuque bahua peadya tumu ebari riyaque quisarati ehuenecue: “Riyaque ri ecuanara Yusu adebayaque

ama mui ishuque”. Yuneridyatu aniya peadya Yusu micuanara adebayaque ama, Yusu Neri. Riyaque Yusu micuanara adebayaque ama muiyaquedyá micuana cuejacara aya. ²⁴ Tumeque Yusratu iyacuare riyaque yahua, dutya rehua aniya cuanaque jadya. Tuquetu barepa, yahua jadya metseque. Tuquetu aijama ama ni ejeque etare caca ecuitaja eaju. ²⁵ Ecuana ni tu eje bucha tsahuae ama tuque. Turatu ni ai buchique sareya ama. Dutyatu tuja aniya. Tura cuitadya ecuana anishaya. Tura cuitadya ecuana ujejedama, jida jadya amereya. Tura ecuana tyaya dutya ai ecuanara sareya cuanaque. ²⁶ Turatu iyametse ahua icueneque deca, icueneque epuna. Dutya quejatu anibareya Yusura icueneque ecuita yahua eque ejuracana cuanaque. Turatu iyabarehua emajaca peadya peadya cuareja ishu, peya cuana peya quejaque, peya cuana bacue peya quejaque jadya. Turatu iyabarehua ejeque badi, huecaca emajaca eju ecuana cuinanayaju cuinana ishu. ²⁷ Tura ecuana yahua dutya ecuana, ecuanaja tuque sare ishu, tuaqueja ecuana catyati ishu. Riyaque Yusu tuque ecuana japada ama baya. Yuneridya ni ecuana dadicara aya, dadiyadya tuque ecuanara.

²⁸ Chacha ecuana aniya, tura anishaya ademe. Ajeja, bucucuya jadya ecuana juya, peya queja peya queja, tura casa tyayaju. Tura ecuana casa tyaya dutya ecuanara ai acara ayaque aishu. “Dutyá ecuana Yusu jabacua cuana, tura ecuana yahua tibu”, jadyatu umae micuanaja yahuaju cuanara hueneacuare béru. ²⁹ Ecuana Yusu jabacua juya tibu, eje bucha juveni tuque ecuanaja Etata juma oro eaque, tumu, acui ea cuanaque. Eje bucha juveni tuque ecuanaja Etata juma cueya cueya ecuita cuanaja eaque, tunajadya jutidya inime tuputsu eaque. Yusu tu ainya jutidya ecuitaja ai ea tsehue beta tupu ama. ³⁰ Beru yuequedyatu Yusura inime tupuhua: “Adebaya ama jari tunara ique. Jadya tibu tuna jucha metse aya ama” jadya. Iyacuatu dutyaja emajaca aniya tuque adeba ishu. Jadya tujatu quisarati iyacuare: “Dutyá ecana inime pacacuareti, cajuchatijaca ishu”, jadyatu Yusu juya. Jadya equetu Yusura dutya quejaque tuaqueja nimee amerecara aya. ³¹ Turatu yahua huecaca dutya tuja yacuaju neticuina ishuque. Tumeque huecaca tura ecuana tuyu abucue ecuana peadya peadya eje bucha judadiyaque. Jadya tura ecuana adadiya tura casa yahua eque. Jesucristo eque tujatu jadya adadibuque. Tumeque Jesús majuhua jutu Yusura chacha nityatsuranucacuare. Jadya tujatu acuare, Jesússtu huaraji tuyuque jadique ejitaju amere ishu, —jadya tuna Pablora cuejacuare.

³² “Tumeque Jesús majuhua jutu Yusura chacha nityatsuranucacuare” jadya bacatsutu umae cuanara ejeneacuare ama. Ijaribacuare jutidya tunaja tuque. Peya cuanara bacue dyaquedyá jutidya bacacara acuare Pablora cuejacara ayaque.

—Peya huecaca ecuana cuejanucacue, —jadya tunajatu acuare.

³³ Tumetu Pablo tuna shanatsu Areópago juque dirucuaire. ³⁴ Umae cuanaratu tupujudya acuare, tuja quisarati cuejayaque bacacara aatsu. Tunadya tuna Jesús

queja catyaticuare. Peadyatu Dionisio bacani jucuaré. Tuquetu peya dyaque ecabahuityatiquedya jucuaré. Aeropagoju tujatu ecana bahuityajacacuare ama. Peadya epuna Dámaris tu Jesús queja catyaticuaredya. Tumbaedyá umada peya cuana catyaticuare tuaqueja.

Pablo Corintioju cuacuareque

18 Jadya juatsutu Pablo dirucuaré Atenas juque. Cuacuaretu epu ebari Corinto bacaniju. ² Tuhua tujatu tsurucuaré israelita Aquila bacani, Pontoju ecuinaaque. Ehuaneque tujatu Priscila bacani jucuaré. Icuenepa tatse Italia yahuaju anicuare Roma epu ebariju. Cuinanacuare tatse Roma juque, enaruqui Claudiora dutya israelita cuana pacuinana Roma juque jadya cuatsashahuaju. Butseeju Corintoju ejuetique tatse jucuaré. Pablora tatse baeticuare. ³ Aquilatu ebiti etare puji jucuaré, Pablo jucuaré baedyá. Jadya tibutu Pablo anicuare tatse tsehue mere juishu. ⁴ Dutya canajara huecacajutu Pablo cuacuare israelita cuanaja caradati ishuque etareju. Quisaraticuaretu israelita cuana tsehue, israelita ama cuana tsehue jadya. Adebamerecara tuna tura acuare Jesús Ecuana Inajacamerequique.

⁵ Silas, Timoteo ecatsetu dirunucacuare Macedonia juque. Dirunucatsu tatse judirucuaré Corintoju Pablo queja. Tatse judiruhajutu Pablo Jesúsja quisarati cueja cuita camadya jucuaré. “Jesús tu Mesías. Tuquetu Yusuja Emepeque micuanara ihuacuareque”, jadya tujatu israelita cuana cuejajacacuare ama. ⁶ Jadya cuejayaju bacatsutu jetiama israelita cuana dyaque cahuaiticuare Pablo tsehue. Jidamaque quisarati tuna acuare. Tumbaedyá tuna Jesús ijillahuanacuare. Tume tuna Pablora jacacuare. Tuna jacayaque tujatu tura jutuyaque itataquenacuare, tuque ama inime metseque jadique.

—Judirubuque ama micuana Yusuja yacuaju, micuana Jesús queja catyaticarama juya tibu. Jesúsja quisarati micuana cuejahua. Jadya ama bucha micuana ejenecarama ahua. Jadya tibu micuana micuana cuitadya micuanaja juchaju inime metse, ique ama. Riyaque huecaca eque tuque cuejaya Yusu queja judiru ishuque quisarati israelita ama cuanaque, —jadya tuna Pablora cuejacuaré.

⁷ Jadya tuna cuejatsutu cuinanacuare caradati ishuque etare juque. Cuacuaretu Ticio Justoja etareju. Tuja etaretu jucuaré caradati ishuque etare peque. Arepa tuque israelita ama jucuaré ama bucha, turatu Yusu Neri muicuare. Pablotu tuja etareju cuacuare Jesúsja quisarati cuejara. ⁸ Crisporatu Pablora cuejayaju bacacuare. Bacatsutu Jesús queja catyaticuare. Riyaque Crispotu caradati ishuque etareju ecuat-sashaquique jucuaré. Tuja etareju cuanaque tumbaedyá Jesús queja catyaticuare. Jetiama peya cuana Corintoju cuanaque tumbaedyá catyaticuare Jesús queja, quisarati cuejayaju bacatsu. Tuaqueja catyaticuare ecana cutsamereticuare. ⁹ Ecuana Cuatsashaquiquetu meta tahuju Pablo queja cabamereticuare.

—Bajida juume, Pablo. Cuejajacaume ecana ecue quisarati. Abacatanaume. ¹⁰ Ique miatsehuedya. Naruyadya mique era. Ni ejera buchiquemi jidama aya ama ni nerecaturaya. Era tuna jetiama riyaque epuju cuanaque eaqueja catyaticuare, mira cuejayaque bacatsu, —jadyatu Ecuana Cuatsashaquira cuejacuaré Pablo.

¹¹ Tumetu Pablo Corintoju anicuare peadya mara, peya patya patya tupu. Tuhua aniyaque tujatu ecana bahuityacuare Jesúsja quisarati. ¹² Tuequedyatu umae israelita cuana Pablo tsehue cahuaiticuare. Inacuare tunara. Inatsu tuna dujucuaré Galión queja. Galióntu Acaya yahua naruquique jucuaré.

¹³ —Riyaque ecuitatu Moisésra cacuatsashati iyacuare eque ama aniya. Arepa Yusu ecuanaja muitaqui jadya juya ama bucha, tuyu amapa ecuanaja muiya, jadyatu juya, —jadya tunajatu Galión aticuare.

¹⁴ Pablo quicueneti ishu equisaraticuaretu Galiónra jutidya isaracuare israelita cuana:

—Tata ecana, nebacacue ique. Erari nereda aya ama riyaque ecuita. Tura ni Roma juque enaruquija cacuat-sashati eje bucha aquena juhua, enerecaturau rique era. Tura ni ai dyaque jidama cuitaque aquena juhua, enerecaturaudya rique era, micuanara amerecara aya bucha. ¹⁵ Riyaqueri eje bucha juhua ama Romajuja cacuatsashati tsehue, micuana israelita cuanaja cacuatsashati tsehue camadya. Micuana micuana cati cati jucara juya ebacani cuana tibu, quisarati eje buchique jadya tibu. Eratu nerecaturaya ama. Eratu riyaque inime bacarama aya. Tuque ni micuanaja cacuatsashati eque ama juya, jutaquiju taa micuanaradya nereda neacue. Eratu nerecaturaya ama, —jadyatu Galiónra acuare israelita cuana.

¹⁶ Jadya aatsu tujatu ecana casada tsehue cuinanashacuare inime bajeje ishuque etare juque.

¹⁷ Cuinanayajutu tuhua cuanara inacuare Sóstenes. Tumequetu caradati ishuque etareju ecuat-sashaquique jucuaré. Miri miri tunajatu atibunecuaré inime cuana bajeje ishuque etare tuyu. Galionratu icuenecuaré cuana ama cuitadya.

Pablo Antioquía queja amaca yudijidya dirunuca jucuaré

¹⁸ Pablotu tsunuda aninucacuare jari Corintoju Jesús queja ecatyati cuana tsehue. Tuequedyatu tuna isaraquenatsu dirunucacuare Corinto juque. Priscila, Aquila jadya tatse tuatsehue dirucuaré. Jueticuare ecana ebute Cencrea bacaniju. Cuahietu Pablo iyuca tsaru pana cajeremereti jucuaré, “Aya tuque era jadya Yusu cuejachineque yana equedya juchineque” adeba ishuque. Cencrea juque tuna cuaba ebari eque dirunucacuare Siriaju judiru ishu. ¹⁹ Siriaju diruyaque tuna jueticuare Efesoju. Tuhua tujatu ecatsé shanacuare Aquila, Priscila jadya. Pablotu cuacuare israelita cuanaja caradati ishuque etareju. Nubititsu tujatu tura tuhua jucuaré cuanaque Jesúsja quisarati cuejacuaré. ²⁰ Efesoju cuanaque tuna tuaqueja canerecaticuare:

—Anicue jari rehua eje uma huecaca cuana ecuana tsehue.

—Aijama. Padirunuca jutidya ique. ²¹ Jerusalénju chine ishú Jesúsja quisarati cuejara cuataquique ique. Yusuja inime jadya juyaque juatsu, juetincaya rehua micuana queja yudijidya, —jadya tujatu ecana acuare.

Jadya tuna isaratsutu Pablo Efeso juque cuacuare cuaba ebari eque. ²² Jueticuaretu Cesareaju. Tuhua juetitsutu Pablo cuacuare Jerusalénju Jesús queja ecatyati cuanaque isarara. Tuequedyatu dirunucacuare Antioquiaju. Tuhuatu eje uma huecaca cuana aniticuare.

Pablo cuaquimisha ishú Jesúsja quisarati cuejara cuanucacuareque

²³ Tuequedyatu cuanucacuare Jesús queja ecatyati cuanaque casaturara nuca. Uhua equetu cuacuare Galacia, Frigia yahua juque epu cuana cuajira. Bahuityacuare tujatu ecana Jesúsja quisarati. Nime casaturacuaretu ecana Jesúsja inime eque anijaca ishú ama.

Apolos Efesoju Yusuja quisarati cueja jucuaque

²⁴ Tume patyatu israelita Apolos bacani jecuare Efesoju. Tuquetu Alejandría juque jucuaque. Ecuíta dyaque jida quisarati bahuequetu jucuaque. Jidatu adebacuare Yusuja quisarati ehuenecue. ²⁵ Tuja patu riya piji ebaca jucuaque Ecuana Cuatsashaqui Jesús eje buchique. Bahuedyatu jucuaque Juan Ecuíta Cuana Utsaquira Jesús eje buchique cuejacuaque. Bahuedyatu jucuaque Juanra inime cacuaretiya cuanaque utsacuareque. Dyaque inime patya tsehuetu Apolosra bahuityacuare riya piji tuque Jesús eje buchique bahueque. ²⁶ Bajida tsehue ama tujatu bahuityacuare israelita cuanaja caradati ishúque etare cuanaju, arepa tura adeba jida ama Jesús eje buchique acuare ama bucha. Aquila, Priscila jadyaratu quisariatijayu tuhua bacacuare. Bacatsu tatsejatu dujucuaque tatseja etareju, dyaque jida Jesús eje buchique pana bahuitya aishu.

—Jesús eque tu Yusu queja judiru ishúque, —jadya tatsejatu pana bahuitya acuare.

²⁷ Tumetu Apolos cuacara jucuaque Acayaju. Jadya bahue juatsutu Jesús queja ecatyati cuanara casaturacuare tuque cuaishu. Huenecuare tuna quirica tuque tuna queja nubinati ishú, Jesús queja ecatyati cuana Acayaju cuanaja ishú, jida tunaja batsa ishú. Tuque judiruma jarijutu jetiama Acayaju cuanaja ebaca jucuaque Yusura tunaja ishú jida ayaque. Cuejayaju bacatsu tuna Jesús queja catyaticuare. Tumetu Apolos tuhua junatitsu israelita cuana tsehue quisaraticuare.

²⁸ Dytajaja yacuajutu tuque caquemitsati caquemitsati jubahue jucuaque. Yusuja quisarati ehuenecue tujatu tsumecuare tuna Jesús Mesiasque ejenemere ishú. Dyaque jidatu quisarati acuare. Israelita cuanaratu bape quemitsae ataquí ama bacuare.

Pablo Efesoju cuanucacuareque

¹⁹ Apolos Corintoju jarijutu Pablo cueticuare emata cuana eque jetiamaju epu cuana cuajiaje juyaque. Tueque cuetitsutu judirucuare Efesoju. Tuhua tujatu tsurucuare eje uma Jesús queja ecatyati cuanaque.

² —¿Butechinetu Yusuja Espiritu micuana queja, micuana Jesús queja catyatihuaju? —jadya tujatu ecana bacaduracuare.

—Juhua aba. ¿Ejeque tu tumeque Yusuja Espiritu mira ecuana cuejayaque? Ni eje tupu ecuanaja bacama tumeque, —jadya tuna caquemitsaticuare.

³ —¿Eje bucha eque micuana cutsameretichine? —jadya tuna Pablora bacaduranucacuare.

—Cutsameretichine ecuana inime cacuaretihuaque adeba ishú, Juanra bahuityahua eque.

⁴ —Yuneridyatu Juanra ecuíta cuana utsacuare inime cacuaretihua jadique adeba ishú, cajuchatijacacara juya jadique. Jadya ama buchatu tura quisarati ajacacuare ama: “Junaya queja micuana catyatitaqui” jadya. Junayaque jadya ayaque tujatu Jesús jadya acuare. Tuaequeja catyatihua jadique adebataqui juishu necutsamereticue, —jadya tuna Pablora acuare.

⁵ Jadya bacatsu tuna cutsameretinucacuare yuneri cuitadya tuna Ecuana Cuatsashaqui Jesucristo queja catyatihuaque caadebamereti ishú. ⁶ Pablora tuja emetucu tunaja iyuca dyaque iyacuare. Jadya ayajutu Yusuja Espiritu tuna queja butecuare. Quisaratitibunecuare ecana peya yana tunara adebaya eque ama. Tunaratu cuejacuaque Yusura quisaratishayaju quisariatihuaque. ⁷ Jucuaque tuna peadya tunca beta eracana ecuíta tume patya cutsamereticuareque.

⁸ Quimisha badi tuputu Pablo cuau cuau jucuaque israelita cuanaja caradati ishúque etareju. Bajida tsehue ama tujatu ecana tuhua Jesúsja quisarati cuejacuaque. Eje buchadya ejenemerecara tujatu ecana acuare Jesús eque cuita camadya Yusura dutya naruyaju judirutaquique. ⁹ Umaetu dyaque ecahuaiti jucuaque Pablora cuejayaque bacatsu. Ejenecarama tunajatu acuare. Jidama tunajatu quisarati acuare Jesúsja ishú ecuíta cuanaja ijacaju. Tume tuna Pablora jacacuare. Tuque, peya cuana Jesús queja ecatyati cuanaque jadya tuna cuacuare Tirano bahuitya bahuityayaju. Tumetu Pablora tuhua cuejatibunecuare Jesúsja quisarati dutya huecaca. ¹⁰ Beta mara tuputu Pablora tuhua Jesúsja quisarati bahuityacuare. Jutajudiyatu jetiama Asiaju anicuare cuanara bacacuare Ecuana Cuatsashaqui Jesús eje buchique. Israelita cuanara, tumebaedyá israelita ama cuanara bacacuareadya.

¹¹ Yusuja casa tsehuetu Pablora ni ejeque ecuitaja ataquique ama acuare. ¹² Jutajudiyatu eraca cuana Pablora inahuaque ecuíta cuanara dujucuaque ujejeda cuana queja. Pablora inahuaque jabatsutu ujejeda cuanaque chacha jucuaque. Tume ijahua cuanara quijahuatishaya cuanaque bacue chacha jucuaquedyá, ijahua cuana tuna quejaque cuinanatsu.

¹³ Anicuairetu peya ijahua cuana ijehuecuinaqui cuanaque. Israelita cuana tuna jucuaire. Epu cuanaju tuna junenicuaire jadya ayaque. Arepa ecana Jesús queja catyatima jucuaire ama bucha tuna Ecuana Cuatsashaqui casa tsumecara acuare ijahua cuana ijehuecuina ishu. Jadya tibudya tunajatu ijahua cuana abahue jucuaire: “Jesúsja ebananiju, Pablora cuejayaja ebananiju micuana aya, ‘Necuinanacue riya cuana quejaque. Paquijahuatijaca ecana’”, jadya quisarati tsehue tunajatu ijahua cuana abahue jucuaire.

¹⁴ Jadya tuna jubahue jucuaire israelita Esceva bacanija pacarucu ebacua cuanaque. Escevatu tuhua pae cuanaja huaraji jucuaire. “Jesúsja ebananiju, Pablora cuejayaja ebananiju micuana aya: ‘Necuinanacue riya cuana quejaque’”, jadya tunajatu abahue jucuaire ijahua cuana. ¹⁵ Tunara jadya ayaju tuna ijahuara jadya apidya acuare:

—Adebaya tuque Jesús. Adebaya tuque Pablo. ¿Micuana jatsu micuana ai? Micuana micuana Jesúsja cuanaque ama, —jadya tuna ijahuara acuare.

¹⁶ Ijahuara jadya ahuajutu ecuita ijahuara quijahuatishayara putiriquecuare tuna pacarucuque. Mirirshacuairetu ecana ijahue atillaya tupu ebajararaque. Chamacama ecana huanacuare etare juque unamaque, ujeda eaque. Jadyatu Efesoju Escevajaja pacarucu ebacua cuanaque jucuaire.

¹⁷ Tuhua cuanaque tuna bahue jucuaire pacarucu ecuita cuana jadya juhuaque. Israelita cuanara, israelita ama cuanara jadyatu bacacuare jadya juhuaque. Bahue juatsu tuna anajacatacuare. Dyaquedya jutidya tunajatu Ecuana Cuatsashaqui Jesúsja casa bacaajecuaire. Jadya juatsu tunajatu pureama acuare.

¹⁸ Jetiama maruhuisa cuana tuna Jesús queja catyaticuaire. Tuaequeja catyatitsu tuna dutyaja ijacaju cacuejatibarecuare tuna jidama juhua cuanaque. Sitacuare tuna dutya quirica cuana tuna maru cabahuityatiqui jucuaire cuanaque. Sitatsu tunajatu pahuacuare dutyara petayaju. Pahuama jarijutu tumeque quirica cuanaja dyaque etsujequi anicuaire, pishica tunca mil ficha tupu dyane. ²⁰ Dyaquedya jutidya tunajatu tuque amaca bacaajecuairedyta jutidya Yusuja quisarati, Yusuja casa jadya.

Efesoju cuanaque capuriticuaireque

²¹ Jadya juatsutu Pablora inime tupucuaire:

—Pacua ique Jerusalénju. Pacueti epu cuana eque Macedonia, Acaya ecatse yahua eque Jesús queja ecatyati cuanaque cuajiaje. Jerusalénju cuaatsu, cuacara juya Romaju, —jadya tujatu inime tupucuaire.

²² Tumetu Pablora Macedoniaju cuadishacuare icuena beta tuque tsahuaquique, Timoteo, Erasto jadya. Tuquetu anicuaire jari eje uma huecaca cuana Asiaju.

²³ “Iyacuaque tu Jesús eque Yusu queja judiru ishuque”, jetiamatu Efesoju cuanaque jadicu quisarati bacatsu cahuaitsitu capuriticuaire. ²⁴ Peadya ecuita Demetrio bacaniratu ecuita cuana cahuaitsacuare. Tuquetu cueya cueya cuana mere puji jucuaire. Yusu

epuna Artemisa mui ishuque etare cueya cueya mere pujitu jucuaire. Tsuje aridaque metal tujatu acuare. Catyati aatsu tujatu jetiama chipiru inacuaire. Tumebaedya tuatsehue mere jucuaire cuanara dyaque etsujequi inacuaire. ²⁵ Demetrioratu tuja mere puji cuana sitacuare. Tumebaedyatu ihuamerecuare dutya peya cuana cueya cueya mere puji cuana.

—Tata ecana, nebacacue ique. Micuanaratu adebaya ecuanara riyaque mere tsehue umada chipiru inayaque. ²⁶ Bachine micuana Pablora cuejahuaju eje bucha juchineque. Bacachine micuana tura cuejayaju. “Ecuita cuanara yusu cueya cueya ayaque tu Yusu ama”, jadyatu ajacachine ama ecuita cuana. Jadya tibutu eje umara Artemisa muijacaya. Artemisa tuna muijacaya ecuanaja epuju cuanara. Asiaju dutya queja cuanaratu muijacaya yusu cuana ecuanara mere aya cuanaratu. ²⁷ Riyaque tu dyaque jidama ecuanaja ishu. Jaidya jutidya ni juajeya, mere tuque ecuanaja aijama ejuu. Chipiru tuque ecuanara einanucau ama. “Artemisaja etaretu ni aishu buchique ejuu”, jadyatu ecuita cuana ejuu. Jadya ni juya, peya epu cuanajura ni tu emuijacadadiu, Asiaju dutya yahuajura. Bijidamatu ebatau riyaque yusu epuna. Emui ama tunaja tuque, —jadya tuna Demetriora acuare.

²⁸ Jadya bacatsu tuna dyaque cahuaiticuaire. Quiqueterecuare tuna:

—[Artemisa tuque ecuanaja esumique! [Tumeque yusu epuna ecuanara muiyaque, dutya Efesoju cuanara! —jadya tuna jubarecuare quique eque.

²⁹ Bape bapedya jutidyatu epu ebariju cuanara cueyanecuare. Gayo, Aristarco Macedonia juque ecatse inaticuaire. Pablo taji juyaque tatse jucuaire. Repeajetsu tuna ecatse ani ishu cuanaque pataca pataca baruda eaque ducu repeajecuaire. Tuhuatu ecuita cuana caradaticuaire. ³⁰ Pablotu nubicara tuhua jucuaire ecuita cuana isara ishu. Jesús queja ecatyati cuanaratu cuejamerecuare tuque nubi ishu ama. ³¹ Umae Asia juque huaraji cuanara tujatu quisarati cuadishacuare. Tuna tuna Pabloja eadeba cuanaque jucuaire.

—Panubi ama tuhua, —jadya tunajatu cuejamerecuare.

³² Ecuita ecapuritique tuna jucuaire. Dutya jujeri bacua jucuaire aishu casitatihuaque. Umaera bape, peya cuanara peya quisarati jadya jutidya ecana jucuaire. Umae cuana quiqueya peya queja eje bucha quiqueya jadya tuna jucuaire. Dutya tuna ecahuaiti jucuaire Pablo tsehue, dutya israelita cuana tsehue jadya. ³³ Israelita cuanara tuna jetiamaque isaracara datse acuare. Jadya tibudya tunajatu Alejandro casada tsehue dutya ecuita cuana acuatsurumerecuare. Tuna israelita cuana tsehue cahuaitsahajacacara aatsu tujatu ecana isaracara acuare. ³⁴ Tudyta cuitadya israelitaque adebatsu ecuita cuana dyaque jebudadya jutidya quiqueterecuare:

—[Artemisa tuque ecuanaja esumique! [Tumeque tu yusu epuna ecuanara muiyaque, dutya Efesoju cuanara! —jadya tuna quiquecuare beta ura jujeri dyane.

³⁵ Tumetu epu juque huenehuene puji huarajira inime eque inime equetu ecana abacashacuare.

—Tata ecana, nebacacue ique. Ecuana riyaque epu ebari juquedya ecuana tumeque etare yusu epuna Artemisa mui ishuque etare naru ishuque. Tumbaedy ecuanajadyatu narutaqui yusu epuna cueya cueya barepa juque epacacaque. Dutya quejaquetu bahue riyaque. ³⁶ Dutyatuhue ecuanaja riyaque bataquique. Neabacatanacue. Jidama jumaradya jida inime netupura. ³⁷ Yanacana tuque micuana tumeque ecuita ecatsé behua. Ni ai buchique tatsejatu chirihua ama Artemisa mui ishuque etare juque. Jidama tatse quisaratihua ama yusu epuna ecuanara muiyaja ishu. ³⁸ Demetriora, peya cuana cueya cueya mere puji cuanara ni baya ai tatsera jidama ayaju, pacua ecana inime cuana bajejequi cuanaja yacuaju. Pacacuejatiti ecana tuna eje bucha juhuaque. Dutya peadya peadya ecana paquicuenetiti. Jadique tu tuyu. ³⁹ Aniya ni micuanaja tumeque inimeju quisarati aishuque, casitatitahu ecuana, ecuanaja cacuatsashati eque, jida tsehue inime bajeje ishu. ⁴⁰ Riyaque huecaca ecuanatu yu ama juhua ecuanaja cacuatsashati eque ama. Ecuana eje bucha juhua equetu enaruique Roma juque dyaque ecahuaiti ecuanatu tsehue. Ecuana tuatsehue cahuaitihua bucha tura ecuanatu ebau. Bacaduraya ni tura ecuanatu “¿Eje bucha juatsu micuana Efesoju capuritichine?”, ai cuejataqui ama tuque ecuanatu ebau, —jadya tujatu ecana acuaré.

⁴¹ Jadya quisarati amena aatsu tujatu ecana cuadishacuare tunaja etare cuanaju tuhua caradatihua cuanaque.

Pablo Macedonia yahuaju, Grecia yahuaju jadya cuacuareque

20 Dutya ecahuaiti cuanaque tunaja etareju diruterehuajutu Pablora ihuaramerecuare Jesús queja ecatyati cuanaque, tuna tuja ai cuejataquique cueja ishu. Tuna cueja amena aatsu tujatu ecana macacatsu isarabarecuare. Tuna isaratsutu cuinanacuare Macedoniaju cuaishu. ² Cueticuaretu epu cuana Macedonia yahuatu eque. Baticuare tujatu tura icuene cuita Jesús queja ecatyati tsahuacuare cuanaque. Dyaque tujatu ecana tuja quisarati tsehue casaturacuare. Jadya juu jadya juatsutu Grecia yahuaju cuacuare. Tumeque yahuatu nucadyatu Acaya bacani juacuare. ³ Tuhuatuhue anicuare quimisha badi. Cuahuietu amena juacuare Siriaju ena eque. Israelita cuanaratu Pablo iyecara acuaré.

—Tuque cuaba eque cuayaju neiyera, —jadyapa tunajatu inime tupucuare.

Jadique bahue juatsutu Pablora inime tupucuare:

—Yahuatu eque padirunuca —jadya.

Yahuatu eque cuaatsutu cuatinucacuare Macedonia epu cuana eque. ⁴ Jesús queja ecatyati cuanaratu tajicuare. Juacuare tuna: Sópater, Aristarco, Segundo, Gayo, Timoteo, Tíquico, Trófimo jadya. Sópater tu Berea juque juacuare. Tuquetu Pirroja ebacuaque juacuare. Aristarco, Segundo jadya tatse Tesalónica juque juacuare. Gayotu Derbe juque juacuare. Tíquico, Trófimo ecatsétu Asia yahuatu juque juacuare. Riyaque pacarucu-

ratu Pablo tajicuare tuque Filiposju cuayaju. ⁵ Jueticuare tuna Filiposju; ique Lucas riyaque quirica huenequi juyaque tuhua yuacuare. Tume tuna pacarucu cueticuare ecuanatu Troasju ihuanati ishu. ⁶ Amena chine pan levaduramaque ara ishuque chine cuetihuaju ecuanatu ique Lucas, Pablo, peya cuana jadya cuacuare Troasju. Cuaba ebari tsehue ecuanatu ebute juque cuinanacuare. Pishica huecaca juatsu tuque ecuanatu peya cuana Troasju adadinucacuare. Tuhua ecuanatu pacarucu huecaca netinaticuare.

Pablora Jesús queja ecatyati cuanaque Troasju aniya cuanaque baticuareque

⁷ Domico huecaca ecuanatu Pablo tsehue cuacuare cuanaque ecuanatu caradaticuare Jesús queja ecatyati cuana tsehue. Casitaticuare ecuanatu pan ara ishu, Jesús majucuareque adeba ishu. Cuarto ebari quimisha ishuque pisoju ecuanatu caradaticuare. Pablota Jesúsja quisarati bahuitya juacuare. Huecacape pijidya cuanucaya tibu tura ecuanatu metapatya tupu bahuityacuare. Jetiamatu ude cuana jujunetibarecuare tumeque cuartoju. ⁹ Peadya ehue ebari Eutico bacanitu juanicuare tuhua huetanaju. Tahuicaraqetu juanicuare, Pablo tsunuda quisaratiya tibu. Amena tahui tahui juyaquetu pacacacuare yahuaju, quimisha ishuque piso juque. Pacacahua baatsu ecuanatu butecuare tuque huesara. Emajuque tunajatu nityatsuraticuare. ¹⁰ Tumetu Pablo butetsu cuinanacuare etare juque. Majuhuaquetu baticuare. Emaju dyaquetu jarabuteacuare. Macacaticuare tura, Yusuja casa tsehue chacha nityatsuranuca ishu.

—Peya inime nejuume. Yusurari yudijidya chacha nityatsuranucaya, —jadya tujatu ecana acuaré.

¹¹ Tume ecuanatu Pablo dutyadya ecuanatu jadya tsuranucacuare ecuanatu casitatihuaque cuartoju. Tsuradirunucatsutu Pablora pan cuesicuare. Cuesitsu tura ecuanatu peadya peadya ecuesi tyabarecuare. Aracuare tuque ecuanatu Jesús majucuareque adeba ishu. Amena ecuanatu pan araqueretsu ecuanatu Pablora Jesúsja quisarati cuejanucacuare huecaca japadama tupu. Huecacayajutu tuhuaque cuanucacuare ehuchi eque. ¹² Tumeque ehue ebari pacacatsu majuhuaquetu chacha junucacuare. Dujucuare tuna etareju. Dutyaja tunajatu jida inime juacuare, tuque chacha junucahuatu baatsu.

Pablo Troas juque, Miletoju cuacuareque

¹³ Ecuana ecuanatu icuene cuacuare. Cuacuare ecuanatu cuaba ebari tsehue Asón epu tupu, Pablo tuhua ihuatu. Cuama jarira tura ecuanatu jadya acuaré: “Ique ehuchi eque cuaya Asón tupu. Tuhua necatsuruti- ra” jadya. ¹⁴ Tuhua ecuanatu catsuruticuare Pablo tsehue. Cuaba ebari tsehue ecuanatu dutyadya Asón juque cuanucacuare. Cuacuare ecuanatu Militene epuju.

¹⁵ Tuhuaque cuinanatsu ecuanatu cueticuare peya huecaca Quío tuyu eque. Huecacape ecuanatu jaratsuraeticuare ebute Samos ecububuaju. Canajaracuare ecuanatu

Trogilioju. Peya huecaca ecuana jueticuare Miletoju.
¹⁶ Cuanucacuare ama ecuana Efesoju, Pablo Asia yahuaju tsunutacarama juya tibu. Huenanacaretu Pentecostés chine ishu Jerusalénju jueticara juatsu.

Pablora Jesús queja ecatyati cuanaque naruqui cuanaque Efeso juque isaracuareque

¹⁷ Arepa Efesoju cuaishu emajaca aijama jucuare ama buchatu Pablora quisarati cuadishacuare tuhua Jesús queja ecatyati cuanaja huaraji cuana queja:

—Nebanacue ique Miletoju ebajarara cuita, —jadya tujatu ecana cuejamerecuare.

¹⁸ Tuna junatihujutu Pablo tuna tsehue quisaraticuare:

—Tata ecana, micuana micuana bahuiedya ique eje bucha jucuareque Asiaju junametse jucuare eque riyaque huecaca tupu. ¹⁹ Dutya huecaca ique micuana tsehue jucuare patya tuque Ecuana Cuatsashaquique merecuare. Ique micuana ducu inime metse ama cabaticuare. Dyaque peya inime jucuare Efesoju cuanaque cajuchatiya baatsu; pacuare ique. ²⁰ Cuejajacacuare ama micuana tsahua ishu cuanaque quisarati, micuanaja jida ishu. Bahuityajacacuare ama micuana jidaque quisarati. Caradati ishu cuanaque etare cuanaju micuana dutyara bayaju bahuityacuare. Tumbaedy micuanaja etare cuanaju micuana bahuityacuare. ²¹ “Necacuareticue inime Yusu iyuhueda banuca ishu. Ecuana Cuatsashaqui Jesucristo queja necatyaticue”, jadya micuana quisarati cuejajacacuare ama, israelita cuana, israelita ama cuanaque jadya.

²² “Iyacuaya cuaya Jerusalénju, Yusuja Espiritura cuadishayaju. Juhua aba eje bucha cuana taa tuhua jutiya. ²³ Camadya ique bahue tuhua dyaque canerecatediadyaque. Bahue ique tunara etare apudaju ishadadiyaque. Jadya Yusuja Espiritura bahue amerechine ique epu cuana tupu juneniya patya. ²⁴ Jadya ama bucha ique bajida juya ama. Jidama ama tuque inime baya tunara ique iyeyaju. Eratu jida baya ecue mere atilla ishu, Ecuana Cuatsashaqui Jesúsra ique amerehuaque. Tura ique cuadishahua jidaque quisarati cuejara. Cuadishahua tura ique Yusura ecana iyuhueda bayaque cueja ishu. Ique pureama juya tura ique mere amerehuaque mere ahua cabatitsu.

²⁵ “Icuene ique cueticuare micuanaja epu cuana eque eje bucha narue Yusura dutya ecuita cuana ayaque micuana cueja juyaque, micuana Jesús queja catyati ishu. Ique caadebatiya micuana ni ejeque buchique riyaque yahuaju banucayaque ama. ²⁶ Micuanaja epu cuanaju junenicuare patya micuana cuejacuare ejitaju micuana eje bucha inajacameree Ijahua quejaque Yusura eauque. Tehuacuare ama micuana Jesúsja quisarati. Dutya micuana pana cueja acuire. Jutaquiju ejeque ni Jesús queja catyaticarama juya, ique ama jucha metse. Micuanaratu adebayadya riyaque yunerique. ²⁸ Jutaquiju neaniajecuedya jutidya jida Yusuja biji eque. Nenaruajecuedya jutidya jida Jesús queja ecatyati cuanaque. Yusuja Espiritura micuana iyacuare, ecuatashaque bucha tuna naruqui juishu. Uhuisha

naruqira tuja uhuisha cuana naruya bucha narue ecana neacue. Tuna tuna Jesús jaque, tuque tuna jiteque ami quijehuetitsu majuhua tibu. ²⁹ Eratu adebaya ique amena micuana tsehueju ama dyaque jidama cuanaque junabuque micuana queja. Pusha pusha tunara micuana abuque, Jesús queja nimee amerejacacara aatsu. Iba mureda cuanaque uhuisha cuana ducu ejuu bucha tuna jubuque. ³⁰ Arepa umae micuana tsehue casitatitsu Jesús pureama abahue ama bucha tunara cuitadya micuana pusha pusha bahuityabuque. Tunara micuana Jesús queja nimee amerejacacara abuque. ³¹ Jutaquijudy necanaruticue tunara micuana ijahue eauju. Mara mara micuana bahuityahua Jesúsja quisarati. Huecada tupu, meta tupu jadya micuana tuque eje buchique cuejajacahua ama. Dyaque iyuhueda micuana baatsu, micuana Jesúsja inime eque ama juya baatsu, paana caca capazashati bahue juhua.

³² “Inime netupucue era micuana cuejahujutu, micuana ecue eatsehuequi cuanaque. Yusura nenarucue tuja quiyuhuebati tsehue. Yusuja quisarati dyaque inime tupuqui neacue. Micuanara ni quisarati inime tupuqui ajacaya ama, dyaque micuana cabahuityatiajeya Yusuja Espirituja biji eque ani. Yusura micuana tyabuque dutya jidaque tura tuja cuanaque tyaana ahuaque tura cuatsashaya eque aniya cuanaque. ³³ Eratu micuana tsehueju Ecuana Cuatsashaquique merehua. Bijiserihua ama tuque peyaja ai aniyaque, chipiru, ejutuqui ni ai buchique. ³⁴ Ecue emetucu tsehue cuitadya ebiti etare caca cuana mere juhua, era, ique tsahuaqui cuanara jadya sareya cuanaque cadaditi ishu. Adebayadya tuque micuanara. ³⁵ ‘Mere nejucue micuanara ai sareyaque cadaditi ishu. Netsahuacue nerecada cuanaque’ jadya micuana cuejajacahua ama. Neadebacue beru Ecuana Cuatsashaqui Jesucristo jadya jucuire: “Dyaque jida tu peya ai tyau, ecuanaja taca jia ishu ai radanityaya bucha ama” jadya. Neadebacue riyaque, —jadya tuna Pablora acuire.

³⁶ Jadya quisarati amena aatsutu Pablo nuyucuare Efesoju cuanaque Jesús queja ecatyati cuanaque naruqui cuana tsehue. Dutya tuna Yusu tsehue quisaraticuare. ³⁷ Dutya tuna pacuire, Pablora amena jaca ishu isaraya cabatitsu. Macaca, dyahua, isara jadya tunajatu Pablo acuire. ³⁸ Dyaque peya inime ecana jucuire, Pablora “Banucaya ama micuanara ique riyaque yahuaju”, jadya ayaju. Jadya aatsu tunajatu tajiticuare cuaba ebari tupu ebuteju.

Pablo Jerusalén epu ebariju dirucuareque

21 Jesús queja ecatyati cuanaque naruqui cuanaque, ecuana diruyara isaratsu ecuana cuaba ebariju anibutecuare. Dirucuare ecuana Cosju piisi. Peya huecaca ecuana judirucuare Rodasju. Tuhuaque dirunucatsu ecuana judirunucacuare Pataraju. ² Pataraju judirutsu ecuana dadinucacuare peya cuaba ebari Fenicia yahuaju cuayaque. ³ Cueticuare ecuana Chipre bacani ecububu peque eque. Diruyaque tuque ecuana jani eque amaca iya acuire. Dirucuareadya ju-

tidya ecuana cuaba tsehue Siria yahua tupu. Jarat-suradirucare ecuana Tiro ebuteju, cuaba aquereniqui cuanaja ai iyadirutaqui jucuar tibu. ⁴ Cuaba juque cuinanatsu ecuana cuacuare Jesús queja ecatyati cuanaque sarera. Tuhua cuana tsehue catsurutitsu ecuana anicuare pacarucu huecaca. Yusuja Espiritura Pablo Jerusalénju canerecatidadiyaque bahue amerehuaju tunajatu

—Cuaume, —jadya acuare.

⁵ Jadya ama buchatu Pablo bahuedia jucuar tuque tuhua cuataquique. Pacarucu huecaca juatsu ecuana cuinanacuare. Ecuana amena cuita diruyaju ecuana Jesús queja dutya ecatyati cuanara ebuteju iyabutyaticuare. Deca cuana, epuna, ebacua jadya tuna ebuteju cuacuare ecuana tsehue. Tuhua enaja ecuaqueja mejijiju ecuana nuyucuar, Yusu tsehue quisarati ishu.

⁶ Yusu tsehue quisarati amena juatsu, tuque ecuana ecan isaracuare:

—Diruya ecuana, —jadya tuque ecuana ecan acuare Tiroju cuanaque.

—Nedirucue taa, —jadya tunara ecuana acuare.

Jadya juatsu ecuana anibutecuare cuaba ebariju. Anibutehuaju tuna dirubarecuare tunaja etare cuanaju.

⁷ Tiro juque ecuana cuinanacuare. Judirucuar ecuana Tolemaidaju. Tuhua tupu ecuana ena eque dirucuar. Cuaba ebari juque cuinanatsu ecuana cuacuare tuhua Jesús queja ecatyati cuanaque isarara. Tuna tsehue ecuana anicuare peadya huecaca. ⁸ Peya huecaca ecuana Pablo tsehue cuaya cuanaque cuinanacuare. Judirucuar ecuana Cesarea epu ebariju. Cuacuare ecuana Felipeja etareju. Tudyatu Jesúsja ecuaisha cuanaque etsahuaquique jucuar tunara béru pacarucu etsahuaqui cuanaque mepecuar patya. Tuaequeja ecuana eje uma huecaca cuana piji aninaticuare. ⁹ Anicuare tujatu pushi ebacujuna cuanaque, ahuema cuanaque. Tumeque epuna cuanatu Yusu equeque quisarati cuejaqui cuanaque jucuar. ¹⁰ Tuhua ecuana eje uma huecaca cuana piji anicuare. Ecuana tuhuajutu jueticuar ecuana queja peadya ecuita Agabo bacani. Judea yahua juquetu jueticuar. Tumequetu Yusu equeque quisarati cuejaquiquedya jucuar. ¹¹ Eje uma cuejadyatu Yusura acuare eje bucha judadibuqueque. Huicacuare tujatu Pabloja cinturu. Cinturu huicatsutu Agabo carisitucuar ehuachi ecatsé, ebi ecatsé jadya cinturu tsehue. Jadya carisititsu tujatu Pablo cuejacuar:

—Pablo, cuejaya mique era Yusuja Espiritura ique bahue amerehuaque mique eje bucha atayaque. Israelita cuanara pami Jerusalénju huachi risi birisi jadya aya. Ique ebi ecatsé, ehuachi ecatsé jadya carisitihua bucha, jadya risipa tunarami aya mique cinturu metseque. Inamereya tunara mique israelita ama cuana queja, —jadyatu Agabora Pablo cuejacuar.

¹² Jadya bacatsu ecuana Pablo tsehue quisaraticuare. Cesareaju cuanaque, ecuana jadya datse ecuana canerecatucuar tuaqueja:

—Cuaume Jerusalénju.

Enapacuare tuque ecuanara, tumebaedya Cesareaju cuanara Pablo tuhua eje bucha judadiyaque adebatsu.

¹³ —¿Eje bucha juatsu micuana paya? ¿Eje bucha juatsu micuanara nime huallacara aya Jerusalénju cuaishu ama? Ecuana Cuatsashaquira amerecara ayaque cuita camadya tuque acara aya. Risitana ishu camadya ama cuaya, tumebaedya iyeta ishu, tuja jadya inime juyaque juatsu, —jadya ecuana Pablora acuare.

¹⁴ Tura ecuana bacacarama acuare. Eje bucha abacashataquima baatsu, tuque ecuana cuejajacuare.

—Paju Ecuana Cuatsashaquija biji eque, —jadya ecuana jucuar.

¹⁵ Eje uma huecaca tarepe juatsu ecuana cabajejetucuar abu ishu cuanaque. Cabajejetitsu ecuana cuacuare Jerusalén diji eque. ¹⁶ Jesús queja ecatyati cuanaque uma Cesareaju aniya cuanara ecuana tajiajucuar. Jerusalénju junatihaju tunara ecuana ducucuar Mnasónja etareju. Tuquetu Chipre juque jucuar. Amena eje uma maratu Jesús queja ecatyatique jucuar. Tuaequeja ecuana anibacuare.

Pablora Santiago baticuareque

¹⁷ Ecuana Jerusalénju junatihaju ecuana Jesús queja ecatyati cuanara pureama tsehue batscuare. ¹⁸ Huecacsutu Pablo cuacuare Santiago queja, Jesús queja ecatyati cuanaja huaraji queja. Ecuana ecuana cuacuaredya tuatsehue. Ecaradatinucadya tuna jucuar tuhua Jesús queja ecatyati cuanaja huaraji cuana. ¹⁹ Pablora tuna isaracuare. Isara amena aatsu tujatu ecan cuejacuar:

—Ique equetu Yusura israelita ama cuanaque Jesús queja catyaticahua, —jadya tujatu ecan acuare.

²⁰ Tuque jadya bacatsu tunajatu Yusu pureama acuare:

—Dyaque jida taa Yusu!

Yusu pureama amena aatsu tunajatu Pablo isaracuare:

—Isaraya mique ecuanara, ecuanaja ecuana tsehuequique. Jetiamatu israelita cuana Jesús queja catyaticuare. Eje uma mil tuna catyatihua. Miquemi bahuedia. Arepa tuja cuanaque juya ama buchatu eje uma juya, dutyapa ecuana Moisésja cacuatsashati eque jutaqui jadya. ²¹ Aniyari quisarati sicacada micue ishu. Mira patu bahuityaya israelita cuana israelita ama cuana ducu aniya cuanaque: “Moisésja cacuatsashati eque nejujacacue. Netubujacacue micuanaja bacua cuana, Yusu jaque jadique adeba ishuque. Ecuana bahue eque neanijacacue”, jadyapa tuquemi ecuanaja ata cuana bahuityaya. Jadyari israelita cuana micue ishu quisaratiya. ²² Masadamadya tuna bahue juya mique junahuaque. Bahuedia ecan amerecue mira Moisésja cacuatsashati bijidamadurayaque ama, israelita juya tibu. ¿Eje buchami juya? ²³ Ecuana cuejaya eque jucue. Riya rehua pushi ecuita Jesús queja nimee cuanaque, Yusu ai tyaana juhuaque. Baretaqui ama tunajatu quisarati. ²⁴ Necuacue tuna tsehue pae cuana queja. Tuna tsehue apeadya acue cacuatsashati eque Yusu queja jida cajuchatima cabamereti ishuque. Tsujety-

acue tunaja manu tunara aana eaque ahua tibu. Eshu ecana pacatimere, tunaja aana eaque ahua jadique caadebamereti ishu. Dutyaja yacuaju Moisésja cacuat-sashati eque juyaque baatsutu rehuaque israelita cuana bahue juya tunara mique eje buchique bacat-sahuaque pusha pushaque. Tume tuna bahuedya juya yuneridya mique Moisésja cacuat-sashati eque juyaque. ²⁵ Ecuana tuna amena cuejacuaredya israelita ama cuanaque eje bucha juishuque ama. Cuadishacuare tuque ecuaña quirica israelita ama cuana Jesús queja ecatyati cuanaja ishu. "Nearaume erami yusu cueya cueya cuanaja yacuaju iyahuaque. Neiji-ume ami. Nearaume erami cuanubi, uu jadya pana su-cururusha ami amaque. Micuanaja caquemitiquire-maque nejaraquereume", jadya tuque ecuaña quirica cuadishacuare icuene, —jadya tunajatu Pablo acuaire.

²⁶ Tumetu Pablo huecacatsu piji cuitadya cuacuare pushi ecuita tsehue. Tuna tsehue apeedyu tujatu acuaire cacuat-sashati eque Yusu queja juchama cabamereti ishu. Cuacuaretu Yusuja etareju. Tuhuatu pae cuana tsehue quisaratiticuaire:

—Pacarucu huecacaju tuque ecuaña Yusuja jida juchama baishuque atillaya. Tumeque huecaca tuque ecuaña uu cuana beya iyetsu micuanaja Yusu tya ishu, —jadyatu Pablora acuaire pae cuana.

Israelita cuanara Pablo Yusuja etareju inacuaireque

²⁷ Pablotu Yusuja etareju jucuare. Umae israelita cuana Asia yahuaju cuanaratu bacuaire tuhua. Pablotu ishu tuna jidama quisarati acuaire dutya tuhua cuanaque tuatsehue cahuaithaya tupu. Tsajaja, inati tunajatu acuaire. ²⁸ Quiquecuare ecana:

—[Netsahuanacue ecuaña, ata cuana! Neinara riyaque ecuita. Riyaquedya ri dutya queja ecuita cuana yunerique ama bahuitya juyaque. Riyaque ri ecuanaja baba cuanaja bahue juhua cuanaquepa jidama jadya juyaque. Moisésra cuatsashahua equepa jutaqui ama, jadyari juya. Jidama rejari quisarati aya Yusuja etareja ishu. Iyacu rejari rehua nudyahua peadya ecuaña jaque ama, israelita ama. Jadya asicaturae tujatu Yusuja etare aya, —jadya tuna pusha pusha jucuare.

²⁹ Icuenedyapa tunajatu Pablo epuju Trófimo tsehue juneniyaju bacuaire. Tumeque tu israelita ama. Efeso juquetu jucuare. Cahuaiticuaire israelita cuana, Pablora tumeque ecuita israelitaque ama Yusuja etareju nubiquerehua bucha baatsu. ³⁰ Dutya jujeri cuitatu Jerusalén juque ecuita cuana cahuaiticuaire. Masadama cuita tuna tsajajabecuare. Caradatitsu tuna inacuaire Pablo. Inatsu tuna repetsu, cuinanashacuare etsecueju Yusuja etare juque. Repe cuinanashatsu tunajatu yume teri etsecue cuana acuaire, tuque catachiti ishu nubitinuca ishu ama. ³¹ Ejera cuanatu mil sudaru romano cuana cuatsashaquique Jerusalén juque cuejaticuaire:

—Dutyu epu jujeritu capurutiya. Pablo tunajatu iyecara aya, —jadyatu ejera cuana cuejaticuaire.

³² Jadya bacatsu tujatu ihuaracuare sudaru cuana, sudaru cuana cuatsashaquique jadya. Tuna tsehuetu

Pablo queja tsajaja cama cuacuare. Banaticuaire tuna tunara Pablo ebi tsehue ayaju. Mil sudaru cuana cuatsashaquique, tuja sudaru cuana tsehue baatsu, tunajatu ajacuare Pablo. ³³ Tumetu mil sudaru cuana cuatsashaquira jipeticuaire. Inamerecuaretu sudaru cuana queja Pablo. Beta sogu tsehue tunajatu ebi ecatsēju risicuaire. Jadya aatsu tujatu caradatihua cuanaque bacaduracuare:

—¿Ejeque ri riyaque ecuita? ¿Eje buchari juhua? —jadya tujatu ecana acuaire.

³⁴ Tumetu ecuita cuana dyaque cuita quiqueterecuare. Umae cuanara bape, peya cuanara bape cueja jadya tuna jubarecuare. Dutyu tupu quisarati ayaque ama tuna quiqueterecuare. Jadya tibusu mil sudaru cuana cuatsashaquira adebataqui ama bacuaire eje bucha juatsu tuna sicada juyaque.

—Nedujucue riyaque ecuita ecuaña aniyaju, —jadya tujatu tuja sudaru cuana acuaire.

³⁵ Jadya ayajutu sudaru cuanara Pablo dujucuare tuna aniyaju. Ecuita jetiamaratu tupujudya aajecuare. Patacaju junatitsutu Pablo sudaru cuanara medequetsu dujucuare ecuita cuanara einaju. Dyaque cuita cahuaithaya tunajatu iyecara acuaire. ³⁶ Dutyu tuna tuque tupuju quiqueajecuare:

—[Neiyecue tumeque! —jadya tuna quiqueajecuare.

Pablo ecuita cuanaja yacuaju quicueneticuaireque

³⁷ Tunara sudaru cuana aniquique etareju ishacara ayajutu tura jadya acuaire sudaru cuanaja huaraji:

—¿Equisaratisaudya mira riyu piji? —jadyatu Pablora acuaire griego yana eque.

Huaraji ecuatsashaquiratu quemitsacuare:

—¿Griego yana ni taa mi bahuedya? ³⁸ ¿Mique ama mi Egiptuju cati inime jucuareque? Amena eje uma mara cuanatu "Roma juque enaruquira cuatsashaya eque nejura ama", jadya jutibunecuare. Tuquetu pushi mil ecuita quiyeti puji cuana cuatsashaquique jucuare. Riya cuitadya tujatu ecana anitaya amaju dujucuareque. ¿Mique ama mi tumeque ecuita?

³⁹ —Aijama, tuque ama ique. Ique israelita. Tarsoju ecuinanaque ique. Cilicia yahua juque ique. Eratu isaracara aya ecuita cuana. Nenerecabacue ique. Nequisaratisacue ique, —jadyatu Pablora acuaire.

⁴⁰ —Isaracuadya ecana, —jadya tujatu acuaire.

Pablotu netitsuracuare patacaju tsura ishujú. Emetucu tsehuetu ecana cuejacuare ecuita cuana abacatana ishu. Tuna abacatanahuaju tujatu ecana isaracuare israelita cuanaja yana eque, hebreo bacani eque.

22 —Tata ecana, nebacacue ique. Ecue ata cuana, nebacacue ique, era ique quicueneti ishu quisarati ayaju, —jadya tujatu ecana acuaire.

² Tuque quisaratiyaju bacatsu tuna jucuare:

—Nebacacue. Ecuanaña yana eque cuitadyatu quisaratiya, —jadya tuna jubarecuare.

Tume tuna dutya abacatanaterecuare tuque pana baca ishu. Pablora tuna isaranucacuare:

³ —Ique israelita. Tarso Cilicia yahuaju cuinanacuareque ique. Catemuticuaire rehua

Jerusalénju. Gamaliel tu ique bahuityaqui jucuareque. Turadya ique dyaque jida bahuityahua ecuanaja baba cuanaja bahue eque cuanaque. Dutya huecacatu era muicara acuare ecue dutya ducuta inime tsehue Yusura cuatsashayaque, dutya micuana iyacua juya baedya. ⁴ Tume patya ique dyaque ecahuaiti jucuare Jesús queja ecatyati cuana tsehue, iyacuaque quisarati ejenequi juhua cuana tsehue. Dyaque ecana ijahue ijahue acuare. Inamerecuare ecana. Deca, epuna jadya ecana etare apudaju ishamerecuare. Iyemerecuare ecana. ⁵ Pae dyaque muidaquetu dyaque jida bahue ique eje bucha juhuaque, tumbaedya israelita emuibacuanaque. Tunaradya tyacuare quirica Damascoju israelita cuana aniya cuana queja duju ishuhua, Jesús queja ecatyati cuanaque ina ishuhua. Cuacara jucuare tuna rehua Jerusalénju risitsu beti ishuhua. Dyaque tuna nerecatu uracara acuare, —jadyatu Pablo cacuejaticuare.

Pablo eje bucha cacuairetie inime jucuareque cacuejaticuareque

(Hch 9.1-19; 26.12-18)

⁶ Isaranucacuare tujatu ecana:

—Damascoju cuayaque piji dyane juajecuare.

Barepatya huie muya jutidya barepa eque huecara pana udatilla atsacuare. ⁷ Hueca baatsu ique huipuchitanatsu yahuaju rumucuta rihui jucuare. Rihuitsu jarayara tuque etsuri bacacuare: “Saulo, Saulo, ¿eje bucha juatsu mira nerecaturaya?” ⁸ Jadya bacatsu tuque bacaduracuare: “¿Aira isaraya?” jadya tuque acuare. “Ique Jesús Nazaret juque idya mira nerecaturayaque,” jadya tura acuare. ⁹ Eatsehue cuaya cuanaque tuna dyaque jecutanacuare. Arepa hueca baya ama bucha tunajatu Jesús quisaratiyaju bacacuare ama. Adebataqui ama tunajatu bacuare. ¹⁰ “¿Ai mira amerecara aya, Ique Cuatsashaquique?” jadya tuque acuare. “Netitsuracue. Damasco piisi tuyu cuau jucue. Tuhua tunarami cuejatsaya mique ai jutaquique”, jadya tura acuare.

¹¹ Tumeque hueca dyaque huecadara atuca secacuare. Ique tajiage juya cuanara dujuacuare ebiju inatsu, Damascoju junatiya tupu.

¹² “Tuhuatu anicuare Ananías. Tumeratu dyaque Yusu muicara. Turatu muibajacuare ama Moisésra cuatsashahua cuanaque. Dutya israelita cuana Damascoju anicuare cuanaratu “Ananías tu ecuita dyaque jidaque” jadya acuare. ¹³ Tuquetu jecuaire eaqueja. ‘Bandía, Saulo. Miquemi ecue eatsehuequique. Ecuana Cuatsashaquira iyacua cuita capetatihanucacue’ jadya tura aticuare. Tura jadya ayaju cuitadya capetatinucacuare. Capetatitsu bacuare netiyaju. ¹⁴ Ananiasra isaranucacuare: ‘Yusu ecuanaja baba cuanara muicuarerami mepechine. Turami mepechine tuja inime eque dyaque jida juishuque adebamere ishuhua. Jesús cuitadya baishu turami mepechine. Tumeque Jesús mira bachineque: tu Tuyu Neri bacanique. Turami mepechine tuque micue quisaratiyaju baca ishuhua. Bacachinedya tuquemi amena. ¹⁵ Jadyami Yusura ahua, micue dutya queja cuanaque cueja ishuhua, mira bacahuaque bahuaque jadya cueja ishuhua. ¹⁶ ¿Eje bucha ju-

atsumi tsunutaya? Netitsuracue. Cutsamereticue Ecuana Cuatsashaquira ebanijyu, tuja micue jucha cuana apupasha ishuhua bacayaque. Jadya inime cacuairetie jucuare, —jadyatu Pablo cacuejaticuare.

Pablora tuna eje bucha cuadishatanae israelita ama cuana queja jucuareque cuejacuareque

¹⁷ Cacuejatinucacuare tuque:

—Juetinucacuare ique rehua Jerusalénju. Rehua juetitsu cuacuare Yusuja etareju Yusu tsehue quisarati-ra. Yusu tsehue quisaratiyaque tuque ai cuana tahuiju bucha bacuare. ¹⁸ Bacacuare tuque Ecuana Cuatsashaquira isarayaju. “Ebajarara cuinanahuishacue Jerusalén juque. Eejeneu ama tunajatu mira ecue quisarati cuejayaque” jadya. ¹⁹ “Ique Cuatsashaquique, eje bucha bijidamadurae ni tunara ama rehua cuanara, ique ecue inime cacuairetihuacue baatsu. Dutyara tunara adebaya. Tuna tuna bahue ique icuene dutya caradati ishuhua etare cuanaju junenihuacue Jesús queja ecatyati cuanaque sare juyaque. Tunaratu adebaya era Jesús queja ecatyati cuanaque inatsu ebi tsehue acuare cuanaque etare apudaju ishacuareque. ²⁰ Mique merequique Esteban iyetanayaju, ique tuhuadya jucuare. Eratu jidadya jutidya bacuare tunaja iye ishuhua. Eradyatu narucuare Esteban tumu tsehue iyequi cuanaja tunara dyaque jutuya cuanaque catacatihuaju”, jadya tuque Ecuana Cuatsashaquique acuare. ²¹ “Cuinanacue rehuaque, Pablo. Erami cuadishaya japada, israelita ama cuanaque ecue quisarati cuejara,” jadya Ecuana Cuatsashaquira acuare tahuiju bucha, —jadyatu Pablo cacuejaticuare.

Sudaru cuanara Pablo inacuareque

²² Yusura israelita ama cuanaque tuja quisarati cuejamerehuacue bacatsu tunajatu amena cuejayaju bacacarama acuare. Quiquetibunecuare ecana:

—Neiyecue tumeque ecuita! ¡Pamaju! —jadya tuna quique eque jucuare:

²³ Quiquejacacuare ama tuna jadya. Dyaque ecahuaiti tuna Pablo tsehue jucuare. Dyaque jutuyaque, muru jadya tunajatu ebarucue queja marecuare, Pablo tsehue cahuaitiyaque cabamereti ishuhua. ²⁴ Jadya juya baatsutu mil sudaru cuana cuatsashaquira cuatsashacuare sudaru cuana Pablo sudaru cuana aniquique etareju isha ishuhua. Bahuetu jucara jucuare eje bucha juatsu ecuita cuana tuatsehue sicacada juyaque.

—Catsacatsa neacue, tuque jidama juhuaque cacuejati ishuhua. Tura ni ecuanara ecuejau ecuita cuana eje bucha juatsu tuatsehue sicacada juyaque, —jadyatu sudaru cuana cuatsashaquira acuare sudaru cuana.

²⁵ Tumetu sudaru cuanara risicuare. Tunaja catsacatsa ahuietu Pablo quisaraticuare:

—Ique Roma juque enaruquira cuatsashaya eque aniyaque. Ecuetu aniya enaruquique quiricaju ebanijyu equiyatique. Micuanara ique catsa catsa acara aya, ique ni inime metse jadya ama juatsu aijama jadique

baecuaque. Dujuhua ama micuanara ique jidama inime cuana bajejequi cuana queja, ique catachiti ishu. Tuyu amatu micuanaja ique jadya aishu, —jadyatu Pablora acuare.

²⁶ Jadya bacatsutu cien sudaru cuana cuatsashaqui juhuara cuejaticuare mil sudaru cuana cuatsashaquique:

—Eje bucha tsehue ama bacue tumeque ecuita. Aniya tujatu quiricaju Romaju enaruquique ebacani equiyatique, —jadya tujatu aticuare.

²⁷ Mil sudaru cuana cuatsashaquira Pablo bacaduraticuare:

—¿Yuneridya tuque micue aniya Roma juque quirica cuana?

—Jejee, aniyadya tuque ecue, —jadya tujatu acuare.

²⁸ —Jetiama ique chipiru quijehueticuare Roma juque quirica cuana caquemiti ishu, —jadya tujatu Pablo acuare.

—Ecuetu tsujetyataqui ama jucuare, ique Romajuja quirica cuana aniyaja ebacuaque tibu. Tuque jucuare baedy a ique, —jadyatu Pablora mil sudaru cuana cuatsashaquique acuare.

²⁹ Jadya tuque juyaju bacatsutu Pablo catsacara juya cuanaque tuque peque netiya cuanaque netisicuacuare, tunara ejera cuana Pablo nerecaturahuaju ecuejauju. Mil sudaru cuana cuatsashaquiquetu dyaque bajida jucuare, Roma juque quirica cuanaquique cadena tsehue risimerehua tibu, jucha metse, jucha metse ama jadique baecuaque risimerehua tibu.

Pablo israelita cuanaja huaraji arida cuanaja yacuaju eje bucha jucuareque

³⁰ Mil sudaru cuana cuatsashaquiquetu baecua jari jucuare eje bucha juatsu israelita cuana Pablo tsehue dyaque ecahuaiti jucuareque. Huecacanucatsu tujatu casitishanucacuare pae cuanaja huaraji cuana, dutya israelita cuanaja inime cuana bajejequi cuanaque jadya. Casitishatsu tujatu sudaru cuana acuare:

—Nebecue Pablo ecuana casitihuaju.

Pablo tuhua jutihuajutu sudaru cuana cuatsashaquira israelita cuanaja huaraji cuanaja yacuaju nityacuare.

23 Pabloratu huaraji cuana petacuare. —Ecue ata cuana, ique taa jida juacahua ama. Jidaque inime ique cadujutijacaya ama Yusuja yacuaju, —jadya tujatu ecana acuare. ² Jadya bacatsutu pae dyaque muidaque Ananías bacani Pablo tsehue dyaque cuita cahuaiticuare.

—Ecuatsaju neacue, —jadya tujatu tuque peque netiya cuanaque acuare.

³ Jadya quisarati bacatsutu Pablora acuare:

—Yusura mique dyaque nerecaturacuеды. Mique ecuita cuana ijahue a quique. Miquemi espiqui eririque jida piji epepa baeque. Iquepa Moisésra cuatsashahua eque ama juya, jadya mira ique ahua. Tumebae cuitadyatu ejeque catsataqui ama jucha metseque baecuaque. Jutaquiju taa mi midya cuitadya Moisésra

cuatsashahua eque ama juya, —jadyatu Pablora acuare.

⁴ —Miratu pae dyaque muidaque ijillahuanaya, —jadyatu tuhua jucuare cuanara acuare.

⁵ —Ecue ata cuana, nenerecabacue ique. Cueyanehua ama tuque era. Baecua ique juhua tuque pae dyaque muidaque. Bahue juatsu tuque quisarati jadya aquena ama juhua. Jadidya tu Yusuja quisarati ehue: “Jidama quisarati tsehue aume ecuat-sashaquique” jadya, —jadyatu Pablora acuare.

⁶ Pablotu bahue jucuare uma huaraji saduceo cuana jucuareque, peya cuana bacue fariseo cuana cuare jadique. Jadya tibudya tujatu fariseo cuana petatsu et-suri jebuda tsehue jadya acuare:

—Ecue ata cuana, ique taa fariseodya. Ecue etatatu fariseodya jucuare. Jucha metse jadya tunara aya, era majutsu ecuana chacha netitsuranucaya jadique ejeneya baatsu, —jadya tujatu fariseo cuana acuare.

⁷ Jadya tura quisarati ahuajutu fariseo cuana, saduceo cuana jadya tuna cama caquemitsati, caquemitsati jucuare.

—Ni ai buchiquetu Pablora jidama ahua ama, —jadyatu fariseo cuana jutibunecuar.

—Aijama, tudyatu jucha metse, —jadyatu saduceo cuana caquemitsaticuare.

Jadya equetu huaraji cuana dutya tupu nimee ama jucuare. ⁸ Saduceo cuanaratu ejeneya ama emaju cuanaque chacha netitsuranucayaque. Ejeneya ama tunajatu barepaju Yusu tsahuaqui cuanaque aniyaque. Ejeneya ama tuna espíritu cuana aniyaque. Jadya tuna cuji cuita eju jucuare. Fariseo cuana bacue, jida bahue emaju cuanaque chacha netitsuranucabuqueque, barepaju Yusu tsahuaqui cuanaque aniyaque, espíritu cuana aniyaque jadya. Tuna tuna cuji ama jucuare.

⁹ Jutaquijudya tuna dutya caquemitsati caquemitsati jucuare. Bape bape tunajatu inime tupu jucuare. Quiqueterecuare tuna. Umae fariseo cuana tuna netitsuracuare quisarati ishu. Tunaratu pana adebadya acuare Moisésja cacuatsashati.

—Riyaque ecuitaratu ni ai jidama ahua ama. Ejeque espiritura cuana ni tu isarahua, jadya ama juatsu barepa juque Yusu tsahuaquira, —jadyatu fariseo cuana jucuare.

¹⁰ Jadya bacatsutu huaraji cuana dyaque casada caquemitsaticuare. Dyaque tuna ecahuaiti jucuare peadya cuare peya cuare cuana tsehue. Mil sudaru cuana cuatsashaquiquetu bajida jucuare, Pablo dyaque ujeda eauju. Jadya tibudya tujatu sudaru cuana cuatsashacuare:

—Necuinanashaticue Pablo ecuita ducuque. Nedujunucacue ecuana aniyaju tuhua icuenetaquiju, —jadya tujatu ecana acuare.

¹¹ Tumeque metatu Pablo Ecuana Cuatsashaquira cabamereti ishu acuare.

—Banuchi, Pablo. Bajida juume. Cuejataqui tuque micue Jerusalénju cuanaque ique eje bucha juhuaque. Romaju cuanaque tumebaedy micue ecana cuejataqui, —jadya tujatu acuare Pablo.

Israelita cuanara Pablo iyecara acuaque

¹² Huecacanucatsutu umae fariseo cuana quisaraticuare Pablo eje bucha iyee aishuque:

—Neiyera Pablo. Arama, ijima jadya nejura tuque iyeya tupu. Iyeya ama ni ecuanara, Yusura nenerecatu-rara, —jadya tuna jucuaque tuna cama.

¹³ Jetiama tuna en jucuaque tuque iye ishu. Pushi tunca ecuita dyaque cuitadya tuna jucuaque. ¹⁴ Pablo iye ana aatsu tuna cuacuare pae cuanaja huaraji cuana queja, tumbaedy a israelita emuiba cuana queja, tuna tsehue quisaratira.

—Dutyara tupudya tuque ecuaana inime tupuhua Pablo iye ishu. Tumeque iyetsu piisi araara, ijiji jadya nejura. Jadya ama ni ecuaana aya, Yusura nenerecatu-rara. ¹⁵ Jadya tuque ecuaana inime bajejehua. Micuana umae huaraji cuanara jadyara nebacacue mil sudaru cuana cuatsashaquique Pablo ecuaana queja cuadisha ishu. “Ecuana ratu Pablo quisaratiyaju bacacara aya jari”, jadya neacue. Ecuana ecuaana ediji jiruru catehua juya tuque micuana queja junatimajudya iyetsa ishu, —jadya tunajatu israelita cuanaja huaraji cuana aticuaque.

¹⁶ Pabloja ebuqueratu bacacuare tumeque ecuita cuanara tuja ecucuque iye ana ayaque. Cuacuaretu ebajarara sudaru cuanaja eanicuaque, Pablo cuejara. Nubitsutu ehue ebari tuatsehue quisaraticuaque. Cuejacuaque tujatu ai tura bacahuaque. ¹⁷ Pablora tu jadya bacatsu ihuaracuare cien sudaru cuana cuatsashaquique:

—Dujucue riyaque ehue ebari mique cuatsashaquique queja. Aniya tujatu ai cueja ishuque, —jadya tujatu acuare.

¹⁸ Jadya ahuaju tujatu ehue ebari dujucuaque Claudio Lisias queja.

—Pablo erisi netiyara ihuaramerehua. Bemerehua tura ique riyaque ehue ebari rehua miaqueja, ai tuja cueja ishuque aniya baatsu, —jadya tujatu acuare.

¹⁹ Tumetu Claudio Lisiasra ehue ebari peya queja duju acuare, tura cuejayaque peya cuanara ebacauju.

—¿Ai mira cuejacara aya? —jadyatu Lisiasra bacaduracuare.

²⁰ —Israelita cuanaratu ecue ecucu Pablo iye ishu inime bajejehua. Era tuna bacahua tuna cama quisaratiyaju. Metajudya tunarami bacananucaya Pablo micue tuna queja cuadishanuca ishu. “Pabacanuca ecuaana quisaratiyaju”, jadyami israelita huaraji cuanara anaya. ²¹ Ejeneume ecana. Jadya ijahuee tunarami acara aya. Pushi tunca cuana ni tuna catehua juya ediji jiruru, ecue ecucu cuetiyaque ihua. “Yusura nenerecatu-rara ecuaana Pablo iyemaque araara, ijiji jadya juyaque juatsu”, jadya tuna jubarehua. Amena tuna ecabajejeti. Mira cuadishayaque bahue juyaque camadya tunajatu ihuaya, —jadya tujatu acuare.

²² Tumetu Lisiasra isaratsu cuadishacuare:

—Cuejaume ni ejequedya jutidya mira ique bahue amerehuaque.

Jadya cuejatsu tujatu cuadishacuare ehue ebari tuja etareju.

Pablo Félix queja cuadishatanacuareque

²³ Ehue ebari diruhua jutu Lisiasra ihuaracuare beta sudaru cuana cuatsashaquique ecatsé.

—Nebajejecue sudaru cuana Cesarea jucaishu. Las nueve chineju necuinanacue. Beta ciento sudaru nedujucue. Tumbaedy nedujucue beta ciento nucadya piya junudaque mare bahue cuanaque. Pacarucu tunca tuna cahuaque eque cuanucayadya. ²⁴ Nebajejecue cahuaque Pablo cahuaque dyaque eque cuaisu. Jida narutsu Félix queja nejunaticuare, Cesarea enaruqui queja. Chacha tuque Pablo junatishacara aya, —jadyatu Lisiasra acuare sudaru cuanaja huaraji ecatsé.

²⁵ Lisiasratu quirica hueneacuare Felixja ishu, tuna tsehue cuadisha ishu.

²⁶ “Riya micue quirica cuadishaya, Félix. Miquemi ecuanaja emuque neri enaruquique. Ique Claudio Lisias. Isaramereya mique era. ²⁷ Cuadishaya rique miaqueja peadya ecuita erisque Pablo bacani. Israelita cuanaratu risimerechine. Iyejerichine tunaja tuque. Tuja quirica cuana Roma juque enaruquija ebacani equiyatique bahue juatsu, cuachine ecue sudaru cuana tsehue tuque inajacamerera. ²⁸ Ique bahue jucara juchine eje bucha juatsu tuna tuatsehue cahuaque. Tume tuque dujumerechine israelita cuanaja huaraji cuana ecasitatiju. ²⁹ Tuque patu Moisésra israelita cuana cuatsashacuare eque ama juya. Jadya ama buchatu tura ni ai jidamaque achine ama ecuanaja cacuatsashati eque. Ecue ishu tu tuyu ama risi, etare apudaju isha jadya aishu.

³⁰ Tume tuque bacatsachine israelita cuanaja amena inime ebajejeque tuque iye ishu. Jadya bahue juatsu tuque miaqueja cuadishaya. Tuque ujeu baqui cuanaque tuna cuejachine: ‘Necuaque Félix queja. Necuejaticue Pablo eje bucha jidama juchineque’ jadya tuna achine tuque inacara juya cuanaque. Riya tupu camadya,”

jadyatu Lisiasra quirica Cesarea juque enaruquija cuadisha ishu hueneacuare.

Jadya hueneacuare tujatu sudaru cuana tyacuare quirica, Félix tunaja tyati ishu.

³¹ Tumetu sudaru cuanara Pablo dujucuaque tuna cuatsashaquira amerehua baedy a. Inatsu tunajatu dujucuaque tumeque chineju Antipatria juca. Cahuaque eque tuna cuacuare. ³² Peya huecacatu sudaru cuana ehuaque eque cuacuare cuanaque judirunucuaque tunaja eanicuaque. Pablo, cahuaque dyaque eque cuanaque jadya tuna cuacuare dy a jutidya Cesarea juca. ³³ Tuhua junatitsu tuna Félix enaruqui queja cuacuare. Tyacuare tuna quirica Lisiasra cuadishahuaque.

—Jeedy a Pablo, miaqueja ecuaana cuatsashaquira cuadishamerechineque, —jadya tunajatu acuare.

³⁴ Enaruquiratu quirica isaracuare. Quirica isara amena aatsu tujatu Pablo bacaduracuare:

—¿Ejeque yahua juque mique?

—Cilicia yahua juque ique, —jadyatu Pablora enaruquique acuare.

³⁵ Tuque jadya bacatsu tujatu jadya acuare:

—Mique ujeu baqui cuanaque junahuaju, mique ihuaramereya mique quicuenetiyaju baca ishu, —jadya tujatu Pablo acuare.

—Neiyacue Herodesja etare eaju. Tuhua nenarucue, tuque ehuanauju, —jadyatu Felixra acuare tuja sudaru cuana.

Israelita cuanara Felixja yacuaju Pablo eje bucha juhuaque cuejacuareque

24 Pishica huecaca juatsutu pae dyaque muidaque Ananías bacani junaticuare Cesareaju. Umae israelita cuanaja huaraji cuanatu tuatsehue junaticuare. Tumebaedyatu juticuare peadya ecuita eje bucha juhuaque cuejaquique, Tértulo bacani. Tumeque ecuita cuanatu cuacuare enaruquique Félix queja, eje bucha juatsu ecana Pablo tsehue cahuitiyaque cuejara. Tuna junatihuajutu Felixra sudaru cuana queja Pablo quetimerecuare. ² Tunara Pablo junatiquerhua-jutu Tertulora cuejatibunecuare Pablo eje bucha juhuaque. Isaracuare tujatu Félix:

—Isaraya mique era, enaruqui emuinerique. Mira ecuana dyaque jida naruya tibu, aniya ecuana rehua jida inime tsapema, jidama inime cuanaju nubima. Miquemi dyaque bahueque. Miratu dyaque ahua ecuanaja jida ishu. ³ Ecuana naruquique, muiya mique ecuanara. Yusrupai mique ecuana aya, dutya ecuanaja jida ishu mira aya tibu, jida ecuana mira naruya tibu. ⁴ Bahue ecuana mique dyaque cuita emajaca aijamaque ecuana quisariatiyaju baca ishu. Jadya tibudya nercabacue ecuana. Riya piji cuita ecuana ijacabacacue. ⁵ Jeeque ecuita Pablo ri inime yuamaturaque. Sicacatura bahue tujatu dutya. Turatu bahuityaya iyacuaque bapeque. Jadya juatsu tujatu israelita cuana dutya quejaque cahuitishaya. Tuquetu Jesús Nazaretju anicuare queja ecatyati cuanaque cuatsashaquique. ⁶ Turatu Yusuja etare asicaturachine, israelita amaque tuhua nudyatsu. Ecuannaratu becara achine inime jidama cuanaque bajejequi queja, tudya inime metse jadya ama juatsu aijama jadique bahue ishu. ⁷ Ecuannara bajejecara ayajutu sudaru cuana cuatsashaqui Lisias ecuana queja cuachine. Dyaque casada tsehue tura ecuana secatichine. ⁸ “Pablo ujeu baqui cuanaque tuna cuataqui Félix queja, tuja inime bajeje ishu”, jadyatu juchine. Jadya tibudya ecuana jehua mi-queja, enaruquique. Midya cuitadya tuatsehue quisaraticue. Tuque isaratsumi bahuedya juya tudya inime metseque, ecuanara aya bae cuitadya, —jadyatu Tertulora Félix cuejacuare.

⁹ —Tertulotu yuneri quisaratiya, —jadya tuna jucuare dutya israelita cuanaja huaraji cuana tuhua jucuare cuanaque.

Pablo Felixja yacuaju quicueneticuareque

¹⁰ Tumetu enaruquira tuja emetucu tsehue piye cuejacuare Pablo quisarati ishu. Jadya juatsutu Pablo quicuenetitibunecuare Felixja yacuaju.

—Isaraya mique era, emuique neri enaruquique. Ique pureama juya micue yacuaju quicuenetiya cabatitsu, mique ecuana naruquique eje uma mara juacuare tibu. ¹¹ Peadya tunca beta earacana huecaca piji di taa ique Jerusalénju Yusu muiya cuachineque. Miquemi bahuedya riyaque yuneriye. ¹² Arepa ique Yusuja etareju ama bucha, ni eje tsehue ique cati cati juhua ama. Ecuita cuana sicacatura ique juhua ama. Ni ejeque buchique tuque Yusuja etareju eje bucha ahua ama, caradati ishuque etare cuanaju, ni eje queja buchique. ¹³ Arepa tunara erapa ecuita cuana sicacaturaya jadya aya ama bucha, yuneri ama tuque. Tunaratu ebamereu ama tunara erapa jidama ahua jadique. ¹⁴ Erami cuejayadya ique eje buchique. Eratu muiya Yusu ecuanaja baba cuanara muicuareque. Muiya tuque era iyacuaque inime eque. Dutya jujeri israelita cuannaratu jeeque iyacuaque inime jidama bucha adebaya. Jadya ama tuque. Eratu ejeneyadya dutya Moisésra hueneacuareque, tunara ejeneya baedya. Tumebaedya tuque ejeneya Yusu equeque quisarati cuejaqui cuanara hueneacuare cuanaque, tunara ejeneya baedya. ¹⁵ Eratu ejeneya majutsu ecuana dutya chacha netitsuranucabuqueque. Jida cuanaque, jidama cuanaque jadya tuna chacha netitsuranucabuque. Israelita cuannaratu ejeneyadya. ¹⁶ Jadya tibudya eje bucha jida jucara juya Yusu cahuitisha ishu ama ni ecuita cuana.

¹⁷ “Eje uma mara cuana peya yahua queja Jesúsja quisarati cuejayaque junenitsu, juetinucachine Jerusalénju. Juetinucachine ique nercada cuanaque tunaja ishu chipiru sitachineque tyara, tumebaedya era tyaana ahuaque Yusu tyara. ¹⁸ Umae israelita cuana Asia yahua cuanara bachine Yusuja etareju, ique tuhua ecuanaja bahue quibetira cuahuaju. Casitatishabarechine ama tuque ecuita cuana. Capuritishabarechine ama tuna era. ¹⁹ Eatsehue tuhua catsurutchine cuanaque tuna iyacua cuita rehua ama. Tunara ique jidama juchineque cuejacara ayaque juatsu, tuna jetaqui micue yacuaju. Tunajadya ni aniya ique jidamaque juchineque cueja ishu, tunara cuitadya cuejacue. ²⁰ Ique Jerusalénju juchine patya tunara dujuchine israelita cuanaja huaraji cuana dyaque inime metse queja. Umae rena rehuedya iyacua cuita. Tunarami iyacua cuitadya ecuejau tunara ique ni aiju buchique jucha metse bachineque ama. ²¹ Tunaja yacuajudya ique quisaratichine. ‘Iyacua riyaque huecaca micuanara behua micuanaja yacuaju era emaju cuanaque chacha netitsuranucabuqueque ejeneya baatsudya jutidya’ jadya tuque huaraji ecuatashaqui cuanaque achine. Era jadya ejeneya baatsu tunara iyacua iquepa jidama juchine jadya aya, —jadyatu Pablora Félix acuare.

²² Felixja patu eje uma baca ea jucuares Jesús queja ecatyati cuanara ejeneyaque. Jutaquijutu aijamadya tumeque huecaca cuejanuca ishucue.

—Neiyara jari riyaque quisarati iyacua. Lisias junaahuaju tuque bacanucaya micuanara ique cuejacara ayaque, —jadyatu Félix jucuares.

²³ Tume tujatu acuare cien sudaru cuana cuatsashaquique:

—Tachicue jari Pablo. Ujeda ujeda camadya aume. Bacuedya jutidya tuja iyuhueda cuanara bayaju. Patyadya tuna tura ai sareya cuanaque, —jadyatu Felixra acuare.

Pablo, Félix, Drusila jadyaja yacuaju quicueneticuareque

²⁴ Eje uma huecaca juatsu cuanatu Félix junatinucacuares tuja ehuanecue Drusila tsehue. Tumeque epunatu israelita jucuares. Felixratu Pablo ihuaramerecuare. Turatu bacanucacara acuare eje bucha catyatie Jesucristo queja juishucue. Tumetu Pablora pana cueja anucacuares Jesucristo eje buchique, eje bucha catyatie tuaqueja jutaquique.

²⁵ —Yusuja biji eque ecuanana anitaqui. Ecuana taca pana canaruti ecuanana jutaqui, tura cuatsashaya eque juishu. Yusura ecuanana aya ecuanana cuitadya jutidyapa ecuanana capureamaturatitaqui ama. Tuquepa tuque ecuanana pureamaturatitaqui jadya. Ejeque huecaca ecuanana dutya Yusuja yacuaju cabameretibuque. Tumeque huecaca tura ecuanana abuque ejeque jida, jidama jadya, —jadya tujatu ecatsa acuare.

Riyaque quisarati bacatsutu Felixra dyaque inime tupucuares, tuque eje uma jidama juhuaque caadebatitsu.

—Dirucue iyacua. Peya huecaca emajaca aniyaju mique ihuaramerenucaya, —jadya tujatu acuare Pablo.

²⁶ Felixratu Pablo inajacamerecarama acuare. Eje uma ihuaramere tujatu acuare tuatsehue quisarati ishucue. Quinajacamereiti ishucue Pablora chipiru tsehue etsujetyau bucha tujatu inime jucuares. ²⁷ Beta mara junucatsutu Félix enaruqui jujacacuares. Enaruqui jujacatsutu tujatu Pablo inajacamerecuare ama, israelita cuana tsehue jida jucara jucuares tibu. Porcio Festotu Cesareaaju enaruqui jutibunecuares Félix cuarequi.

Pablo Festoja yacuaju dujutanacuareque

25 Tumetu Festo judirucuares Cesareaaju, tumeque yahuaju aniya cuanaque narutibune ishucue. Quimisha huecaca juatsutu cuinanacuare tumeque epu juque Jerusalénju cuaishu. ² Tuque junatihuajutu pae cuanaja huaraji cuana tsehue, israelita cuana dyaque inime metse cuanara jadyatu Pablo jidamapa ejuu jadya cuejacuares, Pablo tsehue dyaque cahuaitya tibu.

³ —Nerecabacue ecuanana. Pablo quetimerecue. Pajunanuca Jerusalénju, —jadya tunajatu Festo acuare.

Jadya tunajatu acuare, tunara Pablo Cesareaaju, Jerusalén dijiju iyecara aya tibu.

⁴ Festora tuna acuare:

—Aijama, Pablo paani jari Cesareaaju. Ejetsunue juatsu ama tuhua judirunucaya. ⁵ Umae huaraji cuanatu eatsehue cuataqui. Pablo ni aiju jidama juchine, necuejacuedya ique tuhua tuque eje bucha juchineque, —jadya tujatu ecana acuare.

⁶ Peadya tunca huecaca Jerusalénju aninucatsutu Festo Cesareaaju dirunucacuares. Peya huecacatu nubicuares enaruqui inime bajeje ishucue. Nubitsutu tuhua anibutecuare.

—Nebecue requeja Pablo, —jadya tujatu sudaru cuana acuare.

⁷ Israelita cuanaja huaraji cuana tuatsehue Jerusalén juque judiruhua cuanaque tuna tuhua casitaticuares. Sudaru cuanara Pablo juquerediruhuajutu israelita cuanara jipeticuares. Tunaratu Pablo jidama juchineque cuejatibunecuares:

—Pabloratu dyaque jidamaque ajacaya ama, —jadya tuna jubarecuare.

Jadya ama bucha

—¿Ai cuita jatsu tujatu jidama ahua? —jadya Festo juyaju, ai cuejataqui ama tunajatu bacuares.

⁸ Pablotu jadya jucuares tuta taca catachiti ishucue:

—Eratu ni ai jidamaque ahua ama. Ique israelita cuanaja cacuatsashati eque anijacahua ama. Ique Yusuja etareja ishucue jidama quisaratihua ama ni riyapiji buchique. Eratu ni ai buchique jidama ahua ama Romajuque enaruqui tsehue, —jadya tuna Pablora acuare.

⁹ Festoratu israelita cuana pureamaturacara acuare. Jadya tibudya tujatu Pablo jadya bacaduracuare:

—¿Cuacarami juya Jerusalénju, tuhua ecue yacuaju quicueneti ishucue? —jadyatu Festora acuare.

¹⁰ —Aijama. Cuacarama juya tuhua. Riyadya ique micue yacuaju. Ique iyacua cuita Roma juque enaruquiramepehuaja yacuajudya. Rehuadya bacacue ique quicueneti ishucue quisariatijaju, Jerusalénju ama. Ique ni riyapiji buchique israelita cuana tsehue jidama juma. Miratu adebayadya riyaque. ¹¹ Ique ni huaraji cuanara cuatsashaya eque ama juya, ique ni aiju jidama juhua, tume tunara paiyedy. Majucarama amadya juya ique. Yuneri ama ni tunara ique eje bucha juhua jadya ayaque, jutaquiju taa ique aija buchique inatsu tuna queja tyataqui ama. Cuadishacue jutidya ique Roma juque enaruquique dyaque arida queja. César queja cuadishacue. Tura ique pacueja jucha metse, jucha metseque ama jadique, —jadyatu Pablora Festo acuare.

¹² Festotu quisaraticuares tuja dyaque bahue cuana tsehue. Quisarati amena juatsutu:

—“Cuadishacuepa ique César queja. Tura ique pacueja ique jucha metseque, jadya ama juatsu aijama jadique”, jadya mira ahua. Jutaquiju jadya mique aya. Tuequedy mique cuadishaya, —jadya tujatu Pablo acuare.

Festo ecuari Agripa tsehue Pablo eje buchique quisarati aquerecuareque

¹³ Eje uma huecaca juatsu cuanatu ecuari Agripa, tujaja enajique Berenice tsehue, junacuare Cesareaju, Festo isarara. ¹⁴ Tuhuadya tatse eje uma huecaca jucuaire. Tuque tuhuajudyatu Festora cuejacuare Agripa, Pablo eje buchique:

—Rehuari aniya ecuita erisique Pablo bacani. Felixratu risimerecuare. Tuque enaruquique jujacayara tujatu inajacamerechine ama. ¹⁵ Ique Jerusalénju juchine patya pae cuanaja huaraji cuana, tumebaedy israelita cuana emuiba cuanaque jadya tuna jechine eaqueja. Tunaratu Pablo bijidamadura neri aya. Tumeque ecuita patu jidama juchine. Iyemerecuapa. ¹⁶ Jadya bacatsu tuna jadya achine: “Tuyu ama tu ‘Pamaju’ jadya aishu, quicueneti ishu emajaca tyamaque jidamatu juchine jadya cuejaqui cuanaja yacuaju. Romajuja cacuatsashati eque tuque ecuanaja “Pamaju” jadya ataqui ama, tuque icuene quicueneti ishu quisararishamaque. ¹⁷ Tume tuna jechine rehua. Tuna requeja jehuaju ique tsunutachine ama tuna baca ishu. Huecacape piji cuitadya cuachine ecue inime bajeje ishuj. Tuhua anibutetsu tuque ecuita quetimerechine.

¹⁸ Tume tunara cuejachine tuna ecahuaiti tibudya jutidya. “Riyaqueri Roma juque enaruquija cacuatsashati eque ama juhua”, tunara jadya aya bucha tuque ecue inime juchine. ¹⁹ Jadya eauque, tuna achine: “Pabloratu Yusu muiya ecuanaja baba cuanara ecuanara amerecuare eque ama. Tuquetu ejeque Jesús bacani queja nimeeque cuana. Tumeque Jesústu majuhua. Pablora bacue aya: ‘Majuma tuque. Chacha tu enetitsuranuca’ jadya”, jadya ique israelita cuanara achine Pabloju.

²⁰ Eratu adebataqui ama cuita bachine dutya riyacuanaque. Jadya tibudya tuque Pablo bacadurachine: “¿Cuacarami Jerusalénju juya? ¿Catachiticarami juya tuhua ecue yacuaju?” jadya Pablo bacadurachine.

²¹ Pablotu Jerusalénju cuacarama juchine. “Cuadishacue ique César queja. Tura ique pacueja ique jucha metseque, jadya ama juatsu aijama jadique”, jadya tura achine. Tume tuque ecue sudaru cuana cuatsashachine: “Jida nenarucue riyaque erisique. Tuequedy tuque Romaju César queja cuadishaya”, jadya tuque sudaru cuana achine, —jadyatu Festora Agripa acuare.

²² —Eratu bacacaradya aya quisaratiyaju tumeque ecuita, —jadyatu Agripa acuare.

—Jidadya. Metajudya tuquemi quisaratiyaju bacaya, —jadyatu Agripa acuare.

Pablo Agripa, Berenice jadyaja yacuaju nityatanacuareque

²³ Huecacatsutu juticuare Agripa, Berenice tsehue huaraji cuana jidamaque inime bajeje ishu caradati bahue etareju. Cajututicuarepa tatse ejutuqui jida tsuje arida tsehue. Sudaru cuanaja huaraji cuanara tatse tajicuare. Tumebaedy epu ebariju ecuita cuana

dyaque inime metse cuanaque tuna tatse tsehue nubiticuare. Festotu tuhuadya jucuaire. Turatu quetimerecuare Pablo. ²⁴ Festoratu dutya tuhua ecasitati cuanaque isaracuare:

—Isaraya mique era, ecuari Agripa. Isaraya micuana era, ecuita cuana ecuanaja epu aridaju inime metse cuanaque. Riyadya riyaque ecuita riyaquedy rique ecuanaba bacani bacachine. Ique Jerusalénju, eje uma israelita cuanatu eaqueja jutichine, riyaquepa jidama juchine jadique cuejara. Tuna tuna jechine rehua tuque jucha metse jadique cuejanuca ishu. Cuejajacama tunara aya tuque iyemere ishu. ²⁵ Quisaratiyaju bacatsu, ecuetu inime juya: “Turatu ni ai buchique jidama achine ama tuque iyetana ishu.” Tura cuitadya ique bacachine Romaju cacuadishamereti ishu, enaruqui Cesarja jucha metse, jucha metse ama jadique cuejatsa ishu. Jadya tura ique bacahua tibu, tuque cuadishayadya César queja. ²⁶ Cuadishataqui tuque ecue quirica, eje bucha juatsu tume erisique era cuadishayaque pana cueja aishu. Jadya ama bucha, ai eje buchique huenetaqui ama era baya, ique tura ai jidamaque achineque baecua tibu. Jadya tibudya micuana ihuarahua casitati ishu, micuanaja tuque quisaratiyaju baca ishu. Miaqueja neri neri micue yacuaju rique bemerehua, ecuari Agripa. Micuanara dutyara bacahuaju ni tura ecuejau eje bucha ecue quirica Cesarja ishu cuadisha ishu. ²⁷ Eje bucha cuadisha ataqui ama ejeque erisique jidama ejuque ecuejaque, —jadyatu Festora huaraji cuana acuare.

Pablo Agripaja peya huaraji cuanaja yacuaju jadya quicueneticuareque

²⁶ Tumetu Agripa Pablo isaracuare:

—Iyacu cuita quicueneti ishu quisaraticue. Jadya ayajutu Pablora ebi huesacuare ecuari isara ishu. Tuque jucuaireque tujatu quisarati atibunecuaire:

² —Isaraya mique era, ecuari Agripa. Ique pureama juya, micue yacuaju quisaratiya cabatitsu. Miquemi huaraji dyaque emuique. Israelita cuanara achine, erapa jetiama ai jidama cuanaque achine jadya. Jidadya tu ique micue yacuaju quicueneti ishu, tunara ique eje bucha juchine jadya ayaque pusha pushaque mique bahue juishu. ³ Ecuari Agripa, miratu jida adebaya ecuanara israelita cuanaja bahue. Miratu adebaya ecuanara eje buchique caquemitsati caquemitsati ishu ayaque. Jutaquiju nercabacue ique; ique quisaratiyaju cahuitima baca acue, —jadyatu Pablora Agripa acuare.

Pablo Jesús queja catyatima jariju eje bucha anie jucuaireque cacuejaticuareque

⁴ Pablotu cacuejatinucuaire:

—Duty israelita cuanaratu adebayadya ique yuequedy Moisésja cacuatsashati eque jujacacuareque ama. Ecue epuju cuitadya, tumebaedy Jerusalénju jucacuare ama ecuanaja baba cuanaja bahue cuana eque. ⁵ Riyaque israelita cuanara cuejacara aatsu,

pacueja; ique quisaratiyaque tu yunerique. Tunaratu adebayadya ique yuequedy fariseo jucuaque. Peya cuare israelita cuana bucha dyaquetu fariseo cuana cacasatiya cacuatsashati cuana eque ani ishu. ⁶ Béru yuequedy patu Yusura acuare israelita cuana: “Eratu emaju cuanaque chacha nityatsuranucabuque” jadya. Eratu pana ejenedya aya Yusura eje bucha aana acuareque adadibuqueque. Era jadique ejeneya baatsu tunara micuanaja yacuaju behua. ⁷ Dutya jujeri israelita cuanaratu ejeneya Yusura dutya emaju cuanaque chacha nityatsuranucabuqueque. Peadya tunca beta earacana Israelja ebacua cuanaque eque ejuracana cuanaratu jadique ejeneya. Jadya tibudyatu ecuanara israelita cuanara Yusu muijacaya ama. Huecada tupu, meta tupu jadya tuque ecuanara merejacatsu ama mereya. Amena iyacua, ecuari Agripa, riyaque israelita cuanara “Iquepa jidama juya” jadya aya, era Yusura emaju cuanaque chacha nityatsuranucabuque jadique ejeneya baatsu, —jadyatu Pablora Agripa cuejacuare.

⁸ —¿Eje bucha juatsu jatsu tuque micuana Yusura emaju cuanaque chacha nityatsuranucayaque ejeneya ama? —jadyatu Pablora tuhua cuanaque acuare.

⁹ Pabloratu Agripa cuejanucacuare, dutya tuhua cuanara quisaratiyaju bacayaju:

—Icuenetu era Jesús queja ecatyati cuanaque dyaque jidama acuare. Eratu jida bucha bacuare, Nazaretju anicuare queja catyatiya cuanaque jidama au. ¹⁰ Ijahue jahue tuna era acuare Jerusalénju. Jetiama tuna etare apudaju ishamerecuare Jesús queja ecatyati cuanaque. Jadya tuna acuare pae cuanaja huaraji cuanaja yanaju. Jesús queja ecatyati cuanaque iyetanayaju, ique dyaque pureama jucuaque. ¹¹ Eje uma nerecaturae tuna ahua Jesús queja nimee amerejacacara aatsu. Casada tsehue tuna “Jesús tu Mesías ama” jadya amerecara ahua. Nubinubini bahue juhua caradati ishuque etare cuanaju tuna sare juyaque. Dyaque nime jidama ecahuaiti ique juhua tuna tsehue. Japada epu cuanaju cuabahue juhua tuna sarera. Dadsitu tuna ecue nerecatura bahue juhua, —jadya tuna Pablora acuare.

Pablo eje bucha cacuairetie inime jucuaque cacuejaticuareque
(Hch 9.1-19; 22.6-16)

¹² Pablo cacuejatinucacuareque:

—Peya huecada ique cuacara jucuaque Damascoju Jesús queja ecatyati cuanaque inamerera. Pae cuanaja huaraji cuanara cuatsashacuare jadya ique juishu.

¹³ Ique jadya jucuaque mique cuejaya, ecuari Agripa. Ediji eque cuayaque barepatya cuana ni barepa eque huecara pana udatilla atsacuare. Tumeque huecatu jucuaque ijete bucha dyaque huecada. Udatsacuare tura ique, eatsehue cuaya cuanaque jadya. ¹⁴ Dyaque cuita bajida juya tibu ecuanara huipuchitanatsu yahua ru-mucuta rihui jucuaque. Tume Ecuana Cuatsashaquira isaracuare hebrea yana eque: “Saulo, Saulo, ¿eje bucha juatsu mira nerecaturaya? Mira ique bijidamaduraquemi mita tacadya jutidya jidama catiya. Juye tu-

ta tacadya jutidya enimetsequera muyayaju acui tapat-su ujeda ecitimereu buchique mique”, jadya tura acuare. ¹⁵ “¿Aira isaraya?”, jadya tuque acuare. “Ique Jesús, idya mira nerecaturayaque. ¹⁶ Netitsuracue. Erami mepehua ique merequi juishu. Mepehua mique era, peya cuana micue mira ique bahuaque cueja ishu. Cuejacue ecana mique era eje bucha ameredadiyaque. ¹⁷ Mira tuna ique eje buchique dutya queja cuejadadiya. Narubuque mique era, israelita cuanara, israelita ama cuanara jadya eiyeju. ¹⁸ Israelita ama cuanara queja cuita mique cuadishaya, ecue quisarati yunerique cuejati ishu. Cuadishaya mique era, tuna Yusura cuatsashaya eque jujaca ishu ama, tuna Yusuja biji eque anisha ishu. Cuadishaya mique era, tuna Satanásra cuatsashaya eque jujacatsu, Yusura cuatsashaya eque camadya ani ishu. Cuadishaya mique era, tuna eaqueja catyati ishu. Tuna eaqueja catyatiyaju tunajatu Yusura jucha cuana apupashaya. Tura tuna tyadadiya jidaque tura tuja cuanaque tyaana ahuaque”. Jadya eque Jesúsra cuadishacuare riyaque quisarati cueja ishu, —jadyatu Pablo cacuejaticuare.

Pablo Yusura amereya eque jucuaque cacuejaticuareque

¹⁹ Pablo quisaratinucacuareque:

—Acuaedy tuque Jesúsra barepa juque cabameretitsu tura amerecuareque, ecuari Agripa. ²⁰ Jadya juatsu catibuticuare Jesúsja jidaque quisarati, Jesús eje buchique cueja. Icuene cuita tuna Damascoju aniya cuanaque cuejacuare. Tuequedy tuque Jerusalénju aniya cuanaque, Judea yahua juaniya cuanaque jadya cuejacuare. Israelita cuana, israelita ama cuanaque jadya tuna Jesúsja quisarati cuejaajecuare. “Necacuareticue inime. Nebijiseriume cajuchati. Jesús queja necatyaticue. Jidaque neacue, peya cuanara yuneridya micuana Jesús jaque juishu inime cacuaireti-huaque baishu”, jadya tuna cuejajacuare ama. ²¹ Jadya cuejae quisarati aya tibu, israelita cuanara inacuare Yusuja etareju. Iyecara ebari tunara acuare, era Jesús eje buchique cuejaya baatsu. ²² Jadya ama bucha Yusura tsahuajacahua ama, ni narujacahua ama. Iyacua ique Jesúsja quisarati cuejacuejani juya. Inime metse cuanaque tumbaedy ecuita jetiedya cuanaque jadya tuna era cuejaya. Cuejaya tuque Moisésra hueneacuareque. Cuejaya tuque tumbaedy Yusu equeque quisarati cuejaqui cuanara hueneacuareque. Era cuejayaque ri tunara, jadyatu judadiya, jadya acuareque. ²³ “Mesías patuna nerecaturadadiya. Iye jadya patuna abuaque”, jadya tuna jucuaque. Tuquepa icuene emajuque netitsurabuque, majunuca ishu ama. Turapa Yusu queja judiru ishuque quisarati tsapebuque israelita cuana, israelita ama cuanaque jadya. Ude tsehue udatsu ecuanara eje eque cuayaque ebau bucha, jadyapa tura ecuanara Yusu queja judiru ishuque bahue amereya, jadya tuna jucuaque. Jadya tunajatu béru yuequedyadya hueneacuare, —jadyatu Pablora cuejacuare Agripa, tuhua jucuaque cuanaque jadya.

Pablora Agripa Jesús queja catyatishacara acuareque

²⁴ Festoratu baca anicuare Pablora quicueneti ishu quisarati ayaju. Tuque jadya quisariatijutu Festo jebuda quisaraticuare:

—Miquemi equijahuati, Pablo! Riya cuanaque dyaque inime tupurami quijahuatishaya, —jadya tujatu acuare.

²⁵ —Aijama. Equijahuati ama ique, ecue emuique enaruquique Festo. Era inime tupuyaque tu yunerique. Dyaque bahue cuanara inime tupuyaque tume.

²⁶ Riyadya rehua ecuari Agripa. Bajida tsehue ama tuja yacuaju quisaratiya. Turatu adebayadya ique yuneri quisaratiyaque. Turatu adebayadya Jesús eje bucha juhuaque. Etehua amatu jadya juhua, dutyaja yacuaju, —jadyatu Pablora Festo acuare.

²⁷ Tuequedyatu Pablora ecuari Agripa isaranucacuare:

—Ecuari Agripa, ¿ejenyadyami beru Yusu equeque quisarati cuejaqui cuanara huenecuareque? Eratu adebaya mira ejenyaque, —jadyatu Pablora acuare.

²⁸ Agriparatu quemitsacuare:

—Riya piji bacameretsu Jesucristo jaque amereya bucha tuque micue inime juya, —jadya tujatu Pablo acuare.

²⁹ —Dyaque jidami Jesucristo queja catyatitaqui, iyacua cuita, jadya ama juatsu eje tupu. Dyaque jida taa mique cuita camadya ama, dutya rehua cuanaque tumbaedy tuaqueja ecana ecatyatiu. Ique Yusu queja bacabacajacaya ama dutya micuana tuaqueja catyati ishu, ique tuaqueja ecatyati bucha. Jadya ama bucha, era micuana ique bucha erisi amerecarama aya, —jadyatu Pablora acuare.

³⁰ Pablo jadya quisarati amena juhuajutu Agripa, Festo, Berenice, tuhua anibutecuare cuanaque jadya netitsuracuare, tuhuaque cuinana ishu.

³¹ Cuinanayaque tunajatu quisarati acuare dutya tunara quisarati bacahua cuanaque.

—Riyaque ecuita Pablo ri jidaque. Tuquetu eje bucha ama juchine iyetana ishu, ni etare apudaju ishataqui ama, —jadya tuna jucuare.

³² —Juquena ama juchine “Roma juque enaruquira ique pacueja yuneridya ique jucha metse, jucha metse ama jadique”, era taa tu einajacamereu tumeque, —jadyatu Agripa Festo acuare.

Festora Pablo Romaju cuadishacuareque

27 Bajecucare tunajatu inime Pablo Italia yahuaju cuadisha ishu. Ique cuacuare tuna tsehue. Pablo, peya erisi cuanaque jadya tuna Julio bacani queja catyati atanacuare. Juliotu cien sudaru cuana cuatsashaquique jucuare. Sudaru cuana tura cuatsashaquiquetu “Roma juque ecuarija sudaru cuana” bacani jucuare. ² Cuacuare ecuana Andramito ebuteju. Tuhua junatitsu ecuana anibutecuare cuaba ebariju. Tumeque cuaba ebaritu jaratsuraajetaqui jucuare eje uma ebute cuanaju Asia yahuaju. Tuequedyacuana

cuinanacuare ebute juque. Aristarcotu ecuana tsehue cuacuare. Tuquetu Tesalónica epu juque jucuare, Macedonia yahua juque.

³ Peya huecaca ecuana junaticuare Sidón epuju. Julioratu Pablo dyaque tuja canerecabati tsehue bacuare. Emajaca tujatu tyacuare tuque cuajiti ishu tuja eadeba cuana tsehue tumeque epuju, tura ai sareya cuanaque tunaja tyatsa ishu. ⁴ Tuequedyacuana cuinanacuare Sidón juque. Tuhuaque cuinanayaquetu cuejiji jucuare ecuana queja peitana. Jutaquijudya ecuana cueticuare beni diji eque amaca eque ecububu Chipre bacani jiruru eque, cuejiji casadama jipenee juya eque. ⁵ Riquecuare tuque ecuana enaja ecuaque Cilicia, Panfilia jadya jiruru tuyu eque. Junaticuare ecuana epu Mira bacaniju, Licia yahua juque. ⁶ Tuhua ecuana tumeque cuaba juque cuinanacuare. Tuhuaryatu sudaru cuana cuatsashaquique bahue jucuare tumeque ebuteju peya cuana jarayaque, Alejandría juque junahuaque. Tumeque cuabatu Italia yahuaju cuayaque jucuare. Tuhuarya ecuana cuabaju iyabutyacuare Italiaju cuanuca ishu. ⁷ Cuejijira acuatsuruya tibu ecuana eje uma huecaca inime eque piji cuaba tsehue ajecuare. Dyaque masada tsehue ecuana Gnido barecuare tuhua jaratsuramaque. Cuejijija inime ecuana tuyu cuataqui ama cabaticuare. Jadya tibu ecuana cueticuare Creta ecububu beni diji eque amaca eque, cuejiji dyaque cuita ama juya eque. Salmón tuyu eque ecuanacueticuare. ⁸ Chamacama ecuana cueticuare tuyu cueti Creta jiruru eque. Chamacama ecuana jaratsuracuare ebuteju. Tumeque ebuteju “Capeneti Ishuque Ebute” bacani jucuare. Tumeque ebuteju juacuare Lasea epu peque.

⁹ Dyaque cuita ecuana tsunutacuare. Yusura jucha cuana apupashayaque adeba ishuque chinetu amena cueti jucuare. Ena eque eju cuaishuque dyaque mudaque maratu jueticuare. Cuejipa cuana juyaque maratu amena jueticuare, nei tumbaedy. Mudaque adebaya tibu tuna Pablora jida cuejacuare:

¹⁰ —Tata ecana, eratu dyaque muda baya ena eque cuanuca ishu. Cuabatu enubiu. Dutya ai cuabaju dujuyaque tuque ecuana eaputashau cuana. Ecuana cuitadya ecuana huiditsu emajuu, —jadya tuna Pablora acuare.

¹¹ Cuaba metseque, tuque aquereniquique tatse jadya jucuare:

—Aijama. Mudamatu juya. Necuanucaradya riyaque ebute juque, —jadya tatse jucuare.

Sudaru cuana cuatsashaquiratu tatsera cuejayaque jutidya bacacuare, Pablora cuejayaque ebacauque.

¹² Ebute ecuana jaratsurayaquetu jidaque ama jucuare cuaba jara ishu, dutya huecaca cuejipa cuana juya tibu. Jadya tibutu dutyajadya inime jucuare:

—Dyaque jida necuinanaradya rehuaque. Necuanucara peya ebuteju riyaque ecububu juque. Fenice ebuteju necuara. Tuhua necuetishara cuejipa cuana badaque mara cuana, —jadya tunajatu inime tupucuare.

Tumeque ebutetu nei diji, beni diji ecatse patya majaca jucuare.

Cuejipa jueticuareque

¹³ Cuejiji casadara ama inime equera piji adadihuaju, tunajatu inime jucuare:

—Necuaradya jutidya —jadya.

Tume ecuana cuanucacuare ebute juque Creta cububu jiruru eque.

Jadya tibudya tunajatu huesacuare metal bicuedaque ena ducu eque cuaba ina ishuque. “Capeneti Ishuque Ebute” juque cuinanatsu ecuana cuaba eque ajenuacuare Creta cububu peque eque.

¹⁴ Yaratupu juatsutu peya eque amaca eque cuejipa juetinucacuare. Acuatsuru jida tura ecuana acuare. Nei diji eque amacaquetu tabubu jueticuare. ¹⁵ Tumeque cuejipa casadaratu cuaba ebari tibene duju atibunecuaru. Acuatsurutaqui ama ecuana bacuare cuejipa. Jutaquiju ecuana cuejipa queja cadujumereticuare.

¹⁶ Cueticuare ecuana ecububu ashaasha Clauda bacani jiruru eque. Tumeque ecububuja beni diji eque amaca cuetiyajutu cuejipa casada cuita ama judirucuaru ecuana queja. Cuaba ebari tadajutu cuaba caca piji erisi jucuaru. Tumequetu cuaba ebari juque ai butyatsu mejijiju rada ishuque jucuaru. Chamacama tsehuetu cuaba ebariju mere juya cuanara cuaba caca piji huansicuacuare epucutanatereuju. ¹⁷ Tsurashacuare tuna ebarucue educuju. Tuequedya tuna ebajarara cuaba ebari sogaa arida cuana tsehue huayucuaru, cuaba ebari catsatanatsu epucutanatereuju. Anicuaretu emajaca deda cuita ama cuanaque, emajaca cuana patya mejijiquique. Tume cuanaque catsaqui juatsu cuaba ebari enubiujutu tuna bajida jucuaru. Jadya tibudya tunajatu cuaba ajeshaquique eraca junuda misida jadique butyacuare, cuejipara cuaba ebari mejiji queja duju eaju. Jadya cadujumeretie ecuana jucuaru cuejiji queja. ¹⁸ Cuejipa netiya ama baatsu tunajatu huecacatsu ijehuetibunecuaru tunara cuaba ebariju dujuya cuanaque. ¹⁹ Huecacanucatsutu cuabajutu mere juya cuanara cuitadya tunaja emetucu tsehue ijehuebarecuare cuaba ebariju dujuya ai aquereniya cuanaque, cuaba jatatsusha ishu. Enaju tunajatu ijehuecuare uma acui cuana, sogaa cuana, eraca junuda misida cuana cuaba ebari aquereni ishu erihua cuanaque jadya. ²⁰ Eje uma huecaca tuque ecuana bacuare ama ijeti. Eje uma meta tuque ecuana bacuare ama purari cuana. Majuya bucha ecuana cabaticuare, cuejipa casadaque netiya ama baatsu.

²¹ Eje uma huecaca ecuana arama jucuaru. Tumetu Pablora isaracuare dutya cuaba ebariju cuanaque:

—Tata ecana, cuejachinedya datse micuana era “Capeneti Ishuque Ebute” bacaniju jaratsura ishu jari. Micuanaradya bacacarama achine. Cuinanancataquimadya datse ecuana juchine tumeque ebute juque. Tuhuaque cuinanancachineque ama juatsu micuana caaputashatiquena ama juquena juhua dutya riyaque cuabajutu dujuya cuanaque, cuaba aquereni ishu cuanaque dyaque saretanaya cuanaque jadya.

Majujeriquena ama ecuana juquena juhua.

²² Necanimehuallatiume. Ni ejeque buchique ecuana majuya ama, arepa cuaba ebari nubitsu aputaya ama bucha. ²³ Chineju barepa juque Yusu tsahuaquira cabamereti ishu ahua. Yusu Nerira cuadishayaquetu juchine. Ique tumeque Yusu jaque. Eratu tumeque mereya. ²⁴ Isarahua tura ique: “Bajida juume, Pablo. Miquemi cabameretitaqui enaruqui dyaque arida queja. Romajumi jutitaqui. Yusu dyaque jida juya tibu, turami naruya. Turami majushaya ama ni ejeque miatsehue cuaya cuanaque”, jadya tumeque barepa juque jehua cuejanahua. ²⁵ Tata ecana, necacasaticue. Ique Yusu queja nimee. Eratu ejeneya. Juyadyatu tura barepaju etsahuaqui eque cuejamerehua bae cuitadya. ²⁶ Yusura ecuana naruya, arepa cuaba ecububu catsaqui juya ama bucha, —jadya tuna Pablora acuaru.

²⁷ Jadya jue ecuana mudaju peadya tunca pushi earacana huecaca judirucuaru. Chamacama ecuana ena Adriático bacaniju judirucuaru. Peya queja, peya queja duju jadya tucue ecuana cuejipara acuaru. Meta patyatu cuaba ebariju mere juya cuanaque bahuedya jucuaru ecuana yahua jipeajeyaque. ²⁸ Tupucuaru tuna ena eje deuque. Quimisha tunca shucuta earacana metrotu jucuaru. Riya piji cuanucatsu tunajatu tupunucacuare enaja dee. Deda cuita amatu jucuaru. Jucuaru beta tunca pacarucu earacana metro dyane. ²⁹ Bajida tuna jucuaru cuaba ebari tumu ebari cuana ejiruruju catsaqui ejuuju. Jadya tibudya tunajatu butyacuare pushi metal bicueda cuanaque cuaba nitya ishu. Bucunucacuare amatu cuaba ebari. Tuhadyatu neticuare. ³⁰ Cuaba ebariju mere juya cuanaque tuna huanacara jucuaru. Cuaba caca tunajatu enaju butyacuare, tuatsehue huana ishu. Ijahue acara tuna acuaru tuna cuatsashaqui cuanaque.

—Cuaba huitu quejaque metal cuaba nityaqui butyara ecuana cuaya, —jadya tunajatu acuaru tuna cuatsashaqui cuanaque, pusha pusha ayaque.

³¹ Pablota bahuedya jucuaru tuna huanacara juyaque. Jadya tibu tujatu Julio sudaru cuana cuatsashaqui cuejaticuare:

—Tumeque cuabajutu mere juya cuanaque tuna huanacara juya cuaba juque. Tuna ni cuinanaya, dutya micuana enaju majutereya, —jadya tujatu aticuare.

³² Jutajudiyatu sudaru cuanara tubucuaru sogaa cuaba caca risiquique. Tubuhajutu cuaba caca enaju pacacacuare. Pacacahuajutu ejurira japada dujucuaru.

³³ Apudajudya tuna Pablora dutya cuejahuecacacuare tunaja ai cuana piji ara ishu:

—Amena micuana peadya tunca pushi earacana huecaca dyaque ai bijiseri juyaque. Ni ai buchique micuanaja tupu eara. ³⁴ Araarataqui micuana cacasati ishu. Tsapeume inime. Ni ejeque buchique ecuana majuya ama. Dutyadya ecuana chacha juya, —jadya tuna Pablora acuaru.

³⁵ Tuna jadya aatsutu Pablora inacuaru pan. Inatsu tujatu yusurupai acuaru Yusu dutyaja yacuaju. Yusurupai aatsu tujatu cuesicuare. Cuesitsu tujatu aracuare.

³⁶ Tuque araaraya baatsu tuna cacasatitsu dutyadya araaracuare. ³⁷ Dutyaque ecuana jetiama ecuita cuaba ebariju jucuare. Beta ciento pacarucu tunca shucuta earacana ecuita ecuana jucuare. ³⁸ Araaracuare ecuana jequeya tupu. Araara amena juatsu tunajatu ijehuecuare enaju jetiama trigo bacani tunara dujuya cuanaque, cuaba jatatsusha ishu.

Cuaba ebari enaju nubicuareque

³⁹ Huecacahuajutu cuabaju mere juya cuanara ecua-bata bacuare japada. Baecua tuna jucuare ecuana ejuque. Adebataqui ama tuna yahua bacuare. Bacuare tunajatu mejiji camadya.

—Mejijiju cajipetishatsu quidutishacara neara cuaba, —jadya tuna jucuare.

⁴⁰ Cuanuca ishu ecana cabajejeticuare. Tubucuare tuna soga cuana ena ducu eque cuaba inaquique metal tisu. Soga cuana tubuhajutu metal bicuedaque enaja ecuaque dedaju pacacacuare. Pisubarecuare tuna etaruqui ecatsse cuaba tibu quejaque tatse tsehuedya inajenuca ishu. Nityatsuranucacuare tuna cuejijiju eraca junuda misida icueneque cuejijija cuaba bucucusha ishu. Tumetu cuaba jipetanaajecuare ejiruru queja. ⁴¹ Cuejijiratu cuaba ebari cuinanashacuare beta ejuri dijiju. Mejiji etihuesu catsaquitu jucuare. Cuaba ebari huitutu mejijiju caretacuare. Bucucunucataqui amatu cuaba jucuare. Cuaba ebari tibusu patsatana jida jucuare, ena pacu casadaradya jutidya. Jadya juhujutu cuaba ebari inime eque nubiajecuare. ⁴² Sudaru cuanaratu erisi dujuya cuanaque iyecara acuare, bet-sayaque tuna ehuanau bucha adebatsu. ⁴³ Sudaru cuana cuatsashaquiratu Pablo iyemerecarama acuare. Jadya tibudya tujatu ecana iyemerecuare ama. Betsa bahue cuanaque tujatu enaju pacacashamerecuare, uhuaju icueneta judiru juishu. ⁴⁴ Betsa baecua cuanaque tujatu cuaba juque taura cuana dyaque bet-sashacuare, tuna ehuidiuju. Jadya eque ecuana dutya chacha judirucuare uhuaju.

Pablo Malta bacani ecububuju eje bucha jucuareque

28 Ecuana dutya yahuaju judiruyaju ecuana tuhuaque ecuita cuanara tsurutsacuare. Tunara ecuana cuejatsacuare tumeque ecububu Malta bacanique. ² Tunara ecuana jida inime tsehue batsacuare. Ruqueniyacuare tuna jetiama etiqui, dyaque bada, nei jadya juya tibu.

—Nejecue. Nebahuinacue etiqui, —jadya tunara ecuana acuare.

³ Pablotu cuati urada cuanaque mepe jucuare. Etiquiju tujatu iyati iyati acuare. Cuati emaque tucue bacua dyaque ujedaque juanicuare. Tumetu etiqui uquera tuhuaque cuinanashacuare. Pabloja ebiju cahuayutitsu tujatu emetucuju acuare. ⁴ Tuhua aniya cuanaque tuna tuja ebiju bacua ecahuayuti baatsu jadya cacuejati-barecuare:

—Riyaque ecuita ni taa ri quiyeti puji. Enaju emaju-que chacha juhua ama bucha tume taa ri bacuara ahuaju majuya, —jadya tuna jucuare.

⁵ Pabloratu bacua itatacuare etiquiju. Eje bucha ama cuitadyatu jucuare. ⁶ Dutyara tunajatu bacuara ahuaju mujateretsu masadama majuya bucha bacuare.

Tsunuda datse ihuatsu tuna eje bucha ama juyaju bacuare. Tuque jida baatsu tunajatu bape inime tupucuare:

—Riyaque taa ri ecuita ama! Ejuudyu ri yusu! —jadya tuna jucuare.

—Aijama. Ecuita maju aquiuedya ique, micuana baedya, —jadya tuna Pablora acuare.

⁷ Yume cuejadya ecuana Publora acuare tuja etareju cuaishu. Tuquetu ecububuju dyaque inime metseque jucuare. Tura isaaniyaque yahuatu mejiji japadama jucuare ecuana etiqui bahui jucuare eque. Quimisha huecaca ecuana tuaqueja anibacuare. Dyaque jida tura ecuana batsacuare. ⁸ Tuja etataquetu ujedada jucuare. Jaracuaretu baara tsehue, ami buju jadya juyaque. Pabloratu cuajiticuare. Tuaqueja jutitsutu Yusu tsehue quisaraticuare. Quisarati amena juatsu tujatu emetucu huanacuare tuque dyaque. Jadya chachanee tujatu acuare Yusuja casa tsehue. ⁹ Ancuareadya umae ujedada cuanaque ecububuju. Publoja etataquepa chacha juhua jadya bacatsu tuna, tuna dyadi ujedada cuanaque cadujuticuare Pablo queja. Yusuja casa tsehue tujatu ecana chachaneacuare.

¹⁰ Jadya tibu ecuana tuhua cuanara dyaque jida bacuare. Tunaja cuitadya aniyaque tunara ecuana tyacuare ecuanaja ai ehuitiuju. Ecuana amena yudijidya cuinanancayaju tunara ecuana tyacuare dutya ecuanara ai sareya cuanaque.

Pablo Romaju junaticuareque

¹¹ Tumeque ecububuju ecuana quimisha badi jucuare. Tuhuatu ebuteju jaracuare cuaba ebari. Tumeque cuabatu Alejandria juque juticuare cuejipa catibutima jariju. Neticuaretu cuaba huitu queja amaca yusu cueya cueya ecatsse Cástor, Pólux jadya.

¹² Tumeque cuaba ebari tsehuedya ecuana Malta juque cuanucacuare. Tuhuaque cuinanatsu ecuana dirucuare Siracusa ebuteju. Tuhua ecuana anibacuare quimisha huecaca. ¹³ Cuacuare ecuana ena eque ejiruru eque Regioju judiruya tupu. Huecacape pijidyatu beni cuejiji jutibunenuacuare jida. Huecancanucatsu ecuana Puteoliju junaticuare. Tuhua tupu camadya tuque ecuanaja ena eque aje ishuque jucuare.

¹⁴ Tuhua tuque ecuana tsurucuare ecuana tsehuequi cuanaque. Tunara ecuana ihuamerecuare tuna queja anibaca ishu. Pacarucu huecaca ecuana tuna queja anibacuare. Tuequedya ecuana ehuaqui eque Roma-ju cuacuare. ¹⁵ Jesús queja ecatyati cuanaque tuna bahue jucuare ecuana Romaju ehuaqui eque cuayaque. Umae cuanara ecuana ihuacuare “Mercado-ju Ediji Apio” bacaniju. Peya cuanara ecuana ihuacuare

“Quimisha Etare Eaniqui” bacaniju. Tuna baatsutu Pablo pureama jucuare. Dyaquetu cacasaticuare.

—Miquemi ecuana tsehue dyaque jida juhua, Tata, —jadya tujatu Yusu acuare.

¹⁶ Tuequedya ecuana Romaju junaticuare. Tuhua ecuana judiruhajutu Juliora menaje tyacuare erisi cuanaque Roma juque huaraji cuana. Huaraji cuanaratu Pablo etare apudaju ama ishatsacuare, peya etareju jutidya. Jadya ama bucha tunajatu sudaru queja narumerecuare, tuque ehuanauju.

Pablora Jesúsja quisarati Romaju cuejacuareque

¹⁷ Quimisha huecaca juatsutu Pablora ihuaramerecuare israelita inime metse cuanaque Romaju ancicuare cuanaque. Tuna caradatihuaju tujatu ecana jadya acuare:

—Ecue ata cuana, nequisaratishacue ique, ique quicueneti ishu. Ique eje bucha ama juhua ecuanaja ata israelita cuana tsehue. Moisésja cacuatsashati equedya anihua ecuanaja baba cuanaja bahue eque. Jadya ama bucha ecuanaja ata israelita Jerusalénju cuanaque dyaque cahuaicuare eatsehue. Inatsu tunara Roma juque huaraji cuana ecuadisha cuana queja menajetyacuare. ¹⁸ Huaraji cuanaratu bacacuare ique quicueneti ishu quisaratiyaju. Quisaratiyaju ique bacatsu tunara inajacacara acuare. Dadicuare ama tuna ni ejeque inimedya jutidya ique iye ishu. ¹⁹ Ecue ata cuanara bacue inajacamerecarama acuare. Jadya tibudya “Cuadishacue ique Romaju. Enaruqui dyaque aridara ique jucha metseque, jadya ama juatsu aijama jadique pacuejatsa”, jadya ique jucuare. Jutaquiju riyadya ique quicueneti ishu, ecue ata israelita cuanatu jucha metse jadya cacuejati ishu ama. ²⁰ Jadya tibudya micuana ihuaramerehua, era micuana baatsu isaracara aya tibu. Bahuedya micuana, béru yuequedya ecuanaja baba cuanara ihuajacacuareque ama Yusuja Emepeque junayaque. Tumeque Yusuja Ecuadisha quejadya ique catyatihua, Jesús queja cuitadya. Tuaequeja catyatihua tibu, tunara risimerecuare, —jadya tujatu ecana acuare.

²¹ —Ecuana ecuana baecua cuita juhua riyaque inime cuana. Ecuana ata Judea yahuaju cuanara tuque ecuanaja cuadishachine ama quirica micue ishuque. Israelita cuana tuhuaque jechine cuanara ecuana cuejachine cuana ama cuita mique eje buchique. Ecuana yacuaju tuna quisaratichine cuana ama cuita micue ishu. ²² Bacacara tuque ecuana aya mira Jesús eje buchique cuejayaque. Bacaya tuque ecuana. Dutya quejapa tunajatu quisarati aya; yuneri amapa iyacuaque bahuityayaque jadya. Dyaque jida ecuana miacueja pana cueja catimerecara juya mira bahuityayaque, —jadya tunajatu acuare.

²³ Jadya juatsu tunajatu iyacuare huecaca caradatinuca ishu. Tumeque huecaca juetihuaju tuna umada ju-

naticuare Pablo aniya etareju. Tsunuda tuna Pablora isaracuare. Apudajudya catibutihuaque chineya tupu tujatu ecana bahuityacuare. Cuejacuaretu ecana Yusura dutya eje bucha narue adadiyaque. Cuejacuaretu ecana Moisésra, Yusu equeque quisarati cueja puji cuanara Mesías jadya adadiyaque hueneacuareque. Cuejacuaretu ecana Jesús cuitadya Mesiasque, Yusuja Emepeque. ²⁴ Umae israelita cuana casitatihua cuanaratu ejeneacuare tura cuejayaque. Tuna tuna Jesús queja catyaticuare. Peya cuanara bacue ejeneacuare ama tura cuejayaque. ²⁵ Caquemitsati caquemitsati juyaque tuna cuinanacuare, dutyara tupu ama inime tupuya tibu. Cuama jarira tuna Pablora acuare:

—Béru yuequedyatu Isaiasra cuejacuare yunerique ecuanaja baba cuana. Yusuja Espiritura tuna jadya cuejamerehua:

²⁶ “Cuacue micue ata cuana queja.

‘Bacaya tuque micuana Yusura cuejayaque adebayaque ama.

Baya tuque micuana Yusura ayaque, adebayaque ama’ jadya ecana cuejaticue.

²⁷ Ejeneya ama tunajatu ecue quisarati, tunara ejenecarama aya tibu.

Bacaya ama tunajatu ecue quisarati, tunara bacacarama aya tibu.

Bacarama tunajatu aya era ayaque, tunara adebacarama aya tibu.

Ijaca cani catumutihua bucha, yatuca catumutihua bucha jadya tuna juhua.

Cacuareticarama ecana inime juya, ecue ecana tunaja jucha cuana apupuasha ishu”, jadya patu Isaías eque jucuare Yusu béru.

²⁸ Pablora tuna isaranucacuare:

—Era micuana bahue amerecara aya. Iyacuatu Jesúsja jidaque quisarati tsapetanaya israelita ama cuana queja. Cuejayaju bacatsu tuna Jesús queja catyati-buque. Tuna tuaqueja jadya catyatie juyaju tunajatu Yusura jucha cuana apupashabuque, —jadya tujatu ecana acuare.

²⁹ Pablora jadique cuejahujutu israelita cuana dirucuaru, tuna cama caquemitsatiajeyaque.

³⁰ Pablotu ancicuare beta mara Romaju. Tura cuitadyatu tsujetyacuare etareju ani ishu tuhua. Pureama tsehue tujatu ecana batsacuare dutya tuaqueja jutiya cuanaque, arepa sudarura naruya jari ama bucha.

³¹ Ecuaita cuanara batiyaju tujatu ecana Yusura dutya eje bucha narue ayaque cuejatsabarecuare. Bajida tsehue ama tujatu ecana cuejacuare. Dyaque tujatu quisarati acuare Ecuana Cuatsashaqui Jesucristo eje buchique. Huaraji cuanaratu cuejamerejacacuare ama jidaque quisarati.

Riya tupu camadya,

Lucas

ROMANOS

Pablolarari huenequare riyaque quirica Jesús queja ecatyati cuanaque Romaju cuanaja cuadisha ishu. Huenequare rejari Jesús queja catyatitsu cuita camadya ecuana Ijahua quejaque quinajacamereti ishuque. Turatu quisarati acuaque. Dutyapa ecuana jucha arida. Jadya ama bucha ecuana Yusura dyaque iyuhueda baya. Cuadishacuairetu Jesucristo ecuanaja jucha cuana tsujetyaqui maju ishu. Capítulo 1-11 eque tupu tujatu bahuityacuare Jesús queja ecatyati cuanaja ejenetaquique. Capítulo 12-16 eque tupu tujatu bahuityacuare Jesúsja cuanaque eje bucha anie jutaquique. Tuequedyatu riyaque quiricaju aniya versículo dyaque saretanaya cuanaque: 1.16; 3.23; 5.8; 6.11, 23; 8.1, 14, 18, 28, 35-39; 12.1, 21; 15.2-3 jadya.

Pablora Jesús queja ecatyati cuanaque isaracuareque

¹ Era rique micuanaja quirica cuadishaya. Ique Pablo. Jesucristo merequique ique. Yusura ique mepehuaque, tuja yana atsaqui juishu. Cuadishahua tura ique, jidaque iyacuaque quisarati dutya queja tsape ishu.

² Beru yuequedyatu Yusura tuja quisarati dutya queja tsapemere ana ahua. Yusuja quisarati cuejaqui jucuaque cuanarari riyaque quisarati cuejajacahua ama. Yusuratu huenequerecuare tuja quisarati. Riyaque quisarati ehuenegue ri Yusu jaque; riyaque quisaratiju ri aijama pusha pushaque. ³ Riyaque quisarati jidara ecuana bahue amereya tuja Ebacuaque Jesucristo Ecuana Cuatsashaquique jadique. Cacuitatihuatu ecuita riyaque yahuaju cuinana ishu. Tuquetu ecuari David eque ejuracanaque. ⁴ Ecuita camadya ama tuque, Yusu tume. Tuquetu Yusu Etata buchique cuita nucadya. Yusuja biji eque neritu anihua, cajuchati baecua. Majuhujutu dyaque arida casa tsehue Yusu Etatara emajuque chacha nityatsuranucahua. Emajuque chacha nityatsuranucahua eque tujatu ejitaju bamerehua tuque tuja Ebacuaqueque. Riyaque Jesucristo tu Ecuana Cuatsashaquique. ⁵ Yusutu eatsehue dyaque jida juhua. Ijahua quejaque tura ique inajacamerehua, arepa jucha arida juhua ama bucha. Tura ique cuadishahua tuque cuarequi:

—Cuacue dutya queja. Cuejaticue ecana; Yusura cuatsashaya eque ecana paju. Jesús queja ecana pacatyati, tuja ecana Ijahua quejaque inajacamere ishu, —jadya tura cuejamerehua, Jesús dutya queja muimere ishu.

⁶ Micuana Romaju aniya cuanaratu Yusuja quisarati bacahua. Tura micuana mepehua Jesucristo jaque juishu. ⁷ Jadya tibudya rique hueneya riyaque quirica micuana dutyaja ishu. Yusura micuana dyaque iyuhueda baya. Tura micuana mepehua tujaque juishu. Yusu Ecuana Etata, tumbaedyu Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Pablo Roma juque Cristo queja ecatyati cuana queja cuacara jucuaque

⁸ Dutya queja jujerira ecuana cuejaya; Romaju cuanaquepa Jesús queja catyatihua. Iyacuapa ecana tuja biji eque aniya jadya. Jadya bacatsu tuque yusurupai aya ecuanaja Etata Yusu:

—Tata, Jesucristo eque mique isaraya. Dyaque jida taa mi Romaju micue cuana tsehue, —jadya isarae tuque Yusu aya.

⁹ Yusuratu adebaya ique tuatsehue quisaratijacayaque ama micuanaja ishu. Ecue inime taca ique casatiya tuque mere ishu. Eratu cuejaya, tura Ebacuaque queja ejeque catyatyaque Ijahua quejaque inajacamereyaque. ¹⁰ Eratu Yusu bacajacaya ama:

—Tata, beru taa cuacara juchine Romaju micue cuanaque cuajira. Cuataqui ama cabatichine. Micue jadya inime juyaque juatsu cuadishacue ique, —jadya tuque ajacaya ama.

¹¹ Cuacara ebari juya micuana queja. Cuejacara micuana aya Yusuja Espiritura ique bahue amerehuaque. Espiritura ejitaju ahuaque pana adeba aatsu micuana dyaque ecacasati ejuajeu Jesús queja catyatiaje ishu. ¹² Yurameta cacasaturatie ecuana juya. Micuana ique Jesús queja eje bucha nimeequa bahue juatsu, tumbaedyu ique micuana Jesús queja eje bucha nimee juyaque bahue juatsu, dutya tupu cacasatie nejura dyaque tuaqueja catyatiaje ishu.

¹³ Bahue micuana amerecara aya; eje uma cuacara datse micuana queja juhua micuana cuajira, micuana ecue eatsehuequi cuanaque. Riya cama eje bucha cuataqui ama cabatiya. Aira cuana taa cuataqui ama amereya. Israelita ama cuanaque peya queja aniya cuanaque era Jesús queja catyati tsahuahua bucha, jaididya tuna tsahuacara ebari aya Romaju cuanaque.

¹⁴ Ique ecuejamereta cabatiya Yusuja quisarati dutya quejaque ecuita cuana. Maquei jucuaque cuanaque amena jida atape cuanaque, tumbaedyu maquei jari cuanaque jadya tuna ecue cuejataqui. Quirica isara bahue cuanaque, baecua cuanaque jadya tuna ecue cuejataqui. ¹⁵ Jadya tibudya micuana eje buchadya

cuejacara ebari aya micuana Romaju aniya cuanaque.

Yusura Jesús queja catyatiya cuanaque cajuchati baecua bayaque

¹⁶ Eratu pana ejenedya aya Yusura Jesús queja catyatiya cuanaque Ijahua quejaque inajacamereyaque, Yusu queja judiru ishuque quisarati bacatsu ejenequi juhua cuanaque. Tuja casa tsehue tujatu ecana inajacamereya. Icuene cuitatu cuejatanahua riyaque quisarati israelita cuana, tuequedy a israelita ama cuanaque. Jadya tibudya ique bisuya ama dutya queja aniya cuanaque cueja ishu. ¹⁷ Jidaque quisarati bacatsu ecua bahuedy juya Yusura eje bucha eque cajuchati baecua bucha bayaque. Tujatu inime: "Jesucristo queja catyatiya cuanaque cuita camadya tuque cajuchati baecua bucha baya. Aijamatu peya eje bucha eque Ijahua quejaque quinajacameretie juishuque". Ehuenedya tu tuja quisaratiju: "Cajuchati baecua bucha Yusura baya cuanaque tuna Yusu queja catyatiyacaya ama. Jadya tibudya tuna tuatsehuedya anibuque".

Yusura cajuchatiya cuanaque jucha metse bayaque

¹⁸ Yusu barepa juquetu dyaque cahuatiya dutya tuatsehue cahuaitiya cuana tsehue. Dyaque jidama tujatu ecana nrecaturabuque. Tunaratu Yusu muiya ama, ni ecana tura amereya eque jucara juya. Tunaratu dutya jidamaque ajacaya ama. Tunajatu bijidama Yusuja quisarati cuejayaju baca ishu, tunara jidamaque ajacacarama aya tibu. Ni tuna peya cuana bacamerecara aya, peya cuana Jesús queja catyatishacarama aya tibu. ¹⁹ Yusu cuitadyatu tuna queja caadebameretihua tuque eje buchique. Jadya tibudyatu dutya riyaque yahua juque bahue jutaqui tuja yunerique. Arepa eje bucha adeba ishuque aniya ama bucha, adebama jiu tuna juya. ²⁰ Yusura yahua iyahua equeque dutya tuhua aniya equetu caadebameretihua. Arepa Yusu ejita juque ama bucha, yahua, barepa tura iyahuaque petatsu bahuedy ecua tuja dutyaja casa ebare aniyaque, ni eje tupu teredadi ishuque ama. Baatsu ecua bahuedy tuque Yusu nerique juya. Jadya tibudyatu jidama cuanaja "Eje bucha ama ecua atabuque", jadya inime jutaqui ama.

²¹ Yuequedyatu ecuita cuana bahue juhua Yusu aniyaque. Jadya ama bucha tunaratu jadya ahua ama: "Miquemi Yusu peadyaque; muiya mique ecuanara", jadya tunajatu ahua ama. "Miquemi dyaque jidaque", jadya tunajatu abaecua juhua. Masadama tunajatu inime juhua Yusu adebaya bucha. Tuquetu tunara eje bucha adebahua bucha ama. Eje bucha adebataquimadya jutidya tuna baajehua. Meta ajeyaque adebataquima bucha, jadidya tunajatu adebataquima baya.

²² "Dyaque jida tuque ecua adebaya Yusu. Dyaque jida tuque ecua adebaya tuque pureamatura", yanacana tuna jadya quisarati bahue juhua. Yusura tuna ai baecua bucha bahua. ²³ Yusu tu maju baecua.

Jadya ama buchatu ecuita cuanara Yusu ejita juque ama muicarama aya. Jadya tibudya tuna catihua ecuita maju aqui cuanaque cueya cueya cuana. Tumebaedya tuna catihua upati, cuanubi cuana, yahua eque carepetiya cuanaque cueya cueya cuana. Huipuchitana bahue ecana juhua tunaradya jutidya ahua cuanaja yacuaju. Mui bahue tunaja juhua. Yusupa ejuu jadya juatsu tunajatu muihua. ²⁴ Tuna Yusura amerehua eque jucarama juya tibu, tuna Yusura jacahua. Tujatu inime juhua: "Tumeque ecuita cuanara ique bacacarama cuita aya tibu, paadya tuna ai tunara bisutadaque acara ayaque. Era tuna tachiya ama." Jadya eque tunajatu ahua tunaja biji eque ai dyaque bisutadaque peya cuana tsehue. ²⁵ Yusu Neriratu dutya iyahua.

—Mique peadya mi Yusu; miquemi dyaque jidaque, —jadya tuque ecuanaja ajacataqui ama ni riyapiji buchique.

Tumeque ecuita cuanara bacue Yusu muijacahua. Tuque emuique datse tuna, tunara yusu bucha adebaya cuanaque jutidya muihua. Tuna tuna ai cueya cueya ea cuanaja yacuaju jutidya huipuchitanahua. Dutya Iyaquique emuique, tunajatu muihua ai cueya cueya cuanadya jutidya, tunaja ea cuanaquedy jutidya.

²⁶ Tuna jadya juya baatsu tuna Yusura jacahua. Tujatu inime: "Paa tuna dyaque bisutada cuanaque tunara acara ayaque. Era tuna tachiya ama."

Jadya eque tunajatu aya dyaque bisutadaque. Yusura amerehuaque ama tuna aya; amerehuaque tuna aya ama. Epuna cuanara bacue tunaja yahue cuanaque camadya jaraquerecarama aya. Epuna cuinetsedya jutidya ecana cabijiseritiya. ²⁷ Tumebaedya deca cuanara tunaja ehua cuanaque jaraquerecarama aya. Deca cuinetsedya jutidya ecana cabijiseritiya. Deca cuinetsedya jutidya ecatsé bisutada juya. Yusuratu tumeque dyaque jidama baya. Yusura amerehuaque tuna aya ama; amerehuaque ama tuna aya. Jadya cayuamatie tuna juya tuna tacadya jutidya. Tunaja ecuita cuitadya jutidya tuna cayuamaturatiya. Dyaque tunajatu inime asicada cuanaque inime tupuajeyadya jutidya.

²⁸ Yusu nime adebatsu tunajatu inime juhua: "Yanacana jutidyatu Yusura amereya equeque. Neaniradya tuquemaque." Jadya tibudya tuna Yusura jacahua. "Asicadaque, bisutadaque tuna inime tupuqui paa. Tachiya ama tuna era", jadya tujatu inime juhua.

Jadya eque tunajatu dyaque jidamaque ahua, arepa tunara cuitadya jadya jutaquique ama adebaya ama bucha. ²⁹ Jadya tibu tuna ni ejequedy jutidya tuyu aniya ama. Yusura, huaraji cuanara jadya amerecarama aya eque tuna anijacaya ama. Yuamaturacaradya jutidya tunajatu peya cuana aya. Tunaja ishu cuita camadya tuna ai cadaditicara ebari juya. Nime jidama tuna. Peya jaque tuna ai tunaja ishu bijiseriya. Ecuita tunaja iye bahue. Canerebati arida ecana. Tuna ujeu baqui cuana tsehue masadama cahuitie tuna. Yurameta etsuje etsuje jutidya ecana catiya. Catacuariti arida tuna. ³⁰ Cuejajacarama tunajatu aya peya jidama

juyaque. Yusu tuna ujeu baya. Quijillahuanati arida, casumiti arida jadya ecana. Yanacana tuna jadya jubahue: "Ique dyaque inime metseque, jidaque", peya cuana tunaja ishu jida inime tupumere ishu. Eje bucha cajuchatinucae juishuquedy juidya tuna inime tupuqui aya. Tunaja etata cuanaquera amereya eque ecana juya ama. ³¹ Inimema tuna. Jidamaque tuna jidaque bucha baya; jidaque bacue jidamaque bucha. Tunara quisarati iyayaque tuna aya ama. Ni ejeque tunajatu iyuhueda baya ama. Ejera jidama ayaju tuna nime aputaya ama; cacuarehuanaticaraque tunajatu inime tupujacaya ama, tumeque jidamaque enime aputauque. Nerecabaya ama tuna peya. ³² Yusu jatu cacuatsashati aniya: "Jidama anijacaya ama cuanaque-tu canerecatibuque. Majutsu tuna ijahuaja etiquiju judirubuque ni eje tupu Yusu jipe ishu ama".

Tumeque ecuita cuana jidama cuanaquetu bahue jida Yusura quisarati iyahuaque. Jadique bahue ama bucha ecana jadya aniedya jutidya juya. Tume ecana pureama jutidya juya, peya cuana jadya anie juyaju baatsu.

Yusura ejeque tuyuque, tuyuque ama jadique ejitaju adadiyaque

2 Riya cuanaque quisarati bacatsu ni tuque micuanaja inime juya micuana jadique ama bucha: "Peya cuana tu dyaque jucha arida cuita. Canerecatitaqui tuna." Jadya ama bucha micuana tuna bae cuitadya. Micuanara ni peya cuana jucha metse jadya aya, micuana dyadi micuana tumebaedy jucha metse. Yusratu nerecaturabuque dutya tuja inime eque ama aniya cuanaque; pajudya datse israelita cuana, israelita ama cuanaque. ² Yusratu quisarati ajacaya amadya tuja biji eque ama aniya cuanaque nerecaturadadibuque. Turatu aya dutya jidaque, tuyuque. Jutaquiju ecua bahuedy; tuyudyatu Yusura tuja biji eque ama aniya cuanaque nerecaturadadiyaque. ³ Micuanaratu cuji ebari cuita juatsu inime tupuya. Peya cuanapa Yusura nerecaturaya, micuana cuitapa aijama jadya. Jadya ama bucha micuana tuna aniya bae cuitadya aniya. Jadya tibudya pana ejene neacue micuana dyadi nerecaturadaditayaque caadabatitsu peya cuana aya baedy. Ni eje bucha eque huanataqui ama micuana. ⁴ Micuanaja ni tu inime juya: "Yusuja ecua nerecaturanime ama, tuque dutya tsehue dyaque jida juya tibu; tuque masadama cahuaite ama tibu tujatu canerecabati aniya. Tuque jadya tibu tuque ecuanaja jidamaque ataquidya jutidya eje buchique ecuanara acara ayaque", jadya micuana cuji cuita juatsu juya. Pusha ama cuitadyatu Yusu dyaque jida juhua micuana tsehue. Cacuareshacara tura micuana inime aya, micuana cajuchatijaca ishu.

⁵ Jadya ama bucha ejeque huecacatu Yusura tuja cahuaite ejitaju abuque tura amerehua eque anicarama juya cuana tsehue. Tuquetu tuyu jujacaya ama. Tumeque huecaca tura micuana eje uma nerecaturadadiya. Jadya tura micuana adadiya, micuana tura

anishacara aya eque anicarama juya tibu. ⁶ Tumeque huecaca ecua Yusura cuejabuque peadya peadya ecua riyaque yahuaju eje bucha juhuaque. ⁷ Umaetu Yusuja biji eque anijacaya ama. Eje buchadya Yusura cuatsashaya eque jucara ebari tuna juya. Eje buchadya cabapeticara tuna juya, Jesucristo bae juishu. Tuna tuna Yusu queja eje buchadya "Micuana micuana jidaque" jadya catimerecara juya. Eje buchadya Yusu queja maju baecua ishu cacuaremereticara tuna juya. Tume cuanaquetu Yusura tuatsehue anisirishabuque ni eje tupu tuque jaca ishu ama.

⁸ Peya cuana bacue Yusura cuatsashaya eque jucarama juya ni riya piji buchique. Ejenecarama tuna aya yunerique, ni ecana tueque jucara juya. Yusu cahuaite camadya tunajatu bijida, tunaja biji eque cuita camadya tuna anicarama juya. Yusu cahuaite jacya ama jadya anie juya cuana tsehue. ⁹ Yusratu nerecaturabuque tura amereya eque jucarama juya cuanaque. Tunadya tuna dyaque peya inime jubuque. Israelita cuana neri neri tujatu dyaque canerecatishabuque. Tumebaedy tujatu israelita ama cuanaque dyaque nerecaturabuque. Jadya tsujetyae tujatu abuque Yusuja biji eque ama aniya cuanaque.

¹⁰ Amena tura amereya eque juya cuanaque bacue ecua Yusura Jesucristo bucha cabapetishabuque. —Micuana micuana jidaque, —jadya tujatu ecana abuque.

Tuna tujatu ecana dyaque inime tsapema amerebuque. Capeya inimetishabuque ama tujatu ecana. Israelita cuana neri neri tura amereya eque juya cuanaque tujatu jidaque tyabuque. Tumebaedyatu tyabuque israelita ama cuanaque. Jadya tsujetyae tujatu abuque tuja biji eque aniya cuanaque.

¹¹ Yusratu tura acara aya eque tuyu dutya abuque, israelita cuana, israelita ama cuanaque jadya. ¹² Turatu nerecaturabuque dutya tura amereya eque juhua ama cuanaque, israelita cuana, israelita ama cuanaque jadya.

Israelita ama cuanaque tujatu tura cuatsashahuaque ehue eque ama bahue amerehua. Ijahuaja etiquiju tujatu ecana nudyaabuque tuna cajuchatihuaque tsuje. "Micuana micuana ecue cacuatsashati ehue eque ama juhua", jadya tujatu ecana abuque ama, tuna cacuatsashati ehue eque ama bahue ameretahua tibu.

Tuna tunaja inime tupu equedy Yusuja biji eque aniyaque juatsu, tumeque cacuatsashati ehue eque aniya cuana buchadya tuna aniya. Arepa tuna tumeque quirica aijama paju ama bucha, cuejayaju yana equedy juya cuana buchadya tuna. Tunaja ducuta inimeradyatu adebaya eje bucha jutaquique, jutaquique ama jadya, arepa tunaja cacuatsashati ehue eque aijama paju ama bucha. Tuna eje bucha juyajudyatu adebataqui tuna Yusura cuatsashahua eque juyaque. Tuna cuitadya tuna bahue jida, jadya ama juatsu jidama eje bucha juyaque. Yusuja jidamaque ai eje bucha aatsu tunajatu inime juya jadya: "Riya ique juyaque taa ri jidamaque."

Yusuja biji eque juyaque tunajatu inime juya: “Riya ique juyaque ri jidaque.”

Amena israelita cuana bacuetu bahue amerehua Moisés eque tura cuatsashahuaque. Jadya ama bucha tuna tura cacuatsashati huenehua eque ama anihua. Yusura tuna ijahuaja etiquiju nudyabuque.

—Micuana micuana ecue cacuatsashati ehue eque ama anihua, —jadya tujatu ecana abuque.

Yusuratu jucha metse ama babuque cacuatsashati bacaqui cuanaque camadya ama, tura cuatsashaya eque aniya cuanaque.

¹⁶ Jadyatu judadiya tumeque huecaca Yusura peadya peadya eje bucha anie juhuaque cuejayaju. Turadya ecuaña Jesucristo queja peadya peadya tsuje tyamerebuque ecuaña riyaque yahuaju eje bucha anie juhuaque. Turatu dutya adebaya ecuaña eje bucha juyaque, ecuanara inime tupuya cuanaque. Jadya tibu tura ecuaña tuyudya cuejabuque. Jadidyatu judadibuque era Jesúsja quisarati cuejaya bucha.

¹⁷ Micuana israelita cuana micuana, micuana micuana tacadya jutidya casumitiya. “Ecuana ecuaña israelita cuana. Ecuana camadya ecuaña Yusura cajuchati baecua bucha baya, ecuanadya tura ecuaña Moisés eque cacuatsashati cuana huenehuare eque cuejahua tibu. Ecuana cuita camadya ecuaña Yusuja emepeque”, jadya micuana jubahue. ¹⁸ “Ecuana cuita camadya ecuaña bahue Yusuja biji eque ani ishuque. Ecuana cuita camadya ecuaña bahue tuyuque, tuyuque ama jadya, ecuaña Yusuja cacuatsashati cuana bahuityatajacaya ama tibu”, jadya micuana jubahue. ¹⁹ “Ecuana cuita camadya ecuaña ecueja Yusu eje bucha adebae aishuque. Yusu adeba baecua cuanara ecuaña sareya caaquerenimereti ishu shuhui cuanaque ejuu bucha, apuda ducu ajeya cuanara ediji udamere ishu esareu bucha. Jadidya ecuaña israelita ama cuanara ecuaña sareya Yusu adeba ecuanaja tsahua ishu”, jadya micuana jubahue. ²⁰ “Ecuana cuita camadyatu ebahuityau Yusuja quisarati baecua cuana cuitaque, riya piji cuita Yusuja quisarati adebaqui cuanaque jadya. Yusura ecuaña bahue amerehua tuja cacuatsashati ehue neque. Jadya tibudya tuque ecuaña adebaya yunerique”, jadya micuana jubahue micuana israelita cuana.

²¹ Micuanaratu cuejajacaya ama peya cuana eje bucha anie juishuque. Jadya ama bucha micuana micuanara peya cuana anishacara aya eque anicarama juya. “Chiri nejuume”, jadya micuana juya. Jadya ama bucha micuana chiri juya. ²² “Micuanaja caquemiti-queremaque nejabaume”, jadya micuana ecana cuejaya. Jadya ama bucha micuanaradya jutidya micuanaja caquemiti-queremaque jabaya. “Yusu cueya cueya cuanaja yacuaju chicucata nejuume”, jadya micuana ecana cuejaya. Jadya ama bucha micuana Yusu amadya jutidya muiya.

²³ Casumitiya micuana: “Ecuana cuita camadya ecuaña Yusura bahue amerehua tuja cacuatsashati”, jadya tuque micuana ecana cuejaya. Jadya ama bucha micuana tura amerehua eque ama aniya. Micuana

Yusuja biji eque ama aniya baatsutu israelita ama cuanara Yusu ijillahuanaya. ²⁴ Ehuenedya tu Yusuja quisarati jadya: “Israelita ama cuanaratu jidama quisarati tsehue aya Yusu, micuana israelita cuana jidama juyaque baatsu.”

²⁵ Micuana ni Yusura Moisés eque cuatsashaya eque aniya, dyaque jida tu ecuanaja bahue eque ecaturumereti juishu. Jadya ejitaju cabameretie micuana juya israelita cuana Yusuja emepe cuanaque. Micuana ni Yusura cuatsashahua eque ama aniya, tume micuana yanacana catubumereti juhua ecuanaja bahue. Yusura micuana catubutima bucha baya. ²⁶ Israelita ama cuanaque tuna ecuanaja bahue bucha catubutima. Tuna ni Yusura cuatsashahua eque aniya, tume tuna Yusura ecaturbuti bucha baya, arepa tuna israelita cuanaja bahue catubutima ama bucha.

²⁷ Arepa Yusura cuatsashahuaque adebaya ama bucha, arepa micuana ecuanaja bahue catubutiya ama bucha, arepa micuana israelita cuana Yusuja cacuatsashati eque ama aniya. Israelita ama cuanaque bacue ecana ecuanaja bahue catubutiya ama; arepa tuna ama cacuatsashati ehue ne cuanaque bahue ameretanahua ama buchatu umada israelita ama cuanara Yusu muibaya. Tuna tura amereya eque juyaque juatsu, tujatu ecana jucha metse ama baya. Micuana tura amereya eque juyaque ama juatsu, micuana Yusura baya jucha metse. ²⁸ Yusuja cuanaque ecuaña, ai ecuanaja bahue ecuita huitu biti ecaturbuti juatsu ama, tura amereya eque juatsu. Umaetu yanacana cuita juya: “Yusu jaque ecuaña”. Yanacana cuita tuna Yusuja cacuatsashati bahue ameretanahua. Yusura amereya eque ecana juya ama. Jadya tibudya tuna Yusura tuja cuanaque cuita ama baya. ²⁹ Yunerique cuita Yusuja cuanaque neritu inime ecacuarétique. Tunaja yuequedyaque ani cuaretanahuaque tuna. Tuna tuna juya: “Yusu jaque ecuaña, Yusuja Espiritura inime cuarehua tibu. Arepa tuna catubutima ama bucha tujaquedya tuna. Yusuratu adebaya tuna tuja cuanaque, arepa ecuita cuanara adebaya ama ama bucha. Tura cuitadya tuna aya: “Micuana micuana jida cuanaque” jadya.

Yusura dutya amereya eque juya cuanaque tuna tuja cuanaque, israelita cuana, israelita ama cuanaque jadya.

3 “Yusuratu israelita ama cuanaque tujaque amereya ecuaña bucha. ¿Tume jatsutu aishu jida ejuu israelita juishu? Yanacana tubutana ecuaña juhua ecuanaja bahue”, jadya ni tuque micuana inime tupuya. ² Jidadya tu israelita juishu. Jidadya tu Abrahamja ejuracanaque juishu. Icuene cuitatu Yusura isarahua ecuanaja baba cuana, tunaja tuque adeba ishu. Jadya tujatu acuare, ai tunaja camadya adeba ishu ama, tunaja dyadi tumbaedy peya cuana cueja ishu tuque eje buchique.

³ “Dutyaju jueritu ecuanaja baba cuana Yusura cuatsashahua eque ama anicuarere. Arepa Yusura Abraham jadya acuare ama bucha: ‘Tyabuque tuque jidaque mique eque juracanaya cuanaque’ ¿jida tsehue ama ni tura ecuaña babuque, ecuanaja baba cuana tura cuat-

sashaya eque jujacahua tibu?", jadya ni tuque micuanaja inime juya. ⁴ Yuneru cuitadya tu jadya ama! Yusura ecuana tura aana ahua equedya aya. Turatu ama amadya aya tura eje bucha aana ahuaque. Aijamatu ecuita pusha pusha jubaecuaque. Amená Yusu bacue jadya ama! Ehuenedya tu Yusuja quisarati: "Yusu, mique cuita camadyami yuneru quisaratijacaya ama.

Nime adebatsu tunarami dutyara abueque: "Miquemi pusha pusha baecua, ni mi cuji juya" jadya.

⁵ "Ecuana jidama juyajutu ecuana petaquí cuanaque equisaratiu: 'Ecuita cuana tucue tu jidama; Yusu cuita camadya tucue tu jida'. Tuyudya ni tu ecuana jidama juyaque, peya cuana bahuitya ishú Yusu camadya jidaque. Jadya tibudyatu Yusu tuyu ama juya, ecuana jidama juyaju nerecaturayaque", jadya datse ni tuque micuana inime tupuya. Jadya inime tuputsu micuana cuji juya. Jadya jutidyatu Yusu adeba baecua cuanara inime tupuya. ⁶ Ni eje bucha eque tu jadya ama. Yusura ecuana yunerijudya eje bucha aya! Dutyadya ecuana bahue ejeque huecaca ecuana Yusura tsujetyabuqueque dutya ecuana rehua riyaque yahuaaju eje bucha anie juhuaque. Tuque ni tuyu ama ejuu, tume tura ecuana ni eje tupu tuyu ama etsujetyau. Yuneru cuitadya tura ecuana jadya abueque.

⁷ "Ique tuyu ama quisaratijayutu ique ijacabacaquí cuanaque jadya ejuu: 'Ecuita cuana tu pusha pusha arida; Yusu camadya tu pusha pusha baecua. Dyaque jida taa Yusu' jadya tunara eau. Jutaquijutu jidadya ecuana pusha pusha juishu, tuna 'Yusu tucue tu pusha pusha baecua' jadya juishu. Jadique juatsu tu Yusu tuyu ama, ique pusha pusha juyaju nerecaturayaque", jadya datse ni tuque micuanaja inime juya.

⁸ "Jidamaque neara, Yusu jidaque peya cuana adebamere ishú", jadya tuque ecuanaja inime tuputaquí ama.

Umaetu ecue ishú jidama quisaratihua. "Pablora ecuana cuejaya jidama juishuque, Yusu adeba baecua cuanaque Yusu jidaque bahuitya ishú", jadya tuna juya pusha pusha. Ni eje tupu tuque ecue jadique cuejama. Yusuratu nerecaturabuque ecue ishú jadya pusha pusha juhuaque.

Dutya ecuana jucha metseque

⁹ "Ecuana israelita cuana ni ecuana jucha aridama, Abraham eque ama ejuracana cuanaque bucha ama", jadya ni tuque micuanaja inime juya. Amená, aijama! Dutya ecuana jucha arida, ecuana israelita cuana, tumbaedyá israelita ama cuanaque. Dutya ecuana ecuanara taca eje bucha ajacae ni tuque ecuana ama Yusuja bijidamaque. Jadyatu era huenehua. ¹⁰ Yusuja quisarati tu jadya ehue:

"Aijamatu ni ejeque buchique inime cujisha baecuaque ni peadya buchique.

¹¹ Aijamatu ni ejeque buchique jidaque, jidamaque jadique adebaquique.

Aijamatu ni ejeque buchique Yusu adebacaraque.

¹² Dutyaratu ujeu baya.

Dutya tuna jidama ni aishu buchique.

Ni ejera buchiquetu jidaque aya ama, ni peadyara buchique.

¹³ Tunaja quisarati tu cuauuda idutaquí ama, emajuque papamaque eihuinaque bucha jidama idutaquí ama.

Peja ijahue au, pusha pusha jadya ecana jujacaya ama.

Bacua dyaque cati ujedara enerecaturau bucha, jadya tunajatu nerecaturaya tunaja quisarati tsehue.

¹⁴ Ijillahuanajacaya ama tunajatu peya cuana.

Jadya tsehue micuana ejitaju juya umae cuana ujeu bayaque.

¹⁵ Huenanaya ecana tuna tsehue cahuitiayaque iye ishú.

¹⁶ Peya cuana dyaque jida baatsu tunajatu cayuamata tisha bahue.

Yuamaturaya tunajatu peya cuana.

¹⁷ Inime tsapema tuna eaniu ama, ni tuna peya cuana inime tsapema anishacara aya.

Tume tuna cahuitishaya jutidya tunaja eadeba cuanaque.

¹⁸ Ni eje bucha eque tuna Yusu muibacara aya.

Ni tuna eje tupu pureamaturacara aya", jadya tu ehue Yusuja quisarati.

¹⁹ Bahuedya ecuana peadya peadya cama, ecuana Yusura cuatsashaya eque anicara juyaque. Ehue neque isaratsu ecuana bahue eje bucha tura ecuana anishacara ayaque. Arepa bahue ama buchatu ni ejeque dutya cacuatsashati cuana eque juya ama. Jutaquijudyatu Yusura nerecaturabuque yana equedya ama juya cuanaque. Ni ejera buchiquetu tuque eau ama: "Ique ama jucha metse, jadya Yusura ique anishacara ayaque baecua juhua tibu", jadyatu ni ejeja ataquí ama.

²⁰ "Mique taa mique jucha metse ama baya, era cuatsashahua eque anihua tibu", jadyatu Yusura aya ama ni ejeque buchique. Cacuatashati tujatu ejitaju ahua, tume cuana eque ecuana jucha aridaque caadebati ishú.

Yusura ecuana Jesús queja catyatihuaju jucha metse ama bayaque

²¹ Iyacuatu Yusura ejitaju ahua eje bucha eque tura ecuana jucha metse ama bayaque. Berutu Moisésra, Yusu equeque quisarati cuejaquí cuanara jadya cuejacuare, Yusura tuaqueja catyatihuaju Ijahua quejaque inajacamereyaque. Jadya ama bucha tunajatu dutya jujerija inime juhua, cacuatashati cuana eque juatsupa ecana quinajacameretiya, jadya.

²² "Erami jucha metse ama baya", jadyatu Yusura aya Jesucristo queja catyatiya cuanaque camadya. Jadya equetu Yusura Ijahua quejaque inajacamereya israelita cuana, israelita ama cuanaque jadya. Ecuana Jesús queja dutya catyatiya cuanaque tura ecuana jucha metse ama baya. ²³ Dutya ecuana jucha aridaque. Aijamatu ni ejeque buchique Yusura amerecara aya eque juyaque, ni peadya buchique. ²⁴ Jadya ama bucha tu

Yusu dyaque jida dutya tsehue, arepa ecuana jucha arida ama bucha. Jesucristotu majuhua, ecuanaja jucha cuana tsujetya ishu. Jadya tibudya ecuana Yusura baya jucha metse ama, ecuana Jesús queja catyatihuaju. Tsuje bacaya ama tura ecuana jucha metse ama baatsu, ecuana iyuhueda baya tibu.
²⁵ Yusuratu Jesús majushahua ecuana emajuuque. Quijehuetihuatu ami. Ecuana tuaqueja catyatihuaju, Yusura tuque ecuanaja jucha cuana apupashaya. Yusuratu quisarati ahua; ejeque cuana tu majutaqui: "Ejeque ni majuya ama, tumetu jucha cuana tsujety-atanaya ama".

Yusura quisarati iyahua eque ama ni juquena juhua, tume taa tu tuque tuyu ama juquena juhua. Yusura yahua iyahua equetu ecuita cuana cajuchatihua. Dyaque cuitatu tsunutacuare Jesús jucha cuana tsujetya maju ishuque cuadisha ishu. Dyaque cuita tsunutatsutu ecuita cuana jidama juyaque amena nime aputahua bucha jucure. Amena Jesús canerecati, maju jadya juhuajutu ejitaju juhua Yusu nime aputamaque. ²⁶ Amena iyacua tu Yusuja inime: "Nime aputaya ama iyacua aniya cuanaque jidama juyaque. Jidadya tu dutya peadya peadya ecue tsujetya ishu. Tuyudya tu ecue eana cajuchatiya cuanaque jucha seca ishu, tuna Jesucristo queja catyatihuaju, tuque jucha cuana tsujetyaqui majuhua tibu", jadya tu Yusuja inime.

Jadya tibudya iyacua "Tuyu micuana baya, Jesús micuana cuarequi majuhua tibu", jadya ecuana Yusura aya tuja cuanaque.

²⁷ Jadya tibudya ecuana casumititaqui ama. "Dyaque jida baatsu ecuana Yusura Ijahua quejaque inajacamerhua", jadya tuque ecuanaja inime tuputaqui ama, ni riya piji buchique. Yusura ecuana jucha metse ama baya Jesucristo queja catyatihuaju cuita camadya, ai cacuatsashati eque aniyaju baatsu ama. ²⁸ Tume ecuana yuneridya Yusura jucha metse ama baya ecua-na Jesús queja catyatihuaju cuita camadya, ai cacuatsashati eque anihua baatsu ama. Jadya micuana era cuejahua.

²⁹ Yusu tu israelita cuanaja Yusu camadya ama. Tuquetu dutya queja aniya cuanaja Yusu. ³⁰ Jadya equetu Yusura dutya, dutya tupu bau aya. Ecuana israelita cuana Jesús queja catyatihuaju, jucha metse ama tura ecuana baya. Israelita ama cuanaque Jesús queja catyatihuaju, tura tuna jucha metse amadya baya. ³¹ Jutauquiju ¿eje tsunu ecuana israelita cuana Jesús queja ecatyatique Yusuja cacuatsashati eque anijacataqui? Aijama. Jadya ejuuque, ecuana cacasatitaqui jutidya dyaque tuque pureamatura ishu, yuneri cuitadya ecuana tujaque juatsu.

Yusura Abraham tuaqueja catyatihuaju tuyu bacuareque

4 Ejera cuana ni tuque micuana Abraham inime tupuqui aya. Tuquetu dutya ecuana israelita cuanaja baba jucure, icuene Yusura ecuita huitu biti tubumerecuareque. ¿Yusura ni tu jucha metse ama

bahua, Abraham cacuatsashati cuana ehue eque anihua baatsu? ² ¿Aama! Yusuratu tuyu, jucha metse ama bahua Abraham, ai tuque jida juhua baatsu ama. Abraham ni tuque aiju jida juhuaju Ijahua quejaque quinajacameretiquena juhua, "Yusuja yatucaju taa ique dyaque jida", jadya tujatu inime juquena juhua.

Ecuana aiju jida baatsu ecuana ecuita cuanara jida baya, Yusura bacue jadya ama. ³ Yusuja quisarati tu jadya ehue: "Abrahamtu pana catyati juhua Yusu queja. Jadya tibudyatu Yusura tuyu, jucha metse ama bahua".

⁴ Mere juatsu tuque ecuana inaya etsujequi. Ecuana tsujetyaquira ecuana yanacana tsujetya ama aya. Tuja tsujetyataqui tibu tura ecuana tsujetyaya. ⁵ Jucha metsequetu Yusura aya: "Jucha metse ama mique baya, Jesús queja catyatihua tibu" jadya. Jadya bae tura ecuana aya jucha metse ama, ai ecuana jida juyaju baatsu ama, ecuana tuaqueja catyatihua tibu. Arepa tuja ecuana casada tsehue tsujema inajacameretishuque aijama ama bucha, turatu ayadya. ⁶ Ecuana ebaba Davidratu adebacuareadya riyaque. "Mique mique baya jucha metse ama, ai mira jidaque aya baatsu ama, mique eaqueja catyatihua tibu" jadyatu Yusu juya. Jadya tibudyatu dyaque jida Yusura jucha metse ama baya cuanaque", ecuanaja ebaba Davidjatu jadya cueja bahue juhua. Turatu hueneacuare:

⁷ "Yusura cuatsashaya eque jubaecua cuanaja jidama cuanaque tillahuaju, dyaque jida taa tuna.

Dyaque jida taa Yusura tunaja jucha cuana tillahua cuanaque.

⁸ Yusu ujeu anihua cuanaquetu pureama juya, Yusura tuna jucha cuana adebanucaya ama tibu. Jucha metse ama tuna Yusura baya", jadyatu ecuanaja ebaba Davidra hueneacuare.

⁹ ¿Eje cuanaque tu dyaque jida juya? ¿Ecuana cuita camadya ecuana catubutiya ecuanaja bahue? ¿Aijama! ¿Jadya ama tuque! Tumebaedyatu israelita ama cuanaque Yusura dyaque jida amereya, catubutiya ama cuanaque. Neadebacue Abraham. Yusuratu jucha metse ama bahua, tuque tuaqueja catyatihuaju cuita camadya. ¹⁰ "Jucha metse ama mique baya", jadya Yusura Abraham ahua, ¿ecatubumeretiju tujatu jadya acuare, catubumeretimaju ni taa? Icuene cuitadya tujatu jadya ahua. Yusura jadya Abraham isarahujutu Abraham ecuanaja bahue tubuma jari jucure. ¹¹ Tsunuda juatsutu ecuita huitu biti catubumeretihua. Jadyatu catimerehua, tuque jadya catimeremajudya Yusura jucha metse ama bahuaque adebataqui juishu, tuque Yusu queja catyatihua tibu. Tuquetu Yusura tuyu bahua, tuque catubumeretima jaryu. Jadidyatu Yusura baya israelita ama cuanaque tuyu, tuna Jesús queja catyatihuaju. Jucha metse ama tujatu eana baya, arepa eana ecuanaja bahue tuna catubumeretima paju ama bucha. Jadya tibudyatu Abraham tunaja ebabaque bucha, tuna tuque juhua bucha, Yusu queja catyatihua tibu. ¹² Ecuita huitu biti ecatubuti cuanaja ebabaque camadya amatu Yusura baya Abraham, tumebaedy Jesús queja nimee cuana-

ja, Abraham Yusu queja nimee jucuare bucha. Abrahamtu Yusu queja nimee jucuare ecuita huitu biti catubumeretima jariquedyá.

Yusura Abraham tuaqueja catyatihua baatsu jidaque tyaana acuaque

¹³“Miquemi dutya quejaque enaruquique jubuque. Mique eque juracanaya cuanaquetu tumbaedyá jubuque dutya queja cuanaque enaruquique. Tyabuque mique jidaque”, jadya patu Yusura Abraham acuare béru. Jadya tyaana tujatu acuare, ai Abraham tuja cacuatsahati eque juhua baatsu ama. Abrahamtu tuaqueja catyaticuare. Jadya tibudya tujatu jucha metse ama bacuare. ¹⁴Jadya equetu Yusura tyaana ahua cacuatsashati cuana eque aniya cuanaja ishú camadya ama. Yusura tyaana ahuaque ni cacuatsashati cuana eque aniya cuanaja ishú camadya juquena juhua, tume taa tu aishu ama jida juquena juhua ecua-na tuaqueja catyati ishú. Yanacana tyaanadya tujatu aquena juhua, ni ejeque buchique cacuatsashati cuana eque eaniu ama tibu. ¹⁵Yusutu dyaque cahuiti ya tura cuatsashahua eque ama aniya cuana tsehue. Canerecatishabuque tujatu eana. Tyaquena ama ni tura ecua-na cacuatsashati juquena juhua, tume ecua-na baecuadya juquena juhua ecua-na tura amereya eque ama juyaque. Cacuatsashati cuejahuaque ama juatsu, tura ecua-na jadya aquena ama juhua: “Micua-na micuana era cuatsashaya eque ama aniya”.

¹⁶Yusu tu injeda ama. “Tyaya mique jidaque”, jadya patujatu acuare Abraham. Yusratu ama amadya aya ai aana ayaque. Abraham jipidya ama, tumbaedyá dutya tuaqueja catyatiya cuanaque Yusura tyabuque jidaque. Tura cuatsashahua eque aniya cuanaque jipidya amatu Yusura jidaque tyabuque. Dutya tuaqueja catyatihua cuanaquetu Yusura jidaque tyabuque, israelita cuana, israelita ama cuana jadya. Abrahamtu tuaqueja catyatihua, tumbaedyá ecua-na. Jadya tibu tura ecua-na Abraham eque ejuracanaque bucha baya. ¹⁷Yusuja quisarati tu ehue Yusura Abraham jadya ahuaque: “Dutyá yana eque cuanaja ebabaque bucha mique babuque”, jadya patu Yusura cuejacuare. Yusratu Abraham jetieja ama ebabaque bucha bacuare, arepa tuque bacuama jari jucuare ama bucha. Abrahamratu pana ejene acuare Yusura cuejahuaque jadidya adadiyaque. Ejenecuaredya tujatu Yusura eje bucha ataqui ama buchique jadya adadiyaque. Yusratu chacha nityatsuranucaya emaju cuanaque. Tura cuatsashahuajutu icuene aijama juhuaque judadiyadya.

¹⁸Abrahamratu ejeneacuare tuque eque ejuracana cuanaque jetiama anidadibuqueque, Yusura aana ahua equedyá. Ehuene tu Yusuja quisarati: “Mique eque ejuracana cuanaquetu purari cuana bucha piyebatilla tupu ama judadiya”. Arepa cabacuatitaquima cabatiya ama buchatu Abrahamra pana ejenedya acuare Yusura cuejahua equedyá judadiyaque. Jadidyatu judadicuare. ¹⁹Esiritu jucuare; cien mara jujeri tujatu anicuare. “Ique taa esiri amena cabacuati ishú.

Ecue ehua-ne Sara bacue cabacuati baecua. Tuque bacue amena esiri. Arepa yatse jadya ama bucha, eratu jidama ama inime baya. Ejeneyadya tuque Yusura jadya adadiyaque, yatse cabacuatidadiyaque”, jadyatu Abrahamra inime tupucuare. ²⁰Ejenecacua ama tujatu Yusu. Ejenecara, ejenecarama jadya ama tujatu ahua cabacuatidadiyaque. Turatu ejeneajehuaadya jutidya dutya huecaca. Pureamatu Yusu acuare. “Dyaque jida taa mique eatsehue”, jadya tujatu ajacama acuare. ²¹Turatu yuneri cuitadya pana ejene acuare Yusura ai aana ayaque eauque. ²²Jadya ejene Abrahamra ahua tibu, Yusu queja catyaticuare tibutu Yusura jucha metse ama bacuare.

²³Yusuja quisarati tu ehue: “Jucha metse ama mique baya”, jadya patu Abraham Yusura acuare. ²⁴Jadyatu huenetanahua; ai Abraham jadya juhuaque camadya ecua-na bahue ishú amatu huenetanahua. Jadyatu huenetanahua ecua-na dyadi Yusura jucha metse ama bayaque bahue ishú. Ecua-na tuaqueja catyatihuaju, “Jucha metse ama mique baya”, jadidya tura ecua-na dyadi abuque. Riyaque Yusratu Jesús Ecua-na Cuatsashaquique emajuque chacha nityatsuranucacuare. ²⁵Yusuja jadya inime juhua tibutu Jesús majucuare. Tuquetu majucuare ecua-na jucha cuana tsujetyaqui. Yusratu Jesús emajuque chacha nityatsuranucacua, jucha arida cuanaque tunaja jucha cuana apupashatanahuaque adebataqui juishu. “Jucha metse ama mique baya”, jadya tura ecua-na aya ecua-na Jesús queja catyatihua cuanaque.

Yusura ecua-na jucha metse ama bayaque

5 Ecua-na ecua-na amena Yusura jucha metse ama baya, ecua-na Jesús queja catyatihua tibu. Icuene-tu Yusu ecahuaiti juhua ecua-na tsehue, ecua-na jucha cuana tibu. Ecua-na Cuatsashaqui Jesucristoratu Yusu ecua-na tsehue cahuitishajacahua. Bijidamaduraya ama tura ecua-na amena. ²Ecua-na ecua-na Jesús queja catyatihua. Jadya tibudya ecua-na cajipetitaqui Yusu queja. Jida tsehue tura ecua-na baya, Jesús ecua-na jiteque eje bucha juhua eque. Pureama ecua-na juya, yuneri cuitadya ecua-na, ejeque huecaca Yusu queja judirubuque tibu. Muiabuque ecua-na tuja yacuaju.

³Ri yaque yahuaju jari tupu ecua-na canerecatiya. Jadya ama bucha ecua-na pureama tsehue aniya. Jadya cabahuityatiedya ecua-na juya abacata tsehue idu canimehuallatitsu ama. ⁴Nerecada juya cabatitsu canimehuallatima abacata idu ayaju baatsu ecua-na Yusura jida baya. Yusura ecua-na jida bayaju tuque ecua-na pana ejenedya aya Yusura ecua-na tyaana ahuaque tyadadiyaque. ⁵Ejeneyadya tuque ecua-na Yusura ecua-na jidaque tyadadiyaque. Tura tuque ecua-na cuadishahua tuja Espiritu tura tyaana ahuaque ecua-na pana ejenemere aishu. Tuja Espiritura ecua-na adebamereya Yusura ecua-na dyaque iyuhueda bayaque.

⁶Ecua-na taca ecua-na eje bucha quinajacameretitaqui ama juhua. Ecua-na jadyajutu Cristo majuhua ecua-na jiteque Yusura mara huecaca iyahuaju. Tuque-

tu majuhua ecuana jiteque, dutya ecuana Yusu muiba baecua cuanaque jiteque. ⁷ Ni ejeque buchiquetu majucara ejuu peya iyetayaque cuarequi. Arepa peya jida paju ama bucha, arepa tuque dyaque jida paju ama bucha, majucarama ecuana ejuu peya iyetayaque cuarequi. ⁸ Cristotu tuja inime taca majuhua ecuana jiteque, arepa ecuana jucha arida baya ama bucha. Jadya eque ecuana bahue tura dyaque iyuhueda bayaque. ⁹ Cristotu majuhua ecuana jiteque, curusuju ami quijehuetitsu. Tura ecuana Yusu queja jucha metse ama amerehua. Tuque ecuana cuarequi majuhua tibu, yuneridya ecuana Yusura ijahuaja etiquiju nudyabuque ama ecuanaja jucha cuana tibu. ¹⁰ Icuenetu Yusu dyaque ecahuaiti juhua ecuana tsehue, ecuanaja jucha cuana tibu. Tuja Ebacuaque tumeque tsujetya ishuhua jutu Yusuja cahuaiti terehua ecuana tsehue. Jadya tibu tura ecuana yuneridya tuaqueja judirushaya, tuja Ebacuaque ecuana naru ishuhua ecuana tsehue aniya tibu. ¹¹ Pureamadya ecuana juya, iyacua Yusu ecuana tsehue ecahuaiti ama tibu, Ecuana Cuatsashaqui Jesucristora ecuanaja jucha cuana tsujetyahua tibu.

Adán juhua baedya ecuana jucha arida; Cristo eque ecuanaja jucha cuana eapupashaque

¹² Adán tu ecuita cajuchati metse jucuaque. Tuquetu dutyaja ebabaque. Tuque cajuchatihua tibu, ecuana Yusura baya ecuana dyadi dutya peadya peadya jucha arida. "Dutyajuchatiyaquetu majudadiya", jadya patu Yusura Adán acuare. Jadya tibudyatu tuque majucuaque. Jadya tibudyatu dutya ecuita maju aqui; dutyadya ecuana cajuchatiya.

¹³ Moisésja cacuatsashati cuana huemema jariju anicuaque tuna cajuchaticuaque. Jadya ama bucha tuna ni aira buchique cuejahua ama cacuatsashati eque ama anihuaque, cacuatsashati aijama jari jucuaque tibu. Arepa tuna Adán cajuchatihua bucha cuita ama cajuchatihua ama bucha, tumebae majuedya tuna juhua. Adán eje bucha juhua equetu dutya ecuita maju aqui juhua. Jesús eje bucha juhua eque ademe ecuana dutya anibuque terenuca ishuhua ama. ¹⁵ Adán cajuchatitsu eje bucha jucuaque tsehue tu beta tupu ama Yusuja canerecabati ecuanaja ishuhua aniya tsehue. Adán cajuchatimetse juhua jutu dutya ecuita cuana maju aqui jutibunehua. Jadya ama buchatu Yusu ecuana tsehue dyaque jida juhua. Turatu Jesucristo cuadishahua dutyaja juchaju maju ishuhua. Jesús maju pidya camadya juhua tibu ecuana jetiama Yusura tsujema inajacamereya Jesús queja catyatiya cuanaque. ¹⁶ Yusura ecuana jida tsehue bayaju eje bucha juyaquetu Adán cajuchatihua eque eje bucha juhua bucha ama. Adántu ecuita cajuchatimetse jucuaque. Tuque cajuchatimetse juhua jutu Yusura dutya ecuita jucha metse baya, tuque eque juracanahua cuanaque. Amena ecuana bacue eje uma cajuchati juhua. Yusu tu dyaque jida ecuana tsehue. Ecuana tura ecuana jucha metse ama baya, Jesucristora Adánra yuamaturahuaque bajehua tibu. ¹⁷ Peadya ecuita camadya cajuchatihua

tibu ecuana dutya maju aqui. Amena peyadya majuhua ecuana jiteque. Jadya tibudyatu Yusu dyaque jida juhua ecuana jiteque, jucha cuana ecuanaja tillayaque. Tura ecuana jucha metse ama babuque. Tura ecuana yatseja ecuari amerebuque tuatsehue. Jesucristo ecuana jiteque eje bucha juhua eque, ecuana tujayacuaju judirubuque.

¹⁸ Peadya ecuita tu cajuchatihua. Tuque cajuchatihua tibutu Yusura dutya ecuita jucha metse baya. Tumebaedyatu peadyara camadya jidaque tuyuque ahua. Jesucristo ecuana jucha seca ishuhua tibu, tuque ecuanaja Yusura jucha cuana apupashaya dutya ecuanaja Jesús queja catyatiya cuanaja. Tura ecuana jucha metse ama baya. Tura ecuana anishaya ni eje tupu tere ishuhua ama. ¹⁹ Peadya ecuita camadyatu Yusura cuatsashaya eque ama juhua. Jadya tibudyatu Yusura dutya ecuita jucha arida baya. Dutyadya ecuana cuatsashaya eque ama aniya, Adán juhua bucha. Amena peya bacue Yusura cuatsashaya eque anihua. Jadya tibudyatu Yusura jucha metse ama baya eje uma tuaqueja catyatiya cuanaque. Tuna tuna amena cuatsashaya equedya aniya, Jesús juhua bucha.

²⁰ Eje uma mara mara Adán cajuchatihua jutu Yusura Moisés cacuatsashati huemerehua. Huemerehua tujatu ecuita cuana tura amereya eque juyaque ama bahue amere ishuhua. Jadya ama buchatu dutya cajuchatihua jutidya. Yusu bacue ecuana tsehue dyaque jidadya jutidya juayeya. Arepa ecuana cajuchatiya ama bucha, tura ecuana dyaque iyuhueda tsehue baya.

²¹ Icuenetu ecuita cuana cajuchaticahua ama. Jadya tibudya tuna maju aqui. Ecuana Cuatsashaqui Jesucristo ecuana jiteque majuhua tibu, ecuana Yusura dyaque iyuhueda tsehue baya, arepa ecuana jucha arida juhua ama bucha. Tura tuque ecuanaja jucha cuana apupashahua. Jadya tibudya, ecuana majutsu judirubuque tuaqueja ni eje tupu jacanuca ishuhua ama.

Cajuchaticaraque jacatsu Cristora amereya eque anitaquique

6 Yusutu dyaque jidadya jutidya juajeya ecuana tsehue, arepa ecuana dyaquedya jutidya cajuchatiya ama bucha. Umaeja ni tu inime juya: "Jutaquiju ni tu cajuchatiajetaquidya jutidya, Yusuja ecuana iyuhuedadya jutidya baaje ishuhua". ² ¡Aijama! Jadya tuque ecuanaja inime tuputaqui ama, ni riya piji buchique. Jesús queja catyatitsu tuque ecuanaja cajuchaticaraque terehua. Emajuque amena cajuchaticarahua bucha, jadidya tuque ecuana amena cajuchaticaraque jacahua. ³ Cutsameretihua jutu ecuana Cristo Jesúsra tuja inime eque juyaju baya. Emajuque canajetijacahua bucha, jadidya tuque ecuana cajuchaticaraque jacahua. ⁴ Cristotu majuhua. Emajuque tumu caniju ishatanahua jutu Yusura tuja casa tsehue nityatsurahua, chacha aninuca ishuhua. Tuque ahua baedya tura ecuana cuareya. Cutsameretihua jutu ecuana Cristora tuja inime eque juyaju baya, beruque inime ecuanaja cuaretanahua jutu. Ecuana ai bijiseri cua-

na, inime tupu cuana jadya tuque ecuanaja cuaretanaya. Cajuchaticaraque tuque ecuanaja jacaya.

⁵Tuja inime taca equetu Cristo majuhua curusuju. Tumebaedya ecuanaja inime taca equedya cajuchaticaraque, tuja inime juya eque ecuanaja amena aniya tibu. Cristo emajuque netitsuratsu tujatu bamerehua Yusuja casa ni eje tupu jadya ecabamere-tique ama. Ecuanajatu aniya amena riyaque casa. Jadya tibudya tuque ecuanaja cajuchaticaraque jacahua. Iyacia tuque ecuanaja eje bucha jucaraque iyacuaque aniya. Yusuja casa tsehue ecuanaja beru anihua bucha anijacahua. ⁶Icuene ecuanaja dutya jidamaque ayaque anihua. Tsujetyama mereta juyaja tuja patrón tuja merejacaque ama bucha, jadidya ecuanaja cajuchaticaraque ama juhua. Iyacia ecuanaja amena cajuchaticaraque jacahua. Cristotu majuhua ecuanaja jiteque, Yusuja ecuanaja tuja casa tyashu. Iyacia ecuanaja icuene anicuaru bucha ama aniya. ⁷Ecuitatu majutsu cajuchaticaraque. Jadidya ecuanaja cajuchaticaraque junucataqui ama. Yusura ecuanaja jucha metse ama baya. ⁸Cristotu tuja inime taca cuitadya majuhua. Tumebaedya ecuanaja inime taca eque cuitadya ecuanaja cajuchaticaraque jacahua. Ecuanaja tuja inime eque juya tibu, ecuanaja bahue tuatsehue anidirubueque, tuque bucha judaditsu. ⁹Yusuratu Cristo emajuque nityatsuranucuaru. Ni eje tuputu majunucabuque ama. Ni ejeja buchajatu aniya ama casa tuque majushanuca ishuhua. ¹⁰Cristotu maju pidya camadya juhua. Tuquetu majuhua ecuanaja jucha cuana tsujetyaqui. Tsujetyataquique tura tsujetyahua tibu tuque ni eje tupu majunucabuque ama. Iyacuatu tuque aniya Yusu muimere ishuhua. ¹¹Neadebacue riyaque. Cajuchaticaraque tuque ecuanaja amena jacahua. Emajuque canajetijacahua bucha, jadidyatu ecuanaja cajuchaticaraque jacahua. Iyacia tuque ecuanaja inime pana cuaretana juhua. Iyacia ecuanaja Yusuja biji eque aniya, Jesúsja inime juya eque cuita camadya ecuanaja aniya tibu.

¹²Arepa cajuchaticaraque tsehue aniya ama bucha, necajuchaticaraque. Bisutada cajuchaticaraque neaume. Jucha queja ijahue necatimereume. ¹³Satanásra cajuchaticaraque ayaju, nebacaume. Necatitiume micuanaja ecuita tuja tsume ishuhua. Tuaequeja ecatyatiuque, Yusu queja jutidya necatitiume; tura jidaque amere ishuhua netsumecue. Iyacuaretanahua micuanaja. Cajuchaticaraque tuque micuanaja jacahua. ¹⁴Iyacia ecuanaja Yusura jucha metse ama baya, ai ecuanaja cacuatsashati eque juyaju baatsu ama, ecuanaja Jesús queja catyatihua baatsu. Jadya tibudya ecuanaja Satanásra cacuatsashaya eque jutaqui ama.

Yusu tu iyacia ecuanaja metseque

¹⁵Arepa ecuanaja jucha arida ama bucha, Yusura ecuanaja jida tsehue baya. Tura ecuanaja Ijahua quejaque inajacamerereya, ai ecuanaja cacuatsashati cuana ehue eque anihua baatsu ama. Jutaquiju jadya juya tibu, umaeja ni tu inime juya: "Necajuchaticaraque jutidya". ¡Aijama! Jadya tuque ecuanaja inime tuputaqui ama.

¹⁶Ejeque ecuita peya queja catyatitsu ameretaya tibu, tujatu ataqui dutya tuque cuatsashatayaque. Micuanaja micuanaja bahuedya tumeque. Ecuanaja ecuanaja tumeque ecuita buchique, peya queja tuque mere ishuhua catyatitayaque. Satanás queja catyatitaya cuanaquetu casada tsehue cajuchaticaraque, tura cuatsashaya tibu. Majutsutu jadya juya cuanaque ijahuaque etiquiju judirubueque. Yusu queja catyatitaya cuanaque bacue casada tsehue tura amereya eque juishuque. Casada tsehue Yusuja biji eque ani ishuhua tuna.

¹⁷Yusurupai tuque aya Yusu, ecuanaja inime cuaretanahua tibu. Icuene ecuanaja Satanásja biji eque anijacahua ama. Iyacia ecuanaja jadya anie ama juya. Yunerique quisarati bacatsu tuque ecuanaja ejenehua. Ecuanaja inime taca eque ecuanaja Yusura amereya eque juhua. ¹⁸Yusura ecuanaja tuja casa tyahua, ecuanaja cajuchaticaraque ebijiseriujaju, tuja biji eque juishuque bijiseri ishuhua. ¹⁹Cuejaya micuanaja era, ecuanaja ecuanaja ecuita metseque buchique. Jadya micuanaja cuejaya micuanaja era bahuityayaque dyaque jida adeba ishuhua. Icuene ecuanaja Satanás queja catyatitaya jidamaque aishuhua. Ecuanajatu abijida juhua jidamaque. Iyacia Yusu queja pana catyati nejura jidaque aishuhua, Yusu queja ecatyati cuanaque aniya bae anie juishuhua.

²⁰Icuene ecuanaja cajuchaticaraque tsehue juneniya jari patya ecuanaja anicarama juhua Yusu pureamatura ishuhua. ²¹¿Aishuhua jatsutu jida juhua ecuanaja jidamaque juyaque? ¡Ni aishuhua buchique! Iyacia ecuanaja bisuya icuene eje bucha anie juhuaque adebatsu. Jadya anie jujacahuaque ama juatsu ecuanaja Yusura ijahuaque etiquiju enudyauque. ²²Iyacia ecuanaja Satanás quejaque inajacameretahua. Cajuchaticaraque ama ecuanaja amena. Yusu queja ecuanaja amena catyatitaya. Tuaequeja catyatitaya, tura ecuanaja anishaya tuja biji eque. Majutsu ecuanaja tuaqueja judirubueque ni eje tupu jaca ishuhua ama. ²³Jucha arida tibu ecuanaja maju aqui, mere pujira mere juya tibu etsujequi inaya bucha. Yusura bacue ecuanaja tsujema neri Satanás quejaque inajacamerereya ecuanaja, Ecuanaja Cuatsashati Cristo Jesús queja catyatitaya baatsu. Tura ecuanaja inajacamerereya majunuca ishuhua ama, tuatsehue ani ishuhua.

Yusuja Espiritu eque ecuanaja inime cuaretanayaque

7 Micuanaratu pana adeba aya cacuatsashati ehueque, micuanaja ecuanaja tsehuequi cuanaque. Chacha aniya jari tupu camadya ecuanaja casada tsehue cacuatsashati eque anitaqui. Majutsutu eje bucha jadya junucataqui ama. ²Jadya cuejae micuanaja aya, micuanaja adeba ishuhua. Cacuatashati equetu epuna ecaquemitique yahuique jaquedya. Jacataqui ama tujatu peya tsehue ani ishuhua. Yahuique ni tuja majuya, tume tu ahuema neri. Caquemitinucacara juatsu tu eahuemajuque caquemitinucataquidya cacuatashati cuanara amereyaque cayuamatimaquedya.

³Epunara yahuique chacha jariju peya deca jaraque-ryaque tumeque epunadya tu jucha metse. "Epunadyatu jidamaque juya yahuique tsehue", jadya ni tu peya cuanaja inime juya. Yahuique ni tuja amena ema-

ju, tumetu amena jidadya peya tsehue caquemitinuca ishu. Yahuique iyacuara tahuiqueretsu jabayaque juat-sutu inime metse juya amadya.

⁴Jadya micuana cuejaya, ecue eatsehuequi cuanaque. Ecuana Jesucristo queja catyatihuaque ecuana tumeque epuna buchique. Icuene tuque ecuana tuyu ama inime tupuhua: "Cacuatsashati cuana eque aniya tibudya ecuana quinajacameretibuque", jadya ecuanaja inime juhua.

Iyacua tuque ecuana jadya inime tupujacahua, epunaja yahuique majuhua juja yahuique jujacahua bucha. Iyacua ecuana Cristo jaque. Epuna yahuique majuhua juja yahuique iyacua jaque bucha, jadidya ecuanamena amena Cristo jaque. Yudididya chachatu netisuranucahua. Ecuana yujaque juya tibu ecuana Yusuja biji eque anicara juya. ⁵Icuene ecuana ecuanaja biji eque anihua. Yusu cahuaishu ishuque ecuana ahua. Cacuatsashati eque Yusura amerecarama ayaque ehueque isaratsu tuque ecuana bijiserihuadya jutidya cajuchati. Yusuja bijidamaque tuque cahuaishu ishuque ni ecuana ajacarama aya, japada tuque ecuana Yusu babuque ni eje tupu jipe ishu ama. ⁶Icuene ecuana eje bucha cajuchaticarataqui ama juhua. Etare apudaju erisi netiyyaque cuinanataquima netiyya bucha, jadidya ecuana ecuana taca quinajacameretitaquima cabatihua. Jesústu majuhua ecuana cuarequi. Amena ecuana inime cacuareshua. Amena ecuana Yusuja biji eque anitaqui cabatiya. Amena ecuana Yusura amereya eque anicara juya, cacuatsashatiju ehueque baatsu camadya ama ecuana jadya anie jutaqui, tuja Espiritura ecuanaja inime cuarehua tibu.

Cacuatsashati ehueque isaratsu ecuana bahue ecuana jucha arida cuanaque

⁷Umaera ni tu inime tupuya: "¿Jutaqui ju ni taa tu cacuatsashati jidama?" jadya. ¡Aijama! Jadya inime netupura ama. Cacuatsashati tu jidaque. Ehueque isaratsu ecuana caadebatiya ecuana jucha aridaque. Cacuatsashatiju tu ehueque: "Peya jaque micue ishu bijiseriyme" jadya. Riyaque isarahuaque ama juatsu ecuana jucha metse ama cabatiquena juhua, peya jaque ai bijiseriyyaque. ⁸Cacuatsashati ehueque isaratsu, Yusura ecuana amerecarama ayaque bahue juatsu, dyaquedy a jutidya tuque ecuana ecuanaja ataquimaque acara aya. Arepa jidamaque bahue ama bucha acaradya jutidya tuque ecuana jidamaque aya. Cacuatsashati baecuque juatsu tuque ecuana adebaquena ama juhua ejeque jucha, ejeque juchaque ama jadique. ⁹Cristo queja catyatima jariju ique jucha aridama cuana bucha cabatihua. Yusura jida cuana baya bucha ique cabatihua. Jadya tuque ecue inime juhua, era cacuatsashati adebataquima baya tibu. Adebatsu amena ique jucha aridaque caadebatihua. Caadebatihua ique Yusura japada emaju bucha bayaque. ¹⁰Amena riyaque adebatsu tuque ecue inime juhua: "A, amena bahue juhua eje bucha anie juishuque Yusu pureamatura ishu. Jadya ama bucha

anitaqui ama cabatiya dutya cacuatsashati eque. Ique jucha arida tibu tuque Yusu japada ebau. Majutsu tu- aqueja ama ejudiruu", jadya tuque ecue inime juhua.

¹¹Yusura cuatsashahuaque bahue jida juatsu, ique caadebatihua Yusura jucha metse bayaque, yume tu- cue tuque ahua tuque cahuaishu ishuque. Dyaque neredada ique cabatihua. "Majutsu tuque Yusu japada babuque", jadya tuque ecue inime juhua.

¹²Jadya ama bucha tu cacuatsashati cuana jida. Yusura tuna cuejaha Moisés eque. Dyaque tuyuque tume. Dyaque jidaque tume. ¹³Jadya ni taa ecue inime tupu ejuu: "Cacuatsashati cuana jidaque juatsu, jidaque adebadaditsudya ni taa tuque Yusu japada badirubuque". ¡A, aijama! ¡Jadya inime patupu ama! Yusratu cacuatsashati cuana cuejaha, dutya ecuana dyaque cuita cajuchatiyaque bahue amere ishu, dutya Yusu cahuaishu ishu ayaque. Icuene ique jida cuana bucha cabatihua. Amena riyaque cacuatsashati cuana pana adeba aatsu dyáquedy a jutidya caadebati- ajea ique jucha aridaque.

Jidaque acara ayaque aya amadya ecuanara; jidamaque acarama ayaque camadya ecuana ayaque

¹⁴Bahuedya ecuana Yusura tuja Espiritu eque tuja cacuatsashati cuana cuejahaque. Arepa tume cuanaque tujaque ama bucha, ique bacue ecuita; ecue casa eque cuita camadya tuque ataqui ama baya jidaque tura cuatsashahuaque. Arepa eje bucha juatsu ecuita metsequira tuque metsera cuatsashahuaque acarama aya ama bucha, ataquidya tujatu tura cuatsashahuaque. Jadidya ique. Arepa ique cajuchaticarataqui ama bucha, cajuchatiyadya ique. ¹⁵Yusuja jidaque ama aatsu tuque inime tupuya: "¿Eje bucha juatsu tuque ahua ama jidaque era acara ayaque?" Cajuchaticarataqui tuque ecue inime juya: "¿Eje bucha juatsu tuque ahua riyaque era acarama ayaque?"

¹⁶Eratu pana ejenedya aya Yusuja cacuatsashati cuana jidaque, arepa ique jidama paju ama bucha. ¹⁷Jidamaque tuque aya, era cuitadya acara aatsu ama. Aya tuque era, ecue jucha aniya jari tibu. ¹⁸Ique riyaque yahua juque ecuita jucha aridaque. Adebadya tuque era ecue casa eque cuita camadya jidaque ataqui ama bayaque. Arepa jidaque acara aya ama bucha, ecue cuita camadya casa eque tuque ataqui ama baya. ¹⁹Acara ebari datse tuque jidaque aya. Jadya ama bucha aya ama era. Jidamaque acarama ayaque cuita camadya aya. ²⁰Era acarama ayaque tuque aya. Era cuita, cajuchati bijiserinucatsu ama, ique jucha arida jari tibu, tuque aya.

²¹Jidaque era acara ayaque, eje bucha ataqui ama tuque baya ecue casa eque, educuju ecue jucha aniya tibu. Pana adebadya tuque aya riyaque. ²²Ecue ishutu dyáque jida Yusura cuatsashahuaque; tura amereya eque neridya jucara juya. ²³Jidaque tuque acara ebari datse aya. Ecue tu inime: "Yusura amereyaque tuque acara ebari aya". Arepa ecue inime jadya ama bucha, tuque ataqui ama baya. Educu equeque tuque ecue cajuchaticarataqui. Erisi buchique ique. Etare apudaju

erisi netiyaquetu eje bucha cuinanataqui ama, tumebaedya ique cajuchatiyacataqui ama cabatiya. Aira cuana jadya jujacataqui ama amereya.

²⁴ Dyaque nercada, inime tupu baecua ique! ¿Aira piji jatsu dyadi einajacamereu, Ijahua ja tuja etiquiju ique duju ishü ama? ¿Aira jatsu dyadi cajuchati ebijiserimerejacau? ²⁵ Ecuana Cuatsashaqui Jesucristojatu casa aniya. Tura inamerejacaya. Jadya tibudya tuque ecue Yusu jadya abahue:

—Tata, miquemi dyaque jida eatsehue, —jadya tuque ecue abahue.

Eje buchadya Yusura amereya eque anicara juya. Jesucristoja casa tsehueque ama jadya anitaqui ama cabatiya. Tuquemaque cajuchatiyacataqui ama cabatiya.

Yusuja Espiritura cuatsashaya eque anitaquique

8 Ecuana Cristo Jesús queja catyatihuaque ecuana Yusura nercaturanime ama ecuanaja jucha cuana tibu. ² Icuene ecuana cajuchaticaraque jacayaque ama anihua. Iyacu ecuana Yusuja Espiritura tyahua tuja casa ecuana cajuchaticaraque jaca ishü, ijahuaja etiquiju ecuana judiru ishü ama. Aniya tuque ecuanaja riyaque casa, ecuana Cristo Jesúsja inime juya eque aniya tibu. ³ Eje bucha jutaqui ama cuita cacuatsashati ehüene eque juya tibu, eje bucha judirutaqui amatu Yusu queja cacuatsashati eque. Yusura tuja peadyaque Ebacuaque cuadishahuaju, tujatu anicuare ecuita, ecuana jucha arida cuanaja bucha. Ecuana jucha cuana tsujetyaqui majutsu tura ecuana tuja casa tyahua, ecuanaja cajuchaticaraque jaca ishü. ⁴ Jadyatu tuque juhua, ecuana Yusuja biji eque ani ishü, tura amereya eque ani ishü. Ecuana ecuana amena aniya Yusuja Espiritura amereya eque. Ecuana biji eque ama ecuana aniya. Jadya tibudya ecuana anitaqui cabatiya Yusura amereya eque.

⁵ Tunaja biji eque cuita camadya aniya cuanaratu inime tupuqui aya tunaja pureama ishüque cuita camadya. Yusuja Espiritu biji eque aniya cuanaratu inime tupuqui aya Yusu pureamatura ishüque. ⁶ Tunaja biji eque, cajuchati bijiseri eque anihua cuanaque tuna canerecatibuque. Eje tupu majutsu tunajatu Yusu japa da babuque ni eje tupu jipe ishü ama. Ecuana Yusuja biji eque aniya cuanaque bacue ecuana aniya dyaque jida, inime tsapema tsehue. Majutsu ecuana Yusu queja judirubuque ni eje tupu jaca ishü ama. ⁷ Tunaja biji eque cuita camadya juishüque inime tupuqui aya cuanaque tuna Yusu ujeu cuanaque. Anicarama tuna juya tura amereya eque. Tunajatu ni eje bucha ataqui ama Yusuja biji eque ani ishü. ⁸ Tunaja biji eque cuita camadya aniya cuanaratu Yusu pureamaturaya ama.

⁹ Jadya ama micuana. Micuanaja biji eque ama micuana aniya, arepa peya huecaca micuanaja jadya anicaraque inime juetiya ama bucha. Yusuja Espiritura amereya eque micuana aniya. Cristora Espiritu cuadishahuaque micuana tsehue tibu, micuana tura amereya eque juya. Cristora Espiritu cuadishahuaque tu peadya peadya Cristoja cuana tsehue. ¹⁰ Cristo tuja Espiritu eque micuana tsehue aniya tibu, iyacuane-

huadya tura micuana, Yusu tsehue ani ishü ni eje tupu jaca ishü ama. Majutsu tuque micuanaja ecuita riribuque, micuana cajuchatihua tibu. Arepa jadya juya ama bucha, Yusuja Espiritura micuana anishanucabuque, tura micuana jucha metse ama baya tibu.

¹¹ Yusura Jesús emaju caniju ishatanacuareque tuja ecuita cuitadya nityatsuranucacuare bucha, jadya tura ecuana ejeque huecaca eju ecuana epapatanaque ecuana nityatsurabuque. Ecuita maju baecuaque tura ecuana tyabuque. Tuja Espiritu casa eque tura ecuana jadya amerebuque.

¹² Jadya tibudya micuana cuejaya riyaque, micuana ecue eatsehuequi cuanaque. Yusuja bijidaque tuque ecuanaja ataqui. Ecuana biji equedya jutidya ai neajera ama. Ecuana icuene cajuchatihua baedya jutidya nejuajera ama. ¹³ Cajuchatiajeyadya jutidya ni ecuana, ecuanaja biji, Yusura ecuana nercaturabuque. Majutsu tuque ecuana jipebuque ama. Yusuja Espiritu eque ni ecuana cajuchatiyacaya, tura ecuana Yusu tsehue anishabuque. Yusu tsehue ecuana aniya, riyaque yahuaju jari tupu camadya ama, majutsu tumebaedya.

¹⁴ Yusuja Espiritura amereya eque juya cuanaque tu Yusuja cuanaque. Yusura tuna tuja ebacua cuanaque bucha baya. ¹⁵ Icuene ecuana Yusura cuatsashaya eque jucara ebari juhua, tuque mubatsudya jutidya. Emetsenera tuque metsera amereya eque bajida juatsu ejuu bucha ecuana jucua. Jadya ama bucha tuque ecuanaja Yusura tuja Espiritu cuadishahua. Tumeque Espirituradya ecuana inajacamerehua. Jadya equedya ecuana bajidama, Yusura ecuanaja jucha cuana tibu enerecaturaju. Tuja Espiritura ecuana yunerineya Yusura ecuana tuja ebacuaque bucha bayaque. Jadya tibudya tuque ecuanaja Yusu tsehue quisaratiyaque jadya abahue, "Ecue Etata", jadya.

¹⁶ Ecuana ecuana bahuedya Yusura ecuana tuja ebacua cuanaque bucha bayaque. Yusuja Espirituradya ecuana bahue amereya. "Miquemi Yusura baya tuja ebacuaque bucha", jadya tura ecuana aya.

¹⁷ Yusura ecuana tuja ebacua cuanaque bucha baya tibu, tumebaedya tura ecuana tyabuque dutya jidaque tuja cuanaque tura tyana ahuaque. Yusura Cristo tyana ahuaque ecuana dyadi tura ecuana tyabuquedya. Yusu adeba baecua cuanara ecuana jida ama aya, Yusura amereya eque ecuana juya baatsu. Cristo tunajatu tumebaedya jida ama acuare riyaque yahuaju aniya jariju. Cristo tu jida, casada jadya. Eje tupu tuque dutyaja ecuari judadihuaju ecuana dyadi ecuana tuatsehue ecuavidya jubuque, arepa ecuana rehua canerecetiya ama bucha.

Dyaque jida ecuana Yusuja yacuaju judirubuque!

¹⁸ Riyaque yahuaju ecuana canerecetiya. Tuequedya ecuana Ecuana Cuatsashaqui queja judirubuque. Tuque bucha ecuana jubuque. Jadya tibudya ecuana inime tsapema anicara juya, arepa rehua canerecetiya ama bucha, Yusura ecuana dyaque jida ameredadiya tibu. Eratu pana ejenedya aya ecuana jadya judadibuque. ¹⁹ Yusura dutya iyahua cuanaratu eje

bucha juetishacara tsehue ihuaya tumeque huecaca, eje tupu tura ecuana tuja Ebacuaque Jesucristo bucha amereyaque. ²⁰ Yahua iyatanahuajutu amena dutya cayuamatitibunehua. Iyahua cuanaja inime amatu jadya jutibunehua, “Adán cajuchatihua tibu, dutya era iyahuaquetu jidama juya, cayuamatiya”, jadya Yusuja inime juhua tibu.

Jadya ama buchatu Yusuja inime: “Ejeque huecaca tuque iyacuanebuque dutya era iyahua cuanaque”. ²¹ Dutya iyacua riyaque yahuaju aniya cuanaquetu cayuamati, tere jadya jubahue. Tumeque huecacatu Yusura tuja cuanaque, dutya tura iyahua cuanaque jadya tura amerecara aya bae amerebuque ni eje tupu cayuamatinuca ishu ama. Jadya iyacuanetanaetu dutya jubuque. ²² Adán equeque tupu iyacua equequetu dutya canerecatiya. Epunara mari mari tsehue ebacua cuinanayaque eihua bucha, jadidyatu dutyara ihuaya dutya cuaretanayaque. ²³ Ecuana ecuana nerecadadya juya. Aracara, ijicara jadya ecuana jubahue. Castere tahue ecuana; ujejeda jubahue ecuana. Yusura tuque ecuanaja tuja Espiritu cuadishahua. Espiritu ecuana tsehuedya tibu, tuque ecuana pana ejenedya aya ejeque huecaca ecuana Yusura dutya tyaana ahuaque tyadadibuque. Dutyara tuque ecuana ihuaya tumeque huecaca ecuanaja ecuita riri baecua judadiyaque. Ecuanaja ecuita jadya ecabapetiju, ecuana Yusura ejitaju abuque tuja ebacua cuanaque jadya. Jadya canerecatie ecuana juya, tura ecuana cabapetishaya tupu. ²⁴ Ijahua quejaque inajacameretsu ecuana Yusura tyaana ahua ecuita ecabapetique. Ihuaya jaridya tuque ecuana tumeque ecuita cabapetiyaque. Amena ni ecuana etyatana ejuu ecuana tyatana ana juhuaque, eihua ama jaridya tuque ecuanara. Ni ejeratu ihuaya jari ama amena etyatanaque. Ecuanaratu ihuaya jari Yusura ecuanaja ecuita cabapetishadadiyaque. Ejeneyadya tuque ecuanara ejeque huecaca Yusura cabapetishayaque. Canimehuallatinime ama ecuana, arepa riyaque yahuaju jari tupu nerecada juya ama bucha.

²⁶ Tumebaedya ecuana Yusuja Espiritura casaturaya, ecuana casadama juyaju. Baecua ecuana eje bucha quisaratie Yusu tsehue juishuque. Yusu eje bucha cuejataquima baatsu, ataqui ama ecuana quisarati baya ecuanara educuju inime tupuyaque. Yusuja Espiritu tu ecuanaja ishu bacabacaya. Jadya tsahuae tura ecuana aya ecuana Yusu tsehue quisaratiyaju. ²⁷ Arepa ecuanara quisarati ataqui ama baya ama bucha, Yusratu adebaya ecuanara educuju inime tupuyaque. Jadya tibudya tujatu adebaya tuja Espiritura cuejacara ayaque tura ecuanaja ishu bacayaque. Yusuja biji equetu tuja Espiritura bacaya, ecuana tuja cuanaja ishu.

Ni aira buchique ecuana Yusu jacamereyaque ama

²⁸ Yusratu dutya ecuana eje bucha juyaque, ecuanaja jida ishu jadya amereya, tuque iyuhueda baqui cuanaja ishu. Turatu dutya eje bucha amereya ecuanaja jida ishu, tura tuja ishu mepehuaja. ²⁹ Yahua iyama jari-

radyatu Yusura adeba, iyuhueda bau jadya ahua tuja judadibuque cuanaque. Tunaja ishu tujatu inime tupuhua: “Riya cuanaque rique cuejabuque ecue Ebacua Jesucristo bucha tuna jida juishu. Tuque tujatu tuna tsehuequique icueneque buchique jubuque. Jetiama era mepehua cuanaque tujatu jubuque tuja eju cuanaque bucha”, jadya patu Yusura inime tupucua.

Jadya ihuarae tujatu ecana ahua Ebacuaque Jesús bucha juishu. ³⁰ Tura mepehua cuanaque tujatu cuejahua: “Micuana micuana jucha metse ama baya”. Tura jucha metse ama bahuaquetu tura jida amerehua tuja Ebacuaque bucha. Jadya Yusuja inime juya tibu, ecuanara tuja cuanaja ishu, dutya ecuana eje bucha juyaquetu ecuanaja jida ishuque.

Jesucristo eque ecuana Yusura bamereya tura iyuhueda bayaque

³¹ Yusu ecuana tsehue dyaque jida juya tibu, ¿eje bucha canimehuallatie jatsu ecuana ejuu? Yusura ecuana narujacaya ama. Jadya tibudya tuque ecuana jidama ama inime baya, arepa ecuana ujeu baqui cuanara jidama aya ama bucha. ³² Yusura ecuana dyaque iyuhueda baya. Turatu Ebacuaque iyuhuedama bahua iyeta ishu. Turatu cuadishahua ecuana eiyetauque. Tura etsujequi dyaque umada ecuana tujaque amere ishu tsujetyahua tibu, yuneri cuitadya tujatu abuque dutya ecuanaja jida ishu. ³³ Ecuanaratu jidama ama inime baya peya cuanara jucha metse jadya ayaju ecuanara Yusuja emepeque. Yusura cuitadya ecuana jucha metse ama jadya cuejaya, tura ecuanaja jucha cuana tillahua tibu. ³⁴ Cristo Jesústu majuhua ecuanaja jucha cuana tsujetyaqui. Emajuquetu chacha netitsuranucacuaque. Iyacua tu tuque Yusuja yacuaju. Tuquetu Etataque tsehue enaruquique. Tuquetu quisaratiya Etataque tsehue ecuanaja ishu. Jadya tibudya ecuana ni ejeja buchique jadya ataqui ama: “Micuana jucha arida tibu, micuana canerecatitaqui. Yusu tuque micuana japada babuque ni eje tupu jipe ishu ama”, jadyatu ni ejeque buchique jutaqui ama.

³⁵ Cristora ecuana dyaque iyuhueda baya. ¿Aira jatsu ecuana iyuhueda ebamerejacau? [Ni airatu jadya eamereu ama! Yusu adeba baecua cuanara ni ecuana jidama eau. Eijehueu ni tunara ecuana ecuanaja epu cuana juque. Tunara ni ecuana ehuanashau. Tupu ama ni ecuanaja ara ishu cuanaque eaniu. Jutu ishu cuanaque ni ecuanaja tupu ama eaniu. Mudaju majutaqui ni ecuana ejuu. Cuchiru tsehue ni tunara ecuana eiyeu, jadya ama juatsu peya ai qiyeti ishu tsehue. Arepa ecuana jadya ejuu ama bucha, Cristora ecuana iyuhueda bajacaya ama ni tura ecuana narujacaya.

³⁶ Beru yuequedya Yusuja cuanaque jucuare baedya ecuana judadibuque. Ecuita dyaque nerecada atanacuarerari Yusuja quisarati huenequere:

“Miaqueja ecuana catyatihua tibu, ecuana dutya huecaca ecuita cuanara iyecara aya.

Uhuisha cuana iye ishu edujuta bucha tunara ecuana aya”.

³⁷ Arepa ecuana jadya canerecatie juya ama bucha, ni aira ecuana canimehuallatishaya ama. Iduya tuque ecuana dutya pureama tsehue, Cristora ecuana iyuhueda baya tibu. ³⁸ Ni aira buchique ecuana Yusu iyuhueda bamerejacaya ama. Ecuana jatu amena inime etere pana adeba tuque ecuana aya. Ecuana chacha aniya jari tupu, majuhuaaju iyuhueda tura ecuana bajacaya amadya. Barepaju Yusu tsahuaqui cuanara ecuana iyuhueda bajacamereya ama. Ejitaju ama cuanaja casara ecuana iyuhueda bamerejacaya ama. Yatseja ecuari cuanaja casara ecuana iyuhueda bamerejacaya ama. Jida ni ecuana cuetishaya, jadya ama juatsu jidama, tura ecuana iyuhueda bajacaya ama. Mara cuana juetibeyaju tura ecuana iyuhueda bajacanime ama. ³⁹ Ebarucue equera ni emaque equera ecuana iyuhueda bamerejacaya ama. Jadya tibudya ni ai Yusura iyahuara ecuana tuque ejacamereu ama; ni aira buchique ecuana iyuhueda ebamerejacau ama.

Yuequedya Yusura israelita cuana tuja juishu mepecuareque

9 Dyaque jidama inime ishú tuque baya ecue ata israelita cuana. Dyaque jidama inime ishú ujeda jadya taa baya educuju. Pusha ama cuitadya jadya caadebatiya ique Cristoja inime eque juya tibu. Yusuja Espirituradya yunerineya ique pusha pusha ama juyaque. Tuna jiteque ique dyaque peya inime juya. ³ Eje buchadya Yusu queja bacatsu tuna Jesús queja catyatishamerecara tuna aya. Tuna tuna ecue ata cuana. Peadya ecuita eque camadya ejuracanaque ecuana.

—Tata, jadya jutaquique juatsu era Cristo japada pajaca, ecue ata cuana ijahuaja etiquiju nubidiru ishú ama, —jadya datse tuque Yusu cuejacara ahua.

⁴ Ecue ata cuana tu Israel eque ejuracana cuanaque. Yusuratu tuja ebacua cuanaque amerehua. Tuna tsehuetu tuque junenicuare tuja casa, jidaque tuna bamereyaque. Iyahuatu quisarati tuna naru ishú. Moisés eque tujatu ecana cacuatsashati cuejahua. Bahue tujatu ecana amerehua eje bucha camuimeretie juishuque. Tuna tsehue juneni ana, jidaque tyaana jadya tujatu ecana ahua. ⁵ Tunadya tuna Abraham, Isaac, Jacob eque ejuracana cuanaque. Peadya tunca beta earacana Israelja ebacua cuanaque eque ejuracana cuanaque tuna. Tuequedyatu cuinanacuare Cristo; tuquetu tumbaedyá Israel eque ejuracanaque. Pureama, emuita siri paju. Tuquetu Yusu, dutya ai aniyaque naruquique. Jadya tibudya pureama easiri paju.

⁶ Eje uma piji camadya tu ecue ata israelita cuana einajacaque. Arepa jadya ama bucha, tuque ecuanaja inime tuputaqui ama, Yusura ahua ama tuja quisarati ecuanaja baba cuana tyaana ahuaque. Tura tuna tyahua tyaana ahuaque tura yuneri cuita mepehua cuanaque camadya. Tuna tuna israelita neri cuana bacani. Israel eque dutya ejuracana cuanaque ama tuna Yusuja emepe cuanaque. Umae piji cuita camadya tuna jadique. ⁷ Abraham eque dutya ejuracana cuanaque

amatu Yusura mepehua tuja juishu, umae piji camadya. “Micue bacua Isaac eque ejuracanaque cuita camadya tuque jidaque tyaana aya. Tuna camadya tuna mique eque ejuracanaque neri baya”, jadya patu Yusura Abraham acuare beru.

⁸ Jadya bahuee ecuana dutya ama Abraham eque ejuracana cuanaque Yusura tuja ishú mepehuaque. Arepa Abrahamja peya ebacua cuanaque anihua ama bucha, tume cuana eque ejuracana cuanaquetu Yusura jidaque tyaana ama ahua. Isaac ecarecaniju aijama jariju patu Yusura tyaana ahua Abraham tuque cuinanadadiyaque. Jadya equetu Yusura tyaana ahuaque cuinanahua. Tuque eque juracanahua cuanaque cuita camadyatu Yusuja cuanaque. ⁹ “Arepa micue huane Sara eje bucha cabacuatie jutaqui ama bucha, carecani isaquitu juya. Riyaque mara juetiayajudya tujatu cuinanaya. Jadya cabameretie juya ecue casa aniyaque”, jadya patu Yusura Abraham acuare.

¹⁰ Tumbaedyá micuana riyaque cuejaya micuana huecasha ishú, Abraham eque dutya ejuracana cuanaque ama tuna Yusuja emepeque. Yusuratu mepehua ecuanaja ebaba Isaac jipidya ama. Isaac, Rebeca ecatsejatu beta ebacua pere cuinanacuare. Yusuratu mepecuare peadya cuita camadya. ¹¹ Tatse cuinanama jariju, ecuaqueja ecarecaniju jarijutu Yusura cuejacuare Rebeca: “Pere ecatse esiri juatsu, icuene cuinanahuaquetu ejuque merequique jubuque”, jadya patu Yusura Rebeca acuare. Jadya cuejaetu Yusura acuare, ejuque mepehuaque, eujuque bijidamadurahuaque. Mepecuare tujatu Jacob, jadya tura icuenedadya inime pirehua tibu. Mepecuaretu Jacob; bijidamaduracuaretu Esaú, ai tatse eje bucha juhua baatsu ama. Jadya tujatu ahua, tura cuitadya jadya acara ahua tibu. ¹³ Jadya tu ehueene Yusuja quisarati, tura Rebeca, Isaacja ebacuaque ecatseja ishú quisarati acuareque: “Jacob tuque iyuhueda bahua; eradyatu mepehua. Esaú bacue bijidamadurahua”, jadya patu Yusu jucuaque.

¹⁴ Umaera ni tu Yusu tuyu ama bucha baya, peadya camadya mepe, peya bacue bijidamadura jadya, jadya juhua baatsu. ¡Aijama! ¡Jadya ama tuque! Tuquetu tuyu neri, dutya tura eje bucha acara ayaque aya tibu. ¹⁵ Turadyatu Moisés cuejacuare béru: “Aniya tuque ecue canerecabati ejeque ecue jucara juya tsehue. Ecuetu aniya quiyuhuebati ejeque era jadya bae acara aya tsehue”, jadya patujatu acuare.

¹⁶ Jadya equetu Yusuja canerecabati aniya ecuana tsehue, ai tuque ecuanara ecuana tsehue jadya amereyaju ama. Tuquetu jida ecuana tsehue, ai ecuanatuatsehue jida baatsu ama. Tujatu canerecabati aniya ecuana tsehue, tuque jadya jucara juatsu cuita camadya. ¹⁷ Yusujatu aijama jucuaque canerecabati Egipto juque huaraji dyaque arida tsehue. Ehueene tu Yusuja quisarati: “Érami mepehua Egipto juque huaraji dyaque aridaque juishu. Ahua tuque micue yacuaju ni ejeque ecuitaja ataquique ama, ecue dyaque casa aniya tsehue. Jadya equetu dutya queja aniya cua-

naque bahue judadiya ique dyaque casadaque", jadya patu Yusura quisarati acuare Moisés eque.

(Arepá tumeque huarajija inime cacuareti ishú emajaca anihua ama buchatu cacuaretihua ama.)¹⁸ Jadya equetu Yusuja aniya canerecabati eje tsehue tuja canerecabati anicara juya tsehue camadya. Tura amereya eque jucarama juya cuanaquetu Yusura inime cacuaretishaya ama.

¹⁹ Ejeja cuana ni tu inime juya: "Yusuratu mepeya; ecuita cuanatu bijidamaduraya. Jutaquiju tu tuyu ama ejequedyá jutyida jucha metse aya ama tibu. Ni ejeradya jutidyatu Yusura iyhuaque ecuaireu ama".²⁰ Era micuana jadya quemitsaya. Jadya taa inime netupume, ique bacaqui cuanaque. Yusu tuque micuana jadya jutidyatu juya jadya ataqui ama. Pabejerere ni quisarati aquí ejuu, eje bucha jadya ae jatsu tujatu eau tuque cueyanequique: "¿Aishu mira pabejerere jutidyá ahua, sura jida piji ehue eauque?" jadya? Eiyajatu tuque iyaquique eje bucha quisarati tsehue ataqui ama.²¹ Sura cuana pujiratu mechi tsumeya tura eje bucha acara aya eque aishu. Tumeque mechi eticaquedyá tujatu eau sura jida piji ehueque, shasha cuana nitya ishú, tumbaedyá sura jiji cuana ijehue ishú.

²² Mechi jaba bahueratu sura cuana aya tura eje bucha acara aya eque; jadidyatu Yusura israelita cuana aya tura eje bucha acara aya eque. Tura amereya eque ama juya cuanaquetu tura tuja cahuaiti, tuja casa bamerecara ahua. Jadya ama buchatu tuque dyaque tsunutahua tuna nerecatura ishú. Tunaratu tuque cahuaitishahua. Jadya tibusu tuja aniyadya tuna nerecatura ishú. Jadya ama bucha tura tuna tyaaajehuadya jutidyá jidaque. Peya cuana Jesús queja catyati ishú cuejamere juya tupu, turatu israelita cuejataquima cuanaque nerecaturahua ama.

²³ Ahua tujatu tuque dyaque jida casada ecuanaja ishú caadebamereti ishú. Yuequedyadyatu Yusuja inime juhua: "Jida tsehue tuque ecue cuanaque babuque". Yuneridya iyuhue tshuedya tura ecuanabaya.²⁴ Yusura ecuanamepehua tujaque juishu. Ecuanaisraelita cuana camadya ama, tumbaedyá israelita ama cuanaquetu Yusura mepehua tujaque juishu.

²⁵ Neadebacue Yusuja quisarati Oseasra huenecuareque:

"Era ecuique ama bucha bahua cuanaquetu ecue judadibuque.

Iyuhuedama bahua cuanaque tuna amena iyuhueda baya.

²⁶ Eje quejadya jutidyá era jadya ahua cuanaque: 'Micuana micuana ecue cuanaque ama' era tuna abuque:

'Micuana micuana ecue cuanaque.

Maju Baecua jaque micuana",

jadya patu Yusura quisarati acuare Oseas eque.

Jadya quisarati ayaquetu Yusura israelita ama cuanaque tuna ecue judadibuque, jadya acuare.

²⁷ Tumbaedyá nehuecatanacue Isaiasra huenecuareque beru yuequedyá israelita cuana jadya ayaque:

"Israel eque ejuracana cuanaque tuna jetie ama piyebatilla tupu ama, cueri cuanaja ecuaqueju mejiji bucha.

Arepá jetiama paju ama bucha, eje uma piji camadya tuna Yusu queja judirubuque.

²⁸ Yusura tuna nerecatura ana ahua jetiama tuque ujeu baqui cuanaque.

Masadamadya tujatu jadya adadibuque.

Tuyudya tujatu ecana jadya abuque, tura amereya eque ama juhua tibu.

Patrónra manu catsujetyamereti ishú patsunuta ama jadya eau bucha, jadidyatu Yusu tsunutabuque ama dutya tura amereya eque ama juhua cuanaque nerecatura ishú"

jadyatu Isaiasra huenecuare béru.

²⁹ Tumbaedyatu Isaiasra cuejanucacuare eje bucha judadiyaque.

"Berutu Yusura dutya iyemeretillacuare Sodomaju, Gomorraju anicuare cuanaque, tura amereya eque ama cuita juya baatsu.

Yusu dutya naruquija ecuanatsehue canerecabati aijama juquena juhua, tura ecuanaiyetillaquena juhua, tumeque epu ecatsēju cuanaque acuare bucha", jadyatu Isaiasra huenecuare.

(Jadyatu huenetanacuare Yusuja quisarati, umae israelita cuana camadyatu Yusu queja judirubuque jadye ejitaju ayaque.)

Dutya jujeri israelita cuana Jesús queja catyaticarama juyaque

³⁰ ¿Eje bucha juatsu jatsutu umada israelita ama cuanaque Ijahua quejaque einajacaque juya, israelita cuana eje uma piji einajacaque? Ryaque micuana cuejacara aya. Israelita ama cuanaratu inime tupucuare ama: "¿Eje bucha anie ecuanaejuu Yusuja biji eque cuita tuja ecuanajucha metse ama bucha baishu?" jadya tunajatu inime tupucuare ama. Jadya ama bucha tuna Yusura jucha metse ama bahua, Jesús queja catyati-huaju.³¹ Israelita cuanajatu inime jucuaré, dutya cacuatsashati eque juyaju baatsu Yusura jucha metse ama baya bucha. Eje bucha cacuatsashati cuana eque cuita jutaqui ama tuna cabaticuare.³² ¿Eje bucha juatsu tuna Yusura ecajuchati jari bacuare? Tuna cacuatsashati cuana eque juatsu Ijahua quejaque quinajacameretiya bucha jucuaré tibu, Jesús queja catyatitsu ama. Tu- aqueja nimee jutaquique tuna inime cujisha ebari cuita aatsu ecana jida mere cuana tsehue jutidyá ecana quinajacamereticara juhua. Tsajajacama cuayaque tumu ebari tsehue tsuru juatsu tuque tsajaja cama juticara juyaju ejunatiu ama bucha, jadidyá tu dutya jujeri israelita cuana. Judirubuque ama tuna Yusu queja, tuna Cristo queja catyaticarama juya tibu.³³ Cristodya tu tumu ebari buchique. Jadyatu Isaiasra huenecuare Yusuja quisarati tuque jadya ayaque:

"Eratu cuadishabuque israelita cuana chicashaqui buchique.

Tuaqueja catyatiya ama tibu micuana yuamaturatanaterebuque, etihuesu eque pacacatsu ejuu bucha.

Tuaqueja catyatiya cuanaquetu ni eje tupu ecapeya inimeti juya ama”, jadyatu Isaiasra huenecuare Yusuja quisarati cuana.

10 Cuejaya micuana era, ecue eatsehuequi cuanaque. Eje buchadya einajacamere datse tuque ecue ata israelita cuana amerecara aya. Yusu queja bacabacayaque tuque ecue abahue:

—Ecue ata israelita cuana Jesús queja pacatyati, micue ecana Ijahua quejaque inajacamere ishü, Tata, —jadya tuque ajacaya ama.

² Adebayadya tuque era, tuna Yusuja biji eque jucara ebari juyaque. Tume tuna baecua eje bucha Yusuja biji eque juishuque. ³ Tunaratu adebaya ama Yusura camadya ecuana jucha metse ama amereyaque. Jadya tibudya tuna tuna cuita camadya jucha metse ama cabameretiya tunaja equedya jutidya. Ejenecarama tunajatu aya Yusura ecuana jucha msetse ama bayaque Jesús queja cuita camadya catyatitsu. Catyaticarama ecana juya tuaqueja. Bijidamaduraya tuna tueque cuita camadya Yusura inajacamere ishü iyahuaque.

⁴ Cristotu majuhua etsujetyaqui, ecuana Yusuja jucha metse ama baishu. Ecuana tuaqueja cuita camadya catyatihuaju, Yusura ecuana jucha metse ama baya. Jadya ama buchatu dutya jujeri ecue ata cuanara inime tupuya jadya: “Yusura ecuana jucha metse ama baya, ecuana cacuatsashati cuana eque cuita camadya juyaque juatsu”, jadya jutidya tunajatu inime tupuya.

⁵ “Cacuatsashati cuana ehue ne eque cuita aniya cuanaque tuna Yusu queja judiribuque”, jadyatu Moisésra huenecuare béru. ⁶ Paju ama ecuanaja inime Yusura dyaque ataquimaque inajacamere ishü amereya bucha. Yusura ecuana jucha metse ama baya, ecuana Jesús queja catyatihuaju baatsu camadya. Tumebaedy tu ehue ne: “Paju ama micuanaja inime: ‘¿Ejequetu etsurau barepaju einajacamerequique sarera?’” Cristo cuitadyatu butehua riyaque yahuaaju. ⁷ Tumebaedy tu ehue ne: “Paju ama micuanaja inime: ‘¿Ejequetu ebuteu emaju cuanaque aniyaju einajacamerequique sarera?’” Cristo tu tuhua ama. Netitsuranucahua tuque.

⁸ “Ibeda ama tu eje bucha Ijahua quejaque inajacamere ishüque bahue juishu. Micuanaratu amena bacahuadya cuejatayaju. Micuanaratu amena ahuaadya bacahuadya riyaque quisarati. Micuanaratu amena riyaque inime tupu ishü ahuaadya”, jadyatu ehue ne jucua. Riyaquedya tuque ecuana quisarati cuejayaque. ⁹ Ecuana “Jesús tu Ique Cuatsashaquique”, jadya quisarati ayaju Yusura ecuana Ijahua quejaque inajacamereya. Ecuana yuneri cuitadya Jesús emajuque chacha netitsuranucahuaque ejeneyaju, Yusura ecuana inajacamereya. ¹⁰ Dutya ducuta Jesús queja catyatihuaju, ecuana Yusura jucha metse ama baya. “Jesús queja ique catyatihua”, jadya cacuejatiyaju, ecuana Yusura inajacamereya.

¹¹ Ehuenedya tu Yusuja quisarati: “Ecuana Cuatsashaqui queja catyatihua cuanaque tuna bisunime ama tuaqueja nimee juatsu”. ¹² Ejequedya jutidyatu Jesús queja ecatyatiu einajacaque juishu. Paju israelita, israelita ama, Yusura ecuana inajacamereyadya. Peadya Ecuana Cuatsashaqui Jesucristo dutya naruquique. Tere tupu ama tura ecuana tyabuque jidaque eje uma tuque jidaque bacaqui cuanaque. ¹³ Jadya tu ehue ne Yusuja quisarati: “Ecuana Cuatsashaqui queja tuja inajacamere ishü bacabacaya cuanaque tuna einajacadya juya. ¹⁴ ¿Eje bucha bacae jatsu tunajatu jadya eau, ai tunaja tura inajacamereyaque ejeneya batu di taa? ¿Eje bucha jatsu tunajatu eau, ai tunaja, tuna jiteque tuque majuhuaque ebaca batu di taa? ¿Eje bucha bacae jatsu tunajatu eau riyaque quisarati aira cuejatiya batu di taa? ¹⁵ ¿Eje bucha cuae jat-sutu Yusuja quisarati cueja puji cuana ejuu, aira ecana cuadishaya batu di taa? Ehuenedya tu Yusuja quisarati: “Dyaque jida tu jidaque quisarati cuejaqui cuanaque juna ishü” jadya.

¹⁶ Arepa ecuanara cuejayaju bacaya ama bucha, dutya amatu ejeneya ecuanara cuejayaque. Isaiasratu huenecuare: “Eje umara piji camadyatu ecuanara cuejayaque bacahua, Ecuana Cuatsashaquique”.

¹⁷ Yusuja quisarati cuejayaju bacatsu ecuana catyatiya Jesús queja. Yusuja quisarati bacatsu cuita camadya tuque ecuana Jesús adebaya.

¹⁸ Umaera ni tu inime tupuya: “Israelita cuanaja ni tu aijama emajaca juhua riyaque quisarati baca ishü.” Jadya ama tuque! Tunaratu cuejayaju bacahuadya. Yusuja quisaratitu ehue ne:

“Duty a quejaratu quisarati bacahua cuejayaju.

Duty epu cuanajutu riyaque quisarati cuejatanahua”, jadya tu ehue ne.

¹⁹ Umaeja ni tu inime juya: “Israelita cuana ni tu bacua juhua israelita ama cuanaque Yusura inajacamereyaque”. Aijama, jadya ama tuque! Tuna tuna bahuedya juhua Yusura tuaqueja judirushadadiyaque israelita ama cuanaque. Moisésra cuitadyatu huenecuare Yusura cuejahuaque:

“Micuana micuana ecue cuanaque.

Jadya ama bucha, peya cuana tuque ecue amereya, icuene ecue ama juhua cuanaque.

Era ecana jadya ayaju, micuanara tuna ujeu babuque”,

jadya patu Yusura israelita cuana cuejacuare. ²⁰ Tuequedyatu Isaiasra bajida tsehue ama yunerique cuejacuare. Turatu huenecuare Yusura cuejahuaque:

“Ique sare juya ama cuanara adadibuque.

Ique cabameretibuque ique sarequi ama cuana queja”,

jadyatu Yusu jucua beru yuequedya. ²¹ Tumebaedyatu Isaiasra huenenuacuare Yusura quisarati acuaque israelita cuanaja ishü:

“Cuejajacaya ama tuque israelita cuana:

‘Eaqueja necatyaticue’.

Ijacabacacarama tunara aya era cuejayaju.

Tuna tuna eatsehue cahuaitijacaya ama”.

Dutya ama israelita cuana Yusu queja nimee jucacuaque

11 Umaera ni tu inime tupuya: "Jacahuadya ni taa ecuana israelita cuana Yusura. Bijidamadurahua ni taa tujatu tura mepehua cuanaque", jadya ni tunajatu inime juya. ¶Jadya ama tuque! Dutya ama tura ecuana jacahua. Ique, idya cuitadya israelita. Ique Abraham eque ejuracanaque. Ique tumeque cuare juquedy a Benjamín eque juracanacuare cuana juque. ²Yahua ejitaju ama jariradya tujatu mepehua ecuanaja baba cuana israelita cuana tujaque juishu. Iyacia tura ecuana jacahua ama. Micuanaratu adebayadya Elías eje bucha jucuaque, Yusuja quisarati ehuenecue tuque jadya ayaque. Turatu dutya israelita cuanara cuana Yusu muijacahua bucha bacuare. ³Yusu tsehue patu quisaraticuare: "Ecue ata cuanatu mira amereya eque jucacahua, Ique Cuatsashaquique. Tunaratu iyetillahua mique equeque quisarati cuejaqui cuanaque. Tunaratu yuamaturatillahua mesa tumu ea cuanaque; tumeque mesa cuana mique tyayaque iya ishuhua cuanaque tunajatu rihuishatillahua. Ique cuita camadya mira amereya eque juyaque chacha aniya. Ique tunara iyecaradya aya", jadya patu Eliasra Yusu acua. ⁴Yusura patu quemitsacuare: "Mique camadya amami eaqueja ecatyatique chacha aniya jarique. Aniya jaritu umada era amereya eque juya cuanaque. Aniya jaritu pacarucu mil chichucata juma jari cuanaque cueya Baal mui ishuhua eaja yacuaju", jadya patu Yusura acua Elías. ⁵Elías anicuare patyatu umae israelita cuana Yusu queja nimee jucacuaque amadya. Tumebaedyatu iyacia aniya umae Jesucristo queja ecatyatique. Yusura ecuana mepehua tuque dyáque jida tibu. ⁶Mepehua tura ecuana, tuque ecuana tsehue canerecabati aqui jucara juya tibu. Mepequena tura ecuana juquena juhua ecuana inime jidaque cadujutiyaque baatsu, tume taa tu canerecabati ama ejuu. Tsujematu ejuu ama. ⁷Nebacacue era cuejayaju. Israelita cuanatu cacasatihua Yusu queja jucha metse ama cabamereti ishuhua. Jadya ama bucha dutya jujeri tuna Yusura jadya ama bahua. Tura tuna jucha metse ama bahua umae piji tura icuenetadya mepehua cuanaque camadya. Dutya jujeri tuna isahue bucha juhua, Yusura Jesús queja catyati ishuhua cuejayaju. ⁸Ehuenecue tu Yusuja quisarati:

"Yusura tuna tura amereya eque jucaramaque inime tyahua.

Arepa yunerique isaraya ama bucha, tuna adebaya ama.

Arepa yunerique bacaya ama bucha, tuna ejeneya ama.

Riyacama jaridya tu jadya.

Israel eque ejuracana cuanaque tuna tura amereya eque anicarama juya".

⁹Tumebaedyatu ecuanaja ebaba David emui juhuara huenucuaque:

"Tuna tacadya jutidya tuna ijahue catiya.

Tunaja jetiama ara ishuhua cuanaque, dutya tunara sareya cuanaque aniya baatsu tunajatu inime juya, Yusu tuna tsehue pureama juya bucha.

Tuna tacadya jutidya tuna ijahue catiya, ecuanara cuanubi cuana armadillaju, jae cuana patuju jadya nudya ishuhua ijahue eau bucha.

¹⁰Tuna tuna caadebatiya ama Yusura masadama nerecaturadadiyaque.

Atucamaque bucha tuna.

Ecabutijaraque bicuedaja eremeshaque bucha tuna", jadyatu Davidra huenucuaque Yusuja quisarati.

Yusura tuja ama juhua cuanaque tujaque amereyaque

¹¹Umaera ni tu inime juya: "Dutya jujeri israelita cuanara Jesús bijidamadurahua tibu, jutaqui ni taa tura ecuana pana jacadya ahua". ¶Jadya ama tuque! Ecuana israelita cuana tuja yana equedy juhua ama tibu, tujatu israelita ama cuanaque tyahua emajaca tuaqueja judiru ishuhua. Yusratu inime tupuya: "Israelita ama cuanaque Ijahua quejaque inajacameretanayaju bahua tibu ni tu israelita cuanaja bijidadya Jesús queja ecana catyati ishuhua, tuna dyadi inajacameretana ishuhua" jadya.

¹²Israelita cuana cuatsashaya eque ama juhua baatsu-tu Yusura inajacameretibunehua israelita ama cuanaque. Israelita cuana Jesús queja catyaticarama juya baatsu-tu Yusura israelita ama cuanaque tyahua jidaque. ¶Dyaque jida taa tu eju dutya jujeri israelita cuana Jesús queja catyatisu! ¹³Hueneya rique riyaque micuanaja ishuhua israelita ama cuanaque. Yusura ique cuadishahua tuja quisarati micuana cueja ishuhua. ¹⁴Jadya tibudya ique cacasatiya micuana Yusuja quisarati cueja ishuhua, micuana Jesús queja catyati ishuhua. Tume ni tu eatsehue amie cuanaque Yusura israelita ama cuanaque inajacameretihua baatsu, micuana baedya jucara ejuu. Ejeque cuana ni tuna Jesús queja ecatyatiu quinajacamereti ishuhua. ¹⁵Dyáque jida ni tu jubuque jetiama israelita cuana Jesús queja catyatihua. Tuna Yusura amereya eque ama juhua Yusu bijidamadurahua, israelita ama cuanajatu anihua emajaca Yusu tsehue jida junuca ishuhua. Dyáque jida ni tu jubuque israelita cuana Jesús queja catyatihua. Majucuaque cuanaque chacha netitsuranucahua bucha ni tu jubuque.

¹⁶Catibutiya equeque ni ai Yusu jaque, tumetu dutya tueque catibutiyaque tumebaedy tujaque. Pan ishuhua harina tu Yusu jaque, jadya ecuana eau. Jutaku ni taa tu dutya pandya Yusu jaque tere. Acui tiri tu Yusu jaque, jadya ecuana eau. Jutaku ni taa tu dutya acui yaadya tujaque. ¹⁷Ita taa ejeja cuana tuja teeju eaniu acui olivo béru huenucuaque. Olivo equiquejuja yaa cuana ni tu sipicara eau olivo acui ehuaaju etubudya tujatu umae yaa cuana ehua jaque. Tuque cuarequi tujatu esipiudya umae yaa cuana olivo equique juque. Peya juque catsucahuijati ishuhua equiquejuju raraya ama, etiri cuana aniya tibu, ecui ehuaaju ena huarereya tibu. Micuana israelita ama cuanaque micuana olivo equique juque buchique. Israelita cuana tuna olivo ehua jaque yaa cuana etubu buchique. Israelita cuana tuna eje uma mara Yusu ja-

cameretanahua, micuanaja einajacamereque juishu emajaca ani ishu. Micuanajatu dutya jidaquedya juhua Yusura Abraham tyaana ahuaque, tumbaedyatue eque juracanahua cuanaque. ¹⁸ Jadya ama bucha micuana casumititaqui ama micuana taca. "Yusura ecuana mepehua tibu, tura ecuana dyaque iyuhueda baya, tuna iyuhueda baya bucha ama", jadya micuanaja paju ama inime. Etiri cuana ademetu acui casada netiya, ai yaa cuana eque ama. Abraham eque, tuque eque ejuracana cuanaque ademe micuana Yusura tyahua jidaque; ai micuana eque ama tujatu ecana tyahua jidaque. ¹⁹ Ejeque cuana ni micuana jadya juya: "Yaa cuana yuequedyaque tubutanahua bucha, olivo equique juque yaa cuanaja sipitanabare ishu, jadidyatu israelita cuana bijidamaduratahua, ecuana Yusu jaque juishu. Jutaquiju ni taa ecuana dyaque inime metseque", jadya. ²⁰ Pusha amadyatu Yusura eje uma mara israelita cuana bijidamadurahua. Yuequedyaque yaa cuana tubutanahua bucha, jadidya tuna Yusura bijidamadurahua. Tuna Jesús queja catyaticarama juhua tibu, tuna Yusura bijidamadurahua. Tura micuana mepehua tujaque juishu, micuana Jesús queja catyaticarama baats ademedy. Arepa Yusura micuana mepehua ama bucha, micuana taca casumiti nejuume. Yusu jutidya nemubacue. ²¹ Israelita cuana tu ehuahuque etibu juque ecatsucahuijati buchique. Yusura icuene cuita tuja juhua cuanaque nerecaturahua tibu, micuana ni Jesús queja nimee jujacaya, tumbaedyatue tura micuana nerecaturabuque. ²² Yusu jatu canerecabati aniya. Jadya ama bucha tujatu tuja yana equedya ama juya cuanaque nerecaturaya. Israelita cuana Jesús queja catyaticarama ama cuanaque tujatu nerecaturahua. Micuana tsehuetu tuque dyaque jida juhua, micuana Jesús queja catyaticarama cuana tsehue. Tuquetu micuana tsehue jida jujacaya amadya, micuana Jesús queja nimee jujacayaque ama juatsu. Micuana ni tuaqueja nimee jujacaya, tume tura micuana nerecaturabuque. Micuana micuana acui yaa tubu ijehue jadya eauque bucha jubuque. ²³ Israelita cuana ni Jesús queja nimee junucaya, tume tuna Yusu jaque judadinucaya. Yusura tuna yudijidya judirushanuca eau tuaqueja. Acui yaa tubutanacuareque tuhua nucadya sipinuca jadya eauque bucha tuna jubuque. ²⁴ Micuana micuana israelita cuana ama. Icuene micuana Yusu jaque ama juhua. Iyacu bacue micuana Yusuja cuanaque. Micuana micuana olivo equique juque yaa olivo ehuaja etibuju esipique buchique. Yusura micuana jadya ahua tibu, jutaquiju taa tu Yusuja ishu eje bucha ataquima amadya israelita cuana tuaqueja yudijidya amerenuca ishu. Ecuana baba cuanatu Yusura icuene cuita mepehua tujaque juishu. Tee mere pujira acui ehuaja yaa tumeque acuiju nucadya esipibarenuca bucha. Tuna Jesús queja catyatinucahuaju tuna Yusura abuque: "Israelita cuanatu ecuique nuca" jadya.

Jetiama israelita cuana Yusu queja judiru ishu Jesús queja catyaticarama

²⁵ Pana ijacobaca neacue riyaque, micuana ecue eatsehuequi cuanaque. Icuenu adebataqui ama juhua Yusura israelita cuana eje bucha adadiyaque. Iyacu tura ecuana ejitaju bamerehua. Dyaque jida micuana adebamerecara aya micuana cuita camadya Yusura mepehua bucha micuanaja inime ejuu tibu. Dutya jujeri israelita cuanaratu Jesús bijidamadurabuque tuna inajacamerequique. Tunaratu bijidamaduraja jari israelita ama cuanaque Jesús queja eje uma catyaticarama tupu. Israelita ama cuanaque tujaque judidihuajutu jetiama israelita cuana inime cacuetibuque. ²⁶ Jadya judidihuajutu jetiama israelita cuana Yusu queja judirubuque. Jadidya tu ehue Yusuja quisarati: "Yusuja epu Sión bacani juquetu jebuque Einajacamerequique.

Jacob eque ejuracana cuanaque tujatu secabuque tunaja jidama cuanaque, Israelju aniya cuanaja jidama cuanaque.

²⁷ Apupashabuque tunaja tuque jucha cuana, tunaja ebaba cuanaque jadya aana ahua tibu", jadya tu ehue Yusuja quisarati acuaque.

²⁸ Jetiama israelita cuanatu Yusura baya tuque ujeuque bucha, tunara Jesúsja quisarati ejeneya ama tibu. Tunara Yusuja quisarati bijidamadurahua tibu, micuana israelita ama cuanaque aniya tuque micuanaja emajaca Jesús queja catyaticarama ishu. Jadya ama buchatu Yusura israelita cuana iyuhueda bajacahua ama. Yuequedya tura ecuana mepehua tujaque juishu. "Micuana, micuana eque juracanaya cuanaque jadya micuana ecue cuanaque", jadya patu Yusura acua ecuana baba cuana. ²⁹ Yusu ratu cuareya ama tura inime tupuyaque. Tura tyayaque tujatu secanucaya ama. Tura mepeyaque tujatu jacanime ama. ³⁰ Jadya tibudyatu Yusuja iyacu canerecabati aniya micuana tsehue, israelita cuana Jesús queja catyaticarama juya tupu. Tujatu canerecabati aniya micuana tsehue, arepa micuana icuene tuaqueja catyaticarama juhua ama bucha.

³¹ Tumbaedyatu tuna tsehue Yusuja canerecabati anibuque. Iyacuatu tuja canerecabati aniya micuana tsehue; jadidya tujatu canerecabati anibuque israelita cuana tsehue. Anibuque tujatu canerecabati, arepa iyacu tuna Jesús queja catyaticarama juhua ama bucha. ³² Aijamatu ni ejeque buchique Yusuja yana equedya cuita juyaque, israelita cuana ni israelita ama cuanaque. Yusura tuna dutya tupu baya jucha metse. Tumbaedyatu Yusuja canerecabati anibuque israelita cuana tsehue, israelita ama cuana tsehue jadya.

Yusu pureama aishuque

³³ Adaditilla tupu amatu Yusu ecuana tsehue jidaque. Aijamatu ni ai tuque baecuaque. Aijamatu ni ai tura adebayaque ama. Ni ejera buchiquetu adebaya ama Yusura inime tupuyaque. Ni aira buchiquetu adebaya

ama tuque ai juyaque. ³⁴Jadya tu ehue ne Yusuja quisarati:

“Ni ejeque buchiquetu bahue Yusura eje bucha inime tupuyaque, ni eje bucha juatsu.

Aijamatu ni ejeque buchique Yusu dyaque bahueque cueja ishuhue.

³⁵Ni ejeja buchiquetu Yusu tyataqui ama, tuja cuaretyanuca aishu. Tujatu manu aijama ni eje tsehue”.

³⁶Yusuratu iyahua dutya ai aniyaque. Dutyadya tu tujaque. Dutya ai aniyaque tu Yusu mui, pureama jadya aishuhue.

—Yusu, miquemi jida. Aijamatu peya mique buchique —jadya tuque ecuanaja ajacataqui ama. Jadidya paju.

Yusu jaque juya tibu, tuja biji eque anitaquique

12 Cuejaya micuana riyaque, ecue eatsehuequi cuanaque iyuhueda cuanaque. Yusu jatu dyaque canerecabati anihua dutya ecuana tsehue. Jadya tibudya pana catyati nejura tuaqueja. Ai emajuque bucha ama, Yusu queja necabameratira chacha bucha, tuja ecuana aiju tsume ishuhue. Necuejara Yusu: “Ique, dutya ecue aniyaque jadya tu micuique”. Yusuja biji eque neanira, Yusu pureamatura ishuhue. Jadya cabameretie ecuana jutaqui Yusu queja tuque mere ishuhue. ²Yusu adeba baecua cuanaque aniya bucha anie nejura ama. Yusura ecuanaja pacuare ecuana eje bucha anieque, ecuanaja inime tupu cuana jadya. Tura ecuana jadya cuaree ahua ju tume ecuana bahue juya Yusura ecuana eje bucha anishacara ayaque. Bahue ecuana juya jidaque aishuhue. Bahue ecuana juya Yusuja eje buchique bijidaque. Pana bahue ecuana juya eje bucha anie juishuhue. ³Yusura ique cuatsashahua tuja quisarati cueja ishuhue. Jadya tibudya micuana cuejaya eje bucha anie tuja biji eque juishuhue. Yusura cuitadya ecuana peadya peadya tyahua casa tuque mere ishuhue. Inime tupuqui neara eje bucha meree Yusu eauque. Tura casa tyahuaque pana adeba aatsu, jadya mereadya neara Yusu. ⁴Peadya ecuitajutu aniya jetiama bucucu ishuhue. Dutyaja tunajatu bape bape bucucu ishuhue aniya. ⁵Jadidya ecuana, arepa Cristo queja ecatyati cuanaque jetiama ama bucha, dutya ecuana cuita pidya camadya bucha. Yuhua cama ecuana, Cristo merecara tsehue.

⁶Yusura ecuana dyaque iyuhueda baya. Jadya tibudya tura ecuana casa tyabarehua peadya peadya bape bape. Jutaquiju nemerera tura ecuana casa tyahua tsehue. Umae ecuana Yusura casa tyahua tuja quisarati cueja ishuhue. Tunajatu cuejataqui tuyu cuji juma. ⁷Umae ecuana Yusura tyahua casa peya cuana tsahua ishuhue. Tunajatu jida tsehue tsahuataqui. Peya cuanatu Yusura casa tyahua tuja quisarati yunerique bahuitya ishuhue. Tunajatu bahuityataquidya peya cuana. ⁸Umaetu Yusura tyahua casa peya cuana casatura ishuhue. Tudyajatu tunajatu ataqui. Umaetu Yusura jetiama tyahua chipiru, ai cuana jadya. Tuna tuna inijeda jutaqui ama. Tunara ecana pacajaquetiquere peya cuana

tunaja ai aniyaque jida inime tsehue. Umae cuanatu Yusura casa tyahua peya cuana naru, cuatsasha jadya ishuhue. Tunajatu jadya aqueretaqui, muida tsehue, ai dyaida tsehue ama. Umaetu Yusura casa tyahua nerecada cuana tsehue canerecabati aqui juishuhue. Jadya juya tibu tunajatu pureama tsehue ataqui.

Jesús queja catyatiya cuanaque eje bucha anie junenie jutaquique

⁹Iyuhueda cabatiya jiu nejuume; yuneri iyuhueda necabaticue. Neaume ni ai buchique peya yuamatura ishuhue. Jida nejura peya cuana tsehue. ¹⁰Iyuhueda tsehue necabaticue peya cuana Jesús queja ecatyati cuana tsehue. Micuana tsehuequi cuana tsehue ecabatiu bucha, cabatie nejucue peya cuana tsehue. Ne muicue peya cuana, tuna queja camuimereticara juatsu ama. Yurameta camuibati nejucue peya cuana tsehue.

¹¹Necacasaticue. Dyaida nejuume Ecuana Cuatsashaquira amereyaque aishuhue. Merecara tsehue nemerecue.

¹²Pureama nejucue, Yusura tyana ahuaque eje tupu tura tyadadiyaque cahuecashatitsu. Neiducue abacata tsehue nerecada juya cabatitsu. Yusu tsehue nequisaratijacaume.

¹³Jesús queja ecatyati cuanaja ai aijama baatsu, netyacue ecana micuanaja ai aniyaque. Ejeque micuanaja epu eque cuetiyaju ara ishuhue, tahui ishuhue aijama baatsu, ecana neihuaracue micuanaja etareju.

¹⁴Yusu adeba baecua cuanara micuana jidama ayaju, “Jida ecana bacue, Tata” jadya Yusu queja nebacabacacue. “Nerecaturacue ecana, Tata”, jadya neaume Yusu.

¹⁵Pureama nejucue, peya cuana pureama juya cuana tsehue. Ejeque peya inime juyaju, neaquerecuedya peya inime. ¹⁶Bape bape inime cadujutiya ama bucha pureama tsehue peya cuana tsehue neanicue. Micuana cuita camadya dyaque inime metse bucha necabatiume. Nerecada cuana tsehue cajipeticarama nejuume. Necareneque ecana. Dutya bahue bucha necabatiume.

¹⁷Arepa peya cuanara eje bucha jidama aya ama bucha, tunara aya bae ecana neaume. Neanicue jida, dutyaja micuana jida tsehue aniyaque baishuhue. ¹⁸Eje buchadya dutya tsehue jida pureama tsehue anicara nejucue. ¹⁹Necacuarehuanatiume jidama atayaju, ecue eatsehuequi cuanaque iyuhuedaque. Yusu camadya tu jidama cuanaque nerecaturaquique. “Era cuitadyatu cuarehuanaya ecue cuanaque jidama aquique. Nerecaturabuque tuna ecue cuanaque jidama ahua cuarequi”, jadya tu ehue ne Yusura quisarati acuareque. ²⁰Tumebaedyu tu ehue ne peyaju Yusuja quisarati: “Mique ujeu baquique ni aracara juya, tyacue ara ishuhue. Ijicara ni juya, tyacue iji ishuhue. Mira jadya bae ayaju mique ujeu baquique pabisu. ‘Arepa era tuque jidama ahua ama bucha taa tura ique jida baya’ jadya tujatu inime juya”, jadya tu ehue ne Yusura quisarati.

²¹ "Jidama neara ecuana jidama aqui cuanaque", jadya inime netupuume. Tunara jidama ayaque cuarequi, jida jutidya ecana nebacue.

Jesús queja ecatyati cuanaque huaraji cuanara cuatsashaya eque jutaquique

13 Huaraji cuanara cuatsashaya eque nejudue. Yusratu iyahua dutya huaraji cuana eju ecuanan aniyaju, ecuana naru ishu. Jadya tibudya ecuana dutya huaraji cuanara naruya, Yusura casa tyahua tibu. ² Jadya tibudyatu huaraji cuanara cuatsashaya eque jucarama juya cuanara Yusura cuatsashayaque aya amadya. Yusura cuatsashaya eque juya ama cuanaque tujatu ecana nerecaturabuque. ³ Huaraji cuanatu iyatanahua jida juya cuanaque nerecatura ishu ama. Jidama juya cuanaque nerecatura ishu tuna iyatanahua. Jutaquiju micuana huaraji cuana tsehue bajida jucarama juya tibu, tunara cuatsashaya eque nejudue. Micuana jadya anie juyajutu huaraji cuanara micuanaja ishu jida quisarati aya. ⁴ Yusratu iyahua huaraji cuana micuana tsahua ishu. Jidama ni micuana juya, mubataqui tuque micuanaja ecana, tunaja micuana jidama juyaju nerecatura ishuque inime aniya tibu. Tunaratu Yusu mereya, jidama juya cuanaque nerecaturayaque. ⁵ Jadya tibudya huaraji cuanara cuatsashaya eque nejudue. Cacuatshati eque neanicue, tunara enerecaturaju camadya ama, micuana cuitadya jadya anitaquique bahue juya tibu. ⁶ Yusratu iyahua huaraji cuana ecuita cuana tsahua ishu. Jadya tibudya tunara micuana "Netsujetyacue huaraji cuana", jadya ayaju, ecana netsujetyacue. Tunaratu sareya tumeque chipiru ecuita cuana tsahuajaca ishu ama. Micuana naruyaque tunajatu Yusu mereya.

⁷ Netsujetyacue dutya micuanaja huaraji cuana tsujetyataquique. Huaraji cuanara cuatsashayaju, mere nejudue epuju aniya cuanaja jida ishu. Huaraji cuanara jadya ayaju: "Netsujetyacue chipiru epuju aniya cuanaque tsahua ishu saretanayaque", netsujetyacue chipiru tsehue. Huaraji cuanara cuatsashaya eque nejudue. Nemuibacue; nejaribaume ecana.

Jesús queja ecatyati cuanaque peya cuana tsehue eje bucha cabatie jutaquique

⁸ Manuqui nejuume ni eje tsehuedya jutidya. Patere micuanaja manu cuana; iyuhueda cabati ishuque camadya micuanaja patere ama. Peya cuana tsehue ecuana iyuhueda cabatiyaque tu ecuanara peya cuana manu etsujetya buchique. Peya cuana tsehue ni ecuana iyuhueda tsehue cabatiya, tume ecuana Yusura cuatsashahua eque juya.

⁹ "Peyaja ehuaneeque nejaraquereume. Quiyeti puji nejuume. Chiri nejuume. Peyaja ishu pusha pusha nejuume. Peya jaque micuanaja ishu nebijiseriume", jadya ecuana Yusura cuejahua tuja cacuatshati. Peya cacuatshati cuanatu aninucayadya. Amena ishu tura ecuana cuatsashahua: "Iyuhue tsehue nebacue peya cuana. Micuana cuitadya iyuhueda cabatiya bucha

iyuhuee peya nebacue". Riyaque cacuatshatiju dyari dutya cacuatshati esabutilla. Micuana ni tumeque cacuatshati eque juya, tume micuana dutya peya cuana cacuatshati equedya juya. ¹⁰ Peya cuana yuneridya iyuhueda bayaque juatsu, tuque ecuana peya jidama aya ama. Ejera peya cuana iyuhueda bayaquetu Yusuja dutya cacuatshati equedya juya.

¹¹ Jadya tibudya Yusura cuatsashaya eque neanira, amena Ecuana Cuatsashaquique junanucayaque tsunutaya ama tibu. Jadya tibudya ecabatique bucha nejura, Yusuja mere juyaque emajaca aniya jari tupu. Masadamatu juetiya huecaca ecuana tuaqueja judiruyaque. Ecuana Jesús queja catyati metse juhuaju tumeque huecaca equetu japada jucuaque. Amena iyacua bacue japadama juetibeya tumeque huecaca.

¹² Iyacua ecuana aniyaque ri apuda bucha, dyaque cuita jucha, canerecati jadya aniya tibu. Ecuana Cuatsashaquique junayaque huecaca tu ijete cuinanayaque bucha, tura dutya jidamaque secabuque tibu. Amenatu tuque tsunutaya ama. Amena huecacayaju tibu pajatayaque bucha tuque. Bisutadaque neajacara, Ecuana Cuatsashaqui adeba baecua cuanara apuda ducu aya cuanaque. Yusuja biji equeque camadya neara, eje eque bisutaqui juishu ama. Cristoja casa tsehue nejunenira, Yusu cahuaishu ishuque ecuana eau tibu; sudaru eiyetauju ai pajida tsehue ecajututiu bucha nejura. ¹³ Jida neanira ecuana peyara petayaju bisu ishu ama. Ijijiji, nijuqui mere jadya nejura ama. Chine jutayaju necuara ama ecuita cuana jidama jutayaju. Ecuana caquemiqueremaque nejaraquerera ama. Bisutadaque neara ama. Cahuaishi, cati jadya peya cuana tsehue nejura ama. Cajishati arida nejura ama. ¹⁴ Ecuana biji eque cuita camadya anitsu tuque ecuana Yusuja bijidamaque aya. Ecuana cuita camadya capureamaturati ishuque neara ama. Jesucristo queja necatyatira tuja biji eque ani ishu. Sudaru eiyetauju ejutuqui pajida tsehue ecajututiu bucha, jadidya ecuana Jesucristo queja ecuana dyaquedya jutidya catyatia-jetaqui, Satanásra ecajuchatishau tibu.

Jesús queja ecatyati cuanaque tacuaritaquique ama

14 Umaeratu pana adeba aya ama jari eje buchique Yusuja bijidaque, arepa ecana yuneridya Jesús queja catyatihua ama bucha. Casadamaque jari bucha tuna. Cati cati ecana neaquereume, tuna inime cacuareshu ishu. Micuana tsehuequi bucha bae ecana neacue. ² Jesús queja umae queja ecatyati cuanajatu inime juya: "Arataquidya tuque ecuanaja erami, arepa tunara ai cueya cueya cuanaja yacuaju iyahua ama bucha. Aratsu tuque ecuana Yusu cahuaishaya ama", jadya tuna juya. Dutya erami tunajatu araya.

Peya cuanara bacue adeba jida ama aya Yusuja quisarati. "Arataqui ama tuque ecuanaja tumeque erami. Aratsu tuque ecuana Yusu cahuaishaya", jadya tuna juya. Jadya tibudya tunajatu araya tuna cuhuatiya cuanaque, tunaja teeju aniya cuanaque cuita camadya.

³ Erami ara bahue cuanara nebijidamaduraume erami ara baecua cuanaque. "Micuana micuana in-

imemasi, jadya ejeneya tibu", jadya ecana neaume. Acui caca ai cuhuatiya cuanaque camadya araya cuanaque jadya tunajatu ecana ataquí ama erami araqui cuanaque: "Micuana erami araqui cuanara tuque micuana Yusu cahuaishaya", jadya ecana neaume. Jadya ecana neaume; Yusradya tuna tujaque amerehua erami ara bahue cuanaque.

⁴Jadya micuana cuejaya, micuana jidama bucha erami ara ishu bayaque. Erami araqui cuanaque tu micuana jaque ama; Yusu jaque tuna. Jadya tibudya tuque micuanaja ecana eje bucha quisarati eque ataquí ama. Yusu mereya tibu, tuna jida juyaque juatsu, Yusura peadya tuna eau: "Micuanaratu jidaque aya" jadya. Jida juyaque ama ni ecana juneniya, Yusura cuitadya tuna eau: "Micuana micuana tuyu ama juya" jadya. Ecuana Cuatsashaquira ecuana tyaya tuja cuanaque tujaque cuitadya casa ecuana tuja biji eque cuitadya ani ishu. Turadya ecuana naruya ecuanara tuyuque ama eauju.

⁵Jesús queja uma ecatyati cuanaque tuna juya: "Umae huecaca cuana tu dyaque muitaqui cuanaque. Tumeque huecaca ecuana mere jutaqui ama", jadya tuna juya. Umae bacue juya: "Dutya huecacadya jutidya tu dutya tupu", jadya tuna juya. Ni ejeja buchiquetu casada tsehue peya tura ejeneya bucha ejemeretaqui ama huecaca mui ishuque adebamere, adebamere ama jadya. Peadya peadya camatu ataquí eje bucha tura inime tupuya eque riyu cuanaque inimeju. ⁶Riyu cuanaque huecaca muida bucha baya cuanaratu huecaca cuana muiya, Ecuana Cuatsashaquira amereya eque jucara juya tibu. Ejera dutya huecacadya jutidya dutya tupu bayaquetu Ecuana Cuatsashaquira amereya equedya jucara juya.

Erami ara bahue cuanaratu dutya eramidya araya, Ecuana Cuatsashaquique mui ishu, yusrupai aatsu. Tumebaedya erami ara baecua cuanaratu erami araya ama, Ecuana Cuatsashaquique mui ishu. Tunaratu tumebaedya yusrupai aya Ecuana Cuatsashaquique, tura ara ishuque tyaya tibu.

⁷Ecuana taca ama ecuana; aniyatu ecuana metseque. Yusu jaque ecuana. Chacha aniya jari tupu ecuana Yusura amereya eque jutaqui, ecuanaja biji eque ama. Majutsu ecuana tujaque jaridya. ⁸Chacha aniyaque ecuana Ecuana Cuatsashaquija biji eque aniya. Majutsu ecuana tuaquejadya jubuque. Chacha aniya jari tupu aniyaque tu Ecuana Cuatsashaquira amereya eque ani ishuque. Tura huecaca iyahuajudya ecuana eje tupu majudadiya, tuatsehue anidiru ishu. Jadya tibudya ecuana chachaque, jadya ama juatsu emajuque, Yusu jaque ecuana. ⁹Cristo majutsu, tuque chacha netitsuranucatsu tujatu tsujetyahua ecuana tujaque juishu. Jadyatu Yusuja inime jucuaru. Jutaqui ju tuque Ecuatsashaquique dutya ecuana tuaqueja catyatihua cuanaque, arepa chacha, emaju jadya ama bucha.

¹⁰Micuana, micuana cama bucha juya tibu, micuana Jesús queja catyatihua tibu, nequisaratiame jidama peya cuanaja ishu. Jadya tibudya micuana erami ara baecua cuanara "Erami araqui cuanaratu Yusu

cahuitishaya. Jucha metse tuna", jadya neaume. Micuana erami ara bahue cuanara "Erami ara baecua cuanara ai adebaneriya ama", jadya ecana neaume. Necaadebaticue. Peadya peadya ecuana Yusuja yacaju cabameretibuque, tuja ejeque "Miquemi jida juhua", jadya ama juatsu "Miquemi jidama juhua", jadya aishu. ¹¹Jadya tu Yusura quisarati acuaruque ehuene:

"Yuneridyatu eje tupu era quisarati ahua eque judadiya.

Ecue yacuajutu dutya chichucata jubuque, ique huaraji dyaque aridaque jadya ayaque.

Dutyara tunara dutyaja ijacaju cuejabuque ique camadya Yusuque", jadyatu Yusu jucuaru.

¹²Jadidya tuque ecuana peadya peadya Yusu cuejabuque ecuana ai juhuaque, eje bucha juatsu ecuana jadya juhuaque.

Jesús queja ecatyati cuanaque cajuchatishataquique ama

¹³Jadya tibudya ecuana quisarati qui ama jidama peya cuanaja ishu. "Paa ama ai peya cajuchatishacara aishuque, ni Yusu tuja cahuaishacara aishuque", jadya tuque ecuanaja inime jutaqui.

¹⁴Cuejaya micuana riyuque Ecuana Cuatsashaquique Jesúsra ique cuejahuaque. Adebayadya tuque era Yusu ecuana cahuaishayaque ama erami ai cueya cueya cuana tyata bahue juhuaque aratsu. Peya cuana Jesús queja ecatyati cuanaja ni inime juya: "Araya ni ecuana erami Yusu cahuaishaya ishuque", jutaqui ju tuna paara amadya. Tunara ni araya tunara arataquima adebayaque, jutaqui ju tunajatu aya amadya tuyuque, tunara arataquima bayaque araya tibu.

¹⁵Cuejaya micuana riyuque, micuana erami ara bahue cuanaque. Micuanara ni araya erami, tumetu ecaca cuana camadya araqui cuanara erami arayadya, micuanara araya baatsudya jutidya. Aratsu tuna dyaque peya inime ejuu, tunara arataquimaque bayaque arahua tibu. Jutaqui ju, micuanara ni jadya aya, tume tuque micuana iyuhue tsehue ama baya tumeque micuana tsehuequi cuanaque. Neajacacue peya cuana Cristoja biji eque juya bucha baatsu amerejacaqui juya cuanaque. Cayuamati ishuque ama micuanaja paju. Cristo tuna jiteque majuhua tibu, micuanajatu ajacataquidya micuanaja biji eque cuitaque, tunaja jida ishu. ¹⁶Arepa micuana eje bucha juyaque jidadya bahue ama bucha, neajacaume, peya cuana jidama micuanaja ishu equisaratiu tibu. ¹⁷Ecuana ecuana Yusuja cuanaque, tura ecuana mepehua tuja naru ishu. Tujaque ecuana, ai ecuanara araya, ijiya jadya eque ama. Jida ni ecuana tuja biji eque aniya, peya cuana tsehue catima, jida tsehue ni ecuana aniya, tume ecuana caadebameretiya ecuana tujaque. Jadya anie ecuana jutaqui, Yusuja Espiritura ecuana casaturaya tibu. ¹⁸Jadya anie ni ecuana juya, yuneri cuitadya ecuana Cristoja biji eque juya. Ecuana jadya anie juyajutu Yusu pureama juya. Ecuita cuanatu juya: "Riyu cuanaque taa dyaque tuyu aniya" jadya.

¹⁹ Jadya tibudya ecuana jida cabatitaqui peya cuana tsehue, peya cuana tsehue cahuaitema. Catsahuaititaqui ecuana peya cuana tsehue Jesús queja dyaque nimee juaje ishu, dyaque jida tuja biji eque aniaje ishu.

²⁰ Cuejanucaya micuana era, micuana erami ara bahue cuanaque. Jesús queja ecatyati cuanaque ai ara ishu cuanaque arataquima ejuu cuana eque nenimehuallaume. Neyuamaturaume Yusuja cuanaque. Yuneridya tuque ecuana Yusu cahuaitema ama erami aratsu ni peya earaqui cuana aratsu. Yusu tuque ecuana cahuaitema, ecuana tsehuequique cajuchatishatsu. Jutaquiju, peya ni cajuchatiya ecuanara araya tsehue, jidama tu ara ishu. ²¹ Inime ecuanaja paju: "Eje bucha eque cajuchatishacarama paa Jesús queja ecatyati cuanaque era araya eque, ijiya eque jadya. Panimehualla ama ecana tuaquejaque; eje bucha eque ecana patupumere ama inime, Yusu tuque cahuaitema, jadya.

²² Ai earataque ara ishu jida adebaya tibu, Yusura ecuana jida baya ai arayaju. Jadya eque ecuana cati cati jutaqui ama tume cuanaque tibu. Ataqui tuque ecuanaja ecuana cuitadya jidaque bahueque. Jadya anie juyaque juatsu ecuana jida cabatiya, jucha metse ama. ²³ Ejera ni erami arataqui ama adebaya, tumeque aratsu ni cajuchatihuaaju cabatiya, tura jadya juatsu ecajuchatiu, jadya inime tupuyaque ahua tibu. Pana bahue ama ni ecuana jida, jidamaque aishu, aya ni ecuanara, cajuchatihuaadya ecuana, ecuanara ataquimaque adebayaque aya tibu.

Dutya neara peya cuana pureamatura ishu, ecuana pureama juishu ama

15 Umaera tuque ecuana pana adeba aya eje bucha Yusuja biji eque ani ishuque. Cahuaitemaqui ama ecuana jidaque, jidamaque jadique pana adeba ama aya jari cuana tsehue. Tsahuataqui tuque ecuanaja tume cuanaque pana adeba aya ama jari cuanaque. Ecuanaja jida ishu cuita camadya neanira ama, tumebaedya peya cuanaja ishu. ² Nepureamaturara peya cuana Jesús queja ecatyati cuanaque, ai ecuana cuita camadya ama. Neara tunaja jida ishuque. Necasaturara ecana tuna Jesús tsehue nime aputa ishu ama. ³ Cristotu tuta taca capureamaturati ama juhua. Peya cuana tujatu pureamaturahua. Tuquetu canerecatihua Yusuja quisarati ehue eque. "Ujeu tunara ique bahua, beru mique ujeu bahua bucha", jadyatu Cristora tuja Etataque Yusu acuaque.

⁴ Dutyatu beru Yusuja quisarati ecuana bahuitya ishuque ehue jucuare. Tuja quisarati eque ecuana Yusura adebamereya ecuana canerecatiaque abacata idu ataquique. Tuja quisarati eque tura ecuana casaturaya. Tuja quisarati eque tura ecuana bahue amereya ejeque huecaca ecuana Ecuana Cuatsashaqui queja judirubueque ni eje tupu tuque jaca ishu ama.

⁵ Yusura ecuana tsahuaya canimehuallatima canerecati cuana idu ishu. Tuquetu Ecuana Nime Casaturaque. Tura netsahuacue Cristo Jesúsra anishacara aya eque ani ishu. ⁶ Ecadutyati nejudue Ecuana Cuat-

sashaqui Jesucristoja Etataque pureama aishu.

⁷ Iyuhueda tsehue nebacue peya cuana, Cristora micuana baya bucha. Micuana jadya cabatie juyaju, peya cuana jadya paju: "Yusu tu dyaque jida, tuja cuanaque peya cuana tsehue iyuhueda cabatiya tibu".

Yusu queja judiru ishuque quisarati israelita ama cuana cuejatanacuareque

⁸ Riyaque micuana cuejacara aya. Berutu Yusura ecuanaja ebaba ecana Einajacamerequique cuadishadadiya jadya acuaque. Jadya equetu Cristora junnatsu bahue amerehua Yusura eje bucha quisarati iyatsu tuequedya ayaque. ⁹ Israelita cuana Ijahua quejaque inajacamereratu jehua. Tumebaedya tujatu inajacamerehua israelita ama cuanaque, tunaja dyadi tumebaedya Yusu jadya aishu: "Micuetu dyaque quiyuhuebati anihua ecuana tsehue, Tata". Ehue tu Yusura David "Huenecue" jadya ahuaaju huenecuareque.

"Israelita ama cuanaja ijacaju mique pureama abueque.

Tunaja yacuaju mique pureama abueque jeru cuana tsehue, Yusu" jadya.

¹⁰ Moisesratu huenecuaredya Yusuja quisarati:

"Arep micuana israelita ama cuana ama bucha, jida pureama micuana jubuque Yusuja emepe cuana tsehue" jadya.

¹¹ Davidratu huenecuaredya Yusuja quisarati:

"Micuana israelita ama cuanara tuque micuana jadya abueque:

'Miquemi dyaque jida, Yusu'.

Micuana dutya anaera tuque micuana jadya abueque: 'Miquemi dyaque jida, Yusu'".

¹² Yusuja quisarati cuejaqui Isaiasratu huenecuare beru:

"Ejitajutu jubuque Isaí eque juracanayaque.

Israelita ama cuanaja ecuaitu jubuque.

Tuaqueja tuna catyatidadibuque",

jadyatu Isaiasra huenecuare Jesús jadya ayaque.

¹³ Yusura ecuana yunerineya ejeque huecaca ecuana tuaqueja judirubueque ni eje tupu jaca ishu ama. Tura jida neamerecua. Inime tsapematu neamerecua, micuana tuaqueja catyatihua tibu.

Yusuja Espiritu tu micuana tsehue. Tuquetu dyaque casada. Tura cuitadya micuana ejenemerebueque ejeque huecaca micuana Yusu queja judirubueque.

Pablo Yusura israelita ama cuana queja cuadishacuareque

¹⁴ Cuejaya micuana riyaque, micuana ecue eatsehuequi cuanaque. Eratu pana ejenedya aya micuana peya cuana tsehue jida cabatiyaque. Bahue ique micuanara quisarati yunerique pana adeba ayaque, micuanara peya cuana bahuityayaque. ¹⁵ Jadya ama bucha tuque ecue inime juhua: "Arep tuna pana adeba yunerique aya ama bucha, huenetaqui tibu rique huenehuadya

dutya riya cuanaque jida, tuyu, mui cueja, tuna adebamerenuca ishu”, jadya tuque inime tupuhua.

Pana cueja micuana ahua ecue cuejataquique, ni riya piji buchique ai tehuatsu ama. Yusura cuatsashayaju cuitadya rique jadya huenehua. ¹⁶ Tura ique mepehua Jesucristo mere ishu. Cuadishahua tura ique israelita ama cuanaque tuja quisarati cueja ishu. Paera Yusuja quisarati ecuita cuana ecuejau bucha, jadidya ique juya. Ecue mere tu israelita ama cuanaque Jesús queja catyati tsahua. Tuna Jesús queja catyatiyaju, Yusutu dyaque pureama juya tuna tsehue. Tura tuna jida baya, tuja Espiritura cabapetishahua tibu.

¹⁷ Jadya tibu ique casumitiya Cristo Jesúsra micuana ique eque eje bucha amerehuaque baatsu. Ique pureama juya, Yusu jadya meree aya cabatitsu.

¹⁸ Cristo ique eque israelita ama cuana ducu eje bucha juhuaque cuita camadya quisarati paa. Yusura tuja quisarati cuejamerehua tuna tuaqueja catyati ishu, tuna tura amereya eque juishu. Era tuna cuejayaque bacatsu, ique Yusuja biji eque aniya baatsu jadya tuna Jesús queja catyatihua. ¹⁹ Turadya ique amerehua ejeque ecuitaja ataquique ama, tuna ique Yusuja ishu mere juyaque bahue juishu. Bape tunajatu bahua. Yusuja Espiritura ique amerehua. “Jesús queja ni micuana catyatiya, Yusura micuana Ijahua quejaque inajacamereya”, jadya tuna dutya queja cuejacuejanihua. Icuene cuita tuque cuejahua Jerusalénju aniya cuanaque. Tumeque epu arida juque cuinanatsu, junenihua ique epu cuanaju, quisarati cueja juyaque. Iliria japada epu cuanaju ique cuejacuejaajehua.

²⁰ Dyaque bijida tuque ecue juhua Cristoja quisarati cueja ishu eju ecuita cuanaja quisarati bacama jariju. Bijida tuque ecue juhua quisarati icueneta cueja aishu eju peya cuanaja bacama jariju. ²¹ Berutu Yusura Isaías queja huenemerecuare:

“Yusuja Ecuadishaja quisarati bacama cuita cuanaratu bacabuque tuque cuejatayaju.

Tuque adebaya ama cuanaratu adebabuque”, jadyatu Isaíasra huenecuare.

Eratu cuejahua riyaque quisarati bacama cuana cuita queja, riya ehuene equedya.

Pablo Romaju cuacara jucuaque

²² Aijama cuita tuque ecue emajaca juchine tumeque epu cuanaju quisarati cueja juyaque. Jadya tibudya cuataqui ama jari cabatiya Romaju micuana cuajira.

²³ Amena rique mere atillachine requeja. Chamacama cuataqui cabatiya micuana queja eje uma mara amena micuana queja cuacara cuacara juyaque. ²⁴ Españaju datse cuacara juya. Cuaatsu Roma eque cueticara juya. Eje uma huecaca cuana anaticara juya micuana queja. Tuequedya cueticara juya Españaju. Areque micuanara etsahuatsau ique tuqueja cuanuca ishu. ²⁵ Micuana queja cuamaquedya icuene Jerusalénju cuataqui jari Jesús queja ecatyati cuanaque chipiru tyara.

²⁶ Macedonia, Acayaju cuanaque Jesús queja ecatyati cuanaratu tunaja inime taca sita achine chipiru aiju nerecada cuanaja Jerusalénju Jesús adebaqui cuanaja

ishu. ²⁷ Macedoniaju, Acayaju cuanaque tuna israelita cuana ama. Tuna bacue ecana Jesús queja catyaticuare, israelita cuanara Yusuja quisarati cuejayaju. Jadya tibudya tuna iyacua israelita ama cuanara tsahuacara aya. Jidadya tu israelita ama cuanaja israelita cuana tunaja ai aijamaque tyaishu. ²⁸ Riyaque amena aatsu, tuna chipiru tyaatsu, cuacara juya Españaju. Cuetyara micuana banaticara aya. ²⁹ Tuqueja micuana queja junatitsu, pureama nejura peya cuana tsehue, dutya jidaque Cristora ecuanaja ishunque tyayaque adebatsu.

³⁰ Cuejaya micuana riyaque, micuana ecue eatsehuequi cuanaque. Micuana micuana Ecuana Cuatsashaqui Jesucristo queja catyatihua. Yusuja Espíritu eque micuanaja Yusuja cuana tsehue quiyuhuebati aniya tibu micuana Yusu queja bacabacataqui ecue ishu. Nebacajacume ique tuja casatura ishu.

³¹ —Narucue Pablo, Judeaju Jesús queja catyatima cuanara ujeda eauju, Tata. Jerusalénju micue cuanara pureama tsehue chipiru painatsa Pablora dujuyaque, —jadya Yusu neacue.

³² Micuanara ni jadya bacae aya, Yusuja ni jadya inime, tume pureama tsehue junatiya micuana queja. Tuhua ni tuque ecue canajara ishu emajaca eaniu micuana batiya tupu. ³³ Yusu tu Ecuana Inime Tsapema Anishaquique. Tura dutya nenarucue. Jadidya paju.

Jesús queja ecatyati cuanaque

16 Febe tuque cuadishaya micuana queja.

Tumeque epuna tu ecuana tsehuequique. Turatu dyaque tsahuahua Cencreaju cuanaque Yusuja quisarati baca ishu casitati bahue cuanaque. ² Micuanara Ecuana Cuatsashaquique iyuhueda baya tibu, jida nebotsacue. Yusuja cuanaque ecabatita bucha cabatie nejucue peya cuana tsehue. Netsahuacue dutya aiju micuanara tsahuataqui baya eque, tura dyaque peya cuana tsahuahua tibu, ique tumbaedy.

³ Isaramereya tuque Priscila, tuja yahuique Aquila jadya. Tatsera ique dyaque tsahuahua Cristo Jesúsja ishu mere juyaju. ⁴ Tatse tatse ique eiyetauju icueneyaque majujerihua. Jutaquiju “Yusurupai metse aya, metsera ique eiyetauque icuenehua tibu”, jadya tatse aya. Tumbaedy tatse israelita ama cuanaque Jesús queja ecatyati cuanara yusurupai amereya. ⁵ Isaramereya tuque tatseja etareju Yusuja quisarati baca ishu casitati bahue cuanaque. Tumbaedy tuque isaramereya ecue iyuhuedaque Epeneto. Tuquetu Acaya juque Cristo queja catyati metse juhuaque. ⁶ Isaramereya tuque María. Tuquetu dyaque cacasatihua micuana tsahua ishu. ⁷ Isaramereya tuque Andrónico, Junias jadya. Tatse tatse israelitadya. Tatse tatse etare apudaju eatsehue nerecada jupee juhua. Jesúsra cuitadya cuadishahua cuanaratu jida quisarati aya tatseja ishu. Tatse tatse Jesús queja catyatihua ique catyatima jariju.

⁸ Isaramereya tuque Ampliato. Tuque tuque ecue eadebaque iyuhuedaque, Ecuana Cuatsashaqui queja catyatihuaque nucadya. ⁹ Isaramereya tuque Urbano.

Tura ecuana dyaque tsahuahua Ecuana Cuatsashaqui-ja mereju. Isaramereya tuque ecue iyuhuedaque Estaquis. ¹⁰ Isaramereya tuque Apeles. Eje uma cabameretitu juhua tuque, yuneridya Ecuana Cuatsashaqui queja ecatyati juyaque. Tumebaedya tuque isaramereya Aristobuloja etareju cuanaque. ¹¹ Isaramereya tuque Herodión, ique buchique israelita. Tumebaedya tuque isaramereya Narcisoja etareju cuanaque, Ecuana Cuatsashaqui queja ecatyati cuanaque. ¹² Isaramereya tuque Trifena, Trifosa jadya. Tumeque epuna ecatsé tu ecuana tsehuequique ecatsé. Tatse tatse mere juyadya Ecuana Cuatsashaquiya ishú. Isaramereya tuque Pérsida. Tumeque epuna tu ecuana tsehuequique iyuhuedaque. Tuquetu tumebaedya dyaque mere juhua Ecuana Cuatsashaquiya ishú. ¹³ Isaramereya tuque Rufo. Jesús queja dutya ecatyati cuanaratu Rufopa dyaque Ecuana Cuatsashaqui queja nimee jadya aya; jida patu mereya jadya. Tumebaedya tuque isaramereya tuja ecuaque. Tumeque epunara ique tsahuahua; ecue ecuaa nerira etsahuau bucha tsahuahua tura ahua. ¹⁴ Isaramereya tuque Asíncrito, Flegonte, Hermes, Patrobas, Hermas, tuna tsehue cuanaque Jesús queja ecatyati cuanaque. ¹⁵ Isaramereya tuque Filólogo, Julia, Nereo, Nereo tsehuequi epunaquique, Olimpas, dutya tuna tsehue cuanaque Jesús queja ecatyati cuanaque.

¹⁶ Casitatitsu quisaratibare, emetucuju quinati jadya nejudue peya cuana tsehue iyuhueda cabatiyaque cabamereti ishú. Jesús queja ecatyati cuanara micuana isaramereya eju pajudya jutidya Yusuja quisarati baca ishú casitatiya cuanara.

Camadya ishú cuejayaque

¹⁷ Cuejaya micuana riyaque, micuana ecue eatsehuequi cuanaque. Necanaruticue micuana Jesús queja nimee amerejacacara juya cuana tsehue, tumebaedya micuana yume cama nimee amerejacacara juya cuana tsehue. Tunara bahuityayaquetu bape neri cuita micuana Cristo jaque bahuityatanahua bae ama. Necareneume ecana. ¹⁸ Tume cuanaquetu Ecuana Cuatsashaqui Jesucristora amereya eque ama juya cuanaque. Tunaja biji eque cuitadya jutidya tuna juneniya. Tunaja quisarati jida yuneri bucha datse, ai jidaque ama. Pusha pusha jutidya tuna juya. Baecua jida jari cuanaque adeba jidama Cristo queja ecatyati cuanaque tunajatu ijahue jutidya aya. ¹⁹ Cristo queja ecatyati cuanara peya epuju cuanara micuana aya, micuanapa Jesúsra amereya eque cuita juya jadya. Jadya quisarati bacatsatsu ique dyaque pureama juya. Inimequi, bahue nejudue yunerique quisarati bahue

juishu. Jidamaque acara neaume; yunerique ama ija-cabacacara neaume. ²⁰ Yusu tu Ecuana Inime Tsapema Anishaquique. Tsunutaya amatu Satanás casa secatana ishúque, tuja micuana ijahue anuca ishú ama. Ecuana Cuatsashaqui Jesucristora jida tsehue nenarucue tuja qiyuhuebati tsehue.

²¹ Timoteora micuana isaramereya. Tuquetu eatsehue mere jupee juhua, Ecuana Cuatsashaquiya mere ique juyaju. Tumebaedya Lucio, Jasón, Sosípater ecue ata israelita cuanara micuana isaramereya. Gayora micuana isaramereya. Tuja etareju ique. Rehuari Jesús queja ecatyati cuanaque casitatiya Yusuja quisarati baca ishú. Erastora micuana isaramereyadya. Tuquetu Corintoju huaraji cuanara chipiru sitayaque naruquique. Tumebaedya micuana isaramereya Cuar-to bacanira. Tuquetu Jesús queja ecatyati nucadya.

Ique Tercio. Ique, Pablo tsahuahuquique, tura cuejaa-jeyaque huenequique. Era dyadi micuana isaramereyadya Ecuana Cuatsashaquiya ebacaniju.

²⁴ Ecuana Cuatsashaqui Jesucristora jida tsehue nenarucue tuja qiyuhuebati tsehue. Jadidya paju.

Pablora Yusu pureama acuareque

²⁵ Iyacua Yusu pureama neara:

—Dyaque jida, casada jadya taa mique, —jadya neara.

Tura peadya ecuana ecasaturaajeudya jutidya, Jesús queja ecuana dyaque nimee juaje ishú. Eratu cuejajacahua ama Ecuana Cuatsashaqui Jesucristoja quisarati. Yuequedya yahua iyama jarijutu riyaque quisarati ejitaju ama juhua. Ai ibeda buchiquetu juhua, ni ejeja adeba ishúque ama. ²⁶ Icuene Yusuja quisarati cueja puji cuanaratu cuejacuare ejitaju cuita ama, dyaque jida cuita adebaya ama tibu. Iyacuatu amena Yusura ejitaju aya riyaque quisarati. Tuquetu Yusu maju baecuaque; tere baecuatu anibuque. Tura cuitadyatu riyaque quisarati cuejamerehua dutya queja aniya cuanaque. Jadya tujatu amerehua, tunaja Jesús queja ecatyati ishú emajaca ani ishú, jadya juatsu tuna Yusuja biji eque ani ishú.

²⁷ Yusu tu peadya cuita camadya. Aijama tu peya. Tura peadyatu yuneri cuita dutya pana adeba aya. Pureama neajacara ama tura ecuana Jesucristo eque eje bucha ahuaque adebatsu.

—Dyaque jida, casada jadya taa mique, —jadya neara.

Jadya neajacara ama ni eje tupu. Jadidya paju.

Riya tupu camadya.

Pablo

1 CORINTIOS

Riyaque quirica ri Pablora Corintoju aniya cuanaja cuadisha ishu huenecuareque. Riya tsehue tujatu Jesús queja ecatyati cuanaque nereda acuare, tuna jidama aniya jadya bacatsu. Umae cuana tuna dyaque jidaque bucha cabaticuare. Umaeratu tunaja caquemitiqeremaque jaraquerecuare. Umaetu Yusu mui ishu casitatitsu jidama eje buchadya jutidya jucuare.

Tuequedya tuna Pablora bahuityacuare Yusuja Espiritura bape bape casa tyahuaque peadya peadya Jesús queja ecatyati cuanaque, Yusuja biji eque ecuana peya cuana tsehue catsahuatibare ishu.

Capítulo 13jutu Pablora huenecuare eje buchique iyuhue jadique. Dyaque patu saretanaya ecuana peya cuana tsehue yurameta iyuhueda cabati ishuque. Jadya ni ecuana cabatiya, tume ecuana dyaquedya aniajeya Yusu pureamaturayaque.

Corinto juque Cristo queja ecatyati cuanaratu bape bape cueyaneedy a jutidya acuare Cristora, tuaqueja ecatyati cuanaque emajuque nityatsuranucayaque. Capítulo 15ju tuna Pablora bahuityacuare Yusura ecuana emajuque eje bucha nityatsuranuca e abuqueque.

Umae versículo cuana dyaque saretanaya cuanaque tu: 1.8; 2.14; 3.11; 6.19, 20; 9.24-27; 10.13, 31; 15.20, 22, 25-26, 53-54, 57-58.

Pablora Jesús queja ecatyati cuanaque quirica eque is-aracuareque

1 Era rique micuanaja quirica cuadishaya. Isaraya micuana era. Ique Pablo. Yusura ique mepehua Jesucristoja yana atsaqui juishu, tuja inime jadya juya tibu. Ecuana tsehuequique Sóstenes bacani ri eatsehue. Tura micuana isaramereyadya. ² Cuadishaya rique quirica Corintoju Yusuja cuanaja ishu. Tura micuana mepehua micuanaja jidama cuanaque jaca ishu, tu- aqueja camadya catyati ishu. Micuana Jesús queja catyatihua tibu, jadya mepee tura micuana ahua. Micuana camadya ama, tumbaedy a dutya queja cuanaque 'Jesucristo tu Ecuana Cuatsashaquique' jadya juya cuanaque tuna Yusuja cuanaque. Jesucristo tu Ecuana Dutya Cuatsashaquique. ³ Yusu ecuanaja Etatara, tumbaedy a Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Jesús queja catyatihua tibu, tura ecuana dyaque jida amereyaque

⁴ Micuanaja ishu Yusu tsehue quisaratiyaque tuque ecue abahue:

—Yusurupai mique ecue ajacanime ama mique Corintoju cuana tsehue micue cuana tsehue dyaque jida juhua tibu, Tata. Mira tuna jadya bae aya, tuna Cristo Jesús queja ecatyati juya tibu, —jadya tuque ajacaya ama.

⁵ Micuana Cristo jaque tibu, micuana Yusura tilla tupu ama tyahua jidaque. Tura micuana tyahua dutya micuanara sareyaque tuja quisarati cueja ishu.

⁶ Micuanaratu pana ejenedya aya Cristoja quisarati yunerique ecuanara micuana cuejahaque. Tumeque

quisarati equedya micuana aniya. ⁷ Jadya tibu tuque micuanaja aijama amadya jidaque Yusuja Espirituja tyabahueque. Ejeque huecacatu Ecuana Cuatsashaqui Jesucristo ejitaju junucabuque rehua. Micuanaratu eje buchadya junashahuishacara tsehue ihuaya. Tuque ihuaya tupu tuque micuanaja dutya jidaque aniya Yusuja Espiritu eque etyaque tuque mere ishu.

⁸ Yusura micuana narubuque tereya tupu. Casaturajacabuque ama tura micuana, micuana Jesús queja nimee jujaca ishu ama. Jadya tibu micuana Ecuana Cuatsashaqui Jesucristo junanucahuaju, ni aira buchique micuana jucha metse abuque ama. ⁹ Yunerique cuitadya micuana Yusura jidaque jadya tyae abuque, tura eje bucha aana ayaque cuareya ama tibu. Turadya micuana mepehua tura Ebacuaque Jesucristo jidaque tyaana ahuaque micuanaja dyadi ani ishu.

Corintoju cuanaque peya cuana tsehue yume cama nimee ama anicuareque

¹⁰ Ecuana Cuatsashaqui Jesucristora jadya cuatsashaya tibu, micuana nereda bucha cuejae aya, micuana ecue eatsehuequi cuanaque. Peya cuana tsehue yume cama nimee nejuque. Ujeu cati cati jadique micuanaja paju ani. Dutyara yunerique neejeneque. Dutya yunerique eque neanicue. ¹¹ Jadya micuana cuejaya. Cloéja etareju cuanara ique cuejachine micuana cama ujeu cabatiyaque. ¹² Cuejachine tunara ique. Umaepa micuana juya: "Pablo cuita camadya tuque ecuana bacacara aya". Peya cuanapa micuana juya: "Apolosra cuejayaque cuita camadya tuque ecuana bacacara aya". Peya cuanapa micuana juya: "Pedro cuita camadya tuque ecuana bacacara aya". Umaepa micuana juya: "Cristoja quisarati cuita camadya tuque ecuana bacacara aya, ejeque ecuitaja buchique ama". ¹³ Pusha

amadyatu Cristo dutya metseque, peadya cuare juque piji camadya tuja cuanaque naruquique ama. Ique ama curusuju majuhua micuanaja jucha cuana tsujetyaqui. Ecue ebacaniju ama micuana cutsameretihua. Jadya tibudya cati cati nejujacacue.

¹⁴ Jidadya tucue tuque eje uma ama tuhua Corintoju utsahua. Crispo, Gayo jadya camadya tatse utsahua.

¹⁵ Era cuitadya ni ecana eje uma utsaquena juhua, tume tucue tuna "Pabloja ebacaniju ecua cut-sameretihua", jadya ecana juquena juhua. ¹⁶ A, huecatanahua peya. Utsacuare tucue tuque Estéfanas, dutya tuja etareju cuana tsehue. Tuequedya tuque amena adebaya ama ni ejeque peya utsahuaque.

¹⁷ Cristora ique cuadishahua peya cuana dyadi Yusura eje bucha Ijahua quejaque inajacameree ayaque cueja ishuhua, ai tuna utsa ishuhua jipidya ama. Eratu aya quisarati ibeda adebataquima tsehue ama, Yusura ique adebamerehuaque camadya. Era ni cuejaquena juhua ecuitaja inime aniyaque, tume taa tu ique quisaratiyaju bacaqui cuanara ecue ishuhua dyaque inime tupu que-na juhua, Cristo tunaja jucha jiteque majuhuaque inime tupuqui eauque. Ique jutidya ni tunara dyaque inime tupuqui aya, Cristo queja ecatyatiuque, tume taa tu Cristo curusuju yanacana maju juquena juhua.

Cristo eque, tuja inime dyaque bahue aniya eque jadya Yusu casa cabameretihuaque

¹⁸ Ecuana Yusuja einajacamere cuanaque "Cristotu majuhua curusuju ecua jiteque", jadya quisarati bacatsu tuque ecuanaja inime juya: "Tuja dyaque casa aniya tsehue ecua Yusura inajacamerehua, tuja Ebacuaque ecua jiteque curusuju majuhua tibu", jadya tuque ecuanaja inime juya. Ijahua etiquiju judiru ishuhua cuanaque tuna riyaque quisarati bacatsu tsaya jutidya. "¿Aishu rique ecua riyaque quisarati eejeneu?" jadya jutidya tunajatu inime juya.

¹⁹ Ehuenedya tu Yusura quisarati acuareque: "Yanacatu dyaque bahue cabatiya cuanara inime tupuya.

Tuna cuitadya dyaque bahue juya tibupa ecana eaquejadya judirubueque jadya.

Arepa inimequi cuanaque ique adebaya jiu juya ama bucha, eratu tunara inime tupuya cuanaque yanacanaque ejitaju adadibuque", jadyatu Yusura quisarati iyahua yuequedyadya.

²⁰ Yusuratu inimequi bucha cabatiya cuanaque inimema baya, dyaque bahue bucha cabatiya cuanaque, jida quisarati yana muieque riyaque yahuaju quisaratiya cuanaque. "Yusura ecua jucha metse ama baya ecua bahue baatsu", jadya datse tunajatu inime juya. Jadya ama tuque. Yusuratu ejitaju amerehua ecuita cuanaja inime tupu ishuhua. ²¹ Yusu camadya tu dutya bahueque. Yuequedya tujatu inime juhua:

"Riyaque yahuaju cuana queja tunaja ishuhua camadya inime tupuqui cuana queja caadebamerehibueque ama. Dyaque jida tuna quisarati bacamerehibueque ecue Ebacua tuna jiteque curusuju majuhuaque. Tuaequeja catyatiya cuanaque camadya tuna Ijahua quejaque in-

ajacamerehibueque, arepa peya cuanaja ishuhua riyaque quisarati aishuhua ama, paju ama bucha", jadyatu Yusuja inime juhua.

²² Israelita cuanatu jadya quisarati bahue: "Eejeneu mique ecua Yusura mique quisarati cueja ishuhua cuadishahuaque, mira Yusuja casa tsehue ni ejeque ecuitaja ataquique ama ayaju camadya", jadya tuna quisarati bahue. Israelita ama cuanaque tuna jadya quisarati bahue: "Eejeneu mique ecua Yusura mique quisarati cueja ishuhua cuadishahuaque, mira ecua quisarati adebabada tsehue isarahuaaju cuita camadya", jadya tuna jubahue. Jadya tibudya tunajatu dutyaja jujeri inime "Cristo ecua inajacamere ishuhua majuhuaquepa aishuhua ama", jadya aya. ²³ Ecuana jatu cueja bahue: "Mesiastu curusuju tatatanahua ecuanaja jucha cuana tsujetya ishuhua". Jadique quisarati bacatsutu dutya jujeri israelita cuana cahuaitiya, Mesías curusuju eiyetau ama bucha adebatsu. Israelita ama cuanara bacatsu tunajatu inime juya, aishuhua buchique ama bucha. ²⁴ Ecuana ishuhua bacue Mesías ecua jiteque majuhuaque quisarati jidaque quisarati. Pajudya datse ecua israelita ama, israelita; ecuanaja ishuhua tu jida. Cristo curusuju majuhua equedya ecua Yusura tuja casa bamerehua. Cristo jadya majue juhua eque ecua Yusura tuque dyaque bahueque bamerehua.

²⁵ Yusu tu dyaque inimequique, ai ecuita cuana bucha ama, arepa tuna "Yusura inime tupuyaquepa aishuhua ama", jadya aya ama bucha. Yusura dutya ai ayaque tu dyaque casada, ecuita cuanara ayaque bucha ama, arepa tuna "Yusura ai ayaquepa casadama", jadya aya ama bucha.

²⁶ Micuanara cuitadya eje buchique inime tupuqui neacue, micuana ecue eatsehuequi cuanaque. Riyaque yahuaju cuanaja ishuhua micuana eje uma piji camadya inimequi; eje umaja piji camadya tuque micuanaja casa aniya; eje uma piji camadya micuana inime metse. Micuana jadya ama bucha, micuana Yusura inajacamerehua. ²⁷ Dyaque bahue cuanaque emepeuque, Yusuratu mepehua tujaque amere ishuhua tuque adeba baecua cuanara aishuhua ama bucha cuana baya cuanaque. Dyaque casada cuanaque emepeuque, tujatu mepehua tuque adeba baecua cuanara casadama baya cuanaque. Tume cuanaque tujatu mepehua, bahue, dyaque inime metse jadya cabatiya cuanaque bisutura ishuhua. ²⁸ Yusuratu tujaque amerehua peya cuanara bijidamaduraya cuanaque, aishuhua ama bucha cuanaque. Aishuhua ama bucha cuanaque mepetsu tujatu aishuhua ama amerehua inime metse cabatiya cuanaque. ²⁹ Jadya equetu ni ejeque tuta taca casumiti jutaqui ama: "Ique dyaque jidaque inime metseque", jadyatu ataqui ama Yusu ni ejeja buchaja. ³⁰ Micuana micuana Yusura tujaque amerehua. Yusura micuana baya Cristo Jesús queja ecatyati. Cristoratu Etataque Yusu ecua queja adebamereya. Cristora ademedya ecua Yusu queja jucha metse ama bamereya. Cristora ademedya ecua anishaya Yusura anishacara aya bucha. Cristora ademedya ecua naruya dutya ai jidamaque eauju. Jadyatu

Yusura amerecara aya. ³¹ Jadya tibudya ecuana ecuana taca casumiti jutaqui ama. Jadya tu ehue Yusuja quisarati: "Ecuanaja ishudya jutidya jida quisarati neara ama. Ecuana Cuatsashaquiya ishu camadya tuque ecuanaja jida quisarati ataqui, tura eje bucha ahua eque camadya", jadya tu ehue Yusuja quisarati.

Cristo curusuju tatatanahuaque camadya ecuanaja cuejataquique

2 Ique micuana queja Yusuja quisarati cuejara cuacuare patya iyucaqui cuanaque equisaratiu bucha ama quisaraticuare, micuana ecue eatsehuequi cuanaque. Ecuana cuanara inime tupuyaque ama micuana cuejahua. Yusura bahue amereyaque micuana cuejahua. ² Tuqueja cuahuie tuque ecue inime jucuar: "Corintoju jutitsu tuna Jesucristoja quisarati cuita camadya cuejatiya. Tuque ecuana jiteque curusuju majuhuaque cuita camadya tuna cuejatiya", jadya tuque ecue inime juhua. ³ Micuana queja juticuare patya casadama cabaticuare. Eje buchadya meree acara tuque Yusu ahua. Jadya juyaque tadadahua ique. ⁴ Quisarati yunerique micuana cuejahua. Micuana cuejayaque tuque cuejahua dyaque bahue cuanara bahuityaya bucha ama. Yusuja casa eque tuque cuejahua. Era micuana Jesús queja catyatishacara ahua. Yusuja Espiritu eatsehueque bahue juatsu, tuja casa baatsu, tuque micuanaja inime jutihua era yuneridya Yusuja quisarati cuejahuaque. ⁵ Jesús queja micuana catyatihua, ai ecuita riyaque yahuajuja ebahuityaque bahue juatsu ama, Yusuja casa baatsu cuita camadya.

Yusu tuja Espiritu eque caadebameretiyaque

⁶ Jadya tibu tuque ecuana Yusuja quisarati cuejaya dyaque bahue tsehue, Yusuja Espiritura cuatsashaya eque juya cuana tsehue quisaratiyaque. Jesús queja catyatima cuanara inime adebaya tsehue ama ecuana quisaratiya. Riyaque yahua juque enaruqui cuanaja quisarati tsehue ama ecuana quisaratiya. Arepa iyacua tumeque ecuita cuana emuita juya ama bucha, masadama tunajatu inime dyaque bahueque teredadibuque. ⁷ Yusura bahue amereya eque ecuana quisaratiya. Yahua iyama jariradyatu Yusura inime tupuhua: "Ecue Ebacua queja catyatiya cuanaque tuna tuque muitaya bucha anibuque", jadyatu Yusura inime tupucuar. Yuequedya ama tujatu ejitaju amerehua tura inime tupuyaque. Etehua buchiquetu juhua. ⁸ Ni ejeque riyaque yahua juque huarajiratu adebahua ama Yusuja inime, Yusura ecuita cuana Jesucristo eque Ijahua quejaque inajacamerecara ayaque. Adebayaque juatsu tunajatu Ecuana Cuatsashaquique curusuju tatamerequena ama juhua. Ecuana Cuatsashaquique tu jida, casada jadya. Aijamatu peya tuque buchique. ⁹ Yusuja quisarati ehue baedyatu juhua:

"Dyaque jidaque ejeja buchique bamaque, bacamaquetu Yusuja ebajeje aniya tuque iyuhueda baqui cuanaja ishu.

Tunajatu anibuque, ni eje tupu riyaque tuque ecuanaja anidadibuque jadya inime etupuque ama".

¹⁰ Adebayadya tuque ecuana Yusura bamereyaque, tuja Espiritura cuitadya ecuana adebamereya tibu. Riyaque Espirituradyatu dutya baya. Jadya tibudyatu tura dutya adebaya. Arepa ecuana Yusura inime tupuyaque baecua paju ama bucha, tuja Espiritura camadyatu pana adeba aya. Jadya tibu tura pana adeba aya Yusura inime pirehuaque. ¹¹ Ecuita metsera peadya cuita camadyatu adebaya dutya tura inime tupuyaque, tuque eje buchique jadya. Jadidya tu Yusuja Espiritu; tura peadya cuita camadyatu adebaya Yusura dutya inime tupuyaque, tuque eje buchique.

¹² Yusura tuque ecuanaja cuadishahua tuja Espiritu cuitadya, Yusu adeba baecua cuana tsehueque espiritu ama. Yusuja Espiritu tu ecuana tsehue, Yusura ecuana tsehue jidaque ahuaque adebamere ishu. ¹³ Aya tuque ecuana quisarati cuana ejeque riyaque yahuajuja ebahuityaque ama, Yusuja Espirituja ebahuityaque. Riyaque Espirituqui cuana tsehue quisaratiya tuque ecuana cuejaya riyaque Espiritura bahuityayaque.

¹⁴ Yusuja Espirituja ama eiyacuane cuanaratu bii-damaduraya Espiritura bahuityayaque. Tunaja ishu tu aishuque ama bucha, riyaque Espiritu tuna tsehue ama tibu. Bahuedya ecuana Espiritura bahuityayaque jidaque; tuque ecuana tsehueju cuita camadya. Umae cuana ni tu eje bucha bahuee juma ni riyapiji buchique. ¹⁵ Yusuja Espiritu tsehue cuanara camadyatu adebaya ai jidaque, jidamaque jadique. Tumeque Espiritu tsehue ama cuanaratu adebaya ama Espiritu tsehue cuanaque eje buchique. ¹⁶ Ehuedya tu jadya Yusuja quisarati:

"¿Aira jatsutu Yusura inime tupuyaque adebaya?

☐Ni aira buchique!

¿Ejeque tu dyaque bahue Yusu bahuitya ishu?

☐Ni ejeque buchique!"

jadya tu ehue.

Ecuana camadyatu adebaya Cristora inime tupuyaque, tuja Espiritu ecuana tsehue tibu. Jadya tibudyatu yuneri cuitadya tuja Espiritu tsehue ama cuanara eje bucha adebataqui ama baya.

Yusuja quisarati cueja juyaque tu Yusu merequique

3 Riyaque micuana cuejaya, micuana ecue eatsehuequi cuanaque. Micuanaja biji eque cuitadya jutidya jari micuana aniya. Riya piji camadya micuana Yusuja Espiritura cuatsashaya eque juya. Arepa micuana Cristo jaque juya ama bucha, tuque micuana pana adeba ama jari aya. Ebacua cuana bucha jutidya micuana. Jadya tibudya micuana isarataqui ama baya yuneri cuita Yusuja Espiritu eque aniyaque eisarata bucha. ² Icuene micuana ebacua cuana ebahuityau bucha bahuityae ahua, ai esirique ebahuityau bucha ama, micuanara ibedamaque camadya adebataqui

baya tibu, e bacua nana butse eju ecuinanara atsuna esusuu bucha, esiri cuanara erami earau bucha ama. Riya cama tuque micuana yuhua yuhua piji camadya adebaya Yusuja quisarati. ³ Micuanaratu adebaneriya ama jari Yusuja quisarati. Micuanaja biji eque cuitadya jutidya micuana aniya jari tibu, Yusuja Espiritu eque ama. Dyaque inimequi micuana cabatiya peya cuana Jesús queja ecatyati cuana ducu. Cahuaitiya micuana peya cuana tsehue. Jadya anie juyaque micuana Jesús queja catyatima cuanaque aniya bucha cabameretiya. Yusuja Espiritu tsehue ama aniya cuana bae jutidya micuana juya. ⁴ Micuana ducutu aniya jadya juya cuanaque: "Eratu Pablora cuejyaque cuita camadya bacaya". Umae bacue juya: "Eratu Apolosra cuejyaque cuita camadya bacaya" jadya. Jadya juyaque micuana, Yusuja Espiritu iyacuanema cuanaque bucha juya.

⁵ Ique dyaque inimequique ama. Apolos tu dyaque inimequique ama. Yusu merequique camadya yatse. Micuana Jesús queja catyati ishucue, bahuitya ishucue jadya ishucue camadya yatse. Ecuana Cuatsashaquira yatse cuatsashaya, cuejaya jadya aya tuque eje bucha meree aishucue. ⁶ Ique micuana Yusuja quisarati cuejatibune juhuaque, teeju uhuahua puji buchique. Era micuana Jesús queja catyati ishucue tshuahua. Apolos tu euhua cuanaque jida dane ishucue nasaqui buchique. Jadya ama bucha Yusura cuitadya micuana Ijahua quejaque inajacamerhua. Tuquetu euhuaque ehuijashaquique buchique. ⁷ Dyaque inime metseque tu Yusu, tuja quisarati cuejaqui cuanaque ama. Euhuaque ni huijaya ama, tume taa tu yanacanadya uhua, nasa jadya atanaya. ⁸ Ni ejeque ecuita Yusuja quisarati cuejaquique tu dyaque inime metseque ama. Yusura tuna tsujetyabuque peadya peadya tunara eje bucha meree ahuaque. ⁹ Micuana micuana Yusuja tee buchique. Tee metsera tuja tee jida enaruu bucha tura micuana naruya jida. Apolos, ique jadya yatse teeju mere puji buchique. Yatsera micuana cuejaya, bahuityaya jadya aya Yusuja quisarati.

¹⁰ Ejeque ecuita etare caticara ejuu. Icuene tujatu mere puji cuana queja tumu ebari cuana iyamereya etare nityatsura ishucue, etare casada neti ishucue. Tuequedy tujatu peya cuana queja etare amereya. Yusu tu etare metse buchique. Micuana micuana tuja etare buchique. Ique icuene cuita tumu ebari cuana iyamere ishucue cuadishatanahua buchique. Yusura ique casa tyahua eque eradya micuana Jesucristoja quisarati cuejametse ahua, micuana tuaqueja catyati ishucue. Eratu Yusuja biji eque cuita atibunehua. Apolos tuequedy peya cuana era quisarati cuejahua jenucahua cuanaque tuna tuna etare amena atillara jehua buchique. Tunara micuana tsahuanahua Yusuja quisarati pana adebamere aishucue. Yusuja quisarati bahuitya juya cuanara jida inime patupu, tunara bahuityayaju micuana jida tuyu Yusuja biji eque bahuitya ishucue. Etare mere juya cuanara peyara tibunehuaque inime eque yuamaturama eau bucha, jadidya tunajatu ataqui jidama ebahuityaju.

¹¹ Era micuana tuhua bahuityacuare patya, "Jesucristo queja peadya camadya necatyaticue einajaca juishucue", jadya micuana cuejacuare. Etare casada neti ishucue tuque ecuanaja icuene iya bahue tumu arida cuanaque etare erihuu tibu. Tumebaedya ecuanaja Jesús queja catyatitaqui casada juishucue, ijahuaja etiquijuu enubidiruu tibu. ¹² Umaeratu etare ishucue tsumeya oro, jadya ama juatsu peya ai pajidaque plata, tumu jida tsuje aridaque jadya. Riya cuanaque tu tsunudaque. Peya cuanara bacue tsumeya acui, acui biti, jadya ama juatsu yachi nutsa jadya. Riya cuanaque tu tsunudama. Tirutsutu ejitaju juya ejera pajidaque etare ahuaque, ejera pajidaque ama ahuaque jadya. Etare pajida tsehue ama ahuaquetu masadama murutaya, peya etare cuana bacue aijama. Yusuja cuanaque tuyuque bahuityaqui cuanaque tuna etare jida pajidaque aqui buchique. Jesús pana adeba ama tsahuaqui cuanaque tuna etare pajidaque ama aqui cuanaque buchique. Ecuana Cuatsashaquique juhnahuajutu Yusura ejitaju abucue ejera yuneri, yuneri que ama jadique bahuityahuaque. ¹⁴ Yuneri que bahuityaqui juhua cuanara camadyatu Yusura etsujequi tyayaque babuque. Tuna tuna tiru baecuaque etare puji buchique. ¹⁵ Tuyuque ama bahuityaqui juhua cuanaque tuna tyatabuque ama ni ai. Tuna camadya ni tuna Yusu queja judirubuque; babuque ama tunajatu etsujequi. Etare tiruyaju huanahuaque bucha tuna jubuque, dutya murutaterehuaju mema ejuu bucha.

¹⁶ ¿Adebaya ama jatsu tuque micuana Yusu micuana queja aniyaque? ¿Adebaya ama jatsu tuque micuana tuja Espiritu micuana queja aniyaque? ¹⁷ Yusuja eaniqui tu tujaque, asicadaque ama. Micuanadya micuana tumeque eaniqui buchique. Jadya tibudya tuna Yusura dyaque nerecaturabuque micuana pusha pusha bahuitya juya cuanaque, tunara tuja eaniqui asicaturaya tibu.

¹⁸ Umae micuana bahue cabatiya ecuita cuanara inime tupuyaque dyaque bahue cabatitsu. Micuana tacadya jutidya jahue necatijacacue. Yuneri cuitadya ni micuana dyaque bahue jucara juya, inime tupuqui neajacacue riyaque yahua juque. Yusu inime tupuqui neacue, arepa micuana, Jesús queja catyatima cuanara ai baecua bucha baya ama bucha. ¹⁹ Yusu adeba baecua cuanajatu inime juya dyaque iyucaqui juatsu Yusu queja ejudiruu bucha. Yusratu jadique aishucue ama cuita baya. Ehuenedya tu Yusuja quisarati:

"Yusu adeba baecua cuanaque tuna dyaque bahue cabatiya.

Yusura tuna inimema bucha baya.

Babi puji peyaja ishucue escopeta nityatsu tudya jutidya ecatecuameretiu bucha tuna".

²⁰ Tumebaedya tu ehucue Yusuja quisarati: "Ecuana Cuatsashaquique tu bahue; dyaque iyucaqui cuanaja inime tupu tu aishucue ama". ²¹ Ni ejeque buchique pacasumiti ama jadya Yusuja quisarati cuejaqui cuanaque ijacabacaqui cabatitsu. Dutya tuja quisarati cuejaqui cuanaque tuna iyatanahua micuanaja jida ishucue.

²² Aijama amatu ai micuanaja jida ishuque. Pedro, Apolos, ique Pablo jadyara tuque ecuana Yusuja quisarati cuejahua micuana tsahua ishu. Yusuratu ahua dutya ai riyaque yahuaju micuanaja jida ishu. Micuana chacha aniyaju, tura micuana jida naruya. Majuhaju tumebaedya tura micuana naruya. Iyacua eje bucha juyaque, eje bucha judadiyaquetu Yusuja cuanaja jida ishu jadya juya. Dutyadya tu micuanaja ishuque.

²³ Cristo tu Etataque Yusu Ejitaju Amerequique. Micuana micuana Cristo ejitaju amerequique. Jadya tibudyatu dutya micuanaja jida ishuque.

Cristo merequiera peya cuana queja Cristo ejitaju amereyaque

4 Ecuana Yusuja quisarati bahuityaqui cuanaque ecuana Cristo merequi cuanaque. Yusuja ecuadishaque ecuana yunerique bahuitya ishu Yusura ejitaju ahuaque. Dyaque inimequique bucha bae ecuananeume, micuana merequi bucha bae ecuananeacue. ² Mayurumajatu ataquí tuja patrónra amereyaque ni riya piji buchique cuarema. Jadidyatu Cristoja quisarati bahuityaqui cuanaja bahuityataqui Yusura amerehua eque cuita camadya, ni riya piji buchique cuaretsu ama. ³ Micuanaja, ni ejeque huaraji maju aquiatu aijama era Yusu jida merehua, jadya ama juatsu jidama merehua, jadique cueja ishuque. Ique cuitadya "Yusu jida merequi", jadya catiya ama. ⁴ Merecarama ama ni tuque Yusu ahua ama, tura cuita camadya ique ecuejau era jida merehua, jadya ama juatsu aijama, jadique. ⁵ Jutaquiju icueneta Yusuja huecaca iyama jariju, "Miratu aya ama mique Yusura amerehuaque", jadya neume ni ejeque buchique. Ecuannaratu adebaya ama peya cuanara inime tupuyaque, ni eje bucha juatsu tuna eje bucha juyaque. Ecuana Cuatsashaquira camadyatu adebaya. Tuque junanucatsu tura ecuana pana ejitaju anabuque ecuana ducuta eje buchique inime cadujutiyaque, tura ecuanaja inime tupu cuana eje buchique adebaya tibu. "Dyaque jida mique baya", jadyatu Yusura quisarati abuque, ecuanara tura amerehuaque ahua baatsu.

⁶ Huenehua rique era, micuana ecue eatsehuequi cuanaja ishu. Apolosja ebacani tuque iyahua, ique Pablo tumebaedya quiyatihua, era micuana Yusuja quisarati bahuityayaque dyaque ejitaju amere ishu. Yusuja quisarati cuejaquique peadya camadya bacacara ebari, peya bacue bijidamadura jadya neume. ⁷ Micuana micuana peya cuana bucha dyaque inime metseque ama. Dutya casa tuque micuanaja Yusura tyahuaque. Micuana jaquedya jutidya ama tume. Jutaquiju micuanara cuita micuanaja casa eque dadihua bucha casumitie nejuume.

⁸ Cristo amena pana adeba aya bucha micuana cabatiya. Yusura micuana tyayaque micuanaja amena dutya aniya bucha micuana cabatiya. Ecuana amena Cristo jaque bahuityataqui ama bucha tuque micuanaja inime juya. Ecuatsashaquique dyaque casadaque amena juhua bucha tuque micuanaja inime juya. Areque micuana ecuatsashaquique dyaque casadaque

ejuu. Micuana amena enaruqui dyaque casada cuanaque bucha emui juhuaju ecuana dyadi tumebaedya jubuque. ⁹ Emuita ejuuque ni ecuana Yusura dutyaja jetiedyaque iyahua, arepa ecuana tuja ecuadishaque juya ama bucha. Riyaque yahuaju huaraji cuanajatu iyetayaque dutyaja yacuaju cuetisha bahue, dutyaja peta ishu. Tumebaedya ecuana barepaju Yusu tsahuaqui cuanara, riyaque yahua juque ecuita cuanara ecuana petaya. Umaera bacue ecuana ijaribaya jutidya ecuana canerecatiyaju. ¹⁰ Ecuannara Cristo mereya baatsutu tuaqueja catyatima cuanaque quisaratiya ecuanapa inimema jadya. Micuana bacue dyaque bahue cabatiya Cristo jaque cabatitsu. Ecuana tunara ecuana casadama baya, micuana casada cabatiyaju. Tunara ecuana bijidamaduraya, micuana bacue tuna muibaya. ¹¹ Riyacama ecuana canerecatiya. Riyaque huecaca ecuana ara ishu, iji ishu cuanaju nerecada juya. Ejutuqui siri cuana tsehuedya jutidya ecuana cajututiya. Catsacatsa ecuana ataya, Cristo queja ecatyati baatsu. Tarema ecuana epu cuana tupu anianiniya, Cristoja quisarati cueja juyaque. ¹² Castereya majaca ecuana ecuanaja ebi tsehue mere juya ara ishuque, jutu ishuque jadya cadaditi ishu. Tunara ijillahuanayaju, ecuanara tuna quemitsaya: "Yusura nenarucue jida". Tunara nerecaturayaju dutya tuque ecuana iduya etsuje acara tsehue ama. ¹³ Tuna ecuanaja ishu jidama quisaratiyaju, ecuanara tuna jida tsehue quemitsaya. Yusu adeba baecua cuanara ecuana jiji bucha petae aya; ai eijehuetaque bucha petae tunara ecuana aya.

¹⁴ Jadya rique hueneha, ai micuana bisutura ishu ama, micuana cuejatsu, huecasha ishu. Dyaque iyuhueda micuana baya. Ecue ebacua neri buchique micuana. ¹⁵ Ique micuanaja tata buchique, eradya micuana Cristoja quisarati cueja metse ahua tibu. Era micuana tsahuahua tuaqueja catyati ishu. Tuequedya micuana umae cuanara tsahuahua Cristo dyaque jida adeba. Arepa tuna jetiama ama bucha, ique peadya micuanaja tata buchique. Jadya tibudya micuana cuejayaque huecashaya. ¹⁶ Ique micuanaja tata buchique juya tibu, ique juya baedya nejucue. ¹⁷ Jadya tibudya tuque cuadishaya Timoteo. Tuque tuque ecue ebacua buchique. Dyaque iyuhuedaque tuque ecue. Turatu dyaque jida, tuyu mereya Ecuana Cuatsashaquique. Tura micuana cuejatiya ique eje bucha anie juyaque, ique Cristora iyacuanehua tibu. Ique epu epu cuana tupu Yusuja quisarati ijacabaca ishu casitatiya cuanaque cuajicujini juyara, era tuna bahuityaya eje bucha anie Yusuja cuanaque jutaquique. Timoteo jutitsu tura micuana cuejatiya riya cuanaque Yusuja cuanaque era bahuityayaque.

¹⁸ Umae micuana dyaque bahue bucha cabatiya. "Eje bucha jee ni tu juma Pablo ecuana neredara", jadya datse ni tunajatu inime juya. ¹⁹ Ecuana Cuatsashaquija jadya inime juyaju micuana masadamadya ebatu. Ique bahue eje bucha tume dyaque bahue bucha cabatiya cuanaque quisaratiyaque. Ique cuaatsu tuna nime adebatiya. Nime adebatiya tuna era, yuneridya

tunaja Yusuja casa aniyaque, jadya ama juatsu ni tuna quisaratiniyadya jutidya. ²⁰ Yusura ecuana yuneri cuitadya naruyaju camadya ama tuque ecuana tuja quisarati cuejaya, tumbaedy a ecuana tuja casa eque aniya cuanaque. ²¹ Micuanara ni Yusuja bijidamaque ajacaya ama, tume micuana batiya cahuaiti tsehue, micuana nereda ara, huaraji ejuta bucha. Micuana ni inime cacuaretiya, ajacaya ni micuana jidamaque, tume jutiya micuana queja micuana casatura ishu jida inime tsehue. ¿Eje buchique tuque micuana bijida baya? ¿Ecue micuana acui tsehue ati ishu ni taa, jida inime tsehue micuana casaturati ishu ni taa?

Pablora bisutada cajuchatihujaju eje bucha bae aishuque cuejacuareque

5 Bacaya rique ecuana quisarati Corinto juquepa ejeque cuana etataqueja ehuanque tsehuedya jutidya jucha juyaque aniya jadya, arepa tumeque ecuita Jesús queja ecatyatique ama bucha. Yusratu jadique dyaque asicada baya. Butsee Yusu adeba baecua cuanajatu jadya cuita cajuchati ishu bisu aniya. ² Arepa peadya micuana ducuque dyaque jidama aniyaju baya ama bucha, micuana dyaque jidaque bucha cabatiya. Ecasumitiuque, peya inime, bisu jadya jutidya nejucue! Tumeque ecuita ni cacuaretiya ama inime, necasitatiquireume micuana tsehue Yusu pureama aishu. ³ Arepa micuana era japada baya ama bucha, tuque jadya cajuchatichineque tuque dyaque inime tupuqui aya. Ique tuhua micuana tsehue cuitadya ejuu bucha rique ecue inime juya. Ique Ecuana Cuatsashaqui Jesús cuarequique. Tura ique cuatsashahua tibutu era inime tupuya micuana eje bucha ejuuque. Eratu dyaque jidama ecajuchati baya tumeque dyaque bisutada cajuchatihuaque. ⁴ Necasitaticue tume cajuchatichineque inime bajeje ishu. Neacue era Ecuana Cuatsashaqui casa eque eauque, ique cuitadya micuana tsehue ejuu bucha. ⁵ Casitatitsu ejitaju neacue: “Ecuana Yusuja cuanara tuque ecuana narujacachine riyaque ecuita, Satanásra eje bucha tuque jucara juya eque amere ishu”. Arepa Satanásra majushaya ama bucha, judiribuquedyatu Yusu queja. Ecuana Cuatsashaqui Jesús junanucahuajutu chachadya netitsuranucabuque. ⁶ Jutauquijudyatu jidama “Ecuana ecuana jida”, jadya casumiti ishu, micuana ducu eje bucha cajuchatie juyaque aniya tibu. ¿Adebaya ama jatsu micuana quisarati: “Riya piji levaduraratu dutya esaca sasanashaya”, jadique? Tumbaedy micuana peadya jucha aridaradya dutya micuana eyuamaturatillau. ⁷ Neanijacacue jidama micuana icuene anihua bucha. Ecuana israelita cuanara tuque ecuana dutya mara adebaya Yusura ecuanaja baba cuana Egipto juque cuinanashacuareque. Cuinanama jarira tunajatu uhuisha ami tsehue eteriqui pepacuare. Uhuishatu majuhua tuna emajuuju. Ecuana riyaque chine Pascua bacani aishu cabajetiyaque tuque ecuanaja ijehue bahue juhua pan levadura tsehue ea cuanaque. Peya tuque ecuanaja abahue juhua levadura nerique. Jadidyatu micua-

naja jacataqui dutya jucha, peya cuanaja tumbaedy cajuchati bijiseri ishu ama. Micuana micuana eiyacuane; beruque ani neijehuecue. Cristotu majuhua, ami quijehuetitsu, ecuana tere baecua ani ishu.

⁸ Cristo ecuana jiteque majuhua tibu neanira tuque pureamatura ishu. Jidamaque inime tupuqui neajacara. Necahuaitishajacara Yusu. Dyaque jida jucara nejura ni ejeque ijahue acara tsehue ama. Yusuja biji eque jida jucara nejura. Jadya juatsu tuque ecuana adebaajeya Jesús ecuana jiteque majuhuaque, israelita cuanara uhuisha tuna cuarequi majuhuaque adebaya bucha. Nejacacue beruque, tunara pan levadurauque arajacacuare bucha.

⁹ Era icuene quirica cuadishachine tsehue micuana cuejachine. “Necacarenetiume caquemiteremaque jaraquereya cuana tsehue. Necacarenetiume epuna decadeca arida cuana tsehue. Necacarenetiume ecuita cuana puna puna arida cuana tsehue ni deca cuinetse jucha juya tsehue, ni epuna cuinetse jucha juya tsehue”, jadya micuana cuejachine icuene quirica eque.

¹⁰ Jadya era quirica cuadishachine eque ai Yusu adeba baecua cuanaque tunaja biji eque aniya cuanaque pana jaca neacue, jadya juatsu ama tuque micuanaja quirica jadya cuadishachine. Umaeratu caquemiteremaquedy jutidya jaraquereya. Umaeratu radan-ityacaradya jutidya aya ai tunaja ishu. Umaetu chiri juya. Cueya cueya ea cuanaja yacuaju chichucata juyaque tunajatu tunaradya jutidya Yusu jadya ayaque muiya, Yusu Neri cuita camadya emuiuque. Riyaque yahuaju aniya jari tupu tuque ecuana eje bucha jacataqui ama baya riyaque yahuaju cuanaque. Tuna jaca ishu ecuana riyaque yahua juque cuinanataqui.

¹¹ Aniyatu umae yanacanadya jutidya ecuana tsehuequique jadya juya cuanaque Yusuja inime eque juneniyaque ama. Tuna tuna jara bahue eje tsehuedya jutidya. Tunaratu tunaja ishu cuita camadya ai radan-ityaajecara aya. Tunaratu muiya yusu cueya cueya ea cuanaque. Catacuariti arida tuna. Enajehue, tupari casadaque jadya tunajatu iji bahue niujuqui juya tupu. Chiri puji tuna. Necacarenetiume jadya anie juya cuana tsehue. Tuna tuna Yusu jaque ecuana jadidya datse juya. Jadya cuana tsehue ni araara cuana ishu necasitatum.

¹² Ecuetu cueja, huecasha jadya ataqui ama Jesús queja catyatima cuanaque. “Micuanadya micuana jucha metse”, jadya tuna aya ama. Yusura cuitadya tuna jucha metse babuque, ai era ama. Micuana tsehue casitati bahueque ni jidama juya, micuanaja jadyatu nereda ataqui. “Miquemi jida ama juya”, jadya neacue, Yusu jaquepa jadya juya cuanaque jidama juya cuanaque. Jadya tibudya tume jadya cajuchatie juchineque pacuanuca ama micuanara Yusu pureama ayaju.

Jesús queja ecatyati cuanaja jidamaque inime tunaja cuita camadya bajejetaquique

6 Aniya ni micuanaja inime bajeje ishuque Jesús queja ecatyati cuana tsehue, nequisaratiticue

Yusuja cuana tsehue, tunaja micuana jidamaque inime bajeje tshua ishu. Micuana micuana jadya ama juya. Peya tsehue cahuititsu micuana cuaya huaraji cuana Yusu adeba baecua cuana queja jutidya inime bajejera. ¿Eje bucha juatsu jatsu micuana bisuya ama jadya juyaque? ² Yusu jaque ecuana. Ejeque huecaca riyaque yahua terehuaju ecuanaradyatu narubuque dutya riyaque yahuaju cuanaque. ¿Adebaya ama jatsu micuana jadique? Jutaquiiju ejeque huecaca micuanara inime dyaque jidamaque bajejedadibuque tibu, jadya tibu taa tuque micuana iyacua ebajejeudya inime jidama cuitaque ama. ³ Ejeque huecaca ecuana barepaju Yusu tsahuaqui cuanaque naruqui jubuque. Ejeque huecaca micuana barepa juque ecuatsashaqui dyaque arida cuanaque cuana naruqui jubuque tibu, jadya tibu taa tuque micuanaja iyacua riyaque yahuaju eje bucha juya cuanaque bajejetaquidya. ⁴ Jutaquiiju peya tsehue cahuititsu, necuaume Jesús queja ecatyati cuanara muibaya ama cuana queja, micuanaja inime jidama cuanaque bajeje ishu. ⁵ Paani micuanaja bisu Yusu adeba baecua cuanaja micuanaja eje tsehue jidama inime aniyaque bajeje ishu. ¿Eje tsunu jatsu micuana aijama ejeque dyaque bahueque? Aniyadya tuque. Eje bucha ataqi ama amadya ni tu ejeque inime bajejequere. ⁶ Jadya ama bucha micuana Jesús queja ecatyati cuana tsehue cahuititsu micuana cuabahue huaraji cuana queja. Micuanaratu sareya Yusuja ama cuanaque micuanaja inime jidamaque bajeje ishu.

⁷ Micuana cama huaraji cuana queja inime bajeje ishu cacuejati jadyajutu ejitaju juya micuana Yusuja cuanaque bucha ama aniyaque, Yusuja inime eque ama. Jadya nejuume. Peyara jidama ayaju, ¿eje bucha idutaquima jatsutu ejuu cacua rehuanaticarama tsehue? Ejera ai chirihuaju, ¿dyaque jida jatsutu abacatadya jutidya jutaqui ama? ⁸ Micuanara cuitadyatu jidama baya Jesús queja ecatyati cuanaque micuana jidama aqui juhua cuanaque. Ecuana Cuatsashaquira ecuana cuatsashahua ecuana jidama aqui cuanaque jida baishu. Micuana jidama aqui cuanaque huaraji queja dujutsu tuque micuana iyuhue tsehue ama ecana baya. ⁹ Jidama jujacaya amajudya tu ejitaju Yusuja ama cuanaque. Judirubuque amatu Yusu queja tuque enaruqui juhuaju. Neadebacue riyaque. Micuana tacadya jutidya ijahue necatiume. Asicada, bisutada jadya inime cadujutiya cuanaque tuna tuaqueja judirubuque ama. Tunaja inime tacadya jutidya Yusu bucha baatsu muiqui cuanaque Yusu neri emuique, tuna tuna tuaqueja ama judirubuque. Caquemiti-queremaque epuna jabaquiquetu Yusu queja judirubuque ama. Deca cuana deca cuinetsedya jutidya jucha juyaque, epuna cuana epuna cuinetsedya jutidya jucha juya cuanaque tuna judirubuque ama Yusu queja. ¹⁰ Tumbaedyatu tuaqueja judirubuque ama chiri, peya jaque ai bijiseriqui cuanaque, nijuqui arida cuanaque, catacuariti arida cuanaque, casada tsehue peya ai secaqui cuanaque jadya. Eje tupu Yusu

enaruqui judadihuaju ni ejeque jadya anie juyaquetu tuatsehue ama anidirubuque.

¹¹ Jesús queja catyatima jariju micuana umae jadya anie juhua. Iyacua tuque micuanaja Yusura jucha cuana tillahua. Turadya micuana tujaque amerehua, micuana tuja biji eque ani ishu. Yusura micuana jucha metse ama baya, micuana Ecuana Cuatsashaqui Jesucristo queja catyatihua baatsu. Jadya tura micuana baya, tuja Espíritu cuitadya micuana tsehue tibu.

Ecuanaja dutya ecuita tu Yusu jaque

¹² Ejera cuana ni tuque micuana inime tupuya: "Ique Jesús jaque juya tibu, ataquidya era ai acara ayaque", jadya ni tuque micuana inime tupuya. Pusha amadya ataquidya tuque ecuanaja Yusura ecuana dutya ai ataquimaque amerehuaque. Jadya ama buchatu aniya umada ecuanaja ishu jidaque ama. Eratu inime tupuya: "Pacananuti ique ita tacadya jutidya. Ajacaya tuque aidya jutidya Yusu pureamaturajacaqui juyaque". Ique Yusu pureamaturajacaqui juyaque tu ique casa secaqui buchique. ¹³ Umaera ni tu inime tupuya: "Arataquidya tuque ecuanaja ejeque earaquidya jutidya Yusu cahuitishama. Turadyatu iyahua dutya ara ishu cuanaque ecuanaja ara ishu. Turadya tuque ecuanaja iyahua ecarecani ecuanara arayaque jemi ishu" jadya. Yuneridya. Jadya ama buchatu ejeque huecaca saretanabuque ama ecarecani ni earaqui. Yusura tuque ecuanaja ecuita iyahua, ai ecuana ecuanaja caquemiti-queremaque jaraquere ishu ama. Tuque cameremereti ishu tura ecuana iyahua, tuja Espíritu ecuana tsehue ani ishu. ¹⁴ Arepa ecuana majuya ama bucha, chachadya ecuana aninucaya. Yusuratu emajuque chacha nityatsuranucacuare Ecuana Cuatsashaqui Jesucristo. Tumbaedyatu tura ecuana emajuque chacha nityatsuranucabuque tuja casa tsehue.

¹⁵ Jesús queja catyatitsu tuque, ecuanaja dutya ecuita Jesús jaque. Tuja ecuita cuitadya ejuu buchique ecuanara. Micuanaratu adebayadya riyaque. Micuanara ni jaraquereya ejeque micuana tsehue caquemiti-queremaque, Yusuratu jidama baya. Eje bucha jipemeretaqui amatu Cristo emetsenemereque, epuna decadeca arida tsehue. Ni riya piji buchiquetu jadya ataqi ama. ¹⁶ Ejeque ecuita epuna deca deca arida tsehue cajipetihujutu Yusura cuita pidya camadya bucha baya, betadya ecatse cajipetihua tibu. Ehuene tu Yusuja quisarati: "Caquemiti-queremaque tatse, Yusura baya peadya camadya bucha". ¹⁷ Ecuana Cuatsashaquiija yana equedya aniyaque juatsu, ecuana peadya camadya bucha tuatsehue Yusuja Espíritu eque.

¹⁸ Nejabaume micuanaja caquemiti-queremaque. Peya jucha cuanara tuque micuanaja ecuita yuamaturaya ama, micuanaja caquemiti-queremaque jabatsu juya bucha. Jadya juyaque tuque micuana chiriyá Yusu jaque, ecuanaja ecuita Yusu jaque tibu. ¹⁹ Ecuana peadya peadyajudyatu Yusuja Espíritu aniya. Yusuratu tuque cuadishahua ecuanaju ani ishu; tumeque Espíritu tu ecuana peadya peadyaju. Jadya tibutu ecuana jaque ama ecuita; Yusu jaque tume. ²⁰ Yusura ecuana

tsuje aridaque quemihua. Jadya tibudya tuque ecuanaja ecuita tsehue Yusu muiba ishuque ataquí.

Pablora ecana carequi juishuque cuejacuareque

7 Iyacia micuana cuejaya quirica cuadishaya patya micuanara ique bacadurachineque. Bacadura-chine micuanara ique, “¿Jidadya tu ecuanaja carequi juishu, aijama ni taa?” Micuana taca canaruti bahueque juatsu, micuana jidadya carema siri ani ishu. ²Jadya ama bucha, eje uma carema cuanaque tuna tuna taca canaruti juya ama. Tunaratu jaraquereya tunaja caquemitiqeremaque. Jadya jutidya ejuu tibu, deca cuanaja ehuanee neri paani; epuna cuanaja tumbaedyahuique neri paani. ³Micuanaja huane cuana ecuitaju atacara juyaju, nejabacuedya. Micuanaja ahue cuanara ecuitaju aishu bijida bayaju, nequenatiume. Micuana ama micuana micuanaja ecuita metseque, epuna ahuequi cuanaque. Micuanaja ecuita tu micuanaja ahue cuanaja emetseneque. Jadya tibudya nequenatiume. Ai micuanara cuita camadya bijida baatsu ama, micuanaja ahue cuanara bijida bayaju camadya. Micuana dyadi micuana micuanaja ecuita metseque amadya, huanequi cuanaque. Micuanaja ecuita tu micuanaja huane cuanaja emetseneque. Jadya tibu tuna ecuitaju atacara juyaju, nejabacuedya, micuanara cuita camadya bijiseritsu ama, micuanaja huane cuanara bijida bayaju camadya. ⁵Micuanaja ecare cuana tsehue tuque micuanaja ajacataqui amadya cajipetitsuque inime. Peya jaque jabatsu tu amena chiri juya bucha jutidya. Betaradya ni tatse eje uma huecaca cajipetima cuetishacara aya Yusu tsehue quisaratiyaque. Betaradya ni tatse jadya inime tupuya Yusu tsehue quisaratiyaque cajacatibaca ishu, jadique juatsutu jidadya. Cajacatibaca jadya juatsutu junucataquidya icuene juhua bucha. Dyaque tsunuda cuita ni ecatse ecacatiu, tume tatse Satanásra cajuchatishacara jutidya eau eje tsehuedya jutidya cajipeticara tsehue. Jutaquijudyatu masadamadya cajipetinucataqui Yusuja bijidaque ama eau tibu.

⁶Casada tsehue ama micuana “Carequi nejudue” jadya aya. “Carequi juishu tu jidadya”, jadya tuque quisarati aya. ⁷Ique huanema. Ecue ishu taa dyaque jida ejuu dutya micuana ique bae juishu carema siri. Dutya tupu ama ecuanaja. Umaetu Yusura cuatsashaya: “Miquemi carequi jutaqui ama” jadya. Umaetu Yusura cuatsashaya: “Miquemi carequi jutaqui” jadya. Jadya tsahuae ecuanaja Yusura tuja biji eque ani ishu amereya.

⁸Riyaque micuana cuejaya carequi juma jari cuanaque, tumbaedyahuanemaju, eahuemaju jadya cuanaque. “Jidadya tu carema siri ani ishu. Ique bucha, carema neanicue”, jadya micuana cuejaya. ⁹Caremara ni micuana cajipetitsuque inime bijiseriya, tume carequidya nejudue. Yusratu jidadya baya micuana carequi juishu. Dyaque jidatu carequidya jutaqui, eje tsehuedya jutidya cajipeti ebijiseriu tibu.

¹⁰Tuequedya ri cacuatsashati aniya carequi cuanaja ishu. Riyaque cacuatsashati ri ecuique ama; Ecuanaja

Cuatsashaqui jaque riya. Huanequi cuanara, neijehueume micuanaja huane cuana. Ahuequi cuanara, neijehueume micuanaja ahue cuana. Epuna ahuequi-quetu yahuique tsehue cajacatitsu, caquemitinucataqui ama peya deca tsehue. Dyaque jidatu cajipetinucataqui tuja yahuique tsehue. Jadyatu jutaqui huanequique ahuequique ecatse Jesús queja ecatyatique.

¹²Tuequedya tuque cuejaya Jesús queja ecatyatique, peya bacue catyatima jadique eje bucha jutaquique. Riyaque micuana cuejaya ai Ecuanaja Cuatsashaquira cuita quisarati acuaque ama; tura ique adebamerehuaque micuana cuejaya. Umae micuana ecaquemiti epuna Jesús queja catyatima tsehue, micuana ecue eatsehuequi cuanaque. Arepa tuque Yusu adeba baecua paju ama bucha, tura ni mi jacacarama ebari aya, ijehueume. ¹³Tumbaedyahuae epuna cuana Jesús queja ecatyatique deca Yusu adeba baecua tsehue ecaquemiti. Arepa tuque Yusu adeba baecua paju ama bucha, tura jacacarama ebari ayaju, jacamedya.

¹⁴Umae deca cuanaja ni tu inime juya: “Ecue ehuanes Jesús queja catyatima tibu ni yatse Yusura enaruu ama, ni tura yatse jida tsehue ebau” jadya. Umae epuna cuanaja ni tu inime juya: “Ecue eahue Jesús queja catyatima tibu ni yatse Yusura enaruu ama ni jidaque etyau”. Jadya ama tuque. Mique Yusu jaque juya tibu, Yusrami naruya. Tyayadya turami jidaque, tuque adeba baecuaque, tumbaedyahuae mique tujaque. Jadique ama juatsu taa tujatu micuanaja bacua cuana enaruu ama; tuque adeba baecua cuanaja ebacua cuanaque ebau bucha tujatu ecana ebau. Jadya ama bucha tujatu ecana jidaque tyaya dutya tumeque etare juque, micuana tujaque juya tibu. ¹⁵Yusratu etareju cuanaque dutya tupu nimee anishacara aya. Jutaquiju epuna Yusuja ama yahuique Jesús queja ecatyatique jacacara ayaque juatsu, jacataquidya tuja tuque. Deca Yusuja ama ehuanee Jesús queja ecatyatique jacacara ayaque juatsu, jacataquidya tuja tuque. Micuana Yusuja cuanara tuque micuanaja casada tsehue iyataqui ama. Eiyau ni micuanara, tume micuana pureama tsehue ama dutya tupu inime tsehue ama eaniu.

¹⁶Nequijehuetiume ecaquemiti, Jesús queja ecatyati cuanaque. Micuana nequijehuetiume, epuna Yusuja cuanaque. Quijehuetima juatsu tuque micuana micuanaja ahue cuana dyaque Jesús queja catyati ishu etsahuau. Micuana nequijehuetiume, deca Yusuja cuanaque. Quijehuetima juatsu tuque micuana micuanaja huane cuana Jesús queja catyati ishu dyaque etsahuau.

Yusura eje bucha casa tyahua eque anitaquique

¹⁷“Jesús queja ique catyatihua tibu, dutya era ai ayaque, eje bucha meree juyaque dutyadya tuque ecue cuaretaqui”, jadyatu umaera inime tupuya, cuji cuita juatsu. A, jadya ama tuque. Eje bucha meree juyaju ni mi Yusura tuja ishu ihuarahua, tumbaedyahuae mereedya jutidya nejudue. Ecuanaja Cuatsashaquira tuja cuanaque casa tyahua equedya neanicue. Jadya tuque

amereya dutya quejaque Jesús queja ecatyati cuanaque. ¹⁸ Jesús queja catyatima jariju ecuita huitu biti tubutanahua cuanaque yudijidya ecuita huitu biti etubuque casipitimerenucacara nejuume. Jesús queja catyatimaju ecuita huitu biti catubutima juhua cuanaque tuna catyatitsu catubumeretitaqui ama. ¹⁹ Ecuita huitu biti catubumereti tu dyaque inime metseque juishuque ama, catubumeretimaque tumbaedy, Yusura cuatsashaya equedya juatsuque camadya. ²⁰ “Yusura tuja ishuhuarahua tibu, ique eje bucha meree, juyaque cacuaretitaqui”, jadya inime netupume. Tume cuanaque tuque micuanaja eje bucha cuaretaqui ama, amena Yusu jaque cabatitsu. ²¹ Yusura tuja ishuhuarahua jamaeja micuanaja micuana metseque anicuare. Jadique jidama inime ishunebaume. Nemerecue micuana metse cuanaque. Jadya ama bucha, micuana metsera ni micuana inajacacara aya, cuinanataquidyatu tuaquejaque, peyaja ishuhuarahua mere juatsu chipiru ina ishuhuarahua. ²² Metseque cuanaque tuna tuna eje bucha jucara juya eque jutaqui ama, tuna metsera cuatsashaya eque. Mere puji cuana Ecuana Cuatsashaqui queja catyatihuaju, tura tuna tuque pureamaturaque amereya. Yusura tuna metsema bucha baya. Mere puji cuana metsema cuanaque bacue ecana eje bucha tuna jucara juya eque juya. Ecuana Cuatsashaqui queja catyatitsu tuna amena tuna eje bucha jucara juya eque jujacaya, tura amereya eque camadya. Yusura tuna Cristo merequique baya. ²³ Tujaque juishu micuana Yusura quemihua. Jadya tibudya micuana tuja biji eque anitaqui, ai riyaque yahuajuja biji eque ama. ²⁴ Yusura micuana tujaque juishu ihuarahua, peadya peadyaja tuque micuanaja anihua mere, ecue eatsehuequi cuanaque. Tumeque meredyanejuque. Yusu tu micuana tsehuedya micuana tsahua ishuhuarahua.

Pablora eahuemaju cuanaque, carequi juma cuanaque jadya eje bucha jutaquique cuejacuareque

²⁵ Icuene micuanara ecue quirica cuadishachine patya micuanara bacadurachine: “¿Eje bucha tuque ecua ecuejau carema cuanaque?” jadya. Ecuana Cuatsashaqui cuejaha ama cacuatsashati micuanara bacadurayaque cueja ishuhuarahua. Era jida adebayaque micuana cuejaya. Ecuana Cuatsashaquique eatsehue dyaque jida juhua; turadya ique mepehua tuque mere ishuhuarahua. Jadya tibudyatu era cuejayaque ejenetaqui. Nebacacue era cuejayaque. ²⁶ Iyacua ecua Jesús queja catyatima cuanara nerecaturaya; eje buchadya jucara jadya tunara ecua amereya. Jadya tibudya era jida adebaya carequi juma cuanaque carema siri anishuhuarahua. ²⁷ Jadya ama bucha “Nequijehueti micuanaja huane tsehue”, jadya tuque cuejaya amena carequi cuanaque. “Carequi nejuume”, jadya tuque aya carema jari cuanaque. ²⁸ Huanema cuanaque ni huanequi juya, jucha ama tume, tumbaedy ahuema cuanaque ahuequi juishuhuarahua. Jadyaratu Yusu cahuaitishaya ama ni riyapiji buchique. Jadya ama buchatu caquemitiya cuanara dyaque inime tsapeya earaqui, jutu ishuhuarahua.

naque, tuja ehuanquera, ebaqua cuanaquera jadya sareya cuanaque dadi ishuhuarahua. Dyaque jidama inimeju micuana nubibuque. Era datse micuana riyaque yahuajuque jiteque inime tsape amerecarama aya ni jidama inimeju ishuhuarahua.

²⁹ Riyaque micuana cuejacara aya, micuana ecue eatsehuequi cuanaque. Riyaque yahuaju ishuhuarahua masadama tereya. Masadamadya cuanatu Cristo eju nanucau. Jadya tibudya carequi juatsu dyaque cuita inime netsapeume micuanaja etareju cuanaja ishuhuarahua; Yusu nemerecue. ³⁰ Dyaque cuita inime tupuqui neaume riyaque yahuajuque. Peya inime juya cuanara tuna peya inime amerequique camadya inime tupuqui paa ama. Jida pureama tsehue aniya cuanara chine cuana cuita camadya inime tupuqui paa ama. Ai quemijuya cuanara tuna caquemitiyaque cuita camadya inime tupuqui paa ama. ³¹ Riyaque yahuajuque ai dyaque tsumequi juya cuanara tumeque camadya inime tupuqui paa ama.

³² Eje buchadya riyaque yahuajuque cuita camadya inime tupuqui amerecarama datse micuana aya. Deca caquemitiyaque Jesús queja ecatyatiratu Ecuana Cuatsashaquique mere ishuhuarahua camadya inime tupuqui aya. Jesús cuita camadya tujatu pureamaturacacara aya. ³³ Deca ecaquemitiyaque Jesús queja ecatyatiratu inime tsapequi aya, ehuanquera, ebaqua cuanaquera ai sareyaque dadi ishuhuarahua, tuna naru ishuhuarahua. Pureamaturacacara tujatu ehuanquera aya. ³⁴ Jadya tupue tujatu inime bape bape aya. Ecuana Cuatsashaquique tuna pureamaturacacara aya, tumbaedy ehuanquera. Tumbaedyatu epuna ecaquemitiyaque Jesús queja ecatyatira inime tsapequi aya, tuja yahuique mere, ebaqua cuanaque mere, tuja etareju ai ataquianiyaque jadya. Yahuique cuita camadya tujatu pureamaturacacara aya. Epuna caquemitiyaque Jesús queja ecatyatira bacue Jesús dyaque inime tupuqui aya. Tujatu aniya emajaca tuque mere ishuhuarahua.

³⁵ Jadya micuana cuejaha, micuana tsahuacacara aya tibu, micuanaja ai ataquima ibeda jadya amere ishuhuarahua ama. Dyaque jida tuyu datse micuana amerecarama aya. Yusu inime eque cuita micuana amerecarama aya. Ecuana Cuatsashaquique cuita camadya micuana inime tupumerecarama aya, ai peya cuanaju ama.

³⁶ Tuequedya tuque hueneya deca, epuna jadya carequi juma jari cuanaja ishuhuarahua, caquemitiyaque ishuhuarahua amena equisaratia cuanaja ishuhuarahua. Umae ecuitaratu inime tupuya: “Carequi ni yatse juya ama, tume taa tuque pureamaturaya ama eatsehue caquemiticara juyaque. Amena tuque dyaque cuita bijiseriya epuna jipe ishuhuarahua. Dyaque jida yatse carequi jutaquidya”, jadyatu umaera inime tupuya. Jadya inime tupuya cuanajatu ataquidya tunara eje bucha inime tupuyaque. Carequidya ecatsapaju. Carequi juatsu tunajatu Yusu cahuaitishaya amadya. ³⁷ Peya cuanara bacue inime tupuya: “Eratu tuyudya adebaya yatse carequi juishuhuarahua ama”. Jadya cuanajatu tunaja tacaquedya jutidya inime caquemiticaramaque. Jadya cuanaratu bijitsuruya ama cajipeti ishuhuarahua. Jutaquique jadique ecuita cuanatu carequi ju-

taqui amadya tura quemicara ahua tsehue. ³⁸ Caquemiticara juhua tsehue carequi juyaratu jida aya. Carequi juyara amatu dyaque jida aya.

³⁹ Tuequedya micuana cuejanucaya eahuemaju cuanaque eje bucha jutaquique. Yahuique chacha jarijutu epunaja jacataqui ama tuja yahuique. Jida ama tu decajaca ishuh. Yahuique tuja emajuque juatsu, jidadya tu peya tsehue tura bijida baya tsehue carequi juishu. Ecuana Cuatsashaqui queja ecatyati tsehue camadyatu carequi jutaqui. ⁴⁰ Jadya ama bucha ahue majutsu carequi junucayaque ama juatsu tu dyaque jidadya. Riyaquetu era jida baya. Ecuana Cuatsashaquiija Espiritu tu eatsehue; jadya tibudya era cuejayaque pana baca neacue.

Pablora ecana ai cueya cueya cuanaja yacuaju eiyaque erami ara ishuhue cuejacuareque

8 Quirica cuadishaya patya micuanara bacadura-chine: “¿Jidadya tu cueya cueya cuanaja yacuaju iyahuaque erami ara ishuh?” jadya. Yuneridya tuque ecuana dutyara jujeri adebaya jida eje bucha atae jida tuyuque ataquique. Jadya ama bucha dyaque inime metseque bucha necabatira ama. Iyuhueda tsehue dutya necabatira. Peya cuana tsehue iyuhueda cabatitsu ecuana ecatsahuatiu Yusuja biji eque aniaje ishuh. ² Ni ejera buchiquetu pana adeba aya ama Yusuja eje buchique dutya bijidaque. Jutaquiju ecuana cuji eju: “Ecuonaratu pana adeba aya Yusuja bijidaque”, jadya juyaque. ³ Tuque dyaque iyuhueda baqui cuanaquetu Yusura aya: “Riya cuanaque ri ecue cuanaque. Adebaya rena era”.

⁴ Jutaquiju iyacua micuana cuejaya yusupa ejuu jadya cuanaja yacuaju eiyaque erami eje bucha ataquique. Adebayadya ecuana peadya Yusu Neri camadya. Aijamatu peya yusu cuana. Arepa tunara cueya cueya eaquepa yusu jadya aya ama bucha, yuneri cuitadyatu aijama peya yusu ejuuque. ⁵ Umadara Yusu Neri adebaya ama cuanaratu jetiama yusu cuana aniya bucha adebaya. Tunajatu inime juya jetiama ecuana cuatsashaquique aniya bucha. Tunajatu inime juya tume cuanaque yusu cuana riyaque yahuaju, barepaju jadya aniya bucha. ⁶ Ecuana bacue bahue peadya Yusu camadya aniyaque. Tuque camadya tuque ecuanaja Eta-ta. Turatu iyahua dutya ai aniyaque. Ecuana ecuana aniya, tuque adeba, mere jadya aishu. Peadya camadyatu aniya Ecuana Cuatsashaquique; tuquetu Jesucristo. Tuque equedyatu dutya iyatanahua. Tuque eque ademedy a ecuana aniya.

⁷ Jesús queja umae ecatyati cuanaratu pana adeba ama jari aya peya yusu cuana aijamaque. Icuene tuna dyaque ecabahueneti juhua ai cueya cueya cuana mui, Yusu neri eata bucha. Jadya tibu tuna iyacua ai cueya cueya cuana cuatsaqui earaqui eiyaque aratsu tunaja inime juya: “Riyaque erami ri ai cueya cueya cuana ecuanara muijacahua cuatsaqui eiyaque. Aratsu taa ecuana yudijidya mui anucaya bucha ejuu”, jadya tunajatu inime tupuya. Adebanneriya ama tunajatu jidaque, jidamaque jadique. Casadama bucha jutidya

tuna cabatiya. Tunaja arataquimaque cuana arahua bucha cabatitsu, tuna cajuchatihua bucha cabatiya.

⁸ Neadebacue riyaque. Yusratu jidama ama inime baya ecuanara tumeque erami arayaju, jadya ama juatsu araya amaju. Cueya cueya cuana cuatsaqui eiyaque erami arahua amaju ecuana Yusura baya ama, tumeque erami araya ama cuanaque dyaque jida ama.

⁹ Bahuedya micuana tumeque erami aratsu ecuana Yusu cahuaitishayaque ama. Necanaruticue tume cuanaque aratsu. Peya cuana neyuamaturame, tunara arataqui ama bayaque aratsu. Necajuchatisaume Yusuja quisarati pana adeba aya ama jari cuanaque.

¹⁰ Bahuedya micuana yusupa ejuu jadya cuatsaqui cuanaja eiyaque erami arataquique. Jadya juatsu micuana nubiya ai cueya cueya cuana eaque aniyaju. Tuhua nubitsu tuque micuana araya tumeque erami yusupa ejuu jadya cuanaque cuatsaqui eiyaque.

Micuanara tumeque erami arayaju ni ecuetiu ejeque Jesús queja ecatyatique. Ebau tura micuana tumeque erami ara juyaju. Turatu eje bucha arataqui ama baya tumeque erami. Jadya ama buchatu micuanara araya baatsu tuja inime ejuu: “Era dyadi paaradya” jadya. Tuja ishuh tu eje bucha arataqui ama yusu neri ama cuana aniya jari bucha tujatu inime juya. ¹¹ Tura ni tumeque erami araya, ecajuchatitu cabatiya. Arayaque tuque micuana adebaya ama cajuchatiyaque. Jadya ama bucha micuana peya ecajuchati cabatishaya, tura mubayaque micuanara aramerehua tibu. Micuana tsehuequique tuque micuanaja. Cristotu majuhua tuque jiteque. Tuquetu amena jida tsehue ama aniya, tura micuana eje bucha juyaju bahua tibu. ¹² Tumeque ecuitara ni cajuchati baya erami ara, micuanara araya baatsudya jutidya ni tu araya, tumetu micuanaradya jutidya micuana tsehuequique yuamaturaya. Tuque yuamaturayaju, Cristora micuana jucha arida baya.

¹³ Jutaquiju tuque ecue cajuchatishataqui ama eatsehuequi cuanaque. Tunara ni cajuchati erami ara baya, jutaquiju tuque ecue arataqui amadya tuque, tuna ecajuchatishau tibu.

Arepa Pablo Cristoja ecuadishaque juhua ama buchatu tuja biji eque ama jucuaque

9 Ique Cristoja ecuadishaque. Jadya tibudyatu era eaudya era eje bucha jida bayaque. Jadya ama bucha ique eje bucha jucara juya eque tuque ecue eatsehuequi cuanaque ecajuchatishau. Jadique juatsu, paajaca era cuitadya eje buchique acara ayaque, ecue ecana cajuchatisha ishuh ama. Icuenu era bahua Ecuana Cuatsashaqui Jesús. Jadyajudyatu ejitaju ique tuja ecuadishaque. Era Jesúsja quisarati cuejahuaju, micuana tuaqueja catyatihua. Tume tuque micuanaja ani cuaretanahua. Jadyajutu ejitajudya ique Ecuana Cuatsashaquiija ique ecuadishaque. ² Umaeratu ejeneya ama ique Cristoja ecuadishaque. Micuanara bacue adebaya ique tuja ecuadishaque. Iyacua micuana aniya Cristoja biji eque, era Yusuja quisarati cuejahuahua tibu. Micuanaja ani cacuairetihua tibu, tuhuady-

atu ejitaju ique Cristora tuque cuarequi cuadishahuaque.

³ Peyara ecue ishu quisarati ayaju, ita tacadya ique catachitiya. "Ique Cristoja ecuadishaque", jadya tuna era quemitsaya. ⁴ Ique Yusuja quisarati cuejara jeyaju tyataquidya micuanaja ique tsujema ara ishuque, emajaca tahui ishuque jadya. ⁵ Peya cuana Cristoja ecuadisha cuanaque tuja quisarati cuejara cuayaque tunajatu ehuaque cuanaque duju bahue Jesús queja ecatyatique. Jadyatu juya Pedro, tumbaedy Ecuana Cuatsashaqui tsehuequi cuanaque. Ique ni huanequi ejuu, ecue ehuaque Jesús queja ecatyatique ejuu, eaquereniudya tuque era. ⁶ ¿Micuanajatu inime juya ique, Bernabé yatseja cuita camadya yatsera ai sareya cuanaque Yusu mereya tupu ai tyataqui ama bucha? ⁷ Sudaru cuanaratu inaya etsujequi. Yatseja ecuari mere juyaque tuna tsujema tyatanaya earaqui, eju-tuqui. Tee mere juya cuanaratu tunaja tee cuhuatiyaque araya, uhuayaque tsuje. Uhuisha naru juya cuanaja atsuna tisiyaque ijitaqui, naruya tsuje.

⁸ Jadya eque tu tuyudya ecua earaqui cuana, ai ecuanara sareya cuanaque jadya tyata ishu, Yusuja quisarati cuejaya tsuje. Jadyatu inime tupuya ecuitara jipidya ama; ehue tu Yusura Moisés cacuatsashati huenequareju. ⁹ "Trigo biti tacamereyaque micue juye huimumu risiume. Paara ara juye mere juya tibu", jadyatu Yusu juhua Moisés eque. Ecuana jadya cuejae ayaquetu Yusura juye camadya ama inime tupuqui ahua. ¹⁰ Turatu ecua inime tupuqui ayaquedya jadya ahua. Yusuja quisarati cueja juya cuanaque tuna tsujetyataquidya jadya juyaque tujatu jadya quisarati ahua. Riyaque yahuaju tuque ecua tee cuana uhuaya; tuhua uhuayaque aradadiyaque adebatsu ecua mere juya. ¹¹ Tee uhua juya cuanaratu uhuatsu ecaca juhuaju piisidya baya amena earaqui. Tumbaedy micuana ecuanara tsahuahua, Yusuja Espiritu eque micuana ani ishu. Jadya eque micuanaja ecua tsahuataqui ecuanara riyaque yahuaju ai sareya tsehue. ¹² Peya cuanara micuana Yusuja quisarati cuejahuaju tuque micuana tyahua tunara ai sareyaque. Tuyudya tu jadya. Dyaque tuyu tu micuanaja ecua ai ecuanara sareyaque tyashu, ecuanara micuana icuene cuita Jesús queja catyati ishu tsahuahua tibu.

Jadya ama bucha micuana ecuanara ni eje tupu buchique bacahua ama tsujema ai ecuanara sareya cuanaque, arepa micuanaja ecua tyataqui ama bucha. Ecuana ecua mere juhua ecuanara ai sareyaque cadaditi ishu. "Ecuana ni micuana ebaeu etsujequi, tume tuque micuana Cristoja quisarati bacacarama eau", jadya tuque ecuanaja inime juhua. Jadya tibudya micuana ecuanara bacaya ama ni ai. ¹³ Yusuja etareju mere juya cuanaque tuna araaraya ecuita cuanara Yusuja ishu beya cuana tsehue. Uu cuana pahuama jarijudyatu pae cuanara riya piji tuhuaque eramidya inaya. Micuanaratu adebayadya riyaque. ¹⁴ Jadyatu Ecuana Cuatsashaquia cuatsashahua: "Ecue quisarati cueja juya cuanajatu

inataquidya etsujequi, ai tunara sareya cuanaque cadaditi ishu", jadyatu Cristora cuatsashacuare.

¹⁵ Arepa ique Yusuja quisarati cueja juya tupu micuana queja casada tsehue ai era sareya cuanaque ecatyamereti ama bucha, era micuana bacahua ama ni ai buchique. Riyaque quirica cuadishayaque micuana bacaya ama ni ai. Eratu Yusu mereya pureama tsehue micuana casada tsehue bacamaque. Areque emajuu jutidya ique, micuana queja casada tsehue chipiru yanacana catyamereti jumaquedya. ¹⁶ Eratu Cristoja quisarati cuejaya, peya cuanaja ecue ishu jida inime tupu ishu ama. Ecue cuejatu juya tibu tuque cuejaya, Cristora cuatsashahua tibu. [Nerecapane ique, era Cristoja quisarati cuejayaque ama juatsu! ¹⁷ Ita taca ni ique riyaque mere catyatiquna juhua, tume taa tu tuyudya ecue etsujequi inataqui ejuu, quisarati cuejaya tsuje. Yusura ique mepehua, peya cuana Cristoja quisarati cueja ishu. Tumeque mere aatsutu era aya tura amerehuaque. Ecue aishuque tibu tuque ayadya. ¹⁸ Ique jadya tibu, ¿ai etsujequi jatsu tuque inaya? Cristoja quisarati cueja juyaque tuna tsuje bacaya ama ique quisaratiyaju bacaqui cuanaque, arepa eca tuuyudya tsuje bacataqui ama bucha. Ique pureama juya jadya juyaque. Ique pureama cabatiyaque tu ecue etsujequi buchique.

¹⁹ Ni ejeque ecuitara ama ique casada tsehue peya cuana cuejamerehua Cristoja quisarati. Ecue inime taca eque tuque aya, dutyaja jida ishu. Jesucristo queja eca eje uma catyati ishu tuque jadya aya. ²⁰ Israelita cuana Cristoja quisarati cueja juyaque ique tunaja bahue eque juya, tunaja era quisarati cuejayaque bacacara aishu. Ique casada tsehue ama eamere, jadya ama bucha, Moisésra cuatsashahua eque aniya, tunaja bahue eque. Tuna tsehueju ique jadya juya, tuna Jesús queja catyatisha ishu. ²¹ Tumbaedy nucadya juya. Israelita ama cuanaque Cristoja quisarati cueja juyaque tunaja bahue equedya ique juya. Tuna Moisésra cuatsashahua eque ama aniya tibu, ique tumbaedy juya, tuna Jesús queja catyati ishu tsahua ishu. Arepa ique tuna tsehueju Moisésra cuatsashahua eque ama juya ama bucha, jujacaya amadya ique Yusuja biji eque. Cristora cuatsashahua eque ique juya. ²² Yusuja biji eque juishuque pana adeba aya ama jari cuana tsehueju amereya ama tuna tunara cajuchati adebayaque jari. Jadya ique juya, tuna tunaja Yusuja biji eque ani pana adeba amere ishu. Jadya eque ique eje tsehueju tuna juya equedya ique juya, eje bucha equedya tuna Jesús queja catyatisha ishu.

²³ Jadya ique juya, riyaque yahuaju cuanaque cueja ishu, Jesús queja catyatiyaju Yusura eca Ijahua quejaque inajacamere ishu. Yusuja quisarati jidaque cuejayaque tu era cuejaya cuanaja camadya jida ishu ama, ecue ishu tumbaedy. ²⁴ Arepa umada tsajajayaque aniya ama bucha, icuene junati ishu cacasatiyara cuita camadyatu inaya etsujequi tyatayaque. Micuana necasaticue Yusuja biji eque ani ishu, Yusura tuja cuanaque jidaque tyayaque micuanaja dyadi ina ishu. ²⁵ Peya cuana tsehue cabareti ishu ijahue juishu

cabahuityatiya cuanaratu ijehueya dutya tuque perequi ejuu cuanaque. Jadya tuna juya, ejaqui epicaque masadama manunuyaque tyata ishu. Ecuana bacue dutya huecaca cacasatiya Cristoja biji eque ani ishu. Ejeque huecaca ecuana tuaqueja judirubuque ni eje tupu tuque jaca ishu ama. Tura ecuana jidaque tyayaque tu tere ishuque ama. ²⁶ Tsajajayaquetu tuyu eje tupu tuque tsajajaya tupu icuene juti ishu cacasatiya. Tuyu ama ni tsajajaya, tumetu yanacanadya tsajajahua. Ebi tsehue catiyaratu tuatsehue catiyaque jida ebi tyaya ijehuebutya ishu. Jida ama ni tu ebi tsehue aya, icuayaya jutidya ni tura, tumetu yanacanadya catiya. Ique tumbaedy a cacasatiya Jesúsja biji eque ani ishu, Yusu yanacana meree eau tibu. ²⁷ Jutaqui ique pacacasati Yusura cuatsashaya eque ani ishu. Pa-jaca dutya ique cajuchatishaquique. Pabijiserijaca era peya huecaca jidama juishuque bijiseri bahueque. Tsahuahua tuque amena eje uma ecuita Jesús queja catyati, tuna Yusu queja judiru ishu. Era cuitadya uma eje bucha anie juishuque cuejahua ama bucha, bisutapanane ique juma, Jesúsra “Miquemi ecue biji ama anihua”, jadya ahuaaju.

Yusu neri camadya ecuanaja muitaquique

10 Neadebacue ecuanaja baba cuana Moisésra dujucuaré patya jucuaréque, ecue eatsehuequi cuanaque. Dutya ecuita Egipto juque cuinanacuare cuanaque tuna Yusura huidujucuaré tsecada anitaya cuana eque etiqui huani bucha eque. Dutyara tunajatu Bei Pudedaque riquécuare ediji urada eque. ² Etiqui huani bae eque cahuidujumeretitsu, Bei Pudeda eque carequetitsu tuna Moisésra cuatsashaya eque jucuaré, ecuana cutsameretitsu Cristora cuatsashaya eque juya bucha. ³ Dutyara tunajatu aracuare Yusura barepa juque cuadishayaque. Tumeque earaquitu maná bacani jucuaré. ⁴ Dutyara tunajatu ijicuaré Yusura tyayaque. Turadyatu tumu ebari juque ena cuinanashacuare. Cristotu tuhua jucuaré, tuna ijira emajuju. ⁵ Arepa Yusu tuna tsehue dyaque jida ama bucha, dutya jujeri tuna tura cuatsashaya eque ama jucuaré. Tuna tsehue dyaque ecahuaiti juya tibu tujatu ecaná majushahua. Anitaya ama cuana eque diruyaque tuna dutya jujeri majuhua.

⁶ Tuna jadya juhuaque bahue juatsu tuque ecuana adebaya, iyacua Yusuja yana equedya ama juya cuanaque, tuna juhua baedy ejuuque. Bijiseritaqui ama tuque ecuanaja tunara jidamaque bijiserihuaque. ⁷ Muitaqui ama tuque ecuanaja ai cueya cueya ea cuanaque. Umae israelita cuanatu Yusu Neri muijacatsu ai cueya cueya cuana catihua tumeque muiyaque chine juishu. Jadya juhuaque tu Yusuja quisarati ehue: “Cueya cueya eaja yacuaju tuna anibutehua, araara ijiji jadya juishu. Araara amena juatsu tuna ijahue catibutihua. Jadya tuna chine jubahue jucuaré cueya cueya cuana muiyaque”. ⁸ Ejeque ecuanaja caquemiti-queremaque tuque ecuana jaraqueretaqui ama, israelita cuana juhua bucha. Umae tuna anihua peyaja ehuanéque tsehue, peyaja yahuique tsehue jadya.

Jadya juatsu tunajatu Yusu cahuaishahua. Peadya huecacaju tuna Yusura jetiama majushahua. Beta tunca quimisha earacana mil tuna majucuaré tumeque huecaca. ⁹ “Ecuana Cuatsashaquique yume cahuaite ecuana tsehue juya ama tibu, nejuradya eje buchique jidama ecuanara acara ayaque, tura ecuana nerecatu- rayá ama tibu”, jadya tuque ecuanaja inime tuputaqui ama. Israelita cuanara jadya inime tupuhuaaju Yusu cahuaishahua tuna tsehue. Jadya cahuaite juatsu tujatu cuadishahua bacua cuana dyaque ujeda cuanaque, tuque ijacabaca baecua cuanaque carubare ishu. Jetiama tuna majuhua tume cuanara abarehuaju. ¹⁰ “Yusu- tu jidama”, jadya quisarati neaume, ni riya piji buchique. Umae israelita cuanatu Yusuja ishu béru quisaratihua. Tuna jadya juhuaaju Yusura barepa juque tuque tsahuahuquique cuadishacuare tuna iye ishu.

¹¹ Jadyatu jucuaré ecuanaja baba cuana, ecuana iyacua jadya tuna jucuaré jadya juishu, ecuana ecuanaja baba cuana juhua bae juishu ama. Ehuene tu ecuana adebamere ishu, Yusura cuatsashayaque ama aatsu ecuana dyadi jadya ejuuju. Yahuatu masadama terebuque. Jadya tibudya ecuana ecuanaja baba cuana anihua bae anitaqui ama.

¹² Jutaqui tuque ecuanaja inime tuputaqui ama: “Ecuonaratu Yusu cahuaishahua ama. Aijamatu peya ecuana bucha dyaque tuyuque”, jadya ecuana ecuana tacadya jutidya casumititaqui ama. Jadya inime etupu- uque, tuque ecuanaja inime tuputaqui: “Tsahuacue ecuana, ecuanara mique ecahuaitishaju, Yusu”. ¹³ Eje bucha juatsu tuque ecuana cajuchati bijiseriya. Ecuana camadya ama, dutya ecuitajadyatu cajuchaticaraque inime juetiya. Jadya ama bucha ecuana Yusura naru ana ahua ecuana ecajuchatiuju. Turatu ama amadya aya tura aana ayaque. Cajuchaticaraque inime juetihuaaju ecuana Yusura casa tyaya cajuchati ishu ama. Jadya apushae tuque ecuana aya cajuchaticaraque.

¹⁴ Jadya tibudya rique micuanaja huenehua riyaque, micuana ecue eatsehuequi cuanaque. Ni riya piji buchique tuque micuanaja muitaqui ama ai cueya cueya cuana. ¹⁵ Micuana micuana inimequi. Ita taa era hueneyaque adeba ishu neadebacue, eje yuneriuque jadique. Cuejayaju bacatsu micuana bahue jubuque yuneridya era hueneyaque jadique. ¹⁶ Cristo ecuana jiteque majuhuaque adeba ishu, tuque ecuanaja iji bahue uva nacaca, pan jadya tuque ecuanaja ara bahue. Ijima jarira “Yusurupai, mique ecuana jiteque majuhua tibu, Jesús”, jadya tuque ecuanaja abahue. Cristo ecuana jiteque curusuju ami quijehuetihuaque tuque ecuana adebaya. Pan cuesi catyatibare, ara jadya juyaque tuque ecuana adebaya Cristo ecuana jiteque curusuju majuhuaque. Jadya adebataquie ecuana juya tujaque ecuana jadique, tuaqueja ecuana catyatihuaque. ¹⁷ Peadya pan ecuesishahuaque dutyaradya tuque ecuana araya. Jadya eque ecuana, arepa jetiama ama bucha Yusura baya peadya camadya bucha, peadya Einajacamerequi queja ca-

madya ecuana catyatihua tibu. Jadya ishü tuque ecuana araya pan ecuecishishaque.

¹⁸ Israelita cuana jucuareque neadebacue. Tunajatu ara bahue jucuare ejaque Yusuja ishü mesaju eiyaque. Jadya tuna jucuare tuna Yusu jaque jadique caadebati ishü. Jadya müie tunajatu Yusu acuare, mesaju erami aratsu. ¹⁹ Jadya quisarati ayaque tuque aya ama "Cueya cueya cuana tu Yusu Neri" jadya. "Eramitu cueya cueya yusu neri cuana cuatsaqui iyataqui", jadya ama micuana aya. Ni riya piji buchique jadya ama tuque. ²⁰ Micuana era bahuityacara ayaque tu riyaque. Yusu adeba baecua cuanara ai cueya cueya cuanaja yacuaju erami iyahuaque tunajatu ijahua cuana tyaya, yusu neri cuana ama. "Satanás ijahua cuana cuatsashaqui jaque ecuana", jadya juyaque tuna jadya juya. Ni riya piji buchique micuana era tuna ijahua cuana müi ishü chine juyaju amerecarama aya. ²¹ Eje bucha jue ni ecuana juma Ecuana Cuatsashaqui jaque jadya ama bucha ijahua cuana jaque jadya. Araara, ijijij jadya ni ecuana ejuu tuna ijahua cuana müi juyaque chine jutayaju, jadya juya ama bucha ecuana araara ijijij jadya ejunucäu Ecuana Cuatsashaqui majuhuaque adebayaque, jadya juyaque tuque ecuana muicara aya ijahua cuana, Jesús jadya. Eje bucha jadya jutaqui ama tuque! Jadya juyaque ecuana ecuana tacadya jutidya cayuamatiya; Jesús queja nimee cuita camadya jujacaya. ²² Ecuana Cuatsashaquique ni ecuana müijacaya, ijahua cuana müi ishü, tüme tuque ecuana cahuaitishaya Jesús ecuana tsehue. ¿Cahuaitishacara ni taa tuque ecuana Yusu aya? ¿Tuque bucha dyaque casada ni taa ecuana?

Peya tsahua ishüque ataquique

²³ "Cristo jaque tibu, tuque ecuanaja ataquique eje buchiquedya jutidya", jadyatu umae juya, cuji ebari cuita juatsu. "Jadya ama bucha dutya ama tu jida ecuanaja ishü", jadya tuque quemitsaya. "Ataquidya tuque ecuanaja ecuanara acara ayaque", jadya tuna juya. "Jadya ama buchatu aniya ecuana Yusuja biji eque ama aniaje ishüque pana adeba eaajeuque. Neara ama tüme cuanaque, arepa ataquique ama paju ama bucha", jadya tuque quemitsaya. ²⁴ Ecuana peadya peadyara ecuanaja ishü cuita camadya inime netupura ama. Peyaja jida ishüque netupunucaradya.

²⁵ Icuene cuita micuana cuejaya erami mercado juque catyati eaque arataquique. Arepa jetiama erami cueya cueya cuanaja yacuaju catyati ishüque mercadoju eiya ama bucha, tuhuaque erami quemitsu, inime tupuqui neaume ejuque jadique. Quemitsu nearacuedya. "¿Müi ishüque cueya cueya cuanaja yacuaju eiyaque riya, aama ni taa?" jadya bacadurataqui ama tuna. ²⁶ "Ecuana Cuatsashaqui jaquedya tu dutya yahua, dutya tuhua ai aniyaque". Turadyatu iyahua dutya earaqui ecuanaja jida ishü.

²⁷ Jesús queja catyatimara ni micuana tuja etareju araara ishü cuejaya, cuacara juatsu, necuacue. Nearaticue tura araquereyaque. Bape inime tupuma nearacue. "¿Riyaque erami ri cueya cueya cuanaja

yacuaju eiyaque, aijama ni taa?" jadya nebacaduraume micuana mihuaquique.

²⁸ Ejeque cuana ni tuhua ejuu Jesúsja quisarati pana adeba ama ayaque, arepa tuque Jesús queja ecatyati ama bucha. Tura ni micuana aya: "Riyaque erami ri cueya cueya cuana etyaque", tura jadya ayaque juatsu, nearaume. Nearaume ai micuana cuita baecua juatsu ama, peya jidama inime etupumereju jutidya. Micuana micuana bahuedya aratsu eje bucha juyaque; peyaja bacue inime eje bucha ejuu bucha. Micuanara araya baatsu tujatu earaudya. Tura ni araya, tümetu ecajuchati cabatiya. Jutaquiju nearaume, tuque ecajuchatiuju tsahua ishü.

Arepa eradya arataqui adebaya ama bucha, paara amadya era, era aratsu peya ecajuchatishau tibu. ³⁰ Eratu Yusu ahua: "Yusurupai mira ique riyaque erami tyahua tibu", jadya ama bucha, peya cuana ni jidama quisaratiya ecuanara arahua baatsu, jutaquiju nearajacara, tuna, ecuanara Yusu yusurupai ahuaque arahua baatsu, jidama equisarati tibu.

³¹ Yusu emuita paju micuana eje bucha anie juya eque. Nemuicue Yusu, micuanara araya, ijijia eque, dutya micuana eje bucha juya cuana eque. ³² Jida Yusuja biji eque neanicue dutyara bayaju. Jadya anie nejuque ejeque ecuita, israelita cuana, israelita ama cuanaque Jesús queja catyatisha ishü. Jadya anie nejuque, Yusuja cuanaque Yusu pureamaturayaque aniaje ishü. Jadya tsehue tuque micuana cahuaitishaya ama ni ejeque. ³³ Ique aniya bae neanicue. Dutya ique eje bucha juya eque tuque dutyaja ishü jidaque acara aya. Ecue jida ishüque peadya camadya ama tuque inime tupuqui aya, peya cuanaja ishü tümebaedya. Jadya anie juya, peya cuana Jesús queja catyatisha ishü.

11 Ique Cristo anihua bucha anie jucara juhua; jadya tibu ique aniya bucha anie jucara nejuque.

Epuna ahuequique yahuiquera cuatsashaya eque juishuque

² Eje bucha anie jida juishuque adebataquima baatsu, micuanara ique bacadurajacaya ama, ecue micuana cueja ishü. Eje bucha anie juishuque era micuana cuejaya eque micuana anijacaya ama. Jadique tu dyaque jida. ³ Jadya ama bucha aniyatu era micuana huecashacara ayaque. Epunatu yahuiquera cuatsashaya eque jutaqui. Tümebaedyatu dutya deca cuana Cristora cuatsashaya eque jutaqui, Cristo Etataque Yusura cuatsashaya eque juhua bucha. ⁴ Deca cuana dutyaja yacuaju Yusu tsehue quisaratiyaque, tuna Yusuja quisarati cueja juyaque, jututaqui ama tunajatu iyucaju ni ai. Tunara ni iyucaju ai jutuya dutyaja yacuaju Yusu müi juyaque, tüme tunajatu Cristo müiya ama. ⁵ Epuna cuana camadyatu iyuca caramatitaqui casitatiya cuanaju. Tuna dutyaja yacuaju Yusu tsehue quisaratiyaque, Yusuja quisarati peya cuana cueja juyaquetu epuna cuana iyuca caramatitaqui. Jadya juyaque tuna ejitaju juya amena tuna yahuiqueja cuatsasha ishüque. Tuna ni iyuca caramatiya ama Yusu müi juya tupu, tüme tunajatu yahuique müibaya ama.

Tuna iyuca caramatiyaque ama juatsu tuna epuna cuana bisutadaque eshu eatillaque juneniyaque bucha juya. ⁶ Umae epunara ni inime tupuya: "Peya cuana tsehue Yusu mui ishu casitatiyaque ique iyuca caramatiya ama", jutaqui ju tumeque epuna pana catubuti paju etsaru, jadya ama juatsu pana cajeretillati paju iyuca juque etsaru. Bisutada ni tu adebaya eshu pupi catimere ishu, inime ni tuja juya; "Eshu pupi caatilameretiya ama", jutaqui ju iyuca pacaramati Yusu mui ishu peya cuana tsehue casitatiyaque. ⁷ Yusura icueneque deca iyatsu tujatu ahua dutya eiya cuanaja huaraji juishu. Yusu Dutya Cuatsashaquique juya tibu, jadidyatu yahua deca cuana peya cuana naru ishu, tura cuatsashaya eque juishu. Jadya tibudyatu dutyaja yacuaju Yusu muiyaque, deca cuana iyuca caramatitaqui ama. Icueneque epuna iyatsu tujatu yahuiquera cuatsashaya eque amerehua. Jadya tibudyatu dutyaja yacuaju Yusu mui juyaque, epuna cuana iyuca caramatitaqui. ⁸ Decatu Yusura icuene yahua; tuequedya tujatu icueneque epuna yahua deca iyametse ahua jida ishu. Adán iyametseque deca ejitaju ayaquetu Yusura epunaja tsehue ama cueyanehua. Eva iyametseque epuna iyayaquetu Yusura deca juque quemihua epuna cueyane ishu. ¹⁰ Jadya tibudyatu Jesús queja ecatyati cuanaque tuque mui ishu casitiatyaju epuna cuana iyuca caramatitaqui, barepaju Yusu tsahuaqui cuanara ecuana petaya tibu. Epuna cuanatu iyuca caramatitaqui, tuna yahue cuanaquera cuatsashaya eque juyaque cabamereti ishu. ¹¹ Jadya ama buchatu Ecuana Cuatsashaquira deca, epuna jadya yahua catsahuati ishu. ¹² Yahua iyatanahua equequetu epuna iyametseque deca iyametse eque cueyanetanahua. Jadya equetu tuequequedya deca cuana epuna eque ejitaju juetibeya. Yusu tu Dutya Iyaquique.

¹³ ¿Eje bucha micuana inime tupuya jadyaju? ¿Tuyudya ni taa tu epuna cuana dutyaja yacuaju Yusu muiyaque iyuca caramatima juishu? ¡Ajama! ¡Jadya ama tuque! ¹⁴ Ecuana cuitadyatu adebaya deca cuana tsaru baruda jutaquique ama. Bisutada tu deca cuana tsaru baruda juishu, epunadya cabaticara ecana juya tibu. ¹⁵ Epuna cuana tuque ecuana tsaru barudaju, jida piji baya. Epuna ni tsaru baruda, tumetu iyuca ecaramati buchadya. ¹⁶ Umae cuanaja ni tu inime juya jadidya tuque jadya ama. Umaeja ni tuque micuanaja inime juya epuna cuanatu dutyaja yacuaju Yusu mui juyaque iyuca caramatitaqui ama jadya. Era micuana cuejaya jadya: "Caramatitaquidya tuna iyuca; riyaque tu tuyu". Tumebaedyatu dutya queja aniya cuanaque tuequedya jubahue Yusuja quisarati cuejayaque baca ishu casitati bahue cuanaque.

Corintoju cuanaque Jesús majuhuaque adeba ishu casitatitsu jidamaque chine bucha jutidya jucuaque

¹⁷ Iyacu micuana cuejaya Yusu mui ishu casitatitsu micuana eje bucha jutaquique. Yusu pureama aishu ecasitatita bucha ama micuana juya. Casitatitsu, Jesús queja catyatiaje ishu peya cuana tsehue dyaque catsahuatijetaquique, micuana peya cuana tsehue ca-

juchatiajeyadya jutidya. ¹⁸ Corintoju cuanaque patu Yusu mui ishu casitatitsu cati cati jutidya jubareya. Cajaquetibareya patuna. Yunerique quisaratidya ni tuque bacaya. ¹⁹ Micuanaja ni tu inime juya: "Jidadya tu ecuana cajaquetibare ishu. Jadya cajaquetibareyadyatu adebataqui ejeque ecuana Yusuja biji eque aniyaque, ejeque Yusuja biji eque ama aniyaque jadique", jadya ni tuque micuana cuji cuita juatsu inime tupuya. Yusu-jatu jadique bijidama peya cuare tuja cuanaque, tuja cuanaque cuare nucadya dyaque inimequi bucha cabati ishu. ²⁰ Casitatitsu micuana, "Araara ecuana Ecuana Cuatsashaquique majuhuaque adeba ishu", jadya datse micuana jubahue. Jadya inime tsehue ama micuana casitatiya araara ishu cuita camadya. ²¹ Ai aniyaque dutya tuhua cuana tsehue dutya tupu ecajaquetibareuque, araara ishu micuana cajaquetibareya. Micuana cabetihuaque cama micuana arabareya. Umae bacue arama juya, aijama tunaja ai cadujuti ishuque juya tibu. Umae jequeya tupu araara, ni juqui juya tupu ijijiyi jadya juyaju. Dutyaja tupu ama tuque micuanaja dutya ai aniya. ²² Tuyu ama cuita micuana juya. Aracara juatsu, nearaacue, neijijicue icuene micuanaja etareju. Micuana jadya araarae juya cuanaque tuyu ama micuana. Jadya juyaque tuque micuana bijidamaduraya uma cuana Yusu mui ishu casitatiya cuanaque. Bisuturaya tuque micuana nrecada aima cuanaque. Ecue inime equetu era dyaque jidama baya micuana casitatiya cuanaque jadya juyaque. "Dyaque jida micuana juya", jadya micuana ataqui ama baya, "Ecajuchati micuana" jadya camadya micuana ecue ataqui.

Jesúsra ecuana tuque majuhuaque adeba ishu cuatsashahuaque

(Mt 26.26-29; Mr 14.22-25; Lc 22.19-20)

²³ Ecuana Cuatsashaquira cuitadyatu quisarati yahua eje bucha adebae ecuana tuque majuhuaque ataquique. Tura cuitadya bahue amerehua, era micuana icuene cuejachineque tuque majuhuaque adeba ishuque. Tumeque chineju, Jesús tuque ujeu baqui cuana queja inameretana jarijutu tuque tura mepecuare cuana tsehue ecasitati jucuaque. Tumeque meta araaraque tujatu pan inacuaque. ²⁴ Pan inatsu tujatu "Yusurupai mique aya, Tata", jadya acuare. Yusurupai jadya aatsu tujatu pan cuesicuaque. Cuesitsu tujatu acuare tuatsehue anibareya cuanaque: "Riyaque rique ecue ecuita, micuana jiteque maju ishu catyatiyaque. Micuana jadya araarae juyaque, neadebacue ique micuana jiteque majuhuaque", jadya patujatu ecana acuare. ²⁵ Araara amena juatsutu Jesúsra canecu juque uva nacaca esasanashaque inanucuaque. Canecu inatsu tujatu ecana acuare: "Riyaque rique ecue ami, micuana jiteque quijehuetiyaque. Ique ecue ami quijehuetitsu majuhuaquatu Yusura iyaya iyacuaque inime tuaqueja judiru ishuque. Jadya jucama juyaque neadebacue ique micuana jiteque ami quijehuetitsu majuyaque", jadya tuna Jesúsra acuare. Jadya ique Ecuana Cuatsashaquira bahue amerehua. ²⁶ Pan ara,

uva nacaca iji jadique chine jujacama juyaque tu "Ique Cuatsashaquietu majuhua ique jiteque" jadique cacuejatiyaque. Jadya ecuana jutaqui tuque junanucaya tupu.

Jesús majuhuaque adebayaque eje bucha jutaqui

²⁷ Tuque majuhuaque adebayaque ni ecuana muiya ama Ecuana Cuatsashaquietu, cajuchatiya jutidya ecuana tuatsehue. Muiya ama ni Ecuana Cuatsashaquietu pan arayaque jadya ishuque ijiaque jadya juyaque tu jadique buchique jutidya: "Eratu jidama ama inime baya Cristo ique jiteque majuhuaque; eratu jidama ama inime baya tuque ique jiteque ami quijehuetihuaque". ²⁸ Jutaqui Jesús majuhuaque adeba ishu casitatiyaque, icuene cuita ecuana cuitadya canimeadebatitaqui. Pan aramaque jari, uva nacaca ijimaque jari, pana adeba, ejene jadya tuque ecuanaja ataqui Jesús ecuana jiteque majuhuaque. ²⁹ Adebaya ama ni micuana Jesús curusuju eje bucha juatsu majuhuaque, nearaume pan; neijime uva nacaca tuque ecuana jiteque majuhuaque adebamere ishuque. Micuana ni araraya, ijijiya jadya juya eje buchique adebamaquedya jutidya Yusura micuana ecajuchati baya. Nerecaturabuque tura micuana. ³⁰ Umae micuana casadama, ujejeda jadya jutidya. Arahua micuana pan; uva nacaca esasanashaque iji jadya micuana juhua, eje bucha juatsu jadya juyaque jadique baecuaquedya jutidya jadya juhua tibu. Jadya jutidya juya tibusu uma majuhua. ³¹ Pana canimeadebati ni ecuana juya, jucha cuana cacuejati ishu, Yusuja ecuana nerecaturanime ama. ³² Cajuchatihuaaju ecuana Ecuana Cuatsashaquira nerecaturaya ecuana huecasha ishu. Tuja yana abaecua cuana tsehue ecuana ijahuaja etiquiju ejudiruju tura ecuana jadya aya.

³³ Cuejaya micuana era, micuana ecue eatsehuequi cuanaque. Jesús ecuana jiteque majuhuaque adeba ishuque chine juyaque, nequihuatibarecue. Dutya casitihuaju camadya nearaaracue. ³⁴ Ejeque aracara juyaque juatsu, tunaja etarejudya ecana paaraara, Jesús majuhuaque adeba ishuque chine jutayaju cuamaque jaridya. Ecuana Cuatsashaquietu inime tupuqui aishu micuana casitatiya. Yusura micuana ujejeda eamereu micuanara casitatitsu muibama pureama ayaju. Batitsu micuana pana cueja atiya peya ai cuana micuanara ique bacadurachine cuanaque.

Yusuja Espiritura tuque mere ishu peadya peadya casa tyabarecuareque

12 Micuanara ecue quirica cuadishachine patya micuanara bacadurachine Yusuja Espirituja casara casa tyayaque. Iyacua micuana cuejaya, micuanaja pana adeba aishu, micuana ecue eatsehuequi cuanaque. ² Caadebatiyadya micuana eje bucha anie icuene juhuaque. Jesús queja catyatima jarira tuque micuana ai cueya cueya ea cuanaque muihua. Cuji cuita juatsu tuque micuana ai cueya cueya ea cuanaque

yusu jadya ahua. Micuanara muihua cuanara micuana ni ai buchique bamerehua ama; anama tuna. Ijahue atahua tibu tuque micuana muihua. ³ Yusuja Espiritura bacue ecuana eisarau. Eje uma tuna juya: "Eratu quisarati aya Yusuja Espiritura cuejahuaque", jadya tuna jubahue. Cuejaya micuana era eje bucha adebae ecuana eauque Yusuja Espiritu tsehueque, jadya ama juatsu aijama jadique. Yusuja Espirituja casa eque quisaratiya cuanaratu Jesúsja ishu jidama quisarati aya ama. Eje bucha ijillahuanae ni tunajatu Jesús ama. Tuja Espirituja casa eque quisaratiya cuanara cuita camadyatu quisarati aya: "Jesús tu Ique Cuatsashaquietu" jadya. Yusuja Espiritu tsehue ama cuanaratu quisarati aya ama riyaque. Jadya adebataquietu ejeque Yusuja Espiritu eque quisaratiyaque, tuque eque ama quisaratiyaque jadya.

⁴ Arepa bape bape casa Yusu mere ishu aniya ama bucha, peadya camadyatu aniya Etyaquietu. Tuquetu Yusuja Espiritu. ⁵ Arepa bape bape casa eque Yusu mere ishuque aniya ama bucha, peadya Ecuana Cuatsashaquietu camadya tuque ecuana mereya. ⁶ Arepa bape bape eque Yusu ecuanaju mere juya ama bucha, tumeque Yusu camadyadyatu mere juya ecuana peadya peadyaju.

⁷ Peadya peadya cama tuja cuanaquetu Yusuja Espiritura tyaya casa Yusu cameremereti ishu. Jadya tyae tura ecuana aya, ecuana tuja biji eque ani ishu catshuatibare ishu.

⁸ Umaetu Yusuja Espiritura tyaya yunerique pana adeba aishu, tura cuitadya adebameretsu peya cuana cuejamere ishu. Peya cuanatu tyaya casa tuja quisarati jida ejitaju cueja, pana adebamere aishu. ⁹ Peya cuanatu riyaque Espiritura casa tyaya eje bucha ataquima buchique quejeneti anitsu cuita camadya aishuque. Peya cuana tujatu casa tyaya ujejeda cuanaque chacha amere ishu. ¹⁰ Umae cuanatu tyaya casa ni ejeque ecuitaja tuja tacaja ai ataquimaque aishu. Peya cuanatu casa tyaya Yusuja quisarati cueja ishu. Peya cuanatu tyaya casa ejeque Yusuja Espiritu eque mere juyaque, ejeque tuja casa equedya jutidya mere juyaque jadique adeba ishu. Peya cuana tujatu casa tyaya bape bape yana cuana eque quisarati ishu. Peya cuanatu casa tyaya ejeque yana eque quisarati ahuaque yatseja yana eque pana cueja aishu. Jadya tyae tura ecuana aya casa tuja Espiritu eque tuque mere ishu. ¹¹ Arepa bape bape meree Yusu ataquique aniya ama bucha, peadya Espiritura camadya ecuana tyaya casa jadya ishu. Turadya ecuana tyaya casa tuque cuitadya eje bucha cameremereticara juya eque ecuanaja Yusu mere ishu.

Yuhua cama ecuana cuita pidya buchique

¹² Peadya camadya tuque ecuanaja ecuita, arepa bape bape bucucu ishu cuanaque aniya ama bucha. Dutya ecuanaja ecuitaju bucucuyaratu peadya camadya ecuanaja ecuita yutaneya. Jadya ecuana Cristoja cuanaque. Yusura ecuana baya peadya camadya bucha tuatsehue, arepa ecuana umada paju ama

bucha, arepa ecuanaja tuque bape bape meree aishuque aniya ama bucha. ¹³ Dutya ecuana iyacuane-tanahua tumeque Yusuja Espiritu eque, Jesús tsehue yuhuacama juishu. Dutya ecuana Jesús queja nimee tere juatsu, Yusura ecuana cuita pidya camadya baya. Israelita cuanatu Jesús queja catyatihua; tumbaedy-atu juhua israelita ama cuanaque. Tsujema mere juya cuanaque tuna Jesús queja catyatihua; tumbaedy catyatihuadya etsujequi jiteque mere juya cuanaque. Bape bape ecuana juya ama bucha, peadya Espiritu eque ecuana Yusura casaturaya.

¹⁴ Ecuitaju bucucutereyaque yuhua camaque inime tupuqui neara; jadya adebae tuque micuana eau. Ecuanaja ecuita tu peadya camadya ama; umada tu-jatu bucucu ishucue aniya. Dutya bape bape bucucuyaquetu dutya tupu meree juya, dutya ecuitaju jida ishucue. ¹⁵ Ehuachi, emetucu jadya tu peadya ecuita juque camadya, arepa beta tupu bucucue ama juya ama bucha. Arepa ehuchira quisarati eau ama bucha: "Eje bucha juatsu ique emetucu bucha bucucue ama juya; riyaque ecuita juque ama tucue ique", jujacaya amady-atu tuhuaque. ¹⁶ Ijaca, yatuca jadya tatse tumeque ecuita juque cuinetse, arepa beta tupu bucucue ama juya ama bucha. Arepa ijaca jadya ejuu ama bucha: "Eje bucha juatsu ique yatuca bucha capetati ishucue ama; jutaquiju riyaque ecuita juque ama ique", tuhua-quetu jujacaya amadya. ¹⁷ Ita taa ecuanaja dutya ecuita peadya camadya ejuu. Dutya ecuanaja ecuita ni yatuca tere ejuu, eje bucha quijacabacatie jatsu ecua-na ejuu. Dutya ecuanaja ecuita ni ijaca cani ejuu, eje bucha jirue tuque ecuana ai eau. ¹⁸ Yusratu dutya ecuanaja ecuitaju bucucuyaque dutya tupu ama iyahua. Ecuanaja ecuita cueyaneyaquetu Yusura iyabarehua bape bape bucucubare ishucue cuanaque, tu-ra eje bucha bucucushamerecara aya eque bucucubare ishucue. ¹⁹ Ecuanaja ecuita ni peadya camadya ejuu, tume taa tuque ecuanaja ecuita neri ama ejuu. ²⁰ Yusratu iyahua bape bape bucucu ishucue; tu-cuanaradyatu cuita pidya camadya amereya. Tumbaedy arepa ecuana jetiama paju ama bucha, peadya Ecuana Cuatsashaqui queja camadya ecuana catyatihua.

²¹ Ecuanaja ecuitaju bucucuya cuanaquetu dutya tupu bucucue juya ecuanaja ecuitaju jida ishucue. Emetucu aijamaque juatsu tuque ecuana einau ama yatuca tsehue petayaque. Huachimaque juatsu ecuana eajeu ama eju ecuana cuacara juyaju. Dutya tume cuana-maque, tuque ecuanaja ecuita ebucucuu ama jida. Tumbaedy ecuana yurameta catsahuati jutaqui. ²² Ita taa ecuanaja ecuita inime tupuqui neanucara. Aniya tuque ecuanaja casadama buchique. Jadya ama buchatu dyaque saretanaya; tume cuanamaque ecua-na emajuju. ²³ Aniya tuque ecuanaja ecuitaju ai jida piji buchique ama. Jadya ama bucha tuque ecuana jida naruya, peneya, bajejeya jadya ecuana aya. Bisuya ecuana ejeque ecuanaja ecuita ramama cabatitsu. Jadya ama bucha ecuana jida naruya; ramajacaya ama ecuanara. ²⁴ Ecuanaja ecuita juque dyaque jida pijique

tuque ecuana dyaque cuita ama bajejeya. Yusratu ecuanaja ecuita iyahua, ecuanaja ecuitaju casadamaque, bisutadaque jadya jida piji tsehue jutu ishucue. ²⁵ Yusura tuque ecuanaja ecuita iyahua dutya ecuita ecuanaja bucucutere ishucue yuta ecuitaja jida ishucue, ai aijama juatsu ama. Tumbaedy ecuana anitaqui tumeque inime tsehue, peya cuana tsahua ishucue. ²⁶ Dutya ecuitaju tuque ecuanaja uje jutiya aiju ecuitaju ujedaja juyaju. Ai bahue baatsutu ecuitadya sumitanaya. Tumbaedy, Jesús queja catyatihuaque ni canere-catiya, dutya ecuana peya inime juya tuque jiteque. Ejera ni tuja ishucue jida quisarati aya, dutya ecuana pureama juya, tumeque muitaya baatsu.

²⁷ Dutya ecuana Jesucristo queja catyatihua cuanaque ecuana Yusura Jesús tsehue cuita pidya camadya baya. Jesucristoja ecuita buchique ecuana. ²⁸ Jadya equetu Yusura dutya tuja cuanaque casa tyahua peya cuana tsehue catsahuatibare ishucue, Jesús queja nimeedy jutidya juaje ishucue. Icuene cuitatu aniya Cristora cuitadya tura ejitaju ahuaque cueja ishucue cuadishuaque. Tuequedyatu aniya Cristoja quisarati cueja juya cuanaque. Tuequedyatu aniya Cristoja quisarati bahuitya juya cuanaque, peya cuanaja pana adeba aishucue cuejaqui cuanaque. Umaetu aniya Yusuja casa eque ni ejeque ecuitaja ataquimaque au juya cuanaque. Aniyatu ujedaja cuanaque chachane juya cuanaque. Umaejatu aniya casa peya cuana tsahua ishucue. Umaejatu aniya casa peya cuana naru, cuatsasha jadya aishucue. Aniyatu peya yana eque quisaratiya cuanaque. Jadyatu Yusura tyahua casa tuja cuanaque yurameta catsahuati dyaque jida aishucue. ²⁹ Dutya ama ecuana Cristoja cuita ecuadishaque. Dutya ama ecua-na Yusuja quisarati cueja ishucue. Dutya ama ecuana Yusuja quisarati bahuitya ishucue. Dutyajaja ama tuque ecuanaja casa aniya Yusuja casa tsehue ni ejeque ecuitaja ataquique ama aishucue. ³⁰ Dutyajaja ama tuque ecuanaja casa aniya ujedaja cuanaque chachane ishucue. Dutya ama ecuana yana bape eque quisaratiya. Dutya ama ecuana bahue ecuanaja yana eque yana bape eque cuejahuaque pana cueja aishucue. Jadya eque ecua-na Yusura tyahua bape bape eque tuque cameremereti ishucue. ³¹ Jadya ama bucha eje buchadya catyamereticara casa nejucue Yusu queja, Jesús queja catyatihua cuanaja dyaque jida judadi ishucue.

Iyuhue tsehue peya cuana bajacataquique ama Cuejayadya micuana era, Yusu mere ishucue eje buchique dyaque jidaque.

13 Aijama ni ecuanaja iyuhue peya cuana tsehue, ecuana quisaratiyaque tu aishucue ama cuita. Arepa ecuana ecuita cuanaja bape bape yana eque quisaratiya ama bucha, arepa ecuana Yusu tsahuaqui cuanaja yana eque equisaratiu ama bucha, peya cuana ni ecuana iyuhueda tsehue ama baya, dutya tupu catsahuati ama ecuana juya ni riyu piji buchique. Iyuhueda tsehue ama ni ecuana cabatiya, Yusura tuque ecuanaja quisarati bacaya, peja duduyaque, jadya ama juatsu ai metal duduyaque sicacada ejuu bucha jutidya.

² Ecuejaudya datse ecuana quisarati Yusu equeque cuitadya. Pana adebadya datse ni ecuana eau Yusura dutya ejitaju ahuaque. Eadebadya datse ni ecuana dutya dyaque ibeda cuanaque. Enityasicuadya datse ni ecuana emata cuana, ecuanara dyaque ejeneya tibu. Jadya ama bucha, peya cuana ni ecuana iyuhue tsehue ama baya, Yusura ecuana ni aishu buchique jida ama baya. ³ Etyabareu datse ecuana dutya ecuanaja ai aniyaque nrecada cuanaque. Cristo queja catyatinima cuanara ni ecuana epahuau. Jadya ama bucha, iyuhueda tsehue ama ni ecuana ebau peya cuana, yanacana cuita ecuana Yusuja ishupa mere juya jadya ejuu.

⁴ Yuneri cuitadya ni ecuana iyuhueda tsehue baya peya cuana, tume ecuana tunara jidama ayaju etsuje jucarama juya. Dutya tuque ecuana tunaja jida ishucue aya. Cajishatiya ama ecuana tunaja ecuanaja bucha ama ai aniya baatsu. Tuna bucha dyaque inimequi ama ecuana cabatiya. Ecuana camadya dyaque muita, tuna bacue aijama, jadya ama tuque ecuana inime tupuya. ⁵ Camuibati aqui ecuana. Ecuanaja camadya jida ishucue ama tuque ecuana inime tupuqui aya, tuna pureamatura ishucue. Quijillahuanatiya ama ecuana. Peyara eje bucha jidama ayaque camadya ama tuque ecuana inime tupuqui aya. ⁶ Peya cuana jida juyaque bacatsu, ecuana pureama juya. Peya cuana jidama juyaque bacatsu, ecuana peya inimedya juya.

⁷ Peya cuana iyuhue quetitsu, ecuana masadama nime aputaya tunara jidama aya cuanaque. Ejeneyadya tuque ecuana tunara cuejaya cuanaque. Tuna cajuhatihua baatsu tuque ecuana ihuajacaya amadya tuna inime cacuaretitsu Yusuja biji eque anidadinuca ishucue. Cahuaitima tuque ecuana iduya tunara jidama ayaju. ⁸ Ejeque huecaca Yusura tyajacabuque casa yana bape cuana eque quisarati ishucue, tuja quisarati cueja ishucue, dyaque ibedaque adeba ishucue. Ecuanaja iyuhue peya cuana tsehue aniyaque bacue teredadi ishucue ama. ⁹ Iyacua dyaque ibedaque adeba ishucue casa aniyaratu dutya ama adebaya. Iyacua Yusuja quisarati cueja ishucue casa aniya cuanaratu adebaya ama dutya tuque eje buchique. ¹⁰ Yusu queja judirutsu piisi tuque ecuana tura amerecara aya bae, pana adeba neri jadya abucue.

¹¹ Ebacua jariju ecuana ebacua cuana quisaratiya bucha quisaratie juhua. Ebacua cuanara inime tupuya bucha ecuana inime tupuhua. Ebacua cuana aniya bucha, ecuana anihua. Iyacua bacue ecuana amena ecapajiti esiri. Amena capajiti esiri jadya juatsu ecuana ebacua cuana bucha anie jujacahua. Tumebaedya ecuana Yusu queja judirutsu jubuque iyacua juya bucha ecuana jujacabuque. ¹² Espejo bape jutidya capetatishaquiju capetatitsu ecuana eje buchique cuita ecuana capetatitaqui ama cabatiya. Tumebae cuitadya tuque ecuana iyacua pana adeba ataqui ama baya Yusu eje buchique. Bape bape jutidya tuque ecuanaja inime juya. Ejeque huecaca tuaqueja judirutsu tuque ecuana badirubuque, tuque eje buchique.

Tura ecuana pana adeba aya bucha, adebaedya tuque ecuana adirubuque.

¹³ Cristo queja nimee ecuana jujacanime ama. Ihujacanime ama tuque ecuanaja tura tyana ahuaque. Iyuhueda tuque ecuanaja bajacanime ama. Tuque iyuhue budyu tu dyaque inime metseque; catyatinime ama, ihuanime amadya tuque ecuanaja, iyuhue aniyaque ama juatsu.

Yana cuana bape eque quisarati, Yusuja quisarati cueja jutidya ecatse bapeque

14 Eje buchadya iyuhueda tsehue bacara peya cuana neacue. Tumebaedya eje buchadya catyamereticara Yusuja Espiritu queja nejuque casa Yusu mere ishucue. Eje buchadya catyamereticara nejuque casa peya cuana tuja quisarati cueja ishucue. ² Peya yana eque quisarati ishucue casa aniya cuanara Yusu camadya paisara. Ecasitati cuanaque tujatu cuejataqui ama Yusuja quisarati, ni ejera buchique tuna quisaratiyaque adebaya ama tibu. Arepa tuna quisaratiyaju bacaqui cuanara quisaratiyaju bacaya ama bucha tunajatu adebaya ama ni riya piji buchique. Yusuja Espiritu eque tuna quisaratiya. Tuna quisaratiyaju bacaqui cuanaratu etehua bucha jutidya bacaya. ³ Yusuja quisarati cueja ishucue casa aniya cuanara bacue bahuityaya tuna bacaqui cuanaque Cristo pureamaturaae ishucue jutidya. Casaturaya tunajatu ecana bajida juyaju. Nime casaturaya tujatu ecana peya inime juyaju. ⁴ Yusu pureama aishu casitatitsu, bape yana eque quisaratiya cuanaque tuna jadya juya tunaja jida ishucue cuita camadya. Yusuja quisarati cueja juya cuanara bacue tsahuaya Yusuja cuanaque Jesús queja nimee camadya juishucue.

⁵ Umaera ni tu jidama bucha baya Yusu pureama aishu casitatitsu yana bape cuana eque quisarati ishucue. Ni riya piji buchique tu jidama ama. Areque micuanaja dutyaja eaniu casa jadya quisaratie juishucue. Dyaque micuana Yusuja quisarati cuejaqui dutya amerecara aya. Quisarati cueja juya cuanaratu dyaque tsahuaya Jesús queja ecatyati cuanaque; yana bape eque quisaratiya cuanara tuna riya piji camadya tsahuaya. Jadya ama bucha, yana bape eque quisaratitsu, ejera ni ecuana pana cueja eau ecuanaja yana eque, casitihua cuanaja ishucue dyaque jidadya, cuejahuaque amena pana baca ahuu tibu. ⁶ Baticara datse micuana aya, ecue eatsehuequi cuanaque. Micuana queja jutitsu taa micuana tsahuatiya ama ni riya piji buchique, yana bape eque cuita camadya micuana isaratiyaque juatsu. Ebacau ama tuque micuana era peya yana eque isarayaju. Era ni micuana ecuejau micuanaja yana eque Yusura ique bahue amerehuaque, tume micuana etsahuau dyaque jida tuque adeba ishucue. Tumebaedya micuana etsahuau, tura ique cuejahuaque bahuitya, tura cuitadya ejitaju bamerehuaque, ebahuityau micuana yunerique bahuitya ishucue. Jadya tsahuae micuana eau Jesús queja nimee cuita camadya juaje ishucue.

⁷ Yanacana tu sicacadaque adebataquique ama. Riya piji inime tupuqui neara ai meya, dudu jadya ishucue

naque. Rauta, guitarra jadya ni ecuana eduduu, jida ejitaju ama ni ecuana eduduu, ni ejera buchiquetu eadebau ama eje buchique ecuanara duduyaque. ⁸ Cuartelju cuanaja ishu corneta dudu pujira tuna cabajejeti ishuque adebataqui ama eduduu, tumetu sudaru cuana baecuadya ejuu amena catira cuaishuque. ⁹ Tumbaedyatu micuana yana bape eque quisaratiyaque juatsu, micuana quisaratiyaju bacaqui cuanaratu ecueyaneu ama. Ni aishu buchique tuque micuanaja quisarati jida ama. Isahue cuanaque isaraya bucha jutidya tuna ejuu micuanara isarayaju. ¹⁰ Aniyatu jetiama bape bapeque yana cuana. Ecuanaja yana cuita camadya tuque ecuana jida pana cueyane aya. ¹¹ Jadya ama bucha ejera ni ique isaraya era yana bacaya eque ama, ecue ishutu tuque quisaratiyaque aijama ai jida cuejayaque; ique quisaratiyaque bacue tu jaididya baya. ¹² Eratu adebaya micuana Yusuja Espiritu queja eje buchadya casa catyamereticara juyaque Yusu mere ishu. Eje buchadya jida meree acara neacue. Yusuja Espirituja casa eque acara neacue. Jesús queja catyatihua cuanaque Yusuja biji eque aniaje ishu, tsahua ishu neacue.

¹³ Peya yana eque quisarati ishuque casa aniya cuanajatu Yusu bacataqui: "Tyacue ecuana casa ecuanaja yana eque quisarati ahuaque pana cueja aishu, riyaque yana ecuanara quisarati ahuaque, dutyaja cueyane ishu", jadya neacue. ¹⁴ Yana bape eque Yusu tsehue quisaratiyaque, pusha ama cuitadya ique ecue educuju Yusu tsehue quisaratiya. Jadya ama bucha tuque cueyaneya ama eje bucha ique quisaratiyaque. Peya yana eque jeruyaque tuque pureama aya ducuta. Jadya ama bucha tuque cueyaneya ama era jeru ayaque. ¿Jadya ni taa jujacaya peya yana eque? Aijama. Paquisaratidya pajerudya ique peya yana cuana eque, tumbaedy aye yana eque, era cuitadya ique quisaratiyaque cueyane ishu. ¹⁶ Micuanara ni pureama, yusurupai jadya aya Yusu yana bape eque, tumeque yana baecua cuanaratu micuana tsehue pureama apee aya ama. "Yuneridya, jadidya paju", jadya tuna juya ama, micuana quisaratiyaque bacaya ama tibu. ¹⁷ Yusu jadya yusurupai ayaque ni micuana jidaque quisarati aya. Jadya ama bucha tsahuaya ama tuque micuana peya cuana micuana tsehue casitatihua cuanaque. ¹⁸ Ique Yusura tyahua casa yana bape cuana eque quisarati ishu. Ecueta aniya ni ejeja micuanaja aniya bucha ama casa bape yana eque quisarati ishu. "Yusurupai mira ique riyaque casa tyahua tibu", jadya tuque ecue Yusu abahue. ¹⁹ Peya cuana tsehue Yusu pureama aishu casitatitsu, dyaque jida tuna tunara yana bacaya eque isarataqui. Ecuanaja yana equedya quisaratiya tuna bahuitya ishu. Ique ni tsunuda equisaratiu yana ejera bacaya ama eque, ni ejeque buchique tuque tsahuaya ama Yusu adeba ishuque. Ique ni ecuanaja yana eque cuita equisaratiu, tume tuque etsahuau ique quisaratiyaju bacaqui cuanaque, arepa pishica quisarati piji ahua ama bucha.

²⁰ Riyaque micuana cuejaya, micuana ecue eatsehuequi cuanaque. Ebacua cuanaratu adebaya ama jida Es-

pirituja casa etyaque eje buchique. Esiri cuanara camadyatu jida adebaya. Esirira inime tupuya bucha inime netupucue. Ebacua cuanaratu jidamaque inime tupuqui aya ama; esiri cuanara camadyatu jidamaque inime tupuqui aya. Jidamaque inime tupuqui neajacacue; ebacua cuana bucha nejuque. ²¹ (Israelita cuana quijacabacati baecua cuanara Yusuja quisarati bacacarama ahuaaju Yusura cuadishahua peya yahuaaju cuanaque tuna nerecatura ishu.) Isaiasratu huenehua Yusura cuejahaque: "Peya yahuaaju cuana eque tuque ecue cuanaque jidama juyaque huecashamerebuque. Peya yana cuana eque tuna nerecaturabuque. Jadya ama bucha tunara ijacabacabuque ama", jadyatu Ecuana Cuatsashaquira quisarati ahua Isaías eque. ²² Jadya quisaratiyaju bacaqui cuanara adebayaju ama Jesús queja catyatima cuanaque Yusuja casa bamere ishu, ai tuaqueja catyatihua cuanaque bamere ishu ama. Yana adebaya eque tuque ecuana Yusuja quisarati cuejaya, Jesús queja ecatyati cuanaja ishu. Jesús queja catyatima cuanaja ishu tu Yusuja quisarati ai etehua buchique. ²³ Jesús queja catyatima cuanaque, jadya ama juatsu bape yana eque quisarati ishuque casa aniyaque adebayaque ama, enubiu micuana Yusu pureama aishu casitatiyaju, micuana equijahuatiquet bucha tunajatu inime ejuu, dutya quisaratiya cuanara bape yana eque tere quisarati ayaju bacatsu. ²⁴ Dutorya ni micuana quisarati cuejaya micuanaja yana eque, tumetu Jesús queja catyatima cuanara nubitsu, eadebau micuana eje bucha juyaque. Yusuja quisarati bacatsu tuna juya, "Jucha arida ique", jadya tuna juya. Tume quisarati cuejayaju icuene yana bacahuaque ama. Tuna tuna, tuna taca caadebati juatsu, caadebatiya Yusura juchaqui bayaque. ²⁵ Ducuta inime tsehue tunajatu adebadadiya tuna Yusuja biji eque ama neri juhuaque. Huipuchitanadadiya tuna Yusu mui ishu. "Pusha ama cuitadya tu Yusu micuana tsehue", jadya tuna judadiya.

Yusu mui ishu casitatitsu eje bucha jutaquique

²⁶ Yusu pureama aishu casitatitsu eje bucha jutaquique micuana cuejaya, micuana ecue eatsehuequi cuanaque. Casitatitsu necatsahuaticue peya cuana tsehue Jesús queja nimee cuita camadya juaje ishu. Umae pajeru Yusu pureama ayaque. Umaera Yusuja quisarati pacueja. Umaeja ni aniya casa Yusuja Espiritu eque yana bape cuana eque quisarati ishu, paquisaratidya ecana. Ecuanaja yana eque pana cueja paa jadya aishuque casa aniyara, peyara peya yana eque cuejahaque. Jadya micuana jutaqui peya cuana tsehue yurameta catsahuati juishu, Yusu dyaque jida adeba ishu. ²⁷ Aniya ni Yusuja Espiritu eque bape yana eque quisaratiya cuanaque, eje uma ama ecana jadya paquisarati. Beta, jadya ama juatsu quimisha camadya ecana jadya paju. Peadya peadya ecana jadya pajubare. Ejera cuana pacuejaajenuca micuanaja yana eque tuna quisaratihuaque. ²⁸ Micuana ecasitatiju, bape yana eque quisaratiya jariradya ejera micuanaja

yana eque ecuejaajeuque nesarecue. Aijama ni ejeja cuejaaje ishuque, tume paquisarati amadya peya yana eque quisarati bahue cuanaque. Paabacatana ecana. Educuju camadya ecana Yusu tsehue paquisarati.

²⁹ Micuana casitatihuaaju, beta jadya ama juatsu quimisha jadya camadyatu Yusura bahue amerehuaque cuejataqui. Umae cuanajatu jida inime tuputaqui tume quisaratiya cuanaque yuneri, yuneri ama jadya quisaratiyaque pana adeba aishu. ³⁰ Ejeque quisaratiyaju, Yusura ai bamerehuaque cacuejatiyaju ni Yusura peya ai bamereya, icueneque quisarati amena juhuajutu peyaja cuejataqui iyacua bamerehuaque. ³¹ Jadya juatsu tuna dutyadya Yusura huecashahuaque, quisarati cueja ishu casa aniya cuanaque equisaratibareu. Tunara riyaque quisarati cuejajaju dutyadya micuana bahue ejuu Yusu eje buchique; ecacasatiudya micuana. ³² Tume Yusura bahue amerehuaque cueja juya cuanara inime tsape-pacueja. Abacatadyatu jutaqui tuna quisaratiyaque pana baca aishu, amena tuque quisaratiyaquiju quisarati ishu. ³³ Dutya jutidya ni micuana peadya quisaratiyaju quisaratiya, tumetu eje bucha adebataqui ama juya. Jadya quisaratiya ni micuana juya, tume micuana Yusura amadya quisaratiyaha. Turatu eje bucha adebataquima ama amereya ai.

Cristo queja catyatihua cuanaque casitatiyajutu epuna cuana quisaratiyaqui ama. ³⁴ Ejudyu jutidya ecua casitatiyaju epuna cuana paquisarati ama. Tuna tuna quisaratiyaqui ama. Tunajatu deca cuana tunara amereya eque ameretaqui ama, jadya cacuat-sashatiju ehuene tibu. ³⁵ Epuna cuanara ni quisarati adebataqui ama baya, tunaja etareju judiritsu tuna pabacaduradiru yahue cuanaque umadaja ijacaju ama. Jida ama tu epuna cuana umadara bacayaju tunara inime tupuyaque cueja ishu.

³⁶ Neadebacue micuanara camadya amatu adebaya Yusuja inime eque juishuque. Micuanara amatu Yusuja quisarati bacametse ahua. Jutaquiju peya cuana dyaque inimequi bucha necabatiume. ³⁷ Yusuja quisarati cuejaqui cabatiya cuanaque, Yusura tuja Espiritu eque aquereniyaju cabatiya cuanaque tuna bahue judadiya era hueneyaque Ecuana Cuatsashaquija cacuat-sashati. ³⁸ Era cuejayaque bacacara aatsu nebacacue. Bacacarama aatsu nebacacue.

³⁹ Eje buchadya Yusu queja casa catyamereticara ne-jucue tuja quisarati cueja ishu, micuana ecue eatsehuequi cuanaque. "Micuana nequisaratiyume Yusuja Espiritu eque yana bape cuana eque", jadya ecana neaume ni riyu piji buchique. ⁴⁰ Micuana Yusu mui ishu casitatiyaque, neacue dutya jida inime tsehue, bape bape inime tsehue ama.

Yusura Cristo emajuque chacha nityatsuranucacuaque

15 Tuequedya micuana adebamerecara aya Yusu queja judiru ishuque quisarati micuana era icuene cuejahuaque, micuana ecue eatsehuequi cuanaque. Cristotu majuhua ecuanaja jucha cuana tsu-

jetyaqui jadya cuejajaju bacatsu tuque micuana ejenehua. Ejenetsu micuana tuaqueja catyatihua. Riyaque quisarati cuejatahua eque micuana iyacua aniya.

² Riyaque quisarati jidaque bacatsu, Jesús queja micuana catyatihua jadya juhuaju micuana Yusura Ijahua quejaque inajacamerehua. Einajacadya micuana, era cuejahuaque quisarati ejenejacaya ama tibu. Jadya ama juatsu ni micuana ejeque cuana ebajarara cuita "Ique Jesús queja catyatiya", jadya juhua adebamaquedya jutidya; yanacanadya ni micuana jadya juhua.

³ Cuejaha micuana era ique ejitaju bahue amere-tahuaque. Riya yuneri que bahuityataya cuanaquedya ecua dyaque bahue jutaquique. Cristotu majuhua ecuanaja jucha cuana tsujetyaqui. Tuquetu majuhua Yusura tuja quisarati eque jadyatu judadiya jadya ahua equedya. ⁴ Majuhuaaju tunajatu Jesús emajuque cani ebari epuruju ishacua. Tuque emaju caniju ishatanahuaju, quimisha huecaca emajuque cani ducu jarahuajutu Yusura chacha nityatsuranucacua. Yusuja quisarati ehuene equetu jadya jucua. ⁵ Chacha netitsuranucatsutu Pedro queja cabamereticua. Tuequedyatu cabamereticua peadya tunca beta earacana tura mepecua cuana queja. ⁶ Ejetsunue junucatsu amatu cabameretihua jetiama tuaqueja catyatihua cuanaque ecaradatiju. Tuna dutya quejatu cabameretihua. Tume patya tunajatu pishica cientora dyaque umadara chacha bacua. Dutya jujeritu tume cuanaque chacha aniya jaridya, arepa uma mepecua ama bucha. ⁷ Tuequedya tujatu Santiago cabamereti ishu acua. Jadya juu jadya juatsu tujatu dutya tuja ecuadisha yuhua cuanaque cabamereti ishu acua.

⁸ Camadya ishu eje uma mara dutya peya cuana queja cabameretitsutu tumebaedya cabamereticua eaqueja. Tuequedya ique tupuju Jesús queja catyatihua, uma cuana tura cabamereti ishu acua cuanaque tsunuda eje uma mara jadya juhuaju. Jadya eque ique ebacua nana nana cuinana ejuque bucha. ⁹ Ique Cristoja ecuadisha cuanaja dyaque jetiedya inime metseque. Ique bisuya jipenee "Cristoja ecuadishaque" jadya cati ishu, era icuene dyaque jidama Cristoja cuanaque ahua tibu. ¹⁰ Arepa ique jadya jutidya juhua ama bucha, Yusura ique jida tsehue bahua. Tura ique iyacuanehua ique Cristoja ecuadishaque juishu. Yanacana ama tura mephua ecue jadya meree aishu. Ique cacasatihua tuque mere ishu. Dutya ecuadisha cuanaque dyaque casada ique mere juhua. Ique equetu Yusura Jesús queja jetiama catyatihua. Era ama tuna Jesús queja catyatihua; Yusura cuitadyatu ahua ique eque, eatsehue tuque dyaque jida cuita juya tibu. ¹¹ Jutaquijutu jidama inime bataqui ama ejera Cristo emajuque enit-suranuca jaque quisarati cuejayaque, era jadya ama juatsu peya cuana Cristoja ecuadisha cuanara. Era, uma cuanara jadya tuque ecua cuejajacaya ama jadya; riyaque quisarati rique micuana ejenehua.

Pusha ama cuitadya emaju cuanaque chacha netitsuranucabuqueque

¹² “Majutsutu Cristo chacha netitsuranucahua ecuita ecabapeti”, jadya tuque ecuana cuejajacaya ama. Micuanaratu ejenehua ecuanara cuejayaque. Jadya ama bucha micuana umae juya: “Arepa Yusura Cristo emajuque chacha ecuita iyacua tsehue nityatsuranucahua ama bucha, tura ecuana ni eje tupu emajuque chacha nityatsuranucaya ama”, jadya micuana umae jubahue. Inimema cuana jaque tu jadique inime tupu. ¹³ Eje bucha cuinananucataquima cuitadya ni emaju cuanaque tuna eju ishatanahua juque, jutaquiiju ni taa tu Cristo majuhuaaju caniju ishatanahuaque tuhua jaridya. ¹⁴ Yusura ni Cristo yudijidya nityatsuranucahua ama ecuita iyacua tsehue, jutaquiiju taa tuque ecuana yanacana Yusuja quisarati micuanara ejenehuaque cuejahua. ¹⁵ Cristo ni emajuque netitsuranucahua ama, jutaquiiju taa ecuana pusha pusha arida, “Yusuratu Cristo emajuque chacha nityatsuranucahua”, ecuanara jadique quisarati ajacaya ama tibu. Micuanara quisarati aya baedya ni, tume ecuana pusha pusha quisarathua Yusuja quisarati cueja juyaque. Yuneri ama ni emaju cuanaque tunaja ecuita eiyacuane tsehue netitsuranucabuque, jutaquiiju taa tu yuneri amadya Yusura Cristo emajuque nityatsuranucahuaque. ¹⁶ Emaju cuanaque ni Yusura nityatsuranucabuque ama, jutaquiiju tujatu Cristo emajuque chacha nityatsuranucahua amadya. ¹⁷ Yusura ni Cristo nityatsuranucahua ama, jutaquiiju taa tu catyatitaqui ama didya tuaqueja. Cristo ni emaju jari, tume taa tuque micuanaja jucha cuana apupashama jaridya. ¹⁸ Cristo ni emajuque chacha netitsurahua ama, jutaquiiju taa tu tuaqueja ecatyati cuanaque majuhua cuanaque ijahuaja etiquiju; jacahua tuna Yusu ni eje tupu jipenuca ishuhua. ¹⁹ Riyaque yahuaju aniya jari tupu tunara ecuana jidama aya, Jesús queja ecuana catyatihua baatsu. Canimehuallatitsu ama tuque ecuana iduya, ejeque huecaca ecuana Yusu queja judiruyaque bahue tibu. Majutsu ni ecuana Yusu jacobuque ni eje tupu jipenuca ishuhua. Tume ecuana dutyaja dyaque nerecadaque jubuque. Jadyatu inime tupuya Cristo majutsu netitsuranucahuaque ejeneya ama cuanara.

²⁰ Yunerydya tu Cristo chacha. Emajuque chacha nityatsuranucatsu, ecuana Yusura yunerinehua tura tumbaedya dutya tuja cuanaque emaju cuanaque nityatsuranucabuqueque. Cristo tu icueneque earaqui euhuaque ehuesaque buchique; ecuana ecuana tupuju amena ishuhua earaqui euhuaque huesa ishuhua buchique. ²¹ Peadya ecuita Adán bacanitu cajuchatihua. Tueque ecuana dutyadya maju aqui. Tumbaedya peadya ecuita camadya Yusuja biji eque juhua tibu, tueque ecuana dutyadya chacha netitsuranucabuque majutsu. ²² Dutyadya ecuana maju aqui, Adán eque ejuracanaque tibu. Jadidya ecuana dutya yudijidya aninucabuque majutsu, Cristo tsehue ecuana yuhua cama tibu. ²³ Yusuradyatu jadya ecuana yudijidya iyanu-

cabuque tuque cuitadya jadya juhua tibu. Icuene cuitatu Cristo emajuque netitsuranucacuare. Tuequedya tuque junanucahuaju dutya ecuana tuja cuanaque yudijidya netitsuranuca jubuque ecuita eiyacuane tsehue. ²⁴ Yahua teredadi ishuhua ni tu jadya jubuque. Cristoratu Yusu tsehue dutya cahuaitiya cuanaque casa secabuque. Turatu casa secabuque jidama ejitaju ama cuanaque. Turatu casa secabuque ecuatsashaqui cuanaque. Casa secabuque tujatu dyaque casada cuanaque. Jadya casa secae tujatu dutya jidama cuanaque abuque. Secatsu tujatu Etataque Yusu abuque: “Ahua tuque amena mira amerehuaque. Amena mi dutya ai aniyaja ecuari dyaque aridaque”, jadya tujatu Yusu abuque. ²⁵ Cristotu huaraji dyaque aridaque jutaqui, tura dutya casada cuanaque tuatsehue cahuaitiya cuanaque casa secaya tupu. ²⁶ Dutya jadya judadihuaju ecuana majunucabuque ama. Cristoratu amena ishuhua secadadibuque casa ecuana maju aqui amerequique. ²⁷ “Yusuratu cuatsashahua dutya casa seca ishuhua; dutyatu tura cuatsashaya eque jubuque”, jadya tu ehuene Yusuja quisarati. Arepa Cristora dutya casa secabuque ama bucha, secabuque ama tujatu casa Etataque Yusu. Etataqueradyatu cuatsashahua dutya casa seca ishuhua. ²⁸ Cristora dutya cuatsashaya eque juhujutu tudya cuitadya tuja Etataque Yusu queja catyatibuque. “Miradya cuatsashahua ecue dutya naru ishuhua. Iyacua ecue inime taca eque, idya cuitadya miaqueja catyatitya, tumbaedya dutya era naruyaque, mira cuatsashaya eque ecana juishuhua”, jadyatu Cristora abuque Etataque Yusu.

²⁹ Umae cuanajatu bahue aniya majuhua cuana cuarequi cutsamereti. Emaju cuanaque ni aninucabuque ama ecuita eiyacuane tsehue, umaera ejeneya bucha, jutaquiiju ¿eje bucha juatsu tuna jadya juya? Emaju cuanaque ni netitsuranucabuque ama, ¿eje bucha juatsu tuna cutsameretitya tuna cuarequi? ³⁰ Ecuana ecuana pereu cabatiya ejeque uradya jutidya eje bucha eatauque ecuanara Yusu merehua tibu. Ajacaya amadya tuque ecuanara eje tupu ecuana majutsu aninucabuqueque bahue juya tibu. ³¹ Yuneri cuitadya dutya huecaca jueri ique pereu eiyetauju, micuana ecue eatsehuequi cuanaque. Riyaque ri yuneri cuitadya. Tumbaedyatu yuneridya ique dyaque pureama juyaque, micuana Ecuana Cuatsashaquira cuatsashaya eque aniya baatsu. ³² Eiyetauju ecuana pereu ecabatiu bucha iba mureda tsehue catiyaque earauju pereu ecabatiu bucha, jadidya ique pereu cabatihua eiyetauju rehua Efesoju, Yusuja quisarati cuejahua tibu. Jidaque camadya ni ecuana riyaque yahuaju baya, jutaquiiju ¿aishuhua tu jida jutaquiiju ique jadya canerecatie juyaque? “Araara, ijiji jadya nejura, masadama ecuana teredadibuque”, jadyatu Yusu adeba baecua cuanaque jubahue. Majutsu ecuana aninucabuque amaque juatsu, jutaquiiju taa tu dyaque jida dutya ecuana cuitadya camadya capureamaturati jida juhua.

³³ Ijahue necatimereume jadya quisaratiya cuana queja. Ecadutyati ecuana ejuu emaju cuanaquepa

netitsuranucabuque ama jadya juya cuana tsehue, tume ecuana jidama juya, tuna juya bucha. Micuanaratu adebayadya jadique quisarati: "Jidama tsehue ecacareneti cuanaratu yuamaturaya jida tunaja bahue cuana eque aniya cuanaque".³⁴ Umaera tuque micuana Yusuja ishuhua jida ama inime tupuya. Cuejaya micuana riyaque, micuana bisu adebamere ishuhua. Inime netupunucacue Yusura micuana inime tupumerecara aya bucha. Necajuchatiyacacue.

Eje bucha ecuanaja ecuita majutsu netitsuranucatsu jubuqueque

³⁵ Ejera cuana ni bacaduraya: "¿Eje bucha nityatsuranucaetu Yusura abuque emaju cuanaque? ¿Papatanahuaque baedya ni taa tuque ecuanaja ecuita jubuque?" jadya ni umaera aya.³⁶ Micuana micuana inimema ecuanaja ecuita eriri baatsu ecuana netitsuranucabuque ama bucha inime tupuya cuanaque. Ecaca euhuaque eje bucha juyaque neadebacue. Ecaca euhuaque ni cabapetiya ama, tumetu huijaya amadya.³⁷ Huijayaque tu uhuatanaya buchique ama. Ecacadya jutidyatu uhuatanaya, paju trigo jadya ama juatsu peya.³⁸ Tuequedyatu Yusura huijashaya tura huijashaya eque. Ecaca equedyatu bapedya huijabareya.³⁹ Dutya maju aqui que Yusura cuitanehuaque tu dutya tupu ama. Ecuita, cuanubi, upati, jae cuana bape bapetu Yusura iyahua.⁴⁰ Tumebaedyatu aniya barepaju aniya cuanaque, yahuaju aniya cuanaque jadya. Bape bapequedyatu tuna, barepaju jida pijique, tumebaedya yahuaju juque. Jadya ama bucha barepaju jida pijique, riyaque yahuaju jida piji tsehue beta tupu ama.⁴¹ Ijeti, badi, purari cuanaja huecatu bapedya juya, arepa dutya tiquida ama bucha. Purari cuana dyadi tu dutya tupu amadya; bape bapedya tuna.⁴² Tumebaedya majutsu netitsuranucatsu, tumebaedya tuque ecuanaja ecuita jubuque; papatanahua bucha amadyatu jubuque ecabapeti. Majuhuaaju tuque ecuanaja ecuita papatanaya ecaca uhuayaque bucha. Papayaquetu riryadya. Netitsuranucatsu bacue ecuanaja iyacuaque ecuita riri baecua jubuque.⁴³ Papatanahuaquetu asicada, casadama jadya. Yudijidya aninuca juatsu bacue ecuanaja ecuita jida piji, casada jadya jubuque.⁴⁴ Epatanahuaque tuque ecuanaja ecuita riyaque yahuaju ani ishuhua. Yusura ecuana anishanucahuaju tuque ecuana ecuita ecabapeti jubuque. Yusuja Espirituja tuque ecuanaja eiyacuane jubuque, barepaju anidiru ishuhua. Yuneridya tuque ecuanaja aniya ecuita riyaque yahuaju ani ishuhua. Tumebaedya tuque ecuanaja anibuque ecuita Yusuja yacuaju judiru ishuhua.⁴⁵ Riyaque ri ehueene Yusuja quisarati: "Yusuratu icueneque ecuita iyahua Adán bacani. Jadya aatsu tujatu cuitanehua, riyaque yahuaju ani ishuhua, maju aqui juishuhua. Tuequedyatu anishahua" jadya tu ehueene. Tupujuque Adántu Ecuana Nityatsuraquique judadiahua. Tuja Espiritu eque tura ecuana nityatsuranucaya. Tupujuque Adán tu Jesucristo bacani.⁴⁶ Yuequedyaquedya jutidya tuque ecuanaja aniya, Yusuja

Espirituja tyamaquedya jutidya. Icuene cuita ecuana Yusura tyahua riyaque yahuaju ani ishuhua ecuita. Tuequedyatu tura ecuana tuya Espiritu eque tyabuque ecuita ecuana tuaqueja judiru ishuhua.⁴⁷ Adán icueneque ecuitatu mechidya jutidya atanahua. Cristo bacue butehua Yusuja yacua juque.⁴⁸ Maju aqui cuanaja ecuita tu riyaque yahuaju juque jutidya, Adánja ecuita buchique jutidya. Cristo queja ecatyati cuanajatu ecuita iyacuaque anibuque majutsu, Jesucristo barepa juque jehuaaju buchique.

⁴⁹ Iyacuatu ecuanaja ecuita ea riyaque yahuaju ishuhua jutidya, Adánja ecuita juhua baedya jutidya. Tuequedyatu tuque ecuanaja ecuita eiyacuane jubuque barepaju anidiru ishuhua, barepa juque junahuaja Cristoja bucha ecuita eiyacuaneque.

⁵⁰ Riyaque micuana cuejaya, micuana ecue eatsehuequi cuanaque. Riri aquiquetu Yusu queja ejudiruu ama. Jadya tibudya Yusura dutya naruhuaaju ecuita maju aqui tsehue ni tuque ecuana eje bucha jipee ama. Anitaquitu cacuareti ishuhua. Riri aquiquetu tuaqueja eje bucha judiruedya juma. Ecuita riri baecua tsehue cuita camadyatu judirutaqui.

⁵¹ Pana baca neacue. Cuejaya micuana beru etehua bucha juhuaque. Dutya ama ecuana Jesúsja cuanaque emaju jubuque. Amena ishuhua huecacajutu chacha anibuquedya tuaqueja ecatyati cuanaque. Jadya ama bucha ecuana dutya cabapetibuque.⁵² Yatuca tapiyaque tsunumee piji ecuana Yusura cabapetishabuque. Barepa juquetu corneta meyanatabuque amena ishuhua huecaca juetihuaju. Tume tura ecuana cabapetishabuque. Tumeque corneta meyanatayajutu Yusura nityatsuranucabuque dutya emaju cuanaque. Tumeque tsunumee piji cuitadya tujatu ecana ecuita iyacuanebuque, ni eje tupu majunuca ishuhua ama. Dutya tura ecuana cabetishabuque; ecuita ririnuca baecuaque tura ecuana tyabuque.

⁵³ Yusuratu cuatsashahua. Ecuita maju aquiquetu cuaretanataqui, ecuita riri baecua tsehue, barepaju anidirutaquique. Maju aqui cuanaque tuna cabapetishataqui ni eje tupu majunuca ishuhua ama.

⁵⁴ Ecuanaja ecuita cayuamati aquiquetu cayuamati baecuaaju cuaretanabuque; ecuanaja ecuita maju aqui que maju baecuaaju cuaretanahuaju, jadya judadibuque Yusuja quisarati ehueene equedya: "Ni ai, ni ejeque buchiquetu majunucaya ama. Satanásja casatu amena pana apupasha atanaya maju aqui eamerequique".

⁵⁵ Ajipa etima cuija ejupuque tu amena mudama, tuya ujedaca ishuhua ejuputana tibu. Tumebaedyatu Yusura ecuana pana cabapetisha ahuaju, bajidama ecuana maju ishuhua jubuque, amena ecuana ecuita iyacuana tsehue tibu. Mubaya ama tuque ecuana amena maju, ecuanaja ecuita iyacuana ni ai uje buchique adebanucaya ama tibu".⁵⁶ Jesús queja catyatima jariju ecuana bajida juhua maju ishuhua, ecuanaja jucha cuana tibu Yusura nerecaturayaque bahue juya tibu. Yusuja cacuatsashati cuana cuejatayaju bacatsu ecuana caadebatihua jucha aridaque, cacuatsashati cuana

eque ama juyaque. Yusura ecuanaja jucha cuana apu-pashahua tibu, tura ecuana amena nerecaturabuque ama, ajipa tima cuijamara eje bucha ama eau bucha. ⁵⁷ "Aijamatu peya mique bucha dyaque jidaque. Yusurupai mique ecuana aya, Ecuana Cuatsashaqui Jesucristo eque mira ecuana anishanucabuque tibu, arepa ecuana majuya ama bucha", jadya tuque ecuana Yusu ataqi.

⁵⁸ Jadya tibudya micuana cuejaya riyaque, micuana ecue eatsehuequi iyuhueda cuanaque. Necanimehualatiume. Neejenejacaume ejeque huecaca ecuana Yusura ecuita iyacua tsehue nityatsuranucayaque. Nemerejacaume Ecuana Cuatsashaquique. Bahuedya micuana; Ecuana Cuatsashaquija casa eque ayaque tu yanacana ama.

Peña cuana tsahua ishu ecuanaja chipiru sitataquique

16 Quirica cuadishaya patya micuanara ique bacadurachineque: "¿Eje bucha sitae tuque ecuana chipiru eau Judeaju Jesúsja cuanaque aniya cuanaja ishu?" jadya micuanara bacadurachine. Iyacua micuana cuejaya micuanara bacadurachineque. Neacue era Galacia yahuaju Jesús queja ecatyati cuanaque cuatsashachine bucha. ² Dutya dmicu micuanaja eje uma piji chipiru neiyasicuacue, eje uma piji micuanara inayaque adebatsu camadya. Chipiruda cuanara dyaque umadadya paiya. Nerecada cuanara eje uma amadya paiya. Iyasicuayaque juatsu nesitacue ique jutiya tupu. Masadamadya neiyatibunecue. Ique jutihuaju paanidya amena chipiru esitacue. ³ Ejeque micuanara cuadishacara aya tsehue necuadishacue tumeque chipiru. Ique tuhua jutitsu tuque cuadishatiya Judeaju tumeque chipiru tsehue. Ejeque cuayaque tuque quirica tsehue cuadishaya dutya eana tumeque chipiru dujuquique bahue amere ishu. ⁴ Ique dyadi cuataqui cabatiyaque juatsu, dutya cuaudya ecuana paju.

Pablora Corintoju cuanaque baticara acuaque

⁵ Icuene cuita cuetiya Macedonia yahua cuana eque. Tueque cueti jadya juatsu micuana batiya Corintoju cuanaque. ⁶ Cuetiara camadya ama micuana badirucara aya. Eje uma huecacadya micuana queja judirucara juya, Ecuana Cuatsashaquija jadya inime juyaque juatsu. Beni mara cuana cuetishayaque ni tuhua Corintoju micuana queja anidiruya jari. Tuequedya netsahuanucacue eju ique judiruyaju judiru ishu. ⁸ Rehua Efesojudya aniya jari Pentecostés chine cuetishaya tupu. ⁹ Aniya rique ecue eje bucha cuejae Yusuja quisarati aishuque. Jetiera amari bacacara aya. Umae cuana bacue eatsehue cahuaitiya era cuejaya baatsu.

Timoteo, Apolos ecatsa cuacuareque

¹⁰ Timoteo junatihuaaju jida nebatsacue, tuque micuana tsehue pureama juishu. Ique baeque nucadya tume Ecuana Cuatsashaquique merequique nucadya.

¹¹ Jadya tibudya batsacarama ama neatsacue, arepa

tuque esiri cuitaque ama jadya juya ama bucha. Jida nebatsacue, tuque tuhua dirunucayaque pureama tsehue dirunuca ishu. Netsunutashatsaume cuita bacue, ique, tuatsehue cuaya cuanaque ihua juyaquedya.

¹² Quirica cuadishaya patya micuanara bacadura-chine: "¿Eje tuputu Apolos junaya Corintoju?" jadya. Tuequedya micuana cuejaya Apolos ecuana tsehuequique eje buchique. "Riya yatse tsehuequi cuanaqueri Corintoju cuaya. ¿Eje bucha juatsumi cuaya ama tuna tsehue?" jadya tuque eje uma au achine. Quemitsachine tura ique: "Iyacua cuita cuacarama juya. Ecue emajaca anihuaju piisi cuaya", jadya jutidya tura achine.

Amena ishuque quisarati

¹³ Necanaruticue ejera Cristo queja catyatishamerejacacara eauju. Neejenejacaume yunerique bahuityayaque. Ni ejeque buchique bajida nejuume. Casada nejuque. Necanimehualatiume. ¹⁴ Ai juyaque iyuhue tsehue neacue peña cuana tsehue.

¹⁵ Eratu adebaya micuanara Estéfanos tuja etareju aniya cuanaque jadya adebayaque. Tunadya tuna Acayaju Jesús queja catyatimetse juhua. Tunajatu mere Yusuja cuanaque tsahua cuita camadya. Riyaque micuana cuejaya, ecue eatsehuequi cuanaque. ¹⁶ Nemuibacue eana. Tumbaedy a nemuibacue tuna bucha juya cuanaque, peña cuana tsahuaquique, merequique jadya.

¹⁷ Dyaque pureama ique juya Estéfanos, Fortunato, Acaico jadya junahua baatsu. Arepa micuanara ique tsahuataqui ama bahua ama bucha, rehua ama tibu, tunara ique tsahuahua micuanara etsahuauque. ¹⁸ Tunara ique dyaque casaturahua. Icuene tunara micuana dyadi dyaquedya casaturahua. Nemuicue eana.

¹⁹ Asiaju cuanaque Jesús queja ecatyati cuanara micuana isaramereya. Aquila, Prisca ecatsara micuana isaramereya; tumbaedy a micuana isaramereya tatseja etareju Yusu pureama aishu casitati bahue cuanara. Tunara micuana iyuhueda baya, tuna baedy a micuana Ecuana Cuatsashaqui tsehue yuhua cama baatsu. ²⁰ Dutya rehua ecuana tsehuequi cuanara micuana isaramereya. Casitatitsu quisaratibare, emetucuju quinati jadya nejuque peña cuana tsehue iyuhueda cabatiyaque cabamereti ishu.

²¹ Idya cuitadya ebacani quiyatiya rehua micuana isara ishu: PABLO.

²² Yusura dyaque jidama panerecatura Ecuana Cuatsashaquique iyuhuedama juya cuanaque. Neadebacue: Maranatha, "Ecuana Cuatsashaquiquetu amena junanucaya" jadique.

²³ Ecuana Cuatsashaqui Jesucristora nenarucue tuja quiyuhuebati tsehue. ²⁴ Era micuana iyuhueda baya Jesucristo queja dutya ecatyati cuanaque. Dutya riya cuanaque micuana cuejahua.

Riya tupu camadya.

2 CORINTIOS

Riyaque quirica ri Pablora huenetsu Corintoju aniya cuanaja ishu cuadishacuareque. Riyaque beta ishuque quiricajutu Pablora huenecuare icuene quiricaju iyachineque nucadya. Jesús queja umae ecatyati cuanaque tuna Yusuja biji eque ama jari anicuare. Umaeratu ejenecuare ama Pablo Yusuja casa etyaque tuja quisarati cueja ishu.

Riyaque quiricajuri Pablora cuejacuare dyaque tuque canerecaticuareque. Isaratsu ecuana caadebatiya ecuana bahuedia jutidya ama ecuana canerecaticuareque, ai cajuchatitsu ama. Canerecati eque ecuana Yusura bahuityaya dyaque tuaqueja nimee juaje ishu.

Tumebaedyatu Pablora cuejacuare, Jesús queja ecatyati cuanaja Yusu chipiru tyataquique nrecada cuanaque tsahua ishu.

Umae versículo cuana dyaque saretanayaque tu: 2.14; 3.5; 6.14; 8.9; 9.6-7; 12.7-9.

Pablora Jesús queja ecatyati cuanaque quirica eque is-aracuareque

1 Era rique micuanaja cuadishaya quirica Corintoju Yusuja cuanaja ishu, tumebaedyaya Acayaju dutya epuju cuanaja ishu. Isaraya micuana era. Ique Pablo. Yusura ique mepehua Jesucristoja yana atsaqui juishu, tuja inime jadya juya tibu. Timoteo ecuana tsehuequique ri eatsehue. Tura micuana isarameryadya. ² Yusu ecuanaja Etatara, tumebaedyaya Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Pablora tuque nrecada atayaju naruhua cabatitsu Yusu yusurupai acuaque

³ “Miquemi dyaque jida”, jadya neajacara ama Yusu, Ecuana Cuatsashaqui Jesucristoja Etataque. Tuque tuque ecuanaja Etata Yusu, ecuana tsehue jida juacayaque ama, ecuana nime casaturajaca baecuaque. ⁴ Yusura ecuana nime casaturajacaya ama ecuana canerecaticuareque. Jadya tibudya tuque ecuanaja peya cuana canerecaticuareque casaturataquidya. Bahuedya ecuana tuna eje bucha nime casatura aishuque, ecuana dyadi Yusura nime casaturajacaya ama tibu. ⁵ Cristo jaque ama cuanaratu Cristo nrecaturahua; tumebaedyaya tunara ecuana iyacua nrecaturaya, ecuana Cristo queja ecatyatique baatsu. Arepa dyaque nrecada juya ama bucha, Cristora ecuana dyaque nime casaturaya. ⁶ Ecuana ecuana dyaque nrecada juhua, micuanaja Cristo adeba, Satanás quejaque einajaca jadya juishu, micuana Yusura nime casaturayaque caadebati ishu. Jadya juyaju ecuana Yusura dyaque nime casaturahua. Ecuana jadya canerecaticuareque juhua tibu, micuana ecuanaja bahuityataqui, micuana dyadi tumebae canerecaticuareque juyaju Yusura nime casaturayaque caadebati ishu. ⁷ Ecuonaratu pana ejenedya aya micuana Cristo tsehue nime aputajacayaque ama.

Micuana dyadi ecuana canerecaticuareque bucha canerecaticuareque juya tibu, tuque ecuana adebayadya Yusura micuana nime casaturajacayaque ama, ecuana aya bucha.

⁸ Adebamereya micuana era yatse Asiaju eje bucha canerecaticuareque juchineque, micuana ecue eatsehuequi cuanaque. Dyaque yatse canerecaticuareque castere ni eje bucha idutaqui. Dyaque bicueda cabutitsu eremeu bucha yatse cabaticuareque. Majuya bucha yatse cabaticuareque. ⁹ Maju ishu cuana amena inatahua bucha yatse cabaticuareque. Adebachinedya tuque yatse ecuana cuitadya jutidya eje bucha cacuinanashatie jutaquique ama, Yusura cuita camadya yatse ecuinanashauque. Tuquetu Emaju Cuanaque Nityatsuranucaquique.

¹⁰ Yusura yatse tsahuatsu chachanehua yatse eiyetauque. Tumebaedyaya tura yatse chachanehua yatse iyacua canerecaticuareque. Pana ejenedya tuque yatse aya tura yatse narudadiyaque jari, arepa yatse nrecada juya ama bucha. ¹¹ Jadyatu judadiya, yatse Yusu queja bacabacayaju, micuanara dyadi bacabaca tsahuayaque juatsu. Tumetu Yusura dutya micuanara bacaya equedya adadiya. Tura yatse tsahuadadiya. Jettimara tunajatu Yusu yusurupai aboque. “Dyaque jida taa Yusu, tura Pablo ecatsenaruhua tibu”, jadya tuna jubuque.

Eje bucha juatsu Pablo Corintoju cuacuareque ama

¹² Yusuja cuanaque eanita bucha anicara tsehue yatse anihua, ni eje bucha ni jahue tsehue riyaque yahua. Micuana queja neri neri ecuana jadya anie juhua. Yatse yatse jida tuyu baya equedya aniya, ai yatse dyaque bahue juatsu ama, Yusura yatse jadya anie juishu tsahuaya tibu ademedya. Dyaque pureama yatse juya jadya anie juya cabatitsu. ¹³ Dutya era micuanaja ishu huenehuquetu ibeda ama adeba ishu juhua. Jida ejitaju adebataqui tuque. Isaratsu, cuejajuyaju bacatsu, tuque micuana cueyanehua era micuana cuejacara ayaque. Areque micuana pana cueyaneja

era quisarati cuejayaque eau. ¹⁴ Jadya juyaju, Ecuana Cuatsashaqui Jesucristo junanucahuaju ecuana pureama jubareya peya cuana tsehue. Jadya pureamae micuana jubuque, era micuana Jesús queja catyati ishu tsahuahua tibu. Tumebaedya ique pureama jubuque, micuana era cuejehua eque anihua baatsu.

¹⁵ Eratu adebayadya micuanara ique jida pureama tsehue ebatsauque. Jadya tibudyatu ecue inime juhua micuana ique Macedoniaju cuayara cuajinati ishuque, tumebaedya jetinucayara. Micuana cuajiti beta aatsu tuque ecue ani beta emajaca ejuu Yusuja quisarati cuejayaque micuana pureamatura ishu. Tuequedya micuanara Judeaju cuanuca ishu etsahuanucau.

¹⁷ Tume jadya ama juhua. Ique micuana queja junahuishahua ama baatsu, ¿tuque micuana era muida tsehue ama cuana jadya ahua bucha inime tupuya? ¿Micuanajatu inime juya ique “Jejee” jadya, tumeque ura nucadya “Aijama”, jadya juya bucha? ¹⁸ Arepa era inime tupuyaque cuare bahue ama bucha, Yusuja quisaratu cuaretaqui ama ni riya piji buchique. Cuarehua ama tuque riyaque quisarati. Era “Jadidyatu juya” jadya ayaquetu jadidya juya. Era “Jadya ama tuque” jadya ayaquetu jadya amadya juya. ¹⁹ Jesucristo tu Yusuja Ebacuaque. Cuejachinedya micuana era tuque eje buchique. Tumebaedya micuana Silvano, Timoteo ecatsera cuejachine. Jesucristotu ni riya piji buchique cacuaretiya ama. Tuquetu yuneri cuita yunerique. Tuquetu bape bape inime tupuquique ama. Dutyatu juhua, tura quisarati iyahua eque. ²⁰ Tuque equedyatu Yusura dutya aya tura aana ahuaque. Cristo eque tu Yusu pureama ea. “Dyaque jida taa mique, Cristo eque mira aana ahua cuanaque ahua tibu”, jadya tuque ecuanaja Yusu abahue. ²¹ Yusura cuitadya ecuana Cristo tsehue nime aputashajacaya ama, ecuana camadya ama, micuana tumebaedya. Tura cuitadya ecuana mepehua tujaque juishu. ²² Yusura tuque ecuanaja cuadishahua tuja Espiritu cuitadya tujaque adeba ishuque, ecuana aiju ebacani cahueneti bahue bucha ecuana jaque jadique adeba ishuque bucha. Ecuana ai bijida baatsu icueneta tsujetya riya piji au tupuju bacue tsujetyatilla jadya eau bucha, jadya bae tuque ecuanaja Yusura tuja Espiritu cuadishahua, tupuju dutya tura ecuana tyacara ayaque tyadadi jadya ishu.

²³ Yusuratu adebaya era micuanaja ishu yunerique hueneyaque. Ique Corintoju cuachineque juatsu, riya micuana era nereda atiquena juchine. Jadya tibudya cuama jari. Ique jutitsu micuana peya inime amerecarama aya. ²⁴ Casada tsehue ama micuana ejenemerecara aya micuanaja ejenetaquique. Iyacia micuana jida Jesús queja nimee. Jadya ama bucha micuana dyaque pureama juya ama. Dyaque pureama juishuque micuana tsahuacara aya.

2 “Pacuanuca ique Corintoju”, jadya ama tuque ecue inime juhua, micuana nereda ayaque peya inime ejuuque adebaya tibu. ² Era ni micuana ecapeya inimetishau nereda aatsu, tume taa ni ejera buchique ique epureamaturau ama. ³ Jadya tibudya micuana

icue era quirica cuadishachine eque huecashachine micuana jidama juyaque, ique junatimajudya micuanaja inime jidama cuanaque bajeje ishu. Ique tuhua junatitsu tuque acarama aya ique capeya inimetisha ishuque. Ique peya inime ejuuque, era taa dyaque jida adebaya micuanaja ique dyaque pureama amere ishu. Ique pureama juyaju, micuana dyadi micuana pureamadya juya. ⁴ Micuana eje bucha anie juyaque bahue juatsu peya inime cuita juatsu tuque micuanaja quirica cuadishachine. Micuana jidama inime ishu baatsu tuque cuadishachine. Micuana eje bucha anie jutidya juyaque bahue juatsu tuque micuanaja payaque quirica aatsu cuadishachine. “Areque ecana dyaque peya inime ejuu ama quirica inatsatsu. Jadya tunaja quirica pacuadisha tuna era iyuhueda bayaque caadebati ishu”, jadya tuque quirica hueneyara inime tupuchine.

Iyuhueda tsehue nebacue ecajuchatique

⁵ Ique camadya ama, micuana tumebaedya micuana peya inime juchine, tumeque cajuchatichineju. Eje umadya ecuana peya inime juchine. Dutya micuana cajuchatichine jadya ama micuana aya tuque jadya juchineju. Ujeda quisarati tsehue amadya tuque aya. Nerecabayadya tuque era, micuana dutya jida pureama tsehue ani ishu tsahua ishu, Cristora ique petayaque caadebatitsu. ⁶ Dutya jujeriradya tuque micuana amena nereda achine, tuque inime cacuareti ishu. Tume tupu camadya amena tupudya tuque micuana nerecaturachine. ⁷ Nereda eauque jari, dyaque jida nenerecabacue jutidya tuque jidama juhuaque. Iyacia netsahuacue jutidya. Nenime casaturacue jutidya tuque pana canimehuallati ejuuju, tuque “Tillahua ama taa ecue Yusura jucha”, jadya ejuuju. ⁸ Jida tsehue nebacue tuque yuneridya micuanara iyuhueda bayaque caadebati ishu. Jadya ique tuja ishu micuana queja canerecatiya. ⁹ Cuadishachinedya tuque micuanaja icuene quirica micuana nime adeba ishu, micuana eje bucha era cuejaya equedya juyaque bahue juishu. ¹⁰ Icuene tume cajuchatichinera peya inime amerechine. Micuanara ni nerecabaya tuque jidama juhuaque, era dyaditu nerecabayadya. Micuana jida juya tibu tuque nerecabahua, Cristora ique petayaque caadebatitsu. ¹¹ Jadya tuque aya, Satanásra ecuana tuja biji eque eauju. Bahuedya ecuana tura Yusu ecuana queja cahuaitishamerecara ayaque.

Pablo Troasju peya inime jucuaque

¹² Riya cuitadya cuachine Troas epu ebariju Cristoja quisarati cuejara. Ique tuhua junatihuaaju Ecuana Cuatsashaquira dyaque jida emajaca tyachine ecue ecana tuja quisarati cueja ishu. ¹³ Junatitsu tuque Tito ecue eatsehuequique tuhua ama banatichine. Dyaque jidama, peya inime jadya cabatichine. Jadya tibu tuhuaque Cristo queja ecatyati cuanaque isaraquenatsu masadama cuetinucachine Macedoniaju, tuque sarera.

Cristora ecuana casa tyahua casada juishu

¹⁴ Dyaque jida taa Yusu ecuana tsehue! Ejera peya catiju ijahue aatsu tuatsehue casada juhua cuanaque dutyaja baishu edujuu bucha, jadya tyaedya ecuana Yusura casa aya ecuana Cristo Jesús queja catyati-huaque ejitaju juishu. Ecuana equetu Yusura tuja quisarati adebamereya ai ijimedaque dutya queja epashutanau bucha. ¹⁵ Pae cuanara Yusuja bijidaque muru ijimedaque pahua bahue jucuare bucha, tumbaedyu ecuana Cristoja biji eque aniya baatsutu Yusura tuja biji eque baya. Huani etsapetanau bucha dutyaja jiru ishuhue, tumbaedyatu ecuana eque Cristoja quisarati dutya bahue ejudadiu, Yusu queja judirushabuque cuanaque, tumbaedyu ijahuaja etiquiju judirubuque cuanaque. ¹⁶ Cristoja biji eque ecuana aniya baatsu, ecuana ijahuaja etiquiju judirubuque cuanara ai ihuidaque bucha baya, ai emajuque ihui bucha. Yusu queja judirubuque cuanara bacue ecuana ai ijimedaque bucha baya, ai esamaqui dyaque jida ijimedaque bucha. Inime tupuqui ni micuana aya aira Cristoja quisarati peya epuju cuanaque ecuejauque, era micuana cuejaya. ¹⁷ Yusura cuadishaya cuanara cuita camadyatu ecuejau. Jadique ecuana. Cuejaya ecuana Yusuja quisarati cuarema ni riya piji buchique. Ecuannaratu cuejaya ai chipiru ina ishuhue ama, ni ijahue peya aishuhue ama, yunerique ama bahuitya puji cuanara aya bucha. Jesús tsehue ecuana yuhucama tibu, tuque ecuana cuejaya, Yusura ecuana quisarati tsape ishuhue cuadishahuaque bahue tibu.

Yusura ecuana quisarati iyacuaque cuejara cuadishayaque

3 Ejera cuana ni tu inime tupunucaya ecuana ecuana na taca casumiti juya bucha. Jadya ama tuque. Tuyuque ama bahuityaqui cuanaque bucha ama ecuana. Micuanara, peya cuanara jadya ecuana pana adeba aya. Sareya ama tuque ecuana, ecuana taca cadujuti quirica juishu micuanaja jida batsa ishuhue. Tumbaedyu tuque ecuana sareya ama, micuanaja quirica tyadadi ishuhue, ecuana peya epu cuanaju tunaja batsa ishuhue. ² Micuanaradya ecuana adebamereya ecuana eje buchique, ai juhuaque. Micuanadya micuana ecuana quisarati quirica caadebamereya ishuhue buchique. Eratu ejeneyadya micuana Jesús queja catyatihuaque. Micuana Yusuja biji eque aniya baatsu, "Pusha amadya tucue tu Pablo jida. Jida taatu Corintoju cuanaque bahuityahua", jadya tuna ejuu dutya. ³ Micuana micuana Cristoja quirica ehue buchique. Ai tinta tsehue ehue buchique ama. Ai tumuju ehue buchique ama tume, Moisésra beru Yusuja inime huenequere buchique ama. Yusuja Espíritu tu micuanaja educuju inimeju mere juhua ecuannara micuana quisarati cuejahuaju. Yusu Chachaja Espiritura micuana Cristo queja catyatishahua. Jadya tibudya tuque micuanaja ani iyacua Cristoja quirica ehue buchique.

⁴ Pana ejenedya tuque ecuana aya Cristora cuitadya ecuana tuque mere ishuhue mepehuaque. Yusura cuitadyatu adebaya yuneridya jadique. ⁵ Yusura tsahuayaque ama juatsu tuque ecuana eje bucha cuejataqui ama ebau Cristoja quisarati. Casada ecuana riyaque mere aishuhue, tura tsahuayaque juatsu camadya. Yusu equeque cuitadya tuque ecuana tuque mere ishuhue casa. ⁶ Yusura ecuana Ijahua quejaque inajacamera ana ahua, tuja Espíritu eque, ai cacuatsashati ehue eque juatsu ama. Cacuatsashati ehueque isaratsu ecuana bahue ecajuchatique, ecuana majudadiyaque jadya. Jesús queja catyatihuaju bacue ecuana Yusuja Espiritura anishanucaya.

⁷ Berutu Yusu caadebamereya Moisés queja tumu tauraju cacuatsashati cuana huenequere patya. Yusutu hueca dyaque tiquidaque cabamereyare; Moisésja ebutsequini tumbaedyu tiquida jucaque. Dyaque tiquida juhua; israelita cuanara mubat-su eje bucha petataqui ama bahua. Tuequedya tujatu hueca apusajehua. Ni ejuetu tumeque cacuatsashati eque Ijahua quejaque einajaca ejuu ama. Yusuja Espiritura ecuana iyacuaque inime eque inajacamerenucaya. Casa tsehuetu Yusura bamerehua cacuatsashati cuana ehue cuanaque. Dyaque casa tsehuedya tujatu bamereya tuja quisarati tsapequi cuanaque tuja Espíritu eque tuque ecuana iyacuaque ani aninucaya. ⁹ Eje bucha ae ni tu ama ejera dutya cacuatsashati cuana. Jadya tibudya ecuana Yusura ecajuchati baya. Jadya ama bucha tu cacuatsashati jidadya. Dyaque jida tu iyacua inime aniya eque einajaca juishuhue. Jesús queja catyatihuaju ecuana Yusura jucha metse ama baya. ¹⁰ Moisesratu bacuare Yusuja casa dyaque aridaque tura cacuatsashati cuejaya patya. Tumeque cacuatsashatitu dyaque jida juhua. Iyacua ecuana Yusura jucha metse ama baya, ecuana iyacuaque quisarati eque aniyaju. Iyacuaque tu dyaque inime metse, beruque bucha ama. ¹¹ Cacuatsashatitu tsunuda ishuhue ama juhua. Iyacua inime aniya eque Yusu queja judiru ishuhue tu tere ishuhue ama. Dyaque jida, casada jadya taa tere ishuhue ama!

¹² Ecuana ishuhue tu Cristoja quisarati yuneri cuitadya dyaque cuitaque, Moisésra cacuatsashati huenequere buchique ama, ni riya piji bajida tsehue ama tuque ecuana cuejaya. ¹³ Moisésra ebutsequini eraca tsehue caramatihua, israelita cuanaja tuja hueca aputayaque baishuhue ama. Ecuannaratu Yusuja quisarati cuejayaque ni ai buchique tehuaya ama. Tuyudya tuque ecuana quisarati aya. ¹⁴ Israelita cuannaratu Moisésja ebutsequini pana peta ataqui ama bahua. Tumbaedyu tunajatu pana adeba ataqui ama bahua Yusura bahue amerecara ahuaque. Ejeque ebutsequini ecaramatique buchatu juhua. Iyacua tumbaedyu israelita cuanaja ishuhue tu dyaque ibeda Yusuja quisarati adeba ishuhue, arepa tuna isaraya ama bucha. Tunaja ishuhue tu beru ehueque etehua buchique. Cristo queja catyatitsu cuita camadya tunajatu eadebau. ¹⁵ Riya cama tunajatu Moisésra huenehuaque isarayaque adebataqui

ama baya. Aira cuana tunaja inime tupu epeneu bucha jutidya tuna. ¹⁶ Ejeque ecuita ni Ecuana Cuatsashaqui queja catyatiya, tume tujatu adebaya quisarati. Yusratu inime yuamaturaque secaya, ebutsequini ramaquique ejera equemiu bucha quemie. ¹⁷ Ecuana Cuatsashaqui queja catyatitsu ecuana tumbaedyu Yusuja Espiritu queja catyatiya. Tuja Espiritura ecuana pana iyacuane aya, Yusu pureamatura ishu. Tuque eque cuita camadya, cacuatsashati eque ama ecuana einajaca. ¹⁸ Adebaya tuque ecuana Ecuana Cuatsashaquique eje buchique. Ni aira buchique tuque ecuanaja inime tachiya ama, eraca petayaque epeneu bucha. Ejeque huecaca tuque ecuana tudya cuitadya adebabuque. Iyacu cuita tuque ecuana espejoju cuana epetau bucha jutidya baya; pana peta cuita ama tuque ecuana ebutsequiniju aya. Tuja Espiritu eque tura ecuana cabapetishaajeyadya jutidya ecuana tuque baedyu juaje ishu.

Yusu mere ishu ecuana canimehuallatitaquique ama

4 Yusura ecuana quisarati iyacuaque cueja ishu cuadishahua, tuque ecuana tsehue dyaque jida juhua tibu. Jadya tibudya ecuana ni riya piji buchique canimehuallatiya ama. ² Ecuana ratu jidamaque etehua au aya ama peya cuanara aya bucha. Aya ama ecuana bisutadaque, ni riya piji buchique. Ecuana ratu ni ejeque buchique ijahue aya ama, Jesús queja catyatisha ishu. Cuareya ama ecuana Yusuja quisarati ni riya piji buchique. Ecuareuque, ecuana aniya yuneri eque. Jadya ecuana juya, Yusura petayaque caadebatitsu. Eje buchadya Yusuja biji eque anicara jadya ecuana juya, dutya ecuana petaqui cuanaque ecuana jida aniyaque bahue juishu. ³ Ecuana tuna cuejajacaya ama iyacuaque quisarati. Jadya ama buchatu ijahuaja etiquiju judiruya cuanara adebaya ama. Tunaja ishu tu etehua buchique jutidya. ⁴ Tunaratu adebaya ama, Satanás, Yusu adeba baecua cuanaque cuatsashaquira adebamereya ama tibu. Atuca ramahuaju capetatitaquima ejuu bucha, jadidya tuna Satanásra baecuashaya Jesúsja quisarati iyacuaque, adeba ishu ama. “Emuque Jesús eque tuque ecuana Yusu adebaya”, jadya cuejayaju bacatsu, tunajatu adebaya ama. ⁵ “Jesucristo queja micuana catyatitaqui. Tuque Micuana Cuatsashaqui neamerecue”, jadya tuque ecuanaja cueja bahue. Quisarati cuejayaque tuque ecuanaja abaecua ecuana eje buchique. Ecuana ecuana micuana Jesús queja catyati tsahuaquique cuita camadya. Tura ecuana tuja quiyuhuebati tsehue naruya tibu tuque ecuana mereya. ⁶ Yuequedyatu Yusura quisarati ahua: “Apuda ducu huecara pahueca”. Tumeque Yusudyatu Jesucristo eque caadebameretihua, ecuanaja tuque eje buchique adeba ishu. Jesucristo ecuanaja adebatsuquetu Yusuja ecuana ducuta inimeju eudau buchique.

Arepa ecuana canerecetiya ama bucha, Yusura ecuana jacayaque ama

⁷ Arepa ecuana casadama paju ama bucha, arepa ecuana maju aqui ama bucha, Yusura ecuana casa tyaya tuja quisarati jidaque cueja ishu. Riyaque quisarati tu ai tsuje aridaque tere baecua buchique. Ecuana ecuana mechi emaricaca buchique, tsunuda ishuque ama. Jadya eque, tuque ecuana ejitaju amereya Yusuja casa ai ecuana jaque ama. ⁸ Jujacaya ama ecuana jidama inimeju, peya inime jadya. Jadya ama bucha ecuana Jesús queja catyatijacaya ama. Eje uma jue ecuana inime dyaque jidamaju jubahue. Jadya ama bucha ecuana jidaque inime ihuajacaya ama, Yusura ecuana naruyaque caadebatitsu. ⁹ Arepa ecuana ujeu baqui cuanara ecuana jidama aya ama bucha, ejaca ama ecuana. Eje uma iyejeri tunara ecuana aya miririshatsu. Jadya ama bucha tunara ecuana aputashaya ama. ¹⁰ Dutya huecaca ecuana ecuana ujeu baqui cuanara iyecara aya, Jesús ujeu baqui cuanara tuque iyecara acuaque bucha. Jadya ama bucha ecuana petaqui juya cuanaque tuna bahue Jesús emajuque enetitsuranucaque ecuana tsehueque. ¹¹ Ecuana chacha aniya jarique ecuana pereu eiyetauju Jesús mere juyaque. Ecuana ecuitatu riritsu pana aputa jubuque. Jadya ama buchatu Jesús emajuque enetitsuranucaque cabameretiya ecuana tsehue aniyaque. ¹² Jesucristoja quisarati cuejaya tibu ecuana pereu juajacaya ama eiyetauque. Riyaque quisarati micuana ecuanara cuejaya tibu, micuana majutsu anidiribuque Yusu tsehue ni eje tupu jaca ishu ama, micuanara quisarati ejenehua tibu.

¹³ Salmo quirica huenequi jucuaque canerecetiya patya tujatu Yusuja quisarati hueneuare: “Eratu ejeneyadya Yusura ique naruyaque. Jadya tibudya tuque cuejajacaya ama tuja quisarati”. Iyacu tuque ecuana pana ejenedya aya Yusura ecuana naruyaque. Jadya tibudya tuque ecuana tuja quisarati cuejajacaya ama, arepa ecuana umaera iyecara aya ama bucha. ¹⁴ Ecuana Cuatsashaqui Jesús tu Yusura emajuque nityatsuranucahua. Jesús nityatsuranucahua baedyu tura ecuana emajuque nityatsuranucabuque. Dujubuquedyu tura ecuana tuatsehue anidiru ishu. Micuana tsehue dujupeedya tura ecuana abuque. ¹⁵ Ecuana nerecada juyaque tu micuanaja jida ishuque, micuanaja Yusuja quisarati baca ishu. Micuana Yusura dyaque jida tsehue bayaju, tumetu jetiera amadya yusurupai eau. “Dyaque jida casada taa mique”, jadya tunajatu eajacau ama.

¹⁶ Jadya tibudya ecuana canimehuallatinime ama. Arepa ecuanaja ecuitaja casatereajeya ama bucha, Yusura tuque ecuanaja casa iyacuaneajeya tuque mere ishu. ¹⁷ Arepa iyacu dyaque nerecada juya ama bucha, idutaquidya tuque; ai abu ishuque bicuedamaque buchique tume, tsunudaque ama jadique juya tibu. Yusura ecuana bajejeajeya tuaqueja judiru ishu. Dyaque jidaque ecuana Yusura tyadadibuque. Tere baecua tura ecuana pureama an-

ishabuque. ¹⁸ Jadya tibudya tuque ecuana jidama inime ishuhua baya ama iyacua riyaque yahuaju eje bucha juyaque. Ecuana riyaque ejitajuque ama inime tupuqui aya, ai bataqui ejitajuque ama. Ejitajuque tu tsunuda ishuhua ama. Ejitajuque ama bacue teredadi ishuhua ama.

5 Ecuana jidama ecuita tu ani tsunudama ishuhua buchique, erere buchique jutidya. Anisicuayaque ecuana erere erihuishaquenau bucha, jadidya tuque ecuana jidama ecuita jubuque majutsu. Jadya ama bucha tuque ecuana jidama ecuita iyacuaque aninucabuque barepaju Yusu yacuaju. Yusu cuitadya eaque tume, ai ejeque ecuita eaque ama Tere ishuhua ama, ni ejeque ishuhua ama tu riyaque ecuita iyacuaque. ² Riyaque yahuaju aniya jari tupu ecuana nercada juya. Peya huecaca ecuana canajeti ebari juya ecuana iyacuaque eaniqui barepa juque adebat-su. Jutu ishuhua iyacuaque jutu bahue bucha, jadya tuque ecuana jidama ecuita iyacuaque eaniqui. ³ Iyacuayaque ecuita anitsu ecuana ecatacati bucha ama cabatibuque, jida ecajututi bucha. ⁴ Riyaque yahuaju jari tupu ecuana erere cuanaju anianiniya bucha. Nercada ecuana jujacaya ama. Ujejeda ecuana jujacaya ama. Majucarama ecuana juya. Jadya ama bucha ecuana iyacuayaque ecuita tsehue amena junenicara juya. Amena iyacua tsehue ecuana ni eje tupu majunucanime ama. Chacha ecuana anibuque. Beru sirique iyacuayaque dadi ishuhua bucha tuque. ⁵ Yusura cuitadya ecuana bajehua ecuita iyacua tsehue tsehue ani ishuhua. Turadya tuque ecuana jidama Espiritu cuadishahua, yuneridya ecuana ejeque huecaca ecuita iyacua tsehue amere ishuhua.

⁶ Jadya tibudya ecuana ni eje tupu buchique canimehuallatiya ama. Adebayadya ecuana, ecuana riyaque yahuaju riyaque ecuita tsehue jarira ecuana Ecuana Cuatsashaquique japada bayaque. ⁷ Bahuedya ecuana tuaqueja judirubuqueque ai petaya eque ama, ecuana quejeneti eque. ⁸ Jadya tibudya ecuana canimehuallatiya ama, arepa tunara ecuana iye ana aya ama bucha. Eje buchadya rehua anijacacara ecuana juya Ecuana Cuatsashaquique yacuaju anidiru ishuhua. ⁹ Eje buchadya pureamaturacara tuque ecuana aya Ecuana Cuatsashaquique. Rehua ecuana jidama ecuita beru siri tsehue tuque ecuana pureamaturacara aya, tumbaedyta tuja yacuaju judirutsu. ¹⁰ Peadya peadya ecuana Cristoja yacuaju cabameretibuque. Ecuana jadya ameretsu tura ecuana cuejabuque ecuana eje bucha judadiyaque. Ecuana rehua riyaque yahuaju eje bucha anie juhua eque cuitadya tura ecuana tsujetyabuque. Jida anihua cuanaque tujatu jidaquedya tyabuque. Jidama anihua cuanaque tujatu nrecaturabuque.

Yusu ecuana icuene ujeu bahuaque; Cristo eque ademe ecuana iyacua tuatsehue jidaque

¹¹ Mubaya tuque ecuana Ecuana Cuatsashaquique, tuque dyaque casadaque juya tibu. Jadya tibudya tuque ecuana cuejaya, tuna Jesús queja nimee amere ishuhua. Yusu ama tuque ecuana ijahue aya. Tuquetu

bahuedya ecuana eje buchique. Areque micuana dyadi bahue ejuu. ¹² Ecuana taca casumiti ecuana jucarama juya. Ecuana tsehue pureama micuana ecuana amerecara aya. Umae micuana ecuana ishuhua pusha pusha cuejaya, tuna peya cuana queja dyaque jida cuitaque bucha cabamereticara juya tibu, Yusu adebaqui cuita datse cabatitsu. Jadya ama bucha tu tunara inime tupuya cuanaque jida ama. Ecuana bacue ni ejeque buchique ijahue aatsu ama aniya, tuna ecuana ishuhua pusha pusha quisaratijaca ishuhua, micuana ecuana tsehue pureama amere ishuhua. ¹³ Ecuana quisaratijaju umaera ecuana equijahuati jadya aya. Yusu iyuhueda baya tibu ecuana jadya juya. Micuana tsehue ecuana quisaratijaju, micuana iyuhueda baya tibu ecuana jadya juya. ¹⁴ Cristotu majuhua dutya emajuque. Tuque majuhua jutu Yusura bahua ecuana dutya majuterehua bucha. Jadique bahue juatsu tuque ecuana tuque pureamaturacara aya, ai ecuana jutidya ama, tura ecuana dyaque iyuhueda bahua tibu.

¹⁵ Cristotu majuhua dutya ecuana jidama ishuhua. Tuquetu majuhua dutya chacha aniya cuanaque tuque pureamaturacara ani ishuhua, ai tuna cuita camadya ama. Tuquetu majuhua dutya ecuana jiteque. Netitsuranucagua ecuana jida ishuhua.

¹⁶ Jadya tibu tuque ecuana iyacua inime tupuya peya ecuana ishuhua, Yusu adeba baecua cuanara inime tupuya bucha ama. Icuene tuque cuji cuita juatsu inime tupuhua Cristo ejeque ecuita cuana buchadya jutidya. Iyacua tuque adebaya; jadya ama tucue tuque.

¹⁷ Cristo queja catyatitsu ecuana pana eiyacuane juya. Beruque ani juhuaque tuque ecuana terehua. Iyacuaque ecuita ecuana. ¹⁸ Yusura ecuana iyacuanehua. Cristo ecuana jiteque majuhua tibu, ecuana Yusura iyuhue batsanucagua. Jadya juhua tura ecuana cuadishahua dutya tura eiyuhue quetinucau cuanaque quisarati cuejara. ¹⁹ Cristotu majuhua ecuana jucha cuana tsujetyaqui. Jadya tibudya tuque ecuana jidama Yusura jucha cuana tillahua. Riyaque tuque ecuana quisarati cuejaya. "Jesús queja catyatihuaju micuana Yusura cabapetishaya, tuque iyuhueda cabamereti ishuhua", jadya tuque ecuana ecana cuejaya, Yusura jadya ishuhua cuadishahua tibu. ²⁰ Ecuana Cristoja quisarati cueja juyajutu Yusu cuitadya quisaratiya ecuana eque. Jutajuyaju ecuana Cristoja yana atsaqui juya tibu, micuana ecuana "Yusu tsehue jida nejunucacue", jadya aya. ²¹ Cristotu ni eje tupu buchique cajuchatihua ama. Tuquetu tuyu neri. Jadya ama buchatu tuque ecuana emajuque majuhua jucha cuana tsujetya ishuhua. Jadya juhua jutu Yusura jucha arida bucha bahua. Iyacua ecuana tuaqueja catyatihuaju, ecuana Yusura jucha metse ama baya.

6 Ecuana mereya baedyta micuana Yusu mereya tibu, micuana ecuana cuejaya riyacuanaque. Icuene micuana Yusura Ijahua quejaque inajacamerehua, micuana tsehue jida juya tibu. Iyacua neanime Yusu adeba baecua cuanaque bucha. Jadya anie ni micuana juya, tume taa micuana yanacana ina-

jacatanahua. ² Neadebacue Yusuja quisarati ehuenegue:

“Micuana tsehue jida juishuque huecaca juetihuaju, micuana eaqueja bacabacayaju, micuana era bacahua.

Micuana einajaca juishuque huecaca juetihuaju, micuana era inajacamerehua”, jadyatu Yusura quisarati ahua.

¶ta nebacue! Iyacua cuitadyatu Yusu micuana tsehue jida jucara juya. Iyacuadya tu huecaca Yusura micuana inajacamerecara ayaque.

³ Ecuana ecuana jida tuyu anijacacara ama amadya juya, ni ejeque buchique ecuanara Yusu mereyaque baatsu tsaishu ama. Bijidama tuque ecuana peya cuana “Catyatiya ama ecuana Jesús queja, tuja cuanaque jida ama aniya tibu”, jadya quisarati ishuhua. ⁴ Eje buchadya jida tuyu anicara ecuana juya, peya cuana queja caadabamereti ishuhua ecuanara yuneri cuitadya Yusu mereyique. Sicacada tsehue ama tuque ecuana dutya eje bucha juyaque iduya. Arepa dyaque canerectiya ama bucha, arepa dyaque jidamaque inime cuana aniya ama bucha, arepa ecuana pereu eiyetau cuanaju cabatiya ama bucha, abacata tsehue tuque ecuana dutya iduya. ⁵ Catsacatsa tunara ecuana ahua. Apuda etareju tunara ecuana ishahua. Jetiama ecuita ecahuaitija ecuana acuatsuru bahue juhua. Mere casada ecuana jubahue juhua. Tahui idu, ara idu jadya ecuana Yusu mereyaque juhua. Jadya ecuana nerecada juhua. ⁶ Tumbaedyu ecuana ejitaju ecuana Yusu mereyique ecuanaja eje bucha aniju. Aya ama tuque ecuana ai bisutadaque. Yusu adebaqui ecuana; adebaya ecuana tuja quisarati. Tunara jidama ayaju tuque ecuana cahuaititsu ama iduya. Jida tsehue tuque ecuana peya cuana baya. Tumbaedyu tuque ecuana ecana bamereya Yusuja Espiritu ecuana tsehueque, tura ecuana aquereniyaque. Yunerydu tuque ecuana peya cuana iyuhueda baya. ⁷ Yunerydu tuque ecuana cuejaya. Yusura ecuana casa tyaya tibu, tuque ecuana tuque mereya. Sudarura tuja quiyeti ishuhua cuanaque catiyaque quicueneti ishuhua etsumeu bucha, tumbaedyu ecuana aniya cajuchaticara tsehue ama, peya cuana eje bucha anie juishuque bamere ishuhua, tuna ecuanaja ishuhua pusha pusha quisaratiyaju abacasha ishuhua. ⁸ Umaera ecuana muibaya. Peya cuanara bacue ecuana bijidamaduraya. Umae bacue ecuanaja ishuhua pusha pusha quisaratiya. Umae cuanara bacue ecuanaja ishuhua jida quisarati aya. Yusu mereyique neridyu ecuana, arepa peya cuanara ecuana ejenecarama aya ama bucha. ⁹ Umaera ecuana adebamaque eata aya, aishuque ama bucha. Peya cuanara bacue jida pana adeba ea bucha, dyaque inime metseque bucha. Eje buchaju ecuana dyaque pereu eiyetauju, jadya ama bucha ecuana chacha jaridyu. Dyaque jidama tunara ecuana aya, iyema jaridyu datse tunaja ecuana. ¹⁰ Eje uma peya inime tunara ecuana amereya; jadya ama bucha ecuana Yusura pureama amerejacaya ama. Ecuana ecuana nerecada cuanaque. Jadya ama bucha tuque ecuana Yusuja quisarati cuejaya, peya cuana Yusura ecana dutya ai tunara sareyaque tyanityayaque

bahue ishuhua. Aima bucha datse ecuana; jadya ama bucha ecuana Yusura baya dutya metseque bucha.

¹¹ Dyaque iyuhueda micuana baya, micuana Corintuju aniya cuanaque. Micuana eje buchique tehuatsu amadya rique huenehua. Micuana eje buchique cuitadya micuana adebamerehua era inime tupuhuaque ecue inime juhuaque. ¹² Era micuana dyaque iyuhueda baya. Micuanaja bacue dyaque bataqui ama quiyuhuebatsati eatsehue ishuhua.

¹³ Cuadishaya rique micuanaja quirica huentsu ecue ebacua neri cuanaja ecuadishau bucha. Era micuana dyaque iyuhueda baya bucha, iyuhueedyu ique dyadi nebacue. Ecue micuana tsehue iyuhue aniya bucha micuanaja dyadi paani.

Yusu peadya peadya tuja cuana tsehue aniyaque

¹⁴ Pana cacareneti cuita nejuume Jesús queja catyatiya cuana tsehue. Cacarenetiya ni micuana tuna tsehue, tume micuana juye, cahuayu tsehue yubunehua bucha ejuu. Jida tuyu aniyaquetu tuyu ama aniya tsehue cacarenetiqui ama. ¿Eje bucha ecare jue jatsutu tuyuque, tuyu amaja ecare ejuu? Yusu adebaquijatu ecare neri ejuu ama Yusu adeba bacuaque, huecadaque apuda tsehue cajipetiya ama bucha. ¹⁵ Eje bucha dutya tupu inime tupue ni tu ama Cristoja cuanara Ijahua cuana tsehue. Jesús queja ecatyati cuanaratu dutya tupu ama inime tupuya tuaqueja catyatiya cuana tsehue. ¹⁶ ¿Yusu ecuanara muiyaja etare tu ai cueya cueya cuana pureama aishuque? ¶Ajama! Tumbaedyu tu tuatsehue aniya cuanaque; dutya tupu nimee amadya tu tuatsehue aniya ama cuanaque. Yusu Chachaja anie ishuhua ecuana, Yusura cuitadyatu quisarati ahua:

“Ique anibuque ecue cuana tsehue.

Tuna tsehuedya anibuque.

‘Miquemi Yusu’, jadya tunara abaque.

‘Ecue cuanaque micuana’, jadya tuna abaque”.

¹⁷ Jadya tibudyatu Ecuana Cuatsashaquique jadya jucuaque:

“Necuinanacue tuna quejaque.

Nejacacue ecana.

Ique cahuaitishaqui cuanaque aniya bucha anie nejuume.

Tume micuana era batsabuque.

¹⁸ Ique micuanaja Tata paju; micuana bacue ecue ebacua, ebacujuna jadya’, jadyatu Ecuana

Cuatsashaquira quisarati acuare, ecuana dutya naruquira”.

7 Jadya ecuana Yusura aana ahua, micuana ecue iyuhueda cuanaque. Jadya tibudyu nejacara dutya ecuana asicaturaqui juya cuanaque. Jidama nejujacara. Jidamaque inime tupuqui nejacara. Eje bucha Yusura amerecara aya eque, nejuajeradyu jutidyu. Jadidyu nejuja, tuque cahuaitisha ishuhua ecuanara mubaya tibu.

Pablo Corintoju cuanaque inime cacuaetichine jadya bacatsu pureama jucuaque

²Yudijidya cuejanuca, canerecati jadya junucaya micuana queja. Neiyuhuequetinucacue ecuana. Ni ejeque buchique micuana ecuanara jidama tsehue bahua ama, jida tsehue camadya. Ni ejeque buchique tuque ecua jidama ahua ama. Ni ejeque tuque ecua na yuamaturahua ama. Ni ejeque tuque ecua na ijahue ahua ama. ³Jutiya ama tuque ecue inime micuanara ecua na iyuhueda ebajacauque. Yudijidya cuejanuca micuana aya, era icuene cuejachineque. Dyaque iyuhueda micuana ecuanara baya. Majutsu, jadya ama juatsu chachara micuana ecuanara iyuhueda bajacaya ama. ⁴Eratu ejeneyadya micuana jida tuyu aniyaque. Adebajacaya amadya micuana era, eje tsehue quisaratiyaque micuana jidaque. Arepa ique canerecatiya ama bucha, canimehuallatiya ama ique; pureama jutidya juya micuana adebatsu, micuana eje bucha juyaque bacatsu.

⁵Macedoniaju juetichine equeque rique ecuanaja canajara aijama. Dutya queja ecua na eje bucha ataqui ama bucha baya. Yusu adeba baecua cuanaquetu cahuaitechine ecua na tsehue. Catiyaque ejuu bucha ecua na cabatichine. Jidama inime ishü tuque bachine Cristo queja ecatyati cuanaque, ecuanaja mere yanacana ejuu tibu. ⁶Yusuradyatu nime casaturajacaya ama peya inime juya cuanaque. Tito junachine eque ecua na Yusura nime casaturachine. ⁷Tuque junatsu tura ecua na cuejanachine micuana eje bucha anie juyaque. Micuanara patu tuque dyadi nime casaturatsachine tuhua micuana queja jutichine patya. Micuanarapa ecua na bacara ebaridya aya. Dyaque peya inimepa micuana juchine micuana eje bucha juchineque adebatsu. Cuejachine tura ecua na micuanarapa era cuatsashachineque acara ebari aya jadya. Titora cuejaetiayaju bacatsu, dyaque pureama juchine.

⁸Quirica era cuadishayaque isaratsu micuana ejetsunueque ama peya inime juchine, ecue micuana nereda ataqui juchine tibu. Icuene tuque jidama inime ishü bachine micuana quirica eque nereda aishü. Ecue jadya ataqui juya tibu micuana jadidya achine. Jadya tibudya tuque jidama amadya inime baya amena quirica cuadishatsu. ⁹Yusu cahuaitechahuaque caadibatitsu micuana peya inime juchine. Jadya cabatitsu micua na inime cacuaetichine, Yusura ecua na amerecara aya bae. Jadya tibudya ique pureama juya, micuana peya inime juchine baatsu ama, micuana inime cacuaetichine baatsu. Jadya tibutu jidadya juchine ecue tumeque quirica cuadisha ishü. Tumeque quirica cuadishatsu micuana ni riya piji buchique yuamaturachine ama. ¹⁰Yusu cahuaitechahuaque peya inime juya cabatitsu, inime jutidya ecua na cacuaetitaqui. Inime cacuaetihuaju ecua na Yusura Ijahua quejaque inajacamereya, tuaqueja amere ishü ni eje tupu jacanuca ishü ama. Pureama ecua na juya, einajaca cabatitsu. Yusu adeba baecua cuanaque bacue peya inime cabatitsu, inime cacuaetiya ama. Japada jutidya tuna-

jatu Yusu babuque majutsu ni eje tupu jipe ishü ama. ¹¹Yusura micuana peya inime cabatishahua micuana jidama juchineju. Jadya cabatitsu tuque micuana Yusu pureamaturanucacara aya. Amena micuana caadibatidyadya jidama juchineque. Jadya juatsu micuana Yusu queja canerecati chine tuja micuanaja jucha cuana apupasha ishü. Amena micuana educuju cahuaitei, bisu jadya juya tume micuana tsehueque cajuchatichineque baatsu. Iyacia micuana amena bajida juya Yusu micuana tsehue ecahuaitiju. Amena micua na bacacara aya era jida cuejayaque. Amena micuana bacara ebari aya. Amena micuana nrecaturamerecara aya ecajuchatique. Jadya cuanajudya micuana ejitaju juhua amena micuana ama jucha metseque. ¡Dyaque jidadya taa micuana Yusu tsehue cajuchatitsu peya inime juyaque!

¹²Riyaque quirica rique huenehua jidama juhuaque camadya micuanaja nrecatura ishü ama, ecahuaitishaqui juhuaque camadya tsahua ishü. Huenehua tuque era micuanaja ecua na tsehue iyuhue aniyaque ejitaju amere ishü, era amerehua eque juyaque. Yusratu adebaya riyaque yunerique. ¹³Ecue quiricara micuanaja inime cacuaetishahua tibu, ecua na dyaque cacasatihua, micuanara ecua na iyuhueda bayaque bahue juatsu.

Titotu pureama juchine, micuanara jida batsachine cabatitsu. Micuanara patu tsahuachine tuque inime tsapema juneni ishü. Tuque rehua juetinucatsu tura cuejaetihuaju ecua na dyaque pureama juchine. Nime casaturachine camadya ama tura ecua na; pureama ecua na juchine. ¹⁴Tito micuana queja cuama jariju tuque "Corintoju cuanaque tuna jida. Jida tunarami batsaya", jadya achine. Pusha amadya, tuque jutihuaju tuque micuana jidadya batsachine, era tuque "Jida tunarami batsaya", jadya achine eque cuitadya. Tunara jida batsahuajudyatu ejitaju ique pusha pusha ama juyaque. ¹⁵Titora micuana dyaque iyuhueda baya, tuque micuana queja junenitichine patya micuana tura amereya eque juchine baatsu. Dyaque micuana muibachine. Ni aiju buchique cahuaitechahua micuana achine. Tume cuanaque adebatsu tujatu micuana tsehue dyaque iyuhue aniya. ¹⁶Ique micuana tsehue pureama juya micuana era cuejaya equedya juya baatsu.

Pureama tsehue ecuanaja Yusu chipiru tyataquique

8 Peya micuana cuejaya, ecue eatsehuequi cuanaque. Yusutu dyaque jida juhua Macedonia yahuaju aniya cuana tsehue Jesús queja ecatyati cuana tsehue. ²Dyaque nrecada tuna atahua tuna Jesús queja catyatihuaju. Jadya ama bucha tuna dyaque pureama juya. Dyaque umada tunajatu nrecada cuanaque tyahua, arepa tuna cuitadya nrecada juya ama bucha. ³Eratu adebayadya tunara eje uma tyataqui bayaque tyachineque. Tyataquique bare cuitadya tunajatu tyachine. Tunaja inime taca tyau tunajatu achine. ⁴Cuejanuca cuejanuca tunara ecua na achine: "Ecuana ratu tyacara ebari aya chipiru Judeaju nrecaca-

da cuanaque Jesús queja ecatyati cuanaque. Neduju-cue tunaja", jadya tunara ecuana achine. ⁵ Cuji cuita juatsu tuque ecuana inime tupuchine tunara riya piji camadya chipiru etyau bucha. Tunara bacue dyaque umada tyachine. Icuene cuita "Ecuana miaqueja catyatiya mira cuatsashaya eque cuita juishu", jadya tunajatu Ecuana Cuatsashaquique achine. Tumebaedya tunara ecuana achine: "Micuanara cuatsashaya equedya dyadi ecuana jucara juya" jadya. Jadya tuna juchine, Yusuja inime eque camadya jadya juyaque adebatsu. ⁶ Tito micuana quejaju tuque chipiru sitameretibunechine nrecada cuanaja ishu, micuanaja canerecabati tuna queja aniaque caadabamereti ishu. Macedoniaju cuanara tunaja chipiru tyacara ayaju tuque Tito achine: "Cuacue Corintoju. Tsahuaticue ecana nrecada cuanaja ishu chipiru sitatilla", jadya tuque achine. ⁷ Micuana micuana dyaque casaturatahua Yusu mere ishu, peya cuana bucha ama. Micuana micuana Jesús queja nimee juajeya, tura eje bucha aana ahuaque adadibuequeque ejeneya tibu. Micuanaratu jida cuejaya Yusura cuejamereyaque; pana adeba micuana aya tujaque. Eje buchadya tsahuae acara micuana peya cuana aya. Dyaque iyuhueda micuanara ecuana baya. Dutya riya cuanaju Yusura jidaque tyahua tibu tuque micuanaja injeda tsehue ama Jesúsja cuanaque nrecadaque tsahua ishu chipiru tyataqui.

⁸ Era ama micuana casada tsehue jadya tsahuameree aya nrecada cuanaque. Peya cuanara tuna tunaja taca inime tsehue tyaya chipiru. Nime adebaya micuana era. Micuanara ni ecana tume bae tyaedya aya chipiru, tume micuana ejitajudya juya yuneridya micuanara peya cuana Jesús queja ecatyati cuanaque iyuhueda bayaque. ⁹ Micuana micuana bahuedya Ecuana Cuatsashaqui Jesucristo ecuana tsehue jida jujacayaque ama. Dutya metseque ama buchatu tuque nrecada aima juhua ecuana jiteque. Jadyatu juhua, ecuana ecuanara dutya ai tuja biji eque ani ishu sareyaque tyaishu.

¹⁰ Cuejaya micuana era inime tupuyaque nrecada cuanaja ishu chipiru sitayaque. Juchineque maraju tuque micuana sitatibunechine chipiru nrecada cuanaja cuadisha ishu. Dyaque pureama tsehue tuque micuana ecana tsahua ana achine. Peya cuanaja jadya tsahuae ama jariju tuque micuana tsahuacara achine. ¹¹ Jutaquiju iyacua neatillacue micuanara atibunechineque. Pureama tsehue micuana chipiru sitatibunechine; tumebaedya pureama tsehue nucadya nesitatillacue nrecada cuanaja cuadisha ishu. Netupume inime: "Chipiriqui juatsu piisi tuque nrecada cuanaja ishu chipiru iyasicuaya" jadya. Neiyacue micuanaja eje uma piji aniaque. ¹² Yuneridya ni micuana tsahuacara aya, Yusratu jidama ama inime baya eje uma micuanaja aniaque tyaishu. Tura ecuanabacaya ama ecuanaja aijamaque.

¹³ "Micuanaja ai aniaque tereya tupu peya cuana netyacue tunaja umada ani ishu", jadya ama micuana aya. ¹⁴ Iyacua cuita tuque micuanaja jetiama ania. Judeaju Jesúsja cuanaque bacue nrecada. Jadya

tibudyatu micuanaja tyataqui chipiru tuna tsahua ishu. Peya huecaca ni micuanaja aijama ai, tume micuana tunara etsahuaudya. Jadya catsahuatie juatsu tuque micuanaja dutyaja tupu ai eaniu. ¹⁵ Jadidya tu Yusuja quisarati ehuene: "Jetiama huesahua cuanajatu anidadihua ama; umadama huesahua cuanaja bacue aijama juhua ama". Jadyatu quisarati ania dutya tupu catsahuatie juya cuanaja ishu.

Titora, tuatsehue cuacuare cuanara nrecada cuanaque chipiru tyau, casatura jadya aticuareque

¹⁶ Ecuana micuana tsahuacara aya bucha, tsahuaedya micuana Titora acara aya. Jadya tibudya tuque ecue abahue: "Yusurupai Yusu, mira Tito riyaque inime tyaya tibu", jadya tuque ecue Yusu abahue. ¹⁷ Corintoju micuana queja cuanuca ishu ecuana quisaratinucachine patyatu tuque en cuitadya juchine. Ecuana tuque cuaishuque bacaduramaju cuitadyatu tuque cuacara ebari juchine tuja inime tacadya jutidya. ¹⁸ Tuatsehuedya tuque ecuana cuadishaya peya ecuana tsehuequique. Tuquetu jida mere juya Yusuja quisarati cueja juyaque. Dutya queja Jesús queja ecatyati cuanaratu pana adeba aya; muibaya tunaja tuque. ¹⁹ Tunaradyatu mepechine ecuana Jerusalénju chipiru iyara cuayaju ecuana taji ishu. Dujuya tuque ecuana chipiru nrecada cuanaja ishu, tuna ecuanara iyuhueda bayaque adebamere ishu. Dujuya tuque ecuana Jesúsja cuanaque peya cuana tsehue catsahuatiyaque bamere ishu. Jadya baatsu tunajatu Ecuana Cuatsashaquique pureama adadiya.

²⁰ Jetiama tuque ecuana chipiru dujuya. Ni ejeque buchique tuque ecuana quisaratishacarama aya: "Tunaja ishudya jutidya tunajatu chipiru dujuya, nrecada cuanaja ishu ama" jadya. Jadya tibudya ita taca ama cuaya, ecuita cuana jida eadeba tsehuedya, ecuanaja ishu ecana jidama equisaratiu tibu. ²¹ Ecuana Cuatsashaquiratu ecuana inime cadujutiyaque adebaya. Areque ecuana ecuita cuanara dyadi tume bucha adebaedya eau.

²² Tatse tsehuedya tuque cuadishaya peya ecuana tsehuequique. Bahuedya ecuana riyaque dyaque jidadaque, peya tsahuacara juyaque. Eje uma nime adebadya tuque ecuana ahua. Ejeneyadya tuja tuque micuanara nrecada cuanaque chipiru tyacara ayaque. Jadya tibudya tura micuana baticara ebari aya. ²³ Tito tu ique Ecuana Cuatsashaquique mere juyaju ique tsahuaquique. Tuatsehue cuayaque ecitse tu ecuana tsehuequique. Macedoniaju cuanaque Jesús queja ecatyati cuanaja ecuadishaque tatse. Tatse jida inime cadujutiya eque tatsejatu peya cuana Cristo muimereya. ²⁴ Jida iyuhueda tsehue ecana nebatsacue. Era cuejehua equedya nejucue. Micuanara jadya batsae ahuaaju, Cristo queja ecatyati cuanaque tuna cuadishaqui juchine cuanara paadeba micuanara ecana jida batsachineque.

Pablora ecana "Icuenetadya nrecada cuanaque tsahua ishu chipiru nesitacue" jadya acuareque

9 Eje uma cueja jatsu micuana eau. Judeaju nrecada cuanaque Jesús queja ecatyati cuanaque chipiru tyaishu. ² Eratu adebaya micuanara nrecada cuanaque dyaque tsahuacara ayaque. Icuene ique quisaratichine Macedonia juque Jesús queja ecatyati cuana tsehue. "Corintoju cuanara tumeque epu japadama aniya cuanara jadya tuna tunaja inime taca tyau acara aya chipiru Judeaju cuanaque tuna tsahua ishu. Riyaque mara cuetichine equeque tunajatu ecana jadya tsahuae acara aya", jadya tuna cuejachine. Micuanara tsahua ana ayaju bahue juatsutu Macedoniaju cuanara dyadi tsahuacaradya achine. ³ Icuene tuna cuejachine micuana Corintoju cuanara nrecada cuanaque tsahua ishu chipiru tyacara ayaque. Aijama ni chipiru esitaque ecuanara jutihuaju, tume taa micuana yanacana sumi achine. Jadya tibudya rique icuenea cuadishadya aya riyaque ecuita cuana micuanaja amena chipiru esita juishu. ⁴ Ique Macedoniaju cuana tsehue junatitsu ecuanara ebisunatiu, micuanaja chipiru sitama jari banatitsu, micuanaja amena esita bucha baya tibu. Micuana bacue tumebaedya ebisuu. ⁵ Jadya tibudya tuque icuenetadya Tito peya cuana tsehue cuadishaya ique junatimajudya micuana chipiru sita tsahua ishu. Nesitacue micuanara aana achine baedya. Ique jutihuaju amena dutya esita paju. Esita ni micuanaja amena chipiru aniya, tume micuana peya cuanara pana adeba aya yuneridya micuanara ecana micuanaja chipiru tsehue nrecada cuanaque tsahuacara ayaque. Tume tuna bahue judadiya micuanara casada tsehue tyamereyaju ama tyayaque, micuanaja inime taca tyau ayaque.

⁶ Neadebacue riyaque: "Ejera ni umadama ai uhuaya, tumebaedya tujatu huesaya umadamadya. Ejera ni uhuaya jetiama, jetiamadya tujatu huesaya". ⁷ Icuenetadya pana tupu inime neacue eje uma chipiru tyacara ayaque. Peya inime tsehue ama netyacue chipiru ni ejera casada tsehue tyamereyaju ama. Pureama tsehue netyacue. Yusratu iyuhueda baya ejera pureama tsehue chipiru tyayaque. ⁸ Yusujatu casa aniya micuana jetiama chipiru tyanitya ishu. Dutya jidaque tura micuana etyau. Dutya ai micuanara sareyaquedya tuque micuanaja aniajeya. Jadya aatsu tuque micuanaja anidadiya pureama tsehue nrecada cuanaque tsahua ishu tunaja jida ishu. ⁹ Jadidya tu ehue Yusuja quisarati: "Tilla tupu amatu Yusuja tyabahue aima cuanaque. Jida tsehue tujatu ecana bajacaya ama".

¹⁰ Yusratu tyaya tee puji ecaca uhua ishuque. Turatu ehuahue ehuijaque daneshaya, ecuanaja ara ishuque ani ishu. Turadya micuana tyaya dutya sareyaque. Umaneshayatu dyaque umada micuanaja ai aniyaque, micuanaja aima nrecada cuanaque tsahua ishu.

¹¹ Jadya tyae micuana Yusura aya jetiama micuanaja nrecada cuanaque jetiama tyaishu. Micuanara sitachineque ecuanara Jerusalénju dujuhuaju, tuhuaque nrecada cuanaratu yusrupai aya Yusu,

micuanara dyaque tsahuahua tibu. ¹² Jadya tsahuae nrecada cuanaque aatsu tuque ecuanara ecana tunara sareyaque jipidya ama tyaya. Tumebaedya tuque ecuanara ecana Yusu yusrupai pureama jadya amereya.

¹³ Micuanara cuadishayaque inatsatsu tunajatu Yusu pureama aya. "Corinto juque micue cuanara ecuanara dyaque tsahuahua. Pusha ama cuitadya tuna Cristo queja catyatihua, tura cuatsashaya eque ecana juya tibu. Ecuana tsahuayaju tuna ejitaju juya Cristo queja yuneridya catyatihuaque", jadya tunajatu Yusu aya. ¹⁴ Yusu queja tuna bacabacajacaya ama micuanaja ishu, micuana dyaque iyuhueda baya tibu. Yusrupai tunajatu Yusu aya, "Miquemi Corintoju cuana tsehue dyaque jida juhua", jadya tunajatu Yusu aya. ¹⁵ Yusura ecuanara dyaque jida iyuhue tsehue naruya. Tura ai tsujema tyau ahua buchique; tumeque etsujequi piyebatilla tupu ama buchique tume. Jadya tibudya neara. "Miquemi dyaque jida ecuanara tsehue", jadya tuque ecuanaja ataquí.

Yusura Pablo Jesúsja quisarati cueja ishu cuatsashacuareque

10 Ique Pablo. Yusura cuatsashaya tibu micuana micuanaja jida ishu cuejaya. Cristora ecuanara jida inime tsehue cuejaya tibu, micuana era cuejacara aya. Tura ecuanara jida tsehue baya. Jadidya micuana era bacara aya. Jadya ama bucha umaera aya erapa micuana mubaya jadya. Erapa micuana quirica eque camadya nereda aya, japada equera camadya jadya. Amena micuana tsehuejupa ique baji usi, jadya tunara aya. ² Ique tuhua jutitsu micuana casada tsehue nereda aticara aya, Yusura ique cuadishahuaque ejitaju cabamereti ishu. Jadya ama bucha tuque jadidya atiya, jida ama aniya jari cuanaque. Umaera aya iquepa Yusuja ama ecuatsashaque. Erapa ecue casa eque cuitadya jutidya ecana era amereya eque jucarama juya cuanaque nrecaturaya, jadya tunara aya. Ique tuhua jutitsu tuque Yusuja cacuatsashati casada tsehue nereda atiya ecue ishu jadya quisaratiya cuanaque. ³ Rehua riyaque yahuaju ecuanara Yusu adeba baecua cuana ducu aniya. Jadya ama bucha ecuanara jadya jutidya casa tsehue ama tuque ecuanara ecana Cristo queja catyatishamerecara aya. ⁴ Riyaque yahua juque casa tsehue ama ecuanara aniya, Yusuja casa tsehue. Riyaque casa tsehue ademe tuque ecuanara Cristo tsehue cahuaiya cuanaque casa secaya. Yusuja casa tsehueju tunara ecuanara ijahue ataquí ama baya. Sudaru cuanara etare jida eaque eyuamaturau bucha jadidya tuque ecuanara tunaja casa pana yuamaturatilla aya. ⁵ Tunara ecuanara ejenemerecara aya tunara yunerique ama ejeneyaque. Dyaque bahueque bucha cabatitsu, tunara ecuanara Yusu adebamerejacacara aya. Tunaja inime taca eque, Cristora cuatsashaya eque juma juatsu cuana Ijahua quejaque einajaca ejuu bucha tunajatu inime juya. Peya enubiuju etare epene buchique tuna. Jadya ama bucha tuque ecuanara ecana Yusuja casa tsehue jadya quisaratishajaca inime tupumerejaca jadya aya. Sudaru cuanara etare pene

ishuque eyuamaturatillau bucha, jadidyatu ecuanara yuamaturatillaya tunaja casa eje umaja Cristo adeba ishu, tura cuatsashaya eque tuna juishu. ⁶ Tuhua junatitsu bahuedya junatiya eje cuanaque era amereya eque juyaque, eje cuanaque era amereya eque ama jadique. Cuatsashaya eque ama jubaecua cuanaque tuna emajaca tyaya inime cacuareti ishu. Dutya ecana inime cacuareticarama juya cuanaque tuna era nerecaturadadiya.

⁷ ¿Eje bucha juatsu jatsu umaera ecuepa aijama ejeque casada tsehue cueja ishuque jadya aya? Umae tuhua cuanaque tuna juya tuna cuita camadyapa Cristoja ecuadishaque jadya. Ique, eatsehue juneniya cuanaque jadyapa ecuanara Cristoja ecuadishaque ama. Tuna yuneridya Cristoja ecuadishaque caadebatiya tibu, paadebadya tunara ecuanara dyadi tumebaedya Cristoradya cuadishahuaque. ⁸ Icuene micuana cuejaha ique Ecuana Cuatsashaquira mepehuaque tuja quisarati cuejaqui juishu. Bisutsu ama micuana cuejanucaya, yuneriquedya tibu. Yuneridya ique jadique. Turadya ique cuatsashahua. Turadya ique mepehua ai micuana yuamaturatilla ishu ama, Yusuja Espiritura micuana amerecara aya eque juaje ishudyu jutidya tsahua ishu. ⁹ Bajitura ishu era quirica cuadishaqui nereda bucha cuejae jadya ahua bucha micuana inime tupumerecarama aya. ¹⁰ Era quirica cuadishaya eque camadyapa micuana casada tsehue nereda aya. Huarajira cuana ehue neu buchapa hueneya. Micuana tsehue cabatitsupa micuana bajida tsehue isaraya. Aishupa tuna ique quisaratiyaque bacahuanama. ¹¹ Jadique quisarati tu pusha pusha. Era quirica eque nereda ahua bucha, neredaedya micuana atiya micuana queja jutitsu.

¹² Umae tuna tuna tacadya jutidya casumitiya, tuna tacadya jutidya cacuatsashati cuana quiyatihua eque anitsu. Inimema tuna, peya cuana bucha dyaque jida bucha cabatitsu. Ique ita taca casumitinime ama. Peya cuana bucha dyaque jida cabatinime ama ique.

¹³ Yusura ni ique cuatsashaquena ama juhua, tume jadya ama ique equisaratiu: "Yusura cuatsashayajudya ique cuaya". Yusradya ique cuadishaya. Turadya ique cuejaha eju ecue tuja mere ataquique, eju ecue tuja mere ataquimaque jadique. Turadya ique cuadishahua micuana Corintoju cuanaque tsahua ishu. ¹⁴ Yusradya ique cuatsashahua micuana queja cuaishu. Jadya juyara tuque Yusura ique amerehuaquedya aya. Eradya micuana cueja metse ahua jidaque quisarati Cristora micuana Ijahua quejaque einajacamereuque.

¹⁵ Umaera micuana cuejahuadya Yusuja quisarati. Jadya tibudya "Pablo tuatsehue juneniya cuanara peadyatu Corintoju cuanaque Yusuja quisarati bahuityahua", jadya ejeja buchaja inime paju ama. Era micuana eje buchadya Cristo queja nimeedya jutidya amerecara aya. Jadya tibudya ique micuana queja cuanucacara juya micuana tsahuatinuca ishu. Micuanara amena Yusuja quisarati pana adeba ahujaju, tuque ecuanara peya cuana ecuejanucau. Ique cuaya eju ique Yusura cuadishayaju cuita camadya. ¹⁶ Tume

micuana amena tsahua amena aatsu ecuanara ecuaue Cristoja quisarati cuejara, Corinto yueque tibene aniya cuanaque Yusu queja judiru ishuque quisarati cuejara. Eju peya cuanaja cuejamaju camadya ecuanara cuaya. Tee metsequi juque euhuaque earaqui huesaya bucha ecuanara juya ama. ¹⁷ Jadya tu ehue Yusuja quisarati: "Ecuana ecuanara dyaque jida' jadya ecuanara jutaqui ama. 'Ecuana Cuatsashaquique peadya camadya tu jidaque' jadya camadya ecuanara jutaqui". ¹⁸ Jida ecuanara Ecuana Cuatsashaquira sumiyaju camadya, ai ecuanara taca casumiti juatsu ama.

Pablo pusha pusha quisarati cuejaqui cuanaque bucha ama jucuaque

11 ¿Areque micuanara ebacaudya jutidya ique inimemaque equisaratiu bucha quisaratie juyaju! Nebacacuedya jutidya ique. ² Yusuatu jadique bijidama tumebaedya ecue micuanara Cristo jacayaque juatsu, peya queja catyati ishu. Era micuana Cristo queja cuita camadya catyatishahua. Epuna ehue ebari yahuique juya tsehue camadya caquemiti ishuque buchique tume. Epunajatu tumeque deca camadya iyuhueda bataqui, ai peya ama. Tumebaedya micuana Cristo jaque cuita camadya jutaqui. Tuque junanucahuaju micuana bameretsacara aya tuque iyuhueda bajacahua ama cuanaque. ³ Era micuana jidama inime ishu baya micuana jahue eataju. Satanásra Eva jahue ahua bucha, jadidyatu aniya micuana Cristo pureamaturamerejacacara juya cuanaque. Iyuhueda tunara micuana bamerejacacara aya. ⁴ Ique tuhua juticuare patya micuana cuejacuaredya Cristo eje buchique. Cuejacuare micuana era Yusuja Espíritu tu micuana queja junaya jadya. Cuejacuare micuana Yusu queja judiru ishuque quisarati. Jadique ejenetsu micuana Cristo queja catyatihua. Yusuja Espíritu tu micuana queja junahua. Iyacua bacue micuana pusha pusha bahuityaqui cuanara bape cuita bahuityaya, Jesús pa era micuana cuejaha bucha ama. Aniyapa bape eje bucha Yusu queja judirue juishuque. Aniyapa peya Espíritu, jadya tunara micuana cuejaya. Jida pureama tsehue tuque micuana ecana ijacabacaya. Bacatsu micuana ecana ejeneya.

⁵ Tunapa quisarati cuejaquique dutya ebareque jadya tuna catiya. Jadya ama tuna. Era tuna ejeneya ama tuna ique bucha dyaque ejuuque. ⁶ Iquepa cabahuityatihua ama umadaja yacuaju jida quisarati ishu. Pajudya datse jadya eratu jidadya adebaya era ecana bahuityayaque. Etehua bahuitya bahuitya ama juya, dutyaya yacuajudya. Jadya eque ique dutyaradya adebaya ique eje buchique.

⁷ Jadya ama buchatu uma e quisaratiya: "Pablora tuna tsuje bacahua ama, Yusuja quisarati neri ama cuejaha tibu". Ique mere juhua ecue emetucu tsehue ecuita dyaque nerecadaque bucha Cristoja quisarati cuejayaque tsuje bacatsu ama. Jida tuyu di taa tu tsujema cueja ishu. ⁸ Ique Corintoju Yusuja quisarati cueja juyaju, peya epu cuanajura Jesús queja ecatyati cuanara tuque ecue chipiru cuadishacuare. Peya cuanara

tuque ecue chipiru cuadishacuare, ecue micuana ni riya piji buchique tsuje bacama tsahua ishu. ⁹Ique micuana queja jucuare patya ecue ai aijama juhuaju ni ai buchique micuana bacacuare ama ni ejeque. Macedonia juque ecuana tsehuequi cuanara tyacuare dutya ecue ai aijamaque. Ni eje tupu micuana bacaya amadya micuana jaque ecue ishu; bacanime amadya micuana ecue. ¹⁰Ni ejeque buchique tuque tsuje bacaya amadya Yusuja quisarati cuejayaque. Acayaju dutya queja ique junenitiyara tuna bacatiya amadya tunaja ique etsujequi tyaishu. Riyaque ri yuneridya. Ique pusha pusha arida ama, Cristoja inime eque ique aniya tibu. ¹¹“Pablora ecuana chipiru bacaya ama, ecuana iyuhuedama baya tibu”, jadya ni tu umaeja inime juya. Jadya juatsu ama. Dyaque iyuhueda micuana baya. Yusuratu adebaya.

¹²Tsuje bacaya amadya micuana era Yusuja quisarati cuejaya tsuje. Pusha pusha cueja juya cuanara micuana tsuje bacaya bahuityaya tsuje. Era ni micuana etsujebacau, “Dutya tupudya ecuana Pablo tsehue; tura dyadi micuana tsuje bacayadya tibu”, jadya tuna ejuu. ¹³Pusha pusha tsehue tuna Yusuja ecuadishaque. Tuquepa mereya jadya juya. Ijahue tunajatu ecana aya, Cristoja quisarati cuejaquique neripa ecana jadya tuna ejenemere ishu. ¹⁴Butseejuque amadya tu tumeque tunara peya cuana ijahue acarae ayaque. Satanás cuitadyatu ecabapetiu barepa juque Yusuja quisarati cuejaqui bucha. Ecuana ijahue aishutu tuque ecabapetiu ai jida piji bucha, hueca jida piji bucha. ¹⁵Satanásra ni ecuana jadya ijahue acarae aya, jutaquiju taa tu bape ama didya tuque merequi cuanaque ecuana ijahue aishu ecuita dyaque jida bucha cabapeti ishu. Ejeque huecaca tuna jidama atabuque tuna cuitadya jidama juhua tibu. Tuna eje bucha juhua eque cuitadya tuna Yusura tsujetyabuque.

Pablo Yusuja ecuadishaque neri juya tibu canerecaticuareque

¹⁶Cuejanucaya micuana era. Ique inimema bucha micuanaja inime paju ama. Jadya ama bucha, arepa micuanara ique ai baecuasi baya ama bucha, nebacacue ique quisaratiyaju. Riya piji micuana cuejanucacara aya ique eje bucha juhuaque, nerecada juhuaque jadya, Cristoja quisarati cuejaqui neri juya tibu. ¹⁷Ita taca casumiti juatsu, Ique Cuatsashaquique juhua bucha ama ique juya, inimemasique bucha jutidya. Ecuana Cuatsashaquira ique ni riya piji buchique casumitishahua ama ni aiju. Jadya ni juya, tume inimema buchadya jutidya juya. ¹⁸Umaetu tuna taca casumitidya jutidya juya, peya cuana queja casumereticara juatsu. Cacuejatijacaya ama tuna aique, eje buchique jadique. Tumebaedya ique cacuejatiya ique aique, eje bucha juhuaque jadya. ¹⁹Micuana micuana dyaque inimequi cabatiya. Jadya ama bucha micuana pureama tsehue ijacabacaya tume inimema cuanaque. ²⁰Micuanara tuna jiyuya Yusuja ecuadishaquepa ejuu jadya juya cuanaque. Tuna tuna casada tsehue micuana queja cameremeretiya. Tunara

micuana secaya micuanaja aniyaque, micuana aima amere ishu. Ijahue tunara micuana aya. Tunara micuana bacaramaque eata bucha bae aya. Bahuapajaya tunara micuana. Arepa tunara jadya aya ama bucha tuque micuana ecana jida tsehue batsaya. ²¹Ique bacue bisuhua micuana jadya bae aishu. Casadama juatsu peya jida tsehue bau, jutaquiju taa ique dyaque casadama juhua micuana tsehue.

Cuejajacaya ama tunara micuana tuna cuitadya jutidya eje bucha juhuaque. Casumiti tu inimema cuana jaque. Jadya ama bucha era dyadi micuana cuejayadya ique Yusu mere juyaque, eje bucha juhuaque. ²²Hebreo neripa ecana. Ique tumebaedya. Israel eque ejuracanaquepa ecana. Ique tumebaedya. Abraham eque ejuracanaquepa ecana. Ique jadiquedya. ²³Cristo merequiquepa ecana. Eratu dyaquedya merehua, tunara merehua bucha ama. (Ique inimema bucha quisaratiya.) Cristoja quisarati cueja tibu eje uma ishatana etare apudaju juhua, tuna bucha ama. Eje uma catsacatsa atana juhua huaca biti epica tsehue. Eje uma iyetajeri juhua. ²⁴Israelita cuanaja huaraji cuanara catsacatsa amere pishica ahua ebebacuaju, huaca biti epicaque huitu pajida tsehue. Eje uma nerecatura tunara jadya catsacatsae aatsu ahua. Dutya catsacatsaju tunara quimisha tunca puscurucu earacana cama acuare. ²⁵Catsacatsa amere quimisha acuare acui tsehue Romaju cuanaja huaraji cuanara. Maremaresha pidya tunara tumu tsehue acuare. Huidijeri quimisha jucuare cuaba aridaque ique dujuquique nubitsu. Jupidya jucuare cuaba aridaque enaju nubihuaju ena patya dedaju peadya meta, huecaca juchinepe nuca jadya. ²⁶Epu cuana tupu juneniyaque eje uma pereu cabatihua majutaqui. Eje uma rique ahua cueri espere epesitana cuanaque. Junenihua ique chiri puji cuana casada tsehue ai secaqui cuana juneniya eque. Ecue ata israelita cuanara eje uma iyecara ahua, tumebaedya israelita ama cuanara. Eje uma acuatsuru ahua epu cuanaju ecuita cuana dyaque ecahuaiti cuanara. Ecuita tsecada anitaya cuanaju juneniyaque, enaja ecuaque eque cuaba arida cuana eque juneniyaque majutaqui pereu tsehue junenihua. Eje uma iyecara ahua ique iyuhueda bucha baqui cuanara. ²⁷Dyaque casada mere juhua casteretsu rihuiya tupu. Eje uma cuetishae meta ahua tahuimara. Ara idu, iji idu jadya nerecada juhua. Eje uma aijamae ecue juhua ara ishuque, jutu ishuque, eju tahui ishuque. ²⁸Riyaque camadya ama, tumebaedya tuque jidama inime ishu baya dutya epu cuanaju Jesús queja ecatyati cuanaque. Era tuna eje bucha Yusuja biji equedya jutidya anishacara aya. ²⁹Jesús queja ecatyatique jidama inime cuanaju baatsu, ique tumebaedya peya inime juya; ique cuitadya tumeque inime cuanaju nubihua bucha tuque ecue inime juya. Tunara Yusu cahuitisha ishuque ayaju ique cahuaitiya. ³⁰Ique ni ita taca casumiticara ejuu, tume ique canerecaticuareque eca-sumititi, ai era inimeradya jutidya ahua cuanaju ama. ³¹Yusura ique adebaya pusha pusha ama juyaque. Tuquetu Ecuana Cuatsashaqui Jesucristoja Etataque.

“Dyaque jida, casada taa tuque”, jadya neajacara ama.
³²Yusura ique naruhua ecue quicueneti ishu casa aijama juhuaju. Tume patya ique anicuare Damascoju. Anicuaretu ecuita huaraji Aretasja tuhua cuanaque naru ishu eiyaque. Tumeque ecuitara ique iyecara acuare. Jadya tibudya tujatu nityacuare epu ebari etsecue naruqui cuanaque, ique cuinanayaju inatsa ishu.
³³Ecue ecare eadeba cuanara tsahuacuare. Jiti ebariju tunara tehuacuare. Epu ebari penequi dyaque eque emajaca eque tunara jiti ebari soga tsehue tisunetsu butyacuare. Jadya huanae ique jucuare.

Jesúsra Pablo petamerecuareque, tuque cuitadya eje buchique cabamereticuareque

12 Ecue ishu tu jidama ita taca casumiti ishu. Jadya ama bucha micuana cuejaya ique eje bucha juhua cuanaque. Eje uma bau tuque ahua tahuiju buchique ejitajuque ama cuita, ejeja bamaque. Ecuana Cuatsashaquira bamerehua ique bahuitya ishu. Bamerehua tura ique etehua neri cuitaque. ²Amena peadya tunca pushi earacana mara ique Yusura tuja yacuaju yume duju acuareque. Yuneri cuitadya ique jadya juhua Cristo queja ecatyatique. ¿Riyaque inime eque cuitadya tura dujucuare? ¿Tahuiju bucha ni taa tura dujucuare? Caadebatiya ama ique. Yusura camadyatu adebaya. ³Muya jutidya tura dujucuare tuja yacuaju, tuque aniyaju. Cuejanucaya rique era. Eje bucha dujutanae cuana taa ique jucuare, riyaque inime eque cuitadya ni, tahuiju ni. Yusura peadya camadyatu adebaya. ⁴Tuhua tuque bacahua dyaque muida, mudaque cuejataquique ama. Cuatsashatahua ama ique peya cueja ishu. Tuhua tuque bacahua quisarati dyaque etehuaque peya cueja ishuque ama. ⁵Jadya ique jucuare, ecue casa eque ama, Ecuana Cuatsashaquija casa eque. Jadya tibudya ique casumitiya ama. Eratu casumiti ishu aya Jesúsra tuja casa ique casadama eque bamereyaque camadya. ⁶Ique ni eca-sumitiu, Cristora ique bamerehuajudya jutidya, eje buchique ama di taa; tume ique jadya juhuaquedya. Pusha pusha ama ique juya. Casumitiya ama ique jadyaju. Micuanara ique bahuadya ique eje buchique. Micuanaratu bacahuadya era quisarati cuejayaju. Quijacabacamereticara juya, era tahuiju bucha bahua equeque ama, Yusuja quisarati equeque, micuanara era cuejayaju bacahuaquedya.
⁷Cristora ique eje buchique bamerehua cuanaju dyaque inime metseque ecabatiuju, tura ique jidama inime cuana eque cuetishahua. Acuijara tatahua bucha jee; jadya ujeedya tuque inimeju camadya bahua. Yusuratu Satanás cuatsashahua ique jidama inime cuanaju amere ishu. Yusura jadya amereya tibu, tuque ecue jidama inime cuana aniya, ique ejeque ecuita baequedya jutidyaque enimeaputauju. ⁸“Patere taa eaqueja inime jidama cuanaque”, eje uma jadya au tuque ahua Ecuana Cuatsashaquique. Jadya aquimisha tuque ahua. ⁹Quemitsa quimisha Ecuana Cuatsashaquira ahua: “Secaya ama mique jidamaque inime cuana. Jadya ama bucha narujacaya ama mique era

iyuhue tsehue. Riyaque camadya tuquemi sareyaque. Mique casadama cabatiyaju, ecuetu aniya mique dyaque casa tyaishuque”, jadya Yusura cueja cueja achine. Tume tuja ique uje jarasha ishu ebacaa-jeuquedya jutidya, pureama jutidya juya. Cristora ique dutya huecaca casaturaya tibu. ¹⁰Pureama ique jujacaya ama, arepa ique casadama cabatiya ama bucha, arepa tunara ique ijillahuanaya ama bucha, arepa ecue ai aijama paju ama bucha, arepa tunara ique Cristo jaque baatsu jidama aya ama bucha, arepa ique jidama inime cuanaju nubiya ama bucha. Jadya canerecatie juya Cristoja inime eque ique aniya tibu. Jadya ama bucha ique pureama juya. Dyaque casadama cabatiyaju, Cristora ique casaturaya.

Pablora Corinto juque Jesús queja ecatyati cuanaque jidama inime ishu bacuareque

¹¹Ique inimemasi bucha juhua, ecue ishudya jutidya jida quisarati aatsu. Micuanaradya jadya amerehua. Micuanara ni ecue ishu jida quisarati aquena juhua, jadya ama juquena juhua. Micuanaratu jida quisarati aya tume Yusuja quisarati cuejaquipa ejuu jadya cuanaja ishu camadya. Ique tunaja jetiedyaque ama. ¿Ai jatsu tuna juya, ecue dyadi ataqui ama baishu? Ecue casa tsehue amadya datse tuque aya. ¹²Ique micuana queja juticuare patya, eje uma audya tuque acuare Yusuja casa bamere ishu. Tuja casa tuque dutyaja yacuaju eje uma bamere ahua ni ejeque ecuitaja tuja casa eque ataquique ama. Jadique baatsu micuana bape baatsu yatsanaca quisha juhua. Baatsu micuana adebahua era Yusuja dyaque casa tsehue ayaque. Jadya adebae micuanara ique ahua yuneri cuitadya Yusuja quisarati cuejaquique, era cuita camadya Yusuja ecuadisha cuanara ayaque baatsu. ¹³Peja epu cuanaju ique junenicuare patya Jesús queja ecatyati cuanara tsujema tyabahue jucuare ai era sareya cuanaque. Corintoju bacue micuana ni baca pidya acuare. ¿Jadya tibudya ni taa micuana era peya cuana iyuhueda baya bucha iyuhuee ama cuana baya bucha cabatiya? Cahuaitishahua ni micuana era chipiru bacama aatsu, nenerecabacue ique.

¹⁴Bati beta micuana acuare amena. Iyacia micuana batinucacara aya. Tuhua jutitsu micuana bacatiya ama chipiru. Micuana micuana era sareya, micuanaja chipiru ama. Micuana micuana ecue ebacua cuana buchique. Ebacua cuanaquera amatu etata cuanaque baya, etata cuanaquera. ¹⁵Pureama tsehue patsume dutya ecue aniyaque micuanaja jida ishu. Cacasati neri juya micuana tsahua ishu. Jida iyuhueda tsehue micuana ecue bajaca nime amadya, arepa ique micuanara iyuhue apushaajeyaju cabatiya ama bucha.

¹⁶Bahuedya ique umaera quisarati aya cuanaque: “Jejee, pusha amadya ecuana Pablora rehua jucuare patya tsuje bacacuare ama ni riya piji buchique. Jadya ama bucha tura ecuana inime adebabada tsehue sec-ahua etsujequi etehua seca, babi pujira cuanubi ar-madillaju etehua iyemere eau bucha”, jadya micuana umae pusha pusha juya. ¹⁷Ni ejeque buchique tuque

cuadishahua ama micuana chipiru ecue ishuh micuana seca ishuh. ¹⁸ Canerecatihua ique Tito queja micuana cuajimere ishuh. Tuatsehuedya tuque peya ecuana tsehuequique cuadishahua. Micuana micuana bahuedya tatsera micuana ni riyapiji buchique ijahue ahuaque. Tito tsehue yatse beta tupu. Jida tuyu yatse inime cadujutiya. Beta tupu yatse inime cadujutiya micuana tsahuacaraqe.

¹⁹ Ejeja cuana ni tuque micuanaja inime juya: "Pablo ni tu quicueneticara juya, ecuita dyaque inime metseque jucara juya tibu", jadya ni tuque micuanaja nime juya. Jadya ama tuque! Yusu tuque ecue pureamaturataqui, micuana ama. Riyaque micuana cuejaya Cristora cuatsashaya tibu. Dyaque iyuhueda micuana baya, micuana ecue eatsehuequi cuanaque. Dutya ique eje bucha juyaque tu micuanaja Cristo dyaque adebaaje ishuhue. ²⁰ Era micuana dyaque jidama inime ishuh baya. Ique tuhua jutihuaju ni micuana era anishacara aya bucha ama aniyaju batiya. Nereda bucha cuejae ni micuana atiya casada tsehue, arepa micuanara ique bajida jadya aya ama bucha. Umae ni micuana cahuaiti arida jari. Peyaja ai aniyaque bijiseri, peya cuana tsehue masadama cahuaiti jadya ni micuana juya. Umaera ni tuque micuana micuanaja jida ishuhue camadya inime tupuqui aya, peyaja ishuh pusha pusha, peyaja ishuh quisarati jadya ni micuana juya. Umae ni micuana casumiti arida. Umae ni micuana inime yuamaturaque. Jadya anie jutidya ni micuana juya jari. ²¹ Eje uma micuana cajuchaticacarama juya ni micuana inime cacuareticara juya. Eje uma decaratu caquemitiqueremaque jaraquerehua; tumbaedyaje eje uma epunara caquemitiqueremaque jaraquerehua. Bisutada micuana juhua, jadya jucacatsu ama. Peya huecaca cuanucatsu dyaque peya inime, capeyati jadya ique paju micuana eje bucha anie juhuaque adebatsu. Cristo era adebamerehua cuanaque jadya anie juya jari baatsu, Yusura ique dyaque pabisutura micuana jadya anie juyaju.

Pablora inime cacuareti ishuhue cuejacuareque

13 Riya micuana cuaquimisha ishuh cuajitinucaya. Tuyu ama anihua cuanaque tuna nerecaturatiya. Jadya tuque atiya quimishara (jadya ama juatsu betara) jadya tuque eje bucha juyaque cuejatsayaque juatsu camadya. Ehuedya tu Yusuja quisarati: "Ejeque nerecaturama jarijudyatu tume betaja jadya ama juatsu quimishaja tuque jidama juchineque cuejataqui". ² Cuejacara micuana aya micuana cajuchatichuaque, dutyadya micuana. Ique cuabeta ishuh cuacuare patya micuana cuejacuare inime cacuaretiya ama cuanaque tuna nerecaturatibuque jadya. Iyacu micuana cuamadya cuejanucaya. "Jidama juya cuanaque tuna casada tsehue nerecaturatiya" jadya. ³ Micuanara ique Cristoja ecuadishaque ejitaju cabameretishacara aya. Era casada tsehue nereda ayaju micuanara adebadadiya Cristo ique eque quisaratiyaque. Micuana ducudya micuana Cristora adebamerehua tuque casadaque, ai casadamaque ama. ⁴ Casadamaque

emajuu bucha majuetu Cristo jucuaru curusuju. Iyacuatu tuque chacha aniya. Yusuja dutya casa tujatu aniya. Tumbaedyaje ique casadama; ecue cuitari aijamadya casa. Cristo queja ique ecatyati tibu, rique ecue casa aniya. Yusuja casa rique ecue aniya. Ejetsunue tupu ishuh ama buchatu Cristo casa cabameretijacahua, tume baenucadyaje jetsunue ama micuana ecue nereda aishuhue casa bamerejacahua. Iyacu bacue micuana queja jutinucatsu micuana Yusuja casa eque nereda atiya.

⁵ Micuana taca canimeadebati nejucue, ique nenime adebaume. Micuana taca cabacadurati nejucue jadya: "¿Ecuana eje bucha anie juyaque ecuana ejitaju caadebameretitaqui Jesús queja ecatyatique? ¿Jesucristoja casa equedyaje ecuana aniya? ¿Cristo queja ecatyatique jadya ecuana juya, jadicuadya? Tuqueja ni micuana inime catyatijacaya ama, tume tuque micuana pana adebadya aya, tuque micuana peadya peadya tsehue aniyaque. ⁶ Areque micuana eadebau ecuana Jesús queja nimee jucacayaque ama. Ecuana ecuana Cristoja quisarati eque aniya. ⁷ "Tsahuacue micue cuanaque Corintoju cuanaque tunara ai jidamaque eaju", jadya tuque ecuana Yusu abahue. Micuana ni inime cacuaretiya, tume micuana Yusuja casa tsehue nereda anatiya ama. Jadya ni juya, tume tunajatu inime juya, yuneridya ique bajida jadya. Paquisarati ecanatuna eje bucha quisaraticara juya eque. Eratu jidama ama inime baya. Micuana Yusuja biji eque ani ishuhue camadya tuque jidama inime ishuh baya. ⁸ Yusuja quisarati eque neri aniya cuanaque tuna bijidamaduraya ama. Dyaque jida tuna tsahuaya jutidya. ⁹ Micuana Yusuja biji eque aniyaque juatsu ecuana pureama juya, arepa peya cuanara ecuana casadama baya ama bucha. Jutajudya tuque ecuana Yusu bacajacaya ama, micuana tura amerecara aya bae cuita juishuh. ¹⁰ Icuenetadya rique micuanaja quirica cuadishaya, micuana inime cacuareti ishuh ique tuhua jutimajudya. Cuejaya bae ni micuana juya, tume micuana ique jutitsu casada tsehue nereda aya amadya. Ecuana Cuatsashaquira tyahua casa micuana casatura ishuh, ai micuana yuamatura ishuh ama, tumbaedyaje micuanaja tuja Espiritu pureamaturajaca ishuh ama. Tura ique daneshaaje ishuhue bucha amerehua, aijama daneshajaca ishuhue bucha ama.

Camadya ishuhue quisarati

¹¹ Amena ishuh rique riyaque quisarati aya, ecue eatsehuequi cuanaque. Yusura eje bucha amerecara aya eque jucara ebari nejucue. Nebacacue era micuana cuejahuaque. Ecadutyati nejucue Cristo iyuhueda baishuh, cuatsashaya eque juishuh. Eje bucha ani cayuamati, cati cati tsehue ama neanicue peya cuana tsehue. Micuana tuyu jadya anie juyaju tu Yusu micuana tsehuedya. Tura micuana bahuityaya peya cuana iyuhue tsehue baishuh. Anishaya tura micuana dutya tupu nimee peya cuana tsehue, pureama jadya.

¹² Casitatitsu quisaratibare, emetucuju quinati jadya nejudue, peya cuana tsehue iyuhueda cabatiyaque cabamereti ishu.

¹³ Dutya rehua Jesúsja cuanara micuana isaramereya.

¹⁴ Ecuana Cuatsashaqui Jesucristora nenarucue tuja quiyuhuebati tsehue. Ecuana Etata Yusura tuja iyuhue nebamerecue. Yusuja Espiritura netajijacaume. Riya tupa camadya.

Pablo

GALATAS

Riyaque quirica ri Pablora Galacia yahuaju aniya cuanaja ishu cuadishacuareque. Tuhua tunajatu jetiama yunerique quejeneti ama bahuityacuare. "Yusu queja ni micuana judirucara juya, Moisésra israelita cuana dutya cuatsashahua eque micuana anitaqui. Ecuiteda huitu biti micuana catubutitaqui", jadya tunajatu ecana cueja bahue jucuare.

Riyaque quirica tsehue ecuana Pablora bahuityaya Yusura ecuana Jesús queja catyatihuaju Ijahua quejaque inajacameriayaque, ni ejeque cacuatsashati eque juatsu ama. Tura ecuana bahuityaya, Yusupa ecuana pureamat-uraya, tura tuja Espiritu eque cuatsashaya eque ecuana aniyaju, ai ecuanaja baba cuanaja bahue eque ani eque cacasatitsu ama.

Umae versículo cuana cabahuityati ishu jida cuanaque tu riya cuanaque: 2.20; 5.22-23, 25; 6.7,9.

Pablora Jesús queja ecatyati cuanaque isaracuareque

1 Era rique micuanaja quirica cuadishaya. Isaraya micuana era. Ique Pablo. Jesucristoja yana atsaquique ique. Ni ejeque ecuita riyaque yahuajura ama mepehua Jesúsja yana atsaqui juishu. Yusuratu cuadishahua ama ni ejeque ecuita buchique ique Jesús merequi cuadisha ishu. Jesucristora cuitadya mepehua. Tura cuitadya cuatsashahua tuja ecuadishaque juishu. Tumbaedy a tuja Etataquera ique mepehua, Jesús majuhaju chacha nityatsuranucaqui juhuara.

² Era camadya ama, tumbaedy dutya eatsehue cuanaque Jesús queja ecatyati cuanara micuana isaramereya. Dutya micuana Galacia yahuaju cuanaque micuana ecuanara isaramereya, Yusu pureama aishu caradati bahue cuanaque. ³ Yusu ecuanaja Etatara, tumbaedy Ecuana Cuatsashaqui Jesucristora jida tsehue nenarucue tatseja qiyuhuebati tsehue. Tattersa inime tsapema neanishacue. ⁴ Jesucristo cuitadyatu majuhua ecuanaja jucha tsujetyaqui. Tuquetu majuhua ecuanaja ishu, ecuana Yusu adeba baecua cuanaque jidama cuanaque aniya bucha anie ejuuju. Tuja inime tacatu majuhua. Riyaquetu juhua inime ecuanaja Etata Yusuja jadya inime juya tibu. ⁵ [Dyaque jida casada taa Yusu! [Muitanajacaya ama tuque! Jadidya paju.

Aijamatu peya eje bucha eque Ijahua quejaque einajaca juishuque, Cristo eque camadya

⁶ Era taa jidama baya micuanara masadama cuita Yusu jacayaque. Ique tuhua micuana tsehue jucuare patya micuana cuejacuare arepa micuana jucha arida ama bucha Yusura iyuhueda bahuaque. Cuejacuare micuana era, Cristo queja camadya catyatijaju micuana Yusura Ijahua quejaque inajacameriayaque. Cuejayaju bacatsu tuque micuana ejenequere. Tume tuque micuana masadama Yusu iyuhueda bajacuare. Masadama micuana quisarati yunerique ejenejacuare era bahuityacuareque. Tume micuana amena

ejenenucaya peya quisarati peya cuanara jida jadya ayaque.

⁷ Yuneri cuitadyatu aijama peya eque einajaca juishuque; aijamatu peya quisarati Cristoja ecuejaque. Umae cuanara micuana cujishaya. Tunara micuana cuejaya: "Yusu queja micuana judirubuque Moisésja cacuatsashati eque cuita camadya anitsu, ai Cristo queja cuita camadya catyatitsu ama". Jadya pana cuare tunajatu quisarati yunerique acara aya dyaque bape cuita. ⁸ Icuene micuana ecuanara cuejahua Yusu queja judiru ishuque quisarati. Ejera ni micuana bapeque cuejaya, jadya cuejaquique ijahuaja etiquiju panubidiru, ni eje tupu cuinana ishu ama. Ecuanara cuitadya ni, jadya ama juatsu barepaju Yusu tsahuaqui cuanara ni ecuana bape cuejae aya, ijahuaja etiquiju neijehuetanara. ⁹ Ecuanara micuana cuejahuadya; cuejanucayadya micuana era. Micuanaratu bacatsu ejenehua Cristo eque camadya Ijahua quejaque einajaca juttaquique. Ejera ni micuana cuejaya Yusu queja peya judiru ishuque quisarati, tume jadya cuejaquique Yusura ijahuaja etiquiju paijehue.

¹⁰ Jadya quisarati aatsu, ¿micuanajatu inime juya era ecuita cuana pureamaturaya bucha? Jadya quisarati aatsu tuque Yusu cuita camadya pureamaturaya, ecuita cuana ama. Ecuiteda cuana ni pureamaturacara aya, tume taa ique Cristo merequique ama ejuu.

Yusura Pablo eje bucha eque quisarati tsape ishu cuadishacuareque

¹¹ Bahue nejuque riyaque, micuana ecue ebacua bucha cuanaque. Quisarati era cuejayaque tu ni ejeque ecuita riyaque yahuajura inime equeque ama.

¹² Ejeque ecuita riyaque yahuajura ama cuejahua; ecuitara ama bahuityahua. Jesucristora cuitadya bahue amerehua.

¹³ Ique ecue ebaba ecana israelita cuanaja bahue eque anicuare jari patya tuque dyaque nerecatu- racuare Jesús queja ecatyati cuanaque. Micuana micuana bahuedy a ique eje bucha juhuaque. Era tuna

dyaque ujeu bahua. Ecue casada tsehue tuna era acara aya eque ahua; iyecara ebari tuna ahua. ¹⁴Ique ecue ebaba ecanaja bahue eque anicara ebari juhua. Isarahua tuque ecuanaja cacuatsashatira cuatsashayaque. Dyaque jidatu era adebaajehua. Peya eatsehue capajiti cuanatu jadya bahuee ama juhua. Ecuetu bijidama juhua ecuanaja bahue cuana cuaretana ishu. Ecuita cuana tuque tumeque bahue eque amerejacacarama ahua.

¹⁵Yusura iyuhueda bahua, arepa ique jucha aridaque juhua ama bucha. Tura ique mepehua tujaque juishu. Ique ejitaju juma jariju tura mepehua. "Pablotu ecuique; meredadibuque tura ique. ¹⁶Eratu adebamerebuque Jesús ecue Ebacua", jadyatu Yusuja inime juhua. Jadya bameree tura ahua Jesús. Bameretsu tura cuadishahua israelita ama cuanaque Yusu queja judiru ishuque quisarati cuejara. Jadya cuadishae ahuaaju, ni ejeque ecuita tsehue ama quisaratihua. Cuejatihua ama tuque ni ejeque: "Pana cueja acue Jesús eje buchique; cuejacue ique ecue eje bucha cueja ishuque", jadya tuque ahua ama ni ejeque. ¹⁷Ni cuahua Jerusalénju Cristo queja ecatyati cuanaque cuatsashaqui cuana tsehue quisaratira. Arepa Jesusradya tuna ique cuatsashama jariju cuatsashahua ama bucha, cuahua ama ique tuna queja cacuejameretira. Tsunutahua ama ique Arabia yahuaju cuaishu. Tuequedya Damascoju juetinucahua.

¹⁸Quimisha mara juatsu chamacama cuacuare Jerusalénju Pedro queja. Peadya tunca pishica earacana huecaca tuaqueja juticuare. ¹⁹Bacuare ama tuque ni ejeque; quisaraticuare ama ique ni ejeque peya cuana Cristoja ecuadisha cuana tsehue, Santiago tsehue peadya camadya Ecuana Cuatsashaqui tsehuequi tsehue. ²⁰Yuneridya micuana aya, ique pusha pusha ama juyaque. Yusuratu adebaya era hueneyaque. ²¹Pedro tsehue quisarati jadya juatsu cuacuare Siria, Cilicia jadya yahuaju. ²²Cristo queja ecatyati cuana Judea yahuaju aniya cuanara ique adebacuare ama jari, ique peya epu cuana eque cuetiya tibu. ²³Tunara cuita camadyatu bacacuare peya cuana jadya juyaju. "Pablotu inime cacuaretichine. Icuene tura ecuana dyaque nerecaturahua ecuana Jesús queja ecatyati cuanaque. Iyecara ebari tura ecuana ahua. Jesús queja catyatishajacacara tura ecuana ahua. Iyacua bacue tura cuitadya quisarati yunerique cuejaya. Tura cuitadya iyacua cuejaya Jesús queja catyati-taquiye Yusu queja judiru ishu". ²⁴Riyaque ecue quisarati bacatsatsutu Judeaju cuanara Yusu pureama acuaire:

—Tata, miquemi dyaque jida, mira Pabloja inime cuarehua tibu, —jadya tunajatu Yusu acuaire.

Pablo Jesúsja ecuatsasha cuana tsehue quisaratira cuacuareque

2 Peadya tunca pushi earacana mara juatsu yudijidya cuanuca jucuare Jerusalénju Bernabé tsehue. Tito tuque yatse dujuacuaredya. ²Cuacuare tuhua Yusura ique tuhua cuaishu bahue amerehua tibu. Ique

casitaticuare Cristo queja ecatyati cuana cuatsashaqui cuana tsehue cuita camadya. Cuejacuare tuna:

—Eratu israelita ama cuanaque cuejachine, "Jesús queja catyatiyaju micuana Yusura Ijahua quejaque inajamereya", —jadya tuna cuejacuare Cristo queja ecatyati cuanaja huaraji cuana.

Era ni ecana jadique pana cueja ama aquena jucuare, dyaquedya ni tunara cuejamerejacaquena jucuare, tume ni dutya era mere achine cuanaque, aya cuanaque yanacana ejuuque. ³Tunaratu jidadya bacuare era ai eje bucha ahuaque. Titotu eatsehue junenicuare. Casada tsehue ama tunajatu ecuita huitu biti catubutishacuare, griego jucuare tibu, israelita ama.

⁴Tuequedyatu umae ecuita cuana cuejatamaquedya jutidya nubiticuare ecuana ecasitatiju, ecuana quisaratiyaque ijacabacara aatsu. Nubititsu tuna jucuare: "Jesús queja ecatyatiyadya ecuana". Jadya juya tsunumee tuna Tito griegoque, ecuanaja bahue tubutanamaque bahue juatsu quisaraticuare:

—Tuquetu ecuita huitu biti catubumeretitaqui ecuanaja baba cuanaja bahue. Tuyu amatu ecuanaja baba cuanaja bahue juhua cuanaque ajaca ishu. Arepa ecuana Jesús queja catyatihua ama bucha, eje bucha ajacae ni tuque ecuana ama —jadya.

⁵En ama ecuana jucuare ni riya piji buchique. Dutyaja tupu ni ecuanaja inime juquena juhua, tume taa tuque ecuana cuarequena juhua Yusuja quisarati yunerique. Tume taa tuque ecuana cuejaquena juhua ama tuyu cuita Yusu queja judiru ishuque quisarati. Icuene cuejatanahua bae amatu ecuejatanau. Ecuana ni tumeque pusha pusha ari cuanaja quisarati bacaquena juhua, tume micuana ecuanara ijahue aque-na juhua micuana israelita ama cuanaque.

⁶Jesús queja ecatyati cuanaque cuatsashaqui cuanara cuejahua era cuejayaque cuare ishu ama. Tunara ique bahuityahua ama ni ai iyacuaque. Ecuita cuanaratu tumeque ecuita cuana dyaque muibaya. Jadya ama bucha, ique Yusura cuadishahua, tunara ama. Yusura tuque ecuanaja inime tupu cuana adebaya. Tuquetu bahuedya ique tuyu juyaque. Jadya tibudya tu dyaque jida tuque pureamatura ishu, ai ecuita cuana ama. ⁷Ai iyacuaque ique ebahuityamereuque, ecuatsasha cuanaratu jidadya bahua era bahuityayaque.

—Yusuratu cuatsashahua Pablo Yusu queja judiru ishuque quisarati israelita ama cuanaque cuejara. Pedro bacuetu cuatsashahua israelita cuana cuejara, —jadya tuna cacuejatibarecuare.

⁸Tuna jadya quisaratima jariju, Yusura ique casaturahua israelita ama cuanaque tuja quisarati cueja ishu. Ique israelita ama cuana queja ecuadishaque. Pedro bacuetu casaturahua israelita cuana cueja ishu. Tuquetu tuna queja ecuadishaque.

⁹Santiago, Pedro, Juan jadya tuna Jesús queja ecatyati cuanaque naruquique.

—Yuneridyatu Pablo Yusura mepehua israelita ama cuanaque tuja quisarati cueja ishu, —jadya tuna quisaraticuare.

Jadya quisarati aatsu tunara yatse emetucuju in-
acuare ique, Bernabé jadya. Jadya tunara yatse acuare:

—Dutya ecuana tumeque Yusu camadya merequi
cuanaque peadya tatae camadya buchique ecuana.
Metsera ecana necuejacue jidaque quisarati israelita
ama cuanaque. Ecuana israelita cuana pacueja,
—jadya tunara yatse cuejacuare.

¹⁰ Riyaque camadya tunara cuatsashacuare:

—Tshuajacame camadya israelita nrecada cua-
naque Jesús queja ecatyati cuanaque. Chipiru cuana
piji ni tunaja tuquemi ecuadishau aima cuana cuitaja
—jadya.

Jadya tunara ahuaju ique pureama jucuaré. Jadidya
ecue inime jucuaré, era ecue ata nrecada cuanaque
dyaque tsahuacara aya tibu.

Pablora Pedro Antioquiaju nereda acuareque

¹¹ Pedro Antioquiaju cuahuajutu eratu tudya cuitadya
nereda acuare, tuja inimedya tura israelita ama cua-
naque jida iyuhue tsehue ama bahuaju.

¹² Badirumetse aatsutu ecana jida badirucuaré. Tuna
tshuedya araaruacuaré, arepa tuna ecuita huitu biti
catubutima ama bucha. Tuque eje uma huecaca
judiruhajutu junacuare Antioquiaju israelita cuana
Santiagoja ecuadisha cuanaque. Tuna junahuajutu Pe-
drora jacatibunecuaré israelita ama cuanaque. Tumetu
araarajacuaré tuna tsehue. Israelita ama cuanaque
tuna ecuita huitu biti catubutitiqui jadique ejenequi
cuanaque tujatu cahuitishacarama acuare.

¹³ Pedrora israelita ama cuanaque jacahua baatsu,
peya israelita cuanara ecana tumebaedyá jacabare-
cuare. Arepa tunara quisarati ahua ama bucha, “Ecu-
naja baba cuanaja bahue eque nejura ama”, jadya ama
bucha, ecana cajacaticuaré israelita ama cuana tse-
hue. Jadya baatsutu Bernabé eatsehue juneniyaque
dyadi cajipetijacuaré israelita ama cuana tsehue,
arepa tuque cuitadya tuna queja cuadishatahua ama
bucha. ¹⁴ Tuna jidama aniyaque bahue juatsu, Yusuja
quisarati tuyu eque ama juya baatsu, tuque Pedro
nereda acuare Jesús queja dutya ecatyati cuanaque ec-
asitatija ijacaju:

—Miquemi israelita neri micue tata micue cuaa jadya
eque. Jadya ama buchami israelita ama cuana tsehue
casitatitsu, tuna tsehue araaratsumi israelita cuana
ejuta bucha ama juhua. Mique jadya juhuaque, ¿tume
tuquemi aishu israelita ama cuanaque ecuanaja baba
cuanaja bahue eque casada tsehue anishacara aya?
Miquemi tuyu ama juhua, —jadya tuque Pedro acuare.
Caadebaticuare dyatu era yuneriju jadya ayaque.

Yusura israelita cuana, israelita ama cuanaque jadya dutya tupu inajacameré Ijahua quejaque ayaque

¹⁵ Ique, ecue ata cuana jadya ecuana israelita yue-
quequedyá. “Jucha arida ama ecuana israelita ama
cuanaque bucha ama”, jadya ecuana jubahue datse.
“Moisésja cacuatsashati eque juya cabatitsu, tuque
ecuana Yusu cahuitishaya ama tunara aya bucha”,

jadya ecuana quisarati bahue datse. ¹⁶ Jadya ama
bucha ecuana israelita cuana Jesús queja ecatyati cua-
naja tuque ecuanaja inime cuaretanahua. Bahue ecua-
na ni ejeque buchique Yusura jucha metse ama
bayaque Moisésra cacuatsashati cuana huenehua
eque anitsu. Jesucristo queja ecatyati cuanaque cuita
camadya tujatu jucha metse ama baya. Jadya tibudya
ecuana Jesús queja catyatihua, Yusuja jucha metse
ama baishu. Ni ejeque buchiquetu Yusura jucha metse
ama baya ama cacuatsashati eque aniyaju baatsu, Je-
sucristo queja catyatihuaju cuita camadya. ¹⁷ Ecuana
israelita cuana ecuana bahue amena Jesús queja caty-
atitsu cuita camadya ecuana jucha juque
cuinanashatayaque, arepa ecuana ecuanaja baba cua-
naja bahue eque aniya ama bucha. Israelita ama cua-
naque bucha dyaque inimequi bucha ecabatiuque,
amena ecuana bahuedya tuna bucha jucha aridaque.
Aniyatu yanacana jadya juya cuanaque: “Icuene micua-
na cacuatsashati eque anicuare patya tuque micuana
ejenequere micuana jucha aridamaque. Iyacua bacue
Jesús queja catyatitsu, ‘Jucha arida ecuana israelita
ama cuana tsehue dutya tupu’ jadya micuana juya.
Micuanara jadya inime tupuya tibu, jutaqui ju ni taa
micuana Cristora cuitadya cajuchatishahua, arepa
micuana icuene jadya ama juhua ama bucha”, jadyatu
umaera quisarati aya, cuji cuita tuna eju.

Ⓐijama, jadya ama tuque! Ⓒristoratu ni ejeque
buchique cajuchatishaya ama!

¹⁸ Cuareya ni ecue inime, era ni cuejaya, “Jucha metse
ama bucha bata ishu, ecuana anitaqui ecuanaja baba
cuanaja cacuatsashati eque”, tume taa tu era ecuejaja-
cau quisarati yunerique. Tume taa tu era Yusu ec-
ahuitishau. Tume taa ique rihuishatillahuaque nityat-
suranucayaque bucha ejuu. ¹⁹ Ecuana baba cuanaja
cacuatsashati pana adeba aatsu, ique huecatanahua
tumeque cacuatsashati eque ique ni riya piji buchique
eaniuque, dyaque masada eje bucha ataquimaque.
Adebahua era Jesús queja catyatitsu jucha metse ama
ebata ejuuque. Chamacama bahue juhua tume cua-
naque cacuatsashati eque jutaquimaque. Ecuita ema-
juque amena huaraji cuanaja cuatsashataquima
bucha, jadidya ique amena tumeque cacuatsashati
tsehue jida ama cabatiya. Yusuja biji eque ique jida ca-
batitiqui. Ique emajuque netitsuranuca Yusuja biji
eque ani jadya buchique.

²⁰ Tuja inime tacatu Cristo curusuju majuhua ecuana
jiteque. Ique tuaqueja catyatitsu, amena ecue biji eque
ama aniya, yuequedyaque ani ecue terehua tibu. Iy-
acuatu Cristoja Espiritu eaqueja aniya. Iyacua ique
aniya Yusuja Ebacuaque queja nimee. Tuja inime
tacatu tuque majuhua, era Yusu japada ejacau tibu,
jadya eque tuque Yusu jipehua ni eje tupu jaca ishu
ama. Tura ique dyaque iyuhueda bahua tibu, tuquetu
majuhua ique jiteque. ²¹ Yusura ecuana dyaque
iyuhueda baya, jucha arida ama bucha. Era ni
ejenequena juhua Yusura ique iyuhueda bayaque
ecuanaja baba cuanaja bahue eque aniya baatsu ca-
madyaque, tume taa ique equisaratinu: “Tata, eratu ji-

dama ama inime baya mira ique iyuhueda bayaju, mira ique narucara ayaju jadya". [Ecue tu jadya ama inime! Jucha jida catillatitaqui ni ecuana juquena juhua ecuanaja baba cuanaja cacuatsashati eque juatsu, tume taa tu Cristo yanacana majuquena juhua.

Cacuatsashati eque anira ecuana Yusu queja judirushaya ama, Jesús queja catyatitsu cuita camadya

3 [Ai bijiteque micuana Galaciaju aniya cuanaque! [nimema micuana! ¿Aira jatsu micuana ijahue ahua, yunerique ejenejaca ishú? Ecuana tuhua juticuare patya micuana ecuanara pana cueja acuare Yusuja quisarati. Cuejahua micuana ecuanara Jesucristo curusuju majuhuaque ecuanaja jucha cuana tsujetyaqui. Cuejayaju bacatsu tuque micuana jidadya adebahua. Jesús queja micuana catyatihua. ² Micuana jadya baatsu tuque micuanaja Yusura tuja Espiritu cuadishahua. Yusuratu tuja Espiritu cuadishahua micuana queja, ai micuana cacuatsashati eque anihua baatsu ama. Cuadishahua tujatu tuja Espiritu micuana Jesúsja quisarati bacatsu tuaqueja catyatihua baatsu. ³ [nimema cuita micuana! Yusura micuana tujaque amerehua, micuanaja taca inime eque ama, tuja Espiritu eque. Jadya anitibunee micuana tuja biji eque juhua. Cuji cuita juatsu tuque micuana inime tupuya: "Ecuana cuitadya ecuana Yusuja biji eque eaniu". ⁴ Dyaque micuana canerecatihua Cristo queja catyatitsu. Iyacuani micuana amena cacuatsashati eque quinajacamereticara juya, tume taa micuana yanacana canerecati juhua Jesús queja nimee jujacaya einajaca juishu, tume micuana yanacana canerecati juhua. Eratu ejeneyadya micuana tuaquejaque canimehuallatiyaque ama. ⁵ Yusura micuana tyahua tuja Espiritu, casa jadya tuja quisarati bacatsu micuana tuaqueja catyatihua baatsu, ai micuana cacuatsashati eque anihua baatsu ama.

⁶ Abraham einajaca juhua bucha einajacaedya micuana atanahua. Abrahamratu Yusu ejenehua tura tyaana ahuaque. Jadya juatsutu tuaqueja catyatihua. Jadya tibudyatu Yusura jucha metse ama bahua. ⁷ Yuneri cuitadya Jesús queja catyatihua cuanaque, Abraham catyatihua baedya, Yusura tuna Abraham jaque buchadya baya, arepa tuna israelita ama cuana paju ama bucha. Micuanaratu adebayadya riyaque. ⁸ Yuequedyatu Yusuja inime juhua: "Dutya eaqueja catyatibuque cuanaque tuque jucha metse ama babuque, arepa tuna israelita ama juya ama bucha", jadya tu ehue Yusuja quisaratiju. Jadya tibudya jadya juma jarijudyatu Yusura cuejahua Abraham riyaque quisarati: "Erami jida baana ahua mique eaqueja catyatihuaju. Tumebaedya tuque jida abuque dutya yahuaju aniya cuanaque, dutya yana eque quisaratiya cuanaque eaqueja catyatibuque cuanaque", jadya tujatu cuejacuare. ⁹ Abrahamtu ducuta tuja inime tuaqueja catyaticuare. Jadya tibudya tujatu tyacuare tura jidaque tyaana ahuaque. Tumebaedyatu Yusura tyabuque jidaque Jesús queja dutya ecatyati cuanaque.

¹⁰ Ni ejeque buchiquetu ecuanaja baba cuanaja cacuatsashati eque cuita camadya eaniu ama. Ehuenedya tu Yusuja quisarati jadya: "Yusuratu baya ai asicadaque tuque jipetaquimaque bucha dutya cacuatsashati cuana eque ama aniya cuanaque". Tumetu jadya inime tupu juya cuanaque: "Yusura ecuana tuaqueja judirushabuque ecuana cacuatsashati eque aniya tibu", tuna tuna pana cuji cuita eju. Asicadaque bucha juya tibu tunajatu jipebuque ama Yusu.

¹¹ Ni ejeque buchiquetu dutya cacuatsashati cuana eque cuita eaniu ama. Pusha amadya ni ejeque buchiquedyatu Yusura jucha metse ama baya cacuatsashati cuana ehue eque aniya baatsu. Ehue tuja quisarati: "Yusura ecuana jucha metse ama baya ecuanatuaqueja catyatihuaju camadya. Eaniajeudya juidya ecuana tuja biji eque, tuatsehue nime aputama juatsu camadya".

¹² Ejeja ni jadya inime juya "Yusura tuaqueja judirushabuque cacuatsashati eque anihua tibu", Cristo queja camadya amatu catyatiya. Yanacanatu tuque jida juya eque tuaqueja judirucara juya. Yusuja quisarati tu ehue: "Dutya cacuatsashati cuana eque ni micuana aniya, tume micuana Yusuja yacuaju judirubuque ni eje tupu jaca ishú ama". Jadya ama buchatu ni ejeque buchique eaniu ama dutya cacuatsashati cuana eque.

¹³ Icuene ecuana Yusura asicada bucha bahua, ai tuque jipetaquique ama bucha. Dutya tuja cacuatsashati cuana muibataqui ama tura ecuana bahua. Cristotu curusuju tatatanahuaju majuhua. Ecuandya asicada bucha ebauquetu Yusura Cristo asicada bucha bahua, ecuanaja jucha cuana tsujetya juya tibu. Tuquetu canerecatihua ecuana nerecada ejuuque. Ehuenedya tu Yusuja quisaratiju: "Ecabisuti, ebijidamadura jadya tu acuiju eshura majuyaque". ¹⁴ Yuequedyatu Yusura Abraham cuejahua: "Mique eaqueja catyatihua tibu, mique jucha metse ama baya. Jidaque tuque adadiya dutya queja cuanaja ishú", jadya tujatu aana acuare. Israelita cuana camadya ama tumebaedya israelita ama cuanaque Cristo Jesús queja catyatitsu tuque micuana babuquedyu jidaque Yusura tyaana ahuaque. Cristo micuanaja jucha cuana seca ishú curusuju majuhua tibu, micuana Yusura jidaque tyaya. Ecuana Jesús queja catyatihua tibu tuque ecuanaja Yusura tuja Espiritu cuadishaya tura tyaana ahuaque.

Yusura tyaana ahuaque ni aira buchique eapupashauque ama

¹⁵ Huecashaya micuana riyaque yahuaju aniya cuanaque eje bucha juyaque, micuana ecue eatsehuequi cuanaque. Ecuita cuana yume cama juatsu tunajatu quirica huene ebacani quiyati jadya jubahue. Quirica huene, amena aatsu tuna ebacani cahueneti bahue. Ebacani huene amena ahujutu ni aira buchique quirica ecuaireu, ni acarama ama eau. ¹⁶ Yusura Abraham tyaana ahuaque tu quiricaju ecuita cuana ebacani quiyati buchique. "Mique, mique eque juracanayaque

jadya metse jidaque tyabuque”, jadya tu ehue ne Yusura tyaana ahuaque. Acuare ama tujatu “mique eque ejuracana cuanaque”. “Mique eque ejuracanaque”, jadya tujatu quisarati acuare. Jetiama tuna jidaque tyaya jadya amatu Yusu jucuare. Abraham eque peadya juracanayaque camadya tujatu jidaque tyaana ahua. Cristo tujatu tyaana ishuhua.

¹⁷ Abrahamtu Yusura jidaque tyadadiya jadya ahua. Tyama ama adadiya jadyatu juhua. Quiricaju ecuana ebacani quiyati bahue bucha ecuanara ai tyaana ayaque yuneri juyaque bahue amere ishuhua, jadidyatu Yusura cuejacuare Abraham yuneridya tura tyaana ahuaque tyadadiyaque. Tura amena jadya tyaana ahua, 430 mara cuetihuaju, tujatu chamacama cuejacuare Moisés cacuatsashati cuana, tuja peya cuana cueja ishuhua. Cacuatashati cuana cueja amena aatsutu Yusura quisarati acuare ama: “Iyacua riyaque huecaca eque tuque cuarehua Abraham tyaana ahuaque”, jadya tujatu quisarati ahua ama, ni riyaku piji buchique. ¹⁸ Yusratu Abraham tyaana ahua jidaque tuque tuaqueja catyatihua baatsu. “Pusha amadya mira tsujetyatsu ama tuque abuhua”, jadyatu jucuare. Tura ni ecuana tuaqueja judirushaquena juhua cacuatsashati eque juyaju, tume tura ecuana Abraham tuaqueja judirushahua bucha ama aquena juhua. Yusratu tura aana ahua equedya aya.

¹⁹ Micuanaja ni tu inime juya: “Cacuatsashati eque ama tura ecuana tuaqueja judirushaya tibu, ¿eje bucha juatsu jatsu tujatu Moisés cuejacuare? ¿Aishu tu jida?” Cuejahu tujatu eje buchaju ecuana tura amereya eque ama juyaque bahue juishuhua. Yusura patu Abraham tyaana acuare jidaque dutya queja cuanaque tuque eque ejuracana eque. Riyaque tuque eque ejuracanaquetu Cristo Jesús. Tuque amena junahua jutu saretanahua ama cacuatsashati cuana. Amena ecuita cuana cacuatsashati cuejayaquetu Yusura cuita ama ecanu cuejahu. Icuene cuitatu Yusura tuja cacuatashati cuejacuare barepa juque tuja quisarati cuejaqui cuanaque. Tuequedya tunajatu Moisés cuejacuare. Moiséstu Yusuja yana atsaqui buchique juque israelita cuana cueja ishuhua. ²⁰ Yusura Abraham jidaque tyaana aya patya, tujatu tuque cuitadya isarahua. Tura jadya tyaana Abraham ahua tibutu aijamadya juhua ejeque peya etsahuaquique. Tudyu cuitadya, tuque peadya camadyatu quisaratihua. Turatu jadya aana ahua. Tura aana ahuaque tujatu ama amadya aya.

Cacuatsashati cuana pana bahue juatsu ecuana bahue juya ecuana jucha aridaque

²¹ ¿Micuanajatu inime juya, Yusura Moisés cacuatashati cuejahuque, Yusura Abraham tyaana ahuaque tyamere ishuhua ama bucha? ¿Aijama, jadya ama tuque! Ni ejera bucharatu dutya eau ama. Dutya cacuatashati cuana eque ni ecuana eaniu, tume taa ecuana Yusura jucha metse ama baquena juhua cacuatashati cuana eque aniya baatsu. ²² Yusu tuja quisaratiju jadya juya equetu ni ejeque buchique cacuat-

sashati cuana eque eaniu ama. Jadya tibudya ecuana dutya jucha arida. Ecajuchati ecuana juhua, etare apuda ducu erisque netiyaque bucha. Peadya camadyatu Yusu queja judiru ishuhua aniya, Jesús queja catyati. Jadya juya cuanara peadya cuita camadyatu Yusura tyaana ahuaque babuque.

²³ Cristo junama jarijutu ecuanaja ebaba ecanaja inime juhua: “Cacuatsashati eque ni ecuana aniya, tume ecuana Yusura jucha metse ama baya”. Yanacana cuita tunajatu jadya inime juhua. Jesús queja catyatima jariju ecuana ecajuchati juhua, etare apuda ducu erisque netiyaque bucha. ²⁴ Cristo junama jari tupu ecuana ebacua cuana bucha jucuare, ebacua cuana naruquira naruya bucha. Ebacua cuana naruquira ebacua cuana ecuejau bucha tuna eje bucha jutaquique, eje bucha jutaquique ama jadique; jadidyu ecuana cacuatashati cuana isaratsu bahue juhua eje bucha ataquique, ataquimaque jadique. ²⁵ Iyacua bacue amena Cristo junahua, tuaqueja catyatihuaju ecuana Yusura jucha metse ama baya. Amena ecuana bahue cacuatashati eque juatsu ama ecuana Yusura jucha metse ama bayaque. Amena ecuana ebacua cuana naruquira naruyaque bucha ama; esiri bucha ecuana.

Yusuja cuanaque

²⁶ Micuana Cristo Jesús queja catyatihua tibu micuana Yusuja ebacua cuanaque. Tura micuana tuja ebacuaque bucha baya. ²⁷ Cutsameretitsu micuana Jesús queja catyatihuque ejitaju juhua, Yusu jaque jadique. Jesús queja ecatyati baatsu micuana Yusura jida, asicadama bucha baya. Micuanara asicadaque ijehue, jidaque iya jadya ahua buchique tume. ²⁸ Yusura ecuana jucha metse ama baya, ecuana Cristo Jesús queja catyatihua tibu, jadya juatsu tuja biji eque aniya tibu. Israelita cuana, tumebaedya israelita ama cuana tura ecuana jucha metse ama baya Jesús queja ecatyati baatsu; tumebaedya tsujema mere juya cuanaque, tsujetyataya cuanaque; tumebaedya deca cuana, epuna cuana. Jidamatu inime bataqui ama ecuana eje baeque; Yusura ecuana dutya tupu baya. Tumebaedya tura ecuana amereya tujaque. ²⁹ Micuana Cristo jaque juya tibu, micuana Yusura Abraham eque ejuracanaque baya. Yusura micuana jidaque tyabuque, Abraham, tuja cuanaque jadya tyaana ahuaque.

4 Tumeque quisaratidya neara jari. Ita taa peadya ebacua piji etata majuque eaniu. Majuma jarira etataquera quisarati eau: “Eje tupu ique majuhua, dutya ai ecue aniyaque tu ecue ebacua jaque. Tuque nanada jari tupu tuque peya queja narumerecara aya. Tunaradya tuja ai juya cuanaque panaru, tuque eje tupu esiri judadiya tupu” jadya. Tumetu iyacua dutyadya ebacua piji jaque. Arepa tuque dutya metseque paju ama buchatu tuja muibataqui tuque naruqui cuanaque. Tuque esiri judadiya tupu tujatu ecanu muiba, tunara cuatsashaya eque jadya jutaqui. ³ Ecuana ecuana tumeque ebacua piji bucha jucuare. Eje bucha canarutitaqui ama ecuana ai aniyaque cabaticuare, jadidyatu ecuanaja aijama jucuare Yusuja

casa. Yusu ujeu cuanaque aniya bucha ecuana an-
icuaire. Yusuja casa ecuanaja aijama juhua tibu, ecuana
eje bucha anijacataqui ama cabaticuare ecuanaja
bahue eque, arepa ecuana jadya anijacacara juya ama
bucha. ⁴Yusura huecaca iyhuaque juetihuajutu
Yusura Ebacuaque cuadishahua. Tuquetu
cuinanacuare epuna juque, ecuana cuinanahua
baedya. Tuquetu Moisésra cuatsashacuare eque an-
icuaire, tuque israelita juya tibu. ⁵Tuquetu jehua ecua-
na inajacamere ishuhue tsujetyara. Jehuatu inaja-
camere ishuhue yanacana ecuana cacuatsashati cuana
eque anitsupa einajaca eju jadya juyaju. Tuquetu ma-
juhua, ecuana Yusu jaque juishu, Yusuja ecuana tuja
ebacua cuanaque baishu.

⁶Yusuratu tuja Ebacuaqueja Espiritu ecuana tsehue
amerehua, ecuana tuja ebacua cuanaque juyaque
bahue amere ishuhue. Ebacuaqueratu "Tata" jadya Yusu
aya; ecuanara taa tu "Tata" jadidya eau. Tura tuja Es-
píritu cuitadya cuadishahua tibu, ecuana israelita cua-
nara, tumebaedya israelita ama cuanara tuque ecuana
ataqui "Ecuanaja Etata" jadya. ⁷Iyacua ecuana Yusura
baya tuja etare juque mere puji cuana bucha ama; tuja
ebacua cuanaque ebau bucha bae tura ecuana aya, tu-
jaque ecuana juya tibu. Jutaquiju taa tu dutya jidaque
Yusura tyaana ahuaque tuja cuana jaquedya; tume
baequedya tume. Ecuita chipirudajatu dutya ai
ebacuaqueja ishuhue, tuja mere puji cuanaja ishuhue
ama.

Pablora Cristo queja ecatyati cuanaque jidama inime ishu bacuaque

⁸Icuene tuque micuana adebacuare ama Yusu Neri,
micuana israelita ama cuana tibu. Micuanaratu peya
aidya jutidya muicuare, Yusu bucha baatsu. Micua-
naratu tume cuanaque jutidya merehua, mere pujira
tuque cuatsashaquique emereu bucha. ⁹Jadya jutidya
ejuuque tuque micuana iyacua Yusu mepehua micua-
naja Tata juishu. Pusha ama cuitadya micuanara ama-
tu Yusu mepehua. Yusura micuana mepehua tuja
ebacua cuanaque juishu. ¿Tume jatsu micuana eje
bucha juatsu yudijidya quinajacamereticara junucaya
cacuatsashati cuana eque? Cacuatsashati cuana tu ai
casadamaque buchique, ai aya jiu buchique. Erisique
einajacaque bucha juya ama bucha micuana erisi
bucha junucacara juya. Micuana micuana quirica isara
bahueque yudijidya quirica isara cabahuityatinucaya
buchique. ¹⁰Micuana micuana israelita cuanaja bahue
eque anitibunehua. Yanacana cuita tuque micuana in-
ime tupuya: "Canajara huecacaju israelita cuana juya
bae juatsu, tunara dutya badi chine cuana ayaque aat-
su, tunaja chine arida cuanaque aatsu, tunara mara
cuana dyaque jidaque ayaque aatsu, tume ecuana
Yusura jucha metse ama baya". ¹¹Jidama inime ishuhue
micuana baya. Yanacana jutidya ni mere juhua micua-
na ducu, micuana Jesús queja catyatijacayaque juatsu.
¹²Ique micuana ducu aniticuare patya ique anija-
cacuare ecue baba cuanaja bahue eque, Yusura ecua-
na jadya eque ama inajacamereyaque adebatsu, ecue

eatsehuequi cuanaque. Iyacua micuana cuejaya. Ecua-
na israelita cuanaja bahue eque eaniuque, Jesús queja
cuita camadya necatyaticue, ique juhua bucha. Ique
tuhua juticuare patya micuanara ni riya piji buchique
eje bucha acuaire ama. ¹³Jida, iyuhueda tsehue micua-
nara batsahua. Ujejeda juatsu micuana queja anietitsu
tsunutaetihua. Tuhua juetitsu micuana Yusu queja
judiru ishuhue quisarati cuejaetihua. Micuanaratu ade-
bayadya jadique. ¹⁴Ecuetu inime jucuare: "Ique
dyaque cuita ujejedaque bahue juatsu ni tunara biji-
damaduratsu ijehueya tunaja epu juque" jadya. Biji-
damaduracuare ama micuanara ique, ni micuanara ije-
hucuinacuare micuanaja epu juque. Ebijidamadu-
raque, micuanara jida batsacuare. Narucuare micua-
nara ique barepa juque Yusu tsahuaquique Yusuja
ecuaque bucha. Jesucristo cuitadya ebatsau
bucha batsae micuanara acuaire. ¹⁵Era cuejayaque ba-
cacha, micuana dyaque jida cabaticuare, ique micuana
tsehue baatsu. Caadebatiyadya ique micuanara
muibacuareque. Adebayadya tuque micuanara inime
tupucuareque. "Dyaque iyuhueda taa ecuana baya
Pablo. Ecuanaja dyaque jidaque aniyaque tyaatsu
tsahuacara, ecuana yatuca caquemititaquique juatsu
quemitsu tyacara jadya tuque ecuana aya." Iyacua
bacue micuanaja aijama era cuejayaque jida tsehue
baca ishuhue. ¿Eje bucha juatsu? ¿Eje bucha micuana ju-
chine? ¹⁶Era micuana yunerique cuejacuare. ¿Tume ni
taa micuanara jadya tibudya ujeuque ebataque bucha
bae aya?

¹⁷Tume micuana pusha pusha bahuityaqui cuana-
quetu iyuhuedapa tunara micuana ebau. Inime patya-
pa tunara micuana eau jadya juya. Tunara micuana
ique ujeu bamerecara aya, era cuejayaque micuanaja
bacacarama aishu. Tunajatu bijida micuanaja tunara
bahuityayaque cuita camadya baca ishuhue. ¹⁸Ique
cahuitiyya ama yuneri cuitadya micuana iyuhueda
tsahuacara jadya juya cuana tsehue. Dutyaja tuque
ecuanaja peya cuana inime patya ajacataqui ama.
Tume pusha pusha bahuityaqui cuanaquetu juya,
iyuhuedapa tunara micuana baya. "Ecuana micuana
iyuhueda tsahuacara jadya aya", jadya juya, ai jida in-
ime tsehue ama.

¹⁹Era micuana dyaque iyuhueda baya, ecue ebacua
neri ejuu bucha iyuhuee. Ebacua cuinanayajutu ecua-
quera jidama inime ishuhue. Jadidya micuanara ique
jidama inime bamereya, micuana era bahuityahua
eque ama anitibunehua baatsu. Bajacaya amadya
micuana jidama inime ishuhue, micuana Cristora amere-
cara aya eque judadiya tupu, micuanara tuja biji inime
tupudadiya tupu. ²⁰¡Eje bucha micuana queja jue cua-
na ejuu iyacua cuita micuana tsehue quisarati ishuhue,
tume micuanaja quirica cuadishahuaque ama! ¡Eje
bucha tuputillataqui ama tuque inime baya micuanaja
ishuhue!

Agarja ebacuaque buchique ama ecuana,

Saraja ebacuaque buchique

²¹ ¡Pana ijacobaca neacue! Micuanara ecuana aya Moisésra huenequere equiepa ecuana anitaqui jadya. Micuana bacue juya Abrahamja ebacua cuanaque buchapa micuana anicara juya jadya. ²² Neadebara Abrahamja ebacuaque ecatsé Yusuja quisaratiju cuejatanayaque. Peadyatu Agarja ebacuaque jucuare; tumeque epunatu Abrahamja etareju tsujema mere juyaque jucuare. Peyatu Saraja ebacuaque jucuare; tumeque epunatu Abrahamja ehuanegue neri jucuare. ²³ Agartu ehue ebari juhua bacuaqui jutaquique. Tuja ebacuaquetu Yusuja tyaana eaque ama juhua. Amena Sara bacue epuna esiri juhua, cabacuati baecua. Arepa tuque amena cabacuati ishü esiri ama buchatu Yusura cabacuatisa ana ahua: "Miratu peadya ebacua ejitaju adadiya". Yusura jadya amereya tibu tatsejatu peadya ebacua ejitaju acuare.

²⁴ Cuejacara micuana aya tatse eje bucha juhua eque. Riyaquetu ejitaju beta inime eque Yusura ecuita tsahuayaque.

Anicuaretu beta epuna Sara, Agar jadya. Tumebaedyatu Yusu quisaratihua beta ecuita tsehue, Abraham, Moisés jadya tsehue. Icuene cuitatu Yusura Abraham ahua. Turapa jucha metse ama baya tuaqueja catyatihua cuanaque jadya. Saradya tu Yusura quisarati iyahuaque baeque.

Tuequedyá tujatu cuejacuare Moisés emata Sinaí bacaniju: "Eratu israelita cuana riyaque cacuatsashati cuana eque amerecara aya". Agar tu riyaque quisarati Yusura iyahua buchique. Agartu tuja inime taca eque juneniyaque ama jucuare. Tuquetu Abrahamja etareju tsujema mere juyaque jucuare. Tumebaedyatu cacuatsashati cuana eque tuyu bucha cabatiya cuanaque tunaja inime taca eque ama juneniya.

²⁵ Sinaí bacani ematajutu Yusura Moisés cacuatsashati cuana cuejahua. Riyaque emata tu Arabiaju, Agar eque ejuracana cuanaque aniyaju. Tumeque epunatu cacuatsashati cuana eque quinajacamereticara juyaque jadya adeba ishüque. Tuque tuja patrónra casada tsehue cuatsashayaju jutaqui jucuare bucha, jadidya tuna cabatiya cacuatsashatira cuatsashaya eque einajaca jutaqui. Jadya tu dutya jujeri riyaque yahuaque Jerusalénju aniya cuanaque. Tuna tuna Satanásja inajacama. ²⁶ Ecuana Jerusalén barepaju anidirubuqueque ecuana Satanás quejaque einajacamera. Tuhua ecuana Yusura narubuque. ²⁷ Jadiquetu jadya acuare Yusu equeque quisarati cuejaqui Isaiasra: "Pureama jucue, mama, arepa mique cabacuati baecua juya ama bucha.

Pureama jucue.

Arepa mira ebacua uje adebaya ama ama bucha, tuque micue jetiama anibuque, arepa mira ama ejitaju ahua ama bucha.

Epuna decara jacacuarejatu dyaque umada ebacua anibuque, decara jacacuare amaja bucha ama".

²⁸ Ecuana ecuana Yusu jaque, micuana ecue eatsehuequi cuanaque. Isaactu Yusura Abraham tyaana ahuaque juhua; jadidya ecuana Yusura tujaque amere ana ahuaque. ²⁹ Yusuja Espiritura cuatsashaya eque Isaac ejitaju juhua bucha, tumeque Espíritu equedyá ecuana Yusura cabapetishahua. Cacuatshati eque tuyu aniya bucha cabatiya cuanara jidama ayaju, jidama inime nebaume. Abraham anicuare patyatu Agarja ebacuaquera Isaac Saraja ebacuaque ijaribacuare jutidya. Ujeudya jutidyatu bacuare. Riya cama jaridyatu Yusuja Espíritu eque ecabapeti cuanaque Yusu adeba baecua cuanara jidaama aya. ³⁰ Bahuedya micuana jadya Yusuja quisaratiju ehuenegue: "Cuinanashacue Agar micue etare juque. Tuja ebacuaque tsehue cuinanashacue. Agarja ebacuaquejatu jubuque ama micue ai aniyaque. Micue huane nerija ebacuaqueja camadyatu jubuque", jadyatu Yusura acuare Abraham. ³¹ Cuejaya micuana riyaque, ecue eatsehuequi cuanaque. Netupucue inime Agar, Sara jadyaja ebacuaque ecatséja cuatsabijiju. Cristo queja catyatitsu ecuana Abrahamja ehuanegue nerija ebacuaque bucha, epuna tsujema mere ijehue ishüja ebacuaque bucha ama. Inajacatanahua ecuana.

Jida inimeju cuinanasha bucha anijacataquique ama

5 Cristo tu Ecuana Inajacamerequique. Tura ecuana tyahua casa Yusu pureamaturayaque ani ishü. Aijama ama tuque ecuanaja juya tumeque casa. Micuana micuana amena Yusu jaque ni aira buchique micuana casada tsehue cacuatsashati cuana eque amereya ama. Micuana inajacatanahua tibu, netupunucaume inime: "Cacuatsashati cuana eque neanira, Yusuja ecuana jucha metse ama baishu".

² ¡Pana ijacobaca neacue! Era micuana jadya cuejaya. "Yusuja ecuana jucha metse ama baishu, catubutitaqui ecuana israelita cuana bucha", jadya ni micuanaja inime juya, micuana ni catubutiya, tume micuana ejitaju juya Cristo queja cuita camadya ama einajaca juishu catyatihuaque. Catubutiya ni micuana, tume micuana yanacanadya juya: "Cristo queja ecatyatique ique" jadya. ³ Cuejanucaya rique era. Yusratu quisarati iyahua: "Israelita cuanatu catubumeretitaqui Moisésra dutya cacuatsashati cuana huenehua eque ecuana aniya jadique ejitaju juishu" jadya. Jadya eque micuana ejeque jadya catubumeretie juyaque casada tsehue anitaqui dutya cacuatsashati cuana eque. ⁴ Umaeja tuque micuanaja inime juya: "Ecuana ecuana Yusuja yacuaju jucha metse ama, cacuatsashati cuana eque aniya tibu". Micuanaratu Cristo japada baya. Jacahua tuque micuanara. Jadya ni micuana, tume tuque micuana bijidamaduraya Yusuja tuja iyuhue tsehue naru ishüque. Tyaya amadya tura micuana tsujema tyau aana ahuaque.

⁵ Amena ecuana bacue bahue Yusura jucha metse ama bayaque, ecuana Jesús queja catyatihua tibu. Ecuana tuja yacuaju judiruhaju, "Micuana micuana

jucha metse ama baya", jadya ecuana bahue tura jadya abueque.

Tuja Espiritu eque ecuana bahue yuneridya ecuana jadya judadiyaque. ⁶ Ecuana Cristo Jesúsra cuatsashaya eque aniyajutu Yusura jidama ama inime baya ecuana israelita cuanaja bahue eque ni ecuana ecaturumereti, catubumeretimaque jadique. "Jesús queja tuna catyatiya baatsu, era tuna jida bucha baya, tunara iyuhue tsehue peya cuana bayaju", jadyatu Yusura inime tupuya ecuana Cristoja cuanaju. ⁷ Ejet-sunue ama ri micuana Jesús queja cuita camadya catyaticuareque einajaca juishu. ¿Aira jatsu tuque micuanaja cuarehua inime tupu cuana? ¿Eje bucha ejenemerejae jatsu tunara micuana yunerique ahua? ⁸ Yuneri cuitadya tuque micuanaja Yusura ama inime cuarehua. Turadya micuana mepehua Jesús eque micuana tujaque juishu. ⁹ "Riya piji lebaduratu mujashaya dutya pan ishuke", jadya ecuanaja quisarati abahue. Jadyatu peadya yunerique ama bahuityaquira umadaque yunerique eejenemerejacau. ¹⁰ Eratu ejeneyadya micuana Ecuana Cuatsashaqui queja catyatijacahuaque ama. Yusuratu nerecatu urabuque micuana pusha pusha bahuityaqui juya cuanaque. Arepa ecuita cuanara muiyaque ama bucha, Yusura tuna nerecatu urabuque.

¹¹ Jadya micuana cuejaya, micuana ecue eatsehuequi cuanaque. Umae ique ujeu baqui cuanaque tuna ecue ishusha pusha juya. "Pablora cuitadya tuna cuejaya israelita cuanaja bahue eque catubumeretitaquique", jadyatu umaecue ishusha pusha juya. Jesús queja catyatimara tuna jadya bahuityahua ecue ata israelita cuana. Tume tunara ujeu bahua ama. Ique cacuareti-hua inime. Iyacua tuna bahuityaya: "Jesústu majuhua curusuju ecuana jiteque. Micuana micuana einajaca ejuu, Jesús queja catyatitsu cuita camadya", jadya tuna ecue bahuitya bahue. Jadique bacatsutu israelita cuana cahuaitiya. Jida ama tunara aya. Era ni ecana ecuejau jari: "Catubutitaqui jari micuana israelita cuanaja bahue", tume tuna eatsehue ecahuitiu ama. Ique tunara jidama aya jari tibu, tuhuadyatu ejitaju era amena jadique ama bahuityayaque. ¹² Areque tume jadya micuana ijahue aqui cuanaja casa eaputajarau. Ecuita ecaca quemique amena cabacuati baecua bucha, areque jadya casa tereedya ejujarau yunerique ama bahuityaqui cuanaque.

¹³ Peya micuana cuejanucaya, micuana ecue eatsehuequi cuanaque. Inajacatanahua micuana cacuatsashati eque anitaqui ama micuana amena Yusu queja judiru ishusha. Jadya ama bucha einajaca cabatitsu jadya inime netupuume: "Cacuatsashati eque ama aniya tibu, ecue bijidya jutidya pajuneni. Ecue jida ishusha ique eje bucha jucara juya eque paju", jadya inime netupuume. Netsahuacue peya cuana. Iyuhueda tsehue ecana nebacue. Jadya anie micuana jutaqui, Cristora micuana inajacamerehua tibu. ¹⁴ Jadya tu Moisésra huenequereque: "Iyuhue tsehue nebacue peya cuana. Micuana cuitadya iyuhueda cabatiya bucha iyuhuee peya nebacue". Peya cuana ni micuana jida tsehue

baya, tume micuana dutya cacuatsashati cuana eque juya. ¹⁵ Micuana ni catiya peya cuana tsehue cahuaititsu, iyuhueda cabatijaca jadya juya. Cuanubi cuana mureduque bucha cacaruti, ujeta, cati jadya, peya cuana tsehue catillatiya tupu; jadya micuana, micuana dyadi jidama catiya, jidama cabatiyaque juatsu.

Tunaja biji eque aniya cuanaque, Yusuja Espirituja biji eque aniya cuanaque jadya

¹⁶ Riyaque micuana cuejaya. Yusuja Espiritura inime huecashaya eque neanicue. Jadya anie ni micuana juya, tume micuana micuanaja jidamaque bijiseri eque ama aniya. ¹⁷ Ecuana cuitadya jutidya eje bucha jucara juyaque, jadya juyaque ecuana Yusuja Espirituja biji eque ama neri cuita juya. Ecuana Yusuja biji eque ama anicara juyaju, ecuana tuja Espiritura cuejaya: "Tumeque neaume", jadya. Ecuanaja jidaque aishu tura ecuana cuejayaju, ecuana jidama jucara juyaju tura ecuana nereda ayaju, ecuana jaquedya jutidya tu inime tupu: "Nebacara ama tura cuejayaque. Ecuana eje bucha jucara juya eque nejura" jadya. Ecuanaja biji equeque, Yusuja Espirituja biji equeque jadya tatse catiya. Yusuja Espiritura ecuana casaturaya ecuana ecuanaja biji eque ama ani ishusha. ¹⁸ Ecuana Yusuja Espiritura cuatsashaya eque aniyaque juatsu, tuque ecuanaja israelita cuanaja cacuatsashati saretaqui amadya Yusuja biji eque ani ishusha.

¹⁹ Tunaja biji eque cuita camadya aniyaratu jidamaque aya. Jadya anie juatsu tunajatu caquemiti-queremaque jaraquere ishusha bijiseriya. Asicadaque tunajatu inime tupuqui aya. Bisutadaque tunajatu inime tupuqui aya; ayadya tunara. ²⁰ Ai cueya cueya ea cuanaque tuna muiya yusupa ejuu jadya cuanaque. Jatsura, marura jadya ecana catiya. Peya cuana ujeu, cati jadya tsehue ecana aniya. Peya cuanaja ai aniyaque tuna bijiseri ebari aya. Masadama cahuaitie ecana. Ai bayaquedya jutidya tuna bijiseriya tunaja ishusha cuita camadya, peyaja ishusha bacue aijama. Peyaja ishusha ecana jidama quisaratiya, tuna jacaqui juhua cuanaque tuyu ama juya bucha baatsu. Tuna tsehue beta tupu ama inime tupuyaque tuna jida tsehue ama baya. ²¹ Bacarama, ujeu jadya tuna peya cuana baya tunaja ai aniyaque baatsu. Bijiseriya tuna tunaja ai aniya cuanaque. Nijuqui ecana juya. Eje uma huecaca ecana chine juya. Castere baecua ecana araara, ijijiji jadya juyaque. Bisu baecua ecana peya cuanara petayaju. Era jidama cuanaque ebanijuu ahua cuanaque camadya ama tunajatu jidamaque aya. Dutya ai jidamaque tunajatu aya. Jadya anie tuna juya tunaja biji eque cuita camadya aniya cuanaque.

Cuejanucaya micuana era, era icuene ahua baedya. Jadya anie juya cuanaquetu Yusu queja ama judirubuque; tuque dutya naruqui juhuaju tuatsehue ama tuna anidirubuque. Tuna tuna tyatanabuque ama Yusu tuja cuanaque tyaana ahuaque.

²² Bape neri cuita tuque ecuanaja ani juya, Yusuja Espiritura amereya eque juatsu. Iyuhueda tsehue tuque ecuana peya cuana baya. Pureama tsehue ecuana

aniya. Inime tsapema ecuana juneniya peya cuana tsehue. Abacata tsehue ecuana iduya etsuje jucara juatsu ama. Nime jida, epuri, nime jatada jadya ecuana. Peya cuana tsehue ecuana jida. Ayadya ecuana ai ecuanara aana ahuaque. ²³ Peya queja casumimereticarama ecuana juya. Jidamaque acaraque inime juetihuaju, ecuana tacadya ecuana canarutiya, jidamaque aishu ama. Jadya ecuana juya, Yusuja Espiritura amereya eque anitsu. Jadya anie juatsu, pusha ama cuitadya ecuana Yusura eje bucha bijida baya eque aniya.

²⁴ Ecuana ecuana Cristo Jesús jaque. Ecuana tujaque juya tibu, tuque ecuanaja jidamaque aishu bijiseritaqui ama. Cristo curusuju majucua tibu, ecuana dyadi ecuana curusuju emaju buchadya. Emajuratu amena riyaque yahua juque ni ai buchique cuejayaju bacaya ama; jadidya ecuana. Ecuanaratu bacaya amadya cajuchaticaraque inime juetihuaju. ²⁵ Yusuja Espiritura ecuana Jesús queja catyatishahua, ecuana iyacuaque ani eque ani ishu. Tuja casa eque ecuana aniya tibu, dutya tura eje bucha amereya eque nejura. ²⁶ Necasumitira ama. Peya cuana necahuaitishara ama. Ujeu nebara ama, ecuanara bijida bayaque peyaja aniya baatsu. Cajishati arida nejura ama peya cuana tsehue.

Peya cuana tsehue catsahuatitaquique

6 Jesús queja ejeque ecatyatira Yusuja bijidamaque ayaju, necuejacue jida, micuana ecue eatsehuequi cuanaque. Micuana Yusuja Espiritura amereya eque juyara netsahuacue Yusuja biji eque aninuca ishu. Jida inime tsehue, cahuai tsehue ama jadya neacue. Jadya tuque micuanaja inime tuputaqui: "Era cuitadya ni taa Yusuja bijidamaque aya eje tupu. Ique jidama juyaju peya cuana queja jida tsehue cacuejamericara juya. Jadya tibudya ique dyadi peya tsehue jida jutaqui".

² Necatsahuatira peya cuana tsehue. Bicueda ecabuti que etsahuau bucha, tsahuaedya peya cuana neara tuna jidama inime cuanaju nubihuaju. Jadya ayaque tuque micuana peya cuana jida tsehue baya Cristora bahuityaya eque.

³ Ejeja ni inime juya: "Ique dyaque inime metseque. Tume cajuchatiya ama peya cuana bucha. Jadya tibudya cajuchatiya cuana tsehue jida jutaqui ama", yanacana tujatu jadya inime tupuya. Tuta tacadya juidiyatu ijahue catiya.

⁴ Ecuana tacadya ecuana caadebatitaqui ecuana cuitadya jida, jidama jadya ecuana juyaque. Ecuana jida juyaque juatsu, ecuana pureamadya juya. Ecuana cuitadya ni pana caadebati juya ecuana jida juyaque cabacaduratitaqui ama ecuana: "¿Eje bucha ni Yusura baya dyaque jida, jidama?" jadya. ⁵ Peadya peadya ecuana Yusu queja jucha cuana cacuejatitaqui, "Peyara jadya amerehua", jadya juatsu ama.

⁶ Ejera ecuana Yusuja quisarati bahuityayaju tuque ecuanaja tyataqui ai tura sareyaque, jadya ama juatsu etsujequi. Ecuanaja aniyaque jaquetsu tuque ecuanaja tyataqui tsujetya ishu.

⁷ Micuanadya jutidya ijahue necatiume. Yusu tu eje bucha ijahue ataquí ama. Turatu baya dutya ecuana

eje bucha juyaque. Ecuanara peya cuana eje bucha baya equedya tura ecuana abuque. Quisarati jadique bucha: "Ecuanara uhuayaquedya tuque ecuana huesaya". ⁸ Ecuanaja biji equedya jutidya ni ecuana aniya, Yusratu baya ecuana eje bucha juyaque ai jidama, eririque bucha. Eje tupu Yusuja yacuaju netitihuaju tura ecuana abuque: "Ai eririque bucha mique baya. Eatsehue amami aniya; jipenime ama micue ique".

Yusuja Espirituja biji eque ecuana aniyaque juatsu, dutya ecuana eje bucha juyaque tu Yusura ai jida pijique bucha babuque. Eje tupu ecuana majutsu tuja yacuaju judiruhaju tura ecuana abuque: "Ai jidaque bucha mique baya. Miquemi eatsehue aniya, ique eje tupu jaca ishu ama". ⁹ Jadya tibudya jadya inime netupujacara ama: "Jidaque neajacara ama." Ecuana canimehuallatiyaque ama juatsu ecuana Yusura jidaque tyabuque. Tee metsera ni tuja tee jida naruja-caya ama, tume tujatu jidadya ecaca huesaya; jadidya ecuana tyatabuque Yusuja Espiritura cuatsashaya eque jucayaque ama juatsu. ¹⁰ Jadya tibudya tuque ecuanaja dutya jida tsehue bajacataqui ama. Jesús queja ecatyati cuanaque neri tuque ecuanaja dyaque jida tsehue bataqui, tuna ecuana tsehuequi cuanaque juya tibu.

Cuejayaque, amena ishuque quisarati jadya

¹¹ Era cuitadyari hueneya amena ishuque quisarati cuana. Letra arida tsehue tuque huenehua. ¹² Micuana casada tsehue catubumeretishacara juya cuanaratu ecuita cuana cuita camadya jida quisaratishacara aya. Tunajatu inime juya: "Einajacaque ecuana Cristo curusuju majuhua queja catyatihuaju cuita camadya' jadya ni ecuana juya, tume ecuana riyaque quisarati bacacarama juya cuanara enerecaturadadiu" jadya.

¹³ Tuna cuitadya tuna ecuita huitu bitu tubu israelita cuanaja bahue. Arepa tuna jadya ama bucha, dutya cacuatsashati cuana eque ama tuna aniya. Tunara micuana israelita cuanaja bahue catubutishacara aya, tuna casumiti ishu: "Ecuanara cuejayaque camadya tunajatu bacaya", jadya datse tuna casumitiya.

¹⁴ Arepa tuna jadya ama bucha, ecue bacue jadya inime: "Cristo ique jiteque curusuju majuhua tibu, tu- aqueja cuita camadya catyatiya. Ique jadya juyaju baatsu Yusura jucha metse ama baya". Ique amena einajaca juya tibu, Yusu adeba baecua cuanaque aniya bucha amena anicarama juya. Tuna aniya bae ani ishu tuque ecue bijidama; Yusu adeba baecua cuanaque bacue ique aniya bucha anicarama juya. Tunajatu bijidama ique aniya bae ani ishu.

¹⁵ Cristoja biji eque ecuana aniyajutu Yusura jidama ama inime baya ecuana israelita cuanaja bahue etubutanaque, tubutanamaque jadique. Yusratu jidama inime ishu baya ecuana inime cacuaretima eaniuque.

¹⁶ Yusura inime tsapema paanisha Cristoja biji eque aniya cuanaque. Pabameretu ecan tuja canerecabati. Jadyatu paa dutya tuja cuanaque.

¹⁷ Jadya tilladirue rique ecue riyaque quirica aya. Ni ejera buchique inime patupu ama: "Nebacara ama

Pablo; tuque amatu Ecuana cuatsashaquique". Neba-
cacue ecue quisarati, era Ecuana Cuatsashaquique
mereya tibu. Ujeda ahuaaju ecue ecuitaju jipi aniya cua-
naradya ejitaju amereya ique tuja ecuadishaque.

¹⁸ Ecuana Cuatsashaqui Jesucristora jida tsehue ne-
narucue tuja quiyuhuebati tsehue, micuana ecue eat-
sehuequi cuanaque. Jadidya paju.
Riya tupu camadya.

Pablo

EFESIOS

Riyaque quirica ri Pablora Efesoju aniya cuanaja ishu cuadishacuaque. Rehuari Pablora cuejacuare Yusura yahua iyama jariju inime pirecuareque. Cuejacuare rejari Yusuja inime patu jucuare. Jesús queja dutya catyatiya cuanaquetu Yusu queja judiribuque israelita cuana, israelita ama cuana jadya.

Cuejacuare rejari, dutya ecuana Cristo tsehue peadya camadya bucha anitaquique. Capítulo 3-6ju tura ecuana jida cuejaya Jesús queja ecatyati cuanaque dutya tsehue iyuhue tsehue anitaquique. Cuejaya tura ecuana, ecuanaja etareju cuana tsehue ecuana eje bucha anie jutaquique.

Umae versíulo cuana cabahuityati ishuque jidaque ri jee cuanaque: 1.8; 2.8-10; 3.20-21; 4.30-32; 5.18-20; 6.10-17.

Pablora Jesús queja ecatyati cuanaque isaracuareque

1 Era rique micuanaja quirica cuadishaya. Ique Pablo. Jesucristoja yana atsaquique ique, Yusuja jadya inime juya tibu. Cuadishaya rique quirica Efesoju Yusuja cuanaja ishu. Cuadishaya rique Cristo Jesús queja ecatyati cuanaja ishu. ²Yusu ecuanaja Etatara, tumbaedyu Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tattera inime tsapema neanishacue.

Yusu pureama ataquique, tujaque tura ecuana amerehua tibu

³Yusu Ecuana Cuatsashaqui Jesucristoja Etataque pureama neara:

—Dyaque jida taa mique! Dyaque jida taa mira dutya ai ayaque! Tyahua taa mira ecuana jidaque. Micue Espíritu taa dyaque jida juhua ecuana tsehue. Ecuana Jesucristo jaque tibu, mira ecuana ihuarahua micue yacuaju barepaju judiru ishu. Mira tuque ecuanaja tuhua ani ishuque bajejeya, —jadya tuque ecuanaja ataqui.

⁴Tuja yahua ejitaju ama jariju ecuana Yusura mepehua tuja juishu. Yusutu bahuedya juhua Jesús ecuana jiteque majudadibuqueque. Bahuedyatu juhua ecuana Jesús queja catyatidadibuqueque. Jadya tibudya tujatu inime juhua: “Ecue cuanaque tuque ecue eje bucha eque jucha metse ataqui ama jubuque. Jucha metse ama tuna baya, era tunaja jucha cuana tillahua tibu” jadya. ⁵Yusura ecuana dyaque iyuhueda bahua. Jadya tibudya tujatu jadya inime jucuare: “Jesucristo queja catyatiya cuanaque tuna ecue ebacua cuana jadya abuque” jadya. Tuja inime taca eque tura ecuana mepehua eje bucha tura inime tupuhua eque. ⁶Jadya tibudya jadya Yusu pureama neara:

—Dyaque jida taa mi mique, mira ecuana iyuhue tsehue baya tibu, arepa ecuana jucha arida paju ama bucha. Mira tuque micue Bacua dyaque iyuhueda baya. Ecuana tuaqueja catyatihua tibu, jadya eque mi-

ra ecuana dyaque iyuhueda baya. Dyaque jida iyuhue tsehue mira ecuana baya, —jadya neara.

⁷Cristotu curusuju majuhua; tuhuatu ami quijehuethua. Ecuana tuaqueja catyatihuaju, Yusura ecuana Ijahua quejaque inajacamerhua. Dyaque iyuhueda tura ecuana baya, arepa ecuana jucha arida baya ama bucha. Jadya tibudya tura ecuanaja jucha cuana tillahua. Amena tura ecuana jucha metse ama baya. Aijamatu peya ecuana tsehue dyaque jida ejuuque.

⁸Tuquetu injeda ama ecuana dutya jidaque tyaishu. Tura ecuana piyebatilla tupu ama tyaya dutya ai jidaque. Tura ecuana adebamereya yunerique, yunerique ama jadya. Tura ecuana adebamereya, ecuana eje bucha anie jida jutaquique.

⁹Icuene yuequedyu patu Yusura jadya inime tupucuaque: “Eje buchadya sitae acara taa aya ecue cuanaque. Barepaju cuanaque, yahuaaju cuanaque jadya taa sitacara aya ecue cuanaque. Ecue Emepe Cristora tuna narubuque”, jadya tujatu inime tupucuaque.

Icuenetu ni ejeque buchique baecua jucuare Yusura eje bucha judirushae tuja cuanaque barepaju abuqueque. Amena iyacua bacue tura ecuana bamerehua. Bahue tura ecuana amerehua Cristo queja catyatitsu Yusu queja judiru ishuque. Ejitaju tujatu amerehua tura ecuana dutya narudadibuqueque. ¹¹Dutyatu Yusura amereya eque juajeya, tura icueneta tupu inime ahua eque. Yahua iyama jari equequedyu ecuana Yusura mepehua tuja juishu. Bahuedyatu ecuana Jesús queja catyatidadiyaque jucuare. Jadya tibu turadya ecuana tuja ebacua cuanaque juishu mepecuaque.

¹²Beru yuequedyadyatu ecuana israelita cuanara ihuahua Yusuja Emepeque. Tuquetu amena junahuadya. Tuque junahuaju eje umadya ecuana tuaqueja catyatihua. Jadya tibu tupe peya cuanara Yusura ecuana eje bucha ahuaque baatsu abuque: “Dyaque jida taa mique! Aijamatu peya mique buchique!” jadya. ¹³Jadya juatsu chamacama micuana quisarati yunerique cuejatanahua. Micuanadya micuana cuejatanahua Yusura micuana inajacameredyaque, micuana Jesús queja catyatiyaju. Riyaque jadique bacatsu micuana dyadi micuana catyatihua tuaqueja. Tu-

aqueja micuana catyatihuaju tuque micuanaja Yusura Espiritu cuadishahua juchamaque neri. Ecuana ebacani equiyatiu bucha, ecuana ebacani eque adeba ishu, jadya ishudyatu Yusura tuja Espiritu cuadishahua, micuana tuja cuanaque jadique adeba ishu. Jadidya tujatu tuja cuanaja peadya peadyaja ishu cuadisha ana ahua. ¹⁴Yusuja Espiritu tu ecuana tsehuedya; bahuedya ecuana Yusuja cuanaque. Ecuana tuja cuanaque juya tibu, tuque ecuana pana ejenedya aya, tura ecuana tuja cuanaque dutya ai jidaque tyaana ahuaque tyadadiyaque. Ejeque huecacapa ecuana tuja yacuaju judiruya. Tuhua ecuana cajuchatinuca nime ama. Tuhua ecuana tura eje bucha amerecara aya eque anidirubuque. Jadya tibudya Yusu jadya neara:

—Dyaque jida taa mique! ¡Aijamatu peya mique buchique! —jadya.

Pablo Jesús queja ecatyati cuanaja ishu Yusu queja bacabacacuareque

¹⁵Bacaya tuque quisarati. Micuanapa Ecuana Cuatsashaqui queja nimeedya jutidya juajeya, tumbaedy micuana Yusuja cuanaque iyuhueda cabatiyaque.

¹⁶Riyaque quisarati bacatsu tuque Yusu Ecuana Cuatsashaquique Cuadishaquique jadya ajacaya ama:

—Tata, miquemi dyaque jida. Aijamatu peya mique bucha dyaque jidaque. Yusrupai mique aya, mira Efe-so juque micue cuanaque jida tsahuaya tibu. Micue Espiritu queja ecanacacamerume. Paadecamerajedy jutidyatu ecanacacacamerume. Paadecamerajedy jutidyatu ecanacacacamerume.

Pabahuityaaajedy jutidyatu ecanacacacamerume, tunaja mique dyaque jida adebaaje ishu, —jadya tuque ajacaya ama.

¹⁸Tumbaedy tuque ecue Yusu abahue micuanaja ishu:

—Tata, adecamerue ecanacacacamerume mira ejitaju ayaque. Pana ejenemere ecanacacacamerume acue ejeque huecaca ecanacacacamerume Jesúsja yacuaju judirubuque. Bahue ecanacacacamerume, micue cuanaja ishu micue dyaque jidaque aniyaque. Adebatiilla tupu ama tuquemi ecanacacacamerume tyabuque. ¹⁹Bahue ecanacacacamerume micue casa aniyaque. Aijamatu peya casadaque mique buchique. Bahuityacue ecanacacacamerume riyaque casa tsehue mira ecanacacacamerume Jesús queja catyatihuaju Ijahua quejaque inajacameruehuaque. Riyaque casa tsehue tuquemi ecanacacacamerume anishaa-jedyady jutidya mique pureamatura ishu. Dutya riyacacacamerume ecue adecamerue, —jadya ique Yusu queja bacabaca bahue micuanaja ishu.

²⁰Riyaque casa tsehuedyatu Yusura Jesús emajuque chacha nityatsuranucacacamerume. Chacha amerencacacamerume tujatu tsurashanucacacamerume barepaju tuja yacuaju riyaque casa tsehue. Turatu muihua, tuja jida eque amaca iyabutyatsu. ²¹Iyacua tu Cristo tuhua ecuari enaruqui. Aijamatu ni ejeque buchique dyaque cacuat-sashati tsehue, tuque peadya camadya. Tudyatu dutya umae ecuari cuanaja inime metseque. Huaraji cuanaja dyaque inime metseque tume. Casada cuanaja, ecuat-sashaqui cuanaja inime metseque tume. Iyacuatuhua yahuaju jetiama aniya emuita cuanaque.

Anidadibuquedyatu jetiama tumbaedy emui cuanaque. Jesús tu tume cuanaque dyaque inime metseque. Jadya tu tuque ni eje tsehue beta tupu ama ejeque aniya tsehue ni ejeque anibuque tsehue.

²²Yusratu dutya ai aniya queja muimerehua. Tuquetu ecuat-sashaqui aniya cuanaque dyaque aridaque.

Jesúsra ecuana naruya, cuatsashaya jadya aya dutya ecuana Yusuja cuanaque. Tuquetu iyuca buchique.

²³Ecuana Yusuja cuanaque ecuana tuja ecuita buchique. Iyuca ecuita tsehue camadya ecajipetique bucucuyaque mere juishu bucha; jadya ejitaju juedyatu juya Cristoja mere riyaque yahuaju ecuana eque ademe. Ecuana equetu Cristo Yusuja biji eque juya riyaque yahuaju.

Arepa ecuana jucha arida juhua ama bucha, ecuana Yusura Ijahua quejaque inajacameruehua

2 Jesús queja catyatima jariju micuana, Yusu adeba baecua cuanaque aniya bucha anihua, cajuchati-jacatsu ama. Emajuratu amena ni ejeque buchique bacaya ama; jadidya tuque micuana Yusu bacacarama ahua. ²Icuene micuana anihua Yusu adeba baecua cuanaque bucha, dutya cajuchati Judyta jutidya. Satanás jahua cuana cuatsashaquique tuque micuana merehua, Yusura cuatsashaya eque juya ama cuanara aya bucha. ³Dutyadya ecuana jadya anie juhua. Ecuana capureamaturati ishu cuita camadya ecuana jadya ani juhua. Ai ecuanara jidamaque inime tupuqui ayaque ai jidamaque acara ayaque ahua dyaque tuque ecuanara. Anihua amatu ni ejeque Yusura anishacara aya eque. Cajuchati ecuanaja bijida juhua. Pusha ama cuitadya ecuana Yusuja nerecatura ishuque juhua.

⁴Arepa dutya ecuana jidama juyaque Yusuja bijidama paju ama bucha, iyuhueda tura ecuana bajacaya ama. Tujatu dyaque quiyuhuebati aniya ecuana tsehue. ⁵Ecuana ecuana jucha arida juhua. Emajuquetu ni ai jutaqui tuja ishu, jadidya ecuana quinajacamereti-taqui ama juhua ecuana taca. Jadya ama bucha ecuanacacamerume Yusuja iyuhueda bahua. Tura ecuana Ijahua quejaque inajacameruehua. Ecuana Jesús queja catyatihuaju, Yusuja ecuana iyacuanehua.

⁶Ecuana Jesús queja catyatihuaju tuque ecuanaja Yusuja inime iyacuanehua, ecuana icuene anihua baecacacamerume, tuque pureamaturayaque ecuana ani ishu. Ejeque huecaca tura ecuana dujubuque tuja yacuaju, barepaju ecuana tuatsehue enaruqui juishu. ⁷Jadya ecuana Yusura ahua tuque ni eje tupu pureama ajaca ishu ama, peya cuanaja jadya ajaca ishu ama:

“Dyaque jida taa Yusu! Tuquetu dyaque jida Cristo Jesús queja ecatyati cuana tsehue. Tura tuna jida narujacaya ama. Canerecabati tsehue tujatu ecanacacamerume baya”, jadya tuna juya.

⁸Yusura ecuana Ijahua quejaque inajacameruehua ecuana Jesucristo queja catyatihuaju. Inajacameruehua tura ecuana ecuanara ai jida ahua baatsu ama, ecuana tsehue dyaque jida juatsudya jutidya. Aijamatu ni ai ecuanaja jida aishuque Yusuja ecuana tuaqueja judirusha ishu. Jadya ama juatsu ecuana ecasumitihuaju.

judidya, ecuana aiju jida baatsu Yusura inajacamerehua bucha cabatitsu. Yusura ecuana inajacamerehua tsujema neri. Ai tura ecuana yanacana tyau ahuaque buchique tume. ¹⁰ Yusura ecuana iyacuanehua peya cuana tsehue dyaque jida juishu. Ecuana ecuanaja inime Cristo Jesús queja catyatihua baatsu, Yusuja jadya inime juhua tibu ecuana peya cuana tsahua juyaque aniya. Yuequedyatu Yusuja inime juhua: "Jesús queja catyatihua cuanara jida pabajaca ama peya cuana". Ai jidaque mere aatsu einajaca ejuuque, Yusura ecuana jida amerecara aya, ecuana einajaca juhuaque bahue juishu.

Jesús queja catyatitsutu israelita cuana, israelita ama cuana tsehue dutya tupu

¹¹ Dutya jujeri micuana israelita ama. Micuanaja tata cuana eque micuana israelita ama cuinanahua. Micuana micuana anihua ama dutya ecuana israelita cuanaja bahue cuana eque. Icuene micuana ecuanara bji-damadurahua, ecuana juya bucha ecuita huitu biti catubutiya ama baatsu. ¹² Micuana micuana tuna bucha ecuanaja ebaba Israel emui juhua eque ejuracanaque ama. "Ecuanaja ata ama micuana. Micuana ama micuana Yusura mepehua. Micuana ama micuana Yusura jidaque tyaana ahua, ecuana cuita camadya", jadya ecuana juhua. Yuneri cuitadya tuque micuana icuene Yusu neri adebahua ama. Anihua micuana riyaque yahuaaju Yusura jidaque tyadadiyaque bahueque ama ni Jesús queja catyatidadi ishu. Baecua micuana juhua ejeque huecaca Yusuja yacuaju judiru ishuque ni eje tupu jacanuca ishuque ama.

¹³ Amena iyacua micuana jadya ama. Catyatihua micuana Cristo queja. Iyacua tu Yusu micuana japadama; tuatsehue micuana. Jesucristotu ami quijehuetitsu majuhua micuanaja jucha cuana tsujetya ishu. Jadya tibudya micuana tujaque.

¹⁴ Cristo tu ecuanaja cahuaiti cuana apushaquiue. Icuene ecuana israelita cuana dyaque ecahuaiti juhua micuana israelita ama cuana tsehue, micuana cacuat-sashati cuana eque anicarama juya baatsu. Ecuannaratu inime tupuhua: "Dutyatu Moisésra cuatsashaya eque anitaqui, Yusuja Ijahua quejaque inajacamere ishu" jadya. Ecuana micuana tsehue equisaratiuju, aira patya majaca etachiu bucha tuque ecuana micuana tsehue quisaratitaqui ama ni micuana jida tsehue bataqui ama; micuana bacue ecuana tsehue cabatitaqui ama, jadya juhua. Jesús tu curusuju maju ishu catyatihua dutya ecuana jiteque. Tuque majuhuaaju Yusuja inime juhua: "Iyacua tuna inajacamereya cacuat-sashati cuana eque anihua baatsu ama, Jesús queja cuita camadya catyatihua baatsu". Jutaqui ju iyacua ecuana Jesús queja catyatijaju tura tuque ecuanaja peya tsehue cahuaiti apushaya. Ujeu ecabatiuque bacue ecuana dyaque iyuhueda judidya cabatiya peya tsehue. Tura ecuana cuare pidya camadya bucha amerehua. Yuhua cama tura ecuana amerehua tsape tsape ama.

¹⁷ Cristo riyaque yahuaaju junatsu tura ecuana Yusu tsehue jida ani ishuque quisarati cuejanahua. Micuana israelita ama cuanaque tura micuana cuejanahua, micuana Yusu japada juhua cuanaque. Tumebaedya tura ecuana israelita cuana cuejanahua, ecuana Yusu japadama juhua cuanaque. ¹⁸ Cristo eque ecuana dutya ecajipetiu Yusu queja, ecuana israelita cuana, micuana israelita ama cuana jadya. Dutya ecuana Yusuja Espiritura cuitadya tsahuaya Tata Yusu queja catyati ishu.

¹⁹ Micuana icuene jucua bucha ama micuana. Peya anae bucha ama micuana. Peya yahua juque ecuana queja tarepe junaya bucha ama micuana. Jadya ejuuque, micuana ecuana israelita cuanaja ata buchique. Yusura ecuana mepemetse ahua tujaque juishu. Iyacua micuana dyadi micuana tujaquedy. Tata pidyaque cama buchique ecuana. ²⁰ Ecuana Yusuja cuanaque ecuana etare tuque aniquique buchique. Etare ayaque tuque ecuana tibuneyaque tumu arida cuanaque iya tibuneya aija bucucushataquima etare neti ishu. Jesúsra cuitadya cuadishahua cuanaque tu tumebaeque. Tuja quisarati cuejaqui cuanaque jadya tuna tumu icuene eiyaque buchique, tunadya icuene Jesús queja catyatihua tibu. Tuequedy tunajatu peya cuana Yusuja quisarati bahuityahua. Etare ayaque tuque ecuana tumu aridaque iyabahue, umae tumu cuana casada bucucutaquima neti ishu. Jesucristodya tu tumeque tumu buchique dyaque inime metseque. Iyacua ecuana tuja cuanaque ecuana etare sipitilla ishuque bucha. ²¹ Tumeque tumuradyatu umae tumu cuana bucucushaya ama etare jida tuyu bucucutaquima neti ishu. Tumebaedyatu Cristora tuaqueja catyatiya cuanaque dyaque jida anishaajeya. Tura ecuana iyuhueda cabatishaya peya cuana tsehue ecuana Yusu pureamatura ishu, ecadutyati juishu. ²² Micuana dyadi micuana Yusu aniqui buchiquedy, arepa israelita ama juya ama bucha. Yusu tu aniya dutya tuja cuana queja; tuja Espiritu equetu aniya ecuana tsehue.

Pablo Yusu queja judiru ishuque quisarati israelita ama cuanaque cuejara cuadishatanacuareque

3 Ique rehua etare apudaju erisi netiya, micuana israelita ama cuanaque Cristo Jesúsja quisarati cuejanahua tibu. Israelita ama cuanaquetu Yusura tua queja judirushaya jadique cuejahuaju, israelita cuanara ishamechere rehua. ² Micuanaratu pana adebadya aya ique jadya ata ishu Yusura mepehuaque. Tura ique cuadishahua micuana cueja ishu micuana tura dyaque iyuhueda bayaque.

³ Yuequedy patu Yusura jadya riyaque inime iyahua. "Ecue emepe cuanaque tuque jidaque tyaana ahua Israel eque ejuracana cuanaque. Cristo Jesús queja catyatiya cuanaquetu era jidaque inime tyadadiya. Israelita ama cuanaque Jesús queja catyatijaju tuna tumebaedya jidaque inime tyadadiya. Israelita cuana, israelita ama cuanaque tuque cuare beta ama baya; cuare pidya camadya. Dutya tupu tuna baya. Jidaque

tuque aya israelita ama cuanaja ishu, tumbaedy a israelita cuanaja ishu", jadya patu Yusura inime tupucua. Yuequedy tujatu ni ejeque bahue amerehua ama. Ai etehua buchiquetu jucua, ni ejea adeba ishu ama. Iyacia bacuetu ejitaju ahua. Tura cuitadya cuadishahua cuanaque, tuja quisarati cuejaqui juhua cuanaque jadya tujatu bahue amerehua. Tuja Espiritu eque tujatu ecana bahue amerehua. Ique tura tumbaedy bahue amerehua. Erari cuejahuadya riya piji riyaque quiricaju. Riyaque ehuenque isaratsu yuneridya micuana bahue jubuque tura ique bahue amerehuaque. Bahue micuana juya Jesús queja catyatitsu Yusu queja judiruyaque, israelita cuana, israelita ama cuana jadya.

⁷Jesucristora ique mepehua tuque mere ishu. Arepa era icuene tuque ujeu bahua ama bucha, tuquetu dyaque jida juhua eatsehue. Dyaque iyuhueda baatsu tura mepehua. Bahuityahua tura ique jidaque quisarati tsape ishu. Tuja casa eque tura bahuityahua.

⁸Ique Jesús queja ecatyati cuanaque dyaque jetiedya cabatiya. Ique jadya baya ama bucha Jesucristora mepehua jidaque quisarati israelita ama cuanaque cueja ishu. Cuadishahua tura ique ecuanaja jidaque aniyaque cueja ishu ecuanaja Jesús queja catyatihua tibu. Pana adeba ataqui ama ecuanaja baya ni ecuanaja pana adebatilla ataqui baya tuque ecuanaja tsehue jidaque. Adaditilla tupu ama tuque. Jadya ique Yusura cuejamerehua.

⁹Yuequedyatu tura ni ejeque bahue amerehua ama tura micuana israelita ama cuanaque tuaqueja judirushabuqueque. Etehua buchiquetu jucua. Amena iyacia bacue tura cuejamerehua Jesús queja dutya catyatiya cuanaque tura tuaqueja judirushadadiyaque. Jadya Dutya Iyaquiri cuejamerehua. ¹⁰Icuenetu barepa juque casada cuanaque cacuatsashati puji cuana jadya baecua jucua eje bucha Ijahua quejaque inajacamere Yusura riyaque yahuaju cuanaque ameredadiyaque. Amena iyacia tuna bahue. Ecuanaja Yusura tuja ishu ihuarahua cuanaque baatsu, "Dyaque bahue taa Yusu, jadya inime iyahua tibu! Tuque taa bahue dutya; ni aida jutidya tura adebaya ama!", jadya tuna juya.

¹¹Yuequedy yahua iyama jarijutu Yusuja inime juhua: "Ecue Emepe queja catyatiya cuanaque tuque inajacamerebuque". Jadidya tujatu iyacia aya. Tura ecuanaja inajacamereya, ecuanaja Cuatsashaqui Cristo Jesús queja catyatihuaju. ¹²Ecuanaja jadya juhua tibu, Jesús queja ecuanaja catyatihua tibu, ecuanaja bajida tsehue ama, bisuma ecuanaja cajipetiya Yusu tsehue quisarati ishu. Yuneri cuitadya tuque ecuanaja ejeneya, tura ecuanaja bijidamadurayaque ama. ¹³Iyacia ique canerecetiya era Jesúsja quisarati micuana israelita ama cuanaque cuejahua tibu. Necanimehuallatiume. Paju ama micuanaja inime: "Dyaque jidatu Jesús queja catyatijacataqui, tunara ecuanaja dyadi jidama ayaque juatsu", jadya inime netupuume. "Yuneri cuitadya ecuanaja Yusura tuja quisarati bacamerecara ahua. Jadya ama ni juquena juhua, tume taa tujatu Pablo

dyaque ama canerecatisahaquena juhua", jadya inime netupucue.

Pablo Efesoju cuanaja ishu

Yusu queja bacabacacuareque

¹⁴Yusutu dyaque jida juhua dutya ecuanaja tsehue. Tuque jidaque adebatsu, chichucata juatsu tuatsehue quisaratiya. ¹⁵Tuque tuque Ecuanaja Etata. Tuquetu dutya tuja cuanaja etataque. Barepa juque tuja cuanara, yahuaju cuanaque tuja cuanara jadyatu "Tata" jadya aya. ¹⁶Jadya quisarati tsehue bacabacaya micuanaja ishu:

—Tata, miquemi dyaque jida, casada jadya. Aijamatu peya mique buchique. Micue casa tu adaditilla tupu ama. Bacaya mique era. Efeso juque micue cuanaque casaturacue. Micue Espiritu eque ecana casaturacue, tuna mique pureamaturayaque aniaje ishu. ¹⁷Peya mique bacaya. Cristo tuna tsehue paju. Tura ecana panaru dutya tuna eje bucha juyaque, dutya tunara inime tupuyaque. Tuaqueja nimeedya jutidya ecana pajuae. Tumbaedy mique bacajacaya ama mique tunaja iyuhueda bajaca ishu ama, tumbaedy peya cuana. Acui ni tiri casada, tumetu acui pajida casada majuma netiya. Dudu cuana ni pajida casada, tumetu etare casada rihuitaquima netiya. Jadidya tuna juya tuna iyuhueda cabatijacayaque ama juatsu, dyaque casada, masadama canimehuallati jadya ama tuna juya.

¹⁸Peya mique bacaya. Casaturacue Efeso juque micue cuanaque, Cristora tuna eje bucha iyuhuee bayaque tunaja adeba ishu. Tuna camadya ama, tumbaedy dutya queja micue cuanaque casaturacue ecana. Bahue ecana pajudadi Cristora ecana dyaque iyuhueda bayaque. Cristoja iyuhue ecuanaja tsehue aniyaque tu ai dyaque aridaque tuputillataquima buchique. Ai dyaque quinida, junuda, deda, baruda jadya buchique tume. Paadeba tuna Cristora tuna jadya iyuhuee bayaque. ¹⁹Arepa tuna Cristora iyuhueda bayaque eje bucha pana adebataqui ama baya ama bucha, caadebatishacue ecana tura dyaque iyuhueda bayaque. Jadya caadebatie juyaque juatsu, tuna mique bucha dyaquedy juajeya. Anibuque tunajatu dutya mira tunaja anishacara ayaque. Jadya mique bacaya Efesoju micue cuanaja ishu.

²⁰"Tata, miquemi ecuanaja tsehue. Miratu eau dutya. Adadi tupu ama tu mira ai eauque. Ecuanara ai bacayaju, miratu aya dyaque ecuanara ai bacaya tupu ama. Micue casa dyaque aniya eque tuquemi aya dutya ecuanaja jida ishucue, ai dyaque ecuanaja inime juya tupu ama. ²¹Tata, ecuanaja micue cuanara mique ecuanaja pureama aya. Ecuanaja Cristo Jesús queja catyatihua cuanara: "Dyaque jida taa mique! Aijamatu peya mique buchique!" jadya tuque ecuanaja abahue. Jadya mique ecuanaja aya jadya ajacatsu ama. Jadidya paju, —jadya tuque ecue abahue.

Peadya Yusu jaque camadya juya tibu, ecuana cuare pidya camadya

4 Ique rehua etare apudaju, Ecuana Cuat-sashaquique era mereya tibu. Nebacacue era cuejayaju. Yusuja biji eque neanicue. Yusura tuja ishu mepehua tibu, tuque pureamatura ishu neanicue.

² Netupuume inime ni riya piji buchique: "Ique peya cuana bucha dyaque inimequique". Peya cuanara jidama ayaju, etsuje jucara nejuume. Jida inime tsehue jutidya ecana nebacue. Jidama inimeju nubitsu, tunara jidama ayaju, cahuaaitima idu neacue. Jida tsehue nebacue peya cuana, arepa tunara micuana cahuaaitishacara aya ama bucha, arepa tunara micuana pereya ama bucha. Jadya ejitaju jue micuana peya cuana tsehue iyuhueda cabatiyaque juya.

³ Arepa ecuanaja bape bape inime tupu aniya ama bucha, Yusuja Espiritura ecuana cuare pidya camadya amereya. Necacasaticue Espiritura tsahuatsu yuhua cama ani ishu. Jadya juatsu micuana jida eje bucha tsehue ama aniya peya cuana tsehue cahuaaitima.

⁴ Cuita pidya camadya bucha tu Jesús queja dutya ecatyati cuanaque. Aniyatu peadya Espiritu camadya ecuana peadya peadya tsehue aniyaque, Yusuja Espiritu. Aniyatu peadya camadya ecuana dutyara ihuayaque; dutyadya ecuana bahue ejeque huecaca ecuanaja anibuqueque dutya ecuana Yusura tyana ahua cuanaque. ⁵ Peadya cacuatsashati pujira cuat-sashaya eque camadya ecuana aniya. Dutyara tuque ecuana ejeneya peadya quisarati yunerique. Cut-sameretitsu ecuana ejitaju juya ecuana Peadya jaque camadyaque. ⁶ Aniyatu peadya Yusu camadya ecuanaja dutyaja Tata. Tuquetu dutyaja ecuari. Tura ecuana dutya tachiya, ecuana eque tuja inime eque juishu. Tuquetu ecuana peadya peadya tsehue aniya.

Yusura tuque cameremereti ishu peadya peadya bahuityahuaque

⁷ Dutya ecuana bahuityatanahua Yusu mere ishu. Cristora eje bucha bahuityacara ahua equedya tura ecuana bahuityahua. Yanacana tyau buchique tume ni ai tuque ecuanaja tyataqui ama equarequi. ⁸ Ehuene tu Yusuja quisarati:

"Tuquetu tsurahua ebarucue Yusuja yacuaju.

Tsuratsu tujatu dujuhua tuatsehue tura casatillahua cuanaque.

Tuquetu jidaque tyatanahua.

Tyatanahuaju tujatu ecuita cuana tyahua".

⁹ Riyaque ri Jesúsra adadibuqueque. Jesús cuitadyatu butehua riyaque yahuaju. Bute jadya juatsutu tsuranucahua barepa dyaque barudaju Yusuja yacuaju. Tuquetu tsurahua dutya barepaju, yahuaju jadya aniya cuanaja mui ishu. ¹¹ Turadyatu tyaya tuja casa tuja cuanaque riyaque yahuaju cuanaque tunaja eje bucha meree aishu. Umaetu tura cuitadya Yusu queja judiru ishuque quisarati cuejara cuadishahua quisarati ni ejeja buchaja cuejama jari cuanaju. Peya cuana tujatu

casa tyaya tuque equeque quisarati cueja ishu. Peya cuana tujatu casa tyaya tuque adeba baecua cuanaque Yusu queja judiru ishuque quisarati jida cueja ishu. Peya cuana tujatu casa tyaya tuja quisarati cueja, pana bahuitya jadya aishu. ¹² Cristora ecuana dutya casaturaya peya cuana tsehue catsahuati ishu, tuaqueja nimeedya jutidya juaje ishu. Casaturaya tura ecuanaja, tumebaedya ecuana peya cuana tuaqueja catyati tsahua ishu. ¹³ Casaturacara tura ecuana aya peya cuana tsehue quisarati yunerique ecuanaja ejene ishu. Dutyaja tupu tuque ecuanaja inime juya Yusuja Ebacuaqueju. Ebacua nanajatu aijama casa. Danaejedyatu esiri judadiya tupu. Jadidya tura ecuana amerecara aya. Butseeju Jesús queja catyatitsu, adeba jida ama tuque ecuana aya. Tura ecuana adebamereajecaradya jutidya aya tura ecuana anishacara aya eque anidadiya tupu. ¹⁴ Ebacua cuanaratu masadama inime cuareya; ejeneya tuna dutya cuejayaju bacayaque. Cuejiji casada juyaratu ebacua cuana cueri patya cuaba tsehue juneniyaque peya queja duju peya queja duju jadya eau; eje bucha jutaquima ecana ejuu. Jesús pana adeba eaque ecuana ebacua cuana cuaba eque cuejijira aquereniya bucha ama. Neejenera ama ejeque peya iyacuaque ejera bahuityacara ayaju. Tuna pusha pusha juyaju ecana neejenera ama, arepa ecana ejenetaqui juya ama bucha. Tunara tuyuque ama cuejayaju, neijacabacara ama.

¹⁵ Yunerique quisarati neara peya cuana tsehue. Iyuhueda necabatira peya cuana tsehue, peya cuana jida tsehue bau. Jadya juatsu ecuana Cristora eje bucha amerecara aya eque juajeya. ¹⁶ Ecuanaja ecuitajatu aniya bape bape bucucu ishuque, yuhua cama ecasipitique. Iyuca tu dutya ecuita bucucushatilla ishuque. Dutya bucucu juyaju, dutya quejaque jida bucucuyaju, ecuana jida cabatiya, jida ecuana daneya. Jadidya ecuana, ecuana Jesús queja ecatyatique. Cristo tu Ecuana Cuatsashaquique. Tura ecuana casa tyahua peya cuana tsehue cacasatibare ishu, dyaque jida Cristo caadebamereti ishu. Aniajebuque ecuana tuja biji eque. Iyuhue batsabuque ecuana peya cuana, peya cuana jida inime tsehue bayaque.

Cristo queja catyatihuaju tura ecuanaja inime cuareyaque

¹⁷ Riyaque micuana cuejaya. Ecuana Cuatsashaquira micuana jadya cuejae amereya. Neaniume Jesús queja catyatima cuanaque bucha. Tunaratu inime tupuqui aya aishuque ama, masadama cuetiyaque. ¹⁸ Baecua tuna ni riya piji buchique Yusu ai juyaque ni tura inime tupuyaque. Tuna tuna apuda ducu juneniya buchique baecua eju cuayaque. Yusura amereya eque ecana jucarama juya. Yusu queja ecana jidamaque casecamereticarama juya. Yusu queja quinajacamereticarama juya tibu tuna emajuque bucha. ¹⁹ Jidamaque aishuquedya jutidya tunajatu bijiseriya. Jidama tuna inime tupujacaya ama. Jidamaque aatsu tuna bisu batsaya ama. Pureama jutidya ecana juya jidamaque asicadaque aatsu.

²⁰ Bahue ique, micuana jadya anie juyaque ama. Micuanaratu amena Cristo adebaya. Bahue micuana amena eje bucha tura anishacara ayaque. ²¹ Jadya bahuee micuana, era quisarati cuejahuque pana baca ahua tibu. Jesúsra yunerique bahuityahuque nucadya riya.

²² Neanijacacue micuana icuene anihua bucha. Icuene micuana anihua bisutada. Aida jutidya aya tsehue tuque micuana sarehua jidamaque aishu. ²³ Iy- acua micuana jadya ejuuque, eiyacuane bucha nean- icue. Micuanaja inime tupu, cabijiseriti cuana jadya micuanaja iyacuaque paju. ²⁴ Neijehuecue beruque ani. Eiyacuane nejuque; camisa iyacua tsehue cajututit- su ejuu bucha nejuque. Nebacue jida tsehue peya cua- na. Ni eje bucha eque Yusu necahuitishaume. Nepureamaturacue jutidya. Yusura micuana casatu- ranucaya tuja biji eque ani ishu.

²⁵ Micuana micuana iyacuanetanahua. Jadya tibudya pusha pusha nejunucaume. Dutya ecuana peadya cuitae buchique; pusha pusha neara ama peya cuana, ecuana cuita ijahue catima.

²⁶ Jidadya tu Yusuja bijidama tsehue cahuaiti ishu. Jadya cahuaitie juyaque juatsu, ujeu nebaume ejeque ni etsuje jucara nejuume. Tsunuda necahuitiume. Chineju jaradirumaquedya necahuitijacacue.

²⁷ Masadama cahuitijaca baecua ni micuana juya, tume micuana Satanásra cajuchatishaya. Netyaume emajaca, tura micuana ecajuchatishaju.

²⁸ Micuana icuene chiri arida juhuaque, chiri nejuja- cacue. Mere nejuque; necacasaticue ai aijamaque cadaditi ishu. Micuanaja ishu camadya ama mere neju- cue; tumbaedy nrecada cuanaque tsahua ishu.

²⁹ Neaume quisarati peya cahuitisha ishuque. Jida quisarati camadya neacue peya tsahua ishu. Micuana quisariatijaju bacaqui cuanaque nepureamaturacue micuanaja quisarati tsehue.

³⁰ Yusuratu tuja Espíritu micuana queja cuadishahua, micuana tujaque jadya adeba ishu. Tuque ecuana tse- hue tibu, ecuana bahue ejeque huecaca Cristo junanu- catsu ecuana Yusu tsehue anidirubueque, tura eje bucha amerecara aya bucha ecuana jubuqueque. Jadya tibudya jidama nejuume; tuque necapeya inimetishaume.

³¹ Peya huecaca ishu cahuaiti neiduume. Yume cahuaiti nejuume. Cahuaititsudya jutidya peya cuana quiqetere ishu neaume. Eje bucha jumaquedya ju- tidya peya, jadyatu juya; jadya cuatsabiji neaume. Jadya jidama nejuume ni eje tsehue. ³² Netsahuacue jutidya peya cuana, tuna tsehue jida ani ishu. Jida quiyuhuebatsati aqui peya cuana tsehue nejuque. Pe- yara jidama ahua, nenerecabacue tunara eje bucha ahuaque. Cristotu majuhua ecuanaja jucha cuana tsu- jetya ishu. Jadya tibudyatu Yusura ecuanaja jucha cua- na apupashahua. Tumbaedy etsuje jucara nejuume peyara jidama ahua.

Eje bucha anie Yusuja cuanaque jutaquique

⁵ Peya micuana cuejaya. Micuana micuana Yusuja cuanaque. Dyaque iyuhueda tura micuana baya. Tura micuana iyuhueda baya buchadya tuque micua- naja peya cuana iyuhueda bataqui. ² Dyaque iyuhueda tuque ecuanaja peya cuana bataqui tuna ejera iyecara ayaju ecuana tuna cuarequi quiyemeretitaqui. Neade- bacue Cristo ecuana jiteque jadya majue juhuaque. Icuene uhuisha iye Yusu tyau jadya juhua bucha, jady- atu tuque juhua Yusu pureamaturayaque. Yusuatu pureama ishuquedya micuana peya cuana tsehue iyuhueda cabati ishu.

³ Micuana micuana Yusuja cuanaque. Jadya tibudya tuque micuanaja jipetaqui ama micuanaja caquemiti- queremaque jaraquere ishu. Necaasicatiume tumeque juchaju. Micuanaja ishu camadya dutya ai nebijiseri- ume. ⁴ Bisutadaque, asicadaque jadya cuatsabiji neaume. Jidamaque aishuque cuatsabiji neaume. Bisu- tada, urecada nejuume. Jadya jutidya equisaratiuque, quisarati neacue Yusura jidaque ahuaque, tuque yusu- rupai ayaque. ⁵ Tuja ehuaque ama jaraquereyaque- tu judirubuque ama Cristora, ecuanaja Etata Yusura jadya naruyaju. Jadya bisutada juyaquetu judirubuque ama Yusu queja. Tunaja ishu cuita camadya dutya ai radanityacara juya cuanaquetu Yusu queja judirubuque ama. Jadya cuanaque tuna yusu ama muiya bucha jutidya juya. Yusu adebaya ama cua- naque tuna yusu cueya cueyaja yacuaju jutidya chichu- cata juya, Yusu Nerija yacuaju chichucata ejuuque. Ja- didya tu ai bijiseritsu tuja ishu cuita camadya dutya ai radanityacara juyaque Yusu Neri emuiu ama bucha. Micuanaratu pana adebadya aya riyaque.

⁶ Yusuratu dyaque nrecaturabuque tura amereya eque ama juya cuanaque. Dyaquetu cahuitibuque tu- na tsehue. Jutaquiju neejeneume pusha pusha puji cuana tunara micuana Yusu cahuitisha ishuque amerecara ayaju. ⁷ Jadya tibudya Yusura cuatsashaya eque jucarama juya cuana tsehue necacarenetieme.

⁸ Icuene micuana meta juneniya cuanaque bucha juhua. Iyacua bacue micuana huecadaju ajeya cua- naque bucha, micuana Ecuana Cuatsashaqui queja catyatihua tibu. Jadya tibudya micuana Yusu adebaqui cuanaque eanita bucha anie nejuque. ⁹ Jadya cua- naratu peya cuana ai tsahuajacaya ama. Tunaratu peya cuana jida tsehue baya. Tuna tuna Yusura cuat- sashahua eque aniya. Tunaratu yunerique camadya quisarati aya, ejeque ijahue aatsu ama. Yusu adebaya tibu tuna jadya anie juya, huecadaju ajeya cuanaque buchique tuna. ¹⁰ Ecuana Cuatsashaquija biji eque anicara nejuque. ¹¹ Yusu adeba baecua cuanara jidama aishuque ayaju baatsu, necareneume ecana. Tuna ji- dama juyaque tunajatu etehua au aya ejeque bahue ejuuju. Tunadya tuna meta ajeya buchique. Micuana- jatu riya cuanaque bahuityataqui. ¹² Tunaratu aya dyaque bisutadaque, ni ebaicaniju cuanadya jutidya tuque acara aya. ¹³ Ejeque huecaca dutya ejitaju juhua- ju, tuna bahue jubuque dyaque jidama juhuaque. Ai

eudau bucha jadidyatu ejitaju jubuque tuna eje bucha juhuaque. ¹⁴ Cristo queja catyatitsu ecuana huecadaju ajeya bucha. Riyaque jadya ayaquedya tu jadya ehue:

“Cabaticue etahui buchique.

Emaju buchique, netitsuracue.

Jadya juhujumi Cristora cueyanemereya tuque eje buchique”.

¹⁵ Jutajiqui necacuejaticue jida eje bucha juma ani ishu. Inimema nejuume. Jesús adebaya ama cuanaque aniya bucha anie nejuume. ¹⁶ Tsunuda ama ecuana riyaque yahuaju aniya. Jadya tibudya Yusuja mere aishuque emajaca aniyaju, necacasaticue tuja mere aishu, arepa jetiama jidama tsehue aniya cuanaque aniya ama bucha.

¹⁷ Ecuana jadya anie jutajiqui tibu, Ecuana Cuatsashaquija inime baecua bucha nejuume. Jadya Nebacajacaume: “Bahue amerecua mira ique ai amerecara ayaque”, jadya neajacaume. ¹⁸ Nijuqui nejuume. Nijuqui juatsu micuana cayuamatiya jutidya. Pureama jucara juatsu, Yusuja Espiritura amereya eque neri nejuque. ¹⁹ Jeru cuana eque Ecuana Cuatsashaquique pureama neacue. Espiritura jerushaya eque pureama neacue. Jesús eje buchique, tuque ai juyaque jeru neacue. Jadya pureama neacue jeru cuana eque, ai duduya cuana tsehue. Jadya nejuque, ai peya cuana jadya juya baatsu jipidya ama; pureama neacue, yuneri cuitadya micuanara pureama ebari acara aatsu.

²⁰ Ecuana Etata Yusu yusurupai neajacaume, Micuana Cuatsashaquira micuana narujacaya ama tibu. Micuana dutya aiju jidaju, tumbaedy a jidamaju, tura micuana narujacaya ama. Jadya tibudya yusurupai neajacaume.

Epuna, deca jadya caquemititsu eje bucha anie jutajiqui

(Col 3.18-4.1)

²¹ Dutyara tuque micuana muibaya Cristo. Jadya tibu tuque micuanaja camuibati anitajiqui peya cuana tsehue.

²² Mama ecana ahuequi cuanaque, micuanaja ahue cuanara cuatsashaya equedya nejuque. Ecuana Cuatsashaquira cuatsashayaju juya baedy nejuque.

²³ Yahuique tu ehuanqueja huaraji, Cristo tuaqueja ecatyati cuanaja huaraji bucha. Cristo tu Tuja Cuanaque Inajacamerequique; tunadya tuna tuja ecuita buchique. ²⁴ Ecuana Cristo queja catyatihua cuanaque bucha tura cuatsashaya eque ecuana jujacataqui ama, jadidyatu epuna cuana yahue cuanaquera cuatsashaya eque jujacataqui ama.

²⁵ Tata ecana huanequi cuanaque, jida iyuhueda tsehue micuanaja huane cuana nebacue. Micuana cuita camadya aiju inime patya necatiume. Cristora ecuana dyaque iyuhueda bahua; tudya cuitadyatu majuhua ecuana Ijahua quejaque inajacamere ishu. Jadidya micuanara micuanaja huane cuana iyuhueda nebacue.

²⁶ Jadyatu Cristo juhua ecuana Yusuja ishu amere ishu. Jucha tillatsu tura ecuana jida, asicadama bucha baya,

ecuanaja inime tupu cuana jida eutsa bucha, tura bahuityahua eque ecuanara aya tibu. Jutu ishuque asicadaque ecuanara eutsa bucha, jadya pajatashae tuja tuque ecuanaja asicadaque ahua. ²⁷ Cristora ecuanaja jucha secagua ecuana tujaque amere ishu. Ecuana tuja yacuaju judiruhaju tura ecuana abuque: “Dyaque jida piji bucha micuana baya”. Aijama tuque ecuanaja jidamaque jubuque; dyaque jida ecuana jubuque.

Ahuequi juishu ecabajejetique bucha ecuana jubuque. Ni ai buchique tujatu aijama asicadaque. Peya cuanatu carenejacaya yahuique juyaja cuita camadya juishu.

²⁸ Tata ecana, micuanajatu micuanaja huane cuana jida narutaqui, micuana micuanaja ecuita canarutiya bucha. Micuanara ni micuanaja huane cuana jida naruya, jadiquetu micuana cuitadya jida canarutiya buchique. ²⁹ Ni ejequetu tuja ecuita canarutijacaya ama. Enarujacauque, ecuana tacadya ecuana araara. Canarutiya ecuana jida ecuanaja ecuita. Tumbaedy ecuana Cristora naruya dutya tuaqueja catyatihua cuanaque, ³⁰ ecuana tuja ecuita bucha cuitadya juya tibu. ³¹ Jadidya tu Yusuja quisarati ehue: “Jadya tibudyatu decaja jacataqui etataque, ecuaque, carequi juatsu. Caquemitihaju tatse Yusura baya peadya camadya bucha”.

³² Riyaque isaratsu ecuana bahuedya ecuana cuitadya Cristoja ecuitaque. Ecaquemitique ecatsa tu cuita pidya camadya bucha, tumbaedy ecuana Cristoja ecuita bucha. Icuene tunajatu riya cuanaque adebacuare ama. Iyacu ecuana Yusura bahue amerehua. Riyaque ri dutya bahue jutajiqui. ³³ Jutajiqui iyacu micuana bahue eje bucha anie jutajiqui. Dutya micuana huanequi cuanaja tuque micuanaja huane cuana jida narutaqui, micuana micuanaja ecuita canarutiya bucha. Micuana ahuequi cuanaja tuque micuanaja ahue cuana muibataqui.

6 Ebacua cuana, micuanaja tatara, micuanaja cuara cuatsashayaju yana equedya nejuque.

Micuanara Ecuana Cuatsashaquique iyuhueda baya tibu, tunara cuejaya equedya nejuque. Jadya micuana Yusura amereya. ² Yuequedyatu tura cuatsashahua: “Nemuibacue micuanaja tata cuana. Jadya ni micuana juya, jida micuana judadiya. Tsunuda micuana anibuque micuanaja yahuaju” jadya. Pusha ama cuitadya micuana riyaque cacuatsashati eque cuita jutajiqui. Yusuratu tyaana aya jidaque ejeque riyaque cacuatsashati eque aniyaque.

⁴ Tata ecana bacuaqui cuanaque, necahuaitishaume micuanara baya cuanaque. Nebahuityacue ecana tunaja Ecuana Cuatsashaquique pureamatura ishuque, tuna cuitadya jida canaruti bahue juishu.

⁵ Micuana etsujequi inama mere juya cuanaque, micuanaja patrón cuanara cuatsashaya equedya nejuque. Nemuibacue ecana. Nemuibacue tunara micuana ebijidamaduraju. Inime micuanaja paju: “Jida ecue patrón pamere, tura casada tsehue mere amereyaju camadya ama. Era tuque merecara aya tibu pamere jida jahue aatsu ama” jadya. Cristo cuitadya mereya bucha meree ecana neacue. ⁶ Jida mere nejuque.

Micuanaja patrón cuanara petayaju camadya ama mere nejudue. Tunara petaya amaju tumebaedy a mere nejudue. Paju ama micuanaja inime: “Ecue patrónja jida baishu camadya mere paju. Tura petayaju camadya casada mere paju. Tura petajacahuaju mere pajujaca” jadya. Jida mere jucara tsehue ecana ne-merue; Cristo emereu bucha mereedy a ecana neacue, Yusuja biji eque micuana anicara juya tibu. ⁷Jadya micuanaja inime paju: “Ique rehua cuat-sashaquique camadya ama tuque mereya, tumebaedy a tuque mereya Cristo. Jadya tibudya ecue inime taca eque, pureama tsehue jadya mere paju”. ⁸Neadebacue riyaque. Ecuana Cuatsashaquira ecua na peady a peady a tsujetyabuque tsujema mere juya cuanaque, tumebaedy a tsujequi mere juya cuanaque. Ty-atanabuque ecua na duty a aiju ecua na jida juhua tibu. ⁹Micuana patrón cuana, jida tsehue micuanaja mere puji cuana nebacue. Eje buchady a jutidya aana ecana neaume. Neadebacue riyaque. Arepa micuanara micuanaja mere puji cuana cuatsashaya ama bucha, micuanaja dyaditu Micuana Cuatsashaquique aniyady a barepaju. Turatu jida tuyu tsehue baya mere puji cuana, tumebaedy a micuana mere puji cuat-sashaqui cuanaque.

Yusura ecua na Ijahua e je bucha ayaju catachiti ish u tyahuaque

¹⁰Amena ish u micuana cuejaya duty a micuana. Necacasaticue, Satanásra e je bucha ayaju catachiti ish u, micuanaja casa tsehue ama, Ecuana Cuat-sashaquija casa tsehue. ¹¹Sudaru cuana cuat-sashaquira tuna tyaya pajidaque eiyetauju catachiti ish u. Jadidya ecua na Yusura tyaya tujaque cuita casa, ecua na ecanimehuallatiuju. Micuana micuana tumeque casa tsehue anitaqui, Satanásra ijahue eau tibu, tura micuana cajuchatishacara ayaju micuanaja baca ish u ama. ¹²Sudaru cuanatu catiya, riyaque yahuaju aniya cuanaja casa ijahue aishu. Ecuana bacue aputashatillacara aya casa ejitaju ama cuanaque Yusu tsehue cahuaitya cuanaque. Ecuana ecua na catiya riyaque yahuaju maju aqui cuana tsehue ama. Ijahua cuana riyaque yahuaju ejitaju ama cuana tsehue ecua na catiya. Jadya tibudya tuque ecua na sareya Yusuja casa. Tumeque ijahua cuana tuna dyaque casada. Tuna tuna dyaque jidama. Piyebatilla tupu ama tuna. Duty a queja tuna riyaque yahuaju aniya.

¹³Jutaquijudya nebacacue Yusu, micuana casatura ish u. ¡Nebacacuedya iyacua cuita! Yusuja casa net-sumecue sudarura ai pajidaque quicueneti ish u et-sumeu bucha. Jadya ni micuana juya, tume micuana Satanásra cajuchatishacara ayaju, micuana jidama ju-atsu, tume micuana Jesús tsehue nime aputajacaya ama. ¹⁴Sudaru catira cuaishu ecabajejeti ejuu bucha nejudue. Pana adeba neacue yunerique ijahue eatauju;

sudaru tuja una junudara echicashauju pana caquereti ejuu bucha nejudue. Jida tuyu neanicue, jucha metse ejuu tibu; sudaru ujeda eatauju ai jida pajida tsehue yacua ecapenetiu bucha nejudue. ¹⁵Duty a queja Yusu tsehue jida inime bajeje ish uque quisarati necuejacue; sudaru zapato cajututitsu ejeque ediji equedy a jutidya ejuneni bucha nejudue. ¹⁶Duty a ai inime tupuqui eauque, Jesús queja nimee jutidya nejudue, Satanásra ecajuchatishauju, sudaru ai pajida aridaque yacua cat-achiti ish uque cadujuti bahue bucha. Tuatsehue cati- yara piya jujuya tsehue maretsu tujatu e je bucha ama aya. Ticutiya jutidyatu piya cuana yacua penequiju. ¹⁷Pana ejene neri neacue Satanás quejaque Yusura in-ajacamerehuaque, Satanásra inime tupu cuana ecua nencuau tibu, sudaru ai pajida tsehue iyuca ecapenetiu bucha. Yusuja quisarati netsumecue, Sa- tanásra e je bucha eauju capeneti ish u, sudaru tuja cuchiru beta eque jacua ea tsehue catachiti bae bucha. Yusuja Espirituja casa tsehue netsumecue.

¹⁸Yusu queja nebacabacajacaume micuana tuja tsahua ish u. Tuja Espiritura micuana adebamereya Yusu e je bucha isarae eauque. Tuatsehue quis- aratiyaque, Yusu queja nimee cuita camady a nejudue. “Tsahuacue duty a micue cuanaque, Tata. Satanásra e je bucha eauju ecana tachicue. Casaturacue ecana”, jadya Yusu neajacaume. ¹⁹Iyacua ique rehua etare apudaju eisha, era tumeque quisarati cuejahua tibu. Jadya tibudya Yusu queja nebacabacacue ecue ish u.

—Tata, casaturacue Pablo micue quisarati tuja bajida tsehue ama cuejanuca ish u. Paanucatu mira amereya eque. Yuequedy a tunajatu adebahua ama mira Jesús queja ecatyati cuanaque inajacamereyaque. Iyacua tuquemi ejitaju ahua. Tsahuacue Pablo, umae cuana tuja cueja ish u, —jadya Yusu necuejacue.

Amena ish uque quisarati

²¹Tiquicora micuana cuejatiya ique e je buchique, micuana ique e je bucha juyaque bahue juishu. Tuque tuque ecuanaja ecua na tsehuequique dyaque iyuhuedaque. Turatu merejacaya ama Ecuana Cuat-sashaquique. Nime casada tsehue tujatu mereya. ²²Cuadishaya tuque micuana queja riyaque quirica tsehue. Cuadishaya tuque micuana queja micuana ecua na e je buchique cuejati ish u, tumebaedy a micua- na casatura ish u.

²³Yusu ecuanaja Etatara, tumebaedy a Ecuana Cuat-sashaqui Jesucristora inime tsapema neanishacue micuana ecua na tsehuequi cuanaque. Tatsera dyaque iyuhueda peya cuana tsehue necabatishacue. Tatsera netsahuacue Jesús queja nimeedy a jutidya juaje ish u. ²⁴Yusura jida tsehue nenarucue tuja qiyuhuebati tse- hue, Ecuana Cuatsashaqui Jesucristo iyuhueda baja- cacarama juya cuanaque.

Riya tupu camady a ri quirica.

Pablo

FILIPENSES

Riyaque quirica ri Pablora Filiposju aniya cuanaja ishu cuadishacuareque. Tuquetu dyaque pureama cabaticuare Jesús queja catyatitsu. Tumbaedy tura ecuana Jesúsja cuanaque pureama amerecara aya. Arepa Pablo-ri riyaque quirica etare apudaju netiyara hueneacuare ama bucha, tuquetu peya inime ama jucuaire. Ecanimehuallati amatu jucuaire. Jadya ejuuquetu pureama jutidya jucuaire Jesús jaque cabatitsu. Arepa eje bucha jidama inime cuanaju ama bucha, ecuana pureama jutaqui, jadyatu jucuaire.

Umae versículo cuana jida cabahuityati ishuque tu riyu cuanaque: 1: 18, 21; 2.5-11; 3.7-14; 4.4, 6-8, 11, 13, 19.

Pablora Jesús queja ecatyati cuanaque isaracuareque

1 Era rique micuanaja quirica cuadishaya. Ique Pablo. Timoteo ri eatsehue. Isaramereya micuana yatsera. Yatse yatse Jesucristo merequique. Cuadishaya rique quirica Filiposju Yusuja cuanaja ishu, Cristo Jesús queja cuita camadya ecatyati cuanaja ishu. Micuana neri neri micuana isaraya Jesús queja ecatyati cuanaque cuatsashaqui cuanaque, tumbaedy Jesús queja ecatyati cuanaque tsahuaqui cuanaque. ² Yusu ecuana Etatara, tumbaedy Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Pablo Jesús queja ecatyati cuanaja ishu Yusu queja bacabacuareque

³ Ejeque uradya jutidya micuana adebatsu tuque pureama tsehue Yusu jadya aya: —Ecue Etata Yusu, yusurupai mique aya, mira Filiposju aniya cuanaque mira naruhua tibu. Yusurupai dutya tunaja ishu. Tunara micue quisarati bacametse ahua eque, riyaque huecaca tupu, tunara ique tsahua-jachua ama Ecuana Cuatsashaqui mere. Yusurupai mique aya, tunara ique tunaja ai aniya tsehue tsahuahua tibu, —jadya tuque Yusu aya, micuana adebatsu.

⁶ Micuana Jesús queja catyatihuaaju micuana Yusura iyacuanehua. Tura micuana tura amerecara aya bucha amereajeedy jutidya aya. Eratu pana ejene aya Yusura eje bucha tibunehuaque tura tuequedy adadiyaque. Jesucristo junanucahuaju, micuana tura amerecara aya eque jubuque. ⁷ Era micuana dyaque iyuhueda baya. Jadya tibudya tuque ecue micuanaja ishu jadya inime tuputaqui. Yusura ique casaturahua, dutya eje bucha juyaque pureama tsehue idu ishu. Ique etare apudaju netichine patya, huaraji cuanaja yacuaju quicuenetitaqui, era Yusuja quisarati cuejajaju jadya tura jida tsehue bachine. Tsahuajacacuare ama micuanara ique canerecatiyaju. Jadya tibudya micuana Yusura baya jida tsehue.

⁸ Yusuratu adebaya eje bucha iyuhuee micuana era bayaque. Era micuana iyuhueda baya, Jesucristora

iyuhueda baya bucha iyuhueedy. ⁹ Yusu queja micuanaja ishu bacabacayaque tuque jadya ajacama aya:

—Tata, Filiposju micue cuanaja miatsehue peya cuana tsehue jadya iyuhue paaniajedy jutidya. Paadebaajedy jutidya tuna mique eje buchique. Micue iyuhuedaque tuna iyuhueda paba. Mira ujeu bayaque tuna ujeu paba, —jadya tuque ecue abahue Yusu micuanaja ishu.

¹⁰ Jadya juatsu micuana jida bahue judadiya ejeque jidamaque, jidaque jadya. Jidaque tuque micuana eadadiu. Jadya juatsu tuque micuana aya amadya asicadaque, bisutadaque jadya. Cristo junanucatsu tura micuana banabuque ai tibu nereda ataqui ama, jucha metse ama jadya. ¹¹ Yusuja biji eque micuana anibuque, Jesucristora jadya amereya tibu. Micuana jida tuyu jadya anie juyaju, peya cuanara Yusu pureama, mui jadya paa.

Pablo etare apudaju eishatana ama buchatu Yusuja quisarati cuejatanajacuare ama

¹² Umaeja ni tu inime jucuaire: “Pablo etare apudaju eishatana tibu, peya cuanara amena Yusuja quisarati bacaya ama cuana bucha”. Bahue micuana amerecara aya; jadique ama tume, micuana ecue eatsehuequi cuanaque. Dyaquedy tunajatu Yusuja quisarati bacacuare. ¹³ Dutya sudaru Romaju dyaque inime metse cuanaque ique etare apudaju ishaqui juchine cuanaratu bacachine Jesúsja quisarati. Bahuedya tuna juchine ique Jesús queja nimeeque tuja quisarati cueja puji tibu etare apudaju ishatanachineque. Tumbaedyatu jetiama peya ecuita cuana riyaque epu ebariju aniya cuanaque bahue ique eje bucha juatsu rehuaque.

¹⁴ Tumbaedy dutya jujeri rehua Cristo eque ecue eatsehuequi cuanaja aijama baji Yusuja quisarati cueja ishu. Tunaratu bachinedya ique Yusura jida inime tsapema amereyaju, arepa ique etare apudaju ama bucha. Jadya tibu tuna bahuedya Yusura dyadi tuna naruyaque, tuque mere juyaju jida inime tsapema amereyaju.

¹⁵ Eje umara Cristoja quisarati cuejaqui cuanara ujeu baya. Ni tuna Cristo eje buchique cuejacara aya. Nere-

catura, tsapetillaya jadya jutidya tuna aya ecuita cuana. Tunaja quisarati bacaqui cuana queja tuna casumimereticara juya. Tunara cuejayaque camadya tunajatu ecuita cuana queja ijacabacamerecara aya, era cuejayaque bacue aijama. Tunajatu inime juya: "Pablo ni tu cahuaiiya ecuanara cuejayaque camadya ecuita cuanara bacaya baatsu". Jadya tunajatu quisarati cuejaya jidama tsehuedya jutidya.

Peya cuanara bacue Cristoja quisarati cuejaya jida inime tupu tsehue. Quisaratiya tuna, tuque iyuhueda baya tibu, tumbaedy a ique. Tunaratu adebayadya huaraji cuana Cristoja quisarati cueja ishucue emajaca ani ishucue Yusura ique rehua iyhuaque. Bahuedya tuna tunajadya Cristoja quisarati cuejataquique, ique tumeque cuejara cuinanataqui ama tibu.

¹⁸ Arepa eje umara Cristoja quisarati jidama tsehue cuejaya ama bucha, cahuaishaya ama tunara ique. Ecahuitiique, pureama jutidya juya, peya cuanara Cristoja quisarati bacaya baatsu. Jadya tibudya, eratu jidama ama inime baya, quisaratiya ni ecanacuita cuana pureamatura ishucue, jadya ama juatsu Yusu pureamatura ishucue. Pureama ique jujacaya ama, tunara Cristoja quisarati cuejajacaya ama tibu.

Cristo ecuanaja emajura, chachara jadya pureamaturataquique

¹⁹ Adebayadya tuque ique eje bucha juyaque, ecue jida ishucue judadiyaque, micuana ecue ishucue Yusu queja bacabacaya tibu. Tumbaedy Espiritu Jesúsra cuadishahuara tsahuaya. ²⁰ Eje bucha acara ebari, eje buchadya ama amadya acara jadya tuque aya ecue ataquique. Bisutaqui amatu Cristo eje buchique cueja ishucue, iyacua neri neri. Jadya jucara juya dutya ique eje bucha juya eque Cristo pamuitana. Iyetana ishucue ni, inajacata ishucue ni, eratu Cristo muimerecara aya. ²¹ Ique chacha jari tupu, ecue: tu bijida Cristo pureamatura ishucue, ai ecue biji eque juishucue ama. Iyacua cuita ique tuque aniyaju amadya datse. Majuya ni ique, tuja yacuajudy judiruya ni eje tupu jaca ishucue ama. Ecue ishucue dyaque jida ique maju ishucue.

²² Huaraji cuanara inajacamereyaque juatsu, tume tuque ecue emajaca aniyadya Ecuana Cuatsashaquija quisarati cuejanuca ishucue. Tumbaedy peya cuana tsahuanucaya tuaqueja catyati ishucue. Jadya tibu ejeque inime mepetaqui ama cabatiya, Jesús queja judiru, rehuadya tuque mere, eje bucha cuana taa. ²³ Ejeque inime mepetaqui ama juya. Majucara, majucarama jadya jutidya juya. Eje buchadya majucara juya Cristo queja judiru ishucue. Jadique ni tu dyaque jida ejuu riyaque yahuajudy jutidya mere ejuuque. ²⁴ Micuanaja ishucue dyaquedy saretanaya ique rehuadya ani ishucue jari, ecue micuana tsahua ishucue, Jesús dyaque jida micuana adebamere ishucue.

²⁵ Jadique juatsu taa majunime ama jari. Cuanucaya ique micuana queja, Jesús micuanaja dyaque jida adeba tsahuara. Tume ni micuana dyaque pureama juya, Yusuja biji eque ani dyaque jida bahue juya tibu.

²⁶ Ique micuana tsehue Jesús pana adebamere aishucue

junucatsu taa micuana dyaque jida ejuu. Tume micuana equisaratiu jida Jesúsja ishucue tura ique eje bucha ahuaque adebatsu.

Pablora Jesúsja cuanaque eje bucha anie jutaquique cuejacuareque

²⁷ Cristoja quisarati ejenehua cuanaque aniya bucha anicara nejuque. Yusu pureamatura ishucue cuita camadya, yuhuacama ecadutyati tuque merecara tsehue cuita camadya neanicue. Jutaquiju era cuitadya ni micuana batiya, rehuadya bahue judadiya micuana peya cuana tsehue iyuhueda cabatiyaque Yusu pureamatura ishucue. Sudaru cuana tuna tsehue catiyaque ijahue aishucue ecadutyatiu bucha, jadidya micuana ecadutyati jutaqui peya cuana cueja ishucue Jesús queja catyatisu Ijahua quejaque einajaca juishucue.

²⁸ Nemubaume micuana Jesús queja nimee juya baatsu micuana ujeu baqui cuanaque. Tuna jadya juyajudyatu adebataqui tunara Yusu adebayaque ama. Tume tuna inime cacuaretiya amaju, Yusu tuna jacameretabuque ni eje tupu jipenuca ishucue ama. Amena micuana bacue Jesúsja quisarati micuana bajida tsehue ama cuejaya ni micuana tuaqueja nimee jujacaya, jadique tu ejitajudy micuanara Yusu adebayaque. Tume micuana Yusu queja judirubuque ni eje tupu tuque jaca ishucue ama.

²⁹ Jadya ama bucha, paju ama micuanaja inime riyaque yahuaju canerecatiya ama jadya. Yusradya jadique inime iyahua tibu catyatiya camadya ama ecuanacristo queja, tumbaedy ecuananerecada juya, tujaque juya tibu. ³⁰ Yusu adeba baecua cuanara micuana ujeu babuque, ique acuare bucha. Sudaru casadara canerecati cuana iduya bucha jetiedya juatsu ama, jadyatu era iduhua pureama tsehue, ique Jesús jaque baatsu tunara jidama ayaju. Ique tuhua Filiposju juquare patya bacuaredya micuanara era iduyaju tuatsehue nime aputajacatsu ama. Iyacua micuana bahuedya riyaque quirica eque, Epafrodito eque era pureama tsehue iduyaque jari, arepa tunara ique jidama aya ama bucha.

Peya cuana jida aishucue inime tupuqui ataquique, ai ecuanaja ishucue camadya ama

2 Micuana Cristo queja catyatihua tibu, iyuhueda tsehue necabaticue peya cuana tsehue. Cristora micuana dutya peadya peadya iyuhueda baya tibu, iyuhueda necabaticue peya cuana tsehue. Yusuja Espiritu dutya micuana peadya peadya tsehue tibu, iyuhueda tsehue necabaticue peya cuana tsehue. Micuana peya cuana tsehue quiyuhuebatsati aqui juya tibu, iyuhueda tsehue necabaticue. ² Pureama tsehue neanicue. Peya cuanaja jida ishucue dutya neacue, micuanaja ishucue camadya ama. Peadya inime tsehue camadya ai acara neacue. Dutya tupu micuanaja inime tupu paju. Jadya anie juatsu micuana ejitaju juya yurameta iyuhueda cabatiyaque. Jadya anie ni micuana juya, pana pureama micuana juya. ³ Micuanaja purea-

ma ishu cuita camadya ai neaume. "Ique dyaque jida, dyaque inime metseque, peya cuana bucha ama", jadya micuanaja inime paju ama. Micuana tacadya jutidya peya cuana bucha inime metse ama necabaticue. Tuna pureamaturacara neacue, ai micuana taca ama. ⁴ Eje buchadya tsahuajacacarama peya cuana neacue. Peya cuanaja jida ishu neacue; micuanaja ishu camadya ama.

Arepa Yusu ama bucha Jesús ecuita jucuaque

⁵ "Eje buchadya merecara neacue peya cuana micuana ecameremeretiuque. Cristo Jesúsra inime tupucua bucha inime netupucue. ⁶ Riyaque yahuaju juna jarijutu Cristoja inime juhua: "Ique ecue Etata Yusu jadya yatse beta tupu. Jadya ama bucha, ique yahuaju jari tupu, ecue Etata emui bucha ique muitajacaya", jadyatu Jesúsra inime tupucua. ⁷ Tumetu emui ejuuque, tuja inime taca cuitadya aima bucha jucua. Arepa ecuatsashaqui aridaque paju ama buchatu riyaque yahuaju junahua peya cuana mere ishu. Cuinanacuare maju aqui. Arepa tuque Yusu jucacua ama buchatu ecuita jucua. ⁸ Etataque Yusuja yana equedyatu dutyaju jucua. Majucua ecuana jiteque. Curusuju tatahuajutu majucua. Jadya bisutada iyee tunajatu quiyeti puji cuana abahue jucua. Jadyatu Jesús jucua tuta taca, peya cuana mere ishu.

⁹ Jesús majuhajutu Yusura chacha nityatsuranucua. Tuaequeja tsurashanucatsu tujatu huaraji aridaque amerecuare, dyaque inime metseque aniyaju. Eadeba tujatu amerehua "Ecuana Cuatsashaquique" jadya ebacani tsehue. ¹⁰ Dutya eiyauquetu chichucata jubuque Jesús mui ishu. Barepaju cuanaratu muibuque barepaju Yusu tsahuaqui cuanara, tumbaedy Jesús queja ecatyati cuanaque majucua cuanara. Riyaque yahuaju chacha aniya jari cuanaratu muibuque. Ijahua cuana, tumbaedy Jesús queja catyatima majucua cuanaque tuna chichucata jubuque tuja yacuaju, "Ecuana bijidamaduracuaretu huaraji dyaque aridaque", jadya juyaque.

¹¹ "Miquemi Ecuana Cuatsashaquique, huaraji dyaque aridaque, Jesús. Emuitu Etata Yusu juya", jadya tuna jubuque Jesúsja yacuaju chichucata juatsu.

Peya cuana Jesús adebamerequi jutaquique

¹² Ique tuhua micuana tsehue jucua patya, era bahuityaya eque micuana jucacua ama, micuana ecue iyuhueda cuanaque. Iyacia micuanaja inime paju: "Arepa Pablo rehua ecuana tsehue aijama paju ama bucha, tura bahuityahua eque neanijacara ama" jadya. Yusura micuana Ijahua quejaque inajacamerehuaque ejitaju cabameretiyaque neanicue, Yusu pureamatura ishu. Cahuaitishacarama jadya neanicue. ¹³ Tura cuitadya micuana nime casaturaya tuja yana equedyaju ishu; casaturaya tuja biji eque ani ishu.

¹⁴ Dutya neacue abacata tsehue. "Yusura taa jidama aya. Juya amadya ique tura amerecara aya eque", jadya inime netupuume. ¹⁵ Arepa micuana riyaque

yahuaju Yusu adeba baecua cuana ducu aniya ama bucha, tuna aniya bucha anie nejuume. Tuna tuna tuyu ama inime cadujutiya. Tuna tuna Yusura anishacara aya eque ama cuita aniya. Neanicue dutyaja micuana Yusu jaque bahue juishu. Tuyu inime necadujuticue. Nejuume ni eje bucha peya cuanaja micuana "Miquemi jucha metse", jadya aishu. Purari equetu bahue ejeque meta ajeyaque eju tuque cuayaju junati ishu; tume bae nucadyatu umae cuana bahue juya micuana eque Yusu queja eje bucha judirue juishuque. ¹⁶ Micuanaratu peya cuana cuejaya Yusu queja judiru ishuque quisarati. Tsajajayaque icueneta junati juishu ecacasatiu cuita bucha, jadya ique cacasatihua micuana Jesús dyaque jida adebamere ishu. Tuja biji eque neanijacaume. Tume ique amena pureama jubuque Jesúsja yacuaju netitsu. Casumitibuque ique micuanaju, yanacana ama Filiposju mere ahuaque adebatsu.

¹⁷ Pae cuanaja Yusu uu cuana eiyequete etya bucha, jadya micuana micuana taca catyatihua Yusu queja, Jesús queja catyatitsu. Ique ni majutaqui micuana Jesús queja catyati tsahuahua tibu, pureamadya juya, arepa tunara ique papititubu ama bucha. Jadya juatsu ecue ami pajuridya, uva nacaca esanashaque pae cuanara Yusuja ebacaniju paquehuaju jurihua bucha. Pureamadya juya, Jesúsja quisarati cueja ishu ecue emajaca anihua tibu. Bahuedya ique micuana dyadi pureama juyaque Jesús queja catyatihua tibu. ¹⁸ Jutauquiju, peya inime nejuume, tunara ique iyeyaque juatsu. Pureama jutidya nejuque Yusura ecue ishu ahuaque, micuanaja ishu jadya.

Pablora ecana Timoteo cuayaque cuejacuaque

¹⁹ Juhua aba eje bucha cuana taa tunara aya. Bahuedya ique Ecuana Cuatsashaqui Jesúsja biji eque judadiyaque. Ebajarara datse tuque Timoteo Filiposju micuana queja cuadishacara aya. Tuque juetinuatsu, tura ique micuana eje buchique cuejetihuaju ique pureama juya. ²⁰ Timoteo tuque cuadishaya tura micuana dyaque iyuhueda baya tibu; era micuana tumbaedy iyuhueda baya. Tura micuana bacara aya, etataquera ebacuaque ebau bucha. Aijamari peya micuana queja ecuadishauque micuana tsahuacara ebari ejuuque. ²¹ Uvae rehua eatsehue cuanaque rena cuacarama juya Filiposju. Tunaja ishuque cuita camadya tuna dyaque inime tupu ishu aya; Jesucristo mere ishu bacue aijama.

²² Micuanaratu adebayadya Timoteo. Micuanaratu adebayadya tura tuja ishu inime tsapeyaque ama Jesús mere ishu camadya. Timoteoratu Jesús merehua eatsehue beta tupu peya cuana Yusu queja judiru ishuque quisarati cueja. Ebacua etataqueja yana equedyaju ejuu bucha, jadya tsahuae tura yana equedyajuatsu achine. ²³ Jutauquiju huaraji cuanara inime bajeyaque paba jari. Iyeya, inajacaya eje bucha tunara ique ayaque bahue juatsu, tuque Timoteo cuadishaya Filiposju micuana cuejamere ishu tunara inime bajeyaque. ²⁴ Jadya ni Yusuja inime, inajacayadya tunara

ique. Inajacaya ni tunara ique, tume masadamadya ique dyadi cuayadya micuana cuajira.

Timoteo cuamaju

Epafrodito Filiposju judirunucacuaque

²⁵ Juhua aba eje tsunu cuana taa yatse Timoteo tsehue ecua tuhua. Ecuetu inime juya cuadishanucataqui ni tu Epafrodito ebajarara cuita. Tuque tuque ecue eatsehuequique. Tuquetu eatsehue mere juhua Jesúsja quisarati cueja. Sudaru cuanara tuna ujeda nerecaturayaju eiduu bucha, jadidya tuque yatse tura era jadya iduchine Yusu adeba baecua cuanara ijahue ijahue ayaju. Tura tuque ecue chipiru bechine micuanara ique tsahua ishu sitachineque. Tuquetu tsahuat-sahuaya eje bucha tura tsahuataqui baya eque, tuque rehua tupu, micuanara amerehua equedya. ²⁶ Rehua junatsutu ujejeda junachine, micuanara quisarati bacatsachine baedya. Micuanara tuja ishu jidama inime bayaque adebatsu, tura micuana ebajarara badirunucacara aya, micuanaja amena tuque mejemejeque batsa ishu. ²⁷ Pusha amadyatu dyaque cuita ujejeda juchine. Majujerichine rique. Yusura nerecabatsuri chacha junucachine. Tuque chachanetsu, Yusuja dyadi canerecabati anichinedya eatsehue. Epafrodito majuchineque juatsu taa ique dyaque peya inime ejuque.

²⁸ Jutaquiju tuque masadama cuadishaya micuana queja, micuana tuque banucatsu pureama juishu, tuque adebatsu micuana peya inime ejuu tibu. Era micuana tumbaedya jidama inime ishudya bachine, micuanara Epafrodito bacara ebari eauque adebatsu. Tuque judiruhuaque adebatsu micuana jidama inime ishu ajacaya. ²⁹ Nebatsacue pureama tsehue; micuana tsehuequi cuanaque ebatsau bucha batsae neacue. Dyaque iyuhueda nebacue. Iyuhueda tuque ecuanaja Yusu merequi cuanaque bajacataqui ama Epafrodito juhua bucha. ³⁰ Cristo mere juyaquetu tuque ujejeda juatsu majujerihua. Arepa emajuu cuanaque adebaya ama buchatu tura ajacahua ama micuanara tuque amerehuaque. Micuana rehua eatsehue juatsu ebau bucha baedya tura aya.

Yusura ecuana Ijahua quejaque inajacamereya Jesús queja catyatihuaju, jidaque mere ayaju ama

3 Peya micuana bahue amerecara aya, micuana ecue eatsehuequi cuanaque. Pureama nejucue, micuana Ecuana Cuatsashaqui jaque tibu. Icuene micuana cuejahua pusha pusha bahuityaqui cuanaja micuana ijahue aishu ama. Eje buchadya eje uma cueja acara micuana aya. Jesús queja nimeedya jutidya juaje ishu nebaume tume pusha pusha ari cuana.

² Necanaruticue tume bahuanatacarama juya cuana tsehue, chapa mureda bucha cuana tsehue. Jidamadya jutidya tuna juya. Ecuaita huitu biti tuna catubumeretiya, jadya juatsu Yusu queja ejudiruu bucha adebatsu.

³ Tunaratu inime tupuya tuna Yusu jaque bucha, tuna ecuita huitu biti ecaturumereti tibu. Ecuana bacue pusha ama cuitadya Yusu jaque. Ecuana Jesús queja catyatihua tibu, tuque ecuana adebaya ecuana Yusu jaque, Yusuradya ecuana tujaque amerehua tibu. Tuja Espiritura ecuana Yusu muimereya. Ecuana ecuana casumitiya Cristo Jesús jaque cabatitsu. Ecuana taca ama ecuana Ijahua quejaque quinajacameretihua israelita cuanaja bahue ecuita huitu biti catubumeretitsu, ni peya eje bucha eque ai aatsu ama.

⁴ Ecuana taca quinajacameretitaqui ni ejuu, ique taa quinajacameretitaquidya juhua, ique datse jida juhua tibu. Aijamatu ni ejeque buchique ique bucha jida anihuaque. ⁵ Ique datse ecasumiti ejuu. Ique Israel eque ejuracanaque. Israelita cuanaja bahue tunara tubucue ecue cuinana huecaca catsurutihua, Yusura israelita cuana amerecuar bae. Benjamín eque ejuracanaque ique. Ique hebreo. Ecue etata, ecue ecuaa ecatsatu hebreodya jucuar. Ique fariseo jucuar. Casaticuare ique cacuatsashati eque ani ishu, tumbaedya ecuanaja baba cuanaja bahue eque ani ishu.

⁶ Ique taa Yusu pureamaturacara datse jucuar. Jadya tibudya tuque Jesús queja ecatyati cuanaque jidama acuar, tuna Yusuja biji eque ama juya bucha baatsu. Duya cacuatsashati cuana eque datse anihua jida anicara juatsu.

⁷ Pusha amadya icuene ique casumitihua duya tume cuanaju, Yusura ique jida baya bucha cabatitsu, ique jadya anie juhua cabatitsu. Yume tucue jadya ama. Jesús queja catyatitsu ique casumitijacahua ique icuene eje bucha anie juhuaque. Yusura ique tujaque amerehua ique Cristo queja catyatihuaju ademe.

⁸ Riyaque camadya ama, dutyadya tuque jacahua Jesucristo Ique Cuatsashaqui queja catyati ishu. Tujaque juishuquetu dyaque saretanayaque, peya ai riyaque yahuaju saretanaya bucha ama. Jiji ai asicadaque ebijidamadurata bucha, jadya bijidamadurae tuque ecue beruque ani aya, Cristo cuita camadya adeba, pureamatura jadya aishu. ⁹ Eje buchadya tuaqueja cuita camadya inime tsehue anicara juya. Jadya tuque ecue inime cacuatsashati cuana eque anitsu ama, Cristo queja catyatihuaju Yusura ique jucha metse ama baya tibu. Yusuratu jucha metse ama baya Jesucristo queja ecatyati cuanaque. ¹⁰ Eje buchadya pana adebaajecaradya jutidya tuque Cristo aya. Majuhuaque, enetitsuranucaya casa eque ique anicara juya. Turatu Yusuja biji duya aha, arepa canerecatihua ama bucha; jadidya ique jucara juya. Canerecatitsutu curusuju majuhua. Jadidya ique nime aputacara juya ecue biji eque juishu, Yusu pureamaturayaque cuita camadya ani ishu, ¹¹ majutsu ique Yusu queja judiruyaque bahue juya tibu.

Yusura ecuana amerecara aya eque jucara ebari jutaquique

¹² Ique Jesucristora cuatsashaya eque ama jari cuitadya juya. Yusura ique amerecara aya eque cuita ama jari juya. Canimehuallatiya ama ique. Jadya eju-

uque, eje buchadya Yusura amereya eque jucara ebari juya. Tsajajayaque catuputiyaque ejeque icuene judiru ishu ecacasatiu bucha, jadidya ique cacasatiya Yusura ique eje bucha amerecara aya eque juishu. Icuene Cristo Jesúsra tujaque amerehua ique jadya anie juishu.

¹³ Jadya micuana cuejaya, micuana ecue eatsehuequi cuanaque. Idya cuitadya bahue Yusura ique eje bucha amerecara aya eque juyaque ama jari. Jadya tuque inime tupuya: "Arepá era eje uma mara Yusu merehua ama bucha, tura cuatsashaya eque ique juajetaquidya jutidya. Peya bacue ique nime aputataqui dutya ique eje bucha juhua cuanaque. Yusratu ihuarahua tuja yacuaju Cristo Jesús queja dutya ecatyati cuanaque. Tsajajayaratu etibene queja petaya ama; icuene tujatu petaya, tuja judiru ishuque eje buchadya adadicara tsehue. Jadidya ique juya, Yusura ique amerecara aya eque juishu. Jadya judirue ique ejeque huecaca tu- aqueja jubuque. Tyabuque tura ique jidaque dutya tu- ja cuanaja ishuque", jadya tuque inime tupuya.

¹⁵ Dutya ecuanara Cristora cuatsashaya eque juya cuanaja tuque ecuanaja inime tuputaqui jadya. Bahuedya ecuaná Yusu pana pureamatura ayaque ama aniyaque jari. Umaera ni micuana jadya ama inime tupuya, Yusura micuana adebamereya yunerique. ¹⁶ Jadya ama bucha ecuaná anitaqui eje bucha ecuaná Yusura adebamerehua eque, ecuaná anihua bucha an- inucatsu ama.

¹⁷ Ique, ecue ecare cuana jadya ecuaná Filiposju ju- cuare patya Yusu pureamaturacara ecuaná jucuaré. Neanicue ique aniyá buchá, micuana ecue eatsehue- qui cuanaque. Jetiamatu aniyá micuanaja epuju ecua- ná buchá anie juya cuanaque. Necatsahuaticue peya cuana tsehue jadya anie juishu.

¹⁸ Jetiamatu aniyá Yusuja biji eque ama aniyá cua- naque, arepa "Jesús queja ecuaná catyatihua" jadya juya ama buchá. Amena eje uma cueja micuana ahua tuna eje buchique. Yudijidya cueja micuana anucaya. Tuna eje buchá anie juya tsehue tunara dyaque peya inime amerehua. Arepa "Jesús quejatu catyatitaqui, cu- rusuju majuhua queja" jadya juya ama buchá, tuna, tu- naja anijudya adebataqui yuneri cuitadya ecana tu- aqueja peadya camadya ama tuna catyatiaque. ¹⁹ Tu- na tuna Yusu queja ama judirubuque; jaquebuque tu- jatu ecana ni eje tupu jipenuca ishu ama. Tuna tuna eje buchadya jutidya juya tuna eje buchá jucara juya equedya jutidya, Yusu Neri pureamaturayaque ama. Ai bisutadaque aatsu ecana casumitiya, jida juya buchá cabatitsu. Inime tsapequi tuna aya ama ai Yusu jaque. Riyaque yahua juque camadya tura inime patya aya.

²⁰ Ecuaná ecuaná jadya ama. Arepa ecuaná riyaque yahuaju eje uma huecaca piji aniyá ama buchá, ecua- naja eaniqui neritu barepaju Yusu aniyaju. Tuhuaquetu Ecuaná Cuatsashaqui Jesucristo junanucabuque. Eje buchadya junashahuishacara tsehue tuque ecuaná ihuaya Ecuaná Inajacamerequique. ²¹ Jesús junanucat- su tujatu ecuanaja ecuita cabapetishanabuque tuja ecuita bae cuitadya. Ecuanaja ecuita tu casadama, riri

aquí jadya. Amena Jesúsja ecuita bacue cabapeticuare ni eje tupu riri aquí juishu ama. Jadidya tujatu abuque ecuanaja ecuita. Casa tujatu aniyá dutya ai aniyá cua- naque cuatsasha ishu. Tumeque dyaque casa tsehue tura ecuaná cabapetishanabuque.

Ecuana Cuatsashaqui jaque cabatitsu pureama juaje- taquique

⁴ Ejeque huecaca ecuaná Jesús tsehue anibuque adebatsu necanimehuallatime, micuana ecue eatsehuequi cuanaque. Ecuaná Cuatsashaqui queja nimee nejujacaume. Dyaque iyuhueda micuana baya. Eje buchadya bae acara micuana aya. Micuanara ique dyaque jida amerehua. Yusura micuanaju eje buchá ahuaque inime tuputsu, tuque adebaya yanacana ama tuja quisarati era micuana cuejahuaque.

² Quisarati tuque cuejacara aya Evodia, tumbaedyá Síntique. Ique bahue juchine metse ujeu cabatiyaque. Metse cuinetse buchique metse Jesús queja betadya catyatihua tibu. Jadya tibu cati cati nejujacacue; betara tupu jida inime netupucue.

³ Tumbaedyá mique cuejaya, Suyugos. (Riyaque ebacani ri "tuhua cuinetse mere juyaque" jadique.) Nerecabacue ique; tsahuacue tumeque epuna ecatse ecahuaitique. Jida ecatse quisaratishanucacue. Tatse tatse ecuaná tsehuequique epuna ecatse. Ique tuhua Yusuja quisarati cueja jucuaré patya tatse betadya mere jucuaré eatsehue. Tumbaedyá Clemente, umae cuana ique Yusu mere tsahuacui jucuaré cuanaque. Tunaja ebacani cuana tu amena ehue ne Yusuja cuana- ja ebacani cuana ehue neju. Ehue ne tuna Yusura dutya tuaqueja judirushabuque cuana tsehue.

⁴ Pureama nejujacaume, Ecuaná Cuatsashaquira micuana jacayaque ama caadebatitsu. Cuejanucaya micuana era. Pureama nejujacaume, arepa jidama in- imeju ama buchá. ⁵ Peyara jidama ahua ju necacuare- huanatime. Jida tsehue jutidya ecana nebacue dutya. Ecuaná Cuatsashaquiquetu tsunutaya ama. Tume tura ecuaná cuarehuananaya.

⁶ Inime tsapequi ai neaume. Jidama inimeju, ujejeda jadya cabatitsu Yusu tsehue nequisaraticue. Micua- nara ai sareyaque juatsu, Yusu nebacacue. Necuejacue micuanara ai bijida bayaque. "Yusrupai dutya mira ahua cuana eque", jadya neajacaume. ⁷ Ecuaná jadya juyaju, ecuaná Yusura jida inime tsapema amereya, Cristo Jesús queja catyatihua tibu. Arepa ecuaná inime jidama cuanaque bajeje ishu ecacasatiu ama buchá, ai ama ecuaná ejuu. Yusura peadya camadyatu dutya eau.

Dutyá jidaque inime tupuqui ataquique

⁸ Micuanaja ishu quirica huenetillama jariradya micuana cuejacara aya riyaque, micuana eatsehuequi cuanaque. Jidama inime cuanajudya jutidya jidama in- ime ishu ebauque, jidaque inime tupuqui neacue. Jida juatsu peya cuana ai etyauque inime tupuqui neacue. Inime tupuqui neacue yunerique, camuibati jadya.

Tuyuque inime tupuqui neacue, ai micuana ca-juchatishaquiju ama. Jida inime tsapema ishuque inime tupuqui neacue, pureama ishujyadya. Jadya cuanaque inime tupuqui neacue.

⁹ Era bahuityahua eque neanicue. Ique micuana queja juticuare patya micuana bahuityacuare Yusuja biji eque ani ishu. Micuanaratu adebayadya ique micuana ducu Yusuja biji eque anicuareque. Jutaquiju jadya aniedya nejucue. Tumetu Yusu micuana tsehue aniya. Yusuradya micuana inime tsapema anishaya.

Pablora Filiposju cuanaque chipiru cuadishahuaju yusurupai acuaque

¹⁰ Ecuana Cuatsashaquira micuana queja tsahuamerehua. Jadya tibudya ique dyaque jida. Yusurupai micuana aya. Adebayadya tuque era micuanara ique tsahuajacacarama ahuaque. Tsunudatu eje bucha jadya jutaqui ama juhua. ¹¹ Paju ama micuanaja inime: "Pablotu quisaratiya, canerecaticuare tibu" jadya. Aijama, jadya ama tuque. Ecue ai aniya tsehue piji pureama cabahuenetihua, riya piji, jadya ama juatsu umada jadya tsehue. ¹² Amena ique cabahueneticuare eje bucha juyaju jidadya jutidya cabati. Ique bahue ai aijamaju eje bucha anie jutaquique jetiama aniyaju, jadya ama juatsu riya piji aniyaju. Ecue riya piji ara ishuque aniyaju, adebayadya tuque ique Yusura tyayaque. Ecue earaqui umada aniyaju, yusurupai tuque Yusu aya. Ai eje uma ama aniyaju, jadya ama juatsu umada aniyaju, canimehuallatiya ama ique. Yusurupai jutidya tuque Yusu aya. ¹³ Eiduudya tuque dutya ique eje bucha juyaque canimehuallatitsu ama, Jesús eatsehue tibu. Turadya ique casaturaya; ita taca ama. ¹⁴ Jadya ama bucha micuanara jidadya tsahuahua ique jidama inimeju nubihuaju.

¹⁵ Riyaque amari micuana Filiposju cuanara ique tsahuametse ayaque. Ique Macedonia epu cuanaju Yusuja quisarati cuejatibune jucua patya micuanara tsahuacuare. Ique Tesalonicaju jariju micuanara ecue chipiru cuadishacuare ique tsahua ishu micuanara cuadishacuareque. Jadya apidya ama micuanara

acuare. Micuanara tyacuare tumeque chipiru, ique tsahua ishu, ique Yusuja quisarati cueja peya epu cuanaju juneniyaju. Micuana Filiposju cuanara Jesús queja catyaticuare cuanara micuanara peadya jadya acuare.

¹⁷ Ecuetu inime juhua ama: "Ita tunara ecue ai ecuadishau" jadya. Micuanaja inime tacadya tuque micuanara ecue cuadishahua. Micuana micuana inijeda ama juhua eatsehue. Jadya tibudyatu Yusu dyadi inijeda amadya juya micuana tsehue. ¹⁸ Amena rique ecue aniya dutya era sareyaque. Epafrodito tsehue micuanara cuadishachineque rique ecue aniya tupu ai. Jadya tsahuae micuanara ique achine, Yusu etyau bucha tyae micuanara achine. Tuja biji tu jadique. Yusujatu bijida muru ijimedaque tuja etareju pahuayaju; jadyajudyatu ejitaju juya tuque muiqui cuanaque. Tumebaedyatu Yusura bijida baya micuanara ique tyachineque; ejitajudya micuana juchine Yusu muiyaque. ¹⁹ Micuanara ique ecue aijama tsehue tsahuahua; ecue Etata Yusura micuana tyadya micuanaja dutya ai aijamaque. Dutya ai aniyaque tu tujaque. Tuquetu inijeda ama. Tujatu tyabahuedya dutya ai Cristo Jesús queja ecatyati cuanaque.

²⁰ [Dyaque jida, casada taa ecuanaja Etata Yusu! [Muitanajacaya ama tuque! Jadidya paju.

Pablora Yusuja cuanaque isaramerecuareque

²¹ Isaramereya micuana dutya tuhua Yusuja cuanaque, micuana Cristo Jesús queja ecatyati cuanaque. Eatsehue cuanara micuana tumebaedya isaramereya; tuna dyadi tuna Jesús queja ecatyati cuanaquedya.

²² Eatsehue cuanara camadya ama micuana isaramereya. Tumebaedya dutya jujeri riyaque epu ebariju Yusuja cuanara micuana isaramereya. Aniyari Jesús queja umada ecatyati cuanaque; tuna tuna huaraji aridaque jetiama epu cuanaju merequi cuanaque. Tunara neri neri micuana isaramereyadya.

²³ Ecuana Cuatsashaqui Jesucristora jida tsehue nenarucue tuja quiyuhuebati tsehue. Jadidya paju.

Riya tupu camadya.

Pablo

COLOSENSES

Riyaque quirica ri Pablora Colosasju aniya cuanaja ishu cuadishacuaque. Umae yunerique ama bahuityaqui cuanara patu Colosaju cuanaque acuaque: “Barepaju Yusu tsahuaqui cuanaque nemiucue, tumbaedy peya cuana ai ejitaju cuanaque ama”. Acuaque tujatu ecana: “Jesús queja ecatyati cuanaque ecuita huitu biti necatubumereticue. Aniyatu uma earaqui arataquima cuanaque. Moisésja cacuatsashati eque cuita micuana anitaqui” jadya. Pabloratu tume cuanara bahuityayaquepa pusha pusha jadya acuaque. Tura tuna acuaque: “Cristo tu dutyaju inime metseque jadya, ejitaju ama cuanaju, ejitaju cuanaja jadya.

Bahuityacuare tura ecuana. Cristotu aniya peadya peadya tuja cuana queja, ecuana Yusu pureamaturayaque cuita ani ishu. Huenecuaretu ecuana etareju cuanaque ecuana eje bucha bae ataquique.

Riya cuanaque versículo cuana tu jida cabahuityati ishu: 1.17; 2.6-7, 10; 3.14, 15-17, 23; 4.5-6.

Pablora Jesús queja ecatyati cuanaque isaracuareque

1 Era rique micuanaja quirica cuadishaya. Isaraya micuana era. Ique Pablo. Jesucristoja yana atsaquique ique, Yusuja jadya inime juya tibu. Tumbaedy micuana Timoteora isaramereya. Tuquetu ecuana tsehuequique. ² Cuadishaya rique quirica Colosasju Yusuja cuanaja ishu. Micuana micuana ecuana tsehuequi cuanaque. Bahue ique micuana Cristo queja nimeedy jutidya juajeya. Yusu ecuana Etatara jida tsehue nenarucue tuja quiyuhuehati tsehue. Tura inime tsapema neanishacue.

Pablora Colosasju cuanaja ishu Yusu yusurupai acuaque

³ Cuejaya tunara ecuana micuana Cristo Jesús queja nimeedy jutidya juajeya, tumbaedy micuanara peya cuana Jesúsja cuana jida inime tsehue bajacayaque ama. Jadya tibudya tuque ecuana Yusu micuanaju jadya aya:

—Yusurupai mique ecuana aya, mira Colosas juque micue cuanaque ahuaque baatsu, —jadya tuque ecuana ajacaya ama Yusu, Ecuana Cuatsashaqui Jesucristoja Etataque.

⁵ Icuene tuque micuana bacahua quisarati jidaque yunerique. Bacahua micuana Yusura tuja cuanaque barepaju tuatsehue aniquere ana ahuaque. Cuejayaju bacahua tibu tuque micuana pana ejenedya aya Yusura micuanaja ishu jidaque iyahuaque tyabuqueque. Jadique ejeneya tibu, micuana Jesús queja nimee jujacaya ama. Jadique ejeneya tibu, tuque micuana Yusuja cuanaque iyuhueda bajacaya ama.

⁶ Quisarati jidaque cuejayaju bacatsu, Yusura micuana iyuhueda bayaque bahue juatsu, arepa micuana cajuchatihua ama bucha, adebahuadya tuque micuana yunerique. Jesús queja catyatitsu, tuque micuana dyaque jida eadebaajeu. Adebajehuaadya jutidya micuana tuque eje buchique, tumbaedy peya cuana iyuhue micuana adebahuadya. Micuana camadya ama

tumbaedy uma peya epuju cuanaque tuna cuejatanaya riyaque quisarati. Jadya bacatsu tuna dyadi Jesús queja catyatidyadya. Tunara dyaditu peya cuana iyuhuedadya baya.

⁷ Epafrastra micuana icuene cuita cuejaya riyaque quisarati jidaque. Turatu Cristodya mereya, yatsera mereya baedy. Tuquetu dyaque jida mere juya. Dyaque iyuhueda tuque yatseja. Tuquetu micuana queja yatse cuarequique. ⁸ Juetitsu tura yatse cuejatihua micuana eje buchique.

—Colosasju Jesucristoja cuanaque tuna dyaque iyuhueda cabatibareya peya cuana tsehue, Yusuja Espiritura jadya anishae aya tibu, —jadya tura ecuana cuejachine micuana eje buchique.

⁹ Jadya tibudya ecuana Yusu queja bacabacajacaya ama micuanaja ishu. Micuanaja quisarati bacatsametse achine eque ecuana jadya Yusu queja bacabacaya:

—Ecuana Etata, Colosasju micue cuanara pana adeba paa mira ecana eje bucha anishae acara ayaque. Bahuityacue ecana mira jida bayaque, jidama bayaque jadique adeba ishu. Dyaque caadebameretiajecue. Micue Espiritu eque ecana jadya amerecua, —jadya tuque ecuana Yusu abahue.

¹⁰ Riyaque pana adeba aatsu, micuana Ecuana Cuatsashaquiija biji eque eanijacau ama. Tuja biji eque micuana jujacaya ama. Jida inime tsehue tuque micuana peya cuana baya, micuanara eje bucha tsahuataqui baya eque tsahua jadya. Dyaque jida tuque micuana Yusu eadebau. ¹¹ Tumbaedy ecuana Yusu queja bacabacaya micuanaja ishu:

—Tata, miquemi dyaque jida. Micuetu dyaque casa aniya. Micue dyaque casa eque casaturacue Colosasju micue cuanaque. Casaturacue ecana tunaja dutya eje bucha juyaque idu ishu. Mira ecana jadya casaturae ahuaaju tunajatu cahuaaitibatsaya ama. Canimehualatiya ama, arepa eje buchique idutaquima baya ama bucha, —jadya tuque ecuana Yusu abahue.

¹² Tura jadya nime casatura ahuaaju micuana casada juya. Tume tuque micuana ecuana Etata pureamatu-

raya. "Yusurupai, mique ecuana tsehue tibu", jadya tuque micuana aya. Turatu tyaana ahua ai jidaque peadya peadya cama tuja cuanaque. Yusura cuat-sashahua eque aniyaque juatsu, micuana micuana huecadaju ajeya cuanaque buchique. Huecadaju ajeya cuanaque tuna bahue eju cuayaque; jadidyatu micuana nara adebaya Yusu. Turadyatu quisarati iyahua micuana tuja yacuaju judirubuqueque, tuque dutya naruqui juhuaju. ¹³ Icuene ecuana Satanásra cuatsashaya eque anihua. Satanás tu Yusu ujeu cuanaque cuat-sashaquique, meta juneniya cuanaque buchique cuat-sashaquique. Yusura ecuana inajacamerehua Ijahua quejaque. Iyacu tu Satanás ama ecuana cuat-sashaquique; Yusuja Ebacuaque dyaque iyuhedara ecuana cuatsashaya. ¹⁴ Tuja Ebacuaquetu majuhua ecuana inajacamera ishuhua. Jesústu majuhua ecuanaja jucha cuana tsujetyaqui. Tuaequeja catyatihuaju, tuque ecuanaja Yusura jucha cuana tillahua.

Jesús ecuanaja jucha cuana seca ishuhua catyatihu tibusu Yusu jida nuca ecuana tsehue

¹⁵ Cristo tu ecuanaja Etata Yusu baeque cuita nucadya. Arepa Yusu ejitaju ama paju ama bucha, Cristo tu junahua ejitaju. Tuquetu Yusuja Ebacuaque, Yusura dutya iyahua cuanaque dyaque inime metseque. Yusuja riyaque yahua dutya ai aniyaque iyama jarijudyatu Cristo anihua. ¹⁶ Tuatsehuedyatu Yusura iyahua dutya ai barepaju, yahuaju aniyaque. Ejitaju amaque ejitajuque jadya tatsejatu iyahua. Tatseratu iyahua barepaju Yusu tsahuaqui cuanaque casaju ijahue catimere baecua cuanaque, enaruqui cuana casada cuanaque, ecuat-sashaqui cuanaque jadya. Cristo tsehuedyatu Yusura dutya barepa juque Yusu tsahuaqui cuanaque iyahua. Cristora ademetu dutya iyahua. Tuja ishutu dutya iyatanahuadya. ¹⁷ Cristo tu dutya iyama jariju anicuaque. Tura ademedyatu dutya ai aniyaque jida iyaya. ¹⁸ Cristoradyatu cuatsashaya tuaqueja ecatyati cuanaque. Tudyu tuque ecuanaja iyuca buchique; ecuana tuja ecuana ecuita buchique. Tuquetu Ecuana Maju Baecua Anishaquique. Tuquetu chacha netit-surancuhua Dutyu Cuatsashaqui juishu, dutya ai aniyaque ebaretilla juishu.

¹⁹ Yusuja jadya inime juya tibudya tu Cristo Ebacuaque Yusu cuitadya; beta tupu tatse. ²⁰ Jadyatu Yusura inime tupucuaque: "Yahuaju cuanara, barepaju cuanara jadya muiya ama. Ujeu tunara baya. Era cuat-sashaya eque ama tuna aniya. Era tuna eaqueja amerecara aya, ecuique juishu. Ecue Ebacua eque tuna ecue amerecara anucaya", jadya tujatu inime tupucuaque. Jadya eque tujatu Ebacuaque curusuju majucuaque. Ami quijehueticuaque jucha cuana tsuje. Yusuja tu amena cahuaiti etere. Jadya juhuajutu amena anihua emajaca yahuaju aniya cuanaja, barepaju aniya cuanaja jadya Yusu jipenuca ishuhua.

²¹ Icuene tuque micuana tuque ujeudya bahua. Tuque jipetaqui ama bucha micuana anihua. Jidamaquedyu jutidya micuana inime tupuqui ahua. Jidamaquedyu jutidya micuana ajacahua ama. ²² Iyacu

bacue Yusuja cahuaiti terehua micuana tsehue. Tuja Ebacuaquetu cacuitatitsu riyaque yahuaju junahua. Junatsutu curusuju majuhua. Tuaequeja catyatihuaju, Yusura micuana tuja cuanaque amerehua, micuanaja jucha cuana tillatsu. Asicada buchique tura micuana secahua. Jadya eque micuana tuja yacuaju judirubuque; jucha metse ama tura micuana babuque. Jadya tura micuana amerehua tuaqueja amere ishuhua. ²³ Yusuja yacuaju jadya cabamereti ishuhua, Jesús queja nimeedya jutidya nejuajecue. Quisarati jidaque ejenet-su, micuana pana ejene ahua Yusura tura aana ahuaque adadiyaque, ejeque huecaca ecuana tuaqueja judirubuqueque jadya. Etare ayaquetu saretanaya dudu cuana aridaque; dedatu puchatanaya, etare cuejiji casadara edaduaju. Jadidya tuque micuanaja quisarati yunerique ejeneajetaquidya jutidya, peya cuanara yunerique ama cuejayaju bape bape inime etupuu tibu. Baya quejeneti arida nejuume. Riyaque quisarati yuneriquedyatu era, peya cuanara jadya cuejaya dutya queja.

Yusura Pablo tuja cuanaque tsahua ishuhua, tuque dyaque jida adebaquere ishuhua jadya mepecuaque

²⁴ Ique etare apudaju ishatanachine, era Yusuja quisarati israelita ama cuanaque cuejahua tibu. Arepa jadya nerecadae ataya ama bucha, ique pureama juya. Cristo ujeu baqui cuanara ecuana ijahue ijahue aatsu nerecaturaya ecuana Cristoja cuanaque. Ecuana jadya nerecadae atayaquetu Cristo cuitadya canerecetiya bucha, ecuana tuja ecuita buchique juya tibu. Ique canimehuallatima canerecetiya cabatitsu areque umae cuana pacacasati Jesús tsehue nime aputa ishuhua. ²⁵ Ique Yusura cuatsashahua Jesús queja ecatyati cuanaque tsahua ishuhua. Jadya meree juishu tura cuat-sashahua micuanaja jida ishuhua. Cuejamerehua tura ique tuja quisarati dutya queja.

²⁶ Yuequedyatu ni ejera adebahua ama eje bucha inajacameree Yusura ecuita cuana Ijahua quejaque eauque. Yusuratu cuejahua ama ni ejeque. Amena iyacu bacue tura tuaqueja catyatiya cuanaque bahue amereya. ²⁷ Yusuratu inime pirecuare. "Cristo israelita cuana queja camadya ama paju, tumbaedyu israelita ama cuana queja. Jadya tuque ecue bijida ecue cuanaque riyaque bahue amere ishuhua". Jadya tibu tu Cristo micuana tsehue, arepa micuana israelita ama juya ama bucha. Jadya tibu tuque micuanaja pana ejene aya micuana eje tupu Yusuja yacuaju judirubuqueque. Dyaque jida taa tuque ecuana tsehue.

²⁸ Jadya tibudya tuque ecuana dutya cuejaya Cristoja quisarati, israelita ama cuanaque, israelita cuana jadya. Cuejaya tuque ecuanara ecana jidamaque tunaja jaca ishuhua. Yusura dutya bahuityahua eque tuque ecuana aya. Jadya ecuana juya, Cristora cuatsashaya eque dutya ani ishuhua. Jadya ecuana juya, Yusuja yacuaju judirutsu ecuana tura amerecara aya eque cuita judiru ishuhua. ²⁹ Tuna jadya amere ishuhua ique dyaque cacasatiya. Cristora cuitadya ique cacasatishahua ique castereya

tupu mere juishu. Dutya casa tura ique tyahua tsehue tuque mereya.

² Pusha ama cuitadya ique inime patya juya micuanaja ishu, Laodiceaju cuanaja ishu, dutya tumeque yahuaju ecue ebutsequini bama cuanaja ishu, tuna pusha pusha bahuityaqui cuana queja ijahue ecatimereju. Micuana micuana bahuiedya ique micuana jiteque casada mere juyaque. ² Jadya juya, micuana canimehuallatima Yusu pureamatura ishu, iyuhueda tsehue micuana peya cuana tsehue cabati ishu. Jadya juya, micuanaja quisarati yunerique pana ejene aishu, pusha pusha bahuityaqui cuanara micuana ijahue eauju. Yuequedyatu ejeque bahue juhua ama Cristo eque ecuita cuana Yusu queja judirubueque. Etehua buchiquetu juhua. Amena iyacuatu Yusura ejitaju ahua. ³ Turadya ecuana adebamereya Yusuja bijida, bijidamaque jadique. Educuju eteri aniyaque peta ishu yahue tsehue epacashau bucha, jadidyatu Yusura Cristo eque ejitaju amerehua ai jidaque, jidamaque jadique.

⁴ Jida inime netupucue, quisarati pusha pusha bahuityaqui cuanara micuana ijahue eauju. Tunara cuejayaque tu ejenetaqui buchique; yunerique ama tume. ⁵ Arepa ique micuana tsehue ama ama bucha, era micuana inime tupuqui ajacaya ama. Micuanapa Yusuja cuanaque eanita bucha aniya. Micuanapa canimehuallatima Jesús queja nimee jujacama. Jadya bahue juatsu ique dyaque pureama juya.

Yusura ecuana iyacuanehuaque

⁶ Micuana Ecuana Cuatsashaqui Cristo Jesús queja catyatihua tibu, peadya camadya bucha nejudue tuatsehue. ⁷ Tuaequeja nimeedya jutidya nejuajecue. Acui aridaquetu casada netiya, etiri arida deda ecua tibu. Etaretu casada aija bucucushataqui ama netiya, dudu cuana arida deda epucha tibu. Jadidya ecuana casada jutaqui, Jesús tsehue ecadutyati juatsu. Tuaequeja catyatihuaju tura ecuana casaturaya tuaqueja nimeedya jutidya juaje ishu. Quisarati yunerique neejenejacaume micuana cuejatanahuaque. Yusurupai neajacaume Yusu.

⁸ Jida inime netupucue, ni ejera buchique micuana Jesús queja nimee amerejaca ishu ama, micuana Ijahua quejaque Inajacamerique. Micuana ni tuaqueja nimee jujacanucaya, tume micuana ina risi jadya eataque bucha junucaya. Tumeque pusha pusha arida cuanara bahuityayaque tu ecuitara inime tupuyaque jutidya. Yanacana cuita tunajatu bahuityaya. Pusha pusha jutidya tunajatu bahuityaya. Cristoja quisarati ama tunajatu bahuityaya. Tumeque ebahuityaque, tunajatu baba cuanara cuejahuaque jutidya tunajatu bahuityaya. Ibedaque ama cuita jutidya tunajatu cuejaya. Arepa tuna bahue cuanara cuita camadya tunara bahuityayaque eadebau jadya aya ama bucha, pusha ama cuitadya tunajatu ibedaque ama cuita bahuityaya. Neejeneume ecana.

⁹ Cristo tu Yusu tsehue beta tupuque. Yusu dutya eje buchique Cristo tu tume bae cuita nucadya. Tuquetu

junahua riyaque yahuaju cacuitatitsu ecuana Yusu bamere ishu, Yusu ai juyaque, eje bucha quisarati ayaque jadya bamere ishu. ¹⁰ Yusura ecuana Cristo tsehue yuhua cama bucha baya tibu, tuque ecuana sareya ama peya ecuana inajacamere ishu, ecuanaja ai aijama juyaque tyaishu jadya. Tuquetu ejitaju ama cuanaque dyaque casadaque. Tuquetu barepaju etsahuaqui cuanaque dyaque casadaque. Tuquetu ijahua cuana, yatanana cuana jadya dyaque casadaque. Jadya tibudya tuque ecuanaja barepa juque Yusu tsahuaqui cuanaque muitaqui ama. Mubataqui ama ecuanaja ijahua cuana, yatanana cuana jadya.

¹¹ Cristo tsehue ecadutyati juatsu, tuque micuanaja Yusu jaque adeba ishuque aniya. Arepa tunara micuana israelita cuanaja bahue ecuita cuanaja tubuma ama bucha, Cristora micuana iyacuanehua, cajuaticaraque bijiserijaca ishu. ¹² Cutsameretitsu tuque ecuanaja beruque inime jidamaque terehua; iyacuanehanahua ecuana Jesús queja ecuana catyatihua tibu. Majutsu chacha enetitsuranuque buchique ecuana. Iyacuanehanahua ecuana, Yusuja ecuana iyacuane ishuque casa aniyaque ejenehua tibu. Turatu tuja casa tsehue Cristo emajuque chacha nityatsuranuque.

¹³ Yuequedyaquedya tuque micuanaja cajuchatijacacaramaque. Yusuja cacuatsashati eque ama micuana anihua, micuana israelita ama juya tibu. Yusura micuana emaju bucha jutidya bahua. Iyacua micuana Yusura iyacuanehanahua. Cristo bucha juishu tura micuana iyacuanehua. Yusratu Cristo nityatsuranuque; tumebaedya tura ecuana iyacuanehua ecuana tuaqueja catyatihuaju. Dutya jucha cuana tura ecuanaja tillahua. ¹⁴ Yusratu jetiama cacuatsashati iyahua; dutya tume cuana eque ecuana anitaqui ama cabatihua. Ecuanaja jucha cuanatu Yusu queja manu buchique juhua. Cristotu curusuju tatatanahua. Tuquetu majuhua ecuanaja jucha cuana tsujetya ishu. Patrónra ecuanara manu tsujetyahuaju dutya eapupashau bucha, jadidyatu Yusura apupashahua dutya ecuanaja jucha cuana. "Cacuatsashati eque ecuana equinajacameretiu", jadya ecuanaja inime paju ama. ¹⁵ Cristo curusuju majutsu tujatu Satanás casa secanhua, tumebaedya dutya ijahua cuana casada cuanaque. Dutyaja yatucaju tujatu ecana bisuturahua, ecuarira dutya tura inamerehua cuanaque petata ishu ejunenishau bucha.

¹⁶ Nebacaume yanacana jadya quisaratiya cuanaque: "Aniya tuque ecuanaja ai arataquima cuanaque, ijitaquima cuanaque, Yusu ecahuitishau tibu. Aniyatu chine arida cuanaque ecuanaja ataqui cuanaque. Dutya badi nana ishu ecuana chine jutaqui. Chine huecacaju eje bucha jutaqui eque nejura. Jadya juyaque ama juatsu tuque ecuana Yusu cahuitishaya", jadya tuna jubahue yanacanadya jutidya. ¹⁷ Cristo junama jariju ecuana tume cuanaque cacuatsashati eque anihua. Tume cuanaquetu aputa buchique jutidya juhua, Yusura jadyatu judadiya jadya ahuaque. Iyacua bacue

Cristo junahua. Amena ecuana tume cuanaque cacuat-sashati eque anitaqui ama; tuja biji eque camadya ecuana anitaqui.

Cristo camadya tuque ecuanaja muitaqui, barepaju Yusu tsahuaqui cuanaque ama

¹⁸ Nebacaume “Yusura micuana nerecaturabuque micuana ecuana bucha ama juya tibu”, pusha pusha bahuityaqui cuanaque jadya juyaju. Tuna cuitadya tuna, tunapa aishuque ama jadya juya; tunara bacue ejeneya ama. Tunaratu barepaju Yusu tsahuaqui cuanaque muiya. Tuna bacue juya; Yusrapa ecana ejitaju bamerehua peya cuana ejitaju bameretahuaque ama jadya juya. Tuna tacadya jutidya tuna dyaque casumitiya. Tunaja inime tuputu Yusu jaque ama, ecuita cuana jaquedya jutidya tume. ¹⁹ Tunajatu jutiya ama inime Cristo eque camadya einajaca ejuuque. Tuquetu dutyaja iyuca buchique; ecuana bacue tuja ecuita buchique. Ecuanaja ecuita cuanatu daneya Yusuja inime eque. Tsuru cuana, ejaruna cuana, etsau cuana eque tuque ecuanaja ecuita cayutatiya, temuda, casada jida bucucu ishuhua. Tumebaedya ecuana Yusura Cristo eque casaturaya ecuana dyaquedya jutidya tura amerecara aya bae juaje ishuhua. Tuaequeja catyatitsu tuque ecuana Yusu dyaque jida adebamereajeyadya jutidya.

Eiyacuane tibu, ecuana icuene anicuare bucha anitaqui ama

²⁰ Cristo queja catyatihuaju tuque ecuanaja beruque ani juhua cuanaque terehua. Majutsu ecuanaja ecuita eaputau bucha, jadidya tuque ecuanaja beruque ani juhua cuanaque terehua. Yusura ecuana iyacuanehua, Satanásra, ijahua cuanara jadya amereya eque junuca ishuhua ama. Iyacuanelanahua tibu, tume jatsu micuana eje bucha juatsu Yusu ujeu cuanaque aniya bucha aniya? Tuna juya bae nejuume; nebacaume tunara cuejayaque. ²¹ Tunara “Tumequetu jabataqui ama. Tumeque earaquitu arata baecua, Yusu ecahuaitishau tibu”, jadya ayaju, nebacaume. ²² Dutyatu tsunuda ama juya; earaquitu aratsu tereya. “Ai arataquimaque arama aatsu, ijima aatsu tuque Yusu pureamaturaya”, jadya micuanaja inime paju ama. Tunara bahuityayaque tu ecuita jaque jutidya, Yusu jaque ama. ²³ Tumebaedya tuna juya: “Jadya bahuityatahua eque aniya cuanaquepa dyaque bahue” jadya. Jadya ama tuna! Tunaratu Yusu muiyadya datse, tunara eje bucha acara aya equedya jutidya, Yusura amerehua eque ama. Tuna tuna juya: “Ecuana ecuana ai ama” jadya. Jadya ama bucha tuna peya cuana bucha dyaque cabatiya. Tuna tacadya jutidya tuna ecuita jidama catiya, jidama bucha baatsu. Cuji cuita juatsu, tunajatu inime tupuya: “Ecuana jadya juya tibu, ecuana Yusura jida bucha baya” jadya.

Tuna eje bucha juya eque ni ecuana aniya, tume tuque ecuana jidamaque inime tupuqui ajacaya ama, ni ecuana Yusu cahuaitishajacaya.

Cristo pureamatura ishuhua ecuana anitaqui

³ Jesucristo queja catyatihuaju micuana iyacuanelanahua. Tuque majuhujutu Yusura anishanucanhua. Iyacuatu tuque muidaque eaniquiju aniya Yusuja jida eque amaca. Jadya tibudya Cristo eje buchadya pana adebacara ebari neacue. ² Amena micuana iyacuanelanahua tibu, Cristo eje bucha pureamatura aishuque inime tupuqui neacue. Riyaque yahua juque inime tsapequi neaume, Cristo cuita camadya. ³ Emaraturatu jidama inime ishuhua baya ama riyaque yahua juque; jadidyatu micuanara dyadi jidama inime ishuhua baya ama riyaque yahua juque aiju. Cristo tsehue ecadutyati tibu, Yusura micuana naruya. ⁴ Micuanaja yuequedyaque inime jidamaquetu iyacuanelanahua, Cristo tsehue ecadutyati aniya tibu. Tuque eje tupu junanucayaju ecuana dyadi ecuana tuatsehuedya junanucabuque. Tuquetu dyaque jidaque; ecuana ecuana tuque baedya jubuque.

Beru ecuana anihua bucha aninuca ishuhua ama

⁵ Necacasaticue micuana beru anihua bae aninuca ishuhua ama. Ai muidaque iyehua buchique tume. Nejaraquereume micuanaja caquemitiqueremaque. Nebijiseriume jadique. Asicadaque inime tupuqui neaume. Bisutadaque inime tupuqui neaume. Eje bucha bisu cuana apusha jadya nejuume aiqui jucara juatsu. Riyaquetu Yusura dyaque jidama baya. Dutya riya cuanaque inime ri cueya cueya cuana muiya buchique nucadya, Yusu camadya emuique. ⁶ Tuquetu dyaque cahuaitiya jadya anie juya cuana tsehue, tura amereya eque ama juya tibu. Canerecatishabuque tujatu ecana. ⁷ Icuene micuana anihua jidamaque acaraque bijiseri tsehue. Eje bucha ajacataqui ama tuque micuana bahua.

Cristoja biji eque ani ishuhua

⁸ Iyacua micuana beru jucuaru bae nejujacacue. Necahuaitiume. Cahuaitira nebareume peya cuanara ujeu bayaju. Peya jidama au inime tupuqui neaume. Peya eje bucha jumaquedya jutidya peya cuana queja cuatsabiji neaume. Cuatsabiji neaume bisutadaque ni cueja pidya. ⁹ Pusha pusha jutidya necatiume peya cuana tsehue. Iyacua micuana micuana icuene jucuaru bae ama juya. Amena tuque micuana ijehuehua beruque inime tupu cuana. Yusura tuque micuanaja inime tupu cuana cuaretsu iyacuanelanahua. Camisa siri jutuyaque jidama baatsu ijehue, iyacua tsehue cajututi jadya ecuana jubahue; tumebaedya micuana aniya iyacuaneajeje tuque ecuanaja inime tupu Yusura aya, tujaque bucha juishu, tuque pana adebaaje aishu.

¹¹ Iyacuaque inime tupu anitsu tuque ecuana jidama ama inime baya israelitaque, israelitaque ama; israelita cuanaja bahue ecuita huitu biti ecatubumeretique, catubumeretimaque; peya yahuaju anapeque; maqueique; tsujema mere juyaque, jadya ama juatsu chipiru

metseque. Inime tupuqui neara Cristo queja ejeque ecatyatique, catyatimaque jadique camadya. Cristora ecuana dutya tupu iyuhuee baya. Tuquetu dutya tuja cuana tsehue.

¹² Micuana micuana Yusuja cuanaque. Tura micuana dyaque iyuhueda baya; tujaque juishu tura micuana mepehua. Jadya tibudya tuque pureamatura ishuanenicue. Camisa siri tacatsu iyacuaque jututsu ejuu bucha, jadidya neanicue micuanaja inime iyacua eque, beruque amena ijehuehua tibu. Canerecabati aqui nejuque. Dutya huecaca peya cuana jida tsehue nebacue. Necasumitiume; “Ai ique dyaque inimequique”, jadya nejuume. Peya cuana ujeu tsehue nebaume; jida tsehue ecana nebacue. Necahuitiume, peyara cahuitishacara ayaju. ¹³ Jida tsehue peya cuana nebacue, arepa tunara micuana jidama tsehue baya ama bucha, arepa tunara micuana pereya ama bucha. Nenerecabacue tunara jidama ahuaaju. Ecuana Cuatsashaqui Jesúsra ecuana jucha cuana tillahua bucha, ni eje tupu adebanuca ishuanama; jadidya etsuje jucara nejuume. ¹⁴ Dyaquetu saretanaya ecuana peya cuana iyuhueda baishu. Iyuhueda peya baatsu tuque ecuana peya jacaya ama, beta esipique sirataquima bucha. ¹⁵ Peya cuana tsehue ni micuanaja dutya tupu ama inime, Cristo nebacue, tuja micuanaja inime yuhua cama amere ishuanama. Tura micuana tsahuaya inime jidamaque bajeje; tura micuana yume cama nimee anishacara aya. Turatu tuja cuanaque cuita pidya bucha camadya amerecara aya, peya cuana tsehue catsahuatibare ishuanama. “Yusurupai mique ecuana aya, mira dutya ecuana ishuanama jida ahua tibu”, jadya neajacaume:

—Yusurupai mique ecuana aya, mira dutya ecuana ishuanama jida ahua tibu.

¹⁶ Cristoja quisarati inime tupuqui neajacaume. Tuque bae nejuque. Jadya juatsu micuana bahue judadiya peya cuana tsehue Cristo pana adeba eje bucha catsahuatie juishuque. Nebahuityajacaume peya cuana tuque eje buchique. Necacasaturatibarecue peya cuana tsehue, tuja biji eque ani ishuanama. Jeru cuana eque Yusu pureama neacue. Tuja Espiritura jerushaya eque pureama neacue. Yusu eje buchique, tuque ai juyaque jeru neacue. Jadya tsehue yusurupai neacue; yuneri tsehue pureama neara. ¹⁷ Ecuana Cuatsashaqui Jesúsja inime eque neanijacaume. Tuja biji eque nequisaratijacaume. Riyaque quisarati eque Yusu yusurupai neajacaume:

—Yusurupai mique ecuana aya, Ecuana Cuatsashaqui Jesús ecuana jiteque majuhua tibu —jadya.

Jesús queja ecatyati cuanaque eje bucha anie juttaquique
(Ef 5.22–6.9)

¹⁸ Mama ecana ahuequi cuanaque, micuanaja ahue cuanara cuatsashaya equedya nejuque. Jadya micuana Ecuana Cuatsashaqui amerecara aya epuna cuana tuaqueja ecatyati cuanaque. ¹⁹ Tata ecana huanequi cuanaque, jida iyuhueda tsehue micuanaja huane cuana nebacue. Micuana cuita camadya aiju inime patya

necatiume. Jidama tsehuedya jutidya eje bucha cahuaite tsehuedya jutidya ecana nebaume. ²⁰ Ebacua cuana, micuanaja tatara, micuanaja cuara cuatsashayaju yana equedya nejuque. Micuanara Ecuana Cuatsashaqui iyuhueda baya tibu, tunara cuejaya equedya nejuque. Jadique tu Yusuja bijida. ²¹ Tata ecana bacuaqui cuanaque, necahuitishaueme micuanara baya cuanaque, tuna ecanimehuallatishau tibu.

²² Micuana etsujequi inama mere juya cuanaque, micuanaja patrón cuanara cuatsashaya equedya nejuque. Jida mere nejuque, micuanaja patrón cuanara petayaju camadya ama mere nejuque. Tunara petaya amaju tumebaedya mere nejuque. Paju ama micuanaja inime: “Ecue patrónja ique jida baishu camadya mere paju. Tura petayaju camadya casada mere paju. Tura petajacahuaju mere pajujaca”. Nemerecue ecana jida inime tsehue, micuana micuana bahuedya jadique tuyuque. Micuanara Ecuana Cuatsashaqui muitsu, tura cuatsashaya eque jucara juya tibu, jida micuanaja patrón nemerecue. ²³ Micuanaja patrón cuanara ai amereyaju neacue jida inime tsehue. Inime micuanaja paju: “Ecue patrón camadya ama rique mereya, tumebaedya Ique Cuatsashaqui Jesús. Jadya tibudya ecue inime eque, ecue pureama tsehue mere paju” jadya.

²⁴ Cristo tu Ecuana Cuatsashaqui neri. Tudyatu ecuana mereyaque. Tura ecuana tsujetyabuque ecuana eje bucha meree ahua eque. Neadebacue riyaque. Jida ni ecuana mere juya, tuyu, tume tura ecuana tyabuque jidaque tura tuja cuanaque tyana ahuaque. ²⁵ Ecuana ni jidama mere juya, tume tura ecuana tyabuque ama jidaque. Yusura ecuana tyabuque peadya peadyara ecuana eje bucha meree ahua eque.

4 Micuana patrón cuana, jida inime tsehue micuanaja mere puji cuana nebacue. Tuna queja micuana camuibamereticara juya tibu, micuana dyadi tumebaedya tuna tsehue tuyu nejuque, micuanara tume bae mereedya barepa juque Micuana Cuatsashaqui aya tibu. Neadebacue bacue riya era cuejahua cuanaque.

Pablora ecana bahuityanucacuareque

² Yusu tsehue nequisaratijacaume. Tuatsehue quisaratiyaque inime tupuqui neacue. Yusurupai neajacaume dutya huecaca. ³ Micuana Yusu queja bacabacayaque, ecuana ishuanama dyadi nebacacuedya.

—Tata, tyacue emajaca Pablo tuatsehue juneniya cuanaque Cristoja quisarati cueja ishuanama. Icuenu ni ejeque buchique bahue juhua ama Cristo eque mira ecuana miaqueja judirushabuqueque. Iyacua amena ejitaju juhua tibu, tsahuacue ecana Cristoja quisarati cueja ishuanama, —jadya Yusu neacue.

Ique amena rehua etare apudaju era israelita ama cuanaque quisarati cuejahua tibu. ⁴ Tumebaedya nebacue Yusu ecue ishuanama:

—Tata, tsahuacue Pablo micue quisarati ejitaju pana cueja aishu, tuque ijaca bacuaqui cuana jida pana adeba

aishu. Tsahuacue tuja quisarati cuejataquique cueja ishu, —jadya Yusu neacue.

⁵ Eju cuejataqui baatsu, casada tsehue necuejacue Jesúsja quisarati tuque adeba baecua cuanaque. Jidama ejuuque canaruti tsehue neanicue, tunara micuanara Jesúsja quisarati cuejayaju bacacarama eau tibu. ⁶ Tuna tsehue quisaratityaque ecana ujeda quisarati tsehue neaume. Neijillahuanaume ecana. Jida tsehue ecana yunerique necuejacue. Jida bijitaju ara ishu ecuanaja earaquiju banu iya bahue bucha, jaididya ecana micuanara neisaracue jida, tunaja micuanara Jesúsja quisarati cuejayaque bacaajecaradya jutidya aishu.

Amena ishuque quisarati

⁷ Ecuana tsehuequique Tíquico micuana queja jutitsu tura micuana cuejatiya ique rehua eje buchique. Ecuana tsehue jida merepee tujatu ahua Ecuana Cuatsashaquique Jesús. ⁸ Jadya tibudya tuque cuadishaya micuana casatura ishu, ecuana rehua jidaque micuana cueja ishu. ⁹ Tuatsehuedya tuque cuadishaya ecuana tsehuequique dyaque iyuhuedaque Onésimo, micuanaja epu juquedya. Tuquetu jida mere juhua ecuana tsahuayaque. Tatsera micuana cuejatiya dutya rehua eje bucha juyaque.

¹⁰ Aristarcora micuana isaramereya. Tuque ri rehua eatsehuedya etare apudaju. Tumebaedya Marcos, Bernabéja etatiinequeja ebacuaquera micuana isaramereya. Tuque micuana queja Colosasju jutityaque juatsu, jida nebatsacue, icuene micuana cuejatanahua equedya. ¹¹ Tumebaedya micuana Jesúsra isaramereya, tunara “Justo” jadya ayara. Marcos, Aristarco, Justo quimisha cuita camadya ri israelita cuana eatsehue mere juyaque. Eatsehuedya rena mere juya peya cuana Jesús queja catyati ishu, Yusu tunaja dyadi huaraji ecuari juishu. Riyaque ecuita cuanara dyaque tsahua, nime casatura jadya tunara aya.

¹² Epafrasra micuana isaramereyadya, micuanaja epujura. Tuquetu Cristo merequique; tura cuatsashaya equedya juyaque riya. Quisaratijacaya amatu tuque Yusu tsehue micuanaja ishu. “Tata, Colosas juque micue cuanaque Jesús queja nimeedya jutidya ecana pajuaje. Pacanimehuallati ama ecana. Mira amerecara aya eque ecana paju. Micue biji eque ani tuna pana adeba paa”, jadya tujatu Yusu abahue micuanaja ishu.

¹³ Dyaque tujatu inime tsapeya micuanaja ishu, Laodiceaju cuanaja ishu, Hierapolisju cuanaja ishu jadya, micuana pusha pusha bahuityaqui cuanara ijahue eauju. Era huenuhauque tu yunerique. Era cuitadyatu bacahua tuque Yusu queja micuanaja ishu bacabacayaju.

¹⁴ Tumebaedya micuana Lucasra isaramereya. Tuquetu casamati puji ecuanaja dyaque iyuhuedaque. Demasra micuana isaramereyadya.

¹⁵ Laodiceaju cuanaque tuque ecuana isaramereya Jesús queja ecatyati cuanaque, Ninfa neri neri tumebaedya Yusu pureama aishu tuja etareju casitati bahue cuanaque. Dutya tume cuanaque tuque ecuanaja ecuana tsehuequi cuanaque.

¹⁶ Riyaque quirica micuanara isaratillatsu, necuadishacue Laodicea epuju, tuhuaque Jesús queja ecatyati cuanaja isaranuca ishu. Tunaja ishu dyadi tuque cuadishayadya quirica. Tunara isaratsu tunajatu Colosas equeque cuadishayadya, micuanaja dyadi isara ishu. ¹⁷ Necuejacue jeeque Arquipo: “Ajacaume mere mique Ecuana Cuatsashaquira amerehuaque”.

¹⁸ Ecue emetucu tsehue rique hueneya riyaque micuana isara ishu: PABLO. Yusu queja nebacabacajacaume ecue ishu, ique rehua etare apudaju erisi netiya tibu. Yusura jida tsehue nenarucue tuja quiyuhuebati tsehue. Jadidya paju.

Riya tupu camadya micuana isaraya.

Pablo

1 TESALONICENSES

Riyaque quirica ri Pablora Tesalonicaju aniya cuanaja cuadisha ishuhuenemetse acuaque. Pablotu Corintoju jucua. Tuhuaquedyatu Timoteora cuejacua tudya cuitadya Tesalonicaju Jesús queja ecatyati cuanaque eje buchique.

Arepa ecana Jesucristoja inime nrecada juhua ama bucha, tuna tuaqueja nimee jujacacua ama. Jadya baat-sutu Pablora dyaque pureama juatsu quirica huenetsu cuadishacua, Ecuana Cuatsashaquira cuatsashaya eque anijaca ishuhua ama. "Jesucristoratu tuja cuanaque tere baecua anishaya", jadya tujatu ecana cuejacua. Ejeque huecacatu Jesúsra yudijidya chacha nityatsuranucabuque tuja cuanaque. Jadya tujatu ecana cuejacua. Umae versículo dyaque saretanaya cuanaque ri: 4.15-18; 5.16-18, 24.

Pablora Jesús queja ecatyati cuanaque isaracuareque

1 Quirica rique cuadishaya, Tesalonicaju Yusu pureama aishu caradati bahue cuanaja ishuhua. Ique Pablo. Silvano, Timoteo jadya retse eatsehue. Micuana micuana ecuanaja Etata Yusu jaque, tumbaedyu Ecuana Cuatsashaqui Jesucristo jaque. Yusura jida tsehue nenarucue tuja quiyuhuebati tsehue. Tura inime tsapema neanishacue.

Tesalonicaju cuanaque Yusu jaque jadique ejitaju cabamereticuareque

² Yusu tsehue quisaratiyara micuana ecuanara dutya adebajacama aya.

—Ecuana Etata, yusurupai mique ecuanara aya, micue cuanaque Tesalonicaju cuanaque mique purea-matura ishuhua aniya tibu, —jadya tuque ecuanaja abahue.

³ Tumbaedyu tuque ecuanaja jadya Yusu abahue:

—Ecuana Etata, micue cuanaque Tesalonicaju cuanaque tuna Jesús queja catyatihua. Jadya tibudya tunarami merehua. Tunajatu dyaque iyuhue aniya Jesús tsehue. Jadya tibudya tuna cacasatiya tuja biji eque anishuhua. Tunaratu pana ejene aya tuque junanucayaque, tura quisarati ahua equedyu. Jadya tibudya tuna canimehuallatiya ama, ni tuna Ecuana Cuatsashaqui queja catyatijacaya, —jadya tuque ecuanaja abahue Yusu.

⁴ Micuana ecuanaja ecuanara tsehuequi cuanaque, Yusura micuana dyaque iyuhueda bayaque. Bahuedya ecuanara, micuana tura tuja juishu mepehuaque. ⁵ Ecuana tuna Yusu queja judiru ishuhua quisarati cuejaya. Arepa ecuanara cuejahua ama bucha, Yusuja casa eque, tuja Espirituja casa eque jadya ecuanara quisarati-hua. Jadya tibudyatu ecuanara ijacabacaqui cuanara pana ejenedya aya yunerique. Micuana micuana bahuedya ecuanara jadya juhuaque.

⁶ Micuana bacue jidadya aniya, Ecuana Cuatsashaquique bucha. Ecuana cuejayaque bacatsu tuque micuana ejenehua. Yusuja Espiritura micuana

dyaque pureama amerehua, arepa micuana Jesús queja catyatitsu nrecada jutaqui ama bucha. ⁷ Macedonijau cuanaque, Acayaju cuanaque Jesús queja ecatyati cuanaque tuna bahue juchine micuana Yusuja biji eque aniyaque. Jadique bahue juatsu tuna micuana aniya baedyu anicara juchine.

⁸ Umaera tuque micuana peya epu cuana eque cueti-yara cueja bahue juhua Ecuana Cuatsashaquija quisarati. Macedonia, Acayajura peadya ama, tumbaedyu dutya quejaratu bacachine micuana Yusu neri queja catyatichineque. Jutajiqu tuque ecuanara peya cuana cuejataqui ama micuana eje bucha juchineque, tuna amena bahuedya tibu.

⁹ Dutya queja tunara micuana cuatsabiji aya micuana eje buchique. Ecuana micuana queja Yusuja quisarati cuejara cuahuajupa micuanara ecuanara dyaque jida batsachine. Micuanapa inime cacaretichine. Micuanarapa amena cueya cueya ea cuanaque muijachine. Yusu Neri Chachara amereya equepa micuana aniya. Yusu Neripa micuana muiya. ¹⁰ Pana ejenepa micuana aya, Yusuja Ebacuaque barepa juque junanucayaque Etataqueja yacua juque. Ihuayadyapa micuanara tuque. Jadya tunara ecuanara cuejaya.

Yusuratu Jesús emajuque chacha nityatsuranucacuaque. Jesúsra ecuanara Ijahua quejaque inajacamerehua. Ejeque huecacatu Yusura canerecatishaya dutya tuque bijidamaduraqui juhua cuanaque. Ecuana ni Jesús queja catyatihua, tumetu Yusu ecuanara tsehue cahuaitiya ama.

Pablora Tesalonicaju Yusu eje bucha meree acuaque

2 Micuanadya micuana bahue Yusuja quisarati ecuanara yanacana ama cuejachineque tuhua Tesalonicaju, micuana ecuanara tsehuequi cuanaque. Umae micuanara ecuanara jidadya batsachine. Jesús queja micuana catyatichine. ² Micuana micuana bahuedya ecuanara micuana queja juetima jariju epu ebari Filiposju eje bucha juchineque. Ijillahuanachine tunara ecuanara. Jida ama tunara ecuanara achine. Arepa ecana ecuanara tsehue dyaque cahuaitihua ama bucha,

canimehuallatitsu ama tuque ecuana ecana Yusu queja judiru ishuque quisarati cuejajacachine ama. Ecuana Etata Yusura ecuana casaturachine.

³ Cuejachine micuana ecuanara yunerique; pusha pusha ama micuana ecuanara cuejachine. Ni riya piji buchique tuque ecuanaja inime juchine ama: “Necuejara Yusuja quisarati, ecuita cuanaja ecuana chipiru tyaishu, tunaja mui ishu”. Aijama, ni eje tupu tuque ecuana jadya inime tupuchine ama. Ni eje tupu ecuanara micuana ijahue aishu jadya juchine ama. ⁴ Ijahue eauque, Yusura ecuana cuadishachine jidaque quisarati cuejara. Cuejaya tuque ecuana tura cuejamerecara ayaque. Tura ecuana jida bucha baya tumeque mere aishu. Ecuana jatu inime: “Yusura bijida bayaque tuque ecuana cuejacara aya, ecuita cuanara bacacara ayaque camadya cueja jadya ama. Tunara ni bacacara aya ecuanara cuejayaque, ecuanaratu jidama ama inime baya” jadya. Yusuratu adebaya ecuanara inime tupuyaque. Tuquetu bahue ecuana eje bucha juatsu jadya quisaratiyaque.

⁵ Micuana micuana bahuedya ecuanara ni eje tupu yuneriju amadya jutidya sumiyaque. Yusura peadyatu ecuanara inime tupuyaque adebaya. Turatu adebaya ecuanara ni eje tupu jadya inime tupuyaque: “Ecuana sumiyaju tunara ecuana dyaque chipiru netyara”. Yusuratu adebaya ecuanaja inime jadique ama. ⁶ Camuimeretihua ama ecuana micuana queja ni peya cuana queja. ⁷ Ecuana micuana achine ama: “Netyacue ecuana ecuanaja ai aijamaque. Micuanaja ecuana muibataqui ecuana Cristoja ecuaadishaque tibu”. Aijama, jadya quisarati tsehue anime ama micuana ecuanaja. Arepa ecuanaja micuana jadya bacae aishuque aniya ama bucha, micuana ecuanara jida tsehue bachine. Ecuquera ebacua cuanaque enaruu bucha, narue micuana ecuanara achine. ⁸ Ecuana micuana dyaque iyuhueda baya. Jadya tibudya micuana ecuanara cuejacara achine Yusura micuana eje bucha Ijahua quejaque inajacamere ayaque. Ai jadya camadya ama. Dyaque iyuhueda micuana ecuanara baya; eje buchadya tsahuae acara micuana ecuanara achine. Arepa jadya tibu eiyetau ama bucha, micuana ecuanara tsahuajacachine ama. ⁹ Micuana micuana bahuedya ecuana micuana tsehueju casada mere juhuaque, micuana ecue eatsehuequi cuanaque. Huecada tupu meta tupu ecuana mere juhua ecuanara sareya cuanaque cadaditi ishu, micuanaja ecuana ai tyaishu ama. Yusuja quisarati cueja juyaque ecuana jadya meree juchine. ¹⁰ Ecuana tuhua juchine patya ecuana Yusuja biji eque mere juchine. Huaraji cuanara cuatsashaya eque ecuana juchine, peya cuana tsehue jida juyaque. Ni aija nereda ataqui ama ecuana juchine. Micuana Jesús queja ecatyati cuanaque micuana bahuedya ecuana jadya anie juchineque. Yusuratu adebaya riyaque, tumbaedyu ecuana eje bucha juatsu jadya anie juchineque. ¹¹ Ecuana micuana dutya casaturahua Jesús queja catyatijaca ishu ama. Nime casaturahua micuana ecuanara. Etataquera ebacua cuanaque jida ebau bucha, jadya ecuana micuana tse-

hue juhua. ¹² Cuejachine micuana ecuanara, Yusuja biji eque micuana ani ishu, Yusuja cuanaque eanita bae micuana ani ishu. Turadyatu iyahua micuana tuaqueja judiru ishuque tura dutya naruhuaaju, tuque dutyaja esumi juhuaju.

¹³ Jadya tibudya,

—Yusurupai mique ecuana aya. Tesalonicaju cuanaratu jida micue quisarati bacachine ecuanara cuejayaju, —jadya tuque ecuana ajacaya ama Yusu.

Bahuedya micuana ecuanara cuejahuake ecuanaja inimedya jutidya ama, Yusu jaque tume. Bacatsu micuana Jesús queja catyatihua. Jadya juhuaaju micuana Yusura casaturatibunehua tuja biji eque ani ishu. Ajacaya amadya tuja tuque.

¹⁴ Tuequedya micuana micuana tsehue anae cuanara jidama achine micuana ecuana tsehuequi cuanaque. Ujeu tunara micuana bachine, micuana Jesús queja ecatyatique baatsu.

Tumbaedyatu icuene atanacuare israelita Judeaju cuanaque tuna Jesús queja catyatihuaju. Peya israelita cuanara tuna Jesucristo mui ishu caradati bahue cuanaque nrecaturacuare. ¹⁵ Israelita cuanaja huaraji cuanaratu Ecuana Cuatsashaqui Jesús iyemerecuare. Tunaja baba cuanara tuna Yusu equeque cuitadya quisarati cuejaqui juhua cuanaque iyeetibehua. Arepa tuna tsehue anae ama bucha tunajatu ecana iyeetibecuare.

Tume patya equeque iyacua tumbaedyu ecuana israelita cuanaja huaraji cuanara ecuana jida ama aya. Cuinanashaya tunara ecuana tunaja epu cuana juque, ecuanara Jesúsja quisarati cuejacara ayaju. Jesúsja biji eque ama tuna juya. Tsahuacarama tuna peya cuana aya. Bacamerecarama tuna peya cuana aya Jesúsja quisarati. ¹⁶ Ecuana ecuanaratu cuejacara achine tumeque quisarati israelita ama cuanaque, Yusuja tuna Ijahua quejaque inajacamere ishu tuna Jesús queja catyatihuaju. Tume ecuana tumeque israelita cuanara cuejamerejacacara achine. Jadya juyaque tunajatu Yusu bijidamaduraya. Dyaquedya jutidya tuna cajuchati-jeya. Jadya tibusu Yusu tuna tsehue ecahuaiti. Ejeque huecaca tujatu ecana dyaque nrecaturabuque.

Pablora Tesalonicaju cuanaque batinucacara acuaque

¹⁷ Ecuana cajacatichine equeque ecuana cabatinucama micuana tsehue. Ecuana tsehuequi cuanaque bucha iyuhuee micuana ecuanara baya. Arepa micuana ecuana tsehue ama ama bucha, ecuanara micuana adebajacaya ama. Eje buchadya micuana bacara ebari tsehue ecuana cuacara junucaya micuana cuajira.

¹⁸ Cuacara datse ecuana juya. Ique Pablo neri neri eje uma cuacara datse juya. Satanásra ecuana perejacama aya, cuacara juyaju. Jadya tibudya eje bucha cuataqui ama cabatiya micuana cuajira. ¹⁹ Ecuana Cuatsashaqui Jesucristo junanucahuaju micuana ecuana tsehuedya jubuque tuja yacuaju. Pureama ecuana jubuque micuana tujaque juya tibu. “Riyadya Tesalonicaju cuanaque. Ecuana micue quisarati cuejayaju tuna mi-

aqueja catyatihua. Arepa peya cuanara jidama aya ama bucha, tuna miaqueja catyatijacahua ama, ejene-jacahua ama", jadya tuque ecuanara Jesús abaque. Jadya cuejayaju, "Micuanara ique jida merehua", jadya ecuanara Jesúsra abaque. Jadya tura ecuanara abaque, ecuanara micuana tsahuaya tibu, tumebaedy peya cuana tuaqueja catyati tsahuaya tibu. ²⁰ Micuanara ecuanara pureama amereya, micuana Jesús queja catyatihuaju. Micuana Ecuanara Cuatsashaqui queja bameretsu ecuanara dyaque jida jubuque.

3 Eje buchadya bahue jucara ecuanara juchine micuana eje buchique. Tuequedy ecuanara eje bucha idutaquí ama bachine micuanara quisarati cuanara baecuaque. Tume tuque ecuanara inime juchine: "Ecuana jida merehuaya tibu, jutaquiju Atenasjudya ecuanara neanira. ¿Eje bucha juatsu jatsu tuque ecuanara ejeque cuana cuadishaya ama Tesalonicaju aniya cuanaque cuajira?"

² Jadya juatsu tuque ecuanara cuadishachine ecuanara tsehuequique Timoteo. Tuquetu jida Yusu merequique. Tuquetu ecuanara tsehue mere jupee juchine ecuanara Cristoja quisarati cueja juyaju. Cuadishachine tuque ecuanara, micuana casaturati ishu, micuana Jesús queja nimeedy jutidya juaje ishu. Cuadishachine tuque ecuanara micuana tsahua ishu, Yusuja quisarati micuanara jida jida cuita adebaaje ishu. ³ Micuana cueja, casatura jadya aishu tuque ecuanara cuadishachine, micuana nerecada juya cabatitsu ecanimehuallatiju, beruque inimeju micuana eaninucaju. Micuana micuana bahuedy Yusuja inimedya ecuanara nerecada juyaque.

⁴ Ecuanara micuana tsehue jariju, "Jesús adebaya ama cuanaque tuna cahuitidadiya micuana tsehue. Jidama tunara micuana adadiya", jadya micuana cuejachine icuenedya. Jadidya tunara micuana aya era micuana cuejachine eque cuitadya. ⁵ Jadya tibudyatu era inime tupuchine: "Tesalonicaju cuanaque ni tu canimehuallatichine, jadya canerecacie juya cabatitsu. Ecuanara cajuchatishacara aquira ni tuna beru anihua bae anishanucagua jadya. Ecuanara taa ecuanara casada mere juchine tuna Yusuja quisarati cueja juyaque. Yanacana mere ni taa juchine" jadya.

Micuana eje buchique bahue jucara ebari cuita juatsu tuque Timoteo cuadishachine micuana queja, micuana Jesús queja nimeedy jutidya juajeyaque bahue juishu.

⁶ Ejetsunue ama ri micuana quejaque juetichineque. Jidaque cuatsabiji ecuanara bacatsachine micuana jaque. Micuanara Jesús queja nimee jaridya. Canimehuallatimadyapa micuana. Iyuhuedapa micuana peya cuana tsehue cabatijacaya ama. Micuanarapa iyuhue apushaya ama. Bacara ebaripa micuanara ecuanara aya. Jadya tura ecuanara cuejaetichine. Ecuanara dyadi micuana eje bucha bacara ebaridya aya. ⁷ Dyaque micuana ecuanara inime tupuqui achine. Micuanara cuatsabiji cuana bacatsatsu tuque ecuanara jida inime juchine, micuana ecuanara tsehuequi cuanaque. Rehuari Yusu adeba baecua cuanaque cahuitiya jari ecuanara

tsehue. Canerecacia ecuanara. Micuana Jesús queja nimeedy jutidya juajeyaque bahue juatsu, ecuanara casatinucachine. ⁸ Micuana Jesús queja nimeedy jutidya juajeyaque bahue juatsu, tuque ecuanara eiduu pureama tsehue eje buchique jidamaque inime.

⁹ Jadya tuque ecuanara Yusu abaque:

—Ecuana Etata, dyaque mique ecuanara yusurupai aya Tesalonicaju micue cuanara ishu. Pureama ecuanara cabatiya tuna Jesús queja catyatijacama bacatsu. Eje bucha quisarati tsehue yusurupai ataquí ama ecuanara cabatiya. Mira ecuanara dyaque pureama amerehua, Tata, —jadya tuque ecuanara abaque.

¹⁰ Bacani huesajacama micuana ecuanara aya Yusu queja bacabacayaque. Huecada tupu, meta tupu ecuanara tuaqueja canerecacia:

—Tata, pacabatinuca taa ecuanara Tesalonicaju cuana tsehue. Aniya jari taa tu tunara mique eje buchique adebayaque ama. Baticara ebari tuque ecuanara ecanara aya tuhua, tuna tsahua ishu, dyaque jida tunara mique adeba ishu, —jadya tuque ecuanara abaque.

¹¹ —Tata, tsahuacue ecuanara Tesalonicaju tuna cuajira cuashu, —jadya tuque ecuanara abaque ecuanara Etata Yusu, Ecuanara Cuatsashaqui Jesucristo jadya.

¹² —Yurameta iyuhueda tuna cabatiya. Jida tsehue tuna cabati bahue peya cuana tsehue. Tsahuacue ecanara dyaque iyuhueda tsehue cabati ishu. Tsahuacue ecanara mique adebaya ama cuanaque iyuhueda baishu. Ecuanara tuna iyuhueda baya bucha jadidya ecanara tsahuacue iyuhueda cabati ishu. ¹³ Casaturacue ecanara tuna mique pureamaturayaque anicara juishu. Mique adeba baecua cuanaque aniya bucha ecanara paani ama. Jadya tuna ecuanara Etata Yusura jucha metse ama babuque mique micue cuana tsehue junanucayaju, Ecuanara Cuatsashaqui Jesús, —jadya tuque ecuanara Jesús aya.

Eje bucha anie Yusuja biji eque jutaquique

4 Pea micuana cuejaya, ecue eatsehuequi cuanaque. Ecuanara micuana tsehueju micuana ecuanara bahuityachine Yusu muiba, tuque pureamatura jadya aishu. Pusha amadya jadidya micuana anihua. Riyaque micuana iyacua cuejaya. Tura amereya eque nejujacaume. Dyaque jida nemerecua, tuque pureamatura ishu. Jadya micuana ecuanara cuatsashaya, Ecuanara Cuatsashaqui Jesúsra jadya cuatsashahua tibu.

² Icuene micuana ecuanara bahuityachinedya eje bucha anie Yusu pureamatura ishu jutaquique. Bahuityachine micuana ecuanara ai ecuanara taca inime ama, Ecuanara Cuatsashaqui Jesúsra jadya cueja ishu cuatsashahua tibu. ³ Yusura micuana tujaque amerehua. Tura micuana tuque cahuitisha ishuque amerecarama aya. Jutaquiju micuanara caquemitiqueremaque nejaraquereume. ⁴ Yusu adeba baecua cuanaque tuna caquemitiya, epuna jaraquere ishu bijiseri ebari aya tibu. Micuana bacue caquemitiya, micuanara caquemitiqeremaque iyuhue tsehue baishu, ai tuque jaraquere ishu camadya bijiseritsu ama. Iyuhueda micuanara huane cuana nebacue, jida

bau, muiba jadya ecana neacue. Jadya juyaju micuana Yusura, tumbaedy peya ecuita cuanara jadya baya jida.

⁶ Nebijiseriume Jesús queja ecatyatija ehuaneeque ni peya epuna micuanara caquemitiqereyaque ama. Ejera tuja ehuaneeque ama jadya aquereyaque tu chiri juya bucha. Jadique tu dyaque bisutada. Ecuana Cuatsashaquiratu nerecaturabuque ejeque tuja ehuaneeque ama jipequique. Icuenedya micuana cuejaha riyaque.

⁷ Yusura ecuana ihuarahua tuja juishu. Tura ecuana amerecarama aya tuque cahuaishu ishuque. Tujatu bijida, ecuana jida tuyu ani ishu.

⁸ Jadya micuana cuejaya Yusura jadya cuatsashaya tibu. Tume ejeque bahuityatahua eque anicarama juyaratu ejeque ecuita ama bijidamaduraya. Yusu cuitadya tujatu bijidamaduraya. Yusura ecuana bahuityahua tuque pureamatura ishu. Tuja Espiritu cuitadya tuja tuque ecuanaja cuadishua. Tumeque Espiritu tu cajuchati baecua. Tura ecuana tsahuaya ecuana Yusu cahuaishama ani ishu.

⁹ Micuana iyuhueda necabaticue. Tuna tsehuequi cuana tsehue ecabatita bucha cabatie nejudue. Micuana micuana bahuedya amena. Yudijidya cuejanuca ataquí ama micuana baya, Yusura cuitadya micuana jadya anie juishuque bahuityahua tibu. ¹⁰ Bahuedya ique micuana jadya anie juyaque, micuanara jida iyuhueda tsehue dutya bayaque, dutya Macedonia yahua juque Jesús queja ecatyati cuanaque. Cuejanucaya micuana ecuanara. Dyaque jida iyuhueda tsehue ecana nebacue. Jadya micuana ecuanara aya. ¹¹ Jida inime tsapema anicara nejudue. Peya cuana eje bucha jutaquique cueja micuanaja bahue paju ama. Dyaque jida micuana micuana taca necanaruticue. Dyaida nejuume. Mere nejudue micuanara ai sareyaque cadaditi ishu, micuana peya cuana queja ai aijamaque canerecatitsu catyamereti ishu ama. Jadya micuana ecuanara icuene amerechine. ¹² Micuana jadya anie juyaju, micuana Yusu adeba baecua cuanara muibaya. Tume micuana peya cuana queja canerecatitaqui ama ai tyata ishu.

Jesús junanucayaju eje bucha judadibuqueque

¹³ Cuejaya micuana era Jesús queja ecatyati cuanaque majutsu eje bucha judadiyaque, ecue eatsehuequi cuanaque. Cuejaya micuana, micuana dyaque peya inime juishu ama Jesús queja catyatima cuanaque bucha. Majutsu Yusu queja ama judirubuque caadebatitsu tuna dyaque peya inime juya ejeque majuhaju. ¹⁴ Yunerí cuitadyatu Jesús majucuaré. Majutsutu chacha netitsuranucacuare. Jadya tibudyatu yunerí cuitadya Jesús queja ecatyatique majucuaré cuanaque Jesús junanucayaju tuna Yusura chacha nityatsuranucabuque.

¹⁵ Riyaque micuana era cuejayaque ri Ecuana Cuatsashaquira ique bahue amerehuaque. Tuque junanucayaju dutya tuja cuanaque ecuanara tsurabuque tuatsehue catsuruti ishu. Ejeque ecuanara chachaque emaju cuana tsehue ecuanara cabaretibuque ama. ¹⁶ Ecuana

Cuatsashaqui Jesústu Yusuja yacua juque butebuque. Huaraji dyaque aridaque ejunau bucha, jadya junaetu Jesús jubuque. Etsuri jebuda tsehue tujatu tuja cuanaque sitanabuque. Icueneque barepaju Yusu tsahuahuquetu quiquebuque. Yusratu meyamerebuque corneta Jesús junayaque bahue amere ishu. Icuenetu Yusura nityatsurabuque emaju cuanaque Jesús queja catyatihua cuanaja ecuita.

Cuinanashabuque tujatu ecana. ¹⁷ Ecuana tuque junahuaju chacha jubuque cuanaque ecuanara tuna tsehuedya dujutanabuque huani ducu eque. Ecuana Cuatsashaqui tsehue catsuruti ishu ecuanara dujutanabuque cuejijiju. Jadya casitatie ecuanara jubuque dutya tuatsehue, ni eje tupu jaca ishu ama. ¹⁸ Jutaquiju riyá era cuejahaque inime tupuqui neacue; necacasaturaticue.

5 Dyaque bahuedya micuana; baecuatu ni ejeque buchique eje tupu riyaque jadya judadiyaque.

² Ecuana Cuatsashaquiquetu muya jutidya junabuque. Bahuedya micuana amena. Chiri puji etare metsera ihuayaju ama meta ejunau bucha, jadidyatu Jesús junabuque, dutyara jujeri ihuayaju ama. ³ Jesús queja catyatima cuanaja ni tu inime juya: "Dutyá taa jida. Ni aira buchique ecuanara canerecatishanaya ama". Tuna jadya inime tsehuejutu Jesús masadama junabuque. Epuna maquija muya jutidya ebacua cuinara ishuque uje ejuetiu bucha, jadyatu tuque junabuque muya jutidya tunara ihuayaju ama. Huananime ama tuna canerecati ishu juque. ⁴ Ecuana ecuanara bahue Jesús junanucayaque, arepa ejeque huecaca junayaque adebaya ama ama bucha. Chiri puji meta ejunau bucha muya jutidya ama tujatu etare metseque anaya tahuiyaju ama, jadidya Ecuana Cuatsashaquira neanara tuque junanucatsu muya jutidya ama; ecuanara ihuayajudya pajuna. ⁵ "Ecuana ecuanara huecadaju juneniya cuanaque buchique", jadya ecuanara juya, ecuanara Jesús jaque tibu, tura cuatsashaya eque juya tibu. "Meta juneniya cuana buchique ama ecuanara", jadya ecuanara juya, ecuanara tuque cahuaishu bijidama tibu. Meta juneniyaquetu muya jutidya ataquí capetatiya ama tibu. Ecuana ecuanara jadya ama. Ecuannaratu adebaya Ecuana Cuatsashaquique junanucayaque. Equihuatidya ecuanara. ⁶ Ecuana ecuanara huecadaju ajeya buchique. Jadya tibudya nequihuatira, eje tupu tuque junayaque ihua. Jesús queja catyatima cuanaque tuna tahuiya bucha, tuque junanucayaju ishu quihuatia ama tibu. Tuna bae nejura ama. Jida tuyuque inime netupujacara ama.

⁷ Yusu adeba baecua cuanaque tuna apuda ducu ajeya buchique. Tuna tuna quihuatia ama. Nijuquique tahuiya bucha tuna. Tunaratu Yusuja biji eque ani ishuque inime tupuqui aya ama.

⁸ Ecuana huecadaju ajeya bucha cuanaque ecuanara ecanimeti anitaqui. Sudaru ai dyaque pajida tsehue eiyetauju yacua ecapeneti ejuu bucha, jadidya tuque ecuanara Jesús iyuhueda baajetaqui tuaqueja cuita camadya catyatiaje, ecuanara ecajuchatiuju.

⁹Yusura ecuana mepehua ijahuaja etiquiju nudya ishu ama. Tura ecuana mepehua tuaqueja judirusha ishu, ecuana jadya canerecati juishu ama. Jadya Ijahua quejaque inajacamerée tura ecuana ahua ecuana, Ecuana Cuatsashaqui Jesucristo queja catyatihuaju. ¹⁰Tumeque Jesucristodyatu majuhua ecuana jiteque, ecuana Yusu tsehue ecajacatiuju. Majuhuatu tuque ecuana tuatsehue anisiri ishu. Arepa ecuana tuque junanucama jariju majuya ama bucha, jacabuque ama tuque ecuanara. ¹¹Jadya tibudya necacasaturaticue peya cuana tsehue. Necacasaticue Jesús queja nimeedya jutidya juaje ishu. Bahuedya ique micuana jadya juyaque.

Pablora Jesús queja ecatyati cuanaque eje bucha anie jutaquique cuejacuareque

¹²Peya micuana cuejaya, micuana ecuana tsehuequi cuanaque. Nemuibacue Jesús queja catyatihua cuanaque naruqui cuanaque. Tuna tuna cacasatiya micuana tsahua ishu. Ecuana Cuatsashaquira tuna cuatsashahua, micuana naruqui juishu. Cueja bahue tunaja micuana jida tuyu ani ishu. Nereda bucha cuejae tunaja micuana abahue micuanaja Yusu muiba ishu. ¹³Iyuhueda ecana nebacue. Jida ecana nebacue. Micuana tsahua ishu tuna mere juya. Dutya jida eje bucha tsehue ama neanicue.

¹⁴Tumebaedya micuana cuejaya, micuana ecuana tsehuequi cuanaque. Mere jucarama juya cuanaque ecana nereda neacue: “Dyaida nejuume. Mere nejudue micuanara ai sareyaque cadaditi ishu”, jadya ecana neacue. Necasaturacue ecanimehuallati cuanaque. Netsahuacue Satanásja casa idutaquima baya cuanaque, tura ecana ecajuchatishauju. Necahuaitume ni eje tsehue; abacata idu neacue dutya.

¹⁵Arepa peya cuanara jidama aya ama bucha, ecana etsuje neaume. Jida inime tsehue jutidya necabaticue.

Tumebaedya jida nebacue Jesús queja catyatima cuanaque.

¹⁶Pureama nejudacume. ¹⁷Yusu tsehue nequisarati-jacume. ¹⁸“Yusu, miquemi dyaque jida”, jadya neajacume, dutya jida cabatitsu, tumebaedya jidama inimeju cabatitsu. Yusuatu micuana jadya juishu bijida, micuana Jesús queja catyatihua tibu.

¹⁹Neacue Yusuja Espiritura amereya eque tura cuejayaju. ²⁰Yusuja Espirituja ecuatsashaque quisaratiyaju nebijidamaduraume tura cuejayaju. ²¹Ejeque ni “Yusuja quisarati ri riyaque” jadya tuna juyaju, micuanaja inime paju: “¿Yuneridyari riyaque quisaratiya?” jadya. Nenime adebacue. Yuneridya ni tu Yusu jaque cuejaya, pana ijacabaca neacue. ²²Neaume ni eje bucha ni jadya apidya.

²³Yusura jida tuyu tuque pureamaturayaque neanishajacume. Jadya neacue Ecuana Inime Tsapema Anishaquira. Yusura nenarujacume Ecuana Cuatsashaquira junanucatsu micuana jucha metse ama banana ishu. ²⁴Yusura micuana mepehua tuja juishu. Turadya micuana tsahuaya tuja biji eque ani ishu. Turatu ama amadya aya tura eje bucha aana ayaque.

Amena ishuque quisarati

²⁵Ecuana ishu Yusu queja nebacabacue, ecuana tsehuequi cuanaque.

²⁶Quisaraticue, emetucuju quinati jadya nejudue peya cuana tsehue, micuana iyuhueda cabatiyaque caadebamereti ishu.

²⁷Jesús queja dutya ecatyati cuanaja ijacaju neisaracue riyaque quirica. Jadya micuana amereya, Ecuana Cuatsashaquira ique jadya amerehua tibu.

²⁸Ecuana Cuatsashaqui Jesucristora jida tsehue nenarucue tuja quiyuhuebati tsehue.

Riya tupu camadya.

Pablo

2 TESALONICENSES

Riyaque ri beta ishuque quirica Pablora cuadishacuareque Tesalónicaju aniya cuanaja ishu. Riyaque quiricajuri Pablora huenequere Ecuana Cuatsashaquique junanucama jariju riyaque yahuaaju eje bucha judadibuqueque. Junabuque patu ecuita cuana bajituraquique, Yusuja cuanaque dutyadya jutidya ujeu baquique. Jesús queja ecatyati cuanaquepa dyaque nrecada judadibuque tere japadama Jesús junanucahuie. Jadya tujatu huenequere.

Umae versículo cuana cabahuityati ishu jidaque ri: 2.16-17; 3.3, 13.

Pablora Jesús queja ecatyati cuanaque isaracuareque

1 Cuadishaya rique quirica Tesalónicaju Yusu pureama aishu caradati bahue cuanaja ishu. Ique Pablo. Silvano, Timoteo jadya retse eatsehue. Micuana micuana ecuanaja Etata Yusu jaque, tumebaedya Ecuana Cuatsashaqui Jesucristo jaque. ² Yusu ecuanaja Etatara tumebaedya Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsapema neanishacue.

Cristo junanucahuaju Yusura jucha arida cuanaque nrecaturabuqueque

³ Yusu tsehue quisaratiyaque tuque ecuanaja jadya aya:

—Yusurupai mique ecuanaja aya, Tesalónicaju micue cuanaque jida aniya tibu. Dutya huecaca tuna Jesús queja catyatiajeyadya jutidya. Tuna tuna yurameta iyuhueda cabatiajeya. Dyaque jidadya jutidya tuna cabatiajeya, —jadya tuque ecuanaja abahue Yusu.

Jadidya tuque ecuanaja Yusu ataquí micuanaja ishu, micuana yuneri cuitadya Yusu pureamaturayaque aniya tibu, micuana ecuanaja tsehuequi cuanaque.

⁴ Cuejajacama tuque ecuanaja aya peya epuju cuanaque Yusuja quisarati baca ishu caradati bahue cuanaque: “Tesalónicaju cuanaque Jesús queja ecatyati cuanaque tuna Yusuja biji eque aniya. Yusu adeba baecua cuanara tuna jida ama aya, tuna Jesús queja catyatihua tibu. Jidama inime tsehue tuna. Arepa ecanaja jadya canerecatie juya ama bucha, tuna canime huallatiya ama. Tunaratu pana ejene aya yuneri cuitadya Yusura naruyaque”. Jadya micuana ecuanara sumiya. ⁵ “Arepa ecuanaja nrecada juya ama bucha, ecuanaja Jesús queja catyatiajeya”, jadya tu micuanaja inime.

Jadya tibudyatu Yusu jadya jubuque: “Tesalónicaju cuanaque tuque jucha metse ama baya. Eaqueja ecanaja paju” jadya. Jadya ejitajuetu Yusu juya dyaque tuyuque. Arepa micuana iyacua nrecada juya ama bucha, Yusu dutya naruqui juatsu tura micuana tu- aqueja amerebuque.

⁶ Yusu jadya abahue tuyu cuitaquedya. Jadya tibudya tujatu nrecaturabuque micuana nrecaturaqui juya

cuanaque. ⁷ Ecuana bacue nrecada juya cuanaque Yusura ecuanaja nrecada amerejacabuque. Barepa juque tuque tsahuaqui casada cuanaratu tajibeque. Ecuana Cuatsashaqui Jesús Yusuja yacua juque rehua junanucahuaju ecuanaja Yusura nrecaturajacuque. Tuque etiqui jujuja hueca ducu junanucatsu tujatu nityabuque canerecati cuana. ⁸ Yusu adeba baecua cuanaque nrecaturaratu jebuque. Tume Ecuana Cuatsashaqui Jesucristo queja catyaticarama juhua cuanaque tujatu ecanaja nrecaturanabuque. ⁹ Nrecaturabuque tujatu ecanaja nrecaturajaca ishu ama. Jipebuque ama tunajatu Ecuana Cuatsashaquique ni eje tupu jipe ishu ama. “Eje casau cuita dyadimi, Yusu! Emeui taa mique!”, jadya tuja cuanaque juyaju, tuja cuanaque ama tuna tuque jipenime ama jubuque.

¹⁰ Ecuana Cuatsashaquique junanucahuaju dutya tuja cuanara tuque ecuanaja muibuque. Dutya tuaqueja ecatyati cuanara tuque ecuanaja jadya abuque: “Miquemi dyaque jidaque, Jesús! Miquemi dyaque casadaque! Pureama mique ecuanaja aya” jadya. Micuana micuana tuhuadya jubuque tuatsehue, Yusuja quisarati ecuanara cuejayaque ejenetsu micuana catyatihua tibu.

¹¹ Jadya tibudya ecuanaja Yusu tsehue quisarati jacaya ama micuanaja ishu. Bacaya tuque ecuanaja:

—Ecuana Etata Yusu, mira tuna mepehua Tesalónicaju cuanaque micue ishu. Tsahuacue ecanaja micue cuanaque eanita bucha anie tuna juishu. Tuna tuna micue yana equedya anicara juya. Tsahuacue ecanaja micue casa tsehue, tunaja peya cuana jida tsehue baishu. Tuna Jesús queja catyatihua tibu tunarami mereya. Casaturacue ecanaja tuna micue ishu mere juca ishu ama, —jadya tuque ecuanaja Yusu abahue.

¹² Micuana ni ejitaju Yusu jaque cabameretiya, tume- tu peya cuana jadya ejuu: “Jesucristo tu jida, tuja cuanaque jida tura amereya eque cuita aniya tibu”. Tumebaedya ni tu Yusu jubuque: “Jida bucha taa baya Tesalónicaju cuanaque ecue cuanaque” jadya. Eje bucha jida jue ni ecuanaja juma ecuanaja taca cuita. Ecuana Etata Yusura, Ecuana Cuatsashaqui Jesucristora jadya ecuanaja baya jida bucha, tatsera ecuanaja jida tsehue naruya tibu.

Dyaque jidama cuitaque Jesús junanucama jariju ejitaju jubuqueque

2 Cuejacuaredya micuana ecuanara, Ecuana Cuatsashaqui Jesucristo junanucabuqueque. Cuejacuare micuana ecuanara, Jesús queja dutya catyatihua cuanaque ecuanara dutya tuatsehue casitatu buqueque. Pana ijacabaca neacue era iyacua cuejayaque.

² Aira cuejatsu ama micuana Jesús junanucahuque bahue jubuque. Bacaya ni micuana quisarati: "Jesústu amena junanucachine", jadya cuejayaju necajidamatiume. Bape bape inime netupuume. Yunerique ama tume. "Yusura ique bamerehua Jesús junanucahuque", jadya cuejayaju neejeneume. Ejeque ni quisaratiya: "Bacachine tuque Jesús junanucachineque", jadya cuejayaju neejeneume. "Inatsachine tuque Pabloja quirica. Tuhuadyatu Jesús pa riyaque yahuaju nucadya", jadya juyaju ecana neejeneume. ³ Jida inime netupucue, tumeque pusha pusha ari cuanara ijahue eaju. Jadidyatu jubuque Jesús junanucahuie. Icuenu tu ecuita cuana dutya jujeri Yusu tsehue pana cayuamati jubuque. Yana equedya jujaca camuibatijaca jadya tuna jubuque. Jadya juyajutu cuinanabuque ejeque jucha aridaque neri. Ejet-sunue ejitaju juhuaju amatu Yusura nerecaturabuque. Beru patu Yusura quisarati iyacuare: "Tumeque ecuita dyaque jidamaque neri tuque ijahuaja etiquiju nudyabuque. Tura ique jipebuque ama ni riya piji buchique". ⁴ Riyaque yahuaju jari tuputu tumeque dyaque jidamaque Yusu neri tsehue ecahuaiti jubuque, tumebaedya dutya ecuitara muiya cuana tsehue. "Ique nemiucue; peya ai nemiuume", jadya tujatu ecana abuque. Ecuita cuanara Yusu neri muiyajutu anibuque. Tuequedyatu dutya yahua juque ecuita naru jutibunebuque ejetsunue ama. Dutya bahue ishutu jubuque: "Ique peadya yusu. Nemiucue ique", jadyatu jubuque pusha pusha.

⁵ Beru ique tuhua micuana tsehue jucuar patya micuana cuejacuaredya. ¿Adebaya ama jatsu micuanara? ⁶ Tumeque dyaque jidamaque tu ejitaju juma jari. Huecaca eiyajudyatu junabuque. Micuana micuana bahuedya aira riyaque jidamaque tachiyaque huecaca juetimaju ejunauju. ⁷ Iyacuatu riyaque ecuita Yusu dyaque bijidamaduraquira jidamaque etehua aya. Jadya ama bucha iyacua tuque tachiquira tachijacahuaju, tumetu tuja jidama cuanaque dutyara badadiya. ⁸ Riyaque amena ejitaju juhuaju, tsunutabaca jadya juatsutu Ecuana Cuatsashaqui Jesús ejitaju jubuque tuja dyaque casa tsehue. Riyaque casa tsehue tuja ecuatasa tsehue jujatsutu Jesúsra secabuque dutya tuja casa pana cayuamatisha aishu. ⁹ Cayuamatima jarijudyatu tumeque jidamaque ejitaju jubuque, Satanásja casa tsehue ecuita cuana ijahue aishu. Dutyaja yacuaju tujatu abuque ni ejeque ecuitaja ataquique ama. Tuque petaqui cuanaque tuna baneterebuque bape baatsu. Jadyatu jubuque Satanásja casa eque. ¹⁰ Turadyatu ijahue abuque ijahuaja etiquiju judiruya

cuanaque. Tura dutya ai jidamaque aya baatsu tunajatu inime jubuque: "Riyaque ri jidaque. Aya taa tu jidaque", jadya tuna jubuque, tura ijahue ahua tibu. Tunaja inime tunajatu Yusu jacabuque ni eje tupu jipe ishuhua. Tume cuanaratu yunerique quisarati bacacarama ahua. Yunerique ejenehuaque juatsu tuna Yusura tuaqueja judirushaquena juhua. ¹¹ Tunara tuque bijidamadurayadya jutidya tibusu Yusura cuadishabuque pusha pusha aridaque tura pusha pusha cuejayaque tunaja ejene ishuhua. ¹² Jadya tibudyatu Yusu jubuque: "Dutyu yunerique ejenecarama juya cuanara jipebuque ama. Tunadya tuna ijahuaja etiquiju judirubuque, jidama juyaque ecana pureama juhua tibu", jadyatu Yusu jubuque.

Yusura mepehua cuanaque Yusu queja judirubuqueque

¹³ Ecuana Cuatsashaquira micuana iyuhueda baya, micuana ecue eatsehuequi cuanaque. Yahua iyama jariradya micuana Yusura mepehua tujaque juishu, micuana Ijahua quejaque inajacamere ishuhua. Tuja Espíritu tuja tuque micuanaja cuadishahua micuana tuja biji eque ani ishuhua. Micuanaratu ejenehua quisarati yunerique. Jadya tibudya micuana Yusu jaque. Jutajudya tuque ecuanara Yusu tsehue quisaratiyaque yusurupai ajacaya ama, micuana jida tsehue aniya tibu. ¹⁴ Yuequedyadya micuana Yusura tujaque amerecara ahua. Mepehua tura micuana, Jesús bucha juishu. Jesús queja micuana catyatihua, ecuanara micuana Yusu quisarati cuejahua. Jadya tibu micuana Ecuana Cuatsashaqui Jesucristo tsehuedya jubuque. Tuatsehue muitapeedya micuana jubuque.

¹⁵ Yusu jaque tibu necanimehuallatiume, ni bajida nejuume. Neejenejacaume yunerique. Neanijacaume ecuanara micuana tsehueju bahuityahua eque, tumebaedya quirica eque cuejahua eque. ¹⁶ Ecuana Cuatsashaquira ecuanara dyaque iyuhueda baya, tumebaedya ecuanara Etata Yusura. Tatsera ecuanara nime casaturajacaya ama; ni eje tupu tatsejatu ajacaya amadya. Tatsera ecuanara adebamerejacaya ama ecuanara ejeque huecaca Yusuja yacuaju judirubuqueque. Tatsera ecuanara jida tsehue naruya, arepa ecuanara jidama paju ama bucha.

¹⁷ Yusura necasacuinasacue. Netsahuacue tura, jidaque quisarati micuanaja ajaca ishuhua. Net-sahuacue tura, micuanaja jidaque ajaca ishuhua.

Peja cuanaja ishuhua Yusu queja bacabaca ishuhue

3 Peja micuana cuejaya, micuana ecue eatsehuequi cuanaque. Ecuana ishuhua Yusu queja nebacabacacue:

—Ecuana Etata Yusu, tsahuacue Pablo tumebaedya tuatsehue cuanaque. Ebajarara tuna pacueja dutya epu cuanaju Jesúsja quisarati. Tsahuacue quisarati cuejayaju bacaqui cuanaque miaqueja catyati ishuhua, micue quisarati eque ecuanara ani ishuhua. Ecuana ejenehua bucha, ejeneedya tuna paa. ² Tata, jidama, cue-

jataquima cuanara Pablo tuatsehue cuanaque jadya ujeda paa ama. Jetiama tuna Jesús queja nimee ama cuanaque, —jadya Yusu queja nebacabacacue ecuanaja ishu.

³ Ecuana Cuatsashaquiratu ayadya tura aana ahuaque. Tura micuana casaturaya ecanimehuallatiuju. Satanás dyaque jidamara cajuchatishacara ayaju, tura micuana naruya ecajuchatiuju. ⁴ Ecuana Cuatsashaquiratu ayadya tura ai atibunehuaque. Bahuedya ecuanara tura micuana tsahuayaque. Bahuedya ecuanara micuana, ecuanara cuatsashaya eque juyaque, ni micuana ajacayaque. ⁵ Bacaya tuque micuanaja ishu:

—Tata, miratu Tesalónica juque micue cuanaque dyaque iyuhueda baya. Tsahuacue ecana mira iyuhueda bayaque caadebati ishu. Tata, Cristo riyaque yahuaaju junatsu taa tu iduhua canerecati cuana canimehuallatitsu ama ni cahuititsu. Tsahuacue micue cuanaque tuna canerecatiaque canime huallatitsu ama idu ishu, —jadya Yusu queja bacabacaya micuanaja ishu.

Mere jujacataquique ama

⁶ Micuana ecue eatsehuequi cuanaque, Ecuana Cuatsashaqui Jesucristora cuatsashahuaju micuana jadya aya. Aniyatu tuhua umae mere jucarama juya cuanaque. Arepa Jesús queja catyatihua ama bucha tuna dyaida. Ecuana bahuityahua eque ama tuna aniya. Necacarenetiame tuna tsehue. Eje bucha tuna juya eque ecana neaquereume. ⁷ Micuana micuana bahuedya ecuanara micuana tsehueju eje bucha junenie juhuaque. Jadidya micuana dyadi nejudue. Cadyaititsu ama ecuanara casada mere juhua. ⁸ Ejera ecuanara ai ecuanara sareyaque tyahuaju, tsujetyahua tuque ecuanara. Meredy ecuanara juhua casada huecada tupu meta tupu, micuanara ecuanara ai sareyaque yanacana tyau eauju. ⁹ Jesúsja ecuarishaque tibu, micuana ecuanara ai bacataquidya datse juhua: “Micuanaja ecuanara tyataqui juhua ai tsujema ecuanara sareyaque”. Jadya ama bucha ni bacapidya micuana ecuanara ahua ama. Ebacauque, ecuanara casada mere

juhua, “Pablo, tuatsehue juneniya cuana tsehue mere juya tunaja emetucu tsehue. Ecuana dyadi tumebaedya mereedya nejura”, micuanaja jadya inime juishu. ¹⁰ Ecuana micuana tsehue jariju micuana ecuanara jadya cuatsashahua: “Ejeque mere jucarama juyaque netyaume ara ishuque”.

¹¹ Jadya rique ecuanara quirica cuadishaya micuanaja quisarati jidamaque bacatsachine tibu. Umaepa micuana dyaida. Merepa micuana jujacachine. Umaera patuna cuejaya mere jujaca ishu, Jesús junanucayaque japadama cuita tibu. Jadya tunara ecuanara cuejaya.

¹² Ecuana Cuatsashaqui Jesucristora ecuanara cuatsashamereya tumeque dyaida cuanaque: “Nepereume peya cuana. Yusuja biji eque neanicue. Mere nejudue ai sareyaque cadaditi ishu”, jadya tuque ecuanara ecana cuejaya.

¹³ Ecue eatsehuequi cuanaque, necastereume jidaque aishu. ¹⁴ Dutyaja ijacaju ebacaniju neacue ecuanara riyaque quirica eque cuejayaque bacacarama juya cuanaque. Necacarenetijacacue tuna tsehue. Pabisu ecana tunaja jucha cuanaju, inime cacuareti ishu. ¹⁵ Nejacaume ecana. Micuana tsehue cahuitiayaque ebau bucha bae ecana neaume. Nereda bucha cuejae jutidya ecana neacue. Ecuana tsehuequi cuanaque nereda eau bucha neredae ecana neacue.

Camadya ishuque quisarati

¹⁶ Ecuana Cuatsashaquique tu Ecuana Inime Tsapema Anishaquique. Tura inime tsapema neanishacue jida inimeju jadya ama juatsu jidama inime cuanaju. Tuque dutya micuana tsehue pajuneni.

¹⁷ Ecue emetucu tsehue rique huenehua riyaque micuana isara ishu: PABLO. Jadyatu ecue bahue era huenemerehuaque tilladiru ishu ecue ebacani quiyati.

¹⁸ Ecuana Cuatsashaqui Jesucristora jida tsehue nenarucue tuja quiyuhuebati tsehue. Jadidya paju.

Riya tupu camadya.

Pablo

1 TIMOTEO

Riyaque quirica ri Pablora Timoteoja ishu cuadishametse acuareque. Pabloratu Timoteo tsahuacuare Jesús queja catyati ishu. Jesús queja catyatitsu tujatu Pablo tajicuare, peya queja japada Jesúsja quisarati cuejacuejani juyaju. Eje buchaju cuanatu Pabloja shana bahue jucuare eje uma epu cuanaju butseeju Jesús queja ecatyati cuanaque tsahua ishu. Timoteotu Jesús queja ecatyati cuanaque naruqui jucuare.

Riyaque quiricajutu Pablora cuejacuare Jesús queja ecatyati cuanaque eje bucha narue aishuque, tuna tsahuaqui juishuque. Dyaque tujatu cuejacuare yunerique ama bahuityaqui cuanaque tuja baca ishu ama, dyaque cuita chipiru bijida baishu ama jadique.

Versículo jida cabahuityati ishu cuanaque ri: 1.15; 2.5; 4.12; 6.6, 11-12.

Pablora Timoteo isaracuareque

1 Riya micue quirica cuadishaya, Timoteo. Ique Pablo. Jesucristoja yana atsaquique ique. Turadya ique cuadishahua tuja quisarati cueja ishu. Tumbaedyu Yusu Ecuana Inajacamerequirea cuadishahua. Ejeque huecaca ecuana tuaqueja judirubuque ni eje tupu jaca ishu ama. ² Timoteo, miquemi ecue ebacua neri buchique, Jesús queja nimee juishu era tsahuahua tibu. Yusu ecuanaja etatara, tumbaedyu Ecuana Cuatsashaqui Jesucristora jida tsehue narucue tatseja qiyuhuebati tsehue. Tatseja miatsehue canerecabati paani. Tatsera inime tsapema anishacue.

Yusuja cuanaja pusha pusha bahuityaqui cuanaque bacataquique ama

³ Tuhuadya Efesoju anicue. Cuejahuadya mique era Macedonijaju ique cuahuie. Tuhuadya anicue, pusha pusha bahuityaqui cuanaque "Nebahuityajacacue yunerique ama", jadya aishu. ⁴ Cuejacue ecana: "Neajacacue ecuanaja baba cuana eje bucha juhuaque, tunara cuejahua cuanaque", jadya acue pusha pusha bahuityaqui cuanaque. Riya cuanaque inime tupuqui ajacaya ama cuanaque tuna masadama cati cati, cahuaiti cati jadya juya. Tsahuaya ama tunajatu peya cuana Jesús queja catyati ishu, Yusura ecuana amerehua bucha.

⁵ Tunara ni aya Yusura amerehuaque, tume tuna iyuhueda cabatiya peya cuana tsehue. Iyuhueda tsehue cabatitsu tunajatu jidaque inime tupuqui aya. Jidaque tuna adadiya, ecajuchati cabati ishu ama. Yuneri cuitadya tuna Jesús queja ecatyati judadiya. Jadya tuna eanidadiu yuneri cuitadya peya cuana tsehue iyuhueda cabatiyaque.

⁶ Jadya anijacae juatsutu umae cati cati jujacaya ama aishu amaju. Edijiju cuji eju buchique tuna. ⁷ Tuna tuna casumiticara juya, Moisésja cacuatsashati bahuityqui jadya juatsu. Dyaque cuita tuna quisaratiya. Cacuat-sashati bahuityaqui ecana jucara juya ai jida ade-

bayaque ama. Pusha ama cuitadya tunajatu adebaya ama tunara cuitadya eje buchique quisarati ayaque.

⁸ Ecuannaratu adebaya Yusura Moisés queja ecuita cuana cuejamerecuareque. Adebatsu ecuaa bahue eje bucha jida anie juishuque. ⁹ Yusuratu iyahua tuja cacuatsashati ai jida juya cuanaque bahuitya ishu ama. Iyahua tujatu jidama juya cuanaque cueja ishu, jee cuanaque jucha cuana caadebati ishu: tunaja biji eque cuita camadya aniya cuanaque ejeque ijacabacacarama; Yusuja yana equedya ni ejeque huarajija yana equedya jucarama juya cuanaque; Yusu muicarama juya cuanaque; cajuchatiya cuanaque; Yusuja biji eque ama aniya cuanaque; Yusu ijillahuanatsu ijarib- aiqui cuanaque; etataque, ecuaque iyequi cuanaque; qiyeti puji cuanaque; ¹⁰ caquemitiqueremaque jaraquereya cuanaque; deca cuinetse, jadya ama juatsu epuna cuinetse cajaraqueretiya cuanaque; ecuita chiriqui cuanaque; peya cuana inatsu uu bucha catyatie apuji cuanaque; pusha pusha arida cuanaque; ejenetacara juatsu, "Yusu bahue shasha camaque" jadya quisarati abahue cuanaque; Yusura amerecarama ayaque apuji cuanaque. Jadya anie juya cuanaque tuna jida ama aniya. Riya cuanaque cueja, huecasha jadya aishutu Yusura cacuatsashati iyahua.

¹¹ Yusuratu cacuatsashati cuana eque ecuita cuana bahuityahua eje bucha anie tuna jutaquique. Tura ique iyacua quisarati iyacuaque cuejamerehua tsehue beta tupudya tuque. Yusu tu yuneri cuitadya tuyu dutya casa tsehue. Aijamatu peya tuque buchique.

Yusura Pablo arepa dyaque jucha arida ama bucha iyuhueda bacuareque

¹² Jesucristo tuque isaraya:

—Ique Cuatsashaquique, yusurupai mique aya. Miquemi jida eatsehue. Miradya tyahua casa mique eaqueja cameremereti ishu. Miquemi bahuedya juhua era mira amereyaque adadibuqueque. Jadya tibudya mira mepehua ecue peya cuana miaqueja catyati tsahua ishu. Jadya tibudya mique yusurupai ajacaya ama, —jadya tuque Jesús aya.

¹³ Icuene ique Jesús tsehue cahuitinicuare. Ijillahuananicuare tuque era. Eratu canerecatishahua tuja cuanaque. Ique tuna tsehue dyaque jidama juhua. Era tuna iyuhueda tsehue ama bahua. Jadya ama bucha Yusuja canerecabati anihua eatsehue. Ique jadya baya ama bucha, tura ujeu bahua ama. Ique bacue Jesús queja catyatima jari juhua. Jadya tibudya ique Yusu pureamaturaya bucha cabatihua. Yuneridya ique jadya juyaque baecua juhua; dyaque jidama ique juhua.

¹⁴ Ecuana Cuatsashaqui Jesucristora tuja dyaque jida tsehue tura naruhua. Tura cuitadya tuaqueja catyatishahua. Tuaqueja iyuhue tura amerehua tumbaedy peya cuanaque. Jadya anie ecuaña juya, tuaqueja catyatitsu. Tuque bacue ecuaña tsehue.

¹⁵ "Jesucristotu junahua jucha arida cuanaque Ijahua quejaque inajacamerera", jadya tuque ecuaña cueja bahue. Yunerique dya tume. Dutyajatu ejenacameri ejenecarama tsehue ama. Tura ique inajacamerhua, arepa ique peya cuana bucha dyaque jucha arida juhua ama bucha. ¹⁶ Arepa eje uma mara Jesucristo era ujeu bahua ama bucha, Yusuatu canerecabati eatsehue dyaque anihua. Jesús queja ique catyatihuaju Yusura inajacamerhua. Yusura bijidamadurahua ama. Tura ique inajacamerhua tibu, yuneridya tujatu tumbaey inajacameredy aya Jesús queja dutya catyatiya cuanaque. Jadya juatsu tuna judirubuque tuaqueja ni eje tupu tuque jaca ishuhua. ¹⁷ Nesumijacara ama Ecuari Anisiriyaque. Nemuijacara ama. Tuquetu maju baecuaque. Ejitajuque amatu tuque. Tuque peadya tu Yusu. Aijamatu peya. Jadique tu Yusu.

¹⁸ Timoteo, miquemi ecue ebacua buchique. Jadya tibudya mique cuejaya jadya. Icuene Yusuja quisarati cueja jucuare cuanaratu cuejacuare: "Yusuratu Timoteo mepecuare tuja quisarati peya cuana cueja ishuhua". Adebacue bacue tunara mique Yusura cuadishahuaque jadya ahuaque. Sudaru cuanaja eiyetauju catachiti ishuhue eani bucha, jadidyatu micue adebataqui Yusu miatsehueque, mique ecanimehuallatiuju. ¹⁹ Jesús queja nimeedy jutidya juajecue. Ajacaume mique cuitadya tuyuque bahueque. Mique jadya jujacaume.

Umae bacue jadya jujacahua. Jidama ecana juhua, arepa tuna cuitadya tuyu ama juyaque bahue ama bucha. Jadya juyaque tuna Jesús queja nimee jujacahua. Cuaba rumutanatsu dutya eaputateru bucha, tumbaedy tuna aputatereya, Jesús tsehue nime aputahua tibu. ²⁰ Jadya ejenejacaedyatu Himeneo, Alejandro ecatsera acua yunerique quisarati. Jadya tatse nerada acua:

—Satanás metse cuatsashaquique paju, —jadya tatse acua.

Jadya canerecatie tatse judadiya. Nerecada juya cabatitsu, ecatsé jidama juhuaque pacacuejati. Tume tatse Yusu pajillahuanajaca.

Yusu pureama aishu caradatitsu eje bucha jutaquique

2 Peya micuana cuejaya. Icuene cuita micuana cuejaya eje bucha bacabacae ecuaña Yusu queja ju-

taquique dutya queja aniya cuanaja ishuhua. "Tata, tyacue ecana tunaja ai aijamaque", jadya tuque ecuaña Yusu ataqui. "Narucue ecana jida", jadya tuque ecuaña bacataqui. "Tata, miquemi bahuedya tuna eje bucha juyaque. Miquemi tuna tsehuedya; narucue ecana", jadya tuque ecuaña ataqui. "Yusurupai mique tuna tsehue jida juhua tibu" jadya. Jadya tuque ecuaña ataqui dutya queja aniya cuanaque. ² "Tata, tsahuacue ecuatsashaqui cuanaque, tumbaedy dutya huaraji cuana", jadya tuque ecuaña ataqui. Tunara jida naruhua, ecuaña peya cuana tsehue ujeu ecabatibareu ama. Tume ecuaña jida inime tsapema eani. Tunara ecuaña jida naruhua, tume ecuaña Yusuja biji eque eani. Tumbaedy ecuaña eani jida eje bucha tsehue ama peya cuana ecuaña epuju cuana tsehue. ³ Jidadya tu jadya anie juishu. Jadique dya tu Yusuja dyaque bijida, Ecuana Cuatsashaqui. ⁴ Yusuja inime datsetu juhua: "Areque ecana dutya jipe Jesús queja ecatyatiu, ecue ecana eaqueja judirusha ishuhua. Areque tuna dutyara eadebau jida quisarati yunerique", jadya datsetu Yusuja inime juya.

⁵ Aniyatu peadya Yusu camadya. Peadya camadyatu aniya Yusuja ecuita cuana tsehue cahuaite anihuaque tillaquique. Tumeque tu Jesucristo, ecuita cacuitatihuaque. ⁶ Tudy cuitadyatu tuja inime taca majuhua, dutya tuaqueja ecatyati cuanaque Satanás quejaque einajaca juishu. Jadya majuetu Jesús juhua, Yusuja ecuita cuana tuaqueja judirusha ishuhua. Jadya ejitajuete Yusuja inime juhua, dutya tuaqueja judirushacaraque. ⁷ Yusuratu dutya tuja quisarati bacamerecara aya. Jadya tibudya tura ique mepehua israelita ama cuanaque cueja ishuhua. Ique tura cuadishahua tuna Jesús queja catyati ishuhue cueja ishuhua. Pusha pusha ama juya; yuneridya quisaratiya.

⁸ Cuejaya micuana Yusu pureama aishu casitatitsu eje bucha jutaquique. Eje queja pajudya jutidya ecuaña caradatijacataqui ama Yusu tsehue quisarati ishuhua. Yusuja biji eque aniya cuanaque camadya jadya paju. Peya tsehue ecahuaiti cuanaque, peya cuana tsehue jidama inime tupuyaque, jadya cuanaque tuna Yusu queja bacabacataqui ama ecasitati. ⁹ Yusu pureama aishu casitati ishuhua epuna cuana petataju ejiyu cajututitaqui. Cajututi tunaja paju peya queja capetamereti ishuhua ama, deca cuana jidamaque inime tupumere ishuhua ama. Capetameretitsu peya queja cabijiserimereticara ecana paju ama callutiju, oro tsehue cabajejetitsu tiquida cuana tsuje arida cuana tsehue cabajejetiju, una tsuje arida cuanaque jutu tsehue. Cabajejeti tunaja paju caradatihua cuanaque Yusu inime tupuqui aishu, ai tuna queja nimee ama. ¹⁰ Epuna cuana Yusuja cuanara jidaque ai paa. Tumetu peya cuanara iyuhueda baya, peya cuana tsahuaqui baatsu, ai tunaja cabajejetiju baatsu ama. ¹¹ Yusuja etareju caradatitsu, epuna cuanara abacata tsehue pajacabaca, cabahuityati ishuhua. "Ique dyaque bahue Yusuja quisarati cueja juya bucha ama", jadya tunaja inime paju ama. ¹² Epuna ama tuque dutya yacuaju bahuityamereya. Deca cuana

tuque Yusuja quisarati jadya bahuitya ishu cuat-sashaya. Epuna cuanatu abacata jutaqui Yusuja etareju. ¹³ Epunajatu deca cuana cuatsashataqui ama, deca icuene iyatanahua tibu; ai epuna amatu icuene iyatanahua. Adántu Yusura icuene iyahua; tupuju tujatu Eva iyahua. ¹⁴ Evatu Satanásja quisarati bacatsu cajuchatihua. Turadyatu Yusuja yana ahua ama. ¹⁵ Jadya tibudyatu epuna cuana deca cuanaja huaraji jutaqui ama. Tunajatu ebacua cuana jida narutaqui. Epuna cuana ni Jesús queja catyatiya, Yusura tuna Ijahua quejaque inajacamereya, deca cuana inajacamereya bucha. Epuna cuanajatu peya cuana jida tsehuedya bataqui. Tuna dyadi tuna tumebaedya Yusuja biji eque anitaqui. Tunajatu jidadya inime tuputaqui. Jadya pureamaturae tunajatu Yusu eau.

Jesús queja ecatyati cuanaque cuatsashaqui cuanaque eje bucha jutaquique

3 Peya mique cuejaya, eje buchique micue Jesús queja ecatyati cuanaque cuatsashaqui bacanishataquique. "Mique ni Jesús queja ecatyati cuanaque cuatsashaqui jucara juya, jidaque meredy tuquemi acara aya", jadya tuque ecuanaja ecana ataqui. Riyaque quisarati ri ejene ishuque. ² Jesús queja ecatyati cuanaque cuatsashaqui cuanaquetu jadya jutaqui. Tunadya jutidya peyaja nereda ataquique ama, peya cuana Jesús queja ecatyati cuanaja iyuhuedaque. Ejeque deca ecaquemitique, huane pidya camadya paju; peya epunatu pajaraquere ama. Jida inime tupuqui ecana paju. Tuna taca canaruti ecana paju. Emuita ecana paju. Tunaja etareju jutiya cuanaque batsaqui ecana paju. Bahue, inime adebabada jadya ecana peya bahuitya ishu paju. ³ Nijuqui arida ecana paju ama. Nime junudama juatsu yume cabahuapajati jadya ecana paju ama. Cahuaiti arida ecana paju ama. Canerecabati aqui ecana peya cuana tsehue paju. Eje buchadya cachipiriticaraque tuna inime tupuqui paa ama ni peya jaque bijiseri. ⁴ Tunaja etareju cuanaque jida naruqui ecana paju. Ebacua cuana camuibati aqui juishu ebacua cuejaqui ecana paju, tunara cuat-sashayaju yana equedya juishu. ⁵ Tunara ni tunaja etare juque cuitadya jida narutaqui ama baya, ¿tume jatsu tunajatu Yusuja cuanaque eje bucha jida narue eau? Eje bucha narutaqui ama di taa. ⁶ Jadya mere ishuque amena beru Jesús queja ecatyati cuanaque, bacanishacue, ai butseeju Jesús queja ecatyati cuanaque ama. Mepeya ni mi butseeju Jesús queja ecatyatique, tumequetu tuta taca casumiti jutidya ejuu. "Ique dyaque inime metseque", jadya jutidyatu ejuu. Satanás equeque ri riyaque inime tupu, tuta taca inime metseque cabatihua tibu. Jadya tura inime tupuhujatu Yusura nerecaturacuare. Jadidyatu Yusura enerecaturau butseeju inime ecacaretique casumitiyaju. ⁷ Jesús queja ecatyati cuanaque cuatsashaquiquetu jutaqui Jesús queja ecatyati cuanaja camadya muibataquique ama, tumebaedya Yusu adeba baecua cuanaja muibataquique. Tuja ebutsequinijudya tunajatu tuque eje bucha juyaque ejitaju eau. Jesúsja cuanaque ji-

dama juyajutu Satanás pureama juya. Tuquetu ecuita armadilla nitya puji buchique; ai armadillaju juhua baatsu pureama juya buchique tume.

Eje buchique Jesús queja ecatyati cuanaque mere tsahuaqui cuanaque

⁸ Iyacia mique cuejaya eje buchique micue Jesús queja ecatyati cuanaque mere tsahuaqui bacanishataquique. Riyaque ri emerequi cuanaque eje bucha jutaquique. Emuiba tuna jutaqui. Dyaque cuita tupari iji, jadya ama juatsu ai nijuqui ishuque bijiseri jadya tuna jutaqui ama. Yunerique quisarati tunajatu ajacataqui ama, umae bape cueja peya cuana bacue bape cueja jadya ama. Eje buchadya cachipiruticaraque tuna inime tupuqui paa ama, ni peya jaque bijiseri. ⁹ Yunerique quisarati bahuityayaque tuna paejene. Icuenetu pana adeba ataqui ama juhua; amena iyacuatu Yusura ejitaju ahua. Tunara cuitadya jida tuyu baya eque tuna anitaqui, ni aiju buchique jucha metse cabati ishu ama. ¹⁰ Nime adebacue Yusuja cuanaque mere tsahuaqui jucara juya cuanaque. Nime adebatsu, era huenehua eque amereya eque ni ecana juya, tume ecana chamacama Jesús queja ecatyati cuanaque mere tsahua ishu paju.

¹¹ Jesús queja ecatyati cuanaque mere tsahuaqui cuanaja ehuaque emuitadya paju. Peyaja ishu quisarati arida ecana paju ama. Jida inime tupuqui ecana paju. Yuneri quisarati aqui ecana paju. Jadyatu Jesúsja cuanaque mere tsahuaqui cuanaja ehuaque cuanaque jutaqui.

¹² Jesúsja cuanaque mere tsahuaquique ecaquemitique juatsu, peadya camadya tunaja ehuaque paju; peya epunatu pajaraquere ama. Tunaja ebacua cuanaque, umae tunaja cuitadya etareju aniya cuanaque jida naruqui, cuejaqui jadya ecana paju. ¹³ Etsahuaqui cuanara ni peya cuana jida mereya, emui tuna judadiya. Tume tunajatu bajida tsehue ama Yusu queja judiru ishuque quisarati cuejaya, Cristo Jesús queja nimee neri juya tibu.

Yunerique Yusuja ejitaju eaque

¹⁴ Arepa ebajarara mique bacara aya ama bucha, riyá micue quirica cuadishaya, Timoteo. ¹⁵ Ique tsunutayaque juatsu, tuque micue icuenetadya cuadishaya, era cuejayaque mique bahue ishu. Quirica inatsatsumi bahue juya Yusuja cuanaque eje bucha junenie jutaquique. Maju Baecua Aniya jaque ecua. Ecua tsehuedyatu aniya. Ecuanara tujatu yunerique quisarati adebaya; cuejataqui tuque ecuanaja peya cuana. Etareja dudu tishira jadya buchique ecua. Tunaratu etareja ejaqui rihuitsu eaputauju iduya, jadidyatu ecuanara Jesucristoja quisarati cuejaya peya cuana tuaqueja catyatitsu ecayuatimaju. ¹⁶ Dyaque emuique tu Jesús, ecuanara quisarati cuejaqui ayaque. Tuaqueja catyatitsu ecua Yusu pureamaturayaque eaniu. Icuenetu riyaque ni ejeque bahue juhua ama. Iyacia ecua Yusura bamerehua.

Riyaque Jesústu cacuitaticuare, riyaque yahuaju anina ishu.

“Jesús juchama nerique”, jadyatu Yusuja Espiritura quisarati acuare.

Jesústu cabamereticuare barepa juque Yusu tsahuaqui cuana queja.

Tuque eje buchique quisaratitu dutya yana eque cuanaque cuejatanacuare.

Jetiama tuna tuaqueja catyaticuare.

Riyaque yahua juquetu Jesús dirunucacuare.

Tsuracuretu barepaju, Yusuja yacuaju anidirunuca ishu.

Aniyatu quisarati yunerique ama cuejaqui cuanaque

4 Peya mique cuejaya. Yusuja Espirituratu yuneridya quisarati acuare: “Yuquejane tunajatu quisarati yunerique ejenejacabuque Yusuja cuanara ejeneyaque. Yunerique eejeneuque tunajatu ijahua cuana jutidya ejenebuque, ijahue cati bahue cuanaque jutidya”, jadyatu Yusuja Espiritura quisarati acuare.

²Tume cuanaque ijahue cati puji cuanaratu quisarati pusha pushaque ajacaya ama. Arepa Yusu cahuaishaya ama bucha, ecana ecajuchati cabatiya ama. Yatseja ebiti pana tiru ejuque aputahuaju eadebanucau ama bucha, tumbaedy ecana ecajuchati pacabati ama. ³“Jidama tu carequi juishuque. Umae earaquitu arata baecua. Aratsu tuque ecuana Yusu ecahuaishau”, jadya tuna pusha pusha jutidya jubahue. Yusratu dutya ara ishu iyahua. Dutyadya tuque ecuanaja arataqui, ecuana Jesús queja ecatyati cuanaja, ecuana yunerique ejenehua cuanaja. Yusrupai aatsu tuque ecuanaja arataqui. ⁴Yusura dutya ayaque tu jidaque. Jadya tibutu aijamadya earaqui arataquimaque. Bijidamadurataqui ama tuque ecuanaja ni ejeque earaqui. Jadya tibudya ecuana araara ishu anibutetsu jadya jubahue: “Tata, yusrupai mique ecuana aya, mira ecuana earaqui tyahua tibu” jadya.

⁵Cahuaishaya ama tuque ecuana Yusu aidya jutidya aratsu. “Duty tu jida ara ishu”, jadyatu Yusura quisarati acuare. Araara ishu anibutetsu tuque ecuana Yusu yusrupai aya. Jadya tibu tuque ecuanaja ejeque earaquidya jutidya arataqui.

Jesucristo yuneri merequique eje bucha jutaquique

⁶Bahuityacue quisarati yunerique micue miatsehuequi cuanaque. Jadya juyaque tuquemi Jesucristora amerehuaque aya. Riyaque quisarati bacatsumi Jesús queja catyatihua. Jidaque bahuityayaque bacatsumi jida aniajeya. Riyaque quisarati micue earaqui ejuu buchique paju. ⁷Micue baba cuana eje bucha jucuaquedy jutidya inime tupuqui aume. Yusuja ama cuanajatu bijida baca jadya aatsu yudijidya atinuca atinuca ishu. Tucua inime tupuqui eauque, cabahuenetiajecue Yusu mere ishu, ijahue puji jida ijahue juishu tuja ecuita ecabahuenetiajeu bucha. ⁸Jidadya tu yatseja ecuita casada amere ishu cabahuenetiaje ishu. Dyaque jida tu Yusuja biji eque ani ishu cabahuenetiaje ishu.

Yusura cuatsashaya eque anitsu ecuana dyaque jida inime tsapema jadya riyaque yahuaju aniya. Majutsu ecuana Yusu queja judirubuque ni eje tupu jaca ishu ama. Tuatsehue ecuana anibuque. Jadya tujatu quisarati ecuanaja ishu iyacuare. ⁹Riyaque tu yunerique; dutyajatu ejenetaqui. Ni ejera ejenecara ejenecarama jadya paa ama.

¹⁰Yusu pana ejene cuita ahua tibu tuque ecuana ejeneyadya tura ecuana eje bucha aana ahuaque adadiyaque. Turatu dutyadya naruya, Jesús queja ecatyati cuanaque neri neri. Jadya tibudya ecuana casada mere juya, tuque mereyaque. Jadya cuejacue Jesúsja cuanaque riya amereyaque bahuityayaque jadya.

¹¹Timoteo, bahuityacue peya cuana mique era cuejahuque. Cuatsashacue ecana era amerehua eque ecana paju. ¹²Ejera buchique bacacarama aume mique esiri ama baatsu. Mique anicue jida Yusuja biji eque, peya cuanaja mique muiba ishu. Jidaque quisarati acue. Jida tsehue bacue peya cuana. Yusura mique naruyaque ejenejacaume. Jesús queja nimeedya jutidya juajecue. Aume Yusu cahuaishaya ishuque ni riya piji buchique. Jadya ni mi juya, tumetu peya cuana Jesús queja ecatyati cuanara bijiseriya mique aniya bucha anie juishu. ¹³Ique tuhua jutiya tupu, isarajacaume Yusuja quisarati dutyaja ijacaju. Caradatiya cuanaja baca ishu isaracue. Casaturacue ecana riyaque quisarati tsehue. Bahuityacue ecana riyaque quisarati. ¹⁴Jadya meree jujacaume. Mira Yusu meretibuneyajumi Jesús queja ecatyati cuanaque cuatsashaqui cuanara iyuca dyaque emetucu iyahua. Jadya tunarami ahua, Yusuja emepeque jadique ejitaju juishu. Tunara jadya ahua Yusura casa tyahua tuque miaqueja cameremere ishu.

¹⁵Inime tupuqui ajacaume mique Yusura aishu mepehuaju. Jadya jujacaume. Jadya ni mi aya micue ataquique, tumemi peya cuanara baya mira dyaque jida Jesúsja ishu mere ayaju. ¹⁶Mita tacadya jutidya bacue canaruticue. Bahuityajacaume quisarati yunerique. Anijacaume jadya. Jadidya jutidya ni mi juajeya, tumetu Yusu miatsehuedya juya riyaque yahuaju. Majutsumi tuaquejadya judirubuque ni eje tupu jaca ishu ama. Mique quisaratiyaju bacaqui cuanaque tuna Yusu quejadya judirubuque.

Jesús queja catyatihua cuanaque peya cuana tsehue eje bucha cabatitaquique

5 Ejeque ni eje bucha jidama juya, cuejayaque cahuaishi tsehue ama isaracue. Nereda aume esiri cuanaque. Jida inime tsehue jutidya cuejacue; micue tata ecuejau bucha cuejae jutidya acue. Tumbaedy ehue ebari cuana micue miatsehuequique ebau bucha bae ecana acue. ²Epuna esiri cuanaque micue cuaa ebau bucha bae ecana acue. Peya epuna cuana micue miatsehuequique ebau bucha bae ecana acue. Dyaque jidaque tunaja ishu inime tupuqui acue.

Jesús queja ecatyatique tunaja eahuemajuque eje bucha bae ataquiue

³ Iyacia mique cuejaya eahuemajuque eje bucha bae ataquiue. Netsahuacue eahuemaju cuanaque yuneri cuita atama cuanaque. ⁴ Eahuemajuja ni aniya ebacuaque, jadya ama juatsu yutsecuaque, tunaradya paba. Jesús queja ecatyati cuanara ebauque, ebacua- quera jadya ama juatsu yutsecuaqueradya paba. Pacabahuityatidya ecana tunaja cuitadya bataquiue. Yusuatu bijida ecuanaja ecuanaja baqui esiri cuanaque naru ishü, ecuanaja tunara nanadaju naruhua bucha narue aishu. ⁵ Aniyatu eahuemaju cuanaque atama cuitaque, tuta taca nerique. Jesús queja ecatyati cuanaque tuna bahuedya tunara ai sareyaque Yusura tyayaque. Huecada tupu, meta tupu jadya tuna Yusu bacaya, tuja ai sareyaque tyaisü. Jadique eahuemaju cuanaque tuque micuanaja tyataqui earaqui ejutuqui tunara ai sareya cuanaque.

⁶ Aniyatu eahuemaju cuanaque Yusuja biji eque ama aniya cuanaque. Tuna tuna aniya tunaja biji eque cuita camadya. Arepa tuna chacha ama bucha tuna Yusura emaju bucha baya. Jadique eahuemaju cuanaque nebaume, ni ai netyaume.

⁷ Cuejacue Yusuja cuanaque riyaque mique era cuejaya cuanaque. Jadya ni ecana aniya, tume tuna eje bucha nereda ataqui ama: "Yusuja cuanaquetu jidama tuyu ama aniya. Tyaya ama tuna eahuemajuque ni ai buchique", jadya tuna ni ejeque buchique juya ama.

⁸ Tunaja etareju cuita tunaja ata cuana bayaque amatu tuyu ama aniya. Jesús queja ecatyatihua jadya juya ama bucha, Yusura amerehua eque ama tuna aniya. Jesús queja ecatyati cuanara ni tunaja ata cuana naruya ama, tume tuna Yusu adeba baecua cuanaque bucha dyaque jidama aniya, Yusu jaque ama cuanara tunaja ata cuana jida bayadya tibu.

⁹ Tuequedya mique cuejaya eahuemaju cuanaque eje buchique micue quiricaju ebacani huenetaquiue, Yusu merequi cuanaque. Ni ejeque buchique eahuemajuque ebacani huenema jarijudya icuene Yusuja cuanaju jida inime tupucue tumeque epunaju. Shucuta tunca mara aniya equeque; yahuique adebaqui juhuaque, peya deca tsehue ijahue aatsu ama; peya cuanara tuque jida jujacayaque ama adebayaque; ebacua cuanaque jida catemushatihuaque; tuja etareju jutiya cuanaque jida batsahuaque; Jesús queja ecatyati cuanaque tsahuaqui juhuaque; tsahua bahue ni tuja juhua jidama inime tsehue peya inime juya cuanaque; eje buchadya tsahuacarae peya cuana ahuaque. Tuque ni jadya juhua, tume tuja ebacani hueneque eahuemaju cuanaja ebacani eiyaju.

¹¹ Hueneume eahuemaju cuanaque ebacani ehüene quiricaju shucuta tunca mara adadima jarique. Esiri cuitaque amatu jadya ejuu. Masadama tujatu ahuequi juishuque inime tupuqui aya. Ahuequi jucara ebaritu juya, Cristo camadya emereuque. ¹² Tumeque epunara ni Cristo cuita camadya mere ana aya, tuque ahuequi junucahuajutu, peya cuana equisaratiu: "Yanacana tu-

jatu Cristo cuita camadya mere ana ahua. Jucha metse tu tumeque epuna", jadya tuna equisaratiu. ¹³ Esiri cuitaque ama eahuemajuquetu ahuequi jipidya ama jucara juya. Etare cuana tuputu tarepe mere cabahuityaticara juya, mere ejuuque. Dyaida jutidyatu juya. Dyaida camadya ama, catacuariti arida, peya cuana eje bucha juyaque bahue jucara ebari juatsu cabacadurati arida. Quisarati ataquiue ama tujatu aneniya.

¹⁴ Jadya tibudya mique cuejaya, micue peya cuana cueja ishü. Shucuta tunca maraque ama eahuemajuque ahuequi pajunuca. Ahuequi junucatsu, cabacuatinuatsutu patemusha ebacua cuanaque. Etare juque meretu paa. Tuque ni jadya juya, tumetu ecuanaja ujeu baqui cuanaque jidama quisaratiya ama. ¹⁵ Umae eahuemaju cuanaque tuna Yusuja biji eque anijachine; iyacia tuna Satanásja biji eque aniya. Cuejaya mique riyaya cuanaque, eahuemaju cuanaque eje bucha anie juishuque bahue juishu.

¹⁶ Jadya cuejacue Jesús queja ecatyati cuanaque: "Aniya ni micuanaja ata eahuemajuque, netsahuacue. Netyacue tunara ai sareyaque, tunaja ata cuanara ama ebau tibu. Jesús queja ecatyati cuanajatu tsahuataqui eahuemaju cuanaque yuneri cuitadya atama cuanaque", jadya cuejacue Jesúsja cuanaque.

¹⁷ Tuequedya mique cuejaya Jesús queja ecatyati cuanaque cuatsashaqui cuanaja ishü. Muibataqui tuque ecuanaja ecuanaja Yusu adeba tsahuaqui cuanaque. Tunara ecuanaja Yusu pana adeba aishu tsahuaya tibu tuque ecuanaja ecana tsujetyataqui tupu, tuna tunara ai sareyaque cadaditi ishü. Muiba, jida tsujetya jadya tuque ecuanaja ataqui Yusuja quisarati cueja bahuitya jadya jujacaya cuanaque ama neri neri. ¹⁸ Yusuja quisarati tu ehüene: "Trigo biti tacamereyaque micue juye huimumu risiüme. Paaraara juye mere juya tibu" jadya. Tumebaedya tu ehüene Jesúsra quisarati acuaque: "Mere pujitu tsujetyataqui" jadya. Jadidya tu Yusuja bijida, ecuanaja Yusu adeba tsahuaqui cuanaque ecuanaja tsujetya ishü.

¹⁹ "Cristoja cuanaque cuatsashaquiuetu jidama ahua", jadya peadyara camadya ayaju, ejeneume, Timoteo. Betara, jadya ama juatsu quimishara ni yuequedya cuejaya, tume ejeneque. ²⁰ Jesús queja ecatyati cuanaque cuatsashaquiue ni jidama jujacacarama juyaju, Jesús queja dutya ecatyati cuanaja ijacaju nereda acue. Jadya ecana acue, umae Jesús queja ecatyati cuanaque cuatsashaqui cuanaque jidama juyaju bajida amere ishü, "Ecuana necajuchatira ama; dutyaja ijacaju tura ecuanaja nereda eau", jadya tunaja inime tupu ishü.

²¹ Era huenehua eque bacue mique amereya. Dutya tupu bae Jesús queja ecatyati cuanaque acue. Nime aputaume Yusu Etatara, Jesucristora jadya petajacayaque ama, tumebaedya barepaju Yusu tsahuaqui cuanara. Jadya tibudya acuedya era cuatsashayaque.

²² Nime adebacue Jesús queja ecatyati cuanaque naruqui jucara juya cuanaque. Mepeume ni ejeque buchique, jida inime tupumaque. Ecajuchatiu ni

ejeque mira mepehuaque. Midya bacuemi jucha metse ejuu, cajuchatihuaque bucha. Canaruticue dutya aiju Yusu cahuaishuque ishucue eaju.

²³ Ecareca ni ujera juya cabatitsu, ena camadya ama ijicue. Tumbaedy a casamati ishucue juatsudya juatsudya uva nacaca esanashaque ijicue.

²⁴ Jutajuyi icuene jida inime tupucue, Jesús queja ecatyati cuanaque naruquique bacanishama jarijudya. Adebacue umae etehua ama cajuchati bahueque; dutyara tuna baya tuna jidaque ama. Bahuedya ecana tuna ama jadya ishucue. Umaetu etehua cajuchati juya. Dutyara jueri tunajatu jida bucha baya. Tupujutu amena ejitaju judadiya tuna jidama juyaque.

²⁵ Tumbaedy bijidamaduraume ejeque jida inime tupumara. Aniyatu jida juya cuanaque; tume tuna dutyadya adebaya jida juya cuanaque. Umae bacue jida juyaque ejitaju ama juya. Ni ejera buchique tuna adebaya ama tuna jida juyaque. Tupujutu amena ejitaju juya tuna jida ishucue jetiama mere juhuaque. Jadya tibudya tuque micue icuene nime adebataqui Jesús queja ecatyati cuanaque cuatsashaqui cuanaque bacanishamaque.

6 Metsequi cuanajatu tuna metse cuanaque muiba mere ataquí, Yusuja ishucue eana jidama equisaratishau tibu, tumbaedy Jesúsja quisarati ecuanara cuejayaja ishucue. ² Tuna metse cuanaque Jesús queja ecatyati cuanaque merequi cuanajatu inime tuputaqui ama: "Ecueta muibataqui ama icue metseque, ecue eatsehuequique juya tibu". Jadya inime etupuuque, tunajatu eana dyaque jida jutidya muibataqui. Tuna metse cuanaque tu Yusuja cuanaque. Yusura tuna iyuhueda baya. Jadya tibudya mere puji cuanaja dyaque jida meretaqui. Tuja tuatsehuequi cuanaque tsahua juya tibu, tunajatu eana jida meretaqui.

Yunerique ama bahuityaqui cuanara Yusuja mere yuamaturayaque

Timoteo, bahuityacue riyaque era cuejahaque Jesús queja ecatyati cuanaque. Cuatsashacue eana tuna yuneri eque ani ishucue. ³ Aniyatu ecuanara bahuityayaque bape cuita bahuitya juya cuanaque. Tunaratu Jesúsra yunerique bahuityahaque ejeneya ama. Tunaratu bijidama baya yunerique bahuityayaque, Yusu pureamatura ecuanara bahue juishucue. ⁴ Tuna taca casumiti tuna juya. Arepa tunaja inimeju Yusuja quisarati pana adeba aya jadya ama bucha, yuneri cuitadya tunajatu adebaya ama. Tuna tuna riyaya cuana tibu caticara jutidya juya, tunara camadya pana adeba aya bucha cabatitsu. Ujeu tuna cabatiya peya cuana tsehue dutya eana peya cuana dyaque jidaque bucha cabatitsu. Ejeque eje bucha quisariatijaju, peya cuanara bacue quemitsape jutidya aya. Quijillahuanatiya jutidya eana peya cuana tsehue. Peyara yuamaturacara aya bucha tunajatu inime juya. ⁵ Cati cati peya tsehue ujeu cabati jadya eana juya peya cuana tsehue. Jadya tuna juya, tunaja inime ecayuatami tibu. Arepa icuene yunerique adebahua ama bucha, ejenejaca hua tunara. "Jesús queja ecatyati

juatsu ecuanara cachipirutiya", jadya tunajatu yanacana inime tupuya. ⁶ Pusha amadya Jesús queja catyatitsu ecuanara pureama juya, chipirudaque tuja ai aniya tsehue pureama ejuu bucha. Umada ecuanaja aniyaque juatsu, jadya ama juatsu umadama ecuanaja aniyaque, pureama ecuanara juya; Yusu tu ecuanara tsehue jida jujacaya ama. ⁷ ¿Ai jatsu ecuanara cabetihua cuinanayaque riyaque yahuaju? [Mema ecuanara cuinanahua! ¿Ai jatsu ecuanara cadujutinucaya majutsu? [Mema ecuanara dirunucaya! ⁸ Arepa ecuanaja ai umadama paju ama bucha, pureama nejura ecuanaja earaqui, jutu ishucue jadya aniya tsehue.

⁹ Dyaque cachipiruticara juya cuanara bacue sareajeyadya jutidya eje bucha chipiruqui juajecaraque, tuja ai aniya tsehue pureama juyaque ama. Bijiseriya tuna jida inime tupuqui cuanara bijiseriyaque ama. Tunadya jutidya yuamatura ishucue tunajatu bijiseriya. Cuanubi armadillaju nubitsu jidama juatsu cuinanataquima ejuu bucha tuna. ¹⁰ Cachipiruticara juatsutu ecuita cuanara dutya ai jidamaque aya. Dyaque umadadya jutidya tunajatu chipiru bijiseriajeya. Jadique bijiseritsu tunajatu yunerique quisarati ecuanara ejeneyaque ejenejaca hua. Arepa chipiruda ama bucha, tuna tuna pureama tsehue ama aniya, Jesús tsehue eana nime aputahua tibu.

Timoteo eje bucha junenie juishucue cueja cuareque

¹¹ Mique bacue jadya anie jutidya juume, Timoteo. Miquemi Yusu jaque. Tuque merequique mique. Jadya tibudya nime aputacue jidamaque. Jidaque ani bijisericue. Yusuja bijidaque acue. Jesús queja nimeedya jutidya juajecue. Peya cuana iyuhueda tsehue bacue. Arepa Jesús queja catyatima cuanara nerecaturaya ama bucha canimehuallatime. Cahuaitime mique ujeu baqui cuana tsehue; dutya tsehue jida jucue.

¹² Cacasticue Jesús queja nimeedya jutidya juaje ishucue. Ejeque tuja bahue eje tupu tuque tsajajaya tupu tsajaja ishucue cacasati bahue bucha, jadidya cacasticue Yusuja yacuaju judiru ishucue. Icuenemi jetiamaja yacuaju cacuejatihua mique Jesús queja catyatihuaque. Mique jadya quisariatihuajumi Yusura Ijahua quejaque inajacamerehua. Jutajuyi tura mique tuja juishu ihuarahua tibu, eje tupu majutsu Yusu quejadyami judiribuque ni eje tupu jaca ishucue ama. ¹³ Cuatsashaya mique era; acue Jesúsra amerehuaque. Adebacue Yusura mique petayaque. Turatu chacha anishaya, naruya jadya aya dutya aniyaque. Cristo Jesusrami tumbaedy petaya. Tuquetu bajida tsehue ama Poncio Pilatoja yacuaju cacuejatihua tuque Yusu jabacua jadique. Jetiamaque ecuita cuana camadya ama, tumbaedy ecuanaja Etata Yusu, Jesucristo jadya tuna bahue mique eje bucha juyaque. ¹⁴ Jadya tibudya mique cuatsashaya mique canimehuallati ishucue ama. Anicue aija nereda aquima. Jadya anie jutidyatu juya jadya tuna aume. Jadya anie jucue Ecuanara Cuatsashaquique Jesucristo junanucaya tupu.

¹⁵ Ecuanaja Etata Yusratu ejitaju amerenucabuque tura huecaca iyahuaque juetihuaju. Yusu tu dutya casa

tsehueque. Turatu naruya dutya ai aniyaque; aijamatu peya tuque baeque. Turatu naruya dutya peya cuana naruqui cuanaque. Turatu cuatsashaya dutya peya cuana cuatsashaqui cuanaque. ¹⁶ Tuque peadya tu maju baecuaque. Tuquetu dyaque jidaque. Ejeque buchiquetu riyaque yahuaju dyaque jida juya ama tuque bucha. Bama tu ni ejeja. Bataqui amadya tuque. Tuque emui paju muijaca ishu ama. Pacabameretijaca ama tuja dyaque casa aniyaque. Jadidya paju.

Chipiruda cuanaque cueja ishuque

¹⁷ Jadya mique cuejaya, Timoteo, chipiruda cuanaque micue jadya cuejae aishu. "Necasumitiume, chipiruda cabatitsu. Nerecada cuanaque dyaque jidaque bucha necabatiume. Neadebacue riyaque yahua juque tsunuda ama juyaque. Nerecadama cabatitsu Yusu queja judiruya bucha necabatiume. Jesús queja necatyaticue; tume micuana Yusura Ijahua quejaque inajacamereya. Yusura ecuana tyanityaya dutya ai ecuanara sareyaque. Tura ecuana tyaya dutya ecuanara sareyaque ecuana pureama tsehue ani ishu. ¹⁸ Jidaque neacue. Micuanaja jetiama chipiru aniya tibu, netsahuacue peya cuana. Inijeda nejuume. Dyaque jida peya cuanara sareyaju netsahuacue ecana. Necajaquetique micuanaja ai aniyaque. ¹⁹ Tsahuaya ni micuana nerecada cuanaque, tume micuana ejitaju juya yuneridya micuanara Jesús queja ecatyati cuanaque bayaque. Tume micuana majutsu Yusu queja

judirubuque. Tuhua tuque micuanaja anibuque dutya jidaque Yusura tuja cuanaque tyaana ahuaque. Tumeque tu ni eje tupu tere ishuque ama. Tuja yacua-ju judiruhaju, Yusura micuana yuneri cuitadya pureama amerebuque. Tuatsehuedya micuana anibuque ni eje tupu jaca ishu ama", jadya cuejacue chipiruda cuanaque.

Amena ishuque quisarati

Timoteo cuejatanacuareque

²⁰ Timoteo, miquemi mepetanahua quisarati yunerique cueja ishu. Bacaume cati cati arida cuanaque. Tunaratu Yusuja quisarati ama cuejaya, riyaque yahua juque jutidya. Tsahuaya ama tunajatu ni ejeque Yusu adeba. Yanacana jutidya tuna, tunarapa dyaque jida adebaya Yusu adeba jadya juya. Arepa yuneri bucha quisaratiyaju cabatiya ama bucha, pusha pusha tuna juya. ²¹ Dyaque jidapa tuna Yusu adeba ishuque adebaya. Tunaratu yunerique quisarati ejenejacadua. Cujujuatsu ediji ejacau bucha jutidya tuna.

Yusura jida tsehue nenarucue tuja quiyuhuebati tsehue, tumbaedy dutya mira quirica isarayaju bacaqui cuanaque. Jadidya paju. Jadya mique cuejaya.

Riya tupu camadya.

Pablo

2 TIMOTEO

Riyaque quirica ri Pablora Timoteoja cuadisha beta ishu cuadishacuareque. Riyaque hueneya patyatu Pablo amena maju japadama cabaticuare. Riyaque quirica eque rejari casaturacuare dutya tuja casa tsehue tuja Yusu merejaca ishu ama. Cuejacuare tuja tuque, arepa Cristoja inime canerecatiya ama bucha, tuque casada juishu. Cuejacuaretu ecuita cuana terehuie eje bucha judadibuqueque. Umae versículo cuana cabahuityati ishu jidaque ri: 1.7, 12; 2.1-6, 15; 3.12, 16-17; 4.7-8.

Pablora Timoteo isaracuareque

1 Riya micue quirica cuadishanucaya, Timoteo. Ique Pablo. Jesucristoja yana atsaquique ique, Yusuja jadya inime juya tibu. Turatu Jesús queja ecatyati cuanaque tuaqueja judirusa ana ahua, tuque jaca-nuca ishu ama. Turadya ique cuejamerehua riyaque quisarati. ² Miquemi ecue ebacua buchique, Timoteo. Dyaque iyuhuedaque mique ecue. Yusu ecuanaja Etatara, tumbaedy Ecuana Cuatsashaqui Jesucristo- ra jida tsehue narucue tatseja quiyuhuebati tsehue. Tatseja miatsehue canerecabati paani. Tatsera inime tsapema anishacue.

Pablora Yusu yusurupai acuaque Timoteo

Jesús queja catyatihuaju

³ Mique adebatsu tuque Yusu yusurupai aya. Huecada tupu, meta tupu Yusu tsehue quisaratiya micue ishu. Riyaque Yusudyari era mereya, tura cuatsashaya eque aniya tibu. Adebayadya tuque era ique tuja biji eque anicara juhuaque, ecue baba cuana anihua bucha. ⁴ Eje buchadya banucacara ebari jadya mique aya. Adebayadya tuque era, mira ique sareya iyuhueda jadya bayaque. Era shanayajumi pacuare. Tudy a tuque ecue nime aputataquima ishu. Eatsehue cabatinucatsumi dyaque pureama ejuu. ⁵ Adebayadya tuque era, mique Jesús queja nimeedy jutidya juajeya. “Jesús jaque ique” jadya camadya amami quisaratiya; yuneridyami tujaque. Nanada equedyami micue anu Loidara, micue cuaa Eunicera jadya cuejahua Yusu Neri aniyaque. Jesúsja quisarati bacatsu tatse tuaqueja catyatihua. Tuequedyami tatse catyatihua baedy a catyatinucahua. Ecue inime ni mi riya tuaqueja catyati- jacamadya.

⁶ Jadya tibudya mique cuejaya riyaque. Icuene tuque ecue emetucu micue iyucaju iyahua, Yusurami tuque merequi mepehua jadique mique caadebati ishu. Era jadya ayaju tuque micue Yusura tuja Espíritu cuadishahua, micue tuque mere ishu casa ani ishu. Nime aputaume riyaque. Yusu merejaca ishu ama casatijacuedya jutidya. ⁷ Espíritu ecuanaja ishu Yusura cuadishahua ecuanaja bajida ama amereya.

Tura ecuanaja casaturaya ecuanaja jidama inime cuanaju nubitsu ecanimehuallatiuju. Tura ecuanaja peya cuana iyuhueda bamereya. Turadya ecuanaja jida inime tupumereya ecuanaja ecuanara jida adebayaque aishu, jidama adebayaque aishu ama. ⁸ Bisu adebama cueja acue Yatse Cuatsashaqui quisarati. Arepa ique etare apudaju netiyaju baya ama bucha, bisuume ique jadya baatsu. Ique rehua erisi netiya Jesúsja quisarati era peya cuana cuejaya tibu. Mique ni mi tumbaedy nercada atadadibuque. Iducue canimehuallatima Yusuja quisarati mira cuejaya baatsu tunara eje bucha aya cuanaque. Yusura mique casa tyahua tsehue iducue dutya. ⁹ Yusura ecuanaja Ijahua quejaque inajacamehua. Tura yatse mepehua tujaque juishu, tuque pureamaturayaque ani ishu. Jadidya tujatu ahua, ecuanara cuita ai jidaque ahua baatsu ama. Jadya tujatu ahua, tuja jadya inime juhua tibu. Tura ecuanaja iyuhueda bahua tibu, tujatu ahua, arepa ecuanaja tuque ujeu juhua ama bucha. Riyaque yahua ejitaju juma jar- ijutu Yusura quisarati acuaque: “Inajacamerebuque tuque Jesucristo queja catyatibuque cuanaque” jadya. ¹⁰ Icuene ecuanaja baecua juhua tura ecuanaja dyaque iyuhueda bahuaque. Ejitaju tujatu ahua Jesús ecuanaja inajacame ishu majuhua. Tuaequeja catyatitsu tuque ecuanaja aijama baji maju ishu, Jesús ecuanaja emajuuque majuhua tibu. Iyacuque quisarati bacatsu, ecuanaja bahuedya juhua majutsu Yusu queja judiruyaque ni eje tupu jaca ishu ama. Bahuedya ecuanaja cacuitatinucatsu netitsuranucabuqueque yuta jida, arepa ririterehua ama bucha.

¹¹ Yusura ique cuadishahua riyaque quisarati cueja ishu. Cuatsashahua tura ique tuja yana atsaqui juishu.

¹² Yusura amerehua eque juhua tibu, nercada netiya etare apudaju. Jadya tibudya ique bisuya ama jadya canerecatiya juya cabatitsu. Bahuedya ique ai queja catyatihuaque; tuquetu casada. Turadya ique cuejamerehua Yusu queja judiru ishuque quisarati. Arepa tunara ique iyebuque ama bucha, ecue inimetu yuneri cuitadya riyaque quisarati cuejatanajacabuque ama. Jesús eje tupu junanucaya tuputu riyaque quisarati cuejatanabuque.

¹³ Icuene mique bahuityahua yuneri Jesúsra bahuityahuaque, mique peya cuana bahuitya ishu bahue juishu. Bahuityaume bapeque quisarati. Jesús

queja nimeedya jutidya juajecue. Peya cuana iyuhueda bajacaume. Jadya anie juatsutu ejitaju juya Jesús ecuana tsehueque, ecuana bacue tuatsehue jadique.

¹⁴Yusurami cuadishahua Jesúsra bahuityahuaque yunerique cueja ishü. Bape bape cuejae aume. Peya cuana queja bape cuejameree aume. Yusuja Espiritu micuana tsehüera micuana tsahuaajeyadya jutidya jadya juishu.

¹⁵Aniyatu ique jacaqui juhua cuanaque. Dutya jujeri Asiaju cuanaque Jesús queja ecatyati cuanara tsahuacarama ahua; Figelo, Hermógenes ecatsera bacue tumbaedyä. Miratu dutyadya adebaya.

¹⁶Onesiforo bacue jadya ama juhua. Tujatu bisu aijama juhua eatsehue, arepa ique etare apudaju netiyaju baya ama bucha. Romaju junatiya tajira tura sarehua. Ique dadiya tupu tura sarehua. Daditsu tura casaturahua. Rehua junama jarira tujatu Efesoju cuanaque dyaque tsahuahua Jesús queja ecatyati cuanaque. Miquemi dyaque jidadya bahue tura ecana eje bucha tsahuae ahuaque. Ecuana Cuatsashaquija canerecabati paani Onesiforoja etareju aniya cuana tsehue, tumeque ecuitaja eatsehue dyaque canerecabati anihua tibu. Jadya tibudya Jesúsra Onesiforo dyaque canerecabati tsehue pabana tuque junanucatsu.

Pablora Timoteo yunerique quisarati bahuitya ishü cuejacuareque

2 Timoteo, miquemi ecue ebacua buchique. Cristo Jesusra tuja dyaque quiyuhuebati tsehue baya tibu, turami tyahua casa mira sareyaque tuque mere ishü. Tura casa tyahua tsehue merecúe. ²Miratu quisarati bacahua era jetiamaja yacuaju cuejayaju. Tuna tuna bahuedya era yunerique cuejahuaque. Riyaque quisarati nucadya bahuityacue peya cuana bahuityaqui juishu. Tume cuanara peya cuana cuaret-su ama pabahuitya.

³Miquemi Jesucristora cuatsashaya eque jutaqui, sudaru tuque cuatsashaquira cuatsashayaju ejuu bucha. Sudarura huanama canerecati eiduu bucha, jadidyatu micue idutaqui canerecatiyaque juatsu, canimehuallatitsu ama. ⁴Jidaque sudaruratu tuque cuatsashaquique camadya pureamaturacara aya. Jadya tibudya tujatu bacaya ama tuque cuatsashaquira ama cuatsashayaque ni tu inime tupuqui aya sudaruju nubiyara shanahua cuanaque. Jadidya tuque micue Jesús cuita camadya meretaqui, dutya tuque pureamatura ishü au jadya. ⁵Ejeque dyaque huenida tsajajayaque camadya tunajatu ejaqui cuana epicaque iyucaju jutumereya. Tuque eje bucha tsajajatae ejuta eque tsajajahuaque juatsu camadya tunajatu jutumereya. Jadidya jucue; Jesúsra mique amerehua eque cuita camadya jucue. ⁶Tee pujitu ara ishüque ani ishü casada mere juya. Jadidyami mique casada mere jutaqui Jesús mere ishü. ⁷Jida inime tupucue riya era micue huenehuaju. Ecuana Cuatsashaquirami jida adebamereya.

⁸Jesucristo inime tupuqui ajacaume. Arepa majuhua ama buchatu netitsuranucahua. Chachadyatu iyacua. Ecuari David equetu juracanacuare. Tuque equeque

quisarati ique Yusura cuejamerehuaquedya riya.

⁹Tumeque quisarati era cuejahua tibu, iyacua canerecatiya etare apudaju quiyeti puji bucha. Arepa ique erisi ama bucha Yusuja quisarati cuejatanajacaya ama. Ai erisi bucha ama tuque. Peya cuanajatu cuejataquidya. ¹⁰Jutaquiju tuque nrecada juyara iduya, Yusura mepehua cuanaque jidaque quisarati cueja ishü. Dyaque canerecatiya tuna Jesucristo queja catyatisha ishü. Yusura tuna Ijahua quejaque inajacamerebuque, tura ecuana inajacamerehua bucha. Tuna tuna Yusu quejadya judirubuque, ecuana judiruya bucha. Emuijacata ama ecuana tuatsehue anidirubuque.

¹¹Riyaque quisarati ri ejene ishüque.

Jesúsra amereya eque cuitadya jutidya ni ecuana juya majuya tupu, tuatsehuedya ecuana anisiribuque.

¹²Iduya ni ecuana canerecatiyaque canimehuallatima, tuatsehuedya ecuana enaruqui jubuque.

“Jesús jaque ama ique”, jadya ni ecuana juya, “Tume cuanaque tu ecuique ama”, jadya tujatu Etata Yusu abuque.

¹³Arepa ecuanara tuja ishü ai aana ayaque eajacau ama bucha, turatu ayadya tura ai aana ayaque. Tuquetu pusha pusha baecua.

Tuquetu ejuu amadya tuque eje buchique ama.

Dyaque jida juishu Yusu meretaquique

¹⁴Timoteo, mique Yusuja quisarati bahuitya juyaque, ecana adebamerecúe riya era huenehuaque. Jadya ecana cuejacue: “Cati cati nejuume. Cati cati juyaque tuque micuana tsahuaya ama micuana quisaratiyaju bacaqui cuanaque. Jesús queja catyatishacarama jutidya tuque micuana ecana aya. Riyaque micuana amereya, Ecuana Cuatsashaquira era cuejayaque bacayaque adebatsu”, jadya ecana cuejacue. ¹⁵Cacasaticue Yusu pana pureamatura aishü. Jida mere puji que tuja patrónra mere petayaju ebisuu ama bucha jucue, mere puji ediji jida tuyu paruquique bucha. Jadidya tuque micue jida tuyu Yusuja quisarati cuejataqui, cuarema. Tumemi Yusura abuque: “Mira merehua jida. Erami pureama aya” jadya. ¹⁶Yanacana cuitatu umaecati cati juya. Yusuja quisarati tuna bacacarama aya. Ujeudya jutidya tuna Yusu bamereajeya tuna quisaratiyaju bacaqui cuana queja. Cati cati juume tuna tsehue. ¹⁷Quisarati yunerique ama tu muda. Ujeje caririshati aquique dutya ecuitaju tsapetanaya bucha tuque. Quisarati yunerique ama bacaqui cuanaque tuna tuna tacadya jutidya cayuamaturatiya. Jadidyatu jucua Himeneo, Fileto jadya ecatsé. ¹⁸Ejeque ediji jacatsu cuji ejuu bucha, jadidyatu tatsera yunerique ejenejacuare. Tatserratu bahuityaya: “Yusuratu amena nityatsuranucahua Jesús queja ecatyati majuhua cuanaque. Nityatsuranucabuque ama tura ecuana emajuque”, jadya tuna juya pusha pusha. Jadya bahuityatsu tunajatu Jesús queja ecatyati cuanaque cujishaya. ¹⁹Ecuana bacue tuaqueja nimee jujacahua ama, quisarati yunerique ejeneya tibu. Etare pana au eaquetu rihuiya ama. Tumbaedyä ecuana yunerique ejenetsu, Jesús queja nimee jujacaya ama. Ehüenedya

tu Yusuja quisarati: "Ecuana Cuatsashaquiratu adebaya tuja cuanaque" jadya. Tumebaedya tu Yusura jadya cuatsashahuaque: "Dutya yuneri jadya juya cuanaque 'Yusu jaque ecuana' ni riyá piji buchique tuna jidama jutaquí ama" jadya.

²⁰ Etarejutu aniya pajidaque equiniqui ea cuanaque, oro, plata jadya. Tumebaedyatu aniya acui, mechi jadya ea cuanaque. Umae equiniqui cuana tunajatu eje bucha juatsu cuana camadya tsumeya. Peya cuana bacue tuna dutya huecaca tsumeya. ²¹ Ecuana cajuchaticahuaaju ecuana Ecuana Cuatsashaquira jida baya. "Eatsehue micuana anibuque, ique mere ishu. Ique micuana tsehue dyaque pureama juya", jadya tura ecuana abuque. Ecuana asicadama bucha juya tibu, jidamaque ecuana jacahua tibu, jadya tura ecuana abuque.

²² Timoteo, bijiseriame ai bisutadaque aishu, ehue ebari cuanaja bijiseritaquique ama. Tuna bucha ejuque, cacasaticue Yusuja biji eque ani ishu. Jesús queja nimeedya jutidya juajecue. Iyuhue batsacue peya cuana. Eje bucha tsehue ama anicue peya cuana tsehue cahuaítima. Jadya anie jucue Jesúsja cuana tsehue, jidaque inime cajuchaticarama jadya inime tupuquí cuana tsehue. ²³ Caquemitsati caquemitsati aquereume aishuque ama quisarati aya cuana tsehue, tunara cuitadya adebayaque ama quisarati aya cuana tsehue. Miquemi bahuedya tume cuanaque peya cuana tsehue catijacatsu ama catiyaque. ²⁴ Ecuana Cuatsashaquique merequiquetu cahuaítitaquí ama. Dutya tsehuetu jida jutaquí. Tumebaedyatu tuque bahue jutaquí peya bahuitya ishu. Tujatu jida, inime tsapema jadya cuejatakaquí tuatsehue cahuaítiya cuanaque.

²⁵ Tumequetu cahuaítitaquí ama jidama juya cuana tsehue. Tsahuataquí tujatu ecana yunerique quisarati adeba. Yusura tunajatu inime ecuareu, tunaja yunerique ejene ishu. ²⁶ Icuenetu Ijahua jahue ahua, erisque bucha, cuanubi trampaja einaque bucha. Iyacua tuna tura cuatsashaya eque juya. Masadama cuana tuna ecaadebatiu tuna eje bucha juyaque. Eje buchadya tura cuatsashaya eque junucacarama ni tuna ejuu, cuanubi trampaja eicuayaque bucha.

Jesús junanucahue eje bucha ecuita cuana jubuqueque

3 Adebacue bacue riyaque. Jesús junanuca ishuque japadamatu Yusuja cuanaja ishu dyaque masada idutaquima bucha jubuque; Yusu adeba baecua cuanaque tuna dyaque jidama anibuque. ² Yusu adeba baecua cuanaque cuita camadya tuna inime patya catibuque, peya cuana pureamatura ishu inime et-sapeuque. Eje uma tunajatu chipiru sitanitaryacara abuque tunaja ishu cuita camadya. Tuna tacadya jutidya tuna casumitibuque. Peya cuana dyaque inimequí bucha tuna cabatibuque. Ijillahuanabuque tunajatu Yusu, peya ecuita cuana jadya. Etata cuanaqueja yana equedya ama tuna jubuque. Tuna tsahuaquí cuanaque yusurupai abaecua tuna jubuque. Ijaribabuque jutidya tunajatu dutya ai Yusuja cuanaque.

³ Iyuhuedama tunajatu peya cuana babuque. Etata cuanaqueratu ebacua cuanaque iyuhuedama babuque, ebacua cuanaquera bacue etata cuanaque. Peya cuanara jidama ahuaaju tuna nime aputabuque ama tunara eje bucha ahuaque. Catacuariti arida tuna jubuque. Tunara ai eje bucha acara aya equedya tunajatu abuque, tuna taca canaruti baecua tibu. Dyaque jidama tuna jubuque cuanubi muredaque bucha. Dutya jidaque tunajatu ujeu babuque. ⁴ Tuna iyuhueda baquí cuanaque tunajatu jahue abuque. Jida inime tupumaradya jutidya tunajatu ai abuque. Ni aija cuejatakaquí tuna jubuque, tuna dutya bahue bucha cabatitsu. Yusu tuna pureamaturacarama abuque, tuna cuita camadya. ⁵ Yusu adebaquí cuanaja bahue equedya datse tuna anibuque. Jadya ama bucha tuna Yusuja Espíritu queja cacasaturamereticarama jubuque. Jadya cuana tsehue cacarenetiame. ⁶ Etare cuana tupu juneni camadya tunajatu bahue, anitaya cuana tsehue quisarati ishu, epuna cuana tsehue neri neri. Epuna cuanaratu eje bucha cuejayaque pijidya jutidya ejeneya. Tunaratu dutyadya jutidya bacaya, arepa yanacanaque paju ama bucha. Tuna tuna pusha pusha bahuitya puji cuanara bahuityaya eque aniya. Arepa tuna tunaja jucha cuana ai dyaque bicuedaque bucha cuita adebaya ama bucha, juetiya ama tunajatu casa cajuchaticajaca ishu. Dyaque tunajatu bijiseriya tunaja bijiseritaquique ama. ⁷ Peyara iyacuaque bapeque quisarati cuejayaaju tunajatu eje buchadya bacacara aya, ai inime cacuairetiyaque ama. Tuna tacadya jutidya tuna jahue catiya, yunerique quisarati adeba jida aishu ama. ⁸ Moisesratu quisarati yunerique cuejacuare beru Yusura cuatsashayaaju. Jadya ama buchatu Janes, Jambres ecatsera bacahua ama Moisés. Tatse baedyatu iyacua Yusu ujeu baquí cuanara peya cuana jahue aya, tunaja quisarati yunerique baca ishu ama. Tume cuanaque tu inimemasi. Jesús tsehue tuna nime aputahua. Yusura tuna baya tuaqueja nimee ama juya cuanaque bucha. ⁹ Jahue asiri ishu ama tunajatu peya cuana jahue aya, yaratupu ishu camadya. Tuequedya tunajatu adebabuque tuna ai baecuaque. Jadya adebadadietu ecuita cuanara ahua Janes, Jambres ecatsé.

Pablora Timoteo cuejanucacuareque

¹⁰ Timoteo, miratu pana adebadya aya era yunerique bahuityahua cuanaque, ique eje bucha anieque, era Jesús ducuta muicara ayaque. Adebayadyami ique Jesús queja nimeeque, ique ujeu baquí cuana tsehue cahuaítiyaque ama, iyuhue tsehue tuna bayaque, canimehuallatima canerecatiyaque iduyaque.

Bahuityahuadya mique era eje bucha anie jutaquí. ¹¹ Adebayadyami ique jidama atahuaque, ique Jesús queja ecatyatique juya tibu dyaque canerecatihuaque. Adebayadyami ique Antioquiaju, Iconioju, Listraju eje bucha jucuaque, Jesús jiteque dyaque canerecatiuareque. Jadya ama bucha Ecuana Cuatsashaquira narujacacuare ama. Tura ique jida inimeju cuinanashahua. ¹² Riyaque tu yuneridya. Jesús purea-

maturayaque anicara juya cuanaque tuna jida ama atabuque, dutya tuaqueja nimee juhua cuanaque. ¹³Jidama juya cuanaque tuna jidamadya jutidya juajebuque, yunerique ama peya cuana ejenemerequi juya cuanaque. Tunaratu peya cuana ijahue abuque; peya cuanara bacue tuna tumbaue ijahuedya abuque.

¹⁴Jadya jutidya ejuuque mira ejenejacaume Yusuja quisarati bahuityatahuaque. Miratu amena pana ejenedya aya riyaque Yusuja quisarati yunerique. Miratu adebayadya mique riyaque quisarati cuejaqui juhua cuanara pusha pusha ahuaque ama. ¹⁵Nanada equeradyatu mira Yusuja quisarati isarahua. Miratu adebayadya riyaque quisarati. Tuque isaratsu ecuana bahue juya Yusura ecuana Jesucristo queja catyatiyaju Ijahua quejaque inajacamereyaque. ¹⁶Yusuratu huenemerehua dutya tuja quisarati. Yusuja quisarati tu jida yunerique bahuitya ishu. Jida tu cajuchatiya cuanaque tuna Yusu cahuaitishayaque caadebatitsu capeya inimetisha ishu. Jida tu jucha arida cuanaque cajuchatishajaca ishu. Jida tu Yusuja biji eque ecuana ani ishuque cueja ishu. ¹⁷Riyaque quisarati ehueneneque anitsutu Yusu mere juya cuanaque ecabahuityati dutyaju jida juishu. Tumeque quirica equedya ecuana ecabahuityati.

4 Timoteo, cuejaya mique era. Yusu merecua. Ecuana juya Yusu, tumbaueya Jesucristo jadyatu bahue mique era jadya cuejayaque. Ejeque huecacatu Jesús junanucabuque dutyaja huaraji aridaque juishu. Turatu cuejanabuque emaju cuanaque, chacha cuanaque jadya eje bucha judadiyaque. Jida tujatu amerebuque yana equedya juhua cuanaque. Nerecat-urabuque tujatu yana equedya ama juhua cuanaque. Jadya tibudya acue riyaque era amereyaque. ²Cuejacue Yusuja quisarati. Cuejajacaume; arepa tunara bacacarama aya ama bucha, tsapecue quisarati jidaque. Cajuchatiya cuanaque eana huecashacue tuna jidama juya cuanaque. Nereda acue cajuchatiya cuanaque. Casaturacue ecanimehuallati cuanaque. Jadya bahuityae eana acue yunerique ni eje bucha cahuaiti tsehue ama. ³Tsunutaya amatu huecaca ecuita cuanara quisarati yunerique bacacarama ayaque. Tunara bacacara ayaque cuita camadya tunajatu ijacababuque. Ihuarabuque tunajatu ebahuityaqui cuanaque tunara bacacara ayaque cuita camadya baca ishu. ⁴Bacajacabuque tunajatu quisarati yunerique. Yusuja quisarati ebacauque, tunajatu baba cuana cuatsabiji camadya bacabuque. ⁵Mique bacue inime tsapema junenicue, jida inime tupu tsehue, Timoteo. Peya cuanara jidama ayaju, iducue tuna tsehue cahuaitima. Yusu queja judiru ishuque quisarati cuita camadya cuejacue. Miquemi Yusu merequique. Jadya tibudya acue dutya mique Yusura amerehuaque.

⁶Masadama tunara iyedadiya. Beru tunaja uu Yusuja yacuaju iye bahue juhua, jadidya tunara ique iyedadiya. Amena ri japadama ique majuyaque. ⁷Sудару jidaratu tuque cuatsashaquique merejacaya ama; jadidyatu era Jesucristo merejacahua ama. Jidaque tsajaja pujitu tsajajacaya ama tuque tsajajaya tupu juti-

maque; jadidya ique Jesúsra cuatsashaya eque jujacahua ama. Catyatijahua tuaqueja cuita camadya. ⁸Et-sajajashaqui metseratu dutyaja yatucaju dyaque huenida tsajajahuaque ejaqui pica jutumereya. Tumbaueya ique dutyaja yatucaju Ecuana Cuatsashaquira abuque: "Miquemi jida Yusuja yatucaju, tura mique tuyu amerehua tibu", jadya tura tuque junanucatsu anabuque. Tuquetu dyaque tuyu. Ique camadya ama tura jidaque tyabuque. Tumbaueya tujatu tyabuque dutya tuque iyuhueda baqui cuanaque, tuque eje buchadya junashahuishacara juya cuanaque.

Pablora umaue tuja eadeba cuanaque eje buchique cuejacuareque

⁹Riyaque quirica inatsatsu tsunutaume; banacue ique, Timoteo. ¹⁰Sareya mique era. Eatsehue juneniya cuanaqueri dutya jujeri diruchine. Crescenteri diruchine Galaciaju. Tito bacue diruchine Dalmaciaju. Demasra bacue jacachine. Tujatu dyaque bijida riyaque yahua juque. Jadya tibudya tujatu Yusu mere jacachine. Tesalonicajutu diruchine. ¹¹Lucas peadya camadya ri eatsehue. Marcos tsuruyaque juatsu becue. Paje tuque miatsehuedya. Betaradya yatse Yusu pamere. ¹²Tíquico tuque cuadishachine Efesoju, mique tuhuaque cuare ishu. ¹³Badaju jutu ishuque tuque ecue shanachine Carpoja etareju. Jeyaque, Troas eque cuetiyaque ecue queminacue; becue ecue. Tumbaueya ecue becue quirica piruri; ebiti ehueneneque neri neri tumeque ecue becue cuita.

¹⁴Alejandrora dyaque jidama yuamaturachine, metal cueya cueya apujira. Tura Yusuja cuanaque nerecat-urahu tibu, tuquetu tumbaueya Yusura nerecat-urabuquedya. ¹⁵Tumeque ecuitatu Yusuja cuanaque ujeu. Ecuana quisarati yunerique cuejayajutu masadama ecuana tsehue cahuaitiya. Jadya tibu canaruticue tuatsehue.

¹⁶Huaraji cuanaja yacuaju tunara ique ihuarahuaju era eana ai bahuityachineque, ai ique juchineque jadya ique bacadura ishu, ni ejeque buchiquetu ique tachi ishu quisaratichine ama. Dutyara ique jacatillachine. Jadya ama bucha "Tata, nerecaturaume eana, tunara ique jacahua tibu", jadya tuque Yusu aya. ¹⁷Arepa ique dutya ecuita cuanara jacatillahua ama bucha, Ecuana Cuatsashaquiquetu eatsehuedya juhua. Tura ique jacahua ama ni yara tupu. Tura ique casaturahua, tuhua Yusuja quisarati tsape ishu dutya queja israelita ama cuanaque aniyaque. Ecuana Cuatsashaquira ique tachihua ecuita dyaque jidama cuanaju, león cuana mureda bucha ducucue. ¹⁸Tura ique ni riyaji buchique jacachine ama tibu, eratu pana ejenedya aya tura ique dutya jidamaju naruyaque. Ique narujacama aatsu tura dujubuque tuque huaraji arida aniyaju. Tuquetu dyaque jida jujacaya ama. Aijamatu peya tuque buchique.

Quirica huenetilladirutsu ecana Pablora isaracuareque

¹⁹ Prisca, Aquila isaramereya micuana Timoteo tsehue, tumbaedy a Onesiforoja etareju cuanaque.

²⁰ Erastotu Corintoju anichine. Trófimo tuque Miletoju shanachine, ujejeda baatsu. ²¹ Eubulo, Pudente, Lino, Claudia jadyarami isaramereya. Tumbaedy dutya rehua cuanara Jesús queja ecatyati cuanarami isaramereya.

Sareya mique, Timoteo. Ebajarara cuita tuhuaque cuinanacara jucue, cuejipa cuana pacacama jarijudya.

²² Ecuana Cuatsashaquique miatehue paju, Timoteo. Yusu ecuanaja Etatara nenarucue tuja quiyuhuebati tsehue. Jadidya paju

Riya tupu camadya.

Pablo

TITO

Riyaque quirica ri Pablora Titoja ishu cuadishacuareque Titotu israelita ama jucuare. Jadya ama buchatu tuque Jesús queja catyaticuare. Pablo tujatu tsahuacuare. Cretajutu Pablora shanacuare Jesús queja butseeju ecatyati cuanaque tsahua ishu. Jadya tibudyatu Tito Jesúsja cuanaque naruquique jucuare.

Pabloratu cuejacuare tuhua Jesús queja ecatyati cuanaque eje bucha narue aishuque. Tumbaedyatu hueneacuare Jesús queja ecatyati cuanaque naruqui cuanaque eje bucha jutaquique.

Umae versículo cuana cabahuityati ishuque ri: 1.9; 2.11, 14; 3.3-4.

Pablora Tito isaracuareque

1 Riya micue quirica cuadishaya, Tito. Ique Pablo, Yusu merequique. Jesucristoja yana atsaquique ique. Cuadishahua tura ique Yusura mepehua cuanaque bahuitya ishu, tunara Jesús queja catyatitsu pana adeba aishu. Jadya adebae tunajatu quisarati yunerique eadadiu. Eadebadadiu tunajatu dyaque jida Yusuja biji eque ani. ² Yusuja biji eque ecuana aniya eje tupu ecuana tuque jacanuca ishu ama tuaqueja judirubuque tibu. Yuequedya Yusuja yahua ejitaju ama jarijutu Yusura quisarati acuaque: "Ecue cuanaquetu eatsehue anibuque, ique jacatsu ama" jadya. Bahuedya ecuana jadya judadiyaque, Yusu pusha pusha baecua tibu. ³ Iyacia riyaque huecaca ecuana Yusura bamerehua riyaque quisarati. Yusu Ecuana Inajacamerequiri riyaque quisarati dutya queja cuejamerehua. Jadidya tuque ahua. ⁴ Tito, isaraya mique era. Miquemi ecue ebacua neri buchique, Jesús queja nimee juishu era tsahuahua tibu. Yusu ecuanaja Etatara, tumbaedyatu Ecuana Inajacamerequi Jesucristora jida tsehue naruque tatseja quiyuhuebati tsehue. Tatsera inime tsape ma anishacue.

Jesús queja ecatyati cuanaque naruqui cuanaque eje bucha anie jutaquique

⁵ Tito, ique tuhua Creta cububuju jucuare patya tuque yatse Yusuja mere atillacuare ama. Micue tumeque mere atilla ishudyu mique shanacuare. Micuedyatu bacanishataqui ecuita cuana epu cuanaju Jesús queja ecatyati cuanaque naru ishu, cuatsasha ishu jadya. Cuejacuaredya mique era eje buchique ecuita micue riyaque mere aishu bacanisha ishuque. Acue era mique amerehua bae. ⁶ Jesús queja ecatyati cuanaque naruqui cuanaquetu jida tuyu anitaqui, eje bucha eque nereda ataqi ama juishu. Ecaquemitique juatsu, huane pidya camadya paju, peya epuna jipe ishu ama. Ebacua cuanaque tunajatu Jesucristo queja nimee jutaqui, camuibati aqui jadya. Huaraji cuanara cuatsashaya eque tuna jutaqui. ⁷ Jesús queja ecatyati cuanaque cuatsashaqui cuanaque tuna Yusuja emepe cuanaque, naru, tsahua jadya ishuque. Jadya tibudyatu

tuna jida tuyu anitaqui dutyaja baishu, ni ejeque buchique jidama quisarati ishu ama. Paju ama ecana tunara cuita camadya ai ayaque acara, peyara cuejayaque bacacarama. Masadama cahuaite ecana paju ama. Nijuqui arida, cati arida, dutya ai tunaja ishu bijiseri arida ecana paju ama. Cachipiruti ishuque camadya inime tupuqui paju ama, Yusuja quisarati cueja camadya. ⁸ Tuna queja tarepe juya cuanaque jida bat-saqui ecana paju. Peyaja jida ishuque abahue ecana paju. Jida inime tupu bahue ecana paju jida tuyu ani ishu. Peya cuana tunajatu bataqui jida tsehue, huaraji cuanara cuatsashahua eque anitsu. Yusuja biji eque tuna anitaqui. Tuna taca canaruti aqui ecana paju, peya huecaca jidamaque aishu bijiseri bahueque eau tibu. ⁹ Quisarati yunerique tunajatu pana ejene ataqi ni eje tupu ejenejaca ishu ama. Riyaque quisarati equedya ecuana dutya anitaqui. Enaruqui cuanaque ni riyaque quisarati eque aniya, tume tunajatu Jesús queja ecatyati cuanaque casaturaya. Tumbaedyatu tunajatu ecuejau Jesús adebaya ama cuanaque tuna inime cacuareti ishu. Jesús queja ecatyati cuanaque naruqui cuanaque tuna jadya anie jutaqui era huenehua eque.

Yunerique ama bahuityaqui cuanaque tuna casada tsehue nereda ataqi

¹⁰ Aniyatu jetiama huaraji cuanara cuatsashaya eque jucarama juya cuanaque. Yana equedya ecana jucarama juya. Arepa ecana Jesús queja catyatihua ama buchatu uma israelita cuanara inime tupuya: "Anitaquidyatu ecuanaja baba cuanaja bahue jucuare eque Yusuja ecuana jida baishu", jadyatu uma yanacana cuita juya. Jadya ijahuee tunajatu ecana aya tunaja inime equijahuati tsehue. ¹¹ Bahuityataquique ama bahuityayaque tunajatu ecana uma familia cuana bape bape jutidya inime tupumereya. Jadyatu juya pusha pusha bahuityaqui cuanaque, cachipiruticara juatsu, tuna Jesús queja ecatyati cuanaja chipiru tyaishu. Mira, Jesús queja ecatyati cuanaque naruqui cuanara jadya nequisaratishaume tumeque pusha pusha arida cuanaque. ¹² Adebayadya tuque ecuana Creta juque eje buchique ecuita cuana. Tumeque ecububuju aniyaque ecuita jida quisarati bahuequedy-

atu jadya jucua tuja ata cuanaja ishu: "Eje pusha pusha ariu cuita dyadi tu Cretaju cuanaque! Cuanubi muredaque bucha tuna aniya. Dajicada, dyaida jadya tuna", jadyatu Cretaju aniyaque jucua. ¹³ Yuneridyatu tumeque ecuita quisaraticua. Jadya aniedya tuna juya. Jadya tibudya ecana yana casada tsehue nereda acue, yunerique bahuityayaque tunaja ejene ishu.

¹⁴ Quisarati tuna paajaca tunaja baba cuanaja bahue jucua cuanaque. Quisarati yunerique bijidamaduraqui juhua cuanara cuatsashayaju tuna pabaca ama.

¹⁵ Jidamaque tillatanahua cuanajatu aijama ai jidamaque. Tillatanama cuanaja bacue dutya jidama tere, quisarati yunerique ejenehua ama cuanaja ishu. Tunaratu Yusu cahuaishaya inime tupuya tsehue, tuna eje bucha juya tsehue jadya. Jidama ecana juya, jida juya bucha cabatitsu. Aya ama tuna jidaque, jidamaque bucha baatsu. ¹⁶ Tunapa Yusu jaque, jadya tuna juya. Tuna eje bucha juyajudya tuna ejitaju tujaque ama. Peya cuana tuna ujeu bajacaya ama. Peya cuanara jida cuejayaju, tunajatu bacacarama aya. Ni ai tunaja jidaque abahue. Jadyatu anibahue pusha pusha bahuityaquid cuanaque.

Tuyu bahuityaya eque anitsu

Yusu pureamatura ishuque

2 Tito, cuejajacaume jidaque bahuityahuaque. Bahuityajacaume ecana Yusu pureamaturayaque ani ishuque. ² Jadya ecana cuejacue ecuita esiri cuanaque: "Jida inime netupucue. Necamuibamereticue peya cuana queja. Jida inime netupucue Yusuja biji eque ani ishu. Jesús queja necatyatijecue. Iyuhueda nebacue Yusu, Jesús queja ecatyati cuanaque, dutyadya jutidya. Peya cuana micuanaja ishu jidama quisaratiyaju, tumebaedya nerecada juya cabatitsu necanimehuallatiume", jadya cuejacue esiri cuanaque.

³ Riya bae cuejaedya anucacue epuna esiri cuanaque: "Yusuja biji eque neanicue, Yusu iyuhueda bayaque caadebamereti ishu. Catacuariti arida nejuume. Nijuqui juya tupu tupari neijiume ni peya ai casadaque nijuqui juishuque. Nebahuityacue epuna amena capunatiya cuanaque tuna Yusu pureamaturayaque ani ishu. ⁴ Necuejacue epuna ecapunati cuanaque; yahue cuanaque ebacua cuanaque tuna iyuhueda tsehue paba. ⁵ Necuejacue ecana tunaja jida inime tupu ishu. Necuejacue ecana; pajaraquere ama tuna peya deca cuana, tunaja yahue cuanaque cuita camadya. Tunaja etare naru, bajeje jadya aishu ecana dyaida paju ama. Tuhua aniya cuanaque tuna jida tsehue paba. Yahue cuanaquera cuatsashaya eque ecana paju", jadya esiri cuanaque cuejacue. Tuna jadya anie juya baatsu Yusu adeba baecua cuanaja jadya inime paju: "Yusuja quisarati taa tu ejuu yunerique. Jee taa Yusura cuatsashahua eque aniya cuanaque jida tuyu dutyaju aniya" jadya.

⁶ Tito, riya bae cuejaedya anucacue ehue ebari cuana: "Jida inime netupucue Yusu pureamaturayaque ani ishu", jadya cuejajacaume deca ehue ebari cuana.

⁷ Pureamaturacue Yusu dutya mique ai juya tsehue, inime tupu tsehue, peya cuana mique juya baedya juishu. Yusuja quisarati bahuityayaque ecana pusha pusha aume. Jida ejitaju adebataqui ecana bahuityacue, peya cuanaja pana adeba aishu. ⁸ Yusuja biji quisarati acue, ni ejeja buchaja "Midya jutidyami jidama juya", jadya eauju. Tume mique ujeu baqui cuanaque pabisu yuneriju ama quisarati ahuaque adebatsu. "Jesús queja ecatyati cuanaque taa jida tuyu tunaja quisarati. Jidama quisarati tsehue tucue ecana neara ama", jadya tunaja inime paju. Tume ecana pabisu yuneriju ama quisarati ahuaque adebatsu.

⁹ Jadya cuejae mere puji cuana acue: "Micuanaja patrónra cuatsashaya eque nejuque. Nejujacaume micuanaja patrónja biji eque. Micuanaja patrónra cuatsashayaju, nejuume: 'A, aijama. Aya ama tuque era' jadya. ¹⁰ Nechiriume ni ai buchique micuanaja patrónjaque. Micuanaja ishu tuna jida quisarati paa: 'Ecue mere puji cuanara ni ai jidama ahua ama' jadya. Jadya anie micuana juyajutu peya cuanaja inime ejuu: 'Jesús queja ecatyati cuanaque dyaque jida cuita dutyaju juya. Yusu Tuna Inajacamerequija quisarati taa tu ejenetaquique' jadya", jadya cuejacue mere puji cuana.

¹¹ Yusura ecuana tuja iyuhue bamerehua, arepa ecuana jucha arida ama bucha. Tura ecuana Ijahua quejaque inajacamereya Jesús queja dutya catyatiya cuanaque. ¹² Ecuana tsehue dyaque jida juya tibu, tura ecuana bahuityaya riyaque yahuaju ecuana eje bucha anie juishuque. Yusura ecuana cuejaya: "Ecue bijidamaque ajaca ishuque inime tupuqui neajacaume. Nejacacue Yusu adeba baecua cuanara bijiseri ebari aya cuanaque. Jidaque aishu inime tupuqui neacue. Era bamereya eque nebacue peya cuana. Era cuatsashaya equedya nejuque, dutya ecue biji eque ai aatsu", jadya ecuana Yusura cuejaya. ¹³ Jadya ecuana anitaku Jesús Cristo junanucayaque ihuayaque. Pana ejenedya tuque ecuana aya tuque junanucayaque. Dyaque jida ecuana inime juya riyaque bahue juatsu. Tuque tuque ecuana Yusu casadaque, Ecuana Inajacamerequique jadya. Tuque junanucahuaju tuna jubuque: "Dyaque casada taa tuque! ¡Aijama taa peya cuana tuque buchique!" ¹⁴ Tuja inime taca neri taa majuhua ecuana jiteque. Tura ademe taa ecuana Yusu cahuaishajacama juyaque cuinanashahua. Tuquetu majuhua, tuque Yusuja ecuana tuyu bucha baishu. Tuquetu majuhua ecuana tujaque amere ishu. Tuquetu majuhua, ecuana jidaque acaraque aishu.

¹⁵ Tito, micuedyatu Jesús queja ecatyati cuanaque bahuityataqui. Cuejacue ecana eje bucha jutaquique, eje bucha jutaquique ama jadya. Tuna jidama aniyaque juatsu, ecana nereda acue. Mira bahuityayaque ni aira buchique pabijidamadura ama. "Jesucristora jadya cuatsashahua tibu, jadya quisaratiya. Era cuejayaque ri ecue inime tacaque ama, Je-

sucristora cuatsashahua”, jadya ecana cuejacue, dutyaja mira quisarati ayaque baca ishu.

Jesucristo queja ecatyati cuanaque eje bucha anie jutaquique

3 Tito, jadya cuejacue Jesúsja cuanaque: “Neade-bacue micuana icuene cuejatanahuaque. Nejudue gobiernoja yana eque, tumbaedy dutya huaraji cuanara cuatsashaya eque. Huaraji cuanara peya cuana tsahua ishu cuatsashayaju ecana jida inime tsehue netsahuacue. ² Neijillahuanaume ni ejeque buchique. Cati sare nejuume ni eje tsehue. Jida nejudue peya cuana tsehue; netsahuajacaume ecana. Jida jutidya nejudue dutya tsehue”, jadya ecana cuejajacaume.

³ Jida nejura Jesús queja catyatima cuana tsehue. Icuene ecuana tuna aniya baedy a nicuare. Aishu ama ni ecuana adebacuare Yusu jaque ni tura ejitaju ahuaque. Muibacuare ama ecuana Yusu ni ejeque huaraji buchique. Eje bucha anie jutaquique bahue bucha ecuana cabaticuare, tume taa pusha pusha pana ejene ayaque. Dutya jidamaque bijiseritsu ecuanaja abahuedya jucuare. Dutya ecuana acuare ecuana cuita camadya pureama juishuque. Jidama ecuana acuare peya cuana. Cajishati arida ecuana jucuare; ecuanara ai ecuanaja ishu bijiseriyaque jidama ecuana bacuare peyaja aniyaju. Ecahuitidya jutidya ecuana jucuare peya cuana tsehue; tuna bacue ecuana tsehue. Jadya aniedya jutidya ecuana jucuare icuene.

⁴ Yusu Ecuana Inajacamerequirea ecuana bamerecuare tura eje bucha iyuhuee bayaque. Bamerecuare tura ecuana ecuana tsehue tuque ejejiuque. ⁵ Inajacamerecuare tura ecuana, ecuanara ai jidaque ahua baatsu ama, ecuana tsehue quiyuhuebati anitsu. Iyacuanehua tura ecuana, ecuanaja jucha cuana ai utsaya bae utsae aatsu. Tuja Espiritu eque tura ecuana yudijidya cananatisha anucahua. ⁶ Ecuana Inajacamerequi Jesucristo queja catyatihuaju, Yusura tuque ecuanaja tuja Espiritu cuadishahua. Inijeda juatsu ama tuja tuque ecuanaja cuadishahua. ⁷ Jadya tujatu ahua, tuque jidaque ecuana bamere ishu, arepa ecuana jucha arida juhua ama bucha. Tujaque tura ecuana amerehua. Tuaqueja judirusha ana ni eje tupu jaca ishu ama jadya tura ecuana acuare. Pana ejenedya tuque ecuana aya jadya judadiyaque.

⁸ Riyaque era hueneyaque tu yunerique. Jesús queja catyatihua cuanaque era huenehua eque anishacue. Mira ni ecana cuejajacaya ama, tume tunajatu peya cuana tsahuajacaya ama. Tuyudya tu jadya juishu. Tuna jida juyaju baatsutu peya cuana tuna aniya baedy a nicara ejuu. ⁹ Dutya ama tuna jadya anie juya. Aniyatu umae yanacana cati cati juya cuanaque. Aniyatu ebaba cuanaque eje bucha juhuaque inime tsapequi juya cuanaque. Juya tunajatu inime peya cuana

dyaque jida bucha, ecuita cuana dyaque inimequi eque ejuracanaque cabatitsu. Aniyatu Moisésra cuatsashahua tibu cati cati juya cuanaque. Cati cati ishu tunajatu aya eje bucha anie ecuana tumeque cacuat-sashati eque ejuuque.

Dutya riya cuanaque tu aishuque ama. Dyaque jida ama tura ecuana Yusu adebamereya. Peya cuana tsehue ujeu jutidya tura ecuana cabatishaya. Miquemi jadya jutaqui ama, Tito.

¹⁰ Peya cuanara bacue Jesús queja ecatyati cuanaque dutya tupu nimee amerecarama aya. Jadya ameretsu tunajatu ecana cahuaishaya jutidya. Yusuja cuanaque cahuaishaqi juya cuanaque nereda acue. Tunara bacayaque juatsu, jida. Bacaya ama ni tunara mique, nereda anucacue. Nereda abeta acue. Nereda abeta aatsu, tunara bacaya amaju tume ecana jacacue. Tuna ni jidamaque bahuityajacaya ama, tume ecana yatse tsehuequi bucha ama bacue. ¹¹ Bacacarama ni turami aya, adebayadya tuquemi tumeque ecuita cuejatuquimaque. Arepa nereda atanahua ama bucha, arepa cajuchatiyaque bahue ama buchatu tumeque ecuita cajuchatiyacarama juya. Tura cuitadyatu Yusuraja quisarati bijidamadurahua. Jadya tibudyatu Yusura nerecaturabuque.

Pablora Tito amerecuareque

¹² Inime tuque bajejeya Artemas Cretaju cuadisha ishu, jadya ama juatsu Tíquico. Cuadishaya tuque peadya ejeque cuana Jesús queja ecatyati cuanaque naru ishu mique aijama tupu. Era cuadishayaque jutihaju, jecue ebajarara. Necatsuruti Nicopolisju. Tuhuadya amena aninatiya cuejipa cuana juyaque cuetiya tupu. ¹³ Zenas, Apolos jadya tuhuaque cuinanahuaju, ecatse tsahuacara acue. Zenasratu cacuat-sashati pana adeba aya. Tsahuacue ecatse dutya tatsera ai sareya tsehue tatse cuayaque et-sunutanatiuju. Pahuiti ama tatseja ai. ¹⁴ Jadya cuejae Jesús queja ecatyati cuanaque acue: “Jida nejura. Net-yara ai ecuanaja aniyaque aima cuanaque. Netsahuara ecana. Dyaida tsehue neanira ama. Yanacana juneni ejuu tibu, netsahuara peya cuana”, jadya tuque micue ecana cuejataqui.

Tito Pablora amena ishu isaracuareque

¹⁵ Dutya eatsehue cuanarami isaramereya. Isaracue tuhua cuanaque Jesús queja ecatyati cuanaque. Tuna tuna yatseja eadeba cuanaque iyuhueda cuanaque. Yusura jida tsehue nenarucue tuja quiyuhuebati tsehue. Jadidya paju.

Riya tupu camadya.

Pablo

FILEMON

Riyaque quirica ri Pablora Filemonja ishu cuadishacuareque. Riyaque quiricaju ri Pablora Filemón, “Micue tsujetyama mere ishuque Onesimo jida batsacue”, jadya acuareque. Onésimotu Filemónja tsujema mere ishuque jucua. Tuque metse quejaquetu huanacuare. Juneniyaquetu chamacama Pablo tsehue catsuruticuare, etare apudaju erisi netiyaju. Pabloratu tsahuacuare Jesús queja catyati ishu. Jesús queja catyatitsu tujatu Pablo dyaque tsahuacuare. Pablotu bahue jucua Onésimo, Filemón queja dirunucataquique. Tumetu Onésimo dirunucayaju Pablora tudya quirica cadujutishacuare tuque metseja ishu, tuque merequi bucha camadya tuja batsa ishu ama, tumbaedyatse tsehuequique, betadya ecatsa amena Jesús queja ecatyatique tibu. Pablo Filemón queja Onésimo jida inime tsehue bamerecara aya bucha, tumbaedyatu Yusuja dyaque canerecabati aniya ecua tsehue. Tura tuque ecuanaja jucha cuana nrecabaya, Pablora Filemón queja Onésimo nrecabamerecuare bucha.

Pablora Filemón isaracuareque

1 Era riqe micue quirica cuadishaya, Filemón. Ique Pablo. Ique rehua etare apudaju netiya, Cristo Jesúsja quisarati cuejaya tibu. Timoteo ecue eatsehuequique ri rehuadya eatsehue. Isaramereya tura mique. Miquemi yatseja jida eadebaque. Mira yatse tsahuahua yatse Jesúsja quisarati cueja juyaju. ² Tumbaedyatse isaramereya Jesús queja ecatyati cuanaque micue etareju Yusu pureama aishu caradati bahue cuanaque. Tumbaedyatse isaramereya Apia. Tumeque epuna tu yatse tsehuequique. Tumbaedyatse isaramereya Arquipo. Sudarura tuque cuatsashaquique emereu bucha, jadya mereedyatu Arquipora Jesús aya, yatsera aya baedyatse. ³ Yusu ecuanaja Etatara, tumbaedyatse Ecuana Cuatsashaqui Jesucristora jida tsehue nenarucue tatseja quiyuhuebati tsehue. Tatsera inime tsape ma neanishacue.

Filemónra Yusuja cuanaque iyuhueda bacuareque, Jesús queja nimee jucuaque jadya

⁴ Eratu bacaya tunara jadya ayaju, “Filemonrapa Yusuja cuanaque iyuhue apushaya ama, nipa Jesús queja nimee jujacaya ama” jadya. Riyaque quisarati bacatsatsu, micue ishu Yusu queja bacabacayaque, jadya jujacama juya: —Ecue Etata Yusu, yusurupai mique aya, Filemón eje bucha anie juyaque bacatsatsu. ⁶ Tuquetu dyaque jida micue cuanaja ishu; ni eje tupu pijidya jutidyatu tsahuajacaya. Jutaquijudya mique bacaya, tuja dyaque Cristo adebaaje ishudyatse jutidya, Jesús queja nimeedyatse jutidya juajetsu muibajaca ishu ama. Tuque jadya anie juya baatsumi, peya cuanara pureama aya, tura jidaque inime aya tibu, —jadya tuque bacajacama aya Yusu micue ishu. ⁷ Miratu dyaque iyuhueda baya Jesús queja ecatyati cuanaque. Miquemi tuna tsahuaquique. Tsahuayami

ecana, tuna eje bucha juyaju, tuna eje bucha jidama inimeju nubihuaju. Riyaque bacatsu ique ecue pureama tsehue netiya. Dyaque mira nime casaturaya, ecue eatsehuequique.

Pablo Filemón queja tuja Onésimo jida tsehue batsa ishu canerecaticuareque

⁸ Ique Pablo, amena esiri. Iyacua etare apudaju netiya, Cristoja quisarati cuejaya tibu. Ique Cristoja yana atsaquique juya tibu, mique ecue casada tsehue ameretaqui mique ai jutaquique. Jadya ama bucha mique amereya ama casada tsehue. Acue mira ique iyuhueda baya tibu; nrecabacue ique. ¹⁰ Ique taa mi- aqueja canerecaticuareque micue Onésimo dyaque jida tsehue batsa ishu. (Tumeque ebacani tu “Catsahuati aquique” jadique.) Tuque taa tuque ecue ebacua buchique. Tura ique rehua etare apudaju banahuaju tuque tsahuahua Jesús queja catyati ishu. ¹¹ Ique bahue tura mique tsahuajacabacahuaque, micue etare juque huana diru juatsu. Amena tura ique dutyaju tsahuaya. Jadya tsahuaedyatse turami eadirunucatu, mi- aqueja judirunucatsu. ¹² Jutaquijudya tuque miaque- jadya cuadishanucaya. Arepa tuque ecue ebacua bucha juya ama bucha, tuque cuadishanucaya. Batsacue, ique micue batsa bahue juhua bucha batsaedyatse acue.

¹³ Ecue datsetu inime juhua: “Eje buchadya rehua eaqueja iyacara datse tuque aya Onésimo, ique tuja tsahua ishu, Filemónra etsahuau bucha tsahuae tura ahuaque. Filemónra ique eje bucha tsahuataquima baya tibu tuque, tuque cuarequi datse eiyau”. Jadya tuque inime tupuhua ique rehua etare apudaju netiyara Jesúsja quisarati cuejaya tibu. ¹⁴ Jadya inime tuputsu, tuequedyatse tuque adebatinucaya ecue tuque rehua mique baecuaque iyataquimaque. “Tsahuataqui juya tibu patsahua Pablo”, jadya micue inime paju ama.

Mira ique tsahamerecara ayaque juatsu, jutaquiju tsahamerecuedya ique micue jadya inime juyaque juatsu camadya.

¹⁵ Arepa Onésimo micue etare juque huanadiru juhua ama bucha, Yusuratu jida amerehua tuja ishu, tumbaedy a micue ishu. Tuquetu dirubacahua mi- aquejaque. Jesús queja catyatitsu turami badirunucaya; meredirunucayadya, tura mique amena jacanuca ishu ama. Beta neti metse juya Yusu tsehue cajacati ishu ama. ¹⁶ Iyacua tu tuque mique mere ishuque camadya ama. Micue miatsehuequique tume, betadya metse Jesús queja catyatihua tibu. Eratu tuque dyaque iyuhueda baya. Dyaquedyatu mira iyuhueda baya. Tuque Jesús queja catyatihua tibu, turami dutya tuja casa tsehue tsahuadiruya. Iyuhueda necabaticue mique micue miatsehuequi tsehue iyuhueda ecabatiu bucha. ¹⁷ Ecue, micue jadya tuque yatseja inime aniya Jesús mere ishu. Yatse jadya anie juya tibu, batsacue Onésimo jida tsehue, ique micue batsa bahue bucha. ¹⁸ Mira ni batsacarama aya, tura mique eje bucha jutidya ahua tibu, chirihua ni tura micue ai, jidama inime baume. Eaqueja paju inime. Erami tsujetyaya.

¹⁹ Riyaque quiricaju ique ebacani quiyatiya, mique era tsujetya ana ayaque micue ejene ishu. Micue ecue tsujetyama jarijudya, adebacue era mique eje bucha tsahuae ahuaque. Eradyami tsahuahua mique Jesús queja catyati ishu. Arepa micue ique dutyaju tsahu- ataqui ama bucha, erami casada tsehue ama cuat-

sashaya tuja manu aniyaque apupasha ishu. Acue micue inime eque. ²⁰ Mique ecue eatsehuequique tibu, batsacue Onésimo, ique miaqueja canerecatiya tibu. Jadya mira tuque ahuaaju, mira casaturaya, mira peya cuana casaturaya bucha.

²¹ Jadya era quirica cuadishahuaju tuquemi eaudya Jesúsra bijida baya bucha. Eratu adebayadya, ique tuja ishu miaqueja canerecatihuaju mira tuque nerecaba ebari ayaque.

²² Micue tuque jida batsa ishu jipidya ama mique jadya aya, tumbaedy aya ique aniti ishuque etare micue bajeje ishu. Adebayadya tuque era micuana Yusu que- ja bacabacayaque: "Tata, Pablora ecuana pabananca" jadya. Jadya tibu masadama cuana tunara einajacau. Masadama cuana micuana ebatu.

Camadya ishu isarayaque

²³ Epafasrami isaramereya. Tuqueri rehuadya eatse- hue etare apudaju netiya. Tuquetu Jesús queja nimee jujacaya ama. Turatu dyaque inime tupuya Jesús eje bucha meree aishuque. ²⁴ Tumbaedyami Marcos, Aristarco, Demas, Lucas jadyara isaramereya. Tuna re- na rehua riyaque epuju Yusuja quisarati cuejaqui cua- naque.

²⁵ Ecuana Cuatsashaqui Jesucristora jida tsehue ne- narucue tuja quiyuhuebati tsehue. Jadidya paju.

Riya tupu camadya.

Pablo

HEBREOS

Riyaque quirica ri israelita cuana Jesús queja ecatyati cuanaja ishu cuadishatanacuareque. Adebataqui amari aira hueneacuareque, arepa eje umara Pablora hueneacuareque bucha baya ama bucha. Umae cuana Jesús queja nimee jujacacara juyaju tujaque tibu dyaque canerecatiyaju cuadishacuareque bucha rique. Tunaja baba cuanaja quejeneti cuanaju yudijidya judirunucacara juyaju cuadishacuareque bucha rique. Riyaque huenequirari hueneacuare, Cristopa ni aija beta tupu aqueretaqui ama israelita baba cuanara ejeneacuare cuana tsehue, acuare cuana tsehue jadya. Dyaque tujatu “Cristo tu ecuanaja pae dyaque muidaque”, jadya acuare. Icuene pae dyaque muidara uu iye, ami Yusu tyau jadya acuare buchatu Cristo curusuju majucuaque ami quijehuetitsu, ecuanaja jucha cuana tsujetya ishu. “Necanimehuallatime. Ecuana eiyetauju majuhua queja nimeedya jutidya nejuajecue”, jadyatu jucuaque. Umae versículo cuana jida cabahuityati ishu cuanaque ri: 2.3; 4.12, 14-16; 6.10; 7.25; 9.22; 10.23; 11.1-40; 12.1-2, 5-6; 13.8.

Yusu Ebacuaque eque caadebamereticuareque

1 Beru mara cuana cuetietibehuajutu Yusura tuja quisarati adebamerehua ecuanaja baba cuana tuequeque quisarati cuejaqui cuana eque. Eje uma cueja bape bape eque adebamere tujatu ecana aetibehua. ² Amena iyacua bacue tura ecuanaja eje buchique adebamerehua tuja Ebacuaque neri eque. Tuja Ebacuaque tsehuedyatu Yusura iyahua dutya ai aniyaque. Tudyatu Yusura mepehua dutya ai aniyaque naru ishu. ³ Tuquetu jida casada Yusu bae cuitadya. Tura ecuanaja pana ejitaju adebamere aya Yusu eje buchique. Tura jadya amereya tibutu turadya inimeradya jutidya dutya tura iyahuaque inaya, naruya jadya aya, Yusura iyahua baedya aniaje ishu. Tuquetu majuhua ecuanaja jucha cuana apupashatsu pana bajeje aishu tsujetyaqui. Jadya juatsutu tuque Yusu Dutya Naruquija yacuaju anidiruhua Yusuja jida eque amaca. Emuitaque yahua naruquija jida eque amaca eiyabuty-atau bucha, tumbaedyatu tuque muitahua.

Yusuja Ebacuaquetu dyaque emuitaque, barepa juque Yusu tsahuaqui cuanaque bucha ama

⁴ Yusuja Ebacuaquetu barepa juque Yusu tsahuaqui cuanaque dyaque inime metseque judadihua. YUSUJA EBACUAQUE ebacanidya tu dyaque emuique, “Yusu tsahuaquique” jadya buchique ama.

⁵ “Mique mique ecue Ebacua.

Ique micue Tata”, jadyatu Yusura Jesús ahua. Ni ejeque tuque tsahuaquique tujatu jadya ahua ama. Tumbaedyatu Yusu jucuaque beru Jesús jadya ayaque: “Ique tuja Etataque.

Tuque tuque ecue Ebacua”.

Ni eje tupu tujatu ahua ama quisarati ni ejeque tuque tsahuaquija ishu riya bucha. ⁶ Riyaque yahua ju tuja Ebacuaque peadyaque cuadishahuetu Yusu jucuaque:

“Dutya barepaju ique tsahuaqui cuanara pamui ecue Ebacua”, jadyatu juhua.

⁷ “Eratu ecue quisarati barepa juque bequi cuanaque cuejiji bucha huene amereya, ique barepaju merequi cuanaque bacue casada etiqui ai yuamaturaquique bucha”,

jadyatu Yusu jucuaque barepa juque tuque tsahuaqui cuanaque jadya ayaque.

⁸ Tuja ebacuaquetu Yusura jadya acuare: “Yusu, dyaque casadaque jujacanime ama mique. Narubuque tuquemi tuyu neri micue cuanaque.

⁹ Jida tuyuque tuquemi iyuhueda baya.

Amena jidama tsehuemi cahuaitya.

Jadya tibudya, ique Yusu juya tibu, erami mepehua peya cuana bucha dyaque emui juishu.

Jutaquijudyami mique dutya dyaque jidaque judadiya”,

jadyatu Yusura ahua tuja Ebacuaque. ¹⁰ Tumbaedyatu Yusura acuare beru tuja Ebacuaque:

“Yuequedya tuquemi iyahua yahua, Dutya Cuat-sashaquique.

Micue emetucu tsehue tuquemi iyahua barepa.

¹¹ Yahua barepa jadyatu teredadibuque.

Amena miquemi tere ishucue ama.

Dutya eiyacuaque esiri judadiya.

Ecuanaque ejutuqui siri buchatu judadibuque.

¹² Ejutuqui siri iyacuaque cadadititsu eijehueu bucha, tumbaedyatu tuquemi iyabuque yahua iyacuaque beruque cuarequi, barepa iyacuaque beruque cuarequi.

Mique bacue ni riya piji buchique esiri jubuque ama.

Mique eje bucha, jadidyami jusiribuque”,

jadyatu Yusura Ebacuaque ahua.

¹³ “Anibuteque ecue jida eque amaca muita ishu, era mique ujeu baqui cuanaque dutya iyahue atilla tupu”, jadyatu Yusura ahua tuja Ebacuaque cuita camadya, ai ejeque barepaju tuque tsahuaquique ama.

¹⁴ Barepaju etsahuaqui cuanaque tuna espíritu cuana. Tunadya tuna Yusu merequi cuanaque. Tunadya tuna barepa juque cuadishaya tura tuaqueja judirushabuque cuanaque tsahua ishu. Jesús, Pedro tsehue quisaraticuareque

Nebijidamadurara ama Yusura tuaqueja judirusha ana ayaque

2 Yusuja Ebacuaque dyaque emui juya tibu, barepaju Yusu tsahuaqui cuanaque bucha ama juya tibu, tuque ecuanaja ecuanara Yusuja quisarati bacahuaque dyaquedya ejenetaqui, ecuanara eejenejacau tibu. Ejenejacaya ni ecuanara, tume ecuanara cuaba ejurira dujuyaque bucha jutidya ejuu. ² Beru yuequedyadyatu Yusura Moisés cuejahua cacuatsashati cuana barepa juque quisarati bequi cuana eque. Cacuatashati eque ama anihua cuanaque, yana equedya ama juhua cuanaque tuna dyaque nrecaturatanahua, tuna jidama juhua tibu. ³ Beru yuequedya yana equedya ama juhua cuanaque jadya canerecatie juhua tibu, dyaque jidama di taa ecuanara nrecaturatabuque Ecuana Cuatsashaqui quisarati cuitadya bacaya amaque juatsu! Dyaque jida ri riyaque quisarati. Icuene cuitatu tura cuitadya cuejahua: “Yusuratu tuaqueja judirushabuque eaqueja ecatyati cuanaque” jadya. Tuequedya ecuanara tuque quisaratiyaju bacaqui juhua cuanara cuejahua tumeque quisarati nucadya, pusha ama cuitadya yunerique ecuanara bahue amere ishu. ⁴ Yusura cuitadyatu yunerinehua tunara cuejahuaque pusha ama cuitadya yunerique. Tuque tuna tsehueque bamere ishuque tujatu ecana amerecara ahua. Amerehua tujatu ecana ecuita cuanaja bape baishuque. Amerehua tujatu ecana tuja casa tsehue ni ejeque ecuitaja ataquique ama. Tuja Espíritu eque tujatu ecana tyahua casa tuja biji eque bape bape cameremeretie juishu. Jadya adebamereetu Yusura ahua Jesús quisaratiyaju bacaqui juhua cuanara cuejahuaque pusha amadya yunerique.

Jesucristo cacuitaticuareque

⁵ Tuequedyatu Yusura yahua iyacuaque iyanu-cabuque. Riyaque iyacuaque bahue juishuque rique micuanaja huenehua. Ni ejeque buchique barepaju tuque tsahuaquique tujatu iyahua ama yahua iyacuaju cuanaque naru ishu. ⁶ Yusuja quisarati tu ehue: “Arepá riyaque yahuaju cuanaque micue yacuaju aishuque ama paju ama bucha, mira tuna sareya, Yusu.

Arepá maju aquí cuanaque muita ishuque ama juya ama bucha, mira tuna jida naruya.

⁷ Icuene tuquemi ecuita cuana ejetsunue ishu ama barepaju mique tsahuaqui cuanaja jetiedyaque iyahua.

Jadya ama bucha tuquemi ecuita cuana esumi, emui jadya amerehua, enaruquique casadaque bucha esumita, emuita jadya.

⁸ Dutya mira iyahua cuanaque cuatsashaqui tuquemi ecana iyahua”, jadya tu Yusuja quisaratiyaju ehue.

Jutaquijutu aijama amadya ecuita cuanara cuatsashaya eque judadi ishuque. Jadya ama buchatu ecuita cuanaja aijama jari casa riyaque yahuaju dutya ai aniyaque naru ishu. ⁹ Arepa ecuita cuana jadya muie atama jari ama bucha, Jesús tu iyacua dutya iyaquique emuita jadya. Cacuitatitsu ejetsunue amatu tuque barepaju Yusu tsahuaqui cuanaja jetiedyaque juhua ecuita cuana jiteque maju ishu. Yusuratu jida tsehue bahua cajuchatiya cuanaque; turatu Jesús iyahua dutya tunaja jida ishu. Iyacua tu Jesús esumi, emui dutya casa tsehueque enaruquique, Yusura inime pihuaque ahua tibu. ¹⁰ Yusuratu iyahua dutya ai aniyaque. Turatu baya dutyaju dutya ai tuja jida ishu. Yusuatu bijida dutya tuja ebacua cuanaque tuatsehue pureama ata ishu. Jesúsja canerecatie eque cuita amadya tuna jadya ejudadiu. Jutaquiju tu tuyudya Yusura tuja Ebacuaque nrecatura ishu, tura inime iyahua eque eje uma tuaqueja amere ishu. Jesúsra ademedy ecuanara Yusu queja judirushaya. Tura ademedy ecuanara Yusu queja judiru ishu huidujuya. Tuquetu peya cuana judirushuque ishu ediji pacashaaje juya buchique.

¹¹ Jesúsra tuque ecuanaja jucha cuana tillahua ecuanara Yusu jaque amere ishu. Ecuana jucha tillahua, ecuanara jucha etillatana cuanaja jadya tuque ecuanaja peadya camadya Tata, Yusu. Jadya tibudyatu Jesús bisuya ama ecuanara tuatsehuequique jadya aishu, arepa tuque ecuanaja dyaque inime metseque paju ama bucha. ¹² Jadya tu ehue Yusuja quisarati:

“Pacueja era ecue eatsehuequi cuanaque mique eje bucha juhuaque.

Tuna tsehue casitatitsu mique pureama abuque” jadya.

¹³ Tumebaedya patu Jesús jucuare:

“Yusu queja ique catyatihua” jadya.

Tumebaedyatu jucuare:

“Rehua ique ecue ebacua cuana bucha tsehue, Yusura ique ecue naru ishu tyahua cuana tsehue” jadya.

¹⁴ Ecuana Yusuja cuanaque ecuanara maju aquí cuanaque, ramiqui, amiqui jadya. Jadya tibudyatu Jesús ecuanara baedya maju aquí juhua. Jadyatu juhua majutaquí juishu. Tuquetu majuhua Satanás casa seca ishu, ecuanara maju mubamerejaca ishu. ¹⁵ Icuene tuque ecuanara dyaque mubahua maju. Metsequi cuanajatu ataquí tunara eje bucha cuatsashayaque, arepa tunara acarama aya ama bucha. Jadya ecuanara juhua. Bajida juatsu tuque ecuanara abahue juhua Satanásra amereyaque, arepa acarama aya ama bucha. ¹⁶ Yunerique cuitadyatu Jesús ecuita cuana Iyahua quejaque inajacamerera junahua, Abraham eque ejuracana cuanaque, barepaju Yusu tsahuaqui cuanaque ama.

¹⁷ Jesúsra ecuanara tuja tuatsehuequi cuana bae cuitadya juhua, Yusuja inime juya eque. Jadyatu juhua, ecuanara pae dyaque muidaque Yusuja yacuaju juishu,

Yusu tuyu mere ishuque juya tibu. Jadyatu juhua, ecuana jida inime tsehue naru ishu, tuyu Yusu mere ishu. Jadyatu jucuare tuta taca catyati juishu, ecuanaja jucha cuana tsujetyaqui juishu. ¹⁸ Jesús cuitadyatu canerecatihua. Yanacana cuitatu Satanásra cajuchatishacara ahua. Jadya tibudya tura ecuana tsahuaya Satanásra cajuchatishacara ayaju.

Jesús tu Moisés bucha dyaque inime metseque

3 Jutaquiju dyaque inime netupucue Jesús eje buchique, micuana ecue eatsehuequi cuanaque. Yuequedya cuitadya micuana Yusura mepehua tujaque amere ishu, tuque pureamatura ishu jadya. Tuquetu Yusuja Ecuadishaque. Tuquetu ecuanaja pae dyaque muidaque Yusuja yacuaju. Ejeneyadya tuque ecuana tuque jadicue. ² Icuenetu Yusura Moisés mepecuare tuja cuanaque naru ishu, tuque cuarequi tuna cuatsashaqui juishu. Turatu dutya tuque cuatsashatahuaque acuaire. Tumebaedyatu Jesús mepetanahua Yusu cuitadya ecuita cuana queja ejunauque. Tuque ameretahua eque cuitadya tujatu ahua. ³ Etare metseque tu dyaque emuique, tuatsehue etareju aniya cuanaque bucha ama; tumebaedyatu Jesús dyaque emuique, Moisés bucha ama. ⁴ Dutya etarejatu emechiqui aniya; Yusu tu dutya metseque. ⁵ Tuyudyatu Moisésra ahua Yusura cuatsashahuaque, Yusuja cuanaque naruyaque. Yusu merequiquetu juhua. Tujameretu juhua tuna Yusura eje bucha adadiyaque cueja. ⁶ Cristo tu dyaque inime metseque, Moisés bucha ama. Cristo tu Yusuja Ebacuaque. Turatu jida tuyu naruya Yusuja cuanaque, tuque Yusuja Ebacuaque juya tibu, mere pujira cuatsashaya bucha ama. Yusuja cuanaque ecuana, Jesús queja nimeedya jutidya juajeyaque juatsu, Yusura tyaana ahuaque pureama tsehuedya jutidya ihuaajeyaque jari juatsu.

Yusuja neri cuanaque Yusu queja judirubueque

⁷ Jadya tibudyatu ehue Yusuja quisarati tuja Espiritura jadya ayaque:

“Iyacua micuanara Yusura cuejayaque bacatsu,

⁸ bacacarama ama neacue, micuanaja baba cuana israelita cuanara ahua bucha.

Tunaratu Yusura amerehuaque ahua ama.

Anitaya ama cuanaju juneniyara tunajatu Yusu nime adebahua tuna cuejataquima juyaju, tura nerecaturama idu ayaque adeba ishu.

⁹ Tuhatu micuanaja baba cuana, erapa jidama baya, jadya juhua, arepa ecana era pushi tunca mara jida tsehue bahua ama bucha.

Nime adebajachua ama tunara ique.

Era nerecaturaya ama bucha tuna cabatihua.

¹⁰ Jadya tibudya cahuaithua dyaque tumeque ecuita cuana tsehue, tuna era cuatsashaya eque tuyu jucarama juhua tibu.

Arepa ecana ecue cacuatsashati cuana bahue ama bucha, acarama tunara ecue yana aya.

Tunaja inime tacadya jutidya cuji juya buchique tume.

¹¹ Tuna tsehue dyaque cuita cahuaithu tuna jadya ahua:

“Nubidirubueque ama tuna era ecue cuanaque canajara ishu bajejehuaju”, jadyatu Yusu jucuare beru.

¹² Cuejaya micuana riyaque, micuana ecue eatsehuequi cuanaque. Necanaruticue ejera micuana Jesús tsehue enime aputashaju. Micuanara ni Yusu dutya casa tsehueque bijidamaduraya, jidamaque ni micuana inime tupuqui aya, tume tuque micuana tuja quisarati bacacarama aya. ¹³ Dutya huecaca peya cuana tsehue necacasaturaticue ijahue ecatimereu tibu, cajuchati ebijiseriu tibu. “Iyacua era cuatsashaya eque neanicue”, jadyatu Yusura acuaire ecuanaja baba cuana. Tumebaedya tura ecuana iyacua aya: “Era cuatsashaya eque neanicue” jadya. Tura ecuana jadya aya jari tupu, yurameta cacasaturati nejuce peya cuana tsehue Jesús queja catyatiaje ishu. ¹⁴ Jesús queja catyatimitse juatsu tuque ecuana pana ejenedya ahua tura ecuana naruyaque, ecuana yudijidya ecanimehuallatiuju. Tuajueja nimeedya jutidya ni ecuana juajeya tere juetiya tupu, tuatsehue tyatanapeedya ecuana jubuque tyatana ana juhuaque.

¹⁵ Jadya tu ehue Yusuja quisarati: “Iyacua micuanara Yusura cuejayaque bacatsu bacacarama ama neacue, micuanaja baba israelita cuana jucuare bucha ama. Tura cuatsashaya eque anicarama tuna jucuare”.

¹⁶ Egipto juque huanacuare cuanaratu eje uma bacuaire Yusu tuna tsehue quisaratiyaju, Moisésra dujuacuare cuanara. Jadya ama bucha tuna cuatsashaya eque anicarama jucuare. ¹⁷ Eje uma mara tunajatu Yusu tuna tsehue cahuaithahua; pushi tunca mara tuna jadya jucuare. Cahuaithuaretu cajuchatijacacuare ama cuana tsehue. Jadya cajuchatie juatsu tuna ma-juajehua anitaya ama cuanaju juneniyaque. ¹⁸ Tuna cuitadya tujatu ecana ahua: “Judiruya amadya ni micuana ni ejeque buchique era ecue cuanaque canajara ishu bajejehuaju. Jadya micuana aya ai quisarati cuaretsu ama”, jadya patu acuaire Yusura quijacabacati baecua cuanaque. ¹⁹ Jutaquiju ecuana bahuedya tuna Yusura emajaca bajejehuaju judirutaquimaque, tunara Yusura tyaana ahuaque ejenehua ama tibu.

4 Yusratu tuja cuanaque tuatsehue canajarasha ana ahua. Judiruma jari ecuana tumeque emajaca canajara ishuj. Jadya tibudya ecuana necanarutira, ejeque quijacabacati baecua ejuuju, ejeque cuana ecuana ejudiruu ama tibu. ² Ecuonaratu Yusuja quisarati jidaque bacahua, ecuanaja baba cuanara bacahua baedya. Ni aishu buchiquetu tunaja ishu jida juhua ama, tunara ejenehua ama tibu, arepa bacahua ama bucha. ³ Ecuana quejeneti aniya cuanaque cuita camadya ecuana judirubueque Yusu tsehue canajara ishu, tura amere ana ahua bucha. Beru patu Yusura quisarati acuaire quejeneti baecua cuanaja ishu: “Ique tuna tsehue dyaque ecahuiti. Ahua tuque quisarati: ‘Judirubueque ama tuna ni eje tupu ecue cuanaque canajaradiru ishucue era bajejehuaju’”. Jadya patu jucuare, ai canajaradiru ishucue bajejema jarique juatsu

ama. Riyaque canajara ishuquetu beru yahua iyama jarijudya ebajeje juhua, Yusura yahua iyahua equequedya riyaque mere amena ahua tibu. ⁴ Jadya tu ehue Yusuja quisaratiju pacarucu huecaca ishu jucuaque.

“Yusutu canajaracuare pacarucu ishuque huecacaju, tura ai acara ayaque au amena aatsu”.

⁵ Tumebaedya patu Yusu jucuaque, cuatsashaya eque ama juya cuanaja ishu:

“Tuna tuna judirubuque ama canajara ishujú”.

⁶ Yusuratu tumeque canajara ishuque emajaca bajejehua yanacana ama. Judirubuquedyatu eje uma tuhua, jidaque quisarati bacametse juhua cuanaque ama. Cuatsashaya eque ama anihua tibu tuna nubidiruhua ama tuhua. ⁷ “Iyacu micuana dutya cuatsashaya eque neanicue”, jadyatu Yusura acuare béru ecuanaja baba cuana japada anitaya ama cuanaju juneniyaju. Tuna bacue cuatsashaya eque anicarama jucuaque. Eje uma mára juatsutu Yusura quisarati anucacuare:

“Riyaque huecaca ri ecue quisarati ejene ishuque”.

Butseeju rique ejitaju ahua Davidra huenehuaque:

“Iyacu micuanara Yusuja quisarati bacatsu bacacarama ama neacue”.

⁸ Josueratu cuatsashaya eque anicarama jucuaque cuanaja ebacua cuanaque Canaán yahuaju huidujucuaque. Canaán amatu dutya tyata ana juhua cuanaja canajara ishuque jucuaque. Jadique juatsutu Yusu quisarati quena ama juhua eje uma mára cuetihuaju: “Iyacu tu canajara ishujú nubi ishuque” jadya. ⁹ Jutajui taa tu yuneridya Yusuja cuanaque canajara ishujú nubidirubuque, Yusura amerecara ayaque atillatsu, Yusu cuitadya pacarucu ishuque huecacaju dutya ai aniya cuanaque iyatillatsu canajarahua bae. ¹⁰ Yusura canajara ishuque tyaana ahaju nubitsu, tuque ecuanaja dutya mere cuana terebuque riyaque yahua juque, Yusuja mere yahua iyatillatsu juhua bucha. ¹¹ Necasatira Yusura cuatsashaya equedya jutidya aniaje ishu, Yusura canajara ishuque iyahuaju judiru ishu. Yana equedya nejura bijidamadurata ishu ama, ecuanaja baba cuana bijidamaduratacuare bucha. ¹² Yusuja quisarati tu ai chacha ejitaju buchique, Yusura eje bucha amerecara ayaque ejitaju amere ishuque, cuchiru beta eque jacua ea buchique. Cuchiru tsehue ecuitaju sacuatutu etsauju jutiya. Tumebaedya ecuanaja Yusuja quisarati isaratsu caadebatiya ecuanaja eje buchique. Ejitaju tura ecuanaja amereya Yusuja inime eque eje bucha ecuanaja juyaque. Isaratsu Yusura yatse adebamereya eje bucha jucaraque, inime tupu peya huecaca yatsera cuitadya adebayaque ama. Pana ejitaju tura yatse aya eje buchique inime cadujutiyaque.

¹³ Ni ai buchiquetu Yusu Dutya Iyaquija yatucaju tehuataqui ama. Turatu dutya baya. Turatu baya yatse eje bucha juneniyaque. Adebayatu yatsera inime tupuyaque. Tuque tuque ecuanaja pana cueja abuyaque inime tupuyaque, eje bucha juhuaque jadya.

Jesusdyatu Yusu queja ecuanaja pae dyaque muidaque bacani

¹⁴ Jesús, Yusuja Ebacuaque tu Etataque queja ecuanaja pae dyaque muidaque. Iyacu tu Yusuja yacuaju. Jadya tibudya tuaqueja nimee nejujacara ama. ¹⁵ Jesús ecuanaja pae dyaque muidajatu quiyuhuebatsati aniya ecuanaja canerecatiyaju, Satanásra cajuchatishacara ayaju. Ecuanaja juya bae cuitadyatu juhua. Tuquetu canerecatihuadya. Tumebaedyatu Satanásra cajuchatishacara datse ahua. Jadya ama buchatu tuque cajuchatihua ama ni cajuchati pidya. ¹⁶ Jadya tibudya bajida nejura ama Yusu tsehue quisarati ishu. Iyuhueda tura ecuanaja baya. Aniya tujatu canerecabati ecuanaja tsehue. Jida tsehue tura ecuanaja bajacaya ama tibu, tsahuajacaya ama tura ecuanaja, ejeque uradya jutidya ecuanara sareyaju.

5 Moisésja cacuatshati equetu pae dyaque muidaque ecuitadya jutidya jucuaque. Tuquetu ebanisha jucuaque Yusuja yacuaju ecuita cuanaja yana atsaquique juishu. Tujatu Yusu bamere bahue juhua ecuita cuanaja tuque ai euune cuanaque tyayaque. Turatu tyacuare Yusu uu eiye cuanaja ami ecuita cuanaja jucha cuana tsuje. ² Ecuita cuana Yusuja inime eque juishuque pana adeba ama aatsu cajuchatihujutu pae dyaque muidajaanicuare canerecabati tuna tsehue, tuque tumebaedya ecuita jucuaque tibu. ³ Tuque cuitadya jucha arida cabatiya tibu, bameretaquidya tujatu Yusu uu eiye cuanaja ami jucuaque peya cuanaja jucha cuana tsuje camadya ama, tumebaedya tuja jucha tsuje. ⁴ Ni ejequedya jutidyatu tuta taca cabacanishameretie ejuu ama pae dyaque muidaque amereta ishu. Yusuja cuita camadyatu mepe bahue jucuaque tura pae dyaque muida cuanaque amerecara ayaque amere ishu, béru Aarón acuare bucha icueneque amere ishu. ⁵ Tumebaedyatu Cristo tuta taca ama camepetihua pae dyaque muidaque amereta ishu. Yusuratu jadya muie acuare. Jadya tu ehue Yusuja quisarati: “Miquemi ecue Ebacua. Ique micue Tata”. ⁶ Peyaju tu tuja ehue quisarati jadya: “Miquemi pae jujacaya ama. Melquisedec buchami judadiya”.

⁷ Cristo riyaque yahuaju aniya jari tuputu nerecada jutajui jucuaque. Payaque etsuri jebuda tsehuetu Yusu queja canerecaticuare, tuque maju ishu ama inajaca ishu casa aniya queja. Yusuja inime eque juya tibusu Yusura tura bacayaque bacacuare. ⁸ Arepa tuque Yusu jabacua juya ama buchatu tuque canerecatitaquidya juhua, yuneri cuitadya Yusura cuatsashaya eque jucara juyaque caadebamereti ishu. ⁹ Jadya tibudyatu majutusu cabameretihua tuque Yusuja biji eque cuitadya juhuaque. Jadya juatsutu tuque dutya tura cuatsashaya eque aniya cuanaque inajacameretiquique judadiahua. Terenuca ishu ama tujatu ecuanaja Yusu tsehue anishaya. ¹⁰ Yusura cuitadyatu bacanishahua pae dyaque muidaque juishu. Melquisedec pae jucuaque bucha beru amena eje uma mára, jadya buchiquedya tu tuque.

Cristo tsehue nime aputa ishü përuque

¹¹ Aniya jaritu Melquisedec eje bucha judadie pae ju-
cuareque micuana cueja ishüque. Jadya ama buchatu
eje bucha dutya cuejatilla tupu ama, micuanara yume
adeba ama aya tibu. ¹² Amena micuana eje uma mára
Jesús queja catyaticuareque. Jadya tibudya micuana
Jesús queja butseeju ecatyati cuanaque bahuityaqui
jutaqui. Jadya ama bucha, peya cuana ebahuityauque,
tuque micuana sarenucaya peya cuanaja pana cueja
anuca ishüque ibedamaque Jesúsja quisarati bahuitya
ishü. Dyaque ibedaque eadebauque, cabahuityatitaqui
jari micuana ibedamaque. Micuana micuana ebacua
nana buchique, erami earauque, atsuna piji camadya
susuyaque. ¹³ Ebacua atsuju jari cuanaratu adebaya
ibedamaque cuita camadya. Tumbaedyä micuana
adebaya ama jari tuque micuana Yusuja bijidaque, biji-
damaque jadique. ¹⁴ Yusuja biji equedya jutidya juaje-
yaratu adebaya dyaque ibedaque, amena ari ari cuita
cuana erami araya bucha. Jadique adebaajehua tibu,
butseeju bacametse ayaque, tunajatu adebayadya ji-
daque, jidamaque jadya.

6 Inime tupuqui neajacacue Cristo eje buchique
ibedamaque bahuitya ishüque cuita camadya.
Amena esiri bucha nejuque. Tuja quisarati dyaque
ibedaque necabahuityatiajecue. Etare puji cuanara
dudu cuana sipimaquedya jutidya cuarenuca cuarenu-
ca eau bucha nejuume. Butseeju Cristo jaque bahue
juya cuanaque tuque ecuanaja abahue: “Cacuareti-
taqui micuana. Jidamaque tuque micuanaja aja-
cataqui. Jesús queja micuana catyatitaqui jadya. ² Cut-
sameretitaqui micuana. Esiri cuanajatu micuana
dyaque emetucu iyataqui Yusuja Espíritu micuana tse-
hueque adeba ishü. Emajuque micuana Yusura chacha
anishanucabuque. Yusuja cuanaque tuna tuatsehue
siri anidirubuque; tuja cuanaque ama tuna nrecada
jujaca ishü ama canerecatidadibuque”, jadya tuque
ecuanaja bahuitya bahue butseeju Jesús queja ecatyati
cuanaque. Dutya riya cuanaque ecuanara cuejaya cua-
naquetu ibeda cuanaque ama. ³ Necabahuityatiajera
yunerique dyaque ibeda cuanaque. Jadya ecuanara juya,
Yusura ecuanara huecashayaque juatsu.

⁴ Umaetu Jesús tsehue nime aputahua. Ecuanara ni
tuna eje bucha yudijidya tuaqueja nimee amerenucae
ama. Icuene tunajatu pana baca ahua Yusuja quisarati.
Tsjema tunajatu inatsahua Yusuja jidaque barepa
equeque. Icuenetu Yusuja Espíritu tuna tsehue juhua.
⁵ Tuna tuna Jesúsja quisarati equedya anicuare. Tuna-
pa tuna Jesucristora casa tyacuare. ⁶ Jadya ama bucha
tuna Jesús queja nimee jujacahua. Jesús curusuju
tataqui juhua cuanaja inime jucua bucha, Tuquepa
aishuque ama, jadidya tunajatu inime tupuya Yusuja
Ebacuaque queja nimee jujacahua cuanara. Dutyaja
yacuaju tuna tsahua tuatsehue. Jadya tibu tuna eje
bucha yudijidya Jesús queja nimee amerenucataqui
ama. ⁷ Riyaque cuatsabiji eque micuana huecashaya.
Anicuaretu beta tee. Eje uma autu neira acuare. Yahua
bacue jida nacatacuare. Peadya teejutu jetiama caty-

aticuare mere puji cuanaja ara ishü cuanaque. Peya
teeju bacue huijacuare acuija, jiji cuitadya jutidya,
aishuque ama. (Teeju ai baya ama tibutu emechiquira
shanacuare.) Jesús bijidamaduraya ama cuanaque tu-
na teeju jetiama earaqui catyatiya buchique. Tume
cuanaquetu Yusura jidaque tyabuque. Jesús biji-
damaduraqui cuanaque tuna teeju acuija cuita ca-
madya ehuijaque buchique. Tume cuanaquetu Yusura
nrecaturabuque. Ijahuaja etiquiju tujatu ecana
ishabuque.

Jesús queja nimee jari cuanaque

⁹ Arepa era Jesús tsehue nime aputahua cuanaque
eje buchique huenehua ama bucha, ecue inime micua-
na micuana dyadi tuaqueja nimee juya jari, micuana
ecue iyuhueda cuanaque. Bahuedya ique micuana
Yusura jidaque tyajeyaquedya jutidya, turadya micua-
na Ijahua quejaque inajacamerehua tibu. ¹⁰ Eje uma
tsahuadya tuque micuana ahua Jesús queja ecatyati
cuanaque. Adebayadya tuque ecuanara micuanara
ecana tsahuajacayaque ama. Tuna jadya tsahuae
ayaque micuana ejitajudya yuneridya Jesús iyuhueda
bayaque. Yusu tu dyaque tuyu. Tuquetu nime
aputabuque ama micuanara tuja ishü ayaque. Tura
micuana tyabuque jidaque. ¹¹ Ecuanara micuana
peadya peadya cama tereya tupu yurameta iyuhueda
cabatishacara aya. Tume tuque micuanaja anibuque
micuanara ihuahuaque. ¹² Ecuanara micuana
dyaidama Yusu mere ishü amerecara aya. Jesús queja
nimeedya jutidya juajeya cuanara, canimehuallatima
dutyä iduya cuanara jadyatu babuque Yusura jidaque
tyaana ahuaque. Tuna bae nejuque.

Yusura aana ahuaque adadiyaque

¹³ Neadebacue Yusura Abraham tyaana ahuaque.
Yusutu cacuaretiya ama. Pusha pushatu juya ama. Ai-
jamatu peya tuque bucha casadaque. Jadya tibudyatu
jadya juhua: “Ique Yusu juya tibu, ayadya tuque era eje
bucha aana ahuaque cuarema ni riya piji buchique.
¹⁴ Pusha ama cuitadya mique tyabuque dyaque ji-
daque. Tyabuque mique ebacua. Tuque equedya
tuque micue jetiama mique eque juracanaya cua-
naque anibuque”, jadya patu Yusura Abraham acuare.
¹⁵ Abrahamratu pana ejenedya Yusu acuare tura
tyaana ayaque tyadadiyaque. Yuneridya ihuacuare tu-
jatu tupupe tupupe inime tsehue ama. Tuquetu
chacha anicuare tuja ebacuaque cuinanacuare tupu,
beta yutsecuaque ecatsé. Jadya aetu Yusura ati-
bunecuare tuque tyaana acuareque. ¹⁶ Ecuanara quis-
arati yunerique ayaque cabamereti ishü, tuque ecua-
naja sare bahue ejeque ecuanara bucha dyaque inime-
quija yunerine ishü. Jadya juatsutu amena eje bucha
quisaratitaqui ama. ¹⁷ Jidaque inatsaqui judadiya cua-
naquetu Yusura ejitaju bamerecara ahua tura aana
ahuaque adadiyaque. Jadya tibudyatu juhua: “Ique
Yusu juya tibu, ayadya tuque era eje bucha aana
ahuaque cuarema ni riya piji buchique”, jadyatu ju-

cuare. ¹⁸ Yusura aana ahuaque tu ecuana einajacaque. Yunerinehuadya tura. Jadya ae abeta tujatu acuare. Ecuannaratu Jesús sareya ecuana Yusu queja judirusha ishu. Yusu cacuaretiya ama tibu, ni pusha pusha jadya juya ama tibu, ecuana canimehuallatinime ama; bahuadya ecuana, tura tuja yacuaju duju ana ahuaque juya tibu. ¹⁹ Tura ecuana Yusu queja judirushayaque pana ejene cuitadya aya tibu, tuque ecuana jacacaramadya aya, cuaba pana risi ahuaaju jarasicuama ejarau bucha. Tupu pidya camadya ecuana inime aya. Tupupe tupupe ama ecuana inime aya; Yusu queja judirubuque, judirubuque ama jadya ama ecuanaja inime juya. Berutu pae dyaque muidaque eraca erihua eque cuetitsu nubicuare Dyaque Muidaju Yusu tsehue catsuruti ishu. Iyacia tuque ecuana pana ejenedya aya barepaju Yusu tsehue catsuruti ishu judirubuque. ²⁰ Jesúsra ecuana huidujuhua Yusuja yacuaju, ecuana judirutaqui juishu. Tudyatu Yusuja yacuaju ecuana bamereetsa ishuque. Pae dyaque muidaque tume; ni eje tupu pae jujaca ishuque ama tume, pae Melquisedec jucuare baeque.

Jesús tu pae Melquisedec jucuare baeque

7 Melquisedectu huaraji dyaque aridaque jucuare epu ebari Salem bacani juque. Tuquetu pae jucuare, Yusu dyaque emuitaque merequique. Ecuannaja ebaba Abraham peya epu cuana juque catiju ijahue aatsu juetinucajajutu Melquisedecra tsurutsacuare. Tuque judirunucaya baatsutu Melquisedecra cuinanatsu tsurutsacuare. Tsuratsatu tujatu atsacuare Abraham: “Yusura jida tsehue bacue”. ² Abrahamratu adebacuare Melquisedec Yusu Neri cuarequique. Jadya tibudya tujatu tyacuare riya piji tura huaraji cuana ijahue aatsu secahuaque. Tyacuare tujatu peadya tunca cama tura ai secahua cuanaque. Ebacani Melquisedec tu “Ecuari tuyuque” jadique. Tuquetu epu ebari Salem bacani naruquique jucuare. Salem ebacani tu “Inime tsapema ani ishuque” jadique. Jutajuytu tu ebacani Melquisedec “Tuja ecuita cuana narutsu dyaque jida inime tsapema amerequique” jadique. ³ Aijamatu ehueneneque ni ejeque quiricaju tuja etataque, ecuaque jadya ni ebaba cuanaque. Baecua ecuana eje bucha ejitajue, majue jadya tuque juhuaque. Atanaya amatu ebacaniju peya pae Salem juque tuque yueque tibene ni reequu tibene, Yusuja Ebacuaque bucha tuque peadya camadya pae dyaque muidaque juhuaque.

⁴ Neadebacue Melquisedec dyaque emui juhuaque. Abrahamtu dutya ecuana israelita cuanaja baba jucuare. Emuita juhua. Jadya ama bucha tujatu tyahua Melquisedec peadya tunca cama dyaque jidaque tura huaraji cuana secahua cuanaque. Ejitajudyatu Melquisedec dyaque emui juhuaque, Abraham bucha ama; peadya tunca cama ai tyayaque inatsaquique tu mayuru, etyaquique bucha ama. ⁵ Moisesratu huenehua Yusuja cacuatsashati: “Israelita cuanajatu tyataqui ejaque piji tunaja aniyaque Leví eque ejuracana cuanaque, pae cuana. Peadya tunca cama tunaja ai

aniyaque tunajatu tyataqui”, jadya tujatu cuatsashahua. Tunaja ata cuana jaquedyu tunajatu inatsacuare tunaja tsume ishu. ⁶ Melquisedec bacue Leví eque ejuracanaque ama jucuare. Jadya ama buchatu Abrahamra tunca cama ai ejaque tuja aniyaque tyacuare. Inatsatsu tujatu acuare: “Yusura narucue jida tsehue”, jadya tujatu acuare Abraham. Abrahamtu dyaque emuique juhua, “Mique equedyatu dutya israelita cuana juracanadadibuque”, jadya Yusura tuque ahua tibu. ⁷ Jadya ama buchatu Melquisedec Abrahamja muitaqui juhua. “Yusura jida tsehue narucue”, jadya ejeque aqui que tu muitaquique. ⁸ Israelita pae cuana ecuita cuanara tyayaque inatsaquique juhua cuanaque tunca cama tsujetyacuare; maju aqui que tuna jucuare. Melquisedec bacue majuma jari que bucha. Yusuja quisaratira cuejaya eque taa tu Melquisedec chacha aniya jari bucha, tuque majucuaque ni ejeque buchique baecua tibu. ⁹ Levítu dutya israelita pae cuanaja ebabaque jucuare, ecuita cuanara Yusuja ishu dutya tyaya cuanaque inatsaquique jucuareque tibu. Quisaratit tuque ecuana eadya’ tsujetyacuare dyatu Levíra Melquisedec peadya tunca cama tuja aniya tsehue Abraham eque. ¹⁰ Arepa Leví ejitaju ama jari juhua ama bucha, tuque ejitaju judadiyaquetu ebabaque Abrahamja ecuitajudyu juhua, Melquisedec peadya tunca cama tsujetyaquique tsujetyajaju.

¹¹ Pae cuanara ecuana cuejaya Yusura cuatsashaya eque ani ishuque. Tume Leví eque ejuracana cuanara ecuana eje bucha tyataqui ama bahua casa Yusuja biji eque cuita ani ishuque. Ataqui ni tuna baquena juhua, tume taa tu Yusura cuadishaquena ama juquena juhua peya ecuana Yusu queja bamerequique tuna cuarequi. Cristotu turadya cuadishahua. Aarón eque ejuracanaque amadyatu Cristo pae jucuare, tuque bucha ama, Melquisedec bucha. ¹² Moisésja cacuatsashati equetu Aarón eque ejuracana cuanaque cuita camadya pae jutajuytu jucuare. Iyacuatu Yusura iyahua peya tuja cuanaque tuja yacuaju bamere ishu. Cacuat-sashati beruque cuaretaqui juhua tibu, iyacia ecuana aniya Jesúsra cuatsashaya eque. ¹³ Ecuana Cuatsashaquique tuque ecuanaja iyacuaque ecuana Yusuja yacuaju bamere ishuque. Tuquetu Judá cuare eque ejuracanaque juhua, Leví eque ama. Moisésra cacuat-sashati beru huenehuare eque ni ejeque Judá eque ejuracanaquetu pae juhua ama. Ni ejeque buchique tuna Yusuja etareju mere juhua ama pae ejuta bucha.

¹⁵ Amenatu dyaque ejitajudyu Yusura iyacia eque cuarehuaque. Amenatu juhua peya pae juishuque, Melquisedec jucuare baeque. ¹⁶ Cacuat-sashatitu aniya, Leví eque ejuracana cuanaque cuita camadya pae jutajuytu. Jesús tu pae judadihua, ai cacuat-sashati jadya aniya tibu ama. Majutsutu tuque chacha netit-surancua, majunuca ishu ama. Tujatu aniya casa tuaqueja ecatyati cuanaque yudijidyu nityatsuranuca aishu. Jadya tibudyatu tuque pae judadihua.

¹⁷ Riyaquedyatu Yusura quisaratit ahua tuja ishu: “Miquemi pae maju baecuaque, Melquisedec jucuare baeque cuitadya”. ¹⁸ Cacuat-sashati eque anihua cuana-

jatu aijama casa juhua Yusura cuatsashaya eque cuita ani ishu. Tumeque cacuatsashatitu ecuita cuana Ijahua quejaque inajacamere ishuque ama juhua. Jutaquiui ecuana cacuatsashati beru eque ama amena anitaqui, iyacua eque. ¹⁹ Moisésra cuatsashahua eque anitsutu ni ejeque buchique cajuchatima jutaqui ama cabatihua ni riya piji buchique. Iyacuatu amena aniya inime iyacuaque. Iyacua tuque ecuana ecuanaja pae Jesús eque yuneri cuitadya ejipeu Yusu. ²⁰ Yusradyatu tuque camadya jadya ahua Jesús pae dyaque muidaque tere baecua ishuque. "Ique Yusu juya tibu, ayadya tuque era eje bucha aana ahuaque", jadyatu Yusu jucua. Ehuenedya tu Yusuja quisarati:

"Miquemi pae jujaca ishuque ama' jadyatu Yusu jucua.

Judadibuquetu eje bucha era aana ahuaque, ique Yusu juya tibu.

Cuarenime ama tuque ecue inime ni riya piji buchique", jadya tu ehue Jesús jadya ayaque.

Leví eque ejuracana cuanaque pae ameretsutu Yusura riyaque quisarati ahua ama ni riya piji buchique. ²² Jesússtu judadihua ecuana Yusuja yacuaju bamere ishuque. Turadya ecuana pana ejenemere aya Yusuja quisarati ahua eque dutya juajeyaque. Riyaque iyacuaque inime tu dyaque jida, beru jucuaque bucha ama. ²³ Jetiamatu pae cuana anihua, Aarón eque juracanahua cuanaque. Majuetibeya tibu tuna pae jusiritaqui ama juhua. ²⁴ Jesús bacue jadya ejuque, chacha anisiriya. Maju baecua tibutu tuque pae jujacanime ama. Sareya ama tujatu peyaja cuare ishuque. ²⁵ Jesús maju baecua aniya tibu tujatu ecana Ijahua quejaque inajacamereyadya dutya "Inajacamerecue ique, ique Jesús queja catyatihua tibu", jadya Yusu cuejaqui cuanaque. Tuquetu Yusuja yacuaju ecuanaja ishu bacabacaya, tuja ecuana tsahuajaca ishu ama.

²⁶ Jesúsdy tu pae dyaque muidaque, ecuanara sareyaque. Tuquetu Yusuja inime eque cuita jujacaya ama. Tujatu aijama jidamaque ni riya piji buchique. Tuquetu caasicatima ni riya piji buchique. Arepa juchaqui cuana ducu anihua ama buchatu ni riya piji buchique cajuchatihua ama. Tuquetu Yusuja yacuaju; ai aniyaque dyaque emui tuque. ²⁷ Riyaque yahua juque pae cuanajatu dutya huecaca uu cuana iye bahue juhua Yusuja yacuaju pahua ishu. Jadya tunajatu ahua tunaja jucha cuana cuita icuene nerecaba ishu, tuequedy peya cuanaja jucha cuana. Jesús bacue maju pidya camadya juhua ecuanaja jucha cuana tsujetya ishu. Tuque taa ni riya piji buchique juchaquique ama. Ecuana jiteque majuhua tibutu majunuca nime ama. ²⁸ Moisésra cacuatsashati cuejahua equetu juhua pae ecuita cuana tuyu cuanaque ama, jucha arida cuanaque. Jesús bacue tuyu neri anihua, juchama neri. Moisés eque cacuatsashati cueja, tsunuda junucatsu patu Yusu jucua:

"Ecue Ebacuatu pae dyaque muidaque jusiribuque.

Ique Yusu juya tibu, yuneridya tuque abuque era quisarati ahua eque.

Cuarenime ama tuque ecue", jadya patu Yusu jucua.

Jesús tu Yusuja yacuaju ecuana bamerequique

8 Icueneque quisarati dyaque jidaque ecuanara ahuaque tu Jesús tuque ecuanaja pae dyaque muidaque. Ecuana bamerequique juya tibutu tuque Yusu Dutya Casa Tsehueja yacuaju anibutehua eaniqui muidaju Etataque peque. ² Moisés anicuare patyatu pae cuanara Yusu merecuare ebiti etare ecuita cuanaja eaju jutidya. Jesús ecuanaja pae dyaque muidaque bacue mereya Yusuja eanicuare neriju cuita Yusuja eaju.

³ Pae dyaque muida cuanaja mere tu Yusu ai tyau. Ecuita cuanara beyaque tunajatu tyabahue juhua. Uu cuana eiyeja erami, ami jadya tunajatu tyabahue juhua. Ecuana pae dyaque muidajatu tumebaedy anitaqui juhua ai tyaishuque. ⁴ Tuque ni judiruquena ama juquena juhua Yusuja yacuaju, rehua riyaque yahua jaridya ni ejuneniuri jari, tume taa tu pae amadya juquena juhua. Rehua ri aniya Leví eque ejuracana cuanaque camadya Moisésra cacuatsashati eque ai cuana Yusu bamere ishu cuanaque. ⁵ Ecuita cuanaja Yusuja etare ahue patu Yusura cuitadya Moisés bamerecuare emata dyaque tuja eje bucha ae aishuque. Bamerecuare tujatu etare emeya emeya eaque cuitadya tume bae cuitadya tuja aishu. "Acue mique era bamerehua bae cuitadya", jadya tujatu acuare. Moisésra amerehuaque etare tu barepajuque Yusuja eaniqui nerija jetiedyaque; jadyatu pae cuana eje bucha juya cuanaque ecuanaja pae dyaque muidaja jetiedyaque tuna. Tuna eje bucha juetibehuaquetu Jesús eje bucha judadiyaque bamere ishuque juhua. ⁶ Jesús mere tyatanahuaque tu dyaque inime juque, Leví eque ejuracana cuanaque tyatanahua buchique ama. Tura ecuana Yusu teshue pana cajipetisha anucahua. Tura, Yusu, ecuita cuana jadya teshue inime bajejehuaquetu inime juque tunara ahua buchique ama; Yusura ecuana eje bucha aana ayaque tu dyaque inimeju, tura ecuanaja baba cuana eje bucha aana ahua bucha ama.

⁷ Beru Moisésra cuatsashahua eque ni ecuana Yusu queja judiruquena juhua, tumetu Jesucristo jequena ama juquena juhua peya inime bajeje ishu. ⁸ Yusu tu bahue jucua tuja cuanaque Moisés eque tura cuatsashahua eque cuita ama anibuqueque. Jadya tibudya tujatu ecana ahua tuja quisaratiju:

"Juetibuquetu huecaca iyacuaque inime eque Israel, Judá eque ejuracana cuanaque Yusu

⁹ Tunaja baba cuana jida iyuhue teshue Egipto juque huanashacuare bucha ama tuque inime bajejedadiya. Etataquera ebacuaque emetucuju inatsu edujuu bucha, jadya duje tuna ahua iyuhue teshue.

Jadya ama bucha tuna era cuatsashaya eque jujacahua.

Jadya tibudya tuna narujacahua.

¹⁰ Riyaque tu inime iyacuaque era adadinucayaque Israel eque ejuracana cuana tsehue, beru icueneque terehuaju.

Jadya micuana cuejaya Micuana Cuatsashaquira. Pana adeba tuna amerebuque era cuatsashayaque. Era cuitadya tunaja inimeju hueneya buchatu jubuque.

Tunaja inime taca eque era cuatsashaya eque juishuque tuna tyabuque.

Era cuitadya tunaja ducuta ecue inime eque anicaraque iyaya buchatu jubuque.

Ique Yusu juya tibu tuna narubuque.

'Riya cuanaque ri ecue cuanaque' jadya tuna abuque.

¹¹ Ni ejera buchiquetu bahuityabuque ama ni ejeque ique eje buchique.

'Pabahuita micuana Yusuja inime eque juishuque' jadya cuejataqui amatu jubuque ata cuana ni ecuana tsehue anae cuanaque.

Dutyatu era cuatsashaya eque anibuque, ebacua cuana, esiri cuanaque jadya.

¹² Tillabuque tunaja tuque jucha cuana.

Pana nime aputa ni adeba pidya tuque abuque tuna icuene jidama juhua cuanaque", jadya tu ehue Yusuja quisarati.

¹³ Tcueneque inime Yusura ahuaque tu ai beruque buchique, ecuetique. Adebanucataqui ama tuque. "Iy- acua inime eque neanicue, beru eque ama", jadya ecuana Yusura aya iyacua.

Riyaque yahuaju Yusu ejitaju amaja eaniqui, barepaju tuja eaniqui neri jadya

9 Yusura Moisés eque ecuanaja baba cuana cacuat- sashati cuejahuaaju, eje bucha mui eauque tujatu ecana amerecuare. Tumebaedya tujatu ecana amere- hua etare tuque mui ishunque cuita camadya.

² Amereya equedya tunajatu acuare ebiti etare. Etse- cue enubicuarejutu eraca tsehue epene jucuare. Etare- tu patya jaque ea jucuare. Pae cuana nubinati metse ishuhucuetu "Muida Cuitaque Ama" bacani ju- cuare. Tuhuadyatu ude nityaqui oro eaque jucuare. Tumebaedya anicuare mesa oro tsehue dyaque epepaque. Tumeque mesajutu anicuare pan cuana, Yusu tuja cuana ducu jadya adeba ishunque. ³ Educuju cuitaquetu "Dyaque Muidaque" bacani jucuare.

Tumeque etare jaque ishuhucuetu eraca erihua epenequi jucuare. ⁴ "Dyaque Muidaque" bacanijutu an- icuare mesa oro eaque muru ijimedaque pahua ishunque. Tumebaedyatu anicuare caju "Quisarati Eiyaque Yusu Cabamereti Ishuque" bacani. Tumeque caju taura eaquetu jucuare, pana pepa oro tsehue eaque. Caju ducutu anicuare jarra caca piji oro eaque maná cuesi quiniquique. Maná tsehuetu Yusura ecua- naja baba cuana mihuahua tsecada eje uma piji ani- taya cuanaju juneniyaju. Tumebaedyatu caju ducu an- icuare Aarónja sari catsucahuiticuareque. Tumebaedy- atu anicuare beta taura bejedaque Yusuja cacuat- sashati ehue jucuareque. ⁵ Caju etumuqui dyaquetu neticuare beta barepajuque cueya cueya ecatsé,

querubín bacani ecatsé. Tuhuadyatu Yusu cabamereti bahue jucuare. Pae dyaque muidajatu sequi bahue ju- cuare etumuqui uu eie cuanaja ami tsehue, jucha cuana nrecaba ishuhucuetu. Querubín ecatsé etumuqui dyaque neticuare etumuqui apu ishuhucuetu. Iyacuari aijama emajaca dyaque jida cuita riya cuanaque cueja ishuhucuetu.

⁶ Dutya ecabajejetiquetu pae cuana tunaja bahue Muida Cuitaque Amaju nubi bahue jucuare cacuat- sashati eque juishuhucuetu. Dutya huecaca tuna tuhua nubi bahue jucuare Yusu mere ishuhucuetu. ⁷ Educuju cuita Dyaque Muidaju bacue pae dyaque muidaque camadya nubi bahue junenicuare. Marajutu peadya camadya nubi pidya jubahue jucuare. Uu eieque ami tsehuetu nubi bahue jucuare. Caju tumuquique tujatu ami tsehue se- qui bahue jucuare. "Nrecabacue ecue jucha cuana, peya cuanaja jucha jadya. Cajuchaticaraque ama ecua- na cajuchatihua", jadya tujatu Yusu abahue jucuare, ami sequi yaque. ⁸ Dutya riya cuanaque inime tupuqui aatsu ecuana Yusuja Espiritura huecashaya. Beruque inime aniya jariju dutyadya tuna eje bucha nubitaqui ama juhua Yusu queja; pae cuana cuita camadya Yusu- ja yacuaju nubi bahue juhua. ⁹ Iyacua ecuana Yusu queja nubitaqui ecuanaja jucha cuana tsehue ama. Cacuat-sashati eque anicuare cuanaque bacue ecana ecajuchati tunaja juchaju cabatijacacuare ama, arepa Yusu tyaisuhucuetu uu cuana iye pahua jadya acuare ama bucha. ¹⁰ Cacuat-sashati equetu umae ara ishuhucuetu cuanaque arataquima jucuare, tumebaedya umae iji ishuhucuetu cuanaque. Cutsati bahue tuna juhua tunaja bahue cuana eque. Tumebaedya tunajatu utsa bahue juhua tunaja ai cuana Yusuja yacuaju juchama bucha cabamereti ishuhucuetu datse. Jadya ama bucha, jadya cuana cutsatie juyaque, tunaja ecuita cuita camadya tuna asi- cadaque cutsatinicuare. Cacuaretishahua ama tuna in- ime jadyara. Jadya tuna jucuare, Yusura peadya eque cuita camadya jucha cuana apupashayaque ejitaju aya tupu.

¹¹ Junacuareadyatu amena Cristo. Tudy a tuque ecua- naja pae dyaque muidaque ecuana Yusuja yacuaju bamerequique, iyacua inime equetu jidadya amena Yusura jadya catibutishahua. Iyacua tura Yusuja yacua- ju ayaque tu dyaque jida, Leví eque ejuracana cuanara ebiti etareju acuare bucha ama. Turatu aya Yusura eje bucha bijida baya eque cuita. Yusuja eaniqui neri Jesús aniquiquetu ecuita cuanara ama ahua; riyaque yahua juque ama tume. ¹² Cristotu nubihua tuhua siri ishuhucuetu Yusuja yacuaju. Tuhua nubidiruyaque tujatu chivo ami ama nubiquerediruhua; huaca eieja ami ama tujatu dujuhua ecuanaja jucha cuana tsujetya ishuhucuetu. Tuquetu curusuju majuhua etsujetyaqui ami quijehueta ishuhucuetu. (Majutsutu Yusuja yacuaju neri nubihua, pae dyaque muidaque icuene Dyaque Muidaju nubicuare bucha.) Jadya tsujetyae tujatu ahua ecuana tuaqueja ecatyati cuanaque Ijahua quejaque einajaca neri juishuhucuetu, tuque ecuana jiteque ami quijehuetihua tibu. ¹³ Beruque in- ime equetu pae cuanara chivo, huaca ami cuana tse- hue sequi bahue jucuare ecajuchati cuanaque. Huaca rami cuana pahuatsu tunajatu ena tsehue dusha

bahue jucuare muru. Jadya edusha tsehue tunajatu sequi bahue jucuare cacuatsashati eque tunara asicada bayaque. Sequihuajutu ecuita cuanaja ecuita asicadama jucuare cacuatsashati eque. ¹⁴ Uu cuanaja ami tsehue ecuita cuanaja ecuitadya jutidya dyaque eque tillahua tibu, Yuneru cuita di taa tu Cristo curusuju ami quijehuetihua eque ecuanaja jucha cuana apupashatanaya! Arepa Cristo anisiri ishuque ama bucha, tuquetu tuja inime taca eque catyatihua Yusu queja ecuanaja jucha cuana jiteque maju ishu, ecajuchatique ama. Tuquetu ami quijehuetihua curusuju majutsu. Tume tuque ecuanaja educujuque inime tillatanahua, Yusu Chachaque mere ishu. Bahuedya ecuaana ecuaana eje bucha juya eque chacha jutaquique ama.

¹⁵ Jesús tu Yusu, ecuita jadya tsehue inime bajejequique, iyacuaque inime eque amere ishu. Tuque majuhua tibutu icuene inime eque anihua cuanaque cajuchatihua cuanaque etillatanaudya. Tuque majuhua tibutu Yusuja eihuara cuanaja ejuudya jidaque tura tyaana ahuaque, jidaque tere baecuaque. ¹⁶ Ejeque ni juya: "Ique majuhua, ecue ai aniya cuanaquetu jubuque era 'Tujatu juya' jadya ayaja camadya", emechiqui majuhuaaju camadya tujatu judadibuque. Tuque majuhuaaju piisidyatu tura quisarati ahuaque judadiya. Emechiqui chacha jarijutu ejeque tyaana eaja juya amadya ni ai buchique. ¹⁸ Tumebaedyatu icueneque inime catibutihua uu iyehua cuanaque ami ijehumeretsu cuita camadya. ¹⁹ Icuene cuitatu Moisésra casitatishahua dutya ecuita. Casitatishatsu tujatu eana cuejahua Yusura dutya cuatsashahua cuanaque. Iyemerehuatu chivo cuana, huaca jabacua ehue ebari cuana jadya. Amitu ena tsehue dushamerecuare. Inacuare tujatu yaa piji esapucaca hisopo bacani. Rajutsu tujatu eduqui pude tsehue huayucuaque. Huayutsu tujatu mullacuare ami ena tsehue edushaju. Mullatsu tujatu sequicuare ami cacuatsashati cuana ehueque quirica dyaque. Tumebaedyatu sequicuare ecuita ecasitati cuanaque tuja bahue eque. ²⁰ Jadya aatsu tujatu eana acuare: "Riyaque ami tsehue sequiri, 'Yusura micuana tsehue inime bajejehuaquetu yuneriquedy' jadique, jadya tujatu eana acuare. ²¹ Tumebae nucadyatu Moisésra sequicuare ebiti etare eaque pae cuana Yusu mere juyajuque, tumebaedya tunara tuhua dutya ai tsumecuare cuanaque. ²² Cacuatashati equetu ami tsehue dutya jujeri jidamaque tillatanataqui. Ami quijehuetimaque majuratu jucha cuana apupashaya ama.

Ecuanaja jucha cuanatu eapupasha Cristo ecuaana jucha seca ishu majuhua tibu

²³ Jutaquijudyatu "Dyaque Muidaque" etare uu, ami cuana tsehue pana sequitilla ataqui jucuare. Tumebaedya dutya ai tuhua etare ducu aniya cuanaque tsumema jarijudya sequitillataqui jucuare. Riyaque etare tu barepaju Yusu aniquique buchique cuitadya. Ecuanaja jidamaque tillatsu, Yusuja yacuaju ecuaana nubitaqui juishutu Jesús catyatitaqui jucuare dyaque jida uu cuana ami bucha ama. ²⁴ Tuquetu nubihua Yusu-

ja eaniqui ecuita cuanaja eaju ama. Nubihuatu barepaju Yusuja eaniqui neriju. Tuhuadya tu tuque Yusuja yacuaju, ecuanaja ishu Etataque tsehue quisarati ishu. ²⁵ Eje uma bameretu israelita pae dyaque muidaja ataqui juhua uu eiye cuanaja ami; nubi pidyatu maraju juhua Yusu tsehue catsuruti ishu. Cristo bacue maju pidya camadya juhua, ami quijehuetihua, ecuanaja jucha cuana tsuje tyaishu. ²⁶ Eje uma catyatie juishuque ni juquena jucuare, tume taa tu eje uma maju juquena juhua yahua iyatanahua equeque. Eje uma emajuuquetu tuque maju pidya camadya juhua, ni eje tupu majunuca ishu ama. Yusura huecaca iyahuajudyatu Cristo tuta taca catyati juhua jucha cuana tsujetyaqui maju pidya ishu. ²⁷ Maju pidya cuita camadya ecuaana juya. Tuequedya ecuaana Yusura cuejabuque eje bucha judadiyaque ecuaana riyaque yahuaaju eje bucha juhua eque. ²⁸ Tumebaedyatu Cristo maju pidya camadya juhua ecuanaja jetiamaque jucha cuana tsujetyaqui. Juna beta ishutu junabuque. Juna beta ishu junanucatsutu jucha cuana tillara ama junabuque. Tuque ihua juya cuanaque Yusu queja judirusharatu junabuque.

10 Moisésja cacuatsashati eque anicuare cuanaratu emajacaju emajacaju camadya yunerique adebacuare. Riya piji camadya tunajatu adebacuare Yusura tuja cuanaque jidaque tyadadibuqueque. Cacuatashati equetu adebataqui jucuare ai dyaque jidaque junabuqueque. Dutya maratu cacuatsashati eque aniya cuanaque uu cuana quiyetinicuaque, Yusuja tunaja uu ami baatsu jucha cuana nrecaba ishu. Jadya ama buchatu Yusu pureamara jeya cuanaque Yusura amerecara aya eque cuita jutaqui ama cabaticuare. Juchaquique eana eje bucha nime apupashatanahua juhua, tume tuna juchaqui cabaticuena ama juhua. Pana tillatana ni eana ea juquena juhua, iyejacaquena tuna juquena juhua uu cuana tunaja jucha seca ishu. ³ Eiyecacuque, tuna dutya mara uu cuana iye ishu cabetiyaque, dyaquedya eana caadebatiajehua tuna jucha aridaque. ⁴ Eje bucha secae ni tu chivo, huaca jabacua cuanaja amira ama jucha cuana. ⁵ Jadya tibudyatu riyaque yahuaaju jeyaque Cristora Yusu jadya acuare:

"Pureamaturaya amami chivo, huaca jabacua jucha tsujetyaqui iyeya cuanara, ni peya ai buchara ecuita cuanara tyaya cuanara.

Jutaquijudyata mira cacuitatishahua ique miaqueja catyatitaqui juishu.

⁶ Tunara micue etareju uu rami cuana pahuayaju, tunara uu ami cuana bamereyaju, micue jucha cuana nrecaba ishu, micue biji amadya tuque.

⁷ Jadya tibudyata ique junahua yahuaaju micue biji eque juishu, Yusu, micue quisarati ehue bucha eque ique judadi ishu", jadyatu Jesúsra Yusu acuare.

⁸ Riya era huenehuarari cuejaya; Yusuajatu bijidama ecuita cuanara acara ayaque tunara tsujetyatsu jucha cuana apupashacara ayaque, tunara tuja ishu dujuya

cuanaque, uu eiye cuanaja ami cuana, erami epahua cuanaque jadya. Pureamaturaya ama tunaja tuque, arepa cacuatsashati jadya huenetanahua ama bucha. ⁹ Tumbaedy a “Riya ique jeya micue biji eque juishu, Tata”, jadyatu Jesúsra Yusu acuare. Riyara ecuana cuejaya. Iyacia ecuana Yusura tuja inime eque anishacara aya, Jesús amerehua bucha; tura ecuana cacuatsashati siri eque anishacarama aya ecuanaja baba cuana juhua bucha. Yusuratu secahua icueneque inime, iyacuaque iyanuca ishú, ¹⁰ Jesucristo Yusuja inime eque juhua tibu. Maju pidya camadyatu juhua, ni eje tupu majunuca ishú ama. Jadya tibudya tuque ecuanaja jucha cuana pana tillatana juhua.

¹¹ Dutya huecacatu israelita pae cuana neti bahue juya Yusu mere juyaque. Pahuaajeyadya jutidya tuna uu rami cuana. Jadya ama buchatu Yusura jucha cuana eje bucha apupashataquima baya tuna juya cuana eque. ¹² Jesús bacue maju pidya camadya juhua, ni eje tupu maju nuca ishú ama. Jadya juatsutu tuque Yusu queja tsurahua. Tsuratsutu anidiruhua tuja yacuaju tuatsehue enaruqui juishu. ¹³ Tuhadyatu tuque ihuaihuaya, tuque ujeu baqui cuanaja casa pana secatana juya tupu. ¹⁴ Maju pidya camadyatu tuque juhua ecuanaja jucha cuana tilla ishú. Maju pidya juatsu tujatu jucha metse ama amerehua Yusura amerecara aya bucha ameretahua cuanaque. ¹⁵ Yusuja Espiritura ecuana tumbaedy yunerineyadya ecuanaja jucha cuana apupashatanahuaque Jesús majuhua eque, Yusuja quisaratiju jadya ehue tibu:

¹⁶ “Riyaque tu inime iyacuaque era ecue cuana tsehue adadinucayaque.

Tunaja inime taca eque era cuatsashaya eque anicaraque tunaja tuque inimeju iyaya.

Era cuitadyatu jadya iyaya riyaque tuna ducuta jadya anicaraque.

Jida tuna adebamereya era amereyaque.

Era tunaja inimeju ehue neu buchatu jubuque”, jadya patu Yusu jucuare.

¹⁷ Jadya juatsutu juya:

“Ni eje tupu tuque tunaja jucha cuana adebanucaya ama, ni tuna jidama juhua cuanaque.

Pana etillatana tunajatu jubuque”.

¹⁸ Ecuanaja jucha cuana apupashatanahua tibusu iyenucatauqui amadya uu cuana jucha cuana tsujetyaqui. Jesús majuhua jutu tupudya juhua tsujetyatilla ishú.

Bajida tsehue ama Yusu tsehue cuitadya quisaratitaquique

¹⁹ Riyaque micuana cuejaya, ecue eatsehuequi cuanaque. Aniya tuque ecuanaja aija eje bucha aquima Yusu tsehue quisarati ishúque, ecuanaja jucha cuana Jesúsja ami tsehue apupashatanahua tibu. Pae dyaque muidaque Dyaque Muidaju Yusu tsehue catsuruti ishú nubihua bucha, jadidya ecuana iyacia Yusu tsehue cuitadya quisaratitaquique. ²⁰ Icuenuca eraca epenequira nubitaquima amerehua ecuana Dyaque Muidaju nubi ishú. Pae dyaque muidaque cuita camadyatu tuhua

nubitaquique juhua. Iyacia bacue ecuana Yusu tsehue cuitadya quisaratitaquique. Jesús ecuana jiteque maju ishú catyatihua tibu, ni aira buchique ecuana quisaratitaquima amereya ama. Tura iyacuaque nubi ishúque pacashahuaque tu eje tupu teritananuca ishúque ama. ²¹ Jesús tu Yusuja yacuaju ecuana tachiquique; ecuanaja pae dyaque muidaque tume. Naru, cuatsasha jadya tujatu aya Yusuja cuanaque. ²² Jadya tibudya ecuana Yusu tsehue cuitadya quisaratitaquique muida tsehue. Ejene neri cuitadya tuque ecuana aya tura eje bucha aana ayaque adadiyaque. Pana ejenedya tuque ecuanaja aya Yusura ecuana jucha metse ama bayaque, dutya ecuanaja jucha cuana apupashatanahuaque. Ecuanaja ecuitatu ena pajada tsehue utsatanahua inime ecuana cacuaretihua jadique. Jadya tibudya bajida tsehue ama tuque ecuanaja isarataquique. ²³ “Ejene neridya tuque ecuana aya Yusu queja ecuana judirubueque ni eje tupu jaca ishú ama”, jadya ecuana cacuejatihua. Jadya tibudya jadya neejeneajera, ejenecarama tsehue ama. Yuneridya ecuana Yusura tuaqueja judirushabuque, tura aana ahua baedy. ²⁴ Inime tupuqui tuque ecuanaja ataqui eje bucha tsahuae ecuana peya cuana eauque Yusuja biji eque ecani ishú. Catsahuatitaquique ecuana peya cuana tsehue dyaque iyuhue ani ishú. Yurameta catsahuati ecuana jutaqui peya cuanaja jida ishú. ²⁵ Umae tuna canimehuallatihua Jesús queja ecatyati cuanaque casitaiyaju casitati ishú ama. Ecuana ecuana tuna bae jutaqui ama; necasitatijacara ama tuque pureamatura ishú. Yurameta cacasaturatijadya jutidya nejura peya cuana tsehue, Ecuana Cuatsashaquique junanuca ishú tsunutaya ama tibu.

²⁶ Ejeque ni quisarati yunerique amena adebaya ama bucha cajuchaticaraquedy jutidya, cajuchatiajeya, tumeratu Yusu queja judiru ishúque bijidamaduraya. Cristora peadya camadya ecuana jucha cuana esecau. Cristo ni tu bijidamadurahua, aijamatu peya tuque jiteque emajuuque. ²⁷ Jesús jadya bijidamaduraje juya cuanaque tuna bajida jutaqui eje bucha judadiya tsehue. Yusutu dyáque ecahuaiti jubuque tuna tsehue. Ijahua etiquiju tujatu ecanu nudyabuque, tura cuatsashaya eque ama juya cuanaque. ²⁸ Berutu jucuare; ejeque ni Moisésra cuatsashaya eque ama juya iyetana bahue tuna jucuare. Betara jadya ama juatsu quimishara ni baya jidama juyaju cueja bahue tunajatu huaraji cuana jucuare. Jadya juyaque tunajatu nerecabama iye abahue jucuare. ²⁹ Jadya canerecatietu juhua Moisésja cacuatsashati bijidamaduraju juhua cuanaque; Dyáque di taa tu judadibuque Yusuja Ebacuaque bijidamaduraju juya cuanaque! “Ecue Ebacuatatu curusuju majuhua ami quijehuetitsu jucha cuana tsujetya, apupasha jadya aishu”, jadya patu Yusura quisarati acuare. Jadya ama bucha tuna “Ni aishu buchique tu jida ama Jesús curusuju ami quijehuetitsu majuhuaque”, jadya tuna juya. Icuenuca Yusu tuja Espiritu eque tuna tsehue juhua, tuja jidaque cabamereti. Jadya ama bucha tunajatu tumeque Espiritu ijillahuanaya. Tume cuanaque tuna dyáque

nerecada jubuque. ³⁰ Bahuedya ecuana Yusura quisarati acuareque: "Ique dutya canerecatishaquique. Era micuana tsujetyabuque micuana jidama juhua eque", jadyatu jucuare. Tumebaedya tujatu quisarati acuare: "Ecue cuanaque ni ecana era amereya eque ama juya, nerecaturanucabuque tuna era. Era amereya eque ni ecana juya, tuna nerecaturaqui cuanaque tuna nerecaturabuque". ³¹ Cuatsashaya eque anicarama juya cuanaque tuna Yusu Maju Baecuara dyaque nerecaturayaju, dyaque bajida jubuque.

³² Neadebajacaume icuene micuanara yunerique ejenemetse aatsu micuana dyaque jida cabatihuaque. Arepa micuana Jesús queja catyatima cuanara jidama ahua ama bucha, canimehuallatihuama micuana. Cacasatihua jutidya micuana tura cuatsashaya eque juaje ishuh. ³³ Eje buchaju micuana ijillahuanatahua, jidama atahua dutyaya yatucaju. Jadya ama bucha micuana tuaqueja nimee jujacahua ama. Peya huecacaatu micuanaja cuitadya peta bahue juhua Jesús queja nimee cuanaque nerecaturatayaju. Petatsu tuque micuanaja inime juhua, micuana cuitadya tuna tsehue nerecaturatanapee juya bucha. ³⁴ Bati bahue micuanaja juhua Jesús queja nimee cuanaque etare apuda duc eisha cuanaque tuna tsahua ishuh. Jesúsja ama cuanara micuanaja ai aniyaque chiriyaju, tuque micuana adebahua ni aija buchique micuanaja barepaju aniyaque tere baecuaque secataquimaque. Jadya tibudya tuque micuana iduhua dutya pureama jujacatu ama. ³⁵ Jesús queja nimee nejujacaume. Yusura micuana tyabuque jidaque tilla tupu ama micuana Jesús queja nimee jujacahua ama tibu. ³⁶ Neiduajecuedya jutidya canerecatiyaque canimehuallatima Yusuja biji eque juishu. Tuja biji eque anitsu tuque micuana babuque tura jidaque tyaana ahuaque.

³⁷ Neadebacue Yusuja quisarati ehuenecue:

"Masadamatu junanucabuque junataquique. Tsunutaya ama tuque.

³⁸ Era jida tuyu baya cuanaque tuna eatsehue anisiribuque.

Jadya ama bucha tuna ni eaqueja nimee jujacaya, ecue quisarati baca baecua aniya cuanaque bucha anie juishu, era tuna nerecaturadadiya", jadya patu Yusura quisarati acuare.

³⁹ Amena ecuana bacue Jesús queja nimee jujacaya ama. Bajida cuanaque bucha ama ecuana ai muda baatsu yudijidya diru jadya ama. Ijahuaaja etiquiju ecuana judirubuque ama. Jesús queja nimeedya jutidya ecuana juajeya. Yusu queja ecuana judirubuque.

Beru Yusu queja ecatyati jucuare cuanaque eje bucha jucuareque

11 Jesús queja catyatitsu tuque ecuana pana ejenedya aya tura ecuana tyaana ahuaque tyadadiyaque. Tuaqueja nimee juatsu tuque ecuana inime juya: "Arepa iyacua ejitaju ama ama bucha Yusura tyaana ahuaque, pana ejenedya tuque aya Yusura tyadadibuqueque". ² Yusu tu pureama jucuare ecuana-

ja baba cuana tsehue tura aana ahuaque yuneridya adadibuqueque ejenedya baatsu.

³ Yusu ejenedya tibu tuque ecuana yuneridya ejenedya tura iyahuaquedya dutya aniyaque. Arepa ai aijama juhua ama buchatu tura cuatsashayaju ejitaju juhua ejitajuque ama.

⁴ Abelratu pana ejenedya ahua Yusura tura aana ahuaque adadiyaque. Jadya tibudyatu Yusura bahua tura tyahuaque dyaque jida, Caínra tyahuaque bucha ama. "Mique mique tuyu baya, mique eaqueja catyatihuama tibu. Mira ique tyahuaque tu dyaque jidaque", jadya patu Yusura Abel acuare. Jadya eque, arepa Abel majuhua ama bucha, bahuedya ecuana Yusura tuaqueja ecatyati cuanaque tuaqueja judirushayaque.

⁵ Enocratu pana ejenedya ahua Yusura tura aana ahuaque adadiyaque. Ehuenecue tu Yusuja quisarati Enocra Yusu dyaque pureamaturacuareque. Jadya tibudyatu Yusura muya jutidya riyaque yahua juque barepaju iyasicuacuare majumaque. Banucacuare amatu ni ejera, Yusura barepaju dujucuare tibu. ⁶ Pana ejene ama ni ecuana aya Yusura aana ahuaque ayaque, eje bucha pureamaturae ni tuque ecuana Yusu ama. Yusu tsehue ni ecuana quisaraticara juya, ejenetaqui tuque ecuanaja tuque aniyaque. Tumebaedya tuque ecuana ejenetaqui tura tuja cuanaque naruyaque.

⁷ Noeratu pana ejenedya ahua Yusura quisarati iyahua equedya judadiyaque. "Ena eque tuque tillabuque riyaque yahua aniya cuanaque. Acue cuaba aridaque mique micue etareju cuanaque jadya ani ishuh", jadya patujatu acuare. Ejeneccarama ama tsehuetu tura cuatsashaya eque jucuare, arepa tuja neibama jucuare ama bucha. Acuairetu cuaba ebari; tuequedya tuna chacha jucuare tuque, tuja etareju cuanaque jadya. Yusu ejeneccarama juhua cuanaque tuna tillatanacuare. Tuhudyatu ejitaju juhua Noéra yunerique ejenehuque, peya cuanara ejenehuque ama. Tuaqueja catyatihuajutu Yusura Noé inajacamerehua.

⁸ Abrahamratu pana ejenedya ahua Yusura quisarati iyahua equedya judadiyaque. "Cuinanacue micue epu juque. Dirucue yahua era mique, mique eque juracanaya cuanaque jadya tyaana ayaju", jadya patu Yusura acuare. Jadya ihuarae ahuajutu Abraham yana equedya jucuare. Cuinanacuaretu tuja epu juque, eju diruyaque baecuque. ⁹ Yusura yahua tyaana ahuaju judirutsutu anidirucua tarepe juneniya bucha. Aijama tujatu etare neri jucuare. Etare caca peya queja iyasicua iyasicua ataquiju jutidyatu anianinicua. Tuja ebacuque Isaac, tuja yutsecuaque Jacob jadya tatse tyatana anadya juhua tumeque yahua. Arepa tatse tuhua anicuare ama bucha tatse ama tatse emechiqui jucuare. ¹⁰ Abrahamtu canimehuallatihuama, Yusu queja ani ishuh neri aniyaque adebatsu. Bahuedyatutu Yusuja eaju ebajejeju judiruyaque jucuare, eaniqui tere baecuaju.

¹¹ Sararatu tumebaedya pana ejene acuare Yusura eje bucha aana ahuaque adadiyaque. Saratu esiri juhua carecani isaqui judadi ishuh. Jadya ama bucha tu-

jatu ejenehua bacuaqui judadiyaque, Yusura jadyami judadiya jadya ahua. Ejenehua tibusu carecani isaquidya judadihua. ¹² Jadya equetu Abrahamja anihua piyebatilla tupu ama tuque eque juracanahua cuanaque. Arepa tuque cabacuati ishuhua ama buchatu tuque eque ejuracana cuanaque dyaque jetiama juhua purari cuana bucha, mejiji tsucaca cuana bucha jadya.

¹³ Riya cuanaque tuna majuhua Yusu queja nimee jucacamaque —Abraham, Isaac, Jacob jadya. Yusura patuna acuare: “Riyaque yahuari micue jubuque”. Jadya ama buchatu tunajaque amadya jucuaque. “Ecuana naja utsecua cuana jatu jubuque”, jadya tunajatu inime jucuaque. Jadya tibu tuna canimehuallaticuaque ama. “Tarepe juyaque ecua. Peya yahuaju diruyaque cuetiyaque ecua”, jadya tuna jucuaque. ¹⁴ Jadya inime tupuqui aatsu tunajatu Yusu queja eaniqui neriju inime jucuaque Canaánju ama. ¹⁵ Tunaratu bijiserihua ama tuna diruhuaque epuju judirunuca ishuhua. Tuna dirunucaraque juatsu tuna masadamadya judirunucaraque juhua. ¹⁶ Dyaque jida tuna Yusu quejadya judirucara ebari juhua. Jadya tibudya tuna Yusura bisu bahua ama. Tuna, “Miaqueja ecatyati ecua”, jadya juyaju, bisuhua amatu tuque tuna, “Ecuique micuana”, jadya aishu. Tuja patu amena eba-jedya juhua emajaca tunaja ishuhua tuque peque.

¹⁷ Abrahamratu Yusu ni riya piji buchique ejenejacahua ama. “Abraham, Sara tsehue tuque metseja ebacua anibuque. Metse eque juracanayaque tu tuque; tuque eque cuita camadya juracanaya cuanaque tuna ejuracanaque neri babuque”, jadya patu Yusura quisarati acuare. Jadya ama bucha Isaac ehue ebarijutu acuare: “Iyetsu micue bacua; ecue yacuaju pahuacue”, jadya patu Yusura Abraham acuare, yuneridya tuque tuaqueja nimee juyaque nime adeba ishuhua. Abrahamja ebacuaque iyehueju cuitatu Yusura, “Iyeume”, jadya acuare. ¹⁹ Abrahamjatu inime juhua; “Isaac majuyaque juatsutu Yusura nityatsuranucaya” jadya. Jadya equetu tuja etareju chacha dujunucayaque juhua, emajuque enityatsuranucaque judiruerereya bucha.

²⁰ Isaacratu pana ejenedya ahua Yusura tura aana ahuaque adadiyaque. Jadya tibudya tujatu, “Yusura narucue dyaque jida tsehue”, jadya acuare ebacuaque Jacob, arepa tuque tupujuque ama bucha. Tuequedya tujatu ebacuaque icueneque Esaú acuare: “Yusura jida tsehue narucue” jadya.

²¹ Jacobratu pana ejenedya ahua Yusura aana ahuaque adadiyaque. Jadya tibudya tujatu majuyaque ahua: “Yusura jida nenarucue”, jadya tujatu yutsecuaque ecatsa acuare, Joséja ebacuaque ecatsa. Majuyara tujatu Yusu muihua, tuja sariju quidutitsu.

²² Joseratu pana ejenedya ahua Yusura aana ahuaque adadiyaque. Tuque amena majuhue tujatu israelita cuana acuare: “Israel eque ejuracana cuanaquetu ejeque huecaca Egipto juque cuinanabuque. Rehuaque cuinanayaque ecue etsau cuana nedujucue

yahua ecua na tyatanayaju papadiru ishuhua”, jadya patu jucuaque.

²³ Moisésja etataque ecuaque ecatsaeratu pana ejenedya ahua Yusura aana ahuaque adadiyaque. Egipto juque ecuari aridaratu israelita cuana cuatsashacuare: “Deca nana cuinanaya baatsu israelita jabacua cuana yume iyetsadya neacue” jadya. Moisés cuinanahuajutu Moisésja etataque ecuaque ecatsaeratu mubacuare ama ecuari. Tura amereya eque ama tatse jucuaque. Quimisha badi tatsejatu ebacuaque tehuacuare eyetanaju. Yusu pureamaturadadiquique adebaya tibu tatsejatu tehuacuare.

²⁴ Moisesratu tumebaedya pana ejenedya ahua Yusura aana ahuaque adadiyaque. Amena ecuita juatsutu tuja ata israelita cuana tsehue cuitadya junenicara juhua, arepa ecuarija ebacujunaquera temushahua ama bucha. “Egipto juque ecuarija ebacujunaqueja ebacuaque riya”, jadyatu atacarama juhua. ²⁵ Tujatu inime juhua: “Egipcio cuana tsehue ni eaniu, ejetsunue ama tuna tsehue pureama jupee ejuu Yusuja biji eque ama aniyaque. Dyaque jida Yusuja cuana tsehuedya pajuneni, arepa tuna tsehue nerecada jupee pajuneni ama bucha”. ²⁶ Tujatu educuju inime juhua: “Ique taa jida ejuu dutya chipiru cuana Egipto juque metseque juatsu. Jadya ama bucha dyaque jida, pureama judadiya, Yusura amereya eque juyaque juatsu, arepa Yusuja emepe cuana tsehue nerecada jutaqui ama bucha”. Tuquetu bahuedya jucuaque Yusura tuque dyaque jidaque tyadadibuqueque cuatsashaya eque juyaque juatsu. Dyaque tujatu inime tupuqui ahua jidaque ihuayaque, tumeque ura caneracatiyaque ama.

²⁷ Pana ejenedya Yusura eje bucha aana ahuaque adadiya tibusu Moisés Egipto juque cuinanahua. Arepa ecuari dyaque aridaque dyaque ecahuaiti tuatsehue juhua ama buchatu bajida tsehue ama cuinanahua. Arepa masada inime jidama anihua ama buchatu yudijidya dirunuca juhua ama, Yusu Ejitajuque Ama tuatsehueque adebaya tibu. ²⁸ Tura Egipto juque cuinanama jarira, Yusu ejenehua tibu, tujatu chine ametse ahua Pascua bacani. “Yusuratu cuadishaya barepaju Yusu tsahuaquique bametseque ebacua cuana dutya etare juque iye ishuhua, ami tsehue eteriqui pepama juque. Jadya tibudya neiyera uhuisha. Tuja ami tsehue nepepara etareja eteriqui, ni ejeque buchique israelita maju ishuhua ama”, jadya tujatu cuejacuaque tuja ata cuana.

²⁹ Israelita cuana Moisésra dujuya cuanaratu pana ejenedya acuare Yusura aana ahuaque adadiyaque. Egipto juque cuinanatsu, Bei Pudedaju tuna judiruhua-jutu Yusura ena jaquecuare. Jaquehuaju tuna yahua urada eque carequeticuare. Egiptuju cuanaque israelita cuana tupujudya carequetiyajutu ena tumutanacuare. Tumutanahuaju tuna dutya majuterecuare.

³⁰ Josuéra dujuya patyatu israelita cuana tumebaedya Yusura aana ahuaque adadiyaque pana ejeneacuare. Jericó epu ebariju cuita tuna jutitaqui ama cabaticuaque, etachiquique baruda misida jadya tibu.

Pacarucu tibarilla tunajatu huecacaju cama acuare. Pacarucu huecaca tunajatu tibarillati tibarillati acuare. Tuna jadya juyajutu Yusura epu tachiquique ri-huishatillacuare. ³¹ Rahab decadeca arida paju ama bucha, tujatu pana ejene ahua Yusura aana ahuaque adadiyaque. Israelita cuana Jericóju judiruma jariratu Josuéra cuadishacuare beta epu ebari petati ishu. Tumeque epunara tatse tsahuacuare. Yusu queja catyatihua tibusu tuque majucuare ama. Umae cuejahua-nataquima cuanaque israelita cuanara iyeyajutu tumeque epuna majucuare ama.

³² Tumebaedyatu aniya peya cuana Yusura umada eje bucha aana ahuaque adadiyaque pana ejene juhua cuanaque. Aijamatu emajaca micuana dutya cuita adebatillamere ishuque. Adebayadya tuque micuana, Gedeón, Barac, Sansón, Jafté Yusu queja nimee juatsu eje bucha jucuare cuanaque. Tumebaedyatu tuque micuana adebaya David, Samuel, peya cuana Yusu equeque quisarati cuejaqui jucuare cuanaque Yusu ejenetsu eje bucha jucuare cuanaque. ³³ Dyaque tuna ejenehua Yusura eje bucha aana ahuaque adadiyaque. Catitsu tuna tuna tsehue cahuaitya cuanaque ijahue acuare. Eje buchadya dyaque jida narue acara tunajatu tunaja epuju cuanaque acuare. Tunaratu bahua Yusura tuna tyaana ahuaque. Cuanubi cuana dyaque mureda cuana tsehue catsurutiya cuanaju tuna Yusura tachihua tume cuanaque cuatsa tumutsu tunara ecana earaju. ³⁴ Yusuratu ticuahua etiqui juju, tuna emajuju. Peya cuanara cuchiru ebari tsehue iyecara ayaju tuna huana bahue juhua. Casadama cabatijaju tuna Yusura casaturahua. Catitsu tunajatu ecana jetiama iye bahue juhua. Huanasha bahue tunaja juhua peya yahuaju cuanaque, tuna tsehue catira jehua cuanaque. ³⁵ Tunaja etata cuanaque Yusu queja nimee juhua tibu uma tunaja ebacua cuanaque tuna majutsu chacha aninucacuare.

Peya cuana bacue dyaque canerecatishatatsu majucuare. Canerecatishayaque tunajatu ecana acuare: "Micuana Yusu queja nimee jujacayaju camadya micuana ecuanara inajacaya", jadya tunajatu ecana acuare tuna ujeu baqui cuanara. Tunaratu tuna quemitsacuare: "Arep micuanara ecuanara iyeya ama bucha, Yusura cuatsashaya eque ecuanara jujacanime ama". Bahuedya tuna jucuare Yusura chacha tuja yacuaju dyaque jida anishanucayaque. ³⁶ Peya cuanatu dyaque jidama ijillahuanatacuare Yusu queja catyatihua tibu. Umaetu catsacatsa atahua huaca biti huitu ai pajida eshura tsehue. Umaetu cadena tsehue risitanahua. Etare apudaju tuna ishatanahua. ³⁷ Umae Yusu queja nimee cuanaque tuna tumu tsehue iyetanahua. Umae tuna patya patsa atanahua. Umaetu cuchiru ebari tsehue iyetanahua. Umaetu tunaja epu juque ijehuetanahua. Peya queja peya queja jadya tuna junenihua. Uhuisha biti, cabra biti cuana tsehue camadya tuna ecadunuti juhua. Dyaque nrecada tuna junenihua. Yusuja cuanara ama tuna dyaque jidama acuare. ³⁸ Baya juneni tuna juhua dyaque japada emata cuana queja. Emata cani, yahua cani cuanaju tuna

anianinicuare. Yusuratu tumeque ecuita cuana dyaque inime metseque bahua, tuna ijehuequi cuanaque bucha ama.

³⁹ Yusutu tuna tsehue dyaque pureama juhua, tuna tuaqueja nimee baatsu. Jadya ama bucha tunajatu bahua ama jari riyaque yahuaju aniyaque dutya jidaque tuna Yusura tyaana ahuaque. ⁴⁰ Yusujatu inime juhua: "Tunaratu babuque ama jari dutya jidaque era tyaana ahuaque, iyacuaque inime dyaque jida era iyaya tupu". Tujatu bijida juhua dutya tuja cuanaque Cristo eque tunaja jucha cuana tillatana ishu, beru anicuare cuanaja jipidya ama, tumebaedyatu ecuanara iyacua aniya cuanaja ishu.

Jesús camadya inime tupuqui aishuque

12 Beru yuequedyu Yusura tyaana ahua cuanara Yusura yuneridya tyadadiyaque pana ejene ahua cuanaque inime tupuqui aatsu, ecuanara iyacua cacasatiya Jesús queja nimeedyu jutidya juaje ishu. Tsajajaya buchique ecuanara. Ejeque tsajajayajatu jacataqui tuque tsajajayaju perequi ejuuque. Jaca bahue tunajatu tuna chicashaqui ejuuque. Tuque petaqui cuanara casaturayajutu tsajajaya icuene eju tuque tsajajaya tupu judiru ishu. Tumebaedyatu tuque ecuanara jacataqui dutya eje bucharama ecuanara Jesús queja nimee eamerejacuque. Necajuchatijacara. Necacasatira Yusura amereya eque juishu, Yusu queja judiru ishu. ² Peya ai inime tupuqui ajacatsu, Jesús cuita camadya inime tupuqui neara, ejeque tsajajayara eje tupu tuque tsajajaya tupu camadya inime tupuqui aya bucha. Icuene ecuanara Jesús queja catyatitsu Yusu jaque jutibunehua. Tuaequeja nimeedyu jutidya juajetsuquetu ecuanara Yusura amerecarama aya eque judadi ishuque. Arepa curusuju maju dyaque bisutada juhua ama bucha, Jesús tu jadya majue juhua, tuja Etataqueja biji eque juishu, jadya juatsu dyaque pureama judadiyaque adebatsu. Iyacuatu Jesús aniya Etataque Yusu tsehue enaruqui.

³ Micuana amena canimehuallaticara cabatitsu, Jesúsra cuatsashaya eque jucarama juya cabatitsu, inime netupucue tura canimehuallatitsu ama jucha arida cuanara dutya jidama ayaju iduhuaque. ⁴ Arepa tunara micuana ujeda ujeda ahua ama bucha, Cristo canerecatihua bucha micuana canerecatima jari. Tuque iyetahua bucha micuana iyetama jari. ⁵ Yusura ecuanara isaraya tuja quisarati eque etataquera ebacua cuanaque eisarau bucha. Enime aputa ni taa micuana amena tura cuejahuaque:

"Ebacua ecana, Micuana Cuatsashaquira eje bucha ani juishu cuejayaju, bacacarama ama neacue, eje bucha tura cuejayaque.

Tura bahuityayaque nereda ayaju, necanimehuallatiume.

⁶ Tura iyuhueda bayaque tura amereya eque juya amaju, Ecuanara Cuatsashaquiratu nerecaturaya, tuna tuja biji eque cuita juishu.

Turatu tuja cuanaque nereda aya, bahuitya ishu".

⁷ Canimehuallatima neiducue canerecatiyaque. Micuanaja Tata micuana iyuhueda baquira micuana nerecada amereya bahuityayaque tuja biji eque cuita anisha ishu. Yusura micuana jadya nerecaturae ayaju tuja ebacua cuanaque ebau bucha bae tura micuana aya. Dutyaja tuque ecuana ecuanaja ebacua neri nere-da au, catsa jadya abahue, tunaja jida ishu. ⁸ Tura amereya eque ama juyajutu Yusura tuja cuanaque cuejamereya. Tuja biji eque cuita ani ishu tujatu ecana bahuityaya. Tura ni micuana bahuityaya ama, tuhuadyatu adebataqui micuana tujaque ama jadique; tume tura micuana amena baya amadya. ⁹ Ecuana nanada jariju, rehua riyaque yahuaju ecuana baqui cuanara ecuana catsa, nereda au, jadya ahua, ecuana jidama juyaju. Tunara ecuana catsahuaju ecuana yana equedya juhua. Jadya juhua tibu, \square dyaque di taa ecua-na ecuanaja Etata barepajura cuatsashaya eque ju-taqui, tuatsehue ani ishu! ¹⁰ Eje uma mara ama ecuana nanada jariju, ecuana ecuana baqui cuanara jidama juyaju nereda au, catsa jadya acuare. Ecuana jida tuyu ama juyaju baatsu tunara ecuana nereda ahua. Yusura bacue ecuana nerecaturaya ecuanaja jida ishu, ecuana cajuchatijaca ishu, ecuana tuque bae juishu. ¹¹ Ecuana jidama juhuaju nerecaturayaque ura ecuana jida ama cabatiya, peya inime. Jadya ama bucha ecuana Yusura bahuityacara ayaque bahue juatsu, ecuana jida inime, tsapema, tuyu jadya ecuana cabatiya.

Pereu tu Yusura cuatsashayaque bijidamadura ishu

¹² Tsajaja catuputiyaque casteretsu yudijidya cacasat-inuca juatsu etsajajanucau bucha, jadidya micuana ca-casatitaqui Jesúsra cuatsashaya eque juaje ishu. ¹³ Tupupe tupupe inime tsehue ama, tuyu piisi nean-icue, Jesúsja quisarati adebaya ama jari cuanaja tuja inime pana adeba aishu, ruduruduque aquereniqui cuanara aiju chicama pana aquereni eau bucha. ¹⁴ Eje buchadya dutya tsehue jida anicara nejudue. Yusu pureamaturayaque anicara nejudue cajuchati-maque. Ecuana Cuatsashaquique ni ecuana pureamat-uraya ama, tume tuque ecuana babuque ama. ¹⁵ Yusura ecuana jida tsehue bacara aya. Yurameta cat-sahuati nejudue ni ejeque buchique Jesús queja nimee jujaca ishu ama. Acuihuija venenuquiratu evenuneu peya acuihuija cuana. Tumebaedya ejeque micuana Jesús queja nimee jujacahuaju, tumebaedya tujatu peya cuana tuaqueja nimee eamerejacau. Jadya tibudya tura cuatsashaya eque anicarama ama jadya nejudue. ¹⁶ Yurameta catsahuati nejudue, ejera tuatse-hue caquemitimaque ejabauju. Ni ejera buchara dyaque iyuhueda paba ama riyaque yahua juque, Yusu iyuhueda ebauque. Jadyatu Esaú jucuare Isaacja ebacuaque icueneque. Yusuratu dyaque jidaque tyaana acuare ebacuaque icueneque cuita. Jadya ama bucha aracaraque etareju juetitsutu Esaúra ejuque aeticuare: "Mira earaqui peja pidya tyahuaju mique etyau dutya jidaque ecue ishu ejudadiuque, ique icueneque ebacuaque juya tibu". Jadidyatu jucuare. ¹⁷ Pana adebadya tuque micuana aya Esaú eje bucha

jucuareque. Jutaqui "Ique bametseque juya tibu, ty-acue ique ecue ishuque", jadya tujatu acuare etataque. Etataqueratu quemitsacuare: "Eje bucha tyataqui ama mique baya. Amena tuque ecue jau jaque", jadyapa tu-jatu acuare. Arepa tuja paanacaca tsehue etataque ba-cayaque, canerecaticuare ama bucha, eje bucha cuarenucataqui amatu jucuare tura cuitadya cuare-huaque.

¹⁸ Yusura ecuanaja baba cuana tsehue inime iyahua-ju tuna dyaque bajida jucuare. Emata Sinaí peque tuna jucuare. Petacuare tunajatu tumeque emata Yusu caadebamereticuareque. Pupipupiyaju tajita jadyara tibarillayaju tunajatu bacuare emata matina. Huani se-huedara dyaque huaniratu apuda dyaque amerecuare. Cuejipa dyaque casadaquetu jucuare. ¹⁹ Corneta tsuri tunajatu bacuare. Yusu quisaratiyaque tuna ba-cacuare. "Eje bucha bae ni micuanara ama. Ejeque ni riyaque emataju tsuracara juya, neiyecue tumu tse-hue. Ejeque paju ecuita, jadya ama juatsu uu pamaju", jadya patuna Yusura cuatsashacuare. Jadya bacatsupa tuna tuaqueja canerecaticuare: "Ecuana tsehue cuita quisaratinucaume", jadya tunajatu cuejacuare, idu-taqui ama, bajida jadya juatsu. ²¹ Dyaque muda tuna-jatu bacuare. Jadya tibusu Moisés jadya jucuare: "Dyaque bajida juatsu ique tadadaya".

²² Amena micuana bacue Yusura isarayaju bajida juya ama. Micuana micuana peya emata Sión bacaniju cajipetihua. Micuana micuana Yusu epu ebariju aniya juque, Jerusalén barepa juque bacani juque. Tuhuatu aniya piyebatilla tupu ama Yusu tsahuaqui cuanaque. ²³ Tuhuatu anidirubuque Yusuja cuanaque dutya. Tu-naja ebacani cuanatu quiricaju ehue barepaju. Tuhua tu Yusu. Tura cuitadya ecuana cuejabuque peadya peadya eje bucha judadiyaque riyaque yahua-ju eje bucha juhua eque. Tuhuatu judirubuque Yusura jucha metse ama baya cuanaque, Yusura amerecara aya bucha cuita juajeya cuanaque. ²⁴ Micuana micuana juetihua Jesús queja, Iyacuaque Inime Iyaqui queja. Tuquetu majuhua ami quijehuetitsu ecuanaja jucha cuana tsujetyatsu apupasha ishu. Yahua nanadajutu Caínra iyecuare Abel tuatsehuequique, ami quije-huetishatsu. Riyaquetu cuarehuanatacuare. Amena Cristo bacue majuhua ecuanaja jucha cuana etillatana juishu.

²⁵ Jadya tibudya tuque ecuanaja Yusu bijidamadurataqui ama, tura ecuana quisarati cuejayaju. Yusura ecuanaja ebaba ecana tuna tura cuatsashaya eque ama aniyajutu ecana riyaque yahuaju jariju nerecaturacuare. \square Dyaque jidama di taa tura ecuana nerecaturadadiya, tura barepa juque quisarati cuejayaju ecua-na cuejaya eque ama aniyaju! ²⁶ Yusu emata Sinaíju quisaratitsutu tuja etsurira yahua tadadashacuare. Iy-acua tujatu jadya aana ahua: "Tadadashanucabuque tuque yahua. Tumebaedya tuque barepa tadadashabuque". ²⁷ "Anucabuque tuque era", jadya tujatu quisarati. Jutaqui tujatu cuarebuque tura bu-cucu aqui iyahuaque. Eje bucha cuaretaquimaque cui-ta camadyatu anisiribuque iyacua bucha. ²⁸ Yusura eje

tupu dutya naruhaaju, tuque tuque ecuanaja ecuana naruquiquedya jubuque. Cuaretanabuque ama tujatu casa. Jadya tibudya tuque ecuanaja ataqui: "Miquemi dyaque jidaque" jadya. Tuja biji eque ecuana anitaqui. Mui, muba jadya tuque ecuanaja ataqui. ²⁹ Tuaequeja nimee cuita ecuana jutaqui. Etiquira pana murutasha eau bucha, jadya tujatu dutya pana tilla abuque tura yana amereya eque juya ama cuanaque.

Yusu eje bucha pureamatura amere ishuque

13 Yurameta iyuhuedae necabatijacaume peya cuana tsehue, micuana, micuana cama bucha juya tibu, Cristo queja micuana catyatihua tibu. ² Jida nebatsacue ejeque micuanaja etareju junayaju. Meta tahui ishuque ecana netyacue, arepa ecana adebama cuanaque paju ama bucha. Umaeratu jadya batsae aatsu ejeque eju cuayaque buchadya jutidya bucha baatsu jida tsehue batsacuare; tume taa yuneri cuitadya barepa juque Yusu tsahuaqui cuanaque.

³ Netsahuacue Jesús queja ecatyati cuanaque etare apudaju netiya cuanaque. Nebacue ecana micuana cuitadya batacara ejuu bucha, micuana cuitadya tuhua ejuu bucha. Netsahuacue ijahue ijahue ataya cuanaque; micuana cuitadya jadya jidama ijahue ijahue eatau bucha ecana nebacue. ⁴ Dyaque emuiba jida jadya tu caquemiti. Ni ejera buchara inime patupu ama tuja ecaquemitiqereque jaca ishu. Micuanaja ecaquemitiqereque cuita camadya nejaraquerecue, ecuitaju acara aatsu, ai peya tsehue ama. Yusuratu nerecaturabuque ejera caquemitiqeremaque jaraquereyaque. Turatu nerecaturabuque ecuita peyaja ehuaneeque jabaquique. Tumebaedya tujatu nerecaturabuque epuna peyaja yahuique queja cabameretiyaque.

⁵ Micuana cachipiruti ishuque cuita camadya dyaque cuita inime tupuqui neaume. "Ni riya piji buchique mique aiju bajacaya ama. Jacanime ama mique ecue ni riya piji buchique", jadyatu Yusu jucua. Jadya tibudya pureama nejucue micuanaja ai aniya tsehue. ⁶ Yusuja ecuana jacanime ama tibu ecuana inime tsapema jutaqui.

"Ecuana Cuatsashaquique tu ique tsahuaquique.

Jadya tibu ique bajidama.

Ni ejeque ecuitara ique eje bucha eau ama", jadya ecuanaja inime paju.

⁷ Neadebacue micuana Jesús queja nimee tura cuatsashaya eque ani ishu jadya tsahuaqui juhuaque. Tunara micuana Yusuja quisarati pana cueja ahua. Tuna tuna Jesúsra cuatsashaya eque juhua majuya tupu. Inime tupuqui ecana neacue. Jesús queja nimeedya jutidya nejuajecue tuna juhua bucha.

⁸ Jesucristotu cacuaretiya ama. Tuque beru jucua bae cuitadyatu iyacua. Tudyu cuitadyatu juajeya jari.

⁹ Eje umara bapeque bahuityayaju nebaucame. Ediji baecuara peya queja peya queja jadya edujuu bucha nejuume. Aniyatu umae ai aratsu jadya ama juatsu arama aatsu ejepa Yusu pureamaturaya jadya juya cuanaque. Jadya ama tuque. Yusura cuitadya ecuana

iyuhueda baya. Casaturaya tura ecuana tuque pureamatura ishu.

¹⁰ Uu cuana iye, Yusu tyau jadya juhua bucha, jadya iyetanaetu Jesucristo juhua ecuanaja jucha cuana tsujetyatsu apupasha ishu. Israelita pae cuanajatu ara bahue juhua ejaque tumeque uu cuana eiyeque Yusuja etareju. ¹¹ Jadya ama buchatu uu cuana Dyaque Muidaju ami tsehue sequi ishu iyetana bahue juhua cuanaque arata baecua juhua. Iye, ami quemi jadya aatsu tunajatu uu eiyeque epu juque duju bahue jucua jiji bucha ijehueti ishu. Tuhua tunajatu pana pahua abahue juhua. Amitu pae dyaque muida cuana jadu bahue jucua Yusuja etare Dyaque Muidaque bacaniju. ¹² Tumebaedyatu Jesús majuhua curusuju epu tipare, tuja ami quijehuetitsu, tuaqueja ecatyati cuanaja jucha cuana apupasha ishu. ¹³ Majucarama amatu juhua epu tipare, arepa tuna dyaque jidama ijahue ijahue ahua ama bucha. Tumebaedya ecuana iyacua tura cuatsashaya eque jucarama ama jutaqui, arepa ecuana peya cuanara jidama ijahue ijahue aya ama bucha. ¹⁴ Ecuana anisiri ishuque tu rehua riyaque yahuaju ama. Ecuana eaniqui neri tu yuqueja Yusu aniyaju. ¹⁵ Jesús eque ecuanaja jucha cuana tilla-tanahua tibu, tuque ecuana ajacaya ama Yusu: "Dyaque jida casada taa mique". Uu cuana tyaaustu eque ama iyacua Yusu nepureamaturara. Jeru cuana eque nepureamaturara. Necuejajacara ama ecuana dutya jiteque dutya jidaque tura ahua cuanaque.

¹⁶ Iyuhue tsehue peya cuana tsehue necabatijacara ama. Nerecada cuana tsehue bapee neara ecuanaja ai aniyaque piji. Ecuana jadya juyaju baatsutu Yusu pureama juya.

¹⁷ Micuana Jesúsra amereya eque juishu tsahuaqui cuanara cuatsashaya eque nejucue. Jida inime tsehue neacue tunara cuejaya cuanaque. Yusuja yacuaju judirutsu tuna cacuejatidirubuque riyaque yahuaju tuna eje bucha merree juhuaque. Jadya tibudya tuna casatiya micuana tsahua ishu, micuana Jesús queja nimeedya jutidya juaje ishu. Micuana ni tunara amereya eque juya, tumetu micuanaja jida ishudyu judadiya. Tume tuna pureama tsehue mere juya. Micuana ni tunara amereya eque ama juya, tume micuana canerecatiya. Tuna bacue peya inime tsehue jutidya mere juya.

¹⁸ Yusu tsehue quisaratiyaque, ecuanaja ishu nebacabacacue. Yusura cuatsashaya eque juhuaque tuque ecuana adebaya. Yusuja biji eque ecuana aniajecara juya. ¹⁹ Dyaque micuana queja canerecatiya ecue ishu nebacabacacue, Yusuja ique ebajarara micuana queja cuanuca ishu emajaca tyaishu.

Amena ishuque quisarati

²⁰ Ecuana Cuatsashaquique Jesús tu dutya tuaqueja ecatyati cuanaque naruquique, uhuisha naruquira tuja uhuisha cuana enaruu buchique tume. Majuhuaquetu Yusura yudijidya nityatsuranuca acuaque, tuque ecuana jiteque majuhua tibu, iyacua ecuana aniya Yusuja iyacuaque inime eque. Riyaque iyacuaque inimetu

teredadibuque ama. Yusu tu Ecuana Inime Tsapema Anishaquique. Tura netyacue dutya jidaque tuja inime eque ani ishuque micuanara sareyaque. Turadya paa Jesucristo eque micuanaju tuja yacuaju tuja biji equeque. Ni eje tupu muijaca ishuque ama tu Cristo paamere. Jadidya paju.

²² Isarayaju pana baca neacue era huenehuaque, micuana ecue eatsehuequi cuanaque. Huenehua rique riyaque quirica micuana nereda bucha cuejae ayaque micuana Jesús queja nimee ejujacauju. Junudama ehue tibu, jida inime tsehue nebacacue. ²³ Era

micuana bahue amerecara aya. Timoteo ecuana tsehuequiqueri etare apuda juque inajacatanachine. Tuque ni rehua ebajarara juetiya, dujuya tuque micuana queja cuayaque.

²⁴ Isaraya tuque ecuana Jesús queja dutya ecatyati cuanaque naruqui cuanaque, Yusuja cuanaque jadya. Italiaju aniya cuanara micuana isaramereya.

²⁵ Yusura jida tsehue nenarucue tuja qiyuhuebati tsehue. Jadidya paju.

Riya tupu camadya.

SANTIAGO

Riyaque quirica ri Santiagora huenequereque, Jesús tsehuequira. Santiagotu israelita cuana Jesús queja ecatyati cuanaque naruquique jucuare.

“Yusura cuatsashaya eque aniyaju ecuana yuneridya Jesús queja ecatyatique cabameretiya”, jadyatu jucuare. Jidamapa chipiruda cuanaque camadya jida bau, nercada cuanaque bacue jidama. Jadya bae eauque patu dutya tupu iyuhuee bataqui, jadyatu jucuare. Huenequaretu ecuanara peya cuana ecuanaja quisarati tsehue jidama eauque.

Umae versículo cuana dyaque saretanayaque ri: 1.2-8, 12, 25; 2.10; 3.17; 4.7, 17; 5.16.

Jesús queja ecatyati cuanaque

Santiagora etsapetana cuanaque isaracuareque

¹ Era rique micuanaja quirica cuadishaya. Ique Santiago. Yusu merequique ique, tumbaedyu Ecuana Cuatsashaqui Jesucristo. Micuana Yusuja cuanaque micuana isaraya, micuana Israel eque ejuracana cuanaque dutya queja etsapetana cuanaque.

Yusuja cuanara eje bucha idue jidamaque inime cuana eauque

²Jetiama inime jidama cuanaque masada cuanaque baatsu, pureama nejuque, Yusura micuana tura amerecara aya bae amereya cabatitsu, ecue eatsehuequi cuanaque. ³Yusura micuana nime adebaya, Jesús queja nimeedyu jutidya juaje ishü. Neadebacue riyaque. Inime jidama cuanaque juetiyaju tume micuana cabahuityatidyadya eje bucha idue canimehuallatitsuque ama. ⁴Neiducue eje bucha inime masada baatsu, Jesús queja nimee jujacama. Tume micuana Yusura amereya eque cuita camadya juya. Yusuja biji eque cuita micuana aniya. Aniyadya tuque micuanaja dutya ai sareyaque eje buchique inime idu ishüque.

⁵Baecua ni micuana Yusuja biji eque cuita ani ishüque, “Tata, bahue amerecue jidaque, jidamaque jadique”, jadya nebacacue. Bahuedya tura micuana amereya. Arepa ecuanara bacanuca bacanuca aya ama bucha, tuquetu cahuaiya ama ecuanara jadya bacae ayaju. ⁶Yusu tsehue quisaratiyaque ai bacatsu, pana ejenedya neacue bacahuaque tura tyayaque. Ejenecara aya ama bucha ejenecarama jadya neaume. Jadya juya cuanaque tuna inime tsape tsehuedya jutidya, cueri cuanaja ecuaqueju enapacu bucha, cuejijira peya queja, peya queja jadya eamereu bucha.

⁷Yusu pureamatura ishüque tuna inime tupuqui aya; jadya juya ama bucha tuna riyaque yahua juque inime tupuqui aya. Iyacua ecana tuyu aniya, peya huecaca piji bacue jidama. Jadya anie juya cuanara inime patupu ama, ai bacahuaque Ecuana Cuatsashaquira tyaya bucha.

Nercadaque chipirudaque jadya Yusu jaque cabatitsu pureama jutaquique

⁹Yusuja cuanaque tuna pureama jutaqui. Nercada cuanaque tuna pureama jutaqui, dutya aniya cabatitsu Yusuja tuja cuanaja ishü aniyaque baatsu. Arepa riyaque yahua cuanara bijidamaduraya ama bucha, Yusura tuna muiya. ¹⁰Chipiruda cuanaque pureama paju Yusu jaque cabatitsu. Anisiribuque ama tuna riyaque yahua. Ejeque huecaca tuna riyaque yahua juque aputaterebuque, yachi shasha masadama aputatereya bucha. ¹¹Ijeti uqueratu shasha masadama manunushatsu rarashaya. Pacacaya; aputadya tujatu jida pijique. Tumbaedyatu chipiruda cuanaque, arepa tuna dyaquedyu jutidya ai sareajeya ama bucha, masadama tuna majudadiya. Chacha ecana, peya huecaca bacue emaju jadya.

Yusura ecuana cajuchatishacarama ayaque

¹²Dyaque jida taa ecuana ejuu, jidamaque inime cuanaju nubitsu, Jesús queja nimee jujacatsu ama, abacata idu aatsu. Tume cuanaque iduhua baatsu ecuana Yusura muibuque, emuique ecuana ejaqui picatsu ejutumereu bucha. Majunuca ishü ama tura ecuana tuatsehue iyabuque, tura dutya tuque iyuhueda baqui cuanaque ahua baedyu. ¹³Ai jidamaque ni ecuana acara ayaju cabatiya, paju ama ecuanaja inime: “Yusura ecuana jidama amerecara aya” jadya. Yusratu ni riyapiji buchique jidamaque aya ama. Tura ecuana ni riyapiji buchique cajuchatishacara aya ama. ¹⁴Cajuchatitsu Yusura cajuchatishahua bucha ecuanaja inime paju ama. Ecuana inimedya ecuana cajuchatiya. Ecuana jadyatu cajuchaticaraque inime juetiyu. Huicamutya juyara jae tsetatsu eau bucha, jadidya ecuana ecuana tacadya jutidya jahue catiya jidamaque aatsu.

¹⁵Icuene cuita ecuana ecarecani juque cuinanaya; tueque ecuana daneya; majudadi jadya ecuana juya. Tumbaedyu tuque ecuana icuene cuita cajuchatibijiseriya; cajuchatididyadya ecuana, amena Yusu jaca ishü. Ecuana inime cacuaretivaque ama juatsu tuque ecuanaja jipenime amadya.

¹⁶ Ijahue necatiume, ecue inime ama cajuchatihua jadya inime tuputsu. ¹⁷ Yusuratu iyahua, ijeti, badi, purari jadya. Tume cuanaja huecatu cabapetiya. Eje bucha juatsu dyaque huecada, peya uraju bacue ea-putsu jadyatu juya. Yusu bacue cacuaretiya ama ni riyapiji buchique. Tudyatu dutya ai jida cuanaque cuinanashaquique. Tsujema neri tura ecuana tyaya dutya ai jidaque. Barepaju Aniyara ecuana jida tsehue bajacaya ama. ¹⁸ Tuja inime taca eque tura ecuana tujaque amereya, tuja quisarati yunerique ejenehuaju. Ecuana yada ecuana icuene eiyacuaneque. Tumebaedyatu eje uma eiyacuane juajeya. Ecuana ecuana icuene tee juque ehuesa buchique.

Yusuja quisarati bacatsu ecuana tura amereya equedya jutaquique

¹⁹ Neadebacue riyaque, micuana ecue eatsehuequi cuanaque. Pana baca neacue peya cuana quisaratiyaju. Pana baca amaquedya jutidya quisarati, cahuaiti jadya nejuume. ²⁰ Cahuaitiya ni ecuana, Yusuja biji eque amadya ecuana juya. ²¹ Jutaquiju nejacacue asicada jidamaque eje bucha acaraque. Eje bucha eque bacarama ama jadya neaume Yusuja quisarati tura micuanaja inimeju iyahuaque. Tura nereda bucha cuejae ayaju necahuaitiume. Riyaque quisarati ejenehuaju tura micuana Ijahua quejaque inajacamerehua.

²² Yusura eje bucha amereyaque neara cuita. Tuja quisarati cuejatayaque bacaqui camadya ama nejura. Quisarati cuejayaju bacahua eque ama ni ecuana juya, ecuana tacadya jutidya ecuana jahue catiya, Yusu pureamaturaya bucha cabatitsu. ²³ Ejera Yusuja quisarati cuejayaque ijacabacayaque camadya, cuejaya eque jucarama juyaque: tu ecuita cuetiyaque espejoju capetatiya bucha. ²⁴ Pana capetatitu juya. Cabatiyatu ebutsequini bujequique; jadya ama buchatu masadama nime aputaya. Tumebae cuitadyatu umaera Yusuja quisarati bacaya. Masadama tuna nime aputaya cuejayaju bacahuaque. Tume ecana juya amadya bacahua eque. ²⁵ Yusura ecuana amereyaquetu dyaque tuyuque. Tura cuatsashaya eque ecuana juya, peyara casada tsehue jadya amereyaju ama, ecuana inime taca equedya jutidya. Espejoju pana capetati juya bucha, ecuana juya nime aputaya ama eje bucha capetatihuaque. Cuejaya eque ni ecuana juajeyadya jutidya, nime aputama ecuanara bacahuaque, tume ecuana Yusura dyaque jida ameredadiya dutya ai ecuanara ayaju.

²⁶ Canarutitaqui ama ni ecuana quisarati cabatiya, quisarati ataquique ama ni ecuana quisarati aya, yanacanadya ecuana Cristo jaque jadya catiya. Ijahue ecuana catiya, "Cristo queja ecatyatique ique" jadya juyaque. ²⁷ Yusu tu ecuanaja Etata. Tura ecuana bahuityaya eje bucha anie jutaquique. Quiyuhuebatitaqui ecuana etatamaju cuana tsehue, tunaja ai aijamaque tyau jadya, tumebaedya eahuemaju nrecada cuanaque. Ataqui ama tuque ecuanaja jidamaque Yusuja cuanara ama ayaque, ni apidya. Yusu cuita ca-

madya tuque ecuanaja pureamaturataqui, tuja ecuana tuyu baishu.

Nrecada cuanaque ecuanaja bijidamadurataquique ama

² Peya micuana cuejaya, ecue eatsehuequi cuanaque. Dutyadya jutidya dutya tupu bau neacue, chipirudaque, nrecadaque jadique. Ecuana Cuatsashaquique tu jida, casada jadya. Tuaequejadya micuana catyatihua.

² Ejutiu ejeque micuana Cristo mui ishu ecasitatitaju. Umae cuana bacue chipirudaque ejuu. Ejutuqui jida piji tsehue ecajututique, metara tsuje aridaque jutu jadya. Peya cuana bacue nrecada cuanaque ejuu, ejutuqui siri tsehuedya jutidya ecajututique. ³ Chipiruda cuanaque camadya ni micuana jida ebatsau, nrecada cuanaque jida batsayaque ama. Jadya ni tuque micuana chipiruda cuanaque eatsau: "Rehua neanibutecue eaniqui dyaque jidaju". Nrecada cuanaque ni micuana eau: "Tuhuadya etibene queja neanibutecue", jadya ama juatsu "Tuhuadya yahuaju neanibutecue" jadya. ⁴ Jadya ayaque juatsu tuque micuana dutya tupu bau ama aya micuana tsehuequi cuanaque. Tuyu ama micuana juya. Micuanaratu inime tupuya peadya ecuita petatsu peya dyaque jida bucha tunaja ejutuquiju petatsudya jutidya.

⁵ Pana baca neacue, ecue eatsehuequi iyuhueda cuanaque. Dutya jujeri Yusura tuja ishu ihuarahua cuanaque tuna nrecada. Tura tuna mepehua jetiama tuaqueja catyatisha ishu. Tura tuna mepehua dutya tura jidaque tyayaque inatsa ishu, tuque iyuhueda baqui cuanaque tyaana ahuaque. Tunadya tuna tuaqueja jubuque tuque dutya naruqui juhuaju. ⁶ Arepa nrecada cuanaque Yusuja emepeque baya ama bucha tuque micuana ecana bijidamaduraya. ¿Eje bucha juatsu jatsu tuque micuana ecana jadya bae aya? Chipiruda cuanara, nrecada cuanara ama micuana jahue jahue aya. Chipiruda cuanara micuana huaraji cuanaja yacuaju repeajetsu jidama amereya. ⁷ Ecuana ecuana "Cristiano" bacani, "Cristoja cuanaque" jadique. Ecuana naratu tuque muiya. Eje uma chipirudaque bacue tuja ishu jidama quisaratiya. Ijillahuanaya tunara.

⁸ Ecuana Huaraji Dyaque Aridara cuatsashayaque tuque micuanaja ataqui: "Iyuhueda nebacue peya cuana; micuana iyuhueda cabatiya bucha, iyuhuee ecana nebacue". Riyaque cacuatsashati dyaque saretanayacuetu ehue ne Yusuja quisaratiju. Riyaque cacuatsashati eque ni micuana aniya, jidadya tuque micuana aya. ⁹ Chipiruda baatsu camadya ni micuana uma muiya, peya cuana ni micuana nrecada baatsu bijidamaduraya, tume taa micuana Yusura cuatsashahua eque ama aniya. Cajuchatiya di taa micuana; Yusura micuana jucha metse baya. ¹⁰ Moisés equetu ecuanaja baba cuana Yusura jetiama cacuatsashati cuana cuejacuare. Peadya ni ecuana Yusuja cacuatsashati aya ama, jucha metse tura ecuana baya, arepa ecuana dutya peya cacuatsashati cuana eque aniya ama bucha. ¹¹ Yusuja cacuatsashati: "Jaraquereume micue

caquemitiqeremaque". Tuja cacuatsashati nucadya: "Quiyeti puji juume". Ejera ni peya iyeya, ca-juchatiyadya tuque. Yusratu juchaqui baya, arepa tuja caquemitiqeremaque jaraquerema ama bucha.

¹² Ejeque huecaca ecuana Yusura abuque ecuanara Cristora cuatsashaya eque anihuaque, anihuaque ama eje buchique. Jadya tibudya tuque ecuanaja quisarati ataqi tuja biji eque. Tuja biji equeque tuque ecuanaja ataqi. Jadya anie ecuana jutaqui, Yusura ecajuchati ebau tibu. ¹³ Peya cuana tsehue ni ecuanaja canerecabati aijama juya, Yusujatu ecuana tsehue aijamadya canerecabati juya. Peya cuana tsehue ni ecuanaja quiyuhuebati aniya, Yusujatu quiyuhuebati aniyadya ecuana tsehue. Pana ejenedya tuque ecuana ataqi tura nerecaturadadiyaque ama.

Jesús queja catyati neri ejuque tu ejitaju tura cuatsashaya eque aniyaque

¹⁴ Aya ecuana quisarati: "Cristo queja ique ecatyati". Riyaque tu aishu buchique jidaque ama, tura amereya eque aniyaque ama. Tura amereya eque anitsu camadya ecuana cabameretiya yuneridya ecuana tuaqueja ecatyatique. Jidaque ni ecuana aya ama, tuhuadya ecuana ejitaju tuaqueja catyati nerimaque. Tume ecuana Yusura tuaqueja judirushabuque ama.

¹⁵ Ita taa ecuana peque Cristo queja ecatyatique eaniu, epuna, jadya ama juatsu deca nerecadaque. Ara ishuque tunaja tupu ama eaniu, tumbaedy a jutu ishuque. Ecuana jadya tuna tyataqui tunaja ai aijamaque. Ita taa ecuanaja eaniu ejutuqui, earaqui jadya tuna tyaishuque. Jadya camadya ni ecuana ecana eau: "Jidama inime nebaume. Pabacabaca Yusu queja netyacuetu ai ara ishuque, jutu ishuque" jadya, ai tyamaque, tume tuque ecuanaja quisarati aishuque ama. Yusura ecuana tyahuadya amena earaqui, jutu ishuque jadya tuna tyaishu. ¹⁷ Peya cuana ni ecuana tsahuaya ama, tuhuadya ecuana ejitaju Jesús queja catyati nerimaque. Emajuratu amena peya tsahuaya ama, tumbaedy cuitadya tuque, yuneri ama ni ecuana Jesús queja catyatihua, tsahuaya amadya tuque ecuanaja peya.

¹⁸ Ejeque cuana ni tuna juya: "Umaetu Yusu queja judirubuque, Jesús queja catyatihua tibu. Peya cuana bacue, arepa Jesús queja catyatima ama bucha, Yusu queja judirubuque, tunara jida tsehue peya cuana baya tibu", jadya ni tu umaey juya cuji cuita juatsu. Quemitsaya micuana era: "Peya cuana jida tsehue ama bayaque ni ecuana eje bucha cabameretie juma yuneridya Jesús queja catyatihuaque. Peya cuana jida tsehue bau eque cuita camadya ecuana peya cuana queja ecaadebameretiu Jesús queja ecatyatique", jadya micuana era cuejaya. ¹⁹ Micuanaratu ejenedya Yusu aniyaque, tuque peadya camadya Yusuque. Micuanaja quejeneti ri jida, tuyuque. Jadya ama bucha peya cuana ni micuana jida tsehue ama baya, ijahua cuana dyaque jida ama micuana. Butsee tunara dyaditu ejenedyadya peadya Yusu aniyaque. Pana ejene tuque aniyaque aatsu ecana dyaque bajida juya tuat-

sehue. ²⁰ Micuana micuana inimema, peya cuana jida tsehue ama bataquique ejeneajeya tibu. Jutaqui ju taa micuana yanacanadya Jesús queja catyatihua, ai micuana tura amerecara aya eque juya batudya.

²¹ Adebamereya micuana ecuanaja baba Abraham, micuanaja pana adeba aishu. Tuque eje bucha juhuaque baatsutu Yusura tuyu baha. Abraham Yusura amerehua eque juhua ju, tura tuja ebacuaque Isaac tumu mesa ea dyaque Yusu tyaishu huanahuaju-tu Yusura acuare: "Cabameretihuami yuneridya eaqueja catyatihuaque". ²² Tuquetu Yusura amereya eque juhua, tuque tuaqueja catyatihua tibu. Dyaquedy judiyatu Yusu ejeneajehua, Yusura amereyaque tura dutya acara ahua tibu. ²³ Yusuja quisarati tu ehue: "Abrahamtu Yusu queja catyaticuare. Jadya tibudyatu Yusura jucha metse ama bacuare". Abrahamtu "Yusuja iyuhuedaque" bacani jucuare.

²⁴ Jesús queja catyatitsu, ayadya tuque ecuana tura cuatsashayaque. Tume tura ecuana jucha metse ama baya. Tura cuatsashaya eque ni ecuana aniya ama, tume ecuana yuneridya tuaqueja catyatima. ²⁵ Rahab decadeca aridaquetu cabamereticuare tuque eje bucha juhua equedy Yusu queja catyatihuaque. Yusura tuja quisarati ama ama ayaque ejenetsu tujatu tsahuacuare beta israelita ecatsé yahua petara cuahuaque ecatsé. Tehuacuaretu ecatsé tuja etareju. Tuequedyatu ecatsé cuinanashacuare epu ebari tachiqui dyaque eque. Jadya juhua jutu tumeque epuna Yusura jucha metse ama bacuare, tuque eje bucha juya eque tuque tuaqueja nimeeque cabameretiya tibu. ²⁶ Yatanana ni ecuanaja aijama, tume tuque ecuanaja ecuita ni aishu buchique jida ama. Emajudya ecuana. Tumbaedy tuque, Yusuja biji eque ama ni ecuana aniya, tume tu aishu buchique jida amadya "Jesús queja ique catyatihua", jadya ecuanaja juishu. Yusura ecuana emaju bucha baya.

Yusu pureamatura ishu ecuanaja adebatsu quisarati ataquique

3 Peya micuana cuejaya, ecue eatsehuequi cuanaque. Yusuja quisarati bahuityaqui juishu nebi-jiseriame. Neadebacue Yusura tuja quisarati jidama, tuyu ama bahuityaya cuanaque dyaque nerecaturadadiyaque. ² Dutya ecuana cuji aqui cama. Jadya ama bucha, cahuaishaya ama ni ecuana ecuanaja quisarati tsehue, tume ecuana tura amerecara aya baedy juya. Ecuana taca canarutitaqui ni ecuana cabatiya jidama equisarati ju, tumbaedy ecuana ecanarutiu peya jidama cuanaque aishu ama. ³ Ita taa neadebacue. Cahuayu ecuana freno ecarumereu ecuat-saju. Tumetu cahuayu cuaya eje eque ecuanara dujucara aya equedy. Jadya aquerenie tuque ecuana eau tumeque uu isaani ishuque, casadaque shuma ama ebarique ama, freno eje ari tsehue ama. ⁴ Tumbaedyatu cuaba dyaque aridaque; eje ari tsehue amatu tuque tibu inaquira dujuya. Cuejiji casadara itushaya. Jadya ama buchatu tuque tibu inaquira eje ari tsehue ama tibu inaya, tura eju dujucara ayaju duju

ishu. ⁵ Tumebaedya tuque ecuanaja yana, ecuanaja ecuitaju eje arique ama. Jadya ama bucha tura ecuanadyaque jidama eau ecuanara jidama quisarati tsumeyaju. Riya piji etiqui tasasayara etijaqui maretsutu yachi aridaque etirutereu. Shumaumaque ama, equiquetu eje ari etiquira ama eyuamaturau. ⁶ Jadya eque tuque ecuanaja yana eje ari tsehue ama dyaque jidama eyuamaturau ai. Etiqui bucha mudaque tume. Dutya jidamaque tuque ecuanaja quisarati aya, Yusu dutyaju cahuaishisha ishuque. Tee tuchatsu ecuanadutya acui cuana easicaturau bucha, tumebae cuitadya tuque ecuanaja asicaturaya dutya ecuanaja educu juque inime, dutya inime tupu cuana jadya jidamaque quisarati aatsu. Ecuanaja nanada equeque, esiri judadiya tupu ecuanaja ecuanadya jutidya ujeda catiya ecuanaja jidama quisaratiya tsehue. ⁷ Dutya cuanubi muda cuanaque tuque ecuanaja euuneu, dutya upati cuana jadya. Dutya mapisi bacua cuana tuque ecuanaja euuneu. Enaju dutya aniya cuanaque tuque ecuanaja inatsu euuneu. Dutya riya eiya cuanaquetu ecuitara uuneya. ⁸ Ecuanaja quisarati bacue ecuanaja bucha canarutitaqui ama cabatiya, jidamaque asicadaque quisarati eauju. Asicadaque quisarati ecuanaja jacataqui ama baya, arepa ecuanaja jadya asicada jidama quisarati acarama aya ama bucha. Ecuanaja jidamaque quisarati tu bacuaja cati uje buchique. ⁹ Ecuanaja yana tsehue ecuanaja pureama aya ecuanaja Etata Yusu. Tumeque yana tsehuedya ecuanaja jidamaque quisarati aya peya cuanaja ishu. Yusuja ishu jidama quisarati eau bucha cuitadya tuque turadya ecuanaja tuque bae cuita iyahuaque tibu. ¹⁰ Ecuanaja ecuatasa equedyatu cuinanaya quisarati sumi ishuque, yuamatura ishuque jadya. Jadyatu jutaqui ama, ecue eatsehuequi cuanaque. ¹¹ Peadya ena cani juquetu ena ecuanaja ama ijitaquique, ijitaquimaque jadique. ¹² Tumebaedyatu narasaju jipamu juya ama, mangoju bacue cashi. Jadidyatu ena ijitaquimaque, ena ijitaqui tsehue cuinanaya ama jadique ena peadya cani juque. Ecuanaja ecuatasa juque quisarati jidamaque pacuinana amadya. Riyaque tu jidama, ecue eatsehuequi cuanaque.

Yusuja biji eque anitsu ecuanaja ejitaju cabameretiya ecuanaja Yusu jaque

¹³ Jida neanicue, micuana ecue eatsehuequi cuanaque. Yusuja biji eque neanicue. Jida tsehue nebacue peya cuana. Micuana taca casumiti nejuume. Jadya anie juyaju micuana peya cuanara adebaya bahueque dutya inime adebayaque. ¹⁴ Micuanara inime tupuyaque ni micuana eje buchadya cuejacara ebari aya, peya quisaratiyaju baca jida amaque, cajishati arida ni micuana, peya ni micuana cahuaishisha, tume taa tuque micuana pana adeba ama aya Yusuja quisarati yunerique. Necasumitiume "Dyaque bahue ique" jadya, ai micuana jadique batu. Dyaque bahue ni micuana cabatiya, pusha pusha micuana juya. ¹⁵ Dyaque bahue cabatiya cuanaja inime tupu tu Yusu jaque ama; riyaque yahua juquedya jutidya tume. Tu-

na bahueque tu Yusuja Espiritu jaque ama, Ijahua jaque jutidya. ¹⁶ Ecuanaja Yusuja cuanaque ni ecuanaja cajishati arida, ecuanaja jida ishu camadya ni ecuanaja aya, tumetu ni ai buchique jida juya ama. Dutya ai jidamaquedya jutidyatu juajeya. ¹⁷ Yusura bahuityaya eque ni ecuanaja juya, jidama asicadaque tuque ecuanaja aya ama. Nime jidama ecuanaja juya ama. Ecuanaja Yusu adeba tsahuaqui cuanara cuatsashaya eque ecuanaja juya. Quiyuhuebati aqui ecuanaja juya peya cuana tsehue. Jida tsehue ecuanaja baya peya cuana. Masadama inime cuarequi ecuanaja juya ama. Riyaque huecaca peadya inime tupu tsehue, peya huecaca bape jadya ecuanaja juya ama. Jidadya cabaticara ecuanaja juya, peya cuana ecujishau tibu, yuneri cuitadya ecuanaja jadya anie jucara juya tibu. Jadya anie ecuanaja ejuu Yusu equeque cabahuityatiyaque juatsu. ¹⁸ Ecahuaiti cuanaque jida quisaratishacara aya cuanaque tuna jida tuyu aniya. Jadya eque tunajatu peya cuana tumebaedya inime tsapema anishaya. Huesadadi ishu ecuanaja ai uhuaya; jadidyatu ecuanaja anitaqui equeque cahuaishisha ishu ama dutya tupu nimee peya cuana tsehue.

Yusu pureamatura, riyaque yahuaaju cuanaque pureamatura jadya jutaquique ama

⁴ Educuju tuque micuanaja aniya micuana cuita camadya capureamaturaticaraque. Jadya tibudya micuana dutya tupu nimee ama aniya, arepa Yusu jaque ama bucha. Catiya, cati cati jadya micuana juya. ² Jetiama tuque micuanaja ai anicara juya. Ai bijida bayaque daditaquima baatsu micuana peya cuana iyecara aya, tunaja ai aniyaque seca ishu. Micuanaratu jishaya peya cuana ai qui baatsu. Datse dadicara aatsu tuque micuana peya cuana catiquereya. Aijama tuque micuanaja ai micuanara bijida bayaque, Yusu bacaya ama tibu. ³ Yusura micuana ai bacayaju tyaya ama, jida inime tsehue ama bacaya tibu. Micuana cuita camadya capureamaturati ishu tuque micuana bijida baya. ⁴ Riyaque yahuaaju cuanaque camadya ni ecuanaja pureamaturacara aya, tume tuque ecuanaja Yusu cahuaishisha. Yusu pureamaturaya ama bucha riyaque yahuaaju cuanaque pureamatura jadyatu jutaqui ama ni riya piji buchique. Riyaque yahua juque ai ni ecuanaja iyuhueda baya, tume tuque ecuanaja yuneridya Yusu iyuhueda baya. ⁵ Yanacana amari riyaque Yusuja quisarati huenetanahua: "Yusuratu tuja Espiritu ecuanaja tsehue anishahua. Tuquetu ecuanaja queja iyuhueda cabamereticara juya, ni peya ai ecuanaja iyuhueda baya bucha ama. ⁶ Yusu tu dyaque jida ecuanaja tsehue; jida tura ecuanaja naruya. Ehuene tu Yusuja quisarati: "Yusu tu ecahuaiti dyaque inimequi cabatiya cuana tsehue. Yusuja tsahuataquique caadebatiya cuanaque bacuetu ecuanaja jida tsehue baya". ⁷ Jutaquijudya Yusura amereya eque nejuque. Ijahua cajuchatishacara ayaju, nebaume ni riya piji buchique. Micuanara bacacarama ayajutu tuque huanaya. ⁸ Yusu tsehue quisarati, tuque inime tupuqui jadya nejujacaume. Jadya ni micuana juya, tumetu

tuque micuana tsehuedya. Jucha arida cuanaque, jidamaque neajacacue, Yusuja biji eque cuita ani ishu. Jidamaque inime tupuqui neajacacue. Yusu iyuhueda baya ama bucha, riyaque yahua juque dyadi iyuhueda bau jadya nejuume. ⁹Yusu cahuaishatsu, necapeya inimeticue. Pau, aishu piji cajuchatihua jadya nejuuce cajuchatitsu. Etsauque, nepacue jutidya micuana jidama juhuaque caadebatitsu. ¹⁰Necuejacue Ecuana Cuatsashaquique tuja biji eque juishuque casadamaque. Tura micuana tsahuaya.

Jesúsja cuanaque peya cuanaja ishu jidama quisarati-taquiue ama

¹¹Necatuaritume, micuana ecue eatsehuequi cuanaque. Yusura ecuana "Peyaja ishu jidama nequisaratiue" jadya cuatsashahua. Jutaquiju peyaja ishu ni micuana jidama quisaratiya, tume taa tu "Yusuja cacuatsashati jida ama. Ni aishu buchique tu jida ama", jaididya micuana juya. Jadya ni micuana juya, tume taa micuana Yusuja cacuatsashati eque ama aniya. Tume micuana jidama jutidya tumeque cacuatsashatiya ishu quisaratiya. ¹²Yusura peadya camadya ecuana cuejaya eje bucha anie jutaquique. Tuja cuita camadyatu casa aniya ecuana tuaqueja judirusha ishuque. Tura peadyatu cuejataquima cuanaque ijahuaja etiquiju ecuadishau. Jutaquiju yurameta catacuariti nejuume. Yusu peadya camadyatu bahue ejeque jucha metseque, ejeque bacue jucha metse ama jadique. Micuanajatu aijama ni ejeque buchique jucha metse jadya aishu.

Ni ejequetu bahue metajudya eje bucha juyaque

¹³Pana baca neacue. Umaeja tuque micuanaja inime juya pana bahue eje bucha judadiyaque bucha. "Iyacua, jadya ama juatsu metajudya necuara epuju. Peadya mara neanidirura. Catyati, quemi quemi jadya nejudirura, jetiama chipiru ina ishu" jadya. ¹⁴Ecuana ecuana baecua metajudya eje bucha ejuuque, jida, jadya ama juatsu jidama. Baecua ecuana eje tupu majuyaque. Sise huani masadama aputaya bucha, jaididya ecuana masadama majudadibuque. ¹⁵Jadya tibudya tuque ecuanaja quisarati jutaqui: "Ecuana Cuatsashaquija jadya inime juyaque juatsu camadya metajudya chacha juya. Tuja jadya inime juyaque juatsu camadya ecuanara inime pirehua eque paju", jadya ecuanaja quisarati paju. ¹⁶Jadya ama buchatu micuanaja inime juya, dutya micuanara inime pirehua eque eje bucha judadiyaque. Casumitiya micuana ai ayaque. Jadique tu Yusuja bijidama.

¹⁷Aya ama ni ecuana Yusuja inime eque jutaquique bahueque, tume ecuana cajuchatiya.

Chipiruda cuanaque cueja ishuque

5 Pana baca neacue riyaque quisarati, chipiruda cuanaque. Micuana nrecada cuanaque nrecaturai cuanaque, pana baca neacue. Paya, peya inime jadya nejuuce, dyaque canerecatidadiyaque caade-

batitsu. ²Jetiama micuanaja ishu cuita camadya pana iya eaquetu ririya. Ai bia cuanara tuque micuanaja eju-tuqui jida piji cuanaque yuamaturaya. ³Dutya chipiru tuque micuanaja ejitsutere, oro amena murutaajeya. Chipiru ejitsuque baatsutu peya cuanara adebaya micuanaja ishu cuita camadya chipiru quiyatihuaque, nrecada cuanaque tsahua ishu etsumeuque. Etiquiju rihuitsu ecayumatii bucha, jaididya micuana cayuatibuque. Radanityaajeyadya jutidya micuana chipiru micuanaja ishu cuita camadya. Jadya ama bucha amena huecaca japadama juetibeya micuanaja aniya tsehue pureama juishuque masadama tereyaque. ⁴Micuanaratu micuanaja teeju earaqui huesa juya cuanaque ijahue ahua. Jidama tuque micuana ecana mere huecaca tsujetyahua. Yusratu adebaya micuanara tuna etsujetyauque micuanaja ishu cuita camadya iyahuaque. Turatu bacaya micuana queja catsahuamereticara juatsu tunara quisarati ayaque. Yusu Dutya Casa Tsehueratu bacaya tunaja quisarati micuana queja tuna catsahuamereti ishu bacayaque. ⁵Rehua riyaque yahuaju tuque micuanaja aniya dutya capureamaturati ishuque. Pureama micuana, dutya pureama juishuque micuanaja aniya tibu. Earaqi dyaque jida uuda cuana tsehue micuana pana jeque juya. Uu iye ishuque tsericuinashaya buchique micuana. Ejeque huecaca micuana Yusura dyaque nrecaturabuque. ⁶Micuanaratu huaraji cuana queja jidama cuejaha eje bucha juma cuanaque. Iyemerehua tuque micuana ecana. Tunaratu iduhua dutya micuanara jidama aya cuanaque cacuahuanatitsu ama.

Jesús junanucaya tupu tuaqueja nimee jujacataquiue ama

⁷Necanimehuallatime, Ecuana Cuatsashaquique junanucayaque ihuayaque, micuana ecue eatsehuequi cuanaque. Tee mere juyara tee uhuatsu eihuau bucha ihuae neacue. Trigo uhuatsu tujatu inime tsapema ihuaya nei jumetse juyaque, judadiyaque jadya. Canimehuallatitsu ama tujatu ihuaya, ejeque huecaca trigo jahuaneyaadebaya tibu. ⁸Tumebaedy inime tsapema neihuacue Ecuana Cuatsashaquique. Necanimehuallatime. Masadamatu junanucaya.

⁹Nequisaratiue jidama peya cuana Jesús queja ecatyati cuanaja ishu, ecue eatsehuequi cuanaque. Tuna ishu ni micuana quisaratiyadya jutidya, Yusura micuana jucha metse baya. Amenatu junahuie ecuana jucha metse, jucha metse ama jadya aquiue.

¹⁰Canimehuallatima neiducue canerecatiyaque, ecue eatsehuequi cuanaque. Beru yuequedya Yusuja quisarati cuejaqui cuanara iducare bucha idue neacue. Arepa ecana Yusuja quisarati cuejayaju dyaque jidama atahua ama bucha, Yusu queja nimee tuna jujacahua ama. ¹¹Ecuana ecuana bahue Yusura dyaque jida adadibuque abacata tsehue canerecatiyaque iduqui juya cuanaque. Neadebacue Job jucuareque. Turatu dyaque canerecatiyaque abacata idu acuaru Yusu queja nimee jujacatsu ama. Jadya juhuajutu Yusura

dyaque jida tsehue bacuare. Arepa Jobja tuja ai aniyaque dutya aputaterejerihua ama bucha, Yusuratu tyanucahua tuja anihuaque dyaque jetiama. Ecuana Cuatsashaquiquetu dyaque canerecabati aqui ecuana tsehue. Jida tsehue tura ecuana tsahuaya iyuhueda tsehue.

¹² Peya micuana cuejaya, ecue eatsehuequi cuanaque. Pana ijacabaca neacue. Pusha pusha ni micuana juya ama, tume tuque micuanaja quisarati ataqi ama "Yusu bahue" jadya, micuana quejenemereti ishu. Yunerique quisarati camadya ni micuana aya "Barepaju Aniyaque tu bahue", jadya ama juatsu "Riyaque Yahua Iyaquique tu bahue", jadya quisarati neaume quejenemereti ishu. Ataqi ama cuitadyatu quisarati jadya. Paju micuanaja quisarati "Jejee" jadya ama juatsu "Aijama", micuanaja quisarati quejenemereticara juatsu. Yunerique quisarati ni micuana ajacaya ama, tumetu Yusu micuana tsehue cahuaitya ama.

Eje bucha inimeju paju ama bucha Yusu tsehue quisaratiyacataquique ama

¹³ Jidama inimeju ni ecuana, Yusu tsehue nequisaratiyacara ama tuja tsahua ishu. Pureama ni ecuana, nejerura Yusu jeru eque sumiyaque. ¹⁴ Ujedaja cabatitsu tuque ecuanaja ihuarataqui Jesús queja ecatyati cuanaja huaraji cuana, ecuanaja etareju bati ishu. Etareju jutitsu ecana ujedadaja ishu Yusu queja pabacabaca. Etseri tsehue tuna patedi. "Ecuana Cuatsashaquija ebacaniju mique ecuana tediya", jadya tuna ujedaque paa. ¹⁵ Jadya bacae ni tuna Yusu aya, tura chachaneya que ejeneya que, jadidyatu juya. Ecuana Cuatsashaquiratu ujedaque chachaneya. Ujedaque ni cajuchatihua, Yusura tujatu jucha cuana apu-

pashadadiya. ¹⁶ Cajuchatitsu ecuana peya cuana queja necacuejatira, tuna ecuanaja ishu Yusu queja bacabaca ishu. Peya cuana cajuchatitsu cacuejatiyaju ecuana tunaja ishu Yusu queja bacabacataqui, tunaja jucha cuana apupasha ishu. Yurameta cabacati ecuana Yusu queja jutaqui, ujeje cachachanemereti ishu. Jida cuanaque ni Yusu queja bacabacaya, bacayadya tujatu ecana. Yusuratu ayadya tunara eje bucha bacahua eque. ¹⁷ Neadebacue Elías béru yuequedya Yusuja quisarati cuejaqui juhuaque. Tuquetu ecuana bucha cuitadya jucuare. Yusu tsehue quisaratiyaque tujatu bacacuare: "Nei jujacashacue", jadya tujatu Yusu acuare. Yusura tujatu quisarati bacacuare. Tsunuda eje uma maratu nei jucuare ama ni riya piji buchique. Quimisha mara shucuta badi tuputu nei jucuare ama. ¹⁸ Jadya juatsutu Eliasra Yusu bacanucacuare: "Nei amerenucacue", jadya tujatu bacanucacuare. Yusuratu nei amerenucacuare. Euhua cuanaque huijanucacuare. Aninucacuare ara ishu cuanaque. Eliasra ihuacuare bae, neihuacue yuneri cuitadya micuanara Yusu bacahuaque tyaya que ejeneya tibu.

¹⁹ Ejeque cuana ni micuana yuneri eque anijacahua, Ecuana Cuatsashaquira bahuityahua eque. Necuejacue ecana riyaque quisarati eque aninuca ishu.

²⁰ Micuanara ni ecana Yusu cahuaityahua tsahuaya, Yusura micuana jida baya. Turatu apupashaya tuna jidama juhua cuanaque. Majutsu ijahuaja etiquiju ejudiruuque, Yusuja yacuaju tuna judirubuque tuque ni eje tupu jacanuca ishu ama. Jadya apupashatanae tujatu jucha cuana juya, Ecuana Cuatsashaquira cuatsashaya eque junucaya tibu.

Riya tupu camadya.

Santiago

1 PEDRO

Riyaque quirica ri Pedrora Jesús queja ecatyati cuanaque japada etsapetana cuanaja ishu cuadishametse acuaque. Riyaque quirica eque tujatu ecana casaturacuare tuna casada, canimehuallatima jadya Jesús queja juishu. Casaturacuare tujatu ecana dutyaju canerecatiya cabatitsu canimehuallati ishu ama. Umae versículo cuana cabahuityati ishu jidaque ri: 1.15, 24, 25; 2.20, 24; 5.6-11.

Pedrora Jesús queja ecatyati cuanaque etsapetana cuanaja ishu quirica cuadishacuareque

1 Era rique micuanaja quirica cuadishaya. Ique Pedro; Jesucristoja yana atsaquique ique. Micuana dyadi micuana Yusu jaquedya. Micuana micuana, micuanaja yahuaju ama aniya. Dutya queja micuana tsapetanahua —Pontaju, Galaciaju, Capadociaju, Asiaju, Bitiniaju jadya. ² Ecuana Etata Yusura micuana mepehua. Yuequedyadyatu tuque bahue juhua micuana tujaque judadiyaque. “Ecue ebacua Jesucristora cuatsashaya eque tuna anibuque. Ecue Espiritura tunajatu dutya jidama cuanaque tillabuque, tuna jiteque ecue Ebacua ami quijehuetitsu majudadibuque tibu”, jadyatu Yusuja inime juhua yuequedyadya.

Yusura jida tsehue nenarucue tuja quiyuhuebati tsehue. Tura inime tsapema neanishacue.

Yusu queja judirutsu ni eje tupu jacanuca ishuque ama

³ Dyaque jida taa Yusu, Ecuana Cuatsashaqui Jesucristoja Etataque! Dyaque tujatu ecuana tsehue quiyuhuebati anihua, arepa ecuana inijeusi, jucha arida jadya juhua ama bucha. Iyacuane neri tura ecuana ahua. Pana ejenedya tuque ecuana aya tura aana ahuaque tura adadiyaque. Turatu yudijidya chacha nityatsuranuca ahua Jesucristo emajuque. Jadya tibudya tuque ecuana pana ejene aya, tura ecuana emajuque yudijidya chacha nityatsuranucabuqueque.

⁴ Yusura tuja cuanaque dyaque jidaque tyaana ahuaque tuque ecuana ihuaya. Tere baecuaque, cayuamati baecuaque tuque ecuana ihuaya. Cacualeti baecuaque tuque ecuana ihuaya. Jadya ihuae tuque ecuana aya Yusuja barepaju ecuanaja ishu eiyaque. ⁵ Jidaque ecuana tyatanayaque tu amena ebajejedya Yusu queja. Ecuana Jesús queja catyatitsu ecuana Yusura narujacaya ama, eje tupu ecuana tuaqueja judiruya tupu. Dutya amena terehuaju ecuana Yusura bamerebuque dutya, ecuana amena Ijahua quejaque einajacaque, tuaqueja ecuana judirubuqueque ni eje tupu jaca ishu ama.

⁶ Jadya tibu pureama jutidya nejucue, jidaque tyatanadadibuqueque caadebatitsu. Arepa bape bape inime cuanaju peya inime judadiya ama bucha, pureama nejujacaume. ⁷ Canerecatiya ni micuana, Yusura

micuana nime adebaya, yuneridya Jesús queja nimee jadique nime adeba ishu, oro etiquiju tirushatsu oro neri eadebau bucha. Arepa oro epuritanatereu ama bucha, micuana micuana Jesús queja nimeeque juatsu aputatere ishuque ama. Jadya tuaqueja nimee ni micuana juya, Yusura micuana muibuque Jesús junanucahuaju. “Jida taa micuana”, jadya tura micuana abuque.

⁸ Iyuhueda micuana Jesucristo baya, arepa micuanaja bama ama bucha. Tuaqueja nimee micuana juya, arepa micuanaja bama jari ama bucha. Tuaqueja catyatiya tibudya micuana dyaque pureama juya, pureamaque quisarati eje bucha cueja adebatilla jadya ataquique ama. Yusuja yacuaju cuanaque pureama juya bucha, jadidya micuana pureama juya. ⁹ Micuana micuana Jesús queja catyatihua, Yusuja tuaqueja judirusha ishu. Iyacuana micuana pureama juya, Yusura Ijahua quejaque inajacamereya tibu.

¹⁰ Yuequedya Yusu equeque quisarati cuejaqui cuanaratu dyaque inime tupuqui ahua eje bucha inajacamere Yusura ecuita cuana eauque. “¿Eje bucha ejitaju juetu juya Yusuja quiyuhuebati ecuita cuana queja?” jadya tuna cabacaduratijacama juhua. Arepa adeba jida cuita aya ama majaca tunajatu cuejacuare Yusura ecuana iyuhue tsehue babuqueque. ¹¹ Cristoja Espiritu tu tuna tsehue jucua. Tuquetu tuta taca cacuejatidya jutidya jucua. Icuena cuejadya tujatu acuaque Yusuja Emepeque nercada judadiyaque. Bahue tujatu ecana amerehua nercada juatsu tuque dyaque emui judadiyaque. Jadique bahue juatsu tunajatu riyaque dyaque inime tupuqui ahua. “¿Ejequetu Yusuja Emepeque jubuque? ¿Eje tuputu tuque junabuque?” jadya tuna cabacaduratibarecuare.

¹² “Micuana chacha jariju ama tuque ecue Emepeque nercada jubuque, eje uma mara juatsu piisi”, jadyatu Yusura cuejacuare tuja quisarati cuejaqui cuanaque. Cuejajacuaque ama tunajatu Yusuja quisarati. Riyari micuana amena Yusuja quisarati cuejatanahua. Tumeque Espiritu equedya micuana riyaque quisarati cuejatanahua, barepa juque Espiritu ecuadishaja casa eque. Riya cuanaque yuneriquetu Yusu tsahuaqui cuanara cuitadya pana adeba acara datse acuaque.

Yusura ecuana tuque cuita camadya pureamatura ishu anishacara ayaque

¹³ Necanimeticue. Micuana tacadya pana canaruti nejuque. Jesucristo junanucahuaju micuana Yusura tyabuque dyaque jidaque. Neihuajacaume junanucayaque. Tuque cuita camadya inime tupuqui neacue. ¹⁴ Ebacua cuana meretaqui ejuu bucha tsehue nemerecue Yusu. Yusu adebama jariju tuque micuana ajacahua ama Yusu cahuitisha ishuque. Iyacia bacue jadya anie nejuume. ¹⁵ Neaume Yusu cahuitisha ishuque. Tujaque juishu tura micuana mepehua. Tuquetu jidama juhua ama ni jadya jupidya. Jutaquiju tuque bae nejuque. ¹⁶ Ehuenedya tu Yusuja quisarati: "Ique jidama juma ni riya piji buchique. Jutaquiju micuana dyadi jadidya nejuque".

¹⁷ Micuana micuana juya, Yusupa micuanaja Tata; micuanapa tujaque jadya. Jadique juatsu, nemubacue. Ebacua cuanaquera etata cuanaque mubaya bucha, mubae neacue riyaque yahuaju aniya jari tupu. Ecuana eje bucha anie juhua eque tura ecuana tsuje tyabarebuque. Jidaque tujatu tyabuque tuja biji eque anihuaque cuita camadya, tuque jida camuiti aqui juhuaque etsujequi buchique. Tuja biji eque ama anihua cuanaque tujatu nerecaturabuque, tunaja jida camuibati aijama juhuaque etsujequi buchique. Jadya tibudya neaume ni riya piji buchique tuque cahuitisha ishuque. ¹⁸ Icuene micuana anicuare micuanaja baba cuanaja bahue eque. Ni eje bucha jida inimeju cuinanataquidya jutidya. Yusu queja micuana judirutaqui ama juhua jadya anie juatsu. Yusratu tsujetyacuare micuana jidaju cuinanasha ishu. Oro tsehue ama tujatu tsujetyahua ni metal tsuje arida tsehue. Arepa riya cuanaque tsuje arida ama bucha, tere baecuaque ama tume. ¹⁹ Cristodyatu catyatihua ecuanaja jucha cuana tsuje tyashu, tuja ami curusuju quijehuetitsu. Dyaque tsuje aridatu etsujequi juhua. Beru icuene cuanajatu iye bahue juhua uhuisha jucha tsujetyaqui. Uhuisha jidaque ni eje buchique ama tunajatu iye bahue juhua. Jadidyatu Cristo majuhua ecuana emajuuju, arepa tuque cajuchatima ama bucha ni cajuchati pidya. ²⁰ Yahua iyama jarijudyatu Yusura inime tupuhua: "Cuadishabuque tuque Cristo maju ishu ecuita cuana Ijahua quejaque inajacamere ishu". Eje uma mara juatsu tujatu chamacama cuadishahua. Ejitajutu junahua ecuana inajacamere ishu. ²¹ Cristo majuhua jutu Yusura nityatsuranucacuare. Muimerecuare tuja tuque. Cristo eje bucha juhua eque micuana iyacia dyaque Yusu queja nimee juya. Tuque equedya tuque micuana iyacia pana ejene aya Yusura micuana jidaque tyaana ahuaque tyadadiyaque.

²² Micuana micuana yunerique quisarati eque aniya. Jadya tibudya micuana Yusura asicadama, cajuchati baecua jadya bucha baya. Tumebaedya micuana umae cuana Jesús queja ecatyati cuana tsehue dyaque iyuhueda cabatiya. Eje buchadya iyuhueda cabaticara nejuque peya cuana tsehue, dyaque iyuhueda tsehue. "Iyuhueda mique baya", jadya camadya ama necatic-

ue; ejitajudya necabamereticue iyuhueda cabatiyaque. ²³ Cuinanametse ecuana juhua ecuana baqui cuanaque maju aqui eque. Tuna tuna maju aqui que. Jadya tibudya ecuana majubuque. Amena iyacia bacue ecuana ecuinananuca, Yusura ecuana tujaque amerehua tibu. Tuque maju baecuaque juya tibu, tujatu quisarati chacha buchique. Aputabuque amatu riyaque quisarati. ²⁴ Ehuenetu Yusuja quisarati:

"Ecuaita cuana tu yachi juque acui huija baeque. Dutya tuja casumiti aniyaque tu yachi juque shasha baeque jutidya.

Masadamatu acui huija raratsu, shasha pacacaya.

Jadidya tu ecuita cuana.

Ecuitatu tsunuda ishuque ama.

²⁵ Yusuja quisarati bacue aputa ishuque ama".

Riyaque quisaratidya rique micuana bachua jidaque quisarati micuana cuejatanaya patya.

2 Jadya tibudya nejacacue dutya jidamaque. Pusha pusha nejuume. Micuana aique amadya jutidya aida cabamereticara ebari nejuume. Peya jaque micuanaja ai aijamaque aniya baatsu ujeu nebaume. Neijillahuaume peya. Yusu adebamaque micuana jadya anie juhua. Iyacia nejacacue dutya riya jidama cuanaque. ² Ebacua nana ecuaqueja atsuna cuita camadya ebijiseriu bucha, jadidya nebijisericue Yusuja quisarati yuneri eque cuita camadya ani ishu. Jadya juyaque, micuana Jesús queja nimeedya jutidya juajeya. Tume micuana ijahuaja etiquiju ama judirubuque, Yusuja yacuaju. ³ Tume micuana Ecuana Cuatsashaquique micuana tsehue dyaque jidaque adebatsu amena jadya anie ejuu.

Yusuja cuanaque tuna Yusu aniquique buchique

⁴ Ecuana Cuatsashaqui queja micuana catyatihua. Etare ayaque tuque ecuanaja iya bahue tumu, etare sipi ishu saretanaya cuitaque, etare esipique aruhue ada ishuque. Ecuana Cuatsashaquique tu tumeque tumu buchique, chacha, inimequique. Yusu adeba baecua cuanaratu bijidamaduraya. Yusratu iyuhuedadya baya. Yusratu mepehua ecuana tuaqueja judirusha ishu. ⁵ Ecuana tumu etare eaju aniya bucha, jadidyatu Yusu aniya ecuanaju. Tura ecuana ani iyaciaque tyahua. Yusuja eaniqui buchique ecuana, tuja Espíritu ecuanaju aniya tibu. Micuana micuana tujaque tuque merequique, pae cuana buchique. Tuja Espirituja casa eque tuque micuana mereya. Micuanaratu tyaya Yusu tuja bijidaque. Jesucristo queja micuana catyatihua tibu, micuanara Yusu tyayaque tu tuja biji. ⁶ Jadya tu Yusuja quisarati ehene:

"Etare pujira dyaque saretanayaque tumu etare esipi tsucu cuanaju eadabareu bucha, tumebaedyatu era tuque mepehua.

Tuquetu Siónju jubuque eju ique aniyaju.

Tuque tuque iyahua dutya cuatsasha ishu.

Dyaque iyuhueda tuque ecue.

Tuaqueja catyatihua tibutu tuja cuanaque peya inime ama jubuque.

Pureama jutidya tuna jubuque",

jadya tu ehue.

⁷ Tuaequeja micuana catyatihua. Micuanaratu dyaque jida piji baya. Tuaequeja catyatima cuanaratu jadya ama baya. Bijidamadurabuque tunajatu Yusuja quisarati ehue equedya:

“Tumu ebari, etare puji cuanara tsumecarama acuaquetu tumu dyaque saretanayaque judadicuare”.

⁸ Tumebaedya tu ehue:

“Tumeque tumu ebari tsehue tsuru juatsu tuna tyanatanabuque.

Etihuesu juque tumu dacatanatsu tuna aputabuque” jadya.

Jesús queja catyatima cuanaratu Yusuja quisarati acarama cuitadya aya. Yusura cuejaya eque anicarama juya tibu, aputabuque tuna; ejeque tumu ebarira tyanahuaju ejuu bucha tuna jubuque. Yuequedyadyatu Yusura quisarati ahua; cuejaya eque juya ama cuanaque tuna terebuque. Tume tuna judadibuque Yusura amerehua baedya.

Yusuja cuanaque aique, eje buchique jadique

⁹ Micuana micuana Yusuja emepe cuanaque tuja etareju cuanaque buchique juishuque. Pae micuana, Dutya Cuatsashaquique merequi cuanaque. Cuare pidya camadya micuana Yusuja biji eque aniya cuanaque. Yusuja eiaque micuana. Tura micuana mepehua tura micuanaja ishuhua queja cueja ishuhua. Tura micuana mepehua jidamaque micuanaja jaca ishuhua, tuja biji eque micuana ani ishuhua. Icuene tuque micuana apuda ducu jidamaque ayaque ahua. Iyacu tuque micuana amena huecadaju jidaque ayaque aya.

¹⁰ Icuene micuana Yusuja queja ama jucua. Iyacu micuana tujaque. Icuene micuana eje buchadya jutidya jucara juhua, Yusu queja canarumereticarama juya tibu. Iyacuatu Yusuja micuana tsehue iyuhue aniya.

¹¹ Dyaque iyuhueda baya tibu micuana cuejaya, ecue eatsehuequi cuanaque. Micuana riyaque yahuaju jari tupu micuana tarepe juyaque buchique, tunaja yahuaju ama japada aniyaque ejuu bucha. Jadya ama bucha tuque micuana eje buchaju bijiseriya riyaque yahuaju cuanaque eje bucha juya cuanaque. Ecuandya jutidya capureamaturaticaraque bijiseriyaque, Yusu pureamaturacura tsehue catiya bucha tuque. Cuejaya micuana era. Yusu nepureamaturacue, micuana camadya ama. ¹² Yusu adeba baecua cuanara micuana jidama quisarati tsehuedya jutidya aya. “Cristo queja ecatyati cuanaque tuna jidama aniya”, jadya tuna pusha pusha juya. Tuna ducu aniyaque jida tuyu neanicue. Micuana jida aniya baatsutu micuanaja ishuhua jidama quisaraticara juya cuanaque juya: “Pusha ama cuitadya micuana jida aniya”. Cristo junahuaju tunajatu, “Dyaque jida taa mique”, jadya tunajatu Yusu abue.

¹³ Ecuana Cuatsashaqui jaque micuana juya tibu, huaraji cuanara cuatsashaya eque nejuque, Yusu adeba baecua cuanaque Ecuana Cuatsashaquija ishuhua

dama equisarati tibu. Riyaque yahuaju huaraji cuanara cuatsashaya eque nejuque, Ecuana Cuatsashaquija jadya inime juya tibu. Huaraji dyaque aridara cuatsashaya eque nejuque, tuque dutya epu cuana juque cuatsashaquique juya tibu. ¹⁴ Nemuibacue epu cuana naruqui cuanaque. Tuna tuna huaraji dyaque aridaja ecuadishaque. Turadya tuna cuadishahua jidama juya cuanaque nerecatura ishuhua, jida juya cuanaque dyaque jida amere ishuhua jadya. ¹⁵ Yusu adeba baecua cuanara, tuja quisarati adebaya ama cuanara micuana jidama pa juya jadya aya. Micuana ni jida juya, tume tuna micuanaja ishuhua jidama quisaratiya amadya. Jadya tibudya micuana Yusura jida anishacara aya.

¹⁶ Ejeque amena inajacatanahuaque tu peyara cuatsashaya eque juishuque ama. Jadya inajacamere micuana Yusura ahua. Jutajuyi, “Amena einajaca ama bucha, nejura ecuana eje bucha jucara juya eque”, jadya inime netupuume. Yusuja inime eque neri neanicue. ¹⁷ Dutya nemuibacue. Iyuhueda tsehue nebacue Jesús queja catyatihua cuanaque. Nemuibacue Yusu. Nemuibacue huaraji dyaque aridaje.

Jidama atayaju Cristora iduhua bucha abacata idue ataquique

¹⁸ Peya micuana cuejaya, mere puji cuana. Micuanaja patrón cuanara cuatsashaya eque nejuque. Nemuibacue ecana. Jida cuanara tuyu cuanara cuatsashaya eque camadya ama nejuque, tumebaedya canerecabati baecua cuanara cuatsashaya eque. ¹⁹ Eje bucha juyaju ama micuana jidama atabuque. Yusura micuana jida baya abacata tsehue iduya baatsu, micuanara tuque pureamaturacura aya tibu. ²⁰ Cuatsashaya eque ama juyaju ni micuana nerecaturataya, Yusura micuana jidaque ebau bucha ama baya, arepa canerecatiyaque abacata idu aya ama bucha. Jida juyaju atanayaque camadyatu Yusura dyaque jida baya, abacata tsehue iduyaque. ²¹ Yusuatu bijida micuana eje bucha atayaju abacata idu aishuhua. Cristotu, micuana nerecada eataju, nerecada atahua. Nerecadatu juhua micuana ijahuaja etiquija ejudiruaju. Aiju jidama juhua baatsu ama tunajatu nerecaturahua; abacata idutu ahua. Tumebaedya micuana Yusura amerecara aya. ²² Cristotu ni cajuchati pidya juhua ama; ni ejequetu ijahue ahua ama. ²³ Ejera ijillahuanayaju tujatu ni ejeque etsuje ijillahuanahua ama. Tuque ujeu baqui cuanara nerecaturajutu, “Pacacuarehuanati ique”, jadya ama juhua, ni riyaji buchique. Ecacuarehuanatiquetu tuque Yusu queja catyatihua. Tuquetu bahuedya juhua Etataque tuyuque, tura ecana peadya peadya eje bucha adadiyaque eje bucha tuna riyaque yahuaju juhua eque. ²⁴ Curusuju majuyaquetu Cristo nerecada juhua ecuanaja jucha tsujetya juyaque. Ecuana nerecada ejuuquetu tuque nerecada juhua. Tuquetu majuhua ecuana jucha cuana pana jacamere aishuhua, ecuana Yusuja biji eque ani ishuhua. Cuchiru tsehuetu sacuatanahua, ecuana einajaca juishuhua. ²⁵ Icuene micuana uhuisha cuana aija naruquima juneniyaque

bucha juhua. Cristo queja catyatitsu micuana Micuana Naruqui queja, Micuana Penequi queja juetinucagua.

Carequi cuanaque eje bucha anie jutaquique

3 Peya micuana cuejaya, ahuequi cuanaque. Micuanaja ahue cuanara cuatsashaya eque neju-cue, Jesús queja ecatyatira, jadya ama juatsu Jesús queja catyatimara cuatsashayaju. Micuana ni dyaque jida aniya, tume tuna Jesús queja ecatyatiudya. Aijamadyatu ni ejeque quisarati tsehue cacuaretisha ishuque. ² Micuanara ai jidamaque asicadaque aya ama baatsu, jida aniya baatsu dutyara muiyaque bahue juatsu, tuna dyadi tuna Jesús queja ecatyatiudya. ³ Cabajejeti tsehue capetamereticara nejuume. Petata ishu calluti, irine, metara, una ai tsuje arida tsehue cabajejeticara nejuume. ⁴ Dyaque jidatu capetameretitaqui jidaque camuibati ani educu juque juetiya tsehue. Necahuaitishaume peya cuana. Inime tsapema neiducue peya cuanara cahuitishacara ayaju. Jadya anie ni micuana juya, tume micuana yuneri cuitadya Yusura jida piji baya. Arepa ecuitaju jida piji cabajejeti ishuque masadama terebuque ama bucha, pureamaturanime ama tuque micuanaja Yusu jadya anie juyaque juatsu. ⁵ Béru yuequedya epuna cuana Yusuja jucuare cuanaratu Yusu pureamaturacuare jida ani, camuibati jadya tsehue anitsu. Yusu queja tuna catyaticuare. Yahue cuanaquera cuatsashaya eque ecana jucuare. ⁶ Jadyatu jucuare Sara, Abrahamja ehuanee. Tumeque epunatu yahuiqueja yana equedya jucuare. "Ique Cuatsashaquique", jadya isarae tujatu yahuique acuar. Jida juyaque juatsu micuana tumeque epuna baedya. Tume tuque micuana eiduu ni ai buchique mubatsu ama.

⁷ Tuequedya micuana cuejaya, huanequi cuanaque. Nenarucue micuanaja huane cuana micuanaja canerecabati tsehue, epuna cuana deca cuana bucha casae ama adebaya tibu. Nemuibacue ecana. Micuana tsehue tyatanapeedya tuna atanabuque Yusura jidaque tyaana ahuaque. Yusu tsehue micuana tere ishu ama anibuque; jadidya tuna tuna dyadi anidirubuque. Jutauquiju jida tsehue micuanaja huane cuana nebacue, Yusu tsehue bisuma quisarati ishu.

Jida juyaju nerecaturatayaju eje bucha jutaquique

⁸ Jutauquiju dutya neanicue pureama tsehue, cahuaite tsehue ama. Peya cuana tsehue canerecabati aqui neju-cue. Iyuhueda nebacue Jesús queja ecatyati cuanaque; micuana tsehuequi cuanaque iyuhueda baya bucha, iyuhuee necabaticue. Quiyuhue batsati aqui neju-cue. Micuana cuita camadya dyaque inime metse bucha necabatiume. ⁹ Mepeyaque micuana Yusura ahua: "Dyaque tuque ecue quiyuhuebati aniya micuana tsehue". Jutauquiju riyaque adebatsu, peyara jidama ayaju, etsuje ecana neaume. Ejera ijillahuanayaju ecana etsuje neaume. Neiyuhue batsacue jutidya ecana. ¹⁰ Neadebacue Yusuja quisarati ehuenecue:

"Jida eje bucha tsehue ama ni ecuana anicara juya, ani jidaque bijida baatsu, jidama nequisaratijacara. Pusha pusha nejujacara.

¹¹ Jidamaque neajacara. Jida tsehue peya cuana nebara. Necacasatira peya cuana tsehue pureama tsehue ani ishu.

Jidamaque inime aniyaque juatsu, masadama eje buchadya ebajarara bajejecara neara.

¹² Ecuana Cuatsashaquiratu narujacaya ama tuja biji eque aniya cuanaque.

Bacayadya tujatu tunara isarayaju.

Jidama juya cuana tsehuetu cahuaiteya jutidya", jadya tu Yusuja quisarati ehuenecue.

¹³ Ni ejera buchique micuana jidama abucue ama, micuanara ecana jida tsehue aniquerayaju. ¹⁴ Jadya ama bucha micuana eje buchaju jidama atabuque, arepa jida tuyu juya ama bucha. Jida neju-cue, Yusura micuana jidaque tyabuque tibu. Bajida nejuume ni eje tsehue. Micuana eje bucha atayaju inime necujishaueme. ¹⁵ Nemuibacue Cristo. Yana equedya neju-cue, tuque Micuana Cuatsashaquique juya tibu. Ejera ni micuana aya: "¿Eje bucha juatsumi Jesús queja catyatihua?" nebisuume quemitsa ishu. ¹⁶ Bahue neju-cue tuna cahuaite tsehue ama, muiba quemitsa jadya aishu. Jidaque neajacaume ni aiju buchique ecajuchati cabati ishu ama. Micuana jadya juyajutu micuana ijillahuanauqui cuanaque bisuya. "Cristoja cuanaque tuna tuyu ama aniya", jadya quisarati yunerique ama aatsu tuna bisuya.

¹⁷ Jida juyaju ni tunara ecuana nerecaturaya, ecuana-ja ishu tu jidadya, Yusuja jadya inime juya tibu. Jidama juyajudya ni tunara ecuana canerecatishaya, ecuanaja ishu tu jidama. ¹⁸ Cristo cuitadyatu nerecada juhua, arepa tuque ni riyu piji buchique jidama juma ama bucha. Ecuana jucha cuana tsujetyaquitu majuhua. Maju pidyatu juhua, ni eje tupu majunuca ishu ama. Jidaquetu majuhua jidama cuanaque cuarequi. Ecuana Yusu queja judirusha ishutu majuhua. Tuque ujeu baqui cuanaratu curusuju tatatsu iyehua. Emajuquetu Yusuja Espiritura yudijidya anishanuca ahua. Arepa yuneridya majuhua ama bucha, tuja espíritu tu majuhua ama. ¹⁹ Yusura tuque tuja Espíritu eque chacha nityatsuranucahuaju tujatu espíritu erisi netiya cuanaque quisarati cuejaticuare. ²⁰ Riya cuanaquetu jucuare Noé aniya patya anicuare cuanaque. Tuque cuaba ebari mere juyara tujatu ecana cuejacuare datse Yusuja quisarati. Ejenecuare ama tunaja tuque. Iducuare jari datsetu Yusura tuna tsehue cahuaite. Tyacuare datse tujatu ecana emajaca inime cacuareti ishu. Umaera piji camadyatu bacacuare. Cuaba ebariju nubitsu tuna quimisacarucu camadya chacha jucuare, peya cuana tsehue terepee ejuuque. ²¹ Noé, tuja familia cuana tsehue chacha juishu cuaba ebariju enaju cuetihua bucha, jadidya ecuana iyacua ena tsehue eutsatana ecuana jida inimeju ecuinana cuanaque. Ecuita asicada cabatitsu ama ecuana cutsameretiya. Cutsameretiya ecuana Yusura Ijahua quejaque inaja-

camerehua jadique ejitaju juishu. Jadya juyaque tuque ecuana aya dutya: "Iyacia Yusura baya jucha metse ama bucha. Tuja inime eque iyacia aniya". Einajaca ecuana ejuu, Jesucristo emajuque netitsuranucahua eque. ²² Riyaque Jesucristodyatu barepaju nubihua, Yusuja yacuaju. Tuja jida eque amacatu anidirucuar eaniqui dyaque muidaju ebarucue. Tuhua cuanaratu muiya. Barepa juque Yusu tsahuaqui cuanaque tuna tuja yana equedya juya. Tuhuaque huaraji cuanatu tuja yana equedya juya. Casada cuanaque tumbaedyana yana equedya juya. Dutya tuna tura cuatsashaya eque juya.

Yusu pureamatura ishu ani ishuque

4 Cristo nrecada juhuaque inime tupuqui neacue. Ecuana jitequetu majuhua. Tujatu inime juhua ama ni riyá piji buchique: "Canerecatinime ama tuna jiteque" jadya. Jadya tibudya micuanaja inime paju ama: "Canerecatinime ama ecuana" jadya. Cristo queja nimee jujacamaque ni ecuana nrecada juya, tumetu ecuana cajuchatishacara juyaque casa buteya. ² Jutauquiju riyaque yahuaju aniya jari tupu micuana Yusuja biji eque anitaqui, ecuita cuanaja biji eque ama. Tunnaratu dutya jidamaquedya jutidya acara aya. ³ Yusu adeba baecua cuanaque juya bae cuitadya micuana icuene juhua. Jaraquerehua micuana ejeque micuanaja caquemitiqeremaquedya jutidya. Bijiserihua micuana dutya bijiseritaquique ama. Nijuquidya jutidya micuanaja bahue juhua. Emetucu paja paja tsehue micuana pureama juhua. Chine cuana ishu micuana peya cuana bare micuana ijiji bahue juhua, peya cuana bucha dyaque nijuqui cabati ishu. Asicada micuana juhua chine cuana ishu cueya cueya cuana mui juyaque. Jadya anie micuana icuene juhua. ⁴ Iyacia bacue micuana jadya ama. Jesús queja catyatima cuanaratu bape inime tupuya tunara bisutadaque ayaju micuanara tajicarama ayaju. Ejeradya jutidya ijillahuanaya jadya tunara micuana aya, micuanaja amena iyacuaque ani baatsu. ⁵ Ejeque huecaca tuna Yusuja yacuaju netibuque, riyaque yahuaju eje bucha anie juhuaque etsujequi tyata ishu. Yusuja biji eque anihua cuanaque tujatu jidaque tyabuque. Yusuja biji eque ama anihua cuanaque tujatu nrecaturabuque. Chacha aniya jari cuanaque tujatu tyabuque, tumbaedyana emaju cuanaque. ⁶ Majucuar cuanajatu anihua emajaca Yusuja quisarati baca ishu. Cuejayaju ejenehua cuanaque tuna Yusuja Espiritura Yusuja yacuaju judirushahua, arepa ecuitaque majucuar ama bucha.

Yusura casa tyahua tsehue ecuanaja meretaquique

⁷ Amena tu japadama yahua tere ishuque. Jida inime netupucue. Yusu tsehue nequisaratijacaume. ⁸ Iyuhue tsehue necabatiajecedya jutidya peya cuana tsehue. Yusuratu dyaque jida baya, ecuana jadya iyuhueda cabatiyaju. Yuneridya ni ecuana iyuhueda cabatiya, tume nenime aputara peyara jidama ayaque. ⁹ Nebatsacue

jida; netyatsacue emajaca micuanaja etareju ejeque junayaju, eje bucha quisarati tsehue ama. ¹⁰ Yusuratu tyahua casa tuja cuanaque bape bape inime eque tuque mere ishu. Jutauquiju necatsahuaticue peya cuana tsehue Yusura micuana eje bucha ishu cuita camadya inime tyaya eque. Mayurumaja tuja patrónra tyahuaque jida tsumetaqui ejuu bucha, jaidya tuque ecuanaja dyadi tsahuataqui peya cuana, Yusura ecuanaca casa tyaya tsehue. ¹¹ Aniya ni micuanaja casa peya cueja ishu, necuejacedya ai micuanara camadya inime tupuyaque ama; Yusuja quisarati necuejacue. Peya cuana tsahua ishu Yusura inime tyahuaque juatsu, neacuedya dutya casa Yusura tyahua tsehue. Jadya micuana jutaqui micuana petaqui juya cuanaque jadya juishu: "Dyaque jida taa Yusu! Jesucristo eque tura ayaque tu dyaque jida!" jadya. "Mique camadya mi dyaque jidaque; mique camadya mi dyaque casadaque", jadya tuque ecuanaja ataqui Yusu, jadya ajacatsu ama. Jaidya tuque.

Yusuja cuanara canerecatiyara eje bucha idue ataquique

¹² Peya micuana cuejaya, ecue iyuhueda cuanaque. Necujishaume inime jidama atayaju. Nime adeba ishuque jutidya tume, yuneridya Jesús queja nimee jadique. Micuana jadya juyaque: tu butseejuque ama. ¹³ Arepa canerecatiya ama bucha, pureama nejuque. Cristo canerecatihua bucha, jaidya micuana canerecatiya. Tuque junanucatsu, tuja casa cabameretihuaju, tume micuana dyaque pureama jubuque. ¹⁴ Yusu adeba baecua cuanara micuana yuamaba, ijillahuanaya jadya aya, Cristoja cuanaque baatsu. Pureama jutidya nejuque, Yusuja Espiritu micuana tsehue aniya baatsu. Tuja Espiritu equetu Yusu casa ejitaju cabameretiya. ¹⁵ Quiyeti puji, ni chiri arida nejuume. Huaraji cuanara cuatsashaya eque nejujacaume. Peya etareju aniya cuanaque tuna eje bucha anie jutaquique cueja nejuume; epereu jutidya tuque micuana ecana. Jadya cuana juatsutu dyaque bisutada. Jadya ni micuana juya, yuneridya tunara micuana nrecaturaya. ¹⁶ Cristo jaque juatsu nrecada juyaque tu bisutada ama. "Tata, pureama ecuana juya, ecuana Cristo jaque tibu, arepa ecuana canerecatiya ama bucha", jadya jutidya Yusu neacue.

¹⁷ Amena tu piji dyane Yusura dutya ecana rehua eje bucha anie juhuaque tsujetyayaque. Ecuana riyaque yahuaju jari tupu tura ecuana nrecaturaya ecuana tuja cuanaque, tura cuatsashaya eque ama juyaque juatsu. Butsee ecuanadya ecuana rehua nrecada juya, yutsumadya Yusura cuatsashaya eque jucarama juya cuanaque dyaquedya tuna nrecada jubuque, tuja quisarati jidaque bacacarama juhua cuanaque. ¹⁸ Jadya tu Yusuja quisarati ehue: "Masada tsehuetu Yusuja biji eque aniya cuanaque tuaqueja judirubuque. Yutsumadya tuque cahuaishaqi cuanaque, tuque bijidamaduraqui cuanaque jadya tuna Yusu queja judirubuque ama". ¹⁹ Nrecada ni ecuana juya, Yusuja jadya inime juya tibu, eje bucha narumaedyana tura

ecuana ama. Jida nejujacara ama. Tuquetu Ecuana Iyaquique. Eje bucha tura acara ayaque ayadya tuja tuque.

Cristo queja ecatyati cuanaque cueja ishuque

5 Peya micuana cuejaya, micuana esiri cuanaque. Pana baca neacue era cuejayaque. Ique Jesús queja ecatyati cuanaque naru, tsahua jadya aishuque micuana baequedy. Era cuitadyatu bahua Cristo curusuju etataque majuyaju. Tumebaedya ique tuatsehue jubuque tuque casa cabameretidadihuaju, tuque emui judadihuaju. ² Uhuisha naruqira uhuisha cuana enaruu bucha, naruedya neacue micuanara Jesús queja ecatyati cuanaque, Yusura micuana narumereya cuanaque. Jida inime eque ecana nenarucue, ai peyara cuatsashayaju jipidya ama. Chipiru inatsacara aatsu ama ecana nenarucue. Neacue micuanara Yusu eje buchadya merecara ebari aya tibu. ³ Emechiquira eau bucha nereda nereda tsehue ama ecana nebacue. Micuanaja ani eque ecana nebamerecua tuna eje bucha anie juishuque. ⁴ Cristo tu Ecuana Naruquique. Tuquetu Dutya Naruquique. Tuque junanucahuaju micuana dyadi micuana emuitadya jubuque tuatsehue, ni eje tupu muitajaca ishu ama. Ejeque muitayaque ejaqui epicaque iyucaju ejutumeretau bucha, jadidya micuana tyatabuque muitaya jadique. Tumeque ejaqui epicaquetu masadama manunuya; micuana tyatayaque tu tere ishuque ama.

⁵ Tuequedy micuana cuejaya, ehue ebari cuana. Esiri cuanara cuatsashaya eque nejucue. Dyaque inime metse bucha necabatiume. Necatsahuaticue jutidya peya cuana tsehue. Yurameta camuibati nejucue. Jadya tu ehue Yusuja quisarati:

“Yusutu cahuaitya, ‘Ique dyaque inime metseque’ jadya juya cuana tsehue.

Turatu tsahuajacaya ama dutya jetiedya cabatiya cuanaque”. ⁶ Jutajiqui neiducue Yusura dutya eje bucha amereyaque, aida cabaticara tsehue ama. Tujatu dutya casa ania. Eje tupu tura huecaca iyahuaque juetihuaju tura micuana muimereya. ⁷ Airadya jutidya ni micuana bape bape inime tupumereya, nebacacue Yusu, tuja micuana inime tsapema anisha ishu. Jadidya

tura micuana amereya, tura micuana jida tsehue naru-jacaya ama tibu.

⁸ Necanaruticue bacue. Satanás tu ecuana yuamaturaque. Iba caraticara juatsu emarimariniu buchatu Satanás juneniya ecuana Jesús queja nimee amerejacacara aatsu. Jadya tibudya necanarutijacaume. ⁹ Tura cajuchatishacara ayaju, “A, aijama; bacaya ama mique ni riya piji buchique”, jadya neajacaume. Jesús queja nimeedya jutidya nejuajecue. Neadebacue; micuana camadya ama micuana nerecada ataya. Dutya queja ania cuanaque Jesús queja ecatyati cuanaque tuna micuana ataya baedya nerecada. ¹⁰ Yusura micuana jida tsehue baya. Tura micuana mepehua tuatsehue amerejaca ishu ama, muita ishu, micuana Cristo queja catyatihua tibu. Ejetsunue ama micuana nerecada juya. Tura micuana iyacuanejacaya ama. Tsahuaya tura micuana Jesús queja nimeedya jutidya juaje ishu. Cayuamati baecua tura micuana amerebuque, etare pana au eaque bucha cuejipa cuanara aetiyaju cayuamati baecua bucha. ¹¹ Terenime ama tu Yusuja casa. Dutya tu tura cuatsashaya eque juishuque. Jadidya pa-ju.

Amena ishuque quisarati

¹² Silvano eque tuque huenehua riyaque quirica eje junuque ama. Eratu tuque baya ecue eatsehuequi bucha jida. Tuquetu jida Ecuana Cuatsashaquira amereyaque mere aishu. Huenehua rique micuanaja riyaque quirica micuana casatura ishu. Era micuana yuneri cuitadya ejenemerecara aya Yusura tuja quiyuhuebatsati tsehue micuana bayaque. Tuaequeja nimee nejujacaume.

¹³ Babiloniaju cuanara Jesús queja ecatyati cuanara micuana isaramereya, micuana bucha Yusura tuja ishu mepehua cuanara. Tumebaedya Marcosra micuana isaramereya. Ecue ebacua bucha iyuhueeque tuque ecue. ¹⁴ Casitatitsu quisaratibare, emetucuju quinati jadya nejucue peya cuana tsehue iyuhueda cabatiyaque cabamereti ishu. Yusura inime tsapema neanishacue, dutya micuana Cristoja cuanaque.

Riya tupu camadya.

Pedro

2 PEDRO

Riyaque ri beta ishuque quirica Jesús queja ecatyati cuanaja ishu Pedrora cuadishacuaque. Cuejacuare tujatu ecana Jesús eje buchique cuejaqui cuanaque tuyuque ama junabuque cuanaque. Jesús queja ecatyati cuana-jatu yunerique ama ejenetaqui ama ni canimehuallatitaqui, jadya tujatu ecana cuejacuare. "Yuneri cuitadyatu Ecuana Cuatsashaquique junanucabuque", jadyatu jucuare. Umae versículo cuana jida cabahuityati ishuque ri: 1.3-8, 21; 2.9; 3.9, 14.

Pedrora Jesús queja ecatyati cuanaque isaracuareque

1 Era rique micuanaja quirica cuadishaya, micuana Jesús queja ecatyati cuanaja ishu. Simón Pedro ique, Jesucristo merequique. Tuja yana atsaquique ique. Tuque tuque ecuanaja Yusu, Ecuana Inajacamerequique. Tuquetu dyaque tuyu nerique. Tura micuana tuaqueja catyatishahua, ecuana tuaqueja catyatihua bucha. Ecuana tuaqueja ecatyatique tu ai dyaque tsuje arida buchique. ²Yusura jida tsehue ne-narucue tuja qiyuhuebati tsehue. Tura inime tsape-ma neanishacue. Jadya micuana ejuu Yusu, Ecuana Cuatsashaquique Jesús jadya dyaque adebaajetsu.

Cristoja cuanaque eje bucha anie jutaquique

³Yusura ecuana tuja casa tyahua ecuanara dutya tu-ja biji eque ani ishuque sareyaque ecuanaja ani ishu. Jesús pana adeba aatsu, jadya ecuana aniya. Tura ecuana mepehua tuque bae juishu, emui jadya juishu. ⁴Riyaque casa equedya tura ecuana tsujema tyahua dutya ai jidaque tura ecuana tyaana ahuaque. Dyaque iyuhuedaque tura ecuana tyaana ahua, dyaque jida saretanayaque. Tura tyaana ahuaque tyadadiyaque ejeneyaque tuque ecuana jidamaque ama inime tupuqui aya. Riyaque yahuaju Yusuja cuanara ama bi-jiseriyaque ama tuque ecuana inime tupuqui aya. Jida tuyu ecuana judadibuque Yusu bucha. ⁵Jadya tibudya Yusura amerecara aya bucha nejuajecuedya jutidya. Jesús queja catyatitsu, necacasaticue jida tuyu ani ishu. Jida tuyu anitsu, pana adebaajedyta jutidya neacue dyaque Yusuja biji eque juaje ishu. ⁶Dyaque Yusuja biji eque aniaje ishu adebaajetsu, micuana tacadya necanaruticue jidamaque aishu ama. Micuana taca canaruti juatsu neiduajecuedya eje bucha juyaque canimehuallatitsu ama. Iduajeyaue, Yusura inime tupuya bucha tupue neacue. ⁷Jadya inime tupuyaue, Jesús queja ecatyati cuanaque jida nebacue, micuana tsehuequi cuanaque ebau bucha bae ecana neacue. Jadya cabatie juyaque, dutyadya ecana iyuhue tsehue nebacue, arepa ecana Jesús que-ja catyatima paju ama bucha.

⁸Jadya anie micuana jutaqui. Jadique ni micuanaja inime aniajeya, tume tuque micuana Ecuana Cuat-

sashaqui Jesucristo adebaajedyta jutidya. Tuja yana equedya micuana juajebuque, acui caca cueda jubahue bucha. ⁹Ejeque jadya anie ama juyaque tu atucamaque bucha, japadama capetatiya bucha. Nime aputahuatu Yusura tuja jucha cuana tillahuaque. ¹⁰Yusura micuana ihuarahua, mepehua jadya ahua. Jadya tibudya juneni, camuibati jadya tsehue pana yunerine neacue micuana tujaque, ecue eatsehuequi cuanaque. Jadya anie juatsu micuana Yusu queja judirubuque. Tsajaja catuputiyaque rihuima eju tuque tsajajaya tupu etsajajau bucha. ¹¹Micuana ni tuja yana equedya jujacaya ama, tume micuana aija peretsu ama nubidirubuque Ecuana Cuatsashaqui Jesucristo enaruqui jusiriyaju. Micuana bacue tumbaedyta enaruqui jubuque Ecuana Cuatsashaqui tsehue jupee.

¹²Icuene tuque micuana bacahuadya quisarati yunerique. Ejenedyta tuque micuanara. Riyaque yuneri equedya micuana aniya. Jadya ama bucha micuana era bacamerejacaya ama dutya riya cuanaque, micuana nime aputa ishu ama. ¹³Ique majuma jariradya micuana ecue dutya riya cuanaque adebameretaqui jari. ¹⁴Bahuedya ique masadama majudadiyaque; Ecuana Cuatsashaquira bahue amerehua. ¹⁵Dyaque jida micuana adebamerecara aya dutya riya cuanaque tumbaedyta ique majuhaju micuanaja adeba ishu.

Pedrora Cristo emui, pureama ea jadya bacuareque

¹⁶Era micuana cuejehua Ecuana Cuatsashaqui Jesucristoja casa. Junanucabuque tuque. Jadya micuana cuejehua. Jadya micuana cuejehua; ai ecuedya jutidya cuatsabiji ama tuque yudijidya cuejanuca cuejanuca ahua. Neejenecue taa ique, ique cuitadya tuatsehue junenihua tibu. Ecue yatuca tsehue cuitadya tuja tuque dyaque casa aniyaque bahua. ¹⁷Jesús Etataque Yusura mui, pureama jadya ayajutu eradya bahua. Eradyatu bacahua Dutya Casa Tsehueque jadya quisaratiyaju: "Riyaque rique ecue ebacua dyaque iyuhuedaque. Ique dyaque pureama juya tuatsehue", jadya juyaju. ¹⁸Ecuana cuitadyatu bacacuare riyaque etsuri barepa equeque. Ecuana ematajudyatu Jesús cabameretihua.

¹⁹ Icuene tuque ecuana bacahua Yusuja quisarati cueja juya cuanara cuejayaju. Amena iyacua barepa juque Yusuja etsuri bacatsu, dyaque ejenedya tuque ecuana aya Yusuja quisarati yunerique. Micuanajatu pana ijacabaca ataquí Yusuja quisarati cuejaetibe juhua cuanara cuejehua cuanaque. Tunaja quisarati tu apuda ducu ude tiquida juya buchique. Huecacayaju purari ebari cuinanayaque ecuana eihua bucha masadama huecacayaque adeba ishú, jadya ihuae tunajatu acuare Yusuja Emepeque junabuqueque, Yusuja quisarati cuejatayaque pana adebamere anayaque adebatsu. ²⁰ Riyaquedya tu dyaque saretanayaque. Beru tuna eje bucha judadiyaque cuejaetibehuaque tunaja adebadya jutidya ama tunajatu Yusuja quisarati cuejehua. Ecuana bacue tumbaedy aje bucha adebataqui amadya baya ecuanaja inime taca. ²¹ Yusu equeque quisarati cuejaqui cuanaque tuna tunaja bahue ama quisaratinicuare. Yusuja Espiritura huecashayaju tunajatu hueneajecuaré Yusura ecuana bahue amerecara ayaque.

Pusha pusha bahuityaqui jucuare cuanaque

(Judas 4-13)

2 Berutu anicuare israelita cuana yunerique ama bahuitya juya cuanaque. Tume patya jucuare baedyatu aniya iyacua micuana yunerique ama bahuityacara juya cuanaque. Tunaja pusha pusha bacatsu tuque micuana yunerique bucha bacaya. Bacaya ni micuana ecana, tume micuana pana cayuamati judadiya. Ecuana Cuatsashaquiuetu majuhua tunaja jucha cuana tsujetya ishú. Jadya ama bucha tunajatu bijidamaduraya. Tunaja inime cuitadya jutidya tuna Yusura ijahuaja etiquiju nudyaabuque. "Nerecatrataya ecuana", jadya tunaja inime juyaju ama tuna nerecatratabuque. ² Eje uma tuna tume pusha pusha ari cuanara asicada bahuityahua eque aniya. Tunaja jidama ani baatsu tuna Cristoja ishú eje uma jidama quisaratiya, tuna Jesús queja ecatyatique bucha baatsu. ³ Tume pusha pusha bahuityaqui cuanaratu chipiru dyaquedya jutidya bijiseriajeya. Jadya tibudya tunara micuana eje buchadya jutidya cuejaya, micuanaja ecana tsujetya ishú. Jidama inime nebaume. Berutu Yusura inime iyacuare tuna nerecada juishuque. Tuquetu bahuedya tuna eje bucha juyaque. Ejetsunue juatsu ama tuna Yusura ijahuaja etiquiju nudyaabuque.

⁴ Yusratu nerecada amerema ama aya tuque baca baecua cuanaque. Neadebaradya barepa juque Yusu tsahuaqui cuanaque cajuchatihua cuanaque. Yusuajatu aijama juhua canerecabati tuna tsehue. Ijahuaja etiquiju jutidya tujatu ecana ijehuecuare. Apuda ducu tujatu ecana ishacuare. Cadena tsehue risi, iya jadya tujatu ecana acuare, tura ecana icuene tuna eje bucha juhuaque tsujetyayaque huecaca juetiya tupu. Jidaque-tu tyatanabuque tuyu anihua cuanaque. Tuyu ama anihua cuanaque tuna nerecatratabuque. ⁵ Neadebaradya Noé aniya patya jidama cuanaque anicuare cuanaque. Yusura tunajatu jucha cuana apupashahua ama. Ena eque jutidya tujatu ecuita cuana tillacuare.

Noé, tuja etareju cuanaque jadya cuita camadya tujatu ecana chachanehua tuna ehuidiuju. Enaja tillama jarijudya tuna Noéra cuejajacacuare ama tuna jidama jujaca ishúque. ⁶ Neadebaradya ecuita jidama cuanaque Sodomaju, Gomorraju anicuare cuanaque. Yusratu tirushacuare tumeque beta epu ebari ecatsé; pana murutatu amerehua. Duya tuhua aniya cuanaque tujatu ecana iyetillahua. Pana aputasha tujatu tumeque epu ecatsé acuare; riya camatu ni aira buchique nityatsuranucataqui ama baya. Jadya tujatu acuare, ecuita Yusu adeba baecua cuanaque jidama cuanaque tume bucha adadiyaque caadebati ishú.

⁷ Sodoma pana aputasha ama jarijudyatu Yusura Lot cuinanashacuare. Tumeque ecuitatu Yusuja biji eque aniyaque jucuare. Eje buchadya jucaratu jucuare amena tuja epuju aniya cuanaque Yusuja quisarati bacacarama juya cuanaque jidama juya baatsu. ⁸ Duya huecacatu Lotra bacuare, bacacuare ecuita cuana jidama juya cuanaque. Tuquetu amena ecajijiti jucuare jidama juyaque bau, baca jadya aya tibu. ⁹ Ecuana Cuatsashaquiuetu Ijahuaja quejaque inajacamere bahue Tu- aqueja ecatyati aniya cuanaque. Tuna nerecada juyaju tujatu ecana naruya. Tumbaedy tujatu jidama cuanaque nerecatratabuque. Nime aputaya amatu tuque tuna nerecatratabuque ishú, tuna peadya peadya rehua eje bucha anie juhuaque tsujetyayaque huecaca. ¹⁰ Tunaja jidama abahue eque cuitadya jutidya bisutada anie juya cuanaque neri neri, Ecuana Cuatsashaquira amereyaque bijidamaduraju cuanaque neri neri dyaque tuna Yusura nerecatratabuque. Yunerique ama bahuityaqui cuanaratu muibaya ama Yusu, ni riyaque yahua juque huaraji cuana. Cuejataqui ama tuna. Muibaya ama tunajatu ejitaju ama casa tsehue cuanaque. Ijillahuanaya jutidya tunajatu ecana. ¹¹ Barepa juque etsahuaqui cuanaque tuna dyaque casada, yunerique ama bahuityaqui cuanaque bucha ama. Tunajatu dyaque cacuatsashati aniya, pusha pusha bahuityaqui cuanaja bucha ama. Arepa Yusuja yacuaju jidama cuanaque tuna jidama juyaque cueja ishú tuyudya ama bucha, aya amadya tuna jadya. Jadya ama buchatu pusha pusha bahuityaqui cuanara jida cuanaque ijillahuana tsehue eje bucha cuejataqui ama baya.

¹² Cuanubi cuana tu ina, iye, arahuana jadya ishúque jutidya. Pusha pusha bahuityaqui cuanaque tuna tumeque cuanubi cuana baeque. Eje bucha tuna jucara juya equedya jutidya tuna juya, eje bucha ejudadiuque inime tupuma. Tuna tuna tsaya jutidya tunara adebaya ama tsehue. Ecuana cuanubi cuana iyeya bucha, jadidya tuna Yusura tillabuque. ¹³ Tuna tuna canerecatibuque, peya cuana canerecatishahua cuarequi. Bisutadaye ayaque tuna pureama juya, meta jipidya ama, huecada tupu tumbaedy. Micuana iyuhueda cabatiyaque cabamereti ishú yuhua cama araarayaju, tuna dyadi tuna tuhuadya juya micuana tsehue, arepa tuna dyaque jidama aniya ama bucha. Jida asicadamaju asicadaque bucha jutidya tuna.

¹⁴ Dutya epunadya jutidya tunajatu baatsu bijiseriya. Yurameta cajabatijacacarama ecana juya epuna ahuequi cuana tsehue. Ajacacarama tuna aya Yusu cahuitisha ishuque pusha pusha bahuityaqui cuanara. Huica mutya pujira jae emihuaqui tsehue tsetatsu eau bucha, tunajatu ijahue acara aya Yusuja quisarati adeba jidama aya jari cuanaque, cajuchatisha ishu. Dyaque chipiruidya jutidya tuna juajecara juya. Peya cuana yuamatura tsehue tuna aniya; eje tupu cuana tuna yuamaturatanadadibuquedy. ¹⁵ Cuji ejura ediji cujishahua bucha tuna, jadidya tuna Yusura amereya eque jujacahua. Balaam Beorja ebacuaque jidama juhua eque cuitadya jutidya tuna juya. Tatseratu Balac tsehue betara tupu inime tupuhua jidama tsehue chipiru ina ishu. ¹⁶ Tuja jidamaque inime tibusu nereda atanacuare. Yusratu tura asna isaaniyaque quisaratishacuere ecuita quisaratiya bucha. Jadya amerejacaetu tuja asnara acuaque tuque equijahuati cuita jucara juyaque.

¹⁷ Ena cani euraque badirutsu, yanacana tuque ecuanana ena esareu. Barepa huani sehuedaque masadama cuetihuaque; yanacanadya tuque ecuanana nei ejuuque ihuaya. Tumebaedya tu pusha pusha bahuityaqui cuanaque. Bahuitya bahuityaya baatsu tuque ecuanana ecana yunerique cuana bahuityaya bucha ebau. Tume taa jadicua ama. Yusratu quisarati iyahua. Nerecada tuna jubuque dyaque apuda ducu ni eje tupu cuinana ishu ama. ¹⁸ Tunaja quisarati tu yuneri aishuque ama, arepa tuna quisarati dyaque junuda aya ama bucha, arepa tuna quisaratiyaju bacaqui cuanara dyaque bahue taa ecana jadya aya ama bucha. Tuna tuna juya: "Yusutu pureama juya ecuanara asicadaque ayaque pureama juyaju, bisutadaque ecuanara ayaju" jadya. Jadya tsehue tunajatu ijahue aya butseeju amena Yusu adeba baecua cuanaque aniya bucha anijacacara juya cuanaque. Huicamutya puji jae emihuaqui tsehue etsetau bucha, jadya tsetae tunajatu aya tuna bahuitya bahuityayaju bacaqui cuanaque. ¹⁹ "Arepa micuana Yusura cuatsashaya eque ama juya ama bucha, eanidya tuque micuanaja casa jidamaque ajaca ishu", jadya tuna pusha pusha juya. Jadya ama buchatu tunaja cuitadya aijama casa tuna yuamaturaquique ajaca ishu. Metsequique emechiquira jacataqui ama ebau bucha, jadya tunajatu ajacataqui ama baya tuna yuamaturaquique. Ecuanara ajacataqui ama bayaque tu ecuanana metseque buchique. ²⁰ Ecuanana Cuatsashaqui Jesucristo queja catyatitsu tuque ecuanana ajacaya bisutadaque tuaqueja catyatima cuanara aya cuanaque. Cuanubi trampa juque huanashahua bucha ecuanana. Umaeratu yudijidya anuca aya bisutada ayaque ajacahuaque. Cuanubi trampaju inatana beta ejuque bucha tuna, tuna taca cuinanataqui ama. Jesús queja catyatima jariju tuna jidamaju anihua. Iyacu yudijidya anuca jidamaque aatsu tuna juhua bucha dyaque jidamaju. ²¹ Dyaque jida taa tunaja adebataqui ama juhua Cristo. Tuna anihua bae aninucagua tibu tuna Yusura dyaque nerecaturabuque. ²² Micuanaratu adebayadya dyaque jida riyaque quisarati: "Cadacatitsutu

chapara yudijidya aranca aya. Nahuiyaquetu cuchi uyu uyu asicadaju yudijidya mee mee junucaya". Jadya tu quisarati yunerique ejenetsu, yudijidya icuene anihua bucha anie junucayaque.

Yuneridya Ecuana Cuatsashaquique junanucabuque

3 Cuadisha beta ishu rique micuanaja quirica cuadishaya, micuana ecue iyuhueda cuanaque. Riyaque quirica ecatse eque micuana huecashanucagua icuene micuana bahue juhuaque. Jidaque cuita camadya micuana inime tupumerecaca aya. ² Neadebacue Yusura huecashahuaju eje bucha judadiyaque cuejaqui juhua cuanara cuejahua cuanaque. Tunaratu Yusura merecuare. Tumebaedya neadebacue Ecuana Cuatsashaqui Inajacamerequiri amerehuaque. Tura cuitadya cuadishahua cuana eque tuque micuana bacagua tuja quisarati.

³ Cristo junanucayaque inime tuputibunetsu neadebacue riyaque. Terehuetu anibuque jidama juya tsehue eje bucha jucara juya tsehue pureama jubuque cuanaque. Ijaribabuque jutidya tunara micuana. ⁴ Abuque tunara micuana: "¿Eje bucha juatsu tuque micuana ejeneya Jesús junanucaya jadicua? Inimema tibu jadicua neejenecue. Junanuca ana juhua tibu, ¿juataquiju jatsutu eje bucha juatsu tsunutaya junanuca ishu? Ecuanaja baba cuana tura junanuca ana ahua cuanaque tuna majuhua. Yahua iyatanahua equeque tumebae teredya jutidya", jadyatu quijaribati puji cuana jubuque. ⁵ Huecatanaya ama tuna yahua iyatanahua equeque juhua bae ama dutya juetibeyaque. Tuja quisarati equedy jutidyatu Yusura barepa yahua jadya iyahua béru, iyacua ama. Ena juque tujatu yahua cuinanashahua. Ena tura pacacashajacaya ama eque tujatu naruya dutya ai riyaque yahuaju aniyaque. ⁶ Tsunuda eje uma mara juatsu tujatu tillahua ena eque dutya aniyaque. Enatu dyaque arida amerehua tuna huidishatilla ishu. ⁷ Yusura jadya amerehua tibusu iyacua barepa yahua jadya aniya. Tura nucadyatu iyahua etiqui eque tere ishuque. Jadya tu eiya, Yusura ejuque huecaca peadya peadya eje bucha ani juhua eque tsujetyaya tupu. Tumeque huecaca tuna Yusura nerecaturabuque tuatsehue cahuitihua cuanaque. Quijaribati arida cuanaquetu riyacuanaque nime aputaya.

⁸ Yusratu huecaca piye baya ama ecuita cuanara piye baya bucha. Tuja ishu tu peadya huecaca, peadya mil mara tsehue beta tupu. Nenime aputaume riyaque, ecue iyuhueda cuanaque. ⁹ "Ecuana Cuatsashaquique junanuca ana juhuaque dyaque cuita tsunutahua tibu, juya amatu tura quisarati ahua eque", jadyatu umaera inime tupuya. Jadya ama tuque. Tuja datsetu bijidama ni ejuque buchique ijahuaja etiquiju nudya ishu. Jadya equetu junanucama jari. Tyaya jari tujatu emajaca jucha arida cuanaque inime cacuareti ishu.

¹⁰ Yuneridyatu Ecuana Cuatsashaquique junanucabuque. Muya jutidya, ihuayaju amatu junanu-

cabuque, chiri puji meta ejunau bucha. Tumetu barepa puritanaterebuque, yachi tiruya bucha sicacae. Barepaju aniya cuanaquetu etiquira pana tilla abuque. Yahujaju dutya ai aniyaquetu etiquira pana tilla abuque.

¹¹ Yusura dutya riya cuanaque tillaya tibu, tuque cahuaishisha ishuque neaume ni riya piji buchique. Yusuja biji eque jutidya neanicue. ¹² Eje buchadya juetishahuishacara neacue huecaca Yusura Jesucristo masadama cuadishanuca ishuque. Inime tupuqui neacue tumeque huecaca pureama ishuque. Tumeque huecacatu barepa ejita juque etiquira aputashabuque. Dutya aniya cuanaque tuna etiquija jujura urishatillabuque. ¹³ Yusuratu iya ana anucahua iyacuaque barepa, iyacuaque yahua jadya. Tuhuatu dutya jida jubuque, Yusuja inime eque.

¹⁴ Jadya tibudya dutya riyaque inime cuana judadiya tibu, necacasaticue Yusu cahuaishisha ishu ama, ecue iyuhueda cuanaque. Jadya anie ni micuana juya, tume "Jucha metse ama micuana baya. Ai asicadamaque bucha micuana baya. Ique pureama juya micuana tsehue", jadya tura micuana abuque. ¹⁵ Ecuana Cuatsashaquique tu junanucama jari; jetiama tujatu ecana Ijahua quejaque inajacamerecara aya jari. Neadebacue riyaque. Pabloratu huenehuadya dutya riya cua-

naque micuana cuejayaque. Tuquetu ecuana tsehuequique dyaque iyuhuedaque. Yusura cuitadyatu adebamerehua, micuana cueja ishu. ¹⁶ Dutya tura quirica huenehua cuanaju tujatu cuejaya riya cuanaque. Eje buchaju: tu ibeda adeba ishu tura huenehuaque. Jadya tibudya Pablora huenehuaque Yusuja Espiritura ama bahuityaya cuanara tuyu ama cuejaya. Cuareya jutidya tunaja tuque. Tumebaedyatu aya Yusuja quisarati adeba jidama aya jari cuanara. Jidama tunajatu cuejaya Pablora huenehuaque camadya ama. Tumebaedya tunajatu dutya Yusuja quisarati pana cueja ama aya. Tunaja inimedya tuna Yusura majuhujaju nerecat-urabuque.

¹⁷ Micuana micuana amena icuenetadya bahue yunerique ama bahuityaqui cuanaque eje bucha judadiyaque, ecue iyuhueda cuanaque. Jadya tibudya necanaruticue tumeque ecuita cuejataquima cuanara ijahue au, kujisha jadya eauju, Yusuja quisarati tunara eejenemerejacau tibu. ¹⁸ Ecuana Cuatsashaquique Jesucristo Ecuana Inajacamerequiija biji equedya jutidya neaniajecue. Neadebaajecuedya jutidya tuque eje buchique. ¡Dyaque jida casada taa ecuanaja Etata Yusu! ¡Muitanajacaya ama tuque! Jadiya paju.

Riya tupu camadya.

Pedro

1 JUAN

Riyaque quirica ri Juan Jesúsja emepera huenemetse acuareque. Amena esiri cuitara rejari huenecuare. Turatu huenecuare etataquera ebacua cuanaque jida ecuejau bucha cuejae. Bahuityacuare tujatu yurameta iyuhueda pa ecuana peya cuana tsehue cabatijacataqui ama jadya. Cuejacuare rejari ecuana amena Yusu jaque tibu eje bucha anie jutaquique. Riyaque yahuaju cuanaque bucha ama ecuana. Yusura cuatsashaya eque juyaque ama bucha ama ecuana. Pana ejenedyapa tuque ecuanaja ataqui Yusu tsehue tere baecua anidirunucabuqueque, Jesús queja catyatihuaque juatsu.

Umae versículo cuana jida cabahuityati ishuque ri: 1.7, 9; 2.15, 28; 3.2-3; 4.10-12; 5.13-15.

Yusu eje bucha caadebameretie ecuita cuana queja jucuaque

1 Quirica rique micuanaja cuadishaya micuana Jesús queja ecatyati cuanaja ishu. Ique Juan. Jesucristo eje buchique rique micuanaja hueneya. Tuquetu Yusu Adebamerequique. Tudyatu Ecuana Anisirishaquique. Yahua iyama jarijutu anicuare. Tuque riyaque yahuaju junahuaju ecuana tura mepecuare cuanara tuque ecuana bacacuare tuque quisaratijaju. Ecuana yatuca tsehue cuitadya tuque ecuana bacuare. Bacuare ecuana tuque ai juyaju. Ecuana cuitadyatu ecuanaja emetucu tsehue jabacuare. ² Riyaque ecuana ani tere baecuaque tyaquiquetu ecuana queja cabameretihua. Bacacuare tuque ecuanara. Jadya tibudya micuana iyacua ecuanara tuque eje buchique cuejaya. Tuque maju baecua siri aniyaque micuana ecuanara cuejaya. Icuene cuitatu tuque Etataque tsehue anicuare. Tuequedyatu ecuana queja cabamereticuare. ³ Ecuana bacuareque, bacuareque jadya micuana ecuanara cuejaya, ecuanara ejeneyaque micuanaja ejene ishu, ecuana tsehue micuana peadya camadya bucha juishu. Tume tuque ecuanaja dutya micuana tsehue ecadutyati aniya ecuanaja Etata Yusu tsehue, tuja Ebacuaque Jesucristo tsehue jadya. ⁴ Micuanara ni pana baca aya era riyaque quiricaju cuejayaque, tume micuana dyaque jida juya ecuana bucha. Jadya juatsu rique micuanaja quirica cuadishaya.

Dyaque jidaque juya tibu Yusu hueca buchique

⁵ Riyaque quisarati ri Jesucristora ecuana bahuityacuareque. Cuejaya micuana ecuanara. Yusu tu dyaque jidaque; hueca buchique tume. Aijama tujatu jidamaque; ni apidya tujatu jidamaque aya ama. Apuda buchique ama tume. ⁶ "Yusu tsehue ecadutyati ecuana aniya", jadya ni ecuana juya, arepa Yusu adeba baecua cuanaque aniya baedya jutidya ecuana aniajeya ama bucha, tume ecuana pusha pusha arida. ⁷ Yusu tu hueca buchique, tuque jida jujacaya ama tibu. Tuque bucha tuyu ni ecuana aniya, tume tuque

ecuanaja cacareneti ishuque aniya peya cuana tsehue. Tume tura tuque ecuanaja dutya jucha apupashaya, tuja Ebacuaque Jesucristo ecuana jiteque curusuju ami quijehuetai, maju jadya juhua tibu.

⁸ "Juchama ique", jadya ni ecuana pusha pusha juya, ecuana tacadya jutidya ecuana jahue catiya. ⁹ Jucha cuana ni ecuana Yusu queja cacuejatiya, tillayadya tuja tuque ecuanaja, tura aana ahua baedya. Dutya jidama cuanaque tuja tuque ecuanaja tillaya. Ayadya tuja tuque, tuque tuyu jujacaya ama tibu. Ayadya tujatu tura aana ahuaque ayadya tibu. ¹⁰ Aya ni ecuana quisarati: "Ique ni riya piji buchique cajuchatima", tume taa tuque ecuana Yusu pusha pusha ariju aya, tura ecuana dutya juchaqui jadya aya tibu. Ejeneya ama di taa tuque ecuana tuja quisarati yunerique, ai ecuana tuja quisarati yuneri eque aniya batudya.

Cristo tu Ecuana Icuenequique

2 Peya micuana cuejaya, ecue ebacua bucha cuanaque. Cuadishaya rique micuanaja riyaque quirica, micuana ecajuchatiuju tsahua ishu. Jadya ama bucha cajuchatiya ni ecuana, Jesucristotu ecuana icuene ishu quisaratijacaya ama ecuanaja Etata Yusuja yacuaju. Jesucristo tu tuyuque neri. Tuquetu juchama nerique. ² Tudyatu cuitadyatu majuhua ecuanaja jucha cuana tsujetyaqui. Jadya tibudya tuque ecuanaja Yusura apupashaya. Ecuana jaque camadya ama tujatu apupashaya, tumebaedya dutya queja Jesús quejaque catyatiya cuanaja.

³ Yusura cuatsashaya eque ni ecuana aniya juneniya, tume tuque ecuanaja yuneridya tuatsehue cacareneti ishuque aniya. ⁴ "Yusuja ecare dyaque jida iyuhuedaque ique", jadya ni ecuana juya, tura cuatsashaya eque aniyaque ama, jutaquiju ecuana pusha pusha arida. Aishu ama tuque ecuanaja quisarati. ⁵ Tura amereya eque ni ecuana juya, tume tuque ecuana yuneri cuitadya dyaque iyuhueda baya. Tume ecuana yuneri cuitadya Yusu tsehue ecadutyati aniya, Yusuja biji eque aniyaque juatsu. ⁶ Aya ni ecuana quisarati: "Yusu tsehue ecuana ecadutyati aniya", jutaquiju ecuana Jesucristo anicuare bucha anitaqui.

Cacuatsashati iyacua eque ecuana anitaquique

⁷ Hueneya rique micuanaja quirica Jesucristora ecuana amerehuaque micuana huecasha ishú, ecue iyuhueda cuanaque. Tuja cacuatsashati tu cacuatsashati ri butseejuque ama. Tuaequeja butseeju catyatisu tuque micuana bacajacahua ama. Riyaque cacuatsashati beru sirique micuanara béru bacahuaquedy. ⁸ Jadya ama bucha riyaque cacuatsashati era micuana huecashayaque ri iyacuaque; beru sirique buchique ama riyá. Butseeju ecuana Cristora riyaque yahuaju junatsu bamerenahua peya cuana ecuanaja iyuhue tsehue bataquique. Iyacua ecuana tumebaedya peya cuana tsehue iyuhue tsehue cabatiya. Jesucristo yahuaju junahuajutu apudaque cuetiyaju, hueca iyacuaque neri huecacuinaya bucha juhua.

⁹ Aya ni ecuana quisarati: "Huecaju juneniya buchique ecuana", peya cuana Jesús queja ecatyati cuanaque ujeu bayaquedy jutidya, pusha pusha arida ecuana. Apuda ducu aniya cuanaque jari buchique ecuana. ¹⁰ Yuneri cuitadya ni ecuana iyuhueda baya Jesús queja ecatyatique ecuana tsehuequi cuanaque, jadya juyaque aniyadya ecuana huecaju bucha, Yusuja quisarati equedy ecuana aniya tibu. Ecuana huecaju bucha aniya tibu, tuque ecuana peya cajuchatisha ishúque aya ama. ¹¹ Ujeu ni ecuana baya ecuana tsehuequi cuanaque, apuda ducu bucha jari ecuana aniya. Apuda ducu juneniyaque tu atucama buchique; baya amatu eju cuayaque. Tumebaedya ecuana dyadi caadebatiya amadya ecuana jidama juyaque.

¹² Umae micuana butseeju Jesús queja catyatihua, micuana ecue ebacua bucha cuanaque. Quirica rique micuanaja cuadishaya, Yusura micuanaja jucha cuana apupashahua tibu. Tura tuque micuanaja apupashahua, Jesucristo majuhua tibu. ¹³ Tata ecana, umae micuana amena béru Jesús queja ecatyatique. Quirica rique micuanaja cuadishaya, micuanara yuneri cuitadya Jesús adebahua tibu. Yahua iyama jarijutu tuque anihua. Ehue ebari cuana, umae micuana ejetsunue ama Jesús queja ecatyatique. Quirica rique micuanaja cuadishaya, micuana Satanásra cuatsashaya eque jujacahua tibu.

¹⁴ Micuana butseeju Jesús queja ecatyati cuanaja ishú rique quirica cuadishaya, micuanara yuneridya Etata adebaya tibu. Tata ecana, quirica rique micuanaja cuadishaya, micuana Jesús yahua iyatanama jariju anicuaque eadebaque juya tibu. Ehue ebari cuana, quirica rique micuanaja cuadishaya, micuana Yusuja biji eque ani ishú cacasatijacaya ama tibu, micuana Yusuja quisarati eque aniajeya tibu, micuana Ijahuara cuatsashaya eque amena jujacahua tibu.

¹⁵ Iyuhueda nebaume Yusu cahuaítishaqui cuanaque. Nebijiseriume jidama cuanaque Yusuja ama cuanara bijiseriya cuanaque. Iyuhueda ni ecuana baya Yusu cahuaítishaqui cuanaque, tume taa tuque ecuana eje bucha iyuhueda bataqui amadya baya ecuanaja Etata Yusu. ¹⁶ Yusuja ama cuanaratu aya Yusu cahuaítisha ishúque. Eje umara tunajatu bisutadaque,

caadebati baecuaque inime acara aya. Eje umara petacara aya bisutadaque. Dutya petayaque tuna tunaja ishú bijiseriya. Ai aniya cabatitsu tuna casumitiya; dyaque tuna muitacara juya. Dutya riyá cuanaque aishuque bijiseri tu ecuanaja Etata Yusu equeque ama. Riyaque yahua juquedy jutidya tume. ¹⁷ Dutya ecuanara riyaque yahuaju bayaque, dutya ecuanara riyaque yahuaju bijiseriya cuanaque tu tereyaquedy jutidya. Ecuana Yusuja biji eque aniyaque juatsu bacue ecuana ni eje tupu tere ishúque ama. Yusu tsehue siri ecuana anibuque.

Cristo dyaque ujeuque juetibuqueque

¹⁸ Tere tu amena japadama, micuana ecue ebacua bucha cuanaque. Ebacadya micuanaja quisarati, terehuiepa Cristo dyaque ujeuque juetibuque jadique. Amenatu jetiama cuinanahua Cristo dyaque ujeu baqui cuanaque. Jadya tibudya tuque ecuana adebaya amena tere japadamaque. ¹⁹ Icuenu tu tume Cristo ujeu cuanaque ecuana tsehuedya casitatinicuaque Yusu pureama aishu datse. Amena tuna ecuana tsehue casitatijacahua. Yuneri cuitadya tuna Cristo queja catyatima juhua. Tuna Cristo jaque juatsu tuna ecuana tsehue ecaradatiu jaridya. Tunara ecuana jacahuajudya tuna dyaque ejitaju juhua yuneri cuitadya tuna Jesús queja catyatima juhuaque.

²⁰ Cristora micuana mepehua; Yusuja Espiritu tura micuana tyahua. Riyaque Espiritura micuana bahue amereya ejeque yunerique, ejeque yunerique ama jadique. ²¹ Cuadishaya rique micuanaja riyaque quirica, micuanara yunerique ejeneya baatsu, ai micuanara ejeneya ama baatsu ama. Micuanaratu adebayadya; ni ejeque yuneriquetu pusha pushaque ejuu ama.

²² Cuejayadya micuana era eje cuanaque pusha pusha arida cuanaque. "Jesús tu Yusuja Emepeque ama", jadya juya cuanaque tu pusha pusha arida. Tuna tuna Cristo ujeu cuanaque. Tuna tuna juya, Yusupa Jesúsja Etataque ama, jadya. Tumebaedya ecana juya, Jesússpa Yusuja Ebacuaque ama, jadya. ²³ Dutya jayacuaju jadya juya cuanaque: "Jesús tu Yusuja Ebacuaque ama", pana caadebati ama tatse juya ecuanaja Etata Yusu tsehue. Jadya juya cuanaque: "Ique bahue Jesús Yusuja Ebacuaqueque", pana caadebati tatse juya ecuanaja Etata Yusu tsehue.

²⁴ Neejenejacaume yunerique quisarati micuanara Jesús queja catyatimetse juatsu bacametse ahuaque. Riyaque ni micuana inime tupuquidya jutidya aajeya, riyaque quisarati equedy jutidya ni micuana juajeya, tume micuana ecuanaja Etata Yusu tsehue, tuja Ebacuaque tsehue jadya cajacatiya ama. ²⁵ Jesúsra cuitadya ecuana tuaqueja ecatyati cuanaquepa ecuana tuatsehuedya anisiribuque jadya acuare.

²⁶ Cuadishaya rique micuanaja riyaque quirica, micuana ujeu yunerique ama ejenemerecara juya cuanara ijahue eauju. ²⁷ Cristora tuque micuanaja Yusuja Espiritu cuadishahua. Riyaque Espiritu tu micuana tsehue. Tura micuana adebamereya yunerique. Dutya tura cuejayaque tu yunerique. Tuquetu pusha pusha

juya ama. Tura micuana dutya bahuityaya; sareya ama tuque micuana peyaja bahuitya ishuque. Eje bucha tura adebamereya eque nejuque. Peadya camadya micuanaja inime tupu paju Cristo tsehue.

²⁸ Cuejanucaya micuana, ecue ebacua bucha cuanaque. Peadya camadya micuanaja inime tupu paju Cristo tsehue. Ejeque huecacatu junanucabuque. Tuatsehue ni ecuanaja cacareneti ishuque aniya, bajida tsehue ama ecuana tuja yacuaju cabameretibuque, tuque junanucahuaju. Tume tuque micuana bisutsu catehua ishu acara abucue ama. ²⁹ Micuana micuana bahuedya Jesucristo jida tuyuque. Jutaquiju tuyu neri ni ecuana juya, jadya eque ecuana cabameretiya tujaque, micuana micuana bahuedya jadique.

Yusuja ebacua cuanaque ecuana

3 Inime netupucue Yusu Etatara ecuana eje bucha iyuhuee bayaque. Dyaque iyuhueda baatsu tura ecuana tuja ebacua cuanaque amerehua. "Micuana micuana ecue cuanaque", jadyatu juhua. Pusha ama cuitadya ecuana tujaque. Tuja cuanara amatu adebaya ama eje bucha anie ecuana juyaque, Yusu eje buchique adebaya amadya tibu. ² Iyacua ecuana pureama juya, ecuana tuja ebacua cuanaque juya tibu, ecue iyuhueda cuanaque. Butsee rehuadya ecuana jida cabatiya, dyaquedy a ecuana judirubuque tuaqueja judirutsu! Iyacua cuita tuque ecuana pana adeba ama aya eje bucha ecuana tumeque huecaca jubuqueque. Jesucristo junanucahuaju tuque ecuana pana petatsa abucue tuque eje buchique cuita. Bahuedya ecuana tumeque huecaca tura tuque bae juishu cabapetishabuqueque. ³ Ecuana ratu dyaque ihuaya Jesús bae judadi ishu. Turatu asicadaque ni riyá piji buchique ahua ama ni apidya. Turatu Yusu pureamat-urajacahua ama. Jadya tibudyatu ecuanaja dyadi ataquí ama cuitadya asicadaque. Yusu tuque ecuanaja pureamat-urajacataqui ama.

⁴ Dutya cajuchatiajeyadya jutidya cuanaratu aya ama Yusura cuatsashahuaque. Jucha tu Yusura cuatsashaya eque ama juyaque. ⁵ Micuanaratu adebayadya Jesucristo cajuchatihuaque ama ni cajuchati pidya. Micuanaratu amena adebayadya tuque riyaque yahuaju ecuanaja jucha cuana tsujetya, seca jadyara jehuaque. ⁶ Cristo tsehue ecadutyati camadya aniya cuanaque tuna cajuchatiya ama tunaja bahuedya jutidya. Cajuchatijacaya ama cuanara bacue adebaya ama Cristo eje buchique; ni tuna tuque adebaya. ⁷ Neejeneume, "Cajuchatiajetaquidya jutidya ecuana ecuanaja bahue, arepa ecuana Yusu jaque juya ama bucha", jadya juya cuanaque. Yusuratu jida tuyu baya, Cristo jucuare bucha jida tuyu cuita aniya cuanaque camadya. ⁸ Cajuchatiajeyadya jutidya cuanaque bacue ecana Ijahua jaque. Ijahuatú yuequedy a cajuchatijacahua ama. Yusuja Ebacuaquetu junahua riyaque yahuaju Ijahua ai juyaque apupashara.

⁹ Ecuana Yusuja cuanaque ecuana cajuchatiajeyadya jutidya ama, Yusu ecuana tsehue tibu. Eje bucha ecuanaja cajuchatihua bucha cajuchatiajeedy a jutidya ni

ecuanaja juma, Yusu ecuanaja Etata juya tibu. ¹⁰ Dyaque ibedama tu eje cuanaque Yusuja cuanaque, Ijahua cuanaque jadya adeba ishu. Tunaja bahue cuitadya jutidya jidama aniya cuanaque tuna Yusuja cuanaque ama. Tumebaedy a iyuhue tsehue ama peya cuana bayaque tuna Yusuja cuanaque ama; Ijahua cuanaque tuna.

Duty a tupu iyuhueda necabatira

¹¹ Cacuatashati micuanara bacahuaque butseeju Jesús queja catyatitsu bacahuaque ri riyaque: "Yurameta iyuhueda necabaticue peya cuana tsehue".

¹² Caín jucuare bucha nejura ama. Tuquetu Satanás dyaque jidama cuita jaque jucuare. Iyuhueda ebauque, tujatu ejuque Abel iyecua. Abeltu jida jucuare. Caín bacue inime jidamaque cadujuticua. Jadya tibudya tujatu jishatsu ejuque iyecua.

¹³ Bape nebaume Yusuja ama cuanara ujeu bayaju, ecue eatsehuequi bucha cuanaque. ¹⁴ Iyacua tuque ecuana iyuhueda baya ecuana tsehuequi cuanaque; caadebatiyady a ecuana amena iyacuanetanahuaque. Icuene tuque ecuanaja Yusu queja judiruya jadya ama inime juhua; emaju bucha ecuana anihua. Iyacua bacue ecuana emaju ama. Peya cuana iyuhuedama bayaque jari tuna emaju bucha. Japada tunajatu Yusu baya. ¹⁵ Yusuratu tuja inimeju tuatsehuequique ujeu baquique equiyeti bucha baya. Quiyeti puji ni inime cacuaretiya ama, majutsutu Yusu queja judirubuque ama. Micuana micuana bahuedya jadique. ¹⁶ Cristo ecuana jiteque majuhuaque inime aatsu tuque ecuana adebaya iyuhue yunerique neri. Tumebae iyuhueedy a tuque ecuanaja bataqui tuaqueja ecatyati cuanaque, ecuana tsehuequi cuanaque. Tuna iyetacara juya baatsu ecuanady a ecuana quiyemeretitaqui tuna iyeta ishu ama. ¹⁷ Iyuhue tsehue tuque ecuanaja bataqui nrecadaque Jesús queja ecatyatique. Tu puni ecuanaja ai aniya, tyataqui tuque ecuanaja ai. Tsahuaya ama ni ecuanara ecana eje bucha iyuhueda bae ni tuque ecuana yuneri Yusu ama. ¹⁸ Yurameta iyuhueda ecuanaja peya cuana tsehue cabatiya jadya camadya ama nejura. Yurameta catsahuati peya cuana tsehue nejura. Netyara nrecada cuanaque tunara ai sareya cuanaque. Jadya bameree tuque ecuana ecana aya, yuneridya ecuanara iyuhueda bayaque.

Bajida tsehue ama, bisuma jadya ecuana Yusu queja judirubuqueque

¹⁹ Yuneridya ni ecuana peya cuana tsehue iyuhueda cabatiya, caadebatiyady a ecuana quisarati yuneri eque juyaque. Jadya tibu taa ecuana pereu tsehue ama Yusuja yacuaju cabameretitaqui. Aijama tuque ecuanaja baji jutaqui ni riyá piji buchique tuatsehue catsuruti ishu. ²⁰ Yusura ecuana pana adeba aya ecuana eje buchique, ecuanaja cuita inime tupu cuana. Arepa ecuana ecajuchati cabatiya ama bucha, adebataqui tuque ecuanaja tura iyuhueda bajacayaque ama. ²¹ Cajuchatima ni ecuana cabatiya, bajida amadya ecuana

cabatiya Yusu tsehue quisarati ishu. ²² Tura cuat-sashaya eque ni ecuana juajeya, tuja biji eque ni ecuana aniya, tume tura ecuana tyaya dutya ecuanara bacayaque. ²³ Yusuja cacuatsashati tu: "Ecue Ebacua Jesu-cristo queja necatyaticue. Yurameta iyuhueda necabaticue, tura micuana cuatsashahua bucha". ²⁴ Yusura cuatsashaya eque ni ecuana aniya, tume ecuana Yusu tsehue, tuque bacue ecuana tsehue jadya. Bahuedya ecuana Yusura jacayaque ama, tuja Espiritu ecuana tsehuedya tibu.

Yusuja Espiritu tsehueque, Cristo ujeuja espíritu tsehueque jadique eje bucha adebae ataquique

4 Jetiamatu ijahue cati puji cuana aniya riyaque yahuaju, Yusuja quisaratipa ecuejau jadya juya cuanaque. Pusha pusha arida tuna. Neejeneume ecana. Ejeque ni, "Yusuja quisarati tuque cuejaya" jadya juya, nenime adebacue, ejepa tuque quisaratishaquique, Yusuja Espiritu, jadya ama juatsu tuque ama jadique. ² Cuejaya micuana era eje cuanaque yuneri cuitadya Yusuja Espiritu eque quisaratiya jadique. Yusuja Espiritu tu, "Jesús tu Mesías. Cacuitatit-sutu ecuana cuinanahua baedya cuinanahua", jadya juya cuana tsehue. ³ Yusuja Espiritu tu, "Jesús tu Mesías ama. Ecuita bucha amatu cuinanacuare", jadya juya cuana tsehue ama. Cristo ujeu baqui espíritu eque tuna quisaratiya. Micuanaratu cuejayaju bacahuadya, tumequetu Cristo ujeu junabuque jadique. Yunerydya amenari jetiama aniya riyaque yahuaju tumeque junayaque cueja juya cuanaque.

⁴ Micuana micuana Yusu jaque, ecue ebacua bucha cuanaque. Micuana micuana Jesús queja nimee jujacama, arepa micuana tume pusha pusha arida cuanara tuaqueja nimee amerejacacara aya ama bucha. Micuanaratu casa butyahua tume cuanaque. Yusuja Espiritu micuana tsehueque tu dyaque casadaque, Yusuja ama cuanaque tsehueque bucha ama. ⁵ Tume pusha pusha arida cuanaque tuna Yusuja ama cuanaque. Jadya tibudya tunajatu Yusu jaque amadya quisarati aya. Yusuja ama cuanaja tuna bijida ijacabaca ishu. ⁶ Ecuana ecuana Yusuja cuanaque. Yusuja cuanara ecuana pana ijacabaca aya. Yusuja ama cuanara ecuana ijacabacacarama aya. Quisaratiyaju bacaqui cuana equedya tuna adebataqui Yusu equeque, jadya ama juatsu Yusu equeque ama jadique. Jadya ejitajueta juya ejeque yuneri quisaratiyaque, yuneri ama quisaratiyaque jadique.

Yusura dutya ayaque tu ecuana tuja iyuhue bamere ishuedya jutidya

⁷ Iyuhuedadya jutidya peya cuana tsehue necabatiajera, Yusura ecuana iyuhueda cabatishaya tibu, ecue iyuhueda cuanaque. Iyuhueda tsehue cabatiya cuanaque tuna Yusura iyacuanehua; Yusu jaquedya tuna. Tuja pana adeba eaque tuna. ⁸ Iyuhuedama ni ecuana peya cuana Cristo queja ecatyati cuanaque baya, jutaquiju tuque ecuanaja Yusu pana adeba ama jari ea,

Yusura ecuana tuja iyuhue bamere jacaya ama tibu.

⁹ Tuja Ebacuaque peadyaque riyaque yahuaju ecuana jiteque maju ishu cuadishatsu, ecuana Yusura bamerehua ecuana queja tuja dyaque iyuhue aniyaque. Ecuana jucha cuana tsujetyaqui tujatu cuadishahua, tuatsehue siri ecuana anidiru ishu. ¹⁰ Icuene tuque ecuana Yusu iyuhueda ama bahua. Tura bacue ecuana dyaque iyuhueda bahua. Ecuana dyaque iyuhueda baatsu tujatu Ebacuaque ecuana jiteque maju ishu cuadishahua. Ecuana jucha cuana tsujetyaqui tujatu cuadishahua. Jadya bamere tura ecuana ahua ecuanaja peya cuana iyuhueda baishuque.

¹¹ Yusura ecuana dyaque iyuhueda bahua, ecue iyuhueda cuanaque. Tura ecuana eje bucha iyuhuee baya bucha, jaidya tuque ecuanaja peya cuana iyuhueda bataqui. ¹² Eje bucha bae ni tuque ecuana Yusu ama. Jadya ama bucha, peya cuana tsehue ni ecuana iyuhueda cabatiya, bamereya tuque ecuana Yusuja iyuhue eque tura ecuana amerecara aya bae amerehuaque. Bamereya tuque ecuana, tuque ecuana tsehueque. ¹³ Pana ejenedya tuque ecuana aya, Yusu ecuana tsehueque, ecuana tuatsehueque, tura tuja Espiritu cuitadya ecuana queja ani ishu cuadishahua tibu. ¹⁴ Ecuana Jesúsra mepecuare cuanara tuque ecuana bacuare Ebacuaque Yusura riyaque yahuaju cuadishacuareque. Cuejajacaya ama tuque ecuana tuja Etataque Yusura riyaque yahuaju aniya cuanaque Ijahua quejaque inajacamerera cuadishahuaque.

¹⁵ Dutyaja ijacaju ni ecuana, "Jesús tu Yusuja Ebacuaque", jadya aya, tume ecuana Yusu tsehue, tuque bacue ecuana tsehue.

¹⁶ Jadya bahuee, ejenee jadya tuque ecuana aya Yusura iyuhueda bayaque. Yusura ecuana tuja iyuhue bamerejacaya ama. Tuque iyuhueda, peya cuana iyuhueda jadya ni ecuana baya, tume ecuana Yusu tsehue aniya, Yusu bacue ecuana tsehue. ¹⁷ Iyacua ecuana Yusura peya cuana iyuhueda bamereya, tura iyuhueda bamerecara aya bucha. Jutaquijudya ecuana ni riyapiji buchique bajida jubuque ama Yusura cuat-sashaya eque ama aniya cuanaque nerecaturayaju. Peya cuana ni ecuana iyuhueda baya Cristora iyuhueda baya bucha, bisuma neri ecuana tuja yacuaju judirubuque. ¹⁸ Bajida juatsu ama tuque ecuana ecuanara iyuhueda baya cuanaque jipeya. Eje buchadya jacacarama tuque ecuana aya ecuanaja iyuhueda cuanaque. Ecuana nerecaturaqui cuanaque bacue ecuana jipecarama aya. Jadya tibudya, bajida ni ecuana Yusu jipe ishu juya, tuque iyuhuedama cuita baatsudya tuque ecuana jipecarama aya.

¹⁹ Ecuonaratu Yusu iyuhueda baya, tumebaedya peya cuana, icuene cuita ecuana Yusura iyuhueda bahua tibu. ²⁰ Pusha pusha tu, "Yusu tuque iyuhueda baya" Jesús queja ecatyatique ujeu bayaquedya jutidya. Bama tuque ecuanaja Yusu. Ecuana tsehuequi cuanaque camadya tuque ecuana bayadya. Iyuhueda ama ni ecuana baya dutya huecaca baya cuanaque, eje bucha iyuhueda bae jatsu tuque ecuana eau bayaque ama cuitaque. ²¹ "Micuanara ni ique yuhueda baya, tume-

baedya micuana tsehuequi cuanaque iyuhueda nebacue”, jadya ecuana Yusura cuatsashahua.

Yusuja casa eque tuque ecuana eiduu riyaque yahuaju cuanara cajuchatishacara ayaju

5 Yusuratu tuja ebacua cuanaque bucha baya dutya, “Jesús tu Mesías Yusuja Emepeque”, jadya ejenequi cuanaque. Iyuhueda ni ecuana baya Yusu Etata, tumbaedya tuque ecuanaja iyuhueda bataqui Jesús queja ecatyati cuanaque, tuna dyadi tumbaedya Yusu jabacua cuana juya tibu. ² Ecuana Yusu iyuhueda baatsu, tura cuatsashaya eque anitsu, ecuana bahue juya tumbaedya ecuanara tura ebacua cuanaque bucha bayaque iyuhueda bayaque. ³ Yuneridya ni ecuana Yusu iyuhueda baya, tura cuatsashaya equedya ecuana aniya. Masada ama tu tuja cacuat-sashati cuana eque ani ishú; ai jatadaque abu ishú buchique jutidya tume. ⁴ Yusuja cuanajatu aniya casa Yusuja ama cuanara tura cuatsashaya eque juyaju tunara amerejacacara ayaju idu ishú. Ecuana Jesucristo queja catyatihua tibu, tura ecuana tsahuaya Yusuja ama cuanaque juya bae ejuuju. ⁵ Jesús Yusuja Ebacuaqueque ejeneya cuanaque cuita camadyatu aniya Yusu adeba baecua cuanaque bucha ama.

Jesús Yusuja Ebacuaque jadicu ecuana queja yuneri adebamere ishúque

⁶ Jesús riyaque yahuaju junahuajutu ejitajudya juhua tuque Yusuja Ebacuaqueque. Ejitajutu juhua tuque ena tsehue cutsameretihuaju. Tumbaedyatu ejitaju juhua tuque curusuju ami quijehuetitsu majuhua. Cutsameretihuaju camadya ama, tumbaedya tuque curusuju ami quijehuetihuajutu ejitaju juhua tuque Yusuja Ebacuaqueque. Riyaque ecuana Yusuja Espiritura adebamereya. Tuquetu pusha pusha baecua. ⁷ Aniyatu quimisha, “Jesús tu Yusuja Ebacuaque”, jadicu ejitaju amerequi cuanaque. Yusuja Espiritura ecuana ejitaju amereya. Jesús ena tsehue cutsameretihuajutu ejitaju jucua. Tuque curusuju ami quijehuetihuajutu ejitajudya jucua. Jadya equetu quimisharadya ejitaju amereya Jesús Yusuja Ebacuaqueque; quimishara tunajatu dutyara tupu adebamere aya. ⁹ Yusu cuitadyatu, “Jesús tu ecue Ebacua”, jadya juhua. Ecuana yuneri aquí cuanaque ejeneya tibu, dyaque di taa tuque ecuanaja Yusura cuejayaque ejenetaqui, tuque dyaque inime metseque juya tibu. ¹⁰ Yusuja Ebacuaque queja catyatihua cuanaque tuna Yusuja Espíritu eque pana quejeneti eju yuneridya Jesús Yusuja Ebacuaqueque. Yusu ejeneya ama cuanaratu cuji cuita juatsu Yusu pusha pusha ariju aya. Tunaratu ejenecarama aya tura “Jesús tu ecue Ebacua”, jadya acuareque. ¹¹ Riyaque tu Yusura cue-

jacuareque: “Era micuana tere baecua anishaya. Micuana ecue ebacua queja catyatihua tibu, era micuana tere baecua anishaya”. ¹² Yusuja Ebacuaque queja ni ecuana catyatihua, tume ecuana iyacuane-tanahua. Majutsu ecuana Yusu queja judiribuque ni eje tupu jaca ishú ama. Yusuja Ebacuaque queja ni ecuana catyatima, iyacuanema ecuana. Tume ecuana Yusu tsehue anidiribuque ama.

Amena ishúque quisarati

¹³ Micuana era quirica cuadisha ishú ayaque Yusuja Ebacuaque queja micuana catyatihua. Jadya tibudya micuana iyacuanetanahua. Majutsu micuana Yusu queja judiribuque ni eje tupu jacanua ishú ama. Cuadishaya rique micuanaja quirica, micuana pana adebamere aishu. ¹⁴ Tuja biji eque ni ecuana bacaya, tume tuque ecuana pana ejene aya Yusura ecuana ijacabacayaque. Jadya tibudya ecuana bajida tsehue ama quisarati bahue tuatsehue. ¹⁵ Bahuedya ecuana, ecuanara isarayaju tura bacama ama ayaque. Turatu ijacabacayadya ecuanara ai bacayaque. Jadya tibu ecuanahuedya amena ecuanara ai bacahuaque tyayaque.

¹⁶ Ejeque ecuana tsehuequique cajuchatihuaju, bacabacataqui ecuana Yusu queja tuja ishú, tuque inime cacuareti ishú. Tuque ni inime cacuaretiya, Yusura tujatu jucha cuana apupashaya. Tumetu majutsu Yusu queja judiribuque. Jadya tuque ecuanaja bacataqui maju ishúque ama cajuchatihua cuanaja ishú. Aniyatu jucha majudadi ishúque. Tumeque ni jadya cajuchatie juhua, cuejaya micuana era. Tumeja ishú Yusu queja nebacabacaume. ¹⁷ Dutya jidamaque tu jucha. Jadya ama buchatu aniya jucha majudadi ishúque ama.

¹⁸ Ecuana Yusuja cuanaque ecuana cajuchati bahue juhua eque cuita ama cajuchatiya, Yusuja Ebacuaquera naruya tibu. Tura ecuana naruya, dyaque jidama bacaniya ecuana yuamatura ishú ama.

¹⁹ Bahuedya ecuana, ecuana Yusuja cuanaque. Dutya riyaque yahuaju cuanaque bacue ecana Ijahuara cuatsashaya eque aniya.

²⁰ Bahuedya ecuana Yusuja Ebacuaque riyaque yahuaju junahuaque. Tura ecuana bahuityahua Yusu eje buchique. Tuque peadya tu Yusu neri. Amena tuque ecuana pana adeba aya. Iyacua ecuana peadya camadya bucha Yusu tsehue, peadya camadya bucha Ebacuaque Jesucristo tsehue bucha juya tibu. Tuquetu Yusu neri cuitadya. Tura ecuana anishaya tere baecua. ²¹ Necanaruticue, micuana ecue ebacua bucha cuanaque. Nejacacue ejeque micuana Yusu jacamerequi ejuuque.

Riya tupu camadya.

Juan

2 JUAN

Riyaque quirica ri Juan, Jesúsja emepera cuadisha beta ishu cuadishacuareque. Amena esiri cuitara rejari huenequere. Jesús queja ecatyati cuanaja ishu Yusuja emepe cuanaja ishu jadya rejari cuadishacuare. Quisarati yuneri eque ani ishu tujatu ecana cuejacuare. Cuejacuare tujatu ecana iyuhue tsehue yurameta cabati jujaca ishuque ama. "Juetibuquetu Jesúsja cuanaque pusha pusha tsehue ijahue aqui jubuque cuanaque", jadyatu jucuare. Bacataqui amapa tuque ecuanaja tume yunerique ama bahuityaqui cuanaque. Umae versículo cuana jida cabahuityati ishuque ri: 3, 4, 9 jadya.

Catibuti ishuque quisarati

1 Cuadishaya rique micue quirica, mama. Miquemi Yusuja emepeque epuna. Tumbaedy rique cuadishaya micue bacua cuanaja ishu. Ique esiri, Jesús queja ecatyati cuanaque naruquique, yuneri cuita juya cuanaque naruquique. Pusha ama cuitadya micuana iyuhueda baya. Era camadya ama, tumbaedy Yusuja quisarati yuneri eque aniya cuanara micuana iyuhuedadya baya. ² Era micuana iyuhueda baya, micuanara dyadi era yunerique quisarati ejeneyaque nucadya ejeneya tibu. Yuneri eque ecuanana anijacanime ama. Tumequedy tuque ecuanana inime tupuqui aya.

³ Ecuanaja Etata Yusura, tuja Ebacuaque Jesucristora jida tsehue nenarucue tatseja quiyuhuebati tsehue. Tatseja canerecabati micuana tsehue paani. Tatsera inime tsapema tsehue neanishacue. Jadyatu micuana tsehue jubuque, micuana quisarati yuneri eque aniyaque juatsu, micuana peya cuana tsehue iyuhueda tsehue cabatiyaque juatsu.

Quisarati yuneri eque ecuanana anitaquique, iyuhue tsehue ecuanana cabatitaquique

⁴ Catsurutichine ique micue bacua cuana tsehue. Dyaque ique pureama juchine, tuna quisarati yuneri eque aniya baatsu. Ecuanaja Etata Yusura cuatsashahua bae cuitadya tuna aniya. ⁵ Mama, "Yurameta iyuhueda necabaticue peya cuana tsehue", jadya mique cuejaya. Riyaque cacuatsashati ri iyacuaque ama. Jesús queja catyatimetse juatsu tuque ecuanana bacahua. Jadya ecuanana jutaqui, micuana ecue iyuhueda cuanaque. ⁶ Pusha amadya ni ecuanana peya cuana tsehue yurameta iyuhueda cabatiya, tume ecuanana Yusura dutya cuatsashahua eque aniya. Jesús queja catyatimetse juatsu tuque micuana cuejayaju bacahua, tura ecuanana yurameta iyuhueda cabatishacara ayaque.

Ijahue necatimereume pusha pusha bahuityaqui cuana queja

⁷ Jetiama ijahue cati puji cuanatu dutya yahua queja anibareya. Cuji cuita juatsu tuna juya: "Jesucristotu ecuita ama jucuaque". Jadya quisaratiya cuanaque tuna ijahue cati puji cuana. Tuna tuna Cristo ujeuque.

⁸ Pana tupu inime neacue, tunara ijahue eauju. Ijahue ni tunara micuana aya, tume tuque micuanaja jubuque ama Yusuja tuque jida merequi cuanaja ishu aniyaque. Ejeneajeyadya jutidya ni micuana yunerique, Yusura micuana dyaque jida tsujetyabuque, tuque merehua tibu. Micuanajadyatu jubuque tura dutya tyacara ayaque.

⁹ Aniyatu Cristora bahuityahuaque camadya ama bahuitya juya cuanaque. Tunaja adebadya jutidya tunajatu bahuityaya. Tume cuanaque tuna Yusu tsehue peadyaque camadya ama. Cristora bahuityahuaque ejeneajeyaquedy jutidya bacue ecana ecuanaja Etata Yusu tsehue peadya camadya bucha, tumbaedy tuja Ebacuaque tsehue. ¹⁰ Juetiya ni Cristoja quisarati bape bahuityaqui cuanaque, nebatsaume micuanaja etareju. "Yusura nenarucue", jadya ecana neaume. ¹¹ Micuanara ni ecana jida batsaya, "Yusura nenarucue", jadya tsehue batsatsu, tume tuque micuana ecana tsahuaya tuna jidama juyaque. Yusura micuana baya micuana cuitadya jidama juya bucha.

Amena ishuque quisarati

¹² Aniya jari tuque ecue micuana cuejacara ayaque. Jadya ama bucha micuana cuejaya ama quirica eque. Micuana cuitadya micuana cuejaticara aya. Cuacara juya micuana isarara, ecuanana dutya cabatitsu jida pureama juishu.

¹³ Miatsehuequi epunaja ebacua cuanaquera micuana isaramereya. Tuquetu Yusuja emepequedy.

Riya tupu camadya.

Juan

3 JUAN

Riyaque quirica ri Juan, Jesúsja emepera quimisha ishu cuadishacuareque. Amena esirira rejari huenequere. Cuadishacuare rejari Jesús queja ecatyati cuanaque naruquiya Gayo bacaniya ishu. Gayora, Demetriora jadyatu jida Yusu mereya. Diotrefespa jidama aniya jadya tujatu cuadishacuare quirica. Riyaque quirica eque ecuana bahue juya Yusu ecuanaja meretaquique, tuque ecuanaja ani tsehue pureamaturataquique. Versículo ecuatse jida cabahuityati ishuque ri: 3, 11.

Catibuti ishuque quisarati

¹ Quirica rique micue cuadishaya, Gayo. Ique esiri, Jesús queja ecatyati cuanaque naruquique. Iyuhueda mique baya, mira yunerique ejeneya bucha ejenee era dyadi aya tibu.
² Arequemi dutyaju jida ejuu; jidami ejuneni, ecue iyuhuedaque Gayo. Ique bahue mique Yusuja biji eque aniyaque. Bacatsahua tuque micue quisarati. ³ Jesús queja umae ecatyati cuanaque rena tuhua miaquejaque junachine. Cuejachine tunara ique miquepa yuneri eque aniya jadique. Yusuja biji eque cuita pami aniya. Jadya bacatsu ique dyaque pureama juchine.
⁴ Era Jesús queja catyati tsahuahua cuanaque yuneri eque juyaque quisarati bacatsatsu, ique dyaque pureama juya. Ni peya aira ique pureama amereya ama.

Gayo sumitanacuareque

⁵ Ecue iyuhuedaque Gayo, cuejachine tunara ique mique eje buchique. Mirapa dyaque tsahuaya micue miatsehuequi cuanaque, micue epuju jutiyaju. Arepa peya epuju cuanaque ama buchami ecana jida batsaya. Jadya mique juyaque tu dyaque tuyuque. ⁶ Cristo queja ecatyati cuanaque ecasitatija yacuajutu cuejachine mira tsahuachine cuanara: "Gayora ecuana dyaque iyuhueda tsehue tsahuachine". Micue epu eque tuna cuetinuayaju ecana tsahuanucacue, tunara ai sareya tsehue tuna eju cuayaju. Tunara Yusu mereya tibu, ecana batsacue; Yusu cuitadya ebatsau bucha batsae ecana acue. ⁷ Jesucristo merera tuna cuachine. Bacachine ama tunajatu Jesús queja catyatima cuanaque tuna tsahua ishu. ⁸ Jadya tibudya tuque ecuanaja ecana tsahuataqui, ecuana Jesús queja ecatyati cuanara. Ecuana ecana jadya tsahuae ayaju, Yusura ecuana baya ecuana cuitadya tuja quisarati cueja juya bucha, arepa ecuana tuna tsehue ama juneniya ama bucha.

Diótrefes jidama jucuaque

⁹ Cuadishachinedya tuque quirica eje junu ehuenequa ama Jesús queja ecatyati cuanaja ishu.

Diótrefestu juya; tuja quisarati cuita camadyapa ecuita cuanara pabaca, jadya peya cuana jaque bacue aijama. Jadya tibudya, tujatu quirica isarayaju bacacarama achine. Turatu bacacarama achine era cuat-sashachineque. ¹⁰ Ique jutitsu tuque dutyaja ijacajudya cuejaya tuque eje bucha juyaque. Ecue ishutu pusha pusha juya. Yuamaturacara tura aya tuja quisarati tsehue. Ecue ishu camadya ama tujatu jidama quisarati aya. Tumebaedya tujatu jidama peya cuana aya. Yusu merequi cuanaque tuja epuju junayaju tujatu ecana batsaya ama tuja etareju. Peya cuanara batsacara ayaju tujatu ecana batsamerecarama aya. "Micuanara ni ecana micuanaja etareju nudyatsaya, tume micuana ecuana tsehue casitatitaqui ama Jesús pureama aishu", jadya tujatu ecana aya.

¹¹ Ecue iyuhuedaque Gayo, jida cuanaque juya bae jucue, jidama cuanaque juya bucha ama. Jidaquedya jutidya aajeya cuanaque tuna Yusuja cuanaque. Jidamaque jutidya aajeya cuanaque bacue ecana, tuja cuanaque ama.

Demetrio jida jucuaque

¹² Dutyara tunajatu Demetrioja ishu jida quisarati aya. Tuquetu yunerique quisarati eque jucacaya ama. Era dyaditu ejeneyadya tuque jidaque ecuitaque. Miratu ejeneyadya era quisarati yunerique ayaque.

Amena ishuque quisarati

¹³ Bataqui ama tuque ecue jetiama mique cuejacara ayaque. Jadya ama bucha mique cuejaya ama quirica eque. Midya cuitadya mique cuejaticara aya.

¹⁴ Masadama mique bacara aya. Tume yatse cuitadya nequisarati.

Yusura inime tsapema amerecua. Rehua mique adebaqui cuanarami isaramereya. Isaracue dutya tuhua ecue eadeba cuanaque.

Riya tupu camadya.

Juan

JUDAS

Riyaque quirica ri Judas, Jesús tsehuequira cuadishacuaque. Cuejacuare rejari Pedrora beta ishucue quiricaju cuejacuaque nucadya. Huenecuare rejari terehuie judadibuqueque. Huecashacuare tujatu ecana yunerique ama bahuityaqui cuanaque aniaque. Casaturacuare tujatu ecana quisarati tsehue Jesús queja nimee juaje ishucue, arepa canerecati, jidamaque inime cuana ania ama bucha. Tumeque huecaca juetihua jutu Jesucristo cuita camadya, casada, tuaqueja nimee cuita camadya juishu ecuaana tsahua ishucue. Umae versículo jida cabahuityati ishucue cuanaque ri: 20-22; 24-25.

Judasra Yusuja cuanaque quirica eque isaracuareque

1 Era rique micuanaja quirica cuadishaya. Ique Judas. Jesucristo merequique ique; Santiagoja ejuque ique. Cuadishaya rique quirica micuana dutya queja Yusuja cuanaja ishucue. Dyaque iyuhueda micuana Ecuanaja Etata Yusura baya. Jesucristora micuana tachiya, micuana tuaqueja nimee jujaca ishucue ama tuque junanucaya tupu. ² Yusuja micuana tsehue dyaque canerecabati paani. Tura inime tsapema neanishacue. Yusura micuana iyuhueda tsehue bayaque dyaque jida neadebaajecue.

Pusha pusha bahuityaqui eque bucha judadiyaque

(2 Pe 2.1-7)

³ Ecue eatsehuequi cuana iyuhueda cuanaque, micuanaja ishucue quirica huenema jarira eque buchadya cuadishacara tuque micuanaja ahua quirica, Yusura ecuaana eque bucha Ijahua quejaque inajacameree ayaque datse.

Iyacu micuana peya cuejanucacara aya. Jetie ama pusha pusha bahuityaqui cuanaque ania tibu, cuejataquidya micuana ecue tuna eque buchique. Casaturacara micuana aya, micuanara yunerique eejenejaca ju quisarati cuaretanayaque ama Yusura tuja cuanaque bahue amerehuaque. Cuejacara micuana aya, bajida tsehue ama micuanaja Yusuja quisarati yunerique cuarecara juya cuanaque quemitsa ishucue. ⁴ Micuanaratu adebahua ama tumeque ijahue cati puji cuana micuana ducuque. Tuna tuna dyaque jidama cuita. Dyaque bisutada cuita tuna juya. "Yusu dyaque jida cuita juya tibu, nerecaturanime ama tuja ecuaana, arepa ecuaana bisutadaque, jidamaque aya ama bucha", jadya tunajatu yanacana cuita inime tupu bahue. Tuna eque bucha juya eque, quisaratiya eque jadya tuna ejitaju Ecuaana Cuatsashaqui jaque ama. Pusha ama cuitadya tuna Yusura nerecaturabuque. Tura béru jadya huenemerehua eque cuitadyatu judadiya.

Yunerique ama bahuitya juya cuanaque nerecada judadibuqueque

⁵ Arepa micuana amena bahue ama bucha, micuana huecashanucacara aya béru Yusura cuatsashaya eque anicarama jucuaque cuanaque. Neadebacue icuene cuita ecuanaja baba cuana israelita cuana. Tuna Egiptoju canerecatiyaju tuna Yusura tsahuacuare huanayaju. Arepa jadya cuinanashae ahua ama bucha, cuinanashatsu tujatu ecana aputashacuare tura cuejahaque ejenehua ama cuanaque, tura amereya eque juhua ama cuanaque jadya.

⁶ Tuequedya neadebanucacue barepa juque Yusu tsahuaqui cuanaque tura amereya eque ama jucuaque cuanaque. Icuene cuita tuna anicuare Yusuja yacuaju, tuja yana equedya juyaque. Tuequedya tunajatu merecarama ahua. Dyaque inime metse ecana cabatihua. Jadya baatsu tuna Yusura tuja yacua juque ijehuecuinaha japada. Dyaque tujatu ecana nerecaturaya, nerecaturadadiya. Eque bucha huanataqui ama tuna. Iyacu tuna erisque etare apuda ducu eishaque bucha. Jadya tuna eiya jubuque Yusura tuque dutya muiba baecua cuanaque nerecaturaya tupu.

⁷ Tumebaedya neadebacue Sodomaju, Gomorraju, uma eque cuana japadamaju anicuare cuanaque. Yusu tsahuaqui cuana jidama cuanaque jucuaque bucha tuna Yusura amereya eque juhua ama. Jaraquere bahue tunaja juhua tunaja caquemitiqeremaque. Dyaque bisutadaque tunaja abahue juhua. Deca cuanaja jaraquere bahue juhua deca cuinetsedya jutidya, epuna cuana, epuna cuinetsedya jutidya. Jadya tibudya tuna Yusura dutya tumeque epuju cuana tsehue etiqui dyaque arida tsehue pana tilla acuare. Tuna etiqui tsehue tillatacuare tibu, tuequedya tuque ecuaana adebaya dutya Yusuja yana equedya jucarama juya cuanaque ijahua etiquiju ishatanabuqueque ni eque tupu cuinana ishucue ama. Jadya ejitajuetu Yusura amereya tura dutya tuja yana baca baecua cuanaque nerecaturadadiyaque.

²² Yunerique ejenecara, ejenecarama jadya juya cuanaque netsahuacue yunerique camadya ejene ishu. ²³ Necacasaticue yunerique tuna ejenemere ishu. Etiquiju etiruuju micuana nere inadadi eau bucha, jadya tsahuaedya tuque micuanaja ataqi tunaja yunerique ejene ishu, tuna Yusu queja judiru ishu. Paani micuanaja canerecabati jucha arida cuana tsehue. Tunara jidamaque ayaque ujeu nebacue. Necanaruticue tunara jidama ayaque micuanara dyadi eauju.

Dyaque jida tu Yusu ecuana tsehue!

²⁴ Yusu tu dyaque jida tuja cuana tsehue. Tura micuana narujacaya ama, Ijahuara amerecara aya eque eju-

uju, cajuchatishacara ayaju micuanaja baca ishu ama. Tura micuana judirushabuque tuja yacuaju jucha metse amaque, tura micuanaja jucha cuana apupashahua tibu. ²⁵ Tuque peadya tu Yusu; aijamatu peya. Tura ecuana Ijahua quejaque inajacamereya Ecuana Cuatsashaqui Jesucristo ecuana jiteque majuhua eque. Tuquetu dyaque jida; aijamatu peya tuque buchique. Tuquetu dutya ai aniyaque inime metseque. Turatu dutya naruya. Turatu cuatsashaya dutya. Jadyatu tuque juhua, yuequedyadya yahua ejitaju juma jari equeque. Iyacua tu jadya jaridya. Jadyatu jujacabuque amadya. Jadidya paju.

Riya tupu camadya.

Judas

APOCALIPSIS

Riyaque quirica ri Juan, Jesúsja emepera hueneacuareque. Patmos cububuju erisi neticuare patya rejari hueneacuare. Tuhua patu ijehuetanacuare Jesucristoja quisarati cuejaha tibu.

Riyaque quiricaju ri ehueene eje bucha judadibuqueque. Yusratu Juan bamerecuare tuja huene ishu. Terehuie patu dutyadya jutidya dyaque jidama judadibuque. Jadya tibutu Cristo cuitadya junanucabuque. Tuquetu tuja casa tsehue dutya jidama cuanaque ijahue eatilla junabuque. Turatu Satanás pana ijahue dutyaju anabuque. Capítulo 2-3ju tu Jesús queja ecatyati cuanaque pacarucu epuju aniya cuanaja ishu cuadishatanacuareque. Bahuetu ecana amerecuare jucha cuana, tunaja jucha aniyaque caadebatitsu tuna Yusu queja canerecati ishu. Capítulo 4-5jutu Juanra hueneacuare Cristo, Yusuja yacuaju pureama atanadadiyaque. Cristo tu UHUISHA BUCHA IYETAE ATAHUAQUE bacani. Baba cuanara uhuisha iye bahue jucuare bucha jucha cuana tsujetyaqui, jadidyatu Cristo majucuare ecuanaja jucha cuana tsujetyaqui.

Capítulo 6-18ju tujatu riyaque yahuaju eje bucha nerecadae judadiyaque cuejaya. Capítulo 19-20ju tujatu bahuityaya Cristo ECUARI DYAQUE ARIDAQUE, Satanás tuja casa tsehue ijahue ara junanucabuqueque. Capítulo 21-22ju tujatu cuejaya Cristoja cuanaque dyaque jida, pureama jadya barepaju judadibuqueque, yahua iyacuaju tuque ecuanara muiyaque.

Umae versículo cuana jida cabahuityati ishucue ri: 2.10; 3.20; 5.9-10, 12; 7.10, 12; 12.10-11; 19.6-8; 20.6, 14-15; 21.4, 8, 22-27; 22.20.

Jesucristora Juan eje bucha judadibuqueque cuejacuareque

¹ Ecuanaja Etata Yusura ecuanaja tuque merequi cuanaque bahue amerecara acuare masadama riyaque yahuaju judadibuqueque. Ique Juan Jesucristo merequique. Riyaque quirica ri Jesucristora eje bucha judadiyaque cuejacuareque. Yusratu bahue amerehua ecuanaja bahue amere ishu. Jesucristoratu cuadishacuare etsahuaquique barepa juque ique bahue amere ishu. ² Era micuana cuejaya riyaque yunerí cuitadya era bahuaque, micuana eje bucha judadibuqueque bahue juishu. Riyaque rique ecue yunerique Yusuja ecuejaque Jesucristo eque ejitaju eaque.

³ Dyaque jida paju ejera riyaque Yusuja quisarati isarayaque. Tumebaedya dyaque jida paju Yusuja ecuejaque quisarati isarayaju bacaqui cuanaque. Tumebaedya dyaque jida paju riyaque quiricaju isaratsu ehueene eque aniya cuanaque. Dutya ecana jida paju, dutya riya cuanaque masadama jadya judadiyaque adebatsu.

Juanra, Jesús queja ecatyati cuanaque pacarucu epuju aniya cuanaja ishu hueneacuareque

⁴ Ique Juanra rique micuanaja quirica cuadishaya Jesús queja ecatyati cuanaque Asia yahuaju pacarucu epu cuanaju aniya cuanaja ishu. Yusura, pacarucu espíritu cuanara, Jesucristora jadya jida tsehue nenarucue tunaja quiyuhuebati tsehue. Tunara inime tsape ma neanishacue. Yusu tu yuequedya anihuaque dutya ai eiyaque bucha ama. Aputabuque amatu ni eje tupu.

Pacarucu espíritu cuana tu Yusuja yacuajudya. Jesucristoradyatu peya cuana Yusu eje buchique cuejajacaya ama. Tudyatu emajuque netitsurametse juhuaque ni eje tupu majunuca ishu ama. Turadyatu cuatsashaya dutya riyaque yahua juque cuatsashaqui cuanaque. Cristora ecuanaja iyuhueda baya. Yusura tuque ecuanaja jucha cuana apupashaya Cristo curusuju majuhua tibu, ecuanaja jiteque ami quijehuetihua tibu. ⁶ Jesucristora ecuanaja ihuarahua tuja yana atsaqui juishu, tuja Etataque Yusu mere ishu. Ecuanadya ecuanaja enaruqui jubuque tuatsehue tuque enaruqui juhuaque. Neajacara ama Jesucristo riyaque quisarati tsehue: "Miquemi dyaque jida, dutya ai aniyaque dyaque casadaque". [Jadidya paju!

⁷ Nebacacue. Cristotu junanucabuque barepa huani ducu eque. Dutyaratu batsabuque. Dutya tuque iyequi jucuare cuanaratu batsabuquedya. Dutya ecuita riyaque yahuaju aniya cuanaquetu pabuque tuque batsatsu. Bajida tuna jubuque tuque tuna nerecaturara cuana jeya bucha baatsu. Jeeje, jadidyatu jubuque. ⁸ Yusuja tu quisarati: "Ique dutya ai iyametsequi juhuaque, dutya ai tilladadiqui juyaque jadya. Ique letra A-Z buchique", jadya tu Ecuanaja Cuatsashaquiya quisarati. Tuquetu Yusu. Tujatu dutya casa aniya. Tuquetu yuequedya anicuare. Iyacuatu aniya. Anisiribuque tuque.

Juanra Cristo bacuareque

⁹ Ique Juan; micuana tsehuequique ique. Yusu tu ique metseque, tumebaedya micuana metseque. Jesússtu ecuanaja jiteque nerecada juhua. Tumebaedya micuana ique jadya ecuanaja nerecada juhua tuaqueja

nimee juatsu. Dutya rique ecuana iduya abacada tsehue tuaqueja catyatijacatsu ama. Huaraji cuanara ique ijehuecuare ecububu Patmos bacaniju ique nerecatura ishu, era Yusuja quisarati tsapeya baatsu, yunerique Jesúsja ecuejaque. ¹⁰ Domicu huecaca tuque ecuique inime ama inime tupuqui acuare, Yusuja Espiritura inime tupumeryaque. Ecue etibene queja tuque bacuare etsuri jebudaque, corneta tsuri bucha.

¹¹ —Ique dutya ai iyametsequi juhuaque, dutya ai tilladadiqui juyaque jadya. Ique letra A-Z buchique. Hueneajecue mira petayaque. Tume cuadishacue tumeque quirica mira hueneyaque Jesús queja ecatyati cuanaja pacarucu epuju aniya cuanaja ishu, Efesoju, Esmirna, Pergamoju, Tiatiraju, Sardisju, Filadelfiaju, Laodiceaju jadya, —jadya ecue etibenejura acuare, yume tucue Jesúsra.

¹² Huarerecuare ique eatsehue quisaratiyaja etsuri bacatsu, tuque bacara aatsu. Tume huareretsu tuque bacuare pacarucu ude cuana nityaqui cuanaque oro eaque. ¹³ Tumeque ude cuana nityaqui cuanaque patyadyatu neticuare peadya ecuita jiuque. Tura jutuyaquetu jucuare junuda ehuaqui eque cuita. Jucuare tujatu cinturu oro eaque quinida yacua eque cuita. ¹⁴ Etsaru tuja tuque bacuare dyaque pajada. Yatuca bacue tuja etiqui juju bucha. ¹⁵ Ehuachi tuja tuque metal tiquidaque bucha bacuare. Etsuri tujatu dyaque jebuda jucuare tiritiya bucha. ¹⁶ Jida eque amaca tujatu inacuare pacarucu purari cuana. Tuja yatsanaca eque bacue cuinanacuare quiyeti ishuque beta eque jacuaque. Ebutsequini tujatu jucuare ijete casada tsehue pujetanayaque bucha.

¹⁷ Jadya tuque baatsu rihuicuare tuja ehuaquiju emaju bucha. Ique jadya juhuaquiju tura tuja emetucu jida eque amaca tsehue jabacuare. Jabatsu tura jadya acuare:

—Bajida juume. Ique dutya ai iyametsequi juhuaque, dutya ai tilladadiqui juyaque jadya. ¹⁸ Ique chacha. Yuneridya ique majucuare. Majutsu chacha netit-surancuacuare, ni eje tupu majunuca ishu ama. Ecuetu casa aniya majuja ishu. Ecuetu casa aniya ecuita cuana majuhuaquiju tuna eju cuadisha ishuque cueja ishu.

¹⁹ Erami bahue amereya iyacua ecue cuanaque eje bucha juyaque, judadiyaque jadique. Hueneque dutya mique era ejitaju petameryaque. ²⁰ Bahuadyami era pacarucu purari jida eque amaca eque era inayaju, tumbaedyu pacarucu ude nityaqui cuanaque oro eaque. Arepa petahua ama bucha, tuquemi adebaya ama eje buchique. Erami pana cueja aya tumeque eje buchique. Pacarucu purari cuanatu pacarucu epuju ecue quisarati cuejaqui cuanaque buchique. Pacarucu ude nityaqui oro ea cuanaque tuna, pacarucu epuju cuanaque eaqueja ecatyati cuanaque buchique, —jadya tura cuejacuare.

Efeso epuju Jesús queja ecatyati cuanaja ishuque quisarati

2 Jesúsra ique isaranucacuare:

—Jadya hueneque Efesoju eaqueja ecatyati cuanaque naruquija ishu.

“Idya ique pacarucu purari jida eque amaca inaquique, pacarucu ude nityaqui oro ea cuanaque ducu netiyaque. Rियाque ecue quisarati tuque Efesoju ecue cuanaque cuejacara aya:

² Ique bahue dutya micuana eje bucha anie juyaque. Ique bahue dutya huecaca micuana mere juyaque. Eratu adebaya eaqueja nimee jujacama micuanara dutya abacata idu ahuaque. Adebayadya tuque micuanara ecuita jidama cuanaque eiduque. Micuanaratu nime adebahua ecue yana atsaquipa ejuu jadya juya cuanaque. Adebayadya tuque micuanara ecana tuna pusha pusha arida cuanaque. ³ Iduhua micuana dutya ique jiteque. Peya cuanara micuana dyaque nerecaturahua, micuana era amereya eque juya tibu. Arepa dyaque nerecada ataya ama bucha, micuana eatsehue nime aputahua ama. ⁴ Jadya ama bucha, micuana ahua ique dyaque cahuaisha ishuque. Iyacua micuanara iyuhuedama baya, micuana eaqueja catyatimetse juatsu juhua bucha ama. ⁵ Jadya tibudya necaadebaticue eje bucha iyuhuee micuanara ique bati-bunehuaque. Neajacacue Yusu cahuaisha ishuque. Neiyuhue batsanucacue ique micuanara icuene ahua bucha. Ique masadama junanucaya. Micuanara ni ique icuene iyuhueda bahua bucha iyuhuee banucaya ama, tume micuana peya cuana bahuityaqui amerejacaya. Apudaju lamparina jujuyaque esecau bucha, micuana amerebuque, tume micuana ni eje tupu ecue quisarati bahuityaqui junucaya ama. ⁶ Jadya ama bucha, jidadya tu micuanaja ujeu baishu Nicolás bacaqui cuanaque jubahue cuanaque. Eratu ujeudya baya tunaja jidamaque beruque inime cuana. ⁷ Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque. Ijahua queja cacuatsashameretiya ama cuanaque tuna tyadadiya inime acui caca earau bucha, ACUI CACA CHACHA JUISHUQUE bacani Yusuja yacua juque”, jadya Jesúsra huenequecuare Efesoju tuaqueja ecatyati cuanaque naruquija ishu.

Esmirna epuju Jesús queja ecatyati cuanaja ishuque quisarati

⁸ Jesúsra isaranucacuare:

—Jadya hueneque Esmirna eaqueja ecatyati cuanaque naruquija ishu.

“Idya dutya ai iyametsequi juhuaque, dutya ai tilladadiqui juyaque jadya. Idya majutsu chacha netit-surancuacuare. Rियाque quisarati cuejacue Esmirna eaqueja ecatyati cuanaque:

⁹ Ique bahue dutya micuana eje bucha anie juyaque. Adebaya tuque era micuana canerecathuaque, nerecada jadique. Jadya ama bucha tuque micuanaja aniya dutya ai cuana Jesús queja ecatyati cuanaque tyatanayaque. Bahuedya ique micuanaja ishu jidama quisaratiya cuanaque. Tume cuanaque

tuna “Yusuja cuanaque ecuana. Israelita neri ecuana”, jadya juya. Ecue cuanaque ama tuna. Tuna tuna Satanásra cuatsashaya eque juya. ¹⁰ Bajida nejuume jadya nrecada cabatitsu. Umae micuana etare apudaju ishatanabuque. Ijahuara micuana canerecatishabuque nime adebayaque yuneridya micuanara ique muibayaque, jadya ama juatsu aijama jadique adeba ishu. Ejetsunue ama micuana nrecada jubuque, peadya tunca huecaca tupu cuana camadya. Majuya tupu eaqueja nimee nejujacaume. Eaqueja nimee ni micuana jujacaya ama, tume micuana Yusu tsehue siri anishaya ni eje tupu jancanuca ishu ama, era quisarati iyahua eque.

¹¹ Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque. Eaqueja nimee jujacaya ama cuanaquetu, arepa majutsu tunaja ecuita ririhua ama bucha, tuna chacha netitsuranucabuque ni eje tupu majunuca ishu ama”,

jadya Jesúsra huenemerecuare Esmirnaju tuaqueja ecatyati cuanaque naruquija ishu.

Pérgamo epuju Jesús queja ecatyati cuanaja ishuque quisarati

¹² Cuejanucacuare tura ique:

—Jadya hueneque Pergamoju eaqueja ecatyati cuanaque naruquija ishu.

“Eradyatu quiyeti ishuque beta eque jacuaque inaya. Riyaque quisarati Pergamoju eaqueja ecatyati cuanaque cuejacue:

¹³ Ique bahue dutya micuana eje bucha anie juyaque. Ique bahue micuana dutya jujeri Satanás merequi cuana ducu aniyaque. Arepa micuana tuhua aniya ama bucha, micuana era bahuityahua equedya jutidya anijacaya ama. Bahuedya ique micuana dyaque nrecada juhuaque. Arepa micuanaja epuju Satanás merequi cuanara Antipas iyehua ama bucha, ecue quisarati bajida tsehue ama cuejaqui juhuaque, micuana eaqueja nimee jujacahua ama, arepa nrecada juya ama bucha. ¹⁴ Jadya ama bucha micuana ahua ique dyaque cahuitisha ishuque. Aniyatu eje uma micuana ducu beru Balaamra bahuityacuare eque anijacacarama juya cuanaque. Berutu Balaamra Balac cuejacuare: “Bahuityacue israelita cuana. Yusu cahuitisha ishuque tuna paa. Cuejacue ecana. Paara tuna yusu cueya cueya ea cuana cuatsaqui eaque. Tunaja caquemitiqerema cuanaque tuna pajaraquere. Tunaja biji ecana pacajuchati” jadya. ¹⁵ Tumebaedya micuana uma Nicolásra jidama bahuityahua eque jujacacarama juya. Eratu tumeque tunaja bahue juya cuanaque ujeu baya. ¹⁶ Jutaquijudy necacualetinucacue inime. Masadama junanucaya micuana queja. Junatsu micuana nrecaturanaya inime cacuaeticarama juya cuanaque. Catinabuque micuana tsehue quiyeti ishuque ecue ecuatsa eque cuinanaya tsehue. ¹⁷ Micuana quijacabacati aqui juatsu, nebacacue Yusuja Espiritura ique eque eaqueja ecatyati

cuanaque cuejayaque. Eaqueja nimee jujacaya ama cuanaque tuna tyadadiya iyacuaque earaqui maná Yusura béru tyacuare buchique. Tumebaedya tuna tyadadiya tumu pajadaque. Tumujutu ehue jubuque tunaja ebacani iyacuaque ni ejera adebayaque ama. Tuque inatsaquira camadyatu adebabuque”,

jadya Jesúsra huenemerecuare Pergamoju tuaqueja ecatyati cuanaque naruquija ishu.

Tiatira epuju Jesús queja ecatyati cuanaja ishuque quisarati

¹⁸ Cuejanucacuare tura ique:

—Jadya hueneque Tiatiraju eaqueja ecatyati cuanaque naruquija ishu.

“Idya Yusuja Ebacuaque. Ecue yatucadya tu etiqui juju bucha, ehuchi bronce dyaque jida ebajeje bucha. Riyaque quisarati Tiatiraju eaqueja ecatyati cuanaque cuejacue:

¹⁹ Ique bahue micuana dutya eje bucha anie juyaque. Adebaya tuque era eje bucha iyuhuee micuanara bayaque. Adebaya tuque micuana eaqueja nimee jujacayaque ama, dyaque micuanara mere ayaque jadya. Bahuedya ique micuanara abacata idu ayaque, arepa micuana eje bucha jutidya ataya ama bucha. Bahue ique micuanara iyacua dyaque ayaque, catibutiyaque jucuaque bucha ama. ²⁰ Jadya ama bucha, tuque micuana ahua ique eje bucha cahuitishae aishuque. Micuanaratu tyahua emajaca tumeque epuna, Jezabel bae nimeeque pusha pusha bahuityaqui. Tuquetu jadya juya: “Iquepa Yusu equeque cuitadya quisarati cuejaquique” jadya. Tura tuna jahue jutidya aya ique merequi cuanaque. Tumeque epunara micuana bahuityaya pusha pusha. Tura micuana cuejaya jidadya caquemitiqeremaque jaraquere ishu, yusu cueya cueya cuanaque etyaque ara ishu jadya. ²¹ Eratu tyahua dyaque emajaca tuque inime cacuaetiti ishu. Tumetu tuque cacuaeticarama juhua. Ijehuecaramatu aya tuja beru jidamaque ani. ²² Ique merequi cuanaque ni jidama anijacaya ama, riyaque epuna juya bucha, tume tuque tumeque epuna majutaqui ujejeda amereya. Canerecatishabuque tuque era tuatsehue jidama juya cuana tsehue. ²³ Tumebaedya tuque iyedadiya tuque anihua bucha anie juhua cuanaque. Era jadya ahujutu dutya ecue cuanara adebabuque era inime tupu cuana adebayaque, peadya peadyara ai bijiseriya cuanaque. Micuana jidama juhua tibu, micuana nrecaturadadibuque. ²⁴ Umae micuana Tiatiraju cuanara tuque micuana ahua ama jidama ebahuitya cuanaque. Tumebaedya micuana dyadi Satanásra amereya eque ama aniya. Ni Satanásra yana eque juya cuanaratu adebaya ama dutya tuja bahue eque juishuque. Jidama cuanaque aniya bucha camadya neaninucaume. Riyaque camadya micuana amereya. ²⁵ Eaqueja nimeedya jutidya nejuajecue ique junanucaya tupu. ²⁶ Ecue Etatara ique dutya

yahua juque cuatsashaqui amerehua. Micuana ni eaqueja nimee jujacaya ama, micuana ni ecue biji eque anijacaya ama tereya tupu, tume micuana era ecuatsashaqui eatsehue amereya. Yahua Naruqui nejura dyaque muida cacuatsashati tsehue dutya era amereya eque jucarama juya cuanaque pana aputasha aya tupu, mechi sura epuririshau bucha. ²⁸ Tumbaedy micuana tyadadibuque purari ebari huecacayaju jeyaque. ²⁹ Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque”, jadya Jesúsra huenemerecuare Tiatiraju tuaqueja ecatyati cuanaque naruquija ishu.

Sardis epuju Jesús queja ecatyati cuanaja ishuque quisarati

3 Jesúsra ique cuejanucacuare:
—Jadya huenenucacue Sardisju eaqueja ecatyati cuanaque naruquija ishu.

“Ecuetu pacarucu espíritu Yusu jaque, pacarucu purari jadya. Riyaque quisarati cuejacue Sardisju eaqueja ecatyati cuanaque:

“Ique bahue dutya micuana eje bucha anie juyaque. Adebayadya tuque micuana eje uma era amereya eque anicarama juya cuanaque, arepa micuana eje umara ecue inime eque aniya bucha baya ama bucha. Era micuana majutaquique bucha baya. ² Nimequi nejucue. Majuhuieja riya piji camadya casa aniya bucha, jadya micuana iyacua riya piji camadya eaqueja nimee. Necacasaticue eaqueja nimee juishu. Micuana micuana Yusura anishacara aya eque ama aniya. ³ Neadebacue ecue quisarati cuejaqui cuanara micuana bahuityahuaque. Neanicue ecue quisarati eque. Necacualetinucacue inime. Masadama junanucaya micuana queja. Micuana ni inime cacualetinucaya ama, tume micuana nerecaturanaya. Nimemaju micuana banaya. Chiri puji aira ihuayaju ama ejutiu bucha junae ique jubuque. ⁴ Tuhua Sardis epuju aniya eje uma ecuita cuana ecue yana equedya juya cuanaque. Tuna tuna eatsehue junenidadibuque ejutuqui paja tsehue ecajututi, tuna yuneri juya tibu. ⁵ Eaqueja nimee jujacaya ama cuanaque tuna una pajaquiterre jubuque. Apupashabuque ama tuque tunaja ebanani quiricaju aniyaque Yusu queja dutya judirubuque cuanaja ni eje tupu jacanuca ishu ama. Tume tuna adebamerebuque ecue Etataja yacuaju, tuque tsahuaqui cuanaja yacuaju jadya. Abuque tuna: “Jee cuanaque ri ecue cuanaque”. ⁶ Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque”, jadya Jesúsra huenemerecuare Sardisju tuaqueja ecatyati cuanaque naruquija ishu.

Filadelfia epuju Jesús queja ecatyati cuanaja ishuque quisarati

⁷ Cuejanucacuare ique Jesúsra:

—Jadya huenenucacue Filadelfiaju eaqueja ecatyati cuanaque naruquija ishu. “Ique juchamaque. Ique Yusu neri. Idya Yusu queja judiruya cuanaque naruquique. David tuja epuju aniya cuanaque naruqui juhuaque buchique ique. Era pacashahuajutu ni aira eteriu ama. Era terihuajutu ni aira epacashau ama. Riyaque quisarati cuejacue Filadelfiaju eaqueja ecatyati cuanaque:

⁸ Ique bahue dutya micuana eje bucha anie juyaque. Tyahua micuana emajaca ecue quisarati cueja ishu, ni aija micuana cuejamerejacataqui ama. Arepa micuana eje uma piji, nerecada juya ama bucha, ecue quisarati equedya micuana juhua. Eaqueja nimee micuana jujacahua ama. ⁹ Aniyatu “Yusuja cuanaque ecua. Israelita neri ecua”, jadya juya cuanaque. Pusha pusha arida tuna. Satanás jaquedya jutidya tuna. Micuana Filadelfiaju cuanaque micuana huaraji amereya. Tume ique adeba baecua cuanaque tuna era micuana iyuhueda bayaque bahue amereya. Micuanaja yacuaju tuna chichucata amereya. ¹⁰ Micuana micuana eaqueja nimee jujacama anihua. Tume micuana ni ejeque buchique eje bucha abuque ama era dutya eje bucha juhuaque adadiyaque cuejahua. Nerecaturadadiya tuna Satanásra dutya cuatsashaya eque juya cuanaque. ¹¹ Masadama junanucaya. Eaqueja nimee nejujacaume, Yusura micuana tyaana ahuaque aija seca ishu ama. ¹² Eaqueja nimee jujacaya ama cuanaque tuna Yusuja yacuaju anishasiriya ni eje tupu jaca ishu ama. Tuna tuna Yusuja yacuaju dudu buchique, aija nityasicua ishuque ama. Tuna quejadya tuque ecue Yusuja ebanani huenebuque, ecue ebanani iyacuaque, tumbaedy “Iyacuaque Jerusalén Yusuja epu ebari barepa eque buteya juque” jadya. ¹³ Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque”, jadya Jesúsra huenemerecuare Filadelfiaju tuaqueja ecatyati cuanaque naruquija ishu.

Laodicea epuju Jesús queja ecatyati cuanaja ishuque quisarati

¹⁴ Cuejanucacuare Jesúsra:

—Huenenucacue Laodiceaju eaqueja ecatyati cuanaque naruquija ishu.

“Ique yunerique neri. Ique tuyu quisaratiya. Ique equequedyatu dutya ai riyaque yahuaju aniyaque. Riyaque quisarati cuejacue Laodiceaju eaqueja ecatyati cuanaque:

¹⁵ Ique bahue dutya micuana eje bucha anie juyaque. Micuana micuana eaqueja nimee cuitaque ama; ni micuanara pana bijidamadura aya. Ena uque jahua jahua buchique micuana; uqueda cuita, ni bada cuita. Areque micuana ducuta eaqueja nimee ejuu; jadya ama juatsu pana jaca apiisi neacue. ¹⁶ Micuana micuana eaqueja nimee neri ama; ni micuanara bijidamaduraya. Jadya jutidya micuana juya tibu, ijehueya micuana era. Ena uque

jahuajahuaque ecuatsa juque epushau bucha, jadya ijehuee micuana adadiya micuana inime cacuaretiyaque ama juatsu. ¹⁷ Jadya micuana juya: "Chipiruique ecuana. Jida ecuana aniya. Ni aidya jutidya ecuanaja bataqui ama juya". Arepa micuanaja riyaque yahua juque ai aijama paju ama bucha, micuana ijahue catiya, Yusura jida baya bucha cabatitsu. Yusura micuana baya nereca usi, inijeda, aima, atucama, ecatacati. Shuhui bucha micuana juhua ecatacati, Yusuja biji eque juishu adebahua ama tibu, ni tuja biji eque ani ishu. ¹⁸ Anicara ni micuanaja juya dutya micuanara sareya cuanaque, ique nebacacue. Era micuana tyadadiyaque tu dyaque tsuje aridaque oro neri buchique. Era micuana Yusuja yacuaju bisu baecua amereya, ecatacatiju cajututi ishu era ejutuqui paja etyau bucha. Yusu eje bucha pureamatura aishuque bahuitya, yatucaju esamaqui iyatsu ecapetatishau bucha micuana amereya. ¹⁹ Eratu nereda aya dutya era iyuhueda bayaque, tuna jidama juyaju. Era tuna cuejaya tuna inime cacuaretiyaque ama juatsu. Juttaquiju ducuta inime necacuareticue. ²⁰ Era micuana cuejaya; eaqueja nimee nejucue. Ique nudyatacara juyaju, eteriqui peque netiya buchique. Micuana ni eaqueja catyatiya, ique micuana tsehue junenijacaya ama, ni micuana eatsehue. ²¹ Eaqueja nimee jujacaya ama cuanaque tuna iyabutyabuque ique peque, ique huaraji epu cuana naruquique juatsu. Ique casada juatsu tuque ijahue ahua Yusu ujeu cuanaque. Iyacua ique anibutehua ecue Etata Yusu peque enaruqui juishu. Ique baedyatu judadibuque eaqueja nimee jujacaya ama cuanaque. ²² Micuana quijacabacati aqui juatsu, nebacacue Yusuja Espiritura ique eque eaqueja ecatyati cuanaque cuejayaque", jadya Jesúsra huenemerecuare Laodiceaju tuaqueja ecatyati cuanaque naruquija ishu.

Tunara Ecuana Cuatsashaquique pureama barepaju acuaque

4 Jadya tume cuanaque bau jadya juatsu tuque banucacuare Yusu queja nubidiru ishuque. Tume tuque bacanucacuare corneta tsuri icuene ique isaraqui jucuare buchara isaranucayaju. Jadya tura acuaque:

—Tsuracue requeja. Bamereya mique eje bucha judadibuque, —jadya tura acuaque.

² Tura ique isaraya tsunumee Yusuja Espiritura bamerehua eje bucha judadiyaque. Bacuare tuque Huaraji Dutya Casa Tsehueque. Bacuare tuque tuja eaniquiju aniyaju. ³ Riyaque Huarajitu dyaque jidaque jucuare. Bacuare tuque jida, tiquida, huecada. Casharina bucha tiquie tuque bacuare. Tajina jiuque patya aniyaque tuque tumu esmeralda tiqui bucha sahuae tuque bacuare. ⁴ Peya bacue tuja eaniqui cacuatsashati ishuque jiruru bacuare beta tunca pushi earacana eaniqui cacuatsashati ishu cuanaque. Tuhadyatu anicuare beta tunca pushi earacana ecuita cuana

Yusu mui juya cuanaque. Tunaja unatu jucuare pajada. Iyucaju tunajatu anibarecuare puja oro eaque.

⁵ Eaniqui cacuatsashati ishuque Ecuana Cuatsashaquique aniya juquetu cuinanacuare pupipupiyaque, sicacadaque, tiritiyaque bucha. Tuja yacuaju tuque bacuare pacarucu ude jujunetibareyaju. Riya cuanaque tu pacarucu espíritu cuana baeque Yusuja yacua juque. ⁶ Yusuja yacuajutu tumebaedya anicuare ai cuana pajidaque napajada, huecada buchique.

Enaruqui dyaque aridaja eaniqui tuque bacuare pushi bape bape butsequinie cuanaja etabu, peadya peya eque amaca, peya bacue peya eque amaca jadya pushi eque amaca. Atuca umada tuna bacuare.

⁷ Icuenequetu jucuare iba jiuque. Peya tuque bacuare toro jiuque. Quimisha ishuque tuque bacuare ecuita butsequini jiuque. Pushi ishuque tuque bacuare huihuipa jiuque. ⁸ Tumeque pushi bape bape butsequinie cuanaja tuque bacuare shucuta yajapara cama peadya peadya. Junu badebare tujatu jucuare yatuca cuana dyaque eque yajapara cuanaju, educu eque bacue yajapara cuana riya piji quishayaju, ecuita patya jaque tupu dyane. Jadya tuna jeruchinepe, jerusisa jadyajucuare:

"Miquemi juchama neri, Ecuana Cuatsashaquique, Yusu.

Miquemi dutya casa tsehueque, Miquemi yuequedya animetseque.

Iyacuami aniya. Aputanime ama mique", jadya tunajatu ajacacuare ama Ecuana Cuatsashaquique.

⁹ Tumetu bape bape butsequinie cuanara pureama, mui, yusurupai au jadya acuaque emuita eaniquiju aniyaque. Pureama tuna acuaque Anisiriyaque Maju Baecuaque. ¹⁰ Tuna jadya Yusuja ishu jerujacahuajutu beta tunca pushi earacana Yusu mui juya cuanaque nuyubarecuare Yusuja yacuaju. Tume cuanaratu mui, naru jadya acuaque Anisiriyaque Maju Baecuaque. Tume tunajatu tuja yacuaju puja oro eaque iyabarecuare.

¹¹ "Miquemi Ecuana Cuatsashaquique.

Mique peadya mi Yusu ecuanara muiyaque.

Mique peadya camadya mi yuneri cuita jidaque.

Mique peadya mi muitaquique.

Mique peadya mi dutya casa tsehueque.

Pureama mique ecuana aya, mira dutya ai aniyaque iyahua tibu.

Dutyai iyacua aniyaquetu mique eque iyatanacuare, mira jadya bijida bahua tibu", jadya tuna jucuare.

Jesucristora quirica epirurique sirracuaque

5 Tume eaniqui cacuatsashati ishujū aniyaja jida eque amaca emetucuju tuque bacuare quirica epirurique, educu eque, dyaque eque jadya ehuenecue. Tumeque quiricatu dyaque eque pacarucu sipibare ea jucuare. ² Bacacuare tuque Yusu

tsahuaquira casada jebuda etsuri tsehue bacadurayaju:

—¿Ejequetu quirica esipibareque sirara, isara jadya aishu ecuatsasha? —jadyatu jucuare.

³ Ni barepaju ni riyaque yahuaju ni yahua emaque jadyatu aijama jucuare quirica sirara ishuque; ni tu ejeque anihua tumeque isara bahueque. ⁴ Ique dyaque pacuare, ejeque tumeque quirica sirara, isara jadya aishuque aijama baatsu. ⁵ Tume peadya ecuita Yusu mui juyara jadya acuare:

—Paume dyaque cuita. Aniyatu peadya; tura camadyatu esirarau. Tumequetu Judá eque ejuracanaque. Tumequetu ecuari David eque ejuracanaque nucadya. León bucha casae tuque. Tura peadya camadyatu esipibareque sirarabaretsu epirurique ejirau, —jadya acuare Yusu mui juyara.

⁶ Tume tuque bacuare Dutya Cuatsashaquija yacuaju ecuanaja jucha cuana tsujetyaqui majucuareque, UHUISHA BUCHA IYETA EATAHUAQUE. Pushi bape bape butsequinie cuana ducu, Yusu mui juya cuanaja etabutu neticuare. Ejitajudya tujatu jucuare ecuita cuanaja jucha tilla ishu iyetahuaque mecuare. Tujatu anicuare pacarucu edana, pacarucu yatuca jadya. Tumeque yatuca cuana tu pacarucu espíritu cuana, Yusuja baeque dutya yahua queja tura cuadishhuaque. ⁷ Tumeque UHUISHA BUCHA IYETA EATAHUARA tu inaticuare tumeque quirica epirurique Dutya Cuatsashaquija eaniquiju aniyaja emetucu jida eque amaca equeque. ⁸ Tura quirica inatihuaju tuna pushi bape bape butsequinie cuanaque, beta tunca pushi earacana Yusu mui juya cuanaque nuyucuare UHUISHA BUCHA IYETA EATAHUAJA yacuaju. Dutya Yusu mui juya cuanajatu anicuare dudu ishuque, arpa bacani. Inacuare tunajatu equiniqui oro eaque, atsaca madi muru huani bucha tsehue ejequeshaque, dyaque ijimedaque. Tumeque muru ijimedaque tu Yusuja cuanaque tuatsehue quisariatijaju adeba ishuque.

⁹ Riyaque jeru iyacuaque tunajatu acuare:

“Jesucristo, miquemi jida quirica epirurique ina ishu, tuja esipi cuanaque sirara ishu, mique iyetanahua tibu.

Majutsu micue ami quijehuetitsu, tuquemi dadihua Yusuja ishu ecuita cuana dutya yahuaju, dutya anae cuanaque.

¹⁰ Miradyatu iyahua huaraji cuana dyaque arida cuanaque.

Cameremeretihua mique.

Narubuque tunajatu riyaque yahuaju cuanaque”, jadya tuna jerucuare.

¹¹ Jadya juatsu tuque petanucacuare. Bacacuare Yusu tsahuaqui tumeque eaniqui cacuatsashati ishuque jiruru aniya cuanaque, tumbaedyia tuhua pushi bape bape butsequinie cuanaque, Yusu mui juya cuanaque jadya. Anicuare tuna jetiama piye batilla tupu ama.

¹² Tunadya tuna etsuri jebuda tsehue jadya juyaju bacacuare:

“Dyaque jida taa mique, UHUISHA BUCHA IYETA EATAHUAQUE.

Miquemi dyaque casadaque. Micuetu dutya aniya.

Miquemi dutya bahueque. Micuetu dutya ai ataqui.

Muiya mique ecuanara. Dyaque jida, casada jadya taa mique.

Pureama mique ecuanara aya”,

jadya tunajatu UHUISHA BUCHA IYETA EATAHUAQUE acuare.

¹³ Tumbaedyia tuque bacanucacuare Yusura dutya iyacuare cuanaque, barepaju cuanaque, yahua emaque cuanaque, riyaque yahuaju aniya cuanaque, cueri cuanaja ecuaqueju aniya cuanaque, dutya anicuare cuanaque jadya juyaju:

“Pureama metse ecuanara aya.

Muiya metse ecuanara.

Dyaque jida, casada jadya taa metse.

Metsejatu dutya ai ataqui.

Jadya metse ecuanara pureama aya, Dutya Cuatsashaquique, tumbaedyia Jesucristo UHUISHA BUCHA IYETA EATAHUAQUE”, jadya tunajatu acuare.

¹⁴ Pushi bape bape butsequinie cuanara tuna quemitsacuare:

—¿Jadidya paju!

Tumetu beta tunca pushi earacana Yusu mui juya cuanara nuyutsu yusurupai acuare. Tunaratu muicuare maju baecua aniyaque.

UHUISHA BUCHA IYETA EATAHUARA quirica pacarucu sipibare eaque sirarabaretsu, jiracuareque

6 Tume tuque bacuare UHUISHA BUCHA IYETA EATAHUARA icueneque esipique sirarayaju. Tume tuque bacacuare peadya bape butsequinieque tiriti bucha etsuri tsehue jadya juyaju:

—¿Cuinanatsu, petacue! —jadya tura acuare.

² Tume tuque bacuare cahuayu pajadaque ebajeje netiyaju. Tumeque cahuayu isaaniquiratu inacuare etununu. Tuquetu tyatanacuare dyaque jida pijique oro eaque iyucaju jutu ishu, tuque umada tsehue catiju dyaque casadaque adebataqui juishu. Tuquetu casada. Jujacaya amadyatu casada.

³ Beta ishuque esipique UHUISHA BUCHA IYETA EATAHUARA sirarahaju tuque bacacuare beta ishuque bape butsequinieque jadya juyaju:

—¿Cuinanatsu, petacue! —jadya tura acuare.

⁴ Tumetu cuinanacuare peya cahuayu pudedaque.

Tumeque cahuayu isaaniquijatu anicuare casa dutya ecuita cuanaja jidaque inime cuana seca ishuque, amena ecuita cuana riyaque yahuaju aniya cuanaque quietibare ishu. Tyatanacuaretu quieti ishuque dyaque aridaque, peya anae cuana tsehue catiyaque, tuna jetiama majubuque jadique.

⁵ UHUISHA BUCHA IYETA EATAHUARA quimisha ishuque esipique sirarayaju jucuareque tuque bacacuare quimisha ishuque bape butsequinieque jadya juyaju:

—¿Cuinanatsu, petacue! —jadya tura acuare.

Petatsu tuque bacuare cahuayu sehuedaque.

Tumeque cahuayu isaaniquiratu inacuare tuputupu

ishuque. ⁶ Tume tuque bacacuare etsuri ejeque cuana bape bape butsequinie cuanaque patya jadya juyaju:

—Trigo, ijique jadyatu dyaque daditaqui ama jubuque. Peadya kilo trigo, jadya ama juatsu quimisha kilo ijique jadya piji tuna caquemitibuque peadya huecaca mere tsuje. Jadya ama buchatu etseri, uva nacaca jadya tilla tupu ama anibuque, —jadyatu jucuare.

⁷ UHUISHA BUCHA IYETAETATAHUARA pushi ishuque esipique sirarayaju jucuareque tuque bacacuare pushi ishuque bape butsequinieque jadya juyaju:

—[Cuinanatsu, petacue! —jadya tura acuare.

⁸ Petatsu tuque bacuare cahuayu jahuadaque. Tuque isaaniquija ebacanita jucuare Maju. Tuque tupujutu jecuare emaju cuanaja yatanana naruquique. Cahuayu jahuada isaaniquiquetu tyatanacuare casa jetiama ecuita cuana iye ishu. Riyaque yahuaju dutya ecuita aniyaque patya jaqueque patya jaque nucadya iye ishuque casatu tyatanacuare. Jetiama tuna catitayaju majubuque, mije juatsu, umae ujeje casadara inahua-ju. Peya cuanatu cuanubi mureda cuanara arabuque.

⁹ UHUISHA BUCHA IYETAETATAHUARA pishica ishuque esipique sirarayaju jucuareque tuque bacuare mesaju muru ijimedaque pahua ishu ema-que yatanana cuana, Yusuja quisarati cuejaqui cuanaque yunerique cuejajacaya amaju iyetacuare cuana jaque.

¹⁰ Tume cuanaquetu quisaraticuare etsuri jebuda tsehue:

—Yusu, miquemi juchama neri. Miratu ayadya mira eje bucha aana ayaque. ¿Eje tupu mira ecuana cuarehuanadadiya, mique adeba baecua cuanara ecuana jidama ahuaque? —jadya tunajatu Ecuana Cuatsashaquique acuare.

¹¹ Tume tuna tyatanacuare una pajadaque.

—Micuana micuana iyetanahua Jesúsja quisarati cueja, tuque merequi jadya juhua tibu. Jetiama tuja quisarati cueja juhua cuanaque tuna iyetanadadiyadya. Necanajacue jari micuana iyetanacuare tupu, ique merequi cuanaque iyetanadadinucaya jari tupu, —jadya tujatu ecana cuejacuare.

¹² UHUISHA BUCHA IYETAETATAHUARA shucuta ishuque esipique sirarayaju jucuareque tuque bacuare yahua bucucuyaju. Ijetitu sehuedaque jucuare, eju-
tujui sehuedaque bucha. Baditu jucuare ami bucha pudee. ¹³ Purari cuana bacue pacaterecuare yahua-ju, manga caca cuejijira casada huicuyaju epacacau bucha. ¹⁴ Barepatu piruritanacuare quirica epiruritanau bucha. Dutya emata cuana, ecububu cuana jadyatu peya queja iyasicuatanacuare. ¹⁵ Dutya ecuita Yusu adebacarama juhua cuanaque tuna tumu ebari majaca cuanaju emata cuana equiqueju catehua jucuare. Riyaque yahua juque ecuari cuana tuna catehua jubarecuare. Arida, casada cuanaque tuna catehua jubarecuare. Sudaru cuana cuatsashaqui cuanaque tuna catehua jubarecuare, tumbaedy a chipiruiqui, ecuatashaqui cuanaque jadya. Tsujetyatama mere juya cuanaque, tsujetyataya cuanaque tuna catehua jubarecuare. Jadya eque tuna dutya catehua jubarecuare. ¹⁶ Tuna tuna jucuare:

—Catehua nejura rehua emata cuanaju, Yusu Epu Cuana Naruquira ecuana epetau tibu. UHUISHA BUCHA IYETAETATAHUAREtu dyaque ecahuaiti ecuan tsehue, tumbaedy dutya tuque muibacarama juya cuana tsehue. ¹⁷ Tuque tuja cahuaiti cabameretiyaque huecaca juetihua-ju ni ejeque buchique chacha juya ama. Dutya ecuana majuterebuque, —jadya tuna jubarecuare.

Yusuja cuanaque equetiju huenetanacuareque

⁷ Jadya juu jadya juatsu tuque bacuare Yusu tsahuaqui cuanaque. Bacuare tuque pushi yahua-ju pushi emajaca eque cuejiji cuinanaya eque junetibareyaju. Tunaradyatu tachicuare cuejiji, ni ejequeja yahuaju cuejiji juishu ama, enaja ecuaque pei ishu ama. Bucucushacuare amatu ni ejeque acui buchique cuejijira. ² Yusura tuna cuatsashacuare yahua, cueri cuanaja ecuaque jadya yuamatura ishu. Tumbaedy tuque peya banucacuare Yusu tsahuaquique ijete cuinanaya eque amaca equeque jeyaju. Yusu Neri jaque jadya ehue bacuare junetiya-ju. Jeeque Yusu tsahuaquiradyatu peya cuana casada quiquecuare yahua, cueri cuanaja ecuaque jadya yuamatura ishu ecuatasha cuanaque:

³ —[Neihuacue jari! Neyuamaturaume jari yahua ni cueri cuanaja ecuaque ni acui cuana jadya. Icuene tuque ecuanaja huenetaqui jari ai equetiju Yusuja cuanaja, tuja cuanaque jadique adeba ishuque, —jadya tujatu ecana acuare.

⁴ Bacacuare tuque cuejayaju eje uma ehuenetana cuanaque. Israeljatu anicuare peadya tunca beta earacana ebacua cuanaque. Tuna eque ejuracana cuanaquedy a tuna israelita cuana. Anicuare tuna 144.000 ehuenetana cuanaque. 12.000 peadya ebacuaque cama eque juracanahua cuanaque.

⁵ 12.000 tuna huenetanacuare Judá eque ejuracana cuanaque,

12.000 Rubén eque ejuracana cuanaque,

12.000 Gad eque ejuracana cuanaque,

⁶ 12.000 Aser eque ejuracana cuanaque,

12.000 Naftalí eque ejuracana cuanaque,

12.000 Manasés eque ejuracana cuanaque,

⁷ 12.000 Simeón eque ejuracana cuanaque,

12.000 Leví eque ejuracana cuanaque,

12.000 Isacar eque ejuracana cuanaque,

⁸ 12.000 Zabulón eque ejuracana cuanaque,

12.000 José eque ejuracana cuanaque,

12.000 Benjamín eque ejuracana cuanaque.

Jadya tuna jucuare.

Jetiama ecuita una pajaqui cuanaque bacuareque

⁹ Jadya juu jadya juatsu tuque petacuare. Bacuare ecuita cuana jetiama. Dutya epu cuana juque, yahua juque jadya tuque jeyaju batsacuare. Anicuretu dutya yana eque quisaratiya cuanaque. Jetiama piyebatilla tupu ama tuna jucuare. Bacuare tuna Yusu Dutya Cuatsashaquija yacuaju, tumbaedy UHUISHA BUCHA

IYETAE ATAHUAJa yacuaju jadya netibareyaju. Pajada una tsehue ecajututi tuna bacuare. Ejaqui cuana inat-su tuna netiyaju bacuare pureama juyaque. ¹⁰Jadya tuna quique eque jucuare:

“Miquemi Yusu ecuanara muiyaque.

Miratu cuatsashaya dutya.

UHUISHA BUCHA IYETAE ATAHUA eque mira ecuana Ijahua quejaque inajacamerehua ecuana miatsehue anidiru ishu”,
jadya tuna jerucuare.

¹¹Yusu tsahuaqui cuanaratu tabucuare eaniqui cacuatsashati ishuhu anibutehuaju, Yusu mui juya cuanaque, pushi bape bape butsequinie cuanaque jadya. Dutya riya cuanaque barepaju Yusu tsahuaqui cuanaque tuna yahua queja huipuchitanabare jucuare eaniqui cacuatsashati ishuhu anibutehuaja yacuaju. Pureama tuna acuare Yusu.

¹²“¡Jadidya mique!

Pureama mique ecuana aya.

Dyaque jida, casada jadya taa mique.

Miquemi dutya bahueque.

Yusurupai mique ecuana ajacaya ama.

Muiya mique ecuanara.

Miquemi dyaque casadaque.

Micuetu dutya ai ataqui.

Miquemi Yusu ecuanara muiyaque.

Jadya mique ecuanaja ajacanime ama.

¡Jadidya paju!”

jadya tunajatu Yusu acuare.

¹³Tume Yusu mui juyara bacaduracuare:

—¿Adebayadyami riya cuanaque una paja jutu jadya cuanaque? ¿Bahuemi ejuque tume cuanaque jeyaque? —jadya tura acuare.

¹⁴—Aijama, tata. Midyami bahue, —jadya tuque acuare.

—Riya cuanaque ri Jesús queja nimee jujacahua cuanaque ama, arepa peya cuanara tuaqueja catyatihua baatsu dyaque nerecaturahua ama bucha. Yusura tunajatu jucha cuana apupashahua, tunara Jesús majuhuaque, tuque tuna jiteque ami quijehuetihuaque ejenehua tibu. Iyacia tuna una pajaqui, jucha metse ama jadique adeba ishuhue. ¹⁵Jadya tibudya tuna eaniqui cacuatsashati ishuhu aniyaja yacuaju netibareya. Huecada tupu, meta tupu jadya tunajatu Yusu mereya. Tuque tuja eaniqui cacuatsashati ishuhu aniyara tujatu ecana naruya ni eje tupu narujaca ishu ama. ¹⁶Aracara, ijicara jadya juatsu tuna nerecada junucaya ama. Ni eje tupu tuna ijetija uquera nerecat-uranucabuque ama. ¹⁷UHUISHA BUCHA IYETAE ATAHUAQUE Yusuja eaniqui cacuatsashati ishu tuyu netiyara tuna naruya, tachiya jadya aya. Uhuisha naruquira tuja uhuisha cuana enaruu bucha, narue tujatu ecana aya. Tura tuna ijimereya ecuana chacha anishaqui juyaque. Yusura tuna nime aputashaya dutya tuna nerecada juya cabatitsu pacuare cuanaque, —jadya Yusu mui juyara acuare.

UHUISHA BUCHA IYETAE ATAHUARA pacarucu ishuhue esipique sirarahuaju jucuareque

8 UHUISHA BUCHA IYETAE ATAHUARAtu sir-aracuare quirica camadya ishuhue esipique. Tura sirarahuajutu barepaju dutya yaratupu abacatanaterecuare. ²Jadya juatsu tuque bacuare pacarucu, barepa juque Yusu tsahuaqui cuanaque Yusuja yacuaju netibareyaju. Tunadya tuna tyatanacuare pacarucu corneta meya ishuhue, eje bucha judadiyaque cueja ishuhue. ³Tuequedyatu junanucacuare peya barepa juque Yusu tsahuaquique. Junatsutu netinacuare mesaju muru ijimedaque pahua ishu peque. Tyatanacuaretu umada muru ijimedaque. Huesacuare tujatu muru ijimedaque quiniquique mesa oro eaque dyaque iya ishu, Yusuja eaniqui cacuatsashati ishu pequeque. Pahuacuare tujatu muru ijimedaque Yusuja ishu, Yusuja cuanaque Yusu queja dutya bacabacaya cuana tsehue apee. ⁴Tumetu muru ijimedaque huani tsuracuare Yusu queja barepaju Yusu tsahuaquija emetucu juque, Yusu queja ecatyati cuanaja quisarati cuana tsehue tsurapee. ⁵Tumetu barepaju Yusu tsahuaquira jequeshacuare muru ijimedaque quiniquique etijaqui tsehue mesaju aniyaque. Dacashacuaretu yahuaju. Tura jadya ayajutu tiriticuare. Sicacada, pupipupiya, yahua bucucu jadyatu jucuare.

Yusu tsahuaqui cuanara corneta meyacuaque

⁶Pacarucu, barepa juque Yusu tsahuaqui cuanaque tuna cabajejeticuare corneta meya ishu.

⁷Icueneque Yusu tsahuaquiratu corneta meyacuaque. Tura corneta meyajutu yahuaju pacacacuare nei juya bucha cuita bise etiqui ami tsehue ecujatique. Aridatu yahua tirucuare. Patya jaque jujeritu yahua tirucuare. Tumebaedyatu tume tupu nucadya acui, acuihuija cuana jadya tirucuare. Aijamatu jucuare yachi nutsa ni euhua cuanaque yahua etiruju.

⁸Beta ishuhue Yusu tsahuaquiratu meyanucacuare tuja corneta. Tura meyajutu pacacacuare cueri cuanaja ecuaqueju ai cuana emata ebari buchique jujuyaque. Patya jaque jujeritu cueri cuanaja ecuaque ami cabapeticuare, emata buchique jujuyaque pacacahuaju. ⁹Patya jaque jujeritu cueri cuanaja ecuaqueju aniya cuanaque majucuare. Patya jaque jujeritu cuaba ebari cueri cuanaja ecuaqueju cuanaque aputacuare.

¹⁰Quimisha ishuhue Yusu tsahuaquiratu meyacuaque tuja corneta. Tura corneta meyajutu purari dyaque aridaque pacacacuare barepa juque jujuyaque. Jetiama cueri cuanaju, cueri huitsana cuanaju jadyatu pacacacuare. Patya jaque jujeritu cueri cuanaju cueri huitsana cuanaju jadyatu pacacacuare. ¹¹Tumeque purari bacanitu jucuare “Patsedaque”. Dutya ena cuanaju purari pacacahuajutu ena cuana patseda jubarecuare. Umadatu ecuita majucuare tumeque ena patsedaque ijitsu.

¹²Pushi ishuhue Yusu tsahuaquiratu meyacuaque tuja corneta. Tura corneta meyajutu patya jaque jujeritu

ijeti, badi, purari cuana jadya huecada jujacacuare. Quimisacarucu ura tupu dyanetu ijetija hueca riya piji cuita jucuare. Tume tupu ura nucadyatu riya piji badija, purari cuanaja hueca riya piji jucuare. Quimisacarucu uradyatu dutya pana apunatere jucuare.

¹³ Jadya juatsu tuque petanucacuare huihuipa barepa patya jetajetaniyaju. Jadya tuque quiqueyaju bacacuare:

—Ay, ay, ay! Dyaquetu canerecatidadibuque riyaque yahuaju aniya cuanaque, peya quimisha barepa juque Yusu tsahuaqui cuanara tunaja meya ishuque meyayaju! —jadyatu jucuare.

9 Pishica ishuque Yusu tsahuaquiratu meyacuaru tuja corneta. Tura corneta meyayaju tuque bacuare ai cuana purari bucha barepa juque yahuaju pacacayaju. Purari jiuquetu cuatsashatanahua, emajaca dyaque aridaque espíritu jidama cuanaque eteritana cuanaque pacasha ishu, tuna Yusura canerecatishadadiyaque ihua juya cuanaque. ² Yara tupu juatsu tujatu pacashacuare. Pacashahuajutu cuinanacuare jetiama huani, tee tiruyaju ejuu bucha. Tumeque huaniratu ijeti aputashacuare. Tumetu ajama jucuare cuejiji canajeti ishuque. ³ Tumeque huani juquedyatu cuinanacuare tsei cuana baeque, ai cuana dutya yuamaturaque. Jetajetanacuare ecana yahuaju. Tume cuanaquetu jucuare cati aquique tima cuijaqui ajipa bucha cuanaque.

⁴ —Nutsa, ni ehua cuanaque ni acui cuana jadya neyuamaturame. Yusuja cuanaque adeba ishu ehue cuanaque ujeta neaume. Equetiju huenema cuanaque camadya ujeta neabarecue. ⁵ Arepa micuana jadya ujeta ishu ecuatsasha ama bucha, neiyume ecana. Dyaque cuita camadya ama ecana neujejeshacue, pishica badi tupu camadya, —jadya tuna ai cuana barepajura cuatsashacuare.

Tunaja ujetu jucuare ajipaja uje tupu camadya. ⁶ Tumeque huecaca tume ujeta cuanara aya cuanaque tuna dyaque nerecada jubuque, majuyaque ama, arepa ecana tuna taca camajusareti juya ama bucha.

⁷ Tsei cuanatu cahuyau cuana catira cuaishuque bucha ebajeje jucuare. Iyucaju tunajatu puja anicuare oro eaque. Ecuited butsequini bucha tuna jucuare. ⁸ Etsaru tunajatu jucuare baruda epunaja bucha. Etse tunaja muda cuanubi mureda jaque bucha jucuare.

⁹ Yacua tunajatu epene jucuare fierro tsehue, catira cuaishu bucha, piya enubiuju penequique. Yajapara tunajatu dyaque sicacada jucuare. Caretu cuana cahuyura catira cuayaque repeyaque tsajajaquereyaque ejuu bucha tuna jucuare. ¹⁰ Ihua bacue tunaja ajipa jaque bucha tima cuijaqui. Etima cuija tsehuedya tunajatu ecuita cuana nerecaturacuara pishica badi tupu. ¹¹ Tsei cuanajatu anicuare peadya tuna cuatsashaquique. Tudyatu huaraji tuna cuatsashaquique tumeque emajaca dyaque aridaju aniyaque. Tudyatu icuene beru Yusu tsahuaquique jucuareque. Ijehuetanacuaru emaque emajaca dyaque aridaju. Ebacani tujatu israelita cuanaja yana eque “Abadón”; griego

cuanaja yana eque bacue “Apolión”. Riyaque ebacani tu “Catillati puji” jadique.

¹² Amenatu cueticuare peadya inime jidamaque dutya yuamaturaque. Bataqui amatu beta jadya junuca ishuque.

¹³ Shucuta ishuque Yusu tsahuaquiratu corneta meyacuaru. Tura corneta meyayaju tuque bacatsacuare etsuri jeyaju mesa oro eaque pushi etsucu equeque. Tuhuadyatu muru ijimedaque pahuatanacuare.

Riyaque mesatu Yusuja yacuaju neticuare. ¹⁴ Etsuriratu acuaru shucuta ishuque Yusu tsahuaquique corne-
taquique:

—Pisuticue pushi ijahua cuana dyaque casada cuanaque Eufrates dyaque arida jiruru erisi cuanaque, —jadyatu etsurira acuaru shucuta ishuque Yusu tsahuaquique.

¹⁵ Jadya pisutanaetu jucuare pushi ijahua cuana, jetiama ecuita iye ishu. Patya jaque emaque dyane tunajatu ecuita iyecuaru. Tumeque ijahua cuanatu peya huecaca ama inajacatanacuare. Tumeque ura, huecaca, badi, mara camadya tuna inajacatanacuare.

¹⁶ Jadya juatsutu ejitaju jucuare sudaru cuana tumeque pushi ijahua cuana jaque. Jetiamapa ecana aniya. Jadya tuna cacuejaticuare. Beta cientos millonespa tuna.

¹⁷ Jadya tuque bacuare cahuyau cuana tahuiju bucha. Cahuyau dyaque aniya cuanaquetu yacua ecapeneti jucuare. Riyaque yacua capeneti ishuquetu jucuare pureda etiqui juju bucha, sahuada zafiro bucha, jahuada asufre bucha. Cahuyau cuana tuque bacuare iba muredaque iyuca bae. Tunaja ecuatsa equetu cuinanabarecuare etiqui, huani, asufre jadya. ¹⁸ Era micuana cuejahua baedya, jetiamatu ecuita iyetanacuare. Etiqui, huani, asufre jadya cahuyau cuanaja yatsanaca eque cuinanayara tuna iyecuaru. Jadya majuetu patya jaque emaque dyaque ecuita jucuare. ¹⁹ Tumeque cahuyau cuanatu quiyeti ishuquedyaju cuare tunaja ecuatsa eque cuinanaya tsehue, tumbaedya ihua tsehue. Tunaja ihua cuanatu bacua iyuca bae jucuare. Tunaja ihua tsehue tunajatu ecana dyaque ujeta abarecuare.

²⁰ Arepa canerecatitsu majuyaju bahua ama bucha, tuna umae ecuita cuana riyaque jidamara iyehua cuanaque ama tuna jidama jujacacuare ama. Mujiacacarama tuna acuaru ijahua cuana, yusu jiu oro ea cuanaque, plata, bronce, tumu, acui jadya ea cuanaque. Riya cuanaque cueya cueya cuanatu capetatiya ama ni quijacacatiya ni ajeya. ²¹ Ecuited jidama cuanaque tuna quiyetijacahua ama. Cabijiseritijacahua ama ecana. Marura ecana catijacahua ama. Cabijiserititsu ecana tunaja biji eque jujacahua ama. Chiri ecana jujacahua ama.

Yusu tsahuaquique quirica ina jadique

10 Tume tuque peya bacuare Yusu tsahuaquique casadaque barepa juque buteyaju. Barepa juque huani ducutu jucuare. Iyuca tajinaqui ecuejiquini ijeti bucha huecae, etsaca bacue tuja etiqui bucha huecae

jadyatu jucuare. ² Quirica piji epirurique ejiraque tujatu inacuare. Tapacuare tujatu jida eque amaca tsehue cueri cuanaja ecuaque, jani eque amaca tsehue bacue yahua. ³ Tumetu quiquecuare jebuda etsuri tsehue, iba mariyaque juya bucha. Tumeque marijac-ahuaju tuque bacacuare peya cuanaja etsuri pacarucu tiriti juya bucha. ⁴ Pacarucu tiriti quisaratihua jutu era huenecara acua tunara quisarati ahuaque. Tume tuque bacacuare etsuri barepa juque.

—Hueneume mira bacahua cuanaque, —jadya aira cuana acua barepajura.

⁵ Tumetu barepaju Yusu tsahuaquique cueri cuanaja ecuaque, yahua jadya tapatsu netiyaju bahuara emetucu jida eque amaca huesacuare barepaju.

⁶ —“Tere patu amena japadama”, jadya Yusu Maju Baecuara cuejamerehua. Turadyatu barepa, yahua, enaja ecuaque jadya iyahua. Turadyatu iyahua dutya, dutya queja aniyaque. ⁷ Beru yuequedyatu Yusura cuejacuare tuque equeque cuitadya quisarati cuejaqui cuanaque. Iyacuata ejetsunue ama Yusura amena ishucue inime ejitaju aya. Pacarucu ishucue Yusu tsahuaquira corneta meyatibuneyajutu amena Yusuja inime etehuaque juhua, —jadyatu jucuare.

⁸ Bacanucacuare tuque barepaju ejeque cuana quisaratiyaju.

—Cuacue, ique tsahuaquique casadaque yahuaju, cueri cuanaja ecuaqueju jadya netiya queja. Inacue quirica piji tura inayaque, —jadya tura acua.

⁹ Jadya juatsu cuacuare Yusu tsahuaqui queja. Jadya juatsu tuque bacaticuare tura quirica piji inayaque.

—Jeedyu micue. Inacue. Aracue. Micue ecuatstajutu huajada juya huaja bucha. Micue ecarecaniju camadyatu patseda juya, —jadya riyaque Yusu tsahuaquira acua.

¹⁰ Inatsacuare tuque Yusu tsahuaquija emetucu juque. Inatsatsu tuque aracuare. Ecue ecuatstajutu huajada jucuare huaja bucha. Buijitsu tuque patseda bacuare ecarecaniju. ¹¹ Ejera cuana taa jadya acua:

—Cuejanucataqui tuque micue Yusura eje bucha juya jadya ayaque jetiama epu cuanaju aniya cuanaque, eje uma anae cuanaque, tumbaedyu tunaja ecuari cuana, —jadya tura cuejacuare.

Eje bucha judadiyaque cuejaquique ecatsue

11 Tume tyatanacuare tuputupu ishucue acui buchique.

—Cuacue. Yusuja etare tuputicue, tumbaedyu mesa muru ijimedaque pahua ishucue. Tumbaedyu piye bacue eje uma ecana tuhua Yusu muiqui cuanaque.

² Etare tsecue camadya tupuume etsecue juque. Tumequetu Yusu mui bacua cuanaja ishucue. Tunaratu yuamaturabuque Jerusalén epu ebari emuique. Tunaradyatu epu ebari tapapashaya quimisha mara peya patya patya tupu. ³ Cuadishabuque tuque beta ique merequique ecatsue tumeque epuju ecue quisarati cuejara. Cuejabuque tatsejatu eje uma huecaca ama —1.260 huecaca tupu. Jutubuque tatsejatu una se-

huedaque, ecuita cuana inime cacuaireti ishucue adebamere ishucue, —jadya barepajura acua.

⁴ Tume tuque bacua Yusuja yacuaju enitya beta acui olivo bacani, beta ude nityaqui que ecatsue jadya. Riyaquetu Yusura tachibuque beta tuque merequique ecatsue jadya. ⁵ Ejera jidama acua ayaju, tatsejatu ecuatstajutu eque etiqui pushaya. Pana tirusha tatsejatu aya tatse ujeu baqui cuanaque. Jadya iyetanae tuna jubuque ejera tatse jidama acua aya cuanaque.

⁶ Riyaque quisarati cuejaquique ecatsuejatu casa aniya barepa teri ishucue, Yusuja quisarati cuejatanaya tupu nei pacaca ishucue ama. Tumbaedyu tatsejatu casa aniya ena ami cabapetisha ishucue. Eamereudyu tatsejatu eje buchique ujeje, eje uma tatsera amerecua aya tupu.

⁷ Quimisha mara peya patya patya Yusuja quisarati cueja juhua jutu Ecuita Cuanubi Bucha Mureeque emajaca dyaque arida juque cuinanayara tatse catiquerebuque. Iyahue tujatu ecatsue abucue. Tura tatse casa secabuque. Iyebuque tujatu ecatsue.

⁸ Ecuita Cuanubi Bucha Mureeratu quisarati cuejaquique ecatsue iyetsu papamerecarama abucue quimisha huecaca peya barepatya tupu. Epu ebari ediji cuanaju Ecua Cuatsashaqui Jesucristo curusuju tatatanacuareju tatse emajuque jarabuque. (Tumeque epuju aniya cuanaque tuna dyaque jidama jubuque Sodomaju, Egiptoju jadya anicuare cuanaque bucha.) Dutyara tunajatu ecatsue emajuque babuque; peya yahuaju cuanara tumbaedyu tunajatu ecatsue banabuque.

¹⁰ Yusu adeba bacua cuanaque tuna pureama jubuque quisarati cuejaquique ecatsue emajuque bahue juatsu, tatsera ni eje tupu nereda anucaya ama cabatitsu. Chine tuna jubuque. Dyaque pureama tuna jubuque, quisarati cuejaquique ecatsue majuhua tibu, aija nereda aquima juhua cabatitsu.

¹¹ Quimisha huecaca peya barepatya tupu juhua jutu Yusura chacha nityatsuranucabuque. Dutya tumeque petaqui juhua cuanaque tuna bajida, inime tilla jadya jubuque.

¹² Tuequedyu quisarati cuejaqui ecatsue etsuri casadaque bacacuare barepa equeque tatse ihuara juyaju.

—Netsuracue requeja ebarucue, —jadya tujatu ecatsue acua.

Jadya ayaju tatse tsuracuare barepaju huani ducu eque, tatse ujeu baqui cuanara petayaju. ¹³ Tumeque ura cuitadyatu yahua casada bucucucuare. Umae etare arida cuanaquetu rururuterecuare. Jetiamatu ecuita majucuare, pacarucu mil, yahua bucucutsu.

Ecuita majucuare ama cuanaque tuna bajida juterecuare. Pureama tunajatu Yusu barepa juque acua.

¹⁴ Jadya tereetu jucuare beta ishucue inime jidamaque. Tsunutaya amatu quimisha ishucue.

Pacarucu ishura corneta meyacuaque

¹⁵ Pacarucu ishucue Yusu tsahuaquiratu corneta meyacuaque. Tura corneta meyacaju tuna bacacuare etsuri cuana jebuda barepa juque jadya juyaju:

“Yusu, miquemi dutya naruquique.

Miquemi dutya yahuaju cuanaque cuatsashaquique.

Dutyara tuque micue bacua Jesucristo muisiribuque, muijacatsu ama”,
jadya tunajatu Yusu acuare.

¹⁶ Tume beta tunca pushi earacana Yusu mui juya cuanaque tunaja eaniqui cacuatsashati ishujū aniya cuanaque netibarecuare. Yusuja yacuaju tuna huipuchitanatsu nuyubarecuare. Pureama tuna Yusu acuare.

¹⁷ “Yusu, miquemi Ecuana Cuatsashaquique.

Miquemi dutya casa tsehueque.

Miquemi beru yuequedyadya anihua.

Iyacuami mique anisiriyaque.

Yusurupai mique ecuana aya, mira ecuana micue dyaque casa bamerehua tibu.

Yusurupai mique ecuana aya, mique amena enaruqui jutibunehua tibu.

¹⁸ Mique adeba baecua cuanaquetu cahuaitya miatsehue.

Jadya ama buchatu juetihua huecaca mira ecana nerecaturayaque.

Juetihuatu huecaca emaju cuanaque micue yacuaju netititsu eje bucha juyaque bahue juishu.

Iyacua tuquemi tyaya dutya mique merequi juhua cuanaque dutya jidaque mira ecana tyana ahuaque.

Micue quisarati cuejaqui juhua cuanaque tuquemi ecana jidaque tyaya.

Dutyu micue cuanaque, dutya mique miqui juhua cuanaque tuquemi jidaque tyabuque.

Esiri cuanaque, ehue ebari cuana, ebacua cuana jadya tuquemi ecana tyabuque.

Micue cuanaque riyaque yahuaju jidama ujeda ujeda aqui juhua cuanaque bacuemi ecana pana aputashatilla abuque”,

jadya tunajatu Yusu acuare.

¹⁹ Jadya juhuajutu pacashatanacuare Yusuja etare mudaque barepa juque etsecue Yusu aniquique.

Tumetu ejitaju jucuare caju Yusura tuja cuanaque narucuare cuanaque adeba ishū cuanaque. Casada pupipupiya, tiritiya jadyatu jucuare. Jadya juyajutu yahua casada bucucucuaque. Tumebaedyatu jetiama bise pacacacuare.

Matuja Ebari Jiura epunaja ebacuaque iyecara acuareque

12 Jadya juatsutu barepaju ejitaju jucuare mudaque adeba ishūque. Eje bucha inime judadiyaque adeba ishūquetu jucuare. Ejitaju jucuare peadya epuna. Tuja unatu jucuare ijētija hueca bucha. Badi jiu dyaquetu neticuare. Iyucaju tujatu anicuare puja oro eaque. Tuhuadya tujatu peadya tunca beta earacana purari anibarecuare. ² Riyaque epunatu maquique jucuare. Cuinahuequetu jucuare. Cuinayaque uje bucharatu quiqueshatillacuare. Dyaque nerecadatu jucuare. ³ Jadya juatsutu ejitaju junucacuare peadya adeba ishūque. Matuja Ebari Jiuquetu pudeda jucuare. Anicuare tujatu pacarucu iyuca, peadya tunca edana jadya. Iyucaju tujatu puja oro eaque anibarecuare. ⁴ Repecuare tujatu patya jaque emaque dyane barepa juque purari cuana tuja ihua

tsehue. Pacacashacuare tujatu purari cuana yahuaju. Matuja Ebari Jiuquetu netinaticuare epuna cuinacara juyaja yacuaju, tuja ebacua cuinanaya tsehuedya aratsa ishū. ⁵ Epunajatu ebacua cuinanacuare deca. Dutya yahuaju aniya cuanaque tujatu dyaque muida tsehue narudadibuque dutya jidama cuanaque. Amena tuja ebacua cuinanahuajutu secatanacuare. Duju-tanacuaretu Yusu queja tuja eaniquiju. ⁶ Epunatu huanaacuare epu cuana aijamaju. Tuhuatu Yusura emajaca bajejehua tumeque epunaja ishū. Tuhuadyatu 1.260 huecaca narutana, mihuatana jadya jucuare.

⁷ Jadya juatsutu barepa juque Yusu tsahuaqui cuanaque cuatsashaquique Miguel bacani, tuque tsahuaqui cuana tsehue, tuna caticuare Matuja Ebari Jiu tsehue, barepaju icuene Yusu tsahuaqui jucuare cuanaque Yusu tsehue cahuaicuare cuanaque.

⁸ Tumetu Matuja Ebari Jiuja, tuque tsahuaqui cuanaja jadya casa terecuare. Tume tuna barepa juque ijehuetanacuare. Yusura tuna barepaju iyanucacarama acuare. ⁹ Jadya ijehuetanatu jucuare tumeque Matuja Ebari Jiuque, Ijahua Satanás bacani, dutya yahua juque Yusu adeba baecua cuanaque ijahue aqui. Satanás, dutya tuque tsahuaqui cuana tsehuetu ijehuetanacuare yahuaju.

¹⁰ Tume tuque bacacuare etsuri jebudaque barepa juque.

“Yusuratu inajacamerehua tuja cuanaque emajutereuque.

Iyacuatu Yusu tuja cuanaque inajacamere ishū mepehuaque cabameretihua tuja cacuatsashati.

Satanás, ‘Caana cuejati puji’ bacani jucuarequetu jidama quisaratihua ecuana tsehuequi cuanaja ishū huecada tupu, meta tupu Yusu ecuanara muiyaja yacuaju.

Tuquetu amena ijehuetanahua.

¹¹ Ecuana tsehuequi cuanaque tuna bajida ama juhua iyeta ishū.

Arepa iyetaya ama bucha tuna Jesús queja nimee jujacahua ama.

Ejenejacahua ama tunajatu UHUISHA BUCHA IYETAE ATAHUAQUE ecuana jiteque ami quijehueti, maju jadya juhuaque.

Cuejajacahua ama tunajatu quisarati yunerique.

Tume tunajatu jadya secae casa acuare tunaja ishū quisarati tere baecua jucuareque.

¹² [Pureama nejuque, micuana barepaju aniya cuanaque!

[Nerecapane yahuaju, cueri cuanaja ecaqueju aniya cuanaque, Satanás micuana queja butehua tibu!

Tuquetu ecahuaiti ejetsunue ama tuque jucara juya eque juishu aniya baatsu”,
jadyatu ejeque cuana jucuare.

¹³ Matuja Ebari Jiuque yahuaju ijehuetanahuaque caadebatitsu, tujatu nerecaturatibunecuare epuna ebacua nana ijehuecuinaqui juhuaque. ¹⁴ Epunatu tyatanacuare beta yajapara aridaque huihuipaja buchique. Jetatsu tujatu jacacuare Matuja Ebari Jiuque. Tuquetu judirucuare anitaya amaju. Anidirucuaretu

quimisha mara peya patya patya tupu camadya. Tumeque epunatu naru, mihua jadya atanacuare. Matuja Ebari Jiuratu eje bucha ama acuare. ¹⁵ Tumetu Matuja Ebari Jiura ijehuetibunecuare ena ecuatsa eque. Cueri bucha jurishae tujatu acuare epuna huidisha ishu. ¹⁶ Yusuratu yahua burishacuare. Tume tujatu Matuja Ebari Jiura yatsanaca eque ena pushahuaque caniju ishacuare. Buijihua buchatu jucuare. ¹⁷ Jutajuijudyatu Matuja Ebari Jiuque dyaque cahuaitecuare epuna tsehue. Jadya juatsutu catira cuacuare tumeque epuna eque ejuracana cuana tsehue. Turatu aputashacara acuare Yusuja cacuatsashati eque juya cuanaque, yunerique quisarati Jesucristora cuejahuaque ejenejacaya ama cuanaque.

Juanra Mapisi Ebari Jiuque, Cuanubi Jiuque Bape Ebari jadique bacuareque

13 Ique cueri cuanaja euaque mejijiju junetiyara tuque batsacuare ena juque mejijiju tsurayaju peadya Mapisi Ebari Jiuque. Anicuare tujatu pacarucu iyuca, peadya tunca edana jadya. Dutya edana cuanaju tujatu oro eaque jutubarecuare, ecuari juishu casa aniya jadique caadebamereti ishu. Iyuca cuanajutu Yusu cahuaiteisha ishuque quisarati ehue jucuare. ² Tumeque Mapisi Ebari Jiuque bahuquetu ducueri iba bae jucuare. Huachi meshuru baruda, iba bucha tsebaruda jadyatu jucuare. Matuja Ebari Jiuratu tyacuare tuja casa Mapisi Ebari Jiuque, dutya tuja ataqui juishu, huaraji dyaque casadaque juishu jadya. ³ Peadya iyucaju Mapisi Ebari Jiuque anicuare ujeda eaque majutaqui buchique. Tumequetu chachanatanacuare. Ujeda eaque chacha juhua baatsutu Yusu adeba baecua cuanara bape inime tupucuare, tuque majutaqui ujeda atanahuaque majuhua ama baatsu. ⁴ Tume tuna huipuchitanacuare Matuja Ebari Jiuja yacuaju tuque muiyaque, tura Mapisi Ebari Jiuque casa tyahua baatsu. Tumebaedyata tuna Mapisi Ebari Jiuque chichucata ishu acuare.

—Aijama tuna ejeque riyaque Mapisi Ebari Jiu buchique! Ni ejeradya jutidyatu ijahue eau catiju! —jadya tuna jucuare.

⁵ Tumebaedyatu Mapisi Ebari Jiuja Yusu cahuaite ishuque quisarati aishuque anicuare. Huarajitu amereacuare pushi tunca beta earacana badi tupu. ⁶ Tume tu jadidya jucuare. Quisaraticuaretu jidama Yusuja ishu. Ijillahuanacuaretu Yusu. Tumebaedyatu ijillahuanacuare Yusuja etare. Tumebaedyata barepajuque Yusuja cuanaquetu ijillahuanacuare. ⁷ Tumebaedyatu Mapisi Ebari Jiuque emajaca tyatanacuare Yusuja cuana tsehue cati ishu tuna ijahue aya tupu. Tudyatu tyatanahua cacuatsashati riyaque yahua juque epu cuana, peya yana eque cuanaque cuatsasha ishu.

⁸ Tumeque Mapisi Ebari Jiuquetu yahuaju aniya cuanara muicuare. Muicuaretu UHUISHA BUCHA IYETAETAHUAja quiricaju ebacani huenetanama cuanara. (Tura inajcaamerehua cuanaja ebacani huenetanahua tumeque quiricaju yahua iyatanahua equeque.)

⁹ Micuana quijacabacati aqui juatsu, nebacacue.

¹⁰ Ejera ni peya cuana risitsu dujuya, tumebaedyatu tuna dyadi risitanabuquedyata. Cuchiru tsehue quietiya cuanaquetu tumebaedyata iyetanabuque cuchiru tsehuedya. Jadya tibudyatu Yusuja cuanara iduya dutya canerecatiyaque, canimehuallatitsu ama, ni Jesús queja nimee jujacatsu.

¹¹ Jadya juatsu tuque banucacuare Cuanubi Jiuque Bape Ebarique yahua juque tsurayaju. Arepa uhuisha deca bucha dana beta juya ama buchatu matuja ebari jiu bucha tsurie jucuare. ¹² Riyajatu anicuare Mapisi Ebari Jiuja cacuatsashati bae cuita nucadya. Mereya, tachiya jadya tujatu acuare. Riyaque Cuanubi Jiuque Bape Ebariratu cuatsashacuare dutya riyaque yahuaju aniya cuanaja Mapisi Ebari Jiuque mui ishu. Turadyatu ujeda eaque ujera iyehuaaju chacha nityatsuranucacuare. ¹³ Acuaretu ni ejeque ecuitaja ataquique ama. Etiquitu barepa juque pacacashacuare yahuaju ecuita cuanara petayaju. ¹⁴ Inimeradya jutidya ai aya tsehue tujatu riyaque yahua juque ecuita cuana ijahue acuare. Mapisi Ebari Jiura amereya equetu ecana mui, mere jadya acuare.

—Mapisi Ebari Jiuja cueya neacue, cuchiruja esacuaque majutaquique chacha jucuaque cueya, —jadyatu cuatsashacuare Cuanubi Jiuque Bape Ebari ecuita cuana.

¹⁵ Tuequedyatu Cuanubi Jiuque Bape Ebarique tyatanacuare casa Mapisi Ebari Jiuja cueya eaque chacha amere ishu, tumeque cueya quisaratitsu dutya tuque muicarama juya cuanaque iyetillamere ishu. ¹⁶ Jadya ahua ama bucha tujatu cuatsashacuare jadya:

—Nehuenecue emetucuju jida eque amaca, jadya ama juatsu ecuita cuanaja equetiju, ecue yana equedyata juya cuanaque jadique adeba ishu. Dutya ecana nehuenecue. Pahuenetana achacha cuanaque, ehue ebari cuana, ecapajiti cuanaque, chipirui cuanaque, nrecada cuanaque, tsujema mere juya cuanaque, tsujequi mere juya cuana jadya. ¹⁷ Nehuenecue Mapisi Ebari Jiuja ebacani, jadya ama juatsu número. Riyaque ehuenecue aijama cuanajatu aijama juya ni ai quemitaqui ni catyati ataqui, —jadya tujatu cuatsashacuare.

Jadidyatu jucuare. Dutya huenetanama cuanaque tuna canerecaticuare, tunara ai sareya cuanaque daditaquima baya tibu. ¹⁸ Riyaque tu iyucaquija ishuque. Ejeque bahue juyaratu adebaya número Mapisi Ebari Jiuja. Tuja número tu 666. Riyaque número tu ecuitadya datse. Micuanara ni número adebaya, tume tuque micuana adebaya ejeque ecuitaque.

144.000 jeruare cuanaque

14 Jadya juatsu tuque petacuare. Bacuare tuque UHUISHA BUCHA IYETAETAHUAQUE, Sión bacani emata dyaque netiyaju. Tuatsehuedya tuna neticuare 144.000 ecuita cuana. UHUISHA BUCHA IYETAETAHUAja ebacani, Etataqueja ebacani jadyatu ehue jucuaque tunaja equeti cuanaju. ² Jadya juatsu tuque bacacuare tuuyaque barepa juque buteyaju. Sururu tu-

uuya bucha tuque bacacuare jebuda tiritiyaju enara quemitsaya bucha. Jucuretu etsuri umada arpa dudu puji cuana tunaja arpa dudu juyaque bucha. ³ Tumetu 144.000 cuanaque jerucuaru Yusuja yacuaju, pushi bape bape butsequinie cuanaja, Yusu mui juyaja jadyaja yacuaju. Iyacuaque jeru tunajatu acuare. Ni ejequetu bahue jucuaru ama, 144.000 cuanaque camadya, ni ejeque bahue juishu ama. Riya cuanaquetu jucuaru yahuaju aniya cuanaque ducu echachaneque. ⁴ Riya cuanaquetu epuna tsehue cajipetihua ama cuanaque. Jucha juma tuna anicuare. UHUISHA BUCHA IYETAE ATAHUA tsehue tuna juneniya eju tuque cuayaju. Tunnadya tuna icuene jucuaru Yusura, UHUISHA BUCHA IYETAE ATAHUARA jadya tuja ishu mepecuareque. ⁵ Pusha pusha baecua tuna. Yusura tuna jucha metse ama baya.

Barepa juque quimisha etsahuaqui cuana cueja jucuaruque

⁶ Tume tuque bacuaru barepa juque peadya etsahuaquique barepaju jetayaju. Yusuratu cuadishahua dutya epu cuana juque dutya cueja ishu Yusu queja judiru ishuque quisarati cueja ishu. Riyaque quisarati tu cuaretananime ama. Yusuratu cuadishahua dutya queja aniya cuanaque cuejara, riyaque yahuaju dutya yana eque quisaratiya cuanaque. ⁷ Jadyatu jucuaru barepa juque Yusu tsahuaquique etsuri jebuda tsehue:

—Nemuicue Yusu. Pureama neacue. Amenatu juetihua huecaca tura inime cacuareticarama juya cuanaque nerecaturayaque. Pureama neacue barepa, yahua, cueri cuanaja ecuaque, cueri, espere cuana jadya aquique, —jadyatu jucuaru.

⁸ Yusu tsahuaquiratu peya quiqueyauque tupucuaru.

—Epu ebari Babilonia bacanitu teredadiya, tuhua ecuita aniya cuanaque dyaque jidama cuita juya tibu! Tumeque epuju cuanaratu peya epuju cuanaque cajuchatishahua; tuna tuna epunara deca cuana jaraquere ishu enijuquishau buchique, —jadyatu jucuaru beta ishuque Yusu tsahuaquique.

⁹ Jadya juatsutu junanucacuare quimisha ishuque Yusu tsahuaquique. Jebuda etsuri tshuetu jadya jucuaru:

—Dyaque jidamatu canerecatibuque Mapisi Ebari Jiuque muiqui cuanaque, tuja cueya eaja yacuaju chichucata juya cuanaque, tuja ebari tunaja equetiju, emetucuju jadya cahuenemeretiya cuanaque.

¹⁰ Dyaque tuna nerecada judadiya, dyaque Yusu cahuaishacuare tibu. Etiqui, asufre jadyaju nubi ishuque tuna. Dyaque tuna nerecada jubuque.

UHUISHA BUCHA IYETAE ATAHUARA, Yusu tsahuaqui asicadama cuanara tuna petabuque nerecada juyaju.

¹¹ Tuna nerecada juya juque etiqui huanitu netitsurajacabuque ama. Huecada tupu, meta tupu tunajatu aijama canajara juya, Mapisi Ebari Jiuque, tuja cueya jadya muiqui juhua tibu, tumebaedya Mapisi Ebari Jiuja ebari tsehue cahuenemeretihua tibu. ¹² Jadya tibudya Yusuja cuanaque, tuja quisarati cacuatsashati bacaqui cuanaque, Jesús queja nimee jujacaya ama cuanaque

necacasaturaticue peya cuana tsehue, Jesús queja nimee ejujacau tibu, —jadyatu jucuaru quimisha ishuque Yusu tsahuaquique.

¹³ Tume tuque bacacuare etsuri barepa juque.

—Huenecue era cuejayaque: “Dyaque jida taa reeque amena Ecuana Cuatsashaqui queja nimee majuya cuanaque”, jadyatu judadiya. Majutsutu amena dutya mere cuana, nerecada anie rehua juyaque jadyatu tereya. Tyatanahuie tuna Ecuana Cuatsashaquira tyaana acuareque, tuque merequi jucuaru tibu. Ni aitu aijama juya ama. Canajarabuque tuna. Riyaque ri Yusuja Espirituja quisarati, —jadya tura acuare.

Yusuja cuanaque casitatidadiyaque

¹⁴ Tuequedya tuque bacuaru eje bucha judadiyaque. Bacuaru tuque ejeque cuana ecuita jiuque barepa huani paja dyaque aniyaju. Iyucaju tujatu puja oro eaque anicuare. Inacuare tujatu cuchiru etununaque arusu raca ishuque buchique. ¹⁵ Yusuja etare juquetu cuinanacuare peya etsahuaquique. Turadyatu quiquecuare etsuri jebuda tsehue huani dyaque aniyaque:

—Inacue micue cuchiru beta eque jacua eaque, etununaque. Mepecue amena euhuaque. Juetihuatu amena huecaca euhuaque uva caca pitu ishuque. Ejahuanetu amena pitutaqui tuque, —jadya tujatu acuare.

¹⁶ Tura jadya ahuaaju barepa huani dyaque aniyaque jecuaru yahuaju cuchiru etununa tsehue pitumeretahuaque pitura.

¹⁷ Tumetu peadya Yusu tsahuaquique cuinanacuare Yusuja etare barepa juque. Inanucacuare tujatu cuchiru beta eque jacua eaque, etununaque. ¹⁸ Yusuja yacua juquetu cuinanacuare peya etsahuaquique. Tumequetu etiqui tsehue ujeda aishuque ecuat-sashaque jucuaru. Etsuri jebuda tsehue tujatu ihuaracuare cuchiru etununaque inaquique:

—Inacue micue cuchiru beta eque jacua eaque, etununaque. Uva esa cuana jahuanehuaju tubuyaque emepeta bucha, jadyatu mepetanaya Yusu adeba baecua cuanaque. Amena tuna tunaja jucha cuana tibu nerecada atanaya, —jadya tujatu acuare.

¹⁹ Tumetu barepa juque Yusu tsahuaquique jucuaru yahuaju tuja cuchiru etununa tsehue. Yusu adeba baecua cuanaque, Yusu cahuaishu ishucamadya aniya cuanaque tuna uva amena ejahuaneneque pitu ishu buchique. Barepa juque Yusu tsahuaquique tu uva caca pituquique buchique. Uva caca jahuaneyaque pitu pujira pitutsu equiniqui aridaju nacaca tisi ishu eishau bucha, jadyatu barepa juque Yusu tsahuaquique jucuaru yahuaju Yusu adeba baecua cuanaque cuinanashara nerecaturadiru ishu.

²⁰ Uva nacaca tisiyauque equiniqui juque ejuriu bucha, jadyatu Yusu adeba baecua cuanaja jetiama ami jurihua epu ebari tipare. Cahuaaju epere eque dee cuitatu jucuaru. Curi quimisha ciento kilómetro quini buchatu juhua.

Yusu tsahuaqui cuanaquetu pacarucu amena ishu cuanaque canerecati ishuque tyatanacuareque

15 Bacuare tuque barepaju peya caadebati ishuque bape. Bacuare tuque Yusu tsahuaqui cuanaque. Pacarucudya tuna tyatanacuare amena ishuque pacarucu canerecati ishu cuanaque yahuaju beishu. Riya cuanaque canerecaturati tsehuetu Yusuja cahuaiti terecuare.

² Tumbaedy tuque bacuare Mapisi Ebari Jiuque muima cuanaque, tuja cueyaja yacuaju huipuchitana ma cuanaque. Número tsehema cuanaque tuna jucuaré, Mapisi Ebari Jiu jadique ebacani tsehema cuanaque. Tuna tuna neticuare bei ebari jiuque jiruru, vidrio etiqui tsehue eaque eujaju. Ena jiuquetu yuneri neri huecada jucuaré. Inacuare tunajatu arpa dudu ishuque Yusuja etyaque. ³ Moisés beru israelita cuana cuinanashayaque Yusu pureama ayaque jerucuare bucha, tumbaedy tuna jerucuare UHUISHA BUCHA IYETAÉ ATAHUAQUE pureama ayaque:

“Yusu, miquemi Ecuana Cuatsashaquique.

Ni ai buchiquetu aijama micue ataquimaque.

Dutya mira ayaque tu jidaque.

Miratu aya ecuita cuanara inime tillaqui ayaque.

Dutya mira ayaque tu tuyu, yunerique.

Miquemi dutya yahuaju aniya cuanaque naruquique.

⁴ Dutyarami muiya, Ecuana Cuatsashaquique.

Dutyarami sumitsu pureama aya.

Mique peadya camadya mi juchaju caasaticimaque.

Dutya yahua juque tuna jebuque mique pureama ara, mira ayaque tuyu dutya queja batanahua tibu”, jadya tuna jucuaré jeru eque.

⁵ Riya cuanaque baatsu tuque banucacuare Yusuja etare barepa juque. Pana bau tuque acuare Yusuja eaniqui neri, “Dyaque Muidaque” bacani, Yusu tsehue catsuruti ishuquedy. ⁶ Yusuja eaniqui neri juquedyatu cuinanacuare Yusu tsahuaqui cuanaque, pacarucu ujeje canerecati ishuque dujuqui cuanaque. Ejutuqui jida tiquidaque tunajatu una jucuaré. Yacua eque cuitatu oro eatsehue ecaquereti jucuaré. ⁷ Jadya juatsutu bape butsequiniera ecana tyabarecuare peadya peadya equiniqui oro eaque pacarucu Yusu tsahuaqui cuanaque. Equiniqui cuanatu ejequesha jubarecuare ai tsehue cuana Yusu Maju Baecuaja cahuaiti tsehue.

⁸ Yusu tu tuhuadya tuja eaniqui neri mudaju anicuare. Etehua tujatu jida pijique, casa jadya jucuaré. Jadya tibutu eaniqui mudaque huani tsehue jequecuare. Yusu tsahuaqui cuanaja pacarucu ujeje canerecati ishuque inajacatillama jari tuputu ni ejeradya jutidya jadya juyaque eje bucha ameretaqui ama bahua riyaque yahuaju juyaque tume cuanaque ujeje cuana eque.

Dyaque canerecati ishu judadiyaque jucuaréque

16 Jadya juatsu tuque bacacuare etsuri jebudaque Yusuja eaniqui neri juque cuinanayaque. Jadya tujatu pacarucudya acuare Yusu tsahuaqui cuanaque:

—Neijehuetibarecue yahuaju pacarucu equiniqui cuanaju aniyaque. Equiniquiju aniyaque ijehueyaju cama tuna Yusura dyaque nerecaturabuque Yusu adeba baecua cuanaque, —jadya tujatu ecana acuare.

² Jadya ayajutu icueneque Yusu tsahuaquique cuinanatsu cuacuare. Cuaatsu tujatu ijehueticuare equiniquiju aniyaque yahuaju. Pusese dyaque jidama ujedaque tunajatu cuinanacuare dutya ecuita cuanaja ecuita cuanaju Mapisi Ebari Jiuja ebacani ehue cuanaja, tuja cueya muiqui cuanaja jadya.

³ Beta ishuque Yusu tsahuaquiratu ijehuecuare tuja equiniqui juque cueri cuanaja ecuaqueju. Tumetu ena cabapeticuare ami esasanaque bucha. Dutyatu majuterecuare cueri cuanaja ecuaqueja enaju aniya cuanaque.

⁴ Quimisha ishuque Yusu tsahuaquiratu ijehuecuare tuja equiniqui juque cueri cuanaju, cueri huitšana cuanaju jadya. Dutya enatu ami ecabapeti jucuaré. ⁵ Jadya junucatsu tuque bacacuare Yusu tsahuaquique ena cuana naruquique.

“Yusu, miquemi tuyu, tuna jadya nerecaturahua tibu.

Miquemi ni riya piji buchique ecajuchati ni ecaasicati juchaju.

Miquemi yuequedy animetse juhuaque.

Miquemi anisiri ishuque.

⁶ Iyehua tuna micue cuanaque, mique equeque quisarati cuejaqui cuanaque jadya.

Micue cuanaque tunajatu ami quijehuetishahua.

Iyacua tuquemi tuna nerecatura ishu ena ami cabapetishahua tunaja jadya ijie ami aishu.

Jadidya tuna ataqui, tuna jidama juhua tibu”, jadya tujatu Yusu acuare.

⁷ Bacacuare tuque ejeque cuana quisaratiyaju mesa muru ijimedaque pahua ishu peque.

“Yusu, miquemi Ecuana Cuatsashaquique.

Aijamatu micue ni ai ataquimaque.

Miratu ama amadya aya dutya aana ayaque.

Yunerijudya tuquemi jidama cuanaque yuamaturahua”, jadya tujatu Yusu acuare.

⁸ Pushi ishuque Yusu tsahuaquiratu ijehuecuare tuja equiniqui juque ijjetiju. Yusratu ijeti dyaque uqueda amerecuare, ecuita cuana tuja uque tsehue pahua ishu. ⁹ Uquera tuna dutya dyaque canerecatishacuare. Arepa jadya canerecatie juhua ama bucha, tuna inime cacuaretihua ama; ni tuna Yusu pureama acuare. Tume ecana jidama jutidya tuja ishu quisaraticuare riya cuanaque canerecati cuana cuadishaquija ishu.

¹⁰ Pishica ishuque Yusu tsahuaquiratu tuja equiniqui juque aniyaque ijehuecuare Mapisi Ebari Jiuja eaniqui dyaque. Jadya juhujutu Mapisi Ebari Jiura dutya naruhua cuanaque apuda ducu neri anicuare. Tumeque uje tsehue tuna dyaque nerecada jucuaré. Yana cuana tuna cacarutibarecuare majuyaque tumeque ujera.

¹¹ Arepa jadya nerecadae juhua ama bucha, tunajatu ajacacuare ama jidamaque. Tume tuna jidama jutidya Yusu barepaju aniyaja ishu quisarati acuare, canere-

catiya cabatitsu tumeque pusese peya ujeje cuana jadyara ayaju.

¹² Shucuta ishuque Yusu tsahuaquiratu equiniquiju aniyaque ijehuecuare Eufrates cueriju. Jadya ahuajutu cueru uracuare. Cueru urahuajutu anicuare ediji ecuari cuana ijetei cuinanaya queja amaca aniya cuanaque jeishu.

¹³ Jadya junucatsu tuque banucacuare quimisha ijahua cuana huahua jiu cuanaque. Matuja Ebari Jiuja yatsanaca juque, Mapisi Ebari Jiuja yatsanaca juque, pusha pusha aridaja yatsanaca juque jadya tuna cuinanabarecuare. ¹⁴ Riya cuanaquetu ijahua cuana jucuare inimeradya jutidya ai aqui cuanaque. Riya cuanaque ijahua cuanatu cuacuare dutya ecuatsashaqui cuanaque riyaque yahua juque sitara, Yusu dutya iyaqui tsehue cati ishu. Tumeque huecacatu Yusu, tuja jetiama ecuita cuana tsehue catibuque Mapisi Ebari Jiuque, tuja jetiama ecuita cuana tsehue. ¹⁵ Bacacuare tuque etsuri jadya quisaratiyaju:

—Nebacacue. Micuanara ihuayaju ama muya jutidya junabuque, chiri puji cuana aira ihuayaju ama ejunau bucha. Equihuati, ecabajejeti ique junanucayaju juya cuanaque tuna dyaque jida jubuque, catacatitsu tahui bahue cuanaque bucha ama. Ihuayaque junahuaju ecatacati cuinanabacuare tsurutsatsu bisu tsehue etsurutsau bucha jutidya tuna jubuque ecatacati tibu, —jadyatu jucuire tumeque etsuri.

¹⁶ Quimisha ijahua eyuamaturaqui cuanara tuna sitacuare huaraji cuana, tuna jiteque dutya yahuaju catiya cuanaque emata Armagedón bacani peque.

¹⁷ Pacarucu ishuque Yusu tsahuaquiratu tuja equiniquiju aniyaque ijehuecuare cuejijiju. Bacacuare tuque etsuri barepa equeque, Yusuja eaniqui neri muda equeque:

—Amenatu terehua! —jadyatu jucuire.

¹⁸ Jadya juatsutu pupipupiya, sicacada tiritiya jadya jucuire. Yahuatu bucucucuare dyaque casada. Dyaque mudatu yahua bucucucuare, ecuita cuana riyaque yahuaju anitibunehua equequetu jadya juma. ¹⁹ Epu dyaque aridaquetu jaquetanacuare quimisha cuare. Dutya yahua juque epu cuanatu yuamaturatanacuare. Yusu nime aputacuare ama epu Babilonia bacaniju aniya cuanaque jidama juhua cuana tsehue. Ecuita majuyaque canerecatiyaque equiniqui juque veneno eijiu bucha, jadyatu Babiloniaju cuanaque dyaque nrecada jubuque, Yusu tuna tsehue dyaque ecahuaiti juya tibu. ²⁰ Dutya ecububu cuana, emata cuana jadyatu terecuare. ²¹ Tumebaedyatu barepa juque pacacuare bise aridaque ecuita cuana dyaque pushi tunca kilo tupu bicueeque. Ecuita cuanaratu jidamaque quisarati acuare Yusuja ishu, bisera ecana nrecaturayaju, dyaque nrecada juya cabatitsu.

Epuna decadeca aridaque dyaque nrecada atanayaque

17 Tumetu Yusu tsahuaquique pacarucu equiniqui inaquu jucuireque jecuire eaqueja. Isaracuare tura ique:

—Riyaque epu ebariju cueru japadama aniya cuanaque tuna epuna decadeca aridaque bucha. Petamereya mique era tumeque epuju aniya cuanaque eje bucha nrecada atanadadiyaque. ² Riyaque yahuaju huaraji dyaque arida cuanaque tuna anihua tumeque epuna tsehue jucha juyaque. Tuja biji equetu jucuire. Ecuita cuana yahuaju aniya cuanaque tujatu uva nacaca esasanasha tsehue niijuquishanicuare, tuatehue tahuishatsu, tuja biji eque aquerecara aatsu, —jadya tura acuare.

³ Jadya junucatsu Espiritura ique petamerecuare eje bucha judadiyaque. Yusu tsahuaquira ique dujucuire ecuita anitaya amaju. Bacuire tuque epuna Mapisi Ebari Jiuque pudedaque isaanitsu juaniyaju. Mapisi Ebari Jiujatu anicuare pacarucu iyuca, peadya tunca edana jadya. Dutyatu Mapisi Ebari Jiuja ehuenecue anicuare Yusu cahuaisha ishuque. ⁴ Tumeque epunaratu jutucuire una sahuapudeuque. Jidatu ecabajejeti jucuire oro tsehue, tiquida tsuje arida cuana tsehue, tumu caca perla bacani tsehue jadya. Inacuare tujatu equiniqui oro eaque. Educujutu anicuare ai bijiseritaqui cuanaque. Jidama cayuamati ishuque tsehue equequetu jucuire. ⁵ Equetiju tujatu anicuare ebacani ehuenecue eje buchique jadique adebataquique ama. “Babilonia epu dyaque aridaque, epuna decadeca arida cuanaque, caadebati baecua cuanaque, equihuati cuanaque, dutya yahuaju ujeu baqui cuanaque aniquique”. Jadique tujatu ehue ju cuare equejetu. ⁶ Tume tuque adebacuire tuque Yusuja cuanaja ami ijitsu niijuqui ejuque, Jesús jiteque majucuire cuanaja amiju. Jadya bacatsu ique anajacacuare. ⁷ Tume Yusu tsahuaquira jadya acuare:

—¿Eje bucha juatsumi anajacataya? Jida mique cuejaya tumeque epuna eje buchique, tumeque Mapisi Ebari Jiu pacarucu iyucaque, peadya tunca edanaque jadya tura isaanitayaque jadya. ⁸ Tumeque Mapisi Ebari Jiuque mique era petamerehuaque, tumeque tu beru anicuareque. Iyacuatu amena aniya ama. Jadya ama buchatu tsunutaya ama cuinana ishu emajaca ebari juque. Pana maju jumaque jaritu cuinanabuque. Yusu Tsehue Anisiribuqueja Quiricaju ebacani huenema cuanaque tuna anajacatabuque Mapisi Ebari Jiuque chacha banucatsu. (Yusuja cuanaja ebacani huene-tahua yahua iyatanahua equeque.) Chacha banucatsu tu ecuita cuana riyaque yahuaju aniya cuanaque jubuque: “Mapisi Ebari Jiuquetu chacha jucuire. Aputacuare tuque. Iyacua bacue chacha aninucaya” jadya.

⁹ “Iyacua rique cuejaya jida ejera adebataqui bayaju cueyane ishu. Pacarucu iyuca tu pacarucu emata. Tumeque dyaquedyatu tumeque epuna aniya.

¹⁰ Tumebaedyatu tumeque pacarucu iyuca cuana pacarucu huaraji arida cuanaque buchique. Tumeque pishica huaraji cuanatu amena huaraji jucacuare. Peadyara camadyatu iyacua naruya. Pacarucu ishuque tu junama jari. Junatsutu eje tsunue ama ecuatsashaque junabuque. ¹¹ Mapisi Ebari Jiu beru anicuareque, iyacua aijamaque, tudyatu quimisacarucu

ishuque huaraji. Pacarucu tsehue cuanaquedya tume. Jadya juatsutu Yusura pana aputasha abuque.

¹²“Mira peadya tunca edana petahua cuanaque tu peadya tunca huaraji dyaque arida cuanaque, ecuita cuana cuatsasha catibutima jari cuanaque. Tuna tuna junabuque. Ejetsunue ama tuna ecuita cuanara muibabuque, tuna tumebaedya Mapisi Ebari Jiuque jadya. ¹³Riya cuanaque peadya tunca huaraji arida cuanaque tuna ecadutyati Mapisi Ebari Jiu tsehue. Tumeque huaraji arida cuanaja sudaru cuanatu catibuque Mapisi Ebari Jiuja casa tsehue. ¹⁴Tuna tuna casitatibuque UHUISHA BUCHA IYETA EATAHUA tsehue cati ishuh. UHUISHA BUCHA IYETA EATAHUARA tuna casa secabuque. Jetiera amatu tuque muibuque. Tuquetu huaraji dutya huaraji cuanaja huaraji. Tuatsehue cuanaque tuna tuja eihuara cuanaque, Yusuja emepe cuanaque Cristo queja nimee jujacahua ama cuanaque jadya. ¹⁵Bahuami tumeque cueri cuanaja ecuaque epuna decadeca aridara isaanijaju. Tume cueri cuanaja ecuaque, tumeque tu ecuita cuana dutya yahua juque, dutya anae cuanaque jadique. ¹⁶Tume mira peadya tunca edana Mapisi Ebari Jiuja bahuaque, tume cuanaratu epuna decadeca aridaque equijahuatque ujeu babuque. Chiribuque tunajatu dutya ai tumeque epunaja aniyaque. Ecatacati tunajatu shanatilabuque. Iyebuque tunajatu epuna. Iyetsu tunajatu epuna rami arabuque. Arabishatsu tunajatu etiquiju pahuabuque. ¹⁷Tume tunajatu Yusura inime cacuareshabuque tura amerecara aya eque tuna juishu. Tumetu ecuari cuanara tyabuque casa Mapisi Ebari Jiuque, Yusura quisarati iyahuaque judadiya tupu. ¹⁸Epuna mira petahuaque, tumequetu ecuita cuana tumeque epu ebariju aniya cuanaque jadique. Tumeque epu ebari juque huaraji cuanaratu yahua juque ecuari cuana narubuque, —jadya Yusu tsahuaquira cuejacuare.

Babilonia epu cayuamaticuareque

18 Jadya juatsu tuque banucacuare Yusu tsahuaquique dyaque casadaque barepa juque buteyaju. Yahua tujatu huecada amerecuare tuja hueca tsehue. ²Jebudatu quiquecuare: “¡Cayuamatihua tuque! Babilonia eputu pana aputa, cayuamati jadya juhua. Ijahua cuanaja eaniqui tume. Dutya yatanana jidama cuanaja eaniqui tume. Tumebaedya jeta aqui asicada cuanaja eyuamatura cuanaja eaniqui tume. ³Tumeque epu ebariju aniya cuanaratu cajuchatishacuare peya epuju cuanaque. Tunaja jidama inimeju tunajatu amerecuare. Enajehue ijitsutu dutya inime jidaque aputatereya. Jadidyatu ecuita cuana riyaque yahua juque jidamaque inime tupuqui aatsu, tumeque epu juque, tuna taca nime aputadya jutidya tuna juya. Huaraji dyaque arida cuanaquetu catyaticuare dutya tumeque epu juque jidama cuanaju cabijishatitsu.

Catyati puji cuana riyaque yahua juque tuna cachipiruticuare tuhua jetiama catyati, quemishu jadya aniya cuana tsehue”, jadyatu jucuare.

⁴Jadya juatsu tuque bacanucacuare peya etsuri barepa equeque.

“Necuinanacue tumeque epu arida juque, micuana ecue cuanaque, tuhua aniya cuanaja juchaju ejuu tibu, tuna canerecatiya bucha canerecatie ejuu tibu.

⁵Tuhua aniya cuanaja jucha tu umada.

Yusu barepaju aniyaquetu nime aputataya ama tuna jidama juyaque.

Huecatanahuatu dutya tume cuanaque.

⁶Neacue tumeque epu aridaju aniya cuanaque, peya cuana tunara ahua bae.

Pea cuana tuna nerecaturahua bucha, dyaque ecana nenerecaturacue tunaja jucha tibu.

Pea cuana tuna peya inime amerehua bucha, dyaque peya inime ecana neamerecua.

⁷Tumeque epu aridaju aniya cuanaque tuna casumiti arida juhua.

Jidama tuna anihua.

Dutyai jidamaque inime tsehue tuna jidadya jutidya anihua.

Tuna tuna dyaque jidama anihua.

Dyaque ecana nenerecaturacue.

Tumeque epuju aniya cuanaque tuna jadidya juya: ‘Riyadyapa ecuanaja huaraji dyaque casadaque buchique.

Ejaca ama ecuana.

Nerecada judadinime ama ecuana’ jadyatu juya Babiloniaju aniya cuanaque.

⁸Jadya tibudyatu juetibuque huecaca canerecati ishuhue.

Umada tuna majubuque.

Umada tuna peya inime jubuque.

Jetiama tuna ejacatilla jubuque.

Mije juatsu tuna dyaque nerecada jubuque.

Amena ishutu etiquira tillabuque epu.

Dyaque casada tu tumeque epu nerecaturadadiquique.

Tuquetu Yusu, Ecuana Cuatsashaquique”, jadya tuque bacacuare.

⁹Huaraji cuana peya yahua cuanaju dyaque arida cuanaque juchaju anihua cuanaque Babilonia juque ecuita cuana tsehue etsujequi cuana pana catsumeti ama juhua cuanaque tuna pau, peya inime jadya jubuque, tumeque epu ebariju ecuita cuana aniya cuanaque jiteque, epu tiruyaque huani netitsuraya baatsu. ¹⁰Epu japada tuna netibuque bajida juatsu, tuna dyadi nerecada eatananucaju. Quiqueterebuque tuna:

“Acue, nerecapane Babiloniaju aniya cuanaque.

Icuene tunajatu casa anihua.

Tumebaedya tunaja dutya tunara ai bijida bayaque anihua.

Muya jutidya tuna nerecada juya”, jadya tuna jubuque.

¹¹ Catyati puji cuana riyaque yahuaju cuanaque tuna tumbaedy a pabuque. Peya inime tuna jubuque tumeque epu ebariju aniya cuanaque jiteque. Tunara catyati ishu beya cuanaquetu aija quemitaqui ama jubuque. ¹² Riya cuanaque tunajatu catyati ishu bebahue jucuare tuhua: ai tsuje arida cuanaque —oro; metal dyaque tsuje aridaque plata bacani; tumu tiquida cuanaque, tumu tiqui pucacada tsuje aridaque perla bacani. Tumbaedy tunaja bebahue jucuare eju-tuqui cuana jidaque lino, seda jadya bacani, ejutuqui pude sehueque, tumbaedy pudedaque. Tumbaedy tunaja bebahue jucuare ai tsuje arida cuanaque —acui bape bape ijimeda cuanaque, marfil eaque, acui jida pijique, metal bronce bacani, fierro, marmol. Jetiama ai tsuje arida cuanaque tunajatu catyati ishu bebahue junenicuare tumeque epu ebariju.

¹³ Tumbaedy tunaja bebahue jucuare jetiama ai catyati ishu cuanaque ai earaqui bajeje ishu cuanaque, canela bacani, tumbaedy peya ijimeda cuanaque earaqui isha ishu cuanaque. Tumbaedy tunajatu bebahue jucuare catyati ishu muru ijimedaque, bape bape ijimee cuanaque ijimedaque mirra bacani, peya bape bape cuanaque. Tumbaedy tunaja bebahue jucuare iji ishu cuanaque, ara ishucuaque jadya —uva nacaca esanashaque, etseri, trigo, peya bape cuanaque pan ishu cuanaque. Tumbaedy tunajatu bebahue jucuare uu cuana. Bebahue tunaja jucuare uu cuana cabuti ishuque, uhuisha, cahuayu, tumbaedy caretu cuana. Tumbaedy tunajatu bebahue jucuare ecuita cuana chipiruda cuana queja catyati ishu; uu catyati eata bucha tunajatu acuare ecuita bucha ama.

¹⁴ Epu ebari tirutereya baatsutu catyati puji cuana qui-queterebuque:

“Dutya chipiruqui cuanara bijiserihua cuanaquetu aputaterehua.

Aputatere jidatu juhua dutya chipiru tunaja cabajejeti ishu cuanaque.

Ni eje tuputu rehua ejitaju junucaya ama”, jadya tuna jubuque.

¹⁵ Tuhua ai catyati juhua cuanaque, cachipirutihua cuanaque tuna tumeque epuju cajipetibuque ama. Japada tuna netibuque nrecada eatanauque mubatsu. Pabuque tuna. Peya inime tuna jubuque.

¹⁶ “Acue, nrecapane epu aridaju aniya cuanaque! Eputu jucuare epuna ejutuqui jida piji tsehue ecabajejeti bucha, tumbaedy ejutuqui pude sehueque, pudedada jadya tsehue, oro tsehue, tumu tiquida jida piji cuana tsehue jadya tsehue ecabajejeti bucha.

¹⁷ Yara tupuju tuque micuana aputahua dutya tsuje arida cuanaque”, jadyatu jubuque catyati puji cuana.

Dutya cuaba ebari cuana cueri cuanaja ecuaque eque cuaya cuanaque, tuhua mere juya cuanaque, tueque juneniya cuanaque jadya tuna epu japada netibuque. ¹⁸ Epu tiruyaque huani petatsu tuna quiquebuque: “Aijamatu peya epu riyaque epu bucha dyaque aridaque!” jadya tuna jubuque quique eque.

¹⁹ Muru tsehue tuna iyucaju capucatibuque, peya inime juyaque adebata ishu. Pabuque tuna. Peya inime tuna jubuque. Quiqueterebuque tuna:

“Acue, nrecapane epu dyaque aridaju aniya cuanaque!

Dutya ecua cuaba ebari metse cuanaque cueri cuanaja ecuaque eque cuaya cuanaque ecua cachipiruticuare catyati ishu cuanaque jetiama tumeque epuju beatsu.

Yaratupujutu dutya terehua.

Aputaterehua”,

jadya tuna jubuque.

²⁰ “Arep riyaque yahuaju cuanaque pau, peya inime jadya tumeque epu ebariju aniya cuanaque jiteque pa-ju ama bucha, micuana Yusuja cuanaque pureama juidya nejuque, tumeque epu eje bucha juya baatsu.

Pureama nejuque dutya micuana barepaju cuanaque, Yusuja ecuaisha cuanaque, micuana Yusuja quisarati cuejaqui cuanaque.

Yusuratu dyaque nrecaturaya tumeque epu aridaju cuanaque, tuhua aniya cuanara micuana jidama tsehue aniquerehua tibu”, jadyatu jucuare ejeque cuana.

²¹ Tumetu Yusu tsahuaqui casadara nityaturacuare tumu aridaque. Jucualetu tumu ebari erieri ishuque bucha. Casada tsehue huetsatsu tujatu marecuare cueri cuanaja ecuaqueju.

“Riyaque tumu cueri cuanaja ecuaqueju ijehue-tanahua bucha, jadyatu epu ebari Babilonia pana aputa jubuque.

Ni eje tupu ejitaju juishu amatu aputabuque.

²² Babiloniajutu chine, ni mere aninucabuque ama.

Ni ejeratu arpa ni rauta, ni corneta dudunucabuque ama.

Ni ejequetu tuja teeju mere, ni erierinucabuque ama.

²³ Ni ai huecatu ejitaju junucabuque ama riyaque epuju.

Ni eje tuputu huanequi, ahuequi jadya juya cuanaja chine sicacada junucabuque ama.

Icuene Babiloniajutu catyati ishu bequi juhua cuanaque tuna cachipirutinicuare, dyaque umada chipiru tumeque epu ebariju inacuare tibu.

Ecuita inime metse cuanaque tuna jubarecuare.

Tumbaedy Babilonia juque maru cuanaratu dutya yahuaju aniya cuanaque ijahue ahua tunaja maru tsehue”,

jadyatu jucuare Yusu tsahuaquique.

²⁴ Tumeque epuju cuanaratu jetiama iyehua Yusuja cuanaque, Yusu equeque quisarati cuejaqui cuanaque. Tumeque epuju cuanara Yusuja cuanaque iyeya baatsutu peya epuju cuanara tumbaedy iyecuare Yusuja cuanaque peya epuju cuanaque.

19 Jadya juatsu tuque bacanucacuare umadaque barepaju quiqueyaju etsuri jebuda tsehue:

“Aleluya!

Pureama mique ecua aya, Yusu!

Miquemi Ecuana Cuatsashaquique.

Miquemi Ecuana Inajacamerequique.

Dyaque jida taa mique.
Sumiya mique ecuanara.
Miquemi dutya casa tsehueque, Yusu ecuanara muiyaque.
² Miquemi cuji juya ama eje buchique inime tsehue.
Mira ecuana yuneri tuyuju eje bucha aya.
Miratu nerecada amerehua epuna decadeca aridaque tuja biji eque anihuaque.
Miratu nerecaturahua tumeque epuju aniya cuanaque, tunara Yusu merequi cuanaque iyehua tibu”, jadya tunajatu Yusu acuare.

³ Tume tuna jadya junucacuare:
“¡Aleluya!
¡Pureama mique ecuana aya, Yusu!
Tumeque epu tereyaque huani juyaquetu terenime ama”, jadya tunajatu Yusu acuare.

⁴ Tume beta tunca pushi earacana Yusu mui juya cuanaque, tumebaedy a pushi bape bape butsequinie cuanaque tuna chichucata juatsu huipuchitanacuare yahuaju cuita. Tume tunajatu Yusu tuja eaniqui cacuat-sashati ishuhu aniyaque muicuare.

—¡Jadidya paju! ¡Aleluya! ¡Pureama mique ecuana aya, Yusu! —jadya tuna Yusuja yacuaju jerucuare.

⁵ Tumetu bacataqui jucuare Yusuja eaniqui cacuat-sashati ishuhu eque etsuri jadya juyaju:
“Duty a mique merequi cuanarami pureama aya, Yusu.

Duty achaacha cuanara, ecapajiti esiri cuanarami pureama aya.

Duty micue yacuaju huipuchitana ishuhu aya cuanarami pureama aya”.

UHUISHA BUCHA IYETA E ATAHUAQUE tuja cuana tsehue caradatibuqueque

⁶ Tumebaedy a tuque bacacuare jetiama ecuita cuana quisaratiyaju, ena sicacada tuuuya bucha, tiritiyaju enara piyeyaju juya bucha. Jadya tuna jucuare:

“¡Aleluya!
¡Pureama mique ecuana aya, Yusu!
Miquemi enaruqui jutibunehua, Ecuana Cuat-sashaquique.
Miquemi Yusu Dutya Iyaquique, ecuanara muiyaque.
Necapureamaturatira.
Pureama nejura.

‘Dyaque jida, casada jadya taa mique’ jadya neara.

⁷ Dyaque jida ecuana, mira ecuana naruya tibu.
Pureama ecuana juya, mira ayaque baatsu.
Amenatu huecaca juetihua ‘UHUISHA BUCHA IYETA E ATAHUAQUE caquemitiyaque’ bacani.

Juetihuatu huecaca tuque tuja cuana tsehue cajacatinuca ishuhu ama.

Micue cuanaque tuna ecabajejeti quihuatiya miaqueja judiru ishuhu, epuna tuja yahuique juya tsehue cajipeti ishuhu ecabajejeti bucha.

⁸ Micue cuanaque tuna jutumeretahua ejutuqui jida pajadaque, tiquida, caquemitiyaque ejuta bucha”, jadya tunajatu acuare.

⁹ Tume Yusu tsahuaquira jadya acuare:

—Huenecue jadya: “Pureama paju UHUISHA BUCHA IYETA E ATAHUAQUE casitati ishuhu chine juyaju cuejatahua cuanaque”. Riyaque quisarati tu Yusu equeque cuitadya, —jadya tura acuare.

¹⁰ Tume tuque tuja yacuaju chichucata juatsu muicuare. Tume tura jadya acuare:

—¡Muiume ique! ¡Yusu peadya camadya muicue! Ique Yusu merequique nucadya. Ique, mique, umae cuana jadya buchique Jesús queja ecatyati cuanaque, tuaqueja nimee jujacahuaque ama, —jadya tura acuare.

Yuneri cuitadya Jesús queja ecatyati cuanaque, Yusu equeque cuitadya quisarati cuejaqui cuanaque tuna Jesúsja Espiritura tsumeya tuque cacuejamereti ishuhu.

Cahuayu paja dyaque eque junabuqueque

¹¹ Jadya juatsu tuque bacuare barepa epacashatana. Tumetu cahuayu paja ejitaju jucuare. Tuque dyaque eque junayaque tu TUYU, YUNERIQUE bacani. Jadya tujatu ebacani, tuyu narubuque, catibuque jadya jubuque tibu. ¹² Cahuayu paja dyaque eque jeyajatu yatuca tiquida jucuare, etiqui juyaya bucha. Tuja iyucaju tu anihua jetiama puja cuana, tuque ecuarique adebataqui juishuque. Ebacani ehue juhuaquetu tura camadya adebaya. ¹³ Tura ejutuqui jutuyaquetu jucuare ami tsehue epude. Tuja ebacanitu YUSUJA QUISARATI. ¹⁴ Yusuja cuanaque jetiama cati ishuhu ecabajejeti cuanaratu tupujudya acuare. Ejutuqui jida pajada, asicadama tsehue tuna ecajututi jucuare. Cahuayu paja cuana dyaque eque tuna jecuare. ¹⁵ Cahuayu paja dyaque equejatu ecuatsaju anicuare qiyeti ishuhu cuerudaque, tume tsehuedya Yusu adeba bae cuanaque sacuabare ishuhu. Tuja casa aniya tsehue tujatu narubuque. Uhuisha naruqui cuanaratu cuatsashaya muida tsehue uhuisha cuejataquima cuanaque; jadidyatu tura cuatsashabuque muida tsehue tuque muibacarama juya cuanaque. Uva caca tapapashatsu mere puji cuanara etisiu bucha, jadya tuna tura nerecaturabuque cuejataquima cuanaque. Jadya tuna Yusura abuque Dutya Casa Tsehuer a. ¹⁶ Tuja unaju, etsacaju jadya tu ehue jeeque ebacani CACUAT-SASHATI PUJI CUANA CUATSASHAQUIQUE, ECUARI CUANAJA ECUARI DYAQUE ARIDAQUE jadya.

¹⁷ Jadya juatsu tuque banucacuare Yusu tsahuaquique ijetiju netiyaju. Quiquecuare tujatu dutya upati jamani bucha cuanaque barepa juque:

—Nejecue. Necaradaticue Yusura earaqui bajejayaque ara ishuhu. ¹⁸ Ejetsunue ama tunajatu majutere ishuhu jucuare huaraji cuana, sudaru cuana cuat-sashaqui cuanaque, sudaru casada cuanaque, cahuayu cuana, cahuayu isaaniqui cuanaque. Dutya maju ishuhu ebacua, amena cuanaque, ecuita metsequi, metsema cuanaque. Nejecue. Nearanacue tume emaju cuanaque, —jadyatu jucuare Yusu tsahuaquique.

¹⁹ Tume tuque bacuare Mapisi Ebari Jiuque, huaraji cuana Yusu muiba baecua cuanaque, tuna jiteque catiya cuanaque jadya. Duty a tume cuanaque tuna ca-

sitaticuare cati ishu, cahuayu paja dyaque equeque, tuja sudaru cuana jadya tsehue cati ishu. ²⁰ Tumetu Mapisi Ebari Jiuque, tumeque pusha pusha aridaque Mapisi Ebari Jiuja yacuaju inimeradya jutidya ai aqui juhuaque jadya risitanacuare. Tumeque pusha pusha aridaquetu junenicuare, turapa Yusu equeque cuitadya quisarati cuejaya jadya; tume taa jadique ama. Mapisi Ebari Jiuque, quisarati pusha pusha cuejaquique ecatsetu chacha iyemaque asufre tsehue etiqui jujuyaju ijehuetanacuare. ²¹ Peya cuanatu iye-cuare cahuayu paja dyaque equera tuja ecuatsaju qiyeti ishuque beta eque jacua tsehue. Dutya jamani cuanatu pana jeque jucuare tuhua emaju cuanaque aratsu.

1.000 maraju jubuqueque

20 Tume tuque banucacuare barepa juque Yusu tsahuaquique buteyaju. Inanityacuare tujatu emajaca dyaque aridaque pacasha ishuque, yatanana cuana Yusu muicarama juya cuanaque nerecaturadadi ishu juyaque ni eje tupu nerecada jujaca ishu ama. Tumebaedya tujatu inacuare Satanás risi ishuque. ² Yusu tsahuaquiratu nere inati acuare Matuja Ebari Jiuque, Mapisi Ebari Jiuque yahua nanadaju anicuaque. Tumebaedya tujatu peya ebacani "Ijahua", "Satanás" jadya. Peadya mil mara tuputu Satanás erisi jucuare. ³ Yusu tsahuaquiratu Satanás emajaca ebariju marecuare. Pana teri tujatu acuare etsecue ni ejeque cuinana ishu ama, tuja riyaque yahuaju aniya cuanaque ijahue anuca ishu ama peadya mil mara adadiya tupu. Chamacama peadya mil mara cuetihua-ju piisitu pisutanancabuque ejetsunue ishu ama. ⁴ Jadya juatsu tuque bacuare jetiama eaniqui cacuat-sashati ishu cuanaque. Tuhuadya tuna anibarecuare Yusura inime bajeje ishu casa tyahua cuanaque. Tumebaedya tuque bacuare Jesús quisarati yunerique Yusuja quisarati ejitaju ahuaque cuejaqui jucuare cuanaja yatanana cuana. Tuna tuna iyuca tubutsu iyetanacuare cuanaque, Yusuja quisarati cuejahu tibu. Tunaratu muicuar ama Mapisi Ebari Jiuque ni tuja cueya. Cahuenemereticarama tuna jucuare equetiju ni emetucuju Mapisi Ebari Jiuja ebacani. Bacuare tuque chacha junucayaju. Enaruqui tuna jucuare Cristo tsehue peadya mil mara tupu. ⁵ Tuna emajuque nityatsuratananucahuaju jadya juyaquedya tu icueneque emajuque netitsuranucayaque bacani. Peya emaju cuanaque tuna netitsurabuque peadya mil mara cuetihua-ju piisi. ⁶ Yusura emajuque icuene nityatsuranucaya cuanaque tuna dyaque jida pureama juya. Yunerique cuitadya tuna Yusu jaque. Tuna tuna maju beta ama jubuque, Yusuja ama cuanaque jubuque bucha ama. Yusuja, Cristoja pae tuna judadibuque. Riyaque yahuaju tuna peadya mil mara Ecuana Cuatsashaqui Jesús tsehue enarqui jubuque.

⁷ Peadya mil mara juhuajutu Satanás cadena tsehue erisique inajacatanabuque. ⁸ Tumetu cuinanancabuque dutya yahua juque ecuita cuana ijahue ara. Turatu ijahue abuque Yusu muiba baecua cuanaque,

Gogju, Magogju anicuar bae cuanaque. Satanasratu sitabuque dutya riyaque yahuaju cuanaque Yusu tsehue cati ishu. Yusu tsehue catibuque cuanaque tuna piyebatilla tupu ama. Cueri cuanaja ecuaque juque mejiji tsucaca bucha tuna piyebatilla tupu ama.

⁹ Tume tuna tsuracuare yahua quini eque ejeque ecuita cuana. Yusuja cuanaque ecasitatuque tunajatu tabucuar, tumebaedya Yusuja epu iyuhuedaque. Jadya baatsutu Yusura barepa juque etiqui pacacashacuare. Tumeque etiqui tsehue tuna Yusura pana pahua acuare tuja cuanaque tabuqui juhua cuanaque. ¹⁰ Ijahua tuna ijahue aquique bacue maretanacuare bei tupu arie etiqui asufre tsehue jujuyaju, Mapisi Ebari Jiuque ijehuetanahuaju, tumebaedya Yusuja quisarati cuejaquipa ejuu jadique pusha pusha aridaque. Tuhua tuna huecada tupu, meta tupu dutya mara ni eje tupu nerecada jujacaya ama.

Yusura emaju cuanaque eje bucha adadiyaque cueja

¹¹ Jadya juatsu tuque bacuare Dutya Ecuita Cuatsashaquique, eaniqui pajadaju aniyaju. Tuque baatsutu yahua, barepa jadya cuinanatsu huanacuare. Dadicuar ama tatse eju catehua ishuque. Huanacuare tatse tuja yacua juque. ¹² Tume tuque banucacuare emaju cuanaque umada —nanada cuanaque, ehue ebari cuana, esiri cuanaque jadya. Tuna tuna neticuar Yusuja yacuaju. Riyaque yahuaju tuna ai mere juya cuanaquetu ehue tumeque quiricaju. Tumeque quirica ecatsetu pacashatanacuare. Tumebaedyatu pacashatanacuare quirica Yusuja cuanaja dutya ebacani cuana ehue cuanaque ni eje tupu Yusu jaca ishu cuanaque ama. Yusura tuna peadya peadya eje bucha adadiyaque cuejacuar, tunaja mere eje bucha juhua eque, quiricaju ehue equedya. Tuja biji eque anihua cuanaque tujatu jida acuare. Tuja biji eque ama anihua cuanaque patu nerecaturacuare. ¹³ Cueri cuanaja ecuaque juquetu emaju cuanaque cuinanacuare. Tumebaedya emaju cuanaja eaniqui juque emaju cuanaque cuinanancuare. Yusuratu quisarati ejitaju acuare eje bucha peadya peadya judadiyaque tuna eje bucha anie, meree riyaque yahuaju juhua equedya aishu. Yusuja biji eque anihua cuanaque tujatu jida acuare. Tuja biji eque ama anihua cuanaque bacuetu nerecaturacuare. ¹⁴ Jadya juatsutu dutya emaju cuanaque, emaju cuanaque aniquique emajacaju cuanaque, ebacani Yusuja quiricaju cahuenemeretima cuanaque tuna ijehuetanacuare etiqui bei tupu arieju. Tuhuadya tuna nudyatanabuque ni eje tupu cuinana ishu ama. Riyaque canerecati tere ishuque ama tu maju beta ishuque bacani.

Barepa, yahua jadya iyacuaque judadiyaque

21 Tume tuque banucacuare barepa iyacuaque, yahua iyacuaque jadya, icueneque barepa, yahua jadya aputahuaju. Cueri cuanaja ecuaque bacue aputacuare. ² Bacuare tuque epu ebari Yusura cuita iyuhuedaque tura naruyaque, "Jerusalén Iyacuaque"

bacani. Yusu aniya equeque tuque buteyaju bacuare epu ebari barepa juque. Dyaque jida piji tuque bacuare. Epuna ahuequi juyaque ecabajejeti aniya bucha tuque bacuare. ³Tume tuque bacuare etsuri jebudaque Yusu aniya equeque.

—Neijacabacacue. Iyacuatu Yusu aniya ecuita cuana ducu. Tuna tsehuetu anibuque. Tunadya tuna tuja cuanaque jubuque. Yusu cuitadyatu tuna tsehue anibuque, tunaja mui ishu. ⁴Yusuratu tuja cuanaja paanacaca tillabuque. Majunucanime ama tuna; ni ejetu panucanime ama. Ni aijatu ai ujeda junucabuque ama, beru dutya ai eje bucha juhuaque cuetihua tibu, —jadyatu jucuare.

⁵Tumetu Dutya Cuatsashaqui Cuanaque Cuatsashaquique jadya jucuare:

—Pana ijacabaca acue. Eratu dutya ai aniyaque iyacuaque anucaya. Era quisarati ayaque hueneque. Riyaque ri yunerique. Dutyatu judadiya era quisarati aya eque, —jadyatu jucuare.

⁶Jadya juatsu tura anucacuare:

—Amena tu dutya ea. Idya dutya ai iyametsequi juhuaque, dutya ai tilladadiqui juyaque jadya, letra A-Z jadique bucha. Ique Yusu eje bucha adebameree aishuque. Ejera ni yuneridya eje buchadya adebacara ebari aya, eratu tsujema adebamereya. Ijira majuyaque ena ijitsu ejuu buchatu jida ecabatiu. ⁷Ejeque eaqueja nimee jujacacarama juyaque, eratu tyaya dutya jidaque tyacara ayaque. Ique tunara Yusu muiyaque juya. Tuna bacue ecue ebacua cuana.

⁸“Riya cuanaquetu nerecada jujacabuque ama etiqui bei tupu arie asufre tsehue jujuyaju: bajida juatsu ique jacaqui juhua cuanaque; eaqueja nimee jujacahua cuanaque; dutyaju jidama juhua cuanaque; quieti puji juhua cuanaque; ecuita cuana ehuaneeque neri jipidya tsehue ama jucha juhua cuanaque; caquemitiquiremaque jaraquerehua cuanaque; maruhuisa cuana; jatsura puji cuana; yusu cueya cueya muiqui juhua cuanaque; dutya pusha pusha arida juhua cuanaque jadya. Tuna tuna nerecada jujacabuque ama etiqui bei tupu arieju. Tuhadya tunajatu maju beta ishuque, tuhuaque cuinanancaya ama tibu, —jadya tura acuaque.

Jerusalén epu iyacuaque

⁹Tumetu jecuare Yusu tsahuaquique camadya ishuque ujeje canerecati ishuque eaniqui juque yahua-ju ijehuequique.

—Jecue. Bamereya mique era, ahuequi juyaque UHUISHA BUCHA IYETAETAE ATAHUAJaja ehuaneeque buchique, —jadya tura acuaque.

¹⁰Yusuja Espiritura petamerecuare tahuiju bucha. Yusu tsahuaquira tsuraquerecuare emata dyaque barudaju. Tura bamerecuare Jerusalén epu ebari Yusu jaque. Tumeque epu tuque buteyaju bacuare barepa juque Yusuja yacua juque. ¹¹Tumeque epu ebarijutu Yusuja huecara tiqida amerecuare. Tumeque huecatu jucuare tumu dyaque jida pijija hueca bucha, tumu jaspe bacani bucha. Cristal ude tsehue udatsu hueca

ecuetiu bucha cuetie tujatu hueca jucuare. ¹²Eputu etachi etibarilla jucuare baruda. Peadya tunca beta earacana tujatu etsecue anicuare. Dutya etsecue cuana-ju tu netibarecuare peadya Yusu tsahuaqui cuanaque. Peadya tunca beta earacana cuare israelita cuanaja ebacanitu ehue ne jubarecuare dutya etsecue cuanaju. ¹³Anicuaretu quimisha etsecue ijete cuinanaya queja amaca, quimishadya ijete nubiya queja, quimisha nei diji queja, quimisha beni diji queja amaca jadya. ¹⁴Epu tibarilla ishuquetu ea jucuare peadya tunca beta earacana tumu dyaque. Tumeque tumu cuanajutu peadya tunca beta earacana UHUISHA BUCHA IYETAETAE ATAHUAJaja ecuadisha cuanaja ebacani cuana ehuebare jucuare.

¹⁵Yusu tsahuaquique eatsehue quisaratiyatu anicuare sari oro eaque. Tume sari tsehue tujatu epu ebari tuputaqui jucuare, tumebaedya etsecue, epu penequique jadya. ¹⁶Eputu tsucu pushi jucuare. Junu, quini, jadya tujatu jucuare dutya tupu. Jadyatu barepa juque Yusu tsahuaquira tupucuare tuja sari tsehue. Baru, quini, junu jadyatu epuja dutya tupu jucuare; beta mil beta ciento kilómetro tujatu dutya eque amaca jucuare. ¹⁷Tuequedya tujatu tupucuare epu tachiquique. Shucuta tunca pushi earacana metrotu jucuare baru epu tachiquija. Ecuana medida tsumeya tsehuedya tujatu tupucuare.

¹⁸Tumeque epu tachiquique tu tumu eaque jaspe bacani. Eputu oro ujamaque neri jucuare, vidrio bae huecae. ¹⁹Epura tumu cuana ebajejeque isaaniyaquetu jucuare dutya bape bape cuanaque tumu jida piji cuana tsehue. Jadya bacanietu tumu cuana jucuare: jaspe, zafiro, ágata, esmeralda, ónice, cornalina, crisólito, berilo, topacio, crisoprasa, jacinto, amatista jadya.

²¹Peadya tunca beta earacana etsecue tu tumu tiquidaque perla bacani eaque. Dutya etsecue eaquetu peadya perla eaque camadya jucuare. Epu patyaque ediji dyaque icueneque tu oro neri, ena bucha huecaequi.

²²Tumeque epu ebarijutu aijama etare Yusu mui ishuque cuita camadya. Dutya quejadya jutidyatu aniya Yusu Dutya Iyaquique, UHUISHA BUCHA IYETAETAE ATAHUAQUE jadya ecatse mui ishuque. ²³Tuhuatu saretanaya ama ijete ni badi epu uda ishu, Yusuja huecaradya jutidya epu udaya tibu. UHUISHA BUCHA IYETAETAE ATAHUAQUE tu eudaquique. ²⁴Tuja huecaratu huecatillabuque dutya tuhua aniya cuanaque. Riyaque yahua juque huaraji cuana, arepa tuna mui pureama jadya eatau ama bucha tunajatu Yusu, UHUISHA BUCHA IYETAETAE ATAHUAQUE jadya mui, pureama jadya amerebuque. ²⁵Riyaque yahua juque ecua epu cuanaju eteriqui cuana teriya apunayaju. Tuhuatu aijama teri ishuque, apuna baecua tibu. ²⁶Riyaque yahua juque cuanaque tuna jutibuque tuhua Yusu pureama, mui jadya aishu. ²⁷Nubibuque amatu tuhua, ni ai quibetimaque, cabajejetimaque. Nubibuque amatu ni ejeque Yusuja biji eque ama aniya cuanaque, ni ejeque jidamaque ni pusha pusha aridaque. Yusuja quiricaju ebacani ehue ne aniya cuanaque cuita camadya tuna

nubibuque, dutya ebacani eiya cuanaque Yusu queja judiru ishu ni eje tupu jaca ishu ama. Tumeque quirica tu UHUISHA BUCHA IYETAE ATAHUA jaque. Tume cuanaque cuita camadya tuna Yusuja epu ebariju nubidirubuque.

22 Tuequedya tura bamerecuare cueri jida huecadaque. Tumeque ena ijitsutu maju baecua ishuque. Tumeque cueritu cristal bucha huecae jucuaire. Cuinanacuaretu Yusuja, UHUISHA BUCHA IYETAE ATAHUAja eaniqui cacuatsashati ishu equeque. ² Epu patya equetu juricuare ediji dyaque tsumetanaya eque. Cueri macare beta eque tu acui huijacuare ecuanaju maju baecua amerequique. Dutya baditu cacacatiya, maraju, badiju, badiju cama. Tumeque acuija ejaqui tu jida dutya yahuaju aniya cuanaque sama ishu. ³ Tuhatu amena aijama jidamaque. Yusu, UHUISHA BUCHA IYETAE ATAHUAQUE jadya tatse huaraji dyaque muidaque tumeque epu ebari juque. Tatse merequi cuanara tatse pureama abuque. ⁴ Babuque tunajatu Yusuja ebutsequini. Equetiju tunajatu ehue juque Yusuja ebacani. ⁵ Tuhatu apuna baecua jubuque. Tuhua aniya cuanaratu sarebuque ama ude, lámpara ni ijjetija uda ishu, Yusu ecuanaja Huaraji Dyaque Aridara udaya tibu. Tuhua aniya cuanaque tuna dutya mara mara enaruqui jubuque.

Jesucristo junanucayaque amena piji dyaneque

⁶ Jadya juatsu Yusu tsahuaquira jadya anucacuare: —Riyaque quisarati cuana ri yunerique. Dutya mira quisarati bacaya equedyatu judadibuque. Yusratu cuejaya tuja quisarati cuejaqui cuanaque tuna eje bucha quisarati ishu. Tudyatu ecuanaja huaraji dyaque aridaque. Tumbaedyu tujatu cuadishacuare tuja etsahuaqui, masadama eje bucha judadiyaque bamere ishu, —jadya tura acuare.

⁷ Jesústu quisaraticuare: —Masadama junanucaya. Riyaque quiricaju ri ehueene eje bucha judadiyaque. Dyaque jida tu riyaque quiricaju ehueene eque aniya cuanaque, —jadyatu Jesús jucuaire.

⁸ Era Juanradya tuque bacacuare, bacuare jadya dutya riya cuanaque. Pana baca aatsu, baatsu jadya chichucata jucuaire Yusu tsahuaquique ique dutya petamerequija yacuaju, tuque mui ishu.

⁹ —Jadya juume. Muiume ique. Mique bae Yusu merequique jutidya ique. Dutya ecuanaja Yusuja quisarati cuejaqui cuanaque, riyaque quiricaju ehueene cuanaque muibaqui cuanaque ecuanaja Yusu merequi cuanaque. Yusu peadya camadya muicue.

¹⁰ Tehuame riyaque quiricaju mira huenehuaque. Tsunutaya ama tu quisarati ehueene eque judadi ishuque. ¹¹ Jadya juya tupu ejeque jidamaque, jidamadya paju. Cuejataquima aniyaque, cuejataquimadya paju. Ejera jidaque ayaque, jidadya paju. Yusuja cuanaque jida, tuyu Yusuja biji eque paanijaca amadya, —jadya tura acuare.

¹² Jesústu quisaratinucacuare:

—Neadebacue bacue ique masadama junanucayaque. Tyabarenaya tuna etsujequi peadya peadya tuna eje bucha mere juhua eque. Yusuja biji eque anihua cuanaque tuque jida abuque. Tuja biji eque ama anihua cuanaque tuna nerecaturabuque. ¹³ Ique dutya ai iyametssequi juhuaque, dutya ai tilladadiqui juyaque jadya. Eradyatu dutya iyahua catibuti ishu. Eradyatu dutya tillanucaya. Ique letra A-Z buchique, —jadyatu jucuaire.

¹⁴ Dyaque jida taa jucha cuana caapupashameretihua cuanaque. Jutu ishuque asicadaque ecutsatiu bucha, jadya secae tuna Yusura dutya asicadaque ahua. Yusura tuna nudyatsabuque tuja epu tsecue eque tuque aniyaju, acui caca maju baecua juishuque ara ishu. ¹⁵ Yusu badirubuque ama Yusu adeba baecua cuanara, dutya jidaque bijidamaduraqui cuanara, maruhuisa cuanara, jatsura puji cuanara, tunaja caquemitiqueremaque jaraquereya cuanara, puna puna, decadeca jadya juya cuanara, quiyeti puji cuanara, yusu cueya cueya eaque muiqui cuanara, dutya pusha pusha tsehue eje buchique ejenemerequi cuanara. Jadya cuanaratu Yusu badirubuque ama.

¹⁶ Jesústu quisaratinucacuare:

—Ique Jesús. Eradya tuque ecue ique tsahuaquique barepa juque cuadishahua dutya eaqueja ecatyati cuanaque bahue amere ishu. Ique ecuari David eque eju-racanaque, icuene israelita cuanaja ecuari jucuaireque. Ique apudajudya purari ebari cuinanayaque tiquie buchique, —jadyatu jucuaire Jesús.

¹⁷ Yusuja Espiritura, tumbaedyu UHUISHA BUCHA IYETAE ATAHUAja ehueeneque bucha cuanaratu Jesús jadya aya:

—Jecue.

Ejera pana ijacobaca ayara neacue Jesús:

—Jecue.

Ejeque Yusu queja judirucara juyaque tuaqueja pa-judiru. Jesucristo queja catyatsutu yuneri tsujema einajaca juishuque, Ijahuaaja etiquiju enubidiruuque. Ejeque ijicara juyaque, jecue. Tsujema ijinacue ena maju baecua ishuque.

¹⁸ Ejera isarayaja isara ishuque ri riyaque quirica. Ejera ni adaya quisarati rehua ehueeneque, Yusratu nerecaturabuque ujeje canerecati ishuque riyaque quiricaju ehueene tsehue. ¹⁹ Riyaque quiricajuri ehueene dutya jidaque Yusu adebaqui cuanaque eje bucha judadibuqueque. Ejera ni secaya riya piji Yusuja quisarati riyaque quiricaju ehueeneque, Yusratu tuaqueja judirushaya ama ni tuja epu ebariju. Tumeque ecuitatu Yusuja epu Jerusalén iyacuaque bacaniju anidirubuque ama.

²⁰ Riya cuanaque cuejaquiquetu jadya juya:

—Jee, masadama junanucaya, —jadyatu juya Jesucristo.

—¡Jadidya paju! Jecue, Ecuana Cuatsashaquique Jesús, —jadya ique juya.

²¹ Ecuana Cuatsashaqui Jesucristora jida tsehue nenarucue peadya peadya tuja quiyuhuebati tsehue. Jadidya paju.

Riya tupu camadya.

Juan